


Niospa meka fena
Jesucristoñoa



New Testament in Yaminahua (PE:yaa:Yaminahua)

Niospa meka fena Jesucristo^{noa} New Testament in Yaminahua (PE:yaa:Yaminahua)

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaa], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 22 Feb 2024 from source files dated 29 Jan 2022
6c7b7ce2-9d87-5405-91e6-71ce1387adcc

Contents

MATEO	1
MARCOS	63
LUCAS	98
JUAN	159
LOS HECHOS	202
ROMANOS	255
1 CORINTIOS	284
2 CORINTIOS	315
GÁLATAS	333
EFESIOS	343
FILIPENSES	353
COLOSENSES	359
1 TESALONICENSES	365
2 TESALONICENSES	370
1 TIMOTEO	373
2 TIMOTEO	381
TITO	387
FILEMÓN	391
HEBREOS	393
SANTIAGO	415
1 PEDRO	423
2 PEDRO	431
1 JUAN	436
2 JUAN	443
3 JUAN	444
JUDAS	445
APOCALIPSIS	448

Mateo Jesúsnoa Yoikĩ Keneni

Jesucristo áfe xinifáfe anefo

(Lc. 3.23-38)

¹ Ë mato yoinõ a taeyoi ipaonifo Jesucristo áfe xinifo. Jesucristo áfe xini David. Nã David áfe xini Abraham. Nãfo Jesucristo áfe xinifo taeyoi iyopaonifo.

² Nã Abraham áfe fake Isaaca ini. Isaaca áfe fake Jacobo ini. Jacobo fake Judá ini. Áfe extofori ini. ³ Judapa fake Fares fe Zara ini. Áto afa Tamar ini. Fares áfe fake Esrom ini. Esrom áfe fake Aram ini. ⁴ Aram áfe fake Aminadab ini. Aminadab áfe fake Naasón ini. Naasón áfe fake Salmón ini. ⁵ Salmón fake Booz ini. Booz áfe afa Rahab ini. Booz áfe fake Obed ini. Obed áfe afa Rut ini. Obed áfe fake Isai ini. ⁶ Isai áfe fake xanifo David ini. Xanifo David áfe fake Salomón ini. Salomón áfe áfa fene fetsaya iyopaoni, Urias.

⁷ Salomón áfe fake Roboam ini. Roboam áfe fake Abías ini. Abías áfe fake Asa ini. ⁸ Asa áfe fake Josafat ini. Josafat áfe fake Joram ini. Joram áfe fake Ozías ini. ⁹ Ozías áfe fake Jotam ini. Jotam áfe fake Acáz ini. Acáz áfe fake Ezequías ini. ¹⁰ Ezequías áfe fake Manasés ini. Manasés áfe fake Amón ini. Amón áfe fake Josías ini. ¹¹ Josías áfe fake Jeconías ini; áfe extofori ini. Mã Jeconías rama xanifo ikaino, Babilonia anoxõ xanifáfe áfe sorarofõ nĩchini israelifo ato ifitanõfo anã ato yonomaxikakĩ. Mã sorarofáfe ato ifitanaifono israelifo Babilonia ano fonifo. Jeconíasri iyonifo. Jeconías áfe extofori kainifo.

¹² Nãskata Babilonia anoax fake fetsafori kainifo. Jeconías áfe fake Salatiel ini. Salatiel áfe fake Zorobabel ini. ¹³ Zorobabel áfe fake Abiud ini. Abiud áfe fake Eliaquim ini. Eliaquim áfe fake Azor ini. ¹⁴ Azor áfe fake Sadoc ini. Sadoc áfe fake Aquim ini. Aquim áfe fake Eliud ini. ¹⁵ Eliud áfe fake Eleazar ini. Eleazar áfe fake Matán ini. Matán áfe fake Jacobo ini. ¹⁶ Jacobo áfe fake José ini. Nã José áfe áfi ini, María. Nã María fake ini, Jesús. Jesús áfe ane fetsa Cristo ini.

¹⁷ Abraham áfe fenafo ichapa ini, nã David kainitĩa catorce inifo Abraham áfe fenafo. Askatari nã David áfe fenafo ichapa ini. Nãskano David áfe kaifo yora fetsafáfe Babilonia ano ato iyonifo ato yonomaxikakĩ. Babilonia ano ikanax David áfe fenafo catorce inifo. Askatari David áfe fenafo Babilonia anoax anã fenifo áto mai ano. Mã fenixakakĩ David áfe fena fetsafori kainifo catorce inifo. Askatari Cristo kaini.

María Jesucristo kãini

(Lc. 2.1-7)

¹⁸ Ë mato yoinõ ea nikakapo afeskax Jesucristo kãinimakĩ. José fe María yoinãyonifo fianãxikakĩ. Fianãyofafomano Niospa Yõshi Sharapa María fake nanemani. ¹⁹ José Nios Ifofasharakõiax sharakõini. Nãskaxõ José María yõpáinima yorafáfe ferotaifi. Fomãxopaoni. Nãskaxõ tsoa yoixoma José María enepaini. ²⁰ Nãskano José áfe namapa õini Niospa áfe ájirinĩ yoiato. Yoikĩ iskafani: “José, rateyamafe María fe fianãxiki. Na fake nanea Niospa Yõshi Sharaõõ akaki. ²¹ María fake feronãfake fii kiki. Mĩ anekĩ Jesús faxikai. Nãato ato ifipakenakaki. Nãskaxõ afe yorafo áto chaka soaxoxii kiki ato nimapakexakĩ,” ixõ ájirinĩ José yoini.

22-23 Chanĩmakõĩ nãskakõĩ nã Nios yoimisto yoini keskarakõĩ. Iskafakĩ kirika keneyoni Niospa shinãmanaino:

Kẽro xotofake feronãfake fe imisma fake onixii. Fake feronãfake fixõ anekĩ Emanuel faxii, ixõ yoini. (Akka nõko mekapa Emanuel fakĩ, “Nios nofe ika,” ixõ nõ yoimis.)

24 Mã ajirinĩ yoiano José moinãkafani. Nã ajirinĩ yoia keskafakĩ, José María fini. Mã fixõ afe pexe ano yoini. 25 Mã afe fĩanãx afe chotanãnima afe fake kãiyonõ. Mã fake kãiano anekĩ Jesús fani.

2

Feronãfakefo fishi tãpikõimisfo a xini oaikirinoax mai fetsa anoax Jesús õipai fenifo

1 Herodes xanĩfo ikano Jesús kãini Belén pexe rasi anoax, Judea mai anoax. Nãskano a xini oaikirinoax mai fetsa anoax feronãfakefo fishi tãpikõimisfo fenifo Jerusalén ano. 2 Nokotoshikaxõ yõkanifo: “¿Fanĩmẽ a rama kãia judeofãfe ãto xanĩfo ikai? Mã nõ õia afe fishi oaito. Nãskakẽ nõ oa Jerusalén ano xanĩfo õiyoi. Nõ akiki inimai nõ oa, ‘Mĩ nõko xanĩfokõĩ,’ ixõ yoipaikĩ,” fanifo.

3 Askafaifono fetsafãfe yoiaito nikakĩ Herodes shinãchakakõini xanĩfo iki kiki ixõ. Askatari keyokõĩ Jerusalén anoafãferi shinãchakakõinifo. 4-5 Akka Herodes judeo inima. Nãskaxõ ato kenamani a ato Nios kifixomis afe xanĩfofo fenõfo ato yõkaxiki. Askatari a Moisés yoikĩ kirika kenenĩ keskara ato tãpimamisfo ato kenamani ato yõkaxiki. “¿Fanĩax Cristo kãixiimẽ?” ato faito kemanifo iskafakakĩ: “Belén anoax iki, Judea mai anoax,” fanifo. “Niospa meka yoimisto nãnori kirika keneyoni a inõpokoai yoikĩ Niospa shinãmanaino. Iskafakĩ kenenĩ:

6 Belén, Judã mai anoax pishtakõĩ. Akka pexe rasi fetsafo efapakõifo. Askafax Belén sharafinakõia ixii mãmãĩ israelifo ãto xanĩfo finakõia kãixiaino Belén anoax. Nãskakẽ afe inakõifo israelifo ãto xanĩfokõĩ ixii, ixõ kirikaki kenenĩ Niospa meka yoimisto Niospa shinãmanaino,” fanifo.

7 Nãskakẽ Herodes a fishi tãpimisfo ato yõkani onexõ tsõa nikayamanõ: “¿Afetĩa fishi mã õitamẽ?” ato fani. 8 Nãskaxõ ato nõchini Belén ano. Herodes tãpipaikĩ, “Belén ano fotakãfe a fake tãpixikakĩ. Mã fichixõ ea yoifexikakĩ ãri akiki inimaikanõ,” ato fani ãa ato pãrakĩ.

9 Ato askafaino fonifo. Fokakĩ fishi rekẽ kaino chĩfafainifo. Nãskax fishi nẽteni nã fake yome ano. 10 Nã fishi anã õikanax inimakõinifo. 11 Nãskakanax pexe mẽra ikifaikaxõ fake yome fichinifo afa María yafi. Mã fichikaxõ ratokonõ mai chachipakefõfãnifo, a fakeki inimakakĩ. Nãskakaxõ ãto kafo fẽpekaxõ afama mĩshti sharakõifo Jesús inãnifo. Oro minikãta, pirofomãri mininifo a nõ koofatiro pirofomã nakas sharakõĩ. Askatari pirofomã fetsari afe ane mĩra inãnifo. 12 Nãskakẽ namakẽ Niospa ato yoiano anã Herodes ano fonifoma. Fai fẽtsa fonifo ãto mai ari.

María feta José Jesús ichokinifo Egipto mai ari

13 Askata a fishi tãpimisfo mã foaifono, José namakẽ, Niospa afe ajirinĩ yoini: “Moinãkafafe. Mĩ ãfi feta mĩ fake yome ichokitãfe Egipto mai ari. Nãri ikiyoxiki nã ã mato yoiano mã anã onõ. Herodes na fake yome fenai kiki retepaikĩ,” Niospa ajirinĩ José fani namakẽ.

14 Nãskata moinãkafata, nã fakishi fonifo María fe José ãto fake Jesús iyoi fokani Egipto ano. 15 Egipto ano José fe María ipaonifo mã Herodes naano fexixakakĩ. Nãskakẽ Egipto ano iyopaonifo. Niospa meka yoimisto nãnorikõĩ

kirika keneyoni Niospa shināmanaino iskafakī: “Ēfe fake ē kena Egipto anoa,” ixō Niospa meka yoimisto kirika keneni.

Fakefo retenōfo Herodes ato manamani

¹⁶ Fishi tāpimisfo Herodes fomākani. Fai fētsa foafono nikai, Herodes oitifishkikōini. Fishi tāpimisfāfe taeyoi Herodes yoionifo ato yōkaito iskafakakī: “Afeṭiama nō nā fishi ōikī taefati, mā xini rafe aka,” fanifo. Nāskakē Herodes sorarofa ato manamani fake feronāfake xini rafe akafo, yome mīstifoya ato retenōfo, Belén anoafo retékāta, a Belén pasotai ikafori ato retenōfo. ¹⁷⁻¹⁸ Nāskara taeyoi Jeremías Niospa shināmanaino kirika keneyoni a inōpokoai yoikī. Iskafakī keneni:

Ramā anoxō nikanifo fāsikōi oiaifono. Raquel oiaito nikanifo āfe fake manoi, mā āfe fake nano. Oiyayamafe fafiaifono nishpanima, ixō Jeremías keneni.

Nā Jeremías yoini keskara mā askakōia.

¹⁹ Mā Herodes naano Niospa ājirinī afianā José yoini namakē iskafakī: ²⁰ “Moinākafafe. Mī āfi feta mī fake iyotaxiki Israel mai ano. A fake yomefo retepaimisfo mā naafoki,” fani.

²¹ Nāskafaino moinākafani José. Āfe āfiri mōini āfe fake yafi. Nāskakanax Israel ano anā fonifo. ²² Mā fōkakī nikanifo ato yoiaifono Herodes fake Arquelao mā xanīfokē Judea anoax. Nikai José rateni Judea ano kapai. Nāskaito anā ājirinī José yoini namakē iskafakī: “Galilea mai ano katāfe,” fani. Nāskafaino fonifo Galilea ano āfe āfi fe Jesūs iyokani. ²³ Nāskax nokonifo Nazarete pexe rasi ano. Nāno inifo. Nānori taeyoikōi Niospa meka yoimisfāfe yoionifo, “Cristo Nazarete ano imis,” fakakī, a inōpokoai yoikakī. Nāskakōini.

3

Juan Maotista tsōa istomaxō ato yoini (Mr. 1.1-8; Lc. 3.1-9, 15-17; Jn. 1.19-28)

¹ Jesús Nazarete ano ikano Juan ato maotisafapani tsōa istoma ixō Judea mai anoxō. Nānoxō Niospa meka ato yoipaoni. ² Nānoxō ato yoipaoni iskafakī: “Yorafāfe, anā Nios shinākāfe. Māto chaka xatekōikāfe, a mā chakafamis shināmakikāfe. Niospa meka nikakōikāfe. Mā chaima nōko Ifo Nios oi kiki nōko xanīfo finakōia ixii kiki,” ixō Juan ato yoipaoni fāsikōi.

³ Isaías kirika kenekī yoionyi a inōpokoai yoikī Niospa shināmanaino. Iskafakī yoini:

Tsōa istoma anoxō yorafo yoixii akiki feaifono. Iskafaki ato yoixii: “Mā nōko Ifo oi kiki. Nāskakē itipinīsharakāfe. Āfe fai sharafaxokāfe. Māto chaka xatekāfe,” ixō ato yoiaito nikaxikani, ixō Isaías kirika keneyoni Juanoa yoikī.

⁴ Akka Juan āfe rapati kamīcho fichi kishi faxō safepaoni. Āfe sītorari fichi koiro safepaoni. Nāskaxō tseo pipaoni, fonari apaoni. ⁵ Nāskano Jerusalén anoafo yafi Judea anoafo fenifo Juan nikai fekani. A faka Jordán chaima ikafori fenifo. ⁶ Mā fēkaxō Juan yoinifo a afara chakafamisfo. Nāskaxō āto chaka xatepaiyaifono Juan ato maotisafapani faka Jordán anoxō.

⁷ Nāskafifono fariseofo xanīfo metsamafo feaifono, saduceofo xanīfo met-samafori fenifo Juan ano. Ichapakōi fenifo, “Nokori Juan nashimanōra,” ikanax. Juan ato ōikī ato iskafani: “¿Afeskai mā ea ano oimē? ¿Ē mato maotisafapanō mā oimē? ¿Tsōa mato yoiamē? Mā shināiraka nō chiifā mēra

katirora ixō nāskax mā maotisapaimē, nō chiifā mēra kayamanōra ikax. Maa, mā kai afaa tāpiama, askax mā maotisatiroma. Mā Nios Ifofaima. Mā oa shano keskara mato ōiti chakakōi. Nāskaxō mā Satanás ifofaa. Nāskakē kaxpa ē mato maotisafatiroma māmāi Satanás fisti shināito. Āa fētsa mato pāratiro nō maotisanō nō chiifā mēra kaimakai Nios nikayamafix ixō mato pārano mā chiifā mēra katiro fetsa afaa tāpiamato mato pārano. Askara Niospa mato ifitiroma mā kairoko shināito, ēroko mato maotisafaano. ⁸ Māto chaka xatekāfe, Nios shinākāfe. Mā Nios shināito ē mato maotisafapakai. ⁹ Ē mato anā yoinō nikakapo. Mā shinātiro: ‘Nā Abraham nōko xini ipaonī, ōiti sharayaxō Nios shināpaoni.’ Akka mā shinākī: ‘Nōmāi Abraham fenaxō nō shara shināi,’ ixō mā shinākī mā shināsharaima. Askara shināyamakāfe. Akka māto ōitinī mā chaka shināfi mā chanī. Nikasharakōikāfe, ē mato yoinō. Na tokiri Niospa onifaxō nīchikē mā ōitiro Abraham āfe fena inō. Nāskakanax Abraham fakefo itirofo na tokiri ōikī Nios shinākanax. Akka mā kai anori shināima mā mā chanī: ‘Abraham shināpaoni keskara nō shināira,’ ikax. Askara shināyamafi Satanás fisti ifofafai. ¹⁰ Akka fana fimiyamaito ifāfe reratiro. Āfe taporī tsexaxō koofatiro anā niyamanō. Nāskarifikī mā Nios nikakaspaito a omiskōipakenakafo mēra Niospa mato potaxii mā chaka xateaxma mā isharayamaito. ¹¹ Nāskakē ē mato maotisafai māto chaka mā xatepaiyaito Nios Ifofapaki. Akka nā ea keskarama mā chaima oi kiki, nā sharafinakōia. Aato afama mīshti fatiro, ē atiroma keskara. Akka ē afaama. Mā Nios chanīmara faino aato āfe Yōshi Shara mato mēra naneyoi. Akka tsōa Nios chanīmara fayamaito, Niospa mato omiskōimaxii. ¹² Akka yōra āfe tarepa aros fanaxō mā pachiano topitiro. Nāskaxō katotiro a sharafo fixō a chakafo potaxō koofatiro. Nāskarifikī a chipo oaito a chanīmara faafo yafi a nikakaspamisfo ato paxkanāfaiyoi. Nāskaxō a chanīmara faifo a ika ano ato iyoxii afe isharapakexanōfo. Akka nā nikakaspamisfo chiifā mēra ato potano anoax omiskōipakenakafo. Chiifā mēranoax omiskōi xatenakafoma,” ixō Juan ato yoini.

Juan Jesús maotisafani faka Jordán anoxō
(Mr. 1.9-11; Lc. 3.21-22)

¹³ Askata Galilea anoax Jesús kani faka Jordán ari Juan maotisafanō.
¹⁴ Akiki nokoaino Juan Jesús iskafani: “Jesús, ¿afeskakī ē mia maotisafatiromē? Akka mīroko ea atironō,” fani.

¹⁵ Askafaino Jesús kemani iskafakī: “Epa Niospa noko yoia keskara keyokōi nō nikakōitiro. Nāskakē ea mīa maotisafatiro,” fani.

Jesús askafaino, Juan Jesús maotisafani. ¹⁶ Nāskata Jesús faka mēranoax fininākafānaino nai fepekemetani. Ariax Niospa Yōshi Shara akiki fotoni, oa rifi keskara Jesús ōiaino. ¹⁷ Askaino nai mēraxō Āpa yoiaito nikani iskafaito: “Mī ēfe Fakekōi ē mia noikōi. Ē mikiki inimasharakōi,” ikaito nikanifo.

4

Satanás chakata Jesús afara chakafamapaini
(Mr. 1.12-13; Lc. 4.1-13)

¹ Nāskaino Niospa Yōshi Sharapa Jesús iyoni tsōa istoma anoxō Satanás afara chakafamapainō.

² Mā cuarenta nia oxax Jesús fonāikōimi afaa pishta piyamax. ³ Nāno Satanás akiki nokoni. Mā akiki nokoxō ifofamapaini. Askatari chakafamapaini. Iskafakī yoini: “Mī Niospa Fakemākī na tokirifo pāa fapo,” fani.

⁴ Askafaito Jesús kemani: “Maa, na mī ea yoiyai keskara ē akima. A nō piai fisti nō shināima nipaikī. Akka Epa Niospa āfe meka fisti shara nō shinātiro. Nāskara Niospa meka yoimisto keneni,” Jesús fani.

⁵ Jesús askafaino Satanás iyonī Jerusalén ano a Nios kīfiti pexefā māmākīa. ⁶ Nānoxō yoini iskafakī: “Mī Niospa Fakekōiaxroko mī niriax ichopakekafanikai. Mī ichopakekafanax mī afeskaimakai. Nā Niospa meka kirikaki keneaki isakai: ‘Niospa āfe ājirifo yoixii mia kexenōfo.’ Askatari kirika keneano iskaki: ‘Mī āto mifiki pakeaito mia achixikani kiki mī tokiriki pakenōma,’ kirika kenea iskaki,” Satanás Jesús fani.

⁷ Askafaito anā Jesús kemani: “Akka na kirika keneano yoinifo iskafakī Niospa meka: ‘Nōa nō meka fetsafaxō nō yoitiro: “Ē afara afeskarafaito, ea Niospa kexei,” ixō nō shinātiro. Akka, “Niospa ea amapaiyai keskara nā fisti ē atiroki Niospa ea kexenō,” ixō shinākāfe,’ ikaki na kirika keneano,” Jesús fani.

⁸ Askata Satanás Jesús iyonī māchifā mǎnǎnē. Arixō ōimani nā maifo tii sharafinakōia. ⁹ “Ōipo. Mī ea ratokonō mai chachixō, ‘Mī ēfe ifoki,’ mī ea faito na maitio keyokōi ē mia inātiro mī āfe ifo inō,” fani.

¹⁰ Askafaito Jesús kemani: “Satanás. Emakinoax katāfe. Ē mia ifofaimakai. Na kirika kenea ano Niospa meka yoimisto iskafani: ‘Nā nōko Ifo Nios fisti nō ratokonō mai chachixō nō yoitirokī, nā fistimāi nōko Ifokē;,” fani.

¹¹ Askafaino Satanás Jesús makinoax kaino Niospa āfe ājirifo akiki fotonifo pimaxikakī.

*Galilea anoxō Jesús ato yoikī taefani
(Mr. 1.14-15; Lc. 4.14-15)*

¹² Akka mā Juan sorarofāfe karaxa mēra ikimana nikata Jesús Galilea mai ano anā oni. ¹³ Nazarete anox Capernaúm ano nokoni ano ixiki. Nā Galilea ĩa kesemē Capernaúm ini. Nānori yora fetsafori osia ini. Zabulonōfo fe Neftalifo ano ikafo ini. ¹⁴⁻¹⁶ Isaías kirika kenekī yoini keskakōi Jesús nāno ipaoni. Isaías kirika kenekī iskafani:

Zabulonōfo fe Neftalifo āto mai ano ikafo ĩa Galilea ano. Faka Jordán okiri chai poketa nāno judeofoma fakish mēra ika keskara, Niospa meka nikakatsaxakakima. Fakish mēra ika keskara ifiakaxō, oa koshi penai keskara ōixikani. Fakish mēra ipafikeranaxakakī atoki penarisatani, ixō Isaías a inōpokoai yoikī Jesúsnoa keneni. Nāskarīfai omiskōipakenakafō mēra ikeranafo. Askafikeranafono atoki Jesús nokoaitīa nā Ifofafo tii ato nimapakenaka.

¹⁷ Anoxō Jesús ato yoikī taefakī iskafani: “Mā chaima nōko Ifo Nios xanīfo finakōia oi kiki. Nāskakē shināmītsayanā mǎto chaka xatekāfe. Afaa chakafatamaroko Niospa meka nikakōikāfe,” ixō Jesús ato yoini.

*Jesús cuatro feronāfake kenani tarafanāfānē foe fimisfono āfe inakōi inōfo
(Mr. 1.16-20; Lc. 5.1-11)*

¹⁸ Ato yoita Jesús Galilea ĩa kesemē kani. Kakī fichini Simón yafi onefetsa Andrés. Simón āfe ane fetsa Pedro ipaoni. Nā rafeta tarafanāfānē fimisfo inifo, āto tarafanāfā faka naki poteaifāfe. ¹⁹ “Efe fokāfe. Māfi tarafanāfānē fimiskī. Mā foe ichapa rasi tarafanāfānē fiai keskari fakī iskaratīari mā ekeki yora ichapa efexii ē āto Ifo inō,” ixō Jesús ato yoini. ²⁰ Ato askafaino tarafanāfā fafaikani afe fonifo.

²¹ Askata ori chaimashta kaxō Zebedeo fake raferi fichini, Santiago yafi Juan. Nā rafeta āto apa feta kanōa nakixō tarafanāfā itipinī fanifo, kishi-fakākī. Nā raferi, “Efe fokāfe,” Jesús ato fani. ²² Ato askafaino āto apa kanōa ano nīchifainifo Jesús fe fokākī.

Jesús yora ichapafō tāpimani

(Lc. 6.17-19)

²³ Mā askafaxō afe foafono nā Galilea anoafō kafāsakī Niospa meka ato yoini. Judeofāfe ichanāti pexe mēraxō Jesús ato Niospa meka shara yoisharakī iskafani: “Itipinīsharakāfe. Nios nonoax māto xanīfo ipai kikī,” ixō ato yoifofāsafani. Askatari a isinī ikaifo fetsa fetsatapafō ato sharafāpani.

²⁴ Askafaano nikakaxō Siria mai anoafō isinī ikaifo akiki efenifo ato sharafapanō. Isinī ikaifo fetsa fetsatapafō akiki efenifo. A yōshi chaka āto mēra naneafari ato sharafani. A nīsoaifori efeta, a finimismafori efeta, a chatofori efenifo. Ato keyokōi sharafapani. ²⁵ Askafaito yorafā rasichi chīfafainifo. Atiri Galilea anoax fonifo, atiri Decápolis anoax fonifo, atiri Jerusalén anoax fonifo, atiri Judea anoax fonifo, atiri faka Jordán okirinoax fekāta Jesús chīfafainifo.

5

Machi mǎnǎnēxō Jesús ato yoini

(Lc. 6.20-23)

¹⁻² Yorafā rasi akiki feaifono ōi Jesús ato paxafāini kaax, machi pochinī tsaoni. Tsaono āfe meka tāpipaimisfo akiki fenifo. Āfe meka nikai fekani. Akiki feafono ato yoikī iskafani:

³ “Fētsa āto shinā mēraxō shinākī iskafax: ‘Ēakai ē isharatiroma. Ē Nios yopakōi,’ ikaito Niospa inimamaxii māmāi Nios Ifo sharafaino āfe fakekōi inō.

⁴ “Fetsa shināmitsakōifiaino chipo Niospa noikī inimamaxii.

⁵ “Fetsa kakapaimisma imisno Niospa inimamasharaxii. ‘Keyokōi maitio atonā ixii,’ ixō Niospa yoiyoni keskara atonāri ixii.

⁶ “Fētsa Niospa meka noikōikī Niospa ato imapaiyai keskara shara ipaikōikani, nā keskarafo Niospa ato inimamaxii.

⁷ “Fētsa fetsafori noikī ato sharafaito Niospa tāpia. Nāskakē ari Niospa noikī axosharapakenaka inimamakī.

⁸ “Fētsa Nios shināsharakī, āfe ōiti mēra afaa chaka shinātama Nios fisti shinākī chipo Nios ōixii. Nāskax inimakōixii.

⁹ “Akka noikaspa faatanāifono fētsafāfe ato raenā faano, nāfo Niospa ato yoikī iskafaxii: ‘Mā ēfe fakefo,’ ixō ato yoiaino inimakōixikani.

¹⁰ “Fētsa Nios Ifofasharapaiyaino, fetsafāfe ato omiskōimafiaifono, Epa Niospa kexesharakōiano nāskakē inimakōixii.

¹¹⁻¹² “Mā ea Ifofakē fetsafāfe mato īchakani, mato omiskōimayanā askatari matoōnoa meka chaka yoikani meka fetsa fetsatapafō. Nā mato chakafaifo keskafakīri māto xinifāfe nā Niospa meka ato yoixomisfori ato chakafapaonifo. Nāskakē inimasharakāfe eōxō matori chakafakani kiki. Mā askaito Niospa afara sharafo mato mekexona nai mēranoa mǎtonā inō,” ixō Jesús afe imisfo ato yoini.

“Mā tashi keskarakata askatari mā pena keskara,” ixō a Ifofafo Jesús ato yoini

(Mr. 9.50; Lc. 14.34-35)

¹³ Anã Jesús ato yoini iskafakī: “Māfi nono mai anoax tashi keskaraki. Nāskakē shinākāfe. Tashi sharakē nō meetiro. Akka tashi sharayamakekai nō shara meetiroma. Nāskarakai tosa pishta fichipaima. Mā paispakē anã nō pitiro. Nāskakē nō potatiro. Nāskarifiiai mā tashi keskara. Mā nono mai ano isharaino yorafāfe mato òikani inimatiroma. Askafixò mā Nios anã Ifofasharayamaito matoòxò tsòakai tãpitirofoma Niospa meka shara. Mā tashi paispa keskarakē mato potatirofo. Iskafakī yoitirofo: ‘Mā chakafoki nonoax fotakāfe. Mākai afaama,’ ixò yoitirofo.

¹⁴ “Nāskatari mā oa luz peeikai keskarakī. Akka pexe rasi māchi keya mǎnǎnēnoax onetiroma. Chai ixò penakōi nō òitiro. Nāskarifiiai matoòxò yorafāfe xafakīa eònoa nikatirofo. ¹⁵ Nāskafakīri tsòakai fakishaino òipaifiki luz fepotiroma. Tapo kamaki luz òtaxò kēsho fepotiroma. Askatamaroko tapo kamaki fomākīa nō òtaxò tsǎotiro a pexe mēra ikafāfe òisharanòfo. ¹⁶ Nāskarifiiai isharakāfe. Mā askaito mato òikakī tãpitirofo mā eònoax xafakīa isharakē. Askata mǎto Epa Nios nai mēra ikano aònoa yoikī iskafaxikani: ‘¡Aicho! Na yorafo Niosnoax isharakòimisfo. Āto Nios sharakòi,’ ixò yoixikani,” Jesús ato fani yoikī.

Jesús ato yoini a Niospa shināmanaino Moisés kenenìnoa nikasharakòinòfo

¹⁷ Anã Jesús ato yoini: “Mā shināiraka iskafakī: ‘A Moisés Niospa shināmanaino kenenì, askatari a Niospa meka yoimis fetsafāferi kirika kenenifo afo Jesús noko nikamakaspai,’ ixò mā shināiraka. Anori shināyamakāfe. Ēkai Moisés feta a Niospa meka yoimis fetsafāfe kenenifo keskara ē potayoi onima. Askatamaroko nā kenenifo keskara ē ato tãpimaxii ē fotoni nai mēranoax. ¹⁸ Akka ē mato xafakīa yoi. Ea nikasharakāfe. Nai fe mai keyoyamano a Moisés yoini keskara tsòa fetsafatiroma. Askatari afaa nō potatiro. Akka mā keyokōi mitokomeano, mai fe nai keyoxii. Mā afama mǐshtifo keyoano nō anã Moisés mekari nō yopaxima. ¹⁹ Akka fētsa Moisés meka nikasharayamaxò fetsafori ato meka chaka tãpimanaino nikakaspamisfo a Moisés kenenì keskara. Nā feronāfake Epa Nios ika ariax anã afaa itiroma. Nāskafekē fētsa Niospa meka nikasharataifakī fetsafori Niospa meka xafakīa yoiax Epa Nios ika anoax afe xanìfo itiroki. ²⁰ Askano nā fariseofo fe a Moisés yoikī kirika kenenì keskara ato tãpimamisfo, ‘Nòfi sharakòi,’ ifiamisxakakī Niospa yoini keskara keyokōi nikafoma. Akka a Moisés yoikī kenenì keskara nikakòikanaxma tsoa Epa Nios ika ari nokotirofoma,” ixò Jesús ato yoini.

“Òitifishkiyamakāfe,” ixò Jesús ato yoini

(Lc. 12.57-59)

²¹ Anã Jesús ato yoini iskafakī: “Mā mā nikamiskī a Moisés nòko xinifo ato yoipaoni keskara. Iskafakī ato yoini: ‘Tsoa reteyamakāfe. Mā fetsa retakē xanìfofo ano mato iyotirofo matori kopikiri retematirofo,’ ixò nòko xinifāfe yoinifo. ²² Mēstekòi anori yoifinikē ē mato meka fetsari mēstekòi yoinò. Ea nikasharakāfe. Fētsa fetsa ìchaito mǐ xanìfofo ari iyotiro a omiskòimanò. Askatari fētsa fetsa chakafai iskafakī: ‘Mǐ afaa tãpiama. Mǐ tatimakòi,’ faito Niospa a omiskòipakenakafo mēra chiifā mēra potatiro anoax omiskòipakexanò.

²³⁻²⁴ “Nāskakē mā Nios kǐfiti pexefā mēraxò mā kǐfipaikī mā iskafaki shināino: ‘Ooa, ē fetsa chakafaa ē raefama,’ ixò shinākī, anã Nios kǐfixoma nā

mā Nios ināpaifafāinai fetsa ano koshi fotakāfe. Akiki nokoxō yoisharafe anā mikiki raenō. Nāskaxō anā mā Epa Nios kīfitiro.

²⁵ “Mā fetsa nimiano matoki oxō mato iskafatiro: ‘Mī ea nimia. ζAfetīa mī ea kopifaimē? Mī ea kopifayamaito ē mia xanīfo ano iyoikai,’ mato faito, xanīfo ano kayoxoma koshi raefakāfe. Akka mā askafayamaino xanīfo ano mato iyotiro. Mā mato iyoano xanīfāfe policia yoitiro iskafakī: ‘Na feronāfāke fetsa nimiakī kopifaamaki, karaxa mēra ikimafe,’ fatiro. ²⁶ Ē mato paraima. Fētsa mato karaxa mēra ikimanano mā fena tseketiroma. Akka nā mā nimia kopifatia mā tseketiro,” ixō Jesús ato yoini.

“Māto āfikōima chotapaiyamakāfe,” Jesús ato fani

²⁷ Anā Jesús ato yoini: “Mā mā nikamis a nōko xini Moisés yoini keskara. Iskafakī ato yoini: ‘Māto āfima chotayamakāfe. Askatari kēromāri māto fenema chotamayamakāfe,’ ixō ato yoini. ²⁸ Nāskara chanīma. Nāskakē ēri mato yoi, fētsa āfe āfima ōikī āfe shinā mēraxō shināi: ‘Ē na kēro chotapai,’ ixō shināki āfe shinā mēraxō chotai.

²⁹ “Akka māto fēro ōiki mā chakafatiro. Nāskakē afara chaka ōiyamakāfe afara chakafaxikakima, nā nōko fero tsexaxō nō ōitiroma keskafakī. Mā māto chaka xateyamax omiskōipakenakafo mēra mā katiro. Akka mā māto chaka xateax mā Nios ika ari kaax mā afe ipaxatiro. Askara shara. ³⁰ Nāskarifikī māto mēke kayakai aōxori mato afara chakafamakē, mextemekāfe. Mā askafax shara mā itiroki. Nāskarifikī māto chaka xatekāfe nā mā mextemea keskaraxō. Akka mā māto chaka xateyamax, nā omiskōipakenakafo mēra mā katiro. Akka mā māto chaka xateax, Nios ari mā kaax afe mā ipaxatiro. Askara shara,” ixō Jesús ato yoini.

Feronāfāke āfe āfi fe enēnātirofoōnoa Jesús ato yoini
(Mt. 19.9; Mr. 10.11-12; Lc. 16.18)

³¹ Anā Jesús ato yoini: “Nāskatari Moisés nōko xinifo yoini iskafakī: ‘Fētsa āfe āfi potaxikī a potayoxoma iskafatiro kirika kenexō: ‘Ē anā mia fipaima. Ē mia eneikai,’ ixō kenexotiro,’ ixō Moisés ato yoini. ³² Akka anori Moisés yoifinikē anā meka fetsari ē mato yoinō. Tsōa āfe āfi chotayamafiano, feronāfāke āfe āfi eneano nā kēro feronāfāke fetsa fe chotanāi chakanai. Askatari feronāfāke fētsa nā kēro fīax chakanai āfe āfikōima chotai,” ixō Jesús ato yoini.

“A mā yoiyomis keskara akāfe,” ixō Jesús ato yoini

³³ Askata anā Jesús ato yoini: “Mā mā nikamis a Moisés nōko xinifo yoini keskara. Ato iskafakī yoipaoni: ‘A mā Nios yoiyomis keskara axosharakāfe. A mā yoiyomis keskara Epa Niospa mā nikakī akka mā ayamano nā chakakōi itiro,’ ixō Moisés nōko xinifo yoini. ³⁴ Akka nānori ato yoifinikē, ēri mato yoisharanō. Nikakapo. Mā fetsafo yoiyomis keskara axosharakāfe. Iskafakī yoiyamakāfe: ‘A ē mato yoioya keskara ē axii. Ē mato yoioya keskara ē ayamaino Epa Niospa ea omiskōimatiro,’ ixō yoiyamakāfe. Askatari, ‘A ē mato yoia keskara ē akēma keyokōi nai mēraxō ea omiskōimatiro,’ ixō yoiyamakāfe. Akka nai mēranoax Epa Nios xanīfo finakōia iki. Nāskakē anori nō yoitiroma. ³⁵ Askatari, ‘A ē mato yoioya keskara ē ayamaino nono mai anoafāfe ea omiskōimatiro,’ ixō anori yoiyamakāfe. Keyokōi mai ano Epa Niosnā. Askatari, ‘A ē mato yoioya keskara ē ayamaino a Jerusalén anoafāfe ea omiskōimatirofo,’ ixō anori yoiyamakāfe. Nā Jerusalén nōko xanīfo finakōi Niosnā. ³⁶ Askatari, ‘A ē mato yoioya keskara ē ayamaino ēfe māpo

ea omiskōimatiro,' ixō yoyiamakāfe. Akka nōa nōko māpo shināxō nōko foo nō fetsafatiroma oxo inō, askatari fiso inō. Epa Nios fistichi askafatiro. ³⁷ Akka fetsafo parayamakāfe. 'Ē mia axōikai,' ixō axokāfe. Askatari, 'Ē mia axōima,' ixō axoyamakāfe. 'A ē yoyioa keskara ē ayamaino afaa ranā ea omiskōimatiro,' ixō anori yoyiamakāfe. Mā askara yoikī mā chakafai," ato fani.

*"Tsoa kopiyamakāfe," Jesús ato fani
(Lc. 6.29-30)*

³⁸ Anā Jesús ato yoini iskafakī: "Mā mā nikamiski a nōko xinifo Moisés yoini. Iskafakī ato yoini: 'Fētsa mato fero tsēkaito, kopikiri mā fero tsēkatiro. Askatari mato piti tēkeaito, pitiri mā tēketiro,' ixō Moisés yoini. ³⁹ Akka nōko xinifo anori yoifnifono, ē mato meka fetsa yoinō. Ea nikakapo ē mato yoinō. Fētsa mato chakafayanā mato tapasaito, 'Takai fetsari ea afe,' fakāfe mato tāpinōfo mā ato kopiyamaito. ⁴⁰ Fētsa mia xanīfo ano iyoxō mia rapati fiapaiyaito, ināfe fotanō. Mī chōpari ināfe. ⁴¹ Xanīfo iyamakī soraronō, 'Ea pisha chaima foxōikafe,' mato fafiaito, mā chai foxotiro. ⁴² Akka fētsa mato afarafo yōkaito inākāfe. 'Ea ināyope,' mato faito ināfe fīshkoyamakāfe," ixō Jesús ato fani.

*"Mato noikaspafiaifono māroko ato noikāfe," Jesús ato fani
(Lc. 6.27-28, 32-36)*

⁴³ Anā Jesús ato yoini iskafakī: "Askatari mā mā nikamis a nōko xinifo yoipaonifo keskara. Iskafakī ato yoipaonifo: 'Māto kaifo noikāfe. Akka a mato noikaspaifo ato kopikiri noikaspakāfe,' ixō nōko xinifo yoipaonifo. ⁴⁴ Anori yoifnifono, akka ē mato yoi a mato noikaspaifo ato kopikima ato noikāfe. Askatari ato axosharakāfe. Askatari a mato omiskōimamisfo Epa Nios ato kīfixokāfe. ⁴⁵ Mā askafai Niospa fake mā iki. Akka Niospa xini onifani yora chakafoya, yora sharafo ato chaxanō. Askatari oiri imani nā yora sharafoya a yora chakafoi ato onifaxoni. Nāskakē māri a mato chakafaifoya a mato sharafaifo keyokōi ato noikāfe. Nāskax mā Niospa fake ikikai. ⁴⁶ Akka a mato noiaifos mā ato noia fetsafo noiyamata askarakai sharama. Akka yora chakafo a ato paraxō kori ichapa ato fīamisfori aska famis. Mā askaino Nios matoki inimaima. ⁴⁷ Mato fe yorafos mā noia askarakai afaama. Akka a Nios Ifofaafomari nāskarifiakani aa ranāri noinākani. ⁴⁸ Nāskakē Epa Nios nai mēraxō yorafo noiai keskafakī māri yorafo keyokōi noikāfe. A Epa Niospa shināsharamis keskafakī māri askafakāfe," ixō Jesús ato yoini.

6

"Afaamaisfori ato noikī afara ato ināsharakāfe," Jesús ato fani

¹ Anā Jesús ato yoini iskafakī: "Mā fetsafo sharafaino, 'Nā feronāfake sharakōi ea fanōfora,' ixō anori shināyamakāfe yorafāfe ferotaifi. Mā askaino yorafāfe, 'Sharara,' mato fafiaifono, akka Epa Nioskai matoki inimatiroma. Nāskaxō mato afaa inātiroma. ² Nā āa keparanāmisfo keskara iyamakāfe. Afāfe nōko kaifāfe ichanāti pexe mēraxō afaamaisfo afara ato ināmisfo, 'Sharara noko fanōfora,' ikaxō. Askatari foīśakakī afaamaisfo ato afara ināfofāsafamisfo, 'Noko yoisharanōfora,' ikaxō. Akka askafiaifono Niospa ato afaa ināxima. ³ A afara yopaifo mā afara inākī tsoa yoyiamakāfe tsōa tāpiyamanō. ⁴ Akka tsōa ōiyamaino a afaamaisfo mā ato ināino Epa Nios matoki inimani. Nāskaxō mato afara axosharatiro," ixō Jesús ato yoini.

*“Epa Nios kīfikī iskafakāfe,” ixō Jesús ato fani
(Lc. 11.2-4)*

⁵ Anā Jesús ato yoini iskafakī: “Mā Epa Nios kīfiatīa a chanīmisfāfe kīfimisfo keskara iyamakāfe. Akka afāfe nōko kaifāfe ichanāti pexe mēraxō yorafāfe ferotaifi Epa Nios kīfimisfo: ‘Noko ōinōfora,’ ikaxō. Epa Nios shinātamaro ko ato ōimapaikani. Yorafāfe ato ōiaifono askamisfo. Akka Epa Nios atoki inimaima. Nāskakē ato afara shara ināxiima. ⁶ Akka māri ato keskara iyamakāfe. Mā Nios kīfikī tsōa mato ōiyamaino nānoxō Epa Nios kīfikāfe. Māto pexe kene mēra ikixō tsōa mato ōiyamaino nānoxō Epa Nios kīfikāfe. Akka yorafāfe mato ōiyamafiaino Epa Nios fistichi mato nikatiro. Nāskakē matoki inimai. Nāskaxō afara shara mato ināxii.

⁷ “Akka a Nios chanīmara faafāfema kīfimisfo keskayamakāfe. Nāfāfe mēxotaima nā meka fisti yoiri famisfo. ‘Nō na meka fisti yoirifaito noko Epa Niospa nikai,’ ixō shināmisfo. Askafiaifonokai Niospa a keskara meka nikapaima. ⁸ Akka māri ato keskara iyamakāfe. Mā Epa Niospa tāpiakī mā afara yopaito, mā yōkayoamano. ⁹ Akka mā kīfikī iskafatiro:

Epa Niosi, mī fisti sharafinakōia. Mī nai mēra ika. Nō mia noikōi.

¹⁰ Nai mēra mefe ikafo mī ato yoiaito mia nikakōimisfo. Akka nono mai anoxori nā mī noko amapaiyai keskara nō atiro. Na nono mai ano ikafāfe keyokōichi mia Ifofanōfo. ¹¹ Nā pena tii a nō piati noko ināfafāife nō afaa yopayamanō. ¹² Nō afara chakafaito nōko chaka noko soaxōfe nā noko chakafāifāfe nō ato raefai keskafakī. ¹³ Nokoki Satanás chaka omayamafe, askakimaro ko nomakinōa pōtafe nō nikayamanō, ixō kīfikī iskafakāfe.

¹⁴ “Akka fetsafāfe mato chakafaifono mā ato raefai keskafakī Epa Nios nai mēranoato mā fetsafo raefai keskafakī matori chaka soaxotiromo. ¹⁵ Akka mā fetsafo raefayamaito Epa Niospari mato chaka soaxotiroma,” ixō Jesús ato yoini.

Foni tenemisfoōna Jesús ato yoini

¹⁶ Anā Jesús ato yoini iskafakī: “Ē mato yoiyonō. Mā foni tenei oa shināmitsai keskara māto femānā iyamakāfe a āa keparanāmisfo ikaifo keskai. Afāfe foni tenekani āto femānā shināmitsai keskara ikani yorafāfe ato ōikani. Askatari foaromekanima yorafāfe ato ōinōfo. Nāskakē Epa Niosnoa shinākanima. Askaifono Epa Nios atoki inimaima. Nāskakē ato afaa ināima. Akka māri foni tenei ato keskara iyamakāfe. ¹⁷⁻¹⁸ Akka mā foni tenei mā Nios shināyanā mā fechokometiro. Askatari fōxti mā foaromesharatiro. Nāskakē Epa Nios fistichi tāpitiro yorafāfe tāpiafomano. Mā askaito yorafāfe tāpitirofoma mā foni teneaito. Akka Epa Nios fistichi tāpitiro. Nāskakē Epa Nios matoki inimitiro. Askatari mato afara shara ināxii,” ixō Jesús ato yoini.

*“Epa Nios ika anoxō afara sharakōifo mato mekexona,” ixō Jesús ato yoini
(Lc. 12.33-34)*

¹⁹ Anā Jesús ato yoini iskafakī: “Nono mai anoxō afama mīshti ichapa mekeyamakāfe. Mato nakaxa pīaino mā fenotiroki. Askatari chakanai fetsetiro. Askatari yometsofo māto pexe mēra ikixō māto afama mīshtifo keyokōi mato fīano mā fenotiro. ²⁰ Akka afama mīshti noitama Nios noikāfe. Nā mato yoini keskara akāfe. Mā akiki nokoaito nā mato afara sharakōi mekexona mato ināxii. Akka ono nai mēraxō afama mīshti mato mekexona, a nakaxa mato pīatiroma. Askatari chakanaima. Askatari anā māto pexe mēra ikiax tsoa yometsotiroma. ²¹ Akka māto afama mīshtifo noikī mā shināfafāini.

Nā māto afama mīshṭifo mā shināfafāinai keskafakī Niosri shināfafāikāfe, a noikī yonoxosharakāfe,” ixō Jesús ato yoini.

“Nōko ōiti sharakē nō shināsharakōitiro. Akka nōko ōiti chakakē nō shināsharatiroma,” ixō Jesús ato yoini
(Lc. 11.34-36)

²² Anā Jesús ato yoini iskafakī: “Anā ē mato meka fetsari yoinō mā tāpikōinō. Akka nōko fero rafeta nā rāparinī chai chaxai keskarakē, nōko yora shara itiro. Nāskarifiāi nōko fero sharano nō xafakīa ōisharatiro. Nāskatari nō isharakōitiro. ²³ Akka nōko fero chakakē nō ōisharatiroma. Fakishkōi itiro. Nāskarifiakī nōko ōiti mēraxō nō chaka shinākī nō afara chakafamis nō itiro. Akka ōisharakāfe. Mā Epa Nios shināi xafakīa ifiaxō āfe meka kachikiri faxō mā anā xafakīa shinātiroma. Fakish keskara mā itiro,” ixō Jesús ato yoini.

“Nōko afama mīshṭi noisharatama nō Nios noisharakōitiro,” Jesús ato fani
(Lc. 16.13)

²⁴ Anā Jesús ato yoini iskafakī: “Tsōa āfe ifo rafe yonosharaxotiroma. Fetsa noikaspa, fetsa noisharatiro, nā yoiāi keskarakōi axotiroma, akka a fētsa amapaiyai keskara axotiroma noikaspaitiro. Nāskarifiakī mā kori fisti shinākī mā Nios shinātiroma. Nāskatari Epa Nios fisti shinākī mā kori noitiroma,” ixō Jesús ato yoini.

“Epa Niospa āfe fakefo kexesharamis,” ixō Jesús ato yoini
(Lc. 12.22-31)

²⁵ Anā Jesús ato yoini iskafakī: “Anā ē mato yoisharanō. Ea nikasharakāfe. Shināchakayamakāfe. Nō afaa piyamata, afaari nō ayaima iyamakāfe. Askatari afaari nō safeima ixō shināchakayamakāfe. Akka a nō piatokai noko imasharatiroma. Askatari a nō safeatori nōko yora noko imasharaxotiroma. ²⁶ Akka shinākapo. Peyafāfe afaa fanamisfoma. Afaari topimisfoma. Askaxori afaa mekemisfoma. Nāskafekē Epa Niospa ato pimamis. Akka nā peyafō afaayamafoiakē Epa Nios nai mēra ikato ato pimamis. Akka Niospa mato noikī nā peyafō finōmainifōfā mato kexesharakōimis. ²⁷ Nāskakē, ¿afeskakī mā shināchakaimē? A nō shināchakaitokai pena fisti noko anā nimatiroma. Nāskakē afaa shināchakayamakāfe.

²⁸ “Askatari iskakī shināyamakāfe: ‘Ooa. ¿Faniā ē rapati fitiromē safexiki?’ ixō anori shināyamakāfe. Akka shinākapo afeskax charofo foaikamakī. Nā charofāfe yonokanima. Askatari xapo toro atirofoma rapati faxikakī. ²⁹ Nāskafix charofo sharamishti foaikani. Nāskarari xanifo Salomón rapati sharafinakōia safefixō nā charofo finōama. ³⁰ Akka Niospa nafefo sharashtafo onifani. Sharafiano nō sepakī xateano natiro. Nāskaxō nō koofatiro. Akka Niospa nafefo finōmainifōfā mato noikī mato rapati safematiro mato kexesharaxō. Akka mā shināchakakī mā Nios chanīmara fasharaima. ³¹ Nāskakē shināchakayamakāfe. Shinākī iskafayamakāfe: ‘Ooa. Ē fonāiki a ē piāi keyoano, a ē ayairi keyoano koriyaxomari ē afaa safeima,’ ixō anori shināchakayamakāfe. ³² Akka nā Nios Ifofaifāfema iskara shināmisfo. A piāi fisti shinākata, a safepaiyai fori shināmisfo. Akka Epa Niospa mā mato tāpia afarafo mā yopaito. ³³ Nāskakē Nios mato xanifoōnoa shinākāfe. A Niospa mato amapaiyai keskara nāskara fisti shinākōikāfe. Mā askafaito afara fetsa mā yopaito Epa Niospa mato ināxii. ³⁴ Nāskakē shināchakayamakāfe. Yoi iskayamakāfe: ‘Ooa. Ē tāpiama penama afara chaka afeskara afiaino. Ē nā keskara tenetiroma,’ ixō shināyamakāfe. Shinākī iskafakāfe: ‘Epa Niospa

na penata ea kexesharamis keskafakī penamari ea kexesharai,' ixō nānori shinākāfe," ixō Jesús ato yoini.

7

"Fetsafo mekafakī chakafayamakāfe," ixō Jesús ato yoini
(Lc. 6.37-38, 41-42)

¹ Anā Jesús ato yoini iskafakī: "Mē^{xotaima} fetsafo mekafayamakāfe iskafakī yoikī: 'Naato afara chakafakī Niospa omiskōimapainō,' fakī. Akka mā ato askafayamaino Niospari mato mekafatiroma iskafakī yoikī: 'Na yorafo chakafo,' mato fatiroma. ² Akka māri nāato akai keskafakī afara mā chakafaito, matori Niospa omiskōimaxii. Akka mā fetsafo afara ināsharakēma Niospa matori afaa ichapa ināxima, mā ato afara ināsharakōikēma. ³ ¿Afeskakī ifi pasta pishta fetsa feronaki ikano mā ōimē, māroko ifi pasta efapa feostamefixō? ⁴ Akka, ¿mā shināimamē a mā ifi pasta efapa feostamea? Akka, ¿afeskakī mā fetsa iskafaimē?: 'Yamā, ē mia fixonō a mī ifi pasta pishta fero naki ika,' fakī, mākōi mā kakamepaimis. Mākai afaa tāpiama. ⁵ Nāskax mā chanīkōi mā ato parapaimis. Akka ē mato yoinō ea nikakapo. Akka māto fero mēranoa a ifi pastafā mā feostamea tsekayokāfe. Nāskaxō ōisharakī, a fetsafo ifi pasta pishta feronaki ika mā tsexaxotiro. Nāskarifikā māto chaka xateyamaxō mā fetsafo chaka xatematiroma. Akka māto chaka xatexō fetsafo mā chaka xatematiro. ⁶ "E meka fetsari mato yoinō mā tāpinō. Paxta pōfe nō nami shara ināpaifiaino noko keyotiro mifiki. Askatari kochi nō afara shara ināino peama peamakī chakana fatiro. Nāskari fakī yorafāfe Niospa meka shara nikakaspakī chakafatirofo, Epa Nios chakafakī mekafakakī. Askaifono Epa Niospa meka shara anā ato yoipaiyamakāfe," ixō Jesús ato yoini.

"Nō Epa Nios afara yōkaito noko inātiro," ixō Jesús ato yoini
(Lc. 6.31; 11.9-13)

⁷⁻⁸ Anā Jesús ato yoini iskafakī: "Nāskakē ē mato yoi, afara fichipaikī Epa Nios yōkakāfe mato ināi kiki. Fena fena kakīma manakāfe nā Epa Niospa mato ināitiā. Nāskakē Epa Nios kīfifafāikāfe mā kīfiai to mato ināi kiki. Akka nā yōkai Epa Niospa afara shara ināxii. Nāskarifiakī fētsa afara shara fenaito Epa Niospa fichimatiro. Nāskarifiakī fētsa Epa Nios kīfiai to ināsharakōixii.

⁹ "Akka māto fake mato yoa yōkaito, ¿mā tokiri inātiromē? Maa. Mākai māto fake mā askafatiroma. ¹⁰ Askatari, ¿māto fāke mato foe yōkaito mā rono inātiromē? Maa. Mākai māto fake mā askafatiroma. ¹¹ Akka mā chakafixō māto fakefo kexesharaxō afara sharafo mā ato inātiro. Nāskarifikā Epa Nios nai mēranoato mā afara yōkaito mato kexesharakatsaxakī afara sharafo mato ināsharaxii nā nai mēraxō mato mekexona.

¹² "Nā mā fichipaiyai keskafakī fetsafāfe mato axosharaifono, nāskarifikā māri fetsafo axosharakāfe. Moisés feta a Niospa meka yoimimfāfe nānori yoinifo kirika kenekakī," ixō Jesús ato yoini.

Fepoti pishtaōnoa Jesús ato yoini
(Lc. 13.24)

¹³ Anā Jesús ato yoini iskafakī: "Meka fetsa ē mato yoinō. Nikakapo. Fepoti rafe iskarakī: Fepoti fetsa pishtaki nā fepoti pishta ikikāfe. Akka nā fepoti fetsa efapa. Nā fepoti efapato fai efapa kaa. Nāskakē nā fai efapato yora ichapa fomisfo a omiskōipakenakafo mēra. ¹⁴ Akka fepoti pishta ano fai kaa, pishta fekax. Nā fai Nios ano nokoa nā fai atsō pishtakōi. Nāskakē ichapama aō fomisfo," ixō Jesús ato yoini.

Ifi ħfe fimioxō nō tāpitiro afe keskaramākī
(Lc. 6.43-44)

¹⁵ Anā Jesús ato yoini iskafakī: “Ōisharakāfe, a chanĭaifāfe mato paratirofokī: ‘Nō Niospa meka yoisim,’ ixō mato paratirofo. Afāfe Niospa meka yoisim-fomaki. Akka afofi ovejafō keskarafō fikanax akka āto shinā mēra poomā pōfēfo keskarakōifo. Nāskakē ato fishtayamakāfe. ¹⁶ Akka mā tāpitiro afaa afeskafakanimākai. Akka ifi ħfe fimioxō nō tāpitiro afe keskaramākī. Xopa foaikī moxaya foaitiroma. Askatari kachafi moxaya foaitiroma. Nāskaxō nō tāpitiro moxayafo ōikī xopakairokokē. Nāskarifikā nō tāpitiro kachafimāi moxayakē. ¹⁷ Akka ifi shara fimi sharaya itiro. Akka ifi chaka fimi chakaya itiro. ¹⁸ Nāskakē Ifi shara fimi chakaya itiro. Ifi chakari fimi sharaya itiro. ¹⁹ Akka ififo fimi sharaya iyamaito ifāfe reraxō koofatiro. ²⁰ Nāskakē ato tāpimamisfoōnoa mā ato tāpitiro sharafo iyamakani chakafo itirofo,” ixō Jesús ato yoini.

“Akka keyokōi fotirofoma Epa Nios ika ano. Fisti rasi fotirofo,” ixō Jesús ato yoini
(Lc. 13.25-27)

²¹ Anā Jesús ato yoini iskafakī: “Akka yora ichapato yoisim iskafakakī: ‘Jesús, mī ħfe Ifokōi,’ famisfo. Nāskafikaxō atirito ea Ifofamisfoma. Nāskakē ħfe Epa Nios ika ari nokotirofoma. Ĕfe Epa nai mēra ikato nā ato amapaiyai keskara akatsaxakakī nāfo ħfe Epa ari nokotirofo afe ipaxakakī. ²² Akka mā mai keyoaino nā onifanifo tii keyokōi Niospa ichanāfaxii. Nā nikakaspamisfo tii omiskōipakenakafo mēra ato potaxii. Nāskakē yora ichapafāfe ea yoikani iskafakakī: ‘Ifo, shināpo. Nō mī aneōxō nō yorafa yoisim. Mī aneōxori nō a niafaka chakafo yorafa mēra nanea nō ato makinoa potamis. Mī aneōxori nō afama mīshti famis yorafāfe atiroma keskafakī. Noko shināfe, Ifo,’ ixō ea yoixikani. ²³ Askaifono ħ ato xafakīa yoixii iskafakī: ‘Mākai efe yorama. Māfi ato pāramiski. Afara chaka fisti mā famiski. Emakinoax fotakāfe,’ ħ ato faxii,” ixō Jesús ato yoini.

Pexe rafeōnoa Jesús ato yoini
(Mr. 1.22; Lc. 6.47-49)

²⁴ Anā Jesús ato yoini iskafakī: “Akka nā ea nikaito nā ħ yoiai keskara aki, nā yōra pexe fakī tāpixō mai chai pōkixō mai teikī pexe kishi nīchitiro keskafakī. ²⁵ Akka oi ikaino, pexe nāmā faka faitiro. Askatari nēfefakī pexe afeskafatiroma. Nāskakē pexe paketiroma mā mai teikōikimāi pexe kishi niano. ²⁶ Akka nā ħ yoiaito ea nikafikī a ħ yoiai keskara nikaima, askara yora nā yora tatimato pexe fakī mashi ano pexe fatiro keskarakōi. ²⁷ Akka oi ikaino faka faitiro. Askatari nēfefakī pexe potatiro. Nāskax pexe chakanatiro. Nāskarifiakī fētsa ħfe meka nikafikī ea nikaima afofi fenoi fetsekani. Nāskakē omiskōipakenakafo,” ixō Jesús ato yoini.

²⁸⁻²⁹ Nāskata mā Jesús mekai xateano yorafāfe nikakaxō, “ĭKee! Nikakapo. Nato tāpikī finakōia, a Moisés yoikī kirika keneni keskara ato tāpimamisfo keskarama, meka sharakōi nato yoi,” fanifo.

8

Jesús yora rashkishiai sharafani
(Mr. 1.40-45; Lc. 5.12-16)

¹ Askata Jesús ato yoikī xateta māchi keya ariax tisirimepakeaito yorafāfe chīfafainifo afe fōkakī. ² Jesús kaino feronāfake isinī iki rashkishi fetseax Jesúski oni. Akiki oxō ratokonō mai chachipakefōfā yoini iskafakī: “Ifo, ea sharafapaikī mī ea sharafatiro,” fani. ³ Askafaino Jesús āfe mēkemā ramāyanā yoini iskafakī: “Ē mia sharafanō. Iskaratīa mī sharaikai,” faino, a rashkishi fetseai koshikōi sharatani. ⁴ Mā sharano Jesús nīchini iskafakī yoiyani: “Mī tsoa yoiki. Akka nā ato Nios kīfixomis ispatāfe. Nāskaxō ovejanā fake foxō ināfe mia retexonō Moisés yoini keskafakī. Nāskaxō keyokōichi tāpinōfo a mī isinī imis mā mī sharano,” ixō Jesús yoini.

Jesús sharafani romanō xanīfāfe āfe ina yonaito
(Lc. 7.1-10)

⁵ Askafāfāini Capernaúm ano kani. Nāno akiki soraro xanīfo nokoni a yonoxomis sharafamapai. ⁶ Nokoxō yoini: “Ifo, a ea yonoxomis isinī iki. Ēfe pexe ano rakax omiskōiferoikima,” fani.

⁷ Askafaino, “Ē kanōkī sharafaxikī,” fani.

⁸ “Ifo, ēkai afama. Akka mī tsoa keskarama. Mī finakōiakī ēfe pexe ano kayamafe. Mī mekapa a ea yonoxomis ea sharafaxōfe nonoxō. ⁹ Akka eari ēfe xanīfāfe yonomamis. Ēri sorarofō yonomatiro. ‘Katāfe,’ ē faino karisatiro. Askatari, ‘Ekeki ofe,’ ē faino ekeki orisatiro. Nāskakē a ea yonoxomis afara ea axōfe ē faino ea axotiro. Akka mī afama mīshti fatiroki. Mī mekapa a ea yonoxomis ea sharafaxōfe,” ixō yoini.

¹⁰ Askafaito nikakī a afe foafo Jesús ato yoini: “Kee, nikakapo. Na feronāfake israeliyamafixō ea chanīmara fakī finakōi fetsafo keskarama. Akka Israel onafāfe ea iskafamisfoma chanīmara fakakī. ¹¹ Ē mato xafakīa yoinō. Na maaito ano ikafo Nios chanīmara fakanax nōko xinifo Abrahamnō Isaacanō Jacobonō ichanāxikani Nios yorafo ixikakī. ¹² Akka atiri nōko kaifo nā israelifo Niospa afe yorafo ato imapaifiaino chanīmara fakanima. Nāskakanax Nios ika ano nokotirofoma. Niospa ato fakishifā mēra potaxii. Anoax eaiyanā fasi omiskōixikani,” ixō Jesús ato yoini.

¹³ Nāskata Jesús yoini soraro xanīfo: “Mī pexe ano katāfe. Mī ea chanīmara faino a mia yonoxomis mā sharaki,” fani.

Jesús Pedro rayos sharafani
(Mr. 1.29-31; Lc. 4.38-39)

¹⁴ Askata Jesús Pedro pexe ano kani. Nāno Pedro āfe rayos yōxafo yonai oxati kamaki raka ini. ¹⁵ Jesús oikī āfe mēkemā ramāni. Ramāino āfe yona matsirisatani. Mā Jesús sharafaano anā yonanima. Mā sharaxō fininākfāta Jesús pimani.

A isinī ikaifo Jesús ato sharafani
(Mr. 1.32-34; Lc. 4.40-41)

¹⁶ Nāskano mā xini kaino a isinī ikaifo Jesúski efenifo ato Jesús sharafapanō. Atiri a niafaka chakafo ato mēra nanea Jesús āfe mekapa ato makinoa pōtapakeni. Keyokōi Jesús ato sharafapani. ¹⁷ Nānori Niospa meka yoimisto Isaiās a inōpokoai yoikī kirika kenekī iskafani: “Nō isinī imisno Cristo mā noko sharafaa. Askatari nā noko pāefaifo nomakinoa mā noko potaxona,” ixō Isaiās kirika keneni keskara Jesús ani.

A afe fopaimisfoōnoa Jesús ato yoini
(Lc. 9.57-62)

¹⁸ Askata Jesús òini yorafā rasi akiki feaifāfe. Askaifono aōxō tāpimisfo yoini iskafakī: “Okiri nō ĩamāfā pokefainō fokāfe,” ato fani. ¹⁹ Akka Jesús kayoamano a Moisés yoiķi kirika keneni keskara ato tāpimamis akiki oxō yoiķi iskafani: “Maestro, ěri mefe kapai nā mī kai ari ěri mefe kafāsaxiki,” faito, ²⁰ Jesús kemani: “Akka maxoteneroa kiniya, peyafori naayafo akka ěkai pexe yama,” fani.

²¹ Askatari a afe kafāsamis fĕtsa iskafakī yoini: “Maestro, ea nĕchiyofe ěfe epa naito ě maifayotanō. Chipo mia Ifofaxiki,” faito, Jesús kemani: ²² “Iskaratĭa ea Ifofafe. Akka nā ea Ifofaafāfema yora nakĕ maifatirofo,” ixō Jesús yoini.

Jesús nefe yafi ĩamāfā poo iki meseniaito nishpa fani

(Mr. 4.35-41; Lc. 8.22-25)

²³ Nāskata Jesús kanōanāfānĕ naneinĭkafāni aōxō tāpimisfori afe naneinĭfōfānifo. ²⁴ ĩamāfā pokefainaifono atoki nĕfefā nokoni. Jesús kanōanāfā xaki mĕra rakax oxano nefeyanā ĩamāfā poo ini. Kanōanāfā faka fospikōini. ²⁵ Askaino aōxō tāpimisfāfe mōinifo iskafayanā: “ĭlfo, mā nō āsaikai! ĭNō āsayamanō moife!” fanifo.

²⁶ Askafaifono, Jesús ato yoini: “ĭAfeskai mā rateimĕ? Mā ea chanĭmara fasharama. Nāskakĕ mā ratei,” ato fani. Ato askafata, fininākafāta fāsikōi, “ĭNĕfe, nishpafe!” fata, “ĭlamā, nishpafe!” fani. Askafaino anā ĩamāfā feroinima. ²⁷ Askafaito ōikani yoinānifo: “ĭKee! ĭNa feronāfake afe keskaramĕ na nefe feta ĩamāfānĕ ato yoiaito nikaifo?” ikanax yoinānifo.

Feronāfake rafeta Gadara mai anoxō niafaka chakafo nanea-fono Jesús ato makinoa potani

(Mr. 5.1-20; Lc. 8.26-39)

²⁸ Askata Jesús okiri ĩamāfā aōxō tāpimisfo feta pokefainax Gadara mai ano nokonifo. Nāno feronāfake rafe niafaka yōshi chaka nanekanax Jesúski nokonifo kinifā mĕranoax. Nā rafe mesekōi ipaonifo. Nāskakĕ yorafāfe a ikafo ano tsōa ato finōtiroma ipaoni atoki mesekakī. Nā maiyafō ano nā rafe ipaonifo. ²⁹ Nāskakĕ Jesús fichikanax fāsikōi fiisiyanā yoinifo: “Mĭfi Niospa Fakeki. Akka, ĭmĭ noko afeskafaiyoamĕ? ĭMĭ noko omiskōimaniyoamĕ?” Jesús fanifo.

³⁰ Askafaifono chaimaxō kōchifā rasichi pinifo. ³¹ Nāskakĕ niafaka chakafāfe Jesús iskafanifo: “Mĭ nā feronāfake rafe makinoa mĭ noko potaimākai kochifo mĕra noko nĕchife,” faifono, ³² “Fotakāfe,” Jesús ato fani. Nāskax niafakafo feronāfake rafe makinoax tsekekanax kochifo mĕra ikinifo. Nāskakĕ kochi rasi ichoax ĩamāfā mĕra keyopakeni. Nāskax āsai fetsemi.

³³ Askaito ōikani a kochifo kexemisfo ichonifo. Mā pexefo tii ano nokokaxō ato yoinifo: “Nā feronāfake rafe nā niafaka naneafo rafe mā Jesús ato makinoa niafaka pōta. Askatari nōko kochifo mĕra ikimanano keyokōi nāfoya nōko kochifo ĩamāfā mĕra keyopakeax āsai fetsea,” ato fanifo. ³⁴ Ato yoiaifono nikakanax keyokōi nā pexefo tii anoax Jesúski fenifo. Akiki nokokaxō yoinifo: “Na nōko mai anoax katāfe,” fanifo.

9

Jesús yora finimisma sharafani

(Mr. 2.1-12; Lc. 5.17-26)

¹ Askata Jesús kanōanāfā mĕra nanekaini. ĩamāfā okiri pokefaini kaax āfe mai ano nokoni. ² Nāno ikano a feronāfake finimisma yorafāfe akiki efenifo

āfe ratatinī ratakaḁō Jesús sharaḁanō ikaxō. Jesús ōini shināifāfe iskakakī na finimisma Jesús sharaḁai kiki ikaxō. Nāskakē a finimisma Jesús iskafani: “Efe yorashṁa, inimaḁe. Iskaratīa mē mia chaka soaxonaki,” fani.

³ Askafaino a Moisés yoikī kirika keneni keskara ato tāpimamisḁāfe atirito nikaxō āto shinā mēraxō shinānifo iskakakī: “Natokai ato chaka soaxotiroḁa. Nios fistichi ato chaka soaxotirokī. Akka nato noko feparapai, ‘Ē Niosra’ noko fapai,” ixō āto shinā mēraxō shinānifo. ⁴ Askaifono Jesús tāpixō a shinānifo keskara ato yoini: “¿Aḁeskakī māto shinā mēraxō mā chaka shināimē? ⁵⁻⁶ Ēfi Cristokī ē yorafo ato chaka soaxotiro. Akka, ¿ē aḁa fatiromē? Mē mia chaka soaxona ē fatioraka. Askatari ē mia sharaḁaa ē fatioraka,” ato fani. “Akka ē mato tāpimanō ē Niosxō mato chaka soaxotiro nono mai anoxō.” Nāskata Jesús a feronāḁake finimisma yoini: “Finināḁafata mī rakati fifaini mī peḁe ano katāḁe,” Jesús fani.

⁷ Jesús askafaino a finimisma finināḁafāta āfe peḁe ano kani. ⁸ Askaito ōikani yorafo ratei fetsenifo. “¡Kee, ōikapo! Nios tsoa keskarama. Fāsi sharakōi. Nō ōimisma keskara mā noko rama ōimana. Niospa Yōshi Sharaōxō na feronāḁake finimisma Jesús āḁe meḁapa mā sharaḁaa. Askatari āḁe chakari mā soaxona,” ikanax yoinānifo.

Jesús Mateo ifini aōxō tāpimis inō
(Mr. 2.13-17; Lc. 5.27-32)

⁹ Jesús nānoax kakī feronāḁake fisti fichini, āḁe ane Mateo,* āḁe xanīfo kori fixōi tsaokē. Nāskaito Jesús yoini: “Efe kofe ē mia tāpimanō,” faino Mateo finināḁafā Jesús fe kani.

¹⁰ Nāskafaito Mateo Jesús iyoni āḁe peḁe anoxō pikikakī. Askatari a yora chakafori aḁe inifo a xanīfo kori fixomisfo. Nāḁāḁe āa chanīxō kori finōmainīfoḁa fimisfo inifo. Askatari a yora fetsaḁo chakafamisfori fekanax akairi mīsa ano Jesús fe tsaonifo a feta pixikakī. Jesúsxō tāpimisfori nāno ato fe tsaonifo ato feta pixikakī. ¹¹ Askaito ōikakī fariseofāḁe Jesúsxō tāpimisfo yōkanifo: “¿Aḁeskakī māto maestro nā ato kori fixomisfo feta piimē, a yora fetsa chakafo fetari pii?” fanifo.

¹²⁻¹³ Askafaifāḁe nikakī Jesús ato yoini: “A sharaḁāḁe notoro fenakanima. Akka nā isinī ikaifāḁe notoro fenakani. Nāskafakīri yoraḁāḁe yoimisfo iskakakī: ‘Ēkai aḁa chakafamisma. Nāskakē ē aḁa yopaima ēḁe chaka ea soaxonō,’ imisfo. Nāskakē ē ato chaka soaxotiroḁa. Akka fetsaḁe yoikī iskafaifono: ‘Ē aḁara chakafamis. Nāskakē a ē imis keskara ē anā ipaima,’ ikaifono ē ato chaka soaxotiro. Akka nā nō sharakōi ikaifoōnoax ē onima. Akka ē oni a yora chakafo āto chaka ato soaxoxiki. Akka ē mato yoipai mā tāpinō a Niospa ato shināmanaino iskafakī kenenifo: ‘Mā yoināfo retexō ea ināxiki mā koamis māto chaka soapaikī, askara ē fichipaima. Akka ē fichipai fetsaḁo mā ato noikī mā ato sharaḁaxōaito,’ ixō kenenifo.

“Akka ē onima a yora sharaḁaōnoax. Askatamaroko a yora chakafoōnoax ē oni ato chaka soaxoxiki,” ixō Jesús ato yoini.

Nā foni tenemisfoḁe Jesús yōkanifo
(Mr. 2.18-22; Lc. 5.33-39)

¹⁴ Juan āḁe inafo fēkaxō Jesús yoinifo iskakakī: “Fariseofāḁe foni tenekī feyafamisfo Nios shinākakī. Nōri askafamis foni tenekī Nios shinākī. Akka, ¿aḁeskakī mīōxō tāpimisḁāḁe foni tenekanimamē?” fanifo.

* 9:9 Mateo ane rafeya ipaoni. Āḁe ane fetsa Levi.

¹⁵ Askafaiḡafe Jesúḡ ato kemani: “Feronāfake āḡiyaino, yorafo ano fisti ichanākaxō afara fetsa fetsatapafo afeta pitirofo inimayanā, aicho fakakī akiki inimakakī. Nā kēromā āḡe fene ano ato fe ikano tsōa foni tenetirofoma inimakakī. Akka mā fene rēteafono aḡe yoraḡāḡe shinākakī foni tenetiro,” ixō Jesúḡ ato yoini.

¹⁶ “Tsōa sama fenaya sama xini kishi fatiroma. Nō askafaino sama fena samama chakanatiro. Nāskatari sama fena fe sama xini isharatiroma. Nāskakēri nā ē mato yoiai keskara mā nikakōixō a mā ipaoni keskara anā mā itiroma māmāi ea nikakōiax. A mā ipaoni keskara shināmakita nāskax māto yora fena keskara shara itiro. ¹⁷ Nāskarifakī tsōa māmā fata koiro pisha xini mēra nanetiroma nā māmānō faraxakaino toxamāiyanō. Nāskakē nā māmā fata fe koiro pisha chakanatirofo. Akka nā māto xinifāḡe mato yoimisfo keskara fe nā ē mato yoiai keskara ōsinātiroma. Nā ē mato yoiai keskara Niospa meka sharakōi. Akka a māto xinifāḡe mato yoimisfo anori shināx mā isharatiroma. Niospa mekaya meka chaka ōsinātiroma. Nāskakē mā nikapaifi mā shināsharatiroma. Nāskarifakī tsōa māmā fata koiro pisha xini mēra nanetiroma nā māmānō faraxakaino toxamāiyanō. Nāskakē nā māmā fata fe koiro pisha chakanatirofo. Akka nā māto xinifāḡe mato yoimisfo keskara fe nā ē mato yoiai keskara ōsinātiroma. Nā ē mato yoiai keskara Niospa meka sharakōi. Akka a māto xinifāḡe mato yoimisfo anori shināx mā isharatiroma. Niospa mekaya meka chaka ōsinātiroma. Nāskakē mā nikapaifi mā shināsharatiroma,” ixō Jesúḡ ato yoini.

Jairo fake xotofake mā nakē Jesúḡ otofani. Askatari kēromāri Jesúḡ rapati mēeax sharani

(Mr. 5.21-43; Lc. 8.40-56)

¹⁸ Nānori Jesúḡ ato yoiaino judeofāḡe xanīfo nokoni. Jesúski nokoxō xanīḡāḡe a nāmā ratokonō mai chachipakefoḡā yoini: “Ēḡe fake xotofake rama naa. Akka mī kaxō mī mēkemā mī ramāino anā ototiro,” xanīḡāḡe Jesúḡ fani.

¹⁹ Askafaino Jesúḡ finināḡata aōxō tāpimisfo fe kani xanīfo acho. ²⁰ Askatari nānori kēro imi nesemima ini, doce xinia amis imi nesekima. Nā kēromā Jesúḡ kaito acho kaxō a kachikirixori āḡe tari kexa ramākani. ²¹ “Ē āḡe tari mēeax ē sharatirora,” ixō āḡe shinā mēraxō shināni. ²² Akka Jesúḡ ifiakeḡafāta nā kēro fichini. Fichita yoini: “Yōxashta, rateyamafe. Mī ea chanīmara faax mā mī sharakī,” Jesúḡ faino nā kēro imi neserisatani.

²³ Askata mā Jesúḡ nokoax xanīḡāḡe pexe mēra ikikaini. Anoxō Jesúḡ ōia yoraḡāḡe āto xāiti manenifo, yora fetsafo oiakani sheesaifono. ²⁴ Askaifono Jesúḡ ato isḡafani: “Nonoax fōtakāḡe. Na fakekai naamaki. Oxaki,” ato faito Jesúḡ ōsanifo. ²⁵ Ato kāimata xotofake mētsoinīfoḡānāni koshikōi finināḡafani. ²⁶ Nāskata Jesúḡ nā xotofake naa otoakē nikakanax pexefo tii chanifofāsanifo.

Fēxo rafe Jesúḡ sharafani

²⁷ Nāskata Jesúḡ xanīḡāḡe pexe anoax kaino fēxo rafetari chīḡafainifo isḡafayanā fāsikōi: “Mī nōko xini David fenaki, noko noife,” fanifo. ²⁸ Askafaifono Jesúḡ pexe fetsa mēra ikikaini. Nāno aḡe ikiafono Jesúḡ ato yōkani: “¿Mā chanīmara faimē a ē mato sharafatiro?” ato faito, “Ēje, Ifo, nō mia chanīmara fai,” fanifo. ²⁹ Nāskata ato fero ramākayanā ato yoini: “Ea chanīmara faaxfi mā sharaikai,” ato fani. ³⁰ Ato askafaino ōisharanifo. Nāskakē Jesúḡ ato yoisharani: “Ea nikakapo. A ē mato sharafaa tsoa yoiyamakāḡe,”

ato fani. ³¹ Akka ato anori yoifekē nā Jesús sharafaa nā ano ikafo ato yoifofāsafanifo nā rafeta.

Feronāfake mekamisma Jesús sharafani

³² Nā fēxo rafe imisfo pexe mēranoax tsekefainaifono fetsafāfe feronāfake mekamisma Jesúski efenifo Jesús sharafanō. Niafaka chaka a mēra naneano mekamisma ini. ³³ Jesús mā feronāfake makinoa niafaka chaka potano nā feronāfake mekamisma mekani. Nāskakē nā ano ikafo rateyanā yoinānifo: “¡Kee, oikapo! Na nōko mai Israel anoxō Jesús akai keskara tsōa ōimisma,” ikanax yoinānifo. ³⁴ Askafaifono fariseofāfe yoinifo: “Nato nīafaka xanīfoōxō niafaka potai,” ikanax yoinānifo chakafakī mekafakani.

Jesús yorafo shinākōini

³⁵ Nāskakē Jesús pexefo tii judeofo ikafo ano kafāsani. Judeofāfe ichanāti pexe mēraxō Jesús Niospa meka shara ato yoisharani iskafakī: “Isharakāfe. Nios māto xanīfokōi ipai kiki,” ixō ato yoifofāsafani. Nāskaxō a isinī ikaifo fetsa fetsatapafo ato sharafani. ³⁶ Yorafā rasi akiki feaifono ōikī Jesús ato shinākōini fekaxteiaifāfe ōikī, nā ovejafo ifomaiskanax tsōa ato kexeyamano fofāsatirofo keskara ato ōikī. ³⁷ Nāskaxō a aōxō tāpimisfo ato yoini iskafakī: “Yora ichapafāfe ea nikayamafiaifono ichapatoma ea yonoxokani eōnoa ato yoikakī. Nāskakē mā Epa Nios kīfikāfe a yonoxomisfo katonō eōnoa ato yoinōfo. ³⁸ Akka Epa Nios kīfikāfe yorafo nīchinō ēfe meka ato yoitanōfo ea Ifofanōfo,” ixō Jesús ato yoini.

10

Jesús aōxō tāpimisfo doce feronāfake ifini

(Mr. 3.13-19; Lc. 6.12-16)

¹ Askata Jesús aōxō tāpimisfo kenani: “Ekeki fekāfe,” ato faino, akiki foaifono ato yoini aōxō yorafo sharafanōfo, a niafaka chakafo yorafo mēra nanea ato makinoa potanōfo, a isinī ikaifo fetsa fetsatapafo aōxō sharafanōfo.

² Nā feronāfake docefāfe āto anefo iskarakī: fetsa Simón. Nā Simón āfe ane fetsa Pedro. Āfe exto Andrés. Fetsafori āto ane Santiago, āfe exto Juan, nā rafe Zebedeo fake ini. ³ Felipe, Bartolomé, Tomás, Mateo, nā Mateo Roma anoxō xanīfo kori fixomis ini. Askatari Santiago fetsa, Alfeopa fake, Tadeori ini. ⁴ Simón fetsa nāato āfe kaifo feta romanōfo potapaini anā israelifo yonomayamanōfo. Askatari Judas Iscarioteri ifini, nāato Jesús chakafakī ato achimani Jesús retenōfo. Nā tii Jesús ifini aōxō tāpimiskōi inōfo.

Jesús aōxō tāpimisfo nīchini Nios Xanīfoōnoa ato yoitanōfo

(Mr. 6.7-13; Lc. 9.1-6)

⁵ Nāskata Jesús aōxō tāpimisfo nīchini ato iskafakī yoianā: “Nā nōko kaifo-mafāfe āto mai ano foyamakani. Askatari nā samāritanōfo ikafo anoriri foyamakani. ⁶ Akka nā nōko kaifo israelifo ato mēra fotakāfe. Nāfo oveja fenoafo keskarafokī. ⁷ Fokaxō ato yoikī iskafatakāfe: ‘Mā chaima nōko Ifo Nios oi kiki nōko xanīfo finakōia ixii,’ ixō ato yoitakāfe. ⁸ A isinī ikaifo ēfe sharaōxō ato sharafatakāfe. Askatari naafono ato otofatakāfe. A rashkishii fetseaifori ato sharafatakāfe. A niafaka chakafori āto mēra naneafo ato makinoa pōtatakāfe. Akka ēfe shara kaxpa ē mato minia afaa ē mato yōkama. Nāskari fakī, ato kaxpa sharafatakāfe.

⁹⁻¹⁰ “Akka mā kakī afaa mā fokiki. Māto kori foyamata, māto rapati fetsa foyamata, māto sapato fetsa foyamata, māto forosa foyamata, māto mēsteti

foyamata fakāki, eōxō ēfe meka mā ato tāpimani kaikai. Nāskakē mā afara yopaito mato inātirofo mā pinō a mato nikamisfāfe.

¹¹ “Mā pexe rasi ano nokoxō nā feronāfāke Nios Ifofasharakōia fenakāfe. A keskara fichixō āfe pexe ano iyoxō Niospa meka ato yoisharaxikaki nā mā kaitīa. ¹² Nā pexe mēra ikixō ato yoikī iskafakāfe: ‘Aicho. Nō mato ōiyoa,’ ato fakāfe. ¹³ Akka mato ifisharaino, mā tāpitiro nā pexe ifāfe afe yorafo ikisharamis. Nā mā yoiai keskafakī Epa Niospa axosharai tanaima shara inō. Akka a mato ifisharayamaifo, afāfe afe yorafo ikisharamisfoma. Nāskakē nā mā yoiai keskafakī Epa Niospa ato axosharaima. ¹⁴ Akka pexe fetsa mēraxō mato ifikaspafono, a pexe mēranoax mā tseketiro. Askatari pexe rasi mēraxori mato askafaifono, mā anoax katiro. Mā anoax tsekekaikī mātō taekinoa mā mapo taa taa atiro ato ōimakī. Mā askafaino tāpitirofo Nios atoki inimayamaino. ¹⁵ Ē mato paraima yoi. Nā pexe rasi Sodoma anoafo feta Gomorra anoafāfe afara chakakōi fapaonifo. Nāskakē Niospa nā ato omiskōimanaitīa ato omiskōimaxii. Akka nā mato nikakaspafono nāfo ato omiskōimaki finakōixii,” ixō Jesús ato yoini.

“Mato omiskōimakani kiki,” ixō Jesús ato yoini

¹⁶ Anā Jesús ato yoini iskafakī: “Ōikapo. Ē mato nīchikai nā yora chakafo mēra. Akka nā yora chakafāfe nā poomānā ovejafo pipaitiro keskafakani kiki mato. Mato askafaifono nā poomā onāyākōi keskara ikāfe eōxō tāpisharakāfe. Nā rīfi afaa chaka shināmīma keskafakī māri askara shinākāfe. ¹⁷ Ōisharakaki. Nā yora chakafāfe mato achikaxō āto xanīfofo ano mato iyotirofoki. Nāskakaxō āto ichanāti pexe mēraxō mato koshatirofoki. ¹⁸ Nāskakaxō xanīfofo ano mato iyotirofo eōxō. Akka anoax na meka shara eōnoa mā ato yoixii. Askatari judeofomari mātō kaifomafori na meka shara eōnoa mā ato yoixii. ¹⁹ Akka mato achikaxō xanīfofo ano mato ināifono shināchakayamakāfe afeskaxō mā ato yoisharaimākai. Xanīfofo ano mato iyofaifono Epa Niospa mato shināmanaino mā ato yoisharaxii. ²⁰ Akka mā ato yoi mā mekaima Epa Niospa Yōshi Shara mekai mā ato yoiaino.

²¹ “Nāskatari yorafāfe āto extofo ato achimaxikani, yora fetsafāfe ato retenōfo. Askatari ato apafāferi āto fakefo ato achimakani fetsafāfe ato retenōfo. Fakefāferi āto apa yafi āto afaki ōitifishkikakī ato achimakani fetsafāfe ato retenōfo. ²² Mā ea chanīmara fakē nāskakē eōxō mato yorafāfe noikaspakani. Akka mato noikaspafiaifono mā eōnoax omiskōifikī mā ēfe meka nikasharakōiaito ē mato kexesharakōixii Epa Nios fe mā isharpakexanō. ²³ Akka pexe rasi anoax mato omiskōimanaifono, pexe rasi fetsa ano ichotakāfe. Akka ē mato yoisharanō. Ea nikasharakāfe. Mā israelifāfe pexe rasi anoaxō keyokōi mā ato yoioamano, ē orisaxii.

²⁴ “Akka a aōxō tāpimisfāfe a ato tāpimamis finōtirofoma. Askatari a yonoxomisfāfe āfe patoro finōtirofoma. ²⁵ Akka a aōxō tāpimisfo a ato tāpimamis keskara ikani. Askatari a yonoxomisfo āto patoro keskara itirofo. Nāskak māri ea keskara ixii. Nāskakē nā ea chakafamisfo keskafakī matori chakafakakī finakōixikani. Nāfāfe ea noikaspakakī ea yoimisfo iskafakakī: ‘Mī niyafaka yōshi chakafāfe xanīfo. Mī Beelzebū,’ ixō ea yoimisfo. Ē mātō Ifofekē ea askafamisfo. Akka matori askafakakī finakōixikani,” ixō Jesús ato yoini.

*Akka Nios fistiki nō mesetiro
(Lc. 12.2-7)*

²⁶ Anā Jesús ato yoini iskafakī: “Akka mato omiskōimafiaifono, atoki rateyamakāfe. Akka nā afara one yoifimisfono Niospa ato xafakīa kāimaxoxii, afarari fomāpaimisfono, nāfori Niospa ato xafakīa kāimaxoxii. ²⁷ Akka nā ē mato yoimis yorafāfe ato ferotaifi xafakīa ato yoisharakāfe. ²⁸ Akka mato retapaiifaifono rateyamakāfe. Afāfe mato retetitirofono, akka māto fero mēsho afeska fatirofoma. Atoki ratetamaroko, Nios fistici mesekāfe. Nāato noko retexō nōko fero mēsho nā omiskōipakenakafo mēra potatiro.

²⁹ “Nāskakē a yora chakafo retemitsamisfoki atoki rateyamakāfe. Epa Niospa mato kexesharai kiki. Shinākapo. Peya mīshti afaayamafekē Epa Niospa afo shināki. Ato namapaiyamaino tsōakai nā peya mīshtifo retetiroma. ³⁰ Akka ē mato yoi, Epa Niospa māto foo fisti rasi mato tāpikakōia. ³¹ Nāskakē rateyamakāfe. Nā peya mīshtifo kexesharamis keskafakī, matori Epa Niospa kexesharakī finakōiakī,” ixō Jesús ato yoini.

“Akka atiri yorafāfe, ‘Jesús ēfe Ifora’ ea famisfo yorafāfe ferotaifi. Akka atirifāferi, ‘Jesús ēfe Ifomara’ ea famisfo,” ixō Jesús ato yoini
(Lc. 12.8-9)

³² Anā Jesús ato yoini iskafakī: “Yora fetsafāfe ferotaifi, ‘Jesús ēfe Ifora’ ea faifāfe ēri ēfe Epa Nios nai mēra ika anoxō, ‘Nafō efe yoraki’ ē ato faxii. ³³ Akka nā yora fetsafāfe ferotaifi, ‘Jesús ēfe Ifomara’ ea faifāfe ēri, ‘Nafō efe yorafomara’ ē ato faxii ēfe Epa Nios arixō,” ixō Jesús ato yoini.

“Akka atirifāfe ea chanīmara faifono, atirifāferi ea chanīmara fakanima,” ixō Jesús ato yoini

(Lc. 12.51-53; 14.26-27)

³⁴ Anā Jesús ato yoini iskafakī: “;Mā shināimē maitio anoax keyokōi yorafō eōnoax inimanōfo ē oni? Maa. Anorima. Akka nā ē mato yoi ai keskara tsōa anoris shinākanima. Akka nā ea chanīmara faifāfe shara shināifono akka nā ea chanīmara faafāfema afara fetsa chakafo shinākani. ³⁵ Akka āfe apa ea chanīmara faino āfe fāke ea chanīmara fakaspakī āfe apaki ōitifishkitiro. Askatari āfe āfari ea chanīmara faino āfe fake xotofāke ea chanīmara fakaspakī āfe afaki ōitifishkitiro. Askatari āfe fāfafa yōxafāfe ea chanīmara faino, āfe fāfafa naetāfa ea chanīmara fakaspakī, āfe fāfafa yōxafoki ōitifishkitiro. Akka ē nai mēranoax matoki oyamanikē askakeranafoma. ³⁶ Eōxō nānorifos shinākanima. Akka fetsafāfe ea chanīmara faifono eōxō ato fe yorakōifo noikaspatirofo.

³⁷ “Fētsa āfe apa yafi āfe afa noikī finakōixō akka ea noikī finayamax, ea Ifofamis itiroma. Askatari fētsari āfe fake feronāfake yafi āfe fake xotofake noikōixō, akka ea noikī finayamax ea Ifofamis itiroma. ³⁸ Akka fētsa yoitiro iskafakī: ‘Ea omiskōimafiaifono ēfe Ifo ē potatiroma,’ ixō yoitiro. Akka fētsari yoi kī iskafatiro: ‘Ea omiskōimanaifono ē Jesús Ifofaima,’ ea askafax efe nīpaxatiroma. ³⁹ Akka fētsa iskafakī shināi: ‘Ē Jesús Ifofaito ea omiskōimakanira,’ ixō shinākī, ēfe meka kachikiri faax, nā keskara yora naax omiskōipakenaka. Akka fetsa eōnoax omiskōifiki ea potaxma nā keskara yora naax efe isharaipakenaka,” ixō Jesús ato yoini.

Akka fetsafāfe ato sharafaxōaino, Niospa afara shara ināxii

(Mr. 9.41)

⁴⁰ Anā Jesús ato yoini iskafakī: “Akka fetsafāfe mato nikakōikakī eari nikakōikani. Askatari fetsafāfe ea nikakōikakī ēfe Epa Niosri nikakōikani nāatomāi ea nono mai ano ea nīchinino. ⁴¹ Akka fētsa shinākī iskafatiro:

'Nāatofi Niospa meka yoimiski. Nāskakē ē āfe meka nikasharai,' ixō yoitiro. Akka nā Niospa meka yoimis afara shara ināi keskafakī ari Niospa ināsharaxii. Nāskakē fētsari shinākī iskafatiro: 'Nā feronāfake sharaki Niospa meka nikasharamiski. Nāskakē āfe meka ē nikakōi,' ixō shināino, nā Niospa meka yoimis afara shara ināi keskafakī ari afara shara ināsharaxii. ⁴² Fētsa eka chanīmara faxō ea Ifofakī, aato shināi iskatiro: 'Ē Jesūs Ifofamis. Nāskakē afara shara ē axōi,' ixō shinākī afara shara axotiro. Nāskakē ē yoinō, ea nikakapo. Faka pishta mā fetsa ayamakē Niospa matori afara shara ināsharaxii," ixō Jesūs ato yoini.

11

Juan aōxō tāpimisfo Jesúski nīchini (Lc. 7.18-35)

¹ Askata Jesūs aōxō tāpimisfo doce ato tāpimaxō ato nīchini yorafo Niospa meka shara ato tāpimatanofo. Jesūs mā ato yoikī keyoax ari kani, fetsafo tāpimanikai a pexe rasi chaimashta ikafo ano.

²⁻³ Askatari Juan Maotista karaxa mēra ixō nikani Jesūs Apa Niosxō yorafo sharafaito. Nāskakē tāpisharapaini. Nāskaxō karaxa mēraxō aōxō tāpimisfo nīchini Jesūs ano. Mā ato nīchia fōkaxō yōkanifo: "¿Mīmē Cristo nā Epa Niospa nokoki nīchiai, askayamai fetsa nokoki oiraka nā nō manai?" ixō yōkatanōfo Juan ato nīchini.

⁴⁻⁵ Mā Jesūs ano nokokaxō yōkanifo. Askafaifono Jesūs ato kemani: "Fokaxō Juan yoitakāfe a mā ōiyanā a mā nikafori. Yoitakāfe, mā fēxofāfe sharakaxō ōisharakani kiki, askatari nā chatofori mā sharakanax niafoki, a rashk-ishiaifori mā sharafokī, a pastofāferi mā nikasharakani kiki, a namisfori mā otoafoki, a afaamaisfāferi Niospa meka shara nikakani kiki afesakxō Epa Niospa noko iŋtiromakī." ⁶ Nāskaxō ato yoini: "Akka a ea chanīmara fasharakōia afara fetsa shinātama ekeki inimakōitiro," Jesūs ato fani, Juan ina rafe.

Jesūs ato yoini Juanoa

⁷ Nā a Juan ato nīchia rafe mā foaifono Jesūs yorafo yoikī taefani Juanoa. "¿Afesakī tsōa istoma anoa Juan ōifokani fonifomē? Juankai nā nēfe tafa pei taka taka akai keskarama. Nāskarifiakī mā mā tāpia Juankai ōiti ranāyama.

⁸ Akka, ¿tsoa ōikai mā kamismē? Ōitsai, feronāfake rapati sharakōi safekē ōikai mā kamisraka. Akka mā mā tāpia a rapati sharakōi safemisfo xanīfofōfāfe āto pexe anoxō rapati sharakōi safetirofo. ⁹ Akka, ¿tsoa ōikai mā kamismē? Nā Niospa meka yoimis ōikai mā kamisraka. Akka chanīma, nā Juan Niospa meka yoimis finakōia, fetsafo keskarama. ¹⁰ Akka nā Juanoa yoikī Isaiás kirika keneni iskafakī:

Mī nai ariax mai ano oyoamano, nā ēfe meka yoimis ē nīchi taefakī mīnoa ato yoaino itipinī sharakaxō mia nikakōinōfo, ixō keneni. ¹¹ Akka ē mato yoi ē mato paraima. Tsōakai Juan finōama. Juan yoimis keskara meka shara noko tsōa yoimisma. Juanki Nios inimakōimimis. Akka fetsafāferi afaayamafikaxō ea Ifofaifono Nios atoki inimakōirikai. Nāskakē Juan Maotista finakōifiano fetsafāfe finōkōiafo Niospa ato ōimis.

¹² "Nā Juan ato matotisa fapanitīa Niospa meka nikanixakakī, iskaratiari yorafo Nios ika ano ikipaikōikani. Iskakī shināmisfo; 'Nios xanīfo ariax ēri āfe yora ipai afe nīpaxakī. Afaa pishtakai ea nēfetiroma ē āfe yora inō,' ixō

shināmisfo. ¹³ Akka Juan oniyamano taeyoi nā Niospa meka yoimisfo feta Moisésri keneni iskafakī: ‘Nā noko ifimis nōko Xanīfo finasharakōi oxii,’ ixō kenenifo. Akka nā Niospa meka yoimisfāfe kenenifo keskara nānorikōi Juan ato yoini. ¹⁴ Niospa meka yoimisto keneni iskafakī: ‘Ē matoki Elías nīchixii,’ ixō Niospa yoini. Akka mā āfe meka chanīmara fapaikī mā tāpitiro nā Juan Elías keskarari. ¹⁵ Mā ea nikatirokī ea nikakāfe. Ēfe meka mātō shinā mēra nanekāfe,” ato fani.

¹⁶ Nāskaxō anā ato yoini: “Iskaratīa na niyoafo afe keskarafomāki ē mato yoinō mā tāpinō. Nā fakefo āto kaxeti anoax kaxekakī āto yamafo kenatirofo tai tai iyanā. Akka mā āto yamafo nokokanax a ato yamafāfe fichipaiyaifo keskai tsoa kaxesharayamaino ato yoitirofo iskafakakī: ¹⁷ ‘Nō nōko xāiti maneaino akka mā mairamisma. Askatari shināmitsayanā nō fanāikaino mā oiamisma,’ ixō ato yoitirofo. Akka māri nāskariai mā tsoaki inimamisma. ¹⁸⁻¹⁹ Nāskafakīri Juan yafi ea mā mekafai. Juankai pikī finapaimisma nā ōiai pishta pimis, askatari fimi ene pae pishta ayamisma. Nāskakē aōnoa mā yoia iskafakī: ‘Nā Juan niafaka yōshi chakaya,’ mā famis. Akka ē yorakōi ē Niospa Fakekōi piyanā ē ayasharamis. Akka mā ea iskafakī yoimis: ‘Jesús ichapakōi piimis, askatari pae ayamis,’ mā ea famis. ‘Nāskax yora chakafo fe rafemis, a romanō xanīfo kori fixomisfo ferī rafemis,’ mā ea famis. Akka ē shara imis ea Niospa ea shināmanaino. Juanri shara imis Niospa shināmanaino. Yorafāfe noko ōikī tāpitirofo,” ixō Jesús ato yoini.

*Pexe rasi anoaxō Jesús nikakaspanifo
(Lc. 10.13-15)*

²⁰⁻²¹ Askata anori ato yoita Jesús nā pexe rasi anoafo ato yōani iskafakī: “Ooa, Corazin anoafāfe Betsaida anoafo fe, mā omiskōi finakōixii. Akka Tiro anoaxō Sidón anoaxori nā ē mato ōimana keskara, ē ato ōimanano āto chaka xatekaxō Epa Nios Ifofakeranafo. ‘Ooa, nō afara chakafamiskī iskaratīa nō anā Nios Ifofai,’ iyanā rāfikaxō āto rapati chapo safekaxō chii māpo raish akeranafo fetsafāfe ato ōinōfo. ²² Akka Niospa Tiro anoafo yafi Sidón anoafori ato omiskōimafiakī ato omiskōimasharaima, akka matoroko omiskōimakī finakōixii. ²³ Akka, ĵnō Capernaum anoax nō nai mēra kai Epa Nios ari ixō mā shināimē? Maa. Nā omiskōipakenakafo mēra ē mato potaxii. Akka yōra atiroma keskara afara shara ē mato ispafiano mātō chaka mākai xateama. Akka nā ē mato ōimana keskara Sodoma anoafo ē ato ōimamiskē āto chaka xatekeranafo. Nāskakē keyokeranafoma. Askatari āto pexefā rasi keyokeranama. ²⁴ Ē mato yoinō. Afetīara Epa Niospa nā chanīmara faafoma ato omiskōimani. Nā Sodoma ano ipaonifo omiskōixikani. Akka māfi omiskōi finakōixii,” ixō Jesús ato yoini.

*“Ekeki fekāfe ē mato shināmasharanō,” ixō Jesús ato yoini
(Lc. 10.21-22)*

²⁵ Ato askafata Jesús Apa kīfimi iskafakī: “Epa, ē mia aicho fai. Keyokōi nai mēranoafoya nono mai anoafo mī āto Ifo. Mī sharafinakōi. Akka atirifāfe kirika kene tāpifikaxō mia Ifofakaxoma. Iskafakī shināmisfo: ‘Tsoa fetsakai noko keskarama. Nō tāpikōia,’ ixō shināmisfo. Akka nāfo mī meka mī ato tāpimanima. Akka nā kirika kene tāpikaxoma, mia Ifofaifono nāfo mī meka shara mī ato tāpimani, ²⁶ nā mī fichipaiyai keskafakī,” ixō Jesús yoini.

²⁷ Askata anā Jesús ato yoini iskafakī: “Epa Niospa a tāpia keskara eari keyokōi tāpimani, ēmāi āfe Fakekē. Akka tsōakai ea tāpiama, ēfe Epa fistichi ea tāpikōia. Nāskarifikī tsōa ēfe Epa tāpiama, akka eres fisti ē tāpikōia. Akka

nā fetsafori ě ato tãpimanaino nãfãferi Epa Nios tãpitirofo. ²⁸ Akka mã shinãchakakõikĩ ea kifikãfe. Nãskaxõ mã ea chanĩmara fasharayanã mã ea nikasharaito a mato fekaxtefai ě mato potaxotiro anã mã shinãchakayamanõ. ²⁹ Akka ea shinãkõikĩ eõxõ mã tãpisharakõitiro. Ě mato noikĩ fenãmãshita ě mato yonomamis tenemasharayanã. Nãskaxõ mã anã shinãchakatiroma. ³⁰ Akka a ě mato amapaiyai keskara anã fekaxma. Nãskakẽ anã mãto õiti fekaxtetiroma,” Jesũs ato fani.

12

Nã judeofãfe pena tenetitĩa Jesũsxõ tãpimisfãfe aros keskara metesfenifo (Mr. 2.23-28; Lc. 6.1-5)

¹ Askata judeofãfe ãto pena tenetitĩa Jesũs aõxõ tãpimisfo fe tarepa kani. Aõxõ tãpimisfãfe fonãikakĩ aros keskara meteskaxõ pii fonifo. ² Fariseofãfe õikakĩ Jesũs yoinifo: “Õipo, Jesũs. Iskaratĩa nõko pena teneti. Akka Moisés noko yoini na pena tenetitĩa tsõa pishta yonotiroma. Akka mã inafãfe yonokani na aros keskara meteskakĩ,” ixõ yoinifo.

³ Ato askafaifono Jesũs ato kemani: “Akka, ¿a nõko xini Davidõnoa kirika kenenifo keskara mã õimismẽ David afaa afeska fanimẽ ãfe inafõ feta fonãikõikĩ?” ⁴ Nãskaxõ Nios kifiti pexefã mẽra ikikaixõ a mẽranoa pãa ato pikĩni fonãikõikĩ ano afaayamano. Akka nã pãa nã judeofo ato Nios kifixomisfonã ini. Nãskakẽ fetsafãfe nã pãa tsõa pitiroma ini. Nãnõri Niospa Moisés yoifinino akka fonãikõikĩ David pini a afe rafeafõ feta. ⁵ Akka, ¿a Moisés keneni keskarari mã tãpiamamẽ? Iskafakĩ yoini: ‘Nios kifiti pexefã mẽra a ato Nios kifixomisfãfe yonotirofo nã pena tenetitĩa. Nãskakẽ afaa chakafakanima,’ ixõ Moisés keneni. ⁶ Nios kifiti pexefã sharafiano akka ě na pexefã finõkõia. ⁷⁻⁸ Epa Niospa shinãmanaino Niospa meka yoimisto Oseas kirika keneni iskafakĩ: ‘Mã yoinãfo inafõ retexõ ea inãxikĩ, mã koofamis ea shinãkĩ nã shara. Askafiano fetsafo noikĩ, mã ato sharafaxõaito ě õimis nã sharafinakõia,’ ixõ kirika keneni Niospa shinãmanaino. Niospa noko yoimis keskara mã tãpisharaxõ, mã ato yoikĩ chakafakeranama. Nãskakẽ ě mato yoi iskafakĩ, ěfe Epa Niospa ea nãmã nĩchini xanĩfofinakõi ě inõ. Nãskakẽ ě yoitiro afaa nõ atiomakĩ pena tenetitĩa. Ě mato yoi na ěfe inafãfe akaifo keskara shara,” ixõ ato yoini.

Feronãfake mẽke yõshiya Jesũs sharafani (Mr. 3.1-6; Lc. 6.6-11)

⁹ Nãskata Jesũs nãnoax kaax judeofãfe ãto ichanãti pexe mẽra ikitoshini. ¹⁰ Nãno feronãfake ãfe mẽke yõshia ini. Nãskakẽ fariseofãfe Jesũs yõkanifo afara chakafaito yõaxikakĩ. Iskafakĩ yõkanifo: “Maestro, pena tenetitĩa, ¿nõ yora sharafatiromẽ?” ixõ yõkanifo.

¹¹ Askafaifono Jesũs ato kemani iskafakĩ: “Mã ovejayaxõ mãto oveja kini mẽra pakeano, ¿mã pena tenetitĩa mã ifirisafatiromamẽ?” ato fani. ¹² “Akka yorafo sharafinakõiafo, oveja keskarafoma. Nãskakẽ yorafo nõ shinãkĩ pena tenetitĩa nõ ato sharafatiro. Nãskaxõ nõ afaa chakafaima. Na pena tenetitĩa yorafo nõ sharafakĩ Epa Niospa õia shara,” ixõ Jesũs ato yoini.

¹³ Nãskata a feronãfake mẽke yõshiya Jesũs yoini iskafakĩ: “Mẽshafe,” faino, nã feronãfake mẽke yõshiya mẽshatanaino ãfe mẽke sharatani. Nã takai fetsa keskara shara ini. ¹⁴ Nãskata fariseofo mã tsekekanax yoinãnifo: “¿Afeskaxõ nõ Jesũs ato achimatiromẽ retenõfo?” ikanax yoinãnifo.

Epa Niospa shināmanaino Isaías keneni Jesúsnoa a inōpokoai yoikī

¹⁵ Jesús nānoax kani mā tāpiax retēpaiyaifono. Nāskakē anoax kaino yorafā rasichi chīfafainifo. Akka a isinī ikaifo Jesús ato sharafapani. ¹⁶ Akka ato sharafaxō ato yoini: “Ē Niospa Fakekī tsoa yoiyamakāfe,” ato fani. ¹⁷ Nāskarakōi Isaías kirika keneni Niospa shināmanaino Jesúsnoa. ¹⁸ Iskafakī keneni:

Ōikapo. Nakā ea yonoxomis ē katoni. Ē aō noikōi. Ē akiki inimakōi. Ēfe Yōshi Shara ē afe rafemamis. Nā maifotio ano ikafāfe āfe meka nikasharaifono ē āto chaka soaxotiro efe yora inōfo. ¹⁹ Nakai yora fetsafo fe feratenāxima. Meka mitsisipato ato yoima. ²⁰ Akka tafa kerexma ē xatexima. Askatari chii ketesharayamaito ē nokafaxima. Askatamaroko ē ketefaxii. Nāskarifikā yorafāfe ēfe meka nikapafifikakī nikasharayamaifono ē ato potaima. Ato potatamaroko ē ato axosharai ea Ifo sharafanōfo. ²¹ Nāskakē keyokōi maitio ano ikafāfe yoixikani iskafakakī: “Nā fistichi noko ifitiro nō aōnoax Epa Nios fe nīpaxanō,” ixō yoixikani. Nāskara Isaías yoikī kirikaki keneni. Nāskarakōi nō ōi Isaías keneni.

*Yora fetsafāfe, “Jesús niafakaōxō ato sharafaira,” fanifo
(Mr. 3.20-30; Lc. 11.14-23; 12.10)*

²² Askata Jesúski feronāfakē fēxo efenifo. Askatari mekamisma ini. A mēra niafaka chaka naneano Jesús sharafanō akiki efenifo. Nāskakē Jesús a fēxo ōimasharini, askatari mekamasharini anā mekanō. ²³ Askafaito ōikani yoinānifo: “¡Kee! Ōikapo. Jesús afama mīshti shara fatiro. Akka, ¿namē David āfe fena nā Epa Niospa katoni, nāmē na nō manai?” ikax yoinānifo.

²⁴ Askafaiifāfe nikakaxō fariseofāfe yoinifo: “Maa. Natokai Epa Niosxō niafaka chaka potatiroma. Akka nā niafaka chakafāfe āto xanīfo nā Beelzebúxō ato makinoa niafaka chaka potai,” ikax yoinānifo.

²⁵ Askafaiifono Jesús tāpini a shināifo keskara. Nāskaxō ato yoini: “Yorāfo paxkanākanax āa ranā retenāi keyotirofo. Askatari pexe rasi anoax āa ranā retenāi keyotirofo. Nāskax isharatirofoma āa ranā retenāitirofo. ²⁶ Nāskarifiakī Satanās āfe niafaka chakafo potaxō anā afaa afeska fatiroma. ²⁷ Akka mā ea iskanfai: ‘Nato niafaka xanīfoōxō niafaka chakafo ato makinoa potai,’ mā ea fai. Akka ea yoikapo, ¿tsōaōxō mātō inafāfe niafaka chakafo potafomakī? Akka, ‘Niosxō nōko inafāfe niafaka chakafo potafo,’ ixō mā ea yoitiro. Nāskakē mā tāpitiro ēri Niosxō niafaka chakafo potaino. ²⁸ Akka ē niafaka chakafo Niospa Yōshi Sharaōxō ato makinoa potaino mā tāpitiro a Niospa matoki nīchiai mā nokoano. Nāskakē yorafāfe ea Ifo sharafaxii.

²⁹ “Ē anā mato yoinō, nikasharakāfe. Akka, ¿afesaxō yorafāfe feronāfakē mitsisipakōi āfe pexe kene mēranoa āfe rapatifo fiatirofomē? Akka rapati fiakakī achixō metexkere akaxō āfe rapati fiatirofo. Askafakaxō fiaifonokai ato afeska fatiroma.

³⁰ “Akka fetsa efe rafepaikima ea nikakaspaitiro. Akka fētsa ēfe meka nikakaspai ea noikaspai. Nāskakē fetsafāferi ea Ifofaifono fichikaspakani. Askakimaroko emakinoa ato paxkanāfapai Epa Nios Ifofayamanōfo.

³¹ “Nāskakē ē mato yoi. Fētsa afara fetsafo chakafakē Niospa āfe chaka soaxotiro. Askatari fētsa afara chaka yoaino Niospa āfe chaka soaxotiro. Akka ēfe Yōshi Shara chakafakī mekafaito, Niospa āfe chaka soaxonakama. Āto chaka neepakenaka. ³² Askatari fētsa Niospa Fake yorakōi chakafaino Epa Niospa āfe chaka soaxotiro. Akka fētsa Epa Niospa Yōshi Shara mekafakī

chakafaino, Epa Niospa áfe chaka soaxonakama. Áto chaka neepakenaka. Nā naitiari áfe chaka aō neepakenaka,” ixō Jesús ato yoini.

Ifi áfe fimioxō nō tāpitiro afe keskaramākī

(Lc. 6.43-45)

³³ Anā Jesús ato yoini iskafakī: “Akka shinākapo. Ifi shara áfe fimi sharakōi itiro. Akka ifi chaka áfe fimiri chaka itiro. Ififo áfe fimioxō nō tāpitiro afe keskaramākī. ³⁴ Akka māfi keyokōi chakakōi, nā rono pae keskarakōi mā. Nāskaxō meka shara mā yoitiro ma māmai chakakōixō. Nā mātō shināmā mā shināi keskafakī chakai mā mekamis. ³⁵ Nāskarifikāi yora sharapa meka shara yoitiro, áfe ōiti mēraxomāi shara shinākī. Akka yora chakapari meka chaka yoitiro, áfe ōiti mēraxomāi chaka shinākī. Nāskaxō nā áfe ōiti mēraxō shināi keskara yoitiro. ³⁶ Akka ē mato yoinō. Fatora penata keyokōi Niospa ato ichanāfai tāpikōixō ato yoixiki fatofāfe chanīmara faafomākī, akka fatofāferi nikakaspakanimākī. Nāskatari nā shinātama chaka yoimisfori Niospa ato shināmaxii kiki. ³⁷ Akka mā mātō mekaoxō mā Nios ispatiro mā isharamākī, askayamai mā isharamamākī. Nāskax isharax mā áfe nīpanaka. Askatari mā meka chaka yoimiso nā omiskōipakenakafo mēra mato potaxii. Mātō mekapa mato omiskōimaxii,” ixō Jesús ato yoini.

Yora chakafāfe, “Tsōa atiro ma keskara noko ispafe nō mia chanīmara fanō,” ixō yōkanifo

(Mr. 8.12; Lc. 11.29-32)

³⁸ Askata fariseofo feta a Moisés yoikī kirika keneni keskara ato tāpimamisāfe Jesús iskafanifo: “Maestro, nō ōipai tsōa atiro ma keskara mī faito,” ixō yoinifo.

³⁹ Askafaifono Jesús ato kemani: “Māfi afara chaka shināyanā mā Nios kachikiri famis. Nāskakē, ‘A tsōa atiro ma keskara noko ispafe,’ mā ea fai. Akka nā Jonás ini keskara nā fisti mā ōixii. ⁴⁰ Akka nā Jonás ini keskai ēri askai. Jonás fafīnōa xaki mēra tres nia ini. Nāskarifiāi ēri mai mēra maiax tres nia ixii. ⁴¹ Akka fatora penata nā Niospa yorafo keyokōi ichanāfaiāto ato yoixii fatofāfe chanimara faafomākī, akka fatofāferi nikakaspakanimākai. Nāskakē nā Nīnive anoafāfe mato yoixikani iskafakakī: ‘Jonāspa noko Niospa meka yoiaito nikaxō nōko chaka xatexō nō Niospa meka chanīmara fani. Akka mā Niospa Fake nikafikī mātō chaka mā xatemisma,’ ixō mato yoixikani. Akka ē Jonás finōfekēkai mā ea nikapaimisma. ⁴² Askatari okirinoax nā nafa kēro āto xanīfo ipaoni nōko xanīfo Salomón ōipai chai inoaxkōi oni. Afara sharafo tāpikōia nikaferani oni. ‘Afara shara ea tāpimanō,’ ikax akiki oni. Akka ē nā Salomón ē finōfekē, mā kai ea nikapaima. Akka keyokōi mā mai keyoano Niospa noko yoixii fatofomākī sharafo fatoforimākī nikayospafo. Askatari nā kēromā mato yoixii iskafakī: ‘Māfi chakakōifokī. ¿Afesakī mā Niospa Fake nikakaspamismē? Mātō xanīfo Salomón tāpikōia keskafakī nāto keyokōi tāpikōifiano. Akka ē Salomón nikaikai chaikōi ē kani. Akka mā kai nā Jesús mato fe ifiakē mā nikakaspamis nāto tāpikōifekē,’ ixō mato yoixii,” ixō Jesús ato yoini.

Anā niafaka chaka yoraki nanetiro

(Lc. 11.24-26)

⁴³⁻⁴⁴ Anā Jesús ato yoini iskafakī: “Ē mato yoinō meka fetsafaxō. Nīafaka chaka feronāfake makinoax tsekeax kafāsatiro tsōa istoma ano fēnafōfōfōfāitiro ano tsaōxō tenepaikī. Akka tsoa fichixoma niafaka chakata anā shinātiro: ‘A ē anoax tsekeita ano ē anā kapai,’ itiro. Mā nokoxō ōia nā

feronāfake nā pexe xaka mātsomea keskara shara ini. ⁴⁵ Nāskakē nā nīafaka afe nīafaka siete efetiro nā chaka finakōiafo, nāfo nā feronāfake mēra iki fetsenō. Nāskakē nā feronāfake chaka finakōi itiro a iypaoni keskarama,” ixō Jesús ato yoini.

Jesús òifekani āfe afanō āfe extonō fenifo

(Mr. 3.31-35; Lc. 8.19-21)

⁴⁶ Jesús yorafo yoiaino āfe afanō āfe extonō akiki fenifo afe mekapaikani, pexe emāiti nikaxō mananifo. ⁴⁷ Fētsa yoini: “Mī efanō mī extonō emāiti nīafo mefe mekapaikani,” fani. ⁴⁸ Askafaino kemakī: “¿Fatomē ēfe efa keskarafo ēfe exto keskarafo?” ato fani.

⁴⁹ Nāskata a aōxō tāpimisfo yoini mētoxō: “Nafo ēfe efafo keskarafo, ēfe exto keskarafo ē ato òi. ⁵⁰ Akka nā ēfe Epa nai mēra ikato ato amapaiyai keskara akaifo nāfofi ēfe extofo ēfe chikofori ēfe efafo,” ixō Jesús ato yoini.

13

Jesús ato yoini meka fetsafaxō fimi exe saamisnoa

(Mr. 4.1-9; Lc. 8.4-8)

¹ Askata na pena fisti Jesús pexe mēranoax tsekekaini kaax, ĩamāfā kesemē tsaoni. ² Nāno tsaono yorafā rasi akiki fenifo, āfe meka nīkai fekanı. Akka Jesús kanōanāfā xaki mēra tsaonō ato yoiaino nikanifo, ĩamāfā kesemēxō.

³ Askata meka fetsafaxō afama mīshti Jesús ato yoini iskafakī: “Feronāfake fistichi fimi exe saafoni āfe nōxati mēra kēchoxō fokī. ⁴ Fimi exe saafokaino ranāri fai nēxpakīa pakeaino a kachikirixori peyafāfe pini. ⁵ Nāskata fimi exe ranāri makexfoki pakei fetseni mai shara anoma. Nāskakē samamakōi fimi exe foaipaini. ⁶ Akka mā foaipaiyaito xinī namani, yosipanā, āfe tapokairoko mai mēra kasharakē. Foaikax, samama nani xinī tsaifaano. ⁷ Ranāri fimi exefo moxafo mēra pakei fetseni. Moxafo mēranoax moxafoya foaipaiyaito moxafāfe namani. ⁸ Akka fimi exe ranāri mai shara ano pakeni. Nāskax foaisharax fimi ichapayakōi ini. Fetsa cien fimiya ini, fetsari sesenta fimiya ini, fetsari treinta fimiya ini. ⁹ Mā pachoyakī ea nikasharakōikāfe,” ato fani.

Meka fetsafaxō yorafo yoixō a aōxō tāpimisfo xafakīakōi ato yoini

(Mr. 4.10-12; Lc. 8.9-10)

¹⁰ Nāskata Jesúski a aōxō tāpimisfo fēkaxō yōkanifo: “¿Afeskakī meka fetsafaxō mī yorafo yoimē? Meka xafakīa mī ato yoimisma,” ixō yōkanifo.

¹¹ Askafaiāfe Jesús ato kemani: “Akka afeskakō Epa Niospa afe yorafo ĩkināmakī ē mato fisti tāpimanō. ¹² Akka nā Niospa meka nikasharakōiafo āfe Yōshi Shara āto mēra naneano nāato ato tāpimasharakōixii kiki. Nāskaxō mā tāpikī finasharakōi. Akka nā nikasharayamaifāfe tāpisharakanamax nāfo fenokōixikani. ¹³ Nāskakē meka fetsafaxō ē ato yoi. Akka òifikakī tāpikanima. Askatari nikafikakī nikasharakanima. ¹⁴ Nānori a Niospa meka yoimisto Isaías kirika keneni a inōpokoai yoikī. Iskafakī yoini:

Nikataifafaiāfikakī nikakanima. Ōifikakī tāpikanima. ¹⁵ Nā yorafo āto mapo kerekxōifo. Askatari āto pachō fēstokōifo. Askatari āto fero fepoa keskarafo. Nāskaxō ēfe meka chanīmara fakanima. Nāskakē ē āto chaka soaxotiroma, ixō Niospa yoini keskara Isaías kirika keneni.

¹⁶ “Akka māakai ato keskarama. Ē mato yoia keskara mā nikasharamis. Ē mato tāpimanai keskara mā tāpisharakōia. ¹⁷ Shinākapo. Mā òimis keskara a Niospa meka ato yoimisfo feta a Nios Ifofamis fetsafāferi òipaifikkakī

õipaonifoma. A ã mato yoimis keskara nikasharapaiifikakĩ nikapaonifoma,” ixõ Jesús ato yoini.

Jesús meka fetsafaxõ fimi exe saamisnoa ato yoini ato tãpimasharakõixiki (Mr. 4.13-20; Lc. 8.11-15)

¹⁸ Anã Jesús ato yoini iskafakĩ: “Nã ã mato meka fetsafaxõ yoiai nã fimi exe saamisfoõnoa ã mato yoikai. Nikasharakãfe tãpixikakĩ. ¹⁹ Atiri fimi exe fai kesemẽ pakeaino peyafãfe pinifo. Nãskafakĩri fẽtsa Nios Xanĩfoõnoa nikafikĩ Niospa meka nikasharayamaito, nã Satanãs chakata Niospa meka fiatiro. ²⁰⁻²¹ Akka atiri fimi exe makex mẽra pakeax, foaipafiaito xinĩ namani, ãfe tapo mai mẽra ikikẽma. Nãskafakĩri fẽtsa taefakĩ Niospa meka nikai inimayotiro. Akka afara chaka nokoaino anã inimatiro, anã Nios Ifofayamaino Niospa meka anã ãfe shinã mẽra nanetiroma. ²² Akka atiri fimi exe moxaxo mẽranoax foaixax yosinima. Nãskari fakĩ fẽtsa Niospa meka nikasharamax, nãskaxõ afara fetsa shinãkĩ, ãfe shinã mẽraxõ shinãchakakõitiro. Nãskaxõ kori ichapakõi noikĩ, ‘È kori ichapayax ã inimatiro,’ ixõ shinãkĩ Niospa meka anã shinãima. Nãskakẽ Niospa meka nikafikĩ afara fetsafo shinãino, afaa Niospa axotiroma. ²³ Akka atiri fimi exe mai shara anoax foaixax mã yosiax fimi ichapaya ini, ãfe fimi cien ini, fetsari ãfe fimi sesenta ini, fetsari ãfe fimi treinta ini. Nãskafakĩri fẽtsa Niospa meka nikakõikĩ Niospa meka nanexõ nikasharakõitiro. Akka fẽtsa Niospa meka nikakõisharakĩ nã fimi exe cien keskara itiro, fẽtsari nikasharakõĩ nã fimi exe sesenta keskara itiro, fẽtsari nikakõisharakĩ nã fimi exe treinta keskara itiro,” ixõ Jesús ato yoini.

Meka fetsafaxõ afara fetsa ato tãpimaxiki anã Jesús ato yoini

²⁴ Anã Jesús meka fetsafaxõ afara fetsa ato tãpimaxii ato yoini iskafakĩ: “È mato yoinõ nã Nios xanĩfokõĩ ika anoax afe keskara ixikanimãkai. Ifokõĩ faafo afe keskaramãkĩ ã mato anã yoinõ. Nã yorafãfe Nios Ifokõĩ faafãfe fimi exe shara fana keskarafõ. ²⁵ Akka tare ifõ ãfe inafõ fe oxano, a ato noikaspamis fakishi kaxõ a fana shara ano fana chakafanafaini kani. ²⁶ Akka nã fana shara foaikĩ pei sharayakõĩ foaini. Askatari fana chakarĩ foaini. ²⁷ Nãskata a tare ifokĩ ãfe inafõ fokaxõ yoinifo: ‘Ifõ, fana shara mã tarepa mã fanafiano, akka, ¿fanĩax na fana chaka foaikamẽ?’ ixõ yõkanifo.

²⁸ “Askafaifono nã tare ifãfe ato yoini: ‘Nã noko noikaspamisfãfe fanafo rakikĩa,’ ato faito ãfe inafãfe yoinifo: ‘¿Na fana chaka nõ tsekatiromẽ?’ fanifo. ²⁹ Akka a tare ifãfe ato yoini iskafakĩ: ‘Maa, fana chaka tsekapaikĩ fana sharari mã tsekatiro. ³⁰ Nãskanõki. Nã fana sharafoya yosiyonõ nã fana shara ãfe fimi topiaifõfõa, ã mato yoixinõ iskafakĩ: ‘Na fana chakafo xatekãfe. Xatexõ mextexõ koaxikakĩ. Nãskata nã fana sharafofe ãfe tapas mẽra ea faxoxikakĩ,’ ixõ a tare ifãfe ato yoitiro keskafakĩ, nãskarifikĩ Epa Niospa mato paxkanãfaxii ea Ifofaafõ ã ato ifixii. Akka ea Ifofayamafo chiifã mẽra ã ato nĩchixii,” Jesús ato fani.

Mostaza exeõnoa yoikĩ meka fetsafaxõ Jesús ato tãpimani

(Mr. 4.30-32; Lc. 13.18-19)

³¹⁻³² Askata anã Jesús meka fetsafaxõ ato yoini iskafakĩ: “Afe keskaramãkĩ Nios xanĩfãfe noko ikinã ã mato yoinõ. Nã fimi exe mostaza yõra ãfe tarepa fanatiro. Akka nã mostaza exe pishtakõĩ. Akka mã yosiax efapakõĩ itiro fana fetsafo keskarama. Nãskakẽ peyafãfe ãfe teshpafõ ano naa faxõ too fatiro. Nãskari fakĩ taefakĩ pishta mã Epa Nios Ifofayotiro. Nãskaxõ fisti rasichi mã Ifofayotiro. Akka chipõ ichapakõichi atirofo Nios Ifofakakĩ,” ixõ ato yoini.

*Meka fetsafaxō pāa faraxika keskaraōnoa Jesús ato yoini
(Lc. 13.20-21)*

³³ Askata anā Jesús meka fetsafaxō ato yoini iskafakī: “Afe keskaramākī Nios xanīfāfe noko ikinā ē mato yoinō. Nā kēromā pāa fakī lewaduraya arinā osixō kamosakano faraxitiro keskara. Nāskarifiakī nō ōitiroma. Yorafāfe Niospa meka āto shinā mēra naneano nō ōiyamafiaino āto ōiti fetsafakanax Nios keskara shara itirofo,” ixō Jesús ato yoini.

*Afama mīstikiri yoikī meka fetsafaxō Jesús ato yoipaoni
(Mr. 4.33-34)*

³⁴ Askatarī Jesús nā yorafā rasi yoini meka fetsafaxō afara fetsa ato tāpimaxii. Akka meka fetsafaxō Jesús mēxotaima ato yoipaoni. ³⁵ Akka nā Niospa meka yomisto a inōpokoai yoikī kirika kenekī keskakōifakī Jesús nāskakōi fani. Iskafakī kenenī Jesúsnoa yoikī:

Ē ato meka fetsafaxō yoixii. Niospa keyokōi onifanitīa nāskatarī a nikamisfoma ē ato tāpimaxii, ixō Jesúsnoa yoikī kenenī.

Jesús nā fana chakafoōnoa ato tāpimani

³⁶ Askata yorafā rasi makinoax Jesús pexe mēra ikikaini. Mā pexe mēra kaano, aōxō tāpimisfāfe anā yōkanifo ato yoisharanō. “Ifo, meka fetsafaxō mī noko yoia nā fana chakaōnoa nō tāpiama. Anā noko xafakīa yoife nō tāpisharanō,” ixō yoinifo.

³⁷ Askafaifono Jesús ato kemani: “A fana shara fanamisfo keskara ēkīa,” ato fani. ³⁸ “Akka a tare ē yoiai mā tāpitiro nā maitio ē yoi. Akka nā fimi exe shara ē yoiai nā Nios Ifofamisfo ē yoi. Akka nā fana chakafo ē yoiai nā Satanás ifofamisfo ē yoi. ³⁹ Akka nā noko noikaspamisto fimi chakafana ē yoiai, a Satanás ē yoi. Akka nā fimi exe topiaifo ē yoiaito mā nikai, mā mai keyoaino ē yoi. Akka a fimi exe topimisfo ē yoiaito mā nikai, nā Niospa āfe ājirifo ē yoi. ⁴⁰ Nā fana chakafo xatekaxō chīi koatirofo keskai, nāskarifiaxikani nā omiskōiai nokoaitīa omiskōixikani mā mai keyoaino. ⁴¹⁻⁴² Nāskarifiakī ēfe ājirifo ē nīchixii a afara ato chakafamamisfoya a afara chaka tāpimisfori ato chīi xoi-sai mēra ato potanōfo anoax oiayanā omiskōipakexanōfo. ⁴³ Akka nā Niospa meka nikasharakōiaifo, Epa Nios ika anoax nā xinī chaxai keskara shara ixikani. Mā pachoyakī ēfe meka nikasharakī māto shinā mēra nanekāfe,” ato fani.

Afara sharakōi oneaōnoa yoikī meka fetsafaxō Jesús ato tāpimani

⁴⁴ Anā Jesús ato yoini iskafakī: “Ē mato yoinō nā Nios xanīfokōi ika anoax afe keskara ixikanimākai. Feronāfāke tare ano yonokī orokī afara sharafinakōia fichixō nā fichia ano anā oneni. Nāskaxō āfe afama mīшти keyokōi ato minixō mā kori fixō nā mai fini nā afara sharakōi āfenā inō. Nāskarifiakī mā Nios Ifokōifapaiķī mā fichikōipaitiro,” ixō Jesús ato yoini.

*Makex oxo fakkai fakkaisai keskaraōnoa āfe ane perlaōnoa, meka fetsafaxō
Jesús ato tāpimani*

⁴⁵⁻⁴⁶ Anā Jesús ato yoini iskafakī: “Ē mato yoinō nā Nios xanīfokōi ika anoax afe keskara ixikanimākai. Yora fistichi fenafōfāfōfāimis perla ato ināxii. Akka nā perla sharafinakōia mā fichixō āfe afama mīшти keyokōi ato minixō kori fixō nā perla sharakōi fini. Nāskarifiakī nō Epa Nios Ifofasharapaiķī nōko afama mīштifo nō shināmakitiro Epa Niosmāi sharafinakōiķē,” ixō Jesús ato yoini.

Anā meka fetsafaxō riniōnoa Jesús ato tāpimani

⁴⁷ Anā Jesús ato yoini iskafakī: “Ē mato yoinō nā Nios xanīfokōi ika anoax afe keskara ixikanimākai. Nā rini faka mēra potexō foe fetsa fetsatapafō fi-tirofo keskara ixikani. ⁴⁸ Akka nā rini mā foe fospikōiano, nā rinipa fimisfāfe faka ketokonō rini ninifotirofo. Faka ketokonō tsaoxō foefo katotirofo. Nā sharafo fēta mēra nanekaxō nā chakafo potatirofo. ⁴⁹ Nāskarifiaxii nōko mai keyoaino. Nāskatari Niospa āfe ājirifāfe noko paxkanā faxii nā chakafoya nā sharafo. ⁵⁰ Akka nā chakafo nā chii xoisai mēra ato potaxii. Nānoax oiayanā omiskōipakenakafo,” ato fani.

Afara fena sharakōi yafi afara shara xiniōnoa Jesús ato yoini

⁵¹ Nāskaxō Jesús ato yōkani: “¿Nā ē mato yoiai keskara mā mā nikaimē?” ato faito, “Ēje, a mī noko yoiai nō nikai,” faifono anā Jesús ato yoini: ⁵² “Akka pexe ifāfe pexe xaki mēra āfe afara shara onekatsaxakī nā fena yafi nā xini ato ispatiro. Nāskarifiakī a Moisés yoikī kirika keneni keskara ato tāpimamisfāfe mā Nios Ifokōi faifono, Nios xanīfoōnoa ato yoitirofo. Akka meka xiniōxō meka fena sharari mā tāpitiro,” ato fani.

Jesús Nazarete anoxō nikakaspanifo
(Mr. 6.1-6; Lc. 4.16-30)

⁵³ Askata Jesús mā meka fetsafaxō ato yoikī keyoax nānoax kani. ⁵⁴ Mā kaax āfe mai anokōi nokoni. A judeofāfe āto ichanāti pexe mēraxō ato yoikī taefani ano. Nānoxō yorafāfe iskafanifo: “¡Kee, nikakapo! ¿Fanīxō iskara tāpixō yoimē askatari nā tsōa atiroma keskara fai? ¿Fanīxō iskara tāpiamē?” fanifo. ⁵⁵ “Nā mīsa famisto fakeki. Āfe afa María. Āfe extofo mā nō ōimis. Santiago ikaino, José ikaino, Simón ikaino, Judas ikaino, nāfo āfe extofo,” fanifo. ⁵⁶ “Āfe poifori nofe imisfo. Nōfi Jesús tāpia. Nākai afama. Akka, ¿afeskaxō afama mīshti fatiromē?” ikax yoinānifo.

⁵⁷ Nāskakē nikakaspanifo. Akka Jesús ato yoini iskafakī: “Keyokōi nā maitio anoxō Niospa meka yoimis nikatirofo. Akka nā āfe maikōi anoxō nikapaitirofoma. Nāskakē mā ea nikakaspamis,” ixō ato yoini.

⁵⁸ Nāskakē anoxō afama mīshti ato ōimanima tsōakairoko nikaito.

14

Juan Maotista nani
(Mr. 6.14-29; Lc. 9.7-9)

¹⁻² Nāskatari Galilea anoa nā xanīfo Herodes ini. A Jesús afama mīshti faito nikaxō āfe inafō yoini iskafakī: “Akka nā Juan Maotista ē ato textemayamea mā anā otoa. Mā otoxō tsōa atiroma keskara afama mīshtifo fai,” ixō shināni.

³⁻⁴ Akka Herodes Juan reteyoamano Juan yōani iskafakī: “Xanīfo Herodes, mī exto Felipe mī āfe āfi Herodías mī fia. Askara chakakōi,” nāskafani. Nāskakē Herodes akiki ōitifishkini. Nāskaxō āfe sorarofō achimani karaxa mēra ikimaxii.

⁵ Akka Herodes Juan retepaifi yorafoki meseni yorafāfemāi chanīmara faifono Juanmāi Niospa meka ato yoimiskē. Nāskakē Herodes shināni iskafakī: “Ē Juan retakē eari yorafāfe retetirofo,” ixō shināni. ⁶⁻⁷ Akka Herodes āfe cumpleaño ikaino, yorafa ato ichanāfani. Ichanāfono nā Herodías fake xomaya ares mairani yorafāfe ferotaifi ato inimamai. Nāskakē Herodes yoikī iskafani nā xomaya yorafāfe ferotaifi, “Mī afara fichipaiyai keskara ea yōkafe ē mia inānō,” ixō yoini. ⁸ Nāskakē nā kēro xomayato āfe afa ano kaxō

yōkani iskafakī: “¿Ē afaa Herodes yōkatirōmē?” faito āfa yoini iskafakī: “Juan Maotista āfe mapo textexō ea sapaki rataxō ea fexōfe fafe,” fani.

⁹ Askafaito nikai xanifo Herodes shināmitsani. Shināmitsayanā āfe shinā mēraxō shināni iskafakī: “¡Ooa! Ē Juan ato textemapaima. Akka yorafāfe nikaifono mē na kēro xomaya yoia. Nāskakē ē Juan ato textemapaiyamafikī ē ato textemani,” ixō shināni. ¹⁰ Nāskaxō xanīfāfe āfe sorarōfo yoini: “Juan textexō āfe mapo ea fixotakāfe,” ixō yoini. ¹¹ Ato askafaino fōkaxō sorarōfāfe Juan textekaxō āfe mapo sapaki rataxō fenifo. Fēkaxō nā kēro xomaya inānifo. Nāatori āfe afa ināni.

¹² Nāskakē Juan inafō fēkaxō āfe yora fōkaxō maifanifo. Mā askafakaxō Jesúski nokokaxō yoinifo.

Jesús cinco mil feronāfakefo ato pimani
(Mr. 6.30-44; Lc. 9.10-17; Jn. 6.1-14)

¹³ Askata Herodes sorarōfo Juan textemana nikai Jesús ares fisti kani kanōanāfānē tsōa istoma ano. Mā Jesús ato makinoax kaa nikakani pexe rasi anoax yorafā rasi fāi fonifo. ¹⁴ Mā kanōanāfā makinoax fotoxō akiki yorafā rasi foaito fichini. Ato ōikī ato shinākōini. Nāskaxō a isinī ikaifo ato sharafapani.

¹⁵ Mā yātapakeaino aōxō tāpimisfo akiki nokokaxō yoinifo: “Mā yātapakei kiki nono afaamakī yorafo nīchife a piaifo fitanōfo pexe rasi anofo,” ixō yoinifo.

¹⁶ Askafaifono Jesús ato kemani: “Maa. Fokanima kiki. Māroko ato pimakāfe,” ato faito, ¹⁷ kemanifo: “Nō nono cinco pāaya, askatari foe rafes,” fanifo.

¹⁸ Askafaifono Jesús ato yoini: “Ea fixotakāfe,” ato fani.

¹⁹ Nāskaxō yorafā rasi yoini fasi ano tsaonōfo. Askata foe rafe yafi cinco pāa tsomaxō nai foisinīfofā Apa Nios kīfini iskafakī: “Aicho, Epa, mīōxō ē ato pimai. Mī sharakōi,” fata, pāa kaxketa foe rafeya osixō aōxō tāpimisfo ināni a yorafo ato ināketsanōfo. ²⁰ Nāskax pikanax māyakōinifo. Akka nā chetefafo doce fēta fospini. ²¹ Nā piaifo cinco mil feronāfakefos ini. Kērofāferi fakefo feta pinifo.

Jesús ĩamāfā femākīa kani
(Mr. 6.45-52; Jn. 6.16-21)

²² Mā cinco mil yorafo pimata Jesús aōxō tāpimisfo yoini iskafakī: “Kanōanāfānē nanekāfe, okiri ĩamāfā pokefaitaxikākī,” ixō ato yoini. Jesús kayoxoma yorafo nīchiaino aōxō tāpimisfo fonifo. ²³ Mā yorafo nīchita, māchi keya ari arese kani arixō Apa Nios kīfikai. Mā fakishaino, ares fisti ano ini.

²⁴ Akka a aōxō tāpimisfo kanōanāfānē mā chai foafono, nēfefaino ĩamāfā poikī ato katimafani. ²⁵ Akka mā penaino Jesús ĩa femākīa atoki kaito tsōa tāpinima.

²⁶ Nāskata tāpikanamax aōxō tāpimisfo Jesús ĩamāfā femākīa kaito fichikanax tai tai iyanā ratekōinifo, niafakara ikanax.

²⁷ Askaifono Jesús ato yoini: “Rateyamakāfe, ēki,” ato fani.

²⁸ Ato askafaino Pedro kemani: “Ifo, mīmākī eari kenafe ēri ĩamāfā femākīa kanō mia ari,” Pedro fani.

²⁹ “Ofē,” Jesús fani. Nāskakē Pedro kanōanāfā makinoax fotopakekafā ĩamāfā femākīa Jesús ari kani. ³⁰ Kapaifi nefeaito ōi nefe kerexkōi mei mesekōini. Nāskakē ĩamāfā mēra ikipakekafakī fāsikōi kenani: “¡Ifo, ea ifife!” fani.

³¹ Askaito Jesús koshikōi āfe mēke achixō yoini: “Mīkai ea chanīmara fasharama. ¿Afeskakī mīa chanīmara faimamē?” ixō Jesús yoini.

³² Askata nā rafe kanōanāfā mēra naneinīfofanaifono nefefi nishpatani.

³³ Nāskakē nā kanōanāfā mēra naneafāfe Jesús nāmā ratokonō mai chachipakefōfā yoinifo: “Chanīma, mīfi Niospa Fakeki,” ixō yoinifo.

Jesús Genesaret anoafō a isinī ikaifo ato sharafani

(Mr. 6.53-56)

³⁴ Akka īamāfā pokefaikani Genesaret mai ano nokonifo. ³⁵ Nāskata nā ano ikafāfe yorafāfe Jesús tāpirisafanifo. Nāskakē nā chai ikafori ato yoinifo akairi tāpinōfo. Nāskakē a isinī ikaifo Jesúski efenifo. ³⁶ Nāskakē Jesús yōkanifo: “¿Nō mia tari kexa maikiri pishta ramākatiro mē nō sharaxiki?” fanifo. Nāskakē Jesús tari ramākanax sharai fetsenifo.

15

Jesús ato yoini afeskai yorafo chakafomakī

(Mr. 7.1-23)

¹ Askata fariseofo fe a Moisés yoikī kirika keneni keskara ato tāpimamisfo Jerusalén anoax Jesúski fēkaxō yōkanifo: ² “¿Afskai na mīdōxō tāpimisfo a nōko xinifo ipaonifo keskakanimamē? Akka a nōko xinifāfe yoinifo keskara tāpifikaxō pixikakī mechokomekeranafo,” ixō yoiaifāfe Jesús ato kemani:

³ “Akka, ¿afeskakī māri mātō xinifo ipaonifo keskara mā tanapaimē? Nāskaxō a Niospa yoini keskara mā nikatama nā mātō xinifāfe yoimisfo keskara mā nikamis. ⁴ Akka Epa Niospa yoikī is kafani: ‘Mātō epa yafi mātō efa nikasharakāfe. Akka a āto apa yafi āto afa chakafai fo ato retemakāfe,’ ixō Niospa yoini. ⁵⁻⁶ Nānori Niospa yoifinikē māfi ato mēstekōi nofe yorafo mā ato tāpimamismaki. Akka mā ato yoimis iskafakī: ‘Mātō epa yafi mātō efa mā yoikī iskafatiro: ‘Epa, na kori ē mia inākerana. Nāskafixō mē kori keyoa ē Nios inākī. Nāskakē ē mia anā afaa inātiro,’ ixō mā ato yoitiro. Nāskaxō mātō epafo mā shināmākīa keskara mā itiro,’ ixō mā ato yoimis parakī. Askafixō mā ato tāpimasharamisma. A kirikaki yoikī Niospa meka kenenisfo anori mā yoimisma. Nā mātō xinifo ipaonifo keskara fīsti mā tanamis. A Niospa yoini keskara mā akima. ⁷ Māfi keparanāmiski. Matoōnoa yoikī Niospa meka yoimisto Isaías kirika keneni chanīmakōi iskafakī:

⁸ Nā yorafāfe eōnoa yoisharafikakī āto shinā mēraxō ea shinākōiafoma.

⁹ Āa kaxpa ichanākanax fanāimisfo ea kifīyanā. A ato tāpimanaifo yorafāfe shinā keskarafo. Akka askarakai Niospa shināma, ixō Isaías keneni, Niospa shināmanaino.”

¹⁰ Nāskata Jesús yorafo kenaxō ato yoini iskafakī: “Ea nikasharakōikāfe tāpisharakōixikakī ē mato yoinō. ¹¹ Na mā piaito choshta keskara mato imatiroma. Askatamaroko yorafāfe āto shinā mēraxō chaka shinākani, askatari chakai mekaifono choshta keskara Niospa ato ōi,” Jesús ato fani.

¹² Askata aōxō tāpimisfo fōkaxō Jesús yōkanifo: “Ifo, ¿mī tāpimamē fariseofo ōitifishkikani nā mī yoiaito nikakani?” ikaxō yoinifo.

¹³ Askafaifono Jesús ato kemani meka fetsafaxō: “Tare ifāfe afara chakafo fanatiroma. Askatamaroko a chaka foaikaino tsekaxō potatiro. Nāskarifikā ēfe Epa nā nai mēra ikato afarafo fanayamaxō, āfe tapo tsekaxō potaxii anā afaa inōma. ¹⁴ Akka fariseofo nikayamakāfe. Nā fēxo keskarafofokī. Akka fēxo afe fēxo iyopai xato mēra paketiro. Nāskarifiakī nā fariseofāfe Niospa meka

tāpikaxoma fetsafo tāpimatirofoma. Nāskakē āto fe Nios ari nokotirofoma,” ixō Jesús ato yoini.

¹⁵ Ato askafaito Pedro Jesús yoini: “A na mī yoia keskara meka fetsafaxō noko yoisharafe nō tāpisharanō,” fani.

¹⁶ Askafaito Jesús kemani: “¿Afeskakī māri mā nikasharaimamē? ¹⁷ Akka nō afara piano nōko ato mēranoax payokomeano nō aya safatiro. Nāatokai mato chakana fatiroma. ¹⁸ Akka a mātō shināmā shināxō mā afara chaka yoiaino nāato mato chakana fatiro. ¹⁹ Akka yorafāfe afara chakafakakī āto shinā mēraxō chaka shinātirofo, ato retetirofo, askatari āto āfima chotatirofo, askatari kēro fetsa kaxefatirofo, askatari yometsotirofo, askatari chanītirofo, askatari ato īchatirofo. ²⁰ Akka mechokomexoma mā piaino Epa Niospa choshta keskara mato ōima. Akka yorafāfe āa shinākaxō afara chakafatirofo. Nāskakē Epa Niospa ato ōi choshta keskara,” ixō Jesús ato yoini.

Xotofake judeoyamafixō Jesús chanīmara fakōini
(Mr. 7.24-30)

²¹ Askata Jesús aōxō tāpimisfo fe kani nā pexe rasi Tiro fe Sidón chaimashta ano. ²² Askata kēro fisti Canaán mai ano ikatsaxakī judeo kaifoma Jesús ano kani. Kaxō fāsikōi yoikī kenani iskafakī: “Ifo, mī David fenaki, ea shināfe. Ēfe fake xotofakeshta niafaka chakata omiskōimamiski,” ixō yoini.

²³ Askafaito nikafikī Jesús kemandi. Nāskakē āfe inafāfe fōkaxō yoinifo: “Ifo, na kēro yoife katanō. Nocho okī noko fekaxtefafei kiki. Fāsikōi fiisiki kiki,” fanifo.

²⁴ Askafaifono Jesús ato yoini: “Ēfe Epa Niospa ea nīchini judeofos ano, nāfo oveja fenoa keskarafo. Akka yora fetsafo ano ea nīchinima,” ato askafani.

²⁵ Akka nā kēro Jesús nāmā ratokonō mai chachipakefōfāyanā iskafakī yoini: “Ifo, ēfe fake ea sharafaxope,” fani.

²⁶ Askafaino Jesús kemani meka fetsafaxō: “A fakefāfe piaino fīaxō nō paxta inā, askarakai sharama,” fani.

²⁷ Jesús askafaito nā kēromā kemani: “Ēje, Ifo. Akka paxtafāfe pitirofo a ifāfe piaino āfe potofō mīsa nāmā keyo pakeaito,” fani.

²⁸ Askafaito Jesús yoini nā kēro: “Mī ea chanīmara fakōini fetsafo keskarama. Akka nā mī ea yoiai keskara ē mia axonō,” ixō Jesús nā kēro yoini. Askafaino āfe fake xotofake shararisatani.

Jesús yora ichapa sharafani

²⁹ Askata Jesús anoax aōxō tāpimisfo fe kaax īa Galilea kesemē nokoni. Nāskata machi keya māpefainax tsaoni. ³⁰ Nāno yorafā rasi akiki fenifo. Nā isinī imisfo akiki efenifo Jesús ato sharafanō. Fetsa chāto ini, fetsari fēxo ini, fetsari mifi yōshia ini, fetsari mekamisma ini. Nāskakē fetsa fetsatapafō a isinī ikaifo Jesús keyokōi ato sharafani. ³¹ Ato sharafaino ōikani yorafo yoinānifo: “¡Keel! Ōikapo. Iskarakai nō ōimisma. Nā mekamisfoma mā mekakani. A mifi yōshiafori mā sharafo. Nā chatofori mā nisharakani. Nā fēxofāferi mā ōisharakani. Jesús afama mīshti fatiro. Akka nōfi israelifokī nōko Nios fāsi sharakōi,” ikanax yoinānifo.

Jesús cuatro mil feronāfakefo pimani
(Mr. 8.1-10)

³² Askata Jesús aōxō tāpimisfo kenaxō yoini: “Ē na yorafo shinākōi, nono tres nia mā efe ikafono, nonoxori afaa pikanima. A piaifo mā keyoa. Akka

afaa pimaxoma āto pexe ano ē ato nīchiano fonāikani afaa pikanaxma fai nēxpakīa paketirofo,” ixō Jesús ato yoini.

³³ Akka ato askafaino aōxō tāpimisfāfe kemanifo: “Akka, ¿afeskaxō a nō piati nō fichitromē na yorafo ato pimaxikī nono tsoa ikama?” fanifo.

³⁴ Askafaifono Jesús ato yōkani: “¿Afe tii mā pāayamē?” ato faito, “Siete pāa pishta, foe ichapamashitari,” fanifo.

³⁵ Nāskata nā yorafo nāmā tsaonōfo Jesús aōxō tāpimisfo ato yoini. ³⁶ Nāskata Jesús siete pāa yafi foeri tsoamaxō Apa Nios kīfīni: “Aicho Epa, mīōxō ē ato pimaikai. Mī fāsi sharafinakōiaki,” fata, pāa kaxketa, foeri tekenāfaxō aōxō tāpimisfo ato ināni nā yorafā rasi ato miniketsanōfo. ³⁷ Nāskakē keyokōichi pikanax māyakōinifo. A pikī chetefaafo siete fēta fospikōia ini. ³⁸ Akka nā pāa piafo cuatro mil feronāfakefos inifo. Kērofāferi fakefofaxori ato feta pinifo. ³⁹ Nāskata Jesús yorafo yoini fōtanōfo āto pexe ano. Nāskata Jesús kanōanāfā mēra naneinākfāni aōxō tāpimisfo fe. Mā naneinākfāta aōxō tāpimisfo fe mai fetsa ano kani, Magdala ano.

16

Fariseofo feta saduceofāfe, “Tsōa atiroma keskara noko ispafe nō mia chanīmara fanō,” ixō Jesús yōkanifo

(Mr. 8.11-13; Lc. 12.54-56)

¹ Askata Magdala mai ano Jesús nokoano fariseo fe saduceofo Jesús oīfokani fonifo afara chakafamapaikani. Nāskakaxō yoinifo: “Mī Niospa Fakemākī tsōa atiroma keskara noko ispafe nō mia chanīmara fanō,” fanifo. Nāskakaxō Jesús afara chakafamapainifo. ² Askafaifono Jesús ato kemani: “Mā yātapakeaino xini iki sharapakekōikai, ‘Penama oi ikima,’ mā famis. ³ Akka mā penaino nai choshtakōi oīkī, ‘Oi iki kiki,’ mā famis. Akka nai choshtakēma oīkī, ‘Oi ikima,’ mā famis. Nai foiskī mā tāpitiro oi feyamai feima rakikīa mā fatiro. Askafixokai nā Niospa mato yoiai keskara mā chanīmara faima. Nāskakē mā ea tsōa atiroma keskara fafe, nō oinō mā ea famis. Akka, ¿afeskakī mā tāpiamamē Epa Niospa noko ikīfiano?” ato askafani yoikī. ⁴ “Na yora chakafāfe ea chanīmara faafāfema oīpaikani ē Niosxō afara shara ē ato ispanō. Akka ē ato oīmanima. Akka Jonás fafinōfānē xeaitano fafinōfānē xaki mēra tres nia ini. Nāskakē Niospa Jonás kāimani fafinōfānē xāki mēranoax tsekeinō. Nāskakē a tsōa atiroma keskara ē mato ispaīma,” ato fata ato makinoax Jesús kani.

“Fariseofo feta saduceofāfe anorima yoimifoki ato nikayamakāfe,” Jesús ato fani

(Mr. 8.14-21)

⁵ Nāskano Jesúsxō tāpimisfāfe okiri iamāfā pokefaini fōkakī a pii foaifo shināmakifainifo. Nāskakaxō shinānifo: “Kee, ¿nō afaa piikaimē? A nō piikai mā nō shināmakerani,” ikanax yoinānifo. ⁶ Nāskakē Jesús ato yoini iskafakī: “Nā fariseofo feta saduceofāfe āto pāa faraxati keskara fiyamakāfe,” ixō ato yoini.

⁷ Ato askafaito nikakani aōxō tāpimisfo yoinānifo: “¿Afeskakī Jesús noko yoimē fariseofo feta saduceofāfe āto pāa faraxati fiyamakāfe noko fai? Akka nō pāa feama. Nāskakē pāanoa noko yoiraka,” ikax yoinānifo.

⁸ Akka mā tāpixō Jesús ato yoini: “¿Afsesai nō pāayamara mā ikimē? Akka mā ea chanīmara fasharama,” ato fani. ⁹ “Mā kai ea tāpisharama. Akka, ¿mā shināimamē cinco pāa kaxkexō cinco mil feronāfakefo ē ato pimatī? Akka, ¿afe

tii fēta pāa fospia ikitamē?” ato fani. ¹⁰ “Askatari, ġmā shināimamē nā siete pāa kaxkexō cuatro mil feronāfakēfo ē ato pimatī? Akka, ġafe tii fēta texefafo mā fitamē? ¹¹ Akka, ġmā tāpīamamē pāanoa ē mato yoima? Nā fariseofoya saducefofōnoa ē mato yoi,” Jesús ato fani.

¹² Nāskakē tāpinifo Jesús ato yoiaito. Akka nā pāa faraxitiōnoa Jesús ato yoinima. Nā fariseofāfe saducefofo feta ato anorima tāpīmapaiyaito Jesús ato yoini.

“Mī Cristo mia Niospa ifni nokoki nīchixii mī nōko xanīfo finakōia inō,” ixō Pedro Jesús yoini

(Mr. 8.27-30; Lc. 9.18-21)

¹³ Askata Jesús aōxō tāpimisfo fe mai fetsa ari nokoni, Cesarea Filipo mai ano. Nānoxō aōxō tāpimisfo yōkani iskafakī: “Yorafāfe, ġafaa ea fakanimē ē tsoamē?” ato fani.

¹⁴ Ato askafaito kemanifo iskafakakī: “Fetsafāfe, ‘Juan Maotistara’ mia fakani. Fetsafāferi, ‘Elíasra’ mia fakani. Fetsafāferi mia iskafakani: ‘Nā Niospa meka ato yoisim nā Jeremiasīā, askayamai nā Niospa meka ato yoisim fetsa rakikīā,’ mia fakani,” fanifo aōxō tāpimisfāfe.

¹⁵ “Akka, ġmā, ea tsoara faimē?” ato faito, Pedro kemani iskafakī: ¹⁶ “Mīfi Cristokī, nā Nios nīpanakato Fakekōi,” fani.

¹⁷ Askafaito Jesús kemani iskafakī: “Simón, mīfi Jonáspa fakeki. Niospa mia noixō mia sharafaxōa. Akka ē Niospa Fakekē tsōa mia tāpimanama. Ēfe Epa Niospa nā nai mēra ikato āa mia tāpimana. ¹⁸ Ē mia anā yoinō. Mīfi Pedroki,” ixō Jesús yoini. Akka israeli mekapa Pedro Tokirinifā nō fatiro. Tsōa tokiri efapa pītsi itiro. Nāskaxō Jesús anā yoikī iskafani: “Mī ea yoia: ‘Mī Cristo, nā Nios nīpanakato Fakekōi,’ mī ea faa. Nā mī yoia keskaraōxō fetsafāfe arifi chanīmara faxikani. Nāskafāfe efe yorafo ē ato imaxii. Nāskax ichanāxikani ea fanākani ekeki inimakani. Yōshi chakafāfe Nios noikaspakakī ato namapayanā ato xatemapaifiaifono tsoa xatetiroma. Nā ea Ifofafo xatenakafoma ea fanākani. Tokiri efapanāfā pītsikiki tsōa tararatiroma keskara ixikani. ¹⁹ Akka fētsa chamisi fepoti fēpetiro yorafo pexe mēra ikimaxikī. Nāskarifiakī ē mia yoi mī yorafo eōnoa mī ato tāpimaxii ea Ifofanōfo. Akka mī ato yoiaito nikakōikanax efe yora itirofo Epa Nios fe ipaxakakī. Nāskai mī chamis keskara itiro. Nā mī ōiai fato sharakōimākī mī ato yoitiro: ‘Nā sharakōi mā atiro,’ ixō mī ato yoitiro. Nā sharakōi mī ōiai, Epa Niospari sharakōi ōi. Askatari mī ōikai fato chakamakī, mī ato yoitiro: ‘Nā chaka mā atiro.’ Nāskara mī yoiaito, Epa Niospari nā chaka ōitiro.”

²⁰ Nāskata Jesús aōxō tāpimisfo yoini: “Tsoa yoiyamakāfe ēfi Cristokī,” ato fani.

“Chipo ea retexikani,” Jesús ato fani

(Mr. 8.31-9.1; Lc. 9.22-27)

²¹ Akka anā meka fetsafaxō Jesús ato yoinima. Xafakīakōi a aōxō tāpimisfo ato yoini achiyoafomano: “Ē Jerusalén ano kai. Nānoxō a ato Nios kīfixomisfāfe āto xanīfofo feta a Moisés yoikī kirika keneni keskara ato tāpīmamisfāferi, askatari nōko kaifāfe āto xanīfofāferi ea omiskōimaxikani. Ea ato retemafiafono, tres nia oxata ē anā otoxii,” ixō ato yoini. ²² Askafaino Pedro Jesús ori iyoxō yoini iskafakī: “Ifo, askayamafe. Miakai retekanima kiki,” fani.

²³ Pedro askafaino Jesús texkeakekafāni. Nāskaxō iskafakī yoini: “Satanás, emakinoax katāfe. Mī ea xītipaikai a Niospa ea amapaiyai ē anōma. A Niospa shināi anori mī shināima. Akka nā yorafāfe shināi keskara mī shināi,” fani.

²⁴ Askafata Jesús aōxō tāpimisfo yoini: “Fatora fetsa ēfe inakōi ipaikī āakōi apaiyai keskara anā atiroma. Nā ē yoiyai keskara nikakōitiro. Nāskakē iskatiro: ‘Ēfe Ifoxō ea retefiaifono ēkai ēfe Ifo ē potapakenakama,’ ixō shinātiro. ²⁵ Akka fētsa āa shinātiro iskakī: ‘Ē Nios Ifofaito ea retetirofo. Nāskakē ē Nios Ifofaima,’ ixō shinātiro mesekī. Askara yora naax ēfe Epa ano katiroma. Akka nā ea Ifofaa, eōxō reteafono ē ifixii efe ĩpaxanō eamāi Ifofamiskē. ²⁶ Akka fatora fetsa nono mai anoax kori ichapaya ikatsaxakī mā naax aya katiroma. Ea Ifofayamax koriya ifiyakatsaxakī Epa Nios ano katiroma. Nāskakē afama mīshtifoya iyopaofinixakī nā omiskōipakenakafo mēra mā kaax anā aya itiroma. Nāskakē āfe afaraforikai Nios inātiroma afe ĩpaxakī. ²⁷ Akka ēfi Niospa Fakekī yorakōiri. Nāskakē sharafinakōia chaxapakefōfāxii ēfe ājirifo fe nai mēranoax mai ano okī. Mē oax ē āto xanīfo finakōia ē ixii. Nāskakē nā afara shara famisfo ē ato ināsharakōixii ē atokī inimakōikī. Akka nā afara chakafamisfo afara shara ē ato ināsharakōima. Ē ato omiskōimaxii. ²⁸ Ē mato yoi ē xanīfo finakōia ixii. Akka mā atirito ea Ifofaxō nayoxoma mā ōiyotiro,” ixō Jesús ato yoini.

17

Jesús āfe femānā fetsa keskara ini, fafekōimi. Āfe rapatiri oxokōi ini (Mr. 9.2-13; Lc. 9.28-36)

¹ Askata seis nia mā finōano Jesús aōxō tāpimisfo tres iyonī. Pedro iyota, Santiago iyota, Santiago āfe exto Juanri iyonī. Ranāri ato nichifaini. Nāskaxō māchi keya māmākīa ato iyoini. ² Nānoax āto ferotaiifi Jesús fetsa keskara itani. Āfe femānā fafekōini xini keskara. Āfe rapatiri oxokōi itani oa luzpa chaxa keskara. ³ Nāskakē nānoa Moisés yafi Elías ōinifo Jesús fe mekaifāfe. ⁴ Askaito Pedro Jesús yoini: “Ifo, sharakōi ano nō oa. Akka, ėmī fichipaimē ē tres tapas fanō? Mīa fetsafaxota, Moisés fetsafaxota, Elías fetsafaxota, ē fanō,” ixō Pedro yoini.

⁵ Akka Pedro askafaino kōinī ato keyokōi maipakefōfāni. Nā kōi mēranoax Nios mekaito nikanifo iskaito: “Nafi ēfe Fakekī ē fichisharapaikōi. Ē akiki inimakōi. A nikakōikāfe,” ikaito nikanifo. ⁶ Nikakani Jesúsxō tāpimisfo ratekōiyānā feopakefōfānifo. ⁷ Askafono Jesús ato ano kaxō ato ramāyanā ato yoini: “Finikāfe. Ratekakima,” ato fani. ⁸ Nāskakē foisinīfōfākakī anoa tsoa ōinifoma, Jesús fisti nikē ōinifo.

⁹ Nāskata machi keya ariax anā tisirimepakenifo mā fekani. Tisirimepakekī Jesús ato yoifeni: “A mā ōia keskara mā tsoa yoiki. Ē naax mē anā otoano mā ato yoitiroki,” ixō Jesús ato yoini.

¹⁰ Nāskakē a aōxō tāpimisfāfe Jesús yōkanifo iskafakakī: “A Moisés yoiki kirika kenenī keskara ato tāpimamisfāferi iskafakī yoinifo: ‘Cristo oyoamano Elías rekē oi taexii kiki,’ ixō yoimisfo. Akka, ėfeskakī iskara yoimē?” fani.

¹¹ Askafaiāfe Jesús ato kemani: “Chanīma, Elías rekē oi taei nāato keyokōi itipinīsharafaiyoi āto chaka xatenōfo. ¹² Akka Ē mato yoinō mā Elías ifana mā kai tāpiama. Nāskakē nā apaiyai keskafakakī chakafanifo. Nāskarīfakī ea omiskōimakani,” ixō Jesús ato yoini.

¹³ Nāskakē aōxō tāpimisfāfe tāpinifo Juan Maotistaōnoa Jesús ato yoiaito.

Jesús feronāfake naetapa niafaka chaka pōtaxoni
(Mr. 9.14-29; Lc. 9.37-43)

¹⁴ Askata Jesús a aōxō tāpimisfo fe mā māchifā ariax fotoano yorafā rasi akiki fenifo. Akka feronāfake fistichi ratokonō mai chachipakefōfā Jesús yoini: ¹⁵ “Ifo, ēfe fake shināfe. Ēfe fake nīso omiskōimiski. Nāskakē chii naki pakeyanā faka mēra pakemiski. ¹⁶ Akka mī inafō ano ēfe fake ē efefekē mī inafāfe ēfe fake ea sharafaxomisfoma,” fani.

¹⁷ Askafaito Jesús kemani: “Ooa. Mā kai ea tāpisharama. Mā afara shināmis. Akka afetiakai ē matoki onima. ĶAfetiakai mā ea tāpimē? Niri nā fake efekāfe,” Jesús ato fani.

¹⁸ Nāskakē Jesús nā feronāfake naetapa makinoa niafaka chaka potani. Nāskax sharakōi itani nā feronāfake naetapa.

¹⁹ Nāskaxō aōxō tāpimisfāfe Jesús yōkanifo: “Akka, Ķafeskakīri nō niafaka yōshi chaka potatiromamē?” ixō yōkanifo.

²⁰ Askafaifono Jesús ato yoini: “Akka mā ea nikaima. Ē mato yoinō, ea nikakapo. Akka mā ea pishta nikaxō mā na machi, ‘Nonoax tsekekainax mai fetsa ari katāfe,’ mā faino na machi tsekekaitiro. Ea nikakōixō nā mā apaiyai keskara mā atiro. ²¹ Akka na keskara niafaka chaka mā foni tenekī Nios shinākī mā Epa Nios kīfīyanā mā potatiro,” ixō Jesús ato yoini.

Anā Jesús ato yoini: “Chipō ea retexikani,” ixō
(Mr. 9.30-32; Lc. 9.43-45)

²²⁻²³ Askata aōxō tāpimisfo fe Galilea ano ichanāxō ato yoini: “Ea achikaxō āto xanīfofo ano ea iyoxikani, afāfe ea retenōfo. Akka ea retefiafono tres nia oxata ē anā otoxii,” ixō Jesús ato yoini. Ato askafaito nikakani aōxō tāpimisfo shināmitsakōinifo.

Nā Nios kīfīti pexefā ano yonomisfāfe ato kori yōkanifo

²⁴ Askata Jesús aōxō tāpimisfo fe Capernaúm ano nokoaino a Nios kīfīti pexefā anoxō ato kori fīamīsāfe Pedro ōifokaxō yōkanifo: “ĶMī Ifāfe kopifaimamē na Nios kīfīti pexefā nā ato kori fixomisfāfe?” Pedro fanifo. ²⁵ “Ēje, kopifai,” Pedro ato fani.

Askata Pedro pexe mēra ikikainaito Jesús yoini iskafakī: “Simón, Ķafe keskara mī shināimē? ĶXanifāfe nā maitio anoa āfe kaifo kori fīaimē, askayamakī yora fetsafo ato fīairaka?” ixō Jesús Pedro yōkani.

²⁶ Askafaito Pedro kemani: “Yora fetsafo fīatiro,” fani. “Ēje, chanīma,” Jesús ini. “Akka āfe kaifāfe kopifatiroma. ²⁷ Akka nokoki ōitifishkiyamanōfo ĩa ano kaxō mīshkimātāfe. Nā mī fafī mīshkimāna āfe axfa mēranoa mī kori exe fichikai. Nāskakē nā Nios kīfīti pexefā kori fixomisfo nō ato kopifaikai,” ixō Jesús Pedro yoini.

18

“Akka, Ķtsoakaimē sharafinakōia?” inifo
(Mr. 9.33-37; Lc. 9.46-48)

¹ Akka nāskatari aōxō tāpimisfo fōkaxō Jesús yōkanifo: “Akka, nō mia Ifofamiski, Ķfatomē finakōia?” ixō yōkanifo.

² Askata Jesús fake yome kenaxō ato nēxpakīa nīchini. ³ Nāskaxō ato yoini: “Ē mato pāraima. Iskara mā shinātiroma: ‘Ē keyokōi finōfakī, mā itiroma. Akka fake yome kakapaitiroma. Akka mā shinā fetsafaax na fake yome keskara mā itiro. Mā askayamaxō mā Nios Ifofatiroma. ⁴ Akka Nios Ifo sharakōi faax nā Nios nikakōiaifo fake yome keskarafo, askatari, ‘Nō tsoama,’ ixō shināifo

nāskarafa sharafinakōiafo. ⁵ Akka fatora fētsa ēfe aneōxō na fake yome noikī nāatori ea noisharakōi,” ixō Jesús ato yoini.

*Noko fētsa afara chakafamaino āfenā mesekōi itiro
(Mr. 9.42-48; Lc. 17.1-2)*

⁶ Jesús anā yoini iskafakī: “Akka nā ea rama Ifofai fetsafāfe ato afara chakafamaino ōikī, nā keskarafato ato achixō tokirinifāya tenextifaxō fakafā noa mēra potatirofo āsanōfo fetsafo anā ato afaa chakafamayamanōfo. Nā keskara shara ikerana,” ato fani. ⁷ Askafata Jesús aōxō tāpimisfo yoini iskafakī: “Mēxotaima ea chanīmara faafāfema yorafa chakafamapaimisfo. Akka fētsa fetsafo chakafamax omiskōi finakōixikani.

⁸⁻⁹ “Akka mātō mēkemā mato afara chakafamatiro, askayamākī mātō tae mato afara chakafamatiro, askayamākī mātō fēro mato chakafamatiro. Nāskaino mātō chaka xatekōitakāfe anā chakafayamaxii. Oa mātō mēke xateta pota keskara itaxikakī, oa mātō tae xateta pota keskara itaxikakī, oa mātō fero fetoshimea keskarakōi itaxikakī afaa mā chakafayamanō. Akka mā mā mēke fisti potax anā afaa chakafayamai mā Epa Nios fe isharapakenakakī. Nā keskara sharakōi. Nā mātō mēke mā xateama keskaraxō mā aō chakafaino, nā omiskōipakenakafo mēra mā kanaka ari chiifā nokanakama mēra. Nā mātonā chaka finakōia ixii. Nāskatari mātō tae fisti xatea keskara mā sharafinakōia mā isharapakekōitiro. Nāskax, mā askayamaino nā omiskōipakenakafo mēra mā ipanakaki ari chiifā nokanakama mēra. Nāskatari mātō fēro chakafaino, mā fetoshimeax mā isharapakenakakī. Mā askayamax fero rafeyax nā omiskōipakenakafo mēra mā kaxii nā chiifā nokanakama mēra,” ato askafani.

*Oveja fenoaōnoa Jesús meka fetsafaxō ato yoini
(Lc. 15.3-7)*

¹⁰ Anā Jesús ato yoini iskafakī: “Nā rama ea Ifofaōnoa fakefo keskara shinākī iskafayamakāfe: ‘Na rama Jesús Ifofaafokai afaafoma,’ ixō yoiyamakāfe. Ē mato mēstekōi yoinō. Epa Niospa āfe ājirifāfe nā rama ea Ifofaafato ato kexesharafafāimis. Nā ājirifo Epa Nios fe imisfo. Nāskakē āfe fakefo kexesharamis. ¹¹ Akka nā yorafa fenoafo ē āto chaka soaxoniyoī ē oni isharapakexanōfo.

¹² “Akka, ¿afaa mā shināimē? Feronāfake fetsa cien ovejaya itiro. Nāskakē fisti a makinoax fenoano nā noventa y nueve anā kāimatiroma nā fenoa fenakī. ¹³ Ē mato chanīma yoinō. Mā oveja fisti fichiax inimaifinakōitiro. Akka nā fenoamafoki inimatama nā fenoitaki mā fichiax inimaifinakōitiro. ¹⁴ Nāskarifiai Epa Nios nā nai mēranoato nā rama Ifofaifo keyokōi ato noisharai ato ōikī. Askatari toa pishta fenopaima āfe fakefo,” ato fani.

*Jesús chanīmara faa fētsa mia chakafaito mī raefatiro
(Lc. 17.3)*

¹⁵ Anā Jesús ato yoini iskafakī: “Akka meka fetsa ē mato yoinō. Ea chanīmara famis fētsa mia chakafakē mī yoitiro iskafakī: ‘Yamā, mī ea chakafaa,’ ixō mī yoitiro. Mī askafaito mia nikaxō, ‘Ēje. Ea mīa chakafa. Ea anā raefafe,’ ixō mia yoiatio mī afe rae faatanātiro. ¹⁶ Nā mī askafafaito mia nikakasapaito feronāfake fisti kenafe, askayamakī rafe kenafe nā rafetari nikanōfo mia chanīmara faimākai. ¹⁷ Nāskatari atori nikayamaito nā ea Ifofaafato ichanāfo anoxō ato yoife mia tāpinōfo. Nā ichanāfo anoxō mī yoiatio mia nikayamaito mī iskafakī yoitiro: ‘Na feronāfake Epa Nios Ifofafax

nā Nios Ifofaafoma keskara ika. Nāskatari nā ato pāraxō ato kori fiamisfo keskarakōi,' ixō mī yoitiro.

¹⁸ “Ē mato chanīma yoi. Nā mā ōiai fato sharakōimākī mā ato yoitiro: ‘Nā sharakōi. Nāskara nō atiro,’ ixō ato yoitiro. Nāskara mā sharakōi ōi Epa Niospari shara ōi. Askata mā ōikai fato chakamakī, mā ato yoitiro: ‘Na chaka. Nāskara nō atiro,’ ixō ato yoitiro. Nāskara mā ōikī chakamakī, ‘Na chaka nō atiro,’ ixō mā yoiaino, Epa Niospari nā chaka ōitiro.

¹⁹ “Askatari fetsari ē mato yoinō, ea nikakōikapo. Fatora mā rafeta nono mai anoxō mā shināsharaxō, mā Epa Nios afara yōkaiyanā mā kīfaiato ēfe Epa nai mēranoato mato afara ināsharaxii. ²⁰ Akka rafe iyamakani tres yora ea shinākani eōnoax ichanākaxikani ēri ato fe ichanāxii,” ixō Jesús ato yoini.

²¹ Askata Pedro akiki kaxō Jesús yōkani: “¿Ifo, oato ea noikaspakī ea chakafamis, afe tii fakī ē yoitiro mē ē raefaxiki? ¿Siete fakī ē yoitiro mē?” faito, ²² Jesús kemani: “Maa. Siete fakī mī yoitiro. Mēxotaima mī yoitiro,” fani.

Jesús anā meka fetsafaxō ato yoini feronāfake fētsa a afeta yonomis raefapainima

²³ Anā Jesús ato yoini: “Nō Epa Nios Ifofaxō nō fetsafo raefatiro, Epa Niospa mato raefamis keskafakī. Nā ē mato yoiai keskara nikakapo mā tāpinō mā rae faatanāino. A xanīfāfe ato yonomamis kenani ato yoixii afe tii mā nimiamakī. ²⁴ Xanīfāfe taefakī afe rafea kenani ichapakōi nimiano. ²⁵ Akka a nimia koriya inima afaa kopifatiroma ini. Nāskakē xanīfāfe iskafani: ‘Mī koriyama mī kori nokotiroma mī ea kopifapanā. Akka ē mia xanīfo fetsa ināi mī āfe ina inō ea kori inānō. Mia ināta mī āfi ināta mī fakefo ināta mī afama mīshtifo keyokōi ea ināi mī ea aō kopifanō,’ ixō xanīfāfe yoini. ²⁶ Nāskakē āfe inapa ratokonō mai chachipakefōfā yoini: ‘Ifo, ea manayofe. A ē mia nimia ē mia chipo kopifaikai,’ ixō yoini.

²⁷ “Askafaito nikakī xanīfāfe shinākōini. Nāskaxō yoini: ‘Rateyamafe. A mī ea nimia ē anā shināima. Mī ea nimia ē keyokōi sofai mī anā ea nimirōma. Kasharatāfe,’ ixō yoini. ²⁸⁻²⁹ Nāskakē xanīfāfe pexe mēranoax kakī, āfe yama fichini, nāato ichapama pishta nimia ini. Nāskakē fichixō testopa achixō temo temosayanā yoini: ‘Mī ea nimia ea kopifarīsāfāfe,’ fani. Mā eneano ratokonō mai chachipafōfā yoini, ‘Ea manayofe ē mia inānō,’ fani. ³⁰ Askafaito nikakaspakī karaxa mēra ikimani a mēraxō kopifanō. ³¹ Nāskakē ranāri shināmitsakōikakī a ōiaifo āto xanīfo yoifokani fonifo. ³² Nāskakē xanīfāfe kenaxō mā oano yoini: ‘Mī chaka finakōia. Akka ē mia askafatima mī ea nimirōma,’ “A ē mia nimia ē mia kopifanō ea manayofe,” mī ea faito, ³³ akka mīri mī yama mī shinākerana nā ē mia noikī shināti keskafakī,’ ixō xanīfāfe yoini. ³⁴ Nāskax ōitifishki finakōikī xanīfāfe nā āfe ina karaxa mēra ikimani anoax omiskōi finakōinō nā nimia kopifayanā.

³⁵ “Ēfe Epa nai ari ikato matori askafaxii fetsafo mā raefayamaito mato omiskōimaki,” ixō Jesús ato yoini.

19

Feronāfake āfe āfi fe enēnātirofoōnoa Jesús ato yoini (Mr. 10.1-12; Lc. 16.18)

¹ Mā ato yoikī keyota Jesús aōxō tāpimisfo fe Galilea anoax kakī faka Jordán pokefainax Judea mai ano nokoni. ² Nāskakē yorafā rasichi chīfāfainifo. Nārixō nā isinī ikaifo ato sharafapani.

³ Nāskakē fariseofo akiki fēkaxō chakafakī mekamapainifo. Nāskaxō yōkanifo iskafakī: “Nōko xinifāfe Niospa meka yoikī kenenifo keskafakī, ¿feronāfāke āfe āfi enepaikī enetiromē afeskaraito?” ixō yōkanifo. ⁴ Askafaifono Jesús ato kemani: “¿A Moisés kirika keneni mā ōimismamē? Iskafakī keneni: ‘Niospa keyokōi onifani. Feronāfake yafi kēro onifakī taefani. ⁵⁻⁶ Mā askafaxō iskafakī yoini: ‘Feronāfake mā āfiyax āfe apa yafi āfe afa makinoax paxkatiro āfi fe fianāxiki. Nāskakē āfe āfi fe yora fisti keskara itirofo,’ ’ ixō Niospa yoinino Moisés keneni. Nāskakē anā yora rafema, yora fisti keskara ikani āfe āfi fe. Nāskakē feronāfāke āfe āfi enetiroma Niospamāi ato fianāmano,” ixō Jesús ato yoini.

⁷ Ato askafaino yōkanifo: “Akka, ¿afeskakī Moisés yoinimē iskafakī? ‘Feronāfāke āfe āfi eneyoxoma kirika kenexō yoitiro iskafakī: “Ē anā mia fipaima. Ē mia enei,” ’ ixō yoitiro Moisés fani,” fariseofāfe Jesús fanifo.

⁸ Askafaifono Jesús ato yoini: “Akka māri māto xinifo keskara mā Niospa meka nikakaspamis. Akka Moisés yoini nō kēro enetiro. Akka Niospa taefakī anori shinānima. ⁹ Ē mato yoinō. Akka fētsa āfe āfi enetiroma fetsa fe chotanāyamafiano. Akka fētsa āfe āfi enexō kēro fetsa fia askara sharama, chakafai. Askatari a kēro fenē enea fētsa fia askarari sharama, chakafai,” ixō Jesús ato yoini.

¹⁰ Askara nikakakī Jesús a aōxō tāpimisfāfe yoinifo: “Akka nā mī noko yoiai keskara nikakanax, fianāfoma askara shara itirofo,” ikaxō yoinifo.

¹¹ Askafaifono Jesús ato kemani: “Na ē yoiai keskara atirifāfe nikasharatirofoma. Akka nā Niospa ato shināmanai tiitos shinākanax nāfo shara itirofo fianākanamax. ¹² Akka yōshikōi kāiax mā yosiax āfiyatiroma. Akka fetsafori ato oxkofīxotirofo āfiyanōfoma. Akka fetsafāferi Epa Nios fisti nikakōipaikakī, nā fisti nikakōitirofo. Nāskakē afo āfiyapakenakafoma,” ixō Jesús ato yoini.

Jesús fakefo chishtoxō ato māmāyanā Epa Nios kifixopakeni
(Mr. 10.13-16; Lc. 18.15-17)

¹³ Ato askafaino yorafāfe āto fakefo Jesúski efenifo ato māmāpakeyanā ato Nios kifixonō. Akka a Jesúsxō tāpimisfāfe ato iskafanifo: “Māto fakefo efexō nōko Ifo fekaxtefayamakāfe,” ato fanifo.

¹⁴ Ato askafaifono Jesús ato yoini: “Ato enekāfe nā fakefo ekeki fenōfo. Ato nētefayamakāfe. Ēfe Epa Nios xanīfo ika ari na fakefo keskarakōifoki,” ixō ato yoini. ¹⁵ Nāskaxō fakefo māmāpaketa Jesús nānoax kani.

Feronāfake naetapa kori ichapayax Jesús fe mekani
(Mr. 10.17-31; Lc. 18.18-30)

¹⁶ Feronāfake naetapa fistichi Jesús ōikaxō yōkani: “Maestro, mī sharaki, ea yoife afaa shara ē afeska fatiromakī Nios xanīfo fe ipaxaki,” ixō yōkaito, ¹⁷ Jesús kemani: “¿Afeskakī sharara mī ea faimē? Akka Nios fisti sharafinakōia. Nios xanīfo fe mī ipaxapaikī a Moisés yoini keskara mī nikasharakōitiro,” faito, ¹⁸ “¿Fatomē ē nikanō?” faito, Jesús yoini iskafakī: “Nā Moisés yoini keskarakōi mī nikakōitiro. Iskafakī yoini: ‘Ato reteyamakāfe. Askatari māto āfima chotayamakāfe. Askatari atoki yometsoyamakāfe. Askatari chanī yoiyamakāfe. Askatari kaxpa ato parayamakāfe. ¹⁹ Askatari māto epa yafi māto efa nikasharakōikāfe, ato sharafakāfe. Askatari a mā chaima nikari noisharakōikāfe a mā mā noimeai keskafakī,” ixō Jesús yoini.

²⁰ Askafaito a kori ichapayato kemakī iskafani: “Nā mīa yoiyai keskara mē nikakōimis. Akka, ¿afaa fetsari ē nikamamē?” faito, ²¹ Jesús kemani: “Mī isharakōipaikī, mī afama mīshtifo ato minitāfe. Kori fixō nā afaamaisfo ato ināketsatāfe. Nāskakē nai mēranoax afama mīshtifoaya mī ixikai. Mā mī kori ato ināketsata anā oxō ea Ifofasharafe,” ixō Jesús yoini.

²² Askafaito nikai nā feronāfāke shināchakakōi tooxinima kori ichapayamāiyaxō ato inākaspa. Nāskax Jesús makinoax kani.

²³ Nāskaxō Jesús aōxō tāpimisfo yoini: “Ē mato pāraima, fekaaxkōi yora kori ichapayato Epa Nios Ifofapaia. ²⁴ Akka anā ē mato yoinō meka fetsafaxō. Camello akoja kini mēra ikipaifi ikitiroma, fekaaxkōi, efapamāiax. Nāskarari yora kori ichapayato Nios Ifofapai, fekaaxkōi āfe afama mīshtifomāi potakaspakī,” ixō Jesús ato yoini.

²⁵ Ato askafaito nikakakī a aōxō tāpimisfāfe tāpipainifo. “¡Keel! ¿Afeskaax nō Nios fe ipaxatiromē?” ikanax yoinānifo.

²⁶ Askaifāfe ōikī Jesús ato yoini: “Yorafokai āa ifimetirotoma. Nios fistichi yorafo ifitiro. Niospa afama mīshtifo fatiro, yorafāfe atiroma keskara,” ixō ato yoini.

²⁷ Ato askafaito nikakī Pedro yoini: “Ifo, nō mefe okī nōko afama mīshtifo nō ōiferani nō mefe oni. Akka, ¿afaa nō fīmē?” fani.

²⁸ Askafaito Jesús ato kemani: “Ē mato pāraima. Keyokōi ē ato ikināno sharafinakōia ea ōixikani, ēfe Epa Nios keskara sharakōi ē ikaito. Akka māmāi ea Ifofasharakatsaxakī nai mēranoax mā efe xanīfofo ixii. Mā nōko kaifo israelifāfe āto xanīfori mā ixii. Nā doce nofe yorafo israelifo mā ato ikipakenakakī. ²⁹ Akka yora fētsa eōxō ēfe meka sharaōnoa ato yoikakī āfe pexe ōifaini, askatari āfe onefetsafori ōifaini, āfe poifori ōifaini, āfe apari ōifaini, āfe afari ōifaini, āfe āfiri ōifaini, āfe fakefori ōifaini, āfe tareri ōifaini, akka nāto afama mīshtifo fixii. Nāskatari mā naax Nios fe ipanaka. ³⁰ Akka iskaratīa yora ichapafāfe ato finōpaikani, nō finakōiara ikaxō, akka chipo fenotirofo. Akka a ato finōpaiyamaifo iskaratīa Niospa ato finakōia imaino Nios fe ipanakafo,” ixō ato yoini.

20

A yonomisfokiri yoikī meka fetsafaxō Jesús ato yoini

¹ Anā Jesús ato yoini: “Afe keskaramākī Epa Niospa keyokōi ato ikinā mā Ifosharafaino, ē anā meka fetsafaxō ē mato yoinō. Ea nikasharakāfe. Nā tare ifo mā fakishparikōi kani yorafo fenaikai āfe tare ano yonoxonōfo.

² Ato fichixō ato yoini iskafakī: ‘Ē mato pena fisti yonomapai. Akka nā ē ato kopifamis tii mā pena fisti yonoano ē mato kopifai, ¿nāskara sharamē?’ ato faito, ‘Ēje, shara,’ fanifo. Nāskaxō āfe tare ari ato nīchini. ³ Askata rama xini keyaino tare ifo anā kakī ōia plaza anoxō ranārīto manaifono yonopaikakī tsōa ato yonomayamaino. ⁴ Askaifono tare ifāfe ato yoini: ‘¿Māri ēfe tare ano yonopaimē nā ē ato kopifamis keskafakī ē mato kopifanō?’ ato faito nikakata atiri fonifo yonoī fokani. ⁵ Askata tare ifo anā xini keya kaxō ōia ranārīto mananifo yonopaikakī. Nāskakē afori nīchini āfe tare ano. Askata mā xini kaino anā kaxō ōia ranārītori manaifono. Nāfori nīchini yonotanōfo. ⁶ Askatari yātapishtakōi plaza ano anā kaxō ōia nāno ranārī ato fichitoshini yonopaiyaifāfe. Nāskaxō ato yōkani: ‘¿Afaa nonoxō mā afeskafaimē yonokima?’ ato faito kemanifo, ⁷ ‘Tsōa noko yonomayamaino nō iki,’ fanifo. Askafaifono ato yoini: ‘Māri ēfe tare ano yonotakāfe,’ ato fani.

8 “Nāskata mā fakishano nā tare ifāfe afe xanīfo yoini iskafakī: ‘Ea yonoxonaifo ato kenafe ato kopifanō. Nā rama ikiafo ato kopifakī taefafe. Askata nā iki taeafō chipo ato kopifaxiki,’ fani. 9 Akka yātapishtakōi ikikaxō yonoafo nāfo ato kopifani nā pena fisti yonoafo kopifamis keskafakī. 10 Akka nā yonoī iki taeafāfe shinānifo: ‘Nō kori ichapa fira,’ ikaxō, askafikaxō nā fetsafāfe fiatiri finifo. 11 Nāskakē mā ato kopifaino, nā tare ifo mekafakakī yōachēpenifo. 12 Iskafakī yoinifo: ‘Akka nā rama fēkaxō yonoafo mā ato kopifaa nā mā noko kopifaa keskafakī. Akka nō xini pae meeyanā nō yonoa nīskayanā nā pena tii,’ fanifo. 13 Akka nā tare ifāfe fisti kemani: ‘Efe yorashta, ē mia chakafakī mekafaama. Akka mē mia kopifaa nā mī pena fisti yonoa. Nā pena fisti ē ato kopifamis tii ē mato kopifai ē mato faaki. Nā sharaki mā ea faaki,’ fani. 14 ‘Akka ē mia kopifanō, nakīa mī kori. Katāfe mī pexe ano. Akka nā rama ikikaxō yonoafo nā ē mia ināi keskafakī atori ē ināi. 15 Nā ē ināpaiyai keska fakī ē ato inātiro, ēfe korimāiyakē. Akka, ¿afeskai mī ekeki ōitifishkikimē ē fetsafo ināsharaino?’ ixō yoini. 16 Nāskarifakī Epa Niospa nā taefakī chanīmara faafo ato ināi keskafakī nā rama chanīmara faifo nāfori ato ināsharaxii. Akka Epa Niospa yora ichapa kena a ika ano fonōfo. Nāskakē Epa Niospa ato kenafaito tsōa nikayamaito nā Ifofaafos ato ifixii,” ixō Jesús ato yoini.

*Anā Jesús ato yoini: “Mā chaima ea retekanira,” ixō
(Mr. 10.32-34; Lc. 18.31-34)*

17 Askata Jesús Jerusalén ari fāi kakī a aōxō tāpimisfo kenaxō ato yoini iskafakī: 18 “Ea nikakāfe. Mā mā ōikai iskaratīa Jerusalén ano nō māpei kaikai. Nānoxō ea achikaxō ea ato inākani, a Nios ato kīfixomisfāfe āto xanīfofo, askatari a Moisés yoiikī kirika kenei keskara ato tāpimamisfo anori ea iyoxikani. Nānoxō, ‘Mā mī naikai,’ ixō ea yoixikani kiki. 19 Nāskakaxō yora fetsafo nōko kaifoma ea inākani ea kamaketsayanā ea koshaketsakani. Nāskakaxō ifi cruz ikakī ea mastakani. Akka ea askafafono tres nia oxata ē anā otoxii Epa Niospa ea otofaano,” ixō ato yoini.

*Āfa āfe fake rafe Jesús yoixoni
(Mr. 10.35-45)*

20 Zebedeo fake rafe Juan fe Santiago ini. Nā rafe āto afa fe Jesús ano nififo. Mā Jesúsiki nokoxō nā kēromā ratokonō mai chachipakefofāni Jesús afara shara yōkapaikī. 21 Askafaito Jesús yōkani: “¿Āfaa mī fichipaimē ē mia axonō?” faito, nā kēromā yoini: “Ifo, nā mī xanīfo finakōia ikaitīa ēfe fake raferi mefe xanīfo inōfo ato xanīfo imafe. Nā xanīfāfe tsaoti ano mī tsaono ēfe fake rafe takairafe mefe ketaxamei tsaonōfo,” fani.

22 Askafaito Jesús nā kēromā fake rafe yoini: “Mā tāpiama a mā ea yōkai keskara. ¿A ē omiskōixiai keskara māri omiskōitromē?” Jesús ato faito kemanifo: “Ēje, nōri tenetiro,” fanifo.

23 Askafaiifāfe Jesús ato yoini: “Chanīma, māri mā omiskōixii. Akka ēkai tsoa yoitiro, ‘Efe ketaxamei tsaofe efe rafexii’ ixō. Akka ēfe Epa Nios fistichi yoitiro. Nā Niospa ato katoafos nāfo afe ketaxamei tsaotirofo efe rafexikakī,” ixō ato yoini.

24 Nāskakē a aōxō tāpimis rafeta askafakī yōkaifāfe a aōxō tāpimisfo fetsafāferi nikakakī, “¿Afeskai oa iskai rafe mekakanimē?” ikaxō a rafe meepainifo.

25 Askaifono Jesús ato kenaxō ato yoini: “Mā mā tāpia yora fetsafāfe āto xanīfofo afe keskarafofomākī. Nā xanīfāfe mitsisipakōixō ato yonomamis. A xanīfo fe rafeafāferi ato yoimisfo iskafakakī: ‘Nōri māto xanīfo. Nō mato

yoiaito mā noko afara axorisafatiro,' ixō fāsikōi ato yoimisfo. ²⁶ Akka mā ranā askayamakāfe. Askatamaroko fatora fetsa mā xanīfo ipai ato yonoxomis keskara mā itiro. ²⁷ Askatari fatora fetsari xanīfo ipaikī iskafakī shinātiro: 'Ēkai afaama. Nāskakē ē fetsafo axosharapai. Nā apaiyaifo keskara ē ato axosharai,' ixō shinātiro. ²⁸ Akka ēri anori shināima, ēfe Epa Nios ariax ē nāmā fotoni feronāfakekōi ixiki, ē Niospa Fakefekē ea afara axonōfo ē onima. Askatamaroko fetsafo ē ato afara sharafaxoxiki ē oni. Ē atoōnoax naxiki ē oni Satanás chaka āto ifo inōma," ixō Jesús ato yoini.

Jesús yora fēxo rafekōi sharafani
(Mr. 10.46-52; Lc. 18.35-43)

²⁹ Askata Jericó anoax Jesús aōxō tāpimisfo fe kaino yorafā rasichi chīfafainifo. ³⁰ Akka fai kesemē fēxokōi rafe tsaonifo. Nānoxō Jesús fāi kaito nikakaxō nā rafeta kenanifo iskafakakī: "Ifo, David fenapa, noko shināfe," fāsikōi fanifo.

³¹ Askafaifono nā yorafā rasichi ato iskafanifo: "Nōko Ifo fekaxtefayamakāfe," ato faifono, akka nā fēxokōi rafe fāsikōi kenanifo: "Ifo, David fenapa, ¡noko shināfe!" fanifo.

³² Askafaifono Jesús nēteakekafani. Ato kenaxō ato yōkani nā fēxokōi rafe: "¿Afaa mā fichipaimē ē mato axonō?" ixō ato yōkani.

³³ Ato askafaito kemanifo: "Ifo, nō fēro ōisharapaikōi," fanifo. ³⁴ Jesús ato shinākī āto fero mēeni. Āto fero mēeaino nā fēxokōi rafeta āto fēro ōirisafatanifo. Nāskakaxō Jesús chīfafainifo.

21

Jesús nokoni Jerusalén ano
(Mr. 11.1-11; Lc. 19.28-40; Jn. 12.12-19)

¹ Nāskata mā Jerusalén chaima fokanax pexe rasi Betfagé ano nokonifo machi Olivos ano. Nānoxō Jesús a aōxō tāpimis rafe nīchini, ² ato iskafayanā: "Mēstekōi fotakāfe oa ono pexe rasi ano. Nānoa burro nexekē mā fichi kaikai āfe fake fe nexekē. Nāskakē tēpexō ea efexotakāfe. ³ Anoxō yora fētsa mato yōkaito: '¿Afeskakī mā burro tēpeyoamē?' mato faito, yoikī iskafakāfe: 'Nōko Ifāfe fichipaiyaito nō ifixoniyoa. Akka samama nō mia nīchixoniyoiokai,' fakāki," a aōxō tāpimis rafe fani.

⁴ Nā Niospa meka yoimisto kirikaki kenekī yoini keskakōini Jesús. ⁵ Iskafakī keneni:

Pexe rasi Siōn anoafao ato yoikāfe iskafakī: "Ōikapo. Māto xanīfokōi mā matoki oi kiki. Xanīfofiāx afama keskara oi kikī. Burro fake kamaki tsaona feronāfakekai kakapaimisma," ixō Niospa meka yoimisto kirika keneni.

⁶ Nā Jesúsxō tāpimisfāfe mā fōkaxō nā ato yoia keskara fanifo. ⁷ Nāskata burro fake yafi āfe afa iyonifo. Nāskaxō burro kate kamaki āto sama fanifo. Nāskakē Jesús a kamaki tsaoinākafāni. ⁸ Yora ichapakōi inifo. Nāfāfe āto rapatifo kakafa fonifo fai nēxpakā. Ranāritori epe pei xatekaxō kakafanifo. ⁹ Akka nā rekē foaifo fe a acho foaifo fāsikōi mekafonifo. Tai tai fokani. "¡Aicho! ¡Nōko xanīfo David āfe fena nokoki oi kiki! ¡Sharafinakōia nokoki oi kiki Niospa nīchiano nai mēraxō! ¡Nōko Ifo Nios sharafinakōia!" ikanax tai taifonifo.

¹⁰ Nāskata Jesús Jerusalén ano kaito ōikani yorafo ratei fetsenifo ōiakefaikani. "¿Tsoamē na?" ikanax āa ranā yōināi fetsenifo. ¹¹ Askaifāfe nā Jesús fe foafāfe

ato kemanifo: “Nafi Jesúski Niospa meka ato yoimis. Nazarete anoa Galilea mai ano imis,” ixõ ato yoinifo.

Jesús a Nios kífiti pexefã mēraxõ a ato inãifo ato potani
(Mr. 11.15-19; Lc. 19.45-48; Jn. 2.13-22)

¹² Mã fotoax Nios kífiti pexefã mēra Jesús ikitoshini. Ikiakaixõ õia a mēraxõ yorafãfe ãto afama mĩstififo ato miniketsakani inifo kori fikani. Askafaifãfe õiki Jesús ato põtaketsani a ato afama mĩstififo miniaifo, a ato fiaifori potani. A kori fĩanõnãifo anoari ãto mĩsa põtakĩ ato nãpakaketsani. Askatari a ato rifi miniaifori ãto tsaotifori ato põtaketsani. ¹³ Askafata ato yoini iskafakĩ: “Niospa shinãmanaino Isaias Niospa meka keneni iskafakĩ: ‘Mã ěfe pexefã mēraxõ mã ea kífifiro,’ ixõ kenenĩ. Akka nã yometsofãfe pexe keskara mã famis,” ixõ Jesús ato yoini.

¹⁴ Ato askafaino a Nios kífiti pexefã ano fēxofo, chatofa Jesúski fenifo. Nãskakē anoxõ Jesús ato sharafani. ¹⁵ Jesús askarafa ato sharafaino õikani. Akka nã Nios ato kífixomisfãfe ãto xanĩfofo feta a Moisés yoikĩ kirika keneni keskara ato tãpimamisfãfe õinifo afama mĩstififo Jesús akaito. Askatari fakefo Nios kífiti pexefã mēranoaxri tai tai ikaifãfe nikanifo iskaifãfe, “¡Aicho! ¡Nã Jesús David ãfe fena sharafinakõia!” ikaifãfe nikakani õitifishkinifo.

¹⁶ Nãskakakĩ Jesús yoinifo iskafakakĩ: “¿Oaiskai mĩ nikaimē yoiaifo keskara faifãfe?” Jesús ato kemani: “Ēje, mē nikai,” ato fani. “Akka a kirika keneano, ¿mã õimismamē? Iskafakĩ kenenifo, Niospa ato shinãmanaino:

 Fake yomefãfe mia fanãkani, mĩ ato fanãimaino,
ixõ kenenifo,” Jesús ato fani.

¹⁷ Askafakĩ ato yoita ato makinoax kani pexe rasi ano Betania ano. Nãno oxafistishini.

“Fana higuera, mĩ anã fimiyanakama,” Jesús fani
(Mr. 11.12-14, 20-26)

¹⁸ Mã penano Jerusalén ano anã okĩ Jesús meea fonãikõini. ¹⁹ Mã anã kakĩ Jesús õini a fana higuera fai kesemē nikē. Nãskakē akiki kaxõ ãfe fimi fenani pipaikĩ. Akka fimiya inima, ãfe pei fisti ini. Nãskakē yoikĩ iskafani: “Anã mĩ fimiyanakamaki,” faino koshikõi nã higuera xanarisatani.

²⁰ Askaito õikakĩ aõxõ tãpimisfãfe yõkanifo: “Kee, ¿afeskai na ifi xanarisatanimē?” ikaxõ, ²¹ yõkaifono Jesús ato kemani: “Ē mato pãraima mã ea nikakõixõ mãri atiro na ě ifi higuera xanafaa keskafakĩ. Nãskarifikĩ na machiri mã yoitiro iskafakĩ: ‘Nonoax tsekekainax fakafã mēra paketãfe,’ mã faino fakafã mēra paketiro. ²² Mã Epa Nios chanĩmara fakõixõ mã afara kífiaito mato inãtiro,” ixõ ato Jesús yoini.

“¿Tsõa mia nĩchinimē mĩ xanĩfo inõ?” ixõ Jesús yõkanifo anoxõ achipaikakĩ
(Mr. 11.27-33; Lc. 20.1-8)

²³ Ato askafata Nios kífiti pexefã mēra ikikaini. Nã Nios kífiti pexefã mēraxõ ato tãpimanaino, nã ato Nios kífixomisfãfe ãto xanĩfofo fe judeo anifofo fonifo. Akiki fõkaxõ yõkanifo iskafakakĩ: “¿Tsõa mia nĩchinimē? ¿Tsõa mia yoiamē mĩ iskafanõ?” ixõ yõkanifo.

²⁴⁻²⁵ Askafaifono Jesús ato kemani: “Ēri mato yõkanõ. Ea yoikapo ě nikanõ. ¿Tsõa Juan nĩchinimē ato maotisafakĩ ato faka mēra ikimapakenõ? Niospa nĩchiyamakĩ yorafãfe nĩchiniforaka. Akka mã ea kemaito, ěri mato yoikai tsõaõxõ ě iskafaimãkai.”

Ato askafaino, āa ranā mėnēpai fetsayanā. Shinānifo iskakakī: “Niospa Juan nīchini nō faito noko yoikī iskafatiro: ‘¿Akka afeskakī mā Juan nikamis-mamē?’ noko fatiroki,” ikanax yoinānifo. ²⁶ “Akka nō iskafatiroma: ‘Yorafāfe Juan nīchinifo,’ nō fatiroma. Nō yorafoki mesei keyokōichi shinānani Niospa shināmanaino Juan ato yoipaoni,” ikanax xanīfo yoinānifo.

²⁷ Nāskakaxō Jesús yoinifo iskafakakī: “Nō tāpiama,” faifono Jesúsri ato kemani iskafakī: “Ēri mato yoima tsōa ea nīchinimākī ē iskafanō,” Jesús ato fani.

Meka fetsafaxō feronāfake rafeōnoa Jesús ato yoini

²⁸ Jesús ato yoini: “Meka fetsafaxō ē mato yoinō. Feronāfake fisti fake naetapa rafeya ini. Nāskaxō āfe fake iyoa yoini: ‘Ēfe tare ano kaxō ea yonoxotāfe,’ fani. ²⁹ Askafaito āfe fāke kemani: ‘Ē kapaima,’ fani. Askafiax mā shināx kani.

³⁰ “Askata āfe fake chipokori yoini iskafakī: ‘Mīri kaxō ēfe tare ano ea yonoxotāfe,’ fani. Askafaito nāato kemani iskafakī: ‘Ia, epa. Ē yonotanōkī,’ fafiax kanima. ³¹ Akka, ¿fatoto a āfe āpa fichipaiyai keskafakī axonimē?” ato faito, “Iyoato axoni,” fanifo. Nāskaxō Jesús ato yoini: “Ē mato pāraima. Nā xanīfo kori fīxomisfo fe, nā kēro chotaferomafo āto chaka xatekanax mā Epa Nios Ifofakōikani. Akka mā afaa afeskafaxoma mā Epa Nios Ifofaama.

³² Akka Juan ato maotisafamis oni ato tāpimaxiki afeskax mā itiomākī, Niospa fichipai keskara. Akka mā kai Juan nikamisma. Akka nā xanīfo kori fīxomisfo feta nā kēro chotaferomafāfe nikakōinifo. Akka māto chaka mā xateama mā afara fetsafo shināmis,” ixō Jesús ato yoini.

Meka fetsafaxō Jesús ato yoini a ato yonoxomis chakafoōnoa (Mr. 12.1-12; Lc. 20.9-19)

³³ Anā Jesús ato yoini iskafakī: “Ea nikakapo ē mato meka fetsafaxō yoinō. Tare ifāfe āfe tare ano uva fanani. Fanaxō akiki keneakeni. Nāskaxō mai pōkini a mēraxō uva tsinīxiki. Askatari pexe keya fani anoxō kexexiki tsōa mėeyamanō. Mā askafakī fetsaxō ato ināni nā uva tare kexenōfo. Nāskata mai fetsa ari kani. ³⁴ Akka nā fimimistīa mā āfe fanafo pachiano, a yonoxomisfo nīchini a kexexonafo ato yōkaxō nā āfenā tiiri fixotanōfo. ³⁵ Akka nā tare kexexonafāfe a xanīfo yonoxomis achikaxō fisti seteketsanifo. Askatari fetsari retenifo. Askatari fetsari tokirinī tsakaketsanifo. ³⁶ Nāskakē tare ifāfe anā āfe inafa ichapakōi nīchini. Mā foafono nā tare kexemisfāfe ato askari fanifo.

³⁷ “Mā ato askafapaxō āfe fakekōi nīchini aōnoa shināchakatama, ‘Ēfe fake nikatirofokī,’ ixō. ³⁸ Akka mā āfe fake kaito fichikanax nā tare kexemisfo aa ranā yoinānifo: ‘Nato āfe apa naano na fanafo fixii kiki. A nari retekape na āfe fanafo nōkonā inō,’ inifo. ³⁹ Nāskakata achinifo. Mā achikaxō tare pasotai iyokaxō retenifo. ⁴⁰ Akka, ¿mā tare ifo oxō a tare kexemisfo ato afeskafatiromē?” ixō Jesús ato yōkani.

⁴¹ Ato askafaito kemanifo: “Ato retetiro ato noitama yora chakafokē. Nāskaxō tare ifāfe yora fetsafo āfe tare inātiro, nāfāfe inānōfo nā āfenā tiiri mā āfe fana fimifo pachiano,” ixō yoinifo.

⁴² Nāskata Jesús ato yoini meka fetsafaxō: “¿Na kirika kenea anoa mā anemisamē? Iskafakī kenenifo:

Tokiri pexe fapaikakī nā pexe famisfāfe na tokiri chakara ixō potafifono, fetsafāfe fichikaxō na tokiri sharakōi ikaxō akiki pexe fatirofo. Nāskarifiakī xanīfofōfāfe, ‘Nakai afama,’ ikaxō Niospa Fake Ōikaspamisfo.

Askafafiaifono Niospa áfe Fake katonni nõko Ifo inõ. Nãskakê nõ akiki inimakõi, ixõ kirika ano kenenifo,” Jesús ato fani.

⁴³ “Nãskakê ë mato yoi, taeyoi Nios fe rafexõ áfe meka mã ato yoiyomis. Askafixõ mã ea nikakaspai. Nãskakê Epa Niospa fetsafo yoi áfe meka ato täpimanõfo afeska faxõ Nios Ifo sharakõifatiromakĩ. ⁴⁴ Akka tokiriki fetsa pakeki aõ xao teketiro. Akka tokiri yoraki pakekĩ yamakõi fatatiro. Nãskarifiakĩ ë Niospa Fakekõixõ a ea nikakaspaifono ë ato omiskõimaxii,” ixõ Jesús ato yoini.

⁴⁵ Akka nã Nios ato kifixomisfo äto xanĩfofo feta fariseofãfe nikanifo Jesús meka fetsafaxõ ato yoiaito. Nãskakaxõ täpinifo Jesús atoõnoa yoiaito. ⁴⁶ Nãskakaxõ achipainifo. Akka achipaifikani mesenifo yorafãfemãi chanĩmara faifono Jesús Niospa meka ato yoimiskê. Nãskakê achinifoma achipaifikakĩ.

22

Meka fetsafaxõ Jesús ato yoini a feronãfake äfiyaino inimayanã piaifoõnoa yoikĩ

(Lc. 14.15-24)

¹ Anã Jesús meka fetsafaxõ ato yoini iskafakĩ: ² “A Epa Nios xanĩfo ika ano iskaraki ë mato yoinõ. Nikakãfe. Nã xanĩfãfe áfe fake äfi fiaino fista axoxiki. ³ Akka xanĩfãfe a yonoxomisfo nĩchini ato yoitanõfo fenõfo. Akka mã fõkaxõ ato yoiailfono fekaspanifo. ⁴ Nãskaxõ anã a yonoxomis fetsafo nĩchini ato iskafayanã: ‘Ato yoikĩ iskafatakãfe: “Mã xanĩfãfe áfe fãke äfiyaino mã itipinĩsharakõi faa pixiki. Áfe fakka efapa mã ato retemana. Askatari fakka fake xoakõiari ato retemana. Mã keyokõi itipinĩsharafakĩ, kookãfe pixikakĩ,’ ato fani. ⁵ Akka ato askafaifono ato fe fekaspanifo. Fetsa áfe tare ari kani. Fetsari kani áfe afama mĩshti minikai. ⁶ Atirifãfe nã xanĩfãfe inafõ ato achikaxõ ato seteketsayanã ato retenifo. ⁷ Nãskakê xanĩfo õitifishkifinakõini. Nãskaxõ áfe sorarõfo nĩchini a retemitsamisfo ato reteyanã äto pexefori ato kõakĩ mĩtokakõitanõfo. ⁸ Nãskaxõ xanĩfãfe a yonoxomis fetsafo yoini ato iskafakĩ: ‘Mẽ itipinĩshara faa ëfe fãke äfiyaino pixiki. Akka nã chakafo ë ato kenamanafo fekaspakõiafokĩ. ⁹ Akka mãri fotakãfe nã pexe rasi ano. Nãria ato fichixõ nã mã õiaifo ato yoikãfe fenõfo pii fenõfo, ëfe fãke äfiyaino,’ ixõ ato yoini. ¹⁰ Nãskakê a yonoxomisfo fai fetsa fonifo. Mã fõkaxõ yora ichapafo fichikaxõ ato efenifo. Yora sharafo efeta yora chakafori efenifo. Nãskakê xanĩfãfe áfe fãke äfiyaino yorafo pexe fospikõinifo.

¹¹ “Nãskakê xanĩfo pexe mẽra ikikaini yorafo feaito itipinĩsharafaxõ ato rapati sharakõi ato inãketsani safenõfo áfe fãke fista akaino. Xanĩfo ikikaini ato õikai mã sharakõi safeketsafomakĩ. Akka fistichi rapati shara safea inima, chapokõi safea fichini. ¹² Akka a rapati shara safeama fichixõ yoini: ‘¿Afeskakĩ mĩ rapati sharakõi safeax mĩ oamamẽ ëfe fãke äfiyafaino?’ Askafaino nã feronãfake tooxinima. ¹³ Nãskaxõ xanĩfãfe a yonoxomisfo yoini: ‘Na feronãfake otexkere ata metexkeraxõ fakishifã mẽra potakãfe, anoax omiskõipakexanõ eaiyanã,’ ixõ ato yoini. ¹⁴ Nãskarifiã Epa Niospa yora ichapa kenai a ika ano fenõfo nã áfe Fake Ifoiaifo tii afe ipanakafo,” ixõ Jesús ato yoini.

*“¿Xanĩfo nõ kori inãtiromẽ noko yõkaito?” ixõ Jesús yõkanifo
(Mr. 12.13-17; Lc. 20.20-26)*

¹⁵ Nāskata mā Jesús ato yoiaito nikakata mā fokanax fariseofo yoinānifo: “¿Afeskaxō nō Jesús afara chaka yoimatiromē? Afara chaka noko yoiaito nō yōaxiki,” ikanax yoinānifo. ¹⁶ Nāskafakata āto inafō nīchinifo, Herodes āfe inafōya iskafakī yoitanōfo: “Maestro, mā nō tāpia mī chanīmakōi yoimis. Nā Epa Niospa noko shināmapaiyai keskarakōi mī noko yoimis yorafāfe mīōnoa afara chaka yoifaifono. Afara mī yoipai mī ranomisma. Keyokōi nāskarafos mī ato yoimis. ¹⁷ Nāskakē noko tāpimasharafe. Akka chanīmakōi noko yoife na romanō xanīfo nō kopifatiromakī askayamakī nō kopifatiroma rakikīa,” fanifo. Jesús chakafamapaikakī askafanifo.

¹⁸ Askafaifāfe ōikī Jesús tāpini feparapaiyaiāfe. Ato yoini: “Feparamisfāfe, ¿afara chaka mā ea yoimaimē eōnoa afara chaka yoipaikī? ¹⁹ Akka māto kori exe ea ispakāfe a aō mā xanīfo kopifamis,” ato fani. Ato askafaito kori exe fisti fōxonifo. ²⁰ Nāskaxō Jesús ato yōkani: “¿Tsōa femānā na keskarāmē? ¿Tsōa aneri na kori exe ano keneamē?” ixō ato yōkaito, ²¹ kemanifo iskafakakī: “Nōko xanīfo César keskara,” fanifo. Nāskakē Jesús ato yoini: “Akka na kori exe Césarnākē César inākāfe, akka Niosnākē Niosri inākāfe,” ixō Jesús ato yoini.

²² Ato askafaito nikakani, ratekōiyanā. “Kee. Āfe mekakai tsōa finōtirioma,” ikanax a makinoax fonifo ōifaikani.

*“¿Yora naax anā otoa afeskatiromē?” ixō Jesús yōkanifo
(Mr. 12.18-27; Lc. 20.27-40)*

²³ Nāskatari afia pena fisti saduceofo fenifo Jesús ōifekani. Nā saduceofāfe yoimisfo iskafakakī: “Yora naaxkai anā afeskax ototirioma,” ixō shināmisfo. Nāskakaxō Jesús yōkai fekani fenifo iskafakakī: ²⁴ “Maestro, Moisés yoini iskafakī: ‘Feronāfake naano āfe āfi feta fake akamax, one fētsa nā kēro fitiro, āfe āfi inō. Mā fixō afeta fake atiro āfe ōchi fake inō,’ ixō Moisés noko yoikī keneni. ²⁵ Akka nō mia yoikī taefanō. Noko nikafe chipo noko yoixiki. Akka nā nane tii siete inifo, feronāfake. Āto ochi iyoa āfiyai taeni. Mā āfiyax afeta fake akamax nani. Mā āfe ochi naano chipokoto fini. ²⁶ Nāskarifiai nā chipokori nani afeta fake akamax. Nāskatari chipoko fētsari fini, nāri nani afeta fake akamax. Nāskakanax akikinoax nai keyonifo afeta fake akanamax. ²⁷ Nāskata mā nai keyoafono nā kērori chipo nani. ²⁸ Akka, ¿a yorafo mā otokaxō nai mēraxō, fatoto nā kēro fixiimē, nā fistimāi fīpakaxō?” ixō yōkanifo.

²⁹ Askafaifono Jesús ato kemani: “Mākai afaa tāpiama. Nā kirika ano Niospa meka yoikī kenenifokai mā tāpiama. Nāskaxori Niospa akai keskara āfe sharaōxō ari mā tāpiama. Na mā ea fanīra yoiyai,” ato fani. ³⁰ “Akka yorafo nakanax anā otokanax anā āfiyatirofoma. Kērofori anā feneyatirofoma. Nāskakanax ājirifo keskara itirofo nai mēranoax. ³¹ Akka, ¿a yorafo naax otoxiaofo Niospa yoini keskara, a kirika keneano mā ōimismamē? ³² Iskafakī Niospa yoini: ‘Ēfi mī xinifāfe āto Nioskōiki, Abraham ikaino Isaaca ikaino Jacobo ikaino,’ ixō Niospa yoini. Akka yorafo mā nafiafono naafoma keskara Epa Niospa ato ōimis. Niospa yoini iskafakī: ‘Ēkīa āto Nioskōi,’ ixō Niospa yoini.” Nāskara Jesús keyokōi ato yoini.

³³ Saduceofāfe nikanifo Jesús ato askafaito, “¡Aira! ¡Nikakapo! Jesús sharakōi yoi,” ikanax yoinānifo.

*“Akka, ¿fato meka sharaftnakōiamē, nā Niospa shināmanaino Moisés ato yoiniraka?” ikaxō fariseofāfe Jesús yōkanifo
(Mr. 12.28-34)*

³⁴ Nāskakē saduceofo Jesús ato meka xatemanaito nikakaxō fariseofo ichanākanax Jesús ano fenifo. ³⁵ Akka feronāfake fisti a Moisés yoikī kirika keneni keskara ato tāpimamis ini. Nāato Jesús fanīrira kemamapaikī yōkani, ³⁶ “Maestro, ¿fato meka sharafinakōiamē, nā Niospa shināmanaino Moisés keneniraka sharafinakōia?” faito,

³⁷⁻³⁸ Jesús yoini iskafakī: “Moisés yoikī taefani iskafakī: ‘Nōko Ifo Nios noikōikāfe nōko ōitifofoxō, nōko māpori shināsharakōita, nōko yōshi sharafofaxori.’ Nā mekafi sharafinakōiakī nā Moisés yoini keskara. ³⁹ Nāskatari nā ē mato taefakī yoia keskarakōiri nāno fetsari, a mia chaima nikari noisharafe a mīa mī noimeai keskfakī ixō Moisés keneni. ⁴⁰ Moisés noko yoini keskai afeskax nō shara itiomāki. Askatari a Niospa meka yoimisfāfe yoinifo keskai afeskaxri nō askatiromakī. Akka nō askasharapai nā meka rafe nikakōisharax nō askasharakōitiro,” ixō Jesús ato yoini.

“Akka, ¿tsōa fenamē Cristo?” ixō Jesús ato yōkani

(Mr. 12.35-37; Lc. 20.41-44)

⁴¹ Fariseofo afe ichanāyoafono, ⁴² Jesús ato yōkani: “Akka, ¿nā Niospa katoa nā Cristoōnoa, afaa mā shināimē? ¿Tsōa fenamē?” ato faito kemanifo: “David āfe fenakīa,” fanifo. ⁴³ Nāskata Jesús ato yoini: “David Niospa Yōshi Sharapa shināmanaino nōko Ifo Cristoōnoa kirikaki keneni iskafakī Cristo oyoamano. Ē mato yoinō mā shinākōinō:

⁴⁴ Epa Niospa ēfe Ifo yoini iskafakī: ‘Mī efe xanīfokōi īpanakaki. Akka nā mia noikaspaifo mī ato finōkōinō ē ato mīnāmā nīchikai,’ ixō Epa Niospa yoinino David kirika keneni.

⁴⁵ “Akka, ¿afeskai Cristo David āfe fena itiomē, nā David Cristo ēfe Ifora fafiapaonino?” Jesús ato fani.

⁴⁶ Ato askafaino nikakakī tsōakai pishta kemanima. Nāskakē akiki ranokakī anā tsōa afaa pishta yōkanima.

23

Jesús ato yōani fariseofoya a Moisés yoini keskara ato tāpimamisfo

(Mr. 12.38-40; Lc. 11.37-54; 20.45-47)

¹ Mā askafata Jesús yorafo yoini aōxō tāpimisfoya: ² “A Moisés yoikī kirika keneni keskara ato tāpimamisfo feta fariseofāfe a Moisés yoini keskara mato tāpimakani. ³ Akka ato nikakāfe. Nā mato yoiaifo keskara akāfe. Akka nāfāfe nā yoiaifo keskara akanima. Nāskakē nā yoiaifo keskara akātama afara fetsafo amisfo. Nāskakē mārī ato keskara iyamakāfe. ⁴ Āto patoronō ato yoitiro iskafakī: ‘Na efekōi pefexō fōtakāfe,’ ato fafxō ēri foyoikanō ato fatiroma. Nāskarifiakī a Moisés keneni ato tāpimamisfo feta fariseofāfe mato afara fekaxkōi yoimisfo afeskax Epa Nios fe mā itiomākī Epa Nios matoki inimanō ikaxō. Nāskafikaxō mato afara axosharamisfoma. ⁵ Afama mīshti sharafo apaikani yorafāfe noko ōinōfora ikaxō kakapaiyanā. Niospa meka kirikaki kenekata koiro kafo pishta fakāta a mēra Niospa meka nanekaxō āto fishpi ano nētamisfo. Askatari āto pōya anori nētamisfo. Askatari tari kepanātia chainipa safemisfo sharakōira noko fanōfo ikaxō. ⁶ Askatari sharakōi anoxō pipaimisfo, askatari tsaoti sharakōi anori tsaopaimisfo ichanāti pexe anoax, keyokōichi noko ōinōfora ikanax. ⁷ Nāskakata nā yora ichapa rasi ano fopaikani noko finōkakī noko yoisharakakī, ‘Maestro noko fanōfora,’ ikanax.

⁸ “Akka mā, ‘Maestro, noko fakāfe,’ ato fayamakāfe. Akka keyokōi mā yora fisti keskara. Tsoa fetsakai finama. Akka māto Maestro fisti finakōiaki. ⁹ Nāskakē iskaratīa nono mai anoxō tsoa Ēpa fayamakāfe. Akka nōko Epa Nioskōi nai mēra ikaki. Nā fisti Epa nō fatiroki. ¹⁰ Askatari tsoa ifofayamakāfe. Akka nā Epa Niospa katonī fisti na Cristo fisti mā Ifofatiro. ¹¹ Nā fatora fetsa xanīfo ipai nā ato yonoxomis keskara itiro. Nāskaxō ato afara axosharatiro. ¹² Akka fatora fētsa ato finōpaiyaito a keskara Niospa ato nāmā nīchitiro anā afaa inōma. Akka a shināi iskai: ‘Ēkai afama, ē fetsafo finōpaima, ē ato keskarama,’ ixō shināito Niospa fetsafo finōmainīfofā sharakōi nīchitiro,” ixō Jesús ato yoini.

¹³ Nāskata Jesús a Moisés yoikī kirika kenenī keskara ato tāpimamisfoya fariseofo yoini iskafakī: “Moisés meka ato tāpimamisfāfe, māri fariseofāfe ea nikasharakāfe. Māfi ato pārāpaimiski. Mākai a mā yoia keskara mā ato yoimisma. Mā ato xītimis Epa Nios Ifofayamanōfo. Māri mā Nios Ifofamisma. Nā Nios Ifofapaiyairo mā ato xītimis. ¡Ooa! Epa Niospa mato fāsi omiskōimaxii.

¹⁴ “¡Ooa! Mā omiskōikai, Moisés meka ato tāpimamisfāfe fariseofo fe. Mā ato yoimiski iskafakī: ‘Nō mato afara shara faxōira,’ ixō mā ato pārāmis. Akka kēro ifomafa mā pāraxō mā pexe fiamis. Nāskaxō mā Nios kīfikī mā chaikōi kīfimis yorafāfe sharakōi shinānōfora ixō. Nāskakē Epa Niospa mato fāsi omiskōimaxii.

¹⁵ “¡Ooa, a Moisés yoikī kirika kenenī keskara ato tāpimamisfāfe, mā omiskōixii fariseofo fe! Akka mā judeofoma ari kafāsamis ato yoikai noko keskara inōfora ikax, nō mato Niospa meka tāpimanōra ixō. Askafixō mā ato yoisharamisma. Nāskakē mato nikakanax mato keskarari ikani kiki. Mā chakakōifo nāfori chakafinakōia ikani kiki. Nāskakē mā nakanax Epa Nios ari foxikanima. Mato fe nā omiskōipakenakafo mēra foxikani.

¹⁶ “¡Ooa! Niospa mato omiskōimaxii, mā ato mēstekōi yoimiskēma. Mā tāpimafixō mā ato paramiski ato tāpimapaikī. Mā fēxo keskarakī fēxo afe fēxo iyoikai nā rafe fenotirofo. Nāskarifiakī Niospa meka anoriyamafiano mā ato paramiski iskafakī mā ato yoikī: ‘Ē mato paraima. Nāskakē ē mato yoi, nā ē mato yoioa keskara ē ayamaito Nios kīfiti pexefānē ea omiskōimatiro,’ mā imis. ‘Akka nā Nios kīfiti pexefā aneōxō mā yoioa keskafakī mā ato axoyamaxō shināchakayamakāfe. Askafixō nā Nios kīfiti pexefā mēranoa oro aneōxō mā ato yoioa keskafakī ato axokāfe,’ ixō mā ato yoimis. ¹⁷ Mā tatimakōifo, askatari mā fēxo keskarakōifo. Akka, ¿fato sharafinakōiamē? Nā Nios kīfiti pexefā mēranoa oro raka sharafinakōia, askayamai Nios kīfiti pexefā raka sharafinakōia. Akka oro ares rakax shara itiro. Akka Nios kīfiti pexefā mēramāi rakax shara itiro.

¹⁸ “Nāskarifiakī, ‘Nā ē mato yoioa keskara ē ayamaito nā a kamakixō yoinā koati mīsamāfānē ea omiskōimatiro,’ ixō yoimisfo. Akka mā fariseofāfe, anorima mā ato yoikī iskafamis: ‘Nā mīsamāfā aneōxō mā ato yoioyomis keskafakī mā ato axoyamafixō shināchakayamakāfe. Askatari nā mīsamāfā kamakixō yoinā koaki nā yoinā aneōxō mā ato yoioyomis keskara akāfe,’ ixō mā ato yoimis.

¹⁹ “Akka mā fēxo keskarakōi. Akka, ¿fato sharafinakōiamē? Nā afarafo mā Nios ināi raka sharafinakōia, askayamai a kamakixō yoinā koati mīsamāfā raka sharafinakōia. Akka nā yoinā ina ares shara itiro. Askafixō nā shara, māmāi mā Nios ināno mīsamāfā anoxō koakī. Nāskakē nā yoinā inapa nā koati mīsamāfā finōma. ²⁰ Akka nā koati mīsamāfā aneōxō afara yoiaito nā koati

mīsafā fistiōnoa aneima. Akka nā mīsamāfā kamaki rakaōnoari yoi. ²¹ Akka nā Nios kīfiti pexefā aneōxō afara yoikī Nios kīfiti pexefā fistiōnoa yoima. Akka Niosri a mēra ikano mā yoi. ²² Akka nā nai aneōxori mā afara yoikī, nai fistiōnoa mā yoima. Nā Nios Xanīfo nai mēra ika anoafori mā yoi.

²³ “iOoa, a Moisés yoikī kirika keneni keskara ato tāpimamisfāfe fariseofo feta! Ea nikapapo. Māfi ato parapaimiski. Māto afama mīstifo mā Nios ināpaifiki a Niospa afara fetsa yoia keskara mā shināmisma. Mā mātō fana mīstifo nā korātorofo fana fetsa mīstifori mā Nios ināmis. Akka fetsafo mā ato yonomaxō afara fichipaifiaifāfe mā ato noikima mā ato afaa ināmisma. Epa Niospa yoini keskafakī mā ato noima. Akka a mā yoiai keskara tsōa mātō meka chanīmara fatiroma. Nāskaxō mātō fana mīstifo mā Nios ināfikī a Niospa yoia keskara mā shināima. ²⁴ Akka mā nā fēxo afe fēxo iyotiroma keskarafo. Nāskarifiakī māri mēstekōi shināsharaima yorafo Niospa meka tāpimapaifiki. Nāskaxō afara sharakōifo mā ato tāpimasharamisma. Akka afara sharama mā ato tāpimamis. Akka nāpe pishta mātō kecho mēra naneano, mā fixō mā potamiski. Akka nā camello efapakōi mā potakaspakī mā ayamis.

²⁵ “iOoa, a Moisés yoikī kirika keneni keskara ato tāpimamisfāfe fariseofo feta! Mā ato parapaimiskōi. Akka mātō kecho yafi mātō sapa femākia fisti chokasharafiki, oke mērakai mā chokasharamisma, nachoshtax pisikōi itiro. Nāskarifiakī mā yorafo ōimapai nafo sharafora noko fanōfora ixō. Akka mātō shinā mēraxō mā shara shināyamafiki, oa choshta pisi keskaraxō. Nāskaxō afarafo mā ato fiamis fetsafo ratexō. Askatari mareskōi mā shinākī, ichapakōi fichipaikī mā icha icha famis. Nāskakē Epa Niospa mato omiskōimakōixii. ²⁶ Fariseofāfe, mā kai mēstekōi shināsharamisma. Akka iskaratīa mātō shinā mēraxō shināsharakāfe, isharakōixikakī. Anā afaa chaka shinākakima. Nāskaxō mā yorafo ikisharakōitiroki.

²⁷ “iOoa, a Moisés yoikī kirika keneni keskara ato tāpimamisfāfe, fariseofo feta! Māfi ato parapaimiski. Māfi nā mafa kini keskaraki. Akka mafa kini femākia oxo sharakōi nō ōifiaino oke mēra sharama. A namisfāfe āto xaofō fospikōia pisia fetsa fetsatapafo. ²⁸ Nāskarari shara keskara yorafāfe mato ōikani. Akka mātō shinā mēraxō mā shara shināima. Afara chakakōifo mā shināmis, ato mā parakōimis.

²⁹ “iOoa, a Moisés yoikī kirika keneni keskara ato tāpimamisfāfe, fariseofo feta! Mā ato parapaimis. Nāskakē Niospa mato omiskōimakī finakōixii. Nā mātō xinifo a Niospa meka yoimisfo fetsafāfe ato retenifo maiafo ano mā tokiri famis a mātō xinifo namisfo ato shināxikī. Nāskaxori a maiafo mātō charofo mā famis yorafāfe ōikakī na mēra sharakōira fanōfora ixō. ³⁰ Nāskaxō mā yoimis iskafakī: ‘Nōko xinifāfe a Niospa meka ato yoimisfo retenifo keskafakī nōri niyoxō nō ato retekeraanima,’ ixō mā yoimis. ³¹ Akka nā mā yoiai keskara chanīma. Mātō xinifāfe ato chakafakī ato retenifo. Māri ato keskarakōifo. ³² Nā Niospa matoki nīchiari mā retexii. Akka nā mā apaiyai keskafakī ayotakāfe.

³³ “Mā afara chakafa fafafāini. Nāskakē mā rono keskarafo. Mā chakafa fafafāini. Mā rono paekapato fake keskarakōifo. Nāskakē mā omiskōipakenakafo mēra mā kaxii. Akka afeskax mā faki ichotiroma. Askatari tsōakai mato nētefatiroma. ³⁴ Nāskakē a Niospa meka yoimis ē matoki nīchikai. Askatari a Niospa meka tāpisharakōixō shināsharakōimisno ē nīchikai. Nāskarari a Moisés yoikī kirika keneni keskara ato tāpimamisfoi ē matoki nīchixii. Nāskakē atiri mā ato retexii. Askatari fetsafori ifi cruz ikaki mā ato mastaxii nanōfo. Askatari fetsafori mātō ichanāti pexe mēraxō mā ato koshaxii.

Nāskakī mā ato omiskōimakōixii. Nāskaxori fetsafori mā ato chīfafofāsa faxii ato omiskōimayanā. ³⁵ Nāskakē Epa Niospa matori omiskōimaxii nā māto xinifāfe nā yora sharafo retenifono. Akka taefakī nā Abel sharafiano āfe ōchi reteni. Askatari fetsafori sharafiafono ato retenifo. Chipori mā xini ichapa finōano nā Zacarias, Berequias fake, māto xinifāfe retenifo. Nā Zacarias feronāfake sharafiano Nios kīfiti pexefā chaimastaxō koati mīsamāfā nakirafexō retenifo. Nāskakē Niospa atoōxō mato omiskōimaki finakōixii. ³⁶ Akka chanīma ē mato yoinō. Na yorafo iskaratīa niyoafo Niospa ato omiskōimaki finakōixii,” ixō Jesús ato yoini.

*Jesús Jerusalén anoafo ato shināi oiani
(Lc. 13.34-35)*

³⁷ Anā Jesús ato yoini iskafakī: “jOoa, Jerusalén ano ikafāfe! Māfi a Niospa meka yoimisfo mā ato retemiski. Askatari aōnoa āfe meka shara yoitanōfo Niospa mato ano nīchiafori mā ato tokorinī tsakakī retemis. Oa takaranā āfe fakefo āfe pei nāmā onetiro keskafakī ē mato kexepaifiaito mā ea nikakas-pamis. Māfi ekeki omismakī ē mato ikipanā. ³⁸ Akka ōkapo, iskaratīa anā tsōa mato kexeima nā mā imis ano. ³⁹ Ē mato yoinō, iskaratīakai mā ea anā ōima. Nā ē oaitīa mā ea ōixii. Nā ē nai mēranoax ē oaitīa mā yoikī iskafaxii: ‘Nafi Niospa nokoki nīchia. Fāsi sharafinakōia Epa Niospa na shara fapanaka,’ ixō mā eōnoa yoixii,” ixō Jesús ato yoini.

24

*Jesús ato yoini: “Na Nios kīfiti pexefā pāoixii,” ixō
(Mr. 13.1-2; Lc. 21.5-6)*

¹ Nāskata Jesús Nios kīfiti pexefā mēranoax tsekekainaino, aōxō tāpimisfo akiki fēkaxō yoinifo iskafakakī: “Ifo, ōipo. Nōko Nios kīfiti pexefā sharakōi,” fanifo. ² Askafaiyono Jesús ato yoini: “Na mā ōiai, akka ē mato pāraima anākai tokirifo petsanāmēxima, keyokōi pāoixii. Na tokirifori maoui fetsexii,” ato fani.

*Afaa afeskaximākai mā chaima nōko mai keyoaino Jesús ato yoini
(Mr. 13.3-23; Lc. 21.7-24; 17.22-24)*

³ Askata fonifo māchifā Olivos ano. Nāno Jesús tsaoni. Nāskakē aōxō tāpimisfo akiki fonifo yōkaxikakī iskafakakī: “Nō tāpipai mī noko yoinō afetīa iximē a mī yoiai keskai. Afeskaxō nō tāpitiromē a mī anā oxiai mā mai keyoaino noko yoife,” fanifo.

⁴ Askafaiyono Jesús ato kemani: “Kexemesharakani mā ato nikaino mato afara chakafamatirofoki. ⁵ Yora ichapa fēkaxō, ‘Ē Cristora,’ ixō mato paraxikani. ⁶ Nāskaxori mā nikaxii yorafo retenāifāfe chai inoax. Nāskatari nonoaxri askaxikani retenākani. Askara ōi, rateyamakāfe. Nā ē mato yoimis keskakōi kiki. Nāskafīax nōko mai fena keyoxima kiki, chipo ixii. ⁷ Akka yorafo mai fetsa anoax mēnēpaiyafono yora fetsafori mai fetsa anoax retenāixikani. Askatari fonāiki finakōixikani afaa pikanima. Nāskatari nā mai fetsa anoax mai naya naya ixii. Askatari pae finakōia fetsa fetsatapafo nokoxii kiki. ⁸ Akka taei nā omiskōiaifo, askai fetsexii.

⁹ “Nāskata mato achikaxō fetsafo mato ināixikani mato omiskōimanōfo. Nāskaxō mato retenōfo. Nāskaxō keyokōi nā mai tio anoax eōxō mato noiskaspaxikani. ¹⁰ Nāskatari yora ichapafāfekai ea anā chanīmara fakanima. Nāskakanax āa ranā noikaspa faatanāixikani. Nāskakaxō yora fetsa yōsixikani ato achinōfo. ¹¹ Nāskatari yora ichapafo āa chanīxikani iskakani: ‘Ea Niospa shināmani kiki ē Niospa meka matō yoinō,’ iki āa chanīxikani. Nāskaxō yora

ichapafo ato p̄araxikani. ¹² Nāskaxō ato chakakōi faxikani. Ato noimisfo keskafakī atirififāfe anā ato noisharaxikanima. ¹³ Akka nā ea shināmakixoma ea shinākōiai nāfi ēfe Epa Nios fe ipaxatiroki. ¹⁴ Nāskakē na meka shara Jesúsnoa nikaxakani Jesús noko nāxonikē Epa Nios xanīfo anoax nō afe ipaxanō. Na maifo tii ano ato yoiafono, chipo nōko mai keyoxii.

¹⁵ “Nā Niospa meka yoimisto Daniel a inōpokoai yoikī kenei iskfakī: ‘Nios kīfiti pexefā mēra afara chakakōi faxikani,’ ixō kirika kenei. Nāskakē na kirika kenea anexō tāpikāfe. ¹⁶ Nā chakafinakōia ōikanax, nā Judea anoafu machi keya ano ichorisatakāfe. ¹⁷ Askatari āfe pexe māmākīa tsaxō ato fichiāx koshikōi fotopakekafā āfe afaa fiamax ichotiro. ¹⁸ Askatari a āfe tare ano yonoaito anā oxō āfe rapati fitiroma. ¹⁹ Askatari a kēro fake naneafu fe a fake yome pishta chocho amaifo omiskōixikani māmāi yorafo omiskōifinakōiaifono. ²⁰ Akka Epa Nios kīfikāfe iskfakī: ‘Epa Niosi, noko omiskōimayamafe nōko pena tenetitīa askayamai yōtaino matsi meexikākīma,’ ixō yoikāfe. ²¹ Askatari a omiskōiaifo nokoxii, taeyoi askakatsaxakīma. Nā Niospa yora onifakī taefanitīa tsōa askara ōiyomisma. Askatari anā tsoa chipo omiskōinakama. ²² Akka a omiskōiaifo nōko Ifāfe xateyamano, tsoa nikeranama nai keyokeranifo. Akka afe yorafo ato noikī omiskōinōfoma xateni atomāi katonixakī.

²³ “Akka fētsa mato yoikī iskfaino: ‘Ōikapo, nakīa Cristo,’ mato fayana, ‘Oa onokīa, ōikapo,’ mato faito nikayamakāfe. ²⁴ Akka nā chanīmisfo fekani, ē Cristora ixikani, nāfo nō Niosxō nō mato yoirā ikani. Nāskakaxō tsōa atiroama keskara fakani Satanás yōshixō mato parapaikakī. Nā Niospa ato katoafori nāfo ato parapaikani. ²⁵ Mē mato yoikai iyoamano shināsharakāfe. ²⁶ Nāskakē mato parapaikani: ‘Cristo mā tsōa istoma ano oa,’ ikaxō. Nāskakē ari foyamakāfe. Askatari mato iskfakani: ‘Ōikapo, na Cristo na pexe mēra,’ mato faifāfe ato nikayamakāfe. ²⁷ Akka nā kana peikī fafetanaito nō ōitiro keskara, nāskarifiāi ē oxii xafakīakōi ea ōixikani ē oaito. ²⁸ Akka nā naafo ano ishpifo ichanātiro. Nāskari fakī keyokōichi ea tāpīxikani ē oaito,” ato fani.

*“Niospa Fake fotoaino afe keskara iximākai,” ixō Jesús ato yoini
(Mr. 13.24-37; Lc. 17.26-30, 34-36; 21.25-33)*

²⁹ Anā Jesús ato yoini iskfakī: “Akka nā penatari, nā omiskōiaifo mā keyoano, xini fakishkōi ixii, ōxeri anā chaxaxīma. Fishifori nai mēranoax pakei fetsexii, askatari nā nai mēranoafu naya naya iki fetsexii. ³⁰ Nāskatari ōixikani nai mēranoax afara afeskaraito mā tāpinō ē fotoaitīa. Nāskatari keyokōi nā maitio anoax ratei fetseyanā oiaixikani. Nāskatari ea ōixikani ē nai mēranoax nai kōinī fotoiyoaifo. Ē sharafinakōia ēfe sharaōnoax ē fotoaito ea ōixikani. ³¹ Nāskatari ēfe ājirifori ē yoixii āto maneti fāsikōi manekakī chāi chāisafanōfo a nikakanax efe yorafo a ē ato katoa ichanānōfo. Chai inoax fisti rasi efe yorafo fexikani nāno fistiāx ichanāxikakī.

³² “Akka shinākapo ē mato yoinō. Mā yōkkafaino mā tāpitiro āfe pei sirikīaito. Nāskakē āfe peifo keyopakeaito ōikī mā tāpitiro māmāi chaima xinīaito. ³³ Nāskarifiakī afarafo afeskaraito ōikī mā tāpitiro mē chaima oaino askai fetsexii. ³⁴ Ē mato pāraima ē mato yoikōi, na ē mato yoiāi keskara nono mai anoxō yorafāfe nayokaxoma ōiyokani. ³⁵ Akka nai fe mai keyoi. Akka ēfe meka fisti keyonakama, nā ē mato yoiāi keskakōi.

³⁶ “Afeḷara nai mēranoax ē oxii tsōakai tāpiama. Nā ājirifāfe nai mēra ifiakaxō tāpiafoma. Ērikai tāpiama. Ēfe Epa Nios fistichi tāpia. ³⁷ Akka nā Noé niyoano

ini keskai, nāskarifiaxii ē anā oaino. ³⁸ Nāskata fakafānē ato maiyoamano, Noé kanōanāfā mēra ikini, yorafo pikāta, ayakāta fīanākāta ikaifono. ³⁹ Akka tsōa shināyamaino mā faka faipafaxō keyokōi ato āsakī mitokōini. Nāskarifiaxii ē oaino ea shinātama afara chakafaifono. ⁴⁰ Nāskatari feronāfake rafeta āto tare ano yonokani. Fetsa ea ari kai yamarisatatiro. Akka fetsa nētetiro nā omiskōipakenakafo mēra kaxiki. ⁴¹ Nāskarifiāi kēro rafeta xiki renekani. Fetsa ea ari kai yamarisatanaino akka fetsa nētetiro nā omiskōipakenakafo mēra kaxiki.

⁴² “Nāskakē itipinīsharakāfe oa mā moinākfanaī keskakāfe. Akka mā tāpiamaki afetūara ē anā oxikai. ⁴³ Nāskakē māri nā keskara tāpisharakāfe. Akka pexe ifāfe mā tāpīxō afetīa yometso nokoimākai ixō āfe pexe itipinīshara fatiro mā moixō, a mēra ikiax yometsoyamanō. ⁴⁴ Nāskarifiāi māri itipinīsharakāfe. Akka oimara ixō mā ea manayamaino ē matoki nokorisatani,” ixō Jesūs ato yoini.

Ina shara yafi ina chakaōnoa Jesūs yoini
(Lc. 12.41-48)

⁴⁵ Anā Jesūs ato yoini iskafakī: “Ē mato yoinō afe keskaramākī a yonoxomis shara mā tāpinō. Xanīfāfe mai fetsa ari kakī, a yonoxomis āfe pexe ano nīchifaini nānoxō a yonoxomis fetsafo a piaifo pena tii ato ināfafainō. ⁴⁶ Mā mai fetsa ari katani oxō ōitoshini a yonoxomisto mā yonoxosharakōiano. Nāskakē akiki inimakōini a yonoxomisri inimakōini māmāi yonoxosharakōiax. ⁴⁷ Ē mato paraima. Nāskaxō āfe xanīfāfe mā xanīfo imaxō āfe afama mīstifiko kexexonō inātiro. ⁴⁸ Akka nā yonoxomis chakapa shinātiro: ‘Ēfe xanīfo fena oimara,’ ixō. ⁴⁹ Nāskaxō a yonoxomis fetsafori ato seteketsani. Askatari nā pāemisfo fe rafexō ato feta piyanā askatari ato feta ayayanā. ⁵⁰ Iskaratīa ēfe xanīfo oimara ixō manasharayamaino nā penata āfe xanīfo nokorisatani. ⁵¹ Mā oxō nā yonoxomis omiskōimaxii. Nā yora keparanāmisfo fomisfo mēra potaxii. Nāskakē anoax oiayanā omiskōipakenaka,” ixō Jesūs ato yoini.

25

Meka fetsafaxō Jesūs ato yoini diez xotofake xomayaōnoa

¹ Anā Jesūs ato yoini iskafakī: “Ē mato yoinō meka fetsafaxō mā tāpinō ē anā oxii a Nios Ifoafaōnoax afe keskara ixikanimākai. Akka nā diez xotofake xomayafāfe āto rāpari fifaikani fonifo. Feronāfake rama āfiyaino afe fista mēra foxikakī manai fokani fonifo. ² Akka nā cinco xomayafāfe shināsharanifoma, itipinīnifoma. Akka nā cincoāferi shināsharanifo. ³ Akka nā shināsharaifāfema āto rāpari foyakakī āto kirosī fonifoma anā fospifaxikakima. ⁴ Akka nā shināsharakōiaifāfe āto manishomoki kirosī fonifo. Askatari āto rāpari fonifo. ⁵ Akka feronāfake fena nokoyamaino, mā fakishaino, oxakatsa ikani. Nā kēro xomayafo oxanifo. ⁶ Nāskakē yame nakekafanaino nikanifo kenaifāfe iskaifono: ‘jMā nā feronāfake oi kiki! jMoinīfōfākāfe, ifixikakī!’ ato faifono. ⁷ Nāskakē nā kēro xomayafo moinīfōfākata itipinī fakī fetsanifo āto rāparifo ōtaketsakakī. ⁸ Nāskata nā cinco xotofake shināsharaifāfema nā cinco xotofake shināsharaifo āto kirosī pishta yōkanifo: ‘Noko kirosī pishta inākāfe. Nōko rāpari otasharaima kiki,’ ato fanifo.

⁹ “Ato askafaifono nā xotofake shināsharaifāfe ato kemanifo ato iskafakakī: ‘Maa. Nō mato inātiro, nōri afaa otatiroma. Akka mā kaxō fitiro a

kirosī miniaifo anoa fitakāfe mātonā faxikakī,' ato fanifo. ¹⁰ Akka nā cinco xotofakefāfe kirosī fifofāfono nā manaifo feronāfake nokoni. Nāskakē nā cinco xotofakefo shara shināmisfo nā feronāfake mā nokoaino afe pexe mēra ikiniho afeta fista ayanā pixikāki. Nāskakaxō pexe fepoti feponifo. ¹¹ Nāskano nā xotofakefo kirosī fitakani anā fanifo. Mā fēkaxō iskafakī yoitoshinifo: 'Xanīfo, noko fepoti fēpexōfe nō ikikanō,' faifāfe, ¹² ato kemani: 'Maa. Ēkai mato ōimisma, ē mato ikimatiroma,' ato fani.

¹³ "Nāskarifiakī māri isharakōixō ea manasharakōikāfe. Afetiara ē anā matoki oxikai tsōa tāpiamaki," Jesús ato fani.

Meka fetsafaxō koriōnoa Jesús ato yoini
(Lc. 19.11-27)

¹⁴ Anā Jesús ato yoini iskafakī: "Ē anā mato yoinō Nios xanīfo iskaraki. Feronāfake mā mai fetsa ari kakī a yonoxomis kenaxō yoini āfe kori kexxonō. ¹⁵ Akka a yonoxomis fetsa ināni cinco mil. A yonoxomis fetsari ināni dos mil, fetsari ināni mil. Akka nā kori kexekī tāpia ichapa ināni. Akka a kori kexekī tāpisharafomari ichapa ato inānima. Nāskax kani mai fetsa ari. ¹⁶ Akka āfe ina fetsa nā cinco mil fiato nā kōri afama mīshti fini. Nāskaxō anā cinco mil fini āfe afama mīshtiōxō. ¹⁷ Nāskafakīri nā dos mil kori fiato nāatori nāskarifani afianā dos mil kori fikī. ¹⁸ Akka nā mil kori fiato nāato kori oneni āfe xanīfo mekexokī. Mai kini mēra maifani.

¹⁹ "Akka mā samarakax anā oni āto xanīfo. Mā oxō a yonoxomisfo nā tres ato yōkani afe tii kori fixofafomākī. ²⁰ Nāskakē nā cinco mil kori fini akiki oi taeni. Nāskaxō āfe xanīfo kori ināni iskafakī yoiyanā: 'Xanīfo, mī ea cinco mil kori ināti. Akka ē finōmainīfōfā anā cinco mil faxō ē fia. Ōipo. Nakīa mī kori,' fani.

²¹ "Askafaito āfe xanīfāfe yoini: 'Aicho, mī ea yonoxomis sharakōi. Nā pishta ē mia ināoxō mī yonosharakōia. Nāskakē ēfe afama mīshtifo ichapakōi ē mia anā ināni mī ea kexxonō. Nāskakē nā ē inimai keskariai mīri inimafe,' ixō yoini.

²² "Nāskatari a yonoxomis fetsari chipo oni, nā dos mil kori fini. Oxō yoini iskafakī: 'Xanīfo, mī ea dos mil kori ināni. Akka ē finōmainīfōfā anā dos mil faxō ē fia. Nakīa mī kori,' fani. ²³ Nāatori askafaito āfe xanīfāfe yoini: 'Aicho, mī ea yonoxomis sharakōi. Nā ē mia ināoxō mī yonosharakōia. Nāskakē ēfe afama mīshtifo ē mia anā kexemani. Nāskax mīri nā ē inimai keskariai mīri inimafe,' fani.

²⁴ "Nāskata a yonoxomis fetsari oni nā mil kori fini. Mā oxō āfe xanīfo yoini: 'Xanīfo, ē tāpia mī feronāfake mitsisipakōi. A mī fanama anoa mī fimis. Askatari a mī saakama anoafori mī fimis. ²⁵ Nāskakī ē mesekī ē mia kori maifaxōa. Nakīa mī kori,' faito āfe xanīfāfe kemani: ²⁶ 'Mī ea yonoxomis chakakōi. Askatari mī xanikōi. Akka, ;mī shināmē a ē fanama anoafō fita, a ē saakama anoafori ē fimis? ²⁷ Nāskakī nānori mī shinākī mī kori banco anoa ē fāxōama anā oxō ē kori ichapa fikerana mā ēfe kori ichapano ē anā fikerana,' fani. ²⁸ Nāskaxō nā anoafō ato yoini: 'Nā feronāfake nā mil kori fiakāfe fetsa ināxikakī nā kori diez milya,' ato fani. ²⁹ Akka nā afara ichapaya ichapayakōi itiro. Nāskaxori āfe afara ranāri anā meketiro. Akka nā afaa ichapayama āfe afara fiatiro anā afaa ichapaya iyamanō. ³⁰ Nāskata a yonoxomis chaka mā potaxō fakishifā mēra nīchini nā fakishi mēranoax oiayanā omiskōipakexanō," ixō Jesús ato yoini.

Mā mai keyoaino nā omiskōipakenakafoōnoa Jesús ato yoini

³¹ Anā Jesús ato yoini iskafakī: “Ē mato anā yoinō, ea nikakapo. Ē nai mēranoax oni. Ē Niosfiax feronāfakekōi ē oni. Ē anā nai mēranoax fotoyoi, ē xanīfokōi oxii ēfe ājirifo fe keyokōi ē oxii, ea kemataima mapoi fetsexikani. Askatari efe xanīfāfe tsaoti ano tsoaxikani. Keyokōi sharafinākōia ōixikani. ³² Nāskatari yorafo keyokōi nā maitio anoafō ēfe ferotaifi ichanāxikani. Nāskakē ē ato paxkanā faxii nā oveja kexemisto āfe ovejafōa āfe cabrafo paxkanā fatiro keskafakī. ³³ Nā āfe inafō kexemisto āfe inafō paxkanā fakī āfe ovejafos āfe pōya kayakai aōri nīchixii. Askatari āfe cabrafori āfe pōya mishkiori nīchixii. Nāskarifiakī ē yorafo keyokōi ē paxkanā faxii. Nā ea Ifofaafos ēfe pōya kayakai aōri ē ato nīchixii, akka a ea Ifofaafomāfori ēfe pōya mishkiori ē ato nīchixii. ³⁴ Nāskaxō mē xanīfoxō ē ato yoixii nā ēfe pōya kayakai aōrinaofo ekeki fekāfe, ēfe Epa Niospa mato inimamamiski. Nāskakē ēfe Epa Xanīfo ano mā afara fikai nā mai onifaitia mato yoiyoni keskara. ³⁵ Akka ē fonāikaito mā ea pimamis; ē nōamāikaitori mā ea ayamamis; ē pexemaisax kafāsaitori, ‘Nono ēfe pexe ano ofe nono oxaxiki,’ mā ea famis. ³⁶ Askatari ē rapatimaiskē mā ea ināmis; ē isinī ikaitori mā ea kexesharamis; ē karaxa mēra ikikēri kaxō mā ea ōimis.

³⁷ “Ē ato askafaito ea yōkaxikani iskafakākī: ‘Ifo, ŷafetīa nō mia ōimismē mī fonāikaito, akka mī fonāikaito nō mia pimamis? Askatari, ŷafetīa nō mia ōimismē mī nōamāikaito, akka mī nōimāikaito nō mia ayamamis?’ ³⁸ Askatari, ŷafetīa nō mia ōimismē pexemaisax mī kafasaito, akka nō mia pexe ināmis ano mī oxanō, askatari mī rapatimaiskē akka nō mia rapati ināmis?’ ³⁹ Askatari, ŷafetīa mī isinī ikaito nō mia ōimismē? Askatari, ŷafetīa karaxa mēranoa nō mia ōikamismē?’ ixō ea yōkaxikani.

⁴⁰ “Ea askafaifono ē ato kemaxii: ‘Ē mato paraima, nā fetsafo omiskōiaino mā tanaima isharaxō eōxō mā axomis.’

⁴¹ “Askatari na ēfe pōya mishkiorinoā ē ato yoikī iskafaxii: ‘Na ēfe pōya mishkiorinoā emakinoax fotakāfe mā chakakōikī. Chii xoisai mēra fotakāfe anoax omiskōixikaki. Nā ē chii xoisai itipinī fani mēranoax Satanās chaka fe āfe yōshi chakafori anoax afe omiskōinakafo. ⁴² Akka ē fonāikaito mā ea pimamisma. Askatari ē nōamāikaito mā ea ayamamisma. ⁴³ Askatari ē pexemaisax kafāsaito, “Nono nōko pexe mēra ife,” mā ea famisma. Askatari mā ea rapati ināmis. Askatari karaxa mēranoa mā ea ōikamisma. Askatari ē isinī ikaito mā ea ōikamisma,’ ixō ē ato yoixii.

⁴⁴ “Ato askafaito yorafetsafāfe yōkaxikani iskafakākī: ‘Ifo, ŷafetīa nō mia ōimismē mī fonāikaito, askatari a mī nōiamāikaito, askatari mī pexemaiskē, askatari mī rapatimaiskē, askatari a mī isinī ikaito, askatari a mī karaxa mēra ikikē nō mia tanamisma nō mia ōikaspamis?’

⁴⁵ “Ea askafaifono ē Xanīfokōixō ē ato kemaxii iskafakī: ‘Ē mato paraima. Nā omiskōiaifo mā ato tanamisma nafokai afaafoma ixō askatari eari mā tanamisma,’ ixō ē ato yoixii. ⁴⁶ Nāskakē nāfo nā omiskōipakenakafo mēra foxikani. Akka nā ea Ifofaafō efe nīpanakafo,” ixō Jesús ato yoini.

26

*“ŷafeskaxō nō Jesús retetiromē?” ixō shinānifo
(Mr. 14.1-2; Lc. 22.1-2; Jn. 11.45-53)*

¹ Nāskata mā ato yoikī keyota Jesús aōxō tāpimisfo yoini: ² “Mā mā tāpiakī oxa rafeta Pascua fista ikiki. Nāskatari Pascua fistatīa ea achikani fetsafāfe ea mastanōfo,” ixō Jesús ato yoini.

³ Nāskakē a Niospa meka yoimis xanīfofo fe a judeo anifofo ichanānifo Caifás pexe anoax. Nā Caifás ato Nios kīfixomisfāfe āto xanīfo ini. ⁴ Nāno ichanākanax yoinānifo: “¿Afeskaxō nō Jesús achitiromē paraxō retexiki?” ikanax yoinānifo. ⁵ Nāskakanax yoinānifo: “Fistatīakai nō achitiroma yorafā rasi mekai fetsekani nokoki ōitifishkitirofo,” ikanax yoinānifo.

Kēromā Jesús shinākī āfe mapoki pirofomā nachini

(Mr. 14.3-9; Jn. 12.1-8)

⁶ Nāskata Jesús Betania ano ini Simón pexe ano. Nā Simón “Rashkishiai” fapaonifo. ⁷ Jesús nānoxō piaino kēro fisti akiki kani pirofomā manishomo sharakōikī foikai nā manishomo āfe ane alabastro. Akka nā pirofomā kopikōi ini. Jesús mīsa ano tsaoxō piaino, nā kēromā āfe mapoki pirofomā nachini. ⁸ Askafaito ōikani Jesúsxō tāpimisfo ōitifishkiyanā iskanifo: “¿Afeskakī nā pirofomā shara mī nachimē?” ⁹ Mī ato minixō mī kori ichapa fixō a afaamaisfo mī ato inākerana,” fanifo.

¹⁰ Askafaifāfe nikakī Jesús ato yoini: “¿Afeskakī na kēro mā fekaxtefaimē? Na ea iskafai sharaki,” ato fani. ¹¹ “Akka nā afaamaisfori mato fe ipanakafo. Akka eakai mēxotaima mā ea anā ōima. ¹² Akka na kēromā ea iskafakī ēfe yoraki pirofomā nachia ea itipinīsharafakī ea iskafa ea maifasharaxinōfo. ¹³ Ē mato pāraima, fanīxōra na meka shara eōnoa yoikakī nā mai tio anoxō na kēromā ea iskafaōnoa yoixikani. Askatari na kēroōnoa shināpakenakafo, shināmakiyamaxikakī,” ixō Jesús ato yoini.

Judaspa aōxō tāpifikatsaxakī Jesús ato achimani

(Mr. 14.10-11; Lc. 22.3-6)

¹⁴ Nānori Jesús ato yoiaino a aōxō tāpimis fetsa, āfe ane Judas Iscariote, nā kani nā ato Nios kīfixomis xanīfofo ano. ¹⁵ Mā kaxō ato yoini: “¿Afe tii mā ea kori inātiromē ē mato Jesús achimanō?” ato faito yoinifo: “Treinta nō mia inātiro,” fanifo. ¹⁶ Nāskaxō Judaspa shinākī taefani: “¿Afeskaxomāi ē Jesús ato achimanō?” ixō shināni.

Mā chaima reteafono Jesús aōxō tāpimisfo feta yātapake pini

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Akka nā Pascua fistatīa pāa faraxatimais pipaonifo. Nāskata mā fista pakeano aōxō tāpimisfo akiki fokaxō yōkanifo: “¿Fanī mī fichipaimē ano kaxō nō itipinī fanō, anoxō Pascuatīa yātapake pixiki?” fanifo.

¹⁸ Askafaifono Jesús ato kemani iskafakī: “Oa pexe rasi ano fotakāfe. Nānoa feronāfake fetsa fichixō yoitakāfe iskafakī: ‘Nōko Ifāfe noko yoia nō mia yoiyonō iskafaki: Mē chaima naikai. Nōko fistatīa mī pexe anoxō eōxō tāpimisfo feta ē pii kaikai,’ ixō yoitakāfe,” ato faano, ¹⁹ nāskafakī yoinifo nā āto Ifāfe ato yoia keskafakī. Nānoxō itipinī fanifo Pascua fistatīa pixikakī.

²⁰ Jesús mā fakishaino pexe ano nokoax mīsa ano tsaoni a aōxō tāpimiskōifo fe. ²¹ Nānoxō piyana ato yoini: “Ē mato pāraima, fatora mā fētsa ea mā ato achimafainaka,” ato fani.

²² Ato askafaito nikai shināmitsakōinifo. Nāskaxō yōkaketsanifo: “¿Ēraka, Ifo?” fakī fetsanifo.

²³ Askafaifono Jesús ato kemani: “Nā efeta sapakinoa pāa momoxō piaito nāto ea ato achimaxii. ²⁴ Ē Niospa Fakekōifiax ē yorakōi. Nā eōnoa yoiki kirika kenenifo keskakōi fakī ē asharakōitiro. Akka nā feronāfake ea ato achimafiax akairi omiskōikōixii. Akka nā feronāfake shara ikerana fakeyamanixakī,” ixō Jesús ato yoini.

²⁵ Nāskakē Judaspa nā ato achimanaito yōkani: “Maestro, ¿ēraka?” faito, “Ēje, nā mī yoi ai keskarakā,” Jesús fani.

²⁶ Nāskakaxō piaifono Jesús pāa tso mainīfōfā Apa Nios kīfīni. Mā Apa kīfita pāa kaxkeketsaxō aōxō tāpimisfo ināni ato iskafayanā: “Na ēfe nami keskara pikāfe,” ato fani.

²⁷ Ato askafata kechokinoa fimi ene tso mainīfōfāxō Apa Nios kīfīni. Nāskaxō aōxō tāpimisfo ato ayamani ato iskafayanā: “Na fimi ene ayakāfe,” ato fani.

²⁸ Nāskaxō ato yoini: “Nafi ēfe imi keskaraki. Akka nā ē mato yoiyoni keskai mē nai. Nāskakaxō ēfe imi ōikaxō tāpitirofo Epa Niospa yoiyoni keskafakī yora ichapafo ē ato chaka soaxonō. ²⁹ Akka anā ē mato yoinō ē anā mato feta fena na fimi ene ayaima. Mā mā nai mēra kano ē mato feta anā fimi ene ayaxii ēfe Epa xanīfo anoxō,” ixō Jesús ato yoini.

*“Ē Jesús ōimisma,” Pedro ixiaino Jesús ato yoini
(Mr. 14.26-31; Lc. 22.31-34; Jn. 13.36-38)*

³⁰ Nāskakata mā fanāiki xatekata machi Olivos ano fonifo. ³¹ Nānoxō Jesús ato yoini: “A na fakishi keyokōi mā ea shināmaki fetsei. Nānori kirika kenenifo iskafakā: ‘Āfe ifo reteaifono, āfe ovejafo ichoi fetsetirofo,’ ixō kirika kenenifo,” ato fani. ³² “Akka ea retefiafono ē otoax ē Galilea ano rekē kai mā kayoamano,” ato faino, ³³ Pedro kemani: “Keyokōi shināmakiaifono, akka ēkai mia shināmakima,” fani.

³⁴ Askafaito nikakī Jesús yoini: “Ē mia pārāima na fakishi takara fene keofamano, ‘Ē Jesús ōimismara,’ mī ea fai tres fakī,” fani.

³⁵ Askafaito nikakī anā Pedro kemani: “Maa. Mia retefiaifono ē mefe nai. Ē ōimismara ē mia faima,” fani. Pedro askafaito nikakakī keyokōichi aōxō tāpimisfāfe askafakī fetsanifo.

*Getsemanī anoxō Jesús Apa Nios kīfīni
(Mr. 14.32-42; Lc. 22.39-46)*

³⁶ Nāskata Jesús kani aōxō tāpimisfo fe Getsemanī ano. Nānoxō ato yoini: “Nono tsaokāfe onī chaimashta kaxō ē Epa Nios kīfiyotanō,” ato fani.

³⁷ Akka Pedro iyoni, Zebedeo fake rafe yafi. Nāskaxō āfe yora meeni shināmitsakōiyanā fekaxteaito. ³⁸ Anoxō ato yoini: “Ēfe yōshi shināmitsai napaiyaito ē meikai. Nono nētekāfe oxakakima māri efeta ōisharaxikakī,” ato fani.

³⁹ Ato askafata Jesús ares fisti ori chaimashta kani. Nānoax maikiri fepepakekafata āfe fishpi mai tiisani. Nāskaxō Apa kīfīni iskafakī: “Epa, na ē omiskōiai ekeki nokoyamafe. Akka nā ē apaiyai keskafakima. Nā mī ea amapaiyai keskafafe,” fani.

⁴⁰ Nāskata anā anoris onī aōxō tāpimisfo ano. Oxō ato ōia oxafo inifo. Nāskaxō Pedro yoini: “¿Mā efeta pishta oxa tenetiromamē?” ato fani.

⁴¹ Nāskafata anā yoini: “Moikaxō Epa Nios kīfikāfe Satanás chakata mato chakafamapaiyai keskara axikakima. Chanīma, nā Epa Niospa mato amapaiyai keskara mātō shinā mēraxō mā apaifikī mā atiroma. Akka mātō yora pachikōikī,” ato fani.

⁴² Ato askafata anā kani Apa Nios kīfikai iskafakī: “Epa, ea mīa omiskōimayamakī ea mīa omiskōimatiroma. Akka nā mī ea amapaiyai keskafafe,” fani.

⁴³ Nāskata anā oxō ato fichitoshini aōxō tāpimisfo oxafono, oxa paemei fetsoafono. ⁴⁴ Nānoa ato ōifaini kaxō anā Apa Nios kīfīni, afia yoitana keskafakī.

⁴⁵ Nāskata Jesús anā oni aōxō tāpimisfo ano. Mā oxō ato yoini: “¿Aimā oxamē tenekōiyānā? Akka iskaratīa a ea ato achimaniyoai mā chaima oi kiki. Yora chakafāfe ea achifenōfo ato efei kiki. ⁴⁶ Fininifōfākāfe nō kanō. Mā chaima oi kiki a ea ato achimaniyoai,” Jesús ato fani.

Jesús achinifo

(Mr. 14.43-50; Lc. 22.47-53; Jn. 18.2-11)

⁴⁷ Jesús ato yoiaino Judas nokoni, nā Judaspa Jesúsxō tāpifikatsaxakī, yorafā rasifo fe oni. Nā yorafo kenofoya ifi xatefoya fenifo, a ato Nios kīfixomisfāfe āto xanīfofo feta judeofāfe āto xanīfofōfāfe ato nīchiafono. ⁴⁸ Judaspa nā ato efeaito ato yoiyoni iskafakī: “A ē kokoki tsoo akaito ōikī achirisafaxikāki,” ato fani.

⁴⁹ Mā Jesús ano nokoxō Judaspa iskafakī yoini: “Maestro, ¿mīmē?” fatishoni. Nāskaxō kokotoshini.

⁵⁰ Askafaito ōikī Jesús kemani: “Efe yora, nā mī apaiyai keska farisafafe,” fani.

Askafaito ōikakī nā Judas fe foafāfe Jesús achinifo. ⁵¹ Akka Jesús achiaifāfe ōikī a aōxō tāpimis fētsa āfe keno chainipa tsekainīfōfā a ato Nios kīfixomisfāfe āto xanīfāfe ina paxteni.

⁵² Askaito ōikī Jesús yoini: “Mī keno fafe. Akka nō kenopa retenāino kenopari noko retetirofo. ⁵³ ¿Mī tāpimamē Epa Nios ē yoiaito iskaratīa āfe ājirifo ichapakōi ea nīchixotiro ea kexei fenōfo?” fani. ⁵⁴ “Ē iskaratīa ājiri kenano ea kexeaifono ē naima. Akka nā Niospa meka yoikī kirika kenekī yoinifo keskai ē naikai,” Jesús ato fani.

⁵⁵ Askafano ōikī Jesús yorafo yōkani: “¿Afesakai kenofoya ifixatefoya mā oamē ea achiyoi oa ē yometso keskarakē? Pena tii ē mato fe itiani Nios kīfīti pexefā mēraxō ē mato tāpimani, akka mākai ea achipaimisma. ⁵⁶ Akka nā eōnoa yoikī kenenifo keskafakī mā ea achi,” ixō Jesús ato yoini.

Ato askafano aōxō tāpimisfo Jesús ōifaikani. Ichoi fetsenifo a makinoax.

Xanīfo finakōiafo ano Jesús iyonifo

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Mā Jesús achikaxō a ato Nios kīfixomisfāfe āto xanīfo Caifás āfe pexe ano iyonifo. A xanīfofo fe a Moisés yoikī kirika keneni keskara ato tāpimamisfo fe a judeo anifofo fe nā tsoafo ano Jesús iyonifo. ⁵⁸ Pedro chai ixō ōini faki Jesús iyoi fokanimākai. Nāskaxō ato chīfāfoni. Nāskata nā ato Nios kīfixomisfāfe āto xanīfāfe pexe emāiti ano Pedro nokoni. Mā nokoax nāno tsaoni nā pexefā kexemisfo fe anoxō Jesús afeska fakanimākai ōixiki.

⁵⁹ Nā Nios kīfixomis xanīfofo feta a ato fe rafeafāfe Jesús noikaspakakī, “¿Afaa nō fatiomē Jesús afaa chakakōi faamakī nō retexiki?” ixō shinānifo. ⁶⁰ Akka Jesús afaa chakafayamafiano, yora ichapafāfe āa chakafakakī mekafanifo parakī. Akka aōnoa afaa chaka nikanīfoma. Nāskakē feronāfake raferi mekafai fekani fenifo. ⁶¹ Nā rafeta yoinifo: “Mā nō nikaita Jesús iskaito: ‘Ē na Nios kīfīti pexefā ē pāo fatiro. Nāskata tres nia oxata ē anā pexefā fatiro,’ ikaito nō nikaita,” fanifo nā rafeta āa parakakī.

⁶² Askafafono a ato Nios kīfixomis xanīfo fininīkafāta Jesús yōkani: “¿Mī kemamitsaimamē afamē na mīōnoa meka chaka yoiaifo?” ixō yoini.

⁶³ Akka Jesús tooxinima. Nā Nios ato kīfixomis xanīfāfe yoini iskafakī: “Nā Nios nipanakato mia ōi kiki mī yoikai chanīmākōi, noko yoife mīmākī Cristo Niospa Fake,” fani.

⁶⁴ Askafaito nikakī Jesús kemani: “Nā mī ea yoiai keskarakīa, ēkīa Niospa Fake. Ē mato yoinō. Akka mā ea ōixii ēfe Epa ketaxamei āfe pōya kayakai aōri ē tsāokē xanīfo finakōia ēfe Epa fe. Askatari mā ea ōixii nai kōi mēranoax ē anā fotofaito,” Jesús ato fani.

⁶⁵ Ato askafaito nikakakī a Nios ato kīfixomisfāfe āto xanīfāfe āfe rapati faxteni yorafāfe tāpinōfo Jesús yoiaito nikakaspakī. Askafata yoini: “Na feronāfāke āfe meka chakakōi Nios chakafakī mekafai. Mā nōakōi nō nikakī noko anā tsōa yoitromaki nō tāpinō,” ato fani. ⁶⁶ “¿Afe keskara mā shināimē?” ato faito keyokōichi kemanifo: “¡Nanōki!” fanifo.

⁶⁷ Mā fenexkaxō āfe femānāki kemo mechoketsayanā koshaketsanifo. Atirito fepasketsanifo. ⁶⁸ Iskafakī yoivanā: “Mīkai Cristomākī, noko yoife tsōa mia koshaketsamakī,” fanifo.

*“Ē Jesús ōimisma,” Pedro ini
(Mr. 14.66-72; Lc. 22.56-62; Jn. 18.15-18, 25-27)*

⁶⁹ Pedro nāno ato fe pexefā emāiti tsaono, nāno kēro xomaya a xanīfo yonoxomis akiki kaxō yoini: “Mīri Jesús fe kafāsamis Galilea anoax,” faito, ⁷⁰ Pedro kemani, yorafāfe ōiaifono iskafakī: “Ēkai Jesús ōimisma. Ēkai afaa tāpīama tsoaraōnoa mī yoi,” fani.

⁷¹ Nāskafata pexe fepoti ano kani. Nānoa kēro xomaya fētsari fichixō fetsafo yoini: “A nari Jesús fe Nazarete anoax kafāsamis,” fani.

⁷² Askafaino anā Pedro kemani: “Maa, nā mī yoiai keskara Niospa tāpia ē na feronāfāke ōimisma,” fani.

⁷³ Nāskafaino nā anoafāfe Pedro ano fōkaxō yoinifo: “Chanīma, mīri Jesús fe rafemis mā nō mia nikai mī mekaito, nā keskara,” fanifo.

⁷⁴ Nāskafaifono Pedro ato yoikī tafani iskafakī: “Ē mato paraima, Niospa ea ōi ē charūkē Niospa ea omiskōimatiro. Niospa tāpia ē mato yoikōi nā feronāfāke ē ōimisma,” ixō ato yoini.

Pedro askaino takara keoinākfani. ⁷⁵ Nāskaino Pedro shināni nā Jesús yoita keskara. “Takara keoyoamano mī ato yoikī tres faxii: ‘Ē Jesús ōimismara,’ mī ixii,” ixō Jesús yoita keskara Pedro shinātani. Nāskata Caifās pexefā mēranoax kākainax oiāi finakōini.

27

*Pilato ano Jesús iyonifo
(Mr. 15.1; Lc. 23.1-2; Jn. 18.28-32)*

¹ Nāskata mā penaino keyokōi a ato Nios kīfixomis xanīfofo fe judeo anifofo yoinānifo: “¿Afeskaxō nō Jesús retetiromē?” ikanax yoinānifo. ² Nāskakaxō metexkere akaxō Jesús iyonifo Pilato ano. Nā Pilato āto xanīfo yora fetsa Roma anoā ini.

Judas nani

³ Judaspa Jesús ato achimaxō reteaifāfe ōikī shināmitsayanā ato treinta kori exe ināni, a ato Nios kīfixomis xanīfofoya judeo anifofo. ⁴ Ato iskafayanā: “Ē chakafaa, Jesús afaa chakafayamafiamiskē. Paraxō ē ato achimana retinōfo,” ato faito kemanifo: “Nōkai aōnoa afaa shināchakaima. Mīa mī shināchakakōi,” fanifo.

⁵ Askafaifāfe nikai nā Nios kīfiti pexefā mēraxō ato nāmā kori exe saafaini kaax āari tenexemeax Judas nani.

⁶ A ato Nios kīfixomis xanīfofōfāfe anā kori finifo iskayanā: “Na kori exe imi foano mā chakanaki. Nāskakē a kori fati mēra nō nanetiromakī,” ikax yoinānifo.

⁷ Nāskakanax yoinānifo: “A na kōri nō mai finō ano yora fetsafo maifaxiki. Nā neo kesho fakakī neo fimisfo anoa nā mai nō finō,” ikanax yoinānifo.

⁸ Nāskakē nā mai anekī fetsafanifo. “Imi Mai,” fanifo. Akka iskaratiari, “Imi Mai,” famisfo. ⁹ Nāskakē nā Niospa meka yoimisto Jeremías a inōpokoai yoikī kirika keneni keskakōini. Iskafakī yoikī keneni:

Kori exe treinta fixikani nā israelifāfe yoinifo keskafakī. ¹⁰ Nāskakē nā kōri kesho faxii mai fimisfo anoa nā mai finifo nā Niospa ea yoiyoni keskafakī, ixō Jeremías keneni.

Pilato xanīfāfe Jesús yōkani
(Mr. 15.2-5; Lc. 23.3-5; Jn. 18.33-38)

¹¹ Jesús iyonifo Pilato xanīfo ano. Mā iyoafono nānoxō yōkani iskafakī: “¿Mīmē judeofāfe xanīfo?” faito Jesús kemani: “Ēje, nā mī ea yoiai keskarakā,” fani.

¹² Akka nā ato Nios kīfixomis xanīfofo feta judeo anifofofāfe, “Mī chakakōi famis,” pārakī fanifo. Askafaifono Jesús ato kemanima. ¹³ Nāskakē Pilato yōkani: “¿Mī nikaimamē mia chakafakī mekaifaifāfe?” fani.

¹⁴ Askafaito nikakī, Jesús kai pishta kemanima. Nāskakē xanīfo Pilato, “Kee, ¿afeskai ea kemaimamē?” ixō shināni.

Pilato ato yoini Jesús retenōfo
(Mr. 15.6-20; Lc. 23.13-25; Jn. 18.38-19.16)

¹⁵ Akka Pascua fistaṭia xanīfo Pilato yora fisti karaxa mēranoa kāimapaoni. Nā yorafāfe kāimapaiyāifo ato kāimaxopaoni. ¹⁶ Akka nā karaxa mēra ika feronāfake chakakōi ini, āfe ane Barrabás ini. ¹⁷ Nāskakē yorāfo ichanāfono Pilato ato yōkani: “¿Fato mā fichipaimē ē mato kāimaxonō? ¿Barrabás iyamai Jesús nā Cristo nā Niospa nīchini ē kāimatiromē?” ato fani.

¹⁸ Akka mā Pilato tāpia ini judeo xanīfāfe shināchakaito nō anā xanīfo itiromara ixō, a ano Jesús iyoaifono.

¹⁹ Nā xanīfāfe tsaoti kamaki tsaonō Pilato shināino, āfe āfinī āfe ina nīchini Pilato yoitanō: “Mī āfinī ea yoia ē mia yoinō iskafakī: ‘Na feronāfāke afaa chakafamismakī afeska fayamafe. Ēfe namapa aōxō chakakōi ē namakī,’ mia faa,” āfe inapa fani.

²⁰ Akka nā ato Nios kīfixomisfāfe āto xanīfofo feta judeo anifofofāfe āfe yorāfo ato yoinifo iskafakakī: “Jesús kāiyamanō. Akka Barrabás kāinō. Jesús ato retemanō Pilato yoikāfe,” ato fanifo. ²¹ Askaifāfe xanīfo Pilato anā ato yōkani: “Fato mā fichipaimē ē mato kāimaxonō ea yoikāfe,” ato faito, “Barrabás kāimafe,” fanifo.

²² Anā Pilato ato yōkani: “Akka, ¿ē Jesús nā Cristo famisfo ē afeska faimē?” ato faito, keyokōichi kemanifo: “¡lfi cruz ikaki mastamafe!” fanifo.

²³ Askafaifāfe nikakī Pilato ato yoini: “Akka, ¿naato afaa chakafamē?” ato fani.

Ato askafaito nikakakī fāsikōi yoinifo: “¡Mastafel!” fanifo.

²⁴ Akka Pilato oia tsōa nikakanima inifo. Yorafā rasi fāsikōi mekanifo. Nāskakē āfe ina faka fixotanō nīchini. Askata mechokomeni yorafāfe ferotaifi oinōfo ato iskafakī yoianā: “Ēkai afaamaki na feronāfake ē retepanā. Mā mā apaikai akāfe. Eōnoax naima kiki. Matoōnoax nai kiki,” ato fani.

²⁵ Ato askafaito yorafāfe kemanifo: “Akka nō akikai retēkī nō tenetiroma nokoōnoax nai. Nōko fakefoōnoaxri nai,” fanifo.

²⁶ Nāskakē Pilato Barrabās ato kāimaxoni. Nāskata mā Jesús ato koshamata ifi cruz ikaki mastatanōfo ato yoini.

²⁷ Askata sorarofāfe Jesús iyonifo xanīfāfe pexefā ano. Nānoax sorarofa ichanākanax Jesús kemataima niakenifo. ²⁸ Nāskakaxō āfe rapati pēkakaxō, rapati ōshi nana safemanifo, xanīfāfe tari keskara. ²⁹ Nāskatari moxa chainipafo maiti fākaxō maimanifo. Āfe mēke kaiyakai aōriri ifi chati tsomamanifo. Nāskakaxō āfe ferotaifi ratokonō mai chachipakefofā āto xanīfo feyakanakōi keskarakaxō kaxemetsamakōi fanifo, iskafakī: “Mī sharakōi. Mīfi judeofāfe āto xanīfo,” fanifo kaxefakakī. ³⁰ Nāskakata akiki kemo mechokata, afia ifi xate tsuma fiakaxō aō mapoki koshanifo. ³¹ Mā kaxemetsama fakaxō, tari ōshi fiakata, Jesús āfe rapatikōi safemakaxō iyonifo mā mastai fokakī.

Jesús ifi cruz ikaki mastanifo

(Mr. 15.21-32; Lc. 23.26-43; Jn. 19.17-27)

³² Anoax fōkakī, feronāfake fisti fichinifo āfe ane Simón. Nā Simón Cirene anoa ini. Nāskaxō yoinifo: “Na Jesús ifi cruz ika foxōi afe,” fanifo.

³³ Nāskakata nokonifo machi āfe ane Gólgota ano. (Nā āfe ane fetsa Mapo Xao fanifo.) ³⁴ Nānoxō fimi ene moka osia Jesús ayamapainifo. Akka Jesús mā meexō ayakaspani.

³⁵ Nāskata mā Jesús mastakaxō āfe rapati fīanifo. Sorarofāfe makex tokoronō tsakaketsakaxō nāskakaxō sakka sakka anifo kanānōnākakī. Nā kanāto Jesús tari fōani. Nāskaxō Jesús rapati fetsa fīanifo. ³⁶ Mā Jesús mastakanax nāno tsaonifo anoxō kexexikakī. ³⁷ Nāskaxō āfe mapo mānāori tafaraki kenexō mastanifo. Mā retēkaxō kenekī iskafanifo: “Jesúsfi judeofāfe xanīfokī,” ikaxō kenenifo.

³⁸ Jesús yafi yometso rafe mastanifo, fetsa āfe pōya kayakai aōri ata, fetsari āfe pōya mishkiori anifo. ³⁹ Nā ano finōfāifāfe ĭchayanā āto mapo rafe rafeanifo. ⁴⁰ Iskafakī yoinifo: “Mī yoimis ē Nios kīfiti pexefā pāofaxō ē tres nia oxata ē anā axii pexefā fakī mī imiski, akka mī ifimetiromākī mīa ifimefe. Mī Niospa Fakemākī na ifi cruz ikakinoax fotopakekafāfe,” fanifo.

⁴¹ Nāskariakani akiki kaxemetsamanifo a ato Nios kīfixomisfāfe āto xanīfofo fe a Moisés yoikī kirika keneni keskara ato tāpimamisfo a judeofāfe āto xanīfofori āa ranā yoinānākani iskanifo: ⁴² “Naato fetsafo ififitiroxakī, akka āakai ifimeima. A nafi israelifāfe ato xanīfokī, akka ifi cruz ikakinoax fotoano nō chanīmara fai. ⁴³ A naato Nios shināmis. Mēxotaima noko yoimis: ‘Epa Nios ēfe Epakōira,’ noko famis. Akka chanīmamakī Niospa noikī ifimākai nō ōinō,” ixō mekafakī chakafanifo.

⁴⁴ Nāskaxō nā yometso rafeya mastafono fētsa chakafakī mekafakī ĭchani.

Jesús nani

(Mr. 15.33-41; Lc. 23.44-49; Jn. 19.28-30)

⁴⁵ Nāskata xini keya nā mai tio fakishifākōi itani. Nāskax mā xini kaino anā penani. ⁴⁶ Nāskata mā penano Jesús fāsikōi āfe mekapa kenai iskanī: “Elí, Elí, ¿lema sabactani?” Nōko mekapa iskafakī yoini: “Ēfe Nios, Ēfe Nios, ¿afeskakī mīa ea potamē?” fani.

⁴⁷ Nāskaito nā ano niāfāfe nikakakī iskafanifo: “Nikakapo, nā ato Niospa meka yoipaoni Elías kenai kiki,” fanifo.

⁴⁸ Nāskaito nikafaini fetsa ichoni xapo keskara fiikai. Nā xapo keskara fimi ene kachaki momoxō tafa xate kaxkexō akiki aō nētaxō ayamapaini.

49 Askafaito ranārīto yoinifo: “Enefe. Elías nai mēranoax fotoxō ifimākai nō ōinō,” fanifo.

50 Anā Jesús fāsikōi ea ini. Nāskax nani. 51 Mā Jesús natanaino, sama nami Nios kīfīti pexefā mēranoax naki rafekōi faxtepakekafāni fomākīanoax. Nāskatari mai naya naya ini. Tokirinīfāfori kaxkei fetseni. 52 Nāskakē a maiafo anoax kini fepekemetani. Akka a Nios Ifofafo nakatsaxakakī otōinīfōfānifo. 53 Nāskakata maiafo anoax fonifo. Mā Jesús otōitano, Jerusalén ano fonifo. Nānoxō yora ichapafāfe ōinifo.

54 Nāskata soraro xanīfāfe a afeta Jesús kexeafo feta ōinifo mai naya naya ikaito afarafōri afeskara ikaito. Nāskakē ratekōiyānā yoinānifo iskayanā: “Chanīma, na feronāfake Niospa Fake ika,” fanifo.

55 Kērofāferi chaimashta nikaxō ōinifo. Kēro ichapafāferi Jesús fe fopaonifo Galilea anoax ato afara oxosharamisno. 56 Nā tiixō Jesús ōinifo. María Magdalena ikaino María fetsari ikaino, nā María Jacobo feta José āto afa ini. Askatari kēro fetsari ini Zebedeo āfe āfi. Āfe fake rafe Santiago fe Juan ini. Keyokōichi Jesús ōinifo chaimashta nikaxō.

Jesús makex kini mēra maifanifo
(Mr. 15.42-47; Lc. 23.50-56; Jn. 19.38-42)

57 Akka mā fakishaino feronāfake kori ichapaya fisti kani āfe ane José. Nā José Arimatea mai anoā ini. Nāatori Jesús Ifofamis ini. 58 Nā José xanīfo Pilato ano kaxō Jesús āfe yora yōkani maifai axiki. Nāskakē Pilato ato yoini Jesús āfe yora inānōfo. 59 Nāskata José mā Jesús yora fixō, sama oxosharakōipa rakoni. 60 Nāskaxō makex kini a tsoa maiyomisma mēra ratani. Nā makex kini fakī José ayoni. Nāskata nā Jesús maifaa ano makex kini tokirinīfānē fepofaini kani. 61 Akka María Magdalena fe María fetsa nāno nētekanax a Jesús maia ano tsaokaxō ōinifo.

Sorarofāfe Jesús maia ano kexenifo

62 Mā askaitano, judeofo āfe pena tenetiā a ato Nios kīfixomisfāfe āto xanīfofo fe fariseofo fonifo Pilato ōifokani. 63 Mā fōkaxō yoinifo iskafakakī: “Xanīfo, mā nō shināi na feronāfake chanīmisto nayoxoma yoikī iskafamis: ‘Ē naax tres nia oxata ē otōxii,’ ixō yoimis. 64 Nāskakē mī sorarofo nīchife a maia ano kexeyonōfo tres nia aōxō tāpimisfo fakishi fēkaxō āfe yora fīyamanōfo. Fīakaxō yorafo yoitirofo iskafakī: ‘Mā Jesús otōaki,’ ato fatirofoki. Akka ē otōxira ikax a chanīmiskī. Nāskakē mā otōara ikaxō ato parakī finakōitirofoki,” fanifo.

65 Askafaifono Pilato ato yoini: “Nakīa sorarofo. Ato iyotakāfe. Fokaxō mafa kini kexesharatakāfe nā mā apaiyai keskafakī,” ato fani. 66 Nāskakanax fonifo. Mā fōkaxō itipinī fanifo nā mafa kini. Nāskata nā aō fepoa tokirinīfā sichopa marakka fanifo. Nāskakaxō ano sorarofo nīchitakani fenifo anoax kexesharanōfo.

28

Jesús otōni
(Mr. 16.1-8; Lc. 24.1-12; Jn. 20.1-10)

1 Judeofāfe āto pena teneti safaro mā finōano, nāskata nomīkonō fakish-parikōi fonifo a Jesús maia ano. María Magdalenanō María fetsanō fonifo a Jesús maia ano ōifokani. 2 Nāskata samamakōi fāsikōi mai naya naya ini, nōko Ifo Niospa āfe ājiri nai mēraxō fotomanaino. Mā fotota a Jesús maia

ano kaxō, a aō fēpoita tokirinifā fepeta a kamaki tsaoni. ³ Nā nōko Ifo Niospa āfe ājiri fafekōini, nā kana peeikai keskara. Āfe rapati oxofinakōi ini. ⁴ Askaito ōikani sorarofō choayanā ratekōinifo. Nāskakanax oa naa keskara nāmā pake pakefōfānifo. ⁵ Akka nā nōko Ifo Niospa āfe ājirinī nā kēro rafe yoini: “Rateyamakāfe. Mē tāpiakī mā Jesús fenaiyoaki a mastaitafo,” ato fani. ⁶ “Nonomaki, mā otoaki a mato yoimis keskai. Ōifekapo, a rātaitafo ano. ⁷ Koshikōi fōkaxō aōxō tāpimisfo yoirisafatakāfe iskafakī: ‘Mā otoaki. Galilea ano kai kiki mā kayoamano. Nānoa mā ōikaikai ato yoitakāfe. Mē mato yoikai shināmakiyamakāfe,’” ato fani.

⁸ Ato askafaito nikafaikani nā kēro rafe koshikōi fonifo nā Jesús maita anoax. Ratefyanā āto shinā mēra inimakōinifo aōxō tāpimisfo chanifaifokani ichonifo. ⁹ Ichoaifono Jesús atoki nokorisatani nā kēro rafeki. Nāskaxō, “Mē oi,” ato fani. Ato askafaino nā kēro rafe Jesúski fōkaxō akiki inimakakī ratokonō mai chachipakefōfā āfe fitax ano achinifo. “Mī sharakōi,” fanifo. ¹⁰ Nāskaxō ato yoini: “Rateyamakāfe. Fokaxō ēfe extofo ē yoimis keska fakī ea ato yoixotakāfe Galilea ano fotanōfo. Nānoa ea fichifokani kiki,” ixō ato yoini.

Sorarofāfe ato yoinifo

¹¹ Mā nā kēro rafe foaifono, nā Jesús maia ano kekexanax soraro ranāri fonifo pexe rasi ano. Mā fōkaxō a ato Nios kīfixomis āto xanīfofo yoinifo nā ōiafo keskara. ¹² Nā xanīfo ano fonifo. Nā anifofo fe mekai fokani, ato fe yoināsharaxikaki. Nāskakaxō sorarofō kori ichapakōi inānifo. ¹³ Ato iskafanifo: “Ato iskafakakī yoitakāfe: ‘Nō fakishchāi oxano Jesús āfe inafō fēkaxō āfe yora yometsoanafo,’ ato fatakāfe. ¹⁴ Mā ato askafaito xanīfāfe nikaxō mato afara faito, nō yoisharanō mato afeska fanōfoma,” ato fanifo.

¹⁵ Nāskakaxō sorarofāfe mā kori fikaxō, mā fōkaxō nā ato yoiafo keskafakī ato yoinifo. Nāskakē nā maitio anoxō nikaketsanifo. Iskaratīari a keskara chanimara famisfo judeofāfe.

Jesús aōxō tāpimisfo yoini aōxō keyokōi yoifofāsafatanōfo (Mr. 16.14-18; Lc. 24.36-49; Jn. 20.19-23)

¹⁶ Nāskakanax Jesús aōxō tāpimisfo once fonifo Galilea ano, nā Jesús ato yoiyomis keskai fonifo māchifā ari. ¹⁷ Nāskakata Jesús ōikakī, “Aicho, mī nōko Ifo Jesús nō mia noikōi,” fanifo. Akka Jesús otoano ranārito chanimara fanifoma. ¹⁸ Nāskaifono Jesús atoki kaxō ato yoini: “Ēfe Epa Niospa ea yoia nai mēranoafoya nono mai anoafori ē ato yoinō. ¹⁹ Akka nā maitio ano yorafoki fotakāfe ato yoixikakī ea Ifofasharanōfo. Nāskaxō ēfe Epa aneōxō ato maotisafapatakāfe. Ēfe aneōxori ato askafatakāfe, āfe Yōshi Sharaōxori ato askafatakāfe. ²⁰ Nāskaxō ato yoisharakāfe nikasharakōinōfo nā ē mato yoia keskara. Akka ē mato fe mēxotaima ipanakaki,” Jesús ato fani.

Marcos Jesúsnoa Yoikĩ Keneni

Juan Maotista tsõa istomaxõ ato yoini
(Mt. 3.1-12; Lc. 3.1-9, 15-17; Jn. 1.19-28)

¹ Ë mato meka shara yoinõ Jesucristoõnoa. Nã Jesucristo Niospa Fakekõi.
² Afetiama nã Isaías Niospa shinãmanaino Jesucristoõnoa yoikĩ kirika keneni iskafakĩ:

Mĩ nai mēranoax nãmã fotoyoamano nã ěfe meka yoimis ě atoki rekẽ nĩchixii miõnoa ato yoinõ, itipinĩsharanõfo chipo mia nikasharaxikani kiki, ixõ Epa Niospa ěfe Fakeõnoa yoinino Isaías keneni. ³ Askatari anã keneni iskafakĩ:

Tsõa istoma anoxõ yorafo yoixii akiki feaifono iskafakĩ ato yoixii nã ěfe meka yoimisto ato yoixii iskafakĩ: “Itipinĩsharakãfe. Mã chaima nõko Ifo oi kiki. Mãto chaka xatekãfe isharaxikãki,” ixõ ato yoixii, ixõ Juanoa yoikĩ Isaías kirika keneni. ⁴ Nãnorikõi Juan ato yoini tsõa istomaxõ yorafo ato maotisafayanã. Ato iskafakĩ yoianã: “Anã Nios shinãkãfe mato chaka xateyanã ě mato maotisafanõ Epa Niospa mato chaka mato soaxonõ,” ixõ Juan ato yoini. ⁵ Nãskakẽ keyokõi Judea anoax feaifono, Jerusalén anoaxri fenifo, ato yoiaito nikai fekani. Nãnoxõ a afara chakafamisfo yoiaifono, Juan ato maotisafapani faka Jordán anoxõ.

⁶ Akka Juan ěfe rapati kamĩcho fichi kishi faxõ safepaoni. Āfe sĩtorari fichi koiro safepaoni. Nãskaxõ tseo pipaoni, fonari apaoni. ⁷ Nãskaxõ Juan ato mēxotaima yoipaoni: “Nã ea keskarama mã chaima oi kiki, nã sharafinakõia. Aato afama mĩshiti fatiro, ě atiroma keskara. Akka ě afaama,” ixõ ato yoipaoni Jesúsnoa yoikĩ. ⁸ “Akka ě mato fãka mēra ikimapakea maotisafakĩ. Akka nã rama oaito ěfe Yõshi Shara mato mēra naneyoi,” ixõ Juan ato yoini.

Juan Jesús maotisafani faka Jordán anoxõ
(Mt. 3.13-17; Lc. 3.21-22)

⁹ Nãskano Jesús kani Nazarete anoax, Galilea mai ano. Nãnoxõ faka Jordán anoxõ Juan ato maotisafani. ¹⁰ Nãskafaino Jesús fakanakinoax fininãkafã õia nai fepekemeaito õini. Akiki Niospa Yõshi Shara fotoiyoi oa rifi keskara oni. ¹¹ Nãskaino nai mēranoax mekaito nikani iskafakĩ yoiaito: “Mĩ ěfe Fakekõi, ě mia noikõi. ě mikiki inimasharakõi,” ixõ yoiaito nikani.

Satanás chakata Jesús afara chakafamapaini
(Mt. 4.1-11; Lc. 4.1-13)

¹² Nãskata Niospa Yõshi Sharapa Jesús iyoni tsõa istoma ano. ¹³ Nãri cuarenta nia ini, yoinãfo mēra. Nãrixõ Satanás afara chakafamapaiyaito ěfe ājirifãfe kexenifo.

Galilea anoxõ Jesús ato yoikĩ taefani
(Mt. 4.12-17; Lc. 4.14-15)

¹⁴ Akka mã Juan karaxa mēra ikimaitafono Jesús kani Galilea ano Niospa meka shara yorafo yoikai. ¹⁵ Ato yoikĩ iskafani: “Nõko Ifo Nios mã chaima matoki oi kiki, xanĩfofinakõi a ixii. Mãto chaka xatekãfe anã Nios nikakõisharaxikakĩ. Āfe meka sharari nikakõikãfe chanĩmara fayanã.”

Jesús cuatro feronãfake keneni tarafanãfãfã foe fimisfono ěfe inakõi inõfo
(Mt. 4.18-22; Lc. 5.1-11)

¹⁶ Ato askafakī yoita Jesús Galilea ĩa kesemē kani. Kakī fichini Simón yafi onefetsa Andrés. Nā rafeta tarafanā fimisfo inifo, āto tarafanāfā faka naki poteaifāfe. ¹⁷ Jesús ato yoini iskafakī: “Efe fokāfe. Māfi tarafanāfānē fimiskī. Mā foe ichapa rasi tarafanāfānē fiayi keskari fakī iskaratīari mā ekeki yora ichapa efexii ē āto Ifo inō,” ixō Jesús ato yoini.

¹⁸ Ato askafaino tarafanāfā fafaikani afe fonifo.

¹⁹ Anā orishta fāi katapaikī Jesús ōia Santiago onefetsa Juan fe nia ini. Nā rafeta āto apa feta kanōa nakixō tarafanāfā itipinī fanifo, kishifakākī. ²⁰ Nā raferi Jesús ato kenaino nā rafeta āto apa Zebedeo yafi āfe inafoya ato nīchifainifo. Āto kanōari ōifainifo Jesús fe fokākī.

Nā feronāfake niafaka nanea ini

(Lc. 4.31-37)

²¹ Jesús aōxō tāpimisfo fe kaax Capernaúm ano nokoni. Pena tenetiā nā ichanāti pexe mēra Jesús ikikaixō ato yoikī taefani. ²² Ato yoiaito nikakī yorafā rasichi Jesús ōiketsanifo. “ĭKee! Nikakapo. Nato tāpikī finakōia, a Moisés yoikī kirika keneni keskara ato tāpimamisfo keskarama, meka sharakōi nato yoi,” fanifo. ²³ Judeofāfe ichanāti pexe mēraxō yora mēra niafaka yōshi chaka nanexō Jesús fāsikōi mekafani.

²⁴ Iskafakī yoini: “ĭAfeskakī mī noko fekaxtefaiyoamē, Jesús Nazarete anoato? ĭMī noko a omiskōipakenakafo mēra mī noko potaiyoamē? Ĕ mia ōimisnō, mī sharakōinō Niospa mia nīchiano,” fani.

²⁵ Jesús niafaka yōshi chaka iskafakī yoini: “Askayamafe. Na feronāfake makinoax tsekekaitāfe,” faino, ²⁶ niafaka yōshi chakata feronāfake choamata, fāsikōi mekainā kafata a makinoax tsekekaini. ²⁷ Askaito ōikani, yora rasi ratei fetseyanā āa ranā yoināi fetsetenifo iskakani: “ĭTsoamē na? Na tāpisharakōixō ato yoiai nā xanīfāfe tāpisharakōixō ato yoiai keskara. Nā niafaka yōshi chakafāferi nikakani ato yoiaito,” ikanax yoinānifo.

²⁸ Nāskakē keyokōichi nikaketsanifo Galilea mai anoxō nā Jesús aka keskara.

Jesús Simón Pedro rayos sharafani

(Mt. 8.14-15; Lc. 4.38-39)

²⁹ Nā ichanāti pexe mēranoax Jesús tsekekaini. Santiagonō, Juannō fonifo, Simón feta Andrés āfe pexe ano. ³⁰ Akka nāno Simón āfe rayos yōxafo yonai raka ini. Nāno rakano Jesús yoinifo. ³¹ Jesús akiki kaxō āfe mīfi fininīfofanaino a yonai koshikōi sharatani. Mā sharaxō pīchani ato pimaxii.

A isinī ikaifo Jesús ato sharafani

(Mt. 8.16-17; Lc. 4.40-41)

³² Mā xini kaino a isinī ikaifoya a niafaka chaka naneafo Jesúsiki efenifo. ³³ Nāskakē nānoafo keyokōi yorafo ichanānifo nā pexe fepoti anoax. ³⁴ Jesús ato sharafani yora ichapa pae fetsa fetsatapafāfe ikaifono. Niafaka chakafori ato mēra naneano ato makinoa pōtani. Akka Jesús niafakafo mekamanima māmāi tāpiafāfe Jesúsmaī Niospa Fakekē.

Jesús ichanāti pexe mēraxō Apa Niospa mekasharaōnoa ato yoini

(Lc. 4.42-44)

³⁵ Mā chaima penaino, Jesús fininā kafā pexe rasi mēranoax tsekekaini tsōa istomaxō Apa Nios kīfikai. ³⁶ Mā Jesús ato makinoax penaino kaano Simón āfe rafeafo fe kani Jesús fenaikai. ³⁷ Mā fichikaxō yoinifo iskafakakī: “Keyokōichi mia fenakani,” fanifo.

³⁸ Askafaifāfe nikakī Jesús ato kemani iskafakī: “Nō chaima fetsa ano kanō fokāfe, anoxori nō ato Niospa meka tāpimanō. Nāskakē ē oa,” ato fani.

³⁹ Nāskakē Jesús kafāsapaoni nā Galilea pexefo tii ano Niospa meka shara ato yoifofāsafai ichanāti pexe mēraxō. Fanīma müshtixō niáfaka yōshi chakafo ato makinoa ato potafofāsafai.

Jesús yora rashkishiai sharafani
(Mt. 8.1-4; Lc. 5.12-16)

⁴⁰ Feronāfake fetsa isinī iki rashkishi fetseax Jesúski oni. Akiki oxō ratokonō mai chachipakefōfā yoini iskafakī: “Ea mīa sharafapaikī, ea mīa sharafatiro,” fani.

⁴¹ Askafaito nikakī Jesús shinākōini, omiskōiaito. Nāskaxō āfe mēkemā ramāyanā yoini iskafakī: “Ē mia sharafanō. Iskaratīa mī sharaikai,” faino, ⁴² a rashkishi fetseai koshikōi sharatani. Nāskax sharakōi ini. ⁴³⁻⁴⁴ Mā sharano Jesús nīchini iskafakī yoiyanā: “Mī tsoa yoiki. Akka nā ato Nios kīfixomis ispatāfe. Nāskaxō ovejanā fake foxō ināfe mia retexonō Moisés yoini keskafakī. Nāskaxō keyokōichi tāpinōfo a mī isinī imis mā mī sharano,” ixō Jesús yoini.

⁴⁵ Jesús askafakī yoifiano, akka nā feronāfake mā kaxō ato yoifofāsafani. “Ōikapo, mā Jesús ea sharafaa,” ixō ato yoifofāsafani. Nāskakē Jesús anā pexe rasi ano ikixō ato yoitiroma ini. Xafakīa nini, tsōa istoma ano. Nāskafiaino pexe rasi anoafō akiki fenifo ōifekani.

2

Jesús yora finimisma sharafani
(Mt. 9.1-8; Lc. 5.17-26)

¹ Mā samaraka pishtata Capernaúm ano anā oni Jesús. Mā nokoano, “Mā Jesús anā oa āfe pexe ano,” fanifo. ² Nāskakata Jesús fe anā ichanānifo pexe mēraxō. Jesús nikakani. Pexe ano fospikōikanax āfe emāiti ninifo āfe fepoti ano ikitiroxakākima. Nānoxō Jesús ato tāpimani Niospa meka. ³ Mā ato tāpimanaino feronāfake cuatro nokotoshinifo. Yora finimisma āfe xefapa efenifo. ⁴ Mā xītiafono ikitirofoma, Jesús ano nā yora finimisma efepaiyai-fono ikitirofoma ini. A pexe sapa mánāoxori paitinī māpekaxō fotomanifo āfe xefapa rataxaxō. Risfi rafeta nexati fākaxō a mánāoxori kini fakaxō, nā finimisma fotomanifo, āfe xefapa. ⁵ Jesús ato ōikī tāpikōia ini. “Naato nōko yama noko sharafaxotiroki,” faifono Jesús tāpini. Nāskafaifono a finimisma Jesús yoini iskafakī: “Efe yorashta, mī chaka mē mia soaxona,” Jesús fani.

⁶ A Moisés yoikī kirika keneni keskara ato tāpimamisfāfe ranārīto ano tsoaxō nikakī shinānifo. ⁷ Nānoxō shinānifo: “¿Afeskai Jesús mekaimē is kai? Tsōa noko chaka soaxotiroma. Nios fistichi noko axotiro. ¿Jesús āa shināimē Nios?” ixō shinānifo.

⁸ Askafaifāfe Jesús ato tāpini āto shinā mēraxō shināifāfe. Jesús ato yoini: “¿Afeskai mā iskara shināimē?” ato fani. ⁹⁻¹⁰ “Akka ea Niospa shināmani. Nāskakē ē mato ōimanō Niosxō na feronāfake ē sharafatiro. Tsōa iskara atīroma, Niospa shināmanai fistichi atiro. Nāskakē ē na feronāfake sharafa mā tāpinō Niosxō ēri āfe chaka soaxotiro,” ixō ato yoini. Nāskafata anā yoini feronāfake finimisma, ¹¹ “Fininākafāfe. Mī xefa fifaini, mī pexe ano katāfe,” fani.

¹² Askafaino fininākfani. Fininākfaxō āfe xefa fifaini, āfe pexe ano kaito keyokōichi ōinifo. Nāskakaxō, “¡Aicho, Nios sharakōi! Na keskara nō ōimisma, sharakōi,” fanifo.

Jesús Leví ifini aōxō tāpimis inō

(Mt. 9.9-13; Lc. 5.27-32)

¹³ Nāskax Jesús anā kani ĩa efapa ano. Anoxō yora ichapa rasichi ōinifo. Nānoax Jesúski ichanānifo. Nānoxō ato tāpimani. ¹⁴ Nānoax kakī Jesús finōfāikī Leví* ōini, a yonoai āfe tsaoti mīsa ano tsaoxō, ato keyokōi kori fiaito. Nā Leví āto kori fiamis ini āfe xanīfo minixiki Roma anoa. Leví Alfeo fake ini. Jesús ōixō yoini: “Leví, efe kafe ē mia tāpimanō,” fani. Askafaino Leví afe kani.

¹⁵ Nāskax Jesús aōxō tāpimisfo fe kani Leví ato kenano a anoxō pii fokani. Ato kori fiamisfo fe yora chakafori a Moisés keneni nikamifomafāferi Jesús feta pinifo. Yora ichapa Jesús fe foafofāinifo. Nāskakē yora ichapakōichi Leví pexe mēraxō pinifo. ¹⁶ Nāskakē a Moisés yoikī kirika keneni keskara ato tāpimamisfo nāfori fariseofo inifo. Afāfe Jesús ōinifo yora chakafo feta piaito. Nāskaxō a Jesúsxō tāpimisfo yōkanifo: “¿Afeskakī māto maestro na ato kori fīxomisfo feta piimē? Yora chakafo fetari pii,” ato faifono, ¹⁷ Jesús nikaxō ato yoini: “A sharafāfe notoro fenakanima, a isinī ikaifāfemari notoro fenakanima. Akka nā isinī ikaifāfe notoro fenakani. Nāskakēri ē ato yora sharafos kenatapa ikerani ē oama. Nā yora chakafo ē ato tāpimaniyoi ē oanō,” ato fani.

Nā foni tenemisfofāfe Jesús yōkanifo

(Mt. 9.14-17; Lc. 5.33-39)

¹⁸ Juan Maotista āfe inafāfe āto feyafati ipaoni fisti rasi pikakī pipaoni-foma foni tenemisfo ipaonifo Nios shara shinākakī. Nā fariseofo nāskarari ipaoni āto feyafati. Nāskakē yora fetsafāfe Jesús yōkanifo tāpipaikakī. “Jesús, ¿afeskakī mī inafāfe mēxotaima piimē? Juan āfe inafāfe foni tenekaninō Nios shināsharakakī. Askatari fariseofāferi foni tenekaninō. Akka, ¿afeskai mīōxō tāpimisfo askaramēmē?” fanifo.

¹⁹ Askafaifāfe anā Jesús ato yoini: “Feronāfake āfiyaino, yorafo ano fisti ichanākaxō afara fetsa fetsatapafo afeta pitirofo inimayanā, aicho fakakī akiki inimakakī. Akka feronāfāke āfi fikī foni tenetiroma. Askafixō inimakī pitiro. ²⁰ Akka mā fene rēteafono āfe yorafāfe shinākakī foni tenetiromo,” Jesús ato fani. (“Nāskakē ē nono ikano inimakī eōxō tāpimisfāfe efeta pimisfo. Akka mē naano ea shinākakī tsōa pitiroma eō noikakī,” ato fani.)

²¹ Askata anā fetsa ato yoini: “Tsōa sama fenaya sama xini kishi fatiroma. Nō askafaino sama fena samama chakanatiromo. Nāskatari sama fenafe sama xini isharatiroma. Nāskakēri nā ē mato yoiai keskara mā nikakōixō a mā ipaoni keskara anā mā itiroma māmāi ea nikakōiax. A mā ipaoni keskara shināmakita nāskax māto yora fena keskara shara itiro. ²² Nāskarifikī tsōa māmā fata koiro pisha xini mēra nanetiroma nā māmānō faraxakaino toxamāiyanō. Nāskakē nā māmā fata fe koiro pisha chakanatiromo. Akka nā māto xinifāfe mato yoimisfo anori shināx mā isharatiroma. Niospa mekaya meka chaka osinātiroma. Nāskakē mā nikapaifi mā shināsharatiroma. Nāskarifikī tsōa māmā fata koiro pisha xini mēra nanetiroma nā māmānō faraxakaino toxamāiyanō. Nāskakē

* **2:14** Leví ane rafeya ipaoni. Āfe ane fetsa Mateo.

nā māmā fata fe koiro pisha chakanatirofo. Akka nā mātō xinifāfe mato yoimisfo keskarafe nā ē mato yoiai keskara osinātiroma. Nā ē mato yoiai keskara Niospa meka sharakōi. Akka a mātō xinifāfe mato yoimisfo anori shināx mā isharatiroma. Niospa mekaya meka chaka osinātiroma. Nāskakē mā nikapaifi mā shināsharatiroma.”

Nā judeofāfe pena tenetitīa Jesúsxō tāpimisfāfe aros keskara metesfenifo (Mt. 12.1-8; Lc. 6.1-5)

²³ Jesús aōxō tāpimisfo fe kani a judeofāfe tenetitīa. Tarepa kakī āfe inafāfe aros keskara meteskaxō fikaxō pinifo. ²⁴ Nāskafaifāfe fariseofāfe ōikakī ato iskafanifo: “Ōipo. ¿Afeskakī mī inafāfe na aros keskara metesfekanimē na pena tenetitīa tsōa yonotiroma ixō Moisés noko yoifinino?” fariseofāfe fanifo.

²⁵ Ato askafaifono Jesús ato kemani: “Akka, ¿a nōko xini Davidōnoa kirika kenenifo keskara mā ōimismamē? ¿David afaa afeska fanimē āfe inafō feta fonāikōikī? ²⁶ Nāskakē David Nios kīfīti pexefā mēra ikikaini. Akka nā Nios kīfīti pexefā anoax Abiatar nā ato Nios kīfixomisfāfe āto xanīfo ini. Akka nā Nios kīfīti pexefā mēranao David pāa pini a pāa tsōa pishta pifiatiromano. Akka nā ato Nios kīfixomisfāfe arese a pāa pimisfo ini. Nāskafekē nā pāa David pini a afe foafori ato pikīni.

²⁷ “A Niospa taefakī feronāfake onifani. Askata teneni. Nā feronāfake Niospa tenemani, pena tenetitīa yonoyamanō. ²⁸ Nāskakē Niosxō ē yoitiro na pena tenetitīa ēmāi xanīfokōixō afeskaimākai ē yoitiro. Nāskakē ē mato yoi ēfe inafāfe afaa chakafakanima aros keskara meteskakī pena tenetitīa fonāiki finakōikaxō,” ato Jesús fani.

3

Feronāfake mēke yōshiya Jesús sharafani (Mt. 12.9-14; Lc. 6.6-11)

¹ Jesús anā ikikaini judeofāfe āto ichanāti pexe mēra. Nāno feronāfake mēke yōshiya ini. ² Aas ōinifo, judeofāferi. “Jesús sharafaimākai nō ōinō na pena tenetitīa,” fanifo yōaxikakī. ³ Askata Jesús yoini nā feronāfake mēke yōshiya: “Fininākfata ano nife nakirafe,” fani.

⁴ Askata yorafo yōkani: “¿Afaa nō afeska fatiromē pena tenetitīa? ¿Shara nō atiomē? ¿Chaka nō atiroraka? ¿Nō ifitiromē? ¿Nō retetiroraka?” ixō ato yōkani.

Ato askafaito tsōa kemanima. ⁵ Ato feratexō Jesús ato ōini, yora fet-safoōnoax shināyamaifāfe. Askatari Jesús shināmitsani. Shināmitsaxō yoikī iskafani feronāfake: “Mēshafe,” fani. Askata nikax mēshatani. Mēshatanaino sharatani. ⁶ Askaito ōikani fariseofo ōitifishkinifo. Tsekefanifo ichanāti pexe anoax. Taefakakī shinānifo: “¿Afeskafaxō na Jesús nō retetiromē?” fanifo. Herodes āfe inafō feta shinānifo.

Yora ichapa ini ĩamāfā ano

⁷ Askata Jesús anā kani aōxō tāpimisfo fe ĩamāfā kesemē ano. Nāskakē Galilea anoafō yora ichapa rasi fonifo. Jesús chīfafainifo. ⁸ Mā yorafāfe nikakanax fonifo, nā Jesús ato sharafaino nikafaikani fonifo Jesús ari. Judea anoafori, Tiro yafi Sidón anoafori fonifo. Jesús ano nokonifo.

⁹ “Kayakōi yorafo fei kiki,” ato fani aōxō tāpimisfo Jesús. “Ea shoi aki fetirofoki, ea kanōa fexokāfe ē nanenō,” ato fani. ¹⁰ Jesús ichapa yora

rasi sharafaino, nāskakē na yora isinī ikani akiki fenifo Jesús shināfāikani ramāpaikani ato sharafanō. ¹¹ Nāskaino a niafaka chakafoyafāfe Jesús ōinifo. Nāskakē Jesús fichikanax feopakefōfānifo Jesús nāmā. “Jesús mī Niospa Fakekōiki,” niafaka naneafāfe fāsikōi fanifo.

¹² Askata Jesús ato yoini: “Tsoa yoyamakāfe ē Niospa Fakeki,” ato fani.

Jesús aōxō tāpimisfo doce feronāfake ifini
(Mt. 10.1-4; Lc. 6.12-16)

¹³ Nāskata Jesús māchi keya māpeni. Ari kakī aōxō tāpimisfo ichapa ato kenani ato yoixiki arixō tāpinōfo. Askata Jesús ano fonifo aōxō tāpimisfo. ¹⁴⁻¹⁵ Feronāfake doce faxō ato ifini, afe rafeafono ato nīchixiki aōnoa āfe meka shara ato yoitanōfo, nāfāfe yorafo makinoa niafaka yōshi chakafo ato potaxotanōfo. Nāskata nāfo ato aneni, “Ēfe meka yoimisfo” ato fakī. ¹⁶ Nā tii ato ifipakeni fisti rasi. Taefakī Simón ifini. Āfe ane fetsafaxoni, Pedro kenaxiki. Simón ikaino, ¹⁷ Jacobo yafi āfe onefetsa Juan kenani, āto apa Zebedeo ini. Jesús ato ane fetsa kenani Boanerges fakī. Nō askafatiro, “Yora finakōia oa nai tiri ikai keskara” fakī. ¹⁸ Askatari Andrés kenani, Felipe ikaino, Bartoloméri ikaino, Mateori ikaino, Tomásri ikaino, Jacobo fetsari ikaino, Alfeo fake. Askatari Tadeori ikaino, Simón fetsari ikaino. Na Simón nāskara ipaoni nā yora xanīfo chakafapaikī, potapaikī fetsafo feta. Mā ato makinoax ota Jesús fe rafeni. ¹⁹ Askatari Judas Iscarioteri ifini. Nā Judás Iscariote Jesús fe iyopaoni. Nāskaxō chipo chakafakī ato achimani Jesús retenōfo. Nā tii Jesús ifini aōxō tāpimiskōi inōfo.

Yora fetsafāfe, “Jesús niafakaōxō ato sharafaira,” fanifo
(Mt. 12.22-32; Lc. 11.14-23; 12.10)

Nāskata māchifā ariax fotota, āfe inafō fe ikikaini pexe mēra. ²⁰ Anā yora rasi ichanāfashoni. Askaito ōikī, yora ichapa ōikīkakī, pitirofoma inifo. ²¹ Jesús afe yorafāfe tāpinifo mā pexe mēra kaano fōkaxō Jesús ano ifipainifo. Yoiaifāfe nikakakī ifipainifo fōkaxō Jesús anā shināsharaima faifāfe.

²² Askatari a Moisés yoikī kirika keneni keskara ato tāpimamisfo Jerusalén anoax Jesús ano feafono ato yoini: “Na Jesús nā niafaka chakafāfe āto xanīfoōxō nā Beelzebū āfe shara miniano aōxō āto niafaka pōtai,” fanifo.

²³ Jesús nikakī ato kemani meka fetsafaxō: “¿Afesax Satanás āa potame-tiromē? Āa itiroma. ²⁴ Nāskakēri yorafo paxkanākanax āa ranā retenāi keyotirofo. Askatari pexe rasi anoax āa ranā retenāi keyotirofo. Nāskax isharatirofoma āa ranā retenātirofō. ²⁵ Fetsari nā nofe yorafo mīshti paxkanātirofoma. Paxkanāx keyotirofo. ²⁶ Nāskakēri Satanás āfe inafō fe paxkanātiroma. Paxkanāx keyotiro anā xanīfo itiroma.

²⁷ “Askatari feronāfake mitsisipakōi taefakī metexkere akaxoma tsoa āfe pexe mēra ikitiroma āfe afama mīshti fīaxikakī. Nāskarifiakī nō yora nexaxō āfe afara nō fiatiro keskafakī, nāskarifikī ē Satanás nexaxō Niospa Yōshi Sharaōxō ē Satanás āfe ina pōtatiro.

²⁸⁻²⁹ “Chanīma ē mato yoikōi, keyokōi chaka Niospa soaxotiro. Askatari keyokōi meka chakari Niospa soaxotiro. Askafixō fētsa yoixō, ‘Jesús Niospa Yōshi Sharaōxō askara ato sharafatiroma, Satanás āfe yōshioxō ato sharafai,’ askafaito Niospa ato āfe chaka soaxotiroma, āto neepakexanō,” ato fani Jesús.

³⁰ Anori yorafāfe yoini: “Jesús yōshi chakaya,” fanifo. Nāskakē Jesús ato yoini Epa Niospa Yōshi Sharaōxō ato sharafai.

Jesús òifekani áfe afanō áfe extonō fenifo
(Mt. 12.46-50; Lc. 8.19-21)

³¹ Jesús áfe afanō onefetsanō nokonifo a Jesús ano. Mā nokokanax pexe mēra ikinifoma. Xafakīa ninifo pexe emāiti. Nānoxō yora fetsa nīchinifo Jesús yoitānōfo. ³² A Jesús foaketifaya kekanax tsoafáfe yoinifo: “Jesús, mā mī efanō mī extonō nokoafō. Mia yōkakamekani,” fanifo.

³³ Askafaifáfe ato Jesús kemani: “Ēfe efanō, ěfe poinō, ě ato fistis shināima. Yora fetsafori ě ato shināi efe yora keskarafo. ¿Tsoamē ěfe efa, ěfe extofori? ¿Mā tāpipaimē tsoamāki ěfe efa, ěfe extofori? Ē mato yoinō,” ato fani.

³⁴ Askafaxō Jesús òini a tsoafo. Nāskaxō ato yoini: “Nā ea Ifofaifo, ea nikaifo efe yorafo. Nakīa ěfe extofo, ěfe efafo,” nāskafani. ³⁵ “Nā Niospa fichipayai mā akaino Niospa mato fichipayai keskarifakī nā ěfe extofo, ěfe chikofō, ěfe efa keskara,” ato fani Jesús.

4

Jesús ato yoini meka fetsafaxō fimi exe saamisnoa
(Mt. 13.1-9; Lc. 8.4-8)

¹ Nāskata anā Jesús ato tāpimani ĩa kesemēxō. Nāskakē yora ichapa ichanānifo Jesús ano. Nāskaifono Jesús kanōa ĩa ketokonō rakano aō naneinīkafanax tsaoni. Akka yorafo ĩa ketokonō tsaonifo. ² Nāskaxō Jesús ato tāpimani afama mīshti meka fetsafaxō. Ato yoikī iskfani:

³ “Ea nikakāfe ě mato yoinō,” Jesús ato fani. “Feronāfake fistichi fimi exe saafoni áfe nōxati mēra kēchoxō fokī. ⁴ Fimi exe saafōikaino ranāri fai nēxpakīa pakeaino a kachikirixori peyafáfe pini. ⁵ Nāskata fimi exe ranāri makexfoki pakei fetsetni mai shara anoma. Nāskakē samamakōi fimi exe foaipaini. ⁶ Akka mā foaipaiyaito xinī namani, yosipanā, áfe tapokairoko mai mēra kasharakē. Foaikax, samama nani xinī tsasifaano. ⁷ Akka ranāri fimi exe moxafo mēra pakeni. Nāskakē moxafo foaikī namani. Nāskakē fimi exe foaikax fimiymax nani. ⁸ Akka fimi exe ranāri mai shara ano pakeni. Nāskax foaisharax fimi ichapayakōi ini. Fetsa treinta fimiya ini. Fetsa sesenta fimiya ini. Fetsari cien fimiya ini.”

⁹ Nāskaxō Jesús ato yoini: “Mā pachoyakī ea nikasharakōikāfe,” ato fani.

Meka fetsafaxō yorafo yoixō a aōxō tāpimisfo xafakīakōi ato yoini
(Mt. 13.10-17; Lc. 8.9-10)

¹⁰ Mā yora ichapa rasi foaifono Jesús ares nēteni, akka nā foafáfema a aōxō tāpimisfo docefo fe nēteafáfe yōkanifo. “¿Afaa mī noko yoipaiamē meka fetsafaxō?” faifono, ¹¹⁻¹² Jesús ato kemani, “Epa Niospa a ika anoxō afe yorafo ato ĩkināi afe keskaramākī ě mato xafakīa yoinō. Akka fetsafo meka fetsafaxō ě ato yoiaki. Akka òifakakī tāpikani nīkafīkakīri nīkasharakanima. Nios Ifofakaspakani. Nāskakē Niospari ato chaka soaxotiroma.”

Jesús meka fetsafaxō fimi exe saamisnoa ato yoini ato tāpimasharakōixiki
(Mt. 13.18-23; Lc. 8.11-15)

¹³ Nāskata ato yoini: “¿Nā ě ato meka fetsafaxō yoiai mā tāpīamamē? Akka, ¿afeskakī fētsa nīkatīromē? ¹⁴ Nā fimi exe fanamis, nā Niospa meka yoisim keskara. ¹⁵ Akka ranāri yora fetsafo fimi exe fai nēxpakīa pakea keskarafo Niospa meka nīkafīkani. Akka Niospa meka mā nīkafīaifono Satanás ato xītīro peyafáfe fimi exe pitiro keskafakī. ¹⁶ Fetsafo nā fimi exe tokirifo mēra pakeax foaipaiyai keskarafo. Niospa meka nīkai akiki

inimakōikī nikayotiro. ¹⁷ Akka nā fimi exe foaikax āfe tapo mai mēra ikikēma xinī namatiro keskafakī. Nāskarifikī fētsa taefakī Niospa meka nikai inimayotiro. Akka afara chaka nokoaino anā inimatiroma anā Nios Ifofatiroma, Niospa meka anā āfe shinā mēra nanekema. ¹⁸⁻¹⁹ Akka atiri fimi exe moxafo mēranoax foaikax yositiroma keskarafō. Nāskariatirofo Niospa meka shara nikasharakanaxma. Akka fētsa afarafō shinākī āfe shinā mēraxō shināchakakōitiro. Nāskaxō kori ichapakōi noikī, 'Ē kori ichapayax ē inimakōitiro,' ixō shinākī Niospa meka anā shināima. Nāskakē Niospa meka nikafikī afara fetsafo shināino afaa Niospa axotiroma. ²⁰ Akka atiri fimi exe mai shara anoax foaikax fimi ichaya ini. Āfe fimi treinta ini, fetsari afe fimi sesenta ini, fetsari āfe fimi cien ini. Nāskafakīri fētsa Niospa meka nikakōikī nikasharakōitiro. Akka fētsa Niospa meka nikakōisharakī nā fimi exe treinta keskara itiro, fetsari nikasharakōikī nā fimi exe sesenta keskara itiro, fētsari nikasharakōikī nā fimi exe cien keskara itiro," ixō Jesús ato yoini.

Meka fetsafaxō rāpariki Jesús aōxō tāpimisfo yoini
(Lc. 8.16-18)

²¹ Nāskatari ato yoini. "Akka tsōa rāpari otaxō kafo mēra nanetiroma, askatari a ika nāmā tsāotiroma chaikairoko chaxanō. Akka nō rāpari fomākīa tsāofaano chai chaxatiro. Nāskakē ōisharakōitirofo. ²² Nāskarifiakī nō afaa pishta onetiroma, nō onefiano keyokōichi tāpitirofo. Nāskarifiakī a fomāyomisfo Niospa xafakīa faxii. ²³ Mā pachoyakī ea nikasharakōikāfe," ixō Jesús ato yoini.

²⁴ Nāskaxō anā ato yoini. "Nikakapo, ē mato yoinō. Akka a ea nikakī finasharakōiai, Niospa tāpimasharakōi. ²⁵ Akka nā tāpia nā Epa Niospa tāpimakī finasharakōi. Akka fetsa ē tāpisharakōia iflaxō nikamiskēma, askara yora nā tāpia pishta Niospa anā fīatiro," ixō Jesús ato yoini.

Jesús meka fetsafaxō yoini, fimi exe yositiroōnoa

²⁶⁻²⁹ Nāskata Jesús anā ato yoini. "Epa Nios xanīfāfe noko ikinā iskaraki. Nā feronāfāke fimi exe mai shara ano fana keskaraki. Mā fanax oxatiro fakishi, akka penata yonotiro. Nāskakē ifāfe ōiyamaino ares fimi exe yositiro. Nāskakē mai mēranoax fimi exe āfe tapo foaikax yositiro. Mā yosiāx efapa itiro, nāskata chipo fimitiro. Nāskata mā fana fimi pachiano, ifāfe topitiro māmāi pachiano," ixō Jesús ato yoini.

Mostaza exeōnoa yoikī meka fetsafaxō Jesús ato tāpimani
(Mt. 13.31-32; Lc. 13.18-19)

³⁰ Askata anā Jesús ato yoini iskafakī: "Afe keskaramākī Nios xanīfāfe noko ikinā ē mato yoinō. ³¹ Nā mostaza exe yōra āfe tarepa fanatiro. Akka nā fimi exe pishtakōi fetsafo keskerama. ³² Akka nā fimi exe fanax, mā yosiāx efapakōi itiro fana fetsafo keskerama. Nāskakē mā teshpapafai fetseano peyafāfe āfe teshpafō ano naa fatiro. Nāskarifiakī taefakī ichapatoma Nios Ifofayotirofo. Akka chipo ichapafāfe Ifofakōitirofo," ixō Jesús ato yoini.

Afama mīstikiri yoikī meka fetsafaxō Jesús ato yoipaoni
(Mt. 13.34-35)

³³ Nāskatari meka fetsafaxō Jesús ato tāpimani Niospa meka shara keyokōi tāpikanimākai. ³⁴ Akka meka fetsafaxō Jesús mēxotaima ato yoipaoni. Akka nā aōxō tāpimisfo xafakīakōi ato yoipaoni.

Jesús nefe yafi ìamãfã poo iki meseniaito nishpa fani

(Mt. 8.23-27; Lc. 8.22-25)

³⁵ Mā yātapakeaino nā pena fisti Jesús aōxō tāpimisfo yoini: “Nō okiri ìamãfã pokefainikanō, fokãfe,” ato fani.

³⁶ Nāskata nāno yorafo nīchifainifo, Jesús iyoifokakī. Nāskakanax kanoānãfã mēra nanefainifo. Mā foaifono kanōanãfã fētsari fokākī yorafãfe ato chūfafainifo. ³⁷ Ìamãfã pokefainifono nāno atoki nēfēfākōi nokoni. Atoki nēfēfākōiaino ìamãfã pooiyanã kanōanãfã faka fospikōini. ³⁸ Akka Jesús oxano kanōanãfã chipo kamakī rakax, ãfe tēkesati kamakī tēkesameax. Oxakē aōxō tāpimisfãfe mōinifo iskafayanã: “¿Ifo, mī noko shināimamē mā nō āsaikai?” faifono, ³⁹ Jesús fininīkafãta, “Nēfe, nishpafe,” fata, “Ìamã nishpafe,” fani.

Nāskafaino nefe nishpani anã feroiñima ìa fe nefe. ⁴⁰ Nāskata chipo Jesús aōxō tāpimisfo yoini. “¿Afeskai mā rateimē? ¿Mā ea chanīmara fasharamamē?” ato fani.

⁴¹ Ato askafaino, akka aōxō tāpimisfo ratekōiyanã āa ranã yoinānifo iskakani: “¡Kee! ¿Na feronãfake afe keskaramē na nefe feta ìamãfãnē ato yoiaito nikaifo?” ikanax yoinānifo.

5

Gadara anoxō Jesús feronãfake makinoa niafaka rasi potani

(Mt. 8.28-34; Lc. 8.26-39)

¹ Nāskata okiri ìamãfã pokefaikanax nokonifo, Gadara mai ano. ² Nāskata Jesús kanōanãfã makinoax fotopakekafanaino, nā feronãfake niafaka yōshi chaka nanea nāno akiki oni. Nā feronãfake nā maiāfo kinifã mēranoax oni. ³ Mai kinifã mēra ipaoni. Tsōa nexatiroma ipaoni kaninãnā nexafiaifono. ⁴ Akka mēxotaima kaninãnā otxekere ata metexkere ata fafiaifono, kaninã tesa tesa aki fetsapaoni. Tsōakai afeska fatiroma ipaoni. ⁵ Nāskata penata kafāsata fakishchāiri kafāsapaoni, mächifã ariri māpepaoni maiāfo anori kinifã mēra kapaoni. Nāskata fiisiyanã tokirinī āa tsakamepaoni. ⁶ Akka chai ixō Jesús fichiax, akiki farekekeranax aō ferotaifi ratokonō mai chachipakefōfāni. ⁷⁻⁸ Fāsikōi yoini fiisiyanã. “¡Ea afeska fayamafe, Jesús! Mī Nios Sharapa Fakekī, ē mia yoi Niospa mia ōi kiki ea omiskōimayamafe,” fani. Nāskai mekani, akka Jesúsmāi iskafakī yoiano: “Niafaka yōshi chakata, na feronãfake makinoax tsekekaitãfe,” māmāi faano.

⁹ Askafaito Jesús yōkani: “¿Mī afe anemē?” faito, nāato kemani: “Ēfe ane Legiōn nōmāi ichapax,” fani.

¹⁰ Nāskaxō nā niafaka Jesús yoini iskafakī: “Mai fetsa ari noko nīchiyamafe,” fani. ¹¹ Akka nā chaima mächifã mñānēxō kochifãfe pinifo. ¹² Nāskakē niafaka yōshi chakafãfe iskafanifo: “Kochifo mēra noko nīchife, kochifo mēra nō ikinō,” faifono, ¹³ kochifo mēra Jesús ato nīchini. Nāskakē niafaka yōshi chakafo feronãfake makinoax tsekekainax kochifo mēra iki fetseni. Nā niafaka chakafo dos mil ini. Nā niafakafo kochifo mēra ikiano kochifo ichoax mäfãfã ariax ìamãfã mēra keyopakeax āsai fetsenifo.

¹⁴ Askaito ōikani nā kochifo kexeāfo ichoi fetsenifo. Mā fokaxō a pexe rasi anoāfo ato yoinifo, a pexe rasi pasotai ikafori ato yoinifo nā ōiafo keskara. Ato askafakī yoiaifono nikakani yōrafã rasi fenifo kochifo āsaito ōipaikani. ¹⁵ Mā nokokaxō ōiafo nā feronãfake tsaōa ini rapati shara safeax, mā shināsharai a makinoax mā niafaka yōshi chaka tsekeano. Nāskaito ōikani yōrafã rasi ratei fetsenifo. ¹⁶ Nā Jesús niafakafo kochifo mēranoa potaito

ōikaxō āto kaifo yoifokani fonifo. ¹⁷ Nāskakē yorafāfe yoinifo iskafakakī: “Jesús, nonoax katāfe, nō mia ōipaimakai,” fanifo.

¹⁸ Mā Jesús kanōanāfā mēra naneinākafanaino, nā feronāfake niafakaya ikato, “Ēri mefe kapai,” fani. ¹⁹ Nāskafaino, “Maa, mī efe katiroma. Mī pexe ano katāfe. Mī kaifofo fe kaxō mefe yorafo ato yoitāfe a nōko Ifāfe mia sharafa, mīo noikī mia sharafakī,” ixō Jesús yoini.

²⁰ Askafaito nikafaini nā feronāfake kani. Kaxō nā pexe rasi anoafō ato yoini, nā Decápolis anoafō nā Jesús sharafaa keskara. “Airā, nikakapo, ¿afeskax sharamē?” iki fetsenifo.

Jairo fake xotofake mā nakē Jesús otofani. Askatari kēromāri Jesús rapati mēeax sharani

(Mt. 9.18-26; Lc. 8.40-56)

²¹ Askafata Jesús mā kanōanāfānē ĩamāfā pokeferani oano yōrafā rasi ano ichanānifo. Akka Jesús ĩamāfā ketokonō nēteni. ²² Akka nāno nā ichanāti pexe anoax nānifo fisti akiki oni, āfe ane Jairo. Jesús fichiax a nāmā feopakekafani.

²³ Nāskaxō yoini iskafakī: “Mā ēfe fake xotofake nai kiki. Mī mēkemā ea rāmāxoniyofe, sharax ninō,” ixō yoiaino, ²⁴ Jesús afe kani, yōrafā rasiri afe fonifo. Afe fokakī shoiakī fetsanifo.

²⁵ Nā yōrafā rasi mēra kēro fisti ato fe kani, doce xinia aka ini isinī iki, imi nesemisma ini. ²⁶ Omiskōitiani sharapai notorofo mēra katiani, mā kori potakī mitotiani ini. Tsōa pishta sharafatiroma ini, askatamaroko isinī iki finakōini. ²⁷⁻²⁸ Nā kēromā Jesúsnoa yoiāifāfe nikani. Nāskakē yōrafā rasi foaifono ato acho kaxō āfe tari kexa ramākani. “Ē āfe tari kexa ramākax ē sharatiroraka,” ixō āfe ōiti mēraxō shināni. ²⁹ Nāskaxō āfe tari kexa ramākaxō meeā āfe imi koshikōi nesetani. Nāskaxō āfe yora meeā mā sharakōia meeni.

³⁰ Jesús mā tāpixō āfe sharaōnoax nā kēro mā sharano, yōrafā rasi mēra fesoakekafā ato yōkani: “¿Tsōa ea tari ramākamē?” ato faito, ³¹ a aōxō tāpimisfāfe yoinifo iskafakakī: “¿Mī meimamē yorafāfe mia shoiafetsakaxō mia pitsikinaifāfe? ¿Afeskakī mī noko yōkaimē tsōa ea ramāmē?” ixō fanifo.

³² Askafaifono Jesús aa kemataima ōiakeni, tāpixiki tsōa ramāmākī.

³³ Nāskaino nā kēromā ratei choayanā a sharafaa mā tāpixō, akiki kaxō ratokonō mai chachipakefōfā yoini: “Ē mia tari kexa ramākax mē shara,” ixō yoita a isinī itianiri yoini. ³⁴ Nāskafaito Jesús yoini: “Yōxashta, mā mī shara ea chanīmara faax. Nāskakē tanaima katāfe a mī isinī imis mā mī sharakī,” fani.

³⁵ Jesús mekai xateamano nā xanīfo Jairo pexe anoax fetsafo akiki fēkaxō yoifekani fenifo. Iskafakī yoinifo: “Mā mī fake naaki anā nōko Ifo fekaxtefayamafe,” faifono, ³⁶ akka Jesús ato nikakima, iskafakī nā xanīfo Jairo yoini: “Ratekima, ea chanīmara fafe,” ixō yoini.

³⁷ Nāskaxō Jesús, “Tsoa nofe kaima kiki,” ato fani. Pedro iyota, Santiago iyota, āfe exto Juan iyota ato fani. ³⁸ Nāskata mā Jairo pexe ano nokokaxō ōiafo yorafo oiakani fiisinifo nā fake xotofake manokani mā naano. ³⁹ Nāskata pexe mēra ikikaixō ato yoini iskafakī: “¿Afeskai mā oiai fiisikimē? Na fakekai nakeroko oxanō,” ato fani.

⁴⁰ Ato askafaito yorafāfe Jesús ōsaketsanifo. Askafaifono pexe xaki mēranoa keyokōi Jesús ato kāimani. Nāskaxō apa yafi afa iyoni, a afe foafori afe fonifo. Nāskakanax nā fake xotofake raka ano ikifainifo. ⁴¹ Nāskata Jesús mēkemā mētsosinīfōfā yoini: “Xotofakeshta, ē mia yoikai fininīkafāfe,” faino, ⁴² koshikōi fininīkafāni, nā xotofake doce xinia aka ini. Mā fininīkafānax kani. Nāskaito ōikani yorafo ratei fetsenifo. “¡Kee, ōikapo! ¿Afeskaxō otofamē?” fanifo.

⁴³ Nāskaxō Jesūs ato yoini: “Mā tsoa yoiki na fake xotofake nakē ē otofakī,” ato fani. Nāskaxō, “Pimakāfe na fake xotofake,” ato fani.

6

Jesūs Nazarete anoxō nikakaspanifo

(Mt. 13.53-58; Lc. 4.16-30)

¹ Nāskata Jesūs nānoax kani āfe maikōi ano. A aōxō tāpimisfori afe fonifo. ² Nāskata pena tenetitīa ichanāti pexe mēraxō ato yoikī taefani. Anoxō Jesūs ato yoiāito nikakani yorafo āa ranā yoinākani iskanifo: “Aira nikakapo, ¿Fanīxō iskara tāpikī finakōiamē? Tāpikī finakōixō afama mīstifto fai tōā atiroma keskafai,” ikanax āa ranā yoinānifo. ³ “¿Akka namamē a mīsa famis? María fake Santiagonō Josēnō Judasnō Simónnō āto ochi. ¿Akka mā ōimamē afe chikofori nono nofe ikafo? Nāskakē nō nikapaiyaitoroko,” fanifo. ⁴ Askafafono Jesūs ato yoini iskafakī: “Na mai tio anoxō a Niospa meka yoimis nikakōitirofo aōnoa yoisharakōiyānā. Akka āfe maikōi anoxō nikatirofoma, āfe kaifofo feta afe yorakōifāfe.”

⁵ Nāskakē arixō afama mīsthi fapaifikī anima. Akka a isinī ikaifo fisti rasi ato ramāino sharai fetsenifo. ⁶ Nāskata Jesūs shināni: “¿Afeskakī ea chanīmara fakanimamē?” ixō tōā nikayamaino. Nāskakē pexe rasi chaima ano Jesūs kafāsani ato tāpimafōfāsafai.

Jesūs aōxō tāpimisfo nīchini Nios Xanīfōōnoa ato yoitanōfo

(Mt. 10.5-15; Lc. 9.1-6)

⁷ Nāskata aōxō tāpimisfo doce kenani. Ato kenaino akiki feafono rafe rasi faxō ato nīchini: “Eōxō niāfaka yōshi chakafo ato makinoa pōtatakāfe,” ixō ato yoini. ⁸ Nāskaxō anā ato yoini: “Fāi kakī, mā afaa fokiki, akka māto mēsteti fisti mā fotiro. Māto pishari mā fokiki a mā piari mā fokiki māto koriri mā fokiki.” ⁹ Nāskax fotakāfe māto sapato fistiya, māto rapati fetsari mā fokiki.” ¹⁰ Nāskaxō ato yoini: “Mā pexe fetsa mēra ikiax nāno nētekāfe, nā mā anoax kaitīa. ¹¹ Akka fatora pexe rasi anoxō mato ifikaspayanā mato nikakaspafono anoax tsekekāfe māto taekinoa mapo taa taa ayanā. Mā askafaino tāpinōfo Nios atoki inimayamaino. Ē mato parakima yoi. Nā pexe rasi Sodoma anoāfo feta Gomorra anoāfāfe afara chakakōi fapaonifo. Nāskakē Niospa nā ato omiskōimanaitīa ato omiskōimaxii. Akka nā mato nikakaspafifo nāfo ato omiskōimaki finakōixii,” ixō Jesūs ato yoini.

¹² Nāskakē Jesūsxō tāpimisfo anoax fonifo yorafo yoifokani. “Māto chaka xatekaxō Nios Ifofakāfe,” ato fayānā. ¹³ Ato makinoa ichapa niāfaka chakafo potanifo. A isinī ikaifofo ato sharafayanā xiniyaxō ato māmāyanā.

Juan Maotista nani

(Mt. 14.1-12; Lc. 9.7-9)

¹⁴ Xanīfo Herodes nikani Jesūsnoa yoiāifono aōnoa fanīma mīstixō yoifofāsafafono. Nāskakē Herodes shinākī iskafani: “Mā Juan Maotista otoita, nāskakē āfe sharaōxō ato sharafai,” ixō shināni.

¹⁵ Akka fetsafāfe yoikī iskafanifo: “Nā ato Niospa meka yoimis Elīaskā,” faifono, fetsafāferi yoikī iskafanifo: “Nato Niospa meka ato yoimis, nā afetīama Niospa meka ato yoipaonifo keskafakī,” ixō yoiāifono.

¹⁶ Nāskafakī yoiāifāfe nikai Herodes iskani: “Nākīa Juan, mē ato textemafaitano mā anā otoa,” ixō shināni.

¹⁷ Herodes Juan reteyoamano yoikī iskafani: “Mī exto āfi fīayamafe,” faito nikakī, Herodes akiki ōitifishkiki āfe sorarofō yoini achikaxō metexkere

akaxō karaxa mēra ikimanōfo. Akka nā Herodías Felipe āfe āfi ini, nā Felipe Herodes āfe exto ini. Akka nā Herodes Herodías fe fīanāni. ¹⁸ Akka Juan Herodes yoini: “Na mī exto āfi mī fīatiroma,” ixō yoiano, ¹⁹ nāskakē Herodías Juan noikaspakōikī retepaini. Akka retepaiifkī retetiroma ini. ²⁰ Akka Herodes Juan ki rateni māmāi tāpiax Juanmāi feronāfake sharakōikē Nios Ifofasharakōia. Nāskakē kexesharakōini. Nāskakē āfe āfini noikas-pafiaito nikafikī, “¿Ē afeskaimē?” ixō shināta, Herodes Juan nikakōini. ²¹ Akka Herodías mā ato Juan retematiro ini, Herodes āfe cumpleaños ikaino. Nāskakē Herodes fista akī afe xanīfofoya soraro xanīfofoya Galilea anoa xanīfofori ato ichanāfani. ²² Nāskaifono Herodías fake xomaya fista ikaino ikikainax ares yorafāfe ōinōfo mairani. Mairaito ōikī Herodes inimani, a afeta piaifori yoranifo askafanifo. Nāskakē nā xanīfāfe nā fake xomaya iskafani: “Ea yōkafe a mī fichipaiyai, ē mia mininō,” fani. ²³ “Mā na yorafāfe ōikani ē mia pāraima a mī fichipaiyai keskara ea yōkafe ē mia mininō,” ixō yoini.

²⁴ Askafaino nā xomaya kāikaixō afa yoini iskafakī: “¿Ē afaa xanīfo yōkatirōmē?” faito āfa kemakī iskafani: “Juan textexō ea āfe mapo ināfe fafe,” fani.

²⁵ Nāskata nā xomaya anā ikikaixō xanīfo yoini iskafakī: “Iskaratīa sapaki rītaxō Juan Maotista textexō ea āfe mapo ināfe,” fani.

²⁶ Askafaito nikai xanīfo shināmitsakōini, Juan shināi. “Akka na yorafāfe nikaifono mē na kēro xomaya yoia. Nāskakē ē ato Juan textemapaiyamafikī ē ato textemani,” ixō shināni. ²⁷ Nāskakē āfe soraro nīchini, Juan textexō āfe mapo fixotanō. ²⁸ Nāskakē soraro karaxa mēra kaxō, Juan textexō āfe mapo sapaki feni. Nāskaxō nā kēro xomaya ināno, nāatori āfe afa ināni.

²⁹ Nāskakē Juan āfe inafāfe nikanifo mā texteafo. Nāskakē āfe yora fonifo maifaxikakī.

Jesús cinco mil feronāfakefo ato pimani
(Mt. 14.13-21; Lc. 9.10-17; Jn. 6.1-14)

³⁰ Mā askano a aōnoa yoimisfāfe afe ichanākaxō yoinifo a atanaifo keskara ato tāpimayanā. ³¹ Askafaiāfe nikakī Jesús ato yoini: “Niri fekāfe tsōa istoma ano nores kaxō nō teneyonō,” ato fani. Yorafo mēxotaima atoki feaifono, nāskakē pitirofoma inifo. ³² Nāskakē Jesús aōxō tāpimisfo fe kanōanāfānē tsōa istoma ano kani. ³³ Akka mā fōkaxō yorafāfe Jesús kaito ōikakī tāpinifo. Nāskakē nā pexe rasi anoafō nā aōxō tāpimisfo fe kai ari ichonifo. Jesús aōxō tāpimisfo fe nokoamatai nokoi taenifo. ³⁴ Mā nokoax Jesús kanōanāfā makinoax fotopakekafā ōia yōrafā rasi ōini. Ato fichixō ato shinākōini, nā oa ovejāfo ifomais keskara ato ōikī. Nāskaxō afama mōshtifo ato yoisharakōini. ³⁵⁻³⁶ Nāskakē mā yātapakeaino aōxō tāpimisfo akiki fōkaxō yoinifo: “Mā yātapakei kiki nono tsoa ikamakī. Na yorafo nīchife pexe rasi ari yafi a pexe pasotai ikafo ari fokaxō a piaifo fitanōfo,” faifono, akka Jesús ato kemani: ³⁷ “Askakakīma māroko ato pimakāfe,” ato faito, kemaniifo iskafakakī: “¿Mī shināimē na yorafo pimaxiki kaxō a piaifo dos cientos kori exenē pāa nō ato fixotanō?” faifono, ³⁸ Jesús ato yoini: “¿Afe tii mā pāayamē? Fokaxō ōiyotakāpo,” ato faito, mā fokaxō ōitakakī yoinifo iskafakakī: “Nāno cinco pāa yafi foe rafes,” fanifo.

³⁹ Nāskakē ato yoini: “Ichanāfaxō na yorafo yoikāfe fasi ano tsaonōfo,” ato fani. ⁴⁰ Ato yoikī askafaifono keyokōi tsaoui fetsenifo, fetsa ano cien ini, fetsa

ano cincuenta ini. ⁴¹ Nāskata Jesús cinco pāa yafi foe rafe tsomainīfofā, nai foisnīfofā Apa Nios aicho fani. Nāskata mā pāa kaxkeketsaxō aōxō tāpimisfo ināni, yorafori ato inānofo. Askatari foe raferi keyokōi ato inānifo pinōfo. ⁴² Nāskakē mā keyokōichi pikanax māyakōinifo. ⁴³ Nāskakē a chetefaafō pāa yafi foe doce fēta fospikōiya ini. ⁴⁴ A cinco pāa piaifō cinco mil feronāfakefos inifo.

Jesús ĩamāfā femākĭa kani
(Mt. 14.22-27; Jn. 6.16-21)

⁴⁵ Mā yorafo pimata Jesús aōxō tāpimisfo yoini iskafakĭ: “Kanōanāfānē nanekāfe okiri ĩamāfā pokefaitaxikākĭ Betsaida ano rekē nokotaxikakĭ. Ĕ fenakaimakai, ē na yorafo nĭchyonō,” ixō ato yoini. ⁴⁶ Mā yorafo nĭchita māchi keya ari arese kani arixō Apa Nios kĭfikai. ⁴⁷ Mā fakishaino ĩamāfā nakirafe kanōanāfā ini. Akka Jesús kani, ares fisti nēteni. ⁴⁸ Jesús ōini aōxō tāpimisfāfe tōfeafāfe nēfefanē ato katima faino ĩamāfā pooiki mesenikōiaino, mā penaino. Nāskakē Jesús atoki kani ĩamāfā femākĭa. Akka ĩamāfā femākĭa kakĭ oa ato finōfainai kaskara ini. ⁴⁹⁻⁵⁰ ĩamāfā femākĭa kaito ōikakĭ niafakara ixō shinākani. Tai tai inifo. Nāskakē keyokōichi ōikani rateaifono. Akka Jesús ato yoini iskafakĭ: “¿Afeskai mā rateimē? Ĕki rateyamakāfe,” ato fani.

⁵¹ Nāskata kanōanāfā mēra naneinākafā, nēfefā nishpafani. Nēfefā nishpafaito ōikakĭ a aōxō tāpimisfāfe, “¡Kee! ¿Afeskaxō nēfefā nishpafaimē?” fanifo. ⁵² Akka Jesúsnoa tāpiyonifoma, Jesús afama mĭshti fatiroxakĭ cinco pāa cinco mil feronāfakefo ato pimafiitano. Niospa Fake fiano āto ōiti mēraxō tsōa shinānima, tāpiyonifoma.

Jesús Genesaret anoafō a isinĭ ikaifō ato sharafani
(Mt. 14.34-36)

⁵³ Jesús aōxō tāpimisfo feta ĩamāfā pokefainax Genesaret mai ano nokoni. Nāno ĩamāfā ketokonō kanōanāfā nexanifo. ⁵⁴ Nā kanōanāfā mēranoax fopakefofānaifono, yorafāfe tāpinifo. ⁵⁵ Mā tāpikanax pexe rasi pasotai iĭchoi fetsenifo. Nāskakaxō a isinĭ ikaifō, rātati kamaki rātakaxō ato efenifo Jesús ano. ⁵⁶ Nā Jesús kai ari fanĭma mĭshtixō, a isinĭ ikaifō fai nēxpakĭa ato rātanifo. Nāfāfe, “Noko ramāmafe nō mia tari kexa ramākanō,” fanifo. Nā ramāifo tĭi sharai fetsenifo.

7

Jesús ato yoini afeskai yorafo chakafomakĭ
(Mt. 15.1-20)

¹ Nāskata fariseofo fe a Moisés yoikĭ kirika keneni kaskara ato tāpimamisfo Jerusalén anoax Jesús ano fenifo. ²⁻³ Nāfāfe ōinifo Jesúsxō tāpimisfāfe mechokomexoma piaifāfe, a āto xinifāfe yoinifo keskayamaifono. Nāskakē ato mekafanifo. Akka fariseofāfe keyokōi judeofo āto xinifāfe yoipaoni keskapaonifo. Piamax taeyoi mechomepaonifo chipo pixakakĭ. ⁴ Akka a afarafo ato miniaifo anoax fekanax, a ato xinifāfe yoinifo keskai mechokomekaxoma pitirofoma. Āto xinifāfe afarafo feyafapaonifo keskai nāfori askapainifo. Āto kechofoya, āto jarafōya āto ochamefetifōya, āto rakoti chokapaonifo āto xinifāfe aponifo kaskara.

⁵ Nāskakē fariseofo feta a Moisés yoikĭ kirika keneni kaskara ato tāpimamisfāfe Jesús yōkanifo: “¿Afeskakĭ na mĭōxō tāpimisfāfe a nōko xinifāfe yoinifo kaskara nikakanimamē na mechokomexoma piaifofaifāfe?”

6-7 Jesús ato kemani iskafakī: “Nā Niospa meka yoimisto Isaías matoōnoa yoini iskafakī:

Na yorafāfe afaa tāpiafoma ato feparapaimisfo. Na yorafāfe eōnoa yoisharafikakī, akka āto ōiti mēraxō ea shināsharafoma. Āākōi ichanākanax fanāikani ea kīfīyanā. A yorafo tāpimanaifo keskarakai ēfe mekama. Āākōi shināxaxō ato yoikani,

ixō Isaías Niospa meka keneni. ⁸ Nāskakē a Niospa yoini keskara mā shinākima, a mātō xinifāfe yoini keskara mā shināmis.

⁹ “Nā mā shināpaiyai keskara fisti mā shināpai. Nāskakē a Niospa mato yoini keskara mā anā nikapaima. ¹⁰ Akka Moisés yoini iskafakī: ‘Mātō epa yafi mātō efa nikasharakāfe. Akka a āto apa yafi āto afa chakafaifo ato retēkāfe,’ ixō yoini. ¹¹⁻¹² Anori kenekī yoifnino, akka mā yoikī iskafamis: ‘Feronāfāke āfe apa yafi āfe afa yoikī iskafatiro: “Ē mato afaa inātiroma, nā ēfenāfo mē Nios ināki ixō yoitirofo,” ’ mā famis. Nāskata a Niospa yoini anori mā ato yoimisma mātō epa yafi mātō efa kexeshakāfe ifiano. Akka mā ato yoimis iskafakī: ‘Anā mātō epa yafi mātō efa mā afaa inātiroma,’ ixō mā ato yoimis. Na shara. ¹³ Nāskakē a Niospa yoini anori yoitama, a mātō xinifāfe yoipaonifo anori fisti mā ato yoimis. Nāskaxō afara fetsafo mā famis, Niospa mekakōi mā yoimisma,” ixō Jesús ato yoini.

¹⁴ Nāskaxō Jesús yorafo kenaxō ato yoini iskafakī: “Keyokōichi ea nikasharakōikāfe tāpisharakōixikakī ē mato yoinō. ¹⁵ Nā nō piatokai noko chakana fatiroma, akka nōko shinā mēraxō nō afara chakafo shināito noko chakanafatiro. ¹⁶ Mā pachoyakī nikasharakāfe,” ato fani.

¹⁷ Nāskata Jesús yorafo nīchifaini pexe mēra ikini, nānoxō a aōxō tāpimisfāfe yōkanifo: “A mī yorafo yoia keskara nokori yoife nō tāpinō,” faifono, ato yoikī iskafani: ¹⁸ “¿Afeskakī māri mā nikasharaimamē? ¿Mā tāpiamamē afara nō piato nōko xaki mēraxō noko chakafatiroma? ¹⁹ Akka a nō piāi nōko ōiti mēra kaima, nōko āto mēra kai, mā nōko āto mēranoax payokomēano chipo nō aya safatiro.”

“Akka a nō piāi chakama, keyokōi shara,” ixō ato yoini. ²⁰ Nāskaxō anā ato yoini: “Akka mātō shināmā shināxō mā afarafo chakafatiro. ²¹⁻²² Nāskakē āto shinā mēraxō shinākakī, yorafāfe afara chakafo shināmisfo. Feronāfāfē āto āfima chotafono, kērofāferi āto fenema chotamamisfo. Nāskata yomet-sokata, ato retemisfo. Askatari kēro fetsafo kaxefakāta, fetsafo chakafakī, mekafakāta; afara fetsafo chakafakāta, ato pārakāta, a afara apaiyaifo fisti akāta, a fetsafāfe fiāiti fīpaikāta, āa chanīkāta, āa kakapaikāta, askatari shināsharamisfoma. ²³ Nā afara chakafo āto shinā mēraxō shināifo keskafakī nāto ato chakafaxii,” ixō ato yoini.

Xotofake judeoyamafixō Jesús chanīmara fakōini (Mt. 15.21-28)

²⁴ Nāskata nānoax pexe rasi Tiro ano Jesús kani. Mā kaax pexe fetsa mēra ikini, ano ikikē tsōa tāpīamanō. Akka nāno ikiax onetiroma ini. ²⁵ Nānoa koshikōi tāpinifo, nāskakē nā fake xotofake niafaka naneato āfe afa Jesús ano kaxō a nāmā ratokonō mai chachipakefōfāni. ²⁶ Nā kēro xoko fetsa Sirofenicia mai anoa ini. Nāskakē Jesús ano kani. Kaxō yoikai iskafakī: “Ēfe fake xotofake makinoa niafaka yōshi chaka potaxōfe,” fani.

²⁷ Askafafaiato nikakī Jesús yoini iskafakī: “Āa fakefāfe pikī taefayonōfo. Enefe, a fakefāfe piāi fīaxō nō paxta inā, askarakai sharamakī,” faito, ²⁸ nā

kēromā kemani iskafakī: “Ēje Ifo, a mī ea yoiai keskara mē nikai. Akka paxtafāfe pitirofo a fakefāfe piāi āfe potofō mīsa nāmā keyo pakeaito,” faito, ²⁹ Jesūs yoini iskafakī: “Chanīma, mī ea kemasharakōia. Nāskakē mā mī katiro, mī fake xotofake makinoax mā niafaka yōshi chaka mā tsekeaki,” fani.

³⁰ Nā kēro mā āfe pexe ano nokoxō ōia āfe fake xotofake raka ini, a makinoax mā niafaka tsekeano.

Jesūs feronāfake pāstokōi ita mekamisma sharafani

³¹ Jesūs Tiro mai anoax tsekekainikāi, Sidōn yafi pexe rasi Decápolis finōfaini kaax, Galilea ĩamāfā kesemē nokoni. ³² Nāno yorafāfe feronāfake mekamisma ita pāstokōi iyonifo. Mā iyokaxō yoinifo iskafakakī: “Mī mīfi māmāfe nikamismaki pāstokī,” faifono, ³³ Jesūs a fisti ori iyonī, yorafo maki-noa. Nāskaxō āfe mīfi āfe pachō kini mēra meeni. Askafatari āfe mifiki kemo mechota āfe ana ramākani. ³⁴ Nāskafata nai foisnīfofā xakaita yoini iskafakī: “Efata,” fakī. (Akka nōko mekapa nō yoimis iskafakī: “Papeita nikasharafe,” faki.)

³⁵ Nāskafaino, nā pāsto āfe pācho nikasharakōini. Āfe anari sharakōitani, nāskax meka sharakōini. ³⁶ Nāskafata, “Mā tsoa yoiki,” Jesūs ato fafaino, askatamaroko ato yoikī finakōifofāsa fanifo. ³⁷ Nāskakē, “ĭKee, ōikapo! ĩAfeskaxō iskara sharafaimē?” ikata iskafakī yoinifo: “A pastofō ato sharafaino mā nikakani, a mekamisfomari mā ato sharafaino mā mekakani,” ikanax yoinānifo.

8

Jesūs cuatro mil feronāfakefo pimani

(Mt. 15.32-39)

¹ Nāskata pena fetsa yorafā rasi anā Jesūsiki fenifo āfe meka nikai fekani. Nāskata a piaifori ano afaa inima. Nāskaifono Jesūs aōxō tāpimisfo kenaxō yoini iskafakī: ² “Ē na yorafo shinākōi, nono tres nia mā efe ikafono, nonoxori afaa pikanima. A piaifo mā keyoa. ³ Akka afaa pimaxoma āto pexe ano ē ato nīchiano, fonāikani afaa pikanaxma fai nēxpakīa paketirofo. Atiri chai inoax feafoki,” ato faino, ⁴ a aōxō tāpimisfāfe kemanifo: “Akka, ĩafeskaxō nō ato pimatromē? ĩFanīa nō afaa fitiromē, nonokai tsoa ikama?” faifono, ⁵ anā Jesūs ato yōkani: “Akka, ĩafe tii mā pāyamē?” ato faito, “Siete pākīa,” fanifo.

⁶ Nāskakē Jesūs, “Yorafā rasi nāmā tsaokāfe,” ato fata, siete pāa tsoainīfofā. Apa Nios aicho fata, pāa kaxke pakexō aōxō tāpimisfo ināni. Nāfāferi nā yorafo inānifo pinōfo. ⁷ Nāskata foe ichapama ranāri ini. Nāskakē atoōxō Jesūs Apa Nios aicho fata, aōxō tāpimisfo foe ināni a yorafori ato inānōfo. ⁸ Nāskakē keyokōichi pikanax māyakōinifo. A pikī chetefafo siete fēta fospikōia ini. ⁹ A piafo yorafo ichapakōi inifo, cuatro mil inifo. Nāskaxō Jesūs ato nīchini fotanōfo. ¹⁰ Nāskata Jesūs a aōxō tāpimisfo fe kanōanāfā mēra naneinākafanax Dalmanuta mai ano kani.

Fariseofāfe, “Jesūs, tsōa atiroma keskara noko ispafe nō mia chanīmara fanō,” ĩxō yōkanifo

(Mt. 16.1-4; Lc. 12.54-56)

¹¹ Nāno fariseofo akiki fenifo afe yoināi fekani, feparaxō yōkapaikani. Iskafakī yoinifo: “Tsōa atiroma keskafakī afama mīshtifo fakī noko ispafe nō mia chanīmara fanō mī Nios ariax oamāki,” faifono, ¹² Jesūs fāsi xakainākafā

ato yoini iskafakī: “¿Afeskakī na yorafāfe tsōa atiroma keskafakī noko ispafe ea fakanimē? Ē mato pārima a Nios fistichi atiro keskara ē mato ispaima,” ixō ato yoini.

¹³ Ato askafata mā ato makinoax kai kanōanāfā mēra naneinākfā okiri ĩamāfā pokefaini kani.

“Fariseofo feta saduceofāfe anorima yoimisfoki ato nikayamakāfe,” Jesús ato fani

(Mt. 16.5-12)

¹⁴ Akka mā fōkakī, a pifofaifo shināmaki fainifo. Akka nā kanōanāfā mēra pāa fisti ini. ¹⁵ Askaifono Jesús ato yoini: “Ōisharakāfe. Fariseofāfe Herodes feta pāa faraxakafo piyamakāfe,” ato fani.

¹⁶ Ato askafaino, a aōxō tāpimisfo āa ranā yoinānifo iskakani: “¿Afeskakī noko iskafaimē? Nōkai pāa yama,” ikanax yoinānifo.

¹⁷ Nāskaifono mā tāpīxō Jesús ato yoini iskafakī: “¿Afeskai nō pāayamara mā ikimē, māto ōiti mēraxō mā shināsharaimamē? ¹⁸⁻¹⁹ Feroyafīaxō mā ōi sharaima, pachoyafīaxori mā nikasharaima. ¿Akka mā shināimamē? A cinco pāa cinco mil yorafo ē ato pimaita akka, ¿a chetefaafo afe tii fēta fospia mā fiitamē?” ato faito kemanifo: “Doce fēta ikita,” fanifo.

²⁰ “Askatari a siete pāa cuatro mil yorafo ē ato pimaita, akka, ¿afe tii fēta fospia mā fiitamē?” ato faito, “Siete ikita,” fanifo. “Askatari, ¿nā siete pāa ē kaxkeketsaxō ē ato minita cuatro mil feronāfake, afe tii fēta texefafo mā fiitamē?” ato fani. “Sietekīa,” fanifo.

²¹ Askafaifono ato yoini iskafakī: “¿Ai mā tāpīamamē?” ato fani.

Jesús yora fēxo Betsaida anoxō sharafani

²² Nāskata mā Betsaida ano nokoafono, yora fēxo Jesús ano iyonifo. Mā iyokaxō iskafakī yoinifo: “Jesús, na feronāfake ramāfe,” faifono, ²³ Jesús āfe mēkemā nā fēxo mētsoinīfōfā pexe rasi pasoatai yoini. Nārixō āfe kemō āfe fero mehanafayanā āfe mēkemā ramāni iskafakī yōkayanā: “¿Mā mī afara ōitiromē?” faito, ²⁴ nā fēxo mā ōisharaki iskafakī yoini: “Ē ōi na feronāfakefo oa iffo kafanai keskara,” faito, ²⁵ Jesús anā āfe mēkemā fero ramākani. Nāskafaano nā fēxo mā sharaxō ōisharakōini. Nāskaxō keyokōi xafakīakōi ōisharakōini. ²⁶ Nāskakē Jesús āfe pexe ano nīchini iskafakī yoiyanā: “Mī anā pexe rasi ano kakiki, mī pexekōi ano katāfe, mī tsoa yoiki,” fani.

“Mī Cristo mia Niospa ifni nokoki nīchixii mī nōko xanīfo finakōia inō,” ixō Pedro Jesús yoini

(Mt. 16.13-20; Lc. 9.18-21)

²⁷ Nāskafata Jesús a aōxō tāpimisfo fe pexe rasi Cesarea Filipo pasoato fonifo. Fāi kakī Jesús ato yōkani: “¿Ea afaa yorafāfe faimē?” ato faito, ²⁸ aōxō tāpimisfāfe kemanifo iskafakakī: “Fetsafāfe Juan Maotistara, mia fakani. Fetsafāferi Elíasra mia fakani. Fetsafāferi nā ato Niospa meka yoipaoni fetsa rakikīa mia fakani,” ixō yoinifo.

²⁹ “Akka, ¿mā ea tsoara faimē?” ato faito, Pedro kemani iskafakī: “Mī Cristo mia Niospa ifni nokoki nīchixii mī nōko xanīfo finakōia inō,” faito, ³⁰ Jesús yoini iskafakī: “Eōnoa tsoa yoiyamakāfe,” fani.

“Chipo ea retexikani,” Jesús ato fani

(Mt. 16.21-28; Lc. 9.22-27)

³¹ Nāskata Jesús ato yoikī taefani iskafakī: “Ē chipo omiskōi finakōixii. Askatari ea ōikaspakakī ea potaxikani, judeofāfe āto xanīfofo feta a Nios ato

kīfixomis xanīfofāfe a Moisés yoikī kirika keneni keskara ato tāpimamisfāfe. Askatari ea retexikani, akka ea retefiafone tres nia oxata ē anā otoxii,” ato fani. ³² Nāskakē xafakīakōi ato yoini. Ato yoikī askafaito ori iyoxō Pedro yoini iskafakī: “Ifo, askayamafe mia retekanima kiki,” faito, ³³ anā Jesús fesoakekafā aōxō tāpimisfo ōiyanā iskafakī Pedro yoini: “Emakinoax katāfe, Satanás. A Epa Niospa shināi keskara mī tāpiamaki. Akka nā yorafāfe shināifo keskara mī shināikai,” fani.

³⁴ Nāskata Jesús aōxō tāpimisfoya yorafo kenaxō ato yoini iskafakī: “Fatora fetsa ēfe inakōi ipaikī āakōi apaiyai keskara anā atiroma. Nā ē yoiyai keskara nikakōitiro. ‘Ēfe Ifoxō ea retefiafone ēkai ēfe Ifo ē potapakenakama,’ ixō shinātiro. ³⁵ Akka fētsa āa shinātiro iskakī: ‘Ē Nios Ifofaito ea retetirofo. Nāskakē ē Nios Ifofaima,’ ixō shinātiro mesekī. Askara yora naax ēfe Epa ano katiroma. Akka nā ea Ifofaa, ēfe meka yoiaito askayamākī eōxō reteafono ē ifixii efe ĩpaxanō eamāi Ifofamiskē. ³⁶ Akka fatora fetsa afara ichapayakōi ikatsaxakī, anā āfenā itiroma. Mā naax omiskōipakenaka. ³⁷ Akka, ĩnīpaxakī yorafāfe afe tii kopifatirofomē? Maa, afaa kopifatirofoma. ³⁸ Akka fatora fetsa eō rāfikī, ēfe meka sharari yoikaspai yora chakafāfe ferotaifi ēri aō rāfikī yoikī iskafaxii: ‘Ē na yora ōimisma,’ ē faxii ēfe Ēpa sharafoya fotoxō, ēfe ājiri sharafari efe fotopakefofāxikani,” ixō ato yoini.

9

¹ Askatari anā Jesús ato yoini iskafakī: “Ē mato pārima, fatora fētsa nono efe iyoxō nayoxoma ēfe Epa xanīfo finakōia ōiyoxikani āfe sharaōnoax oaito,” ixō ato yoini.

Jesús āfe femānā fetsa keskara ini, fafekōini. Āfe rapatiri oxokōi ini (Mt. 17.1-13; Lc. 9.28-36)

² Nāskata mā seis nia finōta, Jesús māchi keyakōi ari māpekī āfe ina tiis ato iyonī. Pedro iyota, Santiago iyota, Juan iyota ato fani. Nāriax āto ferotaifi Jesús fetsa keskara ini. ³ Āfe rapati fafekōini oxo finakōia ini, mā patsasharafikakī tsōa askafatiroma ini. ⁴ Nānoa Elías yafi Moisés ōinifo Jesús fe mekaifono. ⁵ Nāskaifono Pedro Jesús yoini iskafakī: “Ifo, sharakōi ano nō oa. Nono nō tres tapas fanō, fetsa mia axota, fetsa Moisés axota, fetsa Elías axota, nō fanō,” fani.

⁶ Akka aōxō tāpimisfo ratekōinifo. Nāskakē Pedro tāpinima a yoiyai keskara, shināyamaino yoini. ⁷ Nāskaifono kōinī ato maipakefofāni. Nā kōi mēranoax mekai iskaito nikanifo: “Nafi ēfe Fakekōiki ē aō noikōi. Nāskakē nikasharakōikāfe,” ikaito nikanifo.

⁸ Askaito nikafikakī, a kemataima ōiafo ano ato fe tsoa inima, Jesús fisti ares ato fe ini.

⁹ Nāskata mā māchi keya ariax fotoxō, “A mā ōia keskara mā tsoa yoiki. Ē naax mē anā otoano mā ato yoitiro,” ixō ato yoini. ¹⁰ Nāskakē tsoa yoitama. Ares fisti āto ōiti mēraxō shinānifo mā tāpifikaxō. Naax ē anā otoxira nokofaito nō tāpiama ikanax yoinānifo.

¹¹ Nāskaxō Jesús yōkanifo, iskafakakī: “Ķafeskakī a Moisés yoikī kirika keneni keskara ato tāpimamisfāfe iskafakī yoisfomē Elías rekē oi taexii?” ixō yoisfomē faifono, ¹² ato kemakī iskafani: “Chanīma, Elías rekē fotoi taexii, nāato ato yoisharaxii itipinīsharanōfo. Akka, Ķafeskakī kirika ano kenenifomē, a ē omiskōixiai yorafāfe ea chakafakakī ea potaifono? ¹³ Akka ē mato yoinō

mā Elías ifana. Nāskakē nā apaiyai keskafakakī chakafanifo. Nānori aōnoa yoikī kirika kenenifo,” ixō ato yoini.

*Jesús feronāfake naetapa niafaka chaka pōtaxoni
(Mt. 17.14-21; Lc. 9.37-43)*

¹⁴ Nāskata mā Jesús fe fōtakakī a Jesúsxō tāpimis fetsafo ano nokokaxō ōitoshinifo yōrafā rasifo fe a Moisés yoikī kirika keneni keskara ato tāpimamisfo fe ato fe feratenāifāfe. ¹⁵ Nāskaifono Jesús oaito fichikanax akikī keyokōi farekefaikaxō, “Kee, mā Jesús oi kiki,” ikaxō yoisharanifo.

¹⁶ Askaifono Jesús ato yōkani iskafakī: “¿Afeskai mā ato fe feratenāimē?” ato faino, fētsa kemani iskafakī: ¹⁷ “Maestro, ēfe fake ē mikiki efea, niafaka chaka a mēra nanexō mekamamismo. ¹⁸ Nā kapaiyai arixō, niafaka chakata achiano paketiani. Āfe axfapa fākokeyopaketiani, askatari āfe piti yeyexamis, askatari charishi fetsemis. Mē mī inafō yoia a makinoa niafaka yōshi chaka pōtanōfo. Akka mī inafāfe atirofoma,” faino, ¹⁹ Jesús kemani: “Mākai ea chanīmara faima. Mā afara shināmis. Akka afetiakai ē nono mato fe itianima. ¿Afetiakai mā ea nikaimē? Niri nā fake efekāfe,” faino, ²⁰ nāskakē Jesús ano nā fake iyonifo. Akka nā niafaka mā Jesús tāpixō, nā feronāfake anā choamanaino anā nāmā pakeni. Nāskakē taramē taramē iyanā āfe axfapa fākokeyopakeni.

²¹ Nāskaxō Jesús apa yōkani iskafakī: “¿Afetiā fichinimē?” iskaifaito, apa yoini iskafakī: “Afetiā fichinima. Yomeax fichini. ²² Mēxotaima na niafaka chakata iskafaino, chinaki paketa fakanaki pakemis, retepaikī iskafaino. Nāskakē mī sharafatiromakī sharafafe, noko shinākī ēfe fake ea sharafaxōfe,” faino, ²³ Jesús yoini: “¿Afeskakī ēfe fake mīa ea sharafaxotiromamē mī ea faimē? Ea chanīmara faifono ē ato afama mīshti faxotiro,” fani.

²⁴ Nāskakē nā fake āpa fāsikōi mekani iskafakī yoini: “Ē mīa chanīmara fai, ea axōfe ē mia chanīmara fakī finakōinō,” ixō yoiano, ²⁵ yōrafā rasi ichanāfono Jesús ōini, Jesús feronāfake makinoa niafaka potaito ōipaikani. Nāskakē Jesús niafaka iskafakī yoini: “Niafaka yōshi chakata, na fake mī mekamatama, mī nikamamismaki, ē mia yoikai na fake makinoax tsekekaitāfe, nāskax mī anā a mēra ikiki,” faino, ²⁶ niafaka yōshi chaka fāsikōi fiisini. Nāskakī nā fake anā choamani. Nāskata mā fake makinoax tsekekaiikī oa naa keskara fafāini. Nāskakē iskafakī yoinifo: “Mā naa raka,” faifono, ²⁷ akka Jesús āfe mēkemā mētsota fininifanaino nā feronāfake niinākafāni.

²⁸ Nāskafata Jesús pexe mēra ikikainano, anoxō a aōxō tāpimisfāfe a fisti yōkanifo: “Akka, ¿afeskakīri nō niafaka yōshi chaka potatiromamē?” ixō yōkaifono, ²⁹ Jesús ato kemani: “Na keskara niafaka mā potakī Epa Nios kīfita fonī teneyanā Nios shinākī mā potatiro. Akka mā askayamaxō mā potatiroma,” ato fani.

*Anā Jesús ato yoini: “Chipo ea retexikani,” ixō
(Mt. 17.22-23; Lc. 9.43-45)*

³⁰⁻³¹ Nāskata Jesús nānoax a aōxō tāpimisfo fe kakī Galilea finōfaini. Akka Jesús ato tāpimakaspani, “Ea tāpiyamanōfora,” ixō. A aōxō tāpimisfoosmāi ato tāpimakī iskafakī ato yoini: “Ea achikaxō āto xanīfofo ano ea iyoxikani, afāfe ea retenōfo. Akka ea retēfiafono tres nia oxata ē anā ototii,” ato faito, ³² tsōa tāpinima a ato yoiai keskara. Yōkapai akikī ranonifo.

*“Akka, ¿tsoakaimē sharafinakōia?” inifo
(Mt. 18.1-5; Lc. 9.46-48)*

³³ Nāskata pexe rasi Capernaúm ano nokonifo. Nā pexe anoaxō Jesús ato yōkani: “¿Afeskai fai anoax mā feratenāmē?” ato faino, ³⁴ tsoa tooxinima, akka fai nēxpakīanoax feratenāi iskakanax: “¿Tsoakai sharafinakoīamē?” ikanax.

³⁵ Nāskakē Jesús tsaoxō a aōxō tāpimisfo doce kenaxō ato yoini: “Fatora fētsa ato finōpai nā yorafāfe āto ina keskara itiro, nāskakē keyokōi ato axosharakōitiro,” ixō ato yoini.

³⁶ Nāskata ato nēxpakīa fake yome nīchita, chishtoinīfōfā ato yoini: ³⁷ “Akka fatora fētsa ēfe aneōxō na fake yome noikī nāatori ea noisharakōi. Nā ea noisharaito ea fisti noima, nā ea nīchiniri noisharai,” ixō Jesús ato yoini.

Fētsa noko noikaspatama noko sharafai

(Mt. 10.42; Lc. 9.49-50)

³⁸ Ato askafaito Juan yoini: “Maestro, mā nō ōia oa feronāfake fistichi mī aneōxō niāfaca chaka potaito. Nāskakē mī nofe rafemismakī, askafayamafe mī yorafo makinooa niāfaca potatiromakī nō faa,” faito, ³⁹ Jesús kemani iskafakī: “Askafayamakāfe. Akka nā ēfe aneōxō afama mīshtifo faxō chipo ea chakafakī mekafatiroma. ⁴⁰ A noko chakafakī mekafaima, nofe rafesharai. ⁴¹ Akka fētsa mato shinākī, nato Cristo Ifofakī ixō mato faka ayamanaito, askara Niospa afara ināsharatiro. Chanīmakoī ē mato yoi,” ixō ato yoini.

Noko fētsa afara chakafamaino āfenā mesekōi itiro

(Mt. 18.6-9; Lc. 17.1-2)

⁴² Anā Jesús ato yoini iskafakī: “Na fakefāfe ea chanīmara faifono, fatorafāfe ato afara chakafamaifono, tokirinīfaya tenextifaxō fakafā nōafā mēra mā ato potatiro ato anā afaa chakafamanōfoma. ⁴³⁻⁴⁴ Akka māto mēkemā mato afara chakafamaino mextemekāfe. Akka mā mā mextemeax Epa Nios ari mā katiro afe nīpaxakī. Akka mifi rafeyaxō mā afara chakafaax chiifā xoisai mēranoax mā omiskōipakenaka, a chiifā nokanakama anoax. Anoax xenafo nayamaino, chiiri nokanakama anoax. ⁴⁵⁻⁴⁶ Askatari mī tae mia afara chakafamaino oxtemefe. Akka mā mī oxtemeax Epa Nios ari mī katiro afe ipaxakī. Akka mī oxtemeamax tae rafeyax chiifā mēranoax mī omiskōipakenaka, anoax xenafo nayamaino, chiiri nokanakama anoax. ⁴⁷ Askatari mī fero mia afara chakafamakē tsekafe. Nāskax mī fero fistiax Epa Nios xanīfo ano mī katiroki. Akka mī fero rafeyax chiifā mēranoax mī omiskōipakenaka. ⁴⁸ Anoax xenafo nayamaino chiiri nokanakama anoax.

⁴⁹ “Nāskakē chiifā mēranoax keyokōi omiskōipakenakafo. ⁵⁰ Akka tashi shara. Akka mā nami tashiya ayamaxō, afeska faxō mā anā sharafatiromē, mā anā sharafatiroma, chakanatiro. Nāskakē oa tashi keskara ikāfe isharakōiax. Fetsafo ato yoisharaxikakī anā afaa chakafanōfoma.”

10

Feronāfake āfe āfi fe enenātirofoōnoa Jesús ato yoini

(Mt. 19.1-12; Lc. 16.18)

¹ Nāskata Jesús Capernaúm anoax tsekekainax Judea mai ano kani. Nā Jordán faka ketokonō, nānoxō anā yorafo ichanāfaxō anā ato yoini, ato yoisim keskafakī. ² Ato yoikī askafaino fariseofo Jesús ano fenifo. Akiki fēkaxō chakafakī mekamapaikani. Nāskaxō yōkanifo iskafakī: “Nōko xinifāfe Niospa meka yoikī kenenifo keskafakī, ¿feronāfāke āfe āfi enepaikī enetiromē?” ixō yōkaifono, ³ Jesús ato kemani: “Moisés mato kirika kenexokī, ¿fanīri mato yoinimē?” ato faito, iskafakī yoinifo: ⁴ “Moisés kenekī iskafani: ‘Fētsa āfe āfi enepaikī taefakī kirika kenexotiro iskafakī: ‘Ē mia anā fiima, mī anā ēfe āfi

ikima,” i xō mā yoitiro noko fani,” i xō yoiainfono, ⁵ Jesús ato kemani iskafakī: “Moisés iskafakī mato yoini: ‘Mākai afaa tāpiama māto ōiti kerexkōi,’ i xō mato yoini. ⁶ Akka taekōifakī, Niospa feronāfake yafi kēro onifani. ⁷⁻⁸ Nāskakē feronāfake mā āfiyax āfe apa yafi āfe afa makinoax paxkatiro āfi fe fianāxiki. Nāskakē āfe āfi fe yora fisti keskara itirofo. Nāskakē anā yora rafema, yora fisti keskara ikani āfe āfi fe. ⁹ Nāskakē feronāfake āfe āfi enetiroma Niospamāi ato fianāmano,” i xō ato yoita, ¹⁰ mā pexe mēra ikiano, anā a aōxō tāpimisfāfe yōkanifo: “A mī yorafo rama yoiyai keskara nokori yoife,” faifono, ¹¹ Jesús ato yoini iskafakī: “Akka fētsa āfe āfi enexō kēro fetsa fixō afe ikī a fikī taefani chakafai. ¹² Askatari feronāfake āfe āfi enexō fetsa fixō fetsa fe ikī āfe āfi chakafai,” i xō Jesús ato yoini.

*Jesús fakefo chishtoxō ato māmāyanā ato Epa Nios kīfixopakeni
(Mt. 19.13-15; Lc. 18.15-17)*

¹³ Askatari yorafāfe āto fakefo Jesúsiki efenifo ato māmāpakeyanā ato Epa Nios kīfixonō. Akka a Jesúsxō tāpimisfāfe ato iskafanifo: “Māto fakefo efexō nōko Ifo fekaxtefayamakāfe,” ato faifono, ¹⁴ nikakī Jesús ato iskafani: “Ato enekāfe na fakefo ekeki fenōfo, ato nētefayamakāfe. Ēfe Epa Nios xanīfo ika ari na fakefo keskarakōifoki,” i xō ato yoini.

¹⁵ “Ē mato pāraima, mā Epa Nios xanīfo nikayamax na fakefāfe ea nikaifo keskafakī, Epa Nios xanīfo ika ari mā katiroma,” i xō ato yoita, ¹⁶ fakefo chishtoinīfōfā ato māmāpakeyanā: “Epa Niospa, na fakefo sharafafe,” fani.

*Feronāfake naetapa kori ichapayax Jesús fe mekani
(Mt. 19.16-30; Lc. 18.18-30)*

¹⁷ Mā askafata mā Jesús kaino feronāfake fetsa ichoax akiki nokoni. Mā akiki nokoxō ratokonō mai chachipakefōfā yōkani iskafakī: “Maestro mī sharaki, ea yoife ē afaa afeskatiromakī Nios xanīfo fe ipaxakī,” i xō yōkaito, ¹⁸ Jesús kemani: “¿Afeskakī sharara mī ea faimē? Akka Nios fisti shara. ¹⁹ Niospa shināmanaino a Moisés yoini keskara mā mī tāpia. Iskafakī yoini: ‘Ato reteyamakāfe, askatari māto āfima chotayamakāfe, askatari kēromāri māto fenema chotamayamakāfe, askatari atoki yometsoyamakāfe, askatari chanī yoiyamakāfe, askatari mā kaxpa ato pārayamakāfe, askatari māto epa yafi māto efa nikasharakōikāfe,’ i xō Jesús yoini.

²⁰ Askafaito nā feronāfake kemani iskafakī: “Maestro, nā mīa yoiyai keskara mē nikamis yomexō,” faito, ²¹ nikakī Jesús ōiyanā aō noiyānā iskafakī kemani: “Nāno afara fisti mī tāpiama. Kaxō mī afarafo minixō kori fixō nā afaamaisfo ato ināketsatāfe. Nāskakē nai mēranoax afama mīxōtifoya mī ixikāi. Mā mī kori ato ināketsata anā oxi ea Ifofasharafe,” i xō yoini.

²² Askafaito nikai nā feronāfake shināchakakōi tooxinima kori ichapayamāiyaxō ato inākaspai. Nāskax Jesús makinoax kani.

²³ Nāskaito Jesús aa kemataima ōiakexō, aōxō tāpimisfo yoini iskafakī: “A yora afama mīshiti ichapaya Nios xanīfo ano katiroma, fekax pishta,” i xō ato yoiaito, ²⁴ nikakakī āfe inafāfe: “Kee, āfe meka nō tāpitiro,” i xō tāpipainifo. Askaifono anā Jesús ato yoini iskafakī: “Ēfe fakefāfe, fekax pishta afama mīshitifoya ikatsaxakī mā Nios Ifofapaia. ²⁵ Māraki camello akoja kini mēra ikipaifi ikitiro, fekaxkōi efapamāiax. Nāskarari yora afama mīshiti ichapayato Nios Ifofapai, fekaxkōi āfe afama mīshitifomāi potakaspakī,” i xō Jesús ato yoini.

²⁶ Ato askafaito nikakakī a aōxō tāpimisfāfe tāpipainifo. “¡Kee! ¿Afeskax nō Nios fe ipaxatiromē?” ikanax yoinānifo.

²⁷ Askaifāfe ōikī Jesús ato yoini: “Yorafokai āa ifimetirofoma. Nios fistichi yorafo ifitiro. Niospa afama mīshtifo fatiro, yorafāfe atiroma keskara,” ixō ato yoini.

²⁸ Ato askafaito nikakī Pedro yoini: “Ifo, nō mefe okī nōko afama mīshtifo nō ōiferani nō mefe oni,” faito, ²⁹ Jesús kemani iskafakī: “Ē mato paraima, fētsa eōxō ēfe meka sharaōnoa ato yoikakī āfe pexe ōifaini, āfe onefetsafori ōifaini, āfe poifori ōifaini, āfe apari ōifaini, āfe afari ōifaini, āfe fakefori ōifaini, āfe tareri ōifaini, ³⁰ nāato niyoxō afama mīshtifo fitiro, Niospa ināino, pexefoya ita, onefetsafoya ita, poifoya ita, afafoya ita, fakefoya ita, tarefoya ita itiro. Nāfo Niospa ināsharafiano omiskōixii. Nāskafiax chipo Epa Nios fe ipanaka. ³¹ Akka iskaratīa yora ichapafāfe ato finōpaikani, nō finakōiara ikaxō, akka chipo fenotirofo. Akka a ato finōpaiyamaifo iskaratīa Niospa ato finakōia imaino Nios fe ipanakafo,” ixō ato yoini.

Anā Jesús ato yoini: “Mā chaima ea retekanira,” ixō (Mt. 20.17-19; Lc. 18.31-34)

³² Askafakī ato yoita Jerusalén ari kani. Jesús rekē kaino aōxō tāpimisfo acho fonifo. “Kee, ¿afeskai nōko Ifo Jerusalén ano kaimē?” ikanax ratekōinifo. Nāskaifono a aōxō tāpimisfo tii ato kenaxō Jesús ato yoini iskafakī: “Iskaratīa afaa afeskaimākai ē mato yoinō. ³³ Mā mā ōikai, iskaratīa Jerusalén ano nō māpei kaikai. Nānoxō ea achikaxō a ato Nios kifixomis xanīfofo yafi a Moisés yoikī kirika keneni keskara ato tāpimamisfo ea ato inākani kiki. Anoxō ea iskafakani: ‘Na Jesús ato chakafamiskī retekāfe,’ ixō ea yoikāta, yora fetsafo ano ea iyokani afāfe ea retenōfo. ³⁴ Nāfāfe ea kaxemetsama fayanā, ekeki kemo mechoketsayanā ea koshaketsakata ea retekani. Akka ea askafafiafono tres nia oxata ē otōxii,” ixō ato yoini.

Santiago feta Juan Jesús yōkanifo afe xanīfo ipaikakī (Mt. 20.20-28)

³⁵ Santiago fe Juan, Zebedeo fake rafe ini. Nā rafeta Jesús ano fōkaxō iskafakī yoinifo: “Maestro, na nō mia yoiai keskafakī noko axōfe, nō mia yōkaikai,” faifono, ³⁶ ato yōkani: “¿Ē mato afaa afeska faxotirofomē?” ato faito, ³⁷ anā yoinifo iskafakakī: “Mī xanīfokōikī nokori xanīfo imafe, nō mefe xanīfo inō. Takai fetsa ē tsaofaino, takai fetsari ēfe ochi tsaonō,” faifono, ³⁸ Jesús ato yoini iskafakī: “Na mā ea yōkai keskara mā tāpiama. ¿Na ē omiskōiai keskai māri mā omiskōitirofomē?” ato faino, ³⁹ kemanifo iskafakakī: “Ēje, nōri nō tenetiro,” faifono, Jesús ato yoini iskafakī: “Chanīma, nā ē teneai keskafakīri, mā tenetiro omiskōifinakōifikī. ⁴⁰ Akka efe ketaxamei tsaopai tsoa efe ketaxamei tsaotirofoma. Ēfe Epa Nios fistichi tāpia. Nā Epa Niospa katoafo ano efe tsaotirofo,” ixō ato kemani.

⁴¹ Askafaiāfe nikakani a aōxō tāpimisfo diez atoki ōitifishkinifo, Santiago yafi Juan mepaikani.

⁴² Askaifono akka Jesús ato kenaxō ato yoini iskafakī: “Mā mā tāpia, yora fetsafo xanīfokaxō fāsikōi mekayanā ato yonomamisfo. A xanīfo fe rafeafāferi ato yoimisfo iskafakakī: ‘Nōri mātō xanīfo. Nō mato yoiaito mā noko afara axorisafatiro,’ ixō fāsikōi ato yoimisfo. ⁴³⁻⁴⁴ Akka mā ranā askayamakāfe. Askatamaroko fatora fetsa mā xanīfo ipai, ato yonoxomis keskara mā itiro.

⁴⁵ Akka ēri anori shināima, ēfe Epa Nios ariax ē nāmā fotonī feronāfakekōi

ixiki, ē Niospa Fakefekē ea afara axonōfo ē onima. Askatamaroko fetsafo ē ato afara sharafaxoxiki ē oni. Ē atoōnoax naxiki ē oni. Satanás chaka āto ifo inōma ē oni,” ixō Jesús ato yoini.

Jesús Bartimeo fēxokē sharafani
(Mt. 20.29-34; Lc. 18.35-43)

⁴⁶ Nāskata Jericó pexe rasi ano nokonifo. Nānoax mā Jesús tsekekainaino, aōxō tāpimisfo fe yōrafā rasi afe fonifo. Fokākī yora fēxo fai ketokonō tsoaofichinifo, āfe ane Bartimeo, Timeo fake ini. Nāno fai ketokonō tsoaxō ato kori yōkatiani ini. ⁴⁷ Nāno fai ketokonō tsoaxō nā fēxo nikani Jesús Nazarete anoa kafani faifāfe. Nāskafaifāfe nikai nā fēxo fāsikōi fiisini, iskafakī yoini: “¡Jesús mīfi David fenaki, ea shināfe!” fani.

⁴⁸ Askafaito, “Nōko Ifo fekaxtefayamafe,” fanifo. Askafafiaifono fāsikōi fiisini, iskani: “¡David fenapa, ea shināfe!” faito nikai.

⁴⁹ Nāskakē Jesús nēteakekafā ato yoini iskafakī: “Ea kenaxokāfe,” ato faino, kenanifo iskafakī yoianā: “Inimayanā fininākakāfe, Jesús mia kenakī,” ixō yoiaifono, ⁵⁰ nikakī āfe tari rashkita potata koshikōi niinākakāfe ichotiri ichotiri ita Jesús ano oni.

⁵¹ Mā akiki oano Jesús yōkani: “¿Ē mia afeska fanō ea mīa yōkamē?” faito, nā fēxo kemani: “Maestro, ēfe fero ē sharafapai,” faino, ⁵² Jesús yoini iskafakī: “Mā mī katiro, ea chanīmara faax, mā mī sharaki,” fani. Naskafaino nā fēxo ōisharakōitani. Mā sharaxō Jesús fāi kaino chīfafaini.

11

Jesús nokoni Jerusalén ano
(Mt. 21.1-11; Lc. 19.28-40; Jn. 12.12-19)

¹ Nāskata Jesús fe fokakī Jerusalén chaima fonifo. Nāno pexe rasi Betfagē fe Betania chaima ini, machi Olivos ano. Nānoxō Jesús a aōxō tāpimis rafe nīchini. ² Ato iskafakī yoianā: “Mēstekōi fotakāfe oa ono pexe rasi ano. Nāno mā nokoxō mā fichi kaikai burro fake nexekē tsoa aō nimisma. Tēpexō ea efexotakāfe. ³ Anoxō mato yōkaifono iskafakakī: ‘¿Afeskakī mā burro tēpeimē?’ mato faifono, iskafakī ato yoikāfe: ‘Nōko Ifāfe fichipaiyaito nō ifixoniyoa, samama mato nīchixonī kiki,’ ixō ato yoikāfe,” Jesús a aōxō tāpimis rafe fani.

⁴ Askata mā fōkaxō fichitoshinifo burro pexe fepoti ano nexekē emāiti fainaki fichixō tēpexō efenifo.

⁵ Nā ano ikafāfe ato iskafanifo: “¿Afaa mā afeskafaimē? ¿Afeskakī mā burro tēpeimē?” ato faifono, ⁶ nā Jesús ato yoia keskafakī ato kemanifo: “Ia. Iyoxotakāfe,” ato fanifo. ⁷ Nāskata Jesús ano burro efekāta, āfe kate kamaki āto rapati kakafanifo. Nāskafafono a kamaki Jesús tsoainākakāfani. ⁸ Akka mā Jesús kaino yorafāfe āto rapatifoya epe peifo xatekaxō kakafaxō fonifo akiki inimakakī.

⁹ Akka nā rekē foaifāfe a acho foaifo fāsikōi tai taifonifo. Iskafa fonifo: “¡Aicho, nā sharafinakōia nokoki oi kiki, nōko Ifo Niospa nokoki nīchiano!

¹⁰ Nōko xini David xanīfo ipaoni keskai, mīri nōko xanīfo ixiki oa. ¡Aicho! ¡Nios sharakōi!” ixō yoinifo.

¹¹ Nāskata Jesús mā Jerusalén ano nokoax, Nios kīfiti pexefā mēra ikixō, a mēranoafo ōifofāsafani. Nāskata nānoax tsekekaini kaax a aōxō tāpimisfo docefo fe Betania ano kani, mā yātapakeaino.

“Fana higuera, mī anā fiminakama,” Jesús fani
(Mt. 21.18-19)

¹² Pena fetsa mā Betania anoax okī Jesús mea fonāikōi fini. ¹³ Nāskakē chai ixō fana higo nikē ōini, peifoya ini. Kaxō ōini fimiyamakī, akka kaxō ōia fimiya inima āfe peifos ini. Nā fimiyamaitīa ōini. ¹⁴ Nāskakē Jesús fana higo yoikī iskafani: “Anā tsōa mī fimi pinakama,” faito, āfe inafāfe nikanifo.

Jesús a Nios kīfiti pexefā mēraxō a ato ināifo ato potani
(Mt. 21.12-17; Lc. 19.45-48; Jn. 2.13-22)

¹⁵⁻¹⁶ Nāskata anā Jerusalén ano nokonifo. Nānoax Jesús anā Nios kīfiti pexefā mēra ikitoshini. Ikitoshixō ōia a mēraxō afafo ato miniaifono xafakīa ato kāimani, a ato flaifori askafani xafakīa kāimakī. A ato kori ināifo anoari mīsafo ato pōtaketsani, askatari a ato rifi miniaifo anoari āto tsaotifori ato pōtaketsani. “Nā Nios kīfiti pexefā mēraxō tsōa afafo ato inātiroma,” ixō fāsi mekainākakā ato yoini. ¹⁷ Ato tāpimakī iskafakī ato yoini: “Niospa meka yoikī iskafakī kirikaki kenenifo: ‘Na ēfe pexefā anoxō keyokōichi nā maitio ano ikafāfe ea kīfitirofo,’ ixō kenefinifono, akka nā yometsofāfe pexe keskara mā famis,” ixō ato yoini.

¹⁸ Ato askafaito, a ato Nios kīfixomis xanīfofo feta, a Moisés yoikī kirika keneni keskara ato tāpimamisfāfe nikanifo. Nāskakē afeskaxoma Jesús retepainifo, retepaifikani mesenifo, yorafāfemāi nikakōiaifono a yoiai keskara, “Aira, nā keskara meka nō nikamisma, āfe meka sharakōi,” ikaxō. ¹⁹ Akka mā fakishaino Jesús a aōxō tāpimisfo fe Jerusalén anoax anā kani.

Fana higuera xanani
(Mt. 21.20-22)

²⁰ Askano anā pena fetsa finōfāikakī ōinifo, nā fana higuera mā xanano āfe tapofoya. ²¹ Nāskakē Pedro shinākī Jesús yoini iskafakī: “Maestro, ōipo na higuera mī kamafofāita mā xana,” faito, ²² Jesús kemakī iskafakī: “Nios nikakōikāfe,” ato fani. ²³ “Akka ē mato pāraima. Māto ōiti mēraxō mā Nios nikakōixō na māchifā mā yoikī iskafatiro: ‘Nonoax tsekekainax fakafā mēra paketāfe,’ mā faino fakafā mēra paketiro. Nā mā yoiai keskai nāskakōitiro. ²⁴ Nāskakē ē mato yoi, afara mā fichipaikī mā Epa Nios chanīmara faxō mā kīfaiato mato inātiroma, mātonā inō. ²⁵ Akka mā Epa Nios kīfikī, fetsaki mā ōitifishki iyoxō ikisi raefayokāfe, Epa Nios nai mēranoato māto chaka mato soaxonō. ²⁶ Akka mā fetsafo raefayamaito, matori Epa Niospa nai mēraxō māto chakafo mato soaxotiroma,” Jesús ato fani.

“¿Tsōa mia nīchinimē mī xanīfo inō?” ixō Jesús yōkanifo anoxō achipaikakī
(Mt. 21.23-27; Lc. 20.1-8)

²⁷ Nāskata Jerusalén ano anā fenifo. Nānoax Nios kīfiti pexefā mēra Jesús kafāsaino, nāno akiki fenifo. A ato Nios kīfixomisfāfe āto xanīfofo fe, a Moisés yoikī kirika keneni keskara ato tāpimamisfo, judeofāfe āto xanīfofori fenifo. ²⁸ Anoxō yōkanifo iskafakakī: “¿Tsōaōxō mī iskafaimē, tsōa mia yoiamē mī iskafanō?” ixō yōkaifono, ²⁹⁻³⁰ Jesús ato kemani iskafakī: “Ēri mato yōkanō ea yoikapo ē nikanō. Ea mā yoiaito ē mato yoikai tsōaōxō ē iskafaimākai. Akka, ¿tsōa Juan nīchinimē ato maotisafakī ato faka mēra ikimapakenō? Niospa nīchiyamakī yorafāfe nīchiniforaka ea yoikapo,” ³¹ ato faino āa ranā mēnēnāpaiyanā iskanifo: “Nō kemakī iskafaino: ‘Niospa nīchini,’ nō faino noko yoikī iskafai: ‘Akka, ¿afesakī mā Juan nikamismamē?’” ³² Akka nō iskafakī yoitiroma: ‘Yorafāfe Juan nīchinifo,’ ixō nō yoitiroma, yorafoki nō mesei nokoki ōitifishki itirofo.” Akka yorafāfe keyokōichi tāpiafo Niospa shināmanaino Juan ato yoipaoni.

³³ Nāskakē yoikī iskafanifo: “Nō tāpiama tsōara Juan nīchini,” faifono, Jesúsri ato yoikī iskafani: “Ēri mato yoitiro ma tsōaōxō ē iskafaimākai,” ixō ato yoini.

12

Meka fetsafaxō Jesús ato yoini a ato yonoxomis chakafoōnoa (Mt. 21.33-46; Lc. 20.9-19)

¹ Anā Jesús ato yoini meka fetsafaxō iskafakī: “Feronāfake fētsa āfe tare ano uva fanani. Fanaxō akiki keneakeni. Akiki keneakexō mai pōkini a mēraxō uva tsinīxiki. Askatari pexe keya fani anoxō kexexiki tsōa mēeyamanō. Mā askafakī fetsaxō a ano yonofaifo ato ināyoni. Nāskafata mai fetsa ari kayoni. ² Nā fimimistīa mā āfe fana pachiaino, āfe ifāfe a yonoxomis nīchini, a kexexonafo ato yōkaxō āfe fana fimifo fixotanō nā āfenā tiiri. ³ Akka āfe kaifo fichikaxō nā fana kexeafāfe achikaxō seteketsakaxō, afaa inākaxoma afaa-maīskōi nīchinifo. ⁴ Nāskata nā tare ifāfe anā a yonoxomis fetsa nīchini. Akka nāri īchaketsayanā tokirinī mapoki tsakakī imi tofeketsafono oni. ⁵ Nāskano afianā fetsari nīchiano nāa retenifo. Mā reteafono ranāfaxō ato nīchini, nāfori ato seteketsayanā, ranāri ato retenifo.

⁶ “Mā ato askafafono, nāno āfe fake fisti ini, nā aō noikōiai. Nāskakē chipokōi fakī āfe fake nīchini: ‘Ēfe fake nikatirofokī,’ ixō. ⁷ Akka mā āfe fake nīchia kaito fichikanax nā tare kexemisfo yoinānifo iskakani: ‘Nato āfe apa naano na fanafo fixii kiki, a nari nō retenō na tare nōkonā inō,’” ikanax yoinānifo. ⁸ Nāskakē achikaxō mā retexaxō tare pasotai potanifo.

⁹ Nāskakē Jesús ato yōkani: “Akka, ¿a tare ifāfe ato afeska fatiromē? Kaxō a tare kexemisfo ato retēkī mitoxō fetsafo āfe tare inātiro afāfe kexexonōfo,” ixō Jesús ato yoini.

¹⁰⁻¹¹ “Akka, ¿a kirika kenekī iskafanifo mā anemismamē?:

Tokiri pexe fapaikakī nā pexe famisfāfe na tokiri chakara ixō potafono, fetsafāfe fichixō na tokiri sharakōi ikaxō akiki pexe fatirofo. Nāskarifiakī xanīfofofāfe, ‘Nakai afama,’ ikaxō Niospa Fake ōikaspamisfo. Askafafiaifono Niospa āfe Fake katoni nōko Ifo inō. Nāskakē nō akiki inimakōi, ixō kirika ano kenenifo,” Jesús ato fani.

¹² Nāskakē Jesús achikaxō karaxa mēra ikimapainifo, mā tāpikaxō meka fetsafaxō atoōnoa yoiaito. Akka achipaifikani yorafoki mesekani a makinoax fonifo.

“¿Xanīfo nō kori inātiro mē noko yōkaito?” ixō Jesús yōkanifo (Mt. 22.15-22; Lc. 20.20-26)

¹³ Nāskakē chipo fariseofāfe Herodes feta afe yorāfo Jesús ano nīchinifo, fanīrira Jesús ato yoiaito afāfe yōanōfo āto xanīfofo yoikakī. ¹⁴ Nāskakē mā akiki fēkaxō nāfāfe yōkanifo iskafakakī: “Maestro, mā nō tāpia a mī yoiaī anori chanīmakōi mī yoimis. Epa Niospa noko shināmapaiyai anorikōi mēstekōi mī noko yoimis. Afara yoipai mī ranomisma, afarikai mī fomāmisma, na yorāfāfe yoiaifo anori mī nikatama, a shināifo anori mī shināmisma. Askatamaroko Epa Niospa meka shara mēstekōi mī yoimis. Akka chanīmamakī noko yoife na romanō xanīfo nō kopifatiromakī askayamakī nō kopifatiroma rakikā,” ixō yōkaifono, ¹⁵ Jesús tāpini feparapaiyaifāfe, nāskaxō ato yoini iskafakī: “¿Afeskakī mā ēa feparapaimē?” ato fata, “Ea kori exe fisti fēxokāfe, ē ōinō,” ato faino, ¹⁶ kori exe fisti fēxofafono, nā kori exe ōiyānā Jesús ato yōkani: “¿Tsōa femānā na keskaramē? ¿Tsōa aneri na kori exe ano keneamē?” ato faino, kemanifo iskafakakī: “Nōko xanīfo Cēsar keskara,” faifono, ¹⁷ Jesús

ato yoini iskafakī: “Akka na kori exe Césarnākē César inākāfe, akka Niosnākē Niosri inākāfe,” ato faino, “¡Kee! ¡Nikakapo! Āfe meka finakōia tsōakai finōtiroma,” ikanax rateyanā yoinānifo.

*“Yora naax anā otoax, ¿afeskatiromē?” ixō Jesús yōkanifo
(Mt. 22.23-33; Lc. 20.27-40)*

¹⁸ Nāskakē saduceofo Jesús ōifokani fonifo. Nā saduceofāfe yoimisfo iskafakakī: “Yora naaxkai anā afeskax ototiroma,” ixō yoimisfo. Nāskakē mā fokaxō yōkanifo iskafakakī:

¹⁹ “Maestro, Moisés noko kirika kenexoni iskafakī yoikī: ‘Feronāfake fetsa āfiyax natiro afeta fake akamax, akka nā kēro ifomafa onefetsa fitiro, afeta fake axiki nā fake nā onefetsa naitanā inō.’ ²⁰ Akka nā nane tii siete feronāfake inifo. Āto ochi iyoa āfiyai taeni, mā āfiyax afeta fake akamax nani. ²¹ Nāskata nāa chipoko fētsa nā kēro ifomafa fini. Nāskarīfai nāari nani afeta fake akamax. Afianā chipoko fētsari fini, nāari nani afeta fake akamax. ²² Nāskakē nā siete feronāfakefāfe nā kēro fīpakanax, afeta fake akanamax nai keyonifo. Chipokōitani nā kērori nani.

²³ “Nāskakē mā otokaxō, ¿fatoto nā kēro fiximē, nā fistimāi fīpakaxō?” ixō yōkaifono, ²⁴ Jesús ato kemani: “Māakai afaa tāpīama. Na Niospa meka yoikī kenenifokairoko mā ōikatsaxakī. Niospa āfe sharaōnoari mā ōimisma. ²⁵ Yorafo nakanax mā anā otokanax, anā āfiyatirofoma, anāri āto āfi feta fake atirofoma. Askatamaroko nā ājiri nai mēranoafo keskara itirofo. ²⁶⁻²⁷ Akka, ¿a yorafo nakanax anā otokiaifōnoa yoikī Moisés kirika kenekī yoiniōnoa mā anemismamē? Niospa fana koofai mēraxō Moisés yoini iskafakī: ‘Ēfi mī xinifāfe āto Nioskōi, Abraham ikaino, Isaaca ikaino, Jacobo ikaino,’ ixō Niospa yoini. Akka Niospa naafoma keskara ato ōi, aōnoax keyokōi niafono. Akka māakai afaa tāpīama mā mā chanīmis,” ixō Jesús ato yoini.

*“Akka, ¿fato meka sharafinakōiamē, nā Niospa shināmanaino Moisés ato yoiniraka?” ikaxō fariseofāfe Jesús yōkanifo
(Mt. 22.34-40)*

²⁸ A Moisés yoikī kirika keneni keskara ato tāpimamis Jesús ano nokoni, Jesús anoax ato fe yoināno māmāi tāpixō Jesúsmai ato kemasharakōiaino. Nāskaxō akairi yōkani: “Akka, ¿fato meka sharafinakōiamē, nā Niospa shināmanaino Moisés keneniraka sharafinakōia?” ixō yōkaito, ²⁹ Jesús kemani iskafakī: “Niospa yoini iskafakī: ‘A sharafinakōia ē mia yoinō nikapo. Nā israelifo nikasharafe, nōko Ifo Nios fisti nōko Ifokī anā ano fetsamaki. ³⁰ Nōko Ifo Nios noisharakōikāfe nōko ōitifoayō, nōko yōshi sharafoyaxori noikāfe. Nōko mapo mēraxori shināsharakāfe, nōko kerex sharafoyaxō,’ ixō nā meka shara Moisés keneni. ³¹ Nā ē mato tafekāi yoia keskarari nāno fetsari. ‘Nā mato chaima nikari noisharakōikāfe a mā mā noimesharakōiai keskafakāfe.’ Na meka rafe sharafinakōia Niospa yoini,” ixō Jesús ato yoini.

³² Naskafaito a Moisés yoikī kirika keneni keskara ato tāpimamisto yoini iskafakī: “Mī yoikōi. Maestro, chanīmakōi mī yoimis. Nāno Nios fisti, anā ano a keskara fetsama. ³³ Askatari iskafakī mī yoia, mātō ōitifoayō Nios noikōikāfe, mātō shinā sharafoyaxori askafakāfe, mātō yōshi sharafoyaxori askafakāfe, mātō kerexfoyaxori askafakāfe, a mato chaima nikafori noisharakōikāfe, a mā mā noimeai keskafakī askatari a afarafo nō Nios inā, nāfo nō finōinīfōfana sharakōikī. A nō afara koakī nō Nios ināfori nāfori nō finōinīfōfana nōko ōitifoayō nō Nios noikōikī,” ixō mī yoia fani.

³⁴ Askafakī yoisharaito nikakī Jesús yoini iskafakī: “Epa Niospa afe yorafo imasharai keskara mīri mī tāpiax mī afe nīpanaka,” ixō yoiaito, nikakakī tsoa anā tooxinima. Askata anā tsōa yōkanima.

*“Akka, ¿tsōa fenamē Cristo?” ixō Jesús ato yōkani
(Mt. 22.41-46; Lc. 20.41-44)*

³⁵ Jesús Nios kīfīti pexefā mēraxō ato tāpimayanā ato yōkani iskafakī: “Akka, ¿afeskakī a Moisés yoikī kirika keneni keskara ato tāpimamisfāfe na Cristo David āfe fenara fakanimē? ³⁶ Akka Niospa Yōshi Sharapa shināmanaino nā David yoini iskafakī:

Epa Niospa ēfe Ifo yoini iskafakī: ‘Mī efe xanīfokōi īpanakaki. Akka nā mia noikaspai fo mī ato finōkōinō ē ato mī nāmā nīchikai.’

ixō Niospa yoinino David keneni.

³⁷ “Akka, ¿afeskai Cristo David āfe fena itiromē, nā David Cristo ēfe Ifora fafiapaonino?”

Nāskakē yōrafā rasi inimanifo Jesús ato yoiaito nikakani.

*Jesús ato yōani a Moisés yoikī kirika keneni keskara ato tāpimamisfāfe anorima ato yoiaifono
(Mt. 23.1-36; Lc. 11.37-54; 20.45-47)*

³⁸ Nāskano Jesús ato yoianā iskafakī ato yoini: “Ōisharakakī a Moisés yoikī kirika keneni keskara ato tāpimamisfo tari chainipa safekanax fofāsamisfoki, askatari nafāfe tāpikōiara noko fanōfora ipaikani. Yora ichapafo ano fofāsapaimisfo noko yoisharakōinōra ikanax, nāfo kakapaimisfo. ³⁹ Nāfāfe ichanāti pe xe mēraxō tsaoti sharakōi fenamisfo noko ōinōfora ikaxō. A piaifo anoaxri ano tsaopaikakī sharakōi ano tsaopaimisfo. ⁴⁰ Nāskarafāfe kēro ifomafafo ato pe xe fiamisfo, nō mato Nios kīfixonira ikaxō chaikōi Nios kīfimisfo atoki kaxemetsamapaiyanā. Nāfo omiskōi finakōixikani Epa Niospa ato omiskōimanaino,” ixō Jesús ato yoini.

*Kēro ifomafa afaamais fixō Epa Nios ināsharakōini
(Lc. 21.1-4)*

⁴¹ Nāskata Jesús tsaoxō ōini yorafāfe a kori naneti mēra kori naneifāfe Nios kīfīti pexefā mēraxō. Akka nā afama mīshti ichapayafāfe kori naneti mēra kori ichapa nanenifo. ⁴² Nāskafaifono nāno kēro ifomafa nokoni. Nā kēro ifomafa afaamais fixō āfe kori exe rafe nā kori naneti mēra āfe kori nanekī mitofaito Jesús ōini.

⁴³⁻⁴⁴ Nāskafaito ōikī Jesús aōxō tāpimisfo kenaxō iskafakī ato yoini: “Chanīma ē mato yoikōi, nā kēro ifomafa afaamaisfixō fetsafo finōmainīfofā āfe kori exe rafe nā kori naneti mēra nanea. Akka nā kori ichapayafāfe nā kori naneti mēra mā āto kori nanefikakī tsōa keyo naneama. Akka nā kēro ifomafa afaamaisfixō nā kori naneti mēra āfe kori nanekī mitokōia. Nāskakē a pai anā afanā fitiroma,” ixō Jesús ato yoini.

13

*Jesús ato yoini na Nios kīfīti pexefā pāoixii ixō
(Mt. 24.1-2; Lc. 21.5-6)*

¹ Mā Jesús a Nios kīfīti pexefā mēranoax tsekeano, a aōxō tāpimis fētsa yoini iskafakī: “Maestro, ōipo, nōko Nios kīfīti pexefo tokirifo petsanāmeakea sharashtakōifo,” ixō yoiaito, ² Jesús kemani iskafakī: “¿Mā mī ōimē na Nios

kīfiti pexefo? Akka, ¿na tokirifo anā petsanamexima chipo maoi fetsexii anākai na tokirifo petsanāmexima?” ixō Jesús ato yoini.

Afaa afeskaximākai mā chaima nōko mai keyoaino Jesús ato yoini (Mt. 24.3-28; Lc. 17.22-24; 21.7-24)

³ Nāskakata machi Olivos ano fonifo, anoxō òiafo Nios kīfiti pexefā chaima ini. Nāno Jesús tsoano, Pedro ikaino, Santiago ikaino, Juan ikaino, Andrés ikaino one yōkanifo tsōa ato nikayamanō iskafakakī:

⁴ “Nō tāpīpaikai noko yoife. Na mī yoiai keskai afetā iximākai, afeskaxō nō tāpitiromakī. Askayoamano afaa nō òitromakī noko tāpīmafe,” faifono, ⁵⁻⁶ Jesús ato kemani iskafakī: “Kexemesharakani mā ato nikaino mato afara chakafamatirofokī. Yora ichapafo fekani kiki, ēfe aneōnoa mato yoikī iskafakani kiki. ‘Ē Cristoki,’ ikaxō yora ichapafo ato pārāpaikani kiki.

⁷ “Akka yorafo retenāifāfe nikai rateyamakāfe. Nā ē yoiai keskai nāskakōixii. Akka fena nōko mai keyoima, chipo ixii. ⁸ Akka yorafo mai fetsa anoax mēenāpaiyaifono, yora fetsafori mā fetsa anoax retenāixikani. Nāskaifono mai fetsa anoax mā naya naya ixii. Askatari fonāiki finakōixikani afaa pikanima. Askatari mekai finakōixikani. Nāskai omiskōi taexikani.

⁹ “Akka māroko kexemesharakāfe. Mato achikaxō xanīfofo mato ināikani kiki, nāskakaxō mato koshakani kiki ichanāti pexe mēraxō. Xanīfofofāfe ferotaifi mato iyoxikani. Eōxō mato askaifono, mā ato yoisharakōixikai.

¹⁰ Akka a omiskōiaifo nokoyoamano efe ipaxanōfo ēfe meka sharaōnoa ato yoikāfe, nā mai tio anofo. ¹¹ Akka mato achikaxō mato iyoxikani, xanīfofo mato ināixikakī. Shināchakayamakāfe nō ato afaa faikaimē iyamakāfe. Mā afaa shināpaimakai, nā Niospa mato shināmpaiyai anori mā ato yoikai. Akka mā mekaimakai Niospa Yōshi Shara mekai kiki. ¹² A yorafāfe āto extofo yora fetsafo ato achimaxikani ato retenōfo. Ato apafāferi āto fakefo yora fetsafo ato achimaxikani. Nāskarifiakī āto fakefāfe āto apakōifo ato chakafakī mekafaxikani, yora fetsafāfe ato retenōfo. ¹³ Akka eōxō keyokōichi mato noikaspaixikani. Akka mato noikaspaifono mā eōnoax omiskōifiki mā ēfe meka nikasharakōiaito ē mato kexesharakōixii Epa Nios fe mā isharapakex-anō.

¹⁴ “Nā Niospa meka yoimisto Daniel a inōpokoai yoikī kirika keneni Nios kīfiti pexefā mēra afara chakakōi faxikani kiki ixō yoikī. (Nāskakē na kirika kenea anexō tāpikāfe.) Nā chakafinakōia òikanax, nā Judea anofo machi keya ano ichorisatakāfe. ¹⁵ Askatari āfe pexe māmākia tsoaxō ato fichiāx koshikōi fotopakekafā āfe afaa fiamax ichotiro. ¹⁶ Askatari a āfe tare ano yonoaito anā oxō āfe rapati fitiroma. ¹⁷ Askatari a kēro fake naneafō fe a fake yome pishta chocho amaifo omiskōixikani māmāi yorafo omiskōifinakōiaifono. ¹⁸ Askatamaroko mā Epa Nios kīfikāfe mato kexesharanō ichoxō yōtaino matsi mexikakīma. ¹⁹ Askatari a omiskōiaifo nokoxii, taeyoi askakatsax-akīma. Nā Niospa yora onifakī taefaniitā tsōa askara òiyomisma. Askatari anā tsoa chipo omiskōinakama. ²⁰ Akka a omiskōiaifo nōko Ifāfe xateyamano, tsoa nikeranama nai keyokeranifo. Akka afe yorafo ato noikī omiskōinōfoma xateni atomāi katonixakī.

²¹ “Akka fētsa mato yoikī iskafaino: ‘Ōikapo nakīa Cristo,’ mato fayanā: ‘Oa onokīa, ōikapō,’ mato faito nikayamakāfe. ²² Akka nā chanīmīso fekani, ē Cristora ixikani, nāfo nō Niosxō nō mato yoirā ikani. Nāskakaxō tsōa atiroma keskara fakani Satanās yōshixō mato pārāpaikakī. Nā Niospa ato

katoafori nāfo ato pārapaikani. ²³ Akka òisharakāfe afetiāma keyokōi mē mato yoiyomiski,” Jesús ato fani.

Niospa Fake fotoaino afe keskara iximā kai ixō Jesús ato yoini
(Mt. 24.29-35, 42-44; Lc. 21.25-36)

²⁴⁻²⁵ Anā Jesús ato yoini iskafakī: “Akka nā penatari, nā omiskōiaifo mā keyoano, xini fakishkōi ixii, oxeri anā chaxaxima. Fishifori nai mēranoax pakei fetsexii, askatari nā nai mēranoafo naya naya iki fetsexii. ²⁶ Askatari ea òixikani nai mēranoax nai kōifoya ē fotoaito sharafinakōia ēfe sharafoya ē fotoxii. ²⁷ Nāskatari ēfe ājirifo ē nīchixii a ē ato katoafo ato ichanāfatanōfo, a chai ikafo ekeki efenōfo.

²⁸ “Akka shinākapo ē mato yoinō. Mā yōkkafiaino mā tāpitiro āfe pei sirikiaito. Nāskakē āfe peifo keyopaito òikī mā tāpitiro māmāi chaima xiniaito. ²⁹ Nāskarifiakī afarafo afeskaraito òikī mā tāpitiro mē chaima oaino askai fetsexii. ³⁰ Ē mato pāraima ē mato yoikōi, na ē mato yoiai keskara nono mai anoxō yorafāfe nayokaxōma òiyokani. ³¹ Akka nai fe mai keyoi. Akka ēfe meka fisti keyonakama, nā ē mato yoiai keskakōi.

³² “Afetīara nai mēranoax ē oxii tsōakai tāpia. Nā ājirifāfe nai mēra ifiakaxō tāpiafoma. Ērikai tāpia. Ēfe Epa Nios fistichi tāpia.

³³ “Nāskakē mā itipinīsharayanā kexemesharakāfe Epa Nios kīfīyanā. Mā tāpiamaki afetiāra ē oxikai. ³⁴ Akka feronāfake fētsa fakira chaikakī, akka kayoxoma a yonoxomisfo yoini āfe pexe kexexonōfo. Nāskaxō ato yono ināketsani yononōfo, akka fētsa āfe pexe fepoti anoxō kexesharayanā mananō yoini. ³⁵⁻³⁶ Nāskarifiāi māri kexemesharakāfe, mā tāpiamaki fatora penata ē matoki nokorisatanikai. Xini kaino nokoyamata, yamenakefanaino iyamata, takaranā akaino iyamata, fakishparikōi ē matoki nokotiroki. Iskaratīa oimara ea faax mā oxakē ē mato fichitoshitiroki, nāskakē itipinīsharaxō ea yonoxosharakāfe isharakōixō. ³⁷ Nā ē mato yoiai keskafakī, keyokōi ē yorāfo yoi itipinīsharakāfe ixō ē ato yoi,” Jesús ato fani.

14

“¿Afesaxō nō Jesús retetiromē?” ixō shinānifo
(Mt. 26.1-5; Lc. 22.1-2; Jn. 11.45-53)

¹ Mā chaima oxa rafeta āto fista Pascua ikaino, nā fistatīa pāa faraxatimais pipanonifo, nā Niospa ājirinī Ejipto anoxō āto fake iyoafo rētenima shinākakī. Nāskaifono a ato Nios kīfixomisfāfe āto xanīfofo feta a Moisés yoikī kirika kenenī keskara ato tāpimamisfāfe, afeskaxoma Jesús pārapainifo pārakaxō retexikakī. ² Akka achixō retepaifikani, iskanifo: “Fistatīakai nō achitiroma yorāfā rasi mekai fetsekani nokoki òitifishkitirofo,” ikanax yoinānifo Jesús retepaifikani.

Kēromā Jesús shinākī āfe mapoki pirofomā nachini
(Mt. 26.6-13; Jn. 12.1-8)

³ Akka Jesús Betania ano ini, Simón pexe ano. Nā Simón “Rashkishiai” fapaonifo. Nāato pexe ano Jesús mīsa kamaki tsaano, nāno akiki kēro fisti onī manishomo “alabastro” foikai. Na manishomo mēra xinia pirofomā osia nanea nakas sharakōi ini, āfe ane “nardo.” Nā pirofomā kopipaekōi ini, na manishomo āfe fepoti fepexō maneakefōfā Jesús āfe mapoki nachini, nā kēromā. ⁴ Askafaito òikani nā anoafo òitifishkīyanā āa ranā yoinānifo iskakani:

“¿Afeskakī na kēromā na pirofomā sharakōi chakanafaimē? ⁵ Ato minixō, aōxō kori ichapa fixō a afaamaisfo ato inākerana,” ikaxō nā kēro feratenifo.

⁶ Askafaiifāfe ōikī Jesús ato yoini iskafakī: “Enekāfe. ¿Afeskafakī na kēro mā fekaxtefaimē? Na ea iskafai sharakī,” ato fani. ⁷ “Akka nā afaamaisfori mato fe ipanakafo, fatora penata mā ato sharafaxopaikī mā ato sharafaxotiro. Akka eakai mēxotaima mā ea anā ōima. ⁸ Akka na kēromā ea iskafakī ea sharafa. Ē nayoamano taefakī ēfe yoraki pirofomā nachia. ⁹ Ē mato pāraima, fanīxōra na meka shara eōnoa yoikakī nā mai tio anoxō na kēromā ea iskafaōnoa yoixikani. Askatari na kēroōnoa shināpakenakafo, shināmakiyamaxikakī,” ixō Jesús ato yoini.

Judaspa aōxō tāpifikatsaxakī Jesús ato achimani

(Mt. 26.14-16; Lc. 22.3-6)

¹⁰ Nāskafakī Jesús ato yoiaino nā afe rafemis fetsa nā docefo ano, nā Judas Iscariote a ato Nios kīfixomis xanīfofo fe mekaikai kani. Mā kaxō ato yoini iskafakī: “¿Afe tii mā ea kopifatiromē ē mato Jesús achixonō?” ato faito, ¹¹ nikakani inimakōiyanā yoikī iskafanifo: “Nō mia kori ichapa ināikai,” faifono, nāskakē Judaspa shināni: “Afeskaxomāi ē Jesús ato achimanō,” ixō shināni.

Mā chaima reteafono Jesús aōxō tāpimisfo feta yātapake pini

(Mt. 26.17-29; Lc. 22.7-23; Jn. 13.21-30; 1 Co. 11.23-26)

¹² Akka nā fistatīa pāa faraxatimais pipaonifo. Afia penatari Pascua fistatīa ovejanā fake retexō pinifo. Nāskano aōxō tāpimisfāfe Jesús yōkanifo. “¿Fanī mī fichipaimē ano kaxō nō itipinī fanō, anoxō Pascuatīa yātapake pixiki?” ixō yōkaifono, ¹³ nāskakē Jesús aōxō tāpimis rafe nīchini, iskafakī ato yoiyanā: “Pexe rasi ano fotakāfe. Nānoa feronāfake fisti mā fichikaikai keshoki faka tesaomexō foikaino, nā feronāfake fe fōtakāfe. ¹⁴ Akka nā feronāfake ikiai ano afe ikixō, nānoa pexe ifo yōkakāfe iskafakī: ‘Nōko Maestro noko yoikī iskafaa: ‘Nā pexe ifo yōkakāfe, ¿Fato kene mēraxō Pascua fistatīa eōxō tāpimisfo feta yātapake ē pitiromākī?’ ixō yōkakāfe.’ ¹⁵ Mā askafakī yōkaito pexe kene efapa fomākīanoa mato ispai kiki mā itipinīkōia. Nāno noko itipinīsharafaxokāfe,” Jesús aōxō tāpimisfo rafe fani.

¹⁶ Ato askafaino aōxō tāpimis rafe fonifo. Mā fokanax pexe rasi ano nokonifo. Mā nokokaxō nā Jesús ato yoiya keskarakōi fichitoshinifo. Nānoxō itipinī fanifo Pascua fistatīa pixikakī.

¹⁷ Mā fakishaino Jesús aōxō tāpimis docefo fe nokonifo. ¹⁸ Mā fokaxō mīsa ano tsoxō piaifono Jesús ato yoini. “Ē mato pāraima fatora na mā efeta piai fētsa mā ea ato achimafainaka,” ato faino, ¹⁹ nikakani shināmitsakōiyanā maikiri fepepakefōfānifo. Nāskakanax āa ranā yoinānifo iskakani: “¿Tsoamē, ēraka?” Fetsari iskani: “Ōitsai, ēraka,” iki fetsenifo.

²⁰ Askafifono Jesús ato kemani: “Nā mā docefo anoafāfe, nā mā efeta sapaki piai fētsa mā ea yōaikai ea achinōfo. ²¹ Nā Niospa meka yoiki, eōnoa yoikī kenenifo keskaī ē askakōi. Akka na feronāfāke ea ato achimafīax akairi omiskōikōixii. Akka na feronāfake shara ikerana fakeyamanixakī,” ixō Jesús ato yoini.

²² Piaifono Jesús pāa tsomainīfōfā. Apa Nios kīfiki aicho fata, mā kaxkepaxexō ato ināni, iskafakī ato yoiyanā: “Na ēfe nami keskaraki pikāfe,” ato fani.

²³ Nāskata mā Apa Nios aicho faxō, kecho tsomainīfōfā ato ināni. Nāskakē mā ato ināno keyokōichi ayanifo. ²⁴ Nāskaxō ato yoikī iskafani: “Nafi ēfe imi

keskaraki. Mē naino ēfe imi foxii. Keyokōi yorafāfe afara chakafamisfono ē atoōnoax naikai. Ē askaino Niospa ato potapakenakama. Ē ato naxōi āto chaka ato soaxoxiki. ²⁵ Ē mato pāraima. Ē mato yoikōi ē anā mato feta na fimi ene ayaima. Mē nai mēra kai. Nā ēfe Epa Nios xanīfokōi ika anoxō ē anā mato feta na fimi ene shara ayaxii,” ixō ato yoini.

*“Ē Jesús ōimisma,” Pedro ixiaino Jesús ato yoini
(Mt. 26.30-35; Lc. 22.31-34; Jn. 13.36-38)*

²⁶ Nāskata mā fanāiki xatekata machi Olivos ano fonifo. ²⁷ Nāskata Jesús ato yoini iskafakī: “A na fakishi keyokōi mā ea shināmakī fetsei. Akka kirika ano kenekī iskafakī yoinifo: ‘Āfe ifo reteaifono, āfe ovejafo ichoi fetsetirofo,’ ixō kirika ano kenenifo,” ato fani. ²⁸ “Akka ea reteaifono mē otoax Galilea ano ē nokoi taexii mā nokoamano,” ixō ato yoini.

²⁹ Ato askafaito nikakī Pedro kemani. “Akka keyokōi shināmakīfiaifono ēkai mia shināmakima,” ixō yoiaito, ³⁰ nikakī akka Jesús yoini iskafakī: “Ē mia pāraima na fakish fistichi takara keoi rafeyamano, ‘Ē Jesús ōimismara,’ mī ato fai tres fakī.”

³¹ Askafaito nikakī anā Pedro kemani. “Maa. Mia retefiaifono ē mefe nai. Ē ōimismara ē mia faima,” fani.

Pedro askafaito nikakakī keyokōichi askafakī fetsanifo.

*Getsemanī anoxō Jesús Apa Nios kīfīni
(Mt. 26.36-46; Lc. 22.39-46)*

³² Nāskakata nā ifi mapoa āfe ane Getsemanī ano nokonifo. Nānoxō Jesús aōxō tāpimisfo yoini iskafakī: “Nono tsaokāfe. Ē Epa Nios kīfiyotanō,” ato fani.

³³ Akka Pedro iyota, Santiago* iyota, Juan iyota ato fani. Nāskaxō āfe yora meeni shināmitsakōiyanā fekaxtekōiaito, ³⁴ nāskakī ato yoini: “Ēfe yōshi shināmitsakōi napaiyaito ē meikai. Nono nētekāfe, akka mā oxaki,” ato fani.

³⁵ Nāato askafata ori chaimashta Jesús ares kani. Nānoxō ratokonō mai chachipakefōfā Apa Nios kīfikī iskafani: “Epa, ea mīa kexetiromakī ea kexefe ea reteaifono ē omiskōinōma. ³⁶ Epa, mī keyokōi tāpiakī. Ea mīa ifipaikī ea mīa ifitiro ē omiskōinōma. Akka nā ē apaiyai keskakakīma nā mī ea amapaiyai keskafafe,” Apa fani.

³⁷ Nāskata mā aōxō tāpimisfo ano oxō ōia oxafo ato fichitoshini. Nāskaxō Pedro yoini: “Simón, ĵmā mī oxamē? ĵAfeskakī mī pishta oxa tenetiromamē?

³⁸ Moikaxō Epa Nios kīfikāfe Satanás chakata mato chakafamapaiyai keskara axikakima. Chanīma, nā Epa Niospa mato amapaiyai keskara māto shinā mēraxō mā apaifikī mā atiroma. Akka māto yora pachikōikī,” ixō Jesús Pedro yoini.

³⁹ Ato askafata anā kani Apa Nios kīfikai a yoitana keskakakī. ⁴⁰ Nāskata anā oxō ato fichitoshini aōxō tāpimisfo oxafono, oxa paemei fetsoafono, a Jesús ato yoiai keskara tāpikaxoma tsōa kemanima. ⁴¹ Nāato askafata anā ato makinoax kani orishtaxō Apa Nios kīfikai. Mā Apa Nios kīfitani oxō ato yoitoshini iskafakī: “ĵAi mā oxamē tenekōiyanā? Moikāfe. Akka iskaratīa a ea ato achimaniyoai mā chaima oi kiki. Yora chakafāfe ea achifenōfo ato efe ikiki. ⁴² Fininīfōfākāfe nō kanō. Mā chaima oi kiki a ea ato achimaniyoai,” Jesús ato fani.

* 14:33 Santiago āfe ane fetsa Jacobo ini.

Jesús achinifo

(Mt. 26.47-56; Lc. 22.47-53; Jn. 18.2-11)

⁴³ Jesús ato yoiaino Judas nokoni, nã Judaspa Jesúsxõ täpifikatsaxakĩ, yorafã rasifo fe oni. Nã yorafo kenofoya ifi xatefoya fenifo, a ato Nios kifixomisfãfe äto xanĩfofo feta a Moisés yoikĩ kirika keneni keskara ato täpimamisfãfe, a xanĩfo fetsafãferi ato nĩchiafono. ⁴⁴ Judaspa nã ato efeaito iskafakã ato yoiyoni: “A ã kokoki tsoo akaito õikĩ koshi achirisafaxikãki metexkere axõ iyotaxikãki,” ixõ ato yoini.

⁴⁵ Nãskata Judas mã Jesús ano nokoxõ iskafakĩ yoini: “¿Maestro, mĩmẽ?” ixõ kokotoshini. ⁴⁶ Nãskafaito õikakĩ nã Judas fe foafãfe Jesús achinifo.

⁴⁷ Akka Jesús achiaifãfe õikĩ a aõxõ täpimis fẽtsa ãfe keno chainipa tsekainĩfofã, a ato Nios kifixomisfãfe äto xanĩfãfe ina paxteni. ⁴⁸ Nãskakẽ Jesús yorafõ yoini iskafakĩ: “¿Afsakai kenofoya ifi xatefoya mã oamẽ ea achiyoi oa ã yometso keskarakẽ?” ⁴⁹ Pena tii ã mato fe itiani Nios kĩfiti pexefã mẽraxõ ã mato täpimani, akka mãkai ea achipaimisma. Akka nã eõnoa yoikĩ kenefo keskafakĩ mã ea achi,” ixõ Jesús ato yoini.

⁵⁰ Ato askafaino aõxõ täpimisfo Jesús õifaikani. Ichoi fetsenifo a makinoax.

⁵¹ Akka naetapa fistichi sabanãnã rakoxõ Jesús chĩfafainaito õikakĩ achinifo.

⁵² Akka achiaifono ãfe sabanã potafaini chitoria ichoni.

Xanĩfo finakõiafo ano Jesús iyonifo

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Nãskakẽ Jesús achikaxõ iyonifo a ato Nios kifixomisfãfe äto xanĩfãfe pexe ano. Nãskakẽ keyokõĩ anofistiax ichanãnifo a ato Nios kifixomisfãfe äto xanĩfofo fe a judeofãfe äto xanĩfofo a Moisés yoikĩ kirika keneni keskara ato täpimamisfori ato fe inifo. ⁵⁴ Akka Pedro acho kakĩ chai ixõ õifoni. Nãskata a ato Nios kifixomisfãfe äto xanĩfãfe pexe emãiti nokoni. Nãnoax a Nios kĩfiti pexefã kexemisfo fe chii ketefax ato fe yooni.

⁵⁵ A ato Nios kifixomis xanĩfofofãfe a äto xanĩfofinakõiafo fe isakai yoinãnifo: “Afskaxomãĩ nõ pãranõ na Jesús afara chakafara ixõ retexiki. Akka afaakai chakafa nõ nikaima,” inifo. ⁵⁶ Nãskaifono yora ichapafãfe, “Na Jesús afara chakafaito nõ õia,” ixõ pãraketsanifo. Askafafiakakĩ anoris yoiketsanifoma. Äa chanĩ fetsenifo. ⁵⁷ Askafaifono ranãri fininĩfofãkãta äa mekafakakĩ chakafakĩ fetsanifo iskafakakĩ: ⁵⁸ “Nõ nikaino na feronãfake iskaita: ‘Na Nios kĩfiti pexefã yorafãfe akafo ã pãofaxii. Nãskata tres nia oxata ã anã fetsafaxii, anã yorafãfe efeta akanima, eres fisti ã aki,’ ixõ yoiaito nõ nikaita.”

⁵⁹ Askafakĩ yoifikakĩ tsõa anoris yoinifoma, äa chanĩ fetsenifo.

⁶⁰ Nãskafaifono a ato Nios kifixomisfãfe äto xanĩfãfe ato nẽxpakĩa niinãkafã iskafakĩ Jesús yõkani: “¿Mĩ kemamitsaimamẽ afamẽ na mĩõnoa meka chaka yoiãifo?” ixõ yoini.

⁶¹ Askafaino akka Jesús tooxinima, pishtakai kemanima. Afianã a ato Nios kifixomisfãfe äto xanĩfãfe iskafakĩ yõkani: “¿Mĩmẽ Cristo? ¿Nã Nios nipanakato ãfe Fakemẽ, mĩ?”

⁶² Askafaito nikakĩ Jesús kemani: “Ëje, ãkĩa Niospa Fake. Akka mã ea õixii ãfe Epa ketaxamei ãfe põya kayakai aõri ã tsãokẽ xanĩfo finakõia ãfe Epa fe. Askatari mã ea õixii nai kõi mẽranoax ã anã fotofaito,” Jesús ato fani.

⁶³ Askafaito nikakĩ a Nios ato kifixomisfãfe äto xanĩfãfe ãfe rapati faxteni fetsafãfe täpinõfo nã xanĩfo õitifishkikaito. Nãskaxõ ato yoini iskafakĩ: “Mã nõakõĩ nõ nikakĩ noko anã tsõa yoitromaki nõ täpinõ. ⁶⁴ Mã mã nikakĩ na

feronāfake āfe mekapa Nios chakafakī mekafaito. Akka, ¿nō afeskafaimē?” ato faito keyokōichi, “Nanōki,” fanifo.

⁶⁵ Nāskakata mā fenexkaxō āfe femānāki kemo mechoketsayanā koshaket-sanifo iskafakī yoianā: “Tsōa mia koshamakī tāpipō noko yoixiki,” faifono, a Nios kīfiti pexefā kexemisfāferi fepasketsanifo.

*“Ē Jesús ōimisma,” Pedro ini
(Mt. 26.69-75; Lc. 22.56-62; Jn. 18.15-18, 25-29)*

⁶⁶⁻⁶⁷ Pedro pexefā emāiti ato fe tsoano, nāno akiki a xanīfo yonoxomis xomaya nokoni. Nāno ato fe chii ketefaax tsooax yooaito ōikī, iskafakī yoini: “Mīri Nazarete anoax Jesús fe kafāsamis,” faino, ⁶⁸ akka Pedro iskafakī kemani: “Ēkai Jesús ōimisma. Ēkai afaa tāpiama tsoaraōnoa mī yoi,” fata, pexefā kāiti ano Pedro nasteinīfofānaino, takara keonākafāni.

⁶⁹ Afianā nā xanīfo yonoxomis xomayato Pedro ōiki, nānoafo iskafakī ato yoini: “A na feronāfake Jesús fe rafemis ōikapo, a nā Jesús Nazarete ano a fe kafāsamis,” fani.

⁷⁰ Akka Pedro anā iskani: “Maa, ēkai Jesús fe rafemisma,” ini. Nāskaino nā anoafāfe anā Pedro yōakakī iskafanifo: “Chanīma, mīri Jesús fe rafemis. Mīri Galilea anoakī mī mekai nā Jesús mekai keskarakī,” faifono, ⁷¹ akka Pedro ato yoikī iskafani: “Ē mato pāraima, ē chanīaito ea Niospa omiskōimatiro. Niospa tāpia chanīmākōi ē mato yoi. Ēkai na Jesús ōimisma tsoaraōnoa mā yoi,” Pedro ato fani.

⁷² Pedro nāskaino anā takara keoinākafāni. Nāskaino Pedro shinātani nā Jesús iskafakī yoita keskara: “Taeyoi takara keofi rafeamano, ‘Ē Jesús ōimismara,’ mī ea faxii tres fakī,” ixō yoitano, nā shinātani Pedro shināmitsai oiakōini.

15

*Pilato ano Jesús iyonifo
(Mt. 27.1-2, 11-14; Lc. 23.1-5; Jn. 18.28-38)*

¹ Mā penaino a ato Nios kīfixomisfāfe āto xanīfofo ichanānifo, a judeofāfe āto xanīfofo fe, a Moisés yoikī kirika keneni keskara ato tāpimamisfori ato fe inifo. Nā xanīfo fetsafori a ato rafeafori ato fe inifo. Nāskakaxō Jesús metexkere akaxō iyokaxō Pilato inānifo. ² Mā iyoxō ināfono Pilato yōkani iskafakī: “¿Mīmē judeofāfe xanīfo?” askafaito, Jesús kemani: “Ēje, nā mī ea yoiai keskarakīa,” Jesús fani.

³ Nāskaino nā ato Nios kīfixomisfāfe āto xanīfofofāfe āa pārakakī yōaketsanifo.

⁴ Nāskafaifono anā Pilato yōkaxō iskafakī yoini: “¿Mī ato kemaimamē mīōnoa afara chakafo yoifiaifono?”

⁵ Askafaito nikakī Jesús tooxanima. Nāskakē Pilato shināni iskafakī: “Kee, ¿afeskakī ea kemaimamē?” ixō shināni.

*Pilato ato yoini Jesús retenōfo
(Mt. 27.15-31; Lc. 23.13-25; Jn. 18.38-19.16)*

⁶ Akka Pascua fistatīa Pilato karaxa mēranoa nā xīnia tii fisti rasi ato kāimapaoni māmāi askafakī feyafakatsaxakī. Nā yorafāfe kāimapaiyifo ato kāimaxopaoni. ⁷ Akka nā karaxa mēra feronāfake āfe ane Barrabás ika ini. Nāto fetsafo feta yora retemis ini nā āto xanīfo ato pōtapaikī. ⁸ Akka yorāfo fenifo. Mā fēkaxō Pilato yōkanifo māmāi askafakī feyafakatsaxakakī.

⁹ Askafaifono Pilato ato kemani: “¿Mā fichipaimē judeofāfe āto xanīfo ē kāimanō?” ato fani.

¹⁰ Akka Pilato tāpini a ato Nios kīfixomisfāfe āto xanīfofofāfe Jesús chakafakī mekafaifono anā yorafāfe noko nikakanimara ikaxō, nāskakaxomāi akiki efekaxō ināfono. ¹¹ Akka a ato Nios kīfixomis āto xanīfofofāfe fāsikōi yorafa mekamanifo: “iNoko Barrabás kāimaxōfel!” ikaxō Pilato yoinifo.

¹² Askafaifono Pilato ato yōkani: “Akka, ζna judeofāfe āto xanīfora mā fai ē afeska fatiromē?” ato faito, ¹³ kemakakī fāsikōi iskafanifo: “iMastafe!” fanifo keyokōichi.

¹⁴ Askafaifono Pilato ato yoini iskafakī: “Akka, ζna feronāfāke afaa chakafamē?” ato faino, anā fāsikōi mekainīfofānifo: “iMastafe!” fanifo.

¹⁵ Nāskafaifono yorafāfe sharakōi fanōfo Pilato ato Barrabás kāimaxoni. Nāskata mā Jesús ato koshamata, ato nīchixononi ifi cruz ikaki mastatanōfo.

¹⁶ Nāskakē sorarofāfe xanīfāfe pexe emāiti Jesús iyonifo, nānoax sorarofō ichanānifo. ¹⁷ Nāskakaxō āfe rapati pēkakaxō, rapati ōshi nana safemanifo, moxa maiti fakaxori maimanifo. ¹⁸ Nāskakaxō fāsikōi mekafanifo iskafakakī: “iAicho, mīfi judeofāfe āto xanīfo!” ikaxō kaxemetsama fanifo.

¹⁹ Nāskatari tafa xatenē mapoki koshaketsayanā akiki kemo mechoket-sanifo. Nāskakata akiki ratokonō mai chachipakefōfā kaxemetsama fanifo. ²⁰ Nāskai mā akiki kaxemetsamakaxō a rapati ōshi nana safemanafo fiakaxō āfenākōi safemanifo. Nāskakaxō iyonifo mā ifi cruz ikaki mastafokakī.

Jesús ifi cruz ikaki mastanifo

(Mt. 27.32-44; Lc. 23.26-43; Jn. 19.17-27)

²¹ Mā Jesús iyoifokakī feronāfāke Cirene anoa fichinifo, āfe ane Simón. Alejandro feta Rufo āto apa ini. Pexe rasi pasotai inoax oaito, fichikaxō yoinifo iskafakakī: “Na Jesús āfe cruz foxōikafe,” fanifo.

²² Nāskaxō Jesús iyonifo āfe ane Gólgota ano. Āfe ane fetsa Mapo Xao fanifo. ²³ Nānoxō fimi ene osia mokakōi Jesús ayamapainifo. Akka Jesús ayakaspani. ²⁴ Nāskafakaxō mastanifo. Mā mastakanax sorarofō makex tokoroya kaxenifo. Nā potakī kanāto āfe rapati fīani. Nāskafakaxō keyofīanifo.

²⁵ Rama xini keyaino Jesús mastanifo. ²⁶ Mā mastakaxō a mǎnǎo tafaraki kenenifo iskafakakī: “Judeofāfe āto Xanīfokōi;” ikaxō a mǎnǎo kenenifo. ²⁷ Nāskakaxō Jesús yafi yometso raferi mastanifo, fetsa āfe pōya kayakai aōri ata, fetsari āfe pōya mishkiori anifo. ²⁸ Afetīama aōnoa yoikī keneyonifo iskafakī yoinifo: “Nā yora chakakōifo keskarakōi ixō aōnoa yoixikani,” ikaxō kenenifo. Chanīmakōi. Nāskakōi fanifo aōnoa yoikakī.

²⁹ Nā ano finōfāifāfe ičhayanā āto mapo rafe rafe ayanā iskafanifo: “Iskafakī mīyoimis: ‘Nā anoxō Nios kīfiti pexefā ē pǎo axii. Nāskaxō tres nia oxata ē anā axii,’ ixō mī yoimis. ³⁰ Mī ifmetiromakī mīa ifimefe na ifi cruz ikakinoax fotopakekafāfe,” faifono, ³¹ nāskarifakī a ato Nios kīfixomisfāfe āto xanīfofo feta a Moisés yoikī kirika kenei keskara ato tāpimamisfāfe askafanifo akiki kaxemetsamapaikakī. Nāskax āa ranā yoinākani iskanifo: “Nato fetsafo iffikatsaxakī, akka aakai ifmeima. ³² A na Cristo israelifāfe āto xanīfo, iskaratīa nō ōipanā afeskai ifi cruz ikakinoax fotopakekafanimmā, nāskaito nō chanīmara faikai,” ikaxō, nā ayafi mastafari ičhaketsanifo.

Jesús nani

(Mt. 27.45-56; Lc. 23.44-49; Jn. 19.28-30)

³³ Nāskata xini keya nā mai tio fakishifākōitani. Nāskax mā xini kaino anā penani. ³⁴ Nāno xini rakano fāsikōi Jesús kenani iskai: “Eloi, Eloi, ζlema

sabactani?” fani. Nōko mekapa iskafakī yoini: “Ēfe Nios, ěfe Nios, ʒafeskakī mī ea potaimē?” fani.

³⁵ Nāskaito nā ano niafāfe nikakakī iskafanifo: “Nikakapo, nā ato Niospa meka yoipaoni Elías kenai kiki,” fanifo.

³⁶ Nāskaito nikafaini nānoa fetsa ichoni xapo keskara fiikai. Nā xapo keskara fimi ene kachaki momoxō tafa xate kaxkexō akiki nētaxō ayama-paini, iskafakī ato yoiyanā: “Enekāfe nō ōinō Elías oi kiki fotomaniyoi,” ixō ato yoini.

³⁷ Nāskakē Jesús fāsikōi eaita nani. ³⁸ Nāskakē sama nami Nios kīfiti pexefā mēranoax naki rafekōi faxtepekekafāni fomākianoax. ³⁹ Nāskaito ōikī nā soraro xanīfāfe Jesús eaita naito ōikī chaimashta nīxō iskafakī yoini: “Chanīma, na feronāfaka Niospa Fake ika.”

⁴⁰ Askatari kērofāferi chai nikaxō ōinifo. Nāno ato fe María Magdalenari ini, María fetsari ini, Jacobo feta José āto afa ini. Saloméri ato fe ini. ⁴¹ Nā kērofāfe Jesús chīfamisfo inifo, pimaxikakī Jesús Galilea ano ikano. Nānori kēro fetsafo inifo, Jerusalén anoax afe foitaxakakī.

Jesús makex kini mēra maifanifo
(Mt. 27.57-61; Lc. 23.50-56; Jn. 19.38-42)

⁴² Penama safaro ikaino judeofāfe itipinīfapaonifo, nā safaromāi āto teneti penakē, nā yātapake ⁴³ José oni, nā Joséri judeofāfe āto xanīfo. Nāato Nios xanīfo manaopaoni, nā José finakōixō Pilato ano ikikaixō Jesús āfe yora yōkani.

⁴⁴ Askafakī yōkaito nikai Pilato rateni, “ʒMā Jesús naamē?” ikax. Nāskaxō soraro xanīfo kenani yōkaxiki mā Jesús naamakī. ⁴⁵ Nāskafaito soraro xanīfāfe yoini: “Mā naakīa,” faito, Pilato Jesús āfe yora José ināni. ⁴⁶ Nāskakē José sama sharakōi fixō nā samapa Jesús āfe yora rakoni. Nāskaxō a makex kini fanifo mēra rātani. Nāskaxō makexefanē nā kini feponi. ⁴⁷ Akka María Magdalena feta María José āfe afa nā maifaafo anoxō ōinifo.

16

Jesús otoni
(Mt. 28.1-10; Lc. 24.1-12; Jn. 20.1-10)

¹ Mā pena teneti finōano María Magdalena ikaino, María fetsa Jacobo āfe afa ikaino, Salomé ikaino, nā tiito pirofomā fonifo, Jesús āfe yora raish akī foxikakī. ² Fakishparikōi fonifo mā pena teneti finōano nāskanax a Jesús maia ano nokonifo, mā xini keyaino. ³ Mā nokokanax āa ranā yoinākani iskanifo: “ʒTsōa na kini anoa tokiri noko fēpexotiromē?” ikanax yoinānifo.

⁴ Akka ōiafo a kini aō fepoitafo a tokirinīfā, mā fepekemea ini, anā fepoa inima. ⁵ Nāskakē nā kini mēra ikifaikakī ōiafo. Nā kini mēra naetapa tsoao ini, nā nōko pōya kayakai aōri. Rapati chainipa oxokōi safeax, nāskaito ōikani ratekōinifo. ⁶ Nāskaifono nāato ato yoini iskafakī:

“Rateyamakāfe, Jesús Nazarete anoā mā fenaikai nā ifi cruz ikaki mas-taitafo mā otoaki anā nonomakī. Ōikapo a rātaitafo ano. ⁷ Fokaxō aōxō tāpimisfo yoitakāfe, Pedrori yoikakī mā nokoamano nā Galilea ano nokoi taei kai kiki. Nā mato yoifafaina keskara nārixō mā ōikaikai,” ixō ato yoiaino, ⁸ nāskakē nā kērofo fonifo nā kini anoax ato yoiaito nikafaikani. Ratei choayanā ato yoinifoma, mesemāiakaki.

Jesús María Magdalenaki nokoni
(Jn. 20.11-18)

⁹ Mā pena nomīkonō fakishpari Jesús otoitaxaki, María Magdalenaki nokoi taeni, nā María makinoa siete niafaka yōshi chakafo Jesús pōtani. ¹⁰ Nāato kaxō a afe rafemisfo ato yoikai kani a ōia keskara. Kaxō ato ōia shināmitsakani oiaifāfe ato ōini. ¹¹ “Mā nōko Ifo Jesús otoakī mē ōiaki,” ixō ato yoiaito, tsōa chanīmara fanima.

Jesús aōxō tāpimis rafeki nokoni

(Lc. 24.13-35)

¹² Mā askata fetsa keskarax Jesús aōxō tāpimis rafeki nokoni fāi foaifono. ¹³ Nā rafetari a afe rafemisfo yoifokani fonifo. “Mā nō Jesús ōiaki,” ato faifono, tsōa ato nikanima.

Jesús aōxō tāpimisfo yoini aōxō keyokōi yoifofāsafatanōfo

(Mt. 28.16-20; Lc. 24.36-49; Jn. 20.19-23)

¹⁴ Nāskata chipo Jesús aōxō tāpimis oncefoki nokoni, mīsa ano tsoxō piaifono. Mā atoki nokoxō iskafakī ato yoini: “¿Afeskakī mā ato chanīmara famamē mē otofiano nā ea ōiafāfe mato yoiaifono?” ¹⁵ Nāskaxō ato yoikī iskafani: “Nā mai tio ano fokaxō na meka shara eōnoa keyokōi ato yoitakāfe mē otoakī āto chaka ato soaxoxiki efe ipaxanōfo. ¹⁶ Akka na meka shara chanīmara fakanax, faka mēra iki maotisameax ēfe Epa Nios fe nīpanakafo. Akka na meka shara eōnoa chanīmara fayamakanax, nāfo omiskōipakenakafo. ¹⁷ Akka nā ea chanīmara faifāfe, ēfe aneōxō ato makinoa niafaka yōshi chakafo potatirofo. Nāskakanax meka fena sharapa mekatirofo. ¹⁸ Nāskakaxō rono tsoatirofo nāskakaxori rao paekōi ayakanax afeskatirofoma. A isinī ikaifori ato ramāifono sharatirofo,” ixō Jesús ato yoini.

Jesús nai mēra kani

(Lc. 24.50-53)

¹⁹ Nāskafakī ato yoita, nōko Ifo Jesús ronoinākafāni nai mēra kai. Mā nai mēra kaax Apa Nios ketaxamei tsaoni afe xanīfokōi ixiki. ²⁰ Mā Jesús nai mēra kaano aōxō tāpimisfo fonifo. Nā mai tio anoafō aōnoa meka shara yoifokani afe nīpaxanōfo. Nōko Ifāfe ato axōfaino aōxō aōnoa meka shara yoikōimifo, tsōa atiroma keskafakī aōxō afama mīshtifori fanifo. Nā tii.

Lucaspa Jesúsnoa Yoikĩ Keneni

Lucaspa kirika keneni Jesús nõko mai ano ipaonino

¹⁻⁴ Teófilo, ẽ mia kirika kenexõ manamani, mĩ tãpinõ. Mã mĩ tãpia Jesús nõko mai ano ipaoni. Nõko mai ano ikano yorafãfe õipaonifo. Akka nã fak-enitĩa õiaifono yosini. Nãfãferi õikaxõ yora fetsafo yoipaonifo akairi Jesúsnoa tãpinõfo. Ato yoiãifãfe nikakakĩ akairi kirika kenepaonifo afeskai nofe Jesús ikimamẽ ikaxõ. Nãskarifiakĩ ẽ mia kirika kenexoni, nã Jesús tãpiafo yõkaxõ. Efe yorashta Teófilo, nãskakẽ ẽ mia kirika kenexõ manamani, nã mia Jesúsnoa yoiãifono nikakĩ mĩ chanimara fanõ.

Åjirinĩ yoini, Juan Maotista kãiyamano

⁵ Jesús fakeamano Zacarías iyopaoni Judea mai ano ãfe kaifo fe. Ari ikano Herodes ãto xanĩfo finakõia ipaoni. Nã Zacarías ãfe xini ane ipaoni Aarõn. Nã Aarõn ãfe fena Zacarías ipaoni. Akka ãfe ãfi Elizabetri Aarõn fena ipaoni, ãto xinimãi Aarõnkẽ. Nã Aarõn ãfe fenafãfe ato Nios Kĩfixopaonifo ãto kaifofo. Zacaríasri ato kĩfixopaoni Aarõn ãfe fenamãi axõ. Nã Zacarías ãfe kaifo feta yonopaoni, Nios kĩfiti pexefã mẽraxõ Abíasfo feta. ⁶ Zacarías ãfe ãfi feta Niospa meka nikasharakõipaonifo, nã Niospa meka yoikĩ kenenifo keskafakĩ. Akka nã Niospa yoiãi keskafakĩ nikasharakõiaifono Niospa ato õini, shara shinãi ikafono. ⁷ Akka Elisabet fake fimisma ipaoni. Nãskaxõ mã yõxãfoxõ fake fipaonima fene feta. Nãskax fene anifoaino nãri askani yõxãfoi.

⁸ Nãskakẽ ãto xanĩfãfe ato yoini, Abías yorãfo: “Nã Nios kĩfiti pexefã mẽra yonomisfo mã tsekefaini fokani kiki. Mãri ikiferakãfe,” ato fani. Ato askafaino a mẽra ikifaikaxõ yononifo. Zacaríasri a mẽra ato fe ikikaixõ ato feta yononi. ⁹ Nios kĩfiti pexefã mẽra ikifaikanax yoinãnifo iskakani: “¿Iskarãtia tsõa na pirofomã shara koofaimẽ nõ õinõ?” inifo. Askaifono ãfe xanĩfãfe Zacarías yoini: “Mĩ koofafe na nakas Niospa xeteax inimanõ,” fani. Akka nãskara feyafapaonifo, pirofomã nakas shara koofapaonifo. ¹⁰ Zacarías pirofomã shara koofaino yorafãfe emãiti nikaxõ Nios kĩfinifo. ¹¹ Yorãfãfe emãitixõ Nios kĩfiaifono, Zacarías pexefã xãki mẽraxõ pirofomã koofaino ãjiri nĩtani, pexe xaki mẽra pirofomã koofai kesemẽ ãfe põya kayakai aõri. ¹² Nãskakẽ ãjiri nikẽ fichiax Zacarías mesta itani. ¹³ Rateaino Niospa ãfe ãjirinĩ yoini: “Zacarías, rateyamafe. Mã Niospa mia nikakĩ mĩ kĩaifito mã mĩ ãfinĩ fake feronãfãfe fii kiki. Mĩ fake kãiano anekĩ Juan mĩ faxikai. ¹⁴ Mã mĩ fakeyax mĩ inimaxikai. Yorãfori akiki inimakõixikani. ¹⁵ Niosri akiki inimasharakõixii. Fãsi finakõia Niospa õixii, Niospa Yõshi Sharapa shinãmanaino. Nãskakẽ afaa pae pishta ayaxima. ¹⁶ Nãskaxõ mã yosixõ Niospa meka ato yoixii ãfe kaifo israelifo ãfe fenafo, Niospa meka ato yoiaino ãto chaka xatenõfo. ãto chaka xatekaxõ Nios fisti nikakõinõfo. ¹⁷ Nõko Ifo oyoamano taeyõ Niospa Juan nĩchixii ãfe meka ato yoinõ. Akka Juan ãfe shara nã Eliãsnã ipaoni keskara ixii Niospa Yõshi Sharapa shinãmanaino. Afe yorãfo ato tãpimaxii. Nãskaino ãto apãfo fe ãto fakefo anã noinãxikani. Askatari nã Niospa meka nikakasãmisfãfe akairi ãto chaka xatekaxõ Nios Ifofaxikani shinãsharaxikakĩ. Nãskakẽ Juanoax ãfe kaifo itipinĩsharaxikani Niospa Fake atoki nokoaitĩa ifisharaxikakĩ,” ixõ ãjirinĩ yoini.

¹⁸ Askafaito nikakī yoini: “¿Afeskai ē fakeyatiromē? Ēkai anā fake atiroma ē anifokōi. Ēfe āfiri nāskarari yōxafokōi. Afeskaxō afeta nō anā fake fitiroma,” fani.

¹⁹ Askafaito nikakī ājirinī kemani: “Ēkīa Gabriel, ē Nios fe ika. Ea nīchiano ē oa. Nikapo, āfe meka shara ē mia yoinō. Mā mī āfinī fake feronāfake fii kiki. ²⁰ Akka, nā ē mia yoiatio mī ea nikakasapax mī anā mekaima. Mā mī fake kāiano mī mekaxii. Nāskax mī mekamais iyoi. Akka Niospa ea fake fimatiroma ēmāi anifokē mī ifaito Niospa mia fake fimatiro. Nā ē mia yoiiai keskafakī Niospa mia askafaxii. Nā Niospa mia apaiyaitīa mia askafaxōi kiki,” ājirinī fani.

²¹ Ājiri fe Zacarías pexe xaki mēranoax yoināino yorafo pexe emāiti nikanax yoinānifo, Zacarías fena kāiyamaino pexe xaki mēranoa. “¿Afeskai Zacarías samarakaimē pexe mēranoax? Afetiakai ikiyama,” faifono ²² Zacarías kainākafani Nios kīfiti pexefā xakī mēranoax anā mekanima yōkapaifiaifono. “¿Afaa pexefā mēranoa ōiax mī iskaimē?” fanifo. Askafaifono ato yoipaiifi mekanima. Mekapaikī āfe mīfis ato yoini a ōia.

²³ Nāskai anā mekaima Zacarías āfe xanēnē kani mā yonokī keyoax. ²⁴ Nāskata mā Zacarías āfe pexe ano nokoano āfe āfinī chipo fake naneni. Mā fake naneax faki kafāsapaonima nā āfe xanēnē fisti ipaoni cinco oxe ani āfe xanenēxō. ²⁵ Nāskaxō mā postoxō yoini: “Aicho, mā Niospa ea sharafakī ē fake finō ē yōxafofiakē. Niospa ea fake fima. Aicho, iskaratīa ē anā yorafoki rāfinakamaki mē fakeyakī,” Elizabet ini.

Ājiri fotopakekafāni, María yoiyoi

²⁶ Elisabet mā fake nanekī seis oxe akano Galilea mai ano Niospa anā nīchini āfe ājiri Gabriel, Nazarete pexe rasi ano. ²⁷ Nāskakē Niospa āfe ājiri María ano fotopakekafāni yoiyoi. Fotopakekafaxō yoini. Nā María fenemais ini. Feronāfake fetsa fe oxamisma. María fenemais ikano José apa yōkani, María fixiki. Nā José āfe xini David ipaoni. Nā David āto xanīfo finakōia ipaoni. Akka José María fiyoamano ājiri fotopakekafāni, María ano. ²⁸ Fotopakekafāxō María yoini: “Mē oi mia yoiyoi, Nios mikiki inimai mefe ika,” fani.

²⁹ Askafaino María shināpaina: “¿Afaa ea yoipaimē, na ea iskafai?” ixō shināpaina. ³⁰ Shināpaiyaito anā ājirinī yoini: “Rateyamafe. Mīa Niospa noisharai kiki mia sharakōi ōi kiki, mikiki inimasharai kiki. ³¹ Mā mī fake feronāfake fikai. Mā mī fake kāixō anekī Jesús mī faxikai. ³² Mī fake xanīfo finakōia Niospa imaxii. Āfe xini David keskara ixii. Nios nā nai mēra ikato āfe Fakekōi faxii. ³³ Nāskakē mī Fake xanīfo finakōia ixii. Mī kaifāfe xanīfo ipanaka. Anā xanīfoi xatenakama,” fani.

³⁴ Askafaito María kemani: “¿Afeskakī ē fake fitiromē ē feneyaxoma, ea tsōa tanamismano?” María ini.

³⁵ Askafaito ājirinī kemani: “Niospa āfe Yōshi Shara mikiki oxō mia fake nanemaxii. Nāskax nā fake kāiax Niospa Fakera faxikani. Akka na fake kāiax sharafinakōia fisti ixii. ³⁶ Nā mī yaya Elisabet ‘Fake fitiromā’ fafiamisfono mā fake nanea seis oxe aka yōxafofiaxō. ³⁷ Nāskakē nā apaiyai keskara fakī Niospa afama mīshti fatiro. Miari fake fimatiro mī fenemaisfikē,” ājirinī fani.

³⁸ Ājirinī askafaino, “Nāskafinō, ē fake finō, ē Nios nikamiskī. Nā ea amapaiyai keskafanō ē Nios itixomafamiski,” nāskafani.

María askafaino ājiri anā nai mēra kani.

María kani Elisabet òikai

³⁹ Nāskata nā pena fisti mā Niospa ājiri kaano María itipinī fata koshi kani āfe yaya òikai Judea mai ari. Judea mai ari māchifāfo mēra kaax pexe rasi ano nokoni. ⁴⁰ Mā nokoax Zacarias āfe pexe mēra ikitoshini. Mā nokoxō María āfe yaya yoitoshini. “Yaya, ē oi mia òiyoi,” fatishoni. ⁴¹ Āfe rare askafatishonaito Elisabet nikani. Āfe rare askafaito nikakī Elisabet xakī mēraxō āfe fake tokko tokko ani. ⁴² Nāskata Niospa Yōshi Sharapa shināmanaino Elisabet onāni mā María fake naneano. Nāskakē fāsi yoini iskafakī: “María, Niospa mia inimamasharakōi. Fato xotofake fetsakai iskafaima mia fisti inimamakōi. Mī fake feronāfake chipo kāiano Apa Niospa akiki inimakōikī kexesharakōixii. ⁴³ Nōko Ifokōi mī fake ixii. Akka, ŷmī ea ano oamē, nōko Ifāfe afafiāx ēkai afaakeroko ēakōi ē ikanō? ⁴⁴ Akka mī ea yoiāito nikakī ēfe xakī mēraxō ēfe fake ea tokko tokko aka, mikiki inimakī. ⁴⁵ Niospa meka nikakōikī, ‘Nē askanōki,’ ixō mī yoita. Nāskakē Niospa meka nikai mī inimasharakōi,” ixō Elisabet yoini.

⁴⁶ Nāskafaito María kemani:

Ēfe òiti mēraxō ē shinākī iskafai, nōko Ifo tsoa keskaramākī. Nōko Ifo Nios fāsi sharakōi. ⁴⁷ Akiki ē inimakōiaino ea anā potanakama, ē afe ipanaka, ea kexepakenaka, ea ifixii ē afe ĩpaxanō. ⁴⁸ Ē nā yonoxomis, ē afaa tāpiamafekē nā Niospa ea noikōi. Nāskakē yorafāfe yoipakenakafo: “Nā María Niospa inimamakōia,” ixō yoipakenakafo. ⁴⁹ Nios fāsi sharafinakōia. Afaa pishta fayamatiroma. Afama mīshti fatiro, ea sharakōi faxōa. Niosfi sharakōiki. Afaa chakafamisma Niosfi nāskarakōi. ⁵⁰ Nāskara yorafāfe yoitirofo: “Ē Nios nikasharapaikōiāito, ē nikakaspaitori ea chakafatiro. Nāskax ē akiki mesetiro. Akiki mesekī ē Nios nikasharakōi,” ixō yoiāito nā keskara yorafo Niospa ato noikī ato shināpakenaka. ⁵¹ Akka Nios nikakaspakī āto òiti fekaxtefakani, “Tsōa afaa tāpikeroko ē akai keskafakī,” ixō āto òiti fekaxtefatirofo. Nāskaifono Niospa ato fenomatiro. Nāskara ato òimatiro afaa tāpiamafāfe. Akka Niospa āfe shināmā afama mīshti famiski. Afaa pishta Niospa fayamatiroma. Nāfi mitsisipakōikī tsoa keskarama. Nāato afara mīshti fatiro. ⁵² Nāato xanifo potano anā tsoa xanifo itiroma. Akka nā afaayamafo Niospa ato sharakōi imatiro. ⁵³ Akka fetsafāfe Nios shināifono Niospa ato kexesharatiro. Āfe shināmā āto òiti mēra ato shināmatiromo inimanōfo. Akka fētsa shinākī iskafai: “Ē iskaratīa shara ē afara fetsa anā shināima Niospa afara fetsa ea anā shināmanima ē anā Nios fe rafepaima,” ixō shināito askara yora Niospa anā tanaima. Afaa pishta tāpikanamax yorafo askatirofo. ⁵⁴ Niospa noko kexesharapakenaka nōko kaifo israelifāfemāi yonoxomisfono. Noko shināmakinakama mēxotaima noko noipakenaka nā yoini keskafakī. ⁵⁵ Niospa nōko xini Abraham yoikī iskafani: “Mī kaifo efe yorafo ipanakafo. Askatari mī fenafo ē ato kexesharapakenaka,” ixō Niospa nōko xini Abram yoini,

ixō María fani.

⁵⁶ Nāskax María Elizabet ano ipaoni tres oxe ani anoxō. Tres oxe ata anā María āfe xanēnē oni.

Juan Maotista kāini

⁵⁷ Mā María āfe xanēnē oano Elisabet fake feronāfake kāini. ⁵⁸ Mā fake kāiano āfe kaifāfe a chaima nikafāfe tāpinifo. “Mā Elisabet fake kāia nōko Ifo Niospa mā Elisabet aō noikī fake fimismano mā fake fima,” nāskafanifo. Askafakanax akiki inimanifo. ⁵⁹ Mā fake kāitaxakī ocho nia oxano Zacarias

pexe ano yorafo fonifo. Fake òikai fokani áfe foshki repa xateyanã nãskaramãî feyafakatsaxakakî. Fokaxõ yoinifo: “Áfe apa anekiriri nõ anenõ Zacarías fakî,” fanifo. ⁶⁰ Nãskafaifono áfa ato yoini: “Maa, ē aõ aneima, Zacarías ē faima. Afeskakîkai apa anekiri ē anetiroma. Ēa ē anei Juan fakî,” ato fani.

⁶¹ Ato askafaito yoinifo: “¿Tsõa anekiri mî aneimē? Anokai áfe xinifo Juanma. Áfe apa nõ yõkanõkî,” fanifo.

⁶² Akka nã fáke apa mekamais ita pastori ini. Nãskakaxõ apa yõkanifo. Mëkemã ato yoini: “¿Áfe ane mî fake mî faimē?” fanifo. ⁶³ Askafaifono ato yoini mëkemã: “Ea kirika inãkãfe, ē mato kenexonõ,” ato askafani. Kirika inãfono kirikaki kenekî: “Ē áfe ane Juan fai,” ixõ kirikaki kenei. Mã kirikaki keneano òikaxõ yoinifo: “Òikapo. Mã anea Juan fakî. Áfe ane Juan ixii,” fanifo, apa feta áfe áfa aneaito shinãpainifo. ⁶⁴ Nãskata áfe fake ane keneta Zacarías mekani. Anã mekamais inima, mã mekaya ini. Mã mekayaxõ ato yoini: “Nios sharakõî,” ato fani. ⁶⁵ Mã Zacarías mekaito òikani ratenifo. Mã ratekanax fokani yoinãî fetsenifo. Nãskakanax mã fokani Judea mai ari fokani yoinãfonifo: “Mã Zacarías áfe fake aneax mã mekai. Mã áfe áfinîri fake fikatsaxakima, mã fake fia,” ikanax yoinãî fetsenifo. ⁶⁶ Yoinãî fetsekaxõ shinãnifo: “Nã fake afeskaimãkai nõ òinõ shinãya iki kiki, Niospamãî shinãmasharaino,” ikaxõ shinãnifo.

Zacarías fanãini

⁶⁷ Niospa Yõshi Sharapa shinãmanaino Juan áfe apa Zacarías yoini:

⁶⁸⁻⁶⁹ Ēfe kaifo israelifáfe nõko Niosfi sharakõikî, nãfi nõko Ifokõikî. Nõko chaka noko soaxoxii. Nõko xini David áfe fena finakõia ixii. Nã David nõko xinifáfe áto xanifo ipaoni. Nã áfe fena Niospa nîchia noko ifipakexanõ afe nõ ipaxanõ. Nãskakē noko shinãmakinakama. ⁷⁰ Nãskakaxõ ato yoipaonifo, nã ato Nios yoixomisfáfe Judea mai anoafõ. ⁷¹ Niospa ato shinãmanaino yoipaonifo noko kexesharano afanã noko afeskafanõma noko òikaspaifono ixõ yoinifo. ⁷² Nã noko yoiaifáfe nõ ato nikapaoni keskakakî noko Niospa kexesharapakenaka noko noikî. Nã noko yoipaonifo keskai Nios noko shinãmakimisma. ⁷³ Nãskaxõ nõko xini Abraham Niospa yoini iskafakî: “Mî kaifo efe yorafo ipanakafo. Nãskakē mî fena ē ato nîchixonî áto xanifo finakõia inõ. Nãskaxõ keyokõî ato ifixii afe ipaxanõfo. ⁷⁴ Nãato nã mato òikaspaifo ato paxkaxii anã mato afeskafanõfoma,” ixõ Niospa yoini. Noko askafaino nõ áfe inafõax nõ anã mesetiroma nokomãî nõko Ifáfe ikikē. ⁷⁵ Nõ áfe ina kayakõikē nõko òiti noko shara faxoxii aa noiax nõ isharakõipakexanõ,

ixõ Zacarías ato yoini.

⁷⁶ Nãskata Zacarías áfe fake yome pishta yoini:

Anifoshta, nõko Nios finakõia nõ mãnão nikõina. Akka mî yosixõ Niosnoa mî ato yoixoxii. Taefakî mî ato yoixonano chipo nã nõko Ifo finakõia oxii. Nãskakē itipinikãfe mã nõko Ifo oi kiki mî ato faxii. ⁷⁷ Nãskakē mî ato tãpimaxii mã nõko Ifo oaino afe yorafo ato chaka soaxoniyoi. ⁷⁸ Akka Niospa noko shinãino áfe Fake finakõia nai mēranoax nokoki oi nõko òiti noko sharafaxoxiki. Oa fakishpari xini koshi kafanai keskakakî nõko òiti xafakõia sharakõî noko faxoxiki, ⁷⁹ anã fakish keskara nõko òiti inõma. Nãskax nai nõ mesetiroma noko shinãmasharaino, ixõ Zacarías ato yoini.

80 Nāskax Zacarías āfe fake yosini Niospa āfe shināmā shināmasharaino. Nāskax ares tsōa istoma ano ipaoni, nā Niospa meka israelifo ato yoikī taefaitia.

2

María Jesucristo kāini (Mt. 1.18-25)

1 Nā Jesús kāiyaitia romanō āfe xanifāfe César Augusto āfe yorafo nīchini nā maitio anoafō ato tanākaxō āto anefo kenenōfo afe tii yorafomakī. 2 Taefakikōi kirika kenenifo āto anefo keyokōi. Akka Siria mai anoafāfe āto xanifāfe ane Cirenio ipaoni. 3 Nāskakē keyokōi fonifo āto mai anoxō āto ane kenei fokani. 4 Nāskaifono María ferī José kani Belén ari, Nazarete ano ikanax. Nā Nazarete pexe rasi Galilea mai anoa ini. Nānoax José fe María fonifo, José āfe xini Davidmāi Belén anoax kāinino. Nā Belén Judea mai anoa ini. 5 Nāskakē María fe José fonifo āto ane kenei fokani. María fe José mā yoināfo ini fianāxikakī. Fianāyokanamax María fe José kani. Nā María tosa pishta tanamisma ini, akka Niospa Yōshi Sharapa fake nanemani. 6 Mā María Belén ano nokoano fāke pāe fani mā kāiki. 7 Mā fake kāiax fakeyai taeni. Āfe fake feronāfake ini. Akka āto fakka inafāfe piāi mēra fonifo. Anoax María fake kāini. Mā fake kāixō sama faxte pishta rakoni. Askata āfe fake rātani a fakkafāfe piāi kamaki.

Ājirifo oveja kexemisfoki nokoni

8 Nā María fakishi fake kāiano oveja kexemisfāfe fasifo mēraxō āto ovejāfo kexeshinifo pexe rasi pasotaixō. 9 Āto ovejāfo kexeshinaifono Nios ariax āfe ājiri atoki fotokī chaxapakefōfāni. Niospa nīchiano chaxapakefōfāni. Mā Niospa ājiri nīchiakī inifo chaxatanaito fichikanax ratekōinifo. 10 Nāskaifono ājirinī ato yoini: “Rateyamakāfe. Ē mato meka shara yoiyoaki nikax mā inimai finakōinō. Askatari yorafāferi nikakanax akairi keyokōi inimakōinōfo. 11 Iskaratīa fotoxō ē mato yoiyōa. Nā fakishi mā mātō Ifo Cristo mā kāia mātō Ifokōi mato ifixiki mā afe Īpaxanō. Nā mātō xini David kāini anoaxri kāia mātō Ifokōi. 12 Ē mato yoinō nikakapo afeskaxō mā tāpitiromakī nā fake āfe afa rapatinī rakoxō rāta fakkafāfe piāi ano fichixō mā tāpitiro nā mātō Ifo finakōia,” ixō ājirinī ato yoini.

13 Ato yoikī xatetanaino atiri Niospa āfe ājiri ichapakōifo atoki fotopakefōfāni. Fotopakefōfākata inimakōi Nioski fanāinifo. Inimakata iskafakī yoinifo:

14 Nios sharakōi nai mēra ika. Nā ato fichipaiyai tii nono mai anoax ikafo ato shināmasharai inimanōfo, ixō yoinifo.

15 Mā yoikanax anā nai mēra fonifo. Mā nai mēra ājirifo foafono, “Nō ōinō,” inifo, “Chanīmamakī nō ōinō, fokapo Belén ano na nōko Ifo Niospa āfe ājirifo nīchiano noko yoiāfo keskara nō ōinō fokapo,” ixō yoinifo.

16 Nāskata nā oveja kexemisfo fonifo. Mā fokakī ichokaxō fichitoshinifo María yafi José. Nāno āto fake yome rātafono fakkafāfe piāi mēra fasi mēra rakakē ōinifo. 17 Nā fake yome ōiafo tiito ato yoifofāsanifono. 18 Nā oveja kexemisfāfe ato yoiāifāfe nikakakī, “Aira, ¿afeskakī iskara shara noko yoikanimē?” inifo. 19 Nāskakē María nā nika keskafakī āfe ōitinī fāsi shināfāfāini. 20 Nāskakata nā oveja kexemisfo ato yoitakani anā ato ovejāfo ano fenifo.

“Aicho, Nios sharakōikī nā noko yoia keskafakī mā nō ōitanikai,” ikanax āa ranā yoinānifo.

Nios kīfiti pexefā mēraxō apa feta āfa āto fake Jesús Nios ispanifo

²¹ Mā ocho nia oxano Jesús foshki repa xatenifo. Nāskafakaxō anenifo Jesús fakakī, nā ājirinī yoiyoni keskafakī María fake naneyoamano.

²² Moisés israelifo yoini iskafakī: “Kēro fake kāiax fena faki kafāsatiroma. Askatari Nios kīfiti pexefā mēra fena ikitiroma cuarenta nia oxa finōaxma,” ixō ato yoini. Akka mā cuarenta nia oxa finōano José fe María fonifo. Jerusalén ano iyoifokani āto fake Nios kīfiti pexefā mēraxō Apa Nios ispaxikakī. ²³ Nānori Niospa shināmanaino Moisés kirikaki keneni iskafakī: “Fake kāi taexō feronāfakekē mā Nios ispatiro āfenā inō,” ixō ato yoipaonino, José feta María āto fake Jesús yonifo Jerusalén ano. ²⁴ Nāskakē José fe María mā fokaxō a Moisés yoini keskafakī a Nios ato kīfixomis rifi rafe iyamai nopoxpoiki rafe inānifo retexō Nios kīfixonō nānorimāi Moisés yoipaonino.

²⁵ Nā Jerusalén anoa feronāfake Nios Ifokōi faa ini, āfe ane Simeón. Nāato Nios Ifo sharakōi faxō kīfitaifapaoni. Niospa Yōshi Sharapa Simeón ikināno, nāato Cristo manapaoni, āfe kaifo israelifo ifinō Niospa Yōshi Sharamāi afe ikano. ²⁶ Niospa Yōshi Shara a mēra naneano a mēraxō tāpimani iskafakī: “Mī fena naima na Niospa nīchiai nōko Ifo Cristo mī ōiyoi mā mī ōiax mī naxii,” ixō tāpimani, Niospa Yōshi Sharapa Simeón. ²⁷ Nāskata Niospa Yōshi Sharapa shināmanaino Nios kīfiti pexefā mēra ikikaini. Nānori José fe María āto fakeya ikifainifo, Moisés yoini keskafakī āto fake ispaxakakī. Mā ikiafono, ²⁸ Simeón atoki oxō inimayanā Jesús yome pishtakē chishtoinīfōfāni, mā tāpixō. Nāskafaxō Nios yoisharani iskafakī:

²⁹⁻³¹ Ifo, ea mīa yoimis keskafakī mē ōi. Aicho, mē akiki inimakōiax mē naikai ēfe Ifo ōiax. Nāatofi noko ifixii kiki nō afe ipaxanō. Keyokōichi nō Ifofanō mī nokoki nīchia. ³² Nāskata mī nōko kaifo yamafiano mia shinākatsaxakakīma mī fākeoxō mia tāpikōikani. Akka nō israelifo mefe yorafo nō tāpikōixii, nā fakeōnoa Niospa nokoya rafemanano. Aōxō nā noko yoimis keskafakī noko axoxii,

Simeón fani.

³³ Ato askafaito nikakī María feta José āto ōitinī shinānifo: “Airā, nōkai nafo meka nikamisma,” ixō shinānifo. ³⁴ Akka Simeón Niospa Yōshi Sharapa shināmanaino ato yoisharani. Nāskaxō āfe afa yoini: “Nā mī fake chanīmara fakanax nōko kaifofo israelifo inimatirofo. Aōnoax isharapakexakakī. Akka nōko kaifo fetsafori afe rafeyamakanax omiskōipakenakafo. Nāskakē yora ichapafāfe chanīmara fakani. Akka fetsafāferi chanīmara fakaxō mā shinākani. ³⁵ Akka a āto ōitinī shināifo keskafakī onetirofoma. Akka fētsa āa shinākī a shināi keskara onetiroma. A shināyamaifori onetirofoma. Xafakīakōi ato ōitiro. Nāskakē mī fake aa noikaspakaxō chakafaxikani. Askafaifāfe ōi aōnoax mī omiskōixii shināi. Nā kenopa mī ōiti xatea keskara mī meexii omiskōikī,” Simeón fani.

³⁶ Nānori kēro fistiri ini, āfe ane Anā. Nāatori Niosnoa yoini, a inōpokoai yoikī. Akka nā Anāmā apa Fanuel ini. Āfe kaifo Aser nafafo ini. Akka nā Anā yōxafokōi ini. Xomayakōi feneyayoni, siete xinia afeta akax fene nani. Nāskakē anā Anā feneya ipaonima. ³⁷ Ares ikax yōxafokōi ini ochenta y cuatro xinia ani feneyaxoma. Nāskakē Anāmā mēxotaima Nios kīfipaoni, pena fisti foni teneyanā. Nios kīfiti pexefā mēranoax Anā askapaoni. ³⁸ Nāskata María

fe José Simeón fe yoinãifono Anãri atoki oni. Oxõ nãnoa Jesús fichini. Fichita akiki inimani. Inimayanã Epa Nios iskafani: “Aicho Epa Niosi, iskaratã mĩ Fake mĩ nokoki nĩchiaki nofe rafemis ìpaxanõ,” ixõ yoini. Mã õixõ Anãmã Jerusalén anoafõ ato yoini a na manamisfoki israelifo ato ifinõ. “Mẽ nõko Ifõ õiaki mã nokoki nokoaki,” Anãmã ato fani.

Nazarete ano anã fenifo

³⁹ Nãskata María feta José Jesús Nios ispatakani, nã Niospa yoipaoni keskai anã ãto mai ano fenifo, Nazarete pexe rasi ano. ⁴⁰ Nãnoax Jesús mitsisipakõ yosini María fake. Afama mĩshti tâpiakõ ini. Niospa aõ noikĩ shinãmasharani.

Jesús Nios kĩfiti pexefã mẽra ikini yomeax

⁴¹ Nãskax nã xinia tii Jesús ãfe afa fe apa Jerusalén ano fopaonifo. Pascua fista aki fokani. ⁴² Jesús mã doce xinia akano apa feta ãfa iyonifo, amisfo keskafakã fista akifokakĩ. ⁴³ Mã fista keyoano María fe José fenifo, ãto pexe shinãferakani. Akka Jesús nẽteaito apa feta ãfa tâpinifoma, mãmã ato fe kaira ikaxõ tsõa tâpinima. ⁴⁴ Mã ato fe kaira ikanax tâpiamax fãi fonifo. Fãi fokãta shinãnifo akka nõko fake akka inifo. Nãskata apa feta ãfa fenani. Fenayanã afe yorafoya a afe rafemisfo yõkani: “¿Mã nõko fake õimamẽ?” ato fani. ⁴⁵ “Maa, nõ mĩ fake õima. Niri oama,” fanifo. Ato askafaifono ãfe apa fe ãfe afa anã anori nẽtefaikani anã fonifo. Afianã fõtanifo Jerusalén ari. Mã nokokaxõ fenafõfãsafanifo.

⁴⁶ Nãskata mã tres nia oxakata fichinifo nã judeofãfe Nios kĩfiti pexefã mẽranoa nã ato tâpimamisfo fe tsoaxõ nikaino. Ato nikayanã ato yõkapakeni a ato tâpimamisfo. ⁴⁷ Ato askafaino nikakakĩ, “Nikakapo, ¿na fãke yomefixõ afeskakĩ mekakĩ tâpisharakõiamẽ? Ato kemasharakõii,” fanifo. ⁴⁸ Ato askafaino afa feta ãpa fichinifo. “Nono tsoafekẽ nõ fenai nõko fake,” fanifo. Nãskata ãfa kenatoshini: “Kõkaishta, ¿afeskai mĩ nẽteamẽ? Mã mĩ noko ratekõia epa yafi. Afeskara ikara nõ mia faa. Nãskakẽ nõ mia fenafei nono ato fe tsoaxõ mĩ yofiaino,” fanifo.

⁴⁹ Askafaifono ato kemani apa yafi afa: “¿Afeskakĩ mã ea fenaimẽ? ¿Ea mã tâpiamamẽ nã ãfe Epa Niospa pexe mẽra ã ikikẽ nã ãfe Epa ea yoiai keskara ã feito?” ixõ Jesús ato yoini.

⁵⁰ Ato askafaito apa feta ãfa tâpinima.

⁵¹ Nãskata apa feta ãfa iyonifo Nazarete pexe ari ato xanẽnẽ. Nãskata mã nokoxõ María shinãni ãfe fãkeõnoa. Nãskaxõ Jesús apa feta ãfa yoiaito ato nikakõisharapaoni ato shinãkõikĩ. ⁵² Nãskata Jesús yosikõini, ãfe õiti sharakõia. Mã ãfe mãpo afama mĩshti shinãkõii ini. Nãskax yosini. Nãskaito õikani yorafo akiki inimakõinifo. Niosri akiki inimakõii ini.

3

Juan Maotista tsõa istomaxõ ato yoini (Mt. 3.1-12; Mr. 1.1-8; Jn. 1.19-28)

¹⁻³ Akka mã yosixõ Zacarías fãke ato Nios yoipaoni tsõa istoma anoxõ. Tsõa istoma ano yora ichapa akiki fonifo nikaxikakĩ, nãskakẽ Zacarías fãke ato Nios yoiaino. Nãnori Tiberio xanĩfo finakõia ipaoni, Roma anoax. Nãskakẽ aa ranã ikanax ãto pexefõ anoax xanĩfo ikaxõ ato ikĩpaonifo. Pexe fisti rasi anoax xanĩfo iki fetsepaonifo. Judeofãfe ãto xanĩfo ini pexe fetsa anoax ãfe ane Pocio Pilato. Askata pexe fetsa anoaxri ãto xanĩfo fetsa Galilea anoax Herodes ato xanĩfo ini. Akka Feliperi xanĩfoxõ pexe rasi anoax rafe kexepaoni. Itoria ano kexeta Traconite ano kexeta fapaoni. Akka nã Felipe

āfe exto ipaoni Herodes. Nāskatari pexe fetsa anori xanīfo fetsa ipaoni āfe ane Lisianas Abilinia anoax. Akka āto xanīfo finakōia ipaoni Tiberio. Nāto keyokōi kexepaoni. Mā xanīfokī catorce xinia akano Zacarias fake Juan tsōa istoma ano ixō Niospa meka yoipaoni. Askatari judeofo yoipaoni āto mai ano ixō, yorafāferi ato Nios Kífixopaonifo. Akka Anás fe Caifás āto xanīfo ipaonifo. Nāskakē nā Zacarias āfe fake Juan Judea mai ano ipaoni. Akka mā yosiax tsōa istoma ikē Niospa yoini aōxō ato yoinō iskakafakī: “Māto chaka xatekāfe, a mā afara chaka shināi keskara anā shināyamakāfe. Niospa mato yoiai keskara nikakōikāfe. Mā nikakōiaito Niospa mato chaka soaxotiro. Mā askaito ē mato maotisafatiro, faka mēra ikimapakekī māto chaka mā xatenō ato ispaxiki ixō ato yoitāfe,” ixō Niospa nīchiano Juan ato yoifofāsafani faka Jordán arixō.

⁴ Afia Isaías ato yoipaoni keskakafakī Juan yoifofāsafani. Nānorikōi Isaías kirika keneni a Juan mekanōpokofai yoikī:

Tsōa istoma ixō yorafo yoixii akiki feaifono. Iskakafakī ato yoixii: “Mā nōko Ifo oi kiki. Nāskakē itipinīsharakāfe, āfe fai sharafaxokāfe. Māto chaka xatekāfe. ⁵ Nā xexa naxpe chakafo ano mai forosharakōi fanōfo. A machifo anori sapa sharakōi fanōfo. Nāskatari āfe fai mēstesharakōi faxonōfo. A xexa naxpefo ano mai forosharafaxonōfo sapa sharakōi inō nōko Ifofai. ⁶ Mā nōko Ifo Niospa nīchiano oxō a shināifo ato ifiyoi afe ĩpaxanōfo. Nāskakē keyokōichi ōixikani,”

ixō yoinōpokoi kiki nā yōra, ixō Isaías kirika keneyoni, Juannoa yoikī.

⁷ Nāskakē nā Isaías ato yoipaoni keskakafakī Juan ato yoipaoni, mā chaima Jesús oaino. Ato Juan yoikī iskakapaoni, a nīkakani akiki yora ichapa feafono: “Noko Juan maotisafanō faka mēra ikimakī nō chiifā mēra kayamanō,” ikanax akiki feafono Juan ato yoini iskakafakī: “¿Afeskai mā ea ano oimē? ¿Ē mato maotisafapanō mā oimē? ¿Tsōa mato yoiamē? Mā shināiraka nō chiifā mēra katirora ixō nāskax mā maotisapaimē, nō chiifā mēra kayamanōra ikax. Maa, mā kai afaa tāpiama, askax mā maotisatiroma. Mā Nios Ifofaima. Mā oa shano keskara māto ōiti chakakōi. Nāskaxō mā Satanás ifofaa. Nāskakē kaxpa ē mato maotisafatiroma māmāi Satanás fisti shināito. Āa fetsa mato pāratiro nō maotisanō nō chiifā mēra kaimakai Nios nikayamafiāx ixō mato pārano mā chiifā mēra katiro fetsa afaa tāpiamato mato pārano. Askara Niospa mato ifitiroma mākaikōi shināito, ēroko mato maotisafaano. ⁸ Māto chaka xatekāfe, Nios shinākāfe. Mā Nios shināito ē mato maotisafapanō. Ē mato anā yoinō nikakapo. Mā shinātiro: ‘Nā Abraham nōko xini ipaoni, ōiti sharayaxō Nios shināpaoni.’ Akka mā shinākī: ‘Nōmāi Abraham fenaxō nō shara shināi;’ ixō mā shinākī mā shināsharaima. Askara shināyamakāfe. Akka māto ōitinī mā chaka shināfi mā chanī. Nikasharakōikāfe, ē mato yoinō. Na tokiri Niospa onifaxō nīchikē mā ōitiro Abraham āfe fena inō. Nāskakanax Abraham fakefo itirofo na tokiri ōiki Nios shinākanax. Akka mā kai anori shināima mā mā chanī, ‘Abraham shināpaoni keskara nō shināira’ ikax. Askara shināyamafi Satanás fisti ifofafai. ⁹ Akka fana fimiyaaito ifāfe reratiro. Āfe tapori tsekaxō kooatiro anā niyamanō. Nāskari fakī mā Nios nikakaspaito a omiskōipakenakafo mēra Niospa mato potaxii mā chaka xateaxma mā isharayamaito,” ixō Juan ato yoini.

¹⁰ Ato Juan askafaito nikakakī kemanifo: “¿Chanīmamē? ¿Na mī yoiai keskara tāpiaxma nō afeskatiromē? ¿Afeskaxō a keskara shara nō shināitiromē?” faifāfe anā ato yoini: ¹¹ “A yora omiskōiaito afaamais oxō mato rapati yōkatoshiaito mā inātiro mā rapati rafeyaxō. Askatari yora fonāiki

oaito mā pimatiro,” ato Juan faito nikanifo.

¹² Xanīfo kori fixomisfāferi Juan yōkanifo: “Maestro, ¿nō afeskatiromē, mā noko maotisanfano?” fanifo.

¹³ Askafaifono ato yoini: “Māto xanīfāfe a tii mato yoiyamafiano finōmainīfōfā mā kori fitiroma,” ato fani.

¹⁴ Nāskatari sorarofāferi yōkanifo: “Akka, ¿nō afeskatiromē?” ixō yōkanifo. Askafaifono ato yoini: “Ato kori fiapiakī shināyamakāfe. Askaxori ato ferateni mitsisipayamakāfe. Ato askafayamakāfe. Māto xanīfori pārayamakāfe. Nā xanīfāfe mato inā tiyi inimakāfe,” ixō ato yoini.

¹⁵ Nāskata yorafāfe ōnifo Juan mekaito. “¿A naamē Cristo?” ixō āto ōiti mēraxō shinānifo. ¹⁶ A shināifo keskara mā tāpixō Juan ato yoini: “Ēkai Cristoma. Nāskakē ē mato maotisanfapani. Akka nā chipo oaito āfe Yōshi Shara mato mēra naneyoi. Nā sharafinakōia, ea keskarama. Aato afama mīshiti fatiro, ē atiroma keskara. Akka ē afaama,” ixō Juan ato yoini. Mā chaima Jesús oaito yoikī ato askafani. ¹⁷ Nāskaxō ato yoipakeni: “Mā Nios shināito mato ifixii. Akka a shināyamaifo ato ifixiima. Afāfekairoko ifofaifono nāfo chiifā mēra ato potano anoax omiskōipakenakako” ato fani.

¹⁸ Nāskatari meka shara ato yoini, āto ōiti mēra ato nanemapakōini āto chaka xatenōfo. “Mā nōko Ifo Jesucristo chaima oi kiki, shināsharakōikāfe,” ixō ato yoitaifapani. ¹⁹⁻²⁰ Askatari xanīfo Herodes yoini: “¿Afeskakī mī exto āfi fāitamē? Askatari mā ato chakafafōfāsafai,” fani Juan. Askafaito nikakī Herodes akiki ōitifishkixō achixō karaxa mēra ikimani.

Juan Jesús maotisanfani faka Jordán anoxō
(Mt. 3.13-17; Mr. 1.9-11)

²¹ Akka Herodes karaxa mēra nīchiyoamano Juan ato maotisanfapani. Jesúsri mā yosiaito nāri maotisanfani. Mā maotisanfano fininākfāta Apa Nios kifini.

²² Apa kifiaino nai mēranoax oa rifi keskara āfe Yōshi Shara fotopakekafāni akiki. Fotopakekafanaino nai mēranoax mekaito nikani iskaito: “Mī ēfe Fakekōi ē mia noikōi. Ē mikiki inimasharakōi,” ixō Apa Jesús yoiaito nikani.

Jesucristo āfe xinīfāfe anefo
(Mt. 1.1-17)

²³ Jesucristo mā treinta xinia axō taefakī ato yoini Apa Niospa meka. Yorafāfe José fakera fāfiaifono Niospa Fake ini. Nāskafiax nāato chata ipaoni Elí. ²⁴ Elí apa Matat ini. Matat apa Leví ini. Leví apa Melqui ini. Melqui apa Jana ini. Jana apa José ini. ²⁵ José apa Matatías ini. Matatías apa Amós ini. Amós apa Nahúm ini. Nahúm apa Esli ini. Esli apa Nagai ini. ²⁶ Nagai apa Maat ini. Maat apa Matatías ini. Matatías apa Semei ini. Semei apa Josec ini. Josec apa Judá ini. ²⁷ Judá apa Joanán ini. Joanán apa Resa ini. Resa apa Zorobabel ini. Zorobabel apa Salatiel ini. Salatiel apa Neri ini. ²⁸ Neri apa Melqui ini. Melqui apa Adí ini. Adí apa Cosam ini. Cosam apa Elmadam ini. Elmadam apa Er ini. ²⁹ Er apa Josué ini. Josué apa Eliezer ini. Eliezer apa Jorim ini. Jorim apa Matat ini. ³⁰ Matat apa Leví ini. Leví apa Simeón ini. Simeón apa Judá ini. Judá apa José ini. José apa Jonam ini. Jonam apa Eliaquim ini. ³¹ Eliaquim apa Melea ini. Melea apa Mena ini. Mena apa Matata ini. Matata apa Natán ini. ³² Natán apa David ini. David apa Isaí ini. Isaí apa Obed ini. Obed apa Booz ini. Booz apa Sala ini. Sala apa Naasón ini. ³³ Naasón apa Aminadab ini. Aminadab apa Admín ini. Admín apa Arni ini. Arni apa Esrom ini. Esrom apa Fares ini. Fares apa Judá ini. ³⁴ Judá

apa Jacobo ini. Jacobo apa Isaaca ini. Isaaca apa Abraham ini. Abraham apa Taré ini. Taré apa Nacor ini. ³⁵ Nacor apa Serug ini. Serug apa Ragau ini. Ragau apa Peleg ini. Peleg apa Heber ini. Heber apa Sala ini. ³⁶ Sala apa Cainán ini. Cainán apa Arfaxad ini. Arfaxad apa Sem ini. Sem apa Noé ini. Noé apa Lamec ini. ³⁷ Lamec apa Matusalén ini. Matusalén apa Enoc ini. Enoc apa Jared ini. Jared apa Mahalaleel ini. Mahalaleel apa Cainán ini. ³⁸ Cainán apa Enós ini. Enós apa Set ini. Set apa Adán ini. Nāskanifo āto xinifo. Akka āto fenafo mā kaiafo. Adán āfe apa Nios ini, nāatomāi onifakē.

4

Satanás chakata Jesús afara chakafamapaini

(Mt. 4.1-11; Mr. 1.12-13)

¹ Mā Juan Jesús maotisaafaano Niospa Yōshi Sharapa iyoaino faka Jordán anoax kani. Tsōa istoma ano kani, Niospa Yōshi Sharapa iyoaino māmāi Niospa Yōshi Shara āfe ōiti mēra naneano. ² Nāskata Jesús ares kafāsani, tsōa istoma ano cuarenta nia oxax afaa pishta piaxma. Nāskakē Satanás akiki kani. Mā akiki nokoxō ifofamapaini. Nāskaxō afara chakafamapaini. Nāskata mā cuarenta nia oxax Jesús fonāikōini, afaa pishta piaxma. ³ Nāskaito ōiki Satanás yoini iskafakī: “Mī Niospa Fakemākī na tokiri pāa fapo,” fani.

⁴ Nāskafaito Jesús kemani: “Maa, na mī ea yoiai keskara ē akima. A nō piai fisti nō shināima nipaikī. Akka Epa Niospa āfe meka shararoko nō shinātiro. Nāskara Niospa meka yoimisto kenei,” Jesús fani.

⁵ Nāskata Jesús fe Satanás yamaris iakekēfofānifo. Māchifā mǎnǎnē fokani. Nārixō Satanás Jesús nā maitio ispani. ⁶⁻⁷ Nāskaxō Satanás yoini: “Ōipo, ea mīa ifofaxō mī ea yonoxonaito na mī ōiaifo keyokōi sharastakōifo ē mia inātiro. Nāskakē keyokōichi āto ifo mī itiro. Nafō ēfenākōifo. Ōipo, na maitio ē ato ināpaiki ē ato inātiro atonā inō,” Satanás fani.

⁸ Nāskafaito Jesús kemani: “Maa, ē mia ifofaima. Nios fisti nōko Ifokōi. Nāskakē nō ratokonō mai chachixō nō yoitiro aato noko shināmanō. Nāskaxō nō yoitiro iskafakī: ‘Mīfi nōko Ifoki nō mia shināi,’ ixō nō yoitiro. Nāskarafi kirika ano keneakī,” Jesús fani.

⁹ Jesús askafaito Satanás anā Jesús iyoni a Nios kīfiti pexefā māmākīaxō yoixiki iskafakī: “Mī Niospa Fakekōiaxroko mī niriax ichopakekafanikai.

¹⁰ Mī ichopakekafānax mī afeskaimakai. Nā Niospa meka kirikaki keneaki isakai: ‘Niospa āfe ājirifo yoixii mia kexenōfo.’ ¹¹ Askatari kirika keneano iskaki: ‘Mī āto mīfiki pakeaito mia achixikani kiki mī tokiriki pakenōma,’ kirika kenea iskakī,” Satanás Jesús fani.

¹² Satanás askafaito afianā Jesús kemani: “Nōa nō meka fetsafaxō nō yoitiroma, ‘Ē afara afeskarafaito, ea Niospa kexei,’ ixō nō shinātiroma. Akka, ‘Niospa ea amapaiyai keskara nā fisti ē atiroki Niospa ea kexenō,’ ixō shinākāfe, ikaki na kirika keneano,” Jesús fani. ¹³ Jesús askafaito nikai Satanás kani, Jesús afeskafatiroma mei. Anā oxō Satanás Jesús afara chaka shināmaniyoxiki ikaini kani. Jesús afara chakafamapaifikī chakafamanima. Akka Jesús finakōia ini Satanás mǎnǎo nia.

Galilea anoxō Jesús ato yoikī taefani

(Mt. 4.12-17; Mr. 1.14-15)

¹⁴ Nāskata Jesús Galilea ano anā kani, Niospa Yōshi Sharapa shināmanaino. Mā nokokē Galilea anoxō yorafāfe nikanifo mā Jesús nokoa ikaxō. ¹⁵ Nāskata

mā nokoxō judeofāfe ichanāti pexe mēraxō ato yoini. Nāskaito ōikani, akiki inimasharakōinifo. “Na feronāfake āfe meka sharakōi,” fanifo.

Jesús Nazarete anoxō nikakaspanifo
(Mt. 13.53-58; Mr. 6.1-6)

¹⁶ Nāskata nā yosini ano kani Nazarete ano. Nāskax safaronō judeofāfe ichanāti pexe mēra ikini māmāi askai feyakatsaxakī. Ikikainax tsaoni. Nāskata niināfafā kirika fita aneni. ¹⁷ Nāskata afia Niospa shināmanaino Isaiás kirika keneni inānifo anenō. Nā kirika fepexō aneni iskafakī:

¹⁸ Niospa Yōshi Shara emēra naneano ea nīchini ē ato yoinō āfe meka shara a afaamaisfo, “Niospa mato noisharai,” ixō, “A Satanás chaka ifofaafa a chaka potakāfe, mato mēra nanepaiyaito anā a chaka nikayamakāfe isharakōixikakī,” ixō ē ato yoinō; askatari nā fēxofori ē ato fero sharafaxonō aō ōisharanōfo: nāskatari nā omiskōikakī afaa shināifoma nāfori ē ato shināmasharanō; ¹⁹ askatari ē ato yoisharanō afetiā Epa Niospa afe yorafo ifimākai,

ixō Jesús aneni. ²⁰ Niospa meka mā yoikī xatexō kirika fēpoxō feronāfake fetsa ināni, tsaopakekafāxō ato yoixiki.

Ato askafaito aas ōiketsanifo. ²¹ Nāskata ato yoini: “Ē fakeyoamano Isaiás eōnoa yoipaoni keskafakī iskaratīa mē mato kirika anexona,” ato Jesús fani.

²² Ato askafaito nikakakī: “¡Aira! Nikakapo, āfe meka sharakōi. José fakefixō ¿afeskakī iskara yoimē?” fanifo.

²³ Askafaifono Jesús ato yoini: “Mā ea iskafairaka: ‘Mī ato Capernaúm anoa sharafaito nō nikamiski mīa anoi sharamefe. Nāskakēri nā mī yoiai keskafakī nonoafari ato sharafafe mia ōixō nō mia chanīmara fanō,’ ixō mā ea yoipairaka,” Jesús ato fani.

²⁴ Anā Jesús ato yoini: “Chanīma ē mato yoikōi. Āto pexekōi anoxō noko iskafatirofo mā nō na ōimis koshikai afaa tāpiama na Niospa meka yoipaiyai aa chanī noko fatirofo. ²⁵ Chanīma ē mato yoikōi. Kirika kenekī nō anetiro iskafakī. Elías nōko mai ano ipaoni. Israel mai ano ari ikano akiki oi inima. Arixō tres xinia ata seis oxe anī, oi manakī. Nāskakē israeli yorafo fonāiki finakōinifo, afaa pikanima. Ari kēro ifomafa fenemais ichapa inifo omiskōikani. ²⁶ Nāskafixō Epa Niospa nōko xini Elías ato ano nīchinima. Askatamaroko Sarepta pexe rasi Sidón mai ano nīchini kēro ifomafa fisti nīchini pimanō. Niospa nīchiaino chai kani. ²⁷ Askatari yora fetsafo israelifāfe mai anoax ichapakōifo rashkishikani inifo. Akka Elías Niospa meka yoimisto aa rashkishiaino ato sharafapaonima. Askatamaroko nā Siria mai anoa fistikōi sharafani. Āfe ane Naamán. Nā Naamán Siria mai anoa ini, israeli inima,” Jesús ato yoini.

²⁸ Jesús ato askafaito nikakani yorafo ichanāti pexe anoax akiki ōitifishkinifo. Akiki ōitifishkikaki achinifo. ²⁹ Achikaxō iyonifo Nazarete pasotai mafa keyakōi ano Jesús iyopainifo arixō potapaikakī.

³⁰ Potapaifiaifono Jesús ato rāfiferani. Nāskax ato makinoax kani.

Nānori feronāfake niafaka chaka nanea ini
(Mr. 1.21-28)

³¹ Jesús Capernaúm ano kani, Galilea mai ano. Nānoxō pena tenetitīa Apa Niospa meka ato yoini. ³² Ato yoiaito nikai iskanifo: “¡Kee! Nikakapo. Nato tāpikī finakōia, meka sharakōi nato yoi,” ikanax aa ranā yoinānifo.

³³ Judeofāfe ichanāti pexe mēraxō yora mēra niafaka yōshi chaka nanexō Jesús fāsikōi mekafani. ³⁴ Iskafakī yoini: “¿Afeskakī mī noko fekaxte-faiyoamē, Jesús Nazarete anoato? ¿Mī noko a omiskōipakenakafo mēra mī noko potaiyoamē? Ē mia ōimisnō, mī sharakōinō Niospa mia nīchiano,” fani.

³⁵ Nīafaka askafaino Jesús yoini: “Mekayamafe. Na feronāfake makinoax tsekekaitāfe,” ixō mitsisipakōikai Jesús niafaka nīchini.

Jesús askafaino nīafaka yora fia kekēfofā potafaini yorafāfe ferotaifi nāskax tsekekaikī afeskafanima.

³⁶ Askafaito ōikakī yorafāfe iskafaino: “Chanīma, Jesús afama mīshti fatiro. Iskarakai nō tsōa ōimisma. ¿Afeskaxō iskafaimē, na feronāfake makinoax niafaka potai? Meka finayakōikē nīafaka nikafainikai,” yorafāfe fanifo.

³⁷ Askafaito ōikaxō yorafāfe pexe tii anoafō yoifofāfōfāinifo Jesús yora makinoax niafaka potaito ōikaxō.

Jesús Pedro rayos sharafani
(Mt. 8.14-15; Mr. 1.29-31)

³⁸ Askakaini Jesús judeofāfe ichanāti pexe anoax tsekekainax Simón pexe mēra ikini. Nānoax Simón rayos yōxafo yonai finakōini. Nāskaito ōikakī Jesús yoixonifo: “Na yonai sharafafe,” fanifo. ³⁹ Askafaifono nā kēro yōxafo yonai mānāo kāta Jesús kātipekafāta yoini iskafakī: “Mī yona nishpafe,” faino samamakōi āfe yona nishpatani. Nāskata mā yonai nishpata, fininīkafāta itipinīshara fani ato pimaxiki.

A isinī ikaifo Jesús ato sharafani
(Mt. 8.16-17; Mr. 1.32-34)

⁴⁰ Akka mā xini kaino nā isinī ikaifo fetsa fetsatapafo Jesús ano efenifo. Nāskakē Jesús āfe mēkemā ato māmāpakeaino sharai fetsenifo. ⁴¹ Rañari nā isinī ikaifo mēranoax niafaka chakafo tsekeni. Fāsikōi mekayanā iskafaino: “Mīfi Niospa Fakekī,” fanifo. Niafakafāfe askafaifono kerexkai Jesús ato pōtapakeni. Nāskaxō ato mekatima fani māmāi tāpiafāfe nāmāi Cristokē.

Jesús ichanāti pexe mēraxō Apa Niospa mekasharaōnoa ato yoini
(Mr. 1.35-39)

⁴² Mā penaino Jesús tsekekaini, pexefā rasi anoax tsōa istoma ano kai. Nāskaino yorafāfe fenanifo. Nāskakanax akiki nokokaxō nētefapainifo ato makinoax kayamanō. ⁴³ Askafaifono Jesús ato yoini: “Akka, ē Niospa meka shara ato yoifofāfōfāni pexe fetsafo ano afe keskaramākī Epa Nios xanīfāfo noko ikini. Nāskakē Epa Niospa ea nīchini, ē ato yoinō.”

⁴⁴ Nāskakē kafāsakī Jesús Niospa meka ato yoifofāsafani, ichanāti pexe mēraxō Judea mai anoxō.

5

Jesús foe rasi tarafanāfā mēra ato fospi faxoni, tsōa atiroma keskafakī
(Mt. 4.18-22; Mr. 1.16-20)

¹ Pena fetsa Jesúsxō foe rasi finifo iamāfā ketokonōxō Genesaret anoxō. Askafaito ōikani yora rasi akiki fenifo. Niospa meka niakai fekani. ² Jesús nānoa kanōanāfā rafe rakakē fichini, nā kanōanāfā mēranoax mā fotokaxō ifofāfe ato tarafanāfā chokaifono. ³ Nāskakē nā kanōanāfā fetsa mēra Jesús naneinākfani, nā Simōn mēra. Nāskaxō yoini: “Eaya fenāmāshta kanōanāfā pitsikife,” fani. Nāskata kanōanāfā mēra tsoxō yorafo yoikī taefani. ⁴ Mā ato yoikī xatexō Simón yoini: “Nā ĩa noa ano kanōanāfā fotakāfe. Anoxō māto tarafanāfā potaxō foe fixikakī,” fani.

⁵ Askafaito Simón kemani: “Maestro, fakishchāi nō yonoshina tarafanāfānē fipaikī. Akka nō fiamā. Akka mī noko yoikai ē tarafanāfā potenō,” fani.

⁶ Mā āto tarafanāfā potekaxō foe ichapakōi finifo. Oa tarafanāfā faxteai keskara meenifo. ⁷ Nāskakaxō nā ato fe rafeafo ato kenanifo, kanōanāfā fetsoānoa, ato feta fii fenōfo. Nāskakaxō nā kanōanāfā rafe foe rasi fospikōi faafono nā kanōanāfā rafe faka fospikōiax foefoya ikikerani. ⁸ Nāskara ōikī Simón Pedro Jesús nāmā ratokonō mai chachipakefōfā yoini: “Ifo, emakinōax katāfe, ē feronāfake chakakī,” fani.

⁹ Simón askaito ōi a āfe rafeafori ratekōinifo Jesús foe ichapa tarafanāfā mēra ato nanexonano. ¹⁰ Akka nā Simón fe rafeafo inifo, Santiago fe Juan āto apa Zebedeo ini. Nāskakē Jesús Simón yoini: “Rateyamafe. Iskaratīa yorafo ēfe Yōshi Sharaōxō mī ekeki efeikai,” fani.

¹¹ Nāskakata āto kanōanāfā fōkata ĩamāfā kesemē nexakata mā Jesús fe fōkakī āto afama mīshti ōifainifo.

Jesús yora rashkishiai sharafani (Mt. 8.1-4; Mr. 1.40-45)

¹² Pena fisti pexe rasi ano Jesús ikano nāno feronāfake isinī iki rashkishi fetseax akiki oni. Mā akiki oxō ratokonō mai chachipakefōfā yoini: “Ifo, ea sharafapāikī mī ea sharafatiro,” faito, ¹³ Jesús āfe mēkemā ramāyanā yoini iskafakī: “Ē mia sharafanō. Iskaratīa mī sharaikai,” faino a rashkishi fetseai koshikōi sharatani. ¹⁴ Mā sharano Jesús nīchini iskafakī yoiyanā: “Mī tosa yoiki. Akka nā ato Nios kīfixomis ispatāfe. Nāskaxō ovejanā fake foxō ināfe mia retexonō Moisés yoini keskafakī. Nāskaxō keyokōichi tāpinōfo a mī isinī imis mā mī sharano,” ixō Jesús yoini.

¹⁵ Jesús askafaito aōnoa mēxotaima nikakī finakōinifo. Nāskakanax yora kaya akiki fenifo nikakani, a isinī ikaifori ato sharafapanō. ¹⁶ Nāskax Jesús ato makinoax kani, a tsōa istoma anoxō Apa Nios kīfikai.

Jesús yora finimisma sharafani (Mt. 9.1-8; Mr. 2.1-12)

¹⁷ Pena fetsa Jesús ato yoiaino nāno fariseofo tsoafo inifo. A Moisés yoikī kirika keneni keskara ato tāpimamisfori inifo. Pexe rasi Galilea anoax fekāta Judea anoax fēkata Jerusalén anoax fēkata inifo. Nānoxō Niospa āfe shara Jesús ato ōimani, a isinī ikaifo ato sharafapakī. ¹⁸ Nāskakata feronāfakefo nokonifo. Feronāfake finimisma ratatinī rataxō iyoifokani. Nāskakata pexe mēra ikimapainifo, Jesús ano iyopaikakī. ¹⁹ Akka afeskaxma ikitiroma inifo, yorafo ichapakōimāiyakē ikipanāfāfe. Nāskakanax pexe fomākīa inanifo. Nārixō nā finimisma ratatinī rataxō fotomapakefōfānifo, yorafāfe ferotaifi Jesús nia nāmā. ²⁰ Jesús ōini shināifāfe iskakakī na finimisma Jesús sharafai kiki ikaxō. Nāskakē a finimisma Jesús yoini: “Efe yorashta, mē mia chaka soaxona,” fani.

²¹ Nāskafaito ōikakī, a Moisés yoikī kirika keneni keskara ato tāpimamisfo feta fariseofāfe shinānifo iskakakī: “Akka, ¿na tsoamē na chanīai Nios chakafakī mekafayanā? Akka Nios fistichi ato chaka soaxotiro,” fanifo.

²² Akka Jesús tāpini askafaifono. Nāskaxō ato yōkani: “¿Afeskakī iskara mā shināimē? ²³ Akka, ¿ē afaa fatiromē? Mē mia chaka soaxona ē fatiromē, askayamakī mē mia sharafaa ē fatiromē,” ixō ato yoini. ²⁴ “Akka ē mato tāpimanō Niosxō ē ato chaka soaxotiroki nono mai anoxō,” ato fani. Nāskaxō a

finimisma yoini: “È mia yoi, fininīkafāta mī rakati fifaini mī pexe ano katāfe,” fani.

²⁵ Nāskafaino a finimisma fininākfani yorafāfe ferotaifi. Nāskaxō a kamaki rakamis āfe rakati fifaini āfe pexe ano kani. Epa Nioski inimayanā. “Aicho, Epa Nios sharafinakōia,” faafoni. ²⁶ Finikainaito ōikani ratei fetsenifo. Nāskakanax, “¡Aicho, Epa Nios sharafinakōia!” inifo. Ratekōiyanā iskafakī yoinifo: “Akka mā nō ōi afama mīshti shara fai,” fanifo.

Jesús Leví ifni aōxō tāpimis inō

(Mt. 9.9-13; Mr. 2.13-17)

²⁷ Mā askafata Jesús tsekekaikī ōini, a āfe xanīfo Roma anoa kori fixomis. Nā āfe xanīfo kori fixomisto āfe ane Levī* ini. Akka nā ato kori fixomis ano tsoao ini. Nāskakē Jesús yoini: “Efe kafe,” fani.

²⁸ Nāskafaino Levī fininākfāta āfe afama mīshtifo ōifaini Jesús fe kani. ²⁹ Nāskata chipo Levī āfe pexe anoxō fista efapa ani Jesús noisharakōiyanā. Yora ichapa rasiri afe inifo. Nā xanīfo Roma anoa kori fixomisfo. Yora fetsafori afe inifo. Nāno ato fe mīsa ano tsaonifo. ³⁰ Akka nā fariseofo feta a Moisés yoikī kirika keneni keskara ato tāpimamisfāfe Jesúsxō tāpimisfo mekafakī taefanifo. Ato iskafanifo: “¿Afeskakī ato feta pita ato feta ayata mā faimē? Na ato kori fixomisfo feta na yora chakafo fetari mā pii,” ato faifono, ³¹ Jesús ato kemani: “A sharafāfe notoro fenakanima, a isinī ikaifāfemari notoro fenakanima. Akka nā isinī ikaifāfe notoro fenakani. ³² Akka a yora sharafoōnoax ē onima. Nā afara chakafakanax shināmitsaifoōnoax ē oni, ato chaka soaxoxiki Epa Nios Ifofanōfo,” ato fani.

Nā foni tenemisfofāfe Jesús yōkanifo

(Mt. 9.14-17; Mr. 2.18-22)

³³ Iskafakī Jesús yoinifo: “Akka Juan inafāfe, fariseofāferi foni tenekōiyanā Epa Nios kīfikī chai yoimisfo. Akka mī inafāfe mēxotaima piyanā ayakani,” faifono,

³⁴ Jesús ato kemani: “Akka yorafo matoki feafono mā ato foni tene-matiroma, feronāfake āfiyai. Nā feronāfake mato fe ikano inimakōikī mā ato feta pitiro. ³⁵ Akka nā feronāfake ato makino a iyoafono āfe yorafāfe shinākakī foni tenetirofo. Nāskarifiakī eōxō tāpimisfāfe inimakakī pitirofo. Akka mē ato makinoax kaano ea shinākakī tsōa pitiroma,” ixō Jesús ato yoini.

³⁶ Nāskafata afianā Jesús ato yoini iskafakī, mēka fetsafaxō: “Tsōa sama fenaya sama xini kishi fatiroma. Nō askafaino sama fena samama chakanatiroma. Nāskatari sama fena fe sama xini isharatiroma. Nāskakēri nā ē mato yoiai keskara mā nikakōixō a mā ipaoni keskai anā mā itiroma māmāi ea nikakōiax. A mā ipaoni keskara shināmakita nāskax mato yora fena keskara shara itiro. ³⁷ Nāskarifiakī tsōa māmā fata koiro pisha xini mēra nanetiroma nā māmānō farax akaino toxamāiyanō. Nāskakē nā māmā fata fe koiro pisha chakanatiroma. Akka nā mato xinifāfe mato yoimisfo keskara fe nā ē mato yoiai keskara osinātiroma. Nā ē mato yoiai keskara Niospa mēka sharakōi. Akka a mato xinifāfe mato yoimisfo anori shināx mā isharatiroma. Niospa mekaya mēka chaka osinātiroma. Nāskakē mā nikapaifikī mā shināsharatiroma. ³⁸ Nāskarifiakī tsōa māmā fata koiro pisha xini mēra nanetiroma nā māmānō farax akaino toxamāiyanō. Nāskakē nā māmā fata fe koiro pisha chakanatiroma. Akka nā mato xinifāfe mato yoimisfo

* 5:27 Levī ane rafeya ipaoni. Āfe ane fetsa Mateo.

keskara fe nã ã mato yoiã keskara osinãtiroma. Nã ã mato yoiã keskara Niospa meka sharakõĩ. Akka a mãto xinifãfe mato yoimisfo anori shinãx mã isharatiroma. Niospa mekaya meka chaka osinãtiroma. Nãskakẽ mã nikapaifikĩ mã shinãsharatiroma. ³⁹ Akka mã mã pae ayatiakaxõ anã tsõa fata ayapaitiroma. Nãskariai iskatirofo: 'Nã ã ipaoni keskara afianã ã askapai, ãfe xinifãfe ea yoimisfo keskara shara nã fisti ã shinãĩ. Akka meka fetsa chaka ã nikapaima. Askatari meka fena chaka ã shinãima,' ixõ shinãmisfo fariseofãfe,' Jesús fani.

6

Nã judeofãfe pena tenetitã Jesúsõ tãpimisfãfe aros keskara metesfenifo

(Mt. 12.1-8; Mr. 2.23-28)

¹ Nã pena tenetitã Jesús aõxõ tãpimisfo fe tarepa kani. Kakĩ aõxõ tãpimisfãfe aros keskara metesaxõ fonãikakĩ piifonifo. ² Nãskakẽ fariseofãfe ato yõkanifo: "¿Afeskakĩ mã na aros keskara metesfeimẽ na pena tenetitã tsõa yonotiroma ixõ Moisés noko yoifinino?" fariseofãfe ato fanifo.

³ Ato askafaifono Jesús ato kemani, "Akka, ¿a nõko xini Davidõnoa kirika keninifo keskara mã õimismẽ David afaa afeska fanimẽ ãfe inafõ feta fonãikõĩ? ⁴ Nãskax a Nios kĩfiti pexefã mãra ikikaini. A mãra ikikaixõ pãa fichixõ pini, nã pãa Nios inãmisfo. Nãskaxõ ãfe inafõri inãni akairi pinõfo, akka nã Nios ato kĩfixomisfãfe ares nã pãa pifiamisfono. Akka fonãikĩ finakõikĩ David nã pãa pini ãfe inafõ feta. ⁵ Akka ãfe Epa Niospa ea katonĩ. Nãskakẽ eres fisti ã yoitiro a nõ atiro keskara na pena tenetitã," ixõ Jesús ato yoini.

Feronãfake mẽke yõshiya Jesús sharafani

(Mt. 12.9-14; Mr. 3.1-6)

⁶ Pena fetsa pena tenetitã Jesús ikikaini judeofãfe ichanãti pexe mãra anoxõ ato yoixiki. Anoxõ ato yoiaino, nãno ato fe feronãfake ãfe põya kayakai aõri ãfe mẽke yõshiya ini. ⁷ A Moisés yoikĩ kirika keneni keskara ato tãpimamisfo feta fariseofãfe õinifo, na pena tenetitã na mẽke yõshiya Jesús sharafaimãkai ikaxõ, afara chakafaira ixõ yõapaikakĩ.

⁸ Akka Jesús mã tãpia ini a shinãifo keskara. Nãskaxõ a feronãfake mẽke yõshiya yoini: "Fininãkafãta ato nẽxpakã nife," faino, nã mẽke yõshiya fininãkafãta niini. ⁹ Nãskaxõ Jesús ato yoini: "Ëri mato yõkanõ. Akka, ¿pena tenetitã afaa nõ afeskafatiromẽ, shara fayamakĩ nõ chakafatiroraka? Askatari ato ifiyamata, nõ ato retetiroraka," ato fani. ¹⁰ Nãskaxõ keyokõĩ ato õiakeni, a kemataima tsaoafo. Nãskata a feronãfake mẽke yõshiya yoini: "Mẽshafe," faino nã mẽke yõshiya meshatani. Nãskax mẽke sharakõia ini. ¹¹ Akka nã fariseofo fe a Moisés keneni tãpimisfo akiki õitifishkinifo. Nãskax ãa ranã yoinãnifo: "¿Nõ Jesús afeskafatiromẽ?" ikanax.

Jesús aõxõ tãpimisfo doce feronãfake ifini

(Mt. 10.1-4; Mr. 3.13-19)

¹² Pena fetsa Jesús kani mãchi keya ano Apa Nios kĩfikai. Arixõ fakishchãĩ Apa Nios kĩfishini. ¹³ Mã penano a aõxõ tãpimisfo ato kenani. Nãnoxõ doce faxõ ato katonĩ, aõnoa ato yoimisfo inõfo. ¹⁴ Nã feronãfake docefãfe ãto anefõ fetsa Simõn ini, ãfe ane fetsa Jesús faxoni Pedro fakĩ; fetsari Andrés ini, nã Simõn exto; fetsari Santiago ini; fetsari Juan ini; fetsari Felipe ini; fetsari Bartolomé ini; ¹⁵ fetsari Mateo ini; fetsari Tomás ini; fetsari Santiago ini, nã Alfeo fake; fetsari Simõn ini. Nãato ãfe kaifo feta romanõfo potapaipaoni, anã israelifo

yonomanōfoma. ¹⁶ Fetsari Judas ini, nā Santiago fake; fetsari Judas Iscariote ini, nāato Jesús ato achimani. Nā tii Jesús ifini doce faxō aōxō tāpimisfo inōfo.

Jesús yora ichapafō tāpimani

(Mt. 4.23-25)

¹⁷ Jesús māchi keya ariax fotoni, aōxō tāpimisfo fe a mai sapa shara ano. Nānoax aōxō tāpimisfo mā ichanāfo inifo. Yora fetsafori ato fe inifo, Judea mai anoax, Jerusalén anoaxri feafo ini fāka fā kesemēnoaxri. Tiro anoa fekāta Sidón anoaxri fenifo. Āfe meka nikaxikakī Jesúski fenifo, aa isinī ikaifori ato sharafapanō. ¹⁸ A niafaka chakata ato fekaxtefaito ato makinoa Jesús potano sharai fetsenifo. ¹⁹ Nāskakē yorafāfe Jesús ramāpaikani, āfe sharaōxomāi Jesús ato sharafapaino.

Nā nimaifo yafi a nimaifoma Jesús ato yoini

(Mt. 5.1-12)

²⁰ Jesús aōxō tāpimisfo ōikī yoini iskafakī: “Afaamaisfiāx mā inimakōitiro. Nios Ifofaax afe mā ipaxatiro nōko xanīfokōimāiyakē. Nāskakē mā inimatiro.

²¹ “Nā yorafāfe fonāikī pipaiyaifo keskafakī māri mā Nios Ifofasharakōipaiyai to mātō ōiti mēra āfe meka shara nanetiro, mā inimasharakōinō. Iskaratīari omiskōi mā oiafiāx chipo mā inimai fitsakōitiro Nios fe ipaxakī,” ixō Jesús ato yoini.

²² Anā Jesús ato yoini: “Inimakōikāfe yorafāfe mato noikaspaifono mato potayanā. Askatari mato ichaifono, askatari mato ōikaspaifono askatari mato anekī chakafaifono. nāskakē inimakāfe eōxō mato askafakani kiki. ²³ Nāskakē mato askafaifono inimai finasharakōikāfe. Nāskaxō a nai mēraxō Niospa afara sharafo mato mekexona mā fixikai. Akka nā mato chakafaifo keskafakī āto xinifāferi nā Nios ato yoixomisfo chakafapaonifo ato omiskōimayanā,” ixō Jesús ato yoini.

²⁴ Akka nā kori ichapayafō Jesús ato yoini iskafakī: “Ooa. Iskaratīa mā kori ichapayax mā inimakōi. Akka chipo naax mā omiskōipakenaka, Nios Ifofamax kori fisti shinākatsaxakī.

²⁵ “Ooa. Iskaratīa afara ichapayax mā inimakōiyoi; akka chipo mā fonāixii. Askatari iskaratīa mā fitsakōiyoi; akka chipo shināmitsai mā oiaxii.

²⁶ “Yorafō sharakōira mato faifono, mā inimakōimis. Mātō xinifori nāskapaonifo, nō Niospa meka tāpikōikē noko yoisharakōikanira ikanax āa chanīfikani,” Jesús ato fani.

“Mato noikaspaifafono māroko ato noikāfe,” Jesús ato fani

(Mt. 5.38-48; 7.12)

²⁷ Nāskata anā Jesús ato yoini: “Akka mā ea nikaito ē mato yoi. A mato noikaspaifo ato kopikima ato noikāfe. Askatari ato axosharakāfe. ²⁸ Mato chakafaifāferi ato yoisharakāfe. Askatari a mato omiskōimamisfo Epa Nios ato kīfixokāfe. ²⁹ Akka fētsa mato tapasaito, ‘Takai fetsari ea afe,’ fakāfe. Askatari fētsa mato tari fiaino āa fotanō inākāfe, rapatiri mato fiaito inākāfe āa fotanō. ³⁰ Akka fētsa mato afara yōkaito inākāfe. Askatari fētsa mato afara fiaito ferateyamakāfe. ³¹ Nā mā fichipaiyai keskafakī fetsafāfe mato axosharaifono, nāskarifiakī māri fetsafori axosharakāfe.

³² “Akka mā ato noikī nā mato noiaifos mā ato noia, askarakai sharama. Yora chakafori nāskariakani; nā ato noiaifos ato noikani. Mā askainokai, ‘Mā afarafo shara faa,’ ixō Niospa mato yoima. ³³ Askatari mā ato afara axoshara nā mato afara axosharaifos, askarakai sharama. Nāskariakani yora chakafori. ‘Mā afara sharafo shara faa,’ ixō Niospa mato yoima. ³⁴ Akka

mā ato kori ināxō mā ato shinākōimis nokomāi kopifakōikanira ixō; akka na yora fetsafāfe ea afaa kopifatirofoma. Nāskakē ē ato afaa ināpaima ixō mā shinākī mā afaa ināma, askara sharama. Nāskarifiakani yora chakafo kori inānōnāmisfo nokomāi kopifasharakōikanira ikanax. ³⁵ Akka ē mato yoinō, nikakapo. A mato noikaspafāfe māroko ato noikāfe, ato shara fakāfe. Afara ato ināxō ea kopifafe iyamakāfe. Mā askai Epa Nios ari mā nokoaito matoki inimayanā afara sharafo mato ināxii. Nāskax mā Nios Sharapa fake mā iki. Nāfi tosa keskaramāki sharafinakōiaki. Epa Nios sharakōi tsōa fayamafiaino ato noikōi. Nā yora chakafori ato noi. ³⁶ Nāskakē māri ato noikōikāfe, nā Epa Niospa ato noikōiai keskafakī,” ixō Jesús ato yoini.

*“Fetsafo mekafakī chakafayamakāfe,” ixō Jesús ato yoini
(Mt. 7.1-5)*

³⁷ Anā Jesús ato yoini iskafakī: “Mēxotaima fetsafo mekafayamakāfe iskafakī yoikī: ‘Nato afara chakafakī Niospa omiskōimapainō,’ fakī. Akka mā ato askafayamaino Niospari mato mekafatiroma iskafakī yoikī: ‘Na yorafo chakafo,’ mato fatiroma. Akka yorafo fe rafesharaxō ato raefakāfe. Mā askaino Epa Niospa matori raeshara faxii mā yorafo fe rafesharano. ³⁸ Fetsafo afara ināsharakōikāfe. Mā fetsafo afara ināsharakōikē, matori Niospa afara ichapa sharakōifo ināxii. Akka mā fetsafo afara ināsharakēma Niospa matori afaa ichapa ināxima, mā ato afara ināsharakōikēma,” Jesús ato fani.

³⁹ Jesús meka fetsafaxō ato yoini iskafakī: “Akka yora fēxo afe fēxo iyopai kī iyotiroma, mai xato mēra paketiro. Nāskari fakī fētsa Niospa meka tāpioxoma mato yoitiro. Askara yorafo yoyimakāfe, mato anorima yoitirofoki. ⁴⁰ Akka a aōxō tāpimisfāfe a ato tāpimamis finōtirofoma. Akka mā tāpisharakōikanax āto maestro keskara itirofo.

⁴¹ “¿Afeskakī ifi pasta pishta fetsa feronaki ikano mā òimē, māroko ifi pasta efapa feostamefixō? ⁴² Akka, ¿mā shināimamē a mā ifi pasta efapa feostamea? Akka afeskakī mā fetsa iskafaimē: ‘Yamā, ē mia fixonō a mī ifi pasta pishta fero naki ika,’ fakī, mākōi mā kakamepaimis. Mākai afaa tāpiama. Akka a mā ifi pastafā feostamea mā tsekayokāfe. Nāskaxō mā mā òisharakī a fetsa feronaki ika mā fixosharatiro. Nāskari fakī mā chaka xateyamaxō mā fetsafo chaka xatematiroma. Akka māto chaka xatexō fetsafo mā chaka xatematiro,” ixō Jesús ato yoini.

*Ifi āfe fimioxō nō tāpitiro afe keskaramākī
(Mt. 7.17-20; 12.34-35)*

⁴³ Anā Jesús ato yoini iskafakī: “Ifi shara fimi chakaya itiroma. Ifi chakari fimi sharaya itiroma. ⁴⁴ Akka ififo āfe fimioxō nō tāpitiro afe keskaramākī. Moxaya òikī nō tāpitiro. Na keoimara nō fatiro. Nāskari fakī nō tāpitiro moxaya òikī, nari uvamara nō fatiro. ⁴⁵ Nāskari fakī yora sharapa meka shara yoitiro, āfe òiti mēraxomāi shara shinākī. Akka yora chakapari meka chaka yoitiro, āfe òiti mēraxomāi chaka shinākī. Nāskaxō nā āfe òiti mēraxō shināi keskara yoitiro.”

*Pexe rafeñoa Jesús ato yoini
(Mt. 7.24-27)*

⁴⁶ Nāskaxō anā Jesús ato yoini: “Akka, ¿afeskakī mā ea Ifofafiakī, a ē mato yoiyai keskara mā akimamē? ⁴⁷ Ē mato yoinō afe keskara fomākī nā ea nikaifo, nāfāfe nā ē ato yoiyai keskara amisfo. ⁴⁸ Nā yōra pexe fai keskara, pexe fakī mai chai pōkixō mai teiki nokoxō pexe kishi nīchiano. Mā faka faikī

faka poikōikī pexe afeskafatiroma pexemāi kerexkōikē. Nāskarifiakī yōra ea Ifofasharakōixō afara afeskara afiaito shināchakatiroma. ⁴⁹ Akka nā ē yoiaito ea nikaito nā ē yoiāi keskara akima, nā yora tatimato pexe fai keskara. Pexe fakī tāpīxoma pexe kishi nīchisharamano, a nāmā faka faikī potatiro. Nāskax mā pexe pāoikax chakanakōitiro. Nāskarifiakī fētsa ēfe meka nikafikī ea nikasharaima. Nāskakē omiskōipakenakafo,” ixō Jesūs ato yoini.

7

Jesūs sharafani romanō xanīfāfe āfe ina yonaito (Mt. 8.5-13)

¹ Mā Jesūs yorafo yoikī xateax Capernaúm ano kani. ² Nāno soraro xanīfo romanō ini. Nāato a yonoxomis fichisharapaikōimis yonafinakōi nakerani. ³ Nānoxō nā soraro xanīfāfe nikani Jesūsnoa yoaifono. Nāskaxō judeo anifofo nīchini Jesūs yoixotanōfo a yonoxomis sharafaxoyonō.

⁴⁻⁵ Ato askafaino mā fokaxō Jesūs yoinifo iskafakakī: “Oa soraro xanīfāfe nofe yora yamafixō noko axosharamis ikaxō chikishta,” fanifo. “Noko keyokōi noikōimis nāato ichanāti pexe noko faxoni. Nāskakē āfe ina mī sharafaxotiro,” judeofāfe Jesūs fanifo.

⁶ Askafafono Jesūs ato fe kani. Akka Jesūs mā pexe chaima faikaino, nā soraro xanīfāfe afe rafeafo nīchini yoitanōfo iskafakī: “Ifo, ē mia fekaxtefaima. Ēkai afaama. Akka mī tsoa keskarama. Mī finakōiakī ēfe pexe ano kayamafe. ⁷ Akka ēkairoko afaax nāskakē ē mikiki kaama. Akka mī mekapa a ea yonoxomis ea sharafaxōfe nonoxō. ⁸ Akka eari ēfe xanīfāfe yonomamis. Ēri sorafōfo yonomatiro. ‘Katāfe,’ ē faino karisatiro. Askatari, ‘Ekeki ofe,’ ē faino ekeki orisatiro. Nāskakē a ea yonoxomisri afara ea axōfe ē faino ea axotiro. Akka mī afama mīshti fatirokī. Mī mekapa a ea yonoxomis ea sharafaxōfe,” ixō yoini.

⁹ Askafaito nikakī a afe foafo Jesūs ato yoini: “Kee, nikakapo. Na feronāfake israeli yamafixō ea chanīmara fakī finakōi, fetsafo keskarama. Akka Israel anoafāfe ea iskafamisfoma chanīmara fakakī,” ato fani.

¹⁰ Ato Jesūs askafaino a sororo xanīfo fe rafeafo mā āto pexe ano fokaxō ōiafo a yonaito ōifaino mā shara fichitoshinifo.

Jesūs otofani kēro ifomāfa fake

¹¹ Mā askafata Jesūs kani pexe rasi āfe ane Nain ano. Āfe inafō fe kaino yora ichapafori afe fonifo. ¹² Mā pexe rasi chaima fāi kakī ōini a naa iyoifofaifono maifafokakī. Kēro ifomafa nā āfe fake fisti ini. Nā kēro ifomafa fe yora ichapafo afe fonifo. ¹³ Nā kēro ifomafa oiaito ōikī, Jesūs shinākōikī yoini iskafakī: “Oiyamafe,” fata, ¹⁴ Jesūs kaxō a kamaki rataxō iyoī foaifo ramāni. Akka nā iyoī foaifo nāno nētenifo. Nāskata nā naita Jesūs yoini: “Naetapa, ē mia yoi, fininīkafāfe,” faino, ¹⁵ fininīkafāni. Nāskakē a naita fininīkafā tsaota mekani. Nāskaxō Jesūs afa yoini: “Nakīa, mī fake,” fani. ¹⁶ Nā naita Jesūs otoa ōikani. Yorafo ratei fetsenifo. Nāskakaxō Nios yoisharakōinifo iskafakakī: “Epa Niosfī finakōiakī āfe meka yoisim nokoki noko,” fanifo. Nāskatari yoikī iskafanifo: “Epa Nios nokoki nokokōia, afe yorafo kexesharaxiki,” fanifo. ¹⁷ Nāskakē Judea anoxō keyokōi nikaketsanifo, aa kematai ixori nikaketsanifo a naita Jesūs otofakē.

Juan aōxō tāpimisfo Jesūsiki nīchini (Mt. 11.2-19)

¹⁸ Juan karaxa mēraxō nikani Jesús ato sharafaito Apa Niosxō. Nāskaxō āfe ina rafe kenani. ¹⁹ Nāskaxō ato nīchini Jesús ano fotanōfo mā ato nīchia fokaxō yoinōfo iskafakī: “¿Mīmē Cristo nā Epa Niospa nokoki nīchiai, askayamai fetsa nokoki oiraka nā nō manai?” ixō yoitanōfo Juan ato nīchini. ²⁰ Mā Juan ato nīchia fokaxō Jesús yoinifo: “Juan Maotista noko nīchia nō oa mia yōkaiyoi, mīmakī a Niospa nokoki nīchia, askayamakī fetsa nō manairaka,” fanifo. ²¹ Jesús anoxō yora ichapa sharafapani, a isini ikanaifo sharafata, a omiskōifinakōiafo sharafata, a niafaka chaka ato mēra nanea ato makinoa potata, a fēxoxo ato fero sharafaxōaito ōimifo.

²² Nāfo askafata Jesús ato kemani iskafakī: “Fokaxō Juan yoitakāfe a mā ōiyanā a mā nikaforti. Yoitakāfe, mā fēxofāfe sharakaxō ōisharakani kiki, askatari nā chatofori mā sharakanax niafoki, a rashkishiaifori mā sharafokī, a pastofāferi mā nikasharakani kiki, a namisfori mā otoafokī, a afaamaisfāferi Niospa meka shara nikakani kiki afeskaxō Epa Niospa noko ifitiromakī. ²³ Akka a ea chanīmara fasharakōia afara fetsa shinātama ekeki inimakōitiro,” Jesús ato fani, Juan ina rafe.

²⁴ Nā Juan ato nīchia rafe mā foaifono Jesús yorafo yoikī taefani Juanoa, iskafakī ato yoikī: “¿Afskakī tsōa istoma anoa Juan ōifokani fonifomē? Juankai nā nēfe tafa pei takka akai keskarama. Nāskarifiakī mā mā tāpia Juankai ōiti ranāyama. ²⁵ Akka, ¿tsoa ōikai mā kamismē? Ōitsai, feronāfake rapati sharakōi safekē ōikai mā kamisraka. Akka mā mā tāpia a rapati sharakōi safemisfo xanīfofofāfe āto pexe anoxō rapati sharakōi safetirofo. ²⁶ Akka, ¿tsoa ōikai mā kamismē? Nā Niospa meka yoimis ōikai mā kamisraka. Akka chanīma, nā Juan Niospa ina finakōia fetsafo keskarama. ²⁷ Akka nā Juanoa yoikī Isaias kirika keneni iskafakī:

Mī nai ariax mai ano fotoyomano nā ēfe meka yoimis ē nīchiki taefai mīōnoa ato yoiaino itipinīsharakaxō mia nikakōinōfo, ixō keneni. ²⁸ Akka ē mato yoi, ē mato pārima. Tsōakai Juan finōama. Juan yoimis keskara meka shara noko tsōa yoimisma. Juanki Nios inimakōimis. Akka fetsafāferi afayamafikaxō ea Ifofaifono Nios atoki inimakōi. Nāskakē Juan finōkōiafo Niospa ato ōimis.”

²⁹ Keyokōichi Juan nikanifo, a xanīfo Roma anoa kori fixomisfāferi nikanifo. Nāskakē Juan ato maotisafapani māmāi tāpikōiafāfe Nioskairoko chanīmiskē. ³⁰ Akka nā fariseofo fe a Moisés yoikī kirika keneni keskara ato tāpimamisfo afo maotiskaspanifo Juan yorafo maotisafapaino. Nā Niospa ato yoipaiyai keskara nikakaspanifo.

³¹ Nāskaxō anā ato yoini: “Iskaratīa na niyoafo afe keskarafomākī ē mato yoinō mā tāpinō. ³² Nā fakefo āto kaxeti anoax kaxekakī āto yamafo kenitirofo tai tai iyanā. Akka mā āto yamafo nokokanax a ato yamafāfe fichipaiyaifo keski tsoa kaxesharayamaino ato yoitirofo iskafakakī: ‘Nō nōko xaiti maneaino akka mā mairamisma. Askatari shināmitsayanā nō fanāikaino mā oiamisma,’ ixō ato yoitirofo. Akka māri nāskariai mā tsoaki iniamisma. ³³ Akka Juan Maotista oni. Atokai pikī finapaimisma, askatari afaa pae ayamisma. Akka mā yoimis iskafakī: ‘Juan niafaka yōshi chakaya,’ mā famis. ³⁴ Akka ē Niospa Fakekōi oni. Piyanā ē ayamis. Akka ea mā iskafakī yoimis: ‘Jesús ichapakōi piimis, askatari pae ayamis,’ mā ea famis. ‘Nāskax yora chakafo fe rafemis, a romanō xanīfo kori fixomisfo ferī rafemis,’ mā ea famis. ³⁵ Akka ē shara imis Niospa ea shināmanaino. Juanri shara imis Niospa shināmanaino. Yorafāfe noko ōikī tāpitirofo,” ixō Jesús ato yoini.

Jesús Simón pexe ano kani. Nā Simón fariseo ini

³⁶ Fariseo fistichi pikīxiki Jesús iyoni. Afe Jesús kani āfe pexe ano nāno mīsa ano tsoxō piaino. ³⁷ Nānoa nā kēro chotaferomato nikani nāno ato fe ixō. Nā fariseo pexe anoxō Jesús pii ano, nāno nā kēro nokoni, manishomo oxokōiki pirofomā foikai. ³⁸ Mā nokoax oiayanā Jesús āfe tae resotai nitishota tsaopakekafāni. Tsoaox oiaino Jesús āfe tae pichiki āfe fēotoshini. Nāskaxō āfe fōo otekere ayanā āfe tae tsōokakata akiki pirofomā nachini. ³⁹ Nā fariseo a Jesús iyoato na kēro askaito oikī āfe ōiti mēraxō shināni: “Na feronāfake Niospa meka yoikatsaxakitsi tāpi kiki na kēro afe keskaramakī na āfe tae ramākai, nā kēro chakakōi,” ixō āfe ōiti mēraxō shināni.

⁴⁰ Nāskara āfe ōiti mēraxō shināito Jesús yoini nā fariseo: “Simón, afara fetsa ē mia yoipai,” faito nā Simón fariseo kemani: “Ea yoife, Ifo,” fani.

⁴¹ Askafaito nikakī Jesús yoini feronāfake rafeōnoa meka fetsafaxō: “Nā feronāfake rafeta a ato kori minimis niminifo. Fētsa nimini quinientos nā kori ane denarios. Fētsari nimini cincuenta. ⁴² Afeskaxoma kopifatiroma inifo. Akka nā ato kori minimisto ea kopifakāfe ato fanima. Ato shara fani nā rafe. Akka ea yoife fatoto noikī finasharakōimākai,” faito, ⁴³ Simón kemani: “Ētsa, nā ichapa nimiatō noikī finakōi rakikāi,” faito, Jesús yoini: “Ēje, mī yoisharakōiaki.”

⁴⁴ Nāskaxō nā kēro ōiyanā Jesús Simón yoini: “¿Mā mī na kēro ōimē? Akka ē mī pexe mēra ikikē mī ea faka ināma, ē aō ochokomepanā. Akka na kēromā oiayanā ēfe taeki āfe fēo tosiyanā ea ōchoa. Nāskaxō āfe fōo ea otekere aka. ⁴⁵ Akka mā nō feyai askafimisno, mī ea tamoki tsoo akama. Akka na kēromā ikitoshixō ēfe tae pemākia tsoo akī xateama. ⁴⁶ Akka mā nō feyai askafimisno mīkai xinī ēfe mapoki mīa matekere akama. Akka na kēromā ēfe taeki pirofomā nachia. ⁴⁷ Akka ē mia yoi, na kēro chaka finakōikē mē āfe chaka soaxona, ea noikōiāito. Akka fētsari afaa chakafai finamano mē āfe chaka pishta soaxofiano ea noisharaima,” ixō Jesús yoini.

⁴⁸ Nāskaxō a kēro yoini: “Mē mia chaka soaxona,” fani. ⁴⁹ A ato feta piaifori nāno ato fe inifo. Nāskax aa ranā yoinānifo. “¿Tsoamē na ato chaka soaxonai?” ikanax yoinānifo. ⁵⁰ Nāskaxō afianā Jesús nā kēro yoini iskafakī: “Ea mīa chanīmara faito ē mia chaka soaxonaki, kasharatāfe,” ixō Jesús yoini.

8

Kērofāfe afara Jesús axosharapaonifo

¹ Mā askafata pexe rasi mēra Jesús kafāsapaoni. Afe keskaramakī Apa Nios xanīfoōnoa ato yoifofāsafai. Nā doce feronāfake aōxō tāpimisfo afe fofāsapaonifo. ² Kēro ranāri Jesús fe fofāsapaonifo, māmāi ato sharafaano ato makīnoa niyafa yōshi chaka potakī, a isinī ikaifori ato sharafani. Nānori ato fe ini āfe ane María Magdalena. Nā María Magdalena makīnoa Jesús siete niyafa potani. ³ Nāskata Juanāri ato fe ipaoni, Cuzapa āfi. Nā Cuzapa Herodes yonoxopaoni. Susanāri ato fe ipaoni. Nāskatari nā kēro fetsafāferi Jesús yafi aōxō tāpimisfo ato kori ināpaonifo.

Jesús ato yoini meka fetsafaxō fimi exe saamisnoa
(Mt. 13.1-9; Mr. 4.1-9)

⁴ Pexe rasi anoax yora rasi fenifo, Jesús ōifekani. Nāskakē yora kaya ichanāfono meka fetsafaxō Jesús ato yoipakeni iskafakī. ⁵ “Feronāfake fistichi fimi exe saafoni āfe nōxati mēra kēchoxō fokī. Āfe tarepa āfe fimi exe saakaino

ranāri fai nēxpakīa pakeaito peamanifo, ranāri peyafāfe xēani. ⁶ Akka mā foaipaiyaito xinī namani, yosipanā, āfe tapo airoko mai mēra kasharakē. Foaikax samama nani xinī tsasifaano. ⁷ Ranāri fimi exefo moxafo mēra pakei fetseni. Moxafo mēranoax moxafoya foaipaiyaito moxafāfe namani. ⁸ Akka fimi exe ranāri mai shara ano pakeni. Nāskax foaisharax fimi ichapayakōi ini fetsa cien ini,” ixō Jesús ato yoini. Nāskaxō anā fāsi ato yoini: “Mā pachoyakī ea nikasharakōikāfe,” ato fani.

Meka fetsafaxō yorafo yoixō a aōxō tāpimisfo xafakīakōi ato yoini
(Mt. 13.10-17; Mr. 4.10-12)

⁹ A aōxō tāpimisfāfe Jesús yōkanifo: “Noko yoisharafe, nō mia nikasharamakī afaa mī yoiamāki meka fetsafaxō,” faifāfe ¹⁰ ato yoini: “Ē mato yoinō Epa Nios xanīfāfe afeskaxō afe yorafo ikināmāki, ē mato tāpimasharai afe keskaramāki. Akka fetsafo meka fetsafaxō ē ato yoi. Nā ē ato yoiai ōisharafikakī ōisharafoma. Nikafikakīri nikasharafoma,” ixō Jesús ato yoini.

Jesús meka fetsafaxō fimi exe saamisnoa ato yoini ato tāpimasharakōixiki
(Mt. 13.18-23; Mr. 4.13-20)

¹¹ Anā Jesús ato yoini iskafakī: “Na meka fetsafaxō ē mato yoiai iskarakī nikakapo. Na fimi exeōnoa ē mato yoiai, fimi exeōnoa ē mato yoima. Niospa mekaōnoa ē mato yoi. ¹² Akka na fai nēxpakīa fimi exe pakea peamatirofo keskafakī, nāskarifiakī Niospa meka nikapaiyafono Satanás chakata ato nikatima fatiro afe iyamapakexanōfo. ¹³ Akka nā fimi exe makex mēra pakeax foaitiro keskariakī, nāskarifiakī fētsa Niospa meka nikapaisharakōiyotiro. Akka nā fana tapo foaisharama keskaraxō nikafikī nikasharaima. Nāskaxō afara afeskaraino samamashta kachikiri fatiro. ¹⁴ Akka nā moxafo mēra fimi exe pakea keskarafori a ea nikaifo. Akka ea nikafikani, nā moxafāfe fanafo namai keskarafō, āto shinā mēraxō afara sharafo shinākakī. Nāskakakī a Niospa ato amapaiyai keskara shinākanima. Nā fimi exemais keskarafō. ¹⁵ Akka nā fimi exe mai shara ano pakea keskara. Nāskarifiakī yora ōiti sharayato itipinīsharaxō ea nikasharai, Niospa meka chanīmara fakōini, nā fimi exe ichapaya keskarakōixō. Nāskasharakōikaxō fetsafo Niospa meka nikamasharakōikani fetsafāfe chanīmara fanōfo,” ixō Jesús ato yoini.

Meka fetsafaxō rāpariki Jesús aōxō tāpimisfo yoini
(Mr. 4.21-25)

¹⁶ Anā Jesús ato yoini iskafakī: “Akka rāpari ōtaxō tsōa kēsho fepotiroma, askatari a ika nāmāri tsōa tsāotiroma. Askakimaroko fomākia tsāotirofo, chai chaxasharakōikē fetsafāfe ikikaxō ōisharakōinōfo. ¹⁷ Nāskarifiakī a afara oneyomis chipo xafakīakōi ōixikani. Nāskatari a afara fomāyomisfo Niospa xafakīakōi ato faxoxii keyokōichi ōinōfo. ¹⁸ Nāskakē nikakōisharakāfe. Akka a ea nikakī finasharakōiai Niospa tāpimasharakōi. Akka fetsa ē tāpisharakōia ifaxō nikamiskēma, askara yora nā tāpia pishta Niospa anā fiatiro,” ixō Jesús ato yoini.

Jesús ōifekani āfe afanō āfe extonō fenifo
(Mt. 12.46-50; Mr. 3.31-35)

¹⁹ Jesús yorafo yoiaino āfe afanō āfe extonō akiki fenifo afe mekapaikani. Akka akiki fotirofoma inifo, yora ichapa fospikōimāiyafono. ²⁰ Nānoa fētsa Jesús yoini: “Mī efanō mī extonō emāiti niafo mia ōipaikani.” ²¹ Askafaino

Jesús kemani: “Akka nã ěfe Epa Niospa meka nikakõiaifo nãfofi ěfe efafo ita ěfe extofoki,” ixõ ato yoini.

Jesús nefe yafi ìamãfã poo iki meseniaito nishpa fani
(Mt. 8.23-27; Mr. 4.35-41)

²² Pena fetsa Jesús kanõanãfã naneinũkafã aõxõ tãpimisfo yoini: “Nõ okiri ìamãfã pokefainõ fokãfe,” ato faino afe fonifo. ²³ Mã ìamãfã pokefainaifono kanõanãfã xaki mẽra rakax Jesús oxani. Nãno atoki nẽfefakõiyana ìamãfã poo ini. Nãskaino kanõanãfã faka fospikõini mesekõini ini mã kanõanãfã ikikerani. ²⁴ Nãskakẽ aõxõ tãpimisfãfe Jesús mõinifo iskafayanã: “Ifo, mã nõ nataramaikai, moife,” faifono, Jesús fininãkafã nefe yafi ìamãfã poo ikaito afe mekapa nishpa fani. Nãskax anã ìamãfã poo inima, sharakõĩ itani.

²⁵ Askafaifono aõxõ tãpimisfo yoini: “¿Afeskai mã rateimẽ? ¿Mã ea chanĩmara faimamẽ?” ato faino, akka aõxõ tãpimisfo rateyanã ãa ranã yoinãnifo iskakani: “¡Keel! ¿Na feronãfake afe keskaramẽ na nefe feta ìamãfã ato yoiãito nikaifo?” ikanax yoinãnifo.

Gadara anoxõ Jesús feronãfake makinoa niafaka rasi potani
(Mt. 8.28-34; Mr. 5.1-20)

²⁶ Nãskata Gadara mai ano nokonifo, nã ìamãfã Galilea okiri. ²⁷ Mã nokoax Jesús kanõanãfã makinoax fotopakekafanaino, pexe rasi makinoax feronãfake niafaka yõshi chaka nanea akiki oni. Rapati safekatsaxakima. Pexe mẽrari ikatsaxakĩma. Akka nã maiafo mafa kini mẽra ano ika ini. ²⁸ Nãskakẽ Jesús fichita a nãmã ratokonõ mai chachipakefofã fãsikõĩ fiisiyanã yoini: “¡Ea afeska fayamafe, Jesús! Mĩ Nios Sharapa Fakeki ě mia yoi mĩ ea omiskõimayamafe,” fani. ²⁹ Nãskafakĩ yoini mãmãĩ Jesús a makinoa niafaka yõshi chaka potaino, mẽxotaimamãĩ a mẽra niafaka yõshi chaka nanemisno. Nãskaito yorafãfe kaninãnã metexkere ata otxkere axõ kexefiafono, nãfo tesaketsafaini ichopaoni. Nãskakẽ niafaka yõshi chakata nã feronãfake tsõa istoma ano iyopaoni.

³⁰ Nãskaito Jesús yõkani: “¿Mĩ afe anemẽ?” faito, nãato kemani: “Ěfe ane Legiõn,” fani, a mẽramãĩ niafaka yõshi chaka ichapa nanekẽ. ³¹ Nãskaxõ niafaka yõshi chakafãfe Jesús yoinifo: “A omiskõipakenakafa kinĩfã mẽra noko potayamape,” fanifo.

³² Akka nãno mãchi keya anoxõ kochifãfe pinifo. Nãskakẽ niafaka yõshi chakafãfe Jesús yoikakĩ iskafanifo: “Noko kochifo mẽra nĩchife,” faifono Jesús kochifo mẽra ato nĩchini. ³³ Nãskakẽ niafaka yõshi chakafo feronãfake makinoax tsekefaini kochifo mẽra iki fetseni. Kochifãfe pifiai ìamãfã mẽra keyopakei fetseax ãsai fetseni, keyokõĩ.

³⁴ Askaito õikani a kochifo kexeafo ichoi fetsenifo, a pexe rasi anoã ato chanifai fokani. Askatari a pexe rasi pasotai ikafori ato chanifanifo. ³⁵ Askaito nikakani yõrafã rasi fenifo kochifã rasi ãsaito õifekani. Nokokaxõ õiafo Jesús nãmã a feronãfake niafaka yõshi chaka nanea tsoã ini, mã a makinoa Jesús niafaka yõshi chakafo põtano. Rapati safeta mã shinãsharakõia ini. Nãskakẽ yorãfo ratei fetsenifo. ³⁶ Nã feronãfake makinoa Jesús niafaka yõshi chaka potaito, õiafãfe ato yoinifo afeskax sharamãkĩ a feronãfake niafaka yõshi chaka nanea. ³⁷ Keyokõĩ yorafãfe nã Gerasa anoafãfe nikakaxõ ratekõiyana. “Nonoax katãfe,” faifono, Jesús kanõanãfã mẽra naneinãkafanax kani. ³⁸ Nã feronãfake a makinoax niafaka yõshi chakafo tsekeato, “Ěri mefe

kapai,” faito, akka Jesús, “Mĩ efe katiroma. Nono mĩ nētetiro. ³⁹ Akka mĩ pexe ano kaxō a mia Niospa axōa keskara yorafo yoifotāfe,” fani.

Nāskafaino nā feronāfake kaxō nā pexe rasi anoafo ato yoifofāsafani nā Jesús axōa keskara.

Jairo fake xotofake mā nakē Jesús otofani. Askatari kēromāri Jesús rapati mēeax sharani

(Mt. 9.18-26; Mr. 5.21-43)

⁴⁰ Nāskafaferani Jesús anā oni ĩamāfā pokeferani. Jesús nokoaito fichikaxō akiki inimakōiyanā yorafāfe ifinifo keyokōichimāi manakakī. ⁴¹ Akka nāno feronāfake āfe ane Jairo akiki nokoni. Nā Jairo Niospa meka yoimis xanifo ipaoni nā judeofāfe ichanāti pexe sināgoga anoax. Nā Jairo Jesús nāmā ratokonō mai chachipakefōfā fāsikōi yoini āfe pexe ano kanō, ⁴² āfe fake xotofake napaiyaino. Akka nā Jairo fake xotofake fisti ini, doce xinia aka. Nā xotofake mā nakerakōini. Jesús Jairo fe kakī meea yorafāfe shoiakī fetsafo meeni afe fokakī.

⁴³ Nānori kēro ato fe kani. Na kēro imi nese kima, doce xinia amis. Notoro kopifakī āfe kori keyotiani. Tsoa pīshta sharafatiroma ini. ⁴⁴ Nā kēromā aa kachikiri kaxō āfe tari kexa Jesús ramākani. Tari kexa ramākaino koshikōi āfe imi nesetani. ⁴⁵ Nāskakē Jesús ato yōkani: “¿Tsōa ea ramāmē?” ato faito, keyokōichi yoinifo: “Nō mia ramāma,” fanifo. Ato askafaito Pedro yoini: “Ifo, yorafāfe mia shoiaki fetsakaxō mia pitsikinafo,” faito, ⁴⁶ afianā Jesús ato yoini: “Fatora mā fētsa ea ramā. Akka mē tāpia fatora fetsa ēfe sharaōnoax mā shara,” ixō ato yoiaino, ⁴⁷ nikai nā kēro ratekōini. “¿Mā ea tāpiaromē?” ikax ratekōiyanā Jesús ano kaxō ratokonō mai chachipakefōfā yoini yorafāfe ferotaifi nāatomāi āfe tari kexa ramākaxō. “Ē mia tari kexa ramākata mē shara,” ixō yoini.

⁴⁸ Askafaito Jesús yoini: “Yōxashta, mā mĩ shara mĩmāi ea chanīmara faax. Nāskakē tanaima kasharatāfe,” fani.

⁴⁹ Jesús nā kēro yoiaino, yora fistichi oxō Jairo yoini: “Mā mĩ fake xotofake naaki. Anā nōko Ifo fekaxtefayamafe,” faito, ⁵⁰ nikakī Jesús yoini: “Ratekima. Ea chanīmara fāfe mĩ fake naamakī otoi kiki,” fani.

⁵¹ Mā pexe ano nokoxō, tsoa Jesús ikikinima. Akka Pedro kaino Santiago kaino Juan kaino inifo nā fāke apa fe fokani, nā fāke afari ato fe kani. ⁵² Pexe mēra ikifaikaxō ōiafo keyokōi oiakani fiisinifo shinākani nā fake xotofake mā naano. Akka Jesús ato yoini: “Oiyamakāfe. Na fake xotofake naamakī oxaki,” ato faino, ⁵³ keyokōichi ōsaketsanifo, tāpifikaxō nā fake xotofake mā nafiano. ⁵⁴ Nāskaxō Jesús mēkemā mētsoinifōfā fāsikōi yoini: “Xotofakeshta, fininākafāfe,” faino, ⁵⁵ mā otox nā xotofake koshikōi fininākafani. Nāskaxō ato yoini nā xotofake pimanōfo. ⁵⁶ Nāskakē apa fe afa ratekōinifo. “¿Keel! ¿Afesaxō otoamē?” ikanax inimakōiyanā. Nāskaifono ato yoini: “Tsoa yoiyamakāfe nā mātō fake xotofake nakē mē otoaki,” ixō ato yoini.

9

Jesús aōxō tāpimisfo nīchini Nios Xanīfoōnoa ato yoitanōfo

(Mt. 10.5-15; Mr. 6.7-13)

¹ Jesús aōxō tāpimisfo doce ichanāfani. Nāskaxō ato yoini iskafakī: “Ēfe sharaōxō ato makinoa niafaka fetsa fetsatapafo pōtatakāfe, a isinī ikaifo ato sharafayanā. ² Askatari Nios xanīfoōnoa ato yoitakāfe, a isinī ikaifori ato sharafayanā. ³ Afaa mā fokiki, mātō mēstetiri mā fokiki, mātō pishari mā

fokiki, a mā piikairi mā fokiki, koriri mā fokiki, rapati fetsari mā fokiki. ⁴Akka nā mā ōiai pexe fetsa anoxō mato ifiaifono, nāno iyokani, nā mā anoax kaitīa. ⁵Akka fatora pexe rasi anoxō mato ifikaspaifono, anoax tsekekaikī mātō taekinoa mā mapo taa taa atiro ato ōimaxiki. Mā askafaino tāpitirofo Nios atoki inimayamaino,” ixō Jesús ato yoini. ⁶Nāskata Jesúsxō tāpimisfo fonifo, pexe fetsafo mēra ato yoifokani. Fokaxō ato yoisharakōinifo. Nios nikasharakōikāfe ato fayanā a isinī ikaifo ato sharafanifo.

Juan Maotista nani

(Mt. 14.1-12; Mr. 6.14-29)

⁷Xanīfo Herodes nikani Jesúsnoa yoaifono afama mīshti akaito. ¿Tsoamē a feronāfake? ixō shināni. Akka yoinifo: “Mā Juan afianā mā otoa,” fanifo. ⁸Fetsafāferi yoinifo: “Nā ato Niospa meka yoipaonikīa Elías,” fanifo. Fetsafāferi yoinifo: “Nā nōko xinifo ato Niospa meka yoipaonikīa afianā mā otoa,” ixō yoinifo. ⁹Askafaifono Herodes ato yoini: “Maa, akai Juanma. Mē Juan ato textemayamea. Akka na nō nikai tsoamē na aōnoa yoaifo afama mīshti faito,” ixō Herodes Jesús ōipaikōini.

Jesús cinco mil feronāfakefo ato pimani

(Mt. 14.13-21; Mr. 6.30-44; Jn. 6.1-14)

¹⁰Nā Jesúsnoa yoimisfāfe mā fēkaxō yoitoshinifo a atanaifo keskara. Askafaifāfe nikakī ato tiis iyonī, pexe rasi āfe ane Betsaida chaima tsōa istoma ano. ¹¹Akka mā yorafāfe tāpikanax Jesús kaino, nāskakē chīfafaifano. Akiki foafono Jesús ato ifini. Apa Nios xanīfoōnoa ato yoianā a isinī ikaifori ato sharafapani.

¹²Mā yātpakeaino, aōxō tāpimisfo doce akiki fēkaxō yoinifo: “Yorafo nīchife fokaxō tenetanōfo a piaifo fenayanā fonāikani kiki, pexe rasi ano fokāta a chaima ikafo anori fotanōfo. Akka nono afaamaki,” faifono, ¹³Jesús ato yoini: “Ato pimakāfe,” ato faito kemanifo: “Nōko pāa cinco pishta foe raferi,” fanifo. “Akka, ¿mī shināimē na yorafo pimaxiki a piaifo nō ato fixotanō?” ixō yoinifo. ¹⁴Akka nāno cinco mil feronāfakefo inifo. Akka Jesús aōxō tāpimisfo yoini: “Cincuenta faxō ato tsōketsakāfe,” ato fani.

¹⁵Ato askafaifono keyokōi tsafo fetsenifo. ¹⁶Askata Jesús cinco pāa tso-mainīfofāni foe rafeya. Nāskaxō nai foisnīfofā Apa Nios kīfini iskafakī: “Aicho Epa, mīoxō ē ato pimai. Mī sharakōi,” fata, pāa kaxketa foe rafeya osixō aōxō tāpimisfo ināni a yorafo ato ināketsanōfo. ¹⁷Nāskakē yorafāfe pikanax māyakōinifo. Akka nā chete faafo doce fēta fospini.

“Mī Cristo mia Niospa ifini nokoki nīchixii mī nōko xanīfo finakōia inō,” ixō Pedro Jesús yoini

(Mt. 16.13-19; Mr. 8.27-29)

¹⁸Pena fetsa Jesús Apa Nios arese kīfini. Akka aōxō tāpimisfo afe inifo. Nāskaxō ato yōkani: “¿Yorafo afaa ikanimē ē tsoamāki?” ixō āto yōkani.

¹⁹Ato askafaito kemanifo iskafakakī: “Fetsafāfe Juan Maotistara, mia fakani. Fetsafāferi Elíasra mia fakani. Fetsafāferi mia iskafakani: ‘Nā nōko xinifo ato Niospa meka yoipaonikīa mā otoa,’ mia fakani,” aōxō tāpimisfāfe fanifo. ²⁰“Akka mā, ¿ea tsoara faimē?” ixō ato yōkani. Ato askafaito Pedro kemanī iskafakakī: “Mī Cristo nā Niospa mia nīchini mī nōko Xanīfo finakōia inō,” fani.

“Chipo ea retexikani,” Jesús ato fani

(Mt. 16.20-28; Mr. 8.30-9.1)

²¹ Nāskata Jesús aōxō tāpimisfo yoini: “Tsoa yoiyamakāfe ēfi Cristoki,” ato fani. ²² Nāskata aōxō tāpimisfo yoini iskafakī: “Ē chipo omiskōifinakōixii. Askatari ea ōikaspakakī ea potaxikani, judeofāfe xanīfofo feta a Nios ato kifixomis āto xanīfofōfāfe a Moisés yoikī kirika keneni keskara ato tāpimamisfāferi. Askatari ea retexikani. Ea retefiafono, tres nia oxata ē anā otōxii,” ato fani.

²³ Nāskata keyokōi ato yoini iskafaki: “Fatora fetsa ēfe inakōi ipaikī āakōi apaiyai keskara anā atiroma. Nā ē yoiyai keskara nikakōitiro. Pena tii iskatiro, ea Ifofapai: ‘Ēfe Ifoxō ea retefiafono ēkai ēfe Ifo ē potanakama,’ ixō shinātiro.

²⁴ Akka fētsa āa shinātiro iskakī: ‘Ē Nios Ifofaito ea retetirofo. Nāskakē ē Nios Ifofaima,’ ixō shinātiro mesekī. Askara yora naax ēfe Epa ano katiroma. Akka nā ea Ifofaa, eōxō reteafono ē ifixii efe īpaxanō eamāi Ifofamiskē. ²⁵ Askatari fatora fetsa nōko mai anoax afara ichapayakōi ikatsaxakī mā naax aya katiroma. Ea Ifofayamax koriya ifiakatsaxakī Epa Nios ano katiroma. Akka afama mīshtifoya iyopaofinixakī nā omiskōipakenakafo mēra kaax anā aya itiroma. Āfe afarafori Nios inātiro afe ipaxakī. ²⁶ Akka fatora fetsa eō rāfikī ēfe meka sharari yoikaspaito, ēri aō rāfikōixii ē yoikī iskafaxii: ‘Ē na yora ōimisma,’ ē faxii. Ēfe sharafoya mē oax ēfe Epa sharafoyari ē oxii, ēfe ājiri sharafori efe fotopakefōfāxikani. ²⁷ Ē mato pārima, fatora mā fetsa nayoxoma nono efe iyoxō ēfe Epa xanīfo finakōia mā ōiyoxii,” ixō Jesús ato yoini.

Jesús āfe femānā fetsa keskara ini, fafekōini. Āfe rapatiri oxokōi ini (Mt. 17.1-8; Mr. 9.2-8)

²⁸ Askata ocho nia mā finōano ato yoikī keyota, Jesús māchi keya māpefaini arixō Apa Nios kifikai. Āfe ina tres iyoni. Santiago iyota Juan iyota Pedro iyota ato fani. ²⁹ Apa Nios kifiaino, āfe femānā fetsa keskara itani. Āfe rapati oxokōi ini fafekōiyanā. ³⁰ Akka nāno feronāfake rafe akiki nokokanax afe mekanifo. Mā nafianixakī Moisés fe Elías inifo. ³¹ Nā rafeta chaxapekofōfānifo. Mā fotokanax Jesús fe ketaxamei nikaxō yoinifo nā Jerusalēn anoax Jesús omiskōixiai reteafono. ³² Nāskata Pedronō Santiagonō Juannō oxapaifikakī oxatenekōinifo. Jesús fafekōiaito ōinifo nā feronāfake raferi ōinifo Jesús fe niafāfe. ³³ Mā Moisés fe Elías Jesús makinōax foafono, Pedro yoini: “Ifo, sharakōi ano nō oa. Nono nō tapas fanō, tres fakī. Mia fetsafaxota Moisés fetsafaxota Elías fetsafaxota nō fanō,” fani. Akka Pedro tāpinima a yoiyai keskara shināfenokōini. ³⁴ Pedro mekai askaino ato kōinī maipakefōfāni. Ato kōinī maipakefōfānaito ōikani ratekōinifo. ³⁵ Nā kōi mēranoax mekai iskaito nikanifo: “Nafi ēfe Fakekōikī ē aō noikōi. Nāskakē nikasharakōikāfe,” ixō yoiyai nikanifo. ³⁶ Mā mekai askai nishpatanaino, Jesús ares nikē ōinifo. Akka tsoa yoitama ares fisti āto ōiti mēraxō shinānifo. Nāskaxō tsoa yoinifoma nā ōiafo keskara.

Jesús feronāfake naetapa niafaka chaka pōtaxoni (Mt. 17.14-21; Mr. 9.14-29)

³⁷ Pena fetsa māchi keya ariax mā Jesús aōxō tāpimisfo fe fotoano, yōrafā rasi akiki fenifo ōipaikani. ³⁸ Nānoxō yōrafā rasi mēraxō yora fistichi fāsikōi Jesús yoini: “Ifo, ēfe fake ea ōixoniope. Nā fisti ēfe fakeki. ³⁹ Niafaka chaka a mēra nanexō, fāsikōi fiisimamiskī, mesta mesta imayanā āfe axfapari fākox potamamiskī. Chakakōi famis a makinōax tsekekaspayanā. ⁴⁰ Akka mī inafō

mē yoia ēfe fake makinoa niafaka yōshi chaka potakāfe ē ato fafiaino akka tsōa atiroma,” fani.

⁴¹ Askafaino Jesús kemani: “¡Ooa! Mākai ea tāpisharama. Mā afara shināmis. Akka afetiākai ē matoki onima. ¿Afetiākai mā ea tāpimē?” Jesús ato fani. Nāskaxō yoini: “Niri mī fake ea efexōfe,” Jesús apa fani. ⁴² Nāskata āpa Jesús ano efeaino, nā fake nīafaka fia kekēfōfā anā nāmā potani, anā ea ea imapaikī. Akka Jesús fāsi mekainākfāfā iskafani: “Nīafaka mī chaka chakakōikī, nā feronāfake makinoax tsekekaitāfe,” fani. Nāskax nā feronāfake sharakōi itani. Nāskaxō apa ināni. “Nakīa mī fake,” fani.

⁴³ Askafaito ōikani āa ranā yoinānifo: “Aira, Niospa afama mīshti atiro,” ikanax āa ranā yoinānifo.

*Anā Jesús ato yoini: “Chipo ea retexikani,” ixō
(Mt. 17.22-23; Mr. 9.30-32)*

Jesús nā feronāfake sharafaito ōikaxō shināifono, Jesús aōxō tāpimisfo yoini, ⁴⁴ “Ē mato yoiaino nikakōisharakāfe, shināmakikākīma. Fetsafāfe ea ato achimaxikani kiki,” ixō ato yoini. ⁴⁵ Akka tsōa tāpinima a ato yoiaino keskara Niospamāi ato shinā mēraxō ato shinātima faino. Nāskai ranonifo Jesús yōkapaikani ato xafakīa yoipanā.

*“Akka, ¿tsoakaimē sharafinakōia?” inifo
(Mt. 18.1-5; Mr. 9.33-37)*

⁴⁶ Nāskata chipo aōxō tāpimisfo āa ranā feratenānifo, “Akka, ¿fato nō fetsa sharafinakōimē?” ikanax. ⁴⁷ Nāskaxō a aōxō tāpimisfāfe shināifo keskara mā Jesús tāpixō fake yome ifixō chishtoinīfōfāni. ⁴⁸ Nāskata aōxō tāpimisfo yoini: “Akka fatora fētsa ēfe aneōxō na fake yome noikī nāatori ea noisharakōi. Nā ea noisharaito ea fisti noima, nā ea nīchiniri noisharai. Akka fatora mā fetsa āto ina keskaraxō mā yorafo shara faa, nāfi sharafinakōiakī,” ixō Jesús ato yoini.

*Fētsa noko noikaspatama noko sharafai
(Mr. 9.38-40)*

⁴⁹ Ato askafaito Juan yoini: “Ifo, mā nō ōia oa feronāfake fistichi mī aneōxō niafaka chaka potaito. Nāskakē, ‘Askafayamafe,’ nō faa. ‘Mī nofe rafemismaki mī niafaka chaka yorafo makinoa potatiroma,’ ixō nō yoia,” fani.

⁵⁰ Askafaito Jesús kemani: “Askafayamakāfe, noko chakafatama, noko sharafai askara sharaki,” fani.

Jesús Santiago yafi Juan mekatima fani

⁵¹ Mā chaima Jesús Apa Nios ari nai mēra kaino tsōakai nētefatiroma ini māmāi tāpikē a Jerusalén anoax noko nāxoxiai Apa Niospa yoiyoni keskai. ⁵² Nāskaxō fetsafo rekē nīchini, mā fokaxō pexe rasi Samāria anoxō itipinīsharafaxonōfo a nokoikai anoxō. ⁵³ Akka samāritanōfāfe ato ifkaspanifo, māmāi tāpikaxō Jerusalén anoamāi foaifono. ⁵⁴ Ato askafaiāfāfe a aōxō tāpimisfo rafeta Santiago feta Juan ōinifo. Nāskaxō yoinifo: “Ifo, mī noko yoife nō atoōxō Epa Nios kīfinō na pexe rasi anoafō nai mēranoax chīi pakeki ato kooakī mitonō,” ixō yoinifo. ⁵⁵ Akka Jesús anā ato yoini: “Anori shināyamakāfe. Mā shināi keskara ē shināimakai,” ixō ato yoini. ⁵⁶ Askafata pexe rasi fetsa ari fonifo.

*A afe fopaimisfoōna Jesús ato yoini
(Mt. 8.19-22)*

⁵⁷ Fāi foaifono feronāfake fistichi Jesús yoini iskafakī: “Ifo, ěri mefe kapai nā mī kai ari ěri mefe kafāsaxiki,” faito, ⁵⁸ Jesús kemani iskafakī: “Maxoteneroa kiniya, peyafori naayafo. Akka ěkai pexeyama,” fani. ⁵⁹ Nāskaxō Jesús anā feronāfake fetsa yoini: “Efe kafe,” faito, akka nāato kemani iskafakī: “Ifo, ea manayofe ěfe epa naito ě maifayotanō,” faito, ⁶⁰ Jesús kemani: “Askakima ea Ifofae. Akka nā ea Ifofaafāfema yora nakē maifatirofo. Akka mī efe koofe ěfe Epa Nios xanīfoōnoa ato yoiofāsafaxiki,” fani. ⁶¹ Akka anā fĕtsari yoini iskafakī: “Ifo, ě mefe kapai, akka ea manayofe ěfe pexe ano kaxō ě ato yoisharayotanō,” faito, ⁶² Jesús kemani iskafakī: “Akka fĕtsa ea yonosharaxofiakī a apaoni keskara anā aki, askara yorakai itipinīsharama. Nāskakē ěfe Epa Nios xanīfo ano katiroma,” ixō Jesús yoini.

10

Jesús setenta y dos yorafo nĕchini pexe rasi ano fotanōfo

¹ Nāskata Jesús anā setenta y dos yorafo katonī. Nāskaxō rafe rasi faxō ato nĕchini nā pexe rasifo mĕra fanĕma mĕshti fotanōfo chipo akairi atoki kaxiki. ² Nāskaxō ato yoini iskafakī: “Yora ichapafāfe ea nikayamafiaifono ichapatoma ea yonoxokani eōnoa ato yoikakī. Nāskakē mā Epa Nios kĕfikāfe a yonoxomisfo katonō eōnoa ato yoinōfo. ³ Akka mā fotakāfe, ě mato nĕchikai yora chakafo mĕra nāfāfe mato chakafapaikani. Oa chaxo poomānā pipaitiro keskafakī, matori askafapaikani eōnoax mā isharafiakē yora chakafāfe mato chakafapaikani. ⁴ Ato mĕra kakī māto forosa foyamakāfe, māto koriri foyamakāfe, māto sapatōri foyamakāfe. Fokākī yorafo finōfāikakī nĕteax ato fe mekakāima. ⁵ Pexe fetsa mĕra ikixō taefakī ato yoisharakāfe iskafakī: ‘Niospa mato sharafanō mā isharakōinō,’ ixō ato yoikāfe. ⁶ Akka nā pexe mĕra ika fetsa isharakōikē nā Niospa shara fakōini. Akka a mā ato yoiai keskara nikakaspafono Niospa ato inĕmamaima. Nāskakē fenokani. Akka mā ato yoiai keskarakōinoax mā afaa fenoima. Epa Niospa mato sharafakōini. ⁷ Nāskata pexe rasi mĕra nokoax pexe fetsa mĕra oxayamakāfe. Nā mā nokoax anoxō mato pimayanā mato ayamanaifono pikāfe. Akka Niosxō yonomisfo nā afara yopaifo ato inātirofo. Nāskakē pexe fetsafo mĕra iki foa foayamakāfe. ⁸ Mā nokoaito pexe rasi anoxō mato ifiyanā mato pimaifono pikāfe. ⁹ Nānoxō a isinī ikaiifo eōxō ato sharafakāfe, iskafakī yoivanā: ‘Epa Nios xanīfo finakōi afe yorafo ĩkixikī mā chaimashta oi,’ ixō ato yoikāfe. ¹⁰ Akka pexe rasi ano mā mā nokoano anoxō mato ifikaspaifono, anoax tsekekāikī ato iskafakāfe: ¹¹ ‘Nā māto pexe rasi anoax nōko tae ano mapo neano, nō taa taa akano anā nōko neima. Nāskarifiakī mā noko nikakaspaino māto chaka nōko neima, māto nei. Akka shināsharakāfe Nios xanīfo māto Ifo ipai mā chaimashta matoki oi kiki,’ ixō ato yoikāfe. ¹² Akka ě mato yoi, nā omiskōiai nokoaitĕa, na pexe rasi ano ato omiskōimaniyoi nā Sodoma anofo ani keskafakī finōmainīfofā ato omiskōimakī finakōiyoi,” ixō Jesús ato yoini.

Pexe rasi anoxō Jesús nikakaspanifo (Mt. 11.20-24)

¹³ Anā Jesús ato yoini iskafakī: “¡Ooa! Corazin anoafāfe Betsaida anofo fe mā omiskōifinakōixii. Akka Tiro anoxō Sidón anoxori nā ě mato oĕmana keskara, ě ato oĕmanano āto chaka xatekaxō Epa Nios Ifofakeranafo. ‘¡Ooa! Nō afara chakafamiskī iskaratĕa nō anā Nios Ifofai,’ iyanā rāfikaxō āto rapati chapo safekaxō chiĕ māpo raish akeranafo fetsafāfe ato oĕnōfo.

¹⁴ Akka Niospa Tiro anoafo yafi Sidón anoafori ato omiskōimafiakī ato omiskōimasharaima, akka matoroko omiskōimakī finakōixii. ¹⁵ Akka, ζnō Capernaúm anoax nō nai mēra kai Epa Nios ari ixō mā shināimē? Maa. Nā omiskōipakenakafo mēra ē mato potaxii,” ixō Jesús ato yoini.

¹⁶ Nāskata Jesús anā aōxō tāpimisfo yoini: “Nā mato nikaifāfe, eari nikasharakani. Akka nā mato nikakaspafāfe, eari nikakaspakani. Nā ea nikakaspafāfe nā ea nīchiniri ēfe Epari nikakaspakani,” ixō Jesús ato yoini.

Anā fenifo setenta y dos feronāfakefo Jesús ato nīchitano

¹⁷ Nā setenta y dos feronāfakefo anā fenifo, inimakōiyanā. Mā fēkaxō iskafakī yoinifo: “Ifo, niafaka chakafāfe noko nika mī aneōxō yorafo maki-noa nō potaino,” faifono, ¹⁸ Jesús ato kemani: “Ēje, mē oia Satanás nai mēranoax pakeaito oa kana piishikai keskara. ¹⁹ Ē mato ēfe shara inā, ēfe sharaōnoax mā kaito rono feta nīfo mato chachiyamanō. Nāskaxō nā noko noikaspamis Satanás chaka mā finōkōinō, mato afeskafanōma. ²⁰ Akka inimayamakāfe niafaka yōshi chaka potax. Akka mā nai mēraxō Epa Niospa mato anefo ēfe kirikaki keneaki, nā sharafinakōia,” ixō Jesús ato yoini.

“Ekeki fekāfe ē mato shināmasharanō,” ixō Jesús ato yoini

(Mt. 11.25-27)

²¹ Ato askafata, Jesús Apa Yōshi Sharaōnoax inimakōikī yoini iskafakī: “Epa Niosi, keyokōi nai mēranoafoya nono mai anoafo mī āto Ifo. Mī sharafinakōia. Akka atirifāfe kirika kene tāpifikaxō mia Ifo fakaxoma. Iskafakī shināmisfo: ‘Tsoa fetsakai noko keskarama, nō tāpikōia,’ ixō shināmisfo. Akka nāfo mī meka mī ato tāpimanima. Akka nā kirika kene tāpikaxoma mia Ifofaifono nāfo mī meka shara mī ato tāpimani, nā mī fichipaiyai keskafakī. Nāskakē ē mia aicho fai,” ixō yoini. ²² “Ēfe Epa Niospa a tāpia keskara eari keyokōi tāpimani ēmāi āfe Fakekē. Akka tsōakai ea tāpiama, ēfe Epa fistichi ea tāpikōia. Nāskarifiakī tsōa ēfe Epa tāpiama, akka eres fisti ē tāpia. Akka nā fetsafori ē ato tāpimanaino nāfāferi Epa Nios tāpitirofo,” ixō Jesús ato yoini. ²³ Anā aōxō tāpimisfoki oxō ato fisti yoini: “Nā mā oiai keskara oikanax fetsafori inimakōikani. ²⁴ Akka ē mato yoi, Niospa meka yoimisfo feta xanīfofofāfe nā ē mato yoiai keskara oipaifikakī oipaonifoma. Nā mā nikai keskarari nikapaifikakī nikapaonifoma.”

Meka fetsafaxō samāritanō sharaōnoa Jesús ato yoini

²⁵ Feronāfake fisti a Moisés yoikī kirika kenei keskara ato tāpimamis Jesús fe mekaikai kani. Jesús ea kemaimāakai ixō yōkaikai: “Ifo, ζē afeskatiromē Nios fe ipaxakī?” ixō yōkaito, ²⁶ Jesús kemani: “Akka, ζa Moisés kenei ano anexō mī oimismamē afaa ikamākī?” faito, ²⁷ a Moisés kenei tāpiato kemani iskafakī: “Nōko Ifo Nios noikōikāfe nōko oitifofoxō nōko yōshi sharafofaxori nōko kerex sharafofaxō nōko māpori shināsharakōikāfe, askatari a mia chaima nikari noisharafe a mīa mī noimeai keskafakī ixō Moisés kenei,” faito, ²⁸ Jesús kemani: “Mī ea kemasharakōia, mī askafai mī Nios fe ipaxatiro,” ixō Jesús ato yoini.

²⁹ Akka nā Moisés kenei ato tāpimamisto shināni, mī isharakōimisra ea Jesús fanōra ixō. Nāskaxō Jesús yōkani: “Akka, ζtsoamē ea chaima nika?” faito, ³⁰ Jesús yoini: “Ē mia yoinō mī tāpinō. Feronāfake fisti Jerusalén anoax Jericō ari fāi kaito, yometsofāfe achikaxō rapati fianifo. Nāskakē seteketsakata nasharakēma fai kesemē rātafainifo. ³¹ Nāskano nā ato Nios kīfixomisri nā fai fistichi kani. Akka kakī oia fai kesemē rakakē oifikī tanafainima. ³² Nāskano

feronāfake fetsa levita arifi okī ōia rakakē ōini, nāatori kakī finōfaini. ³³ Akka feronāfake fisti Samāria anoax nā fai fistichi akairi chipo kakī, mā fichixō aō noikōikī shinākōini. ³⁴ Nāskata akiki kaxō, a āfe tsefefe ano xini yafi uva ene osixō aō tereaki fetsani. Nāskaxō taxta fakī fetsaxō, āfe kamayo kamaki tsaoinīfōfā iyonī, pexe mēraxō kexeshiyoni. ³⁵ Nāskata pena fetsa nā feronāfake samāritanō āfe kori exe rafe tseaxō nā pexe ifo kopifani iskafakī yoiyanā: ‘Na feronāfake ea kexexōfe. Mī kexesharakē ē mia anā kopifaiyoxikai,’ ixō yoini. ³⁶ Akka na feronāfake tresnoa ē mia yoipai. Akka, ¿fato aō noikōinimē na feronāfake omiskōiai, a noko chaima nika nō noitiro keskafakī?’ ixō yoikaito, ³⁷ a Moisés keneni tāpiato kemani iskafakī: “Nā noikōiaito akiki kaxō sharafani,” ixō yoiaito, Jesús iskafani: “Mīri ato noikī askafafe,” fani.

Marta feta María pexe ano Jesús kani

³⁸ Nāskata Jesús fāi kai pexe rasi mēra nokoni, nāno kēro āfe ane Marta ika ini nāato āfe pexe ano ifini. ³⁹ Akka nā Marta āfe chiko fistiya ini, āfe ane María. Nā María Jesús nāmā tsaoni a Jesús yoiyai keskara nikakōixikī. ⁴⁰ Akka Martakai nikanima. Pīchani Jesús pimapaikī. Nāskakē Jesúsiki kaxō yoini: “Ifo, ¿ea mīa shināimamē eres fisti ē pīchai ēfe chikokai efeta akima? Ea yoixōfe efeta anō,” faito, ⁴¹ akka Jesús kemani: “Marta, mī fekaxtei afarafo shināi. ⁴² Akka nā sharafinakōia María nikakōisharai. Nāskakē ēfe meka shara nikaito tsōa xītitiroma,” ixō Jesús yoini.

11

“Epa Nios kīfikī iskafakāfe,” ixō Jesús ato yoini (Mt. 6.9-15; 7.7-11)

¹ Pena fetsa Jesús Apa Nios kīfini. Mā kīfikī xateano aōxō tāpimis fistichi yōkani: “Ifo, afeskaxō Epa Nios nō kīfitiromakī noko tāpimafe, Juan aōxō tāpimisfo tāpimani keskafakī,” faito,

² Jesús yoini: “Akka mā kīfikī iskafatiro:

Epa Niosī, mī fisti sharafinakōia. Keyokōichi mia Ifofanōfo mī āto xanīfo finakōia inō ato ikisharakōipakexakī. ³ Nā pena tii a nō piyai noko ināfafāife nō afaa yopayamanō. ⁴ A noko chakafaifo nō ato raefa keskafakī nōko chakari noko soaxōfe. Satanás noko afara chakafamapaifaiato nokoki kematimafafe, ixō kīfikāfe,” Jesús ato fani.

⁵ Nāskafata anā Jesús ato yoini: “Ōitsai, fatora mā fetsa mā yamayano, mato yama yamenakē kafanaino mātō pexe ano kaxō mato yoikī iskafaino: ‘Yamā, tres faxō ea yoa ināpe. ⁶ Mā ēfe yama rama noi kiki chai inoax ēfe pexe ano, ē afaayamaki afaa ē pimatitromakī,’ ixō mato yōkaito, ⁷ kemakī mātō pexe mēraxō mā iskafatiroma: ‘Ea fekaxtefayamafe. Ēfe pexe fepoti fetaoxikakī ēfe fakefo fe ē oxaki. Finixō ē mia afaa inātiroma,’ ixō mā yoitiroma. ⁸ Ē mato yoi, fininākafā afara āfe yama inākaspaifikī inātiro fekaxtefaito nā fichipaiyai tii.

⁹ “Nāskakē ē mato yoi, afara fichipaikī Epa Nios yōkakāfe mato ināi kiki. Fena fenakākima manakāfe nā Epa Niospa mato ināitā. Nāskakē Epa Nios kīfifafāikāfe mā kīfaiato mato ināi kiki. ¹⁰ Akka nā yōkai Epa Niospa afara shara ināxii. Nāskarifiakī fētsa afara shara fenaito Epa Niospa fichimatiro. Nāskarifiakī fētsa Epa Nios kīfaiato ināsharakōixii.

11 “Akka, ¿fatora fētsa mā āto epaxō mātō fakefo mā rono ato inātiromē mato foe yōkaito? Maa. Mākai mātō fake mā askafatiroma. 12 Mātō fake mato takaranā too yōkaito, ¿nifo mā inātiromē? Maa. Mākai mātō fake mā askafatiroma. 13 Akka, mā chakafixō mātō fakefo kexesharaxō afara sharafo mā ato inātiro. Nāskarifiakī Epa Nios nai mēra ikato āfe Yōshi Shara mato ināsharakōixii mā yōkaito,” Jesús ato fani.

*Yora fetsafāfe, “Jesús niafakaōxō ato sharafaira,” fanifo
(Mt. 12.22-30; Mr. 3.20-27)*

14 Nāskata Jesús niafaka yōshi chaka potani feronāfake makinoa mekamamismo. Mā a makinoax niafaka tsekeano, nā mekamismo mekainīkafani. Mā mekaito ōikani, “¡Kee! Ōikapo, mā mekai,” yorafo iki fetsenifo. 15 Akka atirifāfe yoinifo iskakakī: “Na Jesús nā niafaka chakafāfe āto xanīfoōxō nā Beelzebúxō* ato makinoa niafaka yōshi chakafo potai,” ikanax yoinānifo.

16 Fetsafāferi chakafamapai kakī yoinifo iskakakī: “Nios feta nai mēraxō afara fetsafo noko ōimafe,” faifono, 17 akka Jesús tāpini a shināifo keskara. Nāskaxō ato yoini: “Keyokōi mai tio anoax āa ranā retenākani keyotirofo. Nāskarifiāi pexe fisti mēra ikanax āa ranā noikaspa faatanākani paxkanātirofo anā ano fistikai toso itirofo. 18 Nāskarifiakī Satanās āfe yōshi chakafo potaxō anā afaa afeskafatiroma. Akka āfe yono keyoano anā āfe yōshi chaka afe itirofo. Nā ē mato yoi, akka mā yoikī iskafo: ‘Satanās yōshi chakaōxō niafaka potai,’ mā ea fai. 19 Akka askafiano, akka, ¿tsōa āfe shara mātō ināfo ināno niafaka chakafo potamisfomē? Nāskakē atoōxō mā tāpitiro akka mā eōnoa shināsharamismo. Akka Niosxō mātō inafāfe niafaka potamisfo. 20 Akka ē niafaka yōshi chakafo potatiro Niospa Yōshi Sharaōxō ato makinoa. Nāskakē mā tāpitiro a Niospa atoki nīchiai mā nokoano. Nāskakē yorafāfe ea Ifofasharakōixikani.

21 “Akka feronāfake mitsisipakōichi marayaxō āfe pexe kexekōiano tsōa āfe afaa fiatiroma. 22 Akka fetsa nā mitsisipa finakōia oxō achixō metexkere axō āfe afarafo fīaitokai anā afeskafatiroma. Nāskax paxkanāi fetsetirofo.

23 “Akka fetsa efe rafekaspakī ea chakafai. Nāskakē nāfāfe fetsafo ea Ifofamakaspakani ato paxkanā fakani Epa Nios Ifofayamanōfo,” ixō Jesús ato yoini.

*Anā niafaka chaka yoraki nanetiro
(Mt. 12.43-45)*

24 Anā Jesús ato yoini iskakakī: “Ē mato yoinō mā tāpinō. Niafaka chaka feronāfake makinoax tsekeax tsōa istoma ano kafāsatiro anoxō tenepai. Akka anoxō toso fichiamax niafaka chakata anā shinātiro iskakī: ‘A ē anoax tsekeita ano anā kapa,’ ixō shinātiro. 25 Mā kaxō ōia nā feronāfake nā pexe xaki mēra mātsomea keskara sharakōi ōitiro itipinīsharakōia. 26 Nāskakē nā nīafaka afe niafaka siete efetiro nā chakafinakōiafo, nāfo nā feronāfake mēra iki fetsenō. Nāskakē nā feronāfake chakafinakōia itiro a iyopaoni keskarama.”

Niospa meka nikakani inimasharakōitirofo

27 Nāskata Jesús anori ato yoiaino kēro fistichi yorafā rasi mēraxō fāsikōi yoini iskakakī: “Mī efa mikikī inimakōi mia fake fixō mī yome pishtakē mia

* 11:15 Satanās āfe ane fetsa Beelzebú.

chocho amayanāmāi mia pexkoax,” ixō fāsikōi yoiaito, ²⁸ Jesús kemani: “Akka nā Niospa meka nikasharakōiai nāfi inimai finasharakōi kiki,” ato fani.

Yora chakafāfe Jesús yōkanifo: “Tsōa atiroma keskara noko ispafe nō mia chanīmara fanō,” ixō yōkanifo (Mt. 12.38-42; Mr. 8.12)

²⁹ Yorafā rasi Jesúski feafono anā ato yoini iskafakī: “Na keyokōi yorafo chakakōifo. Tsōa atiroma keskafakī ē afara afeskarafanō ōipaikani ea Niospa nīchiamākī tāpīxikakī. Akka a keskara ōipaifīkākī ōikanima. Nā Jonás ini keskara fīsti ōixīkani. ³⁰ Akka Epa Niospa Jonás Nīnive pexe rasi ano nīchini āfe meka shara ato tāpīmatanō Epa Nios Ifofanōfo mā āto chaka xatekaxō. Nāskarīfiakī Epa Niospa ea nīchia na yorafā rasi āfe meka shara ē ato tāpīmanō. ³¹ ¿Mā shināimamē nā kēro xanīfo chai inoax kani Salomón tāpīsharakōiano nīkaikai? Akka mākaī ea nīkamisma ē Salomón finōkōīfiano nono efe ifīaxō. Akka nā Niospa yorafo keyokōi ichanāfītia ato yoipakexīi fatofa afe ipanakafomākī, fatofori a omiskōīpakenakafo mēra fokanimākai. Nāskaifono nā kēro xanīfo Salomón nīkaikai chai inoax kanito mato yoikī iskafaxīi: ‘Mā chakakōifo mā Jesús nīkakaspamis,’ ixō mato yoixīi. ³² ¿Mā shināimamē nā Nīnive anoafāfe Jonás Niospa meka ato yoiaito anā Nios nīkakōīnīfo? Akka mākaī ea nīkamisma ē Jonás finōkōīfiano nono efe ifīaxō. Akka nā Niospa yorafo keyokōi ichanāfītia ato yoipakexīi fatofa afe ipanakafomākī, fatofori a omiskōīpakenakafo mēra fokanimākai. Nāskaifono nā Nīnive ano ipaonīfāfe mā āto chaka xatekaxō mato yoikī iskafaxīkani: ‘Mā chakakōifo mā Jesús nīkakaspamis,’ ixō mato yoixīkani,” Jesús ato fani.

“Nōko ōiti sharakē nō shināsharakōītiro. Akka nōko ōiti chakakē nō shināsharatiroma,” ixō Jesús ato yoini (Mt. 5.15; 6.22-23)

³³ Anā Jesús ato yoini iskafakī: “Akka tsōa rāpari otaxō tsōa istoma tsāotiro. Askatari tsōa kesho fepotiro. Askatamaroko fomākīa tsāotirofo chai chaxasharakōīkē a mēra ikīaifāfe ōinōfo. ³⁴ Akka māto afama mīshītīfo noikī mā shināfāīni. Akka nōko fero rafeta nā rāparīnī chai chaxaī keskarakē, nōko yora shara itiro. Nāskarīfīaī nōko fero sharano nō xafakīa ōīsharatiro. Nāskatari nō isharakōītiro. Akka nōko fero chakakē nō ōīsharatiroma, fakīshkōī itiro. ³⁵ Akka ōīsharakāfe mā Epa Nios shināi xafakīa ifīaxō āfe meka kachīkiri faxō mā anā shināsharatiromakī, fakīsh keskara mā itiro. ³⁶ Akka mā xafakīa isharakōīano, māto ōiti mēra oa fakīsh keskara itiro. Mā xafakīa shināsharakōītiro rāpari otaxō mato xafakīa chaxa keskara shara mā itiro,” Jesús ato fani.

Jesús ato yōani fariseofoya a Moisés yoini keskara ato tāpīmamīso (Mt. 23.1-36; Mr. 12.38-40; Lc. 20.45-47)

³⁷ Mā Jesús ato yoikī xateano fariseo fīstīchi iyoni āfe pexe ano pikīxīkī. Nāskakē Jesús āfe pexe mēra ikīkainax mīsa ano tsaoni. ³⁸ Akka nā fariseo shināni Jesús mechokomeyamaito āto xīnīfāfe yoīpaonīfo keskai. Akka taeyoi mechokomepaonīfo, chipo pīxīkākī. ³⁹ Akka nōko Ifāfe Jesús mā tāpīxō yoini askara shināito: “Mā fariseofo mechokomesharafīxō, akka māto shinā mēraxō afara sharafo mā shināima. Yora fetsafo mā noima, afara fetsa fetsatapafo noikī māto shinā mēraxō afara chakafo mato mēra fospīkōia. ⁴⁰ Akka mā anorima shināmis. ¿Mā tāpīmamē tsōa nōko yora femākīa onīfata, nōko ōiti mērari onīfanīmē? ⁴¹ Nāskaxō a yora afaamaisfo afara ato inākāfe. Mā askafakī yorafo mā ōīmatiro māto ōitīnī mā Nios shinākī. Nāskax mā

isharakōitiro, Nios matoki inimanō. Nāskaxō a Niospa mato amapaiyai keskara mā atiro.

⁴² “¡Ooa, fariseofāfe! Māto afarafo atiri mā Nios ināmis. Māto fanafari atiri mā ināmis. Askafixō mā fetsafo mā ato shināmisma, askatari mā ato sharafamisma. Askatari mā Nios noikōiama. Akka nā māto fanafo mā Nios ināmis keskafakī fetsafori noikōikāfe Niosri noikōiyanā.

⁴³ “¡Ooa, fariseofāfe! Ichanāti pexe anoax tsaoti sharakōi ano mā tsaopaimis noko ōisharanōfora ikax. Askatari yorafāfe noko finōkakī noko yoikōisharanōfora ikax.

⁴⁴ “¡Ooa! Māfi nā yora naa keskarafokī. Nā yora maia ano kaxō nō pisi xetetiroma keskarafō mā oke mēra pisifiano. Nāskarifiakī māto ōiti chakafiano mato ōikakī sharara mato famisfo,” ixō fariseofo Jesús yoini.

⁴⁵ Jesús ato askafaito, a Moisés yoikī kirika keneni keskara ato tāpimamisto kemani iskafakī: “Maestro, anori mī yoikī nokori mī ichayanā yoi,” faito, ⁴⁶ akka Jesús yoini: “¡Ooa a Moisés yoikī kirika keneni keskara ato tāpimamisfāfe! Akka māto kaifofo yoikī mā iskafamis: ‘Moisés keneni keskara nikakōikāfe,’ ixō mā ato yoifiki akka māri nikasharakōimisma. Askatamaroko a Moisés yoini keskara finōmainifofā mā ato yoisim mato nikakanax askanōfo. Nā mā ato yoiai keskara apaiifikakī tsōa atiroma. Akka māri mā ato afaa axomisma.

⁴⁷ “¡Ooa! Māfi nā Niospa meka yoisimso maiiafo anoxō mā afarafo onifamiski ato shināxikī. Akka nāfo māto xinifāfe retepaonifo. ⁴⁸ Akka mā mā nikakī tāpikōia a māto xinifāfe apaonifo keskara. Akka māto xinifāfe ato retepaonifo. Akka a maiiafo anoxō mā afarafo onifamis yorafāfe ōinōfo. Nāskarafo mā ato ōimani nā māto xinifāfe apaonifo keskara, māri ato fe ixō mā ato feta askafakerana.

⁴⁹ “Nāskakē Niospa atoōnoa tāpixō iskafakī yoini: ‘A ēfe meka yoisimso yafi eōxō yonomisfo fetsa ē ato nīchixii. Akka ranāri ato reteyanā ranāri ato omiskōimakani.’ ⁵⁰⁻⁵¹ Nāskakē na yorafō iskaratīa niyoafo Niospa ato omiskōimaxii atoōxō. Nā Niospa mai onifaki taefaniſia Abel sharafiano āfe ōchi reteni. Nāskatari xinia fetsa finōmata a Niospa meka yoisimso ato retepaonifo. Nāskata chipokōi fakakī Zacariasi retenifo. Nā Nios kīfiti pexefā chaimashtaxō koati mīsamāfā nakirafexō retenifo. Akka ē mato yoi na yorafō iskaratīa niyoafo Niospa ato omiskōimaxii atoōxō.

⁵² “¡Ooa a Moisés yoikī kirika keneni keskara ato tāpimamisfāfe! Niospa meka shara oa onea keskara mā faa yorafāfe tāpinōfoma. Mākai Niospa meka tāpisharama. Nāskaxō fetsafāfe nikapaifaifono mā ato nikatimafai. Nāskakē Niospa mato omiskōimakī finakōixii,” ixō Jesús ato yoini.

⁵³ Ato Jesús askafakī yoiaino, a Moisés yoikī kirika keneni keskara ato tāpimamisfo fe fariseofo akiki ōitifishkiki finakōinifo. Nāskakaxō fekaxtefayanā afara ichapakōi yōkanifo, ⁵⁴ afara ato yoiaito nikakaxō yōaxikakī. Nāskakaxō yōkanifo xanīfofo yoipaikakī.

12

Jesús ato yoikī iskafani: “Ato feparapaimis iyamakāfe,” ixō ato yoini (Mt. 10.26-27)

¹ Nāskakē yorafā rasi akiki fekanax ichanānifo. Shoiki fetsenifo yora ichapakōi māiyakanax. Nāskakē Jesús aōxō tāpimisfo yoikī taefani, ato iskafakī: “Ōisharakāfe fariseofāfe nafa sharafora noko fanōfora ikaxō mato

anorima yoimapaikani kiki sharafoyamafikaxō. Nāfo feparamitsapaimis-fokī. Nāskakē māri ato keskara iyamakāfe.

² “Akka nā afara one yoifimisfono Niospa ato xafakīa kaimaxoxii, afarari fomāpaimisfono nāfori Niospa ato xafakīa kaimaxoxii.

³ “Nāskakē a yora fetsafo fomāfai ares shināmisfo, nāfori Niospa xafakīa faxii. Nā pexe kene mēraxō pexe fepoti tserexō afara one yoimisfori, nāfori Niospa pexe kachiori ato xafakīa kaimaxoxii keyokōichi tāpinōfo,” ixō Jesūs ato yoini.

Akka Nios fistiki nō mesetiro
(Mt. 10.26-31)

⁴ Anā Jesūs ato yoini iskafakī: “Efe yorafāfe, ē mato yoi. Mato retepaifai-fono rateyamakāfe. Akka māto yora nafaiino māto fero mēsho naima kiki.

⁵ Akka ē mato yoi, tsoaki mā mesetiro, atoki mesetamaroko Nios fistiki mesekāfe. Nāto noko retexō nōko fero mēsho nā omiskōipakenakafo mēra potatiroki. Nāskakē akiki mesekāfe.

⁶ “Akka ē mato yoi mā tāpinō. Na cinco peya mīshtifo minixō mā kori ichapa fiima. Āfe exe rafes mā fii. Askatamaroko Niospa keyokōi peya mīshtifo noi. Atokai shināmakīnakama. Peya mīshtifo afaamafiakē Niospa ato noi. Keyokōi Niospa ato shināpakenaka. ⁷ Akka ē mato yoi, Epa Niospa māto foo fisti rasi mato tāpikakōia. Nāskakē rateyamakāfe. Nā peya mīshtifo kexesharamis keskafakī matori Epa Niospa kexesharakī finakōiakī,” ixō Jesūs ato yoini.

Akka atiri yorafāfe, “Jesūs ēfe Ifora,” ea famisfo yorafāfe ferotaifi. Akka atirifāferi, “Jesūs ēfe Ifomara,” ea famisfo
(Mt. 10.32-33; 12.32; 10.19-20)

⁸ Anā Jesūs ato yoini iskafakī: “Akka ē mato yoi yorafāfe ferotaifi, ‘Jesūs ēfe Ifora,’ ea faifono, ēri, ‘Nafo efe yorafo,’ ē ato faxii Epa Niospa āfe ājirifāfe ferotaifi. ⁹ Akka nā yorafāfe ferotaifi, ‘Jesūs ēfe Ifomara,’ ea faifono, ēri Niospa āfe ājirifāfe ferotaifi, ‘Nafo efe yorafomara,’ ē ato faxii.

¹⁰ “Akka Niospa Fake chakafakī mekaifaifono Niospa ato chaka soaxotiro. Akka Epa Niospa āfe Yōshi Shara chakafakī mekaifaifono Epa Niospa ato chaka soaxonakama.

¹¹ “Nāskata ichanāti pexefo ano mato iyoaifono, askayamakī xanīfofo ano mato iyoaifono, shināchakayamakāfe afeskaxō mā ato kemaimākai afaa mā ato faimākai. Epa Niospa mato shināmasharai kiki. ¹² Akka a mato chakafakī mekaifaifono Epa Niospa Yōshi Sharapa mato shināmasharaino mā ato kemasharai,” ixō Jesūs ato yoini.

Yora afama mīshti ichapayax mesekōixii

¹³ Nānoa fētsa Jesūs yoini: “Ifo, ēfe ochi ea yoixōfe āfe afama mīshtifo ea paxkaxonō,” faito, ¹⁴ Jesūs kemani: “Efe yorashta, tsōakai ea nīchima ē ato yoinō āto afama mīshti paxkanānōfo,” ixō yoita. ¹⁵ Nāskaxō anā yoini: “Mā kexemesharakāfe afarafo ato fichipaiyamakāfe, ayafixō finōmafāi fipaiyamakāfe. Nā nō yopaifo shināyamakāfe, afama mīshtiōnoaxkai nō isharatiro-maki. Nōko afama mīshtifāfekai nōko ōiti noko inimamaxotiro-maki,” ixō Jesūs ato yoini.

¹⁶ Nāskaxō anā meka fetsafaxō ato yoini: “Feronāfake fetsa afama mīshti ichapaya ini. Āfe tare ano yonosharaxō afama mīshti fanano ichapakōi ini. ¹⁷ Nāskakē nā feronāfake afama mīshti ichapayato iskafakī shināni: ‘Ĵēfe yonofō ē afeskafaimē? Fanīkai ēfe yonofō ē fatiroma,’ ixō shināni.

¹⁸ Nāskaxō anā shināni: ‘Ēje, mē shinā ē afeskafaimākai. Nā ē ano afama mīshtifo famis ēfe pexe nasaxō anā efapafai, nāno ēfe fana fimifo mekexiki ēfe afama mīshtifoya. ¹⁹ Nāskaxō ēfe shināmā ē shināi iskafakī: “Nē afama mīshti mekekōia nā xiniyai tii rakakōikai pixiki, ayayanā inimasharakōiyanā.”’

²⁰ “Nāskaito Niospa iskafakī yoini: ‘Mīkai afaa tāpiama. A na fakishi mī nai, akka, ¿na mī mekeafō tsoanā ikimē?’ fani. ²¹ Nāskariatiro a yora afama mīshti ichapaya ikatsaxakī Nios shinātama. Akka Niospa ōiaino anā afaya itiroma,” ato fani Jesús.

“Epa Niospa āfe fakefo kexesharamis,” ixō Jesús ato yoini
(Mt. 6.25-34)

²² Nāskata chipo Jesús aōxō tāpimisfo yoini iskafakī: “Ē anā mato yoisharanō. Ea nikasharakāfe. Shināchakayamakāfe. ²³ Akka a nō piatokai noko imasharatiroma. Askatari a nō safeatori nōko yora noko imasharaxotiro. ²⁴ Shinākapo. Nā peyafāfekai afaa fanamisfoma, afarikai topimisfoma. Askatari afari mekemisfoma. Nāskafekē Epa Niospa ato pimamis. Akka Niospa nō peyafō finōmainīfōfā matoroko kexesharakōimis. ²⁵ Nāskakē, ¿afeskakī mā shināchakaimē? A nō shināchakaitokai pena fisti noko anā nimatiroma. ²⁶ Akka afaa shināyamakāfe. A nō shināitokai noko nimatiroma. Nāskakē afaa shināyamakāfe.

²⁷ “Akka shinākapo afeskax charofo foaikamakī. Na charofāfe yonokanima. Askatari xapo toro atirofoma rapati faxikakī. Nāskakē ē mato yoi, na charofo sharafiano xanīfo Salomón rapati sharafinakōi safefixō na charofo finōama. ²⁸ Akka Niospa nafefo shara mīshti onifasharafiano nō sepakī xateano natiro. Nāskaxō nō koofatiro. Akka charofo finōmainīfōfā Niospa mato noikī mato rapati shara safematiro, mato kexesharaxō. Akka mā shināchakakī mā Nios chanimara fasharaima. ²⁹ Nāskakē shinākī iskafayamakāfe: ‘Ooa, ē afaa piimēti a ē piiai keyoano, askatari ē afaa ayaima,’ ixō shināyamakāfe. ³⁰ Akka nā Nios Ifofaiāfema iskara shināmisfo. A piiai fisti shinākata, a safepaiyaifori shināmisfo. Akka Epa Niospa mā mato tāpia afarafo mā yopaito. ³¹ Nāskakē māroko Nios xanīfōōnoa shināfafāikāfe. Mā askaito afara shara Niospa mato ināxii kiki,” ixō Jesús ato yoini.

“Epa Nios ika anoxō afara sharakōifo mato mekexona,” ixō Jesús ato yoini
(Mt. 6.19-21)

³² Anā Jesús ato yoini iskafakī: “Efe yorafāfe, rateyamakāfe, Epa Niospa mato kexesharaikiki. Akka Epa Niospa āfe afama mīshti mato ināsharai inimakōikai mato ināsharai. ³³ Māto afama mīshtifo minixō kori fiyokāfe. A yora afaamaisfo ato ināxikakī. Mā askaino Niospa nā ika anoxō mato afama mīshti mekexona. Nāfokai keyonakama, tsoarikai yometsotiro. Askatari nakaxari mato piatiroma, Epa Niospamāi mato mekexonano. ³⁴ Akka māto afama mīshti shinākī nā fisti mā shināi. Akka mā Nios fisti shinākī nā fistiri mā shinākōitiro māmāi noikōikī. Nāskax mā afe isharpakexatiro,” ixō Jesús ato yoini.

Īkisi itipinīsharakāfe

³⁵ Anā Jesús ato yoini iskafakī: “Nāskakē itipinīsharakāfe māto rapati safe-sharakōita māto rāpariri ōtasharakōikāfe. ³⁶ Nā āfe ifo yonoxomisto āfe ifo manatiro keskakāfe pexe fetsa ari kaax, āfiyatani oaino. Mā nokoaito āfe fepoti koshi fepexoxiki, mā nokoxō fepoti ramātoshaiaino. ³⁷ Nāskaifono āto ifo atoki inimasharakōitiro, manasharakōiaifono. Akka ē mato yoikōi āto ifāfe mīsa ano

ato tsãotiro atoki inimayanã. Nãskaxõ ato pimatiro atoki inimasharakõiyaniã. ³⁸ Nãskakẽ inimasharakõitirofo ato ifomã manasharakõikanax, yamenake kafanaino nokoaino, askayamai penanaki kafanaino nokoainori akiki inimasharakõitirofo. ³⁹ Nãskakẽ mãri nã keskara tãpisharakãfe. Akka pexe ifãfe mã tãpixõ afetia yometso nokoimãkai ixõ ãfe pexe itipinĩshara fatiro, a mẽra ikiax yometsoyamanõ. ⁴⁰ Nãskarifiã mãri itipinĩsharakãfe. Akka oimara ixõ mã ea manayamano ã matoki nokorisatani,” ixõ Jesús ato yoini.

Ina shara yafi ina chakaõnoa Jesús yoini
(Mt. 24.45-51)

⁴¹ Nãskaito Pedro yõkani: “Ifo, ¿noko fisti meka fetsafaxõ mã yoiãmẽ, askayamakĩ keyokõĩ mã noko yoiãmẽ?” ixõ Pedro yoikaito, ⁴² Jesús kemani: “Mã tãpinõ ã mato yoi afe keskaramãkĩ ina shara ãfe xanifãfe ãfe afama mĩshti kexemafaini mai fetsa ari kakĩ nã ãfe pexe anoafo ato kexesharaxonõ ato pimasharayanã, nã ãfe xanifõ fena oyamaino. ⁴³ Mã mai fetsa ari katani oxõ õitoshini a yonoxomisto mã yonoxosharakõiano. Nãskakẽ akiki inimakõini a yonoxomisri inimakõini mãmã yonoxosharakõiax. ⁴⁴ Ë mato pãraima. Nãskaxõ ãfe xanifãfe mã xanifõ imaxõ ãfe afama mĩshti kexexonõ inãtiro. ⁴⁵ Akka mã ãfe xanifõ yonoxomisto, ‘Èfe xanifõ fena oimara,’ ixõ shinãkĩ, a yonoxomis fetsafo sãteketsani, kãrofoya. Nã pãemisfo fe rafexõ ato feta piyanã, askatari ato feta ayayanã, askatari ato fe pãeyanã. ⁴⁶ Iskaratã ãfe xanifõ oimara ixõ manayamaino, nã pena fistichi ãfe xanifõ nokofiaino mã nokoxõ a yonoxomis omiskõimatiro, nã yora chakafo fomisfo mẽra potaki.

⁴⁷ “Akka a yonoxomisto mã tãpia ãfe ifãfe fichipaiyai keskara, nãskakẽ mã tãpifiax itipinĩsharama, nãskakẽri nikasharaima, nãskakẽ ãfe ifãfe omiskõimayanã koshaketsatiro. ⁴⁸ Akka a yonoxomis fetsa ãfe ifãfe yoiã keskara tãpixoma afara chakafakẽ ãfe ifãfe omiskõimafiakĩ, omiskõimasharanima. Nãskarifiakĩ Niospa fetsa ichapa tãpimaxõ ichapari yõkaxii. Iskafakĩ a ã mia yoiã keskafakĩ, ¿fetsafo mã mã ato tãpimasharamẽ? ixõ yõkaxii. Akka fetsafo tãpimasharamano Niospa omiskõimakĩ tãpimaxii,” ixõ Jesús ato yoini.

“Akka atirifãfe ea chanĩmara faifono, atirifãferi ea chanĩmara fakanima,” ixõ Jesús ato yoini
(Mt. 10.34-36)

⁴⁹ Anã Jesús ato yoini iskafakĩ: “È keyokõĩ maifo tii anoa ãto chaka xatemaniyoi ã oa. Atirifãfe ea chanĩmara faifono, fetsafãferi ea chanĩmara fakanima. Nã chanĩmara faamafo Niospa ato omiskõimaxii. Èfe Epa Niospa ea mai ano yonomanai keskara iskaratã keyokõĩ shara ikerana. ⁵⁰ Akka matõnoax naxii ã oni. Akka ã nayoamax ã omiskõixii. Nãskakẽ ã omiskõifinakõita ã naxii. ⁵¹ Akka, ¿mã shinãimẽ ã oni nono mai anoax eõnoax inimanõfo? Maa. Askarakaima. Akka ã mato yoi nã ea chanĩmara faafãfe shara shinãifono, akka a ea chanĩmara faafãfema shara shinãkanima, afara chaka shinãkani. ⁵² Akka iskaratã nã pexe fisti mẽra cinco yorafo ikaxõ anorisfo shinãkanima, paxkanãtirofo. Trespatõ nã rafe noikaspaino, nã rafetari nã tres noikaspatirofo. ⁵³ Apa ãfe fake noikaspaino ãfe fakefãferi ãfe apa noikaspatiro. ãfe ãfari ãfe fake xotofake noikaspaino ãfe fake xotofãkeri ãfe afa noikaspatiro. Askatari ãfe fãfa yõxafãfe ãfe fãfa naetafa noikaspaino ãfe fãfa naetafari ãfe fãfa yõxafo noikaspatiro.”

Nai foiskī nō tāpitiro
(Mt. 16.1-4; Mr. 8.11-13)

⁵⁴ Nāskata Jesús yorafo yoini iskafakī: “Nai foiski nai kōi ōikī nai choshtakē oi feira mā faino oi itiro. ⁵⁵ Akka nā xini oaima anorinoax nēfēfā oaino, mā xiniaira mā fatiro. Chanīma, nāskatiro. ⁵⁶ Akka māakai afaa tāpiama, mākōi mā kakamepaimis a mā yoiai keskara mā yoifikī mā chanīmara famisma. Mā nai foiskī mā yoisimis oi feira mā famis. Askara tāpifixō māakai a Niospa mato yoiai keskara mā chanīmara fapaima. Iskaratīa afara afeskarafiaitokai mā tāpiama,” ixō Jesús ato yoini.

Fētsa mia chakafaito raefarisafafe
(Mt. 5.25-26)

⁵⁷ Anā Jesús ato yoini iskafakī: “Akka, ζafeskakī mā shara shināimamē a sharafinakōia? ⁵⁸ Akka fētsa mato yoikī iskafaino: ‘Mī ea chakafaa. Ē xanīfo yoikai,’ ixō mato yoiaino, xanīfo ari kayoamano koshi raefakāfe. Akka mā askafayamaino nā xanīfāfe āfe sorarofō yoitiro nā sorarofāfe mato karaxa mēra ikimanōfo. ⁵⁹ Ē mato paraima. Fētsa mato karaxa mēra ikimanano mā fena tseketiroma. Akka nā mā nimia kopifatīa mā tseketiro,” ixō Jesús ato yoini.

13

Nōko chaka xatexō nā Jesús noko amapaiyai keskara fisti nō atiro

¹ Nāskaino yorafo Jesúski fokaxō yoinifo iskafakī: “ζMā mī tāpiamē na Pilato yorafo ato retemanita Galilea anoafō yoinā retekaxō Nios kīfiti pexefā mēraxō Epa Nios ināifono āto imifo yoinānā imifoya osita?” ixō yoinifo. ² Askafaiāfē Jesús ato yoini iskafakī: “ζMā shināimē na Galilea anoax na feronāfakefo naitafo? ζYora chakakōifo keskarakanax āto kaifo keskarakanaxma chakafinakōiax naitafo ixō mā shināimē? ³ Maa. Askarama. Akka māri māto chaka xateyamaxō mā Nios Ifofayamax nā ikaifo keskai māri mā narisatiro mato reteaifono. ⁴ ζAkka mā shināimē nā feronāfake dieciochonoa atoki peXe keya āfe ane Siloé atoki pakeano nanifo? ζMā shināiraka: ‘Nāfo chakafinakōia nanifo Jerusalén anoafō keskaraxma,’ ixō mā shināimē? ⁵ Maa. Askarama. Chanīma ē mato yoi. Akka māto chaka mā xateyamaxō mā Nios Ifofayamax, māri mā omiskōipakenaka.”

Meka fetsafaxō higuera fimimaisnoa Jesús ato yoini

⁶ Jesús meka fetsafaxō ato yoini iskafakī: “Feronāfake fistichi āfe tarepa higuera fana ini. Nāskax ōikai kani mā fimiyamākī, kaxō ōimi fimimais ini. ⁷ Nāskakē yoini a tare kexemis. ‘Ōipo mā tres xinia afiax na fana higuera fimiyama. Ē āfe fimi fichipaifiaino fimiyama. Ichakanō rerafe, ano fimi fetsa nō fananō,’ fani.

⁸ “Akka ifāfe askafaino a tare kexexomisto kemani: ‘Ifo, na xinia fisti manayofe. Ē a nāmā orosharata ē mai tatsispo sharayonō. ⁹ Ōitsai, ē askafaino fimisharatirokī. Akka fimiyamaito mī ea reramanō,’ ixō a tare kexemisto yoini.”

Jesús pena tenetitīa kēro petoko sharafani

¹⁰ Nāskano pena tenetitīa ichanāti peXe mēra kaxō Jesús ato yoini. ¹¹ Nānori kēro ini isinī itiani dieciocho xinia amis, niafaka chakata isinī imamis nā kēro sharamisma ini petoko itiani. ¹² Nānoa Jesús ōikī kenaxō yoini iskafakī: “Yōxafoshta, mā mī shara isinī itianixakī,” fani.

¹³ Nāskaxō āfe mēkemā ramāino, koshikōi nā kēro sharakōitani. Nāskaxō, “Epa Nios fāsi sharakōi,” nā kēromā fani. ¹⁴ Nāskakē Jesús pena tenetiā kēro sharafaino, nā ichanāti pexe anoa xanīfo ōitifishkikī yorafo yoini iskafakī: “Seis nia nō yonotiro, akka na pena tenetiā tsōa yonotiroma. Nāskakē seis nia ofafe sharaxiki, akka na pena tenetiā tsōa mato sharafatiroma,” xanīfāfe ato fani.

¹⁵ Askafaito nōko Ifo Jesús kemani iskafakī: “Mā kai afaa tāpiana, mākōi mā kakapaimis, akka pena tenetiāri mā yonomis mato yoinā inafō mā tēpemis ato faka ayamanikakī. ¹⁶ Akka na kēro Abraham āfe fena Satanās chakata finitima famis isinī imayanā dieciocho xinia amamis. ¿Akka afeskakī na pena tenetiā na kēro ē sharafatiromamē?” ixō Jesús ato yoini.

¹⁷ Nikakani a Jesús noikaspamisfo rāfipainifo. Akka yorafo inimakōinifo nā kēro Jesús sharafaito ōikani.

Mostaza exeōnoa yoikī meka fetsafaxō Jesús ato tāpimani
(Mt. 13.31-32; Mr. 4.30-32)

¹⁸ Nāskata Jesús anā ato yoini iskafakī: “Afe keskaramakī Nios xanīfāfe noko ikinā ē mato yoinō. Nikakapo iskarakī: ¹⁹ Oa mostaza exe feronāfāke āfe tarepa fana keskarakī. Mā foaikax efapakōiax ifi tio itiro. Mā efepakōiano peyafāfe āfe pōyamā naa fatirofo. Nāskarifiakī mā taefakī fisti rasichi mā Epa Nios Ifofayotiro. Akka chipo ichapakōichi mā Epa Nios Ifofatiro,” ixō Jesús ato yoini.

Meka fetsafaxō pāa faraxika keskaraōnoa Jesús ato yoini
(Mt. 13.33)

²⁰ Afianā Jesús ato yoini: “Afe keskaramakī Nios xanīfāfe noko ikinā ē mato yoinō. ²¹ Nā kēromā pāa fakī levaduraya harina osixō kamosakano faraxitiro keskara. Nāskarifiakī nō ōitiro. Yorafāfe Niospa meka āto shinā mēra naneafono nō ōiamafiaino āto ōiti fetsafakanax Nios keskara shara itirofo,” ixō Jesús ato yoini.

Fepoti pishtaōnoa Jesús ato yoini
(Mt. 7.13-14, 21-23)

²² Jerusalén ano fāi kakī, Jesús pexe rasi anoafō ato yoini a pexe rasi pasotai ikafo anoafori ato yoifoni. ²³ Ato askafaito fistichi yōkani: “Ifo, ¿fisti rasi Niospa ato ifimē?” faito Jesús kemani,

²⁴ “Pexe fepoti atsoke ikipaifikani toa ikitiroma. Akka ē mato yoi yora ichapakōi ikipaifikani ikitirofo. Nāskarifiāi ēfe Epa ika ano ikipaifikani ikitirofoma. Nāskakē āfe meka tāpisharakāfe a mēra ikisharaxikakī. Akka yora ichapato ēfe Epa nikafikatsaxakakī, tsōa Ifofamax a ika ano ikipaifikani toa ikitiroma. ²⁵ Nāskakē pexe ifo finināfā āfe pexe fepoti fepotiro. Nāskakē mā pexe emāiti nīxō mā kenakī iskafatiro: ‘Ifo, noko fepoti fepexōfe,’ mā faino mato kemakī iskafatiro: ‘Ēkai mato ōimisma mā kai efe yorama tiiri fakiranoax mā oa,’ ixō mato yoitiro.

²⁶ “Nāskakē mā yoikī taefakī iskafaxii: ‘Nō mefeta pita nō mefeta ayamis, askatari mī noko yoiaito nō nikamis,’ mā faxii.

²⁷ “Mā askafaino mato kemakī iskafaxii: ‘Mē mato yoi ē mato ōimisma fakiranoax mā oa. Emakinoax fotakāfe mā yora chakafo mato faxii.’ ²⁸ Mato askafaino anoax mā oiayanā mā omiskōi fetsexii, Abrahamnō Isaacanō Jacobonō a Niospa meka yoimisfonō ato ōi Nios xanīfo ika anoa ato ōi. Nāskakē ato makinoa Niospa mato potaxii. ²⁹ Akka yorafo nā mai ano keyokōi

ikanax fetsa fetsatapafo fexikani Nios xanĩfo anoxõ afe tsaõxõ pixikakĩ.
 30 Nāskakē fetsafo iskaratĩa Nios nikafikani afe rafeafoma, akka a chipo nikaifo Ifofakanax afo afe rafetirofo. Akka fetsafāfe nikakĩ taefafianixakakĩ Ifofakanamax a rama nikaifo keskarakanax afe ipaxatirofoma,” ixõ Jesús ato yoini.

Jesús Jerusalén anoafõ ato shināi oiāni
 (Mt. 23.37-39)

31 Nāskata fariseofo Jesús ano fēkaxõ yoinifo iskafakakĩ: “Nonoax katāfe Herodes mia retepai kiki,” faifono,

32 Jesús ato kemani: “Fokaxõ ea Herodes yoixotakāfe aato ato pāramiski. Ē fena nonoax kaimakai. Iskaratĩa na yorafo sharafayanā penamari ě ato makinoa niáfaka chakafo ě ato pōtaikai. A isinĩ ikaifori ě ato sharafapaikai. Mā ato askafakĩ keyota nā ě kapaiyai ari ě kaikai. 33 Akka iskaratĩa ě yonoyoi, pena fetsari ě yonoi, akka a Niospa meka ato yoimis Jerusalén makinoax na sharama.

34 “iOoa Jerusalén ano ikafāfe! Māfi a Niospa meka yoimisfo mā ato retemiski. Askatarĩ aōnoa āfe meka shara yoitanõfo Niospa mato ano nīchiafori mā ato tokorinĩ tsakakĩ retemis. Oa takaranā āfe fakefo āfe pei nāmā onetiro keskafakĩ ě mato kexepaifiaito mā ea nikaskaspamis. Māfi ekeki omismakĩ ě mato ikipanā. 35 Akka õikapo, iskaratĩa mato anā tsõa kexeima na mā imis anoa. Ē mato yoi anā mā ea õima. Akka nā ě anā oiāitĩa mā ea õixii. Mā yoikĩ iskafaxii: ‘Nafi Niospa nokoki nīchia fāsi sharafinakõia Epa Niospa na shara fapanaka,’ ixõ mā eõnoa yoixii,” ixõ Jesús ato yoini.

14

Jesús a isinĩ imis sharafani pōya rafe faraxita kishi raferi faraxikē

1 Nāskakē pena tenetitĩa Jesús kani nā fariseo xanĩfāfe āfe pexe anoxõ pikai. Akka nānoxõ fariseo fetsafāfe õinifo Jesús afaa afeska faimākai nõ õinõ ikaxõ. 2 Nāskano nānori āfe ferotaiifi feronāfake fisti isinĩ imis ini pōya rafeki faraxika ita kishi rafeki faraxika ini. 3 Nāskakē Jesús ato yõkani, a Moisés yoikĩ kirika kenenĩ keskara ato tāpimamisfoya fariseofo: “¿Na pena tenetitĩa a isinĩ ikaifo nõ ato sharafatiromē, askayamakĩ nõ ato sharafatiromaraka?” ixõ ato yõkaito, 4 akka tsõa tooxanima. Nāskakē Jesús a isinĩ ikai mētsoinĩfofā sharafani. Nāskaxõ yoini: “Mā mĩ sharaki, katāfe,” fani. 5 Nāskaxõ fariseofo Jesús ato yoini iskafaki: “Akka, ¿fatora mā fētsa, mātõ fake iyamāi mātõ yoinā ina kini mēra pakeano mā koshi ifirisa fatiromamē pena tenetitĩa?” ato faino, 6 tsõa kemanima.

Feronāfake āfiyaino fista ayanā pitirofoõnoa Jesús ato yoini

7 Nāskata Jesús õini mā fēkaxõ tsaoti sharakõi fikanax mĩsa ano tsaofaifāfe. Nāskaiifāfe õikĩ Jesús meka fetsafaxõ ato yoini iskafakĩ: 8 “Akka fētsa fista ayanā kēro fikĩ mato kenano, tsaoti sharakõi ano tsaoyamakāfe. Akka mato keskarama nā feronāfake sharafinakõia pexe ifāfe kenano oax nā tsaoti sharakõi ano tsaotiroki. 9 Akka pexe ifāfe fetsa fe oxõ mia yoikĩ iskafatiro: ‘Na feronāfake tsaoti ināfe,’ mia faino mĩ rāfikõiyānā kaax chikayakõi mĩ tsaotiro. 10 Akka askatamaroko mia fētsa kenamana kaax ori chikayakõi mĩ tsaoyotiro. Akka nā mia kenamanato mā oxõ mia yoinõ iskafakĩ: ‘Efe yorashta, na tsaoti sharakõi ano tsaoyofe,’ mia faino, nāskakē mĩ inimasharakõitiro yorafāfe ferotaiifi a mefe mĩsa ano tsaofafāfe mia õiaifono.

¹¹ Akka fatora fētsa ato finōpaiyaito a keskara Niospa ato nāmā nīchitiro anā afaa inōma. Akka a shināi is kai: ‘Ēkai afama, ē fetsafo finōpaima, ē ato keskarama,’ ixō shināito Niospa fetsafo finōmainīfofā sharakōi nīchitiro,” ixō Jesús ato yoini.

¹² Ato askafata a ato pimairi Jesús yoini iskafakī: “Mī ato pimakī mī yamafoos ato pikīyamafe, mī extofoosri ato pikīyamafe, mī kaifoosri ato pikīyamafe, a mia chaima nikafori kori ichapayafori ato pikīyamafe. Akka afāferi kopikiri mia pikītirofo, nāskakē mā pimanāsharakōitiro. ¹³ Askatamaroko mī fista ayanā a yora afaamaisfoya a nipaikī ranāifo chātofoya a fēxofori ato pikīfe. ¹⁴ Nāskakē mī ato askafaax mī inimakōitiro. Akka afāfe mia kopifatirofoma, akka mī ato askafaito Niospa mia inimamasharaxii naax mī anā otokē,” ixō Jesús yoini.

Meka fetsafaxō Jesús ato yoini feronāfāke mā a piyai mā itipinīsharakōi faxō ato pimapaiyaiōnoa yoikī
(Mt. 22.1-10)

¹⁵ Ato askafaito nikakī fētsa a mīsa ano tsaoto Jesús yoini iskafakī: “Ifo, inimasharayanā Epa Nios xanīfāfe keyokōi yorafo īkināi anoax ato fe ikanax fāsi inimasharakōitirofo,” ixō yoiaito, ¹⁶ Jesús yoini iskafakī: “Feronāfake fistichi a piyai sharakōi faxō yora ichapa kenamani afeta pii fenōfo. ¹⁷ A piyai mā itipinīshara faxō a yonoxomis nīchini ato yoitanō iskafakī: ‘Kookāfe pixikakī. Mā ēfe xanīfāfe itipinīshara faki,’ ixō ato yoitanō.

¹⁸ “Ato askafaino, akka keyokōichi yoinifo iskafakakī: ‘Nō kayotiroma,’ ixō yoinifo. Akka a yoikī taefato yoini iskafakī: ‘Ē rama mai fiaki ē ōiyotanō. Ē mia yoikai ē mefe kayotiomaki,’ ixō yoini. ¹⁹ Fētsari yoikī iskafani: ‘Ē rama diez faxō fakka fiaki yonomaxii ē ōiyonō sharamakī. Nāskakē ē mefe kayoi kaimakai,’ ixō yoini. ²⁰ Fētsari yoikī iskafani: ‘Ē rama kēro fia. Ē mefe katiroma,’ ixō yoini.

²¹ “Nāskakē a yonoxomisto oxō nā yoiāfo keskafakī āfe ifo yoini, a yonoxomisto yoiāito nikai ōitifishkikōini. Nāskakē afianā a yonoxomis yoikī iskafani: ‘Nā mī kapaiyai ari kaxō pexe rasi pasotaino ato ifitāfe a afaamaisfoya, a nipaikī ranāifo ifita fēxofori ifita chatofori ifita ato fatāfe,’ ixō nīchini.

²² “Mā āfe ifāfe nīchia katani. Okī yoitoshini, iskafakī yoini: ‘Ifo, nā mīa yoiā keskafakī mē ato yoitani. Akka mā fekani, mā fefiakanax mī pexe fospikanima,’ faito, ²³ afianā āfe ifāfe yoini iskafakī: ‘Na fāi kaxō ato yoirisafafe a chaima ikafoya, nāskaxō ato yoikī iskafafe: ‘Ēfe ifāfe pexe mēra ikikāfe afeta pixikakī,” ato fafe ēfe pexe fospikōinōfo. ²⁴ Akka ē mato yoi nā yorafo taefakī ē ato pimapaiyoa ēfe pexe anoxō efeta pinōfo akka afāfe anā efeta pinakafoma,’ ixō pexe ifāfe yoitiro,” ixō Jesús ato yoini.

Jesús Ifofai omiskōifikani isharakōitirofo
(Mt. 10.37-38)

²⁵ Yora ichapafāfe Jesús chīfaifono atokiri fesoakekafā ato yoini: ²⁶ “Fētsa ea Ifofapaiikī ea noikī finakōitiro. Āfe apanō āfe afanō āfe āfinō āfe fakefonō āfe extonō āfe chikonō ato noifikī earoko noikī finakōiama, askatari āa anoi noime i ea noisharakōitama nāskakē a keskara eōxō tāpimis itiroma. ²⁷ Akka ē cruznoax mato nāxoxii. Nāskakē ea tsōa yoikī iskafaima: ‘Iskaratā ē Jesús Ifofai. Nāskakē ē nai omiskōifikī ē shināchakaima,’ ixō tsōa anori yoiaxma, nāskakē ēfe ina itirofoma.

²⁸ “Akka fatora fētsa mā pexe fapaikī ĩkisi mā shināyotiromamē afe tii xepa peimāki ōixiki aō pexe fakī mitoxiki. ²⁹ Akka mā pexe fapaikī mā xepa pei ichapama fixō mā mitotiroma. Nāskakē nā ōiaifāfe mato kaxemetsama fatirofo.

³⁰ “Mato iskafakī yoiyanā: ‘Kee, ōikapo, na feronāfāke pexe fafiakī akka pexe fakī mitoama.’ ³¹ Nāskarifiakī xanīfo fētsa afe xanīfo fetsa fe retenāpaikī shinātiro a diez mil soraroyato a veinte mil soraroya retetiromakī. ³² Nāskakē afe retenātirooma meekī, xanīfo fetsa oyoamano meka fomatiro iskafakī yoikī: ‘Nō retenāimakai, nō raenānō,’ ixō yoitiro. ³³ Nāskarifiakī fatora mā fetsa mato afarafo mā potayamax ēfe ina mā itiroma,” ixō Jesús ato yoini.

Akka tashi sharakēma nō pitiroma
(Mt. 5.13; Mr. 9.50)

³⁴ Anā Jesús ato yoini iskafakī: “Akka shinākāpo. Tashi sharakē nō tsopeitiro. Akka tashi sharayamakē nō tsopeitirooma, paispa chakakē. ³⁵ Askarakai tsōa fichipaima. Potatirofo. Nāskariakakī ea Ifofayamakakī ea tsōa Ifofasharakanima chakakōi ea fakani. Akka mā pachoyakī ea nikasharakāfe,” ixō Jesús ato yoini.

15

Oveja fenoaōnoa Jesús meka fetsafaxō ato yoini
(Mt. 18.10-14)

¹ Nāskakē nā xanīfo Roma kori fīxomisfo fe yora chakafo Jesúski fenifo āfe meka nikai fekanī. ² Nāskaifono fariseofo feta a Moisés yoikī kirika kenenī keskara ato tāpimamisfāfe Jesús mekafakakī iskafakī yoinifo: “Ōikapo nato yora chakafo ifimis, askatari ato feta pimis,” ixō yoinifo.

³ Askafaifono Jesús ato yoini meka fetsafaxō mā tāpixō iskafakī: ⁴ “Fatora mā fetsa cien oveja inayano fisti ato makinoax fenoano, nā noventa y nueve mā anā fasifo mēra nūchitiro. Nāskaxō nā oveja fenoa fisti mā fenatiro shināmitsakōiyanā. Nā mā fichiaitīa fetsafo kāimaxiki. ⁵ Mā fichiax āfe oveja fenoaki akiki inimakī tepapiinīfofā tepokomexō iyotiro. ⁶ Nāskax mā āfe pexe ano nōkoxō āfe yamafoya a chaima nikafo yoitiro iskafakī: ‘A ēfe oveja fenoa. Mē fichiakī efe inimakāfe,’ ixō ato yoitiro. ⁷ Nāskakē ē mato yoi, nāskarifiakī inimakōikani nā nai mēra ikafo fētsa āfe chaka xatekōiano Jesús Ifofakī. Akka nā noventa y nueve yorafokiri nai mēranoax atokiri inimakani, afomāi ishakarōipaonifono nono mai ano ikanax. Akka nā feronāfāke chakafinakōi iyopaonixakī āfe chaka xatekōiano akiki inimaifinakōikani nai mēranoax,” ixō Jesús ato yoini.

Meka fetsafaxō Jesús ato yoini kēromā āfe kori exe fenoa fīaoxō

⁸ Anā Jesús ato yoini iskafakī: “Nāskarifiakī kēro kori exe diezyaano fisti pakeano āfe pexe mēra rāpari otaxō fenakī ōisharata mātsokī fichitiro. ⁹ Nāskata mā fichixō, āfe yamafoya a chaima ikafoya ato ichanāfatiro. Nāskaxō ato yoikī iskafatiro: ‘¡Aicho! A ēfe kori exe fenoa mē fichiakī efe inimakāfe,’ ixō ato yoitiro. ¹⁰ Nāskarifiakī ē mato yoi. Nāskarifiakani Epa Niospa āfe ājirifo inimakani fētsa āfe chaka xateax a anā ipaoni keskara iyamaito ōikani,” ixō Jesús ato yoini.

Meka fetsafaxō Jesús ato yoini apa āfe fake raefatiroōnoa yoikī

¹¹ Jesús afianā ato yoini iskafakī: “Feronāfake fisti fake rafeya ini. ¹² Akka nā chipokoto apa yoikī iskafani: ‘Epa, mā mī chaima nakī a mā ināxiai ikisi ea ināfe,’ fani. Nāskakē āpa āfe afama mīshiti ato paxkaketaxoni.

¹³ “Nāskano pena fetsa āfe fake chipokoto āfe afama mīshiti ato ināketsani kori fixiki. Mā kori fiax chaikōi kani mai fetsa ari. Nārixō āfe kori potakī mori mēxotaima pāekī kēro chota feromafo fe ikī. ¹⁴ Akka mā āfe kori potakī keyoano, nā mai anoaxri fonāikōinifo. Nāskakē nā mai anoax nā feronāfakēri chipo omiskōini afaamaisax. ¹⁵ Nāskakē kaxō nā mai anoax feronāfake fetsa yono yōkani yonoxopaikī, iskafakī yoini: ‘Ē mia yonoxopai,’ ixō yōkaito āfe tarepa nīchini āfe kochifo pimaxonō. ¹⁶ Nāskata fonāikōifiki a kochifāfe piar maropei xaka pisharapaikōini tsōakairoko afaa pimaino.

¹⁷ “Nāskakī iskafakī shināni: ‘Ēfe epa yonoxomisfāfe ēfe ēpa pexe anoxō pikī finasharakōiyanā texefamisfo. Akka ē nonoax fonāiki finakōi mē nairokomē,’ ixō shināta, ¹⁸ ‘Mia iskaratīa afianā ēfe ēpa pexe ari kapa. Mē kaxō iskafakī ēfe epa yoi kaikai, ‘Epa, ē Nios chakafata miari ē chakafamis. ¹⁹ Nāskakē iskaratīa ēfe fakera mā ea fatiroma. Mia yonoxomisfo keskara mī ea fatiro,’ ixō shināta, ²⁰ āfe āpa pexe ari fāi kani. Nāskakē chai inoax oaito āfe āpa fichini shināmāi fakī. Nāskax akiki koshi farekekāi akiki nokota chishtoinīfofā kokoketsani.

²¹ “Nāskafaito āfe fāke āfe apa yoikī iskafani: ‘Epa, ē Nios chakafata miari ē chakafamis. Nāskakē ēfe fakera mā fatiroma,’ ixō apa yoini.

²² “Apa askafaino akka āfe āpa a yonoxomis yoini ato iskafakī: ‘Koshikōi rapati fenasharakōi fixokāfe ēfe fake ea safemaxokāfe, askatari anīcho sharari safemakāfe, askatari sandalia sharari safemakāfe,’ ato fata, ²³ ‘Fākka fake xoakōiari ifitakāfe retexikakī nō pinō fista ayanā. ²⁴ Akka na ēfe fake mā nani keskara ikatsaxakī mā anā ekeki nokoaki. Mā fenofinino mā nō anā fichiaki,’ ixō akiki inimakī fista axoni.

²⁵ “Akka āfe fake iyoato āfe tare ano yonofai okī nikaferani pexe chaima nokoiyokī mōsika maneyanā mairafono. ²⁶ Nāskakē a yonoxomis fetsa kenaxō yōkani āfe āpa pexe anoxō afaa afeskafakanimākai. ²⁷ Askafaito a yonoxomista yoini: ‘Mā mī exto noko. Nāskakē āpa fakka fake xoa sharakōia ato retemana afeskaxma mī exto sharakōi nokoano,’ ixō yoini.

²⁸ “Akka āfe ochi iyoa akiki ōitifishkiki finakōini. Nāskakē pexe mēra ikinima. Nāskaino āfe apa āfe pexe mēranoax kāinākafani āfe fake yoioi mā āfe fake chipoko nokoano, ‘Mā mī exto nokoaki. Nōko pexe mēra ikikofe,’ fani. ²⁹ Āpa askafaino apa kemani iskafakī: ‘Shināpo epa, ē mia yonoxomis keskarakō, ħafe tii xinia ē mia yonoxomismē? Ea mā yoiaitokai ē mia nikakaspamisma, akka eakai cabranā fakeshta mā ināmisma retexō piyanā ēfe yamafo feta ē fista apanā. ³⁰ Akka mī fake mā noko nā mī kori ināni kēro chotaferomafoki potakī keyotani. Nāskafikē mī fākka fake xoashara retexona,’ faito, ³¹ āpa kemani: ‘Anifoshta, mīkai ea potamisma, mī efe itiani. Akka na ēfenāfo mīnā, keyokōi iki kiki. ³² Akka iskaratīa nō fista aki mī extoki inimayanā. Akka mī exto naa keskara ikatsaxakī, mā anā ekeki noko afaa afeskaxma, mā afetiama fenofinino anā oaito nō fichiaki,’ ixō āpa āfe fake iyoa yoini,” ixō Jesús ato yoini.

16

Meka fetsafaxō Jesús ato yoini, xanīfokōichi afe xanīfo yōaniōnoa yoikī

¹ Jesús afianā aōxō tāpimisfo yoikī iskafani: “Feronāfake fetsa afama mīshiti ichapayato feronāfake fetsa afe xanīfo inō yoini. Nāskaxō nikani āfe afama

mīshti āfe inapa kexesharaxokēma. ² Nāskakē āfe xanīfāfe kenaxō yoikī iskafani: ‘¿Afamē a mīōnoa ea māa yoiāi? Akka a mī yonofaiōnoa ea yoife. Akka iskaratīa mī anā efe xanīfo ikima,’ ixō yoini.

³ “Askafaito nikakī āfe inapa shinākōini: ‘¿Ē afeskaimē? Iskaratīa ēfe xanīfāfe ea anā yonomanima, mā ea potai. Ēkai afeskaxō anā yonotiroma kerexkai ē tarepanā. Nāskatari ē anā afaa yōkapaima ē rāfitiro. ⁴ ¡Choo! Mē shināi. Nā ēfe ifo nimiyāfo ē ato xekaxopakefōfāni anā ichapa niminōfoma. Ē ato askafaino āto pexe anoxō ea ifinōfo ēfe ifāfe ea potano,’ ixō shināni.

⁵ “Nāskaxō fisti rasi ato kenapakeni afe tii āfe ifo nimiafomāki ato yoixiki. Nā akiki kai taea yōkakī tafefani: ‘¿Afe tii mī ēfe xanīfo nimiamē?’ ixō yōikaito, ⁶ kemani iskafakī: ‘Ē nimia xini ene cien galon,’ faito, a xanīfo fētsa yoini iskafakī: ‘Nā mī nimia potaxō nono tsoxō fetsa arisafafe cincuenta faxō kenefe,’ fani.

⁷ “Nāskaxō fetsari yōkani: ‘Akka mūri, ¿afe tii nimiamē?’ faito, atori yoini iskafakī: ‘Cien sacos de trigo ē nimia,’ faito, ari yoini iskafakī: ‘A mī nimia potaxō fetsa arisafafe ochenta faxō kenefe,’ fani.

⁸ “Nāskakē a āfe ina chakapa āa shināxō akai keskara āfe xanīfāfe tāpikōini. Nāskakē yoini iskafaki: ‘Mī tāpikōia, nāskakē fetsafāfe mia sharara fakani,’ ixō yoini. Nāskarifiakī a Nios Ifofaafāfema tāpikī finakōiafo ato pārakiki, āa shināxō. Akka a Nios Ifofaafō askarafoma, ato pāratirofoma. Chanīma fisti yoitirofo.

⁹ “Ē mato yoinō, mā afama mīshti ichapayaxō a afaamaisfo ato inākāfe, mā ato askafakē mato yoisharanōfo. Nāskakē mā mā naxō mā anā kori yopatiroma mā Nios ari nokoaito nā mā kori ināmisfāfe mato yoikī iskafatirofo: ‘Aicho, mī noko shara famis. Iskaratīa nono Nios ano mī nofe ipanaka,’ ixō mato yoitirofo.

¹⁰ “Akka nā isharakōixō afara ichapama kexesharakōimis nō tāpitiro afara ichapa kexesharakōitirokē. Akka nā isharaxoma afara ichapama kexesharamisma nāri nō tāpitiro afara ichapa kexesharakōitirokēma. ¹¹ Akka nono mai anoxō āto afarafo kexesharayamaifono, Niospa ato afara sharakōifo ināpaifiki anā ato afaa inātiroma. ¹² Nāskarifiakī Niospa mato afara shara ināpaifiki mato inātiroma.

¹³ “Nāskarifiakī tsōa āfe ifo rafe yonoxosharatiroma. Akka fetsa noikaspata fetsa noisharatiro, nā yoiāi keskarakōi axotiro, akka a fētsa amapaiyai keskara axotiroma noikaspatiro. Nāskarifiakī mā kori fisti shinākī mā Nios shinātiroma. Nāskatari Epa Nios fisti shinākī mā kori noitiroma,” ixō Jesús ato yoini.

¹⁴ Akka nā fariseofāfe kori noikōimisfono Jesús atoōnoa yoiāito nikakani akiki kaxemetsamanifo. ¹⁵ Askafafono Jesús ato yoini: “Māfi nō sharafora imiski yorafāfe ferotaifi, akka mā askafaiato Epa Niospa mato tāpikōia. Akka yorafo mā pāratiro nafo sharafoki mā ato fatiro, mā ato askafaino Niospa mā mato tāpixō mato iskafai: ‘Nafo chakakōifo,’ ixō mato yoi,” Jesús ato fani.

A Moisés yoini keskara sharafiano Nios xanīfāferoko ato finōkōinīfofana

¹⁶ Anā Jesús ato yoini iskafakī: “Moisés Niosxō yoini keskafakī, a Niospa meka yomisfāferi yoinifo keskara Juan mato yoini. Nāskakē meka shara Nios xanīfoōnoa Juan ato yoini iskafakī: ‘Māto chaka xatekāfe anā a mā ipaoni keskara iyamakāfe Nios xanīfo ari ikixakakī.’

17 “Akka chanīma, maife nai koshikōi keyotiro. Akka a Moisés yoini keskakōi, Niospa meka shara keyonakama,” ixō Jesús ato yoini.

Feronāfake āfe āfi fe enēnātirofoōnoa Jesús ato yoini
(Mt. 19.1-12; Mr. 10.1-12)

18 Anā Jesús ato yoini iskafakī: “Akka fētsa āfe āfi enexō, fetsa fia sharama. Chakafai. Askara sharama. Askatari mā fenē enea feronāfake fētsa fiari sharama. Nāatori chakafai āfe āfimakōi fe ikī,” ixō Jesús ato yoini.

Feronāfake fetsa afama mīshti ichapaya ikaino akka Lázaro afaamais ini

19 Nāskata afianā Jesús ato yoini iskafakī: “Feronāfake fetsa afama mīshti ichapaya ini, rapati sharakōi safea. Nāskaxō pena tii fista apaoni pisharakōiyanā inimakōikī. ²⁰⁻²¹ Nānori feronāfake afaamais ini āfe ane Lázaro, yorafoki koyoi fetseax tsaoni a yora afama mīshti ichapayato āfe pexe fepoti ketokonō. Nā feronāfake afaamaisyato shināni iskafakī: ‘Na feronāfake afama mīshti ichapayato a piāi ea ināpainōra,’ ixō shināni. Nāskaino paxtafo akiki kaxō āfe koyoyo tāxoketsani.

²² “Nāskax Lázaro nani. Mā nakē ājirifāfe āfe fero mēsho iyonifo Abraham fe ikikanō Nios xanīfo ano. Nāskatari a yora afama mīshti ichapayari nani. Nāri nakē maifanifo. ²³ Nāskakē a yora afama mīshti ichapaya omiskōikōini chiifā mēranoax a yorafo naax fomisfo anoax. Nānoxō foisnīfofā chai inoa Abraham yafi Lázaro fichini. ²⁴ Nāskakē fāsikōi Abraham kenani iskafakī: ‘Ĵepa Abraham, ea shināfe! Ea Lázaro nīchixōfe āfe mifi rechoko fāka mechanafaxō ea ana mechana faxoyonō. Nonoax ē omiskōi finakōikai na chiifā mēranoax,’ ixō yoiāito, ²⁵ akka Abraham kemakī iskafani: ‘Ēfe fāke, ĵmī shināimamē nayoamax mī isharakōiyopaoni inimakōiyanā? Akka Lázaro isharakōiipaonima. Omiskōiipaoni. Nāskakē iskaratīa nonoax isharakōia inimasharakōiyanā, akka mī omiskōikōi. ²⁶ Nāskakē afeskax mia ari tsoa katiroma, mīrikai afeskax noko ano otiroma. Na mafa kinifā mesekōi afeskaxō nō finōtiroma. Māri afeskaxō arixori finōtiroma,’ ixō yoiāito, ²⁷ nā afama mīshti ichapayato anā yoini iskafakī: ‘Ē mia yoi epa Abraham mī Lázaro nīchinō ēfe ēpa pexe ano ²⁸ a ēfe exto cinco ikafo ano, anoxō Niospa meka ato yoinō nikakōinōfo akairi nono feyamanōfo nonoax omiskōi fetirofoki,’ ixō yoini.

²⁹ “Askafaito Abraham yoini iskafakī: ‘Afāfepi mā kirika kene ōiafoki a Moisés feta a Niospa meka yoimisfāfe kenenifo. Nā ōikaxō tāpisharakōinōfo,’ ixō yoiāito, ³⁰ a afama mīshti ichapayato anā kemani iskafakī: ‘Mē tāpia, Epa Abraham, akka a yora naax otoato atoki oxō ato yoiāito nikakōitirofo,’ ixō yoiāito, ³¹ anā Abraham yoini iskafakī: ‘Akka a Moisés feta Niospa meka yoimisfāfe yoinifo keskara nikakaspakaki. Nāskarifiakī tsōa nikatiroma a yora otoato ato yoiāito,’ ixō Abraham yoinino,” Jesús ato fani.

17

Noko fētsa afara chakafamaino āfenā mesekōi itiro
(Mt. 18.6-7, 21-22; Mr. 9.42)

1 Jesús aōxō tāpimisfo yoini iskafakī: “Mēxotaima a ea Ifofaafāfema yorāfo afara chakafamapāmisfo. Akka fētsa fetsafo afara chakafamax omiskōifinakōixii. ² Akka ato askafamayoamano, tokiriya tenexti faxō fakafā nōafā mēra potatirofo a ea rama Ifofaifo ato afaa chakafamayamanō. Nāskara shara,” ato fani.

³ “Kexemesharakāfe. Fētsa mia chakafaito yoisharafe anā mia chakafanōma. Mī yoiaito nikakī iskafakī shinānō: ‘Chanīmarokomē ea yoisharakōi ē anā askanōma,’ ixō shināito raefaxō yoisharafe. ⁴ Akka anā mia chakafakī mekafaxō, ea raefafe ixō mēxotaima mia yoiri faito akiki ōitifishkikīma mī yoisharaxō mī raefaito,” ixō Jesús yoini.

Nō chanīmara faito Niospa noko afama mīshti faxotiro

⁵ Nāskata a aōnoa yoimisfāfe Jesús yoinifo iskafakakī: “Ifo, nō mia chanīmara fai finōmainīfōfā noko yoisharafe nō mia chanīmara fakōinō,” ixō yoiaifono, ⁶ Jesús ato kemani: “Akka mā ea nikakōixō na ifi efapa mā yoikī iskafakerana: ‘Mī tapofoya tsekekainax fakafā mēra pakeax anā foaife,’ mā faino anā foaitiro.”

Āfe xanīfāfe yoiai keskafakī a yonoxomisto axosharakōitiro

⁷ Nāskaxō anā ato Jesús yoini iskafakī: “Na meka fetsari ē mato yoinō nikakakī. Fatora fetsa mā inayaxō mātō inapa mātō tare ano yonoxotani oaino askayamakī fakkafo kexetani oaino akka, ĵmā iskafakī yoitirōmē: ‘Pexe mēra ikikerafe tsoaxō pixiki,’ mā fatirōmē? ⁸ Maa, mā askafatiroma. Askafatamaroko mā yoitiro iskafakī: ‘Ea pīchaxōfe ē pinō, mā nafakē ea yoixii ē pikī taefanō, mī chipo axiki,’ ixō mātō ina mā yoitiro. ⁹ Nāskatari āfe inapa nā āfe xanīfāfe yoia keskafakī mā axosharakōiano iskafakī yoima: ‘Aicho, ea mīa axosharakōia,’ ixō yoima. ¹⁰ Nāskarifiakī māri a Niospa mato yoia keskarakōi fakī iskafakī yoikāfe: ‘Nōkai afama, nōa shināxō nō afaa akima. Nōko Ifāfe noko yoia keskafakī nō aki,’ ixō yoikāfe,” Jesús ato fani.

Jesús diez feronāfake sharafani rashkishi fetseaito

¹¹ Jerusalén ano fāi kakī Jesús Samāria yafi Galilea xatsokama rafe finōfaini. ¹² Nāskax Jesús pexe rasi pasotai nokoni. Nāno mā nokoano chai ixō diez feronāfake nā rashkishi fetseaitō ēikakī kenanifo fāsikōi. ¹³ Akka iskafakī fāsikōi yoinifo: “Jesús, Maestro, noko shināfe,” faifono, ¹⁴ Jesús ato ōikī ato yoini iskafakī: “A ato Nios kīfixomisfo ano fotakāfe, a mā shara ato ispaxiki,” ato faino, mā fokani koshikōi a isinī ikaifo sharai fetseaito.

¹⁵ Akka fistichi āfe yora sharakōi meekī anā akiki oxō fāsikōi yoikī iskafani: “ĵAicho, fāsi Nios sharakōi! Mā ea sharakōi faki,” ixō yoini. ¹⁶ Nāskafata Jesús ferotaifi ratokonō mai chachipakefōfā maikiri fepopakekafā. “ĵAicho Jesús, mī ea sharafaa! ĵMī fāsi sharakōi!” ixō yoini. Akka nā feronāfake Samāria ano ini.

¹⁷ Askafaito Jesús yoini: “ĵAkka diez feronāfake ikafomamē a ē ato sharafa isinī ikaifono? ĵAkka fakimē ranāri a nueve feronāfake? ¹⁸ ĵAkka na feronāfake fisti efe yora yamafixō ekeki oxō Nios aicho faiyoamē?” ixō Jesús yoini. ¹⁹ Nāskaxō nā feronāfake yoini iskafakī: “Fininīkafāfe kātaxiki. Mī ea chanīmara fakōinax mā mī sharaki,” ixō Jesús yoini.

Nios xanīfāfe keyokōi yorafo īkināino afe keskara iximē

²⁰ Nāskano fariseofāfe Jesús yōkanifo iskafakakī: “ĵAfetīa nono mai anoax yorafāfe ato xanīfo iximē Nios?” ixō yōkaifono, Jesús ato kemani: “Nios xanīfāfe ato īkināino nō ōitiro. ²¹ Tsōakai yoima iskafakī: ‘Nakīa, ōikapō,’ askatari, ‘Oa onokīa, ōikapō,’ mato faima. Akka Nios xanīfo mato mēra ixō mā mato shināmani nō ōiyamafaino,” ixō ato yoini.

²² Nāskaxō āfe ināfo yoini iskafakī: “Ē samama mato makinoax kai. Mē mato makinoax kaano anā mā ea ōima. Ea ōipaifikī mā ea shinākōixii iskayanā, ‘Nōko Ifo nofe imis keskara nō ōipaikōi,’ ixō mā ea yoifikī a keskara

mā anā ōima. ²³ Akka mato fetsafāfe pārakī iskafakani: ‘Nakīa Cristo,’ mato fata, ‘Oa onokīa,’ mato faifāfe, akka ato nikayamakāfe āa mato pārakani kiki. ²⁴ Akka ē nai mēranoax oi oa kana peiki fafetanaito nō ōitiro keskara, nāskarifiāi ē oaito mā ea ōixii ē chaxaferanaito. ²⁵ Akka ē taei omiskōifinayoxii yorafāfe ea ōikaspaifono nā ea ōikaspaifotiā. ²⁶ Akka nā Noé niyoano ini keskai nāskarifiāxii ē anā oaino. ²⁷ Akka yorafo pikāta ayakāta fīanākāta ikaifono, mā Noé kanōanāfā mēra ikiano faka faipafāino, keyoi āsai mitokomenifo. Nāskarifiāxii ē oaino ea shinātama afara chaka shināifono.

²⁸ “Nāskarifiāni nā feronāfake Lot niyoano, yorafo pikāta, ayakāta, afarafo fīkāta, afarafo ato minikāta āto tarepa afarafo fanakāta pexe fakāta ikaifono, ²⁹ akka Lot mā Sodoma anoax tsekeano, oa oi ikai keskara nai mēranoax atoki chiifā pakeaino keyokōi koofi mitokomenifo.

³⁰ “Nāskarifiāxii ē oaino, ea shinākātama nā ipaiyai keskara shināifono. ³¹ Nāskarifiāki ē oaino fetsa āfe pexe fomākīa tsoxō anā āfe afara fīpai āfe pexe mēra ikitiroma āfe afara fixiki. Askatamaroko ichotiro. Nāskarifiāi a āfe tarepa yonofai anā āfe pexe ano katiroma āfe afara fixiki. ³² Akka nā Lot āfe āfiōnoa shinākāfe. Nā kēromā āfe afarafo shināi ifiakēkafā ōipai narisatani keskai māri askatiroki. Askayamakāfe. ³³ Akka fētsa shinākī iskafai: ‘Ē Jesús Ifofaito ea omiskōimakaniraiti,’ ixō shinākī ēfe meka kachikiri fai. Nā keskara yora naax omiskōipakenaka. Akka aa eōnoax omiskōiai naax efe isharakōipakenaka.

³⁴ “Akka ē mato yoi, yora rafe nā fakishi mishkitiro fistichi oxakanax ē oaino fetsa efe kaino fetsa nētetiro. ³⁵ Nāskarifiāi kēro rafeta xiki renekani. Fetsa ea ari kai yamarisatanaino akka fetsa nētetiro nā omiskōipakenakafo mēra kaxiki. ³⁶ Nāskatari feronāfake rafeta āto tare ano yonokani, fetsa ea ari kai yamarisatanaino, fetsa nētetiro nā omiskōipakenakafo mēra kaxiki,” ixō ato yoiaino, ³⁷ yōkanifo iskafakakī: “Ifo, ġfaki fokanimē?” ixō yōkaifono ato kemani iskafakī: “Mā tāpitiro a afara naa ano ishpifo fotofaifāfe. Nāskarifiāxii ē fotofaino a ea Ifofamisfo ekeki ferisaxakani,” ixō Jesús ato yoini.

18

Meka fetsafaxō kēro ifomafaōnoa yafi xanīfo Jesús ato yoini

¹ Jesús anā ato yoini meka fetsafaxō ato tāpimaxiki, Epa Nios mēxotaima kīfīkani xokenāyamanōfo. ² Ato yoikī iskafani: “Nā pexefā rasi anoxō xanīfāfe Nios shinātama yorafori noimisma. ³ Nā pexefā rasi anori kēro ifomafa ika ini. Nāskakē nā kēro ifomafa mēxotaima a xanīfoki kapaoni yoikī iskafaikai: ‘A ea noikaspamisto ea chakafai kiki ea yoixōfe ea anā chakafayamanō,’ ixō yoifiaito, ⁴ nā xanīfāfe nikakaspayanā tooxanima. Nā kēro ifomafa fekaxtefaiaino akka nāskaxō xanīfāfe shināni isakī: ‘Ē Nios shināima, yorafori ē noima. ⁵ Akka na kēro ifomāfa ea fekaxtefai kiki, ē yoisharaxonō anā a chakafaito fekaxtefayamanō, mē yoixonano anā ea fekaxtefaima kiki,’ ixō xanīfāfe yoini.”

⁶ Iskafakī Jesús ato yoini: “A xanīfo chakapa yoini keskara nikasharakāfe. Chakafixō nā kēro ifomafa fekaxtefaito axosharaniki. ⁷ Akka Nioskai nā xanīfo chaka keskarama. Akka, ġNiospari āfe yorafo ato afara axosharatiromanē? Noko nikaikai fekaxtetiroma penachāi yafi fakishchāi kīfiaifono ato nikakaspatiroma. ġAskayamakī, ‘Ea manayokāfe,’ ixō ato yoitromē? ⁸ Maa. Akka ē mato yoi mā manamiskē koshi mato afara shara faxoxii. Akka a mato

chakafamisfo ē ato omiskōimaxii. Akka, ¿ēfe Epa ariax anā ē nāmā fotoaitīa ea chanīmara faifāfe ē ōitoshiximē?” ixō Jesús ato yoini.

Meka fetsafaxō fariseofoya a ato kori fiamisfo Jesús ato yoini

⁹ Jesús meka fetsafaxō ato yoini ato tāpimaxiki. “Ēfi sharaki, ēkai afaa chakafamisma yora fetsafokai ea keskarama,” ixō shināmisfoōna Jesús ato yoini iskafakī: ¹⁰ “Feronāfake rafe fonifo Nios kīfiti pexefā mēra anoxō Nios kīfi fokani. Fetsa fariseo ini. Fetsari āfe xanīfo kori fīxomis ini. ¹¹ Nā fariseo arese nīxō kīfīkī iskafani: ‘Epa Niosi, ē fetsafo keskarama. Akka fetsafo yometsomisfo, chakakōifo, askatari ato āfima chotamisfo. Akka ēkai nā āfe xanīfo kori fīxomis keskarama. Nāskakē ē mia aicho fai. ¹² Na semānā tiifi ē foni tenekī rafefa fafāfāini mia shinākī. Akka nā ē fiairi ē mia paxkaxō fafāini,’ ixō fariseo Epa Nios kīfīni. ¹³ Akka a āfe xanīfo kori fīxomis ori chai nini. Nāri chai nīxokai nai foispainima. Askatamaroko shināmitsayanā Epa Nios yoini iskafakī: ‘¡Ooa! Epa Niospa, ē mia chakafamiski. Eō noikī ea sharafafe ē chakakī,’ fani. ¹⁴ Ē mato yoi nā āfe xanīfo kori fīxomis āfe pexe ano oni mā Niospa āfe chaka soaxonano. Akka nā fariseo āfe chaka soaxonima. Nāskarifiāi fetsa āa anoi yoimesharai: ‘Ē sharara,’ imiskē chipo Niospa afaa imatiroma. Akka fētsa shinākī iskafai: ‘Ēfi afarafo chakafamiski,’ ixō shināito nā keskara yora Niospa chaka soaxotiro afe ipaxanō,” ixō Jesús ato yoini.

Jesús fakefo chishtoxō ato māmāyanā ato Epa Nios kīfixopakeni
(Mt. 19.13-15; Mr. 10.13-16)

¹⁵⁻¹⁶ Nāskatari yorafāfe ato fake mīshti Jesúski efenifo ato māmāpakeyanā ato Epa Nios kīfīxonō. Akka nā Jesúsxō tāpimisfāfe ato iskafanifo: “Māto fakefo efexō nōko Ifo fekaxtefayamakāfe,” ato fanifo. Ato askafaifono Jesús ato yoini: “Ato enekāfe na fakefo ekeki fenōfo. Ato nētefayamakāfe. Ēfe Epa Nios xanīfo ika ari na fakefo keskarakōifoki,” ixō ato yoini. ¹⁷ “Ē mato pāraima, mā Epa Nios xanīfo nikayamax na fakefāfe ea nikaifo keskafakī, Epa Nios ika ari mā katiroma,” ixō Jesús ato yoini.

Feronāfake naetapa kori ichapayax Jesús fe mekani
(Mt. 19.16-30; Mr. 10.17-31)

¹⁸ Xanīfo fetsa Jesús ano oxō yōkani iskafakī: “Maestro, mī sharaki, ea yoife ē afaa afeska fatiromāki Nios xanīfo fe ipaxaki,” ixō yōkaito, ¹⁹ Jesús kemani: “¿Afskakī sharara mī ea faimē? Akka Nios fisti shara. ²⁰ A Niospa yoini keskara mā mī tāpia. Iskafakī yoini: ‘Mī āfima chotayamafe; askatari yora reteyamafe; askatari yometsoyamafe; askatari chanīyamafe mā kaxpa ato pārayamakāfe. Nāskaxō māto epa yafi māto efa nikasharakāfe,’” ixō yoiaito, ²¹ nā feronāfake yoini iskafakī: “Nā mīa yoiaifo keskara mē nikamis naetapaxō,” faito, ²² askafakī yoiaito nikakī Jesús kemani iskafakī: “Nāno afara fetsa fisti mī tāpiama. Akka mī afarafo minixō kori fīxō nā afaamaisfo ato minife. Nāskax nai mēranoax mī afama mīshtifoya ixikai. Nāskafata efe koofe,” ixō yoiaino, ²³ akka nā feronāfake Jesús askafaito nikai, shināchakakōi tooxinima, afama mīshti ichapayax.

²⁴ Shināmitsaito ōikī Jesús ato yoini: “A yora afama mīshti ichapaya Nios xanīfo ano katiroma, fekax pishta. ²⁵ Māraki camello akoja kini mēra ikipaifi ikitiro fekaxkōi efapamāiax. Nāskarari yora afama mīshti ichapayato Nios Ifofapai fekaxkōi āfe afama mīshtifomāi potakaspakī,” ixō Jesús ato yoini.

²⁶ Ato askafaito nikakakī a aōxō tāpimisfāfe tāpipainifo. “¡Keel! ¿Afesakax nō Nios fe ipaxatiromē?” ikanax yoinānifo. ²⁷ Jesús ato kemani: “Akka yorafokai āa ifimetiroma, Nios fistichi yorafo ifitiro. Niospa afama mīshti fatiro. Tsōakai afama mīshti fatiroma, Nios fistichi atiro,” ato faito, ²⁸ Pedro yoini: “Ifo, nō mefe okī nōko afama mīshtifo nō ōiferani nō mefe oni,” faito, ²⁹ Jesús kemani iskafakī: “Ē mato yoikōi, fētsa Nios xanīfoōxō ato yoikakī āfe pexe ōifaita āfe apa yafi āfe afa ōifaita āfe onefetsafo ōifaita āfe āfi ōifaita āfe fakefo ōifaita ixō, ³⁰ nāato afama mīshtifo fixii. Nāskatari mā naax Nios fe ipanaka,” ixō Jesús ato yoini.

*Anā Jesús ato yoini: “Mā chaima ea retekanira,” ixō
(Mt. 20.17-19; Mr. 10.32-34)*

³¹ Jesús aōxō tāpimis tiis doce kenani. Nāskaxō ato yoini iskafakī: “Iskaratīa mā nō Jerusalén ano kaikai. Nānoax nā Niospa meka yoimisfāfe eōnoa yoikī kenenifo keskakōi kaikai ē. ³² Nānoxō yora fetsafo ea ato achimakani kiki. Nāfāfe ea kaxemetsama fayanā ea īchakani kiki ekeki kemo mechoketsayanā. ³³ Ea koshaketsakata ea retekanī. Akka ea askafafiaifono tres nia oxata ē otoxii,” ixō ato yoini.

³⁴ Ato askafakī yoiaitokai tsōa tāpinima. Mā nikafikakī tsōa tāpisharanima, Niospa Yōshi Sharapa ato shināmoyoamano.

*Jesús yora fisti fēxokōikē Jericó anoxō sharafani
(Mt. 20.29-34; Mr. 10.46-52)*

³⁵ Mā chaima Jesús Jericó ano nokoi kakī, yora fēxo fai ketokonō tsaokē fichini, anoxō ato kori yōkaito. ³⁶ Nānoxō nā fēxo fai ketokonō tsaoxō nikakī yorafā rasi fofānaifāfe ato yōkani: “¿Afaa afeskafakanimē?” ato faito, ³⁷ yoinifo: “Jesús Nazarete anoa kafani,” fanifo. ³⁸ Askafaifono nikai fāsikōi kenani iskai: “Jesús mīfi David fenakī, ea shināfe,” fani.

³⁹ Askafaito nā rekē foaifāfe iskafanifo: “Nōko Ifo fekaxtefayamafe,” fafi-aifono, akka nā fāsikōi kenai iskani: “¡David fenapa, eō noife!” faito nikai, ⁴⁰ Jesús nēteakekafā ato yoini iskafakī: “Ea ifixotakāfe oaiskai kenariai,” ato faito ifixotanifo. Mā oano Jesús yōkani iskafakī: ⁴¹ “¿Ē mia afeskafatiromē?” faito, nā fēxo kemani iskafakī: “Ifo, ē oīsharapai afeskaxō ē ōisharatiroma,” faito, ⁴² Jesús yoini iskafakī: “Ea mīa chanīmara faax mā mī shara. Nāskaxō mā mī ōisharai,” fani.

⁴³ Nāskafaino nā fēxo ōisharakōitani. Nāskax Jesús fe kakī, “Aicho mā ea Niospa sharafakī, Nios fāsi sharakōikī,” ikax afe kaino yorafāfe ōikakī akairi, “Nios fāsi sharakōi,” ikanax akiki inimakōinifo.

19

Jesús fe Zaqueo

¹⁻² Nāskano Jesús Jericó peke rasi ano finōfaini. Akka nāno feronāfake afama mīshti ichapaya ika ini, āfe ane Zaqueo. A ato kori fixomisfāfe āfe xanīfo ini. Nāatori āfe xanīfo kori fixomis ini. ³ Nāato Jesús ōipaifiki ōinima, yora ichapafāfemāi nakifaifono Zaqueomāi mīsto pishtamāi axō. ⁴ Nāskakē fāi rekē ichoni Jesús kaito ōixiki. Nāskata ifiya inani nā Jesús kafanai anori. ⁵ Jesús anori finōfāikī fomākīa naiskī fichixō yoini iskafakī: “Zaqueo, fotopakekafāfe. Iskaratīa mī peke ano ē nēteyoikaikai,” faino, ⁶ koshikōi Zaqueo fotopakekafāni. Nāskakē akiki inimasharakōiyanā āfe peke ari iyoni.

⁷ Nāskaito ðikakī yora rasichi iskafakī yoinifo: “¡Kee, ðikapo! ¿Afeskai na yora chakapa pexe ano Jesús iki kaimē?” fanifo. ⁸ Askafafiaifono Zaqueo fininākfā Jesús yoini iskafakī: “Ifo, ðipo. Nā afaamaisfo na éfenāfo ē ato paxkaxonikai. Nā ē atoki yometsomisfo cuatro veces faxō ē ato ināi,” ixō yoini.

⁹ Askafaito Jesús yoini iskafaki: “Iskaratīa mē mia chaka soaxona mī Niospa fake iki mī afe īpanaka,” ixō yoini. Nāskaxō nānoafo ato yoini: “Na feronāfake Abraham āfe fena. Abraham Nios nikakōīpaoni keskafakī natori Nios nikakōi. ¹⁰ Akka ē oni ēfe Epa Nios anoax a fenoafo ato fenayanā ato ifiyoi,” ixō ato yoini.

Meka fetsafaxō koriðnoa Jesús ato yoini
(Mt. 25.14-30)

¹¹ Nā yorafāfe nikanifo Jesús ato yoiāito māmāi Jerusalén chaima faifokakī, “Mā Nios xanīfo chaima nokoira,” ixō shināifono. Nāskara shināifono mā tāpixonō Jesús meka fetsafaxō ato yoini. ¹² Iskafakī ato yoini: “Nāno feronāfake fetsa xanīfo keskara ini. Nā feronāfake chai kani mai fetsa ari, nāriax mā xanīfo ikax opai. ¹³ Akka kayoxoma a yonoxomisfo diez kenani. Nāskaxō ato kori ichapa ināketsayanā ato yoini iskafakī: ‘Na kōri afara ichapa mā fikāfe nā ē oaitīa,’ ixō ato yoini. ¹⁴ Akka yorafāfe āfe mai anoxō noikaspanifo. Nāskaxō acho yora rafe nīchinifo iskafakī ato yoitanōfo: ‘Na feronāfake nō fichipaima nōko xanīfo inō,’ ixō ato yoitanōfo.

¹⁵ “Akka askafafiaifono mā xanīfo itani anā anoris oni āfe mai ano. Mā nokoxō a yonoxomisfo kenamani nā ato kori ināfaini tii, tāpixoniki afe tii kori fiafomākī. ¹⁶ Nāskano fetsa akiki oitaexō yoikī iskafani: ‘Ifo, a ea mīa kori ināfainitatima finōmainīfofā kori exe diez faxō mē mia fīxōa,’ fani. ¹⁷ Askafaino āfe xanīfāfe kemani: ‘Aicho, mīfi ea yonoxō sharamiski. Ē mia afaa ichapa ināyamafiano finōmainīfofā mīa fīxosharakōia. Nāskakē pexe rasi diez anoā ē mia xanīfo imai,’ ixō yoini. ¹⁸ Nāskatari āfe ina fetsari akiki oxō yoikī iskafani: ‘Ifo, a ea mīa kori ināfainitatima finōmainīfofā kori exe cinco faxō mē mia fīxōa,’ fani. ¹⁹ Nāskafaino nāri kemakī iskafani: ‘Mīri cinco pexe rasi anoā xanīfo ikikai,’ fani. ²⁰ Akka a yonoxomis fetsari akiki oxō iskafakī yoini: ‘Ifo, nakīa mī kori ē mia mekexona samapa rakoxō. ²¹ Ē mikiki mesekī, mīmāi feronāfake mitsisipakōikē, mīnāyamafekē mī fimis, askatari a mī fanama anoafori mī fimis. Nāskakē ē mikiki mesekī ē mia kori mekexona, nakīa mī kori,’ ixō yoini.

²² “Askafaito nikakī āfe xanīfāfe yoini iskafakī: ‘Mī ea yonoxosharamisma, mī chakakōi, askatari mī xanikōi. Mī mekaðxō ē mia omiskōimani. Mī ea iskafakē, na feronāfake mitsisipakōi āfenāyamafekē fimis, askatari a fanama anoafori fimis mī ea fakē. ²³ Akka, ¿afeskakī banco ano mī ea kori faxōfamamē mā ēfe kori īchapano ea ināxikima, mē anā ēfe pexe ano ē oano?’ ²⁴ Nāskata nā anoafo ato yoini iskafakī: ‘Na feronāfake kori fitakāfe nā diez faxō finōmainīfofā ea kori fīxōa ināxikakī,’ ato faito, ²⁵ kemakī iskafanifo: ‘Ifo, akka nāatoroko mā diez faxō finōmainīfofā fia,’ faifono, ²⁶ anā xanīfāfe ato kemani: ‘Akka ē mato yoi nā afara ichapaya nō afara ichapa inātiro. Akka a afaa ichapayama, āfe afara nō fīatiro anā afaa ichapaya inōma. ²⁷ Askatari a ea noikaspakakī a ea xanīfo fakaspafo, fitakāfe ato retexikakī ēfe ferotaifi,’ ixō xanīfāfe ato yoini,” Jesús ato fani.

Jesús nokoni Jerusalén ano
(Mt. 21.1-11; Mr. 11.1-11; Jn. 12.12-19)

²⁸ Nāskara ato yoita Jesús kani Jerusalén ano a aõxõ täpimisfo fe. ²⁹ Mā chaima Betfagē fe Betania ano nokoxõ machi Olivos anoxõ a aõxõ täpimis rafe nīchini. ³⁰ Ato iskafakī yoivanā: “Mēstekōi fõtakāfe oa ono pexe rasi ano. Mā nokoxõ nānoa burro fake nexekē mā fichi kaikai tsoa aõ nimisma. Tēpexõ ea efexotakāfe. ³¹ Anoxõ mato yõkaifono iskafakī: ‘¿Afeskakī mā burro tēpeimē?’ mato faifono ato yoikī iskafakāfe: ‘Nõko Ifāfe fichipaiyaito nõ ifixoniyoa,’ ato fakakī,” Jesús ato fani. ³² Ato nīchia fõkaxõ õiafo nā Jesús ato yoia keskarakōi fichitoshinifo.

³³ Mā burro tēpeaifono, nā burro ifofāfe ato yõkanifo: “¿Afeskakī mā noko burro tēpekaimē?” ato faifono, ³⁴ ato kemanifo iskafakakī: “Nõko Ifāfe fichipaiyaito nõ ifixoniyoa,” ato fanifo. ³⁵ Nāskaxõ burro kateki āto rapati kakafakaxõ efenifo Jesús ano. Nāskaxõ a kamaki Jesús tsoainīfõfānifo. ³⁶ Nāskakē Jesús tanaima kani. Akka yorafāfe āto rapatifo fai nēxpakīa kakafafonifo. ³⁷ Mā chaima machi Olivos tisiri mekani keyokōi a aõxõ täpimisfāfe fāsikōi yoinifo iskafakakī inimayanā: “¡Aicho, Nios fāsi sharakōi! ¡Niosxõ afama mīshti mī akaito nõ oia!” fanifo. ³⁸ Iskafakī yoinifo akikī inimakakī: “¡Aicho, nõko xanīfo nokoki oakī! ¡Niospa nai mēraxõ shara famafafāini! ¡Niospa yoini Jesús nõko xanīfo inõ, aõnoax yorafo Nios fe nīpaxanõfo! ¡Aicho, Nios fāsi finakōia!” ixõ fāsikōi yoinifo.

³⁹ Nāskafaifono fariseofāfe yorafā rasi mēraxõ yoinifo iskafakakī: “Maestro, mī inafõ yoife iskanõfoma,” faifono, ⁴⁰ akka Jesús ato kemani: “Ē mato yoi nafāfe ea yoisharayamaifono, na tokirifāfe fāsikōi eõnoa meka shara yoikeranafo,” ixõ Jesús ato yoini.

⁴¹ Mā chaima Jerusalén ano nokoax nā pexe rasi anoafõ ato õi, atoõnoax Jesús oiani. ⁴² Iskafakī ato yoivanā: “Ea chanīmara faax mā isharapakenakakī. Akka mā kai tāpiama iskaratīa Niospa Fake mā nokoa. Eakai mā xanīfo fapaima ē mato imasharapaiñaito, mā ea nikakaspai. Iskaratīa ē mato afeskafatiroma. Mā mā fenoa. ⁴³ Fatora penata mato noikaspakani nā mato noikaspaiñāfe. Nāskaxõ mato chetekaxõ mato mēra ikiferakaxõ mato retekī mitokani. ⁴⁴ Māto pexefori pāoiki fetsexii, mī kaifofoya mato retekī mitoxikani tsoa pishta ichoxima, mā ea nikakaspamis Niospa ea matokī nīchifiano,” ixõ Jesús ato yoini.

*Jesús a Nios kīfiti pexefā mēraxõ a ato ināifo ato potani
(Mt. 21.12-17; Mr. 11.15-19; Jn. 2.13-22)*

⁴⁵ Nāskata Nios kīfiti pexefā mēra Jesús ikikaixõ õia a mēraxõ afarafo ato miniaifāfe õikī ato kāimani. ⁴⁶ Nāskafata ato yoini iskafakī: “Niospa meka yõra kenekī iskafani: ‘Mā ēfe kīfiti pexefā mēraxõ mā ea kīfitiro,’ ixõ yoifinino, akka nā yometsofāfe pexe keskara mā famis,” ixõ Jesús ato yoini.

⁴⁷ Nāskata Nios kīfiti pexefā mēraxõ pena tii Jesús ato yoini. Ato yoifinino a ato Nios kīfixomisfāfe āto xanīfofo feta a Moisés yoikī kirika kenenī keskara ato täpimamisfāfe judeofāfe āto xanīfõfõfāferi afeskaxoma Jesús retepaikakī shinānifo. ⁴⁸ Akka afeskaxõ retetiroma inifo, yorafāfemāi nikasharapalkõiaifono a Jesús ato yoiai keskara.

20

*“¿Tsõa mia nīchinimē mī xanīfo inõ?” ixõ Jesús yõkanifo anoxõ achipaikakī
(Mt. 21.23-27; Mr. 11.27-33)*

¹ Pena fetsa Nios kīfiti pexefā mēra Jesús ikikaini anoxō yorafo tāpimani afeskax Nios fe ipaxatirofomākī. Anoxō ato yoiaino a ato Nios kīfixomisfāfe āto xanīfofo fe, a Moisés yoikī kirika keneni keskara ato tāpimamisfo, judeofāfe āto xanīfofori fenifo. ² Iskafakī yōkanifo: “¿Tsōaōxō mī iskafaimē? ¿Tsōa mia yoiamē mī iskafanō?” ixō yōkanifo.

³ Askafafono Jesús ato kemani: “Ēri mato yōkanō ea yoikapo. ⁴ ¿Tsōa Juan nīchiamē ato maotisafakī ato faka mēra ikimapakenō? Niospa nīchiamakī yorafāfe nīchiniforaka.”

⁵ Ato askafaino āa ranā mēenāpai fetseyanā shinānifo iskakakī: “Nō kemakī iskafaino: ‘Niospa nīchini,’ nō faino noko yoikī iskafai: ‘Akka, ¿afeskakī mā Juan nikamismamē?’ ⁶ Akka nō iskafakī yoitiroma: ‘Yorafāfe Juan nīchinifo,’ nō fatiroma yorafāfemāi tokirinī tsakakakī noko retenōfo. Akka keyokōichi shinākanī Niospa ato shināmanaino, Juanmāi Niospa shināmanaino ato yoiaino,” ikanax yoinānifo. ⁷ Nāskaxō kemanifo: “Nō tāpiama tsōara Juan nīchini ato maotisafakī ato faka mēra ikimapakenō,” faifono, ⁸ akka Jesúsri ato kemani iskafakī: “Ēri mato yoima tsōaōxō ē iskafaimākai,” ixō ato yoini.

*Meka fetsafaxō Jesús ato yoini a ato yonoxomis chakafoōnoa
(Mt. 21.33-44; Mr. 12.1-11)*

⁹ Nāskata taefakī Jesús yorafo yoini. Meka fetsafaxō ato yoikī iskafani: “Feronāfake fētsa āfe tare ano uva fanaxō fētsafāfe kexexonō ato ināfaini chai kayoni. ¹⁰ Nā āfe fana fimimistīa ifāfe a yonoxomis nīchini a kexexonafo ato yōkaxō āfe fana fimifo fixotanō nā āfenā tiiri. Akka nā fana kexeafāfe seteketsakaxō afaamais nīchinifo. ¹¹ Nāskata tare ifāfe anā a yonoxomis fetsa nīchini. Akka nāari īchaketsayanā seteketsakaxō afaamais nīchinifo. ¹² Nāskaxō afianā fetsari nīchini. Akka mā kaano nāri imi tofeketsakaxō tarepaxō potanifo.

¹³ “Nāskata tare ifāfe shināni: ‘¿Ē afeskafaimē? Ēfe fakekōi a ē aō noiai mia nīchīpa, ōitsai ēfe fake nikakōitirofokī,’ ixō nīchini. ¹⁴ Akka mā āfe fake nīchia kaito fichikanax nā tare kexemisfo yoinānifo iskakani: ‘Nato āfe apa naano na fanafo fixii kiki. A nari nō retenō na tare nōkonā inō,’ ikax yoinānifo. ¹⁵ Nāskakata achikaxō tare pasotai iyokaxō retenifo. Akka, ¿afaa mā shināimē ato afeska faimē a tare ifāfe? Ē mato yoinō. ¹⁶ Kaxō a tare kexemisfo ato retēkī mitoxō, fetsafo āfe tare ināxii afāfe kexexonōfo,” Jesús ato fani.

Ato askafaito nikakani iskanifo: “Askayamapainōra,” inifo.

¹⁷ Akka askaifāfe ōikī Jesús ato yoini: “Akka, ¿afeskakī Niospa meka iskafakī kenenifomē?

Tokiri pexe fapaikakī nā pexe famisfāfe na tokiri chakara ixō potafiafano, fetsafāfe fichikaxō na tokiri sharakōi ikaxō akiki pexe fatirofo, ixō kirikakī kenenifo. ¹⁸ Akka tokirikī fetsa pakekī aō xao teketiro. Akka tokiri yorakī pakekī renekōititiro.”

¹⁹ Nā ato Nios kīfixomisfāfe āto xanīfofo feta a Moisés yoikī kirika keneni keskara ato tāpimamisfāfe Jesús achipainifo karaxa mēra ikimapaikakī. Atoōnoa meka fetsafaxō yoiaito nikakakī akiki ōitifishkikakī. Akka achipaifikakī tsōa achinima yorafoki mesekakī.

*“¿Xanīfo nō kori inātiromē noko yōkaito?” ixō Jesús yōkanifo
(Mt. 22.15-22; Mr. 12.13-17)*

²⁰ Nāskakaxō a ato feparamisfo nīchinifo Jesús fe yoinātanōfo fanīrira Jesús ato yoiaito nikakakī āto xanīfofo yoixikakī Jesús achinōfo. ²¹ Nāskakē nāfāfe

yōkanifo: “Maestro, mā nō tāpia a mī yoiai anori chanīmakōi mī yoimis. Nā mī ato yoiai anoriri, nokori yorafāfe yoimisfo. Chanīmakōi mī yoimis nā Niospa fichipaiyai keskarakōi. Afara yoipaikai mī ranomisma, mēstekōi mī ato yoimis. ²² Akka chanīmamakī noko yoife na romanō xanīfo nō kopifatiromāki askayamakī nō kopifatiroma rakikīa,” ixō yoinifo.

²³ Akka Jesūs tāpini feparapaiyaiāfāfe. Nāskaxō mā tāpixō ato yoini, ²⁴ “Ea kori exe fisti ispakāfe ē ōinō,” ato faito ispaifono ato yoini iskafakī: “¿Tsōa femānā na keskaramē? ¿Tsōa aneri na kori exe ano keneamē?” ixō ato yōkaito kemanifo iskafakakī: “Nōko xanīfo César keskara,” faifono, ²⁵ Jesūs ato yoini: “Akka na kori exe Cēsarnākē César inākāfe, akka Niosnākē Niosri inākāfe.”

²⁶ Ato askafaito nikakani, rateyanā yoinānifo: “Kee, na yoiai keskarakai tsōa finōtiroma. Tāpikī finakōia,” ikanax āa ranā yoinānifo. Nāskakē yorafāfe ōiaifono Jesūs fanīra mekamapaifaifono fanīra mekatiroma ini. “Kee, finakōia,” ikanax anā tsoa tooxinima.

*“Yora naax anā otoax ¿afeskatiromē?” ixō Jesūs yōkanifo
(Mt. 22.23-33; Mr. 12.18-27)*

²⁷ Nāskata saduceofo Jesūs ōifokani fonifo. Nā saduceofāfe yoimisfo iskakakī: “Yora naaxkai anā afeskax ototiroma,” ixō yoimisfo. Akka nāfāfe Jesūsiki fōkaxō yōkanifo ²⁸ iskafakakī: “Maestro, noko Moisés kirika kenexoni iskafakī yoikī: ‘Feronāfake fetsa āfiyax afeta fake akamax naano one fētsa nā kēro ifomafa fitiro āfe āfi inō. Mā fixō afeta fake atiro āfe ōchi fake inō,’ ixō Moisés keneni. ²⁹ Akka nō mia yoinō, nā naneti siete feronāfake inifo. Āto ochi iyoa āfiyai taeni. Mā āfiyax afeta fake akamax nani. ³⁰ Mā āfe ochi naano chipokoto fini. ³¹ Nāskata nā chipoko fētsari nā kēro fini. Nāskarīfai nāari nani afeta fake akamax. Nāskakanax akikinoax nai keyonifo nā siete feronāfake afeta fake akanamax. ³² Nāskata mā nai keyoafono nā kērori chipo nani. ³³ Akka, ¿fatoto mā otokaxō na kēro fixikanimē, nā fistimāi fipakaxō?” ixō yōkaifono, ³⁴ Jesūs ato kemani: “Yorafo nono mai ano niyokanax feronāfakefo fe kērofo fianāyokani. ³⁵ Akka fatorafāfe Niospa meka chanīmara faafono Niospa ato imasharatiro afe ipaxanōfo. Akka nāfo mā otokanax feronāfakefo fe xotofakefo anā fianātirofoma Nios ika ari nokokanax. ³⁶ Nāskakē anā tsoa natiroma. Ājirifo keskara ixikani Niospa fakekōifori ixikani mā otokanax. ³⁷ Akka Moisés nikani oa fana kooai xoisai keskara mēranoax mekaito, yoikī iskafaito: ‘Mā nafianixakakī mā anā otoafō, ēfi Abraham ikaino Isaaca ikaino, Jacobo ikaino, ē āto Nioskōiki. Iskaratīa efe niafo,’ ixō yoiaito Moisés nikani. Nāskakē nō tāpitiro naax nō anā ototiro. ³⁸ Akka Epa Niospa naafoma keskara ato ōi Epa Niosnoax keyokōi niafo,” ixō Jesūs ato yoini.

³⁹ Nā Moisés yoikī kirika keneni keskara ato tāpimamisfāfe ranārito iskafakī yoinifo: “Maestro, mī ato yoisharakōi,” fanifo. ⁴⁰ Nāskakē anā tsoa yōkapainima, atomāi kemasharakōiaito akiki rāfikakī.

*“Akka, ¿tsōa fenamē Cristo?” ixō Jesūs ato yōkani
(Mt. 22.41-46; Mr. 12.35-37)*

⁴¹ Nāskata Jesūs ato yōkani: “Akka, ¿afeskakī Cristo David āfe fenara mā faimē? ⁴² Nā David Niospa Yōshi Sharapa shināmanaino fanāiti kirika keneni iskafakī:

Epa Niospa ēfe Ifo yoini iskafakī: ‘Mī efe xanīfokōi ipanakaki. ⁴³ Akka nā mia noikaspaifo mī ato finōkōinō ē ato mī nāmā nīchikai,’ ixō yoini. ⁴⁴ Akka, ¿afeskai Cristo David āfe fena itiomē, nā David Cristo ēfe Ifora fafiapaonino?” ixō Jesūs ato yoini.

Jesús ato yōani a Moisés yoikī kirika keneni keskara ato tāpimamisfāfe anorima ato yoiāifono

(Mt. 23.1-36; Mr. 12.38-40; Lc. 11.37-54)

⁴⁵ Keyokōichi yorafāfe nikaifono Jesús aōxō tāpimisfo yoini, ⁴⁶ “Ōisharakakī. A Moisés yoikī kirika keneni keskara ato tāpimamisfāfe mato pārapaikani kiki. Akka nāfo rapati chainipa safekanax fofāsapaimisfo. ‘Noko yoisharakōinōfora,’ ikanax tsaoti sharakōi fenamisfo ičhanāti pexe anoxō, a piaifo anori sharakōi ano tsaopaimisfo, ‘Noko ōisharanōfora,’ ikanax. ⁴⁷ Nāskakaxō kēro ifomafa pexe fiamisfo. Nāskatari Epa Nios chaikōi kīfimisfo, ‘Noko nikanōfora,’ ikaxō. Akka nāfo chanīmisfonono Epa Niospa ato omiskōimakī finakōixii,” ixō Jesús ato yoini.

21

Kēro ifomafa afaamaisfixō Epa Nios ināsharakōini

(Mr. 12.41-44)

¹ Jesús ōini a kori ichapayafāfe kori naneti mēra kori naneiaifāfe Nios kīfiti pexefā mēraxō. ² Nāskatari ōini a kēro ifomafa afaamaisfixō āfe kori exe rafe kori naneti mēra āfe kori nanekī mitofaito. ³ Nāskata ato yoikī iskafani: “Chanīma ē mato yoikōi, na kēro ifomāfa afaamaisfixō ato finōmainifōfā inākōia. ⁴ Akka na kori ichapayafāfe mā Nios ināfikakī tsōa keyo ināma, texe faafo. Akka na kēromā omiskōifikī āfe kori rafe potakī mitokōia. Anā afanā a piāi fitiroma,” ixō Jesús ato yoini.

Jesús ato yoini na Nios kīfiti pexefā pāoixii ixō

(Mt. 24.1-2; Mr. 13.1-2)

⁵ Nāskata a afe rafea fetsafāfe Nios kīfiti pexefāōnoa yoinifo iskafakakī: “Nōko Nios kīfiti pexefā sharaifinakōia. Tokiri petsanāmeax nā kori ichapayafāfe afara sharafifikaxō nētakeafo,” ikaxō yoiāifono, Jesús ato yoini: ⁶ “Akka na mā ōiai anākai tokiri petsanāmexima, keyokōi pāoixii. Na tokirifori maoi fetsexii,” ixō Jesús ato yoini.

Afaa afeskaximākai mā chaima nōko mai keyoaino Jesús ato yoini

(Mt. 24.3-28; Mr. 13.3-23)

⁷ Nāskakē yōkanifo iskafakī: “Maestro, ¿na mī yoiāi keskai afetīa iximē? ¿Afesakaxō nō tāpitiromē na ixiai keskara?” ixō yōkanifo.

⁸ Askafaifono Jesús ato kemani: “Kexemesharakani mā ato nikaino mato afara chakafamatirofoki. ‘Ēfi Cristokī. Mē oa mato xanīfo ixiki,’ ixō mato pārapaikani kiki. Nāskakaxō afāfe yoikani kiki a ē yoimis keskara. Akka yoiāifāfe ato nikayamakāfe. ⁹ Akka yorafo retenāifāfe nikai rateyamakāfe. Askatari a fetsafāfe āto xanīfofori potapaiyāifāfe nikairi rateyamakāfe. Nā ē mato yoimis keskakōiyoxii kiki. Nāskafīax nōko mai fena keyoxima, chipo ixii.

¹⁰ “Akka yorafo mai fetsa anoax mēenāpaiyāifono, yora fetsafori mai fetsa anoax retenāixikani. ¹¹ Nāskaifono nā mai fetsa anoāfo mai naya naya ixii. Askatari fonāiki finakōixikani, afaa pikanima. Askatari pae finakōia ixii nā mai fetsa anofo. Askatari nā nai mēranoafori a ōimismafo ōixikani. Ratekōixikani.

¹² “Akka askayoamano, mato achikaxō fāsi mato omiskōimaxikani. Mato achikaxō judeofāfe āto ičhanāti pexe mēra mato iyokani xanīfofōfāfe mato yōkanōfo. Nāskakaxō mato karaxa mēra ikimakanī xanīfofōfāfe. Eōxō mato askafakani. ¹³ Mato askafaifono mā eōnoa ato yoitiro. ¹⁴ Akka kayoxoma shināchakayamakāfe. Ē mato shināmanikai mā ato yoisharanō. Afaa nō

ato faimē iyamakāfe. ¹⁵ Akka ē mato ato kemamasharaikai fanīrira mato mekafaifono mā ato kemasharanō. Nāskakē nā mato noikaspaifāfe mato kemakanima, fanīrira mā noko yoi tsōa mato faima. ¹⁶ Akka mātō epafāfe mātō efafo feta mato ato achimaxikani. Mātō ochifāfe, mātō kaifofofāfe mato fe rafemisfāferi mato askafaxikani. Akka ranāri mato retexikani. ¹⁷ Akka eōxō yorafāfe keyokōichi mato noikaspaxikani. ¹⁸ Akka mato noikaspaifafifono Epa Niospa mato kexesharai mato retefiaifonokai mātō fero mēsho fenonakama. ¹⁹ Akka afara afeskara ifiaino ea shināmakiyamakāfe. Nāskax mā efe isharapakenakaki.

²⁰ “Jerusalén anoafō sorarofāfe ato cheteafono mā ōikī mā tāpitiro mā chaima ato reteafono, āto pexefori pāo iki keyoi. ²¹ Nāskakē a Judea ano ikafo māchi keya ari ichotanōfo. A Jerusalén ano ikafori nā pexefā rasi mēranoax tsekenōfo. A Jerusalén pasotai ikafori anā Jerusalén ano feyamanōfo. ²² Nā Niospa meka yoiķi kenenifo keskakōi fakī Jerusalén anoafō Niospa ato omiskōimani. ²³ Askatari a kēro fake naneafō fe a fake yome pishta chocho amaifo omiskōixikani māmāi yorafo omiskōifinakōiaifono. Nāskakē nā Judea mai anoafō omiskōifinakōixikani, Niospa ato omiskōimanaino. ²⁴ Ranāri ato kenopa retekani. Akka ranāri ato achikaxō karaxa mēra ato ikimakani mai fetsafo ano. Ato askafaifono nā judeofoma Jerusalén ano iyokani. Akka nā Niospa ato omapaiyaiāfa judeofo Jerusalén ano anā fexikani,” ixō Jesús ato yoini.

*Niospa Fake fotoaino afe keskara iximākai ixō Jesús ato yoini
(Mt. 24.29-35, 42-44; Mr. 13.24-37)*

²⁵ Anā Jesús ato yoini iskafakī: “Nāskakē xini fe oxe fishifori a nō ōimis keskara anā iki fetseima. Fetsa keskara iki fetsei. Askaito ōikani nono mai anoafō ratekōixikani. Fākafāri poo iki meseniaito nikakani. Ratekōixikani nōkai iskara afaa ōimisma ikanax. ²⁶ Nāskaito ōikani yorafo ratekani shinā fenoyotaxikani. Afafo afeskaraito ōikani a ōiyomisfoma keskara ōikani. ²⁷ Nāskatari ea ōixikani ē nai mēranoax nai kōinī ē fotoiyaoito. Shara finakōia ē fotoaito ea ōixikani. ²⁸ Nāskakē nā ē mato yoiāi keskai taei afafo afeskaraino, inimayanā ea manasharakāfe, ea chanīmara fayana. Mē chaima okī ē mato ifirisa fatanō,” ixō ato yoini Jesús.

²⁹ Nāskaxō anā meka fetsafaxō ato yoini iskafakī: “Akka shinākāpo yōkka fiyafi ifi fetsaōnoa. ³⁰ Afe pei siri ikaito ōikī mā tāpitiro māmāi chaima xiniaito. ³¹ Nāskarifiakī mā tāpitiro nā ē mato yoisimis keskara afafo afeskaraito ōikī mā chaima Nios Xanīfo oi kiki xanīfo ikiyoi nono nāmānoax.

³² “Akka ē mato pāraima. Na afafo ē mato yoiāi keskaito na yorafāfe nayokaxoma ōiyokani. ³³ Akka nai fe mai keyoi. Akka ēfe meka fisti keyonakama na ē mato yoiāi keskakōi.

³⁴⁻³⁵ “Nāskakē kexemesharakāfe mātō ōitinī afaa chaka shinākākīma. A mā pāepaiyai fisti shināyamakāfe. Afaa fetsafori shināyamakāfe. Anori shinākī a ikaifo keskakī mā ea chanīmara fatiromaki. Akka afo itipinīsharafomano ē nokorisataxii. Māraki poomānā tanasharaxma tarapa faafo mēra ikiyamatiro. Māri nāskatiro ea shināxma. Nāskata afafo afeskara iki fetseaino nā mai tio anoax omiskōi fetsexikani. ³⁶ Nāskakē itipinīsharakāfe, Epa Nios mēxotaima kififafāikāfe afara afeskaraino omiskōixikakima. Nāskax mā ekeki chipo nokoaino ē matoki inimaxikai,” ixō Jesús ato yoini.

³⁷ Nāskata Jesús pena tii Nios kīfiti pexefā mēraxō ato yoini. Akka fakish tii machi āfe ane Olivos ano oxatai apaoni. ³⁸ Nāskakē yorafā rasi pena tii akiki fepaonifo Nios kīfiti pexefā ano. Anoxō ato yoiaito nikai fekanī.

22

*“¿Afeskaxō nō Jesús retetiromē?” ixō shinānifo
(Mt. 26.1-5, 14-16; Mr. 14.1-2, 10-11; Jn. 11.45-53)*

¹ Mā chaima fista ikaino a Niospa ājirinī Egipto anoxō āto fake iyoafo retenima shinākakī pāa faraxatimais pipaonifo, Pascua fistaṭia. ² Afia penata a ato Nios kīfixomisfāfe āto xanīfofo feta a Moisés yoikī kirika kenenī keskara ato tāpimamisfāfe afeskaxoma Jesús pāraxō retepaikani yorafoki ratenifo.

³ Nāskaifono Judas mēra Satanás ikini. Nā Judasri Jesús āfe ina ini. Āfe ane fetsa Iscariote ini. ⁴ Nā Judas kani a ato Nios kīfixomis xanīfofo yafi a anoxō Nios kīfiti pexefā kexemisfo xanīfofo yoikai. Anoxō ato yoini iskafakī: “¿Afeskaxō ē mato Jesús achimatiromē?” ixō ato yōkani. ⁵ Akiki inimayanā yoikī iskafanifo: “Aicho, nō mia kori ināi mī noko ato Jesús achimaxonō,” ixō Judas yoiaifono, ⁶ “Ia. Ē mato achixonō,” ixō ato yoini. Nāskaxō Judaspa shināni afetia ē ato Jesús achixotiromē ini. Yorafā rasichimāi naki faafono afeskaxō achitiroma ini.

*Mā chaima reteaifono Jesús aōxō tāpimisfo feta yātapake pini
(Mt. 26.17-29; Mr. 14.12-25; Jn. 13.21-30; 1 Co. 11.23-26)*

⁷ Akka nā fista Pascuatia pāa faraxatimais pinifo. Afia penatari oveja fake retexō Nios ināpaonifo āto xinifāfe anifo keskafakī. Akka mā fista pakeano, ⁸ Jesús Pedro yafi Juan nichini ato yoikī iskafayanā: “Fokaxō itipinīsharafatakāfe fistaṭia nō pinō,” ato faito, ⁹ kemanifo: “¿Fanixō nō itipinīsharafaikaimē?” faifono, ¹⁰ Jesús ato kemani: “Mā mā pexefā rasi ano nokoxō feronāfake fisti mā fichi kaikai keshoki faka tetsaomexō foikaino. Nā chīfafaitakāfe fato pexe mēra ikikaimākai ōixikakī. ¹¹ Nānoxō nā pexe ifo yoikī iskafaxikakī: ‘Nōko Ifāfe noko yoikī iskafakī: ‘Fato pexe kene mēraxō eōxō tāpimisfo feta fistaṭia ē pitromāki ixō yōkatakāfe nōko Ifāfe noko faa,’ mā faito, ¹² nāato mato ispai kiki pexe keya kene efapaya itipinīsharakōia. Nāno itipinīsharafakāfe anoxō nō pinō,’” Jesús ato fani.

¹³ Nāskata mā fokaxō fichinifo nā Jesús ato yoia keskarakōi. Nāskaxō itipinī fanifo Pascua fistaṭia pixikakī.

¹⁴ Mā itipinīshara faafono, Jesús a aōxō tāpimisfo fe kaax, mīsa ano tsaoni.

¹⁵ Nāskaxō tsaoafono Jesús ato yoini: “Ē mato feta pipaitiani na fista Pascuatia ē nayoxoma. ¹⁶ Akka ē mato yoikōi ēkai anā mato feta Pascua fistaṭia pifainakama. Akka nā mā Epa Nios xanīfo ano nokoaitia ē mato feta pixii inimayanā.”

¹⁷ Nāskata kecho tsomainīfofā Apa Nios kīfikī, “Aicho,” fata, ato yoikī iskafani: “Na mato tiito ayakāfe. ¹⁸ Ē mato yoikōi ē anā mato feta na fimi ene ayame. Akka nā ēfe Epa Nios fe ē xanīfo ixō keyokōi ē yorafo īkixō na fimi eye ē anā ato feta ayaxii,” ixō ato yoini.

¹⁹ Nāskaxō anā pāa tsomainīfofā, Apa Nios kīfikī aicho fata, ato pāa kaxkex-opakeyanā ato yoikī iskafani: “Nafi efe nami keskaraki. Matoōnoax ē nai. Nāskakē nā mā paitia ea shinānafāikāfe,” ixō ato yoini.

²⁰ Nāskarifiakī kecho tso mainīfōfā nā pixō ato yoini iskafakī: “Na ayatiōxō ē mato afara fenashara yoi iskafakī: Ēfe imi foaino ē matoōnoax nai mā ēfe Epa Nios fe ĩpaxanō.”

²¹ “Akka nā efe mīsa ano tsoa fētsa ea ato achimani. ²² Akka nā eōnoa yoikī kirika kenenifo keskakōi ē naikai. Akka nā ea ato achimanai akairi omiskōi finakōi,” ixō Jesúo yoini.

²³ Ato askafaito nikakani āa ranā yoināi fetsenifo: “¿Fatokai nō achimanimē?” ikanax āa ranā yoinānifo.

Akka, ¿tsoa sharafinakōiamē?

²⁴ Nāskakē aōxō tāpimisfo feratenānifo fatokai sharafinakōiamē ikanax.

²⁵ Nāskaifono Jesúo ato yoini iskafakī: “Nā yora fetsafo xanīfokaxō ato ferateyanā ato yonomamisfo. Ato askafafiakakī nōko xanīfo noko afara shara faxō fafāini ixō nokoōnoa yoikāfe, ato famisfo.

²⁶ “Akka māri askayamakāfe. Askatamaroko nā sharafinakōia mato exto chipoko keskara ikāfe. Nā chipokofāfe āto iyoafo ato yonoxosharatirofo keskara ikāfe. Akka xanīfo ipaikakī fetsafo sharafakāfe ato axosharaxikakī.

²⁷ Akka, ¿fatokaimē sharafinakōia, nā mīsa ano tsoaxō pimisraka, askayamai nā ato pimamisraka? Akka nā mīsa ano tsoaxō piai nā sharafinakōia. Akka ē mato fe ixō ē mato yonoxomis keskara ē imis.

²⁸ “Akka mā efe itiani mā ea potamisma, na afara chakafāfe ea chakafafaino. ²⁹ Nāskakē ēri mato xanīfo imaxii, ēfe Epa Niospa eari xanīfo imaino.

³⁰ Akka mā efeta pita efeta ayata mā faxii ēfe mīsa ano tsoaxō. Nāskakē mā mā xanīfōxō nā doce nōko kaifo israelifāfe mā ato ĩkixii,” ixō Jesúo a fe rafeafo yoini.

“Ē Jesúo ōimisma, Pedro ixiaino,” Jesúo ato yoini (Mt. 26.31-35; Mr. 14.27-31; Jn. 13.36-38)

³¹ Nāskata nōko Ifāfe Simón yoini iskafakī: “Simón, ōipo Satanás Nios yōkaxō mato afara chakafamapai, mā ea potanō. ³² Akka ē mia Epa Nios kīfixoni mī ea nikakī xateyamanō. Akka mā mī paxkafixō mī ea anā Ifofakōixō a mefeta ea Ifofafo ato yoisharafe ea Ifosharafanōfo,” ixō yoiāito, ³³ Simón kemani: “Īfo, ē mia potanakama. Mia karaxa mēra ikimanaifono ēri mefe kai. Mia reteafonori ēri mefe nai,” faito, ³⁴ Jesúo kemani: “Pedro, ē mia yoi iskaratīa takara fene keoyoamano mī ato yoi iskai: ‘Ē Jesúo ōimisma,’ ixō mī ato yoikī tres fai,” Jesúo fani.

“Mē samamashta omiskōikai,” Jesúo ato fani

³⁵ Nāskafata Jesúo anā ato yoini iskafakī: “Ē mato nīchiyamea pishamais koriri mā foyameama, saporiti mā fotima. Akka ē mato nīchia kaxō ¿mā afaa yopatimē?” ato faito kemakakī iskafanifo: “Maa. Nōkai afaa yopatima,” fanifo.

³⁶ Nāskata ato yoini iskafakī: “Akka iskaratīa nā pishayato āfe pisha foikanō, āfe koriyafi. Akka nā keno yamato āfe rapati minixō kori fixō, nā kōri keno fetsa finō. ³⁷ Akka ē mato yoi nā eōnoa yoikī kirika kenenifo keskaī mē askakōi. Ē askarayamafiano ea pārakani yora chakafāfe, ‘Nato ato chakafamis,’ ea fakani. Nāskakē nā eōnoa yoikī kirika kenenifo keskara nē askakōi,” ixō ato yoiāito, ³⁸ a aōxō tāpimisfāfe yoinifo: “Īfo, nono keno rafe,” faifono, ato kemani: “Nā rafe inōkī anā nō yopaimakai. Nāskanō,” ixō ato yoini Jesúo.

*Getsemaní anoxō Jesús Apa Nios kīfini**(Mt. 26.36-46; Mr. 14.32-42)*

³⁹ Nāskata Jesús kani nā kamis keskai machi Olivos ano. Aōxō tāpimisfori afe fonifo. ⁴⁰ A kamis ano mā nokoxō ato yoini: “Epa Nios kīfikāfe Satanás mato afara chakafamapaiyai keskara axikakīma,” ixō ato yoini.

⁴¹ Ato askafata ato makinoax orishta kaxō Apa kīfini ratokonō mai chachipakefōfā. ⁴² Apa kīfikī iskafani: “Epa, ea ifipaikī ea ifife ē omiskōinōma. Akka nā ē apaiyai keskafakīma, nā mī ea amapaiyai keskafafe,” Apa faino, ⁴³ āfe ājiri nai mēranoax akiki nokorisatani mitsisipakōi imaxiki. ⁴⁴ Shināmitsai finakōiyanā, Jesús Apa kīfini nā omiskōiai shināyanā. Nāskaino āfe nīskaya āfe imi mai ano tosini.

⁴⁵ Mā Apa kīfita fininākfāta, aōxō tāpimisfo ari kani. Kaxō ōia oxafo inifo shināmitsai finakōikani āto lfo omiskōiaino. ⁴⁶ Nāskaxō ato yoini: “¿Afeskai mā oxaimē? Fininīfōfākāfe Epa kīfixikakī Satanás chakata mato afaa chakafamayamanō,” ato fani.

*Jesús achinifo**(Mt. 26.47-56; Mr. 14.43-50; Jn. 18.2-11)*

⁴⁷ Jesús ato yoiaino yorafā rasi nokotoshinifo. Nā āfe ane Judas, nāri Jesúsxō tāpimis iyopaoni, nā Judas rekē oaino acho yorafā rasi fenifo. Nā Judas Jesús ari kani kokoikai. ⁴⁸ Askafaito Jesús yoini iskafakī: “¿Judas, ea mā kokoxō mī ea ato achimanimē?” fani.

⁴⁹ Askafaito ōikakī a aōxō tāpimisfāfe Jesús yōkanifo: “¿lfo, nō ato kenopa rerapaketimō?” ixō yōkanifo.

⁵⁰ Nāskata fētsa nā ato Nios kīfixomisto āfe xanīfāfe ina āfe pacho kayakai aōri paxteni. ⁵¹ Askafaito ōikī Jesús yoini iskafakī: “Enefe. Nāskanō,” fata afianā koshikōi xanīfāfe āfe ina āfe pacho ramākaxō pacho tichixotani. ⁵² Nāskaxō ato yoini a Nios kīfixomis xanīfofo yafi a Nios kīfiti pexefā kexemis xanīfofo, nā anifo tiri mā ifi feafono ato yōkani: “¿Afeskai kenofoya ifixatefoya mā oamē ea achiyoī oa ē yometso keskarakē? ⁵³ Pena tii ē mato fe itiani Nios kīfiti pexefā mēraxō ē mato tāpimani, akka mā kai ea achipaimisma. Akka na fakishi mā ekeki oa Satanás māto ifono,” Jesús ato fani.

*“Ē Jesús ōimisma,” Pedro ini**(Mt. 26.57-58, 69-75; Mr. 14.53-54, 66-72; Jn. 18.12-18, 25-27)*

⁵⁴ Jesús achixō iyonifo a ato Nios kīfixomis xanīfāfe pexe ano. Akka Pedro acho chipo kani. ⁵⁵ Akka pexe emāiti chii ketefaax tsaoax yoafono Pedrori nāno ato fe tsaoax yooni. ⁵⁶ Nāno ato fe tsaoax yooaino xanīfo yonoxomis xomayato fichixō yoini iskafakī: “A nari Jesús fe imiski,” faito,

⁵⁷ Akka Pedro iskani: “Ē kai Jesús ōimisma. Mī ea pārai,” faito, ⁵⁸ fētsari tāpixō yoini iskafakī: “Mīfi na Jesús fe imiski,” faito, Pedro kemani: “Maa. Ē kai Jesús fe imisma,” fani.

⁵⁹ Mā askafafo samaraka pishtano, fetsari anā iskafani: “Chanīma, a nafi Jesús fe imiski. A na feronāfake Galilea ano,” faito, ⁶⁰ Pedro yoini iskafakī: “A mī yoiaīōnoa ē tāpiama tsoaraōnoa mī yoi ē tāpiama,” Pedro faino takara keoinākfāni.

⁶¹ Pedro askaito Jesús texkeakekafā festani. Festanaino Pedro shinātani nā āfe Ifāfe yoia keskara. “A takara keoyoamano, ‘Ē Jesús ōimismara,’ ixō mī ato yoi tres fakī,” Jesús faa nā Pedro shinātani. ⁶² Nāskakē nānoax tsekekaini kaax Pedro shināmitsai oiai finakōini.

Jesús kaxemetsama fanifo

(Mt. 26.67-68; Mr. 14.65)

- ⁶³ Nāskakē nā kexeafāfe Jesús kaxemetsama fanifo koshaketsayanā.
⁶⁴ Nāskata feopokaxō yōkanifo: “Noko yoife tsōa mia koshamakī.”
⁶⁵ Nāskakata Ichaketsanifo afara fetsa yōkaketseyanā.

Xanīfo tiito Jesús yōkanifo

(Mt. 26.59-66; Mr. 14.55-64; Jn. 18.19-24)

- ⁶⁶ Mā penano a judeofāfe āto xanīfofo ichanānifo. Nā ato Nios kīfixomisfāfe āto xanīfonō, a Moisés yoikī kirika kenenī keskara ato tāpimamisfori ato fe ichanānifo. Nāskakaxō Jesús iyonifo xanīfo finakōia ano. Nārixō yōkanifo iskafakakī: ⁶⁷ “Noko yoife mīmākī Cristo.”

- Askafafono ato Jesús kemani: “Ēje, ē mato faitokai mā ea chanīmara faima.
⁶⁸ Ēri mato yōkaito mā ea kemaima. ⁶⁹ Akka iskaratīa ēfe Epa Nios ketaxamei ē tsaosharakōi. Nāmāi fasi finakōikē afama mīshti atiro,” ixō ato yoiaito,
⁷⁰ keyokōichi yōkanifo: “Akka, ĵmīmē Niospa Fake?” ixō yōkaifono Jesús ato kemani: “Nā mā yoiai keskarakīa ē,” ato fani.

- ⁷¹ Ato askafaito nikakakī anā yoinifo iskafakākī: “ĵNikakapo! Nōkai anā aōnoa meka fetsa nō nikapaima. Mā nōakōi nō nika noko yoiaito,” ikanax yoinānifo.

23

Pilato ano Jesús iyonifo

(Mt. 27.1-2, 11-14; Mr. 15.1-5; Jn. 18.28-38)

- ¹ Nāskakata keyokōi fininīfofākāta Jesús iyonifo Pilato xanīfo finakōia ano.
² Nāskakata judeofāfe Jesús chakafakakī yōanifo iskafakakī: “Na feronāfāke nōko kaifofo ato chakafamai iskafakī yoikī: ‘Na romanō xanīfofōkichi mato kori yōkaito ināyamakāfe,’ ato faa. Nāskatari, ‘Ēkīa Cristo, ea Niospa nīchia ē mātō xanīfo inō. Ē Niospa Fake,’ noko faa,” ixō Pilato yoinifo.

- ³ Askafafono Pilato yōkani: “ĵMīmē judeofāfe xanīfo?” ixō yōkaito Jesús kemani: “Ēje, nā mī ea yoiai keskarakīa,” fani.

- ⁴ Nāskafaino Pilato nā ato Nios kīfixomis xanīfofo yafi nā ano niafo yoini iskafakī: “Na feronāfākekai afaa chakafaa ē oīma,” ato fani.

- ⁵ Ato askafaito fāsikōi mekainīfofā yoinifo iskafakakī: “Na feronāfāke ato tāpimayanā pexefo tii anoa ato chakafakī mekafamafofāsafai. Galilea anoxō ato taefamati, iskaratīa nono Judea anoxori ato askafamai,” ixō yoinifo.

Jesús Herodes ano iyonifo

- ⁶ Askafafāfe nikakī Pilato ato yoini: “ĵChanīmamē na feronāfāke Galilea anoamē?” ato faino, ⁷ “Ēje, nānoa,” fanifo. Nāskaxō xanīfo Herodes ano nīchini, nā Herodesmāi Galilea anoax xanīfofōkē. Nāskafafono Herodes Jerusalén ano oni. ⁸ Jesús ōi Herodes inimakōini, mēxotaimamāi ōipaikatsaxakī, aōnoa yoiaifāfe nikakatsaxakī afama mīshti faito ōipaikī. ⁹ Nāskaxō afama mīshtifo yōkaket sani. Akka Jesús kai pišta kemanima. ¹⁰ Nāskano nānori inifo, a ato Nios kīfixomisfāfe āto xanīfofo fe a Moisés yoikī kirika kenenī keskara ato tāpimamisfo, nāfāfe Jesús mekafakī chakafanifo. ¹¹ Nāskakē Herodes āfe sorarofa feta chakakōifayanā kaxemetsama fanifo. Nāskakaxō rapati nana safemanifo nā rapati xanīfonā. Nāskaxō Herodes anā Pilato ano Jesús nīchini. ¹² Nāskatari Pilato fe Herodes rafe fatanānifo. Akka taeyoi chakafanāyopaonifo.

Pilato ato yoini Jesús retenōfo

(Mt. 27.15-26; Mr. 15.6-15; Jn. 18.39-19.16)

¹³ Nāskaxō Pilato ato ichanāfani a ato Nios kīfixomis xanīfofo yafi xanīfo fet-safo, askatari a ano ikafori ato ĩchanāfani. ¹⁴ Nāskaxō ato yoini iskafakī: “Mā ekeki na feronāfake efea iskafakī yoiyanā: ‘Nato yorafo chakafakī mekafa,’ ixō. Akka māto ferotai fi mē yōka. Natokai afaa chakafa ē ōima, askatarikai ato chakafakī mekafaama a mā yoiyai keskafakī. ¹⁵ Akka Herodesri aōnoa afaa chaka nikama. Nāskaxō nokoki anā nīchia. Mā mā ōi natokai afaa chakafaama napanā. ¹⁶ Akka ē omiskōimakī tāpimani, chipo anā nīchixiki katanō,” ixō ato yoini.

¹⁷ Akka Pascua fistatīa Pilato ato inimamapaoni yora fisti karaxa mēranoa tsekakī. ¹⁸ Akka keyokōi fāsikōi mekainīfofānifo. “ĭNa chaka retefe, Barrabās noko kāimaxoxiki!” fanifo.

¹⁹ Nā Barrabās karaxa mēra ikimanifo pexefā rasi anoxō romanōfāfe āto xanīfo nō potanō fāsikōi mekainīfofākāfe ato faito. Askatari ato retekē karaxa mēra ikimanifo. ²⁰ Akka Pilato Jesús nīchipaikī, afianā yorafo yoini. ²¹ Ato askafato nikakakī yorafāfe fāsikōi mekafainīfofānifo: “ĭA chaka mastafe!” fanifo.

²² Askafaifono afianā Pilato ato yoini: “Akka, ĭafaa chakafamē? Natokai afaa chakafa ē ōima. Afeskaikai natiroma. Akka ē omiskōimakī finata ē nīchi katanō,” ato faito, ²³ akka afo mēxotaima mekarianifo. “ĭMastafe!” faria fanifo. Askafaria faifono, “Māa akāfe,” ato fani. ²⁴ Ato iskafakī, yoiyanā, “Nā mā apaiyai keskafakāfe” ato fata, ²⁵ nāskaxō nā Barrabās karaxa mēranoa kāimani, “Noko kāimaxōfe,” faifono. Nā Barrabās karaxa mēra ipaoni xanīfofo potapaita ato retekatsaxakī. Nāskaxō Jesús ato ināni nā apaiyai keskafanōfo.

Jesús ifi cruz ikaki mastanifo

(Mt. 27.32-44; Mr. 15.21-32; Jn. 19.17-27)

²⁶ Mā Jesús mastai fokakī iyokakī, feronāfake fisti fichikaxō yoinifo cruz foxōikanō. Nā feronāfake Cirene anoa ini, āfe ane Simón. Oriax oaito fichikaxō cruz iyamanafono Jesús acho cruzya kani.

²⁷ Nāskakē yorafā rasi kērofo fe oiakani, fiisi fonifo. Acho fokani, shināmitsakani āto Ifo shinākani. ²⁸ Nāskaifono Jesús ato ōikī ato yoini iskafakī: “Kērofo Jerusalén anoafofāfe, eōnoax ōiyamakāfe, eōnoax ōiakīmaroko māa ranā oia faatanākāfe, māto fakefoōnoaxri oiakāfe. ²⁹ Akka chipo a mā omiskōiai nokoxii, nāskakē mā yoikī iskafaxii: ‘Inimakāfe a fake fimisfoma, mā nofe omiskōikeranaki,’ ixō mā yoixii. ³⁰ Nāskakē yorafāfe machi yoikī taefakī iskafaxikani: ‘Nokoki māchifā mafakerafe noko fepoxiki nō narisanō omiskōixikima,’ ixō yoixikani. ³¹ Ē afaa chakafayamafiamiskē ea iskafakani. Akka nā afara chakafakī xateyamaifo omiskōimakī finakōikani,” ixō Jesús ato yoini.

³² Nāskata yora chaka raferi iyonifo Jesúsya mastai fokakī. ³³ Nāskata a mastai fo ano nokonifo āfe ane Mapo Xao ano. Nānoxō Jesús mastanifo. Yora chaka rafeya fetsa takai fetsa ata, fetsari takai fetsa anifo. ³⁴ Nāskaxō mā mastafono Jesús Apa Kīfīni: “Epa, ato raefafe na ea iskafaifo tsōa tāpiamakī,” Apa fani.

Nāskano sorarofa ato kaxetiya kaxenifo mā kanākanax Jesús rapati paxkanāxikakī. ³⁵ Nānoxō yorafāfe ōinifo. Nā xanīfofōfāfe kaxemetsamafai-fono iskafayanā: “Nō ōinō nato yorafo ifimiski, iskaratūa āari ifimeimākai. Niospa Fakeaxroko āa ifimeiki kiki a Niospa katonino,” fanifo.

³⁶ Sorarofori Jesúski kaxemetsamanifo. Nāskaxō akiki fokaxō fimi ene kacha ayamapainifo. ³⁷ Iskafakī yoiyanā: “Mī judeofāfe āto xanīfomākī mīari ifimefe,” fanifo.

³⁸ Nāskaxō āfe mapo mǎnāori tafara kenekī iskafanifo: “Nafi judeofāfe āto Xanīfoki,” fanifo.

³⁹ Nāskano nā aya mastafo fētsa Jesús chakafakī mekafani iskafakī: “Mī Cristomākī mīa ifimeta nokori ifife,” faito, ⁴⁰ akka fētsa yoikī iskafani: “Askafayamafe. ¿Mī Nioski meseimamē a mī afara chakafaax omiskōiai?” fani. ⁴¹ “Akka nō omiskōikōi chanīmakōi nōmāi afara chakafakatsaxakī. Akka na feronāfakekai afaa chakafama na omiskōiai,” fani.

⁴² Nāskaxō nāato Jesús yoini iskafakī: “Ifo, xanīfo finakōixō ea shināfe,” faito, ⁴³ Jesús kemani: “Ē mia pārāima iskaratīakōi mī efe kai nā sharafinakōia ari mī efe inimakōipakenaka,” fani.

Jesús nani

(Mt. 27.45-56; Mr. 15.33-41; Jn. 19.28-30)

⁴⁴ Nāskata xini keya nā mai tio fakishifākōitani. Nāskax mā xini kaino anā penatani. ⁴⁵ Nāskakē xini peinima. Nāskaino sama nami Nios kīfiti pexefā mēranoax nakirafekōi faxtepekekafāni. ⁴⁶ Nāskaino Jesús fāsikōi Apa kenani: “Epa, ea ifife ē mia ano kanō,” fata, nāskax nani.

⁴⁷ Nāskaito soraro xanīfāfe ōikī, Epa Nios aicho fayanā iskafakī yoini: “Chanīma, na feronāfake afaa chakafamisma,” ixō yoini.

⁴⁸ Nā ano niāfāfe ōinifo Jesús naito. Nānoax fokani, oiai finakōi fonifo Jesús shinākani. ⁴⁹ Akka nā Jesús ōimisfāfe ano nētekaxō chai nikaxō ōinifo. Kērofāferi ōinifo, Galilea anoax afe foitaxakakī.

Jesús makex kini mēra maifanifo

(Mt. 27.57-61; Mr. 15.42-47; Jn. 19.38-42)

⁵⁰⁻⁵¹ Nāno feronāfake sharakōi fisti ini. Nāato Nios Ifofasharapaikōini. Āfe ane José, Arimatea ano ini judeofāfe āto xanīfo. Nā José Nios xanīfokōi manapaoni. Nāatokai xanīfo fetsafāfe shināifo keskara shināpaonima. ⁵² Nā José Pilato ano kaxō Jesús yora yōkani maifai axiki. ⁵³ Mā yōkatani oxō cruz ano fotomaxō sabanā fena sharakōipa rakoxō iyoxō mafa kini mēra rātani, a tsoa maiyomisma mēra. ⁵⁴ Nā penata itipinīshara fanifo, mā chaima safaro faino, ⁵⁵ kērofo Jesús fe Galilea anoax foitaxakakī. Nāfāfe José chīfāfanifo afeskaxō kini mēra Jesús rātaimākai ōifokakī. ⁵⁶ Mā āto pexe ano fēkaxō, pirofomā yafi a aō tereati itipinīsharafanifo. Akka kērofāfe judeofāfe pena tenetiā teneyonifo nā Moisés yoini keskafakī.

24

Jesús otoni

(Mt. 28.1-10; Mr. 16.1-8; Jn. 20.1-10)

¹ Akka nā pena teneti safaro mā finōfaano nomīkonō fakishparikōi fonifo a Jesús maia ano. Pirofomā foifokani mā itipinīshara fakaxō. ² Mā nokokaxō ōiafo a kini a aō fepoitafo tokirinīfā mā fepekemea ini. ³ Akka ikifaikakī ōiafo āto Ifo Jesús āfe yora ano inima. ⁴ Nāskai ratekōiyanā afeskamē ikaxō shināpaiyafono, feronāfake rafe ato ketaxamei nitani, āto rapati fafekōiyanā. ⁵ Nāskaifono kērofo ratekōiyanā maikiri fepepakefōfanifo. Nāskaifono nā ājiri rafeta ato yoini: “¿Afeskakī nā yora nia mā fenaimē na yora nakē maifamisfo mēranoa? ⁶ Anākai nonoma, mā otokaina. Akka shinākapo a Galilea ano iyoxō

mato yoimis keskara. ⁷ ‘¿A yora chakafāfe ea achikaxō ea mastafono tres nia oxata ē anā otoxira,’ mato faito mā nikamismamē?” ixō ājiri rafeta ato yoini.

⁸ Ato askafaino a Jesús ato yoimis anori shinānifo. ⁹ Nāskakata nā Jesús maita anoax anā fekakī, nā once aōxō tāpimisfoya nā fetsafori ato yoitoshinifo nā ōitanaifo keskara. ¹⁰ Akka nā Jesúsnoa ato yoimiski chanifōfāifo tii, María Magdalena ikaino Juana ikaino Santiago āfe afa María ikaino kēro fetsafori inalo. ¹¹ Akka a aōxō tāpimisfāfe, “Āa chanīkanira,” ato fanifo. Ato nikakaspanifo.

¹² Ato askafaifono nikai Pedro fareke kaini, a Jesús maita ano ōikai. Kaxō ōia kini mēra a aō rakoita sabanā fisti mania ini. Nāskax anā Pedro pexe ano oni, “Kee, ¿afeskaitamē?” ikax.

Jesús Emaús ano fāi kani

(Mr. 16.12-13)

¹³ Afia pena fistichi Jesús fe rafemisfo rafe pexe rasi āfe ane Emaús ano fonifo. Jerusalén fe Emaús once kilometro ini. ¹⁴ Fokakī yoifonifo a Jesús reteitafo. ¹⁵ Yoināfōfāifono Jesús atoki nokoax ato fe fāi kani. ¹⁶ Akka mā ōifikakī tsōa tāpinima, Niospa ato onātimaifaino. ¹⁷ Askafōfāifono Jesús ato kemani: “¿Tsoaōnoa mā yoifokaimē fāi kakī?” ato faino tsoa tooxinima nāno nētenifo shināmitsakōīyanā.

¹⁸ Nāskaito nā āfe ane Clefás kemani: “¿Meres fisti mī Jerusalén ano ixō, mī tāpitamamē na rama iskaita?” faito, ¹⁹ Jesús kemani: “¿Āfaa afeskaitamē?” ato faito yoinifo: “Jesús Nazarete ano nō yoi, nāatofi Niospa meka yoimiskī. Nāskakē yorafo akiki inimakōimisfo, Niosri akiki inimakōimis. Niospa āfe sharaōxō noko yoimis Niosxō afama mīshti noko faxomis. Āfe mekapa yorafo sharafata afara sharafo noko axomis. ²⁰ Nāskafaiato a ato Nios Kífixomis xanīfofo feta nōko xanīfōfāife achikaxō ato ināitafo retexaxō mastanōfo. ²¹ Akka nā nōko kaifo israelifo romanōfo ano ifimis ipainōra nō famis nōko xanīfo ixiki romanōfāfe anā noko afeskafanōfoma. Akka mā tres nia finōa a naita. ²² Akka nā kērofo nofe ikafāfe noko yoikakī noko ratekōiafo. Fakishparikōi a maia ano ōifokaxō ōiafo āfe yora ano ikama. ²³ Ano āfe yorakēma ōitakani pexe ano anā feafo. Nāskaxō yoiafo a āfe ājiri rafeta atoki nokoxō ato yoiafo keskara iskafakī: ‘Jesús naama, iskaratīa nia,’ ato faafono. ²⁴ Nāskakē nofe yora rafe chipo a maia ano fokaxō ōiafo nā kērofāfe yoiafo keskarakōi ika. Akka Jesús āfe yora ano ikama.”

²⁵ Nāskafaifono Jesús ato yoini iskafakī: “Kee, mā kai afaa tāpiama, mā tatimakōi. Akka a Niospa meka yoimisfāfe yoinifo keskarakai mā chanīmara faima. ²⁶ Akka kenenifo iskafakī: ‘A Niospa nīchia Cristo omiskōikōīfiāx, chipo Apa Nios fe xanīfokōi ixii,’ ixō aōnoa kenenifo,” Jesús ato askafani.

²⁷ Nāskaxō ato yoikī taefani a aōnoa yoikī kenenifo, a Moisés aōnoa yoikī keneni yoita, a Niospa meka yoimisfāfe aōnoa yoikī kenenifori; nāfo ato fe kakī ato yoifoni.

²⁸ Mā chaima pexe rasi ano nokokakī nā rafeta shinānifo: “Noko finōfainikaira,” ikaxō. ²⁹ Akka nā rafeta nētefanifo iskafakī yoīyanā: “Kaya-mafe. Nono nofe nētefe mā yātapakei kiki. Mā fakishaki,” faifono Jesús nāno ato fe nēteni. ³⁰ Nāskata mā mīsa ano tsoaofono pixakakī Jesús pāa tsoainīfōfā, Apa Nios kīfikī. “Aicho,” fata, nāskaxō pāa kaxkepaxexō ato ināni pinōfo. ³¹ Ato askafaito nāskakē koshikōi Jesús tāpinifo. Akka mā tāpiafono ato makinoax yamarisatani. Nāskakē anā tsōa ōinima. ³² Nāskakē āa rafe yoinānifo: “No fe fāi okī a Niospa mekaōnoa yoikī kenenifo keskara

noko yoifeaito nõ mea nõko õiti fepeisharakõia. Āfe meka sharakõi,” ikanax yoinānifo.

³³ Nāskakanax Jerusalén ano anā fenifo. Mā fēkaxõ ato fichitoshinifo, nā Jesúsxõ tãpimisfo once a ato fe rafeafo fe ĩchanākaxõ, ³⁴ iskafakī yoiaifono: “Chanīma, mā nõko Ifo otoa, mā Simón õimana,” ixõ yoinifo.

³⁵ Nāskaifono nā rafetari ato yoinifo nā Jesús ato fe fāi kaito õitanaifo: “Mā nõ õia noko pāa torexopakeaito,” ixõ ato yoinifo.

Jesús aõxõ tãpimisfoki nokoni

(Mt. 28.16-20; Mr. 16.14-18; Jn. 20.19-23)

³⁶ Nā ato yoiaifono, Jesús ato nakirafekõi nirisatani. Nāskaxõ ato yoisharakõini iskafakī: “Inimakõikāfe,” ato fani.

³⁷ Ato askafaino ratekõinifo, “Niafaka chaka nokoki nokoara,” ikanax. ³⁸ Askaifono Jesús ato yoini: “¿Afeskai mā rateimē? ¿Afeskakī mātõ õiti mēraxõ mā chanīmara fatiromamē? ³⁹ Ōikapo ēfe mēke yafi ēfe tae. Ēkīa. Ea ramākapo. Akka õikapo na rāfo tsefefe. Akka niafakakai namiyata xaoyama, nā mā ea õiai keskara,” ixõ ato yoini.

⁴⁰ Ato askafakī yoianā, āfe mēke toa yafi āfe tae toa ato ispani. ⁴¹ Ato askafakī yoiaino āto õiti mēraxõ shinānifo: “Jesúspara,” ikaxõ. Nāskaxõ chanīmara fakeratama akiki inimakõinifo. Nāskaifono Jesús ato yõkani: “¿Nono mā afaayamamē ē pipanā?” ato faito, ⁴² foe xoia pishta inānifo. ⁴³ Mā fixõ āto ferotaifi pini.

⁴⁴ Nāskaxõ afianā ato yoini: “Mēfi mato yoiyomiskī mato fe iyoxõ eõnoa yoikī Moisésnõ nā a Niospa meka yoimisfonõ, eõnoa fanāiti kenenifo keskai nē askakõi,” ixõ Jesús ato yoini. ⁴⁵ Nāskakē āfe shināmā a kenenifo keskara ato shināmanaino tãpikõinifo. ⁴⁶ Ato yoikī iskafani: “Eõnoa yoikī kenekī iskafanifo: ‘Cristo a Niospa nīchia mā nafiāx tres nia oxata anā otouxii,’ ixõ eõnoa yoikī kenenifo. ⁴⁷ Akka ēfe aneõxõ ato yoikāfe. Jerusalén anoxõ ato yoikī taefakāfe. Nāskaxori nā maniafo tii anoafori ato yoifofāsafakāfe āto chaka xatekaxõ anā Nios nikasharakõinõfo, nāskaifono āto chaka ē ato soaxonikai. ⁴⁸ Akka nā ē mato yoiaito, mā õiai a mā nikaifori fetsafo yoipakexakāfe. ⁴⁹ Akka ēfe Yõshi Shara ē matoki nīchi ēfe Epa yoiyoni keskafakī. Akka mā nono Jerusalén ano nētēyokāfe, ēfe shara matoki nīchionõ nai mēraxõ nā ē mato yoiai keskafakī mā fetsafo eõnoa mā ato yoinõ,” ixõ Jesús ato yoini.

Jesús nai mēra kani

(Mr. 16.19-20)

⁵⁰ Nāskaxõ Jesús ato iyoni Jerusalén anoxõ Betania pasotai. Nānoxõ Jesús mēshainākfā Apa Nios yoini iskafakī: “Epa Niospa, eõxõ tãpimisfo ato kexe-sharapakexafe.” ⁵¹ Nāskafakī yoianā ato makinoax Jesús Apa Nios ari kani.

⁵² Akka a aõxõ tãpimisfāfe iskafakī yoinifo: “Jesús, mī nõko Ifo sharakõi, nõ mīo noikõi,” ixõ yoikanax chipo Jerusalén ano fonifo inimakõiyānā. ⁵³ Nāskakē mēxotaima Nios Kifiti pexefā mēraxõ Nios yoisharapaonifo. Nā tii.

Juan Jesúsnoa Yoikĩ Keneni

Jesucristoõnoa Juan keneni

¹ (Èkĩa Juan. Iskaratĩa Jesucristoõnoa ã mato yoi mã tâpinõ. Cristo ãfe ane ipaoni, Meka. Nãato Niosnoa noko tâpimani.)

Afaa oniataima na Meka aneya iyopaoni. Apa Nios fe iyopaoni. Nãrifi Nioski. ²Taefenakõi Nios fe iyopaonixakĩ, iskaratĩari afe ika. Afaa oniamatai nã Meka aneya Apa Nios fe iyopaoni. ³ Aõxõ Epa Niospa keyokõi onifani. Akka Jesúsmaisxõ afaa onifanima. Nãskaxõ Jesús feta Niospa afama mĩshti onifani. ⁴ Aõnoax keyokõi niafo. Niospa yorafo tii shinãmapaiyai keskafakĩ Jesúsxõ ato shinãmatiro ãto õiti xafakĩakõi inõfo. ⁵ ãfe õiti xafakĩakõifiax yora chakafo mẽra Jesucristo ipaoni. Yora chakafãfe ãto õiti fakish keskara, shara shinãkanima. Askafiano yora chakafãfe Jesucristo xĩtitirofoma yorafo shara shinãmanaino ãto õiti anã fakish keskara inõfoma.

Niospa Juan Maotista nĩchini ato yoinõ

⁶⁻⁷ Epa Niospa Juan nĩchini Jesucristoõnoa yorafo yoinõ iskafakĩ: “ãfe õiti xafakĩakõi. Epa Niospa mato shinãmapaiyai keskara aõxõ mato shinãmatiro,” ixõ Juan ato yoini Jesús chanĩmara fanõfo.

⁸ Juankai Cristoma, Niospa nĩchini Jesucristoõnoa ato yoinõ. ⁹ Cristo fistichi yorafo shinãmatiro ãto õiti xafakĩakõi inõfo. “Mã oi,” ixõ Juan ato yoini. ¹⁰ Oaito yorafãfe tâpinifoma. Niospa Jesúsxõ ato onifafiano tsõa tâpinima Jesús. ¹¹ Nã mã onifani ano nokoni. Nãno nokofiaito ãfe yorafãfe, nãfãfe ifikaspanifo. ¹² Askafafiaifono a ifpaiyaiãfe Jesús ato yoini iskafakĩ: “Mã ea noikĩ chanĩmara faa. Nãskakẽ ãfe Epa Niospa fakefo mã itiro ea chanĩmara faax,” ixõ Jesús ato yoini. ¹³ Niospa fakefo yorafãfe fakefo keskarama. Yorafãfe fakefo yora keskara, yõramãi ato fake faano. Akka Nios fistichi ato fake fatiro. Yõrakai Niospa fakefo fake fatiroma. Nã Jesús chanĩmara faafo tii Epa Niospa ãto shinã ato fetsafaxotiro ãfe fakefo inõfo.

¹⁴ Nãskakẽ na Meka aneya Apa Nios ika anoax mai ano oni yorakõi ixikĩ. Nonoax nofe iyopaoni. Apa Nios keskara sharakõi mã nõ õipaoni. Nãato yorafo noikõimis. ãfe meka chanĩmakõi. Nã fisti Epa Niospa Fakekõi. Apa Nios imis keskara nãskakõiriaia sharakõi imiski.

Juan Maotista Jesucristoõnoa ato yoini

¹⁵ Jesúsnoa Juan ato yoini iskafakĩ: “Ea nikakãfe, õikapo. Nãõnoa ã mato yoimis. Iskafakĩ ã mato yoimis: ‘Mã oi. Ë taeyoi ofiano ea finõkõia ã fakeamano amãi Apa Nios fe iyopaonixakĩ,’” ixõ Juan ato yoini.

¹⁶ Jesús keyokõi noko shara famiski. Noko noikõixõ noko sharafa fafafãini. Akka keyokõichi nõko õiti inimsharakõiaito nõ meemis. ¹⁷ Epa Niospa noko amapaiyai keskara Moisés yoini. Nãskakẽ Niospa noko yoini keskara Moisés noko tâpimani. Nãskakẽ Niospa noko õimapai noko noikõi afi chanĩmakĩ. Nãskaxõ Jesucristo nokoki nĩchini. Jesucristo noko keyokõi noimis. Nãskaxõ noko õimatiro Nios chanĩmakõi. Askatari Epa Niospa noko noi. ¹⁸ Tsõakai Epa Nios õimisma. Askafiax ãfe Fakekõi nã afe rafemis, arifi Nioskõi. Apa Niosnoa noko yoimis. Aõxõ nõ tâpitiro afe keskaramãki Epa Nios.

Juan Maotista judeofāfe āto xanīfofo yoini
(Mt. 3.11-12; Mr. 1.7-8; Lc. 3.15-17)

¹⁹ Nā judeofāfe āto xanīfofāfe Jerusalén anoxō nā ato Nios kīfixomisfo nīchinifo, Juan ano. Akka nā Levifori ato nīchinifo Juan yōkatanōfo: “¿Mī tsoamē?” fatanōfo.

²⁰ Askafafifono Juan ato kemani: “Ēkai Cristoma. A nō manai nōko xanīfo ēkai aama,” ato faito, ²¹ “¿Akka mī Cristoma, mī tsoamē? ¿Mīmē Elías?” faifāfe, “Ēkai Elíasma,” ato faito, “¿Akka mī Elíasmaax mī tsoamē? ¿Mīmē nā nō manamis Niospa meka yois, nā nokoki oai?” faifāfe, “Maa, ēma,” ato fani.

²² Ato askafaino anā yōkanifo: “¿Akka mī tsoamē? Noko yoife a noko nīchiafo nō ato yoitānō. Mī tsoamāki noko tāpimafe,” fanifo.

²³ Askafafifono Isaías kirika keni keni keskara nānorikōi Juan ato yoini iskafakī: “Niospa mato yoipaiyai keskara ē mato yoinō. Tsōa istoma anoxō ē fāsikōi mekaikai: ‘Nōko Ifo nokoki oxii. Īkisi itipinīsharakāfe. Mā ipaoni keskara afianā iyamakāfe. Keyokōichi mātō chaka potakāfe, mēstekōishara isharaxikakī,’ ixō Juan ato yoini.

²⁴⁻²⁵ Nikakata judeofāfe nā farisefo a Juanki nīchinifo yōkatanōfo iskafakakī: “Mī Cristomamamāki, mī Eliasmamamāki nā nō manamis Niospa meka yois mīmaraka, akka, ¿afeskakī mī yorafo faka mēra ikimapakeimē maotifakī?” ixō yōkakāfe ato fanifo. ²⁶ Juan ato kemani: “Ēfi ato maotifapapai. Ē ato askafafaino nono fetsa nokoki nokoi. Mākai tāpiama.

²⁷ Ē iskaratīa mato Niospa meka yoifafāini. Askafiano aato chipo mato yoixii. Fāsi ea finōkōia. Ē afaa tāpiama ē sharakeroko ē āfe zapato risfi nexaxopanā,” ixō Juan ato yoini.

²⁸ Nā pexe rasi Betania faka Jordán okirishtaxō Juan ato faka mēra ikimapakeki maotifaini. Nānoax ato fe yoināni.

Niospa āfe oveja fake keskara, Jesús

²⁹ Askata pena fetsa Juanki Jesús kani. Jesús fichixō Juan yorafo yoini iskafakī: “Ōikapo. Nā Niospa āfe oveja tetomashta keskara oa. Nato keyokōi yorafo chaka soaxonō Epa Niospa nīchia nokoōnoax naxō nōko chaka noko soaxonō. ³⁰ Ē mato aōnoa yois. Ē mato yoia iskafakī: ‘Chipo oi ea keskarama finōkōia, nāmāi ē fakeamano iyopaonixakī.’ Nakīa mā oa. ³¹ Ērifi Cristo tāpixoma yorafo maotifapai a nōko kaifo judeofāfe tāpinōfora,” ixō Juan ato yoini Cristoōnoa yoiki.

³² Ato yoixō anā Jesúsnoa Juan ato yoini: “Niospa Yōshi Shara nai mēranoax rifi keskara Jesúski fotopakekafanaito ē ōia. ³³ Ēri ōiyamano Epa Niospa ea yoiti iskafakī: ‘Fatofāfe ea chanīmara faimākai mī faka mēra ato ikimapaketiro maotifakī. Akka mikiki fetsa nokoano ēfe Yōshi Shara nā feronāfakēki fotopakekafāxii. Afe nītaxii. Nā mī ōikī mī tāpixii nāato ēfe Yōshi Shara matoya rafemaxii āfe shinā shara mātō shinā mēra nanenō,’ ixō ea yoia. Epa Niospa ea anori yoiyamakē Jesús nā Niospa Fake ēri tāpikeranama. ³⁴ Askafixō mē ōia. Askaxō ē mato chanīmakōi yoi nafi Niospa Fakeki,” ixō Juan ato yoini.

Jesúsxō tāpikī taefanifo

³⁵ Pena fetsa nāno Juan aōxō tāpimisfo rafe ini. ³⁶ Afe niafono Jesús ato finōfaini. Ato finōfainaito Juan ato yoini: “Ōikapo. Oa Niospa ina oveja fake keskara,” ixō Juan ato yoini.

³⁷ Juan ato yoiaito nikakata Jesús chīfāfāinifo. ³⁸ Jesús ifiākekafā ato ōikī ato yōkani: “¿Tsoa mā fenaimē?” ato faito, “Maestro, ¿fanī mī ikamē?” faifāfe,

39 “Ono ðifokāfe, ē mato ispanō,” ixō ato iyoni. Askata afe fokakī ðiafo nā ika ano afe nokoni. Mā nokoaiyono mā xini kai ini. Nāno afe yātapakenifo.

40 Nā rafe Juan ato yoia keskara nikakata Jesús chīfafainifo. Fetsa āfe ane Andrés. Nā Andrés Simón Pedro āfe exto ini. 41 Jesús ika ano nokokata Andrés āfe ochi Simón fenaikai kani. Akiki nokoxō yoini: “A Niospa nokoki nīchia Mesías mā nō fichia. Nā Cristora nō famis. Ōiyotāfe,” fani. 42 Askata Andrés Simón Jesúski nokokini. Akiki nokoaino Jesús Simón yoini: “Mī Simón, Jonáspa fake. Iskaratīa ē mia ane fetsafaxonō. Nō mia Cefas fanō,” fani. (Cefas nāfa mekapa yoimis Pedro fakī.)

Jesús Felipe yafi Natanael kenani afe fonōfo

43 “Ē Galilea ano kaira,” ixō Jesús shināni. Kapaikī Felipe fichixō yoini: “Efe kafe, eōxō tāpisharakōixikī,” fani. Askafaino afe kani. 44 Felipeñō Andrésñō Pedronō pexe rasi āfe ane Betsaida ano imisfo.

45 Askata Felipe Natanael fichixō yoini: “Moisés Niospa yoini keskara kenekī iskafani: ‘Ē mātō xanīfokōi Cristo matoki nīchixira,’ ixō Niospa yoini anori Moisés keneni. Nānorikōi Niospa meka yoimisfāfe kenenifo. Nākai mā nō fichia. Jesús José fake Nazarete ano ika. Nāðnoa Moisés feta Niospa meka yoimis fetsafāfe kenenifo,” faito, 46 “¿Afaa shara Nazarete anoax oimē?” ixō yōkaito, “Ofe, ðixikī,” Felipe fani.

47 Natanael akiki nokoaino Jesús ðixō aðnoa yoini: “Nafi israelifāfe fakeki. Nato afaa chaka yoimisma. Chanīmakōi fisti shināfafāimiskī. Tsoakai pāramisma,” ixō Jesús aðnoa yoini.

48 Askafaito nikakī Natanael kemani: “¿Afeskað mī ea ðiyamafikatsaxakī mī ea tāpiamē?” faito, “Mia Felipe fichiyoamano ē mia ðikī taefaita ifi higuera nāmānoa ē mia ðita,” Jesús fani. (Akka Jesús Natanael chai ixō tāpini ðiyamafikī.)

49 Askafaito, “Maestro, mīfi Niospa fakeki. Askatari mīfi israelifāfe āto xanīfokī,” faito, 50 Jesús kemani: “ ‘Mī ifi higuera nāmā tsaóa ē mia ðia,’ ixō ē mia yoia, ¿nā nikaxō mī ea chanīmara faamē? Afara shara fetsa finakōia mī ðixii. 51 Chanīmakōi ē mia yoi. Ēfi yōra fakefiāx ē Niospa Fakekōi. Nai fepekemeano mī Niospa ājirifo ðixii. Epa Niospa ika anoax āfe ājiri ekeki fotota, māpeinīfofā fotota, māpeinīfofā ikaito mī ðixii,” ixō Jesús fani.

2

Jesús āfe mekapa fakakōifekē fimi ene onifani

1-2 Tres nia oxakata Caná pexe rasi anoxō Galilea mai anoxō feronāfāke kēro fiaino yorafo ano fisti ichanānifo. Jesús ikaino afa ikaino Jesúsxō tāpimisfori nāfo ato kenamanafono fenifo. 3 Fimi ene mā netsoafono, āfa Jesús yoini iskafakī: “Nafokai fimi eneyama,” fani. 4 Āfa askafaito Jesús kemani: “Efa, ¿afeskakī mī ea yōkaimē afara fetsa afeskarafanōra ixō? Iskaratīa ē afara fetsa fena ayoima. Tsōa atiroma keskara ē fena akimakai,” fani. 5 Askafaito Jesús āfe āfa a yonoxomisfo ato yoikī iskafani: “Nā Jesús mato yoiai keskara faxokāfe,” ato fani.

6 Nāno tokiri kesho seis efapafō chaimashta tsaóa ini. Treinta galon a mēra ikitiro ini. Nāskata nā kesho mēra faka fikaxō, judeofāfe āto chokati mēraxō chokaketsanifo. Nāskakī judeofāfe chokasharaiifāfe Niospa ato ði nāfo sharara ato fanō, āto xinifo ipaonifo keskara.

⁷ Nāskata Jesús a yonoxomisfo yoini: “Nā keshofo mēra faka fospifikāfe,” ato faito, faka fospikōi fanifo keshofo mēra. ⁸ Askata Jesús ato yoini: “A ichanāifono ato kexemis na faka ayamatakāfe,” ato faino, nāskata a ato kexemis faka foxonifo. ⁹ A ato kexemisto ayaxō mea faka inima fimi enekōi ini. Nāskakē tāpinima Jesús faka fetsafaano. (Akka nā yonoxomisfāfe ōinifo Jesús faka fetsafaito. Nāskakē tāpinifo.) Nāskakē tāpixoma a ato kexemisto a Jesús faka fetsafaa a rama kēro fiai foxoni. ¹⁰ Nāskaxō yoini: “Fistatīa nā fimi ene sharakōi taefakī nō ato ayamamis. Akka nā fimi ene sharakōi mā mitoxō, nā fimi ene sharama chipo nō ato ayamamis. Akka iskaratīa fimi ene sharakapakōi mī ato ayamani,” fani.

¹¹ Jesús nā pexe rasi Caná anoxō tsōa atiroma keskara taefaito ōinifo Jesúsmāi finakōixō tsōa afama mīshti atiroma keskara atiro. Nāskakē ōikaxō aōxō tāpimisfāfe chanīmara fanifo.

¹² Askata Jesús afanō āfe extofonō aōxō tāpimisfonō nā pexe rasi āfe ane Capernaúm ano fonifo. Nāno oxa ranāyonifo.

Jesús a Nios kīfiti pexefā mēraxō a ato ināifo ato potani
(Mt. 21.12-13; Mr. 11.15-18; Lc. 19.45-46)

¹³ Mā judeofāfe āto fista Pascua mā chaima ikaino Jesús nā pexe rasi Jerusalén ano kani. ¹⁴ Nānoxō Nios kīfiti pexefā mēraxō fakkafo, ovejafo, rififo afo ato minikaxō kori finifo. Nānori a kori kāmiafamisfori tsaoafono Jesús ato fichini. ¹⁵ Jesús ato fichita risfi koshati fata ato koshapaita a ato inafo ato pōtaketsani. Ovejafo potakī, fakkafo potakī fani. Askata yorāfori potani. Mīsa kamakī āto kori māchiafo saakī fetsani. Mīsari kekafaya kekēfofā potani. ¹⁶ Nā rififāfe āto ifofo ato yoini: “Na māto inafoya ēfe Epa Niospa pexe mēranoax fotakāfe. ¿Afeskakī ēfe Ēpa pexe mēraxō mā afarafo ato miniket-saimē kori fixikī? Afianā ēfe Ēpa pexe mēranoax afarafo inānōnāyamakāfe kori fixikī. Na ēfe Epa āfe pexe mēranoaxkai mā afarafo minimitsaima,” ixō Jesús ato yoini.

¹⁷ Ato askafaito nikakata aōxō tāpimisfāfe shinānifo iskakakī: “Chanīma, Niospa meka nānorikōi Jesúsnoa kenenifo iskafakakī: ‘Epa Niosi, ē mī pexe kexesharapai a mēraxō mia fisti shinānōfo. Afara fetsa a mēraxō anōfoma. Afara fetsakai mī pexe mēranoa ē ōipaima,’ ixō kenenifo Jesúsnoa yoikī.”

¹⁸ Jesús askafaito judeofāfe āto xanīfofāfe yōkanifo: “¿Afeskakī Nios kīfiti pexefā mēraxō mī ato potaimē? Niospa mia yoiaito afara tsōa atiroma keskara noko ōimafe nō mia chanīmara fanō,” ixō yōkaifāfe ¹⁹ Jesús ato yoini: “Mā na pexe pāoikano afianā tres nia oxata ē anā pexe faxii,” ixō Jesús ato yoini.

²⁰ Ato askafaino, “Kee. Nōko xinifāfe cuarenta y seis xinia anifo Nios kīfiti pexefā fakakī. Akka, ¿mī koshikōi tres nia pexe faimē?” fanifo. ²¹ Askafafiakakī tsōa tāpinifoma Jesús Niospa pexeōnoa yoinima. Aafi anofi yoimeni. ²² Askata Jesús nafiax oxa rafeta tres nia ita otoano aōxō tāpimisfāfe shinānifo: “Chanīma, a Jesús ato yoita keskara, nā pexefā pāoikaikiri keparanākī, ‘Ēfi tres nia ototii,’ ixō yoita. Iskaratīa mā nō tāpia aafi anofi yoimeita,” ixō aōxō tāpimisfāfe shinānifo Jesús otoano. Nāskakē Niospa meka kenenifo keskara chanīmara fanifo. Nāskata nā Jesús ato yoini keskara shinākakī: “Chanīmakōi Jesús noko yoini,” fanifo.

Jesús keyokōi yorafo tāpini

²³ Askata tsōa atiroma keskara afama mīshti Jesús fani Jerusalén anoxō fista Pascuatīa. Nāskara ōikaxō yorafā rasichi, “Na Cristo,” ixō chanīmara fanifo. ²⁴ Askafiaifono a yorafāfe āto shinā mēraxō shināifo keskara Jesús ato tāpini. (“Iskaratīa ea chanīmara fakani. Askafikaxō chipo, āa chanīra, ea fakani,” ixō Jesús ato tāpini.) ²⁵ Yorafāfe āto shinā mēraxō shināifo keskara tsōa Jesús tāpimatiroma. Areskōi Jesús onātiro a āto shinā mēraxō shināifo Jesús tāpikōia. Chanīmara fayoaifāfe Jesús ato onāni nāskax koshi shināmaki fetsenifo.

3

Jesús Nicodemo tāpimani

¹ Nā feronāfake fariseo ini, āfe ane Nicodemo. Nāri judeofāfe āto xanīfo ini. ² Nāato fakishi oxō Jesús yōkani: “Maestro, nō tāpia mī noko tāpimanō mia Niospa nīchini. Mā nō tāpia Nios fe rafexoma tsōa afara fetsa atiroma nā mī akai keskara fakī tsōa atiroma,” faito, ³ Jesús kemani: “Ēfi chanīmakōi mia yoikai. Tsoari oa fake yome rama kāia keskaraxma Nios xanīfo ano nokotiroma,” fani.

⁴ Askafaito afianā Nicodemo Jesús kemani: “¿Afeskax afianā feronāfake yometatiromē? ¿Mā anifofiax afeskai afianā āfa xaki mēra nanetiromē, fake yomeax anā kāixikī?” ixō Nicodemo Jesús yōkani.

⁵ Askafaito afianā Jesús kemani: “Fake yome rama kāi fakaya kāitiro. (Nāskax yōra fake itiro. Nāskariakī āfe Yōshi Sharaōxō Niospa mato ōiti fetsafaano mā āfe fake itiro.) Akka Niospa Yōshi Sharapa mātō ōiti fetsafayamano mā Nios xanīfo ano nokotiroma. ⁶ A yōra fake fia nā keskara itiro. Nāskarifiakī Niospa Yōshi Sharapa mato fake fiano māri a keskara itiro. ⁷ Ē mia yoiano mī ea nikax, ‘Mīri oa fake yome rama kāia keskara mī itiro,’ ē mia yoiano, ‘Aira, ¿afeskax nō afianā yometatiromē?’ iyamafe. ⁸ Nefeaito tsōa tāpitiroma fakirinoax oimākai. A nefe kai ariri tsōa tāpiama fakiri nefe kaimākai. Nāskari fakī Niospa yorafo āfe Yōshi Sharapa āto shinā fetsafaano tsōa tāpitiroma,” Jesús faito, ⁹ anā Nicodemo kemani: “¿Afeskax nō askatiromē?” ixō fani.

¹⁰ Askafaito afianā Jesús kemani: “Mī israelifo tāpimamis, ¿afeskakī na ē mia yoiai mī tāpiamamē? ¹¹ Ē mia chanīmakōi yoi. Nā nō nikafo nā nō ōiafo nāfo nō mato yoi. Nāskafekē nō mato yoiano mā noko chanīmara faima. ¹² Nono mai anoafo afarafo afeskaraito ē mia yoiaito mī ea chanīmara faima. Askatari nai mēranoafori afeskaraito ē mia yoiaito mī ea chanīmara faima.

¹³ “Tsoakai nai mēra kaax anā fototiroma. Akka ē fisti ē nai mēranoax fotoa yora fakekōi ikiyoi. Ē afianā chipo kaxii. ¹⁴⁻¹⁵ (Nōko kaifo israelifo tsōa istomanoax chaka iyopaonifo. Nāskakē Niospa rono atoki nīchini ato chachinō. Nāskaxō Niospa Moisés yoini iskafakī: ‘Na rofetaxō rono faxō nīchinīfōfāfe ifiki ratāfe yorafāfe ōikanax sharanōfo, a ato chachia tii.’) Nāskari fakī ifi cruz ikakī ea mastakaxō ea nīchinīfōfāxikani. Nāskakē nā ea chanīmara faafo tii eōnoax Nios fe nīpanakafo,” ixō Jesús ato yoini.

Epa Niospa keyokōi yorafo noi

¹⁶ Anā Jesús ato yoini iskafakī: “Epa Niospa keyokōi yorafo noikī āfe Fake fisti ato nīchixonī nai mēraxō nono mai anoax atoōnoax naiyonō. Nāskakē nā chanīmara faafo tii omiskōipakenakafoma afe nīpanakafo. ¹⁷ Niospa āfe

Fakekōi mai ano nīchini ato omiskōimatama āto chaka soaxoniyonō aōnoax isharapakexanōfo,” ixō Jesús ato yoini.

¹⁸ Askata anā Jesús ato yoini iskafakī: “Nā Niospa Fake chanīmara faifokai omiskōipakenakafoma. Akka nā nikakaspai fo ato Niospa omiskōimaxii. Niospa Fake nikakaspakanax omiskōipakenakafo. ¹⁹ Pena fe fakish osinātiroma. Nāskarifiāi afara chaka fe Niospa fake rafetiroma. Nāskakē Niospa āfe fake nāmā nīchini nā yorafo pena keskara shara inōfo āto chaka xatekanax. Akka yorafāfe āto chaka potakaspakani. Niospa āfe fakeki fekaspakani. Nāskax isharakaspakani, chaka fisti shinākani. Niospa fake ōikaspakani āto chaka xateax isharaxikakima. Nāskakē Niospa ato omiskōimani. ²⁰ Afara chaka fichipaiyaito Niospa Fake ōikaspai. Nā chakafaifo fisti fichipaikani. ²¹ Nā shara nipaiyairo Niospa Fakeki fekani. Ato ōimasharaxikakī Niospa ato imasharanō,” ixō Jesús ato yoini.

Jesús Judea mai ari kani

²² Nāskata Jesús fe aōxō tāpimisfo Judea mai ari fonifo. Nāno ato fe iyoni. Nānoxō āto chaka potapaiyāifāfe ato maotisafapani. ²³⁻²⁴ Juan karaxa mēra ikimayofafomano nāatori yorafo maotisafapani. Nā Enōn nā Salim chaimashta nika ini. Nāno faka noa ini. Nāskata nānoxō ato maotisafapani. Nāno yorafo akiki feaifāfe ato maotisafapani.

Juan Maotista Jesúsnoa anā ato yoini

²⁵ Nāskata Juan aōxō tāpimisfo āto kaifo judeo fetsafo fe feratenānifo. Afesxaxō mā chaka soatiromē ikanax feratenānifo. ²⁶ Nāskaxō Juan ano fōkaxō Juan yoinifo: “Maestro, nō mia yoipai. Faka Jordān okixori mī Jesús fichita. Fichixō mī noko yoita: ‘Nā Cristo Niospa noko nīchixona nā nō manamis,’ mī noko feita. Nāatori iskaratīa yorafo maotisafapai. Oa yorafo keyokōi akiki fokani,” fanifo. ²⁷ Askafaifono nikakī Juan ato kemani iskafakī: “Nios fistichi yonomatiro a yonoxonō. Akka Niospa axoyamaino afaa afeska fatiroma. ²⁸ Akka ēkai Cristoma. Epa Niospa ea yoia ē Cristoōnoa yorafo tāpimanō āto chaka xatenōfo, Cristo nokoaito chanīmara fanōfo. Nānori ē mato yoiaito mā nikamis. ²⁹ Afianā ē mato yoinō ea nikapo. Mā mā tāpia feronāfake āfe yama yoikī iskafatiro: ‘Aicho. Na kēro mī ea yoixona iskaratīa ēfe āfi iki,’ ixō yoiaino āfe yamari aōnoax inimatiro. Nāskarifiāi ē Cristoyamafīax fetsafāfe nā Cristo Jesús chanīmara faifono ēri fāsi akiki inimakōi. ³⁰ Akka nā Cristo finakōia. Ēkai Cristoma. Ē afaa tāpiama, Cristo finakōia. Akka ē afianā afaa yoitiroma ea tanatamaroko, Cristo fisti nikakōinōfo,” ixō Juan ato yoini.

Jesús nai mēranoax fotoni

³¹ Anā Jesús ato yoini iskafakī: “A nai mēranoax nāmā fotoato nāto nāmānoafo ato finōa. Akka nā nāmānoax fakeafāfe nāmānoa fisti yoitirofo. Akka nā nai mēranoax fotoato nāatofi keyokōi finōa. ³² Nāto noko yoitiro a ōiafo, a nikaforti. Nāskakē fisti rasichi chanīmara fakani. ³³ Niospa meka chanīmara fakī nōko ōiti mēraxō nō tāpisharakōitiro Niospa noko pāramisma, āfe meka chanīmakōi.

³⁴ “A Niospa nīchiato Niospa meka yoi Niospa āfe Yōshi Shara a mēra naneano. Nāskaxō tāpikōia. ³⁵ Epa Niospa āfe Fake noikī nīchini nai mēra ikafāfe āto Ifo inō, nāmānoafāferi āto Ifo inō. ³⁶ Nāskakē Niospa Fake chanīmara faax nō afe nipaxatiro. Akka tsōa chanīmara fayamakē Niospa ato

omiskõimapakenaka. Akka Jesús nikayamakanax nakanax afe nīpanakafoma fakishifā mēranoax omiskõipakenakafo.”

4

Jesús kēro samāritanōki nokoni

¹⁻³ Fariseofāfe nikanifo Juan yorafo maotisafapaito. Akka yora ichapa Jesús maotisafapaito fariseofāfe nikanifo. Akka Jesúsakai ato maotisafapanima, nā aōxō tāpimisfāfe ato maotisafapanifo. Aōnoa yoinifo keskai mā Jesús tāpiax aōxō tāpimisfo fe Judea anoax Galilea ano kani. ⁴ Judea mai anoax Galilea ano kakī Jesús Samāria finōfaini.

⁵ Askata Samāria ano Jesús nokoni. Nāno nā pexe rasi āfe ane Sicar ano nokoni. Nāno chaimashta Jacobo āfe tare ipaoni. Nā tare āfe fake José ināni māmāi anifoxō. ⁶ Nānori Jacobo kini fani nā kini mēranoa faka fixikī. Nā faka fiti ano xini keya Jesús nokoni. Chai inoaxmāi oax xokenāi Jesús nāno tsaoni. ⁷⁻⁸ Jesús teneyoaino, a aōxō tāpimisfāfe a piaifo pexe rasi ano fiifokani fonifo. Mā foafono nāno kēro samāritanō akiki nokoni faka fiyoi. Faka fiti ketokonō Jesús tsaono akiki nokoni. Nāskaxō Jesús a kēro yoini: “Ea faka fexōfe ē ayanō,” fani.

⁹ Judeofo fe samāritanōfo ōikaspa faatanāmisfo. Ato fetakai pimisfoma. Nāskakē nā kēromā Jesús yoini: “Mīfi judeoki. Ēfi samāritanōki. ¿afeskakī mī, ‘Ea faka fexōfe, mī ea faimē?’” faito, ¹⁰ Jesús kemani: “Niospa mia ināpaiyai mī tāpiama mī eari tāpiama. Akka mī ea yōkaito ē mia faka shara inākerana. Nā faka sharapa yorafo nimasharatiro,” Jesús fani. ¹¹ Nāskafaito kēromā Jesús kemani: “Mī keshoyata mī risfi yama. Kini chaikōi, ¿afeskafaxō mī faka kini mēranoa fiimē a noko nimasharatiro a mī ea yoiai keskara?” kēromā fani.

¹² Nāskata anā kēromā yoini: “Nōko xini Jacobo kini faxō faka fixō ayapaoni. Āfe fakefāferi ayapaonifo. Āto inaforti ayamapaonifo. Nōri nā faka ayai. ¿Mī nōko xini Jacobo finōamē?” kēromā fani.

¹³ Askafaito Jesús kemani iskakakī: “Na faka kini mēranoa ayax chipo afianā mā nōamā iki. ¹⁴ Nāskafixō na faka ē ato ayamani anā nōamākiyamanōfo. Chanīmakōi, nā faka ayakanax isharapakexanōfo,” fani.

¹⁵ Askafaito kēromā kemani: “Mī feronāfake shara. Na faka shara ea ināfe ē ayax anā ē nōamākiyamanō ē afianā nonoa faka fiyamanō,” fani. (Jesús fakakiri keparanākī yoiaito nā kēromā tāpinima.)

¹⁶ Nāskaxō Jesús yoini: “Mī fene ifitāfe afianā nētekaini kaxō mī fene ifitāfe afe oxikī,” faito, ¹⁷ “Ēkai feneyama,” faito, “Mī chanīmakōi yoi. Mīkai feneyama,” Jesús fani. ¹⁸ “Mī fene cincoya mia fimisfo mī fenefo. Akka iskaratīa mī fetsa fe ika a mī fenema fe. Ea mīa yoikōi mī feneyama,” ixō Jesús yoiaino, ¹⁹ “Ē iskaratīa ē mia tāpia mī Niospa meka ato yoimis. ²⁰ Nōko xinifāfe na machi anoxō Nios kīfipaonifo. Akka mī kaifo judeofāfe yoimisfo iskakakī: ‘Jerusalén anoxō nō Nios kīfitiro,’ ixō yoimisfo,” faito, ²¹ “Ē mia yoinō, ea chanīmara fafe. Na machi fisti anoxos nō Nios kīfitiroma. Jerusalén fisti anoxori nō Nios kīfitiroma. Akka fanīma mīshtixō nō Nios kīfitiro. ²² Māfi samāritanōfoki. Nios kīfikikī nōko Epa Nios mā tāpisharama. Akka nōfi judeofoki. Nō nōko Epa Nios tāpikōia. Niospa noko tāpimani afeskaxō yorafāfe āto chaka soatirofomāki Epa Nios fe ipaxakakī. ²³ Chipo afetiara nō Nios kīfikōikē, āfe Yōshi Shara fistichi noko tāpimatiro nō kīfisharanō. Āfe Yōshi Sharaōxō nō Epa Nios kīfikōiaito nāskara Niospa fichipai. ²⁴ Nios

yorama. Niosfi fero mēsho keskara sharaki. Nāskakē āfe Yōshi Sharaōxō nō Nios kīfitiro,” Jesús fani.

²⁵ Askafaito kēromā kemani: “Mē tāpia a Niospa nīchia chipo nokoki nokoxii. Nā āfe ane Cristo. Nāato afama mīshti noko tāpimaxii,” faito, ²⁶ “Ēfi Cristoki, ē mefe mekai,” ixō Jesús yoini.

²⁷ Askata Jesús kēro fe mekaino aōxō tāpimisfo fenifo. Fēkaxō ōiafo Jesús a kēro samāritanō fe mekaito ōikani ratenifo. Nāskax yoinānifo: “ ‘¿Afeskai mī na kēro fe mekaimē?’ nō Jesús faima,” fanifo. Nāskata shinānifo: “Nā kēro samāritanō mī yoia keskarari nokori yoife, nōkai faima,” inifo.

²⁸⁻²⁹ Askata nā kēromā āfe kesho potafaini āfe pexe rasi ano kakī. Āfe pexe ano kaxō āfe yorafo yoini: “Oa feronāfake ekeki nokoxō ea yoia. Nā ē afama mīshti ē chakafamis mā ea kāimaxōa. Nāraka Cristo, ōifokāfe,” ixō ato iyoni.

³⁰ Nikakata nā pexe rasi anoax Jesúski fenifo.

³¹ Mā kēro kaano aōxō tāpimisfāfe Jesús yoinifo: “Maestro, piyofe,” faifono, ³² “Ē aya a ē piāi. Nā ē piāi mā tāpiama,” ato fani. ³³ Ato askafaito nikakani yoinānifo: “Kee. ¿Tsōa a piāi ināfanamē?” ikanax yoinānifo.

³⁴ Askata Jesús ato yoini: “Ēfe Epa Niospa ea nīchini ē āfe yono shara yonoxonō. Nāato ea amapaiyai keskara ē apai. Nā ē piāi keskara,” Jesús ato fani. (“Mā nō piāx nō anā fonāikima, nō shara iki. Nāskarifiāi Niospa noko amapaiyai keskara nō iki nōko ōiti sharakōi iki. Nāskara noko amapaiyai nō aki, a nō piāi keskara,” ato fani.)

³⁵ Anā Jesús ato yoini: “Māfi iskamiski: ‘Mā nōko tarepanoax mā nōko xiki choshiaki. Mā cuatro oxe akaki nō finō,’ mā imis. ¿Nāskarifiāki mā shināimē: ‘Nō Jesúsnoa yorafo Niospa meka yoiano chipo chanīmara faxikani,’ ixō mā shināimē? Akka ē mato yoi: ‘Ōikapo, mā iskaratīa itipinīsharakōiafo Nios Ifofaxikakī,’ ato fani. ³⁶ Akka fētsa āfe yama āfe tare kexexotiro, āfe xiki top-ixoxiki. Chipo kopifaxinō, tare ifāfe. Nāskarifiāki fētsa taefakī yorafo Niospa meka yoitiro. Ato yoifaino chanīmara fayokanima. Askatari chipo fetsa oxō ato yoiaito chanīmara fakani. Nā rafe Niospa ato shara imapakenaka nā rafetamāi Niospa meka ato yoimifono. ³⁷ Nāskakē chanīkima mā yoimis iskakī: ‘Fētsa xiki fanano chipo fētsa nā xiki fimi fitiro.’ Nāskarifiāki fētsa Niospa meka yoikī taefaano fētsari chipo rama oxō nāatori ato chanīmara famatiro. ³⁸ Akka mā taefakī ato yoimisma iskaratīa ē mato nīchia mā ato chanīmara famanō. Taefakī fetsafāfe Niospa meka ato tāpimani, mā ato tāpimayoamano. Mā ato tāpimayoxoma koshikōi mā ato chanīmara famatiro māmāi taefakī ato yoiyomisfono,” ixō Jesús ato yoini.

³⁹ Nāskata Jesús aōxō tāpimisfo yoiaino nā kēro samāritanō āfe kaifo yoikai kani pexe rasi ano. Kaxō ato yoini: “Oa feronāfake mā ea tāpixō ea yoia nā ē afara amis keskara. Ea ōiyamafikatsaxakī mā ea tāpia,” ato fani. Ato askafaino Jesús fisti rasichi chanīmara fanifo.

⁴⁰ Askata nā kēro nikakanax Jesúski fonifo āfe meka nikakani. Akiki nokoxō yoinifo: “Nofe nono iyofe,” fanifo. Askafaifono nikata Jesús ato fe oxa rafeyoni. ⁴¹ Āfe meka nikakaxō yora ichapato chanīmara fanifo. ⁴² Askata chanīmara fakaxō yorafāfe nā kēro yoinifo: “Mī Jesúsnoa noko yoia fisti nō chanīmara faima. Nōakōi mā nō āfe meka nikakōia. Nāskakē iskaratīa nō chanīmara fai. Nāato na yorafo ikafo tii ato ifitiro afe İpaxanōfo.”

⁴³ Askata mā oxa rafeta Jesús nā samāritanōfo anoax Galilea ano kani.
⁴⁴ Jesús Galilea anoax yosini, nānoxori yonopaoni. Afe yorafo nāno inifo. Askata Jesús ato yoini iskafakī: “A afe pexkonifāfe a ato Nios yoixomis yoikakī iskafatirofo: ‘Akai tsoama, afi nofe pexkoniki,’ fatirofo,” ixō ato Jesús yoini.

⁴⁵ Askata Jesús Galilea ano nokoni. Jerusalén anoax Galilea ano Jesús nokoamano yorafo Galilea anoax Jerusalén ano fonifo fista aki fokani. Nānoxō tsōa atiroma keskara Jesús Niosxō ani. Nā afama mīshti Jesús anoxō akaito ōinifo. Nāskakē Galilea ano Jesús atoki nokoano akiki inimanifo: “Aicho, mā mī oakī,” Galilea anoxō fanifo.

Jesús xanīfāfe fake sharafani

⁴⁶ Askata nā pexe rasi āfe ane Caná ano Jesús nokoni nā Galilea mai ano. A āfe mekapa faka fetsafani ano fimi ene keskara fakī nāno Jesús nokoni. Nānoa xanīfo fētsa Jesús ōiyoi oni. Nā pexe rasi āfe ane Capernaúm anoax oni. Nānoax xanīfāfe fake isinī ini.

⁴⁷ Askata xanīfāfe nikani Jesús Judea anoax oano Caná ano nā Galilea mai ano. Nikata akiki oxō yoini: “Xanīfo, ēfe fake isinī iki nai kiki. Ēfe fakeshta ea ōixoni ope ēfe fake ea sharafaxoxikī,” ixō iyopaini. ⁴⁸ “¡Ooa! Tsōa atiroma keskara ē fayamakē mā ea chanīmara fakeranama,” ixō Jesús ato yoini. ⁴⁹ Afianā nā xanīfāfe Jesús yoini: “Xanīfo, efe kayoikape ēfe fake nayamanō,” ixō iyopaini. ⁵⁰ Askafaito Jesús kemani: “Mī fake namakī. Katāfe. Iskaratīa mī fake niaki,” Jesús fani.

Jesús askafaito nikafaini kani. ⁵¹ Mā nokoi kaino āfe inafa akiki nokokaxō yoinifo: “Mī fake mā shara, anā isinī ikima,” fanifo. ⁵² Askafaiāfe ato yōkani: “¿Fanī xini rakano ēfe fake sharamē?” ixō ato yōkaito, “Xini keya mī fake āfe yona matsita,” fanifo. ⁵³ Yoiaifāfe nikata āpa shināni: “Chanīma, Jesús ea yoita xini keya, ‘Mā mī fake sharaki katāfe,’ ea Jesús feita,” ixō xanīfāfe shināni. Nāskata na xanīfonō āfinō afe yorafoyaxō Jesús chanīmara fanifo.

⁵⁴ Nāskata Jesús Judea anoax Galilea ano nokoxō afianā tsōa atiroma keskara fakī ato ōimani. Ato ōimakī rafe fani.

5

Jesús feronāfake isinī imis Betesda anoxō sharafani

¹ Askata Jesús Galilea anoax Jerusalén ano kani āfe kaifo judeofo feta fista akikai. ² Nāno Jerusalén ano ovejāfāfe āto kāiti ano ĩa ini. Judeofāfe yoimisfo a ĩamā āfe ane Betesda. Nā ĩa kesemē pexe kafāshara mīshti tsaofafāina ini, cinco pexe. ³⁻⁴ Nāno yora isinī imisfo ichapa rasi inifo nāno rakafafāinafo. Fēxofo, chātofo, sifitianifo nāfo isinī imisfo nā pexe kafāshara mīshti mēra rakafafāinafo ini. Akka Niospa āfe ājiri nā ĩa ano nokomis nā ĩa fecha fecha axikī. Nā ĩa fecha fecha akaino nā isinī ikaifo nā nashi taea nashiax koshi sharamisfo. Nāskakē nā isinī ikaifāfe Niospa āfe ājiri manamisfo ato ĩa fecha fecha axoyonō nā nashi nā taea koshi sharaxikakī.

⁵ Jesús nāno nokoxō feronāfake fichini treinta y ocho xiniya amis finipaikī ranāmis. ⁶ Feronāfake fnimisma fichixō Jesús tāpini nā feronāfake treinta y ocho xiniya amis isinī itiani. Nāskaxō yōkani: “¿Mī sharapaimē?” ixō yōkani. ⁷ Askafaito kemani: “Niospa ājirinī ĩa fecha fecha akaino tsōakai ea ĩa ano iyomisma. Akka ē nashipaifaino ea xītimisfo. Ēkai fena nashitiroma. Nono

tsōama ea ĩa ano iyoikaxiki,” faito, ⁸ Jesús yoini: “Fininākafā, mī rakati fifaini kasharatāfe,” Jesús fani. ⁹ Askafaito nikai fininākafāta āfe rakati fifaini kani.

Nā pena safaronō finimisma Jesús sharafani. ¹⁰ Nāskano nā judeofāfe āto xanīfofōfāfe ōinifo nā feronāfake finimismato āfe rakati fifaini kaito yōkanifo: “¿Afeskakī mī rakati safaronō mī foikaimē? ¿Mī tāpiamamē nōko xinifāfe yoipaonifo safaroino nō afaa metiroma? Akka mī rakati na safaronō mī fotiroma,” fanifo. ¹¹ Askafaifono ato kemani: “Oa feronāfake ea sharafaxō ea yoia iskafakī: ‘Mī rakati fotāfe,’ ea faa,” ato faito, ¹² “¿Tsōamē a feronāfake anori mia yoia?” fanifo. ¹³ Finimismatokai tāpinima tsōa sharafaamāki Jesúsmāi a finimisma sharafāfāini koshikōi a makinoax yorafā rasi mēra kaano. Nāskakē finimismato anā ōinima.

¹⁴ Askano chipo Jesús a feronāfake sharafaa Nios kīfiti pexefā mēraanoa fichixō yoini: “Anā mī isinī ikima. Mā mī shara. Anā a mī chakafapaoni keskafakī afianā chakafayamafe. Mī chaka xatefe. Mī chaka mī xateyamakē afaranā mia anā omiskōimatiroki,” ixō Jesús yoini. ¹⁵ Nāskax nā feronāfake Jesús makinoax kani judeofo yoikai, “Oa Jesús ea sharafaa,” ato fani. ¹⁶ Nā Jesús safaronō yora sharafaa nikakanax judeofo āto xanīfofo Jesúski ōitifishkinifo. Ōitifishkikakī Jesús mekakakī chakafanifo. ¹⁷ Askafaifono Jesús ato yoini: “Ēfe Epa pena tii yonofafāini. Iskaratīari yonoi. Ēri ēfe Epa yonoai keskafakī ēri yonoi,” ixō ato yoini.

¹⁸ Nāskakē fakirira shinānifo. Nāskara shinākakī Jesús mekafanifo: “Nōko xinifāfe yoini keskara nō safaronō afaa metiroma, akka Jesús yonoi yorafo sharafakī. Nāskaxō noko yoia: ‘Nios ēfe Epakōi,’ noko faa. Nāskax Nios keskarakōi ipai,” fanifo. Nāskax a ranā yoinānifo: “¿Afeskaxō nō Jesús ato retematiromē?” ikanax yoinānifo judeofo āto xanīfofo.

Jesús Niospa Fakexō nā Niospa akai keskara fai

¹⁹ Nāskara shināifāfe Jesús ato tāpini. Nāskaxō Jesús ato yoini iskafakī: “Chanīma ē mato yoinō. Ea nikakapo. Ē Niospa Fakekōikī ēa ē afara afeskarafaima. Ēfe Epa Niospa akai keskara ōixō ēri aki. Nā fisti ē aki. ²⁰ Ēfe Epa Niospa ea noikōi. Nāskakī nā akai keskara ea tāpimani ēri anō. Akka afara fetsa finakōia ea ispaxii. Askaino mā ea iskafakī yoixii: ‘Airā ōikapo. ¿Afeskakī iskara shara akimē?’ mā ea faxii. ²¹ Epa Niospa yora naano anā otofatiro. Nāskaxō anā nimasharatiro. Ēri āfe Fakexō nāskari fakī ē ato nimapaikī ē ato nimatiro shara ĩpaxanōfo. ²² Epa Niospa ato yoima fatora yori shara nīpanaka, akka fatorari omiskōipakenaka. Ēfi Niospa Fakeki. Ea nīchini ē yorafo yoinō fatofomāki a afe nīpanakafo, akka fatoforimāki a omiskōipakenakafo. ²³ Nāskaxō yorafāfe Epa Nios yoixikani: ‘Mī fāsi shara. Tsōa mia finōtiriroma,’ ixō yoixikani. Nāskarifiakī eari yoixikani ēmāi āfe Fakekē. Ea nīchini. Akka iskaratīa ea tsōa yoisharaima. Ēfe Epa Niosri askari fakani yoisharakima.

²⁴ “Ē mato chanīmakōi yoinō. Fatoto ēfe meka nikasharaimākai, akka nā ea nīchiniri, fatotori chanīmara faimākai nāfi ēfe Epa Nios fe nīpanakakī. Akka iskaratīa yorafo oa naa keskara ikafo Nios Ifofaamax. Akka Epa Nios chanīmara fakanax afe ipanakafo. Nafix afianā otokixani.

²⁵ “Ē afara fetsa chanīmakōi mato yoinō. Yorafāfe āto ōiti mēra shināsharakōiafoma oa naa keskarakōi ikafo. Akka ē Niospa Fakeki. Iskaratīa ē ato yoiaito ea nikakanax anā naa keskara ikanima, efe isharapakenakafo. ²⁶ Akka tsōa Epa Nios onifanima. Akōi ika. Nāskarifiakī Epa Niospa yoia

keskara afe Fakeri tsōa onifanima. Ēakōi ē ikaki. ²⁷ Ēfi Niospa Fakeki. Nāskakē ea yoia iskafakī: ‘Mī yorafo yoitiro fatofomāki efe nīpanakafo, akka fatoforimāki omiskōipakenakafo,’ ixō ea nīchini. ²⁸⁻²⁹ Nāskara ē mato yoiaino rateyamakāfe. Akka nā namisfāfe ēfe meka nikakani ototikani. Afara shara famisfo nikasharakōimisfo nāfo Nios ano nīpanakafo. Akka nā afara chakafamisfo afo otokanax omiskōipakenakafo,” ixō Jesús ato yoini.

Niospa Jesús nīchini a apaiyai keskara famaxikī

³⁰ Anā Jesús ato yoini iskafakī: “Akka ēakōi ē yorafo omiskōi manima. Epa Niospa ea yoiaino ē aki. Epa Niospa keyokōi tāpia. Akka ea mēstekōi yoia keskara ē yorafo yoitiro fatofomiskōipakenakafomāki. Ē ato kaxpa omiskōi manima. Eres fistikai ē apaiyai keskara ē shināima. Ēfe Epa Niospa ea nīchini a apaiyai keskara ea famaxiki. ³¹ Ēakōi ē yoimesharaito tsōa ea tāpitiroma ē afe keskaratiromakī. ³² Akka nāno yora fētsa eōnoa yoisharamis. Nāto ea chanīmara fakē māri a nikasharakōitiro. ³³ Akka mā yorafo Juan Maotistaki nīchimis eōnoa nikanōfo. Juan eōnoa meka shara yoimis nā yorafāfe mato tāpimakani. ‘Jesúsfi Cristokī,’ Juan ato famis. Nā nikakaxō mato tāpimamisfo.

³⁴ “Ēfi tsōa atiroma keskara fakē mā mā ōimiski. Akka tsōa eōnoa mato yoiamaito nāfo ōixō mā tāpitiroma ē mato chanīkima yoimis. Nāskafekē Juan eōnoa mato yoimis keskara ē afianā mato shināmani mato chaka mā xatenō omiskōitamaro Epa Nios fe mā isharapakexanō. ³⁵ Juan feronāfakē fāsi sharakōi. Oa rāpari fafeai keskara shara. Fakishikakī nō rāpari ōtano fai chaxasharano nō fāi katiro. Oa rāpari fafeai keskara shara mato Juan tāpimanano mā mato chaka xateax mā Nios fe mā isharapakexatiro. Mato yoimis keskara mā shināmis iskafakī: ‘Aicho, Juan noko mēstekōi Niospa meka yoimis. Nō nikashara,’ ixō mā shināmis. ³⁶ Juan eōnoa yoikōimis; akka ēfe Epa Niospa Juan finōkōia. Ēfe Epa ea nīchini a apaiyai keskara ē anō. Iskaratā a ea yonomanai keskara ē aki. Akka a ē akai keskara ōixō mā tāpitiroma Epa Niospa ea nīchini a ea yonomanai ē mitonō. ³⁷ Epa Niospa ea matoki nīchini. Nāatori eōnoa yoimis. Mākai Epa Niospa afe meka nikamisma, askatari mā ōimisma. ³⁸ Niospa ea nīchifinino mā ea chanīmara faima. Nāskax afe meka shara mato shinā mēra naneama.

³⁹⁻⁴⁰ “Moisés feta a Niospa meka yoimis fetsafāferi kenenifo keskara mā mā ōisharai māmāi shināki iskafakī: ‘Ē Niospa meka anekī ē tāpitiroma afeskax ē Nios fe isharapakenakamāki,’ ixō mā shināi. Nāskaxō a Niospa meka yoikī kenenifo mā anefafāimis. Akka Moisés feta a Niospa meka yoimisfāfe eōnoa kenefinifono mā ekeki opaima ē mato imasharapanā.

⁴¹ “Epa Niospa ea yoikī iskafaino: ‘Ēfe fake shara,’ ea faino ē inimatiro. Akka yorafāfe, ‘Jesús sharaki,’ ea faifono ē askafamapaima. ⁴² Ē mato tāpikōia. Mākai Epa Nios noima. ⁴³ Epa Niospa ea nīchini ē matoki onō. Ē matoki ofiakē mā ea ifipaima. Akka yora fetsa āakōi matoki oaito mā ifitiro. ⁴⁴ Akka mā yora fetsafo, ‘Na yorafo sharafora, noko fanōfora,’ ixō mā ato yoimapai. Akka Niospa mato yoisharaino mā fichipaima. Nāskakī mā Niospa meka mā nikakaspai.

⁴⁵ “Mā ea chanīmara fayamakē ēfe Epa Nios ē yoima. Nāskakē, ‘Nā Jesús noko chakafai,’ ixō shināyamakāfe. Mā shināmis iskakī: ‘Moisés meka nikai nō Epa Nios fe nīpanaka,’ ixō mā shināmis. Anori mā shināfiaino Moisés

Epa Nios yoixii mākairoko āfe meka nikakōimiskē. ⁴⁶ Moisés eōnoa yoikī keneni. Nāskaxō Moisés āfe meka chanīmara faxō eari mā chanīmara fakerana. ⁴⁷ Nāskafixō a Moisés kirika keneni mā chanīmara faima. Nāskaxō eari mā chanīmara faima,” ixō Jesús judeofāfe āto xanīfofo yoini.

6

Jesús cinco mil feronāfakefo ato pimani (Mt. 14.13-21; Mr. 6.30-44; Lc. 9.10-17)

¹ Askata Jesús anā ĩamāfā āfe ane Galilea pokefaini. Āfe ane fetsa Tiberias. ² Nāskaxō Jesús isinī imisfo āfe mekapa ato sharafaito ōikani yorafā rasichi chīfafainifo. ³⁻⁴ Nāskaifono judeofāfe āto fista Pascua mā chaima pakeaino Jesús māchi keya ano nokoax aōxō tāpimisfo fe tsaoni. ⁵⁻⁶ Nāno tsaofono yorafā rasi Jesúski fenifo. Akiki feaifāfe atokiri fesoxō Jesús ōini. (Ato ōikī Jesús shināni oa yorafō fonāikani rakikā. Nāskaxō Jesús āa tāpini afesaxō ato pimaimākai.) Nāskaxō Jesús Felipe tāpimapaikōini a āfe mekapa afama mīshti atiro. Nāskaxō Jesús Felipe yōkani: “¿Faniā afaa ato pimaxikī nō fimē?” ixō Jesús Felipe yōkaito, ⁷ nikaxō Felipe kemani: “Kee, Ifo, nō dos cientos nia oxata yonoxō nō kori fitiro akka a tiikai nokotiroma na yorafā rasi nō ato pimapanā,” Felipe fani. ⁸ Nāskafekē Jesúsxō tāpimis fetsa Andrés nā Pedro ěxto yoini: ⁹ “Ōipo. Na fāke cinco pāa fea. Foe rafeya fea. Akka yora ichapato pitirofoma. Fisti rasichi pitirofo. Nono yora ichapa rasi. Na pāa pishta tsoa nokotiroma,” fani.

¹⁰ Askafaito Jesús yoini iskafakī: “Ato yoikāfe tsaonōfo,” ato fani. Nāno fasi ichapa ini. Nā Jesús ato yoiāi keskai fasi mēra tsaoui fetsenifo. Cinco mil feronāfakefo tsaoui fetsenifo. Kērofori, fakefori tsaonifo. ¹¹ Nāskax tsaofafono Jesús nā cinco pāa fita Apa Nios yoini: “Aicho, Epa,” ixō Apa Nios yoita pāa yafi nā foe rafe kaxkepaketa aōxō tāpimisfo ato ināni, afāferi ato inānōfo. Fikaxō pikani māyakōinifo. ¹² Nāskax keyokōi yorafō māyakōiafono Jesús ato yoini: “Nā pāa yafi foe texefafō fikāfe fēta mēra nanekāfe afaa pishta fenoyamanō,” ato fani. ¹³ Ato askafaito nikakaxō nā pāa yafi foe texefafō finifo. Doce fēta fospifanifo.

¹⁴ Nāskata Jesús āfe mekapa foe rafe yafi cinco pāa ato pimaito ōikanax yoinānifo: “Chanīmakōi Jesús Niospa meka yoimis. Nā Epa Niospa aōnoa yoipaoni. Nokoki nīchini,” ikanax yoinānifo. ¹⁵ Askafaifono Jesús tāpixō āfe ōiti mēra shināni: “Na yorafāfe ea kerexkai āto xanīfokōi ea imapaikani,” ixō tāpini. Askata ato makinoax machi fetsa ari kani.

Jesús ĩamāfā femākīa kani (Mt. 14.22-27; Mr. 6.45-52)

¹⁶⁻¹⁷ Askata mā xini kaino aōxō tāpimisfo kanōanāfā mēra nanefainifo ĩamāfā pokefainifo nā pexe rasi Capernaúm ano fokani. Nokoafomano mā fakishaino Jesús atoki nokonima. ¹⁸ Nēfefaino ĩamāfā pooitifikōini. ¹⁹ ĩamāfā chai naisti nēxpakīaxō nēfefānē ato akaino ĩamāfā pooitifikōini. Jesús ĩamāfā kamaki kaitokai tsōa tāpinima mā fichifikaxō. Tāpiamax ratekōinifo. ²⁰ “Ēkīa. Rateyamakāfe,” Jesús ato fani. ²¹ Nāskaxō yoinifo: “Aicho. Kanōa mēra naneyofe,” fanifo. Mā Jesús naneano nāskax ĩamāfā kesemē nokorisanifo.

Yorafā rasichi Jesús fenanifo

²² Nāskaino mā penano yorafā rasi okiri ĩamāfā kesemē nētenifo. “A aōxō tāpimisfo fe Jesús kaito nō ōiama. Nonokai kanōa fetsama. Akka Jesús nonoki,” ĩkanax yoinānifo.

²³ Nāskatari Tiberias chaimaxō kanōa rasi fenifo. A Jesús yorafā rasi ato pi-maita ano fenifo. ²⁴ Askatari Jesúsxō tāpimisfo ano ĩnifoma. Jesúsri ano ĩnima. Nāskaxō yora rasichi Jesús fenaifokani fonifo kanōanāfānē Capernaúm anoa.

Jesúsfi a nō piyai keskaraki. Akka nō piaxma nō nitiroma. Nāskarifiakī nō Jesús chanīmara faaxma nō afe nīpaxatiroma

²⁵ Mā fichikaxō Jesús yoinifo: “Maestro, ¿afetīa mī nono oamē?” ĩxō yōkanifo. ²⁶ Askafaifono ato kemani: “Chanīmakōi ē mato yoi. A yōra atiroma keskara ē mato ĩspafekē mā ea fenaima. Akka ē mato pimaino keyokōi mā māyakōita. Nāskakē mā ea fenai. ²⁷ Shinākapo. a piyai fisti mā shināfafāini. Akka a mā piyai pisiāx payokometiro. Nāskaxō mā yonofafāini a mā piyai fixiki. Akka a mā piyai fisti shināyamakāfe. A ē mato ĩnātiro shinākāfe. A mā piyai ē mato ĩnātiro a keyonakama. Nā piāx mā efe isharapakenaka. Ēfi yōra fakekōiki. Ēfe Epa Nios ekeki ĩnimai ea katoxō matoki ea nīchini ē mato imasharapakexanō,” ato faino, ²⁸ nikakakī yoinifo: “¿Nō afeskatiromē Nios nokoki ĩnimanō?” ĩxō yoinifo. ²⁹ Askafaifāfe Jesús ato kemani: “Epa Niospa ea matoki nīchini. Akka mā Epa Nios ĩnimamapaikī ea chanīmara fakāfe,” Jesús ato faino, ³⁰ kemanifo: “A tsōa atiroma keskara fakī noko afama mīshti ĩspafe nō mia chanīmara fanō. ³¹ Akka Niospa meka kenenifo ĩskafakī: ‘Tsōa atiroma keskara Moisés a piaifo ato ĩnāpaoni. Nā pena tii nai mēranoax pakepaoni a piaifo,’ ĩxō kirika kenenifo. A nōko xiniāfe pipaonifo tsōa ĩstoma anoxō āfe ane mānā. Nāskakē mūri a Moisés aka keskara fafe, nō mia chanīmara fanō,” ĩxō yoinifo.

³² Askafaifono Jesús ato yoini: “Ē mato pāraima na Moiséskai a nōko xiniāfe piyai ato ĩnānima, nai mēraxō Epa Niospa ato ĩnāni. Akka Epa Niospa mā ĩskaratiā mato mēra nīchia a mā piyai keskara nai mēraxō mato ōiti mēra nanenō. ³³ Nā fistichi yorafo nimapakekōixatiro. Epa Niospa nāmā nīchini yorafo ato imasharapakexanō,” ato faino, ³⁴ “Īfo, a nō piyai noko ĩnāfafāife a mī noko yoiyai,” fanifo. ³⁵ Jesús ato kemani: “Ēfi nā mā piyai keskarakī. Ē yorafo nimasharapakexatiro. Mā nō piāx māyatiro. Nāskax nō anā fonāitiroma. Nāskarifiakī ea shināifāfe ē ato shināmafāini. Ē ato potanakama. Nāskakē āto ōiti mēra ĩnimakōitirofo. Askatari mā nō faka ayax nō anā nōamāitiroma. Nāskarifiakī ea shinākanax efe isharapakenakafo. ³⁶ Nāskafekē ē mato yoiāito mā ea nikakī mā ea chanīmara faima. ³⁷ Akka nā ea ĩfofafo Epa Niospa ea atoya imasharapakenaka nāfāfemāi ea ĩfokōiafono. Akka fatorafāferi ea ĩfofaifāfe nāfo ē ato kexesharapakenaka. Ē ato potapakenakama. ³⁸⁻³⁹ Epa Niospa ea nīchikī ea yoini ĩskafakī: ‘Nā mefe ipaikani mefe ipanakāfo tsoa pishta fenonakama. Nāfo mā nafiamisfono mī anā fotoxō mī ato ōtofaxii nofe nīpaxanōfo. Nāskara ē fichipai,’ ĩxō ea nīchini. Nāskakē nā ēa ē apaiyai keskara faxiki ē mai ano onima. Akka nā ea nīchiato ea amapaiyai keskara faxikī ē mai ano fotoni.

⁴⁰ “Ēfi Niospa Fakeki. Ea chanīmara fakanax nāfo ēfe Epa Nios ari efe isharapakenakafo. Nafiafāfe ē afianā mai ano fotoxō ē ato ōtofaxii ishara-pakexanōfo. Nāskara ēfe Epa Niospa fichipai,” ĩxō Jesús ato yoini.

⁴¹ “Ēfi nai mēranoax onikī a mā piyai keskaraxō yorafo imasharaxikī,” Jesús ato faino nikafikaxō chanīmara fatama judeofāfe Jesús mekafakakī

yōachepenifo: ⁴² “Kee, nikakapo. Na Jesús, áfe apa José yafi áfe afa María nō ōimis. Nakai afaama. Akka, ¿afeskakī noko yoimē: ‘Ēfi nai mēranoax Nios ika ariax onikī?’ Nāskakē na meka nō chanīmara faima. Iskara meka nō nikapaima,” ikanax yoinānifo. ⁴³ A āto ōiti mēraxō shināifo keskara Jesús ato onāxō ato yoini: “Ekeki yōachepeyamakāfe. ⁴⁴ Ē chanīma. Epa Niospa ea nīchini. Nāskafekē Epa Niospa āto ōiti mēra ato shināmayamaino ea tsōa chanīmara fatiroma. Akka nā ea chanīmara faax nakē ē anā nai mēranoax fotoxō ē ato otofaxii efe ĩpaxanōfo. ⁴⁵ Niosnoa yoimisfāfe kirika kenenifo iskafakakī: ‘Epa Niospa keyokōi ato tāpimaxii,’ ixō kirika kenenifo. Fatora yorafāfe ēfe Epa Nios nikaifono ato tāpimaxii. Nāskaxō afāferi ea chanīmara faxikani.

⁴⁶ “Tsōakai Epa Nios ōimisma. Eres fisti ē Epa Nios ōimis, ēmāi a makinoax onixakī. ⁴⁷ Ēfi mato chanīmakōi yoikai. A ea chanīmara fai ēfe Epa Nios fe ipanaka.

⁴⁸ “Ēfi nā mā piāi keskaraki. Nā ea chanīmara faafo tii Epa Nios fe isharapakenakafo. ⁴⁹ Nōko xinifo Moisés fe tsōa istoma ano ipaonifo. Nā pipaonifo, áfe ane mǎnā. Akka mǎnā pipaofnixakī mā nai mitokomenifo. ⁵⁰⁻⁵¹ Ē nai mēranoax ēfe Epa Nios ika anoax oni. Ēfi na mā piāi keskaraki. Nā ea chanīmara fai nāfi efe nīpanakakī. Nā nōko xinifāfe pipaonifo nai mēranoax pakeaito aatokai ato nimasharamisma. Iskaratīa afianā Epa Niospa nai mēraxō mato ināi a mā piāi. Nā piāx yorafo isharapakenakafo anā nanakafoma. Ēfi nā mā piāi keskaraki. Nāskakē ē keyokōi yorafo ē ato nāxoxii nisharapakexanōfo,” ixō Jesús ato yoini.

⁵² Nikakani judeofo fochishpanā faatanānifo. “¿Afeskaxō na feronāfāke áfe nami noko inātiromē nō pinō?” ikanax yoinānifo. ⁵³ Jesús áfe namikiri keparanākī ato yoini: “Ē mato pǎraima. Ēfi yōra fakekōiki. Mā ēfe nami piyamata ēfe imi ayayamata ikax mā nipaxatiroma. ⁵⁴ Fatorafāfe ēfe nami pikani ēfe imiri ayakani isharapakexikakī. Nāskakē ē afianā nai mēranoax fotoaitīa a namisfo ē ato otofaxii Epa Nios ari nisharapakexanōfo. ⁵⁵ Ēfe nami na mā piāi keskara. Ēfe imiri a mā ayatiro keskara. ⁵⁶ Fatorafāfe ēfe nami pikani, ēfe imiri ayakani, nāfo efe rafesharapakenakafo. ⁵⁷ Akka ēfe Epa nīpanakato nāto ea nīchini. Nāskai ēri aōnoax nīpanaka. Nāskakē efe rafesharakanax eōnoax nīpanakafo.

⁵⁸ “Afianā ē mato yoi. Nōko xinifāfe a pipaonifo áfe ane mǎnā. Nā pifiakanax mā nai keyonifo. Akka ēfi Epa Nios ariax ē matoki oni. Ēfi a mā piāi keskarakī. Ea pikanax eōnoax nisharapakenakafo,” ixō Jesús ato yoini. ⁵⁹ Judeofāfe āto ichanāti pexe mēraxō Capernaúm anoxō áfe meka Jesús ato yoini.

Jesúsnoax yorafo nīpaxatirofo

⁶⁰ Jesúsxō tāpimisfo a ranā yoinānifo: “A Jesús noko yoia keskara fekaxkōi. Tsōakai tāpitiroma. Nōkai na keskara meka nikamisma,” ikanax yoinānifo. ⁶¹ Jesús ato onāni a ranā yoināifāfe. Akka atirifāfe Jesús nikapainifoma. Nāskaxō ato yoini: “¿A ē mato rama yoia keskara mā nikapaimamē? ¿Anā mā ea chanīmara faimamē? ⁶² Ē yōra fakekōi fiāx a ē ipaoni ano nai mēra ē anā kaito mā ea ōiki, ¿mā ea chanīmara faimamē? ⁶³ Akka Niospa Yōshi Sharapa nā fistichi yorafo nimasharapaketiro. Yorafokai yōra nīpapaketiroma. Akka ēfe Epa Niospa Yōshi Sharaōxō ē mato yoimis. Nāskakē ēfe meka chanīmara faax mā nisharapakexatiro. ⁶⁴ Nāskafekē fetsafāfekai ea chanīmara

fakanima,” ixō Jesús ato yoini. Jesús taefakī ato ifini. “Fatotokai ea chanīmara fatama ea ato achimaximē,” ixō Jesús tāpiyoni. ⁶⁵ Askaxō anā ato yoini: “Ē mato yoia iskafakī, Epa Niospa āto ōiti mēra ato shināmayamaino ea chanīmara fatirofoma,” ixō ē mato yoia.

⁶⁶ Nāskaxō Jesús ato yoiai keskara nikakaxō a chīfamisfāfe Jesús potakaxō anā tananifoma. ⁶⁷ Akka Jesús a aōxō tāpimis doce ato ifini. Afetiama ato ifiyoni aōxō tāpimisfo inōfo. Nāskaxō ato yoini iskafakī: “¿Māri emakinoax kapaimē?” ato faino, ⁶⁸ Pedro kemani: “Ifo, nō fato fetsakai Ifofatiroma. Mī fistichi mī noko yoitiro afeskax nō isharapakexatiromākī. ⁶⁹ Mīfi mī Nios ariax nokoki onīki. Mīfi sharakōi Cristokī. Nios nā nipanakato nāato āfe Fakekōi mī. Nā nō chanīmara fai,” askafaito, ⁷⁰ “Ē mato doce feronāfake ifini mā eōxō tāpimis inō. Akka Ē mato ififinino a mato fe rafea fetsa mā a mēra Satanás chaka nanea,” ixō Jesús ato yoini. ⁷¹ Nā Simón Iscariote āfe fake Judas ini. Nā Judasnoa Jesús ato yoini. Jesús nā Judasri ififinino nāato Jesús ato achimani fetsafāfe retenōfo.

7

Jesús āfe extofāfe chanīmara fanifoma

¹ Askata Jesús Galilea ano kafāsani ato tāpimafofāsafai. Judea ano kayopainima judeofāfe āto xanīfofāfemāi retepaiyaifono. ²⁻⁵ Judeofāfe āto xinifāfe tapas fapaonifo shinākakī fista anifo. Askata judeofo ichapa rasi Judea mai ari Jerusalén anoxō fista aki fokani fonifo. Mā fista chaima ikaino Jesús Judea mai ari kayotama, Galilea ano nēteni. Āfe extofori nā Galilea ano afe inifo. Āfe extokōifofiakaxō Jesúsakai nafi Cristoki Niospa nīchini ixō tsōa chanīmara fanifoma. Nāskaxō yoinifo iskafakakī: “Nonoax Judea mai ano katāfe nā mia Ifofamisfāfe nā mī ato axomis keskara ōinōfo. Nā mī amis keskara mī ato ōimanamano fetsafāfekai mia tāpitirofoma. Nā mī afama mīshti akaifo ato ispatofāfe,” faifāfe ⁶ ato kemani: “Ē iskaratīa ari katiroma. Ēfe Epa ea nīchiyoima. Akka afetiara kapai mā katiro,” ato fani. ⁷ “Na yorafāfekai Epa Nios yafi ea chanīmara faafoma. Nāfāfe ea noikaspakani. ‘Māfi afarafo chakafamis,’ ē ato famis. Nāskakē ea noikaspakani. Akka mato noikaspakanima. ⁸ Akka māri fista axiki Jerusalén ano fotakāfe. Ē kayoikaima. Ēfe Epa Niospa ea nīchiyoima,” ixō Jesús āfe extofo yoini.

⁹ Mā ato yoita Galilea ano Jesús nēteni.

Jesús kani fista akikai

¹⁰ Nāskata mā āfe extofo fista akikai, Jerusalén ano foafono Jesúsri chipo kani. Tsōa tāpianamo onekōi Jerusalén ano kani. ¹¹ Nānoxō nā judeofāfe āto xanīfofāfe Jesús fenakani yoinānifo: “¿Fanīmē nā feronāfake?” fanifo. ¹² Nāno yora ichapa rasi inifo. Atirifāfe iskafanifo: “Jesús feronāfake sharakōi,” ikaxō yoinifo. Askafafiaifāfe atirifāfe yoikī iskafanifo: “Maa. A feronāfakekai sharama. Yorafo pāramis,” ikaxō yoinifo. ¹³ Nāskax a ranā yoinānifo judeofāfe ato nikayamanōfo judeo xanīfofoki mesekakī.

¹⁴ Fista mitokomeamano Jesús Nios kīfiti pexefā mēra ikikaini a mēraxō ato yoixikī. ¹⁵ Judeofāfe āto xanīfofāfe nikakaxō yoinifo: “Aira. Nikakapo. ¿Afskakī na feronāfake kenekī tāpikī finayamafixō tāpifinakōiamē?” ikanax yoinānifo. ¹⁶ Nā yoiaifo keskara onāxō Jesús ato yoini: “Ēfe shināmā shinākōixō ē mato yoima. Epa Niospa ea nīchini nā ea shināmanai keskara ē mato yoi. ¹⁷ Fatatora a Niospa yoiai keskara apaikī tāpitiro akka ēa ē shināxō

ē mato yoima, Epa Niospa ea shināmanaino ē mato yoi. ¹⁸ Fatora yora fētsa āfe shināmā shināxō āakōi ato yoi. Nāato yorafo shināmapai iskafakī: ‘Nā feronāfāke mekakī tāpikōia, ea fanōfora,’ ixō anori ato shināmapai. Akka yōra fētsa āa āfe shināmā shināx mekaima. A nīchinio shināmanaino mekai, a nīchini fisti yoisharanōfo. Nāskakē nā yōra ato chanīkima yoi, ato pāraima. ¹⁹ Nōko xini Moisés Niospa meka mato kenexoni. Akka mā nikasharamisma. Nāskakē pena tenetitīa ē feronāfāke sharafaano mā ea retepai,” ato faino, ²⁰ “Kee. Tsoakai mia retepaima. Mī mēra niafaka yōshi chaka nanea,” faifāfe ²¹ ato kemani: “Ē feronāfāke pena tenetitīa sharafaino akka mā ea yoikī iskafamis: ‘¿Afeskakī Jesús pena tenetitīa feronāfāke sharafaimē?’ ixō mā eōnoa yoimis. ²² Ē pena tenetitīa afara shara faa keskafakī māri pena tenetitīa afara memis. Moisés kirika kenekī yoini keskafakī māri mātō fake feronāfākefo rama kāikē mā cho nia oxano mātō fake feronāfākefo mā foshki repa xatemis. (Akka Moisés kai askara noko yoinima, nōko xinifāfe askara yoinifo.) Akka iskaratīa pena teneti ikaino mā mātō fake feronāfākefo mā foshki repa xatemis.

²³ “Moisés yoini keskara nikakī pena tenetitīari mā mātō fake feronāfākefo mā foshki repa xatemis. Akka, ¿afeskai mā ekeki ōitifishkikimē na pena tenetitīa ē na feronāfāke sharafaano? ²⁴ Nāskakē a yōra afara shara fakē ōixō yoikī iskafayamakāfe: ‘Nāto afara chakafai kiki,’ fayamakāfe. Mēstekōi yoisharakāfe,” ixō Jesús ato yoini.

“Ē ēfe Epa Nios ariax ē oni,” Jesús ato fani

²⁵ Askata yora rasi Jerusalén ano ikanax yoinānifo: “¿A na feronāfākemē xanīfofāfe retepaiyaifo?” ikanax yoinānifo: ²⁶ “Ōikapo, yorafā rasichi ōifiaifono mā ato yoi. Akka tsōakai afaa faima. Mā xanīfofōfāfe mā tāpiafo rakikīa nā Cristo, a Niospa nokoki nīchini. ²⁷ Ētsa, aama rakikīa Cristo. Cristo oaito nō tāpitiroma fakiranoax oi. Akka na feronāfāke mā nō tāpia fakiax oamāki,” ixō yoinifo.

²⁸ Askafaiāfe nikaxō Nios kīfiti pexefā mēra ikixō Jesús ato yoini iskafakī: “Chanīma, mā mā ea tāpia ē fakiax oamē,” ato fani. “Akka ēa ēfe shināmā shināx ē oama. Akka ēfe Ēpa ea nīchini. Nāfi chanīmismaki. Akka māfi ēfe Epa mā tāpiama. ²⁹ Ē ēfe Epa ariax oni. Nāato ea nīchini. Nāskakē ē a tāpikōia,” ixō Jesús ato yoini.

³⁰ Ato askafaito nikakani akiki ōitifishki ikakī achipainifo karaxa mēra ikimapaikakī. Akka a reteaifo āfe pena nokoamano achipainifo. Tsōakai Jesús afeska fanima. ³¹ Nā yorafā rasichi Jerusalén anoafāfe yoinifo: “Tsoa fētsa atiroma keskara fakī Jesús Niosxō afama mīshti noko ispa. Nā Jesús afama mīshti fai tsōa atiroma keskara fakī. Akka yora fetsa oax āa is kai yoi: ‘Ēkīa Cristo,’ iki yoi. Akka atokai afama mīshti fakī Jesús finōtiroma,” ikanax yoinānifo. Nāskakī Jesús chanīmara fanifo.

Fariseofāfe āto inafō nīchinifo Jesús achitanōfo

³² Nā yorafā rasichi Jesúsnoa meka shara yoiāifāfe fariseofāfe nikanifo. Nāskaxō judeofāfe āto xanīfofo feta fariseofāfe a Nios kīfiti pexefā kexemisfo nīchinifo Jesús achitanōfo karaxa mēra ikimaxikakī.

³³ Askata Jesús ato yoini: “Ē anā nono mato fe samarakaima. Ē sama-mashta kai a ea nīchini shināfāini. ³⁴ Ē mato anoax kaino mā ea fenakī mā ea fichitiroma. A ē kai arikai mā katiroma,” ixō Jesús ato yoini.

³⁵ Ato askafaito nikakanax judeofāfe āto xanīfofo yoinānifo: “¿Faki na feronāfake kaimē nō fichitiroma? Nā nōko kaifo griegofō nā peXe rasi anoax paxkafainifo nāno kai rakikā. Nānoxō griegofō tāpimaxikī kai rakikā,” fanifo. ³⁶ “¿Afaa noko yoipaimē iskafakī? ‘Mā ea fenafikikai mā ea fichitiroma. Ē ika arikai mā katiroma,’ ixō noko yoiai. ¿Afaa noko yoipai iskaimē?” ikanax yoinānifo.

Niospa Yōshi Sharapa yorafō nimapaketiro

³⁷ Askata mā fista mitokomeaino Jesús nā yorafā rasi mēraxō niināka fā fāsi mekaināka fā ato yoini iskafakī: “Nikakapo. Nā mā nōamā iki faka ayapaiyai keskai ekeki fekāfe. ³⁸ A ea chanīmara faafāfe Niospa meka kenenifo keskara yora āfe xaki mēra faka poyo poyo iki netsotiroma keskara shara itiro ea Ifofaax,” ixō āfe Yōshi Sharaki keparanāki Jesús ato yoini. ³⁹ Akka faka ato yoinima, Niospa Yōshi Sharaōnoa ato yoini iskafakī: “A ea chanīmara fai ēfe Epa Niospa āfe Yōshi Shara fe rafepakenaka,” ixō Jesús ato tāpimani Apa Nios ari kayoxoma yorafāfe āto xanīfokōi ixikī. Nāskakē Jesús kayoamano Niospa āfe Yōshi Shara ato fe rafeama.

Jesúsnoa yoinifo. Askafikaxō anoris shinānifoma

⁴⁰ Jesús nikakaxō atirifāfe yoinifo: “Chanīmakōi nā feronāfake Niospa meka yoimis a nō manai,” ikanax yoinānifo. ⁴¹ Atirifāferi yoinifo: “Nāfi Cristoki,” ixō yoinifo. Akka fetsafāfe yoini: “Maa, nakai Cristoma. Cristokai Galilea anoax kāitiroma. ⁴² Niospa meka kenenifo keskara, ‘David āfe fena inō Cristo. Nā David ipaoni Belén ano. Nānoaxri Cristo kāixira,’ ixō kirika kenenifo. Akka Cristokai Galilea anoax kāitiroma,” ixō yoinifo. ⁴³ Nāskakē nā yorafāfe Jesúsnoa nikakaxō anoris shinānifoma. Fetsafāfe Jesús chanīra fanifo, fetsafāferi chanīmara fanifo. ⁴⁴ Atirifāfe Jesús achipainifo karaxa mēra ikimapaikakī. Achipaifikakī tsōa Jesús afeska fanima.

Judeofo āto xanīfofāfe Jesús chanīmara fanifoma

⁴⁵ Askata fariseofāfe āto Nios kīfiti pexefā kexemisfo fenifo. Āto xanīfokoi feaifono ato yōkanifo: “¿Afeskakī mā Jesús achiamamē noko efexoxikī?” ixō ato yoinifo. ⁴⁶ Ato askafaifono ato kemanifo: “Na feronāfake āfe meka sharakōi, tsōa anori yoimisma,” ato fanifo. ⁴⁷ Ato nikakaxō fariseofāfe ato yoinifo: “Kee, Jesús mā matori pāra. ⁴⁸ Akka nōfi māto xanīfofo feta a Moisés kirika keneni nō tāpikōiakī. Akka nō fatotokai nō Jesús chanīmara faima. ⁴⁹ Akka nā yorafāfe mā rama Jesús nikafo nāfāfe a Moisés kirika keneni tsōa tāpiafoma. Niospa ato omiskōimaxiki,” ikaxō ato yoinifo.

⁵⁰ Askafafiaifono Nicodemo taeyoi nāato pena fetsa Jesúski kani fakishi afara yōkaikai. Nārimāi fariseoax nāskaxō afe rafeafo yoini: ⁵¹ “Efe yora mishtichi, ē mato yoinō. Nōko xinifāfe āto xanīfofāfe yoinifo keskara nō fatora feronāfake nikasharayamaxō, ‘Afara chakafaira,’ nō fatiroma iskafakī: ‘Nāto afarafo chakafai kiki nō omiskōimanō,’ ixokai nō askafatiroma,” ato askafaino kemanifo: ⁵² “Mī noko yoi Galilea anoxō yoiaifo keskara. Galilea anoxō Niospa meka tāpiafoma. Shināpo. Fato feronāfakekai a Galilea anoxō Niospa meka yoimis oama. Akka nono fistixō Niospa meka noko yoitirofo,” ikaxō Nicodemo kemanifo.

⁵³ Nāskax yoinākanax āto peXe rasi ano fonifo.

8

Kĕro Āfe fenema fe ikaito xanĭfofofāfe retepainifo

¹ Nāskata Jesús machi āfe ane Olivos ano kani. ² Penaino Jerusalén ano nokoax anā a Nios kĭfiti pexefā mĕra Jesús oni. Nāno yorafā rasi afianā akiki fenifo nikai fekani. Askata tsoaxō ato yoini.

³ Ato yoiaino a Moisés yoikĭ kirika keneni keskara ato tāpimamisfo fe fariseofo fenifo. Kĕro āfe fenema fe ikaito fichikaxō Jesúski efenifo. Yorafā rasi nĕxpakĭa kĕro nĭchinifo keyokōichi ōinōfo. ⁴ Askafakaxō Jesús yoinifo: “Maestro, na kĕromā afarafo chakafaa. Āfe fenema fe ikaito nō fichia. ⁵ Moisés iskafakĭ noko yoini: ‘Kĕro āfe fenema fe ikaito ōikĭ nō tokirinĭ tsakakĭ retetiro,’ ixō Moisés noko yoini. Akka, ĵmĭ noko afaa faimĕ?” fanifo.

⁶ Nāskaxō Jesús kemamapainifo, “Fakiri noko yoimākai,” ikaxō āto xanĭfofo yoipaikakĭ. Askafaifono Jesús āfe mĕkemā mai keneni. ⁷ Yōkarifaifono Jesús atoki fininākafā ato yoini iskafakĭ: “Fatotokai mā afaa chakafamismamĕ na kĕro mā tokirinĭ tsakakĭ taefai,” Jesús ato fani.

⁸ Mā ato yoixō afianā āfe mĕkemā mai keneni. ⁹ Nāskano mā ato yoiaino nikakaxō a Jesús mai keneai ōikanax nā kĕro mekafakĭ chakafamisfo fisti rasi tsekefaifāinifo. Nā anifo tii foi taenifo. Chipo naetapafo fonifo. Mā foafono Jesús fisti nāno kĕro fe nĕteni. ¹⁰ Nāskax Jesús fininākafā nā kĕro yōkani: “ĵNā feronāfakefo mia yōafo mā foafomĕ? ĵTsoa fisti nĕteamamamĕ anā mia yōaxikakĭma?” ixō Jesús yōkaito, ¹¹ “Īfo, tsoa pishta nĕteama,” faito, “Ērikai mia mekafakĭ chakafaima. Iskaratĭa mĭ katiro. Afianā mĭ chaka ipaoni keskara anā askayamafe,” ixō Jesús nā kĕro yoini.

Jesús pena xafashara keskara

¹² Askata mā kĕro kaano Jesús yorafā rasi yoini. Ato yoini iskafakĭ: “Ēfi pena keskarakĭ. Ē nā yorafo tii imasharatiro shara ĩpaxanōfo, anā fakish keskara inōfoma. A ea Ifofai fenotiroma,” ixō Jesús ato yoini. ¹³ Nikakakĭ fariseofāfe yoinifo: “Na mĭ noko yoiaino anorikai tsōa mĭdnoa noko yoima. Mĭa mĭ yoimei. Akka a mĭ noko yoiaino tsōa mia nikatiroma,” faifāfe ¹⁴ Jesús ato kemani: “Ē fakiax oamĕ fakiri ĕ kaimĕ mĕ tāpia. Akka ĕa ĕ yoimeai ĕfe meka chanĭmakōi. Askafiax fakiax ĕ oamĕ ĕ fakiri ĕ kaimĕ mākai tāpiama. ¹⁵ Mā ea tāpixoma, mā ĕfe meka chanĭmara faima. Ea tāpixoma mā ea shināi oa chanĭai keskara ĕ mekaito. Mā askara shināi Niospa mato askara anori shināmanainoma. Ēkai tsoa mekafakĭ chakafaima. ¹⁶ Akka, ‘Na yorafāfe afara chakafamisfo,’ ĕa ĕ mato faima. Ēfe Epa shināi keskara nānorikōiri ĕ mato yoi. Askaxō chanĭmakōi ĕ yoimis. Ēfe Epa nāato ea nĭchini, nā ea tāpimanai ĕ yoimis. ¹⁷ Moisés mato yoini iskafakĭ: ‘Feronāfake rafeta nānoris mato yoiaino mā nikatiro,’ ixō mato Moisés yoini. ¹⁸ Akka ĕakōi ĕ yoimei. Akka nā ea nĭchinio ĕfe Ēpari eōnoa nānorikōi yoimis,” ato faito, ¹⁹ nikakakĭ yōkanifo: “ĵFanĭmĕ mĭ Epa?” faifāfe, “Mākai ĕfe Epa yafi mā ea tāpiama. Ea tāpixō ĕfe Ēpari mā tāpikerana,” ixō ato Jesús yoini.

²⁰ Nios kĭfiti pexefā mĕraxō ato yoini. Nāno nā kene mĕra judeofāfe āto kori naneti ini. Niospa meka yoimisfo ato ināmisfo. Jesús ato yoiaino judeo xanĭfofofāfe achipainifo. Askafixō tsōa achinima āfe penakairoko nokokĕ achipanāfāfe.

Jesús yorafo yoini: “Ē kai arikai mā katiro,” ato fani

²¹ Askata Jesús afianā judeofo āto xanīfofo yoini: “Ē chai mē kai. Ē kaano mā ea fenafikī mā ea fichitiroma. Māto chaka soaxoma nāskax mā nai. Ē kai arikai mā nokotiroma,” ixō Jesús ato yoini. ²² Jesús ato askafaito nikakaxō yoinifo: “¿Akōi retemeimē? Nā noko yoiai: ‘A ē kai ari mā nokotiroma,’ noko fai,” ikanax judeofo xanīfofo yoinānifo.

²³ Jesús ato tāpixō ato yoini: “Māfi na mai anoakī. Akka ēfi nai mēranoakī. ²⁴ Nā ēa ē yoimea keskara māto chaka potaxma mā nai eakairoko mā ea chanīmara faax. Nāskakē afara chakafaxō māto chaka soaxma mā naax Epa Nios ari mā nokotiroma. Mā mā naano māto chaka mato fe ipanaka.”

²⁵ Ato askafaito kemanifo: “¿Mī tsoamē?” ixō yōkaifāfe, “Nā ē mato yoitaifamis ēkīa. ²⁶ Matoōnoa afama mīshti ē yoitiro. A mā afara chakafamis ē yoitiro. A ea nīchinito ea yoiaito ē nikai. Nāskakē nā ē mato yoifafāini. A ea nīchinito yoiai chanīmakōi,” Jesús ato fani.

²⁷ Apa Niosnoa ato yoifiaitokai tsōa tāpinifoma. ²⁸ Nāskaifāfe Jesús ato yoini: “Ēfi yōra fakekōiki. Mā ea ifi cruz ikakī mastaxō mā ea fininīfofāxō mā ea ōixii ē tsoamāki mā ea tāpitiro. Nāskatari eōnoa mā tāpitiro ēa ē mato yoimisma. Epa Niospa ea yoia keskara ē mato yoimis. ²⁹ Nā ea nīchini efe ika. Eres ē ikama. A ea amapaiyai keskara ē amiski. Nāskax ekeki inimasharamiski,” ixō ato Jesús yoini. ³⁰ Yoiaito nikakaxō yora ichapato chanīmara fanifo.

Niospa fakefāfe Nios āto Ifo, akka afara chakafamisfāfe afara chaka āto ifo

³¹ Nāskaxō Jesús a chanīmara faafo yoini: “Ē mato yoiaito mā ea nikasharakōiax mā eōxō tāpiniskōifo mā itiroki. ³² Ēfe meka nikakōixō mā Nios tāpitiro, Nios chanīmismo. Askax mā isharatiro. Afara chanī māto ifo itiroma.”

³³ Ato askafaito kemanifo: “Nōfi Abraham āfe fenaki. Fato fetsa nōko ifo imisma. Nōkai tsōa yonomatifoma. ¿Afeskakī ‘Afara chanī māto ifo itiroma’ noko Jesús faimē?” fanifo.

³⁴ Askafaifāfe anā Jesús ato yoini: “Chanīmakōi ē mato yoi. Nā afara chakafamisfāfe nā chaka āto ifo ixii. ³⁵ Mā mā tāpia pexe ifāfe āfe yonomati āfe pexe mēra ipaxatiroma. Akka āfe fake fisti āfe pexe mēra ipaxatiro. ³⁶ Nāskarari Niospa Fāke mato chaka soaxonano afara chaka māto ifo itiroma. Niospa mato fakekōifai, mā afe isharakōipakenaka. ³⁷ Mē mato tāpia māto xini Abraham. Āfe fenafoxaxō ēfe meka mā nikakaspai. Nāskaxō mā ea retepai. ³⁸ Ēfe Epa amis keskara mē ōimis. Nāōnoa ē yoimis. Māri a māto epa mato yoimis keskara māri yoimis,” ato faito, ³⁹ kemanifo: “Akka nōko xini Abraham,” faifāfe, “Akka mā Abraham āfe fenafokī ¿afeskaī mā Abraham apaoni keskara mā amismamē? ⁴⁰ Epa Niospa ea yoimis keskara chanīma ē mato yoifiaino mā ea retepai. Abrahamkai mato keskara ipaonima. ⁴¹ Māto epa akai keskara māri mā amiski,” ato faito, “Nōkai Epa ichapayama. Nōko Epakōi fisti Nios. Nōfi āfe fakekōifoki,” faifāfe ⁴² Jesús ato yoini: “Ēfi Nios fe imiski. Ē Nios ariax oni. Ēa shināx na mai ano ē onima, ēfe Ēpa ea nīchini. Akka māto Epa Nioskē mā ea noikerana. ⁴³ ¿Afeskakī ēfe meka mā nikaimamē? A ē mato yoiaito mā nikakaspai. ⁴⁴ Akka māto epa Satanás. Mā āfe fakekōifo. Nāskaxō māto epa apaiyai keskara māri mā apai. Nāfi taeyoi retemitsamis iyopaoni. Afi iskaratīa nāskara. Atokai afara šhara yoimisma, chanīkōi. Āfe shinā mēraxō chanī fisti shināmis. Nāskaxō chanī fisti yoimis. Nā chanīai shināifāfe nā chanīmis nāfi āto apaki. ⁴⁵ Nā keskara chanī ē mato yoiyamafaito mā ea chanīmara famisma. ⁴⁶ Ē afaa chakafaito mā ea ōimisma.

Ēkai afaa chakafamisma. Ramashara ē chanīmisma. Ē askafiaito mā ea chanīmara famisma. ⁴⁷ Nā Nios fe rafeafāfe Niospa meka nikatirofo. Mākai Nios fe rafeama. Nāskaxō mā āfe meka mā nikaima,” ixō Jesús ato yoini.

Abraham fakeamano Cristo Apa fe iyopaoni

⁴⁸ Judeofāfe Jesús kemanifo: “Chanīma nō yoimimis. Mīfi samāritanō chakaki. Askatari mī mēra niafaka chaka nanea,” faifāfe, ⁴⁹ “Niafaka chaka ē mēra naneama. Ē ēfe Epa Niosnoa meka shara ē yoimimis. Akka māfi eōnoa meka chaka yoimimis. ⁵⁰ Askafixō, ‘Ea yoisharakāfe,’ ē yorafo famisma. Ēfe Epa Niospa meka shara eōnoa ato tāpimapai. Nāato ato yoitiro fatofomāki yora sharafo, fatoforimāki yora chakafo. ⁵¹ Chanīmakōi ē mato yoinō. Nā ēfe meka nikaifo nakanamax nīpanakafo,” ato faito kemanifo, ⁵² “Iskaratīa mā nō mia tāpikōi mīfi niafaka chakaya. Akka mā Abraham nani, Niospa meka yoimisfori mā nanifo. Nāskafikē mī noko yoiā: ‘Nā ēfe meka nikakōiaifo nātamaroko nīpanakafo,’ ixō mī noko yoi. ⁵³ Mā nōko xini Abram nani. Niospa meka yoimisfori mā nanifo. ¿Akka mī Abram finōkōiamē? ¿Mī shināimē ‘Ē ato finōara’ iki?” faifāfe, ⁵⁴ Jesús ato kemani: “A ēa ē yoimesharai ēfe meka sharama. Akka ēfe Ēpa eōnoa yoisharai. Mā a yoimimis: ‘Nōko Epa Nios,’ fakī. ⁵⁵ Mākai ēfe Epa Nios tāpimisma. Akka ēfi ēfe Epa tāpikōia. Akka ē mato keskaraxō, ‘Ēfe Epamara,’ ē fakerana mato keskara chanīmimis ē ikerana. Askatamaroko ēfe Epa Nios ē tāpikōia. Ea yoiāi keskara ē amis. ⁵⁶ Māto xini Abram yoini: ‘Cristo oaito ē ōixii,’ ixō yoi inimani. Mā ē oaito ea ōini askax fāsi inimani,” ato faito, ⁵⁷ “Mīkai cincuenta xiniya akama. Mīkai nōko xini Abram ōimisma. Afetīakai nanima. Akka, ¿afeskakī, ‘Ē Abram ōimimis,’ ixō mī noko yoimē?” faifāfe, ⁵⁸ “Chanīmakōi ē mato yoinō. Abram fakeamano ēfi iyopaoniki,” ixō Jesús ato yoini.

⁵⁹ Askaito nikakani nā judeofāfe āto xanīfofo ōitifishkikaxō tokiri fikaxō Jesús tsakapainifo. Askafapaiifaifono Jesús ato makinoax yamarisatani, Nios kīfiti pexefā mēranoax. Kaitokai tsōa ōinima.

9

Feronāfake fēxo kāini Jesús sharafani

¹ Jesús kakī feronāfake fēxo nāskarapa kāini fichini. ² Ōikakī aōxō tāpimisfāfe yōkanifo: “¿Maestro, afeskai na feronāfake fēxo kāinimē? Afara chakafakatsaxakī ikaraka, apa feta āfa afara chakafamifsono ikaraka,” ixō Jesús yōkanifo. ³ “Afara chakafayamafikatsaxakī nāskarapa fēxo kāini. Apa feta āfari afara chakafamismano nā feronāfake fēxo kāini. Nāskarapa kāini. Akka Niospamāi afama mūshti fatirokē nāskax fēxo kāini ato ōimasharaxikī. ⁴ Niospa ea nīchini ē yonoxonō. Nā ē akaitīa ē yonoxotiro. Akka fakishikai nō yonoxotiroma. Nāskarifiakī mā nō naxō nō anā Nios yonoxotiroma. ⁵ Ē nono mai ano iyoax ē pena keskara. Ē ato ōimayoi afeskax isharakanimākai,” ixō Jesús yoini.

⁶ Nāskara yoita maiki kemo mechota a mai kemō mechanafaxō a feronāfake fēxo aō fetekere ani. ⁷ Askafata, “Īamā fechokometāfe,” fani. Nā Īamā āfe ane Siloē, āto mekapa anemisfo na Siloē āfe ane “Nīchia” famisfo.

Nāskata fēxo Īamā kaax fechokomeni. Fechoxomēxō ōiakefaini. Nāskax oni. ⁸ Nāskata nā chaima nikafāfe a ōimisfāferi yoinifo: “Nā fēxo tsoaoax afara yōkakameaito nō ōimimis. ¿Nāmē?” faifāfe ⁹ atirifāfe, “Nākīa,” fanifo. Atirifāfe yoinifo: “Akerokōi,” fanifo. Nāskafikaxō yoinifo: “Nā keskarakōi,”

faifāfe, ato yoini: “Ēkīa. Ēfi fēxo iyopaoniki. Nāskafixō iskaratīa mē ōisharai,” ato faito, ¹⁰ “¿Afeskaxō mī iskaratīa ōisharaimē?” faifāfe, ¹¹ “Nā feronāfake ‘Jesúsra’ faifāfēfi āfe kemō mai mechanafaxō ea fetekere axō: ‘Nā Siloé iamā fechokometāfe,’ ea faano, Siloé iamā fechokomexō ē ōishara,” ato fani. ¹² Ato askafaito nikakaxō, “¿Fanīmē a feronāfake Jesús?” faifāfe, “Ētsa ē tāpiama. Mā fakira kaa,” ato fani.

Nā fēxo kāinito ōisharaino fariseofāfe a yōkanifo.

¹³ Askaito yorafāfe nā feronāfake fēxo iyopaoni fariseofo ano iyonifo. ¹⁴ Jesús nā feronāfake pena tenetitīa sharafani. ¹⁵ Fariseofāfe nā feronāfake anā yōkanifo: “¿Afeskax mī fero sharamē?” faifāfe, “Ea Jesús sharafaa āfe kemō mai mechanafaxō ea aō fetekere akano. Ē iamā fechokomexō ē ōisharakōia,” ato fani.

¹⁶ Nikakakī fariseo fetsafāfe yoinifo: “Akai Nios fe rafeama. Moisés kirika kenexō noko yoini iskafakī: ‘Pena tenetitīa nō yonotiroma,’ ixō yoini. Nāskakē nō yora sharafatiroma pena tenetitīa,” faifono, fetsafāfe ato kemanifo: “Akka yora chakapa fēxo sharafatiroma. Yora chakapakai nāto akai keskara fatiroma,” ikanax fariseofo fochishpanā faatanānifo. Atrifāfe fariseofāfe yoinifo: “Jesúskaī sharama,” faifono, atrifāferi, “Jesús sharaki,” fanifo. ¹⁷ Nāskata afianā fariseofāfe a yora fēxo ipaoni yōkanifo: “Mī noko yoia, ‘Nāto ea fero sharafaxōa,’ fakī. ¿Akka afaa mī shināimē tsoamāki?” faifāfe, “Nā Nios ato yoixomisto ea sharafaa,” ato fani.

¹⁸ Ato askafaito nikakakī judeo fetsafāfe, “A chanīra,” fanifo. “Na fēxo ipaonima,” ixō. Nāskaxō fariseofāfe apa yafi afa kenaxō yōkanifo. ¹⁹ “¿Namē mī fake fēxo ipaoni? Akka, ¿afeskakī iskaratīa ōimē?” faifāfe, ²⁰ “Nākīa nōko fake, nā fēxo kāini. Mā nō tāpia nōko fake. ²¹ Tiiri afeskara axora mā ōi nōkai tāpiama. Akka fakefomaki, xiniki mato yoitiroki afeskax sharamāki. Yōkakāfe,” afa feta āpa ato fani. ²² Judeofoki mesekakī nānori yoinifo. Akka judeo xanifāfe yoyoini iskafakī: “Tsōa yoitiroma: ‘Epa Niospa Jesús nīchini nōko Ifo Cristo inō,’ ixō yoitiroma. Akka askara yoixō anā nōko ichanāti pexe ano ikitiroma,” judeo xanifāfe anori ato yoiaino nā fēxo ipaonito āfe afa fe āfe apa mesenifo. ²³ Nāskaxō ato yoinifo: “Xiniki fakefomaki. Yōkakāfe,” ato fanifo.

²⁴ Nāskata fariseofāfe nā feronāfake fēxo ipaoni yōkanifo: “Noko yoiki iskafafe: ‘Niospa ea sharafaa,’ ife,” fanifo. “Jesúskaī sharama. ‘Niosfi sharaki,’ ife. ‘Jesús sharara,’ fayamafe. Nō tāpia Jesús chakaki,” fanifo.

²⁵ “Ētsa. Ē tāpiama chaka iyamai shara rakikīa. Ē tāpia ē fēxo iyopaoni ē iskaratīa ōisharai. Nā fisti ē tāpia,” ato faito, ²⁶ “¿Afeskafaxō mia sharafamē?” ixō yōkaifāfe, ²⁷ “Ē mato yoiaito, ¿mā ea nikamamē? ¿Afeskakī mā afianē ea yōkaimē? ¿Māri aōxō tāpimis mā ipaimē?” ato faito, ²⁸ nikakakī ichaketsanifo. Nāskaxō yoinifo: “Mīfi a Ifofaikai. Akka nōfi Moisés meka nikamiski. ²⁹ Nō tāpia Moisés Nios fe mekapaoni. Nōkai na Jesús tāpiama. Fakira anoax oa afe keskarara a feronāfake nō tāpiama,” faifāfe anā ato kemani: ³⁰ “¿Mā tāpiamamē fakira anoax oxō ea sharafaa ē fēxokē? ³¹ Nō tāpia yōra chakafamisfokai Niospa ato nikapaitiroma. Fatorato Nios Ifofasharapai isharatiro. Nāskara Niospa nikapai. ³² Nā Niospa mai onifani chāikai nō afaa nikayomisma yora fēxo kāini tsōa sharafai. Akka iskaratīa mā ea Jesús sharafaa. ³³ Na feronāfake Niospa nīchiyamanokai afaa afeskafakeranama,” ato faito, ³⁴ nikakani akiki ōitifishkinifo. “Mīfi chakakōi kāini. ¿Afeskakī mī noko tāpimaimē mī

chakafixō? Anā nōko ichanāti pexe mēra mī ikitiroma. Nonoax kariskatāfe. Nōkai anā mia ōipaima. Anā nōko ichanāti pexe mēra ikiyamafe,” fanifo.

Fatorafāfe Jesús chanimara fayamakanax nā yora fēxo keskarakōifo

³⁵ Nāskano nā fēxo imis āto ichanāti pexe mēraxō potaifāfe nikafaini Jesús kani. Nāskaxō fenakī a fēxo imis fichini. Fichixō yōkani: “¿Mī Niospa Fake chanimara faimē?” ixō yōkaito, ³⁶ “¿Fatomē ē chanimara fanō?” faito, ³⁷ “Nā mī ea ōi. Ēkīa,” Jesús fani. ³⁸ Askafaito ratokonō mai chachipakefōfā yoini: “Ifo, ēfi mia chanimara faikai. Mī fāsi sharakōi. Ē mia Ifofai. Mī Niospa Fakeki,” ixō yoini.

³⁹ Askata chipo afianā yorafo akiki feafāfe Jesús ato yoini iskafakī: “Ēfe Epa Nios ika anoax ē nono mai ano oni. Fato yorafomāki a ea nikayamaifo, fatoforimāki a ea nikaifo ē ato ōiyoi oni. Fatotora shināi iskaito: ‘Mē afara chakafamiski. Ea chaka soaxope,’ ixō anori shināito ē āfe chaka soaxotiro afianā afara chakafayamanō. Ē na fēxo fero sharafaxōa keskafakī ē yorafo āto chaka soaxotiro shara inōfo. Akka fetsafāfe shināi iskakani: ‘Ē afaa chakafamisma, ē yora sharakōi. Ē tāpikōia,’ ixō shinākani. Askarāfofi yora fēxo keskarafokī, a ato sharafamis ano fopaikanima ato sharafapanā. Nāskarāfāfekai yoipaikanima āto chaka soapaikanima. Nāskarāfo fenopakenakafo,” ixō Jesús ato yoini. ⁴⁰ Fariseofāfe a Jesús yoiai nikakaxō yōkanifo: “Kee. ¿Mī noko yoimē nōmē fēxo?” faifāfe ⁴¹ Jesús anā ato yoini: “Mā ea yoikerana: ‘Nō fēxo keskarāfo. Mā nō afara chakafamis,’ ixō mā ea yoiaito ē mato chaka soaxokerana. Akka mā kai ea askafamisma. Mā yoimis: ‘Nō ōisharatiro. Nōkai fenoama. Nō sharakī. Nōkai chakama,’ ixō anori mā yoimis. Akka māto chaka soaxma, mā fenokōiax Epa Nios ika ano mā nokopakenakama,” ixō Jesús ato yoini.

10

Oveja keneaki keparanākī Jesús ato yoini

¹ (Askata Jesús ato tāpimani nāatomāi āto kexekatsaxakī. Oveja kexemisto āfe ovejafo kexemis keskari fakī nāskarifiakī Jesús ato kexemis.) Nānori Jesús ato yoini iskafakī: “Chanīmakōi ē mato yoinō. Yōra ovejafo kenexotiro āfe kene mēra inōfo, faki fofāsanōma. Nāskata yora yometsopai ovejafo āfe kāiti ano ikitiroma, fomākīari ikitiro. ² Akka nā ovejafo kexemis nā oveja kāitinī ikikaitiro. ³ Kāiti ano nokoano feronāfake nā kāiti kexemisto fepoti fēpexonano oveja kexemis ikitiro. Nā oveja kexemis ikiano āfe ovejafāfe āfe oi tāpikatirofo. Nāskaxō āfe ovejafo āfe anē ato kenaito āfe ovejafāfe chīfafāitirofo. ⁴ Nā ovejafo kexemis rekē kaino āfe ovejafo āfe kene mēranoax kāiferatirofo. Māmāi āfe oi tāpikanax nāskaxō chīfafaitirofo. ⁵ Akka a kexeamatokai iyotiroma, āfe oi tāpikatiro, a ato kexemisto āfe oikairoko askarakē. Nāskakē a makinoax ichotirofo,” ixō Jesús ato yoini. ⁶ Jesús nā ovejafoki keparanākī ato yoini. Ato yoiaito tsōa tāpinifoma.

Jesús noko kexesharamis

⁷ Nāskano Jesús afianā ato yoini: “Ē chanīmakōi mato yoinō. Nā ovejafo kene mēra ikikani nā kini fisti mēra ikitirofo. Ēfi na oveja kini keskaraki. Nā Epa Nios ano ikipaikani eōnoax fisti ikitirofo. ⁸ Ē matoki nokoamano fetsafāferi mato yoikī iskafakani: ‘Ēfi Cristoki. Ē mato tāpimatiro afeskax mā Epa Nios ari nokotiromāki afe ipaxakī,’ ixō anori yoikani āa chanīmisfo.

Yometso keskarakōifo. A Nios chanīmara faifo ato pārapaikani: ‘Noko fisti nikanōfora,’ ikaxō. Nāskakē Niospa fakefāfe ato nikakanima, ‘Noko fisti nikanōfora,’ ixō ato pārapaiyaifono. ⁹ Akka ēfi na kini kāiti keskaraki. Nā ēfe Epa Nios ika ano ikipaikani eōnoax ikitirofo afe ipaxakakī. Nāskatari eōnoax isharatirofo anā fekaxtetrofoma. ¹⁰ Akka fetsafāfe efe yorafo ato pārapaikani: ‘Ea ifofakāfe. Ē mato tāpimasharanō,’ ixō ato yoifikakī anorima ato pārakani. Nāskakaxō emakino ato ifipaikani. Yometso keskarakōifo. A ea chanīmara faafo ato kexesharapaikani. Ato chakafata ato retepaikani. Akka ē askarama. A ea Ifofamisfo ē ato kexesharai efe isharapakexanōfo, nono nāmānoaxri isharapakexanōfo. Nāskax ē nono nāmā oni ato kexesharaxikī.

¹¹⁻¹³ “A ea chanīmara faifo ovejafō keskarafo. Ēfi nā oveja kexesharamis keskaraki. Nāskakē ē efe yorafo ē ato nāxoxii. Oveja ifāfe feronāfake fetsa kori inātiro āfe oveja kexexonō. Nāskaxō mā kori ināno nā feronāfake oveja kexesharatamaroko, kori fisti shinātiro. Nāskakē poomā oaito fichiāx ovejafō kexetama ichotiro. Nāskaxō shināi iskakī: ‘Na poomā mesekōi. Na ovejafō ēfenākōima, aa poomānā pinō ēfenākōimakī. Nāskakē ē ichoikai ea poomānā afeska fanōma,’ ixō shinātiro. Akka ovejafāfe ifokōi askarama. Āfe oveja kexesharai. Poomā oaito fichixō ato kexesharatiro, poomānā ato afeska fanōma. Nāskaxō shinātiro iskakī: ‘Ēfe ovejafōnoax ē natiro afokai afeskatiroma,’ ixō shinātiro.

¹⁴⁻¹⁵ “Ēfi nā ovejafāfe ifo keskara sharakī. Ovejafō āfe ifāfe ato tāpia atomāi kexesharakatsaxakī. Ēri nā ea chanīmara faafo ē ato kexesharamis. Ēfe Epa Niospa ea tāpikōia. Ēri ēfe Epa ē tāpia. Nāskarifiakī a ea chanīmara faafo ē ato tāpia. Afāferi ea tāpiafo. Nāskax ē atoōnoax naxii. ¹⁶ Yora fetsafāferi ea chanīmara faxikani. Afokai nono ikafoma. Mai fetsa ano ikafo. Nāfāfe ea nikasharaxikani. Nāfo ēfe Epa ika ano ē ato iyotiro. Akka nā yora fetsafāfe a nono ikafāferi ea chanīmara fakanax yora fisti keskara ixikani. Nāskax Epa Niospa yorakōifo ixikani. Eres fisti ē ato kexesharai. ¹⁷ Ē ato kexeax ē atoōnoax naxii. Nāskaito ēfe Epa Niospa ea noi. Naax ē anā otoxii. ¹⁸ A ea chanīmara faafoōnoax ēakōi ē nai, ea tsōa retekaranama. Ēfe Ēpa ea yoini keskara ē atoōnoax naikai. Ēfe Epa Niospa ea yoini keskara ē atoōnoax nafiax ē anā otoxii,” ixō Jesús ato yoini.

¹⁹ Nikakaxō judeofāfe chanīmara fanifo. Akka atirifāfe chanīmara fanifoma.

²⁰ Atirifāfe yoini iskafakakī: “Niafaka yōshi chaka a mēra nanea. Afaa tāpiana. Noko yoiai nō tāpitiroma. Ķafeskakī na feronāfake nō nikatiro mē?” ixō yoinifo.

²¹ Akka atirifāfe yoinifo: “Niafakakai a mēra naneama. Niafaka a mēra naneanokai iskara meka shara yoikeranama. Niafakakai feronāfake fēxo ōimatiroma,” ixō yoinifo.

Judeofāfe āto xanīfofōfāfe Jesús chanīmara fanifoma

²²⁻²³ Askafafono Jesús kani judeofāfe āto Nios kīfiti pexefā mēra Jerusalén ano mā mechakaino. Nāno tapas keskara ini pexe kachiori. Ano Jesús kani. Nā tapas āfe ane Salomón. Nāskatari judeofāfe āto fista anifo. Nā fistaťia shinānifo a Niospa pexe onifani.

²⁴ Judeofāfe āto xanīfofo Jesúski fenifo yōkai fevani: “ĶMīmē Cristoki? Noko yoife. Ķafeskakī mī noko yoisharaimamē? Ķafetākairoko mī noko xafakīa yoimē?” faifāfe, ²⁵ “Ē mato yoifimiskē mā ea chanīmara faima. Ēfe Epaōxō a yorafāfe atiroma keskara fakī mē mato ispa ēmāi Niospa Fakexō. ²⁶ Akka

mākai ea chanīmara faima mākairoko Ēpa Niospa yorafoxō. ²⁷ A ea chanīmara faifāfe ea nikasharatirofo. Mē ato tāpia a ea Ifofakōinafo. ²⁸⁻³⁰ A ea Ifofaafoma omiskōipakenakako mēra fokani. Akka a ea Ifofamisfokai ari fokanima. Askatamaroko ē ato imasharapakenaka. Epa Niospa atoya ea rafemani. Epa Niospa keyokōi ato finōkōia. Ē ēfe Epa Nios fe nā yora fisti keskara. Nāskakē a ea Ifofamisfo emakinoa tsōa ato ifitiroma, ēfe Epa makinoari tsōa ato ifitiroma,” ixō Jesús ato yoini.

³¹ Nikakaxō judeofāfe āto xanīfofōfāfe anā tokiri fikaxō aō Jesús tsakapainifo retapaiyanā. ³² Nāskafaiāfāfe Jesús ato yoini: “Epa Niosxō afama mīshti ē mato ispa tsōa atiroma keskafakī. Akka, *zafaōxokai mā ea tokirinī tsakaimē?*” ato faito, ³³ “Akka na afama mīshti mī noko ispaōxokai nō mia tokirinī tsakaima. Akka nā mī meka chakaōxō nō mia tokirinī tsakapai, ē Nios keskara mī ikaito. Anā ano Nios fetsama. Mīri noko keskara yora. Akka mī noko yoiā: ‘Ēri Nios keskara,’ iki. Akka mī Nios chakafai. Nāskakē nō mia tokirinī tsakai,” faifāfe, ³⁴ Jesús ato kemani iskafakī: “Mā iskaī: ‘Anā ano Nios fetsama,’ mā imis. Akka nā Niospa meka yoimisto kirika keneni iskafakī: ‘Ē mato yoi māfi Nios keskarakōifokī. Niospa mato nīchia,’ ixō kirika keneni, Niospa meka yoiKī. Akka nā meka tsōa chanīra fatiroma. ³⁵⁻³⁶ Akka Niospa anori yoifiano *zafeskakī mā ea yoimē ē Nios chakafai?* Akka Niospa ea nai mēraxō nāmā nīchini. Nāskakē ē mato yoitiro ēfi Niospa Fakeki. ³⁷⁻³⁸ Mākai ea nikapaima. Ēfe Epa Niospa aka keskara ē ayamakē, āa chanīra mā ea fakerana. Akka ēfe Epa akai keskara ēri akaito mā yoikerana: ‘Chanīma Epa Niospa atiro keskara Jesús aki,’ ixō mā yoikerana. Nāskakē a ē afama mīshti akaōxō ea chanīmara fakāfe. Ēfe Ēpa akai keskara ēri akaito mā ea tāpitiro ēfe Epa fe ika,” ixō Jesús ato yoini.

³⁹ Nikakaxō anā Jesús achipaifiaifono, ato makinoax kaitokai tsōa tāpinima. Nāskakē tsōa achinima.

⁴⁰ Ato makinoax kai, faka Jordán ari kani nā Juan yorafo maotisafapaoni ano. Nāno chaimashta Jesús nēteni faka kesemē. ⁴¹ Nāskakē yorafo akiki fēkaxō yoinifo iskafakakī: “Jesús Niosxō afama mīshti fakī noko ispa. Juankai askafapaonima. Askafixō Juan Jesúsnoa noko yoini chanīmakōi,” ikanax yoinānifo. ⁴² Nāskakaxō yora ichapato Jesús Niospa fakera fakaxō Jesús chanīmara fanifo.

11

Lázaro mā nani (Mt. 12.46-50; Lc. 8.19-21)

¹ Askata feronāfaka Lázaro isinī ini. Nā Lázaro Betania ano ikax isinī ini. Poi rafe fe ikax María ikaino, Marta ikaino, nā rafe ato fe ikax. ² Nā María pirofomā sharakapa Jesús āfe tae pemākīa nachiyoni. Nāskaxō āfe fōo otekere ani.

³ María feta Marta iskafakī Jesús yoitanōfo ato nīchini: “Ifo, mī yamakōi Lázaro isinī iki kiki,” ikaxō yoitanōfo. ⁴ Kenamanaiāfāfe nikaxō Jesús aōxō tāpimisfo ato yoini iskafakakī: “Nā Lázaro isinī ikai naima. Akka yorafāfe ōikani ē afara afeskarafaito. Nāskakē ea tāpikani ēmāi Niospa Fakekē. Nāskaxō yorafāfe yoikani: ‘Epa Nios fāsi sharakōi,’ ikaxō yoimōfo,” ixō Jesús ato yoini.

⁵ Jesús poi rafeya Lázaro noikōini. ⁶ Lázaro isinī ikaito nikafi Jesús oxa rafeyoni. ⁷ Nāskata a aōxō tāpimisfo Jesús yoini: “Nō Judea mai ano nō anā kanō,” ixō Jesús ato yoini. ⁸ Ato askafaito kemanifo: “Maestro, nōko xanīfofāfe

Judea anoxō mā mia retekeraitafo. ¿Afeskai mī afianā ari kapaimē?” ixō yoiaifono, ⁹ Jesús anā ato kemani: “Penata nō ōisharatiro. Xinī chaxaino nō ōisharatiro. Nāskax nō otisikax nō paketiro. Nāskarifiakī pena tii Niospa ea amapaiyai keskara ea tāpimani. Nāskaxō ea kexeano ē mesetiroma. ¹⁰ Akka fakishi yora kai xafasharayamano otisikax paketiro. Nāskarifiakī Nios fe rafeamato tāpisharatiroma afeskax isharatiromāki. Askax fenotiro,” ixō Jesús ato yoini.

¹¹ Nānori ato yoita anā Jesús ato yoini iskafakī: “Nofe yora Lázaro mā oxakē ē mōikai,” ato faito, ¹² a aōxō tāpimisfāfe nikakaxō yoinifo: “Ifo, akka oxakōiax naima. Chipo sharatiro,” fanifo. ¹³ “Nofe yora Lázaro mā oxaki,” Jesús ato fani. Mā Lázaro nafiakē ato tāpimapainima. Nāskakē shinānifo: “Lázaro oxara,” ikaxō tsōakairoko tāpixō. ¹⁴⁻¹⁵ Nāskaxō Jesús ato xafakīa yoini mā Lázaro nakōinano: “Mā Lázaro naki. Nāskax ē inimaikai ē ano ikamano Lázaro naki. Akka mā ea chipo ōitiro ē afara afeskarafaito. Nāskaxō mā ea chanīmara fai. Nāskakē iskaratīa nō Lázaro ano kanō,” ixō Jesús ato yoini. ¹⁶ Ato askafaito nikakata Tomás nā Rafe Naneni nāato Jesúsxō tāpimis fetsafori ato yoini: “Nō kanō nōri afe naxikī,” ixō ato yoini.

Jesús fistichi naafo ato otofatiro

¹⁷ Askata Betania ano nokoxō Jesús nika: “Mā Lázaro naa,” nikani. Mā cuatro nia oxa nikani a maifaitafo mafa kini mēra, Betania ano. ¹⁸ Betania fe Jerusalén chaima ini. ¹⁹ judeofo ichapa María fe Marta ika ano fenifo ato ferarofai fekani, mā āto poi naano.

²⁰ Nāskata Marta Jesús oaito nikai akiki nokoikai kani María pexe mēra nīchifaini. ²¹ Marta Jesúsiki nokoxō yoini: “Ifo, mī nono ikanokai ēfe exto nakeraitama. ²² Ē tāpia mī iskaratīa afara fetsa mī Nios yōkaito mia ax-orisafatirokī,” faito, ²³ “Extofi anā otoi kiki,” faito, ²⁴ “Ē tāpia nā namisfo mā mai keyoaino afianā ototokani. Ēfe extori ototokii,” ixō Marta yoiaino, ²⁵ Jesús kemani: “Eōnoax nā nafo tii otokani. Akka eōnoax niafori. Nā ea chanīmara faax nafiax anā ototokii kiki. ²⁶ Nāskakē ea chanīmara faax anā nanakama. ¿Nāskakē mī ea chanīmara faimē?” faito, ²⁷ “Ēje, Ifo, ē mia chanīmara fai mīmāi Cristokē, Niospa fake. Nō mia manamis. Akka nōko xinifāferi Cristo manapaonifo. ‘¿Afetīa na mai ano Cristo oimē?’ ikaxō nōko xinifāfe mia manapaonifo,” Marta fani.

Lázaro mafa kini mēra maia ōi Jesús oiani

²⁸ Nāskata mā yoikī xateta, Marta āfe chiko María yoikai kani. Kaxō ōia a María fe rafeafo oiyakani inifo. Nāskata Marta āfe chiko María one mēshanāxō yoini: “Mā nōko Ifo oaki. Mia kenamana, ōikofe,” fani. ²⁹ María nikata fininākakafāta kani Jesúsiki nokoikai. ³⁰ Jesúsiki pexe rasi ano nokoama ini. Nā Marta akiki nokoano Jesús nēteni. ³¹ Mā María ato fe oiafai kaino a afe oiafaiyaiifāfe ōinifo. “María poi maia mānāonoax oiai kai kiki,” ikaxō chīfafainifo.

³² Nāskata Jesúsiki nokota ratokanō mai chachipakefōfā yoini: “Ifo, mī nono ikanokai ēfe exto nakeraitama,” María fani. ³³ María oiaito Jesús ōini. Judeofori a María fe feafori oiaifāfe Jesús ato ōini. Nāskaxō ato shinākōini. ³⁴ Nāskaxō ato yōkani: “¿Fanī mā maifaitamē?” ato faino, yoinifo: “Ifo, ono nō akitakīa ōiyopo,” fanifo. ³⁵ Askafaifono Jesús oiani. ³⁶ Oiaito ōikakī judeofāfe: “Ōikapo. Lázaro manoi oiai,” fanifo. ³⁷ Nāskaxō fetsafāfe yoinifo: “Nā fēxo sharafaita keskafaxō, ¿afeskafakī nonoxō Lázaro sharafaitamamē?” fanifo.

Jesús Lázaro otofani

³⁸ Nāskata Jesús anā shināmitsani Lázaro maia ano nokoax. Nā Lázaro maia ano nā kini tokiri efafato fepofo ini. ³⁹ Nāno nokoxō Jesús ato yoini: “Na tokiri aō fepoa fepekāfe,” ato faito, nikakī Marta yoini: “Iskaratīa mā pisiaki,” faito, ⁴⁰ nikakī anā Jesús yoini: “¿Ē mia yoiaito mī ea nikaimamē? Ea mā nikaino Niospa afara shara faito mī ōitiro,” fani. ⁴¹ Askafaito nikakakī fēpexonifo. Fēpexonaifono nai foisnifofāta Apa yoini: “Epa, ē mia kīfaiato mī ea nikai. Ē mia aicho fai. ⁴² Ē tāpiaki ea mā nikafafāimiskī. Nāskakī ē mia kīfi na yorafāfe mia chanīmara fanōfo. Nāskakaxō ea tāpinōfo ea mā nīchiniki.”

⁴³ Apa kīfikī askafata fāsikōi Lázaro kenani: “Lázaro, kini mēranoax kāikerafe,” faino, ⁴⁴ Lázaro kāikerani nā aō rakoitafoya. Nāskaxō ato yoini: “Na mā aō rakoita pekakāfe kāisharanō,” ato fani.

“¿Afeskaxō nō Jesús retetiromē?” ixō shinānifo (Mt. 26.1-5; Mr. 14.1-2; Lc. 22.1-2)

⁴⁵ Nāskata judeofo a María fe feafāfe Jesús Lázaro otofaito ōikakī Jesús chanīmara fanifo. ⁴⁶ Nāskafaito ōikani atiri fariseofoki chanifokani fonifo. ⁴⁷ Ato yoiaifāfe nikakanax fariseofo fe a Nios ato kīfixomisfāfe āto xanīfofo ichanānifo. Ichanākanax yoinānifo: “¿Nō Jesús afeska faimē? Tsōa atiroma keskara fai kiki. ⁴⁸ Nō afeskafayamaino keyokōichi chanīmara fakani kiki. Romano xanīfokōifo fēkaxō noko yoitirofo iskafakakī: ‘Mā kai anā xanīfoma,’ noko fatirofo. Nāskaxō nōko kīfiti pexefā noko pōtatirofo,” ikanax yoinānifo. ⁴⁹ Nāskaiifāfe Nios ato yoixomis xanīfokōichi Caifás ato yoini: “Māfi tati-makōikī,” ato fani. ⁵⁰ “¿Mā tāpiamamē? na feronāfake fisti a yorafōnoax naxiai. Nāfi sharaki. Ares fisti natiro nō nanōma, nōko kaifo fetsafori nanōfoma,” ixō ato yoini. Chanīmakōi Caifás yoini a ixiai keskara yoikī.

⁵¹ A Caifás yoiai āa shinākī yoinima. Niospa āfe shināmā shināmanaino yoini. Nios kīfixomisfāfe āto xanīfokē Niospa āfe shināmā shināmanaino, “Jesús judeofonoax naxira,” ixō yoini. ⁵² Jesús kai judeofo fistiōnoax naima. Mai fetsa ano ikafāferi chanīmara faafono ato nāxoxii. Nāskata Niospa fake ixikakī noinānkōikanax, nā yora fisti keskara ixikakī.

⁵³ Nāskata nā penata judeo xanīfofōfāfe shinānifo: “¿Afeskaxō nō Jesús retetiromē?” ikaxō pena tii shināpaonifo. ⁵⁴ Mā retēpaiyaifono tāpiax judeofo ano anā Jesús kanima. Yorafā rasi ano katamaroko pexe fisti rasi ano kani, nā pexe āfe ane Efraín ano, tsōa istoma ano. Nā aōxō tāpimisfo fe nāno iyoni.

⁵⁵ Judeofāfe āto fista Pascua mā chaima ikaino, yora rasi Jerusalén ano fonifo, Pascua fista akifokani. Moisés āto xinifo yoipaoni keskai akairi āto chaka soapaikani Nios kīfiti pexefā mēra ikifokani, fista ikamano fonifo.

⁵⁶ Nāskaiifono judeofāfe Jesús fenanifo. Nāskakanax Nios kīfiti pexefā mēra ikinifo. Nānoax yoinānifo: “¿Fani mē Jesús?” ikanax yoinānifo. “ ‘Nonoxō Jerusalén anoxō Jesús fista akiyoira,’ ¿mā ikimē?” ikanax aa ranā yoinānifo.

⁵⁷ Askakaxō judeofo āto xanīfofo feta fariseofāfe ato yoinifo iskafakakī: “Jesús fichixō noko tāpimakāfe nō achinō,” ato fanifo.

12

Kēromā Jesús shinākī pirofomā āfe tae pemākīa nachini (Mt. 26.6-13; Mr. 14.3-9)

¹ Nāskano seis nia Pascua fista mā chaima ikaino Jesús aōxō tāpimisfo fe Betania ano kayoni. Nāno Lázaro ika ini. Nā Lázaro nakē Jesús otofani.

² Nānoxō Jesús pimaxikakī pīchanifo, a Jesús fe foafāferi pinifo. Lázarori ato feta pini. Nā Marta ato pimani. ³ Mā piafono María Jesúski oni āfe pirofomā sharaya. Oxō nā pirofomā āfe tae pemākia nachini. Nāskaxō āfe fōo otekere ani. Nāskafaano yorafāfe nā pexe mēra ikafāfe nā pirofomā sharakōi xetenifo. ⁴ Nā Jesúsxō tāpimis fētsa nā Judas Iscariote, Simón fake, nā ato achimaxiaito yoini, ⁵ “Kee. ¿afeskakī na kēromā pirofomā shara potaimē? Ato minixō kori ichapa fixō noko inākerana a afaamaisfo nō ato ināpanā. Nāskax shara ikerana,” Judaspa fani. ⁶ Anori Judaspa yoifikī ato kori inākeranama. Nā Judasfi yometsokōi iniki. Nā Judaspa āto kori kexexopaoni. Yometsofixō nāskakē tsōa tāpipoanima. Nā kori fixō a afaamaisfo ato inākeranama, nā a kori onekerana. ⁷ Nāskafaito nikakī Jesús Judas yoini: “María fekaxtefayamafe. Ē samamashta naito mā tāpixō ekeki pirofomā nachia,” fani. ⁸ “Nā yora afaamaisfo mato fe ipanakafo. Nāskakē mā ato mēxotaima afarafo inātiro. Akka ēkai mato fe nono mai ano ipanakama, ē mato yoi. Akka nā María iskaratīa ea shara faa,” ato Jesús fani.

Judeofāfe āto xanīfofōfāfe Lázaro retepainifo

⁹ Nāskata judeofo ichapa rasi Jesúski fenifo, Betania ano ikano mā tāpikanax Jesús fistikai ōifekani fenifoma. Lázarori ōifekani fenifo. Nā Lázaro Jesús otofaita nikakaxō ōipainifo. ¹⁰⁻¹¹ Nā Lázaro Jesús otofaita nikakaxō judeofāfe ranārīto anā āto xanīfofo tananifoma Jesús fisti chanīmara fakakī. Nāskaifono nā xanīfofo ōitifishkikanax yoinānifo: “Jesús yafi Lázaro nō retenō. Jesús fistima. Lázarori nō retenō,” ikanax yoinānifo.

Jesús nokoni Jerusalén ano

(Mt. 21.1-11; Mr. 11.1-11; Lc. 19.28-40)

¹² Nāskano pena fetsa judeofāfe āto fistatīa yorafā rasi Jerusalén ano fenifo. Jesús nokoaito nikakani nāskax akiki fenifo. ¹³ Epe pei tsoamakanax akiki fekani. Nāskakanax fāsikōi tai tai ifenifo iskakani: “¡Sharafinakōi nokoki oi kiki Niospa nīchiano! Israelifo mī nōko xanīfo oi nokoki. ¡Sharafinakōia!” ikaxō fāsikōi yoinifo. ¹⁴⁻¹⁵ Askafaifono Jesús burro fakeshta kamaki tsoax oni. Niospa meka fētsa keneni iskafakī Niospa shināmanaino:

Jerusalén ikafāfe, rateyamakāfe. Māto xanīfo matoki oxii burro fakeshta kamaki tsoax, ikaxō kirika keneni. ¹⁶ Nāskafikē Jesúsnoa yoikī kirika keneni keskara aōxō tāpimisfāfe tāpiyonifoma. Akka mā reteafono otoax Apa ari kaano nāskakē aōnoa tāpinifo. Iskakakī shinānifo: “Nā Jesús nono mai anoxō a afama mīshti axiai aōnoa yoikakī kirika keneyoni. Nōko xinifāfe Jesús fakeyoamano a inōpokoai aōnoa yoikakī kirika keneni,” ikaxō Jesúsxō tāpimisfāfe āto ōiti mēraxō shinānifo.

¹⁷ Jesús Jerusalén ano nokoaino nikakakī yorafā rasichi a mananifo ōipakakī. Atirifāfe mā Lázaro nakē Jesús otofaitano ōinifo. Nāskakē mā Lázaro Jesús otofaita ōikanax fetsafokī chaninifo akairi tāpinōfo. ¹⁸ Jesús Lázaro mā nakē otofaita nikakaxō nāfāferi ōipainifo. Nāskaxō fai nēxpakīaxō mananifo. ¹⁹ Nāskakē fariseofo yoinānifo: “Kee. Shinākapo. Nōkai na yorafo afeska fatiroma anā Jesús tanayamanōfo. Tsōakai noko anā tanapaima keyokōichi yorafāfe Jesús nikakōipaikani,” ikanax yoinānifo.

Griegofāfe Jesús fenanifo

²⁰ Nāskata Jerusalén ano nā yorafā rasi mēra griegofori ato fe inifo judeofāfe āto fista akaifono. ²¹ Nānoax Felipe ano fonifo, Felipe yōkai fokani. Nā

Felipe Galilea mai anoax fakeni, nã pexe rasi ãfe ane Betsaida anoax. Felipe ano fokaxõ griegofãfe Felipe yõkanifo: “Nõ Jesús õipai noko efexõfe nõ afe yoinãno,” Felipe fanifo.

²² Askafaiãfe nikaxõ Felipe Andrés yoini: “Na griegofõ Jesús fe meka-paikani-kiki. Nõ Jesús ato yoixonõ,” fani. ²³ Yoiaifãfe nikakĩ Jesús ato kemani: “Ëfi samamashta ãfe Epa ari ã kaikai afe xanĩfo ikikai. Akka ãfe Epa ari kayotama ã yorafonoax nayoxii. ²⁴ Akka ã mato tãpimani mã tãpinõ. Xiki fero fisti nõ fanayamano kãitiroma. Akka nõ fanasharano foaix ãfe fimi ichapa itiro. Nã nõ fana ãfe exe fisti payokometiro, akka ãfe kaya yositiro. Nãskarifiã ã matoõnoax nayamakẽ mã efe ipaxatiroma. Eres fisti ã ipaxatiro. ²⁵ Akka ãa fẽtsa shinãi iskai: ‘Niospa ea amapaiyai keskara ã shinãima, ãa ã apaiyai keskara ã shinãi,’ ixõ anori shinãi fenotiro. Akka nã iskakĩ shinãi: ‘Ë nono mai ano niyoxõ ã apaiyai keskara ã shinãipaima, Niospa ea amapaiyai keskara fisti ã shinãpai,’ ixõ shinãi afi Epa Nios fe nipanakaki. ²⁶ Akka a ea yonoxopaikĩ ãfe meka nikakõixõ a ã yoiai keskara atiro. Ea Ifofax a ã ika ano nãri efe ipaxatiroki. Ea yonoxomis a ã yoiai keskara ea axõaito ãfe Epa Niospa yoixii iskafakĩ: ‘Aicho. Mĩ ãfe Fake Jesús nikasharamiski. Mĩ fãsi sharakõiki,’ Epa Niospa yoikĩ iskafaxii a ea Ifofamis.

²⁷ “Iskaratã ãfe õiti mẽra ã shinãmitsai. ¿Ë afeskaimẽ? Akka, ‘Epa, ea ifife ea omiskõimayamanõfo,’ ã faima. Akka ãfe Ëpa ea nĩchini ã ato omiskõixonõ,” ato Jesús fani. ²⁸ Nãskaxõ Jesús Apa yoini: “Epa, eõxõ ato ispafe mã fãsi sharaki,” ixõ Jesús Apa yoini. Askafaito nikakĩ nai mẽraxõ fãsikõi Niospa kemani: “Ë mĩõxõ mã ato ispa ãmãi afama mĩshti shara fakĩ afianã afama mĩshti ã ato ispai,” ixõ yoini.

²⁹ Nã yorafã rasichi anoxõ nikakani yoinãnifo. Atirifãfe yoinifo: “Mã nai tiri ika,” fanifo. Atirifãfe yoinifo: “Epa Niospa ãjirinĩ Jesús yoia,” ikanax yoinãnifo. ³⁰ Nãskaifono Jesús ato yoini: “Na meka nai mẽranoa mã nikai ea tãpimatama, mato tãpimaxikĩ yoia,” ato fani. ³¹ “Iskaratã nã ea Ifofaifoma Niospa ato omiskõimani. ãto ifori nã yõshi chaka Satanãs nãri ãfe Epa Niospa potaxii anã xanĩfo inõma. ³² Akka ãfi yõra fakekõi. Ea retexaxõ ifi cruz ikakĩ ea mastakaxõ ea fininĩfõfaxikani. Ea askafaifono ã yorafo ã ato ifi efe rafenõfo,” ixõ Jesús ato yoini. ³³ Nãnori ato yoini nã ifi cruz ikakĩ mã mastaxiaifono ato tãpimani.

³⁴ Nikakaxõ yorafãfe nãno nixõ yoinifo iskafakakĩ: “Niospa meka sharaõnoa kirikaki kenekĩ yoikĩ iskafanifo: ‘Cristo, nã Niospa nĩchia nĩpanaka nanakama,’ fanifo. Akka, ¿afeskakĩ mã noko yoimẽ iskafakĩ?: ‘Na yõra fakekõi retexaxõ ifi cruz ikakĩ mastakaxõ fininĩfõfaxikani,’ mã noko fai. ¿Akka tsoaõnoa mã noko yoimẽ?’ fanifo. ³⁵ Askafaifono Jesús ato yoini: “Ë nono ika pena keskara shara. Nãskakẽ ã anã mato fe nono ifãinakama. Ë mato yoiaito nikasharakãfe fenoxikakima. Pena yamaino fakish itiro. Nãskakẽ yora fenotiro. Tsõa fakish mẽra õitiroma, fãi kai fenotiro. Nãskarifiã a chaka shinãmis fenotiro. Fenokĩ tãpitiroma afeskax Nios fe rafetiromãki. ³⁶ Ë mato fe iyoano ea Ifo shara fakãfe fenoxikakima. Mã ea nikasharaino ã mato pena keskara shara fatiro, xafakã mã inõ. Ëfi pena keskarakĩ. Ea Ifo shara fakaxõ mãri fetsafo pena keskara shara fatiro mãtoxõ eari Ifo sharafanõfo,” ato Jesús fani. Mã ato yoikĩ senẽfax, nãskax ato makinoax kaitokai anã tsõa õinima.

³⁷ Yorafāfe ferotaifi tsōa atiroma keskara Jesús fafiaino tsōa chanīmara fanima nā Niospa Fakekōi fiano. ³⁸ Nā Isaiás Niospa meka ato yoipaoni. Nāato kirika keneyoni a inōpokoai yoikī. Iskafakī yoini:

Ifo, nō mī meka nō ato yoiflainokai tsōa noko chanīmara faima. Yōra atiroma keskafakī mī ato ispafiaino tsōa tāpiama, ixō Isaiás a inōpokoai yoikī kirika keneyoni.

³⁹ Nāskakē tsōa Jesús nikanima. Askatari afianā Isaiás kirika keneni a inōpokoai yoikī iskafakī:

⁴⁰ A nikaiyamaifo Epa Niospa fē_{xo} keskara ato imapakenaka Niospa meka chanīmakōi mā tāpifikaxō tsōa nikayamaito. Niospa ato shinātimafai anā shināsharanōfoma. Nāskakē Niospa meka ōifikakī tsōa shināima āto ōiti kerexkōi fakani mā nikafikaxō. Āto chaka xateaxma ekeki fekanima ē ato fetsa keskara shara fapanā,

ixō Niospa ato yoini. Nānori a Jesús inōpokoai yoikī Isaiás kirika keneyoni.

⁴¹ Isaiás Niospa shināmanaino Jesús tāpini xanīfo sharakōi ikiyoai. Nāskaxō Isaiás Jesúsnoa yoini.

⁴² Judeofāfe xanīfofo atirifāfe Jesús chanīmara fanifoma. Akka atirifāfe chanīmara fanifo. Akka afaa tsōa yoinifoma fariseofoki mesekakī noko potayamanōra ikanax āto ichanāti pexe mēraxō. ⁴³ Yora fetsafāfe ato yoiatio nafo sharakōifora nā yorafāfe atoōnoa meka shara yoiifono nikapaimisfo. Akka Niospa atoōnoa nafo sharakōira ixō yoiaino fichisharapainifoma.

Jesús mekaōxō nō tāpia nō chakakōifo

⁴⁴ Nāskata Jesús fāsikōi mekainīkafā ato yoini iskafakī: “Nā ea chanīmara faito ea fisti chanīmara fatama nā ea nīchiniri chanīmara fai. ⁴⁵ Nāskafakīri mā mā ea ōia nā ea nīchiniri mā mā ōia. ⁴⁶ Nono mai ano fakish keskara. Nāskakē ēfe Epa Nios ariax ē nono mai ano ē oni pena keskara ikiyoi. Fakishi tsōa ōitiroma. Akka nā ea chanīmara faito Epa Nios Ifo sharakōifatio pena keskara shara ixiki.

⁴⁷ “Mā ēfe meka nikafikaxō ea nikayamaifono ēkai ato omiskōimanimā. Akka ē mai ano oni yorafo omiskōimatama ato ifiyoi ē oni efe īpaxanōfo.

⁴⁸ Akka nā iskakī shināi: ‘Ēkai Jesús Ifofapaima, askatari āfe mekari ē nikapaima,’ ixō shināi nā ē mato yoimis keskara nikayamax Nios ari katama omiskōipakenakafo mēra kaxii. Nāskakē ē mato yoiatio mā ea nikayamax mā mai keyoaino mā omiskōipakenaka. ⁴⁹ Ēfe Epa Niospa ea yoiā keskara nānorikōi ē mato yoimis. Ēa ē mato yoima. Ēfe Epa Nios nā ea nīchinioxō ē mato yoimis. ⁵⁰ Mē tāpia Epa Niospa yoiā keskara chanīmara faax mā nīpaxatiro. Nāskakē, ‘A ē ato yoimis keskara nānori ato yoife,’ Ēfe Epa Niospa ea famis,” ixō Jesús ato yoini.

13

Jesús aōxō tāpimisfo āto tae chokapakeni

¹ Mā judeofāfe āto Pascua fista chaima ikaino Jesús tāpini a mai anoax Apa ari kaxiai. A Ifofaafō nā nono mai anoafō ato noini. Mā atoōnoax nakī ato noikōini.

² Jesús aōxō tāpimisfo feta mā xini kaino ato feta pipaini. Nāskaino nā Judas Iscariote mēra Satanás yōshi chaka nanetani. Nā Simón fetsa āfe fake Judas Iscariote. Nā Judas mēra niafaka nanexō shināmani iskafakī: “Ato tāpimafe afeskaxō na Jesús achitirofomāki,” ixō Satanás shināmani.

³ Akka Epa Niospa áfe Fake yoini: “Nā nai mēranoafoya nā mai anoafari mī ato yonomatiro. Mī āto xanīfo,” ixō Epa Niospa anori yoiaito Jesús tāpini. Epa Nios ariax onixakī mā anā akiki kakī Jesús tāpini. ⁴ Nāskata pikī keyotama Jesús fininākfā áfe rapati pekata áfe rakotiñ pinixemeni. ⁵ Nāskata faka tasoki manexō a aōxō tāpimisfo ato fāka ochopakeni. Mā ato ochopakexō ato otokere apani áfe rakotiñ.

⁶ Ato askafapakī Pedrori áfe tae chokapaiyaito yoini: “Ifo, ¿afeskakī mī éfe Ifo fixō mī ea fāka ochopaimē?” faito, ⁷ Jesús kemani: “Na ē mato fāka ochofai mī tāpiana. Akka mī chipo tāpixii,” faito, ⁸ anā Pedro kemani: “Maa, Ifo, mīakai ea fāka ochopakēnakama,” Pedro faito, anā Jesús kemani: “É mia ōchoyamainokai mī efe rafetiroma,” fani. ⁹ Askafaito nikakī Pedro yoini: “Ifo, taekis ea chokakima éfe mifikiri ea afe, éfe mapokiri ea māchofe,” faito, ¹⁰ “Nā rama yora nashiax áfe yora choshtanatiroma, áfe tae fisti choshtanatiro. Nāskakē nō tae fistiki nō chokatiro. Akka keyokōi mā choshtama, ranāri mā shara,” ato Jesús fani. ¹¹ Nānori ato yoini māmāi tāpixō fatoto ato achimaximākai.

¹² Mā ato ōchopaketa áfe rapati safeni. Mā áfe rapati safeta afianā tsaopakekafāni. Nāskaxō ato yoini: “¿Mā mā tāpamē na ē mato fāka ōchofaito?” ato fani. ¹³ Nāskaxō anā ato yoini: “Māfi, ‘Maestro,’ mā ea fayanā, ‘Ifo,’ mā ea famiṣ. Chanīmākōi émāi mātō Ifo ita ē mātō maestrori.” ¹⁴ Askata anā ato yoini: “É mātō Ifokī, askatari ē mātō maestrokī ē mato fāka ōchopakea oa mātō ina keskarakōixō. Akka nā ē mato fāka ochopakea keskarai mā ranā fāka ōchokome faatanākāfe oa mātō inafō keskarax. ¹⁵ É mato ōimana keskarai māri askakāfe,” ato fani. ¹⁶ “É mato chanīma yoi. A yonoxomistokai áfe xanīfo finōtiroma. Akka ē mato nīchia mā fetsafo éfe meka yoinō. Nāskafixokai fetsafo éfe meka ato yoifikīkai mā ea finōama. É mato fāka ōchomis oa ē mato yonoxomis keskaraxō. Nāskaxō, ‘Nō fetsafo finōa, nō āto inama,’ iyamakāfe,” ato Jesús fani. ¹⁷ “Na ē mato yoiaito mā nikakōiax, nāskax mā fāsi inimākōitiro.

¹⁸ “Nāskakē ē mato yoi, akka keyokōiōnoa ē mato yoma. É tāpia fatomākī ē katoa a nofe kai, askatari a nofe kaima. Nāskakē ē mato yoi, eōnoa Niospa meka yoikī kirika keneyonifo nō nikakī nō chanīmara fatiro. Iskafakī kirika keneyonifo, Niospa meka: ‘A feta paii fētsa ea ōikaspakī ea chakafaxii,’ ixō kirika keneyonifo. Chanīmākōi mā ōifainaka,” ato Jesús fani. ¹⁹ “Ea askafayoamano ē mato yoiyomis. Akka nā ē mato yoiai keskara ea askafafono mā ea ōikī, nāskakē mā ea chanīmara fatiro. ²⁰ É chanīkima mato yoi ē mato nīchi mā éfe meka ato yoitanō. Mā ato yoiaito nikakaxō eari nikakani. Nāskatari ea chanīmara fakaxō nā ea nīchiari chanīmara fakani,” ixō Jesús ato yoini.

*“Mā fētsa ea ato achimaxii,” ixō Jesús ato yoini
(Mt. 26.20-25; Mr. 14.17-21; Lc. 22.21-23)*

²¹ Mā yoikī keyota Jesús fāsi shināmitsakōini. Nāskaxō xafakīakōi ato yoini: “É chanīma mato yoi. Fatora mā fētsa ea mā ato achimaxii,” ato faito, ²² nikakani fesenākefainifo tāpikanaxma. ²³ Afe ketaxamei tsoa Jesús fichisharapaikōini. ²⁴ “Fatora mā fētsa ea mā ato achimaxii,” ato faito nikakī a Jesús fe ketaxamei tsoa Pedro fenāmāshta yōkani: “Tsoaōnoa yoimākai, yōkafe,” fani. ²⁵ Nāskafaito nikakī a Jesús fe ketaxamei tsoato chaimashta yoi yōkaxikī: “Ifo, ¿tsoaōnoa mī yoimē?” faito, ²⁶ Jesús kemani: “Na pāa tore pishta nami ene mēra mechanafaxō ē ināito nāatofi ea ato achimaxii kiki,” Jesús fani. Nāskafaxō nami ene mēra pāa mechanafaxō Judas Iscariote Jesús ināni, Simón fetsa áfe fake. ²⁷ Jesús pāa mechanafaxō Judas ināino Judas

mēra Satanás chaka nanerisatani. Nāskaxō Jesús Judas yoini: “Nā mī apaiyai keskara farisafafe,” fani.

²⁸ Nā tsaokaxō piaifāfekai tāpinifoma afeska fakī askafaimākai. ²⁹ Atirifāfe shinānifo: “Jesús Judas nīchiaito Judaspa afara fitanō Jesús nīchi fista ayanā pixikī,” ixō shinānifo. Akka atirifāferi shinānifo iskafakī: “Jesús Judas nīchia a afaamaisfo kori inātanō,” ixō shinānifo. Nā Judaspa āto kori kexexomis ini. ³⁰ Nāskax Judas koshi kani mā fakishaino.

Jesús Ifofamisfo noinā faatanātirofo

³¹⁻³² Nāskata mā Judas ato makinoax kaano Jesús ato yoini: “Iskaratīa ē naino Epa Niospa mato ōimani ēmāi āfe Fake sharakōikē. Nāskafīax ēfi yōra fakekōi. Ē afama mīshti akaito ōikaxō, ‘Epa Nios fāsi sharara,’ faxikani. Nāskakē mā tāpitiro ēmāi Niospa Fakekōikē a keskara sharakōi.

³³ “Ēfe fakefāfe, ēkai anā nono mato fe ifīnakama. Mā ea fenaxii. Ē judeofo yoita keskafakīri ē matori yoi. Ē kai arikai mā katiroma. ³⁴ Ēfe meka fenashara ē mato yoikai, noināi finakāfe. Nā ē mato noiai keskariai māri noinā faatanāsharakāfe. ³⁵ Mā noināiyaito yorafāfe ōinōfo mā eōxō tāpimiski,” Jesús ato fani.

*“Ē Jesús ōimisma,’ Pedro ixiaino,” Jesús ato yoini
(Mt. 26.31-35; Mr. 14.27-31; Lc. 22.31-34)*

³⁶ Nāskata Pedro Jesús yōkani: “Ifo, ¿faki mī kaimē?” faito, nikakī Jesús kemani: “Ē kai arikai iskaratīa mī efe kayotiroma. Chipō mī kaxii,” faito, ³⁷ anā Pedro kemani: “¿Afeska iskaratīa ē mefe katiromamē? Mē iskaratīa itipinīshara mīōnoax naxikī,” faito, ³⁸ anā Jesús kemani: “¿Mī chanīmamē? ¿Mā mī itipinīsharamē naxikī?” Jesús fani. Nāskaxō anā yoini: “Na fakishi takara keoyoamano mī ea iskafai: ‘Ēkai Jesús ōimisma,’ ixō mī ato yoi tres fakī,” Jesús fani.

14

Jesús fai keskara. Aōnoax nō Nioski nokotiro

¹ Anā Jesús ato yoini: “Ēfe fakefāfe, māto ōiti fekaxtefayamakāfe. Nios chanīmara fata, eari chanīmara fakāfe. ² Ēfe Epa ika ano pexe ichapa sharakōifo. Ē mato itipinīsharafaxōi kaikai. Askarayamakē ē mato yoikerana. ³ Ē kaxō ē mato itipinīshara faxōikai. Afianā oxō ē mato ifiyoxii, a ē ika ari mato iyoxiki ari mā efe īpaxanō. ⁴ Mā mā fai tāpiaki a ē kai ari,” ato faito, ⁵ Tomás kemani: “Ifo, nōkai a mī kai ari tāpiama, afeskaxō nō fai tāpitiroma,” faito, ⁶ Jesús kemani: “Ēfi nā fai keskaraki. Ēfi chanīmismaki. Eōnoax yorafo nīpaxatirofoki. Tsoakai ēfe Epa ika ano nokotiro. Eōnoax fisti ēfe Epa ari nokotirofo.

⁷ “Ea tāpikōixō ēfe Epari mā tāpikōitiro. Akka iskaratīa mā ēfe Epa tāpikōikai. Nā mā ea ōiai keskarari mā ēfe Epa mā ōi,” ato Jesús faito, ⁸ Felipe kemani: “Ifo, noko Epa Nios ōimafe. Mī noko Epa Nios ōimanaino nō inīmakōitiro,” faito, ⁹ Jesús kemani: “Felipe, afetiakai ē mato fe imisma. ¿Afeskakī mā ea tāpiyomismamē? Ea ōikī ēfe Epari mā mī ōi. ¿Afeskakī: ‘Ea Epa ōimafe,’ mī ea faimē? ¹⁰ Ēfi ēfe Epa fe fisti keskarakōiki. ¿Nā mī chanīmara faimamē? A ē mato yoiai ēa ē mato yoima ēfe Epaōnoa ē mato yoi. Epa Niospa nā apaiyai keskara ea famai efe imis. ¹¹ Ē mato yoi ēfe Epa efe rafea ēri ēfe Epa fe

rafemiski. Nāskakē ea chanīmara fakāfe. Nā tsōa atiroma keskarafori ē famis nā ōixō ea chanīmara fakāfe.

¹² “Chanīmakoī ē mato yoi. Nā ea chanīmara faxō nā ē akai keskarari faxii. Ēfe Epa ari kaxō a ē aka keskaramaroko finōmainīfofā axikani. ¹³ Afara ēfe aneōxō ēfe Epa mā yōkaito ē mato axoxii, eōxō Epa Nios sharara fanōfo. ¹⁴ Afara fetsa ēfe aneōxō mā Epa Nios yōkaito ē mato axotiro,” ixō Jesús ato yoini.

“Epa Nios āfe Yōshi Shara ē matoki nīchixii,” Jesús ato fani.

¹⁵ Anā Jesús ato yoini iskafakī: “Ea noikōikī nā ē mato yoiai keskai ikāfe. ¹⁶ Ē Epa Nios mato kīfixoni mato fetsa nīchixonō, nāato māto ōiti fepeaxoyonō. Nā Niospa Yōshi Shara, nāfi chanīmismaki. Mato fe ipanaka. ¹⁷ A nikayamaifāfe ōitirofoma. Askatari tāpitirofoma. Akka māfi mā mā tāpimiski mato femāi ikē. Nāskatari māto shinā mēra mato fe ika.

¹⁸ “Akka ēkai mato fe ikima. Askafixō ē mato potaima. Ē matoki anā oxii. ¹⁹ Ē anā nono ikima. A ea Ifofaifāfema anā ea ōikanima. Akka mā ea ōixii, ē niano. Nāskakē māri efe nīpanaka. ²⁰ Naax ē otoaito mā ea tāpitiro ēmāi Epa Nios fe nīpanakakē. Nāskarīfiai mā efe ixii. Ēri ē mato fe ixii. ²¹ Nāskakē ē mato yoiaito mā ea nikakōixō mā ea fāsi noi. Ea noixori ēfe Epari mā noi. Askatari ēri ē mato noi. Nā ē shināi keskara ē mato tāpimani,” ixō Jesús ato yoini.

²² Nāskaito Judas fetsa, Judas Iscariotema yōkani: “Ifo, ōafeskakī a mia Ifofaifoma mī ato tāpimatama noko fisti mī tāpimanimē?” ixō yōkaito, ²³ Jesús kemani: “Ea noikakī nā ē mato yoiai keskara ea nikakōitirofo. Ēfe Epa ato noiaino ēri ato noi. Nāskax nō ato fe rafetiro. ²⁴ Ea noiyamakaxokai ē yoia keskara ea nikakanima. Na meka mā nikai ēfe mekama, ēfe Ēpa meka ē mato yoi. Nā ea nīchinīto āfe meka.

²⁵ “Mato fe iyoxō ē mato yoiyofafāina. ²⁶ Nāskaxō Epa Niospa āfe Yōshi Shara matoki nīchi eōxō mato fe ixō māto ōiti mato inimamasharaxonō. Keyokōi mato tāpimani. Nā ē mato yoia keskara mato shināmani.

²⁷ “Ē mato makinoax kakī ē mato ōiti fepeaxosharafāinikai. Akka nā ea nikaifāfema mato ōiti fepeaxotirofoma, ē fisticī ē mato axotiro. Nāskakē shināchakayamakāfe. Rateyamakāfe. ²⁸ Ē mato yoiaito mā mā nikai ē mato makinoax kaikai. Askafīax ē anā matoki oxii. Ea noikōiax mā ekeki inimatiro ēmāi ēfe Epa ari kaino, ēfe Epamāi ea finōkōikē. ²⁹ Nā ē mato rama yoiai keskaito mā ea chanīmara fatiro. Mē mato yoi a ixiai mā ōixō mā ea chanīmara fanō.

³⁰ “Ē mato mēxotaima yoipaifaiino nā yōshi chakafāfe āto xanīfo Satanás chaka ekeki oi. Askafixō ea afeska fatiroma. ³¹ Akka ē Epa Nios fāsi noikōi. Nāskakē nā ea yoiai keskai ē akōini. Nāskaxō keyokōichi ea tāpikani ē fāsi aō noiaito. Fininīfofākāfe. Nonoax nō kanō,” ato fani.

15

Jesúsfi fana āfe kaya keskaraki. Akka nā fana pōya keskarafō a Ifofamisfo

¹ Anā Jesús ato yoini iskafakī: “Ēfi uva āfe kaya keskarakōiki. Akka ēfe Epa nā uva āfe ifo keskara. ² Akka mā na uva āfe pōya keskarafō. Nā uva pōya fetsa fimiyamaito āfe ifāfe mextetiro potaxikī. Akka nā uva āfe pōya fimiyafō nā āfe teshpa mīshti ifāfe xatetiro. Nāskax uva pōya sharayakōi itiro fimi sharaya ixikī. ³ Nāskarīfiakī mā ēfe meka nikaxō mā māto chaka mā potax mā isharaxii. ⁴ Emakinoax paxkayamakāfe. Efe rafekāfe, nā ē mato fe ika

keskariai. Akka uva pōya fisti fimitiroma āfe kayamaisax. Nāskarifiakī mā efe rafexoma nā ē mato amapaiyai keskara mā atiroma.

⁵ “Ēfi nā uva āfe kaya keskarakī. Akka mā na uva āfe pōyafa keskara. Akka nā efe rafekōiai ēri afe rafekōiaino ea keskarakōiri itiro. Ē mato fe ikamano mā afaa afeskatiroma. ⁶ Uva āfe pōya chaka fimimais nō mextexō potatiro. Nāskaxō mā xiniḥ tsasifaano nō ichafaxō nō kofatiro. Nāskarifiiai nā efe rafekaspaifo nāfo chiifā mēra fokani.

⁷ “Akka mā efe rafekōixō ēfe meka mā nikakī māto ōiti mēraxō mā shinākī mā afarashta fapaikī ēfe Epa Nios mā kīfiaito mato axōi. ⁸ A ē mato amapaiyai keskara mā akī nāskax eōxō tāpimis mā iki. Mā askafaito ōikakī Epa Nios tāpitirofo Epa Niosmāi fāsi finakōikē. ⁹⁻¹⁰ A Epa Niospa noikōiai keskafakī ēri mato noikōi. Epa Niospa ea yoiai keskara ē afafāini. Akka ē afe imiskē ea noifafāini. Nāskafakīri nā ē mato yoiaito mā atiro māmāi efe ixō. Nāskakē ē mato noifafāini.

¹¹ “Anori ē mato yoi ē inimai. Nāskarifiiai māri mā inimanō. Ē mato yoiaito mā anori akī mā tāpitiro ē mato noiaino. ¹² Iskafakī ē mato yoi: Ē mato noiai keskai māri noinākāfe. ¹³ Nō fetsafo fe rafekōiax nō aō noikōiax nō aōnoax natiro. A mā nakī noiai keskarakōi tsōa finōtiriroma. ¹⁴ Ē mato yoiai keskara aki mā efe rafemis mā itiro. ¹⁵ Akka a mato fe rafea mā tāpimatiro a mā shināi keskara. Nā ēfe Epa ea yoisimis keskara ē matori tāpimani māmāi efe rafeano. Nāskakē ea yonoxomisfora ē anā mato faima. Efe rafeafora ē mato faxii. ¹⁶ Mā ea ifiyamafiaino ē mato ifini ea keskara mā inō mātoxō fetsafāferi ea chanimara fanōfo. Nāfāfe ea Ifofapanakafo efe ipaxakakī. Nāskaifono mā afarashta ēfe Epa Nios ēfe aneōxō mā yōkaito mato axosharaxii. ¹⁷ Nā ē mato yoiai keskai noinākāfe,” ixō Jesús ato yoini.

Jesús Ifofamisfo ato noikaspakani

¹⁸ Anā Jesús ato yoini iskafakī: “Anā ē mato yoi mato noikaspayokanima. Akka ea noikaspayokani. Mato iskaratīa noikaspafiaifono mā tāpitiro taefakī ea noikaspakani. ¹⁹ A ea Ifofaafoma fe mā ato fe rafeaito mato noikeranafo. Aa ranā noināifo keskari fakī matori noikeranafo. Akka māakai ato keskarama. Ē mato ifini a ea Ifofaifoma keskara mā inōma. Akka nā ea Ifofaafāfema mato noikaspakani. ²⁰ Nā ē mato yoiai keskara shinākāfe. Ē mato yoi iskafakī a yonoxomistokai āfe ifo finōtiriroma. Akka ea omiskōimakanī matori omiskōimaxikani. Akka a ē ato tāpimana nikaxō matori nikaxikani mā ato yoiaito. ²¹ Akka mā ea Ifofaito, nā ea amisfo keskafakakī matori askafaxikani. Akka a ea nīchini tsōa tāpiama. Nāskaxō mato chakafaxikani.

²² “Ē atoki oyamaxō Niospa meka ē ato yoiyamaito tsōa tāpikeranafoma. Akka Niospa meka pishta tsōa nikayomisma afara chakafamisfo. Nāskax āto chaka atoō neama. Nāskafiaifono Niospa meka ē ato yoixiki ē oni. Nāskakē tsōa iskaratīa iskatiriroma: ‘Tsōa ea Niospa meka yoiama.’ Askatari: ‘Ē afaa chakafamisma,’ itirofoma. Mā nikafikatsaxakakī āto chaka xateafoma. Nāskax āto chaka atoō nea. ²³ Ea noikaspayanā ēfe Epari noikaspakani. ²⁴ Niosxō tsōa atiroma keskara ē ato ispanis. Askafixaxokai tsōa āto chaka xateafoma. Tsōa atiroma keskara ē faito ōifikakī ea nikakanima. Nāskax shara ikanima. Akka ē afarafo shara fayamaito ea tāpikeranafoma. Nāskax ato chaka atoō nekeranama. Akka ē afarafo shara faito mā ōifikaxō ea noikaspayanā ēfe Epari noikaspakani. ²⁵ A Niospa meka yoikī kirika kenenifo nē askakōi. Niospa meka yoikī eōnoa kirika kenenifo iskafakakī: ‘Ē afara chakafayamafiakē ea noikaspakani,’ ixō eōnoa yoikī kirika kenenifo.

26 “Matori noikaspaifono ěfe Epa Nios arixō ěfe Yōshi Shara ě matoki nīchixii. Nāato mato ōiti fepeaxosharanō. Nāfi chanīmakōikī eōnoa mato yoixii. 27 Ĕ yorafo Niospa meka ato yoikī taefani. Nāskax mā efe imiski. Nāskarifiakī māri eōnoa tāpixon mā ato yoitiro.

16

1 “A mā omiskōixiai ě mato yoiyoni mā iskakī shinānōma: ‘ĴAfeskai Jesús ěfe Ifo fiano ě omiskōimē?’ ixō mā anori shinākī mā ea potapaixii, anākai mā ea chanīmara faxima. 2 Tāpikāfe. Māto kaifāfe nā ea Ifofaafāfema mato potaxikani mā anā āto ichanāti pexe mēra İkinōma. Ĕ mato yoikōi anā shināsharakanima. Fakirira shinākani iskakakī: ‘Nā Niospa apaiyai keskara nō faxōi. Nā Jesús Ifofaafō nō retei,’ ixō anori shinākani. 3 Ĕfe Epa tāpiafoma eari tāpiafoma. Nāskakaxō mato chakafaxikani. 4 Akka nā mā ea Ifofakī taefaniĵia mā omiskōixii ě mato famisma, ě mato fe ifiaxokai ě mato afaa yoimisma. Akka iskaratĵia ě mato yoi. Nāskakē mā mato omiskōimanaifono mā shināxii nā ě mato yoimis keskara,” Jesús ato fani.

Niospa Yōshi Sharapa noko shināmatiro

5 Anā Jesús ato yoini iskafakī: “Ĕfe Epa ea nīchini. Iskaratĵia ě anā akiki kai. Akka mā, ‘ĴFaki mī kaimē?’ mā ea faima. 6 Ĕ mato yoiaino mā shināmitsai. 7 Ĕ mato yoikōi, ě mato makinoax kaano mā shara ixii. Akka ě mato makinoax kayamaino Niospa Yōshi Shara matoki oima. Nāskakē māto ōiti mato fepeaxoyoima. Nāskafiano ě mato makinoax kaxō ěfe Yōshi Shara ě matoki nīchixii. 8 Nā ěfe Yōshi Sharapa nai mēranoax oxō a ea Ifofaafoma ato yoixii iskafakī: ‘Mā mā afarafo chakafamiski,’ ato faxii. Nāskatari a Niospa fichipaiyai ato tāpimaxii. Nāskaxō a Nios Ifofaafoma ato yoixii iskafakī: ‘Mā mā afarafo chakafamiski, nāskakē mā omiskōi,’ ato faxii. 9 Nā ea Ifofaitoma afara chaka shināi. Nāskakē ěfe Yōshi Sharapa a afara chakafamis ispayoxii. 10 Ĕfi nā ěfe Epa ea amapaiyai keskara ě amiski. Nāskax ěfe Epa ari ě kai anā ea ōinōfoma. Nāri Niospa Yōshi Sharapa ato tāpimaniyoxii. 11 Nāskatari Niospa Satanās omiskōimaniyoxiai Niospa ěfe Yōshi Sharapa ato tāpimaniyoxii, nā Satanās āto xanĵfo.

12 “Ĕ mato meka ichapa yoipaifaitokai mā tāpitiro. 13 Nāskafikē Niospa Yōshi Shara matoki oxō a Niospa ěfe meka chanīmakōi mato tāpimaxii. Nāfi chanīmisma. Akka ěfe meka mato yoitama nā ěfe Epa shināmanai anori mato tāpimaniyoi. Nā afarafo afeskara ixiai mato tāpimaniyoi. 14 Nāto eōnoa yoisharakōixii. Nāskakē nā ě mato yoimis keskara Niospa Yōshi Sharapa mato tāpimaxii. 15 Nā ěfe Epanāfori ěfenāfori. Nāskakē nā ě yoiai keskara ěfe Epa ěfe Yōshi Sharapa mato tāpimaxii,” ixō Jesús ato yoini.

Jesús aōxō tāpimisfo shināmitsafikanax chipo inimaxikani

16 Anā Jesús ato yoini iskafakī: “Akka ěkai anā mato fe nono samarakaima. Mē ěfe Epa ari kai. Nāskakē mā ea ōiyoima. Nāskafiax anā ě samamashta oaito mā ea ōixii,” aōxō tāpimisfo Jesús ato fani.

17-18 Ato askafaito nikakani yoinānifo: “ĴAfeskakī, ‘Ĕfe Epa ari kaito mā anā ea ōiyoima,’ noko faimē? ‘Afianā ě oaito mā ea ōixii,’ noko fai. Na noko yoiai keskarakai nō tāpiama,” ikanax yoinānifo.

19 Nāskakaxō yōkapaiyaiĵefe Jesús ato tāpini. “ĴNa ě mato yoiai keskara mā tāpiamax mā yoinōnāimē?” ato fani. 20 “Ĕ mato xafakĵia yoinō. Mē omiskōiaino a ea Ifofaafoma fāsi inimaxikani. Akka māfi ea shināi mā oi. Mā ea shināi

oiafiar chipo mā ekeki inimaxii. ²¹ Akka mā kēro fake kāikī pae metiro. Nāskax mā fake kāixō anā pae metiroma māmāi āfe fake kāiax. Nāskax inimasharakōitiro māmāi āfe fake kāisharax. ²² Nāskarīfiai ē mato makinoax kaino mā oiai omiskōixii. Nāskax ē anā chipo matoki oaino mā inimakōixii. Tsōakai mato xatematiro mā ekeki inimaito.

²³ “Ē naax ē otoax ē anā mato fe iyamaino mā anā afara mā ea yōkatiroma. Akka ēfe aneōxō mā Epa Nios yōkatiro. Afarashta ēfe aneōxō mā Epa Nios yōkaito mato axoxii. ²⁴ Ēfe aneōxokai ēfe Epa mā yōkayomisma. Akka ē naax otokē nāskakē ēfe aneōxō ēfe Epa mā yōkatiro. Mā yōkaito ēfe Epa mato ināxii. Mato ināino mā fāsi inimakōixii,” ixō Jesús ato yoini.

Jesús keyokōi finōa

²⁵ Anā Jesús ato yoini iskafakī: “Ē mato meka fetsafaxō yoiaito mā tāpiyomisma. Ēkairoko xafakīa mato yoiaito mā tāpianā. Akka iskaratīa xafakīa ē mato yoi Epa Niosnoa mā tāpinō. ²⁶⁻²⁷ Nāskaxō mā ea noi. Ēmāi Nios ariax matoki onikē mā mā ea chanīmara faa. Nāskakē Epa Niospa matori noikōi. Akka, ‘Ē mato makinoax kakī anā ē mato Epa Nios kīfixoni,’ ē mato faima. Mā mā yōkaxii ēfe aneōxō. ²⁸ Ē Epa ariax nono mai ano oni. Nāskakē iskaratīa nono mai anoax ēfe Epa ari ē kai,” ixō ato Jesús yoini.

²⁹ Ato askafaino aōxō tāpimisfāfe kemanifo: “Aicho, iskaratīa xafakīakōi mī noko yoikai. A mī noko taefakī yoiaito nō tāpiyoitama. Anā meka fetsafaxō mī noko yoima. ³⁰ Iskaratīa mā nō tāpia keyokōi mī tāpikōia. Nō mia yōkapaiyaito mī noko tāpitiro. Nāskakē mī Nios ariax onikē nō mia chanīmara fai,” ixō yoiaifāfe ³¹ Jesús anā ato kemani: “¿Chanīmamē mā mā ea chanīmara faimē?” ato fani. ³² Nāskaxō anā ato yoini: “Chipo mā emakinoax mā paxkakāinikai. Mā fakirira kai. Chanīma, iskaratīa mā emakinoax mā fakirira kai. Tsoakai efe nēteima. Mā askafiainokai eres ē nēteima. Ēfe Epa fe ē nētei. ³³ Nā ē mato yoi māto ōiti shara inō. Akka nā ea chanīmara faafoma fe mā nono nāmā nētei. Nāskakē mato omiskōimafiaifono shināchakayamakāfe. Ē Satanás yafi nā ea chanīmara faafomafo ē ato finōkōia. Nāskakē ē mato kexesharatiro,” Jesús ato fani.

17

Aōxō tāpimisfo Jesús Epa Nios ato kīfixoni

¹ Nāskata Jesús nai foisnīfofā Apa yoini: “Epa, iskaratīa ē naano ato tāpimafe ē mī Fakekōiki. Mī ato tāpimanaino ēri ato tāpimatiro mī fāsi sharakōi. ² Mī ea nīchini ē āto xanīfo inō. Nāskaxō mī ea ato ināni ē ato imasharapakexanō. ³ Meres fisti mī Nioskōi. Akka ēfi Jesucristo nā mā nīchini. Nā noko tāpiafo nāfo nīpanakafa.

⁴ “Ē nono mai anoxō afarafafo ē ato ispa, mīmāi sharafinakōikē. Nā mā yoiai keskara mē aka. ⁵ Nō mai onifamatai ē mia keskara xanīfo shara iyopaoni. Nāskakē iskaratīa ē mefe xanīfo inō ea xanīfo imafe a ē ipaoni keskara.

⁶ “Nono mai anoa yorafo mī ea ato minini ē ato tāpimanō mī afe keskaramāki. Nā mīnāfofiano mī ea ato minini. Mī meka nikakōinifo. ⁷ A mī ea yoia keskara ē ato yois. Nāfo mā tāpikōiafo. ⁸ A mā yoiai keskara ē ato yoiaito ea chanīmara fakōikani. A ē mia ariax oniri mā tāpiafo. Chanīmara fakani a ea mā nīchini.

⁹ “Ē mia ato kīfixōfāfāini. Akka a ea chanīmara faafoma ē mia ato kīfixonima. Nā ea mī ato mininiōxō ē mia kīfifāfāini. Ē mia ato kīfixōfāfāini nāfomāi

mīnāfokē. ¹⁰ Akka nā ēfenāfori mīnāki. Nā mīnāfori ēfenā. Nāskaxō nā ea chanīmara faafoōxō fetsafāferi tāpitirofo ē sharakē.

¹¹ “Ēkai anā na mai ano ikima. Ē mikiki kai. Akka nā mia Ifofaafofi nono na mai ano nētekani. Epa, mī fāsi sharaki. Ato kexesharafe. Mī aneōxō ato kexesharafe. Nā mī ea ināni tii ato kexesharafe. Akka nōfi fisti keskaraki. Nāfori nofe fisti keskara inōfo. ¹² Ē ato fe iyoxō ē ato kexeshara. Mīoxō ē ato kexeshara, ē fato fenoama. Akka nā Satanās āfe fake fisti ē fenoa. Nā mī meka yoikī kirika keneyonifo keskarax nā fisti mā fenoa.

¹³ “Iskaratīa ē mia ari kai. Ē kayoxoma ē ato yoiyoi nā ē ikai keskarai akairi inimakōinōfo. ¹⁴ Nā mī yoiai keskara mē ato tāpimani. A mia chanīmara faafāfema ato noikaspakani, miamāi Ifofaafono. Nāskakē ato noikaspakani. Nāskakēri ērikai ato keskarama. Akka eari noikaspakani.

¹⁵ “Akka ē mia yoima na mai anoa mī ato ifinō. Akka ē mia yoi na mai anoa mī ato kexesharanō Satanās chakata ato afeska fanōma. ¹⁶ Nā mia Ifofaafa a mia chanīmara faafomafo fe, ato fe rafetirofoma. Ērikai ē ato fe rafetiroma. ¹⁷ Mī meka chanimakōi. Mī mekapa ato sharafafe mia keskara shara inōfo. ¹⁸ Ea mī mai ano nīchini ē mī meka ato yoinō. Nāskarifikī ē yorafo nīchi mī meka shara ato yoitanōfo. ¹⁹ Mīa ea yoia keskara ē akaino nāfāferi askari fanōfo.

²⁰⁻²¹ “Ēkai ato fistiōxō kīfifafāinima. Nā ea Ifofaafāfe ato yoiainono nikakaxō ea Ifofaxikani. Nāskakē ē mia ato kīfixōfāfāini nā nō shināi keskara fisti shinānōfo. Mī efe imis keskai nāfori nofe inōfo. Nō ato fe tanaima nīaito ōikakī a ea chanīmara faafāfema akairi chanīmara fanōfo mī ea nīchini. ²² Mī efe imis keskai ēri ato fe imiski. Nā nō shināi keskarafō akairi shinānōfo. ²³ Mī efe ika keskarari ēri ato fe ikaki. Akka nā mī shināi keskarafō nōri shinātiro. Mī ōiti keskara nō itiro. Akka mī ea atoki nīchini. Nā mī ea noiai keskari fakī nāfori mī ato noikōi. Mī askafaino nā ea chanīmara faafāfema tāpitirofo.

²⁴ “Epa, nā yorafo mī ea ināfo efe inōfo mī ika anoa mia keskara shara ea ōinōfo. Mī mai onifayoxoma mī ea noiyopaoni. ²⁵ Epa, mī fāsi sharakōi. Nā ea chanīmara faafāfemakai mia tāpiafoma. Akka ē mia tāpikōia. Mī ea nīchini nā efe ikafāfe mā tāpiafo. ²⁶ Mī afe keskaramāki mē mia ato tāpimamis nā mī ea noiai keskari fakī, nāfāferi fetsafo noikōinōfo ē ato fe ikano. Askatari ē ato ōimafāfāini,” ixō Jesūs Apa kīfīni.

18

Jesús achinifo

(Mt. 26.47-56; Mr. 14.43-50; Lc. 22.47-53)

¹ Nāskata mā Apa kīfīkī nishpata aōxō tāpimisfo fe fakishi Jesūs kani, xexa Cedron pishta pokefaini. Nāno ifi fanafāfe āfe anefo olivos ini. Olivos mēra ikitoshinifo. ² Judaspa ato Jesús achimani kakī tāpini faki Jesús kaamāki, Olivos anomāi aōxō tāpimisfo Jesús ato iyomiskē. ³ Nānori Judaspa sorarofō iyoni Jesús achinōfo. Nā ato Nios kīfixomis xanīfōfōfāfe askatari fariseofāferi Nios kīfīti pexefā kexemisfo nīchinifo Judas fe fōtanōfo. Chiifoya kenofoya koshatifoya ashifoya fonifo. ⁴ Mā achifōfāifono Jesús ato tāpini. Mā nokoafono ato yōkani: “¿Mā tsoa fenaimē?” ato faito, ⁵ “Nō Jesús Nazarete anoa nō fenai,” faifāfe, ato kemani: “Ēkīa, nono ē ika,” ato fani. Ato askafaino nā Jesús ato achimanai Judasri nāno ato fe ini. ⁶ “Ē nono ikaki,” Jesús ato faino, chetekiri ifiakekafāpakei fetsenifo. ⁷ Nāskaxō Jesús anā ato yōkani: “¿Tsoa mā fenaimē?” Jesús ato faino, “Nō Jesús Nazarete anoa nō fenai,” faifāfe ⁸ anā ato

yoini: “Ēkīa nā mā ea fenai ē mato faa,” ato fani. Nāskaxō ato yoini: “Mā ea fenamākai na eōxō tāpimisfo ato nīchikāfe fotanōfo,” ato fani.

⁹ Nā Jesúsnoa yoikī kirika keneyonifo iskafakī: “A māa ea minia fato fisti fenoima,” ixō kirika kenenifo. Nāskaxō nā kirika kenenifo keskarakōi Jesús Apa Nios kīfini. ¹⁰ Nāskaino Pedro āfe keno tsekani, āfe keno tsiostamexō. Mā āfe keno fixō nā ato Nios kīfixomisto āfe xanīfāfe yonomati paxteni. Nā xanīfāfe āfe yonomati āfe ane Malco ini. Nā Pedro paxteni. ¹¹ Pedro askafaito ōikī, “Mī keno fafe,” Jesús Pedro fani. “¿Mī shināimamē? Ēfe Epa ea afara kechoki inā ē ayai,” ayatiki keparanākī Jesús Pedro yoini. “Nā ēfe Epa Niospa apaiyai keskara ē akikai,” ixō Jesús yoipaini.

Jesús Anás ano iyonifo

(Mt. 26.57-58; Mr. 14.53-54; Lc. 22.54)

¹² Sorarofāfe āfe xanīfo feta a Nios kīfiti pexefā kexemisfo feta osinākaxō Jesús achikaxō metexkere anifo. ¹³ Metexkere akaxō Anás pexe ano iyonifo. Nā Anás Caifās āfe rayos ini. Nā Caifās Nios ato kīfixomis xanīfokōi ini. ¹⁴ Nā Caifās āfe kaifo israelifo yoini: “Feronāfake fisti yorafoōnoax naa, sharaki,” ato fani.

“Ē Jesús ōimisma,” Pedro ini

(Mt. 26.69-70; Mr. 14.66-68; Lc. 22.55-57)

¹⁵ Askata Jesús iyoaifono Pedro fe a Jesúsxō tāpimis fetsa ato acho fonifo. Mā pexe ano nokoano nā Jesúsxō tāpimis fetsa xanīfāfe mā ōimis ini. Nā Jesús fe ikikaini. ¹⁶ Akka Pedro kāiti ano nēteni, ikinima. Akka nā Jesúsxō tāpimis fetsa ikikaini. Nāato xomaya a kāiti kexea yoini Pedrori ikimanō. ¹⁷ Mā Pedro ikiano nā kāiti kexemis xomayato yōkani: “¿Mīri mī Jesús āfe inamē?” faito, “Maa, ēkai Jesús āfe inama,” Pedro fani.

¹⁸ Mā fakishano matsinākōikanax chii ketefaax keyokōi chii yoonifo matsi meyamaxikakī. Nā xanīfofo āto yonoxomisfo fe a Nios kīfiti pexefā kexemisfāfe chii ketefaax yoonifo. Pedrori ato fe yooni.

Judeofāfe xanīfāfe Jesús yōkani

(Mt. 26.59-66; Mr. 14.55-64; Lc. 22.66-71)

¹⁹ Nāskata ato Nios kīfixomisfāfe āto xanīfāfe Jesús yōkani iskafakī: “¿Fatomē a mīōxō tāpimisfo? ¿Afaa mī ato yoimismē?” faito, ²⁰ “Ēkai one ato yoiaa. Keyokōichi ea nikanōfo ē ato yoimis. Ē māto ichanāti pexe mēranoa yafi a māto Nios kīfiti pexefā mēranoa ē ato yoimis. Ēkai ēfe meka ē onemisma. ²¹ ¿Afeskakī mī ea yōkaimē? Ea yōkakima a ea nikamisfo yōkafe. A ē ato yoimis tāpiafoki,” Jesús faito, ²² a Nios kīfiti pexefā kexemisto afe ketaxamei niato fepasyanā yoini: “¿Afeskakī nōko xanīfo mī anori yoimē?” faito, ²³ Jesús anā kemani: “Afaa chaka ē yoimē ea yoife. Akka ē afaa chaka yoiaa ¿afeskakī mī ea fepasimē?” Jesús fani.

²⁴ Askafaito nikakī Anás āfe rayos Caifās ano Jesús nīchini metexkere axō. Nā Caifās ato Nios kīfixomis āto xanīfokōi ini.

Pedro anā ato yoini: “Ēkai Jesús ōimisma,” ato fani

(Mt. 26.71-75; Mr. 14.69-72; Lc. 22.58-62)

²⁵ Nānoax Pedro ato fe chii yooni. ato fe yooaito afianā Pedro yōkanifo: “Mīfi nā Jesús āfe ina fetsakī,” faifāfe, “Maa, ēkai nā Jesús āfe inama,” ato fani.

²⁶ Ato askafaino nã paxteato afe yõra yõkani: “¿Ë mia õiamamẽ? Akka ã mia õia. Nã fanafo mapoa mẽranao Jesús yafi ã mia õia,” nã paxteato afe yõra Pedro fani. ²⁷ “Maa. Ëkaima,” Pedro faino takara keoinãkafani.

Pilato ano Jesús iyonifo

(Mt. 27.1-2, 11-14; Mr. 15.1-5; Lc. 23.1-5)

²⁸ Nãskano fakishpari judeofãfe Caifás ãfe pexe anoxõ Pilato xanĩfo ano Jesús iyonifo. Nã judeofo Pilato ãfe pexe mẽra ikitiroma inifo. Pilatokairoko judeokẽ a mẽra ikipanãfãfe. “Nõ Pilato ãfe pexe mẽra ikiãx nõ chakanatiro,” ikanax, ikikaspanifo. Nã judeofo a judeofoma fe rafexõ Pascua fistatĩa pitirofoma ipaonifo. Nãskara feyafamisfo ipaonifo. Nãskakẽ Pilato ãfe pexe mẽra ikikaspanifo. ²⁹ Nãskaifono pexe kachiori kãinãkafã Pilato ato yõkani: “¿Afaa chakafakẽ na feronãfake mã ea ano efeamẽ?” ato faito, ³⁰ “Afaa chakafayamakekai nõ mikiki efekeranama,” faifãfe, ³¹ ato Pilato yoini: “Iyotakãfe. Mãto xinifãfe yoini keskafakĩ omiskõimaxikakĩ. Nã keskara mã feyafamiski. Afaa chakafamãki mã akãfe,” ato Pilato faito, judeofãfe kemanifo: “Akka mãto xanĩfofõfãfe yoinifo nõ tsoa retekĩ mastatiroma,” fanifo.

³² Jesús aõxõ tãpimisfo taeyoi yoini keskafakĩ nãskakõĩ fanifo ifi cruz ikaki mastakakĩ.

³³ Nãskano Pilato ãfe pexe mẽra Jesús ikimani yõkaxiki. Mã ikimaxõ yõkani: “¿Mĩmẽ judeofãfe ãto xanĩfo?” Pilato faito, ³⁴ Jesús kemani: “¿Mĩ ea shinãmẽ ã judeofãfe xanĩfo mia yoiãforaka?” Jesús faito, ³⁵ anã Pilato kemani: “¿Mĩ shinãmẽ ã judeo? Ë judeoma. Akka mã kaifo feta mã xanĩfofõfãfe mia ekeki efeafõ ã mia omiskõimanõ. ¿Mĩ afaa chakafakẽ mia ekeki efeafomẽ? Ea yoife,” Pilato faito, ³⁶ Jesús kemani: “Ëkai na mai anoax xanĩfoma. Ë nonoax xanĩfokẽ a ea Ifofaafãfe yorafo setekeranafo ea achiyamanõfo. Akka êkai na yorafãfe ãto mai anoax ãto xanĩfoma,” Jesús faito, ³⁷ Pilato kemani: “¿Akka mã xanĩfo rakikĩã?” faito, “Nã ea mã yoiã keskarakĩã ã xanĩfo. Nãskakẽ ã yõra fakekõĩ kãini meka chanĩmakõĩ ato yoixikĩ. A meka chanĩmakõĩ fisti nikapaiyãfãfe nãfãfe ea nikamisfo,” Jesús faito, ³⁸ “¿Afaamẽ a meka chanĩmakõĩ?” Pilato fani.

Pilato ato yoini Jesús retenõfo

(Mt. 27.15-31; Mr. 15.6-20; Lc. 23.13-25)

Askafata Pilato pexe kachiori kãinãkafani. Kãinãkafaxõ judeofo yoini: “Ë na feronãfake yõkakĩ êkai aõnoa afaa chaka nikama,” ato fani. ³⁹ “Iskaratĩa na Pascua fistatĩa ã yora fisti karaxa mẽranao ã mato kãimaxomis, nãskaramãĩ mãto feyafamiskẽ. ¿Akka ã mãto xanĩfo ã mato kãimaxotiromẽ katanõ?” ato faino, ⁴⁰ fãsikõĩ mekainĩfõfãfõfo: “¡Jesús tsekakima! ¡Barrabás noko kãimaxõfe!” fanifo. Nã Barrabás yometso ini.

19

¹ Nãskaxõ Pilato ato yoiano Jesús iyonifo sorarofãfe koshatinĩ koshaxikakĩ. ² Askano sorarofãfe moxa chainipafo maiti fakaxõ maimanifo. Akiki kaxepayanã nãskatari tari õshi nana safemanifo. ³ Nãskax akiki kaxepai kakĩ iskafanifo: “Aicho. Mifi judeofãfe ãto xanĩfoki. Mĩ mẽxotaima nipanakakĩ,” iyanã fepasketsanifo.

⁴⁻⁵ Askafaifono Pilato Jesús pexe xaki mẽranao kãimani õinõfo. Jesús tari õshi nana safeax kãikaini, moxari maiti fakaxõ maimanafono. Nãskaxõ Pilato ato yoini: “Õikapo na feronãfakekai afaa chakafaa ã nikama ã chakafapanã,” ato fani. ⁶ Ato askafaito judeofãfe ãto xanĩfoyxõ a Nios kĩfiti pexefã kexemisfãferi

fāsikōi mekafanifo: “¡Mastafe! ¡Mastafe!” faifono, “Mā iyokaxō mastatakāfe. Ēkai aōnoa afaa chaka ē nikama ē chakafapanā,” Pilato ato fani. ⁷ Ato askafaino judeofāfe kemanifo: “Akka na feronāfāke noko yoimis: ‘Ēfi Niospa fakeki,’ noko famis. Akka nōko xinifāfe yoini: ‘Ē Niospa fakera ikai natiro,’ fanifo. Nāskakē na feronāfake nayamaima,” fanifo.

⁸ Askafaifāfe nikai Pilato ratekōini. ⁹ Nāskaxō āfe pexe mēra Jesús anā iyoni. Iyoxō yōkani: “¿Fanīamē mī?” faino, Jesús kemanima. ¹⁰ Pilato anā Jesús yoini: “¿Ea mīa kemaimamē? ¿Ea mīa tāpiamamē ē xanīfo? Ē mīa kāimatiro, askayamai ē mia ato mastamatiro,” Pilato askafaino, ¹¹ Jesús kemani: “Niospa mīa xanīfo imayamainokai mī ea afeska fakeranama. Akka mī ea ato mastamanax mī chaka iki. Akka nā ea mikiki efea nā chakafinakōi iki mī ea reteano,” Jesús fani.

¹² Askafaito nikakī Pilato Jesús kāimapaini. Kāimapaiyaino nikakani fāsikōi judeofo mekainīfōfākata yoinifo: “Fatora fetsa xanīfo ipaikī nāato César xanīfo chakafai. Akka na Jesús xanīfo ipai. Akka mī Jesús kāimaxō mī anā nōko xanīfo César tanaima,” fanifo.

¹³ Askafaifāfe nikakī afianā Pilato Jesús pexe mēranao kāimani. Nāskax Pilato a xanīfāfe tsaoti ano tsaoni. Nā xanīfāfe tsaoti pexe emāiti ini tokiri sapa kamaki āfe tsaotiki tsāoni. Nā tokiri hebreofāfe āto mekapa anemisfo Gabata fakakī. ¹⁴ Mā Pascua fista ikaino xini keya Pilato tsaioxō ato yoini mā Jesús kāimaxō, “Nakīa ōikapo māto xanīfo,” ato fani. ¹⁵ Ato askafaino fāsikōi mekainīfōfākata yoinifo: “¡Iyoxō mastatāfe ifi cruz ikikakīnoax nanō!” faifono, “¿Mā ōipaimē ē māto xanīfo mastanō?” ato Pilato faino, “César fisti nōko xanīfokōi. Anā ano nōko xanīfo fetsama,” judeofāfe āto xanīfōfāfe Pilato fanifo.

¹⁶ Askafaifono Pilato ato Jesús nīchixonī iyoxō mastatanōfo.

Jesús ifi cruz ikaki mastanifo
(Mt. 27.32-44; Mr. 15.21-32; Lc. 23.26-43)

¹⁷ Nāskano sorarofāfe Jesús iyonifo. Iyoaifono āakōi ifi cruz ika Jesús iyaxō foni. A mastaifo ano nokoni. A mastaifo nāno āfe ane ini: “Mapo Xao,” fanifo anekakī. Judeofāfe mekapa Gógotara fapaonifo. ¹⁸ Nāskata Jesús yafi yometso raferi mastanifo. Takai rafe yometso rafe mastanifo. Akka Jesús nēxpakīa anifo.

¹⁹ Mā Jesús mastakaxō āfe mapo mānāori kenenōfo Pilato ato yoini. “Jesús Nazarete anoa judeofāfe āto xanīfokōi,” fanifo kene kakī. ²⁰ Jerusalén ano yora fetsafo osiafo ichapakōifo inifo. Nānoxō Jesús Jerusalén chaimashtaxō mastafō ini. Nānoxō Pilato meka fetsa fetsatapafo ato kenemani Jesús judeofāfe āto xanīfokē tāpinōfo. Judeofāfe āto meka keneta, griegofāfe āto meka keneta, romanōfāfe āto mekari kenenifo. ²¹ Nāskax judeofāfe āto xanīfofo Pilato ano fonifo yoi fokani: “Jesús nōko xanīfoma. Nāskakē ato kenemayamafe iskafakī: ‘Jesús judeofāfe āto xanīfokōi,’ askara ato kenemayamafe. Akka, ‘Jesús yoimis, “Ē judeofāfe xanīfora” imis.’ Nānori mī ato kenematiro,” faifāfe, ²² Pilato ato yoini: “Nā ē ato kenemana keskara ē ato kenemani. Ēkai anā afaa fetsa ē ato kenematiroma,” Pilato ato fani.

²³ Sorarofāfe Jesús mastaifono āfe rapati fīanifo. Nāskax paxkanāi fetsenifo Jesús āfe rapati soraro cuatropa Jesús rapati finifo. Nāskata nā āfe tari chainipari fīanifo. ²⁴ Nāskax yoinānifo: “Nā tari nō faxteimākai fetsakanāyamaxikī. Nāskara memashara nō finō,” inifo. Nāskax āfe tariya kaxenifo āto kaxetiya.

“Na finōmanato Jesús āfe tari fii kiki,” inifo. Nānori Niospa meka yoikakī keneyonifo. A Jesús inōpokoai yoikakī keneyonifo. Iskafakī kenenifo: “Ēfe rapatī paxkanāxikani. Askata ēfe tari chainipayari āto kaxetiya kaxexikani. Nā finōmanato ēfe tari fixii,” ixō kirika keneyonifo. Nāskakē sorarofa Jesús āfe tariya kaxenifo.

²⁵ Nāskano nā Jesús mastafa ano chaimashta Jesús āfe afa nini. Āfe afa fet-sari nāno nini. Nā Cleofaspa āfe āfinō María Magdalenanō nāno chaimashta ninifo. ²⁶ Nā aōxō tāpimis fisti āfe yamakōi a Jesús noikōipaoni afa fe ketaxamei nikē Jesús ōini. Nāskaxō Jesús afa yoini: “Na feronāfakēfi mī fakeki,” fani. ²⁷ Nāskata nā feronāfakēfi Jesús yoini: “Nafi mī efaki,” fani. Askafaino nikakī María āfe pexe ano iyoni kexesharaxiki.

Jesús nani

(Mt. 27.45-56; Mr. 15.33-41; Lc. 23.44-49)

²⁸ Jesúsnoa yoikī Niospa meka keneyonifo keskakōini. Mā Jesús tāpīxō yoini: “Ē nōamāiki,” ato fani. ²⁹ Ato askafaino fimi ene kacha ocha mefetiki tsaeano nā mīxa fikaxō fimi ene kachaki momokaxō Jesús ayamapainifo tafa xatekī rōtati fakaxō. ³⁰ Mā fimi kacha ayaxō Jesús yoini: “Keyokōi ēfe Ēpa ea yoiā keskara mē aka,” ato fani. Ato yoita nāskax nai tepopakekafāni.

Soraronō Jesús āfe pishi nāmā chachini

³¹ Mā Pascua fista ikaino Jesús yafi yometso rafe ifi cruz ikakīnoa judeofāfe ōikaspanifo. Nā fīstatīa ato pena tenetīa ini. Nāskax mā fista ikaino Pilato ano fonifo yoi fokani iskafakakī: “Mā penama nōko fista iki kiki. Nā Jesús yafi nā yometso rafe āto fitax xao tēkerisa fanōfo koshi nanōfo ato yoife. Mā penama nōko fista iki kiki nā ato mastafa ano anā inōfoma nōko fīstatīa,” judeofāfe āto xanīfōfōfāfe Pilato fanifo. ³² Nāskafaifono Pilato sorarofa yoini iskafakī: “Āto fitax xao ato tēkerisa fakāfe koshi nanōfo.” Ato askafaino fokaxō ōiafo yometso rafe naafoma inifo. Naafomano āto fitax xao ato tākenifo nanōfo. ³³ Akka Jesúski fokaxō ōiafo mā Jesús naa ōinifo. Nāskakē tsōa āfe fitax xao tēkenima. ³⁴ Akka soraro fistichi āfe āshi āfe pishi nāmā chachiaino āfe imi fakaya siini.

³⁵ Ēkīa Juan na kirika ē keneai nā ē ōimis keskara ē mato yoi na kirika kenekī mā chanīmara fanō. Ēfi chanīmakōi mato yoi. ³⁶ Niospa meka yoimisto a Jesús inōpokoai yoikī kirika kenei iskafakī: “Āfe xaokai tsōa tēkexikanima,” ixō kirika keneyonifo. ³⁷ Askatari, “A āfe pishi chachiaifono ōixinōfo,” a Niospa meka yoimisto nānorikōi kirika keneyoni.

Jesús makex kini mēra maifanifo

(Mt. 27.57-61; Mr. 15.42-47; Lc. 23.50-56)

³⁸ Nāskano José Arimatea ano ikax Pilato ano kani. Kaxō Jesús āfe yora yōkani: “Ifi cruz ikakīnoa ē Jesús fotomapai maifaxikī,” José faito, “Atāfe,” Pilato fani. Nā José Jesús Ifofamis ini. Jesús Ifofaīxō ato yoinima. Judeofāfe āto xanīfōfōki mesekī ato yoinima. ³⁹ Nicodemo feta José Jesús ifi cruz ikakīnoa fotomanifo maifaxikakī. Nā Nicodemo Jesúski fakishi kaxō yōkayoni. Nāato āfe pirofomā shara treinta kilo feni Jesús āfe yora raish axiki fena pisiyamanō. Fetsa āfe ane mīrra ini. Fētsa aneri āloes ini. Nā rafe osia ini. ⁴⁰ Askano José feta Nicodemo sama oxo shara pirofomā raish axō aō rakonifo. Judeofāfe āto kaifo maifakī askara feyafamisfo ini. ⁴¹ Nā ifi shara mīshti mapoa anoxō chaimashtaxō Jesús mastanifo. Nānori mafa kini fena, tsoa a mēra maiyomisma ini. ⁴² Mā judeofāfe āto pena teneti chaimashta

ikaino mā xini kaino Jesús maifanifo. Nāskakē nā mafa kini chaimashta nā mēra Jesús maifanifo.

20

Jesús otoni

(Mt. 28.1-10; Mr. 16.1-8; Lc. 24.1-12)

¹ Nāskano nomikonō fakishparikōi María Magdalena kani nā Jesús mafa kini mēra maia ano. Kaxō ōia mā mafa kini fepekemea ini. Nā tokirinifā aō fepoitafo mā fepekemea ini. ² María ōifaini ichoni Pedro yafi nā Jesúsxō tāpimis fetsa nā Jesús āfe yamakōi chanifaikai kani. Ato yoini: “Nōko Ifāfe āfe yora kini mēraano mā fakira oneafo nōkai tāpiama,” ato fani.

³ Ato askafaino Pedro fe a Jesúsxō tāpimis fetsa ōifokani ichonifo. Mafa kini ano ōifokani. ⁴ Nā fētsa Pedro xonōfaini rekē nokoikakī. Akka Pedro chipo nokotoshini. ⁵ Rekē nokotoshixō a Jesús maia ano mafa kini mēra tēkepakekafā naisni. Ari naiskī ōia a aō rakoitafo sama mania ini. ⁶ Nāskata Pedrori chipo nokotoshini. Nokoax mafa kini mēra ikikaini. Ikikaixō ōia aō rakoitafo mania ini. ⁷ A aō mapoki marakoitafo nā fosoita ariri āfe sama mania ini chaimashta. ⁸ Askaino a Pedro fe kaari kini mēra ikikaini. Ikikaikī ōia ano Jesúsma ini. Nāskaxō chanīmara fani. ⁹ A Jesús otoxiai Niospa meka yoiikī kirika kenenifo tsōa tāpiyonima. ¹⁰ Nāskata mā ōita āto pexe ano fenifo.

Jesús María Magdalenaki nokoni

(Mr. 16.9-11)

¹¹ Mā foaifono María kanima. Mafa kini kachiori niax María oiani. Oiayanā nāatori kini tēkepakekafā naiski ōini. ¹² Niospa āfe ājiri rafe rapati oxokōi safekanax tsoafo ini Jesús rakaita ano. Nā fosoita ariri fetsa tsoa, fetsari āfe tae ikita ariri tsoa ini. ¹³ Nāskaxō Niospa āfe ājiri rafeta yoini: “¿Afeskaī mī oiaimē?” faifono, “Ēfe Ifāfe āfe yora mā fakira oneafo ē tāpiama,” ato fani.

¹⁴ Nāskata María texkeakekafā ōia Jesús a kachiori niano tāpinima. ¹⁵ Jesús María yōkani: “Kēromā, ¿afeskai mī oiaimē? ¿Mī tsoa fenaimē?” faito, María shināni: “Nā fanafo kexemisra,” fani. Nāskaxō María yōkani: “Mī ēfe Ifāfe āfe yora fanī mī faamē ea yoife, ē afianā nono maifanō,” faito, ¹⁶ Jesús: “María,” faito, foisnīfofā María ōia nā Jesús āfe fesokōi ini. Nāskaxō María judeo mekapa: “Rabonī,” fani. Rabonī fakī, “Noko tāpimamisto,” fani. ¹⁷ Askafaino, “Ea ramāyamafe. Ēfe Epa ari ē kaamaki. Akka ea ramākima efe yorafo ea ato yoixotāfe, mā ēfe Epa Nios ari ē kaikai. Nā ēfe Epari mātō Epaki. Nā ēfe Niosri mātō Nioski, ato fatāfe,” fani. ¹⁸ Askafaino María kaxō aōxō tāpimisfoki nokoxō ato yoini: “Mē nōko Ifo ē ōiaki,” ato fani. Nā āfe Ifāfe yoia keskara ato yoini.

Jesús aōxō tāpimisfoki nokoni

(Mt. 28.16-20; Mr. 16.14-18; Lc. 24.36-49)

¹⁹ Nāskata nomikonō mā xini kaino a aōxō tāpimisfāfe judeofoki mesekakī āto pexe fepoti feponifo ichanākakī. Mā ichanāifono āto nēxpakīa Jesús nirisatani. Ato yoini: “Mātō ōiti fepeakax inimasharakāfe,” ato fani. ²⁰ Ato askafata a mifiki rāfomā mastaitafo āfe tsefe ato ispani. A āfe pishiki āshi chachitafori ato ispani. Ato ispaifo ōikani āto Ifoki fāsi inimakōinifo.

²¹ Afianā Jesús ato yoini: “Mātō ōiti fepeakax inimasharakāfe. Nā ēfe Ēpa ea nīchini keskafakīri iskaratīa ē matorī nīchikai,” ato fani. ²² Nāskaxō ato yoini: “Na ēfe Epa āfe Yōshi Shara fikāfe,” ixō atoki axfainākafa ato xoō ani.

23 “Fatora fetsa mā āto chaka soaxonaino Niospari āto chaka soaxoxii. Mā ato chaka soaxoyamaino atoō chaka nepakenaka,” ixō Jesús ato yoiāx nāskax ato makinoax kani.

24 Ato Jesús yoiainokai Tomás ato fe ano inima. Nā Tomásri Jesúsxō tāpimis ini. Āfe ane fetsa “Rafe Kāini” fapaonifo. 25 Tomás atoki oaino yoinifo: “Mā nōko Ifo nokoki oaito nō ōia,” faifāfe Tomás ato yoini: “Ē āfe mifi natakino a rāfo tsefefe ē meikerana a āfe pishi tseferi ē meikerana nāskaxō ē chanīmara fakerana. Akka ē āfe tsefefe ramākayamaxō a mā Jesús ōia ē chanīmara faima,” ato Tomás fani.

Jesús aōxō tāpimisfoki anā nokorisatani

26 Nāskata ocho nia oxata Jesús aōxō tāpimisfo anā kene mēranoax ichanāfono Tomásri nāno ato fe ini. PeXe fepoti fepokōiafono Jesús atoki nokorisatani. Anā ato yoini: “Māto ōiti fepeakax inimasharakāfe,” ato fani. 27 Nāskaxō Jesús Tomás yoini: “Ea mī mīfi ramāfe ēfe mifi nataki. Ēfe pishi nāmāri ea ramāfe. Anā ea chanīmara fakima, ea chanīmara fafe,” Jesús faito, 28 Tomás kemakī: “Mīfi ēfe Ifoki. Mīfi ēfe Nioski,” faito, 29 “Ea mā ōikī mī ea chanīmara fai,” fani. “Akka ea ōiyamafikakī ea chanīmara faifofi Epa Niospa ato shara faxii. Inimakōixikani,” Jesús fani.

Juan kirika keneni tāpinōfo

30 Akka afama mīshti tsōa atiroma keskafakī Jesús aōxō tāpimisfo ato ōimamis. Afara fetsafori Jesús aka ē afo mato kenexonama. 31 Epa Niospa Jesús nīchini nōko Ifo inō. Nāfi Niospa Fakeki. Ē mato Jesúsnoa kenexoni mā chanīmara fanō. Chanīmara faax mā aōnoax Nios fe nīpaxanō.

21

Īamāfā kesemē Jesús aōxō tāpimisfoki nokoni

1 Nāskano Jesús anā aōxō tāpimisfoki atoki nokoni. Īamāfā Tiberias kesemē nāno atoki nokoni. Ē mato yoinō afeskax Jesús onimāki.

2 Pedro fe Tomás (nā Tomás “Rafe Naneni” fapaonifo), Natanael Caná anoa ini Galilea mai anoa, Zebedeo Pedro ato yoini: “Ē rinipa fii kaikai,” Pedro ato faino, “Nōri mefe kai,” fanifo. Nāskax fonifo kanōanāfānē nanefainifo. Fōkata rini potenifo nā rini fakishchāi potefikaxokai tsōa foe finifoma.

4 Mā penaino Jesús Īamāfā kesemē atoki nokorisatani. Īamāfā kesemēxō aōxō tāpimisfāfe tsōa Jesús tāpinifoma. 5 “ĶĒfe fakefāfe, mā foe fiamamē?” ato faino, “Nō fiamā,” fanifo. 6 Askafaifono ato yoini: “Māto pōya kayakai aōri māto rini potekāfe. Askafaxō mā fitirokī,” ato faino nikakakī nā ato yoiāi keskafanifo āto rini potekakī āto pōya kayakai aōri. Nāskaxō meafō mā foe kayakōi fia menifo. Ato kanōanāfā mēra nanepaikakī ranānifo. 7 Nā Jesúsxō tāpimis fētsa nā Jesús āfe yamakōi ipaonito Pedro yoini iskafakī: “ĶNāfi nōko Ifoki!” fani. Askafaito nikai Pedro koshikōi āfe rapati safeni nāskax kanōanāfā makinoax Īamāfānaki pakekaini āfe Ifoki nokorisapai. 8 Nāskaito ōikani atiri kanōanāfānē acho fonifo. Āto rini foe fospikōiano ninifonifo Īamāfā kesemē chaimashta nokoxikakī.

9 Mā Īamāfā kesemē nokokaxō ōiafo chii mǎnǎ mǎnǎ ikaito ōinifo. Foe yafi pāa xoimea chii ketokonō raka ōinifo. 10 Askata Jesús ato yoini: “A mā rama foe fia niri fekāfe,” ato fani.

11 Akka Pedro kanõanãfãoxõ rini ninifoni ãamãfã kesemë rataxiki. Mã rini fixõ õia foe rini mëra fospikõia õini. Ciento cincuenta y tres ini. Akka fõe rini faxtenima. 12 Askaifono Jesús ato yoini: “Piyoi fekãfe,” ato fani. Akka tsõa yõkanima: “¿Mĩ tsoamë?” tsõa fanima mãmãĩ tãpikaxõ ãto Ifomãiyakë. 13 Nãskaxõ Jesús ato pimakĩ ato pãa yafi foe ato inãni.

14 Mã reteafono otoitaxakĩ aõxõ tãpimisfoki nokoni. Tres ves ini atoki oi.

Jesús Pedro yoini

15 Mã pixõ Jesús Simón Pedro yoini: “Simón mĩfi Juan fakeki. ¿Na fetsa finõmainĩfõfã mĩ ea noimë?” faito, “Èje Ifo. Mã mĩ tãpiaki ã mia noiaito,” Pedro faito, Jesús yoini: “A ea noisharaxõ a ea rama Ifofaifori ato kexesharafe ea Ifosharafanõfo. A oveja kexemisto ãfe oveja fake kexemis keskafafe ato kexekĩ,” fani.

16 Anã Jesús Pedro yõkani: “Simón, mĩfi Juan fakeki. ¿Chanĩmamë mĩ ea noimë?” faito, “Èje, Ifo. Mã mĩ tãpia ã mia noiaito” Pedro faito, anã Jesús yoini: “A ea noisharaxõ ea Ifofamisfo ato kexesharafe ea Ifosharafanõfo. A oveja kexemisto ãfe oveja kexemis keskafafe ato kexekĩ,” fani.

17 Nãskaxõ anã Jesús yõkani: “Simón, mĩfi Juan fakeki. ¿Ea mãa noikõimë?” ixõ Jesús yõkari faino Pedro anã tooxinima. Nãskaxõ anã Pedro kemani: “Ifo, mĩfi afama mĩshti tãpiaki. Mã mĩ tãpia ã mia noiaito,” fani. Askafaino anã Jesús yoini: “A ea Ifofamisfo ato kexesharafe ea Ifofasharanõfo. 18 Ë mia yoikõinõ. Mĩ naetapakĩ nã mĩ apaiyai keskara mĩ fapaoni. Askatari nã mĩ kapaiyai ari mĩ kapaoni. Akka mã mĩ anifoax mĩ takairafe mëshax kaxii mã iyoaifono a mĩ kapaiyamai ari mã iyoxikani,” Jesús fani. 19 Askafakĩ Jesús Pedro tãpimani afeskax naximãkai. Pedro Jesúsnoax naxiaino yorafãfe mã tãpikaxõ, “Nios finakõia,” faxikani. Nãskano Jesús Pedro yoini: “Ea Ifosharafafe,” fani.

20 Askafaino Pedro texkeakekafã Juan fichini acho oaino. (Nã Juanri Jesúsxõ tãpimis ini, Juan Jesús noikõia ini. Jesús reteyoafomano aõxõ tãpimisfo feta fakishi piyoni. Akka Juan afe ketaxamei tsoaxõ Jesús yõkani iskafakĩ: “¿Ifo, tsõakai mã ato achimaximë?” fani Jesús reteyoafomano afeta pikĩ.)

21 Nãskaxõ Pedro nã Juan fichixõ Jesús yõkani: “¿Ifo, afeskax na Juan naximë?” fani.

22 Askafaino Jesús kemani: “A ã nimapaikĩ ã nimaino niyoxii nã ã anã oaitã. Akka mãkai aõnoa shinãchakatiroma. Askatamaroko ea Ifofatitaifafe. Eõnoa fisti shinãfãfãife,” fani. 23 Nãskax Jesúsxõ tãpimisfo ãa ranã yoinãnifo: “Juankai nanakama,” fanifo. Askafafiaifono Jesúskaĩ Pedro anori yoinima. Akka iskafakĩ yoini: “A ã nimapaikĩ ã nimaino niyoxii nã ã anã oaitã. Akka mãkai Juanõnoa mã shinãchakatiroma,” fani. Nãnori fisti Jesús Pedro yoini.

24 Èkã Juan ã kirika kenexõ ã mato yoi. Èri Jesúsxõ tãpimis. Ea Jesús noikõia. Jesús afarafo faito ã õimis. Nãfo ã mato kenexoni. Jesús afarafo akaito më õimis. Nãskakë mã ãfe meka chanĩmara fatiro. Ë mato yoiaito mã Jesús chanĩmara fatiro. 25 Jesús afama mĩshti fani afo yoikĩ nõ kirika kenekĩ mitotiroma. Èkã Juan ã mato kirika kenexoni. Nã tii.

Jesúsxō Tāpimisfāfe Apaonifo Keskara

“Niospa āfe Yōshi Shara matoki nīchixii kiki,” ixō Jesús yoini aōxō tāpimisfo

¹ Teófilo, ē mia anā kirika kenexoni mia yoikī. Ēfi Lucaski, mia kirika fomai. A Jesús nai mēra kayoxoma afama mīstiffo fayanā ato tāpimapaoni keskara yoikī ē mia kirika kenexō fomayoni, mī tāpinō. ²⁻³ Mā Jesús refetiafono oxa rafeta anā otoni. Mā otoxō aōxō tāpimisfo ato ifixō ato tāpimani Niospa Yōshi Sharapa shināmanaino akairi fetsafo tāpimanōfo. A metasitafo ato ispaketsani a aōxō tāpimisfo. “Nafō ea metasitafokī ōikapo,” ato fani ōikakī tāpisharanōfo. Mā anā nia afia ipaoni keskara ixō tāpinōfo ato yoisharani nai mēra kayoxoma. Cuarenta nia oxata ato tāpimasharani chipo katāxiki ato yoipakeyoni a Nios xanīfoōnoa ato yoisharapakeni. Nāskax Apa Nios ari kani nai mēra.

⁴ Nai mēra kayoxoma anā pena fetsa aōxō tāpimisfo yoisharani iskafakī: “Nonoax fakifoyoyamakāfe. Ē mato yoisharayonō, mā nikasharanō. Ēfe Epa āfe Yōshi Shara matoki nīchixii kiki a ē mato yoimis keskafakī. Mā mā nikafafainakī ē mato yoiaito. Nāskakē na Jerusalén anoxō manayokāfe, ēfe Epa āfe Yōshi Shara mato mēra naneyonō. ⁵ Juan mato maotisafakī faka mēra ikimapakeni Niospa māto chaka mato soaxonano mā ato ōimanō. Nāskafakiri samama fatora penata Niospa āfe Yōshi Shara mato mēra naneaino mā shinā sharaya ixii.”

Jesús nai mēra kani

⁶ Anā ano fisti Jesús fe ichanākaxō yorafāfe yōkanifo iskafakakī: “¿Ifo, iskaratīa nōko kaifo israelifāfe āto xanīfo mī ikimē? ¿Anā nafa nōko xanīfo ixiimamē?” fanifo yōkakakī.

⁷ Askafaifāfe Jesús anā ato yoini iskafakī: “Tsōa tāpiama. Epa Nios fistichi tāpia. Afetiāra inōpokoi mā tāpitiro. ⁸ Mā tāpiyamafitirono Niospa āfe Yōshi Shara mato mēra naneano aōxō mā afama mīsthi tāpitiro. Nāskakē mā eōnoa ato yoitiro mēstekōi. Taefakī nā Jerusalén anoafō yoita, nā Judea anoafō yoita, nā Samāria anoafō yoita, keyokōi nā maitio anoafō eōnoa mā ato yoitiro,” ixō Jesús aōxō tāpimisfo yoini.

⁹ Nāskata mā ato yoita Apa Niospa ifiaino nai mēra kani. Aōxō tāpimisfāfe ōiaifono fininākaḡ kani. Mēstekōi māpeinīfofani nai kōi mēra ikikainaito aōxō tāpimisfāfe anā ōinifoma mā kaano. ¹⁰ Nai mēra foisaifono feronāfake rafe ato ketaxamei nītanifo rapati oxo shara safekanax ato yoinifo iskafakī: ¹¹ “¿Na Galilea anoafāfe, afeskakī mā nai mēra foisimē? Mā Jesús nai mēra kaa. Afetiāra anā matoki oxii. Fatora penata afia mā kaito ōia keskara oxii kiki,” ixō feronāfake rafeta ato yoini.

Jerusalén anoax aōxō tāpimisfo ichanānifo

¹² A māchifanē āfe ane Olivos anoax Jesús ronoinākaḡ nai mēra kaito ōikata anā anoris fenifo Jerusalén ano chaima. Un kilometro Olivos fe Jerusalén nā tiixō rafe ini. ¹³⁻¹⁴ Jerusalén ano nokokata pexe mēra ikifaikata fomākīa māpeinīfoḡkata a ikafo ano ikifainifo. Ano ikifaikanax ano fistiāx ichanānifo. Pedro ikaino, Jacobo ikaino (nā Jacobo āfe ane fetsa Santiago ipaoni), Juan ikaino, Andrés ikaino, Felipe ikaino, Tomás ikaino, Bartolomé ikaino, Mateo ikaino, Jacobo Alfeo fake ikaino, Simón Celote ikaino, Judas Santiago fake

ikaino, Jesús onefetsafo ikaifono, Jesús áfe afa María ikaino, a kēro fetsafori ikaifono ano fisti ichanānifo Nios kīfikani. Nānoxō pena tii Nios kīfifāinifo.

¹⁵ Askata pena fetsa yora rasi ciento veinte ichanānifo. Askaifono Pedro ni-inākaḡā ato yoini ¹⁶ iskafakī: “Efe yorafāfe, ea nikakōisharakāfe ē mato yoinō. Na Judaspafi yorafo iyoita Jesús achifonōfo. ‘Fato Jesúsmākī noko yoife,’ faifāfe, ‘Nakīa,’ ato faito ōikakī achitafo. Afia Niospa shināmanaino nōko xini David yoikī kirika kenepaoni keskaḡakī Judaspa ato yoita. ¹⁷ Na Judas nofe rafemis noko akai keskari fakī Jesús ifini. Nāskakē nofeta yonoxofikatsaxakī mā chakafakī yorafo ato achimanita,” ixō Pedro ato yoini.

¹⁸ (Ato askafaito kori ināitafo āa anofi chakamenō. Kori ināfiafono anā anoris xanīfofo ināita. Nā kori xanīfofofāfe mai fiitafo. Askata Judas āa tenexemeta ifiki nexeax ronoinākaḡāita. Ronox ariax xetaori pakei mā nafaraxikax āfe poko napakemeita. ¹⁹ Askaito nikaitafo Jerusalén anoxō. Anoax āfe imi fokē nā mai aneitafo “Acéldama” ixō aneitafo. Nōko mekapa nō yoitiro iskafakī: “Imi Mai” fakī.) ²⁰ Askata anā Pedro ato yoini iskafakī: “Nōko xini David a inōpokoai yoikī kirika Salmos ano keneni a Judasnoa yoikī iskafakī:

A yōra āfe mai ano tsoa inōma,
yoikī keneni. Nāskata anā yoini iskafakī:

Feronāfake fetsa a yonomis ano ikiakēkafanō,
ixō anori yoikī noko kenexoni.

²¹ “Nāskakē iskaratīa a feronāfake fetsa nō ifinō, a nofe Judas ipaoni keskara inō. Fatora fetsa nō ifinō, a Jesús fe taefenai kafāsapaoni keskara nofe inō. ²² Nā nofe ixō ōini Juan Jesús maotisafakī faka mēra ikimanaino, nāskakē mēxotaima nofe imis, akka mā Jesús nai mēra kaito nofeta ōitakī, nāskakē nō ifinō nofeta ato yomis inō. Nofe rafexō Jesúsnoa iskafakī yoinō: ‘Mā Jesús nayofiax mā anā otofaa,’ ixō ato yoinō,” Pedro ato fani.

²³ Ato askafaino José Barsabás fe Matías nāno inifo. Nā rafe ato ifipaikī, “¿Fato nō ifimē?” ixō shinānifo. Nā José Barsabás āfe ane fetsa Justo. ²⁴ Askata a rafe ifipaifakakī fisti ifinifo. Nāskakē Nios kīfinifo iskafakakī: “Epa Niospa, ¿fato nō ifimē? Epa, mī nōko Ifoki. Keyokōi nōko ōiti mēra mī tāpikōiaki. Nāskakē noko tāpimafe fato mī ifiamāki nofeta mīōnoa yomis inō. ²⁵ Judaspa Jesús ato achimaita. Nāskakē Judas naax omiskōipakenaka. Nāskakē Judaspa anā mīōxō yonotiroa nofeta. Noko tāpimafe fato a Judas ipaoni keskara itiomākī mīōxō ato yomis inō,” ixō Nios kīfinifo.

²⁶ Nāskakata āto ane rafe tokiriki kenexō kesho mēra nanexō napakefofānaifono fisti pakeaito ōikakī nā ifnifo. Matías āfe ane ini. Nāskakē Matías ifiafono nā feronāfake oncefo feta Jesúsnoa yomis ini.

2

Niospa Yōshi Shara ato ōiti mēra naneni

¹ Askata judeofāfe āto fista Pentecostés ikaino a Jesús Ifoafafo pexe fisti mēra ichanānifo. ² Anoxō nikafo nai mēranoax oa nēfefā oi itikikerani pexe mēraxō nikafo. ³ Nāskata ōiafo oa chii keskara fotopakekaḡāni. Oa nōko ana keskarafiax oa chii rekēfo keskara maratamefaḡāinafo ini. ⁴ Askaiyono Niospa Yōshi Shara ato mēra nanetani. Askaino anā a meka fistichi tsoa mekanima. Meka fetsafāfe fisti rasi mekanifo Niospa Yōshi Sharapa ato meka fetsafamano.

⁵ Nāskaifono judeofāferi Nios Ifofapaikani Jerusalén ano ipaonifo, chai inoax fekanax. Nā Jerusalén ano inifo mai fetsa fetsatapafo anoax fekanax. ⁶ Anoxō nikafo oa nēfefā oai keskara nikanifo. Askaito nikaferakani a Jesús Ifofafo ichanāfo ano ikitoshinifo. Tāpipaikani afaa afeskaimākai ikanax. Nāskata nikafo a chai inoax feafāfe āto mekapa mekaifāfe nikanifo, fisti rasi āto mekapa mekaifono. “¿Afeskaxō nōko meka tāpiafomē? Nikakapo,” ato fakī fetsanifo. Askakanax ratei fetsenifo. ⁷⁻⁸ Rateyanā yoinānifo. Iskanifo: “Na Galilea anoafāfe nōko meka nikayamafikatsaxakakī nōko meka tāpiafo nō nikai. ¿Afeskaxō tāpiafomē mai fetsanoax nō ofiafiano? ⁹ Akka nō Partia anoax oni. Fetsafori Media anoax fenifo. Fetsafori Elam anoax fenifo. Fetsafori Mesopotamia anoax fenifo. Fetsafori Judea anoax fenifo. Fetsafori Capadocia anoax fenifo. Fetsafori Ponto anoax fenifo. Fetsafori Asia anoax fenifo. ¹⁰ Askatari fetsafori Frigia anoax fenifo. Fetsafori Panflia anoax fenifo. Fetsafori Egipto anoax fenifo. Fetsafori nā Africa fe, Cirene chaima nikakanāfo anoax fenifo. Akka fetsafori judeofo Roma anoax fenifo; ¹¹ nāfo judeokōifo ini. Akka a Roma anoax feafori judeokōifoma inifo. Nāskafikaxō mā Nios Ifofakani judeofo keskara inifo. Askatari fetsafori Creta anoaxri fenifo. Askatari fetsafori Arabia anoaxri fenifo. Nōfi mai fetsa fetsatapafo anoax nō onikī,” ikanax yoinānifo. “Nāskax nō ichanāiyoi oa chai inoax, akka nōko mekapa mekaifāfe nō nikai. Nāskaito nikai nō ratei,” ikanax yoinānifo. “Na Galilea anoafō nōko mekakōichi xafakīakōi yoikani iskakani: ‘Niospa afama mīshti tāpikōia,’ ixō noko yoikani nōko mekapa. ¹² Afeskaxō na yorafāfe nōko meka nikayamafikatsaxakakī noko yoiaifāfe nō ato nikasharakōi,” ikanax rateyanā yoinānifo: “¿Afeskai iskafofomē?” ikanax.

¹³ Askaifāfe ōikakī a yora fetsafāfe ato iskafanifo: “¿Afeskai na yorafo pāekanax nōko mekapa mekakanimē?” ixō yorafāfe ato kaxemetsama fanifo ato ōsakakī.

Pedro Niospa meka ato yoini

¹⁴ Askaifono Pedro niinākakāfā Jesúsxō tāpimisfo oncefo feta fāsikōi mekainākakāfā ato yoini: “Ēfe kaifo judeofofāfe na Jerusalén ano ikafo feta, ea nikasharakāfe. ¹⁵ ¿Afeskakī pāekanax nōko mekapa mekakanira, mā noko faimē? Nafo pāekanima. Penamakai tsoa pāeima mā rama xini keyaino. ¹⁶ Nā mā nikai anori Niospa meka yoimisto Joel kirika keneni Niospa Yōshi Sharapa shināmanaino. Nā iskanōpokoai yoikī kirika keneni iskafakī:

¹⁷ A ea Ifofaifo nā maniafo tii anoā ēfe Yōshi Shara āto ōiti mēra ē nanexii. Nāfo askayoi mā chaima nōko mai keyoaino. Afia penatari mātō fenafāfe ēfe meka yoixikani. Naetapafāfe ōiafo oa namakē ōia keskara ōixikani. Anifo tiitori eōnoa namaxikani. ¹⁸ Askata a ea yonoxomisfori feronāfakefoya kērofoya ēfe Yōshi Shara ē ato mēra nanei fatora penata ēfe Yōshi Sharaōxō eōnoa ato yoinōfo. ¹⁹ Afama mīshti tsōa ōimisma afo ē ato ispaxii nai arixō, nāmāxori ē ato afama mīshti ispaxii. Imi yafi chii āfe kōimāfāri ōixikani ē ato ōimanaino. ²⁰ Askatari xinī anā chaxaxima, fakishkōi; ixii. Oxeri oa imi keskarakōi ōshikōi; ixii. Askata nāfo askai fetseyoi mā chaima mātō Ifo oaino. Askata mā mātō Ifo nokokōiaino keyokōichi xafakīa ōixikani. ²¹ Mā askai fetseaino akka nōko Ifo yoikī fatorafāfe iskafaifāfe: ‘Ifo Cristo, ea shināfe, ē mefe ipaxanō,’ faifāfe ato ifixii, ixō Joel kirika keneni Niospa anori yoiaino,” ixō Pedro ato yoini.

²² Askatari Pedro anã ato yoini iskafakī: “Israelifāfe,* ea nikakāfe. Mā mā tāpia Jesús Nazarete anoa Niospa nai mēraxō nāmā nīchini, nāmāxō mato afama mīshiti ōimanō afara sharafō fakī. Mato askafaino mā tāpinō Niospa Jesús nīchinikē. ²³ Nāskakīkē māfi Jesús achixō yora chakafo ināyameaki achixō cruzki mastanōfo. Akka reteyoafomano Niospa mā tāpixō Jesús nāmā nīchini: ‘Ēfe Fāke mato nāxoxii,’ ixō Niospa yoini mā tāpixō. Nāskakōikī mātōōxō yora chakafāfe reteyameafo Niospa yoini keskafakī. ²⁴ Mā retefitafano Niospa anã Jesús otofani. Anākai omiskōinakama. Anākai nanakama. Anākai natiroma. ²⁵ Askatari a xanīfo David afianori yoikī kirika mēra keneni Cristoōnoa āfe meka iskafakī:

Mē tāpia ēfe Ifo Nios efe itiani. Efe ixō efeta aki kiki. Nāskaxō ea kexei tsōa ea fekaxtefanōma. ²⁶ Nāskakē ēfe ōiti mēra ē fāsi inimakōi Niospa ea kexesharaino. Nāskakē ē yoikī: ‘Nios fāsi sharakōi,’ ē fafafa fāini. Ē Nios chanīmara fakōini afe ipaxakī ēfe yora ea fena faxōano. ²⁷ Ea potayamaino ēfe fero mēsho omiskōipakenakama. Ēfe yora mai mēra nēteima. Epa Niosi, mī ea noi. Ēfi mī fakekōikī, ēfe yora mī pisi famaima. ²⁸ Ē nafiakē mī ea nimapakenaka. Ē mia ari kai, mefe ikax ē inimakōixii, ixō David yoini Cristoōnoa yoikī.

²⁹ “Efe yora mīshtichi, ea nikakāfe. Nōko xini David āa yoikī kenenima. Jesúsnoa yoikī keneni. Afetiama mā David nani. Mā nō tāpia a maia ano. ³⁰ A nã askanōpokoai yoikī keneni. Niospa David yoini iskafakī: ‘Ē mia yoi na chipo kāiyai mī fena ēfe Fakekōi ixii. Mia keskara xanīfokōiri ixii. Ēfi Nioskī. Ē mato pāraima,’ ixō Niospa yoini. Niospa yoiāito nikakī David chanīmara fani, tāpini Niospa pārayamaino. ³¹ Nāskakē David tāpixō a inōpokoai Cristoōnoa yoini iskafakī:

Nafīax otōxii. Nāskax āfe fero mēsho omiskōipakenakama, āfe yorari pīsinakama, ixō David keneni. ³² Nā David yoini keskakōifakī Epa Niospa mā Jesús otoakē nō ōita keyokōichi. ³³ Mā otoax mā nai mēra kaa Apa Nios ano. Iskaratīa xanīfo finakōia Apa fe. Nāskaxō Epa Niospa yoikī taefani iskafakī: ‘Ēfe Yōshi Shara ē atoki nīchixikai nāmā,’ ixō Niospa yoini. Nāskakē Niospa āfe Yōshi Shara nai mēraxō nāmā nīchia. Oa nēfefā keskara Niospa āfe Yōshi Shara nokoki nīchia. Nāskakē nō mātō meka nikayamafikatsaxakī nō meka fetsafāfe nō mekai fetsea. Mā chai inoax oxō mā noko nika, nō mātō mekapa mekai fetseaito. ³⁴⁻³⁵ Nāskakē māri tāpikāfe, nānori David kirika kenenikī Jesúsnoa yoikī. Āa yoinima. David otōax nai mēra kanima. Nāskaxō kirika kenepakekī yoini iskafakī nōko Ifo Cristoōnoa:

Nono efe ife, efe xanīfokōi ixiki. A mia noikaspaifo ē ato mī nāmā nīchinō, ixō yoini Niospa. Nānori tāpixō David yoikī kirika keneni,” ixō Pedro yoini.

³⁶ Askata Pedro anã ato yoini: “Ēri mato anori yoikai, israelifāfe, ē mato pāraima. Mā Jesús retekī mā mastayamea. Akka Niospa yoini Jesucristo nōko Ifokōi inō,” ixō Pedro ato yoini.

³⁷ Ato askafaito nikakakī shinānifo: “¿Afeskakī Jesús askafayameafomē?” ixō shinākī ato ōitinī shināketsanifo, Jesús shinākakī. Askata Pedro yafi a Jesúsnoa yoisais fetsafori yōkanifo: “No fe yorafāfe, nō mato nikai. ¿Nō anā afeskatiromē?” ixō ato yōkanifo.

* 2:22 Israelifo āto ane fetsa judeofo ipaoni.

³⁸ Askafaiifāfe nikakī Pedro ato yoini: “Iskaratīa māto chaka soakāfe anā anori shinākakīma. Jesús aneōxō mato maotisafanōfo, faka mēra ikima-pakekī. Mato maotisafaifono yorafāfe mato ōinōfo mā Jesucristo Ifofaito. Nāskaxō āfe Yōshi Shara mato mēra nīchi kikī mato fe rafekōinō. ³⁹ Jesús yoini iskafakī: ‘Fatora fetsa nōko Ifo Niospa ifixii āfe Yōshi Shara ato mēra nanexii. Māto fakefori, māto fenafori a chai ikafo tiiri nā fake refenoafori Niospa āfe Yōshi Shara ato mēra nanexii Niospa ato ifiano,’ ixō noko Jesús yoini.”

⁴⁰ Ato askafakī yoita anā Pedro ato yoini ato iskafakī yoianā: “Māto chaka soakāfe. Na yora nono nāmā ikafo ichapa chakakōifo chaka shināmisfo. Askakakīma māa kexemesharakōikāfe anā askayamaxikakī. Mā askaito Jesús mato chaka soaxonō mato ifixiki mā afe ipaxanō,” ixō Pedro ato yoini.

⁴¹ Ato askafaito nikakakī yora rasichi chanīmara faifāfe, ato maotisafapanifo, ato faka mēra ikimapakekākī. A ato maotisafaifo tres mil yorāfo ini. Nāskax ato fe rafenifo a Jesús Ifofakakī taefanifo fe. ⁴² Nāskakē keyokōichi ato nikakōinifo a Jesúsnoa yoimisfāfe ato yoiaifono. Nāskax Jesús Ifofaafo fe rafesharakōipaonifo, a rama Jesús chanīmara faifo. Askaxō pāa torekaxō ato pikīpaonifo Jesús shinā kakī, a ato nāxoyamea. Nāskakē Nios kīfitai fapaonifo pena tii ichanākaxō.

Jesús Ifofamisfo isharakōipaonifo

⁴³ Nāskaxō anoxō a Jesúsnoa yoimisfāfe, nā docefāfe, afama mīshtifo apaonifo, yonaifono ato sharafata, afara fetsafori apaonifo, nāskaxō afama mīshti faifāfe ato tāpinōfo. Nāskafaiifāfe ōikani keyokōi anoax yorāfo ratenifo.

⁴⁴ Jesús chanīmara fakani pena tii ichanānifo. Anoax āto afama mīshti paxkanāi fetsexikakī. ⁴⁵ Āto afarafo ato minikaxō kori fixō, a afaamaisfo kori inānifo tsoa afayakēma. ⁴⁶ Nāskata pena tii Nios kīfiti pexefā mēranoax ichanākaxō Nios kīfinifo. Nāskaxō āto pexe mēraxō a Jesús ato nāxoyamea shinākakī pāa torepakexō pinifo inimakōiyanā. ⁴⁷ “Aicho, Nios fāsi sharakī,” ikanax inimai finakōinifo. Askaifāfe ōikani a Jerusalén ano ikafāfe ato yoinifo iskafakakī: “Na Jesús Ifofaafo isharakōiafo,” ixō ato yoinifo. Nāskakē pena tii a yora fetsafāferi Jesús Ifofaifono Niospa ato chaka soaxoni. Nāskax nā Jesús rama Ifofaifo fe ano fistiax ichanānifo, ato fe rafekanax.

3

Pedro feta Juan yora finimisma sharafanifo

¹ Askata a Nios kīfiti pexefā mēra Pedro fe Juan yātapake fonifo. Yātapakes anoxō yorafāfe Nios kīfifokani fopaonifo. ² Nā Nios kīfiti pexefā kāiti ano feronāfake finimisma nāskarapa kāini tsoa ini. Nā mēxotaima iyopaonifo pexe fepoti ano, nā pexe fepotini afe ane “Sharashta” fanifo. Anoxō ikiaifāfe ato kori yōkanō iyopaonifo. ³ Pedro fe Juan ikifainaifāfe ōikī a finimismato ato kori yōkani iskafakī: “Ea kori inākāfe,” ato faito, ⁴ Pedro feta Juan feesnifo. Pedro yoini iskafakī: “Noko feisfe,” fani.

⁵ Askafaito, “Ea kori inākanira,” ixō ato feisni. ⁶ Ato feisaito Pedro yoini: “Ē mia kori ināima. Ē koriyama. Ē mia kori inākima Ē mia sharafatiro. Nikafe, Ē mia yoinō. Jesucristo nā Nazarete ano ipaoni āfe sharaōnoax fininākafāfe,” fani.

⁷ Askata Pedro mētsoinīfōfāni aō pōya mēste aōxori. Nāskax a finimisma fininākafani. Pedro mētsoinīfōfānaino niinākafāni. Askaxō mea mā nisharakōia meeni a finimismato. Āfe taefoya āfe opoxko mā shara meeni. ⁸ Nāskax

inimakōini. Askata mono mono ini. Mono mono ita Pedro fe Juan iki-fainaifono, akairi ato fe ikikaini ichotiri ichotiri ikani inimayanā. Nios kīfīti pexefā mēra ato fe ikikaini. Askata mekani: “Aicho, Niospa mā ea sharafakī,” ixō Nios sharafani. ⁹ Askaito yorafāfe a ichanāfo anoxō ōiketsanifo kafāsaito Nios yoisharayanā. ¹⁰ Askata, “Kee, ōikapo. Mā finia, na pexe kāiti āfe ane ‘Sharashta’ ano tsatiani, a ato kori yōkamis. ¿Afeskax finiamē?” ikanax yoinānifo, rateyanā.

Nios kīfīti pexefā kene fetsa āfe ane Salomón anoxō Pedro ato yoini

¹¹ Pedro fe Juan kaino ato fe kani nā finimisma mā sharax. Nā Nios kīfīti pexefā kene fetsa mēra ikifainifo. A pexe kene āfe ane “Salomón” ini. Askaito nikakani yorafāfe ōifokani ichonifo ano ikiafono. Nāno nokotoshikata ōiafo a finimisma Pedro fe Juan niano ato fe nia ini ato mētsoax. ¹² Askaifāfe ōikī Pedro ato yoini iskafakī: “Israelifāfe, ea nikakāfe. ¿Afeskax nā finimisma sharamē ixō mā shināimē? ¿Afeskakī mā noko ōimē? Nōkai sharafama. Akka Jesúsxō nō sharafaa,” Pedro ato fani. ¹³ Askata anā Pedro ato yoini: “Nōko xinifo Abraham, Jacobo, Isaaca atiito Nios Ifofapaonifo. Afia fistichi a yonoxomis Jesús finakōia imani. Nāskakē afama mīshti famis. Nāskafikēkai mā Jesús Ifofapaiameama. Nāskakē xanifo Pilato Jesús shinākī, ‘Nō reteimakai’ fafiaito, ‘Maa, nō sharafaima, ato retemafe,’ ixō Pilato mā yoiyamea, Jesús retenōfo. ¹⁴ Jesús ōiti sharayaxō afaa pishta chakafamisma, akka mā noikas-payamea. Nāskakē mā Pilato yoikī: ‘A chaka kāimayamafe,’ mā fayamea. Pilato Jesús kāimapafiaino a yora chakakōi Barrabás kāimakaspakī. Askafaito mā iskafayamea: ‘Barrabás kāimafe, Jesúsroko ato retemafe,’ mā fayamea. ¹⁵ Akka nā Jesús taefakī yora onifani, iskaratīari noko ikinā, ađnoax nō nia. Nāskafekē mā reteyamea. Mā mā retefiano Apa Niospa afianā otofayamea. Nāskaito Juan feta nō ōiyamea. Mā anā otoyamea. Iskaratīa nia. ¹⁶ Nāskakē nā finimisma Jesús chanīmara faax mā fininākafāna. Jesúsnoax mā shara. Nāskakē keyokōichi mā ōi.

¹⁷ “Nāskakē ē mato yoi, efe yora mīshtichi. Akka ēfi mē mato tāpimiskī. Akka mā tāpixoma mā Jesús reteyamea, ‘Niospa Fakemara,’ ixō. Askata mato xanīfofōfāferi tāpiyameafoma. Jesús nōko Ifokōi fiano tāpixoma reteyameafo. ¹⁸ Nāskakē afetīama Niospa yoini a inōpokoai mā tāpixō: ‘Ēfe Fake Cristo retexikani,’ ixō Niospa yoini. Nānori yorafāfe kirika kenenifo, Niospa ato shināmanaino. Nāskakē mā reteyameafo a Niosnoa ato yoimisfāfe nānorikōiri yoinifo. Mā askakōia. Akka Niospa mā tāpiano, mā askakōifayamea. ¹⁹ Nāskakē mato chaka xatekāfe. Mā afara chakafamiskī anā anori shināyamakāfe. Nāskakē Epa Nios fisti shinākāfe, mato chaka mato soaxonō. ²⁰ Nāskaxō nōko Ifāfe mato ōiti mato inimamasharakōinō. Nāskakē mato ano Cristo Jesús Niospa anā nīchixii, mato Ifokōi mato nīchixoxii. Āfe Fake Cristo Jesús katonī mato ifimis inō. ²¹ Iskaratīa Apa fe nai mēra iyoa, oyoxoma na nāmā anoafo keyokōi Niospa fena shara fayoi. Askata chipo nāmā Jesús anā fotoxii. Nānori a Niosnoa yoimisfāfe yoiyopaonifo a inōpokoai yoi kakī, Niospa ato shināmanaino. ²² Moisésri nānori yoikī kirika kenenī iskafakī afia Nios fistichi shināmanaino: ‘Nōko Ifo Niospa mato mēra fisti nīchixii mato Nios yoixomis inō, ea ani keskafakī. Nāto mato yoiāi anori nikasharakōikāfe. ²³ Akka a nikakaspaifo Niospa afe yorafo mēra ato ifixiima. Ato makinoa ato potaxii anā ato fe inōfoma.’ ²⁴ Na iskaratīa nō ōiai yoikī Samuel taefakī yoini a inōpokoai yoikī. Nānori fisti a Niosnoa yoimis fetsafāferi keyokōichi yoinifo

Niospa ato shināmanaino. ²⁵ Nāskax mā mātō xinifāfe āto fenakōifokī mā. Nāskakē Niospa mātō xinifo iskafakī yoini: ‘Mātō fenafoōxō ē ato sharafai keyokōi nā maniafo tii,’ ixō Niospa Abraham yoini. ²⁶ Nāskakē Niospa āfe Fake Jesús nokoki nīchini nai mēraxō yonoxomis inō. Taefakī nokoki nīchini nōko chaka nō xatenō anā chaka shināyamaxiki a Ifo sharafaxō. Nāskax nō isharakōinō,” ixō Pedro ato yoini.

4

Pedro yafi Juan xanīfofo ano iyonifo

¹⁻² Pedro feta Juan Jesúsnoa yorafā rasi yoiiafono òikani atoki fenifo, a ato Nios kīfixomisfo ita, a Nios kīfiti pexefā kexemisfo xanīfofo ita, saduceofo ita nāfo atoki fekanax òitifishkinifo, Pedro feta Juan mā Jesús nafiax anā otoita ato faifono. ³ Nāskakata yātapakē ato achixō karaxa mēra ato ikimanifo. Fakishchāi ishinifo a mēra. ⁴ Ato ikimayofafomano a yora rasi ato yoiiafono nikakakī ato chanīmara fakōinifo. Afia penata cinco mil yora rasichi Jesús Ifofanifo.

⁵ Pedro fe Juan karaxa mēra ikafono, Jerusalén anoax judeofāfe xanīfofo fe a xanīfo fetsafori, askatari a Moisés yoikī kirika keneni keskara ato tāpimamisfori pena fetsa fakishpari ichanānifo. ⁶ Nānori a ato Nios kīfixomis xanīfo finakōia ini āfe ane Anás. Askatari a xanīfo fetsari āfe ane Caifás ini, Juanri ini, Alejandrori ini, a ato Nios yoixomisfāfe āto kaifori ato fe inifo, ano fisti ichanākani. ⁷ Nāskaxō Pedro yafi Juan kenanifo ato yōkaxikakī. Tsōāōxō a finimisma sharafafomāki tāpipai kakī Pedro yafi Juan kenanifo karaxa mēranoa. Mā feafono ato nakirafe nīchikaxō ato yōkanifo iskafakakī: “¿Tsōāōxō na finimisma mā sharafaitamē?” ato fanifo.

⁸ Ato askafaifono Pedro ato yoini iskafakī Niospa Yōshi Sharapa shināmanaino: “Efe xanīfofōfāfe, efe anifofōfāfe, ea nikakapo ē mato yoinō. ⁹ ¿Tsōāōxō nō yora sharafatiromē mā tāpipaimē? Na mā tāpipaiyai finimisma tsōāōnoax sharamākī mā noko yōkaito ē mato yoinō. Ea nikakāfe. ¹⁰ Tāpixikakī israelifāferi tāpinōfo mēstekōi ē mato yoisharanō. Ea nikakāfe. Na feronāfake keyokōichi òiaifo Jesús Nazarete anoato mā sharafaita. Nā mā ifi cruz ikaki mastaitato mā Apa otoaitano nāato mā sharafaa,” Pedro ato fani. ¹¹ “Aōnoa yoiyokī yōra kirika keneni iskafakī Niospa shināmanaino:

Tokiri pexe famisfāfe, ‘Na tokiri chakara,’ ixō potanifo sharafiano.

Nāskakaxō chipo tāpinifo nā tokiri sharafinakoifiano.

Nāskarifikakī nā Jesucristo tokiri keskarafiano mā potamis sharafinakoifiano. Mā mā potafiano Epa Niospa ifini aōnoax mā afe yorafo inō. ¹² Anā fato yora fetsakai nāmā ikama noko shara fatiro. Jesús fistichi nōko òiti noko shara faxotiro nō afe nīpaxanō,” ixō Pedro ato yoini.

¹³ Ato askafaito nikakani a xanīfofo āa ranā yoinānifo: “¿Afeskakī iskara yoiimē kirika kenekī tāpisharayamafixō? Ranotamakōi iskara noko yoi. ‘Na rafe Jesús fe ipaonifo,’” ikanax yoinānifo. ¹⁴ Nāskaxō òiaifono nā finimisma mā finiax ato fefotai kafāsaito òinifo mā sharax. Nāskakē na rafeta afaa chakafafoma ixō atoōnoa afaa yoitiroma inifo nā finimisma mā shara òikakī. ¹⁵ Nāskakaxō Pedro yafi Juan nīchinifo ato makinoax fotanōfo. Pedro fe Juan mā kāifainaino, nā xanīfofo āa ranā yoinānifo iskakani: ¹⁶ “¿Na rafe nō afeska faimē? Akka keyokōi Jerusalén anoafāfe mā tāpiafo, na feronāfake rafeta finimisma sharafaito òitaxakakī. Fato feronāfake fētsakai iskara finimisma sharafatiroma. Iskarakai nō fomātiroma. ¹⁷ Akka iskaratīa nō ato yoinō

anā Jesúsnoax mekanōfoma. Nō ato yoinō iskafakāi: ‘Mā anā Jesúsnoa yoiaito nō nikakī nō mato omiskōimani,’ ” ikanax āa ranā yoinānifo. ¹⁸ Askaxō ato kenanifo pexe emāitinoa. Ato kenakaxō ato yoinifo: “Anā mā Jesúsnoa afaa yoikī.”

¹⁹ Ato askafaifāfe nikakī Pedro feta Juan ato kemani iskafakakāi: “¿Akka nō tsoa nikaimē? Mato nō nikasharairaka, askayamakī Nios nō nikairaka. Mā shinākāfe fato sharamākī. ²⁰ Nā nō Jesús ōifafaina keskafakī, nā noko Jesús yoiaito nō nikafafaina keskafakī nō yoipaketiro enetama,” ixō Pedro feta Juan ato yoini.

²¹ Ato askafaifono ato yoinifo iskafakakāi: “Mā anā Jesúsnoa yoiaito nikaxō nō mato omiskōimani,” ato fanifo xanīfo tiito. Ato askafakaxō ato nīchinifo yora fetsafāfemāi ato ōiaifono. A xanīfo tiito ato koshapaifīkakī ato koshanifoma yorafoki mesekakī. Akka a yorafāfe, “Epa Nios sharakōira,” fanifo Pedro feta Juanmāi Niosxō ato sharafaino. ²² A finimisma nāskara kāini ini mā cuarenta xinia akano Pedro feta Juan sharafanifo Niospa Yōshi Sharaōxō.

Jesús Ifofaafāfe Nios kīfinifo mitsisipakōi ixikakī

²³ Nāskata a xanīfofōfāfe ato nīchiafono Pedro fe Juan fonifo mā ichanāxō a ato fe rafeafo ato yoixikakī, a ato Nios kīfixomis xanīfofo feta anifofōfāfe ato yoiafo keskara. ²⁴ Ato askafakī yoiaifono nikakaxō a Jesús Ifofamisfāfe Nios kīfinifo iskafakakī: “Epa Niosi, mī nōko Ifo finakōiaki. Mī keyokōi onifani. Nai yafi mai mī onifani. Fākafāri mī onifani. Nai mēranoari mī onifani. Nāmānoafori mī onifani, fākafā mēranoafori mī onifani, afama mīshififo. ²⁵⁻²⁶ Akka nā mia yonoxomis nōko xini David mī Yōshi Sharapa mī shināmāni mīōxō ato yoini iskafakī:

¿Afeskai na yorāfo Nioski ōitifishkikanimē? Keyokōichi yorafāfe āa shinākāni Nios potapaikakī. Askafīkaxō potatirofoma. Āto xanīfo tiitori ano fisti ichanākaxō nōko Ifo Nios noikaspaxikani potapaikakī. Askatari a Niospa noko nīchixoxiai Cristori noikaspaxikani. Aa askara shinākakī, ixō David kirika kenenī mīōxō yoikōiki.

²⁷ “Iskaratīa nāskakōi Herodes fe Poncio Pilato yorafetsafo fe ichanāitafo, israelifori ato fe ikitafo mī Fake Cristo Sharafīnakōia ifixō mī nīchifinino chakafakāni. ²⁸ Nā mī yoiyoni keskafakī mā nāskakōi faitafo a inōpokoai mī yoini keskafakī. ²⁹ Epa Niosi, noko nikāfe mīōxō noko noimati fakani kiki. Nāskakē noko mesemayamafe nō mia yonoxosharamiskī. Nāskakē atoki mesetama mī meka shara nō ato ranotamakōi yoinō mitsisipakōi noko imafe. ³⁰ Epa Niosi, mī sharaōxō a isinī ikaifo ato sharafafe, afama mīshififo ato ōimayanā a mia yonoxomis Jesucristo aneōxō,” ixō Epa Nios kīfinifo.

³¹ Mā askafakakī kīfīkī xateafono nā ichanāfo anoax mai naya naya ini. Nāskaino Niospa Yōshi Shara āto mēra naneaino ranotamakōi Niospa meka shara yoinifo.

Nā afafo keyokōi atonā ini

³² Jesús Ifofaafāfe nānori fistis shinānifo āto ōitinī. Nāskakanax na afafo nōkonā fistis ixō tsōa shinānima. Askakimaroko keyokōi atonā ini. ³³ A Jesúsnoa yoimīsfāfe, “Nōko Ifo Jesús noko nāxofīax mā anā otoni,” ixō ato yoinifo Niospa Yōshi Sharapa ato shināmanaino. Nāskakē keyokōi nā chanīmāra faafo Epa Niospa ato shināmasharaino inīmakōinifo. ³⁴⁻³⁵ A Jesús Ifofaafāfe atirito āto tarefoya āto pexefo ato minīkaxō kori fīkaxō nā Jesúsnoa yoimīsfō ato inānifo afāferi a afaamaisfo ato inānōfo tsōa afaa yopayamanō. ³⁶ Akka José Levī āfe fena ini. Chipre anoax fakea ini. Nāskakē a Jesúsnoa

yoimisfāfe āa anenifo iskafakakī: “Yora Inimamamis” fanifo. Akka āfe ane kaiyakōi Bernabé ini. ³⁷ Nā feronāfake tareya ini. Nāato āfe tare ato minixō kori fixō a Jesúsnoa ato yoimisfo ināni a afaamaisfo ato inānōfo.

5

Āfe āfi feta Ananías ato feparapaini

¹ Akka feronāfake fetsa āfe ane Ananías ini. Āfe āfinī ane Safira ini. Nāato āfe tare ato minini kori fixii. ² Nā feronāfake āfe āfi feta shinākaxō ranāri kori finifo. Ranāri a Jesúsnoa ato yoimisfo inānifo keyokōi mā noko ināfo ixō shinānōfo.

³ Nāskaito Pedro yoini iskafakī: “Ananías, ¿afeskai mī mēra Satanás naneamē mī Niospa Yōshi Shara feparapainō ranāri mā mī kori fifiāxō mī tareōxō?”

⁴ Akka, ¿taeyoi mī tare iyoamamē? Akka mā mī ato minia, akka, ¿na kori mīnāmamē? Nāskakē nā mī apaiyai keskafatiro. Akka atiri mekepaikī mī noko yoia shara ikerana. Askatamaroko mī noko fomāpai. Mīkai noko pāraima, akka Nios mī pārapai,” ixō Pedro yoini.

⁵ Askafaifāfe nikai Ananías koshikōi nani. Askaito nikakani yorafā rasi ratei fetsenifo. ⁶ Nāskakē naetapafo fēkaxō Ananías rakonifo mā nakē. Nāskafakāta maifaifokakī iyonifo.

⁷ Mā askai samarakano āfe āfiri ikitoshini, afaa tāpiamax. ⁸ Nokotoshiao Pedro yōkani iskafakī: “Ea yoipo mā tare minixō afe tii mā kori fiamāki,” ixō Pedro yōkani. Kemani a kēroma iskafakī: “Nā noko inā tii nō mato inā,” faito, ⁹ Pedro yoikī iskafani: “¿Afskakī mī fene feta mā shināxō nōko Ifāfe āfe Yōshi Shara mā feparapaimē? Mā mī fene nakē maifatakani a pexe kachiori fekani. Ōipo, iskaratīari mia iyoi fokani,” ixō Pedro yoini.

¹⁰ Askafaito nikai Safira koshikōi nātani. Pedro nia nāmā pakeni. Naetapa tiito mā fene maifatakani ikiferakakī ōiafo mā āfe āfiri naa fichitoshinifo. Ari ififainifo maifaifokakī, fene ketaxamei. ¹¹ Askaito nikakani a Jesús Ifofamisfo ratenifo. Yora fetsafori askanifo nikakani akairi ratei fetsenifo.

Iskarafokai tsōa ōiyomisma inifo

¹² Tsōa atiroma keskafakī nā Jesúsnoa yoimisfoōxō afama mīshtifo fanifo yorafāfe ōinōfo. Nāskakanax keyokōi ichanānifo pexe kene āfe ane Salomón anoax.

¹³ Atiri a Nios Ifofaafo a Nios Ifofaafo fe ato fe rafenifoma. Akka ato askafafiaifono yorafāfe, “Na Nios Ifofaafo isharakōiafo,” ato fanifo.

¹⁴ Ato askaifaifono yorafāfe nōko Ifo nikakōinifo, feronāfakefo feta kērofāfe. Nāskax ichapakōi inifo. ¹⁵ Nāskakata a isinī ikaifo xafakāa ato kāimanifo āto rakatiki ato rataxō fāi kesemē, “Pedro āfe yōra ato fakish faafofānaino sharatirofora,” ikaxō. ¹⁶ Nāskakata a chaima ikafori yora kaya Jerusalén ano fonifo. A isinī ikaifo ato efeyanā a niafaka chakata ato mēra nanexō ato fekaxtefaifori ato efenifo. Nāfo a Jesúsnoa ato yoimisfāfe ato sharafapanifo.

A Jesúsnoa ato yoimisfo ato omiskōimakōinifo

¹⁷ A Nios ato kīfixomis xanifo fe saduceofo afe ikanax ōitifishkinifo, afskakī noko nikakanimamē ikanax. ¹⁸ Nāskakaxō a Jesúsnoa ato yoimisfo ato achikaxō karaxa mēra ato ikimanifo. ¹⁹ Akka Niospa āfe ājiri fakishi oxō karaxa āfe fepoti fepexō ato kāimani iskafakī ato yoianā: ²⁰ “Nonoax kāifaikaxō a Nios kīfiti pexefā mēraxō ato yoitakāfe afskakaxō nōko Ifo Jesús ato ikitiromākī,” ato fani. ²¹ Nā ājirinī ato yoiaito nikafo keskakani penakaiama Nios kīfiti pexefā mēra ikifainifo, anoxō ato yoixikakī.

Näskaifono a ato Nios kīfixomis xanīfāfe, a afe ikafoya israeli xanīfofo ato kenani, ano fistiax ichanāi fenōfo xanīfo finakōia anoax, anoxō a Jesúsnoa yoimisfo ato ifitanōfo ato fe ichanāi fenōfo. ²² Mā ato nīchiafono a ato kexemisfo fokaxō ōiafo a karaxa mēra tsoa inima. Nāskakē anā ato yoifekani fenifo. ²³ Iskafakī ato yoinifo: “Kaxō nō ōia karaxa fetaoxikōina nō fichitoshia, sorarofāfe kexekōiafono kāiti ano. Akka a mēra ikikaixō nō ōia ano tsoa ikama,” ato faifono, ²⁴ nikakani a Nios kīfīti pexefā kexemisfāfe a ato xanīfofo fe, a ato Nios kīfixomisfo xanīfokōifo āa ranā yoinānifo: “¡Aira! ¿Afeskax tsekeafomē?” ikanax ratenifo.

²⁵ Askaifono feronāfake fetsa atoki oxō ato yoini iskafakī: “Nikakapo a mā ato karaxa mēra ikimanita feronāfake rafeta, a Nios kīfīti pexefā mēraxō mā ato yoikani,” ato faino, ²⁶ a ato kexemisfāfe āto xanīfo āfe inafō fe kani ato ifikai. Akka mā fokaxō ato efenifo. Nāskaxō ato afeska fanifoma yorafoki mesekakī tokirinī noko tsakatirofora ikaxō.

²⁷ Mā fokaxō ato iyonifo a xanīfo finakōia ano. Nānoxō a ato Nios kīfixomis xanīfāfe ato yoini iskafakī: ²⁸ “Mā nō mato yoita, ‘Anā ato Jesúsnoa yoiyamakāfe,’ nō mato feita, akka, ¿afeskakī Jesúsnoa mā ato yoirifaīmē? Jerusalén anoafō mā ato yoiki mā mā ato tāpimakōia. Nāskaxō mā noko pārapai nafāfe Jesús reteitafora mā noko fapai, noko chakafapaikī.”

²⁹ Ato askafaifono Pedro a afe rafeafo feta ato kemani: “Akka nōfi Nios nikaikai. Yorafokai nō nikapaima. ³⁰ Nōko xinifāfe āto Niospa Jesús otoaita, mā mā refeitano ifi cruz ikaki mastaxō. ³¹ Nāskaxō Niospa Jesús a keskara xanīfofinakōi imani yorafo ato ifixō ato ikikōipakexanō. Nāskakē israelifāfe keyokōichi Nios chanīmara fanōfo, a afara chakafamifsono āto chaka ato soaxonō. ³² Chanīma mā nō ōimis, askatari Niospa Yōshi Sharapa mā tāpia. Akka a nikaifo Niospa āfe Yōshi Shara ato mēra nanea,” Pedro ato fani.

³³ Ato askafaito nikakakī akiki ōitifishkianā ato retepainifo. ³⁴ Akka nā xanīfofo fe fariseo āfe ane Gamaliel ato fe ini. Nāato a Moisés yoikī kirika keneni keskara ato tāpimamis ini. Yorafāfe aōnoa yoisharakōimisfo. Nāato nīmāfāfā ato yoini iskafakī: “Xafakīa ato kāimayokāfe,” ato fani. ³⁵ Nāskaxō ato kāimaxō a xanīfo fetsafo yoini: “Efe yorafāfe israelifāfe, ea nikakapo ē mato yoinō. Māfi na feronāfake rafe retepaikāi, ¿afeskaito mā ato retepaīmē? Shināsharakāfe. Ato retepaikakīma,” ato fani. ³⁶ Nāskata anā ato yoini: “Shinākapo, oa feronāfake Teudas xanīfo iyoni. Xanīfo finakōia ipaiyaito cuatro cientos yorafāfe chīfafainifo. Akka nā mā yora fetsafāfe retenifo. Mā reteafono āfe inafō paxkanāi fetsenifo. Nāskakanax ariax keyonifo. ³⁷ Askatari chipo āto anefo kenekakī censo akaifono, Judas fetsa. Galilea anoa ini. Xanīfo ipaikī ato yoini yorafāfe chīfafainōfo. Askafaiaino nāri retenifo. Nāskakē āfe inafori paxkanāi fetsenifo. ³⁸ Nāskakē ē mato yoi na feronāfake rafe ato enekāfe ato afeska fakakīma. Akka a Niospa shināi anori ato yoiyamakakī, āa ato yoikakī kaxpa ato yoitirofo. Nāskakanax keyotirofo. ³⁹ Akka Nios ato fe ikano mā ato afeska fatiroma. Māroko kexemesharakāfe ato chakafayanā Niosri mā chakafatiroki,” ixō Gamaliel ato yoiaito nikanifo.

⁴⁰ Ato askafaito nikakakī, a Jesúsnoa yoimisfo ato kenakaxō ato koshakata, “Anā Jesúsxō mā afaa yoiki,” ato fakaxō ato nīchinifo. ⁴¹ Nāskakē a Niosnoa yoimisfo xanīfofo anoax tsekekani inimakōinifo, Niosnoaxmāi omiskōikanax Jesúsnoa meka shara ato yoikani. ⁴² Nāskakē pena tii nōko Ifo Cristo Jesúsnoa meka shara ato yoinifo. A Nios kīfīti pexefā anoxō ato yoita pexefo anoxori ato yoifōsafainifo.

6

Jesúsxō tāpimisfāfe docefāfe feronāfake fetsafo siete ato ifinifo ato feta yononōfo

¹ Nāskaifono a Jesús Ifofaifo ichapakōi inifo. Akka fetsafo a griego mekapa ikaifāfe, hebreofo ato mekafakakī taefanifo ato iskafakakī: “¿Afeskakī nōko kaifo a fenemaisfo a piaifo mā ato ināsharaimamē? Akka māto kaifo fisti mā ato ināi,” ikaxō ato mekafanifo. ² Ato askafaiifāfe nikakata a Jesúsxō yoimisfāfe nā docefāfe a Jesús Ifofamisfo ato ichanāfakaxō ato yoinifo iskafakakī: “Nō mato Niospa meka yoikī nō xatetiroma a ma pi ai mato paxkaxoxiki. Akka pena tii nō mato Niospa meka yoifafāini,” ato fanifo. ³ “Efe yora mīstichi, feronāfakefo siete fenakāfe a mā pi ai mato ināsharanōfo. Mā mā tāpiakī fatofomākī Niospa Yōshi Shara fe rafeafo. Nāfo nō ato yonomanō a mā pi ai mato ināsharanōfo. ⁴ Akka nō pena tii Epa Nios kīfifafāinikai, āfe meka sharari yoivanā,” ixō ato yoinifo.

⁵ Ato askafaifono nikakani keyokōi inimanifo. Nāskakata Esteban ifinifo, nāto Nios chanīmara fakōina ini, āfe Yōshi Shara a mēra naneano. Feliperi ifinifo, Prócorori ifinifo, Nicanori ifinifo, Timónri ifinifo, Parmenasri ifinifo, Nicolásri ifinifo. Nā Nicolás Antioquía anoa ini. Judeofāfe Nios Ifofaifo keskakāfi Nicolás Nios shināmis ini. ⁶ Ato askafakāta a ato Jesúsnoa yoimisfo ano ato iyonifo. Anoxō ato Nios kīfixoyanā ato māmānifo.

⁷ A Jesúsxō yoimisfāfe Niospa meka ato yoi aifono atoōxō yorafāfe chanīmara fanifo, Jerusalén anoxō. Askatari judeofāfe a ato Nios kīfixomisfāferi akairi Jesús Ifofanifo. “Jesús Niospa Fakekōira,” ixō chanīmara fanifo.

Esteban achinifo

⁸ Esteban Jesús chanīmara fakōina ini. Niospa āfe kerex shara a mēra naneano akiki inimakōini. Nāskakē aōxō afama mīstifofakī ato ōimani. ⁹ Akka judeofo fetsafo nā ichanāti pe xe mēranoax ichanāpaonifo. Nā ichanāti pe xe anenifo: “Anā Ato Inafoma,” fakakī. Nāfo Cirene anoafō ikaino Alejandría anoafō ikaino Cilicia anoafō ikaino fetsafori Asia anoafōri nāfo ichanākanax Esteban fe feratenānifo. ¹⁰ Meka finōmapaifaifono Niospa āfe Yōshi Sharapa Esteban āfe ōiti mēra shināmāni. Shināsharakōita ato yoini. Ato askafaito tsōa Esteban kemanima.

¹¹ Ato askafaito nikakakī akiki ōitifishkiyanā yora fetsafo ato kori inānifo ato iskafayanā: “Nō mato kori inānō Esteban mā pāratakāfe iskafakī: ‘Na Esteban Moisés yoini keskara chakafaito nō nika, Niosri chakafayanā,’ ixō ato yoitakāfe,” ato fanifo. ¹² Mā fokaxō ato yoikī askafaifono, yorafo ōitifishkikani mekai fetsenifo, a judeofāfe āto xanīfo fe a Moisés yoikī kirika keneni keskara ato tāpimamisfori askanifo. Nāskakaxō Esteban achikaxō xanīfokōi ano iyonifo. ¹³ Mā iyokaxō āa pārānifo āa chanī fetsekakī iskafakakī: “Na feronāfake nōko Nios kīfīti pexefā mēxotaima chakafai, askatari a Moisés yoini keskara chakafai. ¹⁴ Nāskatari, ‘Nā Jesús Nazarete anoato nā Nios kīfīti pexefā pāoxii kiki,’ ikaito nō nikamis. Nāskatari, ‘A Moisés yoini keskara ē fetsafaxii,’ ikaito nō nikamis,” fanifo āa pārakakī.

¹⁵ Askafaifono xanīfofo feta a ano tsoafāfe ōiafo Esteban āfe femānā nā ājirinī femānā keskarakōi ōinifo.

7

Esteban ato kemasharakōini

¹ A judeofo Nios kīfixomis xanīfo finakōiato Esteban yōkani: “¿Chanīmamakī a mīōnoa yoiaino keskara?”

² Askafaito nikakī Esteban kemani iskafakī: “Efe yora mīshtichi, ea nikakapo. Nōko Nios fāsi sharakōixō afetiama nōko xini Abraham yoini, Mesopotamia ano iyoano, Harán mai ano kayoamano. ³ Iskafakī yoini: ‘Na mai anoax tsekekaini katāfe, mefe yorafoya ato ōifaini. Nā mī kai ano ē mia ispaikai,’ ixō Niospa Abraham yoini. ⁴ Nāskakē Abraham Caldea anoax tsekekaini kani, Harán ano ikikai. Mā anoax āfe apa naano Niospa Abraham efeni na mai ano, na iskaratīa nō ika ano. ⁵ Akka Niospa afaa pishta ināyonima. Mairi fena inānima. Akka iskafakī yoini: ‘Ē mia na mai ināxii,’ ixō yoiyoni. ‘Akka mā mī nanino mī fenafo ē ato ināxii,’ ixō Niospa Abraham yoiyoni āfe āfi feta fake akamano. ⁶ Askata Niospa anā yoini iskafakī: ‘Mī fenafo yora fetsa keskarakanax mai fetsa ano iyonōfo. Nānoax āto yonomati keskarakanax omiskōiōiyonōfo cuatrocientos xinia akani.’ ⁷ Nāskata anā yoini iskafakī: ‘Ē na yorafō omiskōimani, nā ato yonomakī omiskōimanaifo. Ē ato askafaino anoax mī fenafo tsekefaixikani. Mā anoax fokaxō nā Canaán mai anoxō ea nikasharakōixikani,’ ixō Epa Niospa Abraham yoini. ⁸ Niospa afetiama Abraham yoini: ‘Mī fake feronāfake mī foshki repa xatetiro,’ ixō yoiyoni. Nāskakē Abraham āfe fake Isaaca mā ocho nia ikano foshki repa xateni. Nāskarifikā Isaaca āfe fake Jacobori askafani. Nāskarifikā Jacobo āfe fakefo ato foshki repa xatepakeni.

⁹ “Jacobō āfe fakefo nōko xinifo ipaonifo, nāfāfe āto exto José ōikasapaonifo. Nāskakaxō Egipto anoax foaifono yora fetsafo ato inānifo aōxō kori fixikakī nāfāfe Egipto ari iyotanōfo. Askafafiaifono Epa Niospa José potanima. ¹⁰ José omiskōiāito Epa Niospa ifini. Nāskaxō shināsharamani. Nāskakē Egipto anoxō ato xanīfokōichi José noisharakōini. Nāskaxō xanīfāfe José xanīfo imani, Egipto anoxō āfe pexe anoax xanīfokōi inō.

¹¹ “Nāskakē Ejipto anoafō fe Canaán anoax fonāiki finakōinifo omiskōiyanā. Nāskakē nōko xinifāfe afaa pinifoma. ¹² Akka Jacobo nikani Egipto anoa a piaifo ichapakē. Nāskakē nāri āfe fakefo nīchini a piaifo fitanōfo, nā nōko xinifo. Ari fokatsaxakakīma foitaenifo. ¹³ Nāskakata afianā fonifo. Mā anā foafono José āfe ochifo tāpimani. Nāskakē nā xanīfo Faraón tāpini José āfe kaifo. ¹⁴ Nāskata chipo José apa kenamani Egipto ano onō āfe fakefo fe. Nā yorafō setenta y cinco inifo Egipto ano ikifeaifo. ¹⁵ Nāskakē Jacobo kani Egipto ano ikikai. Nānoax Jacobo nani, nānoaxri nōko xinifori nāpanifo. ¹⁶ Nāskakē Jacobo āfe xaofō Siquem ano fonifo maifaifokakī. Nā mai nōko xini Abraham afetiama fini, feronāfake āfe ane Hamor minini. Nā mai kini mēra nōko xinifo maifanifo.

¹⁷ “Akka mā anoax chaima tsekeafono nā Epa Niospa Abraham yoiyoni keskai, mā Egipto anoax kaikanax fakefo ichapakōi kainifo. ¹⁸ Nāskatari Egipto anoax nā xanīfo fetsa finakōiato José ōimisma ini. ¹⁹ Nā xanīfāfe nōko kaifofo ato pārapaoni. Nāskaxō nōko xinifo ato omiskōimapaoni. Ato pāraxō āto fakefo ato potamapaoni nā fake rama kāiyaifo nanōfo. ²⁰ Ato askafaino nānoaxri Moisés fakeni. Akiki Epa Nios inimakōini. Nānoxō apa feta āfe afa ato pexe anoxō kexesharapaoni. Tres oxe anifo kexekakī. ²¹ Mā tres oxe akano apa feta āfa fētamā fepoxō faka ketokonō ratanifo. Nānoa Faraón fake xomayato fichixō ifini āfe fake keskarakōi inō. ²² Nāskakē Moisés nā Egipto anoxō tāpiafo keskarari tāpikōini. Mā yosixō yoikī tāpisharakōia ini a xanīfāfe yoitiro keskafakī.

23 “Mā cuarenta xinia axō Moisés āfe kaifo israelifo ōikai kani. 24 Akka mā kaxō ōia Egipto anoato āfe kaifo koshaito ōini. Askafaito ōikī timamapaikī, Moisés Egipto anoa feronāfake koshakī retenī. 25 Askafata Moisés shināni: ‘Ēfe kaifāfe tāpikani eōxō Niospa ato ifipai,’ ixō shināni. Akka tsōa tāpinima. 26 Nāskata pena fetsa Moisés āfe kaifo ari kaxō ōia āfe kaifo raferi setenāifāfe ōitoshini. Nāskaxō ato raefapaita ato yoini iskafakī: ‘Nā yora fistifiax ζafesaki mā setenāimē?’ 27 Ato askafaino a fētsa seteai Moiséski ōiti fishkiyanā yoini iskafakī: ‘ζTsōa mia xanīfo imamē mī noko īkinō? 28 ζAkka mī ea retepaimē nā Egipto anoa mī retefaiyamea keskafakī?’ ixō yoini akiki ōiti fishkiyanā. 29 Askafaito nikai Moisés onekaini Madián mai ari kani. Nāri ipaoni yora fetsa keskarax. Nāriax āfiyaxō fake feronāfake rafe ani.

30 “Nārixō Moisés mā cuarenta xinia akano, tsōa istoma machi Sinai chaima akiki ājiri nokoni, oa fanafano kooai keskara mēranoax. 31 Askaito nikai Moisés rateyanā namakē ōia fani. Nāskakē akiki chaimashta kaxō ōipaikī nika a mēranoax Nios mekaito nikani iskafakī yoiaito, 32 ‘Ēfi mī xinifāfe ato Nioski. Abraham ikaino Isaaca ikaino Jacobo ikaino ēfi āto Nioskōikī,’ ixō Niospa yoiaito nikai Moisés rateyanā choani. Nāskakē anā ari naisnima. 33 Nāskaito Epa Niospa yoini iskafakī: ‘Mī zapato pekafe, nā mī nia ano sharakōikī. 34 Efe yorafo mē ōia omiskōiaifāfe Egipto anoax. Mē ato nika tetsosikaifāfe. Nāskax ē fotoa ato ifiyoi. Nāskakē iskaratīa Egipto ano ē mia nīchi,’ Niospa Moisés fani.

35 “Āfe kaifāfe noikaspakakī iskafafianifono: ‘ζTsōa mia yoiāmē mī nōko xanīfo inō noko īkixikī?’ ixō yoiifinifono. Akka Epa Niospa xanīfo imaxō nīchini āfe kaifo ifitanō, āfe ājiriōxō. 36 Mā Moisés kaxō Egipto anoa nōko xinifo ifini. Mā ato ifitani oxō Moisés afama mīshti fani tsōa atiroma keskara fakī. Nā mai anoxō cuarenta xinia ani. Nā īamāfānē āfe ane Ōshi anoax tsōa istoma ipaonifo. 37 Moisés āfe kaifo israelifo yoikī iskafani: ‘Niospa fatora fetsa ea keskara mato ano nīchixii kiki. Nikasharakāfe,’ ato fani. 38 Nā Moisés judeofo fe tsōa istoma ano ipaoni. Nānoax ājiri fe mekani machi Sinai anoax, nā ājirinī yoia keskafakī nōko xinifo yoini. Nā Moisés a noko īkipakexatiro Niospa meka shara fini, nā meka sharapa noko īkipakexatiro ixō ato yoini.

39 “Akka nōko xinifāfe nikakaspayanā chakafanifo. Nāskakanax afianā Egipto ano fepainifo. 40 Nāskakaxō Aarón yoinifo iskafakakī: ‘Noko nios faxōfe noko īkinō. Fakira Moisés kaaki nō tāpiamaki, Egipto anoa noko efe-fiitaxakī.’ 41 Nāskafāifāfe Aarón ato fakka fake keskara oro ato onifaxoni. Mā ato onifaxōano yoinā retexō ināyanā akiki inimayanā fista axonifo. ‘Aicho, nōko nios fasi sharakōi; fanifo āa onifakaxō. 42 Nāskakē Nios ato makinoax paxkani iskafakī ato yoianā: ‘Na fishifo nai mēranoafo nōko niosra mā fatiro,’ ato fani. Akka nā Niosnoa yoimisfāfe, nānorikōi kirikaki kenenifo iskafakī:

Israelifāfe tsōa istomaxō mā mā cuarenta xinia afluxō mā kai yoinā retexō mā ea ināpaonima, 43 Askatamaroko māa mā afara fetsa onifaxō, ‘Nā nōko niosra,’ ixō Moloc mā iyafofāsafamis. Askata mātō nios Refán āfe fishifori mā noimis. Na nōko niosra ixō mā afara onifanixakī, akiki mā inima kakāini. Nāskakē ē mātō na tsōa istoma anoa ē mato chai nīchi, Babilonia finōfai, Niospa ato fani.

44 “Nāskakē nōko xinifāfe tsōa istomaxō nā Moisés Niospa yoini keskafakī pexe fakanax ipaonifo. Nā Niospa Moisés yoini iskafakī: ‘Karpa pexe fafe nā ē mia ōimana keskara fakī,’ ixō yoini. 45 Nāskakē mā xini ichapa finōta

nōko xinifāfe nā karpa pexe finifo. Akka mā Josué xanifoxō ato iyoni yora fetsafo potaxō ato mai fīaifonōfo. Niospa ato axōfaino ato mai fīanifo. Mā askapakeafono Davidri chipo xanifoni. ⁴⁶ Xanifo Davidki Nios fāsi inimakōini. Nāskakē David Nios yoini iskafakī: ‘Epa Niosi, ē pexe efapa shara mia faxopai ano Jacobo āfe fenafo inō,’ ixō yoini. ⁴⁷ Askafakī yoifixō axonima, āfe fake Salomón Epa Nios pexe faxoni. ⁴⁸ Akka yorafāfe pexe faxōfiafono nā Nios finakōia a pexe mēra itiroma. Niospa keyokōi ikinā ixō a Niosnoa yoimisto kirika keneni iskafakī:

⁴⁹ Ē nai mēra ika. Nārixō na mai anoafō ē onifani tii keyokōi ē ikinā. Akka, ĵafeskakī mā ea pexe faxotiomē a fisti mēra ē inō faki kafāsaxikima? ⁵⁰ Akka, ĵē afama mīshti onifanimamē? ixō Niospa ato yoini.

⁵¹ “Akka māfi māto xinifo keskarakī. Mā nikayospakōifo Epa Niospa meka mā nikakaspakōimis, chanīmarakai mā famisma. Niospa Yōshi Sharapa mato yoimis mā nikakōimisma. ⁵² Nāskaxō māto xinifāfe a Niospa meka ato yoimisfo ato omiskōimapaonifo. Nāfāferi retenifo, ‘A sharafinakōia nokoki fotoxii kiki,’ ixō aōnoa yoinifo. Akka nā sharafinakōia mā nokoki oano, mā achixō ato retemayamea. ⁵³ Niospa ājirifoōxō Moisés Niospa meka shara mato yoifimisno mā nikakaspamis,” ixō Esteban ato yoini.

Esteban retenifo

⁵⁴ Esteban ato yoikī askafaito nikakani judeofāfe Esteban noikaspakani, akiki ōitifshikikī finakōimifo. ⁵⁵ Askafiaifono Esteban shināchakanima māmāi Niospa āfe Yōshi Shara āfe ōiti mēra naneano. Askata nai ari foisnīfofākī ōia Niospa āfe shara chaxasharakōiaito ōini, Jesús Apa fe ketaxamei nikē. ⁵⁶ Nāskaxō ato yoini iskafakī: “ĵŌikapo! Mā nai fepekemea ē ōikai Jesucristo Apa ketaxamei niakī,” ixō Esteban ato yoini.

⁵⁷ Ato askafaito nikakaspakōiakī fāsikōi fiisiyanā paopomenifo. Nāskakaxō noikaspayanā akiki fareke ferakaxō, ⁵⁸ mā achikaxō pexe rasi pasotai iyokaxō nā Esteban yōaitafāfe feronāfake naetapa āfe ane Saulo rapati inānifo ato kexexonō. Nāskakaxō chipo Esteban tokirinī tsakaketsanifo.

⁵⁹ Nāskafakī tokirinī tsakaketsaifono Esteban Epa Nios kīfīni iskafakī: “Ifo Jesús, ēfe fero mēsho ifife,” ixō yoini. ⁶⁰ Nāskata ratokonō mai chachipakefofā, fāsikōi fiisini. Iskafakī yoini: “Ifo, ea chakafakani kiki ato raefāfe,” ixō yoiax nani.

8

A Jesús Ifofafo Saulo ato omiskōimani

¹ Mā Esteban reteafono Saulo inimayanā: “Mā mā akakōikī,” ato fani. Nāskata afia penata nā Jesús Ifofamisfo ato omiskōimakī finakōinifo Jerusalén anoxō. Akka Jesúsxō tāpimisfo ichonifoma, Jerusalén ano nētenifo. Akka nā ato omiskōimanaifo ichokanax paxkanāi fetsenifo. Ranāri Judea mai ari foaifono, ranāri Samāria ari fonifo. ² Atiri yorafāfe a Nios Ifofamisfāfe Esteban maifakani oiai finakōinifo aō noikani. ³ Akka nā Saulo Jesús Ifofamisfo ato omiskōimani pexefo tii mēra ikikafākakāini ato achixō karaxa mēra ato ikimaxiki, kērofoya feronāfakefo.

Niospa meka sharaōnoa Samāria ano ato yoinifo

⁴ Akka nā Jerusalén anoax ichoafāfe Jesucristoōnoa meka shara ato yoifofāsafanifo nā foaifo arixō. ⁵ Felipe pexe rasi Samāria ano kani, anoxō

Cristoōnoa ato yoikai. ⁶ Ato yoiaito nikakani yorafo ichanākaxō Felipe nikakōinifo. Askatari Niospa Yōshi Sharaōxō tsōa atiroma keskakafā Felipe afama mīstiffo faito ōnifo. ⁷ Askata a niafaka chakafo ato mēra nanea ato makinoa potapakeni. Nāskakē niafaka chakafo ato makinoax tsekei fiisiki fetšenifo. Askatari a finimisfoma sharafata chātofori sharafani. ⁸ Askafaito ōikani a pexe rasi anoafō Felipeki inimakōinifo, ato sharafapaito ōikani.

⁹ Akka nā Samāria mai anoa feronāfake āfe ane Simón ini. Taeyoi yōfe iyopaoni, nāato Samāria anoafō ato pārapaoni: “Ē feronāfake sharafinākōiara,” ixō. ¹⁰ Keyokōichi fakefofaxō anifofofāfe nikakōisharanifo iskafakī yoiyanā: “A nā yoimisfo a nato Niosxō afama mīstiffo fai kiki,” ixō yoinifo.

¹¹ Nāskakē akiki inimakakī nikakōipaonifo āfe yōfēōxomāi mā ato pārapakemiskē. ¹² Akka askafiaifono Felipe Nios xanīfoōnoa yafi Jesucristoōnoa meka shara ato yoiaito nikakakī chanīmara fakōinifo. Nāskakē chanīmara faifāfe Felipe faka mēra ato ikimapakeni maotisafakī āto chaka xatenōfo. Feronāfakefoya kērofoya ato faka mēra ikimapakeni. ¹³ Askatari a Simón yōfe ifiakatsaxakī atori Jesús chanīmara faxō Ifofani. Askafaito ōikī aari Felipe maotisafani. Nāskax nā Simón Felipe afe kapaoni. Akka Felipe tsōa atiroma keskakafā Niosxō afarafō sharafaito ōikī yoini iskafakī: “Aira. ¿Afeskakō iskafaimē?” ixō Simón yoini.

¹⁴ Nāskaifono a Jesús fe rafemisfāfe Jerusalén anoxō nikanifo Samāria anoxō yorafāfe Niosnoa meka shara chanīmara faifāfe. Nāskakē Pedro yafi Juan nīchinifo, Samāria ari fotanōfo. ¹⁵ Mā Samāria ano nokokaxō a Nios Ifofaafō ato Nios kīfixonifo Niospa Yōshi Shara ato mēra nanenō. ¹⁶ Ato mēra Epa Niospa Yōshi Shara naneyoamano Jesús aneōnoax maotisanifo. ¹⁷ Nāskakē Pedro feta Juan ato māmānifo ato Nios kīfixoyanā. Ato askafaifono Niospa Yōshi Shara ato mēra naneni.

¹⁸ Nāskakē Simón ōini Niospa Yōshi Shara ato mēra naneaaito Pedro feta Juan ato Nios kīfixoyanā ato māmāifono. Ato askafaifono ōikī Simón ato kori ināpaini. ¹⁹ Ato iskafakī yoiyanā: “Eari na kerex shara inākāfe ēri ato māmāpakenō Niospa Yōshi Shara ato mēra nanenō,” ixō Simón ato yoini.

²⁰ Ato askafaito Pedro kemani: “A na mī koriya mī nai, akka mī shinā korioxō a Niospa noko ināpaiyai keskara nō fitiro. Maa, askarakaima. ²¹ Mīkai afaa tāpiama na nō Nios yonoxonai keskarakai mī nofeta atiroma. Mia Niospa tāpikōia mī ōiti mēraxokai mī shināsharaima. ²² Nāskakē mī chaka xatefe a mī shināi anori anā shinākima. Nios yōkafē mī kīfīaito mia chaka soaxotiroki. ²³ Mē mia ōi mī ōitifishkiki finaito mīmāi chakakōiax,” ixō Pedro yoini.

²⁴ Askafaito nikakī Simón kemani iskafakī: “Ea Nios kīfixōfe, nā mīa yoiai keskakafakī, Niospa ea omiskōimayamanō,” ixō yoini.

²⁵ Askakāta Pedro feta Juan Samāria anoafō nōko Ifo Jesúsnoa meka shara ato yoitakani Jerusalén ano anā fenifo.

Mā fekakī pexe rasi anoafō Jesúsnoa meka shara ato yoifenifo

²⁶ Nāskata Niospa āfe ājirinī Felipe yoini: “Fai fētsa kakīma, na fāi katāfe na fāi Jerusalén yafi Gaza finōfainaki tsōa istoma ari na fai kaaki,” fani. ²⁷ Askata Niospa fininākkafāta kani. Fāi kai feronāfake Etiopīa anoaki nokoni. Nā feronāfake xanīfori ini. Nāato kēro xanīfokōi kori kexexopaoni Etiopīa anoa. Nāato Jerusalén ano kaxō Epa Nios kīfitani. ²⁸ Mā āfe kaifo mēra okī āfe karo mēra tsoaxō kirika anefeni, nā Isaiās Niosnoa yoikī keneni. ²⁹ Nāskata

Niospa Yōshi Sharapa anā yoini Felipe: “Oa karo ano katāfe,” fani. ³⁰ Mā Felipe akiki kaxō nikani nā feronāfake Etiopía anoato kirika aneaito, nā Isaiás keneni. Nāskaxō yōkani: “¿Mā mī tāpiamē a mī aneai?” faito, ³¹ Etiopía anoato kemani iskafakī: “¿Afeskaxō ē tāpitiromē? ¿Tsōa ea tāpimatiromē?” fata nāskaxō nā feronāfake Felipe keneni: “Ēfe karomā naneyofe efe tsaoxiki,” fani. ³² A kirika kenea anekī ōiai iska ini:

Oveja iyokaxō retetirofo keskafakī, ari iyonifo retexikakī. Ovejanā fake achikaxō āfe rani xateafono feroitiroma keskai ari tooxinima. ³³ Rāfinī fanifo afaa chakafayamafiakē noikaspa kakī. A xanīfofo aō rafaanā inifoma aō rafaanā itamaroko retenifo. Akka āfe fenafāfe nikanakafoma, ixō Isaiás keneni ōini.

³⁴ Nāskata nā xanīfo Etiopía anoato Felipe yōkani: “Ea yoife ē tāpinō na Niospa meka yoimisto yoini afaa ikamākī, fetsaōnoa yoikī kenenimākī askayamakī āa anoi yoimekī kenenimākī,” faito, ³⁵ Felipe yoini iskafakī: “Na mī kirika ōiai Isaiás keneni a Jesucristo noko nāxoxiai yoikī keneni,” fani. Nāskafaxō Jesúsnoa meka shara yoipakeni. ³⁶ Nāskakata fāi fokani faka ano nokonifo. Nānoxō a xanīfo Etiopía anoato Felipe yoini: “Na faka ōipo. ¿Na fāka mī ea maotisafatiromamē?” fani.

³⁷ Askafaito Felipe yoini: “Mī ōiti mēraxō mī chanīmara fakōinaito ē mia atiro,” fani. Askafaito a feronāfake kemani: “Ēje, ē chanīmara fai Jesucristo Niospa Fake,” fani.

³⁸ Askafaito nikakī Felipe, “Mī karo nētefafe,” fani. Mā karo nētefakata nā rafe fotopakefōfanifo faka ano. Nānoxō Felipe a feronāfake Etiopía anoa maotisafani. ³⁹ Mā faka anoax feaifono, Niospa Yōshi Sharapa Felipe iyofaino yamarisatani. Nāskakē a feronāfake Etiopía anoato Felipe anā ōinima. ⁴⁰ Nāskata Felipe mai fetsa, Azoto ano nokoni. Nānoax kakī a pexe rasi anoafō Jesúsnoa meka shara ato yoifoikaax, Cesarea ari nokoni.

9

Saulo Jesús chanīmara fani Damasco ano kakī (Hch. 22.6-16; 26.12-18)

¹ Nāskatari nā Saulo mēxotaima ē mato reteikai ixō ato retepaipāoni a Jesús Ifofaafō. Nāskakē a ato Nios kīfixomisfo āfe xanīfo ano kanī. ² Mā kaxō ato yoini iskafakī: “Ea kirika kenexokāfe ē aya katanō, ichanāti pexefo Damasco ano a Jesús chanīmara faifo ē ato achitanō, feronāfakefoya kērofoya, Jerusalén ano ato iyoxō karaxa mēra ato ikimaxiki,” ixō ato yoini. ³ Akka mā pexe rasi Damasco chaima fāi kaino, nai mēraxō a kemataima chaxatanaino, ⁴ Saulo pakeni. Pakexō nikani, iskafakī yoiaito: “Saulo, Saulo, ¿afeskakī mī ea omiskōimanimē?” faito nikakī, ⁵ Saulo kemani: “Ifo, ¿mī tsoamē?” faito kemakī iskafani: “Ēkīa Jesús, a mī ea omiskōimanai. ⁶ Fininākafā. Pexe rasi ano katāxiki. Anoxō mia yoikani kiki mī afaa afeska faimākai,” fani.

⁷ Akka a Saulo fe foaifo ratekōinifo mekaito nikakani. Akka anoa mekaito nikafikakī tsoa ōinifoma. ⁸ Nāskata Saulo fininākafani. Fininākafāta ōipaiikī anā ōinima, mā fēxoa ini. Nāskakē mētsokaxō iyonifo Damasco ano. ⁹ Nā Damasco ano tres nia ini ōiaxma. Askatari afaa pinima, afaari ayanimi.

¹⁰ Akka nā Damasco ano Jesús Ifofaa fisti ika ini, āfe ane Ananías. Nāato namakē ōini nōko Ifāfe yoiaito iskafakī: “Ananías,” faito, “Ēkīa, Ifo,” fani. ¹¹ Askafaito nōko Ifāfe yoini: “Na fai āfe ane ‘Mēstekōi’ ari katāfe. Mā nokoxō Judaspa pexe ano yōkafē nānoa feronāfake Tarso anoa, mī fichikai āfe ane

Saulo. Nānoxō Epa Nios kīfi kiki. ¹² Anoxō mia namakē ōiafai kiki, mī mīfi mī māmaīto, anā ōisharaxiki,” ixō yoiaito, ¹³ nikakī Ananías kemani: “Ifo, na feronāfakeōnoa ea yoiiaifāfe mē nikamis. Nāato keyokōi Jerusalén anoafō chakafaito a mia Ifofaafō. ¹⁴ Akka mā nono oa a ato Nios kīfixomis xanīfofōfāfe nīchīafono. A mia Ifofamisfo ato karaxa mēra nīchixikī mā ato ifiyoa,” faito, ¹⁵ anā nōko Ifāfe yoini iskafakī: “Mē na feronāfake katoa eōnoa meka shara ato yoinō mai fetsafo anoafōya āto xanīfofōya israelifōya ato yoinō. ¹⁶ Nāskakē ē Saulo ōimana eōnoax omiskōifinakōinō,” ixō yoini.

¹⁷ Askafaito nikafaini Ananías kani. Kaax pexe mēra ikitoshita nānoa Saulo fichitoshini. Nāskaxō āfe mīfi māmaīni iskafakī yoiyanā: “Saulo, ēfi mefe yorakī. Nōko Ifo Jesús nā mī fāi oaito mikiki nokoitato, ea nīchia ē mia fero sharafaxonō, askatari Niospa Yōshi Shara mī mēra ē nanenō,” faino, ¹⁸ koshikōi Saulo fero mēranoax oa foe pese keskara pakeni. Nāskaxō ōisharakōitani. Nāskakē Ananías maotisafani faka mēra ikimakī. ¹⁹ Nāskaxō mā pixō meea āfe yora sharakōi ini, anā āfe yora pachi inima. Nāskakē nā Jesús Ifofaafō fe Damasco ano ato fe oxa ranāyonifo.

Damasco anoxō Saulo Niosnoa yoini

²⁰ Askata Saulo ichanāti pexe mēraxō ato yoikī taefani iskafakī: “Jesús Niospa Fakekōi,” ixō ato yoini. ²¹ Ato askafaito nikakani ratei fetsenifo. Nāskaxō yoinifo iskafakakī: “Akka, ŷnato Jerusalén anoxō a Jesús Ifofamisfo ato omiskōimamismamē? Akka, ŷnaamamē? Mā nono oa nonoafō ato achiyoi, a Nios kīfixomisfāfe āto xanīfofo ato iyoxoni axiki.”

²² Akka taeyoi Saulo ratepishtakī yoiyoni. Nāskaxō feyafani fāsikōi yoikī. Nāskaxō mēstekōi ato yoini Niospa āfe Fake Jesús nokoki nīchini. Nāskakē judeofāfe Damasco anoxō tāpīpaiketsanifo. “ŷFato nō chanīmara faimē?” ikaxō, “Jesucristofi Niospa Fakekōikī,” ixō ato yoiaito.

Saulo judeofoki mesei onekaini

²³ Nāskata mā oxai ichapano, judeofāfe ichanākakaxō shinānifo: “ŷAfesakaxō nō Saulo retetiromē?” ikaxō, ²⁴ akka Saulo tāpini yoiifono. Pena yafi fakishchāi manaifono pexe rasi kāiti anoxō retepaikakī. ²⁵ Askaito ōikakī a Jesús Ifofamisfāfe Saulo fēta mēra nanexō kene fomākīaxō risfichi fakishi fotomanifo a tsoa niama anori. Mā fotomanafono onekaini.

Saulo Jerusalén ari kani

²⁶ Mā Saulo Jerusalén ano nokoax a Jesús Ifofamisfo fe rafepaiyaito, akka keyokōichi omisnifo tāpīkaxoma koshikairoko Nios Ifofara ikaxō. ²⁷ Askaito ōikī Bernabé Saulo iyoni Jesús āfe inakōifo ari. Nāskaxō ato yoini iskafakī: “Na Saulo nōko Ifo ōia fāi kakī, nōko Ifāfe yoiaito. Nāskaxō na Saulo Damasco anoxō ato yoisharapakea, ‘Jesús Niospa Fakekōi,’ ixō ato yoiā ranotamakōi,” Bernabé ato fani. ²⁸ Nāskakē Saulo Jerusalén ano ato fe ikax, kafāsapaoni. Nōko Ifo Jesúsnoa ato yoifofāsafapaoni mesetama. ²⁹ Anoxō ato yoiaito judeofāfe griego meka tāpīkaxō fochishpamanifo. Nāskakaxō afesakaxoma retepainifo. ³⁰ Askafaifono a Jesús Ifofaafāfe mā tāpīkaxō Saulo iyonifo Cesarea ano. Nānoxō Tarso ano nīchinifo.

³¹ Nāskakē a Jesús Ifofaafō Judea anoax ita Galilea anoax ita Samāria anoax ita isharakōinifo anā tsōa ato omiskōimanimano. Anoxō Nios nikasharakōinifo isharakōikaxō Niospa Yōshi Sharapa ato axosharaino. Nāskakē a Nios Ifofaafō ichapakōi inifo.

Pedro Eneas sharafani

³² Nāskakē Pedro kafāsani a Nios Ifofaafo ato òifofāsafai. A Lida ano ikaxō Nios Ifofaafari ato òikai kani. ³³ Nānoa feronāfake āfe ane Eneas fichini. Rakatiani mā ocho xinia aka ini. ³⁴ Fichixō Pedro yoini iskafakī: “Eneas, Jesucristo mia sharafaaki fininākfāta mī oxati itipinīfāfe,” ixō yoiaino, Eneas koshikōi fininākfani. ³⁵ Nāskakē Lida ano ikafāfe, Sarón anoafāferi òikakī nōko Ifo Jesús chanīmara fanifo.

Mā Dorcas naano Jesúsxō Pedro otofani

³⁶ Nāskaifono nā pexe rasi Jope ano kēro Nios Ifofaa ika ini, āfe ane Tabita. Griego mekapa Dorcas famisfo. Nā kēromā isharakōixō ato axosharakōipaoni ato afara ināsharakōikī. ³⁷ Nāato askafai, Dorcas isinī iki nani. Mā nakē chokakaxō fomākīa māpemainīfōfā pexe kene fetsa ano ratanifo. ³⁸ Akka Jope fe Lida chaima ini. Nā Lida ano Pedro ika ini. Nāno ikē nā Nios Ifofaafāfe tāpikaxō feronāfake rafe nīchinifo, iskafakī yoitanōfo: “Jope anoxō mia kenafō mī koshi kanō,” ixō yoitanōfo.

³⁹ Askafaifono Pedro ato fe kani. Mā nokoano fomākīa māpemainīfōfānifo a Dorcas raka ano. Anoax a kēro fenemaisfo oiakakī Dorcas nayoxoma ato samafaxomis ispanifo. ⁴⁰ Askafāfe òikī Pedro ato kāmiani. Ato kāmata ratokonō mai chachipakefōfā Epa Nios kīfini. Nāskata a kēro naa òiyanā yoini iskafakī: “Tabita, fininākfāfe,” faino, nā kēromā Pedro feista nāskax tsaoinākfāni. ⁴¹ Nāskata Pedro mētsoxō fininīfōfāni. Nāskata a Jesús Ifofaafōya a kēro ifomafāfo ato kenani ato òimaxiki mā Dorcas anā otoano. ⁴² Askaito nikanifo a pexe rasi Jope anoafāfe. Nāskakē ichapakōichi nōko Ifo chanīmara fakōinifo. ⁴³ Mā askafata Pedro Jope pexe rasi ano oxaranāyoni, a Simón anoxō fichi shinā famis ano.

10

Pedro fe Cornelio

¹ Nā pexe rasi Cesarea ano feronāfake āfe ane Cornelio ini. Sorarofāfe āto xanīfo ipaoni. Nā sorarofo, “Italianōra,” ato famisfo. ² Nā feronāfake āfe yorāfo fe isharakōixō Epa Nios kīfipaonifo. Nāskatari judeofo ato axosharayanā kori ichapa ato ināpaoni. Nāskaxō Epa Nios mēxotaima kīfipaoni. ³ Nāskata pena fetsa yātapake oa namakē òia fani, Niospa āfe ājiri xafakīakōi òini akiki oxō iskafaito: “Cornelio,” faito. ⁴ Nāskakē Cornelio ājiris òini. Nāskaxō rateifinakōiyanā yōkani iskafakī: “¿Afaa mī ea yoipaikī kenaimē, Ifo?” faito, ājirinī yoini: “Mī kīfīaito mā Epa Niospa mia nikakōia, a yora afaamaisfo ato axosharayanā mī ato kori ināito.” ⁵ Nāskaxō yoini: “Fatora fetsa nīchife Jope pexe rasi ano kaxō Simón ifitanōfo. Āfe ane fetsa Pedro. ⁶ Simón fetsa pexe ano oxaki nā Simón iamāfā ketokonō ikaki fichi koiro fai.”

⁷ Askafakī yoiāx mā ājiri kaino, Cornelio a yonoxomis rafeya āfe soraro fisti kenani nā soraronō kexekōimis ini. Akka nā soraronō Nios shināmis ini. ⁸ Nā ājirinī yoia keskara mā ato yoixō Jope ari ato nīchini.

⁹ Penama xini keya mā Jope chaima faifoafono, Pedro pexe māmākīa māpeinīfōfāni arixō Epa Nios kīfikakī. ¹⁰ Nāskax fonāikōikī pipaini. Akka pixikakī mā pīchaifono Pedro namakē òia fani. ¹¹ Òia nai fepekemeaito òini ariax sabanā keskara petapafā nexeax nai mēranoax nāmā fotopakekafanaito. ¹² Nā sabanā petapafā mēra yoinā fetsa fetsatapafo òini ronofōya, peyafo, afama mīshti ini. ¹³ Nāskata mekaito nikani iskafakī yoiāito: “Pedro, fininākfāfe. Nafō retexō pixiki,” faito nikani.

¹⁴ Askafaito nikakī Pedro kemani: “Maa, Ifo, nafo ē pimisma, Moisés noko yoini nafo nō pitiroma,” faito, ¹⁵ afianā yoiaito nikani iskafakī: “Niospa nafo shara imaki. Akka nafo chakara fayamafe,” faito nikani.

¹⁶ Yoikī tres fata nāskax nā sabanā petapafā anā nai mēra kaito ōini. ¹⁷ Nāskakē Pedro shināchakakōiyanā tāpipaini. “¿Afaa iskara Niospa ea yoipaimē na namakē ōia keskara ē ōiai?” ixō Pedro shināni. Nāskaino a Cornelio ato nīchia fokaxō, pexe fepoti anoxō ato yōkanifo: “¿Fatomē Simón pexe?” ixō ato yōkanifo. ¹⁸ Anoxō fāsikōi ato yōkanifo: “¿Fanī Simón fetsa oxamē, āfe ane fetsa Pedro?” ixō ato yōkanifo.

¹⁹ Oa namakē ōia keskara ōixō Pedro shināpaiyaino, Niospa Yōshi Sharapa yoini iskafakī: “Ōipo, feronāfake trespa mia fenai feafokī. ²⁰ Fininākakāfe. Nā mā fotoax ato fe kataxiki tanaimakōi, ē ato nīchia feafoki,” faino, ²¹ Pedro fotopakekafaxō a feronāfake tii ato yoini iskafakī: “¿Afaa mā akiyoamē? Ērokonō a mā ea fenai,” Pedro ato fani.

²² Ato askafaino kemanifo: “Nō oa nā sorarofāfe āto xanīfo Cornelio noko nīchiano nā feronāfakefi sharakōiki. Nios nikakōimis. Judeofāfe aōnoa meka shara yoimisfo sharara famisfo, Niospa āfe ājirinī yoia mia kenanō āfe pexe ano mī kanō, nāato mia nikasharai mī yoiaito,” fanifo.

²³ Askafaiāfe nikakī Pedro ato ikimani. Nāno afe oxa fistinifo, nāskata Pedro ato fe penama kani. A afe rafeafori Nios Ifofakanax Pedro fe fonifo Joje anoax.

²⁴ Mā fokanax pena fetsa Cesarea ano nokonifo, a Cornelio ato manai ano, afe yorafo feta. Āfe yamakōifori ano afe inifo ato kenamana fekanax. ²⁵ Mā Pedro pexe ano nokoano, Cornelio āfe pexe anoax kāinākakā Pedro ifikai kani. Mā kaxō a nāmā ratokonō mai chachipakefōfā: “Mī fāsi sharakōira,” fani.

²⁶ Askafaito ōikī Pedro fininīfōfāni iskafakī yoianā: “Fininākakāfe. Ēri yoraki mia keskara,” fani.

²⁷ Nāskax afe mekayanā pexe mēra ikikai kī ōia yora ichapakōifo ichanā inifo. ²⁸ Anoxō Pedro yoini: “Mā mā tāpia a nōko xinifāfe noko yoini keskara a judeofoma fe nō rafetiroma. Askatari āto pexe mēra nō ikitiroma. Akka Niospa ea tāpimana ē tsoa chakafatama ē ato noisharakōinō. ²⁹ Nāskakē ea yoiaifono ē koshi oa, ē okaspama. Akka ē tāpipai afeskakī mī ea kenamāki,” faito, ³⁰ Cornelio kemani iskafakī: “Mā cuatro nia finōa, a nono xini rakato ēfe pexe anoxō foni teneyanā ē Epa Nios kifaino yātapake, feronāfake rapati fafekōiai safeax ekeki nokoita, ³¹ ea yoikī iskafaita: ‘Cornelio, mā Niospa nika mī kifiaito. A mī akai keskarari mā tāpia, a afaamaisfo mī ato afara ināsharaito, ea faito ē ōita. ³² Nāskaxō feronāfake tres pexe rasi Joje ano nīchife Simón ifitanōfo. Āfe ane fetsa Pedro. A Simón fetsa āfe pexe mēra ikaki. Nā Simón fētsa fichi koiro shinā famiski ĩamāfā kesemē ikaki,’ ixō ea yoita.

³³ Nāskakē feronāfake tres ē koshikōi nīchita mia ififonōfo. Akka mī nokoki osharakōiyanā mī noko inimamasharakōia. Nāskakē keyokōi mā nō ichanā Niospa noko ōiaino. Akka nō nikapai a nōko Ifāfe mia yoia keskara mī noko yoinō,” ixō Cornelio yoini.

Pedro ato yoini Cornelio pexe anoxō

³⁴ Askafaito nikakī Pedro yoini iskafakī: “Chanīma mē tāpikōia Niospa noko yora fetsa keskara ōima, keyokōi nā yora fisti keskara noko ōi. ³⁵ Askakimaroko nā mani fetsafāferi Nios nikakōikakī, afarafo sharakōi fakanax, Epa Niospa fake itirofo. ³⁶ Niospa israelifāfe fenafo meka sharaōnoa

ato yoini, inimasharakōinōfo. Jesucristoōxō ato yoini, nā nōko Ifoōxō. ³⁷ Mā mā nikamiski a Judea mai anoax ini keskara. Taefakī Galilea anoxō ato yoikī taefani: ‘Māto chaka xatekāfe Nios chanīmara fakāfe ē mato maotisafapanō,’ ixō Juan ato yoini. ³⁸ Akka mā mā tāpia Niospa āfe kerex sharafoya āfe Yōshi Shara Jesús mēra naneni. Jesús afama mīstiftifo fapaoni, ato sharafayanā a omiskōiaifo, niafaka chakata ato omiskōimanaino. Nāskakē afama mīstiftifo fatiro Niosmāi afe ikano. ³⁹ Akka nō ōiyamea Jesús afama mīstiftifo faito judeofāfe āto mai anoxō ata Jerusalén anoxori akaito nō ōiyamea. Nāskafaiaito reteyameafo ifi cruz ikakī mastakaxō. ⁴⁰ Akka mā retefitafono Epa Niospa tres nia oxata otofayamea. Nāskakē nokoki nokoaito nō ōiyamea. ⁴¹ Akka atiri yorafoki nokoyameama, nokoki nokoaito nō ōiyamea. Afetiāmamāi Niospa noko katonixakī chanīmakōi nō mato yoi. Nō a feta piyanā nō afeta ayayamea mā Niospa otofayameano. ⁴² Nāato noko nīchiyamea pexe rasi anoafō nō ato yoinō iskafaki: ‘Niospa Jesús nīchini,’ ato yoinō fatofomākī afe nīpanakafō mā nafianixakakī, askatari a niafori ato yoixii. ⁴³ A Niosnoa yoimisfāfe a nā Jesús iskanōpokoai yoikī aōnoa yoiyonifo. Iskafakakī yoinifo: ‘Nā chanīmara faifono aōxō Epa Niospa ato chaka soaxotiro,’ ixō yoinifo,” Pedro ato fani.

Nā judeofomafāfe Niospa Yōshi Shara finifo

⁴⁴ Pedro ato yoikī xateamano Niospa Yōshi Shara ato mēra naneni āfe meka shara nikaifono. ⁴⁵ Nāskakē a judeofāfe Jesús Ifofamisfāfe Pedro fe foitaxakakī ato ōinifo. Ato iskafanifo: “Aira. Ōikapo. Na nōko kaifomafō Niospa Yōshi Shara ato mēra naneakekafana,” ikax yoinānifo. ⁴⁶ Anoxō ato nikanifo meka fetsapa mekaifāfe iskakani a ato kaifomafō: “Nios fāsi sharakōi,” ikanax mekaifāfe ato nikanifo judeofāfe. ⁴⁷ Askaiifāfe Pedro ato yoini: “Akka tsōa na yorafō ato maotisano fayamakāfe noko fatirofoma. Akka Niospa Yōshi Shara mā ato mēra nanea, nōmēra naneni keskai.”

⁴⁸ Pedro ato yoini Jesucristo aneōxō ato maotisano fanōfo. Mā ato maotisano faafono, Pedro nīchikapanifo. “Kayamafe, nono nofe iyoxiki,” fanifo.

11

Pedro a Nios Ifojaafō Jerusalén anoafō ato yoini

¹ Nā Cesarea anoafāfe Jesús Ifofanifo judeofo yamafikaxō. Afāfe Jesús Ifofaifāfe ato nikanifo a Jesúsxō tāpimiskōifāfe. A Nios Ifofamisfo fetsafāferi nikanifo. Atiixō ato nikanifo āto mai Judea anoxō. ² Askata Pedro Cesarea anoax kani Jerusalén ano. Anoxō a Jesús Ifofamisfo fetsafāfe Pedro mekafanifo a Moisés kenenī tāpiafāfe: “Judeofoma fe mī rafeira,” ikaxō. ³ Iskafanifo: “¿Afeskai a nōko kaifoma ano mī kaitamē? Anoxō ato fe rafexō mī ato feta piaito nō nikaita a Moisés yoini keskafakī nō ato feta pitiroma,” fanifo.

⁴ Askafaiifāfe nikakī Pedro ato yoini a namakē ōiafaita keskara, ⁵ iskafakī: “Ē pexe rasi Jope anoxō ē Nios kīfiyanā oa namakē ōia keskara ē ōita. Ē ōita oa sabanā keskara nexeax nai mēranoax fotopakekafanaito a ē nia ano. ⁶ Askaito ē ōia a mēra yoinā fetsa fetsatapafō ikita askatari a xōchixaraifofo peyafori ē ōita a mēra kechokomekē. ⁷ Askata mekaito ē nikaita ea yoikī iskafaito: ‘Pedro, fininākfāfe. Na fetsa retexō pixiki,’ ea faita. ⁸ Ea askafaito nikakī ē kemakī iskafaita: ‘Maa, Ifo. Moisés yoikī kenenī keskafakī, nafo nō pitiroma. Nāskakē na yoināfo ē pimisma,’ ē faita. ⁹ Ē askafaito afianā nai mēraxō iskafakī ea yoiaito ē nikaita: ‘Niospa yoia nafo mī pitiroki. Pife, sharaki, chakafakīma,’ ea faito ē nikaita. ¹⁰ Ea yoikī tres fata, afianā nai mēra kaito ē

ōita. ¹¹ Askaino Cesarea anoax feronāfake tres ekeki feitafo. Ato nīchiafono ea fenai fekanī. Mā fekanax pexe ano nokoitafo a ē ika ano. ¹² Nāskakē Niospa Yōshi Sharapa ea nīchita iskafakī ea yoivanā: ‘Shināchakakīma ato fe katāfe,’ ea feita. Nāskatari a Nios Ifofaafō seis feronāfake efe foitafo. Nāskakē ato fe yora yamafiax Cornelio pexe mēra nō ikitoshita. ¹³ Nānoxō noko Cornelio yoita a āfe pexe anoxō ājiri ōitaxakī iskafakī yoiaito: ‘Fatora fetsa pexe rasi Jope ano nīchife Simón ifitanōfo, āfe ane fetsa Pedro. ¹⁴ Nāato mia yoi kiki afeskax Nios fe mī ipaxatiromākī, mefe yorafo fe,’ ixō Niospa yoitano Cornelio ea yoita,” Pedro ato fani. ¹⁵ “Ē ato yoiaino Niospa Yōshi Shara ato mēra naneita, taeyoi nō mēra naneni keskaī. ¹⁶ Nāskakē ē shināfaita a nōko Ifāfe noko yoiyamea anori chanīma. ‘Juan ato fāka maotisafani, akka Niospa āfe Yōshi Shara mato mēra nanei,’ ixō Jesús noko yoiyamea. ¹⁷ Epa Niospa āfe Yōshi Shara ato mēra naneita a nōmēra naneni keskaī, nōko Ifo Jesucristo nō chanīmara faito. Akka ē, ‘Mī Yōshi Shara ato mēra naneyamafe,’ ē Nios fatiroma,” ixō Pedro ato yoini.

¹⁸ Ato askafaito nikakani a Nios Ifofamisfo Jerusalén anoax anā tsoa tooxinima, Nioskiroko inimanifo. Iskafakī yoinifo: “Aicho, Nios fāsi sharakōi, nā noko ināni keskaī, āfe Yōshi Shara ato mēra nanea, a nikakōisharakanax afe ĩpaxanōfo,” ixō yoinifo.

Antioquia anoafāfe Jesús Ifofanifo

¹⁹ Mā Esteban reteitafono a Jesús Ifofamisfo ato omiskōimakī taefanifo. Ato askafaifono ranāri Fenicia ari ichonifo, ranāri Chipre ari fonifo, ranāri Antioquia ari fonifo. Nārīxō judeofo Jesúsnoa meka shara ato yoinifo. Yora fetsafo ato yoinifoma, judeofos ato yoinifo. ²⁰ Ato askafaifono a Nios Ifofamisfo Chipre anoax fekāta Cirene anoaxri fenifo pexe rasi Antioquia ano. Mā fēkaxō a judeofoma nōko Ifo Jesúsnoa meka shara ato yoinifo. ²¹ Nōko Ifāfe āfe Yōshi Shara ato fe ikano, a āto xinifāfe ato yoipaonifo shināmākikāta nōko Ifo chanīmara fakōinifo.

²² Askaifono a Jesús Ifofamisfāfe Jerusalén anoxō ato nikanifo. Nāskakē Bernabé Antioquia ano nīchinifo. ²³ Mā Bernabé nokoxō ōia Niospa ato imasharakōia ōitoshini. Askaifāfe ōikī Bernabé inimasharakōini. Nāskaxō ato yoisharakōini shināsharakōixō. “Isharakōixō nōko Ifo nikasharakōikāfe,” ato fani. ²⁴ Akka Bernabé feronāfake sharakōi ini. Niospa Yōshi Shara āfe ōiti mēra nanea, Jesús chanīmara fakōina. Nāskakē yorafāfe aōxō nōko Ifo Jesús chanīmara fakōinifo.

²⁵ Mā askata Bernabé Tarso ano kani Saulo fenaikai. Mā fichixō Antioquia ano iyonī. ²⁶ Nārīxō a Nios Ifofaafō feta xinia fisti ani, yora ichapafo ato tāpimayanā. Antioquia anoxō taefakī ato anenifo a Jesús Ifofaafō. “Cristianōra,” ato fanifo.

²⁷ Askaifono a Niospa ato shināmanaino Niosnoa ato yoipaonifo nāfo Jerusalén anoax Antioquia ano fonifo. ²⁸ Mā fokaxō fishtichi niinākakāfāxō ato yoini āfe ane Agabo, Niospa Yōshi Sharapa shināmanaino, “Nā maitio anoax fonāiki finakōixikanira,” ixō ato yoini. Akka chanīma, askakōini Claudio xanīfo ikano. ²⁹ Nāskakē a Nios Ifofaafāfe Antioquia anoxō shinānifo a Nios Ifofaa fetsafo Judea anoafō ato kori manamaxikakī, afe tii ato fomakanimāikai. ³⁰ Nāskakaxō Bernabé yafi Saulo inānifo ato foxotanōfo. Nāno a Jesús Ifofamisfo Judea ano xanīfofo ikafo inifo. Nāfo ato kori inānifo ato paxkaketsaxonōfo.

12

Santiago retekāta Pedro karaxa mēra ikimanifo

¹ Nāskaino Herodes xanīfāfe a Jesús Ifofamisfo atiri ato achixō karaxa mēra ato ikimani ato omiskōimayanā. ² Nāskata Herodes ato yoini Santiago retenōfo kenopa. Nā Santiago Juan fe nanea ini. ³ Mā Herodes Santiago ato retemanano ōikani judeofo akiki inimanifo. Askafaiāfāfe ōikī Herodes āfe inafō yoini Pedrori achinōfo. Nāato askafanifo fistatīa pāa faraxaxoma piyanā. ⁴ Mā Pedro achiafono Herodes Pedro karaxa mēra ikimani. Nānoxō dieciseis sorarofāfe kexenifo. Herodes shināni: “Mā fista senēano chipo ē Pedro kāimanō yorafāfe ōinōfo,” ixō shināni. ⁵ Nāskakē Pedro karaxa mēra ini, sorarofāfe kexekōiafono. Askafafiaifono a Jesús Ifofamisfāfe Epa Nios kīfixonifo Niospa kexesharakōinō.

Niospa Pedro kāimani karaxa mēranoa

⁶ Nā fakish fistichi Herodes shināni: “Ē penama Pedro kāimanikai yorafāfe ōinōfo,” ixō, akka karaxa mēranoax Pedro oxani soraro rafe fe cadenānā takai rafe metexkere ikax. Nāskaino atiri sorarofāfe karaxa fepoti anoxō kexeshinifo. ⁷ Nāskaino nōko Ifāfe āfe ājiri akiki nokorisatani. Karaxa mēra fakishfiax penasharakōi Itani. Nāskaxō ājirinī Pedro mōini ramāyanā iskafakī yoini: “Fininākaifāfe kataxiki,” faino koshikōi Pedro mifi inoax cadenās mepekemetani. ⁸ Nāskafata ājirinī yoini iskafakī: “Mī rapati yafi mī sapato safe,” faito nikakī Pedro koshi āfe rapati yafi āfe sapato safeni. Nāskaxō ājirinī anā yoini: “Mī tariri safe efe kaxiki,” fani.

⁹ Nāskafaino Pedro ājiri acho kani. Acho kakī shināpaina: “¿Chanīmamē mā ea ājirinī kāimanamē? Akka ē namakē ōiafai keskara ē ōi,” ixō shināpaina. ¹⁰ Nāskax ājiri fe kakī a soraro kexei taea finōfaini. A fetsari kexea finōfaini. Nāskax nā fepoti firo ano nokoxō ōia, mā fepoti āakōi fepekemea ini. Nāskax ājiri fe mā tsekeano fāi kaax ājiri a makinoax yamarisatani.

¹¹ Nāskafaito ōikī Pedro tāpini. Nāskaxō shināni iskafakī: “Chanīma, mē ōi ēfe Ifāfe āfe ājiri nīchia. Herodes feta judeofāfe ea retepaiyaifono ea kāimana,” ixō shināni.

¹² Mā tāpiax Pedro María pexe ano kani, Juan āfe afa ano. Nā Juan āfe ane fetsa Marcos ipaoni. Nā María pexe anoxō yora ichapafāfe ichanākaxō Epa Nios kīfiaifono Pedro kani. ¹³ Mā kaxō pexe fepoti anoxō ato kenaino, nā xomayato María yonoxomis āfe ane Rode, nāato kaxō ōini tsoamāki. ¹⁴ Mā Pedro āfe meka tāpikāta, inimakōiyanā pexe fepoti fēpexotama ato yoikai ichoni. “Mā Pedro oa. Na pexe fepoti ano nia,” ato fani. ¹⁵ Ato askafaito tsōa chanīmara fanima. Iskafanifo: “Mī chanī, Pedrokai oama,” faifono, “Maa, mē Pedro āfe meka nikakōia,” ato fani. Ato askafaino iskafakī yoinifo: “Aamaki, āfe ājiriki,” fanifo.

¹⁶ Askafaiifono Pedro pexe fepoti anoxō mēxotaima ato kenani. Mā fēkaxō fepoti fepekaxō Pedro fichikanax ratenifo. ¹⁷ Askafāfāfe ōikī Pedro āfe mēkemā mekayamakāfe ato fani. Nāskaxō ato yoini afeskaxō nōko Ifāfe karaxa mēranoa kāimanamākī. Nāskata anā ato yoini iskafakī: “Santiago yafi a Nios Ifofamisfo ato yoitakāfe,” ato fani. Ato askafakī yoita pexe fetsa ari kani.

¹⁸ Akka mā penano ano Pedro ōikanima sorarofō yoinānifo, tāpikanamax Pedro afeskamē ikanax. ¹⁹ Mā kāikaina nikaxō, Herodes ato fenamani, “Akka mā fenafikāki fichiyamaifono mā kexesharamakī,” ixō Herodes, “Nā

sorarofo retেকāfe,” ato fani. Ato askafata Herodes Judea anoax kani Cesarea ari ikikai.

Herodes nani

²⁰ Herodes atoki òitifishkini Tiro pexe rasi anoafo yafi Sidón pexe rasi anoafoki. Atoki òitifishkikaino Tiro anoa feta Sidón anoafāfe shinānifo Herodes yōkaifoxikakī anā atoki òitifishkiyamanō. Nāskakaxō xanīfo Blasto yoinifo: “Noko Herodes yoixōfe nō afe mekapaikai. Nokoki òitifishkiki kiki, nō afe rafepaisharaikai anā nokoki òitifishkiyamanō. Nokoki òitifishkiki afe yorafo yoitiroki a nō piari noko inānōfoma,” ixō Tiro anoafo feta Sidón anoafāfe Blasto yoiaifono. Nā yoiaifo keskafakī Blasto Herodes yoini. ²¹ Askafaito nikakī, “Pena fetsa ē ato fe mekanō,” fani. Nāskata pena fetsa mā akiki feaifono, rapati sharakōi nā xanīfāfe safemis keskara safeax tsaoti sharakōi ano tsaoni, anoxō ato yoixiki. ²² Ato yoikī askafaino fāsikōi yorafo mekainīfōfānifo. Iskafakī yoinifo: “Na mekai yora mekaima, nios mekai,” fanifo. ²³ Askafaifono nōko Ifāfe āfe ājirinī Herodes isinī imani, “Ē Niosma. Nios sharakōi,” ato faimano. Nāskax Herodes nani xenafāfe xaki mēraxō piaino.

²⁴ Askano Niospa meka shara Jesúsnoa ato yoifofāsafainifo akairi Niospa meka shara nikakaxō chanīmara fanōfo. ²⁵ Nāskafaifono Bernabé feta Saulo mā yonokī mitokanax Jerusalén anoax fonifo, Antioquía ano. Juanri ato fe kani, āfe ane fetsa Marcos ini.

13

Bernabé feta Saulo Niospa meka ato yoikī taefanifo

¹ Antioquía ano Jesús Ifofamisfo inifo, a Niosnoa ato yoipaonifori ano ato fe inifo. A Jesús Ifofaax afeskax isharatirofomākī ixō ato tāpimamisfōri ano ato fe inifo. Bernabé ikaino, Simón āfe ane fetsa Nā Fisora fapaonifo ikaino, Lucio a Cirene anoa ikaino, Manaén xanīfo Herodes fe yosini ikaino, nā Saulori ato fe ini. ² Akka pena fetsa foni teneyanā nōko Ifo kīfiaifono Epa Niospa Yōshi Sharapa ato yoini iskafakī: “Bernabé yafi Saulo ato paxkanāfakāfe ē ato katoaki eōxō yononōfo,” ato fani.

³ Nāskata foni teneyanā mā Epa Nios kīfikaxō Bernabé yafi Saulo ato mīfi māmākaxō Epa Nios ato kīfixoyanā, ato nīchinifo fetsafo ari fokaxō Epa Niospa meka shara ato yoitanōfo.

Bernabé fe Saulo Chipre ano fonifo

⁴ Mā Niospa Yōshi Sharapa ato nīchia fokanax Bernabé fe Saulo Seleucia ano fonifo. Nānoax kanōanāfānē nanefainifo Chipre ano fokani. Nā iamāfā fakafā nakirafe mai toomāfā ano fokani. ⁵ Mā fokanax pexe rasi Salamina ano nokokaxō judeofāfe āto ichanāti pexe mēraxō Niospa meka sharaōnoa ato yoikī taefanifo. Juanri ato fe kani afara fetsa ato axoxii.

⁶ Nā iamāfā nakirafe mai toomāfā anoa ato yoikāta, Pafos ano fonifo. Nānoa judeo yōfe fichinifo āfe ane Barjesús. Nā chanīkōi ipaoni ē Niosxō yoirā iki.

⁷ Nā yōfe Barjesús xanīfo Sergio Paulo fe ipaoni. Nā xanīfāfe tāpisharakōia ini. Nāskaxō Bernabé yafi Saulo kenamani, Niospa meka shara nikapaikōiki.

⁸ Akka nā yōfemā āfe ane fetsa griego mekapa Elimas fapaonifo. Nāato āfe xanīfo yoini: “Ato nikayamafe mia pārakani kiki,” fani, ea nikanōra ixō.

⁹ Nāskakē Saulo āfe ane fetsa Pablo ini. Niospa Yōshi Shara a mēra nanekōia. Nāato aas ōini. ¹⁰ Nāskaxō yoini iskafakī: “Chanīchakapa nīafaka fake, nā

sharafo mī noikaspamis. Mī chanīmis ato pārapaiyanā nōko Ifāfe mēstekōi ato yoifimisno, akka anorima mī ato yoimis. ¿Afeskai mī xateimamē? ¹¹ Akka iskaratīa nōko Ifāfe mia omiskōimani. Mī anā fēro ōima, xinī chaxafiaino mī anā fena ōiyonakama,” fani.

Askafaino Elimas anā fēro ōinima. Fakish mēra nia keskara ini. Askaxō ato kenani mētsoxō iyoifonōfo anā fēro ōiyamaito. ¹² Nāskaito ōikī xanīfāfe nōko Ifo chanīmara fani. “Aira, Jesús afama mīshti fatiro,” ixō yoininifo.

Pablo fe Bernabé Antioquía ano inifo. Nā Antioquía Pisidia mai ano ini

¹³ Pablo afe rafeafo fe Pafos pefo anoax kanōanāfānē nanefainifo pexe rasi Perge ano fokani. Nā Perge Panfilia mai ano ini. Nānoax Juan anā ato fe kanima. Nāno nēteax anā oni, Jerusalén ano. ¹⁴ Nā Perge anoxō Antioquía finōfainifo, Antioquía anoxō shinā Pisidia chaima ini. Nāriax pena tenetitīa ichanāti pexe mēra ikifaikanax tsaonifo. ¹⁵ A Moisés Niospa meka yoikī kirikaki keneni yafi a Niospa ato shināmanaino yoipaonifo keskara anekāta, a ichanāti pexe kexemisfo xanīfofōfāfe Pablo yafi Bernabé ato yoini iskafakakī: “Nōko kaifo rafeta mā noko afara yoipaimākai noko yoikāfe, noko inima-maxikakī,” ixō ato yoinifo.

¹⁶ Ato askafaifono Pablo niinākafā atokiri mēshainākafā mekayamakāfe ato fani. Nāskaxō ato yoini iskafakī: “Ea nikakāfe ēfe kaifo israelifāfe yora fetsafo feta mā nofeta Epa Nios kīfipaimākai ē mato yoisharanō. ¹⁷ Israelifāfe āto Niospa taefakī nōko xinifo katonī afe yora inōfo. Nāskakē Egipto anoax kainifo yora fetsafo mēra iyokanax Ejipto mai anoax. Nāskakē chipo Epa Niospa āfe kerex sharaōxō Ejipto anoato ato iyonī. ¹⁸ Nāskakē Niospa meka tsōa nikasharayamafiaifono, Niospa ato kexepaoni cuarenta xinia tsōa istoma anoxō. ¹⁹ Nāskata Niospa Canaán mai anoaxō siete faxō mani fetsafo ato potani, nōko xinifo a mai ato ināxiki. ²⁰ Nāskakē cuatrocientos cincuenta xinia ayonifo. Fena Canaán mai ano fonifoma. Mā cuatrocientos cincuenta xinia finōta xanīfoya inōfo Niospa ato yoini.

“Nāskatari chipo nā Niospa meka ato yoimisri Samuel xanīfo ini. ²¹ Nāskakē, ‘Xanīfo finakōia nō fichipai noko ikinō,’ ixō yoinifo. Nāskakē Niospa Saúl cuarenta xinia imani xanīfokī. Akka nā Saúl āfe apa Cis ini, Benjamín āfe kaifo. ²² Nāskata Epa Niospa Saúl tsekani anā xanīfo iyamanō. Akka Epa Niospa David xanīfo inō imani. Nāskaxō yoini iskafakī: ‘Isai āfe fāke David mā ea inimamakōi nā ē apaiyai keskafaki nāato akōini,’ ixō yoini. ²³ Nā David āfe fena ini Jesús. Epa Niospa nai mēraxō nāmā nīchini israelifo ato ifipakexanō nā yoiyoni keskafakī. ²⁴ Askatari Jesús oyoamano israelifo Juan Jesúsnoa meka shara ato yoini iskafakī: ‘Māto chaka xatexō Nios Ifofakāfe maotisaxakakī fetsafāfe tāpinōfo mā māto chaka mā xateano,’ ixō ato yoini. ²⁵ Askata mā Juan chaima nakī, ato yoini: ‘¿Mā shināimē ē Cristokē? Maa, ēkai aama. Akka a Cristo samama oi a nō manai nōko xanīfo ikiyoi. Akai ea keskarama. Ato afama mīshti tāpia. Atokai afaa chakafamisma,’ ixō ato yoini.

²⁶ “Ēfe kaifo mīshtichi, māfi Abraham fenafokī, ea nikakapo a ēfe kaifomafo feta ē mato yoinō. Māfi Epa Nios chanīmara fapaikai. Nā meka sharaōnoa nikakāfe Epa Niospa āfe Fake nīchiniki noko ifipakexanō. ²⁷ Nā Jerusalén ano ikafāfe āto xanīfofo feta tāpinifoma Jesús tsoamāki. A inōpokoai yoikī aōnoa kirika kenenifori tsōa tāpiyameama, pena tenetitīa ichanāti pexe mēraxō anefikakī. Nāskakaxō reteyameafo nā aōnoa yoikī kenenifo keskakōifakī. ²⁸ Afaa chakafaito ōiyamafikakī retepaikakī. ‘Ato retemafe,’ yorafāfe Pilato fanifo.

²⁹ Nāskakē nā aōnoa yoikī kirika kenenifo keskakōifakī, mā askafayameafo retekaxō ifi cruz ikakinoa fotomapakefōfākaxō mafa kini mēra maifanifo.

³⁰ Akka mā mafa kini mēra maifafiafono Epa Niospa otofayamea. ³¹ Mā oxa ranāta a Galilea anoax Jerusalén ano afe foitafāfe atoki nokoaito ōiyameafo. Nāfāfe judeofo Jesúsnoa ato yoikani.

³²⁻³³ “Nāskakē na meka shara aōnoa nō mato yoi, Epa Niospa nōko xinifo yoini keskakafī. Mā noko askafaxokōia nō āto fenafokē. Nāskakē Epa Niospa mā retelitafono Jesús otoayamea. A kirika Salmo ano kenea iskai:

Mī ēfe Fake. Iskaratīa ē mia nima,

ixō kenenifo. ³⁴ Niospa afetiama yoiyoni iskafakī:

Mī nafiano ē mia otofaxii mī yora pisiyamanō,

ixō yoinino, nānorikōi aōnoa kirika kenenifo:

Chanīma, nā ē David yoini keskakafī ē mia sharafai,

ixō Niospa yoini. ³⁵ Nāskakē ana aōnoa yoikī yōra keneni iskafakī:

Epa Niosi, mī Fake mī kexesharai āfe yora pisinōma,

ixō keneni. ³⁶ Chanīma, David nayoxoma ato İkiyopaoni, Niospa yoiaino. Nāskax chipo nani āfe xinifo nāpa keskai, nā āfe xinifo mai anori David maifanifo. Anoax āfe yora pisini. ³⁷ Akka Jesús mā nafiakē Epa Niospa otoani. Ato āfe yora pisinima. ³⁸⁻³⁹ Efe yora mīshtichi, mā nō mato yoimis māri tāpisharakāfe, māto chaka mā soapaimākai Jesúsxō mā atiro. Mā chanīmara faito aōxō Epa Niospa mato chaka soaxotiro. Akka a Moisés noko yoinioxōkai nōko chaka nō soatiroma. ⁴⁰ Kexemesharakāfe a inōpokoai yoikī Niospa meka yoimisfāfe kenenifo keskai mā askatiroki. Iskafakī yoinifo:

⁴¹ Akka ē yoiaito mā ea nikakaspai, ekeki kaxemetsamayanā. Nāskakē ē afarafo akaito ōiax rateyanā mā nai iskarafo nō ōimisma ikax. Nāskakē mā chanīmara fāisma, fetsafāfe mato yoifiaifono,

ixō kenenifo,” ixō Pablo ato yoini.

⁴² Mā Pablo afe rafeafo fe judeofāfe āto ichanāti pexe mēranoax tsekefainai-fono, nā judeofōfāfema ato iskafanifo: “Mā noko yoia keskakafī pena teneti fetsatīa noko anā yoifaixakāfe,” ixō ato yoinifo. ⁴³ Mā ichanāti pexe anoax ichanāi xateafono, judeofo feta yora fetsafāfe a Epa Nios Ifofafo keskakafī akari Epa Nios Ifofapaikani ato fe fonifo, Pablo fe Bernabé foaifono. ato fe foaifono ato iskafanifo: “Nofe yora mīshtichi, Niospa mato yoiāi anori tāpisharakāfe. Niospa mato afara sharafaxōfai keskara shinākāfe inimayanā,” ato fanifo.

⁴⁴ Nāskata afianā pena fetsa pena tenetitīa, pexe rasi anoax yora ichapakōifo ichanānifo nōko Ifāfe āfe meka shara nikakani. ⁴⁵ Nāskaifono judeofāfe ato ōinifo yōrafā rasichi Pablo yafi Bernabé ato nikaifono. Nāskakē ōitifishkikōinifo. Nāskaifono judeofo Pabloki ōitifishkiyanā mekakafī chakafayanā İchanifo. ⁴⁶ Ato askafaifono Pablo feta Bernabé mesetama ato kemanifo ato iskafakakī: “Nō mato Niospa meka sharaōnoa yoikī taefafiaino, mā nikakaspamis. Nikakaspaxkai mā Epa Nios fe İpanakama. Nāskakē nā judeofoma nō ato yoikai. ⁴⁷ Nāskakē nōko Ifāfe noko nīchini iskafakī yoiyanā:

Ē mato nīchi oa luzpa keyokōi chaxa keskara faxō, eōnoa mā ato yoifotanō, efe İpaxanōfo. Maifo tii ano na chai ikafo ari kaxō mā ato yoitanō,”

ixō noko nīchini.

⁴⁸ Ato askafaifono nikakani, a judeofoma inimakōinifo. Nāskaxō yoinifo iskafakakī: “Nōko Ifāfe āfe meka sharakōi,” fanifo. Nāfāfe chanīmara fakōinifo

a Niospa ato katoafo afe ipanakafora ikaxō. ⁴⁹ Nāskakē nā mai anoafo, nōko Ifāfe āfe meka sharaōnoa ato yoifofāsafanifo. ⁵⁰ Ato askafaifono judeofo nā kērofo isharakōimiffo fe mekanifo, a pexe rasi ano a xanīfofo feri inifo. Nāskakaxō ato yoinifo Pablo yafi Bernabé ato chakafakī ato omiskōimata a mai anoxō ato potanōfo. ⁵¹ Ato askafaifono Pablo feta Bernabé āto sapatoteakaxō taatakanifo yorafāfe ato tāpinōfo. Nāskanax Pablo fe Bernabé Iconio ari fonifo. ⁵² Akka nā Nios Ifoafafo inimakōinifo, Epa Niospa Yōshi Shara ato fe ikano, mā Pablo fe Bernabé foaifono.

14

Pablo fe Bernabé Iconio ano inifo

¹ Mā fokanax Pablo fe Bernabé Iconio ano nokonifo. Nānoax judeofāfe ichanāti pexe mēra ikifainifo. Nānoxō Niospa meka sharaōnoa ato yoiāifono ato nikakōisharayanā ato chanīmara fanifo, judeofāfe yora fetsafo feta. ² Askaifono judeofāfe ato nikakaspakakī, a judeofoma ato yoinifo iskafakakī: “Ato nikayamakāfe āa chanīkani kiki,” ato fanifo Pablo yafi Bernabé nikanōfoma. ³ Ato askafafiaifono Pablo fe Bernabé nāno ato fe iyopaonifo. Nānoxō nōko Ifoōxō mesetamakōi ato yoipaonifo. “Nōko Ifāfe noko chaka soaxotiro Nios fe nō īpaxanō,” ixō ato yoinifo. Nāskaxō afama mīstiffo fakakī ato ispanifo. Askafaifono Niospa ato noikī ato ōimani aōxō ato yoinōfo. ⁴ Akka yorafāfe pexe rasi Iconio anoxō anoris shinānifoma. Ranārīto judeofo chanīmara faifono, ranārītori Pablo yafi Bernabé chanīmara fanifo.

⁵ Nāskaiifono judeofo yora fetsafo fe xanīfofo fe yoinānifo, Pablo yafi Bernabé ato tokirinī tsakakī omiskōimaxikakī. ⁶⁻⁷ Ato askafapaiyaifono Pablo feta Bernabé mā tāpikanax Iconio anoax Listra ano fonifo, nānoax Derbe ano fonifo. Nā pexe rasi Listra fe Derbe Licaonia mai ano ini. Nāskakē nānoafo Niospa meka sharaōnoa ato yoifofāsafanifo.

Listra anoxō tokirinī Pablo tsakaketsanifo

⁸ Listra ano feronāfake finimisma ika ini, kafāsamisma chatomāiax. Nāskarapa kāini tsoafo ini. ⁹ Pablo yoiāito nikai. Nāskaito Pablo aas ōikī shināni na feronāfake Jesús sharafatiroraka chanīmara faito ixō shināni. ¹⁰ Nāskaxō fāsikōi yoini iskafakī: “Fininākafāfe,” faino, koshikōi fininākafānax kafāsani. ¹¹ Pablo askafaito ōikani, yorafo Licaonia meka mekanifo iskakani: “Aicho, na nios rafe nokoki fotoaki yora keskarakanax,” ikanax yoinānifo.

¹² Nāskakaxō Bernabé na nōko nios Zeus fakaxō, Pablōri ato yoiāito, “Na nōko nioskōi Hermes,” fanifo. ¹³ Zeus kīfīti pexeya ini pexe rasi chaima, pexe efapa ini. Nā mēraxō na nōko niosra ikaxō Nioskōima kīfipaonifo. Nā pexe mēra yonomisto Pablo yafi Bernabé shināmaxō fakkafoya charofo fexonifo. Nāfāfe yorafo feta mā niosra ixō ato fakka retexopainifo ato ināxikakī.

¹⁴ Akka ato askafaifono Bernabé feta Pablo mā tāpikaxō, āto rapati faxtenifo, ato niosra faifono āto ōiti mēraxō shinākōikaki. Nāskakaxō ato mēra ikifaikata fāsikōi ato yoinifo ¹⁵ iskafakakī: “¿Afeskafakī mā noko na rafe niosra mā noko faimē? Nōkai niosma. Nōri mato keskara, nō mato meka shara yoiyoi oa na afarafo nōko niosra mā famis a chakafo mā potanō a chakafokai afama. Nāskaxō nā Nioskōi nīpanaka Ifokōi fakāfe, nai yafi mai fakafāri onifaniki. Nai mēranoafo onifata, nono mai anoafo onifata fakafāri mēranoafo onifani. ¹⁶ Nā iyopaonifāfe afara chakafakī xateafomano Epa Niospa ato xatemanima āa anōfo. ¹⁷ Nāskafiaifono Niosxō afarafo sharafakakī ato ōimanifo, tāpinōfo Nios tsoamāki. Akka nāto mato oi imaxona, māto

fanafari mato fofaimasharaxona, a mā piari mato ināsharataifa, mā ini-masharakōinō,” Pablo feta Bernabé ato fani.

¹⁸ Ato askafakī yoifikkī ato xatematiroma inifo, ato fakka retexopaiyai-fono nōko niosra ixō ato ināpaikakī.

¹⁹ Ato askafaifono judeofo Antioquía anoax fekāta Iconio anoax fenifo. Ato pārai fekani, “Pablo feta Bernabé mato pārakani,” ixō ato yoinifo. Ato askafaifono Pablo tokirinī tsakaketsanifo. Mā nō reteara ikaxō xarafokaxō pexe rasi pasotai potanifo. ²⁰ Askafaifono a Jesús Ifofaafō a mǎnǎo niakekaxō ōiaifono Pablo fininākfani. Askata finikaini pexe rasi mēra anā kani. Nāskata nǎnoax pena fetsa Bernabé fe Derbe ano kani.

²¹ Derbe anoxō Niospa meka sharaōnoa ato yoiaifono yōrafā rasichi ato nikakaxō Nios Ifofasharakōinifo. Mā ato yoikanax Listra ano fenifo, nǎnoax Iconio ano fenifo, nǎnoax Antioquía ano nokonifo. ²² Nǎriafo a Nios Ifofaafō ato yoifofāsafakakī ato inimamakōinifo, “Isharakōikāfe Nios nikakōisharayanā. Epa Nios xanīfo fe ipaxakakī, nai mēra oyoamano nono mai anoax mā omiskōi finakōitiro,” ixō ato yoinifo. ²³ Nāskatari Pablo feta Bernabé a Nios Ifofaafō anoafō a ato kexeaifo xanīfofo katonifo, Nios chanīmara fakōinafono. Mā foni teneyanā Epa Nios kīfikaxō iskafakakī: “Epa Niospa, ato kexesharafe mia chanīmara fakani kiki,” ixō yoinifo.

Pablo fe Bernabé anā Antioquía ano fenifo nā Antioquía Siria mai ano ini

²⁴ Mā anoax fokakī Pisidia finōfāikanax Panfilia ano nokonifo. ²⁵ Nāskakata Perge anoxō Niospa meka sharaōnoa ato yoikata, Atalia ano fonifo. ²⁶ Nǎnoax kanōanāfānē fonifo Antioquía ano anā fokani. Nā Antioquía anoxō ato nīchinifo. “Niosnoax fokaxō ato yoisharatakāfe,” ixō ato nīchiyameafono ato yoitakani anā fenifo. ²⁷ Mā Antioquía ano nokoafono a Jesús Ifofamisfo ato fe ichanāfono anoxō ato yoinifo a Niospa ato feta afama mīshti aka keskara. Iskafakī ato yoinifo: “Nōko Ifāfe a judeofoma ato chanīmara famaino mā Ifofaafō,” ixō ato yoinifo. ²⁸ Nāskakanax Pablo fe Bernabé nā Nios Ifofaafō fe nǎno ato fe iyopaonifo.

15

Jerusalén anoax a Jesús Ifofaafō ichanānifo

¹ Nāskaifono feronāfakefo Judea anoax Antioquía ano fonifo. Mā nokokaxō a Jesús Ifofamisfo ato yoinifo iskafakakī: “Moisés noko yoini iskafakī: ‘Foshki repa xateyamax nō Nios ano katiroma,’ ixō noko yoini. Nāskakē nā Moisés noko yoini keskai nō askamis,” ixō ato yoinifo. ² Ato askafaifāfe nikakī Pablo feta Bernabé, “Maa, askarakaima. Fanīrira mā yoi,” ato fakanax ato fe feratenānifo. Ato askafaifono Pablo yafi Bernabé a Jesús Ifofamisfo fetsafari ato katokaxō Jerusalén ari ato nīchinifo a Jesúsxō āfe meka ato yoimisfoya a Nios Ifofaafō ato kexemisfo ato yōkatanōfo chanīmamakī.

³ Nā Nios Ifofaafāfe Antioquía anoxō ato nīchiafo fokakī, Finicia yafi Samāria finōfāikakī ato yoifainifo: “A judeofofāfema Nios Ifofakakī mā āto chaka xateafora,” ixō ato yoiaifono nikakani a Nios Ifofaafō inimakōinifo.

⁴ Mā Pablo fe Bernabé Jerusalén ano nokoafono, a Jesús Ifofaafō feta a Jesúsxō āfe meka yoimisfo feta a ato kexemisfofāferi ato ifinifo, ato iskafayanā: “Aicho, mā nokoki osharakī,” ixō ato yoianā. Ato askafaifono anoxō ato yoinifo a Niosxō afama mīshtifofamisfo. ⁵ Ato askafaifono nikaxō

fariseofāfe Jesús Ifofakaxō ato iskafanifo: “Judeo yamafikaxō Nios Ifofakaxō āto foshki repa xatetirofo Moisés yoini keskafakī,” ixō ato yoinifo.

⁶ Nāskaifono a Jesúsxō āfe meka ato yoimisfo fe ato kexemisfo fe ichanānifo tāpīxikakī a yoiāifo keskara. ⁷ Mā ichapa yoināfono Pedro finināfā ato yoini iskafakī: “Efe yora mīstichi, mā mā ea tāpia afetiāma Niospa ea katoni, mato mērano āfe meka shara a judeofoma ē ato yoinō, akairi chanīmara fakanax afe īpaxanōfo. ⁸ Niospa a shināifo keskara tāpikōia. Nāato ato tāpimani afe yora inōfo. Nāskaxō āfe Yōshi Shara ato mēra nanei, a nōmēra naneni keskafakī. Nāskakē keyokōichi tāpitirofo Niospa ato ifiaito. ⁹ Niospa atoya yora fetsa keskara noko ōima, nā yora fisti keskara noko ōi. Nā noko ani keskafakī āto chakari mā ato soaxona chanīmara faifono. ¹⁰ Akka māto xinifāfe a Moisés yoini keskara nikakōipaonifoma. Nāskarifiakī māri mā nikakōimisma. Akka a Moisés yoini keskara nikakōiyamafikatsaxakī, ŷafeskakī a judeofoma Jesús Ifofafiafono a Moisés yoini keskara nikakōikāfe mā ato famismē? Nāskakē afāferi nikakōitirofoma. Akka Jesús fistichi noko nimafitirono, ŷafeskakī mā chanīmara faimamē? ¹¹ Akka Moisés yoini keskarato noko nimatirora ixō mā shināmis. Akka nōko Ifo Jesús nō chanīmara faito, noko noikōixō noko ifitiro afe nō īpaxanō. Nāskarifiakī a judeofoma ato ifitiro chanīmara faifono,” ixō Pedro ato yoini.

¹² Nāskakē anā tsoa tooxinima, ato nikakani. Akka Pablo feta Bernabé ato yoinifo a Niospa atoōxō afama mīstifo faa, judeofoma mēraxō. ¹³ Mā yoikī xateafono, Santiagori ato yoini iskafakī: “Efe yora mīstichi, eari nikakapo ē mato yoinō. ¹⁴ Simón Pedro noko yoyamea Epa Niospa a judeofoma ato noikī mā ato katoa āfe yorafo inōfo ixō noko yoyamea. ¹⁵ Nānorikōi a inōpokoai yoikakī a Niosnoa yoimisfāfe kenenifo. Iskafakī yoinifo na kirika keneano:

¹⁶ Nāskata ē anā oxii a David āfe kaifāfe ea anā shinātama chaka shināifono, ato chaka soaxoxikī. Ato ōiti fepeaxosharayanā isharakōinōfo ea anā Ifofakanax. ¹⁷ Ea ōikakī fetsafāferi ea fenanōfo nā maitio ikafo feta nā ē ato katoafāfe ixō Epa Niospa yoini. ¹⁸ Nōko Ifāfe afetiāma afama mīsthi tāpiyoni,

ixō aōnoa yoikī kenenifo.

¹⁹ “Nāskakē ē shinākī iskafai, nōko kaifāfema Nios Ifofapaiyafono nō ato afara fetsa kerexkai amatiroma. ²⁰ Askatamaroko nō ato kirika kenexō fomanō iskafakī yoikī:

Na nōko niosra ikaxō afara onifakaxō nami ināfo piyamakāfe. Askatari māto āfima chotayamakāfe. Kēromāri āto fenemafo chotamayamanōfo. Askatari yoinā yafi afara inafakaxō tetoxakafo āfe imi foyamaito piyamakāfe, āfe imiri ayayamakāfe,

ixō nō ato kirika kenexō fomanō judeofoma. ²¹ Nā taeyoi ato yoipaonifo keskafakī, iskaratiāri pexefo anoxō a Moisés ato yoipaoni keskafakī ato yokani. Mēxotaima ichanāti pexe mēraxō pena tenetiā nā kirika anemisfo.”

A judeofoma ato kirika kenexō fomanifo

²² Nāskakata a Jesúsxō ato yoimisfāfe a ato kexemisfāferi a Nios Ifofaafāferi shinānifo a Nios Ifofaa fetsafo katoxikakī, Antioquía ano ato nīchixikakī Pablo fe Bernabé foaifono. Judas yafi Silas ifinifo, nā Judaspa āfe ane fetsa Barsabás ipaoni. Na feronāfake rafe isharakōiafo a Nios Ifofaafāfe ato fapaonifo. ²³ Nāskakaxō mā foaifono ato kirika keneni inānifo ato foxotanōfo, iskafakī ato yoikaxō:

Nōfi Jesúsxō ãfe meka yoikatsaxakī, ato kexemisfo feta a Jesús Ifofaafō nō mato kirika kenexō fomai, mā tāpinō. Efe yora mīshtichi, mā nōko kaifoyamafekē nō mato meka shara fomai, Antioquia anoa fomata Siria anoa fomata Cilicia anoa fomata nō mato fai. ²⁴ Mā nō tāpia yora fetsafo nonoax foitafo nō ato nīchiamafiano, mā foitaxakakī mato yoikakī āto mekapa mato fekaxtefakani, fanīrira mato yoikakī nō ato anori yoiyamafekē fanīrira mato yoiiaifono mā ato tāpipai. ²⁵ Nāskakē ichanāxō nō shinā feronāfake fetsafo katoxiki noko anoax fokaxō mato ōitanōfo. A nō ato noiai Bernabé yafi Pablo nō katoa. ²⁶ Nā Bernabé feta Pablo nōko Ifo Jesucristoōnoa ato yoipaiiaifono ato retepaimisfo ato nikakaspakakī. ²⁷ Nāskakē Judas yafi Silas nō nīchia mā fokaxō mato yoisharakōinōfo nā nō mato kenexona keskafakī. ²⁸ Nā Niospa Yōshi Sharapa shināi keskafakī nānorikōi nō shināi. Afaa fetsa nō mato yoipaima. Akka nā sharafinakōia nō mato yoipai mā nikanō: ²⁹ Na nōko niosra ikaxō afara onifakaxō yoinā retexō ināfo piyamakāfe. Askatari āfe imi ayayamakāfe. Yoinā ina fakaxō tetoxakafo āfe imi foyamaito piyamakāfe. Askatari māto āfima chotayamakāfe, kērofāferi āto fenema chotamayamanōfo. Akka nā nō mato yoiiai anori mā nikasharakōiax, mā isharakōikai. Nā tii nō mato yoi na kirikaki kenexō, ixō ato yoinifo.

³⁰ Nāskakaxō Jerusalén anoxō ato nīchiafono Antioquia ano fonifo. Mā fokaxō a Nios Ifofaafō ato ichanāfakaxō kirika kenea ato inānifo. ³¹ A Nios Ifofaafāfe kirika anexō ōikani, inimaifinakōinifo, “Aicho, noko kirika kenexō manamakakī noko inimamasharakōikani,” ikanax. ³² Judas yafi Silas Niospa ato shināmanaino Niospa meka tāpikaxō Niosnoa meka shara ato yoikakī ato inimakōiyanā ato nikamasharakōinifo āto mekapa a Nios Ifofaafō. ³³ Nā Antioquia ano ato fe iyopaonifo. Nāno ato fe ikafono nā Nios Ifofaafāfe ato nīchinifo iskafakī ato yoiyanā: “Tanaima fosharatakāfe,” ato faifono, tanaimakōi fosharakōinifo a anoxō ato nīchiameafo ano. ³⁴ Akka Silas anā Jerusalén ano kanima nāno ato fe nēteni. Judas fisti kani. ³⁵ Akka Pablo fe Bernabéri fonifoma, Antioquia ano nētenifo anoxō fetsafo feta nōko Ifoōnoa meka shara yoixikakī.

Pablo aſianā kani Jesúсноa meka shara pexefo tii ari ato yoikai

³⁶ Mā askakāta Pablo Bernabé yoini iskafakī: “A Nios Ifofaafō nō anā ato ōikanō fokāfe pexe rasi anoafō a nōko Ifoōnoa meka shara nō ato yoikī taefaniano afeskax ikafomāki.” ³⁷ Bernabé Juan iyopaini ato fe kanō, nā Juan āfe ane fetsa Marcos ipaoni. ³⁸ Akka Pablo iyokaspani. Nā Marcosmāi Panfilia anoax ato makinoax nēteyameano, ato feta yonokaspakī. ³⁹ Askai feratenākanax anoax paxkanāfainifo. Bernabé Marcos Chipre ano iyoikai kanōanāfānē nanekaini. ⁴⁰ Akka Pablo Silas ifini afe kaxiki, afeta Niospa meka shara ato yoi axiki. Askaito ōikakī a Jesús Ifofamisfāfe ato Nios kīfixonifo fosharakōitanōfo Niospa ato kexesharanō. ⁴¹ Mā fokakī Siria yafi Cilicia anoafō Jesúсноa meka shara ato yoifofāsafanifo, a Nios Ifofaafāfe Jesúсноa tāpisharakōinōfo inimasharaxikakī.

16

Timoteo ato fe kani Pablo feta Silaspa Niospa meka sharaōnoa ato yoikai foaifono

¹ Pablo fe Silas pexe rasi Derbe ano nokonifo, nãnoax Lистра ano fonifo. Nãnoa Nios Ifofaa fetsa ãfe ane Timoteo fichinifo. ãfe afa Judea këro ini, Nios Ifofa, akka ãfe apa griego ini. ² Nã Nios Ifofaafãfe Lистра anoxõ Iconio anoafãferi, “Na Timoteo feronãfake sharakõira,” fanifo. ³ Pablo Timoteo iyopaini afe kanõ. Akka iyoyoxoma ãfe foshki repa xatemani, judeofãfe mekafayamanõfo, mãmãi tãpikaxõ Timoteo ãfe apamãi grigokẽ. ⁴ Askata mã fokakĩ a pexe rasi anoafa a Jesús Ifofamisfo ato yoifainifo, nã Jesúsxõ ãfe meka yoimisfo feta, a Jesús Ifofamisfo ato kexemisfãfe Jerusalén anoxõ ato yoitafo anori. ⁵ Ato yoiaifãfe nikakani a Jesús Ifofamisfãfe Jesús chanĩmara fakĩ finasharakõinifo. Askatari a Jesús Ifofaifo ichapakõĩ kainifo pena tii.

Pablo namakẽ õia keskara fani feronãfake Macedonia ano

⁶ Akka Niospa Yõshi Sharapa, Asia mai ari ato nĩchikaspani, arixõ Jesúsnoa meka shara ato yoipaiifaifono. Nãskakẽ Frigia yafi Galacia finõfainifo. ⁷ Fokanax Misia mai xatea ano nokonifo. Nãnoxõ Bitinia ano fopaikakĩ shinãnifo, ari fopaiyaifono Jesús ãfe Yõshi Sharapa ato nĩchikaspani. ⁸ Nãskakẽ Misia finõfaini fokanax Troas ano nokonifo. ⁹ Nãnoxõ Pablo fakishi namakẽ õia fani, feronãfake Macedonia anoato nĩxõ yoikĩ iskafaito: “Nõ Macedonia ano ofe noko tãpimaxiki,” ixõ yoiaito õini. ¹⁰ Nãskara õixõ Pablo ato yoini iskafakĩ: “Itipinĩkãfe nõ Macedonia ano kanõ, Niospa ari noko nĩchipai kiki arixõ Jesúsnoa meka shara nõ ato yoinõ,” noko fani.

Pablo fe Silas Filipos ano inifo

¹¹ Nã Troas anoax nõ kanõanãfãnẽ nanekaini ãmãfã nakirafe mai toomãfã ano kai ãfe ane Samotracia ano. Nãnoax kaax pena fetsa Neápolis ano nõ nokoni. ¹² Nãnoax nõ anã kani Filipos ano. Nã Filipos ano romanõ xanĩfokõifo ipaonifo nãnoa ãto pexe rasi sharañakõia ini, nã Macedonia mai ano. Nãno nõ oxa ranãyoni. ¹³ Nãnoax pena tenetiã pexe rasi anoax nõ tsekekainikax faka ketokonõ nõ kani, nõ shinã anoxõ judeofãfe Nios kĩfikanira ixõ. Nãno tsaõxõ Niosnoa meka shara kërofo nõ yoini ano ichanãfono. ¹⁴ Nãnoa fetsa ãfe ane Lidia ini pexe rasi Tiatira ano. Nã këromã sama fexta nana sharakõĩ ato minimis ini. Askatari Nios shinãkõimis. Nãskaxõ Pablo Jesúsnoa yoiaito nikakõisharaito õikĩ nõko Ifãfe ãfe õiti fepeaxosharakõini. ¹⁵ Nãskaito õikĩ afe yorafoya maotisafanifo faka mẽra ikimakĩ. Nãskaxõ noko yoini iskafakĩ: “Mã ea iskafaikai, mã nõko Ifo ifofaki mã ea faikai, ãfe pexe ano oxai fekãfe,” noko fani. Noko askafaino nõ nẽteyoni.

¹⁶ Nãskata pena fetsa a Nios kĩfimisfo ano nõ kaino nãno nokoki xomaya nokoni niafaka chaka a mẽra naneeano. Nãato ato õnãxomis ini. ãto inakõima ini, ãa ato onãxomis. Aõxõ kori ichapa fimisfo ini. ¹⁷ Nã xomayato noko chĩfafaini Pablo fe nõ kaino fãsikõĩ mekayanã noko yoifoni iskafakĩ: “Na feronãfakefoni Nios nã keyokõĩ finõato ãfe inakõifoki. Afeskak nõ Nios fe ipaxatiromãki noko yoi feafo,” ixõ yoini.

¹⁸ Pena tii noko askafafõfãsa fani. Noko askafaito Pablo mã fekaxtexõ anã teneyamakĩ, ifiakekapã nã niafaka yõshi chaka xomaya mẽra nanekẽ iskafani: “Jesucristoõxõ ã mia yoikai na xomaya makinoax tsekekaitãfe,” fani. Askafaino a makinoax niafaka chaka tsekekaini.

¹⁹ Pablo askafaito õiakõĩ, akka a xomayato ãfe ifofãfe shinãchakakõinifo anã afaakema, anãkairoko aõxõ kori fikani. Nãskakaxõ akiki õitifishkikakĩ Pablo yafi Silas achikaxõ xanĩfo finakõia ano iyonifo. ²⁰ Nãskakaxõ xanĩfofo ano ato iyokaxõ iskafakĩ ato yoinifo: “Na judeo rafeta nõko pexe rasi ano ato

chakafakī mekafakani. ²¹ Nō mato yoisharaira ikaxō nā imisfo keskapaiķi anori ato yoipaikani. Akka nōa nō chanīpaima, askara yoikī nō feyafaima nōmāi romanōfoxō,” ixō ato xanīfofo yoinifo.

²² Ato askafaifāfe nikakani yorafā rasi atoki ōitifishkinifo Pablo yafi Silaski. Nāskakaxō āto xanīfofofāfe ato yoinifo ato rapati fiakaxō ato chati koshanōfo. ²³ Ato koshakī finakaxō karaxa mēra ato ikimanifo. Nāskakaxō a karaxa kexea yoinifo ato kexesharakōinō tsekeyamanōfo. ²⁴ Yoikī askafaifāfe nikakī, a karaxa kexemisto oke mēra chaikōi ato ikimaxō tafara rafe oyatamaxō ato tsāoni.

²⁵ Ato askafafono Pablo fe Silas yamenakekafanaino Epa Nios kīfīyanā fanāinifo. Askaifono a ato fe karaxa mēra ikafāfe ato nikanifo. ²⁶ Nāskaifono fāsikōi mai naya naya ikī, nā karaxa pexe simīto posa akōini. Nāskafaino āfe fepotifo fepekemei fetseni. Nāskaino a karaxa mēra ikafo cadenās mepekemei fetsenifo. ²⁷ Askaino a karaxa kexea moinākafā ōia mā karaxa āfe fepoti fepekemei fetsea ōini. Askaito āfe espada tsekata āa retemepaini, mā tsekeafora ixō shināi. ²⁸ Askaito Pablo fāsikōi yoini iskafakī: “Mīa retemeyamafe. Nō faki kaamaki,” faito nikakī.

²⁹ A karaxa kexeato āfe soraro fētsa, “Ea kirosī otaxō fexōfe,” fani. Mā fexoano koshikōi ichoni choayanā ratei, nāskax Pablo fe Silas niafono ato nāmā ratokonō mai chachipakefōfāni. ³⁰ Nāskata fininākāfe mā ato kaimaxō ato yōkani iskafakī: “¿Afeskaxō ēfe chaka ē soatiromē Nios fe ipaxakī?” ixō ato yōkani.

³¹ Ato askafaito nikakakī kemanifo iskafakakī: “Nōko Ifo Jesucristo chanīmara fafe Ifokōi faax mefe yorafo fe mī afe nīpanakakī,” fanifo.

³² Nāskakaxō nōko Ifoōnoa meka shara yoinifo, a afe ikafori āfe pexe mēranoa ato yoinifo. ³³ Ato askafaifono nā fakish fistichi nā karaxa kexemisto a ato kohafo ano ato fāka chokani. Ato askafaino āfe āfiyafi āfe fakefoya ato maotisafanifo, ato faka mēra ikimapakekakī Jesús chanīmara faifono. ³⁴ Nāskaxō āfe pexe ari ato iyoxō ato pimani. Nāskax āfe āfi fe āfe fakefo fe inimakōini Nios chanīmara fakōikanax.

³⁵ Nāskata penama xanīfofofāfe āto sorarofō nīchinifo a karaxa kexeafō ato yoitanōfo Pablo yafi Silas ato kāimanōfo. ³⁶ Nā karaxa kexeato Pablo yoini iskafakī: “Xanīfofofāfe ea yoiafo ē mato kāimanō. Mā mā tanaima kasharatiro,” faino, ³⁷ Pablo a ato kexeafō yoini iskafakī: “Nōri romanōfofiano noko koshaketsafo yorafāfe ferotaiġi, noko yōkasharakaxoma. Nāskakaxō noko karaxa mēra ikimanafo. Akka, ¿afeskakī one mā noko kāimapaimē? Āakōi noko kāimani fenōfo ato yoitakāfe,” Pablo ato fani.

³⁸ Ato askafaito nikakakī mā fokaxō sorarofāfe ato xanīfofo yoinifo. Ato yoiaifono nikakani ratenifo: “Nōri romānōfora,” ato faifāfe nikakanax. ³⁹ Ato askafaifono xanīfofo mā fokaxō ato iskafanifo, Pablo yafi Silas: “Nō mato tāpīama māri romanōfo fekē nō mato koshaketsaxō karaxa mēra nō mato ikimanaki. Na karaxa mēranoax kāikāfe, nōko pexe rasi anoax fōtaxikakī,” ato fanifo. ⁴⁰ Mā karaxa mēranoax kāikanax Pablo fe Silas Lidia pexe ano fonifo. Nānoxō a Nios Ifofafo Jesúsnoa meka shara ato yoikakī ato inimamakōinifo. Nāto yoikī askafakanax ato makinoax fonifo.

¹ Pablo fe Silas mā fokakī, Anfípolis yafi Apolonia finōfāikanax, Tesalónica ano nokonifo. Nā Tesalónica ano judeofāfe ichanāti pexe ini. ² Pablo nā imis keskai pena tenetiña ichanāti pexe mēra kapaoni. Tres simānā anoxō ani, anox ato fe feratenñayanā a kirika ano Niospa meka kenenifoōnoa ato yoiyāna. ³ Anoxō ato yoini: “A Cristo omiskōiax nani. Mā nafiakē anā Epa Niospa otoani. Nā Jesúsnoa ē mato yoikai nāfi Cristoki,” ixō Pablo ato yoini.

⁴ Ato askafaifāfe nikakakī atiri judeofāfe Jesús chanīmara fanifo. Mā Jesús chanīmara fakanax ato fe rafenifo. Askatari griegofāferi Nios chanīmara fakaxō Nios fāsi sharakōi fanifo, nā kērofo xanīfofo feta. ⁵ Askafaifāfe ōikani judeofo noko anā nikakanimaraka ikanax, Pablo yafi Silas mepaikani ōitifishkinifo. Nāskakaxō a yora xani chakafo ato fenaifokani fonifo, Pablo yafi Silas chakafakakī mekafanōfo, fetsafāfe pexefo tii anoxō ato nikanōfo. Nāskakanax Jasón pexe ano fonifo Pablo yafi Silas fenaifokani, ato kāimaxikakī yorafāfe ato omiskōimanōfo. ⁶ Akka Pablo yafi Silas anoa ato fichikaxoma, Jasón yafi a Nios Ifofamis fetsafo ato achikaxō āto xanīfofo ano ato iyonifo. Mā ato iyokaxō fāsikōi ato iskafanifo: “Na feronāfakefāfe fanīma mīshixō ato chakafafōfāsafamisfo. Akka mā noko ano feafo. ⁷ Na Jasón āfe pexe mēra ato ikimana. Nafāfe a romanō xanīfāfe yoisim anori anā nikakanima. Akka nāno nōko xanifo fetsa āfe ane Jesús ikani,” ixō ato yoinifo.

⁸ Ato askafaifāfe nikakani xanīfofo ōitifishkikī metsamanifo, noko anā nikakanimara ikanax. ⁹ Akka Jasón feta fetsafāfe a xanīfofo ato kori ināfono ato kāimanifo.

Pablo fe Silas Berea ano fonifo

¹⁰ Nāskakata fakishi Pablo fe Silas Berea ano fotanōfo koshikōi ato nīchinifo. Mā Berea ano nokokanax judeofāfe ichanāti pexe mēra ikifainifo. ¹¹ Nā judeofāfe Pablo feta Silaspa ato yoiainono ato nikakōipainifo, Tesalónica anoafo keskara inifoma. Ato nikasharapaikōikakī Niospa meka shara nikakōinifo. Nāskakata pena tii kirika fepekaxō ōinifo a ato yoiāfo keskara chanīmamākī. ¹² Nāskakē judeofāfe Jesúsnoa chanīmara fakōinifo. Askatari griegofāferi chanīmara fakōinifo. Kērofāferi nikakōinifo a feronāfakefāfe nikaifo keskafakī.

¹³ Akka judeofāfe Tesalónica anoxō nikanifo Pablo Niosnoa meka shara Berea anoafo ato yoiāto. Nāskakanax Berea ari fonifo, mā ari fokaxō ato yoinifo Pablo mekafakī chakafanōfo. ¹⁴ Ato askafaifono, akka a Jesús Ifofamisfāfe Pablo koshikōi katanō nīchinifo fakafā kesemē ano. Akka Timoteo fe Silas fonifoma. Berea ano nētenifo. ¹⁵ Akka a Pablo fe fofaifo, afe fonifo pexe rasi Atenas ano. Nānoax anā feaifono Pablo ato yoini iskafakī: “Timoteo yafi Silas ea ato yoixotakāfe koshi ekeki fenōfo,” ixō ato yoini.

Pablo Atenas ano ini

¹⁶ Pablo Timoteo yafi Silas Atenas anoxō ato manayanā ōia Atenas anoxō afarafo ichapakōifo onifakaxō, “Na nōko niosra,” faifāfe ōi. Āfe ōiti mēraxō shināchakakōini. ¹⁷ Nāskakē Pablo nā judeofāfe ichanāti pexe mēranoax judeofo fe a judeofoma fe a Nios sharara faifo fe yoināni. Nāskatari a pexe emāiti niāx yoināifo mēxotaima Pablo Jesúsnoa ato yoini. ¹⁸ Ato yoiaino yora fetsafo akiki fenifo afe feratenāxikakī. Nāfāfe shinānifo iskakakī: “Nā nō apaiyai keskafakī nō atiro noko inimamanō,” ixō shinānifo. Nāfāfe āto anefo epicureofo. Ranāri iskanifo: “Afaa afeskara afiaino nō tenetiro,” ixō shinānifo. Nāfāfe āto anefo estóicofo. Nāfo epicureofo fe estóicofo Pablo fe feratenānifo. Iskafakī yoinifo: “Na mekakī finamisto ¿afaa noko yoipaimē?” ixō yoiainono, fetsafāferi iskafanifo: “Nios fetsafoōnoa noko yoipai rakikā,”

ixō yoinifo. Nāskafakī fetsanifo. Pablo Jesúsnoa meka shara ato yoifiaito, mā Jesús nafiax anā otoyamea ixō ato yoifiaito nikakaspakakī. ¹⁹ Nāskakaxō Areópago ano Pablo iyonifo a anoax mēxotaima ichanāxō afarafo yoimisfo ano. Nānoxō yōkanifo iskafakakī: “Nō tāpinō na mī yoiai anori meka fenakōiki noko yoife. ²⁰ Na mī noko yoiai anori nō nikamismaki. Afaa ikamākī noko yoife nō tāpinō,” fanifo. ²¹ Nā Atenas anoafō feta yora fetsafāfe anoxō ōikakī nikapaikōinifo a nikaifo keskara ato yoixikakī.

²² Nāskaxō nā ichanāmisfo āfe ane Areópago anoxō Pablo ato nēxpakīa niinākāfe ato yoini: “Atenas anoafāfe, ea nikakapo, mē mato ōi mā Niosnoa nikapaikōiaito tāpipaikōiyanā. ²³ Nā mā nios kīfimis ano kafasakī mē ōia. Nānoa ē fichia na nōko niosra ixō mā afara onifanixakī mā akiki kenekī iskafakē: ‘Nō na nios ōimisma,’ ixō mā aōnoa yoikī keneni. Nā nios ōikatsaxakīma mā kīfimis, nāōnoa ē mato yoi.

²⁴ “Nā Niospa keyokōi onifani, afama mīshtifo nai mēranoafōya mai anoafō onifani ato Ifo ixikī. Nā Nios yorafāfe pexe faafo mēra ikama. ²⁵ Askatari ea afaa axokāfe ikima. Akka nāato keyokōi noko nima. Nō xakainō noko nefefaxoni, afara fetsafori ani.

²⁶ “Askata feronāfake fisti onifakī taefani, nānoax nā maniafo tii kainōfo, nā mai tio ano ipaxakakī. Nāskaxō ato yoini, afe tii xinia akanimākai fanīra ikaxō. ²⁷ Nāskakē Niospa yorafo onifani keyokōichi fenanōfo tāpipaikakī. Akka fenakī fichitirofo. Chanīma, Nios chai ikama, noko chai faama. ²⁸ Akka Niosnoax nō nia. Akka Niosyamakēkai nō nikeranama. Akka nā mato tāpimamisfāfe kenenifo iskafakakī: ‘Nō Niospa fenakōifo,’ ixō yoinifo. ²⁹ Akka nō Niospa fenafofiāxō, nō shinātiroma Nios na yorafāfe afarafo onifafo keskara inō, āa shināxō yorafāfe onifafo keskara. ³⁰ Askafiaifonokai Niospa ato afeska fanima. Akka iskaratīa keyokōi ato yoi āto chaka xatekaxō chanīmara fanōfo. ³¹ Nāskakē Niospa tāpiyoni afetīa ato ichanāfaimākai, a ato omiskōimanaitīa, fatofō sharafomākī askayamai fatofori chakafomākī. Nā feronāfake katonioxō ato askafaxii. Akka mā nafiakē Āpa otofaito keyokōichi ōinifo,” ato faito,

³² a Jesús naax otoita nikakani, akiki kaxemetsamanifo. Ranārīto yoikī iskafanifo: “Mā nō nikakī a mī noko yoiaito, anā pena fetsa noko yoifaixāfe,” fanifo.

³³ Askafaifono a ichanāfo anoax Pablo kani. ³⁴ Akka Pablo mā kaino atiri afe fonifo Jesús chanīmara fakanax. Dionisiori nāno ato fe ini, nā Dionisio Areópago anoxō ato fe ichanāxō ato yoimis ini. Kērori nāno ato fe ini, āfe ane Dámaris, kēro fetsafori ano ato fe inifo.

18

Pablo Corinto ano ini

¹ Nāskata Pablo Atenas anoax kaax Corinto ano nokoni. ² Nānoa feronāfake āfe ane Aquilaki nokoni. Nā feronāfake Ponto pexe rasi anoa ini. Rama Italia anoax āfe āfi Priscila fe nokoita ini, nā Italia anoa āto xanīfāfe āfe ane Claudio ato potaitano. Ato iskafayanā na judeofo Roma anoax fōtanōfo ixō. Nāskakē Pablo ato ōikai kani. ³ Nā Pablo nā akaifo keskafakī akairi pexe fakāki tāpia ini, karapa pexe fakī. Nāskakē nāno ato fe nēteni, ato feta yonoxiki. ⁴ Nāskakē nānoax mēxotaima pena tenetitīa ichanāti pexe mēra kapaoni. Anoxō judeofoya a judeofoma ato Jesúsnoa meka shara nikamapai chanīmara fanōfo.

⁵ Akka Silas fe Timoteo mā Macedonia anoax akiki nokoafono Pablo Jesúsnoa meka shara judeofo ato yoifofāsafani: “Jesúsfi Cristoki Niospa katonī āfe Fakekōi inō,” ixō ato yoini. ⁶ Ato askafaito nikakakī judeofāfe Pablo iskafanifo: “Jesúskaī Cristoma. Mīa mī chanī,” fakaxō Pablo Ichaketsanifo. Askafaiāfe nikakī Pablo āfe rapatiōnoa atoki mapo taa taani mā anoax kakī ori fetsa ari ato iskafafāini: “Ē Niospa meka mato yoipaifaito mā ea nikakaspai. Māto shināmā mā iki. Nāskax naax mā Nios fe nīpanakama. Ē mato yoisharapaifaito mā ea nikakaspai. Nāskakē na judeofoma ari ē kai ariafo ato yoixiki,” ixō Pablo ato yoini.

⁷ Nāato askafata āto ichanāti pexe anoax kāikaini feronāfake āfe ane Ticio Justo pexe ano kani. Nāato Epā Nios shinākōikī kifipaoni. Nā ato ichanāti pexe chaima ika ini. ⁸ Feronāfake Crispa ichanāti pexe anoā āto xanīfo ini. Nāato āfe āfi feta āfe fakefoyaxō nōko Ifo nikakōiyānā chanīmara fani. Askatari nā Corinto anoafāferi chanīmara fakōinifo, Pablo Jesúsnoa meka shara ato yoiaito. Nāskakē chanīmara faifono ato maotisafakī faka mēra ato ikimapakenifo. ⁹ Nāskano fakish fetsa Pablo namakē ōia fani, nōko Ifāfe yoiaito iskafakī: “Ratekima mēxotaima ēfe meka sharaōnoa ato yoi xateyamafe. ¹⁰ Ē mefe ikaki mia tsōa afeska faima kiki. Na pexe rasi ano efe yorafo ichapa ikafokī,” ixō yoini. ¹¹ Nāskakē Pablo Corinto ano nēteni. Anoxō xinia fisti finōmata oxe seis ani. Nānoxō mēxotaima Niospa meka ato yoipaoni.

¹² Akka Acaya mai anoax Galiōn xanīfo finakōia ini. Nānoax judeofo ichanānifo Pablo achixikākī. Mā achikaxō āto xanīfo finakōia ano iyonifo. ¹³ Iskafakī āto xanīfo yoinifo: “Na feronāfake ato pārafōfāsafai, yoipai mā Nios kifiki iskafatiro ixō. A Moisés yoini anori ato yoima, fakirira ato yoi,” ixō yoinifo.

¹⁴ Pablo mā ato kemapaiyaito nā xanīfo Galiōn judeofo yoini iskafakī: “Na feronāfake afara chakafakē, askayamakī ato retekē mā ea yoiaito ē mato nikakerana. ¹⁵ Akka nā māto xinifāfe yoipaonifo keskaraōnoa mā yoita, a māto kaifāfe āfe aneōnoa yoita, a Moisés yoini keskaraōnoa mā yoi. Akka nā mā apaiyai keskafakāfe, ē aōnoa afaa tāpipaimakai. ¹⁶ Nāskakē nonoax fotakāfe,” Galiōn xanīfāfe ato fani. ¹⁷ Ato askafa fokaxō Sóstenes achinifo nā ichanāti pexe anoā xanīfo. Mā achikaxō nāri seteketsanifo xanīfāfe ferotaifi. Akka nā xanīfo Galiōn aō rafaanā inima.

Pablo anā Antioquía ano kani Niosnoa meka shara ato yoikai. Taeyoi kai rafenixakī anā kai fistini

¹⁸ Pablo Corinto ano oxaranāyoni. Nānoax a Nios Ifofafo makinoax kani Priscila fe Aquila afe fonifo. Nāskakata kanōnāfānē nanefainifo Siria mai ano fokani. Mā fokanax akka Cencrea anoax kanōnāfā mēra nanexoma Pablo ato testemayoni. Akka Pablo Nios yoiyoni: “Ē mīōxō afara axii, mī ea ōiaino,” ixō yoini. Akka mā axō ato testemani tāpinōfo. Ē Nios afara afeskarafaxōara ikax. ¹⁹ Nāskata mā fokanax Efeso ano nokonifo. Nāno Pablo ato nīchifaini Aquila yafi Priscila, ichanāti pexe mēra kakī nānoax judeofo ichanāfono ato fe yoināxiki. ²⁰ Nānoxō nētefapainifo. “Kayamafe nono nofe iyofe,” fanifo. Askafaifono akka Pablo nētekaspani. ²¹ “Maa, ē nētetiroma, mē kai,” ato fani iskafakī ato yoiyānā: “Epā Niospa ea nīchiaino anā oxō ē mato ōiyoxii.”

Nāato askafata Pablo kanōnāfānē naneinākafani Efeso anoax mā kai. ²² Mā Cesarea ano nokoax, Jerusalén ano kani a Nios Ifofafo ato yoisharaikai. Mā ato yoita anā kani Antioquía ano. ²³ Nāno ato fe ikatsaxakī, nānoax anā kani Niospa meka sharaōnoa ato yoifofāsafaikai. Galacia anoxō ato yoikī taefata,

Frigia anoxori ato yoini. A Nios Ifofaafō ato inimamakōini, Niosnoa meka shara ato yoikī.

Apolos Efeso anoafō Niosōnoa meka shara ato yoini

²⁴ Nāskaifono Efeso ano judeo fisti nokoni āfe ane Apolos pexe rasi Alejandria anoa ini. Nāato Niospa meka yoikī kirika kenenifo tāpikōia ini, xafakīakōi ato yois. ²⁵ Nāato nōko Ifo Jesúsnoa tāpikōixō ato yoini, inimakōikai nā tāpia anori xafakīakōi Jesúsnoa ato yoini. Askafixō Jesúsnoa tāpisharaxō nā Juan ato maotisafakī faka mēra ato ikimani nā fisti tāpia ini. ²⁶ Nāskata Apolos ichanāti pexe mēraxō ranotamakōi ato yoiāito nikakī. Aquila feta Priscila kenakaxō ori iyokaxō Niospa meka tāpimasharakōinifo nikasharakōinō.

²⁷ Nāskakē Apolos Acaya mai ano kapaiyaito nikakī a Nios Ifofaafāfe iskafanifo: “Nō a Jesús Ifofamisfo kirika kenexō fomanō mia ifisharakōinōfo,” ixō yoinifo. Apolos mā Acaya mai ano kaxō, ato yoisharakōini. Ato askafaito nikakani Niosnoax inimasharakōinifo.

²⁸ Nānoxō ōiaifo judeofo Apolos yoini: “Jesús Niospa Fakemara,” faifono. Akka nā kirika keneaxō Apolos ato yoini iskafakī: “Nā nō manai Cristofi Niospa Fakeki,” ixō xafakīakōi ato yoiāito tsōa kemanima.

19

Pablo Efeso ano oni

¹ Apolos Corinto ano iyoano, māchi keya ari fai tāpiato kaax Efeso ano Pablo nokoni. Nānoa Nios Ifofamisfo fichitoshini. ² “Mā Nios Ifofaxō Niospa Yōshi Shara mato mēra mā nanenimē?” ixō Pablo ato yōkaito, kemanifo iskafakakī: “Maa, nōkai aōnoa afaa nikayomisma, Niospa Yōshi Sharakai nō nikamisma,” fanifo.

³ Askafafāfe nikakī anā Pablo ato yōkani: “¿Afeskai mā maotisanimē?” ato faito, kemanifo iskafakakī: “Juan noko yoinino nō ini,” ixō yoinifo.

⁴ Askafafono anā Pablo ato yoini iskafakī: “Juan ato maotisafani afara chakafakatsaxakakī āto chaka xatepaiyaifono Nios Ifofapaikakī. Iskafakī ato yoiyanā a chipo oxiai nikakōisharaxikāfe ixō ato yoini, Jesúsnoa yoikī,” ato Pablo fani.

⁵ Pablo ato yoikī askafaino, nikakani nōko Ifo Jesús āfe aneōnoax maotisanifo fetsafāfe tāpinōfo. ⁶ Askaifono ōikī Pablo ato māmāpakeaino Niospa Yōshi Shara ato mēra naneni. Nāskakanax meka fetsapa mekai fetsenifo. Niosnoa meka shara nikakaxō ato yoinifo. ⁷ A ato mēra Niospa Yōshi Shara nanea, doce feronāfake ini.

⁸ Nāskaifono Pablo nāno ato fe ikax mēxotaima ichanāti pexe mēra kapaoni. Anoxō tres oxe ani. Niospa meka sharaōnoa ato yoiyanā ranotama, anoxō Nios xanifoōnoa ato tāpimapaikōikī. ⁹ Ato askafafaino atirifāfe nikakaspakakī yorafāfe ferotaifi mekafakī chakafanifo iskafakakī: “Nōkai Jesús chanīmara faima. Aōnoaxkai Epa Nios ari nō katiroma,” ixō yoiāifono, Pablo ato maki-noax kakī a Nios Ifofaafō ato iyon, feronāfake āfe ane Tirano a anoxō ato tāpimamis ano. Nānoxō a chanīmisfo anoxō pena tii Pablo Jesúsnoa meka shara ato yoipaoni. ¹⁰ Anoxō Pablo Niospa meka sharaōnoa ato yoikī xinia rafe ani. Nā Asia mai ano ikafāfe nikasharakōinifo Niospa meka sharaōnoa. Judeofo feta a judeofofāfema nōko Ifo Jesúsnoa meka shara nikapaonifo. ¹¹ Nāskakē Niospa Pabloōxō afama mīshtifo fakī ato ispani. ¹² Nāskakē yorafāfe āto payōiro iyamata āto sama faxte pishta Pablo āfe yora ramākanifo. Nāskafata

mã fokaxõ a isinĩ ikaifoya a niafaka chaka naneafõ ato ramãnifo. Ato askafaifono a isinĩ ikaifo fe a niafaka chaka naneafõ sharai fetsenifo.

¹³ Nãskaifono atiri judeofãfe fofãsakakĩ niafaka chakafo yorafo makinoa põtani fo pexefo tii fofãsakakĩ. Jesús ãfe aneõxõ niafaka chakafo yorafo makinoa ato põtapanifo. Iskafanifo: “Niafaka chakafãfe, Jesús aneõxõ Pablo noko yomiskĩ, akka nõ mato yoikai ato makinoax tsekefaitakãfe,” ato fanifo.

¹⁴ Nãskafapaonifo nã judeo ãfe fake sietipa, nã judeo ãfe ane Esceva ini. Nã ato Nios Kĩfixomisfãfe ãto xanĩfo ini. ¹⁵ Ato askafaifono a niafaka yõshi chaka yora mẽra naneato ato kemani iskafakĩ: “Ë Jesús õimis, askatari Pablori ã tãpia. Akka, ¿mã tsoamẽ?” ato fata, ¹⁶ nã niafaka yõshi chakayato ato rapati faxteyanã, fãsikõi ato achixõ ato seteketsayanã ato imi tofeni. Nãato askafakĩ fetsaino pexe mẽranoax yorioma ichonifo. ¹⁷ Nãato askafaano Efeso anoxõ judeofãfe yora fetsafo feta nikakani ratenifo. Nãskakaxõ, “Nõko Ifo Jesús fãsi sharakõi,” fanifo.

¹⁸ Nãskakaxõ a Jesús chanĩmara famisfãfe fẽkaxõ a afara chakafapaoni xakakĩ yorafãfe ferotaifi yoinifo. ¹⁹ Askatari a yõfe tãpiafãfe ãto kirika fẽkaxõ yorafãfe ferotaifi koanifo, mã Jesús Ifofakaxõ. Nã kirika kene õiafo kopikõi ini, como cincuenta mil ini. ²⁰ Nãskakẽ nõko Ifãfe ãfe mekashara nikaketsanifo Jesús Ifofamisfãfe ato yoiãifãfe, ãfe kerex sharaõxõ afama mĩshtifo fakakĩ.

²¹ Nãskafata Pablo shinãni Macedonia yafi Acaya ano kaxiki. “Nãnoax Jerusalén ano ã kaikai, Jerusalén anoax Roma ano ã kaikai,” ixõ shinãni. ²² Nãskaxõ a afeta yonomisfo rafe Macedonia ano ato nĩchini Timoteo yafi Erasto. Akka Pablo Asia ano nẽteyoni.

Efeso anoax yorafo mekai fetsenifo

²³ Nãskaifono nã Efeso anoafõ mekai fetsenifo: “Jesúsfi Niospa Fakekĩ aõnoax nõ Nios ari katiro,” Pablo ato faino, ²⁴ nãno feronãfãke ãfe ane Demetrio ini. Nãato yonokĩ afarafo kori exe keskara oxokõi onifapaoni. Nã feronãfãke afara onifakĩ tãpikõia ini. Nãskaxõ kẽro õitsa onifani, na nõko niosra ixõ ãfe ane Artemisa. Ranãfaxõ kẽro õitsa fakĩ kafãshara mĩshtifo onifani. Nãskakẽ a afeta yonofãifãfe aõxõ kori ichapa fipaonifo. ²⁵ Nãskaxõ Demetrio ato ichanãfani, a afeta yonomisfo ato iskafayanã: “Efe yora mĩshtichi, mã mã tãpiakĩ nõko nios Artemisa yora keskara onifaxõ, aõxõ nõ kori ichapa fimiski. ²⁶ Akka mã mã õimis nikayanã, na Pablo ato yoifofãsafamis iskafakĩ: ‘Na yorafãfe niosra ixõ onifaafõ, akai niosma,’ ixõ ato yoi. Mã yora ichapafãfe chanĩmara fakõinafo ato yoiãito nikakakĩ. Na Efeso anoafos ato yoiãma, Asia mai anoãfori ato yomimis. ²⁷ Na Pablo yoiãi keskara mesekõi, ã shinãchakakõi. Anã noko tsõa kori inãyamaino nõ fenotiro, na nõko nios Artemisa anã tsõa kĩfitiroma, nã maitio ikafãfe Asia mai anoxõ kĩfimisfo. Askatari a nõko nios kĩfiti pexefã mẽranoax anã ichanãtirofoma,” ixõ Demetrio ato yoini.

²⁸ Demetrio ato askafaito nikakani Pablori õitifishkiyanã fãsikõi yoinifo iskafakakĩ: “¡Na Artemisa Efesio anoafõ nã sharafinãkõiafo, tsoa keskarama!” ikanax fãsikõi mekai fetsenifo.

²⁹ Nãskakanax pexe rasi anoax fekaxtei fetsenifo. Nãskakaxõ Gayo yafi Aristarco achinifo. Nã rafe Macedonia anõa inifo, Pablo fe feitafo. Nãskakaxõ a yora kaya ichanãno ato iyonifo. ³⁰ Ato askafaifono Pablo ato mẽra ikipaini arixõ yorafo yoixiki. Akka a Jesús Ifofaafãfe Pablo nĩchikaspanifo, “Mia retetirofoki,” ikaxõ. ³¹ Askatari a Pablo fe rafemisfãfe, xanĩfofõfãfe Asia

mai anoxō ato yoinifo, Pablo yoitanōfo ato mēra ikiyamanō. ³² Nāskakē āa ranā ichanākanax fāsikōi mekanifo. Atirifāfe fetsa anori yoinifo. Nāskaifono ranārīto tāpinifoma afeskai ichanāfomākī. ³³ Nāskaifono judeofāfe shinānifo, na yorafo chakai mekai taeafora noko fakanira ikaxō. Nāskakaxō Alejandro pītsikinifo ōiaifono ori nīxō ato yoitakāfe ikaxō. Nāskafaifono Alejandro nīnākaā mēshaxō ato yoini iskakafī: “Mekayamakāfe, ē mato yoisharanō,” ixō Alejandro ato yoini. ³⁴ Akka mā tāpikaxō Alejandro judeokē, fāsikōi āa ranā mekai fetsenifo, iskakani: “Na Efeso anoafāfe āto Artemisa sharafinokōia,” ikaxō.

³⁵ Askaifāfe ōikī a xanīfo kenexomisto, “Mekayamakāfe,” ato fani. Ato askafaito anā tsoa mekanima. Nāskaxō ato yoini iskakafī: “Efesofo anoafāfe ea nikasharakāfe. Keyokōichi tāpiafo nōfi Efeso anoafokī, nā āto nios Artemisa āfe kīfiti pexefā nō kexemis. Nā onifafo nai mēranoax pakeafori nō kexemis. ³⁶ Nāskakē āa chanīkanira tsoa itiroma. Nāskakē anā mekayamakāfe, afaa afeskafapaiyamakāfe shināsharaxoma. ³⁷ Akka na feronāfakefo mā ato efea afaa chakafayamafafono, askatari na pexefā mēranoa tsōa afaa oneyamafiano, askatari na nōko nios Artemisa tsōa chakafakī mekafayamafiano mā ato efea. ³⁸ Akka na Demetrio afeta yonomisfo feta, a ato chakafapai xanīfofo ano ato iyotiro, anoxō ato yōkanō afaa chakafafomākī. ³⁹ Nāskaxō afara fetsa mā yoipaikī nā ichanāfo anoxō mā yoitiro. ⁴⁰ Mā iskaratīa ato chakafai keskafakī xanīfofōfāfe nikaxō nokori askafatirofo. Na yorafāfe afaa chakafayamafiamisfono, afeskakī mā yōachepeimē xanīfofōfāfe noko faifono nō ato kematiroma,” ixō a xanīfo kenexomisto ato yoini.

⁴¹ Ato yoikī askafata ato nīchiaino fonifo.

20

Pablo Macedonia ano kata Grecia ariri kani

¹ Mā mekakani nishpafono Pablo a Nios Ifofaafō kenani ato yoisharaxiki. Mā ato yoisharata, ato makinoax kani Macedonia ari kai. ² Mā kaxō nāriafo Jesúsnoa meka shara ato yoifofāsafakī a Nios Ifofaafō ato inimamakōini. Nāskata Grecia ano nokoni. ³ Nānoxō tres oxe ani anoax kanōanāfānē Siria ano kapaikī, nikani judeofāfe kexefonon retepai kakī. Nāskakē fāi kakī, Macedonia anā finōfaini. ⁴ Mā kaino feronāfake ranāri afe fonifo. A feronāfake fetsa āfe ane Sópater Berea ano ini. Āfe apa ane Pirro ini, Aristarcori ini, Segundori ini, nā Segundo Tesalónica ano ini. Fetsari Gayo, Derbe ano ini. Fetsari Timoteo ini. Askatari Tíquico fe Trófilo Asia mai ano ini. Nā tii Pablo fe fonifo. ⁵ Nā tii rekē fokaxō Troas anoxō noko mananifo. ⁶ Akka mā lista senēano chipo nō kani. Nā fistatīa pāa faraxaxoma pimisfo ini. Nāskata Filipos anoax kanōanāfānē nō kai cinco nia mā nō oxax Troas ano nō atoki nokoni. Nāno nō siete nia oxayoni ato fe.

Troas ano ōikai Pablo kani

⁷ Nāskata mā pena nomīkoaino nō ichanāni pāa kaxke mīshtixō pixiki a Jesús noko nāxoyamea shinākī. Anoxō Pablo a Nios Ifofaafō yoini, mā penama kaxiki yamenake kafanaino ato yoikī xateni. ⁸ Nānoax pexe kene keya fomākīa anoax nō ichanāni, a rāpari ichapa ōtai fetsea anoax. ⁹ Nāskaino naetapa āfe ane Eutico pexe kene fomākīa āfe naisti anori tsaoni. Pablo ato chaikōi yoiaino nā naetapa oxakatsaini. Nāskax mā oxachāi kaax pexe

kene fomākīakōinoax pakeax nakē chishtoinīfofānifo. ¹⁰ Nāskakē Pablo fopakekafā chishtoinīfofā nā naetapa ikōni, ato iskafakī yoiyanā: “Rateyamakāfe, naamaki,” ato fani.

¹¹ Nāskafata anā pexe fomākīa Pablo māpeinīfofāxō ato pāa kaxkeketsaxoni ato feta pixiki. Nāskaxō ato yoikī pena fani. Mā penano Pablo kani. ¹² Ato askafaino nā naetapa nafiax mā otokē afe yorafāfe xanēnē iyonifo. Askafakī Pablo ato inimamakōini.

Troas anoax Pablo Mileto ano kani

¹³ Akka nō kanōanāfānē rekē kani, Aso anoxō Pablo ifixiki. Akka noko iskafakī yoini: “Ē fāi kaikai rekē fokāfe,” ixō noko yoini. ¹⁴ Nā Aso anoax noko fichiax nofe feronāfāke kani. Nāskax Mitilene ano nō nokoni. ¹⁵ Nāskata nānoax nō tsekekainax pena fetsa Quío mai nō finōfaini kaax pena fetsa Samos fai fototai nō nokoni. Anā anoax kaax pena fetsa pexe rasi Mileto ano nō nokoni. ¹⁶ Akka Pablo Asia ano samarakapainima. Efeso anori kakaspani, Jerusalén ano koshi nokopai ato feta fista Pentecostés apai.

A Nios Ifofaafō ato kexemisfo Efeso anoafō meka shara Pablo ato yoini

¹⁷ Mileto anoxō Pablo ato kenamani, Efeso anoxō Nios Ifofaafō ato kexemisfo. ¹⁸ Mā feafono ato iskafani: “Mā mā ea ōimis ē isharakōiaito nā ē oitachāi. Na Asia mai anoxō ē afaa afeska fama ē isharakōia Jesúsnoa meka shara mato yoi. ¹⁹ Mēxotaima ē mato mēra itiani, nōko Ifo yonoxoni. Ē mato yoi ē oiatiani Nios mato Ifo sharafamapai. Askatari ea omiskōimanaifono ē omiskōimis judeofāfe ea askafaifono. ²⁰ Akka ea askafafiaifono Jesúsnoa meka shara ē mato yoikī xateima. A meka sharakapafo ē mato yoimis. Ranotamakōi ē mato yoimis, ichanāti pexe anoxō yoita a mato pexekōifo anoxori ē mato yoimis. ²¹ Judeofo yoita a judeofomari mē yoimis āto chaka xatekaxō Nios Ifofanōfo nōko Ifo Jesucristori chanīmara fakōinōfo.

²² “Akka iskaratīa Jerusalén ano ē kai, Niospa Yōshi Sharapa ea nīchiaino. Ē tāpiama arixō ea manafo ea afeskarafakani. ²³ Akka mē tāpia Niospa Yōshi Sharapa ea yoiāito, pexe rasi anoxō ea karaxa mēra ikimakaxō ea omiskōimakani. ²⁴ Akka ea askafafiaifono ē shināchakaima. Nā Epa Niospa ea amapaiyai keskara fisti ē shināi. Epa Niospa keyokōi yorafo noikōi na meka shara ato yoitāfe ea fani. Nā ea yoini keskara ē apai.

²⁵ “Ē mato mēraxō Nios xanīfoōnoa ē mato yoimis. Akka mē tāpikōia anā mā ea ōinakama. ²⁶ Nāskakē ē mato yoipai. Na fetsafāfe ea nikakaspamisfo ē ato yoipaifiaito tsōa ea nikamisma. Nāskax omiskōixikani. Nāskakē ē ato afeskatatiroma, mē ato yoimis. ²⁷ Mē mato yoimis a Niospa fichipaiyai keskafakī ē mato yoikaspamisma. ²⁸ Nāskakē kexemesharakāfe, a Nios Ifofaafōri ato kexesharakāfe. Niospa Yōshi Sharapa mato ikināki, a Nios Ifofaafō mā ato kexesharanō. Jesús nokoōnoax nai āfe imi foniki. ²⁹ Mē mato makīnoax kaano, chipo a fanīrira yoimisfo chakafō fekani mato fanīrira yoipaikani. Oa poomānā chaxo fichixō pitiro keskafakī mato pārapaikani mā anā Jesús shinānōma. ³⁰ Afianofi mā fetsa mā ranā mā pāranōnāxii nō Niospa meka tāpiara ixō mā ato pāraxii, a Nios Ifofaafāfe mato nikanōfo. ³¹ Kexemesharakōikāfe, akka shinākapo. Tres xinia ē ani Niospa meka sharaōnoa mato yoikī. Penata yoita, fakishi yoikī ē mato famis, Niospa meka sharaōnoa ē mato yoi ē oiamis.

³² “Akka efe yora mīsttichi, iskaratīa ē Epa Nios kīfi mato kexesharanō, a mato noiai keskafakī āfe meka shara mato mēra nanenō. Nāato āfe kerex sharaōxō āfe meka shara mato inātiro mato mēra nanesharanō askatari a

yoiyoni keskafakī afe yorakōifo ato afara ināsharakōitiro afe İpaxanōfo. ³³ Ēakōi ē afaa fipaimisma, askatari ē mato kori yōkamisma, rapatiri ē tsoa yōkamisma. ³⁴ Askatamaroko ēfe mifikōichi ē yonofaito mā mā ōimis, a ē fichipaiyai fixiki, a efe ikafori ato ināxiki. ³⁵ Mē mato ōimamiski afeskaḡō mā yonotiromāki, a omiskōiaifo ato axosharayanā. Nōko İfo Jesūs āfe meka sharaōnoa shināyanā fetsafāfe noko afara ināino nō inimatiro keskai, ‘Nōri fetsafo afara ināsharai nō inimaifinakōitiro,’ ixō nōko İfāfe noko yoini,” Pablo ato fani Efeso anoafō.

³⁶ Mā ato yoikī askafata ratokonō mai chachipakefōfā Pablo ato Epa Nios kīfixoni. ³⁷ Anoax keyokōi oiayanā Pablo ikōketsayanā kokoketsanifo. ³⁸ Shināmitsakōinifo: “Ē anā mato ōinakamara,” ato faino, askakāta afe fakafā kesemē fonifo Pablo kaito ōifokani. Nāskax Pablo kanōanāfānē nanekaini mā kai.

21

Pablo Jerusalén ano kani

¹ Anoa a Nios İfofaafo nō ato ōifaini, kanōanāfānē nō nanekaini kaax Cos ano nō nokoni. Anoax kaax pena fetsa Rodas ano nō nokoni, anā anoax kaax Pátara ano nō nokoni. ² Nā Pátara anoxō kanōanāfā nō fichini Fenicia ano kaino, nāo nō nanekaini. ³ Kakī fakafā nakirafe Chipre mai toomfā nō ōifaini. Nā Chipre mai nōko pōya mishkiori ini. Nā finōfaini kaax Siria ano nō nokoni. Nānoxō pexe rasi Tiro fai fototai nokoxō kanōanāfā mēranoa afama mīsthtifo māpemanifo. ⁴ Nānoa a Nios İfofaafo nō ato fichini, nāno nō ato fe siete nia oxani. Nāfāfe Pablo yoinifo Niospa Yōshi Sharapa ato shināmanaino iskafakakī: “Jerusalén ano kayamafe. Anoxō mia retepaikani kiki,” ixō yoinifo. ⁵ Askafaifono mā siete nia finōta nō anoax kaino, keyokōi āto āfifo fe āto fakefo fe nofe fonifo pexe rasi pasotai. Nānoxō nā māshifā anoxō ratokonō mai chachipakefōfā nō Epa Nios kīfini. ⁶ Nāskata mā nō kakī nō ato yoisharaketsata, kanōanāfā mēra nō naneinākafani, akka atii anā fenifo āto pexe ano.

⁷ Nāskata kanōanāfānē nō kai Tiro ano nō nokoni, nānoax kaax Tolemaida ano nō nokoni. Nānoax a Nios İfofaafo fe nō ato fe yoināsharakōini, askatari nāno nō ato fe oxa fishtiyoni. ⁸ Nāskata nānoax kaax pena fetsa Cesarea ano nō nokoni. Nānoax Felipe pexe ano nō kani. Nā Felipe Niospa meka shara yoisim ini. A Jesūs İfofaafāfe afetiama Felipe ifinifo Jerusalén anoxō a piaifo ato paxaxonō. Seis feronāfake fetsafoya Felipe ifinifo ato feta yononō. Nāato pexe ano nō nēteni. ⁹ Felipe fake xotofake cuatro inifo fenemais. Nāfāfe Niospa Yōshi Sharapa ato shināmanaino ato yoipaonifo. ¹⁰ Nāno nō oxa ranāni, nāno Judea anoax feronāfake āfe ane Agabo nokoki nokoni. Nāato Niosnoa yoisim ini, a inōpokoai yoikī. ¹¹ Mā noko ano nokoxō, Pablo āfe nanexemeti fiata, aō metexkere ita aō otxekere ini. Nāskaxō ato yoini iskafakī: “Niospa Yōshi Sharapa ea yoi Jerusalén anoxō judeofāfe na nanexemeti ifo iskafaxikani. Nāskaxō yora fetsafo ināxikani,” ixō Agabo ato yoini.

¹² Noko askafaito nikakī Cesarea anoafō feta, “Jerusalén ano kayamafe,” nō Pablo fani. ¹³ Askafaifono Pablo noko kemani iskafakī: “¿Afeskakī mā oiayanā mā ea shināmitsamanimē? Mē itipinīshara ea nexayamakakī ea retekani Jerusalén anoxō, nōko İfo Jesūsxō ea askafakani,” Pablo noko faito, ¹⁴ nō anā afaa fanima noko nikayamaito. Nāskaxō nō yoini iskafakī: “Nōko İfāfe nā mia apaiyai keskafanō,” ixō nō yoini.

¹⁵ Mā askata nō itipinī fani, nāskax nō Jerusalén ano kani. ¹⁶ Nō kaino a Nios Ifofaafō ranāri nofe fonifo Cesarea anoax. Nāfāfe noko iyonifo feronāfake āfe ane Mnasón pexe ano, nā Mnasón Chipre anoa ini. Nāato afetiāma Nios Ifofakī taefani. Nāskaxō āfe pexe anoaxō noko ifini ano nō oxanō.

Pablo Santiago ōikai kani

¹⁷ Mā nō Jerusalén ano nokoano a nofeta Jesús Ifofamisfāfe noko ifinifo nokoki inimakōiyānā. ¹⁸ Askata pena fetsa Pablo nofe kani Santiago ōikai. A Nios Ifofaafō ato kexemisfori nāno inifo. ¹⁹ Mā atoki nokoxō Pablo ato yoisharakōini. Nāskaxō ato yoipakeni a Niospa aōxō a judeofoma ato chanīmara famakōikē.

²⁰ Ato yoiaito nikakakī, “Nios fāsi sharakōi,” fanifo. Nāskaxō Pablo yoinifo iskafakakī: “Nofe yorashta, nō mia yoisharapai, mā mī ōimiski na judeofāfe ichapakōichi mā nōko Ifo Jesús chanīmara fafiakaxō, nāfāfe a Moisés yoini keskara nikapaikōimisfo. ²¹ Nāfāfe yoiafo judeofo a yora fetsafo mēra ikafo mī ato yoikē iskafaki: ‘A Moisés yoini keskara nikayamakāfe,’ ixō mī ato yoikē, ‘Askatari māto fakefo foshki repa xateyamakāfe, askatari a mā imis keskai anā askayamakāfe,’ ixō mī ato yoimiskē. ²² Akka, ǀnō afeskaimē, yorafāfe nikakani mā mī nono oano? ²³ Akka nā nō mia yoiai keskafe. Na cuatro feronāfakefāfe Nios yoiafoki iskafakakī: ‘Epa Niosī, mī noko yoia keskai nō askakōikai,’ ixō yoiafoki. ²⁴ Akka na cuatro feronāfake fe Nios yoiti pexefā mēra katāfe, nō imis keskai ato fe ife māto chaka soaxikakī. Mī ato kopifaxōfe matō testeafono. Mī ato askafaito ōikakī keyokōichi tāpitirofo a mīōnoa yoiaifo āa chanīkani. Askatamaroko mūri a Moisés yoini keskara mī nikakōimis. ²⁵ Akka a judeofofāfema a Jesús Ifofaafāfe mā chanīmara fakōinafo. Akka mā nō ato kirika kenexona iskafakī: ‘Nō nami pitiroma na nōko niosra ixō afara onifakaxō fetsafāfe ināfono. Askatari yoināfo āfe imiri nō ayatiroma. Askatari yoinā ina fakaxō tetoxakafo āfe imi foyamaitori āfe nami nō pitiroma, askatari nōko āfima nō chotatiroma, kēromāri āfe fenema chotamatiroma,’ ixō nō ato yoia,” Pablo fanifo.

Nios kīfiti pexefā mēraxō Pablo achinifo

²⁶ Nāskafaifono nā cuatro feronāfake Pablo ato iyonī. Nāskata pena fetsa ato fe Nios kīfiti pexefā mēra ikini, āto chaka soaxikakī. Nāskata a Nios kīfiti pexefā mēra ikikaini xanīfo yoixiki a Epa Niospa yoini keskara afetiā keyoimākai, nā tiitori yoinā retexō Epa Nios ināpaikakī.

²⁷ Mā siete nia ikano judeofo Asia mai anoax fokaxō Nios kīfiti pexefā anoa Pablo ōikakī yorafo yoinifo Pablo chakafakī mekafanōfo. Ato askafai-fono Pablo achinifo. ²⁸ Mā Pablo achikaxō fāsikōi ato yoinifo iskafakakī: “Israelifāfe, nofeta nākifēkape, a na feronāfake kafāsakī yorafo ato pārāfōsa famiski. Nōko maifo tii ano ato chakafakī yoimiski. Askatari a Moisés noko yoini anori nikayamakāfe ato fai. Askatari nōko Nios kīfiti pexefā chakafakī mekafai. Askatari nōko Nios kīfiti pexefā sharafinakōifiano chakafaa, a mēra nōko kaifoma griego yorafo ikimana,” fanifo. ²⁹ Akka taeyoi Pablo ōinifo pexe rasi ano nā Trófimo fe kafāsaito. Nā Trófimo Efeso anoa ini. Na Pablo nōko Nios kīfiti pexefā mēra Trófimo ikikinaki ixō shinānifo aa yamafiano.

³⁰ Nāskakē pexe rasi anoax mekai fetsenifo, nāskaifono yorafo nikaferakani ichonifo. Nāskakaxō Pablo achikaxō Nios kīfiti pexefā mēranoa kāimanifo. Nāskata Nios kīfiti pexefā koshikōi feponifo. ³¹ Nāskaxō mā chaima reteai-fono, romanō anoa sorarofāfe āto xanifāfe nikani pexe rasi Jerusalén

anoafāfe yōachēpeaifāfe. ³² Nāskaiifāfe nikakī a soraro xanīfāfe a afe rafeafoya āfe sorarofa ichanāfani. Nāskax ato fe koshikōi ichoni yorafo mēra, a soraro xanīfo āfe sorarofa fe kaito ōikakī anā tsōa Pablo seteketsanima enerisafanifo.

³³ Nāskata a soraro xanīfāfe mā Pabloki kaxō mā achixō, cadenās rafeta ato metexkere amani. Nāskaxō chipo yōkani tsoamāki, askatari afaa afeska faamāki. ³⁴ Akka askafaino yorafo fanīra mekai fetsetenifo anoris yoinifoma. Nāskai mekai fetseafonono soraro xanīfāfe tāpitiroma ini. Nāskaxō sorarofa mēra ato iyomani. ³⁵ Mā chaima sorarofa mēra nokoikaino, anoxō yorafāfe retapaiyafono, sorarofāfe Pablo chishtokaxō iyonifo yorafāfe afeska fanōfoma. ³⁶ Nāskakē keyokōi acho fokani fāsikōi mekafonifo. “Aa chaka reterisafakāfe,” ato faafonifo.

Askafafono yorafāfe ferotaii Pablo ato yoini

³⁷ A sorarofa ika mēra mā ikimanaifono, a sorarofāfe āto xanīfo Pablo yōkani: “¿Ē mefe pishta mekatirōmē?” faito soraro xanīfāfe kemani iskafakī: “¿Griego mekapa mī mekatirōmē? ³⁸ Akka, ¿mīmamē a Ejipto anoa afetiama xanīfo potapaiyanā cuatro mil yorafo tsōa istoma iyonī?” ixō xanīfāfe yōkani.

³⁹ Askafaito nikakī Pablo kemani iskafakī: “Maa, ēma. Ēfi judeoki. Ēfi Tarso anoax fakeakī nā pexe rasi Cilicia mēranoax. Akka na yorafo ē ato yoinō ea yoife,” faito, ⁴⁰ nā soraro xanīfāfe, “Mī ato yoitiro,” fani. Nāskafaino Pablo kipiti ano niinākakāfā mēshainākakāfā, “Mekayamakāfe,” oinoma ato fani. Mā ato nishpafaxō hebreo mekapa iskafakī ato yoini:

22

¹ “Efe yora mīshtichi, ea nikakāfe ē mato yoinō ea chakafafa keskara, ea anā chakafayamanōfo,” ixō ato yoini.

² Hebreo mekapa ato yoiaito nikakani, tsoa pishta tooxinima. Askafono Pablo anā ato yoini, ³ “Ēri judeo. Tarso anoax ē fakea, Cilicia mai anoax. Akka ē nono Jerusalén anoax yosia, ēfe maestro Gamalielxō ē tāpia. Na Moisés nōko xinifo yoipaoni anori ē yoimis. Mēxotaima ē shinākōimis ēfe ōitifyoxō ē Nios Ifopapikī. Nā mā Nios Ifopapayai keskafakī ēri askafapaoni. ⁴ Taefakī a Jesús Ifofaifo ē ato omiskōimakī ē ato retapaiyoni. Nāskaxō ē ato achixō karaxa mēra ē ato ikimapaoni, feronāfakefoya kērofo. ⁵ A ato Nios kīfixomisfāfe āto xanīfo feta a xanīfo fetsafāfe mato yoitirofo nā ē mato yoiai keskara. Nāfāfe ea kirika kenexō inānifo, nofe yorafo judeofo Damasco anoafō ē ato foxotanō. Nāskax ē ari kani a Nios Ifofaifo ato fenaikai, ato achixō Jerusalén ano ato efexiki anoxō ato omiskōimaxiki,” ixō Pablo ato yoini.

Pablo afeskaxō Jesús Ifofamāki ato yoini (Hch. 9.1-19; 26.12-18)

⁶ Anā Pablo ato yoini iskafakī: “Akka fāi kaikī mē chaima Damasco faikaino, nānoxō xini keya oa luz keskarato nai mēraxō ea chaxakōitani. ⁷ Ea askafaino ē nāmā pakeni. Nāskaxō mekaito ē nikani, ea iskafaito: ‘Saulo, Saulo, ¿afeskakī mī ea omiskōimanimē?’ ea faito. ⁸ Ea askafaito ē yōkani iskafakī: ‘¿Mī tsoamē, Ifo?’ ē faito ea kemani iskafakī: ‘Ēkīa Jesús Nazarete anoa, nā mī ea omiskōimanai,’ ea fani. ⁹ A efe foaifāfe luz keskarato ea chaxatanaito ōikani ratenifo. Akka a ea yoi mekaito tsōa nikanima. ¹⁰ Ea askafaito ē yōkani iskafakī: ‘¿Ifo, ē afeskatiromē?’ ē faito, nōko Ifāfe ea iskafani: ‘Fininākakāta Damasco ano katāfe. Anoxō ē mia yoi kaikai mī afaa

afeskafaimākai,' ea fani. ¹¹ Akka anā ē fēro òitiroma ini, nā luzpa ea fechaxki mā ea fēxoano. Nāskakē a efe foaifāfe ea mētsoxō Damasco ano iyonifo.

¹² "Nāno feronāfakē āfe ane Ananías ika ini. Nāato Nios nikakōixō a Moisés yoini keskara nikakōipaoni. Nānoxō judeofāfe Damasco ano ikaxō aōnoa yoisharapaonifo. ¹³ Ē Damasco ano nokoano ekeki Ananías oni ea òiyoi. Mā ekeki oxō ea iskafani: 'Efe yorashta Saulo, anā òife,' ea faino koshikōi ē anā fēro òini. Nāskaxō ē òisharakōini. ¹⁴ Anoxō ea yoini iskafakī: 'Nōko xinifāfe āto Niospa mia katoa, a mia amapaiyai keskara mī tāpinō. Askatari āfe Fake sharafinakōia mī òinō, āfe meka sharafinakōia nikayanā. ¹⁵ Nāskaxō mī ato yoixii Niosnoa, nā maniafo tii anoa, nā mī òiaifoya, nā mī nikaifo. ¹⁶ Nāskakē samarakakima koshikōi fininākafāta maotisafe faka mēra ikipakekafāfe nōko Ifāfe āfe aneōxō mia chaka soaxonō,' ea fani" ixō Pablo ato yoini.

Pablo ato yoini a judeofoma mēra Epa Niospa nīchini

¹⁷ Anā Pablo ato yoini iskafakī: "Mē Jerusalén ano anā oax, Nios kīfiti pexefā mēra ē kani anoxō Nios kīfikai. Nānoxō ē òia oa namakē òia ē fani. ¹⁸ Ē nōko Ifo òini ea iskafaito: 'Nā Jerusalén anoax koshi tsekekaitāfe, mī eōnoa yoiaito mia tsōa nikaima kiki,' ea fani. ¹⁹ Ea askafaito ē kemakī iskafani: 'Ifo, mā ea tāpiafo nā ichanāti pexe mēranoafo kaxō ē ato achixō karaxa mēra ē ato ikimapaoni a mia Ifoifafo. Askatari ē ato koshaketsapaoni. ²⁰ Askatari a mī inakōi Esteban reteaifono, ēri nāno ato fe ini reteaifono. Nāskaxō ē ato rapati kexexoni.' ²¹ Ē askafaino nōko Ifāfe ea yoini: 'Fininākafāta fāi katāfe, mai fetsafo ari chaikōi ē mia nīchikai a judeofoma ari,' ea fani," ixō Pablo ato yoini.

Soraro xanīfāfe Pablo kexeni

²² Ato askafaito nikakani, akka fāsikōi yorafo mekainīfōfānifo: "Na feronāfakē chaka retefe anā niyamanō," fayanā chakafakī mekafanifo. ²³ Nāskakakī òitīfishkikī finayanā fāsikōi mekakakī āto rapati taa taa ayanā fomākīa mapo saakī fetsanīfo. ²⁴ Askafaiifāfe nikakī a soraro xanīfāfe ato yoini Pablo karaxa mēra ikimanōfo, koshaketsakaxō, nāskafaifono ato yoinō afeskai a yorafo akiki chakai mekakanimākai. ²⁵ Akka mā metexkereakaxō koshapaiyaifono, a soraro xanīfo fētsa Pablo yoini iskafakī: "¿Tsōa mia yoiamē mā romanō koshanō xanīfo yōkaxoma?"

²⁶ Askafaito nikai a soraro xanīfo āfe xanīfokōi yoikai kani iskafakī: "¿Mī afeska faimē, na feronāfakeri nofe romanō?"

²⁷ Askafaito nikakī soraro xanīfokōi Pablo ano kani yōkaikai. "¿Mī chanīmamē mī romanōmē?" ixō yōkaito, "Ēje, ēri romanōki," Pablo fani.

²⁸ Askafaito nikakī a xanīfāfe yoini iskafakī: "Ē romanō ixiki kori ichapa ē ato ināni, akka taeyoi ē romanō iyopaonima," faito nikakī, Pablo kemani iskafakī: "Akka ēfi romanōkōiki," fani.

²⁹ Ato askafaito nikakani a koiro fichi koshapaiyaifo a makinoax fonifo. Nā soraro xanīfāfe mā tāpiax Pablo romanōkōikē nikai ratekōini cadenānā ato metexkerekamax.

Judeofāfe āto xanīfāfe ferotaifi Pablo yoini

³⁰ Nāskata pena fetsa soraro xanīfokōichi tāpipaikōikī judeofāfe aōnoa afaa yoiafomākī, a cadenānā menexafo mēpeni. Nāskaxō ato ichanāfani a Niosnoa ato yoimisfo ato kexemisfoya, a xanīfokōifo. Nāskaxō Pablo kāimaxō āto ferotaifi nīchini.

23

¹ A xanifofo òikì Pablo ato yoini iskafakì: “Efe yora mīshtichi, nā Epa Niospa ea yoikì taefani keskai, nē askakòimis. Èfe òiti mēraxò ē Nios shinākòiyana ē sharakòimis,” ixò ato yoini.

² Akka Ananías ato Nios kīfixomis āfe xanifo ini. Nāato a Pablo ketaxamei nia yoini Pablo apasnò. ³ Askafaito òikì Pablo kemani iskafakì: “Epa Niospa mia koshai mīkai afaa tāpiama. Mī ano tsaoxò mī ea pārāi a Moisés yoini keskara nikaimara ixò. Akka mīroko a Moisés yoini keskara nikakaspakì, mī ea ato apasmana,” ixò Pablo yoiaino, ⁴ a anoxò òiaifāfe Pablo iskafanifo: “¿Afeskakì a ato Nios kīfixomis xanifo mī chakafakì mekafaimē?” faifono, ⁵ Pablo ato yoini: “Efe yora mīshtichi, ē tāpiama nato ato Nios kīfixomis xanifofiano. Akka kirika ano kenekì iskafanifo: ‘Māto xanifo chakafakì mekafayamakāfe,’ ixò yoinifo,” ixò Pablo ato yoini.

⁶ Nāskaxò mā tāpixò ano fisti ichanāfono saduceofoya fariseofo fāsikòì Pablo ato yoini: “Efe yora mīshtichi, èri fariseo, èfe kaifofori fariseofo. Akka ea chakafakì mekafakani, yora naax anā ototirora ixò ē chanīmara faino.”

⁷ Pablo ato yoikì askafaito nikakani, fariseofo fe saduceofo āa ranā feratenānifo. Nāskakanax ichanākanax paxkanānifo. ⁸ Akka saduceofāfe yoinifo: “Naax nò anā ototiroma,” famisfo. Askatari anokai ājirima anorikai nòko yōshima famisfo. Akka fariseofāfe keyokòì chanīmara famisfo. ⁹ Nāskakanax fāsikòì mekainifōfānifo, akka nāno ranāri inifo a Moisés yoikì kirika kenenì keskara ato tāpimamisfo. Nāfo fariseofo inifo, nāfāfe niinifōfākaxò yoinifo iskafakakì: “Na feronāfakakai afaa chakafama. Òitsai, yōshi sharapa yoiyamāki Niospa ājirinì yoia rakikīa,” ixò yoinifo.

¹⁰ Ato askafaino fāsikòì mekai xatenifoma. Nāskakaxò Pablo achikaxò nini nini akanaifono nā soraro xanifo ratekòini. Nāskakē āfe soraroch kenamani, ato anoa ifixò anā āfe pexe ano iyoikaxiki.

¹¹ Nā fakishi Pabloki nòko Ifo nokoxò iskafakì yoini: “Pablo, inimafe. Na Jerusalén anoafò eōnoa mī ato yoisim keskafakì na Roma anoafori ato yoife,” fani.

Pablo retexikakì itipinīsharanifo

¹² Nāskata pena fetsa ranāri judeofo yoinānifo Pablo retexikakì. “Nò Pablo retexoma nò foni tenekì taefanò, afaa piamata afaari nò ayaimakai, noko Niospa retetiroki. Akka mā Pablo retexò chipo nò pixikai,” ikanax yoinānifo.

¹³ Cuarenta feronāfakafe anori yoinānifo. ¹⁴ Nāskakata nā feronāfakafe fonifo a ato Nios kīfixomisfāfe āto xanifofo fe a judeofāfe āto xanifofo ikafo ano. Iskafakì ato yoifokani: “Nò yoia iskafakì: ‘Pablo reteyoxoma, nò foni teneyoi nò afaa piyamata afaari nò ayaima. Nò askayamaino Epa Niospa noko retetiro,’ ixò nò yoia,” fanifo. ¹⁵ “Akka iskaratīa mā na xanifo fetsafo feta, na soraro xanifo yoikāfe mato ano penama Pablo efenò. Feparaxò yoikì iskafakāfe: ‘Nò Pablo yōkasharapaikai noko nīchixōfe nò yōkanò afaa aōnoa yoiafomāki,’ ixò yoikāfe. Oaito òikì nò achixò reterisafanò,” fanifo.

¹⁶ Nāskaifono Pablo āfe piaka nikani nò Pablo retenò ikaifono. Nāskax sorarofò mēra kani anoa āfe koka Pablo yoikai. ¹⁷ Mā Pablo nikaxò, soraro xanifo fetsa kenaxò yoini iskafakì: “Na naetapa xanifokòì ano iyotāfe, afara yoipai kiki,” fani.

¹⁸ Nā soraro xanifāfe āfe xanifokòì kenaxò yoini iskafakì: “Na karaxa mēra ikato Pablo ea kenaxò ea yoia na naetapa ē mikiki efenò afara mia yoipai kiki,” faito, ¹⁹ nā xanifokòichi nā naetapa mētsofaixò a fisti iyoxò

orixō yōkani: “¿Afaa mī ea yoipaimē? Ea yoife,” faito, ²⁰ nā naetāpa yoini iskafakī: “Mā judeofo yoināfo, mia yoixikakī mī penama a xanīfofo ichanāfo ano mī ato Pablo iyoxonō. Mia feparapaikani nō Pablo yōkasharapai aōnoa nō nikasharapai mia fai fevani. ²¹ Akka mia askafaifono ato nikayamafe. Cuarenta feronāfakefo fai nēxpakīa kexekaxō ēfe koka manafoki achikaxō retexikakī. Nō Pablo retexii nō fonī tenekī taefanō afaa piyamata afaari nō ayaimakai. Nō askayamaito Epa Niospa noko retetirokī. Akka mā Pablo retexō chipo nō pikai ikax yoināfo, mā itipinīkōikaxō mia manafō mī ato afafaimākai,” ixō nā naetāpa yoini.

²² Askafaito nikakī a soraro xanīfāfe nā naetapa nīchini, “Na ea mīa yoiaia anori tsoa yoiyamafe,” fayanā.

Pablo xanīfo Félix ano nīchinifo

²³ Nāskaxō a soraro xanīfokōichi afe xanīfo rafe kenaxō ato yoini dos cientos sorarofō yoixō nīchinōfo, askatari setenta kamayonō fotanōfo, askatari dos cientos sorarofō ashifoya fotanōfo Cesarea ari fōkani fakishi. ²⁴ Nāskata kamayori ato itipinīfamani a kamaki Pablo tsooax kanō. Nāskaxō ato yoini kexesharata iyotanōfo xanīfo Félix ano. ²⁵ Nāskaxō kirika kenexō ato ināni a xanīfo Félix foxotanōfo iskafakī kenexō:

²⁶ Efe xanīfo Félix, ēkīa Claudio Lisias, ē mia kirika kenexō fomai mia yoisharayanā. ²⁷ Na feronāfake judeofāfe achixō retepaiyaifono, akka ē nikaita ēri romanōki ikaito, nāskaito nikakī ēfe sorarofō fe kaxō ē ifita.

²⁸ Afaa chakafaamakī ē tāpīpaikī, judeo xanīfofo ichanāfo ano ē iyoita.

²⁹ Anoxō ea yoiaifāfe ē nikaita, na Pablo a Moisés yoini keskara shināima ea faifāfe. Akka afaakai chakafama retepanāfāfe, askatari karaxa mēra ikimapanāfāfe. ³⁰ Akka mē tāpia judeofāfe ea feparapaiyaifāfe Pablo retepai kakī. Nāskakē ē mikiki nīchi. A Pablo chakafaiori nāfori ē mia ari nīchi, afaa Pablo chakafamākī mia yoinōfo. Nā tii ē mia yoi efe xanīfāfe, ixō kenei.

³¹ Āto xanīfāfe ato yoia keskafakī kexesharakōixō, fakishi Pablo iyonifo Antīpatris ano. ³² Askata pena fetsa sorarofō atiri nēteferakani āto pexe ano fenifo a tāe foaifo. Akka a kamayonō foaifo Pablo fe fonifo. ³³ Mā Cesarea ano nokokaxō xanīfo ano Pablo iyonifo, a āto xanīfāfe kirika kenexō manamana, nā xanīfo Félix inānifo. ³⁴ Mā a kirika kene anexō, nā xanīfāfe Pablo yōkani: “¿Mī fanīamē?” faito, “Ē Cilicia anoa,” Pablo faito nikakī, ³⁵ anā yoini iskafakī: “A mia mekafakī chakafaifo mā fēkaxō mīōnoa yoiaifāfe ē nikanō mia afaa fakanimākai ē ato manayonō,” ixō yoini. Nāskaxō sorarofō yoini Herodes xanīfo ika ano iyoxō Pablo kexesharakōinōfo.

24

Pablo xanīfo Félix yoini

¹ Mā cinco nia oxata nā ato Nios kīfixomis xanīfokōi, āfe ane Ananías, Cesarea ano oni. Judeofāfe āto xanīfo fetsafo fe feronāfake fetsari ato fe kani, āfe ane Tértulo, nāato ato yoixomis ini. Nāfo xanīfo ano fonifo, Pablo chakafakī mekafaxikakī. ² Mā nokoafono xanīfāfe Pablo ifitanōfo ato yoini. Mā efeafono nā Tértulo Pablo yōani. Iskafakī nā xanīfo Félix yoini: “Aicho xanīfo, mī noko ikinā nō isharakōiaki. Aicho mī tāpisharakōiaki nōko maitio anoafō mī ato yoisharakōimis noko chakafanōfoma. ³ Fanīmā mīshstixō mī askafaito nō nikamis. Nāskakē mī noko sharafamiskē nō mikiki inimasharakōimis. ⁴ Akka ē mia yoikī, ē mia chai samaratapaimakai. Nō mia yoiaito noko

pishta nikayofe. ⁵ Na feronāfake mā nō ōimis ato fekaxtefamis, fakima mīshtifo kafāsakī ato pārafōfāsafakī judeofāfe anoris shinānōfoma. Askatari āto xanīfo nazarenōfo ato mekamamis. ⁶ Askatari nōko Nios Kīfīti pexefā chakafakī mekafaito nikakī nō achita. ⁷ Akka nā sorarofāfe āto xanīfo Lisias nomakinoa kerexkai ifita. ⁸ Anoxō noko yoikī iskafaita: ‘Māri Cesarea ano fotakāfe afaa Pablo chakafamākī, a xanīfo yoixikakī.’ Nāskakē nō mia ano oa. Yōkaxō mī tāpitiro nā afara chakafakē aōnoa nō yoiāi keskara,” ixō yoiāifono, ⁹ judeofāferi ano fisti ichanākaxō, nānoriri yoinifo: “Chanīma,” fanifo.

¹⁰ Askafaiāfe nikakī xanīfāfe Pablo āfe mēkemā, “Mekafe,” faino, Pablo niinākafā yoini iskafakī: “Inimakōikai ē mia yoi ē afaa chakafamisma. Mē tāpia na mai anoafāfe mī āto xanīfokōi, mā mī xini ichapa aka xanīfokī. ¹¹ Akka mī ato yōkaxō mī tāpitiro ē oxa ichapama doce nia ē ika na Jerusalen ano ē oita anoxō Epa Nios Kīfixikī. ¹² Ē tsofe feratenāito ea ōimisfoma, Nios kīfīti pexefā mēraxori ē tsoa mekafamisma, ichanāti pexe mēraxori ē tsoa mekafamisma, askatari a pexe rasi mēranoax ē tsofe feratenāito ea tsōa ōimisma. ¹³ Na yorafokai āa kaxpa chanītirofoma, ē afaa chakafaitokai ea ōiafoma. ¹⁴ Akka ē mia yoitiro nōko xinīfāfe āto Nios ē shinākī ē kīfimis. Nōko Ifo noko yoipaoni keskafakī akka na yorafāfe āa chanīra ea famisfo. Akka a Moisés yoikī kirika kenenī nāri ē chanīmara fakōimis. A Niospa ato shināmanaino yoipaonifori, nāfori ē chanīmara fakōimis. ¹⁵ Akka na ea yōaifāfe a yora sharafoya yora chakafo nafono Niospa ato otofaxii chanīmara famisfo keskafakī ēri nā akaifo keskafakī chanīmara famis. ¹⁶ Nāskakē mēxotaima ē isharapaikōimis, shināsharakōita. Niospa mā ea ōimis, yorafāferi mā ea ōimisfo.

¹⁷ “Mai fetsa ari kafāsakī mē xini ichapa akatsaxakī, ēfe mai ano ē oita a afaamaisfo ato kori ināyoi, askatari a Nios Kīfīti pexefā mēraxō Nios afara ināxiki. ¹⁸ Epa Niospa noko yoini keskarakōi ē faa. A nō imis keskai nē askakōikī Epa Niospa ferotaifi afaa chakafatama ē isharakōia. Akka yora ichapa ano efe ikafoma. Askatari anoax tsoa fāsi mekaitama. Akka atiri judeofo Asia mai anoax fenixakakī ea ōiafo. ¹⁹ Nāfāfe ē afara chakafaito ea ōifikaxō ōafeskai afo feafomamamē, nonoxō ea yōaxikakī a ē afara chakafaito ōiafo keskara? ²⁰ Akka afo feyamaifono, nā nonoafō mī ato yōkatiro ē afaa chakafaito ea ōiafomākī judeofāfe āto xanīfofōfāfe ferotaifi. ²¹ Akka ē anoxō fāsikōi mekainākafā ē ato yoita iskafakī: ‘Yora naax anā ototiro,’ ixō ē chanīmara faito, mā ea chakafakī mekafai ixō ē ato yoita,” Pablo xanīfo fani.

²² Akka na Félixpa Jesúsnoa tāpia ini. Nāskaxō shināni iskafakī yoiyanā: “Mā soraro xanīfo Lisias oxō ea yoisharaiyonō ē tāpisharanō mī afaa chakafaamākī,” ixō yoini.

²³ Nāskaxō xanīfo Félixpa soraro xanīfo fetsa yoini anā Pablo karaxa mēra ikimayonō a āfe yorafāfe pimapaikakī ōipaiyāifāferi ato ikimanō.

²⁴ Mā oxa ranāta xanīfo Félix anā oni āfe āfi Drusila fe. Nā āfe āfi judeo kēro ini. Nāskaxō Félixpa anā Pablo kenamani. Mā oxō Pablo ato yoiāito nikanifo Jesús meka shara afeskaxō nō Jesucristo Ifofatiromākī. ²⁵ Akka Pablo yoini afeskax nō isharatiromākī, askatari afeskax nōa nō kexemesharatiromākī. Jesús Ifofaxma naax omiskōipakenakafo ixō yoiāito nikai Félix ratekōini. Nāskaxō yoini iskafakī: “Iskaratīa katāfe ē mia anā kenaxikakī afaa afeska fayamakī,” ixō yoini.

²⁶ Pablo askafaito nikakī Félixpa shināni ea Pablo kori ināno ē kāimatiro ixō. Nāskakī mēxotaima kenapaoni afe mekaxiki. ²⁷ Nāskakī anoxō xinia rafe anifo. Nāskatari Félix tsekeni anā xanīfo inima, fetsa ini xanīfoi, āfe ane

Porcio Festo. Akka Félixpa karaxa mēranoa Pablo kāimanima, judeofāfe aōnoa yoisharakōinōfo.

25

Festopa ferotaiſi Pablo yoini

¹ Festo nokoni xaniſo ixiki. Mā tres nia ikax Cesarea anoax Jerusalén ari kani. ² Nārixō a ato Nios yoixomisfāfe āto xaniſofofāfe a judeo xaniſo feta Pablo chakafakī mekafanifo. ³ Nāskaxō Festo yōkanifo Festopa ato yoinō Jerusalén ano Pablo iyotanōfo. Akka atiito shinānifo fai nēxpakīaxō nō Pablo retenōra ikaxō. ⁴ Askafaifāfe nikakī akka Festopa ato kemani iskafakī: “Pablo Cesarea ano karaxa mēra ika. Akka ari mē samama kai,” ato fani. ⁵ Nāskaxō ato yoini iskafakī: “Nāskakē māto xaniſo Cesarea ano efe fotirofo, na Pablo afaa chakafaamakī arixō yoixikakī.”

⁶ Festo Jerusalén ano oxa ranāyoni. Nāskata Cesarea ano anā oni. Nānoxō pena fetsa a xaniſo tsaomisfo anoax tsoaxō ato yoini Pablo ifitanōfo. ⁷ Mā Pablo oano ōikakī, judeofāfe Jerusalén anoax fēkaxō, akiki fokaxō mekafakī chakakōi fanifo. Askafaifono, “Afaa Pablo chakafamāki ea yoikapo,” xaniſāfe ato faito, tsoa afaa inima Pablokairoko afaa chakafaito ōikanax āamāi noikaspakakī. ⁸ Askafaifāfe nikakī Pablo ato kemani iskafakī: “Ēkai afaa chakafama, a Moisés judeofo yoini keskarari ē chakafamisma, a anoaxō Nios kīfiti pexefāri ē chakafamisma, askatari romanō xaniſori ē chakafakī mekafamisma.”

⁹ Askafaito nikakī judeofāfe nōko xaniſo Festo sharakōira fanōfo Pablo yōkani iskafakī: “¿Mī Jerusalén ano kapaimē? Anoxō ē ōikanō mī afaa afeska famāki.”

¹⁰ Askafaito nikakī Pablo kemani: “Ē ari katiroma mīrimāi romanōfāfe xaniſokē nonoxō ea yōkatirofo. Mā mī tāpia, ē judeofo chakafamisma. ¹¹ Akka ē afara chakakōifaito ea ōikaxō ea retetirofo. Ea retekanira ikax ē meseima. Akka ē afaa chakafayamaito āa ea pārakaxō ea ari nīchitirofoma ea retenōfo. Akka ē xaniſo finakōia César ano ē kapai anoaxō ea yōkanō.”

¹² Askafaito nikakī Festopa a afe rafeafo feta yoini: “Mā mī yoiaki xaniſo finakōi ari katāfe arixō mia xaniſāfe yōkanō,” fani.

Xaniſo Agripa ano Pablo iyonifo

¹³ Mā ano ikatsaxakī pena fetsa xaniſo Agripa āfe chiko Berenice fe Cesarea ano fonifo Festo fe mekasharai fokani. ¹⁴ Nāri oxa ranāifono, Festopa Pabloōnoa xaniſokōi iskafakī yoini: “Na karaxa mēra feronāfake fisti ika Félixpa ikimayameano. ¹⁵ Ē Jerusalén ano ikano a Nios ato kīfixomisfāfe āto xaniſo fe judeofāfe āto xaniſo ekeki fēkaxō Pablo chakafakī mekafaitafo iskafakī ea yoivanā na feronāfake omiskōimafe ea faitafo.

¹⁶ “Ea askafaifono ē ato yoikī iskafaita: ‘Nō romanōfāfe askara feyafamisma nikasharaxoma nō tsōa retetiroma. A chakafakī mekafaifo fe ato fe yoināmano, afeskakī aōnoa yoikī chakafakī mekafakanimākai.’ ¹⁷ Nāskakē mā nono Cesarea ano feafono, pena fetsa mē xaniſoxō a xaniſo tsaomisfo ano tsoaxō, ē ato manamayamea Pablo ifitanōfo. ¹⁸ Akka afaa chakafaamakī ea yoikapo ē ato fafiaino, tsōa aōnoa afaa chaka ea yoima. Afara chakafakī finakē ea yoikanira ixō ē shināfiaino. ¹⁹ Akka aōnoa yoikī iskafaifāfe ē nikaita: ‘Na Pablo Niosnoa yoimisfo anori yoima, a feronāfake Jesús mā nafianino, mā anā otoyamea,’ ixō yoimisfaifāfe ē nikaita. ²⁰ Ē afeskaimē na yoiifoōnoakai

ē tāpiama ixō ē shināita. Nāskaxō ē Pablo yōkaita, Jerusalén ano kapaimākai xanifāfe anoxō yōkanō a aōnoa yoiiaifo keskara.

²¹ “Ē askafaito ea Pablo yoikī iskafaita: ‘Ē anā Jerusalén ano kapaima. Nonoxō ēfe xanifokōichi ea yōkatiro,’ ixō ea yoita. Ea askafaito ē ato yoita anā Pablo karaxa mēra ikīmanōfo, nā ē nīchiatiā,” ixō Festopa yoiaito, ²² Agripa yoikī iskafani: “Ēri na feronāfakē nikasharapaikōi,” ixō Agripa yoiaito, Festopa kemani iskafakī: “Mī penama nikitiro,” fani.

²³ Nāskata pena fetsa Agripa āfe chiko Berenice fe rapati sharakōi safekanax xanifāfe pexe mēra ikinifo. Soraro xanīfofo fe a pexe rasi anoa xanīfofori ato fe ikinifo. Nāskaifono Festopa Pablo ifitanōfo ato yoini. ²⁴ Mā Pablo efeafono Festopa xanīfo Agripa iskafakī yoini: “Efe xanīfo Agripa, a xanīfo fetsafori nofe ichanāfāfe na feronāfakēiā ōikapo. Judeofāfe ekeki efeafō aōnoa afara chaka yoianā. Jerusalén anoxō chakafamisfo, nono Cesarea anoxori chakafamisfo. Mēxotaima fāsikōi mekayanā retefe ea famisfo. ²⁵ Akka afaa chakafakai ē ōima ē retepanā. Akka iskaito ē nika: ‘Ē xanīfo yoipai ē afaa chakafamākī ea yoinō,’ ixō Pablo yoiaito ē nika. ²⁶ Akka afaa chakafaitokai ē ōiama, aōnoa yoikī ēfe xanīfo ē kirika kenexō ē fomapanā. Nāskakē mato ano ē Pablo efea mīmāi xanīfo finakōikē. Efe xanīfo Agripa, mī Pablo yōkaxō mī ea yoitiro nānori yoikī ē xanīfo kirika kenexō fomanō. ²⁷ Akka ē shinā askara sharama na feronāfakē xanīfo ari nō nīchitirota tāpixoma afaa aōnoa yoiiafomākī.”

26

Pablo xanīfo Agripa ano kaxō yoini a aōnoa chakafakī yoiiaifo keskara

¹ Nāskakē xanīfo Agripa Pablo yoini iskafakī: “Mī yoitiro afeskakī mia chakafakī mekafafomākī,” faito Pablo mēshainākafā ato yoini iskafakī: ² “Xanīfo Agripa, ē inimakōi mī ferotaifi yoi na judeofāfe eōnoa afara chaka yoiiaifo keskara yoi, na eōnoa yoiiaifo keskara mī chanīmara fanōma. ³ Akka mī xanīfokōi mā mī ōimis, nā judeofo imis keskaī nō yoināito. Nāskakē ē mia yoi, fekaxtekima mī ea nikayonō,” ixō Pablo yoini.

Pablo Jesús Ifofamax isharayopaonima

⁴⁻⁵ Anā Pablo ato yoini iskafakī: “Keyokōi judeofāfe tāpikōiafo a ē ato mēranoax imis keskara, ēfe mai anoxō tāpikāta, Jerusalén anoxori tāpiafo. Askatari mā tāpiafo, akka mia yoipaikakī mia yoitirofo, ēri fariseo. Nā nōko xinifāfe noko yoipaonifo keskara ē nikakōimis. ⁶ Epa Niospa nōko xinifo yoini keskafakī, a yora naax anā ototirora ixō ē chanīmara faito, ea chakafakakī mato ano ea efeafō. ⁷ Ēfe kaifo judeofāfe nā doce xoko fetsafāfe, nā Epa Niospa yoiyoni keskara ōipaikakī manamisfo. Nāskakē Epa Nios kīfimisfo, penata kīfita fakishi kīfikī famisfo. Nāskarifiakī ēri ōipaikī ē manaino, na judeofāfe āa ea pārakakī ea chakafakī mekafamisfo. ⁸ ?Afseskakī mā chanīmara faimamē, Niospa yora nakē otofatiatirono?” ixō Pablo ato yoini.

Pablo ato yoini a Jesús Ifofaafō ato omiskōimapaonixakī

⁹ Anā Pablo ato yoini iskafakī: “Ēa shināxō a Jesús Ifofaafō ē ato omiskōimapaoni. Nā Jesús Nazarete ano ikano, āfe ane nikakaspakī ē chakafapaoni. ¹⁰ Jerusalén anoxō ē ato askafapaoni. A Nios ato kīfixomisfāfe āto xanīfofōfāfe ea yoiafono a Nios Ifofaafō ichapakōifo ē ato karaxa mēra ikimapaoni. Ato reteaifonori nō ato retenō ē ato fapaoni. ¹¹ Mēxotaima ē

ato omiskōimapaoni, anā Jesús sharara fayamakāfe ixō. Nā ichanāti pexefo mēraxō ē ato askafapaoni. Ē atoki ōitifishkikī finakōikī pexe rasi fetsafo mēra kaxori ē ato omiskōimapaoni,” ixō Pablo ato yoini.

Pablo yoini afeskaxō Jesús Ifofamāki
(Hch. 9.1-19; 22.6-16)

¹² Anā Pablo ato yoini iskafakī: “Nāskakē achixō ē ato omiskōimapai pexe rasi Damasco ano ē kani, a Nios ato kīfixomisfāfe āto xanīfofōfāfe ea yoikaxō ea nīchiafono. ¹³ Xanīfo Damasco ari fāi kakī ē ōini xini keya nai mēraxō chaxatanaito oa xinī chaxa keskara inima, chaxakī finakōini. Ea kemataima chaxakōia ini, a efe fofaifori ato askafani. ¹⁴ Noko askafaino nō nāmā pakeni. Askata āfe meka ē nikani hebreo meka ea yoiaito iskafakī: ‘Saulo, Saulo, ¿afeskakī mī ea omiskōimanimē? Ea mīa iskafai, miakōi mī chakamei oa fakka ifiki chachixō pae meetiro keskai.’

¹⁵ “Ea askafaito nikakī ē kemakī iskafaita: ‘¿Ifo, mī tsoamē?’ ē faito, nōko Ifāfe ea kemakī iskafaita: ‘Ēkīa Jesús, ea mīa omiskōimamis. ¹⁶ Fininākakāfe ē mikiki nokoaki mī ea Ifofanō. Askatari na mī ōiai keskara mī ato yoinō, a ē mia chipo ōimanai keskarari. ¹⁷ Ē mia kexesharaxii judeofāfe mia retapaiyaifono, yora fetsafāferi mia askafaifono ē mia kexesharaxii. Nāskakē ato mēra ē mia nīchi. ¹⁸ Nāskakē ato mēra ē mia nīchi, eōnoa mī ato yoinō anā fakish mēra nia keskara inōfoma, askatamaroko penata nia keskara shara inōfo, Satanás chakata ato yoiaito anā nikayamanōfo, askatamaroko Nios Ifofanōfo. Nāskakaxō ea chanīmara fakaxō afara chakafakatsaxakakī āto chaka xatekanax Niospa yoini keskai efe Ipaxanōfo,’ ixō Jesús ea yoini,” ixō Pablo ato fani.

Jesucristo yoiaito namakē ōia keskarafaxō Pablo nikakōini

¹⁹ Anā Pablo ato yoini iskafakī: “Ēfe xanīfo Agripa, ē nikakaspanima a ē namakē ōia keskarafaxō nī mēraxō ea yoiaito. ²⁰ Damasco anoxō ē ato yoikī taefani Jesúsnoa meka shara ato yoikī. Nāskata Jerusalén anoafori ē ato yoini, Judea mai anoafori ē ato yoini. Askatari a judeofoma ē ato yoini iskafakī: ‘Māto chaka xatekāfe Nios Ifosharakōifaxikakī, askaxori afarafo shara fakī ato ōimakāfe mato chanīmara fanōfo mā Nios Ifofasharakē,’ ixō ē ato yoiaito, ²¹ judeofāfe ea achinifo Nios kīfiti pexefā mēraxō ea retepainifo. ²² Akka ea retapaiyaifono Epa Niospa ea kexesharani, iskaratīari ē isharakōia Niosnoa ato yoianā. A xanīfokōifoya a afamafori ē ato yoimīs. Afaa fetsa ē yoimīisma. A ato Niospa shināmanaino Moisés feta yoipaonifo anori fisti ē yoimīs. ²³ Iskafakī ato yoipaonifo, na Niospa nīchia Cristo omiskōiax naxii. Mā nafīax anā otoxii, mā otoxō ato yoisharax afeskax Epa Nios fe ipaxatirofomākī, judeofoya a judeofoma,” ixō Pablo ato yoini.

Pablo Agripa shināmapaini akairi Jesús Ifofanō

²⁴ Pablo yoikī askafafiaino, Festopa mekatimafani iskafakī yoini: “Pablo, mā mī fekaxtekōia mēxotaima kirika fisti anekī tāpikōiax,” fani.

²⁵ Askafaito nikakī Pablo kemani iskafakī: “Ēfe xanīfo Festo, ē fekaxtemisma. Askatamaroko na ē yoiai anori sharakōi, chanīmakōi ē mato yoi. ²⁶ Na ē mato yoiai anori nōko xanīfo Agripa mā tāpikōia a ē Jesúsnoa yoimīs anori. Nāskakē xafakīakōi āfe ferotaifi ē yoi, akka mē tāpia na ē yoiai anori nāatori mā tāpia. Nā ē yoiai anori ē nikamīisma mā itiroma onekai ē yoimīisma. ²⁷ Ēfe xanīfo Agripa, a Niospa ato shināmanaino yoipaonifo

keskara, ¿mī chanīmara faimē? Akka ē tāpia mī chanīmara fai,” ixō Pablo Agripa yoini.

²⁸ Askafaito nikaki Agripa kemani iskafakī: “Mā mī ea chanīmara famakerana Jesús Ifofafe,” ixō yoini.

²⁹ Askafaito anā Pablo yoini: “Iskaratīa iyamai afetiāra ea keskara mī inō ē fichipai, askatari nā mā ea nikaifo keyokōi ea keskara mā inō. Nōko Ifo Jesús Ifofai nāskafīax karaxa mēra mā ikiyamanō ē imis keskai. Nānori ē mato Epa Nios kīfixomis,” ixō Pablo ato yoini.

³⁰ Ato askafaito nikai xanīfokōi fininākfani, xanīfo fetsa fe, Bereniceri ato fe askani, a ano tsoaofori ato fe fininīfōfānifo. ³¹ Nāskakanax ori fokanax āa ranā yoinākani iskanifo: “Na feronāfākeakai afaa chakafama afeskakīkai retetirofoma, askatari afeskai karaxa mēra itiroma.”

³² Nāskaxō Agripa Festo yoini iskafakī: “Na feronāfake nō kāimakerana, ē xanīfo César ari kaimakai noko faino,” ixō Agripa Festo yoini.

27

Pablo Roma ari nīchinifo

¹ Nāskakē shināxaxō Italia ano noko nīchinifo. Pablo yafi a afe karaxa mēra imisfo soraro xanīfāfe āfe ane Julio ato kexenō. Nā sorarofa, “Xanīfo finakōia kexemisfo,” ato famisfo. ² Nānoax kanōanāfānē nō nanekaini. Nā kanōanāfā Adramitio fai fotoa anoax oaino mā itipinīkōiax Asia fai fotoa ano kaino. Aristarcori nofe ini, nā Aristarco Tesalónica ano ini, Macedonia mai ano. ³ Nānoax kaax pena fetsa Sidón fai fotoa ano nō nokoni. Nānoxō soraro xanīfāfe āfe ane Julio nāato Pablo noikōikī iskanifo: “Mefe yorafa xaxō ōitāfe afāfe nā mī fichipaiyai keskara mia inānōfo,” ixō yoini. ⁴ Nāskata Sidón anoax nō anā kanōanāfānē kaino, nēfefanē noko akaino nā fakafā nakirafe mai toomāfā āfe ane Chipre aōri nō kani, takai fetsaxomāi noko nēfefanē katimafaino. ⁵ Askata mā nō kakī Cilicia yafi Panfilia fakafā kesemēkōi nō finōfaini. Askata pexe rasi Mira ano nō nokoni. Nā pexe rasi Mira Licia mai ano ini.

⁶ Nānoxō a soraro xanīfāfe kanōanāfā fetsa fichini Alejandría anoax okē. Nā kanōanāfā Italia anoax kaino, nāo noko naneni aō nō kanō. ⁷ Fenāmāshta kai nō oxa ranākōini, nō kanōanāfā tōfei nō xokenākōini. Nāskax pexe rasi Gnido okiri nō nokoni. Anoxō nēfefānē noko anā akaino, pexe rasi Salmona okiri nō finōfaini. Nā Creta anoax fakafā nakirafe mai toomāfā okiri nō kayakeni.

⁸ Nāskata nēfefānē noko katimafaino nō samarakakōi nō fekaxtekōini. Nāskata nō nokoni pexe rasi āfe ane Buenos Puertos ano. Pexe rasi Lasea chaima ini.

⁹ Nāskai mā nō ano samarakōiano, mā mechakaino fakafā pooiki meseinaito ōikī anā katiroma meeki Pablo ato yoini ¹⁰ iskafakī: “Xanīfōfōfāfe, nō katiromaki mesekōi iki kiki mē tāpiaki. Na kanōanāfā yafi nōko afama mīshtifo nō fenotiro, askatari nōri nō āsai fetsetiroki,” ¹¹ ato faino akka tsōa Pablo nikanima. Akka na kanōanāfānē ifāfe yoini: “Maa. Nō meseima, nō āsaima. Nō kanō fokāfe,” ato fani. Ato askafaino nā sorarofāfe āto xanīfāfe nā kanōanāfānē ifo nikani. Nā rafeta Pablo nikanifoma. ¹² Akka nā fai fototai shara inima anoxō mechaka finōpaifiaifono nāskakē anoxō shinānifo: “Nō nonoax kanō Fenice ano,” ixō shinānifo. Nā pexe rasi Fenice Creta mai ano ini.

Nēfefanē fakafā anoxō ato ani

¹³ Nāskaxō shinānifo: “Anā nēfefaima kiki, fenāmāshta nefei kiki na nēfe nō kanō,” ikax yoinānifo. Nāskata nānoax mā nō kakī Creta ketokonōkōi

nō finōfaini. ¹⁴ Akka mā nō kaino chipo nokoki nēfefākerakī, fakafā pooiki kanōanāfā rafe rafe ani. ¹⁵ Noko askafaino fakafā ketokonō nō kapaifaino, noko katimafani. Nāskakē nā nēfefanē nā iyopaiyai ari noko iyonī. ¹⁶ Noko askafaino nā fakafā nakirafe mai tōo eapama āfe ane Cauda nō finōfaini. Nāno nō finōfainaino anā noko nēfe fāsi anima. Nāskakē a kanōa kafāshara chiroamea fāsi kerexkai kanōanāfā xaki mēra nanenifo. ¹⁷ Mā askafakaxō risfi eapato kanōanāfā nexasharakōinifo ato nēfe toōxayamanō. Nexakaxō āto sama poteti pekakaxō kanōanāfā mēra rātanifo, nēfe noko iyoyamanō nā mashi āfe ane Sirte ano ikaxō, “Nēfe noko fakirira iyoikanōra,” ikaxō. Nāskakaxō kanōanāfāki nexakaxō āto afeskarafakafānaki nōtanifo, nato nā noko iyopaiyai ari noko iyoikanōra ikaxō. ¹⁸ Akka pena fetisa anā nokoki nēfefani, nāskakē nā kanōanāfā mēranoa āto afama mīshtifo fakafā naki potaketsanifo. ¹⁹ Askakāta mā tres nia ikano nēfefā nishpayamaito ōi kakī āto risfifoya āto firofo, āto fitifo, āto samafo, fakafā naki potakī mitonifo. ²⁰ Nāskai nēfefā nishpayamaino xini yafi fishifo nō ōitiroma ini, nēfefanē noko ōitimafaino. Nāskatari anā afaa nō shinānima mā nō āsai fetseira ikax.

²¹ Nāskakī mā nō foni tenekī ranā faano, Pablo niinākafā noko yoini iskafakī: “Efe yora mīshtichi, nō afeskakeranama na Creta anoax fena foyamakāfe ē mato fafiaino mā ea nikaitama. Nōko afama mīshtifokai nō fenokeranama, mārikai omiskōikeranama. ²² Nāskakē rateyamakāfe. Mā āsaimakai. Kanōanāfā fisti fakafā mēra iki kiki. ²³ Na fakishi Niospa āfe ājiri ekeki nokoakī Niospa nīchiano, nā Niosfi ēfe Ifokōikī, nā ē yonoxomis. ²⁴ Ea iskafakī yoiakī: ‘Pablo, rateyamafe. Mī xanīfo César ano kaikai ato mia yōkanō mī afaa chakafamākī. Mīoxō Epa Niospa na kanōanāfā mēra mefe foaifo ato kexeshari kiki afeskakanima kiki,’ ixō ea yoiaki. ²⁵ Nāskakē ē mato yoiakai efe yora mīshtichi, ratekakima inimakāfe. Epa Niospa ea yoiaki keskara ē chanīmara fakōimiski. Mē tāpiaki tsoa āsaima kiki mā ea ājirinī yoiaki. ²⁶ Akka fakafā nēxpakīa mai toomāfā anoax nōko kanōanāfā tooxai kiki,” ixō Pablo ato yoini.

²⁷ Mā nō catorce nia finōta fakafā āfe ane Adriático ano nō nokoni. Nāskakē nānoxō nēfefanē nā noko iyopaiyai ari noko iyoikaino, nā fakish fistichi yamenake kafanaino a kanōanāfā mēra yonomisfo yoinānifo: “Mā nō mai ano nokoikaira,” ikanax. ²⁸ Nāskakaxō āto tanātinī faka noamākī ixō meenifo. Mā meekaxō ōiafo treinta y seis metros ini, askata afianā ori fokaxō meeafō veintisiete metros ini. ²⁹ Nāskakaxō mesekakī nō tokirinīfakī nokoi katirora ikaxō, cuatro faxō āto firopafāfo nexakaxō kanōanāfāki chenexti faxaxō fakafā naki potanifo, noko nēfefanē iyoyamanōra ikaxō. Nāskakaxō Epa Nios kīfinifo koshi penanōra ikaxō. ³⁰ Nāskaifono akka a kanōanāfā mēra yonomisfo onefaipainifo kanōanāfā mēranoax. Nāskakē a kanōanāfā mēranoa a kanōa kafāshara fotomapainifo. Nō firopafāfo nexaxō kanōanāfā renexte faxō nō fakanaki potaira ikaxō ato feparapainifo. ³¹ Nāskaifono Pablo soraro xanīfo yoini, āfe sorarofoya iskafakī: “Nafo kanōanāfā mēra nēteyamaifono tsōa mato anā iyoyamaino, mā āsai mitokomei,” ato faino, ³² sorarofāfe a aō kanōa fotomapaiyaifo risfi xatenifo a kanōa fakanaki pakeano fāka fōtanō.

³³ Nāskata mā penaino Pablo shināxō ato yoini afara pishta pinōfo. Iskafakī ato yoini: “Mā nō nomīko rafe akaki nēfefā nishpaira ixō, manayanā a mā pimis keskafakī mā afaa piamakī. ³⁴ Ē mato yoiakai pikāfe. Nō piax shara nō itiroki anā mato yora kerex inō. Nō afeskaimakai,” ixō ato yoini.

³⁵ Ato yoiakī askafata pāa tsomainīfōfā āto ferotaifi, Epa Nios kīfikī iskafani:

“Aicho Epa Niosi, mī noko kexesharaki,” fata ato pāa pikīni. ³⁶ Ato askafaino inimakōiyanā anā ratekakīma akairi pinifo. ³⁷ Akka nā kanōanāfā mēra docientos setenta y seis yorafo nō ini. ³⁸ Mā pii māyakōikāta ato trigofa fakafā naki potanifo, kanōanāfā xaka inō.

Kanōanāfā ikini

³⁹ Mā penaino a kanōanāfā mēra yonomisfāfe, mā mai fichifikaxō tsōa tāpinima. Akka a fakafā chitotanā anoa mashi fichikaxō, “Ono nōko kanōanāfā nō rītiaki kanō,” inifo. ⁴⁰ Nāskakata a aō kanōanāfā nexea āfe risfi xatekaxō nānoa ōifainifo. Nāskatari āto fitifo pekaketsanifo kanōanāfā mēstekōi iyoikanō. Nāskata afianā kanōanāfā rechokoki āto samapafā poteinīfōfānifo ato nēfe iyoikanō. Nāskax mā fōkakī mashi chaima fanifo. ⁴¹ Akka mā fofaifono kanōanāfānē mashi tsakax nāno rakani. Refokirixori mashi tsakakōia ini, pishta feroitroma. Nāskakē aō chipokirinoax toxai fetseni fāsikōi fāfakā poo ikaino.

⁴² Nāskaino sorarofāfe a karaxa mēra imisfo ato retepainifo, tsoa pishta ichoyamanō. “Keyokōi nō ato retenō,” ikax yoinānifo. ⁴³ Akka a sorarofāfe āto xanīfāfe Pablo retepaikīma, “Ato reteyamakāfe,” āfe sorarofa fani. Nāskaxō ato yoini iskafakī: “Fatoto mā faka feakī tāpiamākī faka feafaitakāfe mashi ano nokoxikakī. ⁴⁴ Akka a faka feakī tāpiafoma tii na kanōanāfā kaxkē aō nonoax fonōfo,” ixō soraro xanīfāfe ato yoini.

Nāskakē keyokōi āsaxma mashi ano nokonifo.

28

Pablo mai toomāfā āfe ane Malta ano ini

¹ Mā nō keyokōi fāfakā kesemē nokoxō, nō tāpini nā fāfakā nēxpakīa mai toomāfā āfe ane Maltakē. ² Nānoxō keyokōi noko ifisharakōinifo. Nānoax nokoki oi ikaino, matsikōi ini. Nāskakē anoxō chii ketefakaxō, “Yoofēkāfe,” noko fanifo. ³ Pablo nānoxō karoya shano ikōferani chii ketefakī. Mā chii ketefaino chii xanamei shano kākikerani oxō mifiki chachini. Mā mifiki chachiax aō neetani. ⁴ Pablo āfe mifi shano ronokē ōikani āa ranā iskaī fetsenifo: “A na feronāfāke ato retemis rakikīa. Fakafā anoax nokosharafiaino, mā Niospa shano chachimana nai rakikīa,” ikanax yoinānifo.

⁵ Akka Pablo metashkiri itakī shano chii nēxpakīa potani. Shanopa chachifano Pablo paemenima. ⁶ Nāskakē keyokōichi ōiketsanifo faraxinākafanax naira ikaxō. Akka faraxiyamaito ōikakī, iskafanifo: “Nakai retemisamisma, nafi nioski,” ikanax yoinānifo.

⁷ Anoxō shinā nā xanīfo Publio chaima ika ini. Nānori yorafo afe ikafo ini. Nā xanīfāfe āfe pexe anoxō noko ifisharakōixō noko pīchasharakōixoni, tres nia ano nō oxaino. ⁸ Nānoax Publio āfe apa isinī iki rakani, yonayanā chixoi. Nāskaino Pablo ōikai kaxō Epa Nios kīfixota āfe mīfi māmāsharani. ⁹ Pablo sharafaito nikakanax a isinī ikaifori nā ika anoax feafono Pablo ato sharafapani. ¹⁰ Ato askafaito ōi kakī anoxō afama mīshtifo noko ināketsanifo. Nāskata mā nō ato makinoax kai kanōanāfā mēra nō naneikainaino, anā afama mīshtifo noko inānifo a nō kakī pifoikai.

Pablo Roma ano nokoni

¹¹ Nāskata anoxō mā nō tres oxe akax, kanōanāfā mēra nō naneinākakāni. Nā kanōanāfānē nā mai anoxō mechaka finōmani. Nā kanōanāfā Alejandrīa anoa ini. Nā kanōanāfā recho koki afarafo tsoxō fonifo na nōko niosra ikaxō, fetsa āfe ane Castor ini, fetsari Pólux ini. ¹² Nāskax nō nokoni Siracusa

fai fotoa ano, nãno nō tres nia oxayoni. ¹³ Nãnoax kanōanāfānē nō anā kai fakafā ketokonō pishtakōi nō kaax Regio ano nō nokoni. Nãnoxō pena fetsa nēfēfānē noko ani a xini oaikirinoaxma oxō. Nāskakē nãnoax kaax pena fetsa nō nokoni Puteoli ano. ¹⁴ Nãnoa a Jesús Ifofaafō nō ato fichini nāfāfe noko yoikī iskafanifo: “Nono nofe oxa ranāyokāfe,” noko fanifo. Nāskata nãnoax ato makinoax kaax chipo Roma ano nō nokoni. ¹⁵ Mā nō kaino nō Roma ano nokoyoamano a Jesús Ifofamisfāfe Roma anoxō nikaketsanifo. Nāskakē nokoki nokoifekani fenifo. Atiri pexe rasi Foro de Apio anoax fenifo, atiri pexe rasi Tres Tabernas anoax nokoki nokonifo. Askaifāfe ōikī Pablo Epa Nios kīfikī iskafani: “Aicho Epa Niosi, mī yorafo ekeki nīchiaki,” fani inimakōiyānā. ¹⁶ Mā nō Roma ano nokoano, xanīfāfe ato yoini pexe fetsa mēra ares Pablo inō, anoxō soraro fistichi kexenō.

Roma ano Pablo ini

¹⁷ Mā nokoitaxakakī ano tres nia ixō, Pablo judeofo xanīfofo Roma anoa ato kenamani fenōfo. Mā fekanax ichanāfono Pablo ato yoini iskafakī: “Efe yora mīshtichi, ea nikakapo ē mato yoinō. Ēkai judeofo chakafakī mekafamisma. A nōko xinifo ipaonifo keskarari ē chakafakī mekafayamafiakē, ea achikaxō Jerusalén anoxō romanōfo ano ea nīchinifo. ¹⁸ Nãnoxō mā ea yōkakaxō, ea nīchipainifo, ēkairoko afaa chakafakē ea retexikakī. ¹⁹ Ea askafaifono, akka judeofāfe ea iskafayameafo: ‘A chaka kāmīyamāfe,’ ea faifono, ē xanīfofo yoini iskafakī: ‘Ē xanīfokōi César ano kapai ato ea yoinō, ē afaa chakafayamafiakē efe yorafāfe eōnoa yoiafo keskara,’ ixō ē ato yoini. ²⁰ Ē mato kenamana mato fe yoināxiki. Akka mā mā nikai ēfe kaifo israelifāfe, nā noko nimamis Niospa Fake nō manamis. Nāskakē mā mā ea ōi nonoxō ea metexkere akafono,” ixō Pablo ato yoiaito, ²¹ nikakakī iskafanifo:

“Judea anoxō mīōnoa tsōa noko kirika kenexō femama. Nofe yorafo judeofori ariax fēkaxō mīōnoa afaa chaka noko yoiafoma. ²² A mī yoiai keskara nō tāipai, akka mā nō nikamiski, a maniafo tii anoxō a Jesús Ifofamisfo chakafakī ato mekafamisfokī,” ixō ea yoinifo.

²³ Nāskakata, “Pena fetsa nō mefe ichanāfainakaki,” fanifo. Nāskakē yora ichapakōi a Pablo ika ano fenifo nikai fekani. Mā feafono Pablo ato yoikī yātafani, Nios xanīfoōnoa ato yoikī. Afeska faxoma Jesúsnoa ato nikama-paikōini, a Moisés kenenīōnoa ato yoita, a Niospa ato shināmanaino kenenīfoōnoari ato yoini. ²⁴ Pablo ato yoiaito ranārito nikanifo, akka ranāritori nikakaspanifo. ²⁵ Nāskakē āa ranā fochishpanā faatanānifo ares shinākanima. Nāskakata mā fopaiyafono Pablo ato yoini iskafakī: “Isaiās chanīmākōi ato yoipaoni Niospa shināmanaino. Nāōxō Niospa Yōshi Sharapa mātō xinifo yoini, iskafakī:

²⁶ Kaxō mī kaifo yoitāfe iskafakī: ‘Mā mā nikakōifikī mā nikasharaima; mā mā afara sharafo ōifikī mā ōisharaima.’ ²⁷ Mā na yorafāfe nikafikakī shināsharakanima, āto ōiti fēstokōi. Mā ōifikakī tāpipaikanima, na ē yoiai keskara chanīmākōi ōifikakī. Askatari nikakōiafoma ē ato chaka soaxopanā efe nīpaxanōfo,

ixō Niospa Yōshi Sharapa Isaiās yoini. ²⁸ Na ē mato yoiai keskara tāpikāfe, Epa Niospa noko nimapaiyai keskara mā nikayamaino a judeofoma ē ato yoi afāfe ea nikakōixikani,” ixō Pablo ato yoini.

²⁹ Pablo ato yoikī askafaino, judeofo mā fokani āa ranā feratenāfonifo.

³⁰ Anoxō Pablo xiniya rafe ani. A pexe ifo Pablo kori ināni a mēra ixiki. Nānoxō ato ifisharapaoni ōikai fofaifono ato yoisharayanā. ³¹ Nānoxō ranotamakōi ato yoini afeskaxō Epa Nios xanīfāfe noko īkitiromāki. Nōko Ifo Jesucristoōnoari ato yoiaito tsōa xatematiroma ini. Nā tii.

Pablo Roma Anoafo Kirika Kenexō Fomani

Pablo Jesús Ifofafo Roma anoafo kirika kenexō fomani

¹ Roma anoafāfe, ē mato kirika kenexō fomai. Ēkīa Pablo, ē Jesucristo yonoxomis. Niospa ea nīchini ē aōnoa yoimis inō, āfe meka shara Jesúsnoa yoinō.

² Niospa āfe Fake nokoōnoax naiyonōpokoai tāpixonō a Niospa meka yoimisfāfe meka kenenifo. Jesúsnoa meka shara yoinifo. ³ Niospa Fakeōnoa meka shara kenenifo a inōpokoai keskafakī. Jesús Niospa Fakekōifiax David āfe xini ini. Nā David nōko xinifāfe āto xanīfokōi ipaoni. ⁴ Niospa afama mīshti fatiroxakī nōko Ifo Jesucristo otofani. Otofaxonō ato ōimani nāmāi Niospa Fakekē. Niospa āfe shināmā āfe Yōshi Sharaōxō āfe Fake otofani. Ato ōimani Jesúsmāi āfe Fakekē. ⁵ Jesucristoxō noko noi. Noko noikī āfe shinā noko ināni. Nāskaxō noko nīchini Jesúsnoa yoimis nō inō. A judeofomari a xoko fetsafori afāferi Jesús chanīmara fanōfo nō yoiaino. Jesús chanīmara fakaxō nikasharakōinōfo. ⁶ Māri mā mā Jesucristo chanīmara faito mato nīchini mā afe yorafo inō.

⁷ Roma anoafāfe, ē mato kirika kenexō fomai. Niospa mato noixō mato ifini mato chaka soaxoxiki afe yorafo mā inō. Mato noikī mato shinā mēraxō mato shināsharamanō. Epa Nios feta nōko Ifo Jesucristo mato askafanō.

Pablo a Jesús chanīmara fafo Roma anoafo ato ōipaini

⁸ Ē mato yoinō. Nikakapo. Keyokōichi a maitio anoafāfe mato yoimisfo, mā Jesús chanīmara faito ōikakī. Nāskakē, “Aichora,” ē Nios famis. Jesucristoxō, “Aichora,” ē famis. ⁹ Ēfi Nios yonoxokōikai. Chanīmakōi ē yonoxonikai. Ē feparanima. Āfe Fakeōnoa ē meka shara yoimis. Pena tiifi ē mato Nios kīfioxōfāfāini. Niospa tāpia. ¹⁰ Ē mato ōisharapai. Nāskaxō ē Nios kīfifāfāini ē mato ano kapaikī. Akka ē kai, ē kayamai ē kaima. A Niospa ea nīchipaiyaino ē katiro. ¹¹ Ē mato ōisharapai. Ōikaxō ē mato Niospa meka yoipai. Niospa āfe Yōshi Sharaōxō ē mato yoipai mā chanīmara fakī finakōinō Jesús Ifo sharakōi faxiki. ¹² Nāskax Jesúsnoax nō inima faatanānō. Mā Jesús chanīmara faino ē inimatiro. Nāskarifiakī ē chanīmara faino mā inimatiro.

¹³ Efe yorafāfe, ē mato tāpimapai mā tāpinō afeskaxma ē matoki kapai ē katiroma mei, ē kamisma. Mē kāta katamis ifiakeranax afara fetsa aki ē kamisma, mato ari kapaifi. Mai fetsa aria ichanāmisfo judeofoma nāfo ē Jesús ato chanīmara fama. Nāskari fakī ē matori askari famapai. ¹⁴ Jesús ea yoia ē āfe meka keyokōi ato yoinō. Nā kirika kenekī tāpiafo ita a kirika kenekī tāpiamafori ē ato yoikai. Nafafoya a nafamafori ē ato yoitiro. Ē ato yoiaito nikakakī Jesús chanīmara fanōfo. ¹⁵ Nāskari fakī ē Jesúsnoa mato Roma anoari yoikapaimis.

¹⁶ Jesúsnoa meka shara yoipakai ē ranotiro. Āfe meka xafakīa shara. Noko Niosnoa tāpimatiro a tsōa atiroma keskara Niospa atiro. Nō chanīmara faito Jesucristoxō Niospa noko chaka soaxotiro nō afe ipaxanō, nō fenoyamaino. Taefakī judeofāfe nikakōinifo. Akka iskaratīari judeofomafāferi nikakani afe ipaxakakī. ¹⁷ Nā Jesúsnoa meka sharaōxō Niospa noko ōimatiro. Nō Jesús chanīmara faito Niospa nōko chaka noko soaxotiro. Nānori kenenifo

iskafakakī: “A Jesús chanīmara fakōinaifo Niospa āto chaka ato soaxō afaa chakafamisma keskara ato ōi. Nāskax shara ipanakafa Nios fe.”

Keyokōi yorafo chakamisfo

¹⁸ Niospa meka nikakaspaifāfe a chakafamisfo Niospa ato ōimani ato omiskōimakī. Niospa meka chanīmakōifiano nikakaspakata yora fetsafori ato Niospa meka chanīmara ato famakaspakani. ¹⁹ Nōko Nios afe keskaramākī tāpīpaikī nō tāpītiro. Akka Niospa noko ōimamis. ²⁰ Nō Nios ōiyamafixō nō tāpītiro Niospa keyokōi onifani, nāmāi Nioskōi ixō. Nā Niospa onifani ōikī nō tāpītiro tsoa fētsa keyokōi atiro. Nios fistichi atiro, afama mīshti. Nāskakē Nios nikakaspaifāfe Nios chanīmara fapaikanima, a onifani ōifikakī. Nāskakē Niospa ato omiskōimani nāfāfe Nios tāpīpaikanima. Akka tāpīpaikī tāpikeranafo. ²¹ A Niospa onifani ōifikakī iskafakī yoipaikanima: “Nios fistichi keyokōi onifani. Aicho, Nios finakōia,” ikaxō shināpaikanima. Nāskakaxō āto shinā mēraxō afara shināsharakanima. Afara chaka fisti shinākani āto ōiti fakish keskara ikaxō. ²² “Nōfi tāpikōiaki,” ifiakaxō tsōa shināsharaima. ²³ Niosfi sharakōikī shara enenakama. Nāfi isharapakenakakī. Isharakōifiaito Ifofapaikanima. Askata yorafo isharayamaino yora fetsafāfe afara yora keskara onifakaxō, “Na nōko Niosra,” ikaxō kīfimisfo Nioskōi kīfikaspakakī. Yoinā keskara onifakaxō, peya keskara onifakaxō, rono keskarari onifakaxō, nāskarafo onifakaxō, “Na nōko Niosra,” ikaxō kīfimisfo.

²⁴ Askafaifāfe ōikī Niospa anā ato Ifofamaima. Nā chakafapaiyaifo fisti akaifāfe ōikī Niospa ato xatemanima. Nāskax āa ranā fekaxte faatanākani. ²⁵ Nios fistifi chanīmismaki. Nā chanīyamafimiskē tsōa Ifofapaima nā fisti nōko Nios sharakōifiano. Niospa keyokōi onifafianino tsōakai Ifofapaima. Akka nā Niospa onifanifo, “Nā nōko niosra,” ikaxō kīfitaifamisfo. Tsōakai Nioskōi Ifofapaima, mēxotaima sharafinakōia ifamiskē. Nāskakē, “Epa Niosi, mī sharafinakōia,” ikaxō yoikani. Askapakexapainōfora.

²⁶ Askafaifāfe ōikī Niospa ato chaka xatexonama, afara chakafapaiyaifo fisti akaifāfe. Niospa noko onifani feronāfake yafi kēro, kēro feronāfake fe inō. Askafafianino kēro rafe fichināpaikani chaka ikani. ²⁷ Askatari feronāfake rafe fichināpaikanax chotanākani, kēro tanatama. Askax chaka ikanax omiskōikani.

²⁸ Nāskakakī chaka fisti shināpaikani. Anā Nios shināpaikanima. Askaifāfe ōikī Niospa ato potai nā apaiyai keskara fakī chaka fisti shinānōfo. ²⁹⁻³¹ Chaka fisti feyafakanax chaka shinākani. Chaka faatanāi xatekanima. Feronāfakefāfe āto āfima fichipaikī chotamisfo. Kērofāferi āto fenema fichipaikī chotamamisfo. Nāskaxō afara shara āa atonā fisti fipaikani. Fetsafo chakafakī xatekanima. Fetsafo xītipaimisfo. Yora retemitsamis ita, setemitsamis ita, feratenā faatanāmisfo. Ōitifishkikī feyafamisfo. Ato pārafofāsafamisfo. Ato noikaspamisfāfe fetsafonā fīpaikakī. Ato noikaspamisfo. Chanīmisfo fetsafo pāramisfo. Nios noikaspayanā tsoa noimisfoma. Īchamitsamisfo. Kakapaimisfo, āa kakamepaimisfo. Afara fetsa chaka shināi iskakani: “Afaa chaka fetsa ē afeska faimēti,” ixō shinākani. Āto apa yafi āto afa nikakaspakani. Afara shara shinākanima. A yoiāi keskara amisfoma. Āa chanīmisfo. Tsoa noikanima. Ōitifishkikax fetsaki raemisfoma. ³² “Askakanax nakanax omiskōipakenakafa,” ixō Niospa anori yoini. Niospa yoiāi keskara āto shinā mēraxō tāpīfikaxō afara chaka xatemisfoma. Askata fetsafāfe afara chakafaifāfe ōikani atoki inimamisfo.

2

Niospa mēstekōi noko ðixō yoitiro: “Nāto afaa chakafamisma. Akka natori chakafamis,” noko fatiro

¹ Ēfe kaifo judeofāfe, ē mato yoinō. Mā fatorafāfe yoi iskakī: “Na keskara yorafāfe afara chakafaifo omiskōipakenakafo,” ixō mā shināmis. Anori shināfikī māri ato keskarari afara chakafamis. Nāskata, “Nō afaa chakafamisma,” mā itiroma. ² Mā nō tāpia, Niospa ato tāpikōia a yorafāfe chaka shināifo. Nāskakē ato omiskōimaxii. Niospa tāpikōixō chanīmakōi yoi. ³ Mā, “Nato afara chakafara,” ixō māri mā aki. ĶNāskakī mā shināimē: “Niospa noko omiskōimani,” ixō? Akka nāskakē ē mato yoi. Niospa matori omiskōimani mā afara chakafaito. ⁴ Niospa mato noi. Mā chakafafaito mato omiskōimarisafaima. Mato noikikai mato omiskōimapaima. Nāskakē, “ĶNā ē ipaiyai keskara ē iki,” ixō mā shināimē? Askara shināyamakāfe. Niospa mato noikī mato shinā fetsafaxopai mātō chaka mā xatexō āfe meka mā nikasharakōinō. ⁵ Niospa mato shinā fetsafaxopafaito mā nikayospakōi. Mātō ōiti mā kerexfaxō mā Nios nikakaspai. Mākai mātō shinā mā fetsafapaima mātō chaka mā xatexiki. Mā askafaiaino iskaratīa Niospa mato omiskōimayoima. Akka mā mai keyoaino mato omiskōimaxii mākaikō mātō chaka xateano. Nā keyokōi yora chakafo ato omiskōimaniāfari nānori matori omiskōimaxii. Niospa mēstekōi noko ōi. Nāskakē nā yora chakafo ato omiskōimani. Nāskaxori nā yora chakafo ato omiskōimaxō noko ōimaxii. ⁶ Nā nō imis keskara Niospa tāpikōia. Nāskax nō naano keyokōi noko kopifaxii mā nōko mai keyoaino. ⁷ Yora fetsafāfe shara shināmisfo a Niospa ato amapaiyai keskara apaikī. Niospa ato inimamatiro. Askatari Nios fe ipaikani. Askara yorafo Nios fe ipanakafa. ⁸ Akka yora fetsafāfe nā apaiyai keskara shinākani. Niospa meka nikakaspakani. Chaka fisti shinākani. Askarafoki Nios atoki ōitifishkixō ato omiskōimani. ⁹ Nā chakafamisfo nāfo keyokōi omiskōixikani, judeofo, judeofomari omiskōixikani afara chakafakanax. ¹⁰ Nā Nios chanīmara faafo tii Niospa ato imasharaxii a keskara inōfo. Nāskaxō ato yoixii iskafakī: “Māfi sharaki. Mā ea nikasharakōia. Nāskax mā efe isharapakenaka,” Niospa ato faxii. Nānori judeofo yoixii. A judeofomari ato yoixii askafakī. ¹¹ Niospa ōia nāskarafos ōi yorafo, a judeofo ōita a judeofomari nāskarafos ōi.

¹² Akka a Moisés kirika keneni tāpiamato afara chakafaax omiskōipakenaka. Nios fe ipanakama. Askatari a Moisés kirika keneni tāpiato afara chakafaax nāri omiskōipakenaka. Nānori Moisés kenekī yoini: “A afara chakafamisfo omiskōipakenakafo,” ixō Moisés kirika keneni. ¹³ A Moisés kirika keneni keskara nikafikakī nikakaspai. Afokai Niospa shara ato ōima. Akka nā Moisés kirika keneni keskara nikakōiafo, “Sharafora,” Niospa ato faxii. ¹⁴ Moisés Niospa meka a judeofoma ato kirika kenexonima. Askafekē a Moisés keneni keskara judeofomafāfe tāpiamafikaxō āa tāpikōikaxō shara shinākani. Nāskakaxō a Moisés keneni tāpiafo keskara ikafo tāpiamafikanax. ¹⁵ Moisés keneni tāpiamafikaxō shināsharaifono fetsafāfe ato ōitirofo Moisés keneni keskara Niospa ato shinā mēra ato shināmana. Akka sharafakaxō shinākakī iskafatirofo: “Ē afaa chakafama,” ixō shinātirofo. Akka afara chakafaxō shinākani iskatirofo: “Oashta, ē afara chakafaa,” ixō shinātirofo. Nāskaxō anā afaa chakafapaikanima. ¹⁶ Niospa nōko ōiti mēraxō nō shināito noko tāpikōia. Jesucristori noko tāpia. Akka yorafāfe nōko ōiti mēraxō nō shināito noko tāpiafoma. Nāskakē mā nōko mai keyoaino Niospa noko yoikī

iskafaxii māmāi noko tāpīxō: “Nafo sharafo. Akka nafori chakafo,” noko faxii. Nāskara ē yorafo yoimis.

Moisés judeofo Niospa meka kenexoni

¹⁷ Ea nikakapo, efe yorafāfe. ¿Mā shinākī iskafatiromē? “Nōrifi nō judeofoki. Moisés keneni keskara mā nō tāpia. Nōfi Niospa afe yorafoki,” mā imis. ¹⁸ Moisés kenenioxō Niospa mato amapaiyai keskara mā tāpitiro. Askatari mā asharakōikī mā tāpitiro. ¹⁹ Akka mā shināmīs iskafakī: “A Moisés keneni tāpiafoma yora fēxo keskarafo. Nāskakē nō ato tāpimasharatiro āto ōiti xafa shara inōfo, anā fakish keskara inōfoma,” ixō mā shināi. ²⁰ “Nā afara shara tāpiafomā nō ato tāpimatiro,” mā iki. Nāskatari, “Nā rama tāpiafomā nō ato yoitirora,” ixō mā shināi. Mā shināi iskafakī: “Mā nō Moisés keneni tāpikōia. Nāskaxō nō ato yoitiro noko chanīmara fanōfo,” ixō mā shināi. ²¹ A Moisés keneni keskara mā ato yoifikī, ¿afeskakīri māri mā nikakōimamē? “Atoki yometsoyamakāfe,” mā ato fafiāi māri mā yometsoi. ²² “Māto āfima fe iyamakāfe,” mā ato fafiāi māri māto āfima fe mā chotanāmīs. Askatari yora fetsafāfe afara onifakaxō, “Na nōko niosra,” famisfo. Askafafiaifono mā ato yoimis: “Anā ano Nios fetsama. Nios fisti. Afara yora faxō, ‘Na nōko niosra,’ fayamakāfe,” mā askafamis. Mā ato askafafiai āto nios kīfiti pexefā mēranōax mā yometsoimis. ²³⁻²⁴ Māfi yoikī iskafamis: “A Moisés Niospa meka kirika keneni nō tāpikōia,” nā kakapaimisfo keskara mā imis. Askafaxiāōkai a Moisés keneni keskara mā akama. Mā askayamaito ōikakī judeofomafāfe yoikī iskafamisfo: “Niospa afe yorafo judeofo isharafo. Nāskakē Niosrikai sharama,” ixō yoimisfo. Askafakī matoōxō Nios chakafaifo. Nānori Niospa meka yōra kirika keneni.

²⁵ Moisés judeofo kirika kenexoni iskafakī: “Māto fake feronāfakefo foshki repa xatekāfe mato tāpinōfo mā judeofokē,” ixō Moisés kirika keneni. Māto fake foshki repa mā xatefixō nā Niospa mato yoini keskara mā nikayamaito Niospa mato ōi judeofoma keskara. Niospa yorafo mā itiro mā judeofiax. Nāskarari nā Epa Niospa noko yoini keskara mā ikaito Niospa mato ōi judeokōifo keskara. ²⁶ Judeofoyamafixō Niospa meka nikaifono Niospa judeofo keskara ato ōi afe yorafo keskara. ²⁷ Nā judeofoma foshki repa xateyamafikaxō a Moisés Niospa meka yoikī kirika keneni tāpiyamafikaxō nā Niospa yoini keskara chanīmara fakanax nāskarafofi sharafoki mato keskarama. Akka māfi judeofixō a Moisés kirika keneni tāpifixō mā nikakōima. Moisés mato Niospa meka yoikī kirika kenexofianino mā nikasharakōima. ²⁸ Māfi judeofo kāinikī. Nāskaxō mā foshki repa xatemis. Akka mā judeofixō a Niospa yoini keskara mā nikaima. Nāskax mā judeokōifo keskarama. Mā māto feyafatifixō māto chaka mā xatemisma. Nāskaxkai mā Niospa afe yora ikima. ²⁹ Moisés kirika kenekī yoini keskafakī judeofāfe āto fakefo foshki repa xatemisfo ato tāpinōfo judeokōifokē. Akka judeofo atirifāfe Nios shinākanima. Nāfofi judeomakōifo keskara. Nāfokai Niospa afe yorafoma. Akka judeofo atirifāfe Nios shinākani. Nāfofi judeokōifokī. Nāfofi Niospa afe yorafokī. Niospa Yōshi Sharapa noko ōiti fetsafaxōano Nios keskara shara ikafo. A Moisés kirika kenenito noko ōiti fetsafaxotiro. Niospa Yōshi Sharapa noko ōiti fetsafaxotiro. Akka yorafāfe, “Mīfi sharakī,” noko fayamafiaifono Niospa, “Mī sharakī,” noko fai.

3

1-2 ¿Nō judeofoxō nōko fakefo nō foshki repa xatemiskē sharamē? Ēje, shara itiro. Akka nōfi judeofo fake kāmiki. Moisés Niospa meka yoikī noko kirika kenexoni. Nāskakē nō inimai nō judeofo. Efe yora mīshtichi, shinākapo. Epa Niospa nā yorafo tii yoipaiyai keskara nōko kaifo taeyoi ato yoiyoni. Noko tāpimanai keskarari nō yora fetsafori nō ato tāpimanō āfe meka. ³ Akka nōko kaifāfe atirifāfe Niospa meka ifo shara fayamafiono akka Niospa a yoiai keskara amis. ⁴ Yorafo chanīmisfo. Akka Nios ramashara chanīmismo. Yorafāfe keyokōichi noko pārāfiaifono akka Niospa noko pārāmisma. Nā David Niospa meka yoikī kirika keneni iskafakī:

Niospa āfe meka mēstesharakōi yorafāfe ōinōfo. A shara shināifo Niospa ato sharafaxōi. Akka a chaka shināifo Niospa ato tāpimakī omiskōimaxii, ixō David yoikī kirika keneni.

⁵ Nios fistifi sharakōiki. Nōkai a keskarama. Nāskakē nō chakafaito yorafāfe ōikakī shinātirofo iskafakakī: “Nios iskarama, Niosfi sharakōikī. Na yorafāfe afara chakafakani. Akka Niospa afaa chakafamismo,” ixō shinātirofo. Nāskaxō Nios sharara fakani. Akka nāskaxō āa yora fētsa shinātiro iskakī: “Ē afara chakafaito ōikakī yorafāfe yoitirofo: ‘Akka Nios iskarama, Nios shara.’ Nāskakē ē chaka shināi yorafāfe Nios sharakōi ōinōfo ea keskarama. Nāskakē Niospa ea omiskōimatiroma ē chakafafaito,” ixō yora fētsa shara shināima. Nāskara shinākī yōra shināi keskara shināi, Niospa shināi keskara shināima. ⁶ Nios chakama. Nios mēstekōi ika. Akka mēstekōi iyamaxō yorafo yoikeranama iskafakī: “Nafō sharakōifoki. Ē ato sharafaxōi. Akka nafori chakafo. Ē ato omiskōimani,” ixō Niospa yoikeranama mēstekōi iyamaxō. ⁷ Yora fētsa āa shināi iskatiro: “Yorafāfe ea yoitirofo ē chanāito ōikakī. Iskafakakī ea yoitirofo: ‘Mī Nios keskarama. Nios chanīmismo. Nios mēstekōi ika,’ ixō ea yoitirofo. Akka ē chanāito ōikakī fetsafāfe, ‘Nios sharakōi, mia keskarama,’ ea faxikani. Nāskakē ē shinātiro iskafakī, Niospa ea yoitiro iskafakī: ‘Mī afara chakafafaito ē mia omiskōimaxima,’ ea Niospa fatiro,” ixō āa yōra anori shināi. Anori Niospa yoiyamafiano āa shināi askatiro. ⁸ Iskafakakī yoipaikani: “Nō afara chakafanōkāfe. Nō afara chakafaito ōikakī yorafāfe, ‘Nios sharara,’ fanōfo,” ixō yoipaikani. “Nā Pablori anori yoimiski nō afara chakafanō,” ixō yoikani. Āa chanīmisfo. Ēkai anori yoimismo. Epa Nios chanīmismo. Nā keskara yorafo ato omiskōimaxii.

Nō keyokōichi chakafamis

⁹ “Nō judeofo sharakōifo. Akka nā judeofoma sharafoma,” ē faima. Askatamaroko ē iskafakī yoimis: “Nōfi nā judeofoma ōitsa, nāskarafos nō. Nō keyokōichi afara chakafamis. Nāskakē Niospa ato yafi noko omiskōimaxii noko tāpimakī,” nānori ē yoimis. ¹⁰ Niospa meka yoikakī kirika kenenifo iskafakakī:

Tsoa pishtakai nā Niospa yoia keskara famismo. ¹¹ Tsoa pishtakai Nios shināpaikanima. Tsōakai Nios tāpipaisharakanima. ¹² Tsoa pishtakai anā Nios Ifofapaikanima. Afara chaka fisti fapaikani. Afara sharakai tāpiafoma. Tsōa pishtakai sharafamismo. Fato fistichikai shara Ifofaima. ¹³ Yora naax maiax fepekemeax pisi kāitiro. Nāskarifiakī nōko axfapa meka chaka fisti nō yoimis. Mā nō ato pārakī feyafamis. Nā rono paekapato noko chachiano nō paemetiro keskarari nōko meka chakaōnoax omiskōixikani. ¹⁴ Nō ato fekaxtefapaikī meka mitsisipato fisti nō mekamis. Nō ato īchari

famis. ¹⁵ Tsoa afayamafekē nō ato retepaimis. ¹⁶ Nōa kafāsakī nō ato omiskōimafofāsafamis. Nōa nō ato fekaxtefaafofāsafaki. ¹⁷ Yora fetsafokai nō ato raefapaimisma ato fe isharaxikima. ¹⁸ Nōko shinā mēranoaxkai Nioski nō rateima. Āfe meka nō nikapaima. Nōko chaka nō xatepaima, ixō nāskara yoikī kirika kenenifo.

¹⁹ Mā nō tāpia a Niospa yoia keskara Moisés noko kirika kenexoni. Akka tsōakai Niospa meka nikakōimisfoma. Nāskaxō tsōa yoitiroma iskakī: “Ēfi afaa chakafamismaki. Ē shara imis,” tsoa itiroma. Akka Niospa noko yoitiro iskafakī: “Māri afara chakafamiski,” keyokōi noko fatiro. ²⁰ Nāskakē Niospa meka a Moisés noko kenexoni nō nikapaifaito, Niospa noko yoikī iskafatiroma: “Mā shara imiski,” noko fatiroma. Akka tsōa āfe meka nikasharakōima. Āfe mekaoxō nō tāpitiro keyokōichi nō chakafamisfo.

Jesucristo chanīmara faax nō Nios fe ipaxatiro

²¹⁻²² Iskaratīa Niospa noko afara fetsa tāpimana. Noko xafakīa ōimana afeska faxō noko imasharatiromākī a keskara shara nō inō. Moisés kenenioxō noko shara imaima. Akka nō Jesucristo chanīmara fakē Niospa noko shara imatiro Jesūsmāi noko nāxonikē nōko chaka noko soaxoxiki. Nānori Niospa meka Moisés yoikī kirika keneni. Niospa meka yoimisfāferi nānoriri kenenifo. Nā keyokōichi Jesucristo chanīmara faifo Niospa ato shara imai. Judeofo, judeofomafori Niospa shara imatiro Jesús chanīmara faifāfe. ²³ Keyokōichi mā nō chakafamis. Tsoa Niospa keskarama. Nios sharakōi. Afaakai chakafamisoma. A keskarakai tsoama. ²⁴ Nāskakē Niospa noko noikī nōko chaka noko soaxotiro nō Jesucristo chanīmara faino. Akka Jesucristo nōko chakaōnoax noko nāxoni. Nāskaxō nōko chaka noko soaxoni. Nō afaa kopifatiroma Niospa noko shara imanō. ²⁵ Āfe Fake Jesucristo nīchini āfe imi foax nōōnoax nanō nōko chaka noko soaxoxiki. Nāskaxō Niospa noko omiskōimanima. Nō Jesús chanīmara faino Niospa nōko chaka noko soaxoni nō shara inō. Nāskaxō nō ōitiro Nios sharakōi. Jesús nayoamano chakafafiaifono Niospa teneyoni. Ato omiskōimayonima Niospamāi tāpixō āfe Fākemāi chipo ato nāxoxiaino Niosmāi mēstekōi ixō. ²⁶ Jesús nōko māi ano oax noko nāxoni. Nāskakē nō chanīmara faito Niospa nōko chaka noko soaxoni noko imasharai. Nāskaxō Niospa noko ōimasharai amāi mēstekōi ixō.

²⁷ Nāskaxō tsōa yoitiroma iskafakī: “Ēfi sharaki, fetsafo keskarama. Nāskax ē Nios fe ipanaka,” ixō tsōakai yoitiroma. Moisés kirika kenekī yoini keskara nikafixō tsōa anori yoitiroma. Jesucristo noko nāxoni nōko chaka noko soaxoxiki nō shināsharanō. Nāskakē nō Jesús chanīmara faino, “Jesús nōko chaka noko soaxoni nō afe ipaxanō,” ixō nō yoitiro. ²⁸ Nāskakē anā nō mato yoi. Jesucristo nō chanīmara fakēma a Moisés kirika keneni keskara nō ifofafiaito nōko chaka noko soaxonima. Akka nō Moisés meka nikaito Niospa, “Mī afara sharafamiski,” noko fatiroma. Akka nō Jesús chanīmara faito, “Mī Jesúsnoax isharakōimis,” noko fatiro.

²⁹ Nāskakēri, ¿Niospa judeofo fisti ato ifitiromē afe yora inōfo? Maa, judeofomafori ato ifitiro Jesús chanīmara faifono afe yora inōfo. ³⁰ Niosfi fistiki. Judeofori, judeofomafēferi Jesús chanīmara fakanax Nios fe nipanakafo ato chaka soaxonano. ³¹ ¿Nō Jesús chanīmara faxō a Moisés kirika keneni nō potatiromē? Maa, nō potatiroma. Jesús chanīmara faxō a Moisés Niospa meka yoikī kirika keneni nikakī nō chanīmara fatiro.

4

Abraham Nios chanĩmara fakõini keskara yorafãferi keyokõichi Nios chanĩmara fatirofo

¹ Akka nõko xini Abraham ipaoni keskara ã mato yoinõ. ² Abraham afara sharafaõxokai Niospa ãfe chaka soaxonima. Akka Nios chanĩmara faito Niospa ãfe chaka soaxoni. “Mĩ afara sharafaito nãskakẽ ã mia ifitiro mĩ efe yora inõ,” ixõ Niospa anori yoinima. Akka Niospa anori yoiano Abraham yoikerani: “Ë afara sharafaito ea Niospa chaka soaxona,” ixõ yoikerani ãa kakapaikĩ. Akka anori Niospa yoinima, nã Niospamãĩ mã ãfe chaka soaxonano chanĩmara faito. ³ Niospa meka yoikĩ Moisés kirika keneni iskafakĩ: “Abraham Nios chanĩmara faito Niospa ãfe chaka soaxoni. Nãskakẽ Niospa yoini iskafakĩ: ‘Mĩ afaa chakafamisma keskara ã mia õi,’ Niospa fani.” Nãskakẽ Moisés kirika keneni. ⁴ Akka feronãfãke yora fetsa yonomaxõ kori inãtiro, kaxpa inãtiro. ⁵ Akka nõ afara sharafaõxokai Niospa nõko chaka noko soaxonima, nõ afaa chakafamisma keskara noko õixiki. Askatamaroko nõ Jesús chanĩmara faito Niospa nõko chaka noko soaxotiro. ⁶ Nãskarari David yoini iskafakĩ: “Mã Nios chanĩmara faito oa afaa chakafamisma keskara Niospa mato õitiro a Moisés keneni keskara mã nikakõiyamafiaito. Nãskax mã inimatiro.” David anã yoini iskafakĩ:

⁷⁻⁸ Fatora yora Niospa ãfe chaka soaxonano inimatiro Niospamãĩ õiaino afaa chakafamisma keskara. Mã Niospa yora ãfe chaka soaxõ Niospa anã shinãchakaima a yõra afara chakafapaoniõnoa. Nãskax yora inimakõitiro Niospamãĩ mã ãfe chaka soaxonano, ixõ David yoini kirika kenekĩ.

⁹ ¿Nã judeofo fisti Niospa ãto chaka ato soaxotromẽ? Maa, anorima. Judeomafãferi Nios chanĩmara faifãfe ato chaka soaxotiro afori inimanõfo. Nãskakẽ Niospa meka yomisto kirika keneni iskafakĩ: “Abraham Nios chanĩmara faito Niospa sharakõĩ õini,” ixõ a Niospa meka yomisto kirika keneni. ¹⁰ Akka taeyoi Abraham foshki repa xateyoamano Niospa yoini iskafakĩ: “Mĩ ea chanĩmara fai nã mĩ afaa chakafamisma keskara ã mia õi,” Niospa fani. ¹¹ Nios chanĩmara faito Niospa Abraham ãfe chaka soaxoni afaa chakafamisma keskara õixiki. Nãskaxõ chipo Abraham foshki repa xatenifo fetsafãfe tãpinõfo Nios chanĩmara faino. Akka taeyoi Abraham Nios chanĩmara fani askayoxoma. Nãskaxõ chipo foshki repa xateni. Taefakĩ Abraham Nios chanĩmara fani Niospa fake ixiki. Nãskano a chipo Nios chanĩmara faifo Abraham ãfe fenafo. “Abraham nõko xini ipaoni,” fatirofo. Abraham keskara nõ foshki repa xateyamafixõ nõ Nios chanĩmara faito Niospa noko chaka soaxotiro afaa chakafamisma keskara noko õixiki. ¹² Abraham askayoxoma Nios chanĩmara fani. Nãskaxõ foshki repa xateni. Nã Abraham judeofãfe ãto xini ipaoni. Judeofo a Nios chanĩmara faafãfe nãfãfe ãto xinikõĩ Abraham nafãferimãĩ Nios chanĩmara fakanax.

Niospa noko yoiai keskara noko axõĩ

¹³ Niospa Abraham yoini: “Ë mia yafi mĩ fenafo keyokõĩ ã mato mai inãikai,” fani. A Moisés kirika keneni Abraham nikaito Niospa mai inãnima. Akka Nios chanĩmara faito Niospa mai inãni. Nãskaxõ Abraham Nios chanĩmara faito Niospa ãfe chaka soaxoni, afaa chakafamisma keskara shara õikĩ. ¹⁴ Fetsafãfe anorima shinãtirofo iskafakakĩ: “Nõ Moisés kirika keneni nikaito Niospa a yoiai keskara noko axotiro. Akka Jesús fisti nõ chanĩmara faito Niospa noko

axotiroma. Kaxpa nõ Jesús shināi,” ixõ anorima shinãtirofo. Akka nõroko Jesús chanĩmara faito Niospa yoia keskara noko axosharatiro Jesúsmaĩ nõko Ifoxõ. ¹⁵ Akka Niospa meka a Moisés yoini keskara nõ nikayamaito Niospa noko omiskõimatiro. Akka Niospa noko afaa yoyamanino nõ nikayospa ikeranama. Akka iskaratĩa nõ nikayospakõifo mã nõmã Moisés kirika keneni tãpiax.

¹⁶ Taeyoi Niospa Abraham yoyoni Nios chanĩmara faino. Nãskakẽ Niospa afama mĩshti axoni a yoyoni keskafakĩ. Niospa Abraham afaa yõkanima afama mĩshti axosharaxõ. Akka Abraham ãfe fenafori Niospa ato noikĩ nãskaxõ afama mĩstiri ato axosharai a yoyoni keskafakĩ. A Moisés yoini keskara nikakõiaito Niospa afama mĩshti axosharanima. Akka Nios chanĩmara faito Niospa axosharani. Nãskarari a Abraham keskarafo Nios chanĩmara faifori Niospa ato shara faxõ. Akka Abraham nõko xinikĩ nõmã Nios chanĩmara fai Abraham ipaoni keskara. ¹⁷ Niospa Abraham yoini keskafakĩ, yora fẽtsa kirika kenekĩ iskafani: “Nã yora ichapakõifo ãto apa keskarakõĩ mĩ inõ,” ixõ kirika keneni. Abraham Nios chanĩmara fani. Askaxõ Abraham nõko epa keskara Niospa õi. Niospa nã namisfori anã otofatiro. Nãskaxõ Niospa afama mĩshti onifatiro tsõa õimismafo. Nãskakẽ Abraham Nios chanĩmara fani.

¹⁸ Nãskax Abraham anifokõĩ ini anã fake atiomaxakĩ. Nios chanĩmara faito Niospa yoini: “Mĩ chipo fake fixii. Mĩ fenafori ichapa rasi kaixikani,” ixõ Epa Niospa yoini keskara Abraham chanĩmara fani. Nãskax, “Yorafãfe ãto xini mĩ iki,” Niospa fani. ¹⁹ Nãskax Abraham anifokõĩ ini. Cien xiniya aka. Sara ãfe ãfiri yõxafokõĩ ini. Anã yõxafoxõ fake fitiroma ini. Nãskafixõ Abraham Nios chanĩmara fani. “Ë anifokõĩ, ã anã fake fitiroma,” ixõ Abraham shinãnima. “Akka Niospa tsõa atiroma keskara fatiro,” ixõ Abraham shinãkĩ Nios chanĩmara fani. ²⁰ “Mĩ ãfi Sara fake nanexii,” ixõ Niospa yoini. Niospa nãskara yoiãito nikakĩ Abraham Nios chanĩmara fani. Niospa askafafiaino, “Ëfe ãfi yõxafokõia. Anã fake nanetiroma,” ixõ Abraham shinãnima. “Niospa ea yoia keskara ea axotiro. Aicho, Nios fãsi sharakõĩ,” fani. ²¹ Niospa axõai keskara fakĩ Nios chanĩmara faxõ Abraham afaa fetsakai shinãnima. ²² Nãskakẽ Niospa yoini: “Mĩ ea chanĩmara fai afaa chakafamisma keskara ã mia õi,” Niospa fani.

²³ Niospa Abraham askafaniõnoa yõra kirika keneni iskafakĩ: “Nios chanĩmara faifãfe afaa chakafamisfoma keskara Niospa ato õi,” ixõ Abrahamnoa fisti kirika kenenima. A Nios chanĩmara faifo Niospa ato õi afaa chakafamisfoma keskara mãmã ãto chaka soafono. ²⁴ Nokori askara kenexoni nõ Nios chanĩmara faito. “Nõko Ifo Jesús naafiakẽ Niospa otofani,” nõri chanĩmara fakẽ, afaa chakafamisma keskara Niospa noko õi. ²⁵ Nõko chakaõnoax Jesús nani nõko chaka noko soaxoxiki. Askata mã otofaano aõnoax afaa chakafamisma keskarafo nõ ixii.

5

Nõ Nios chanĩmara faito afaa chakafamisma keskara Niospa noko õi

¹ Nõko Ifo Jesucristo nõ chanĩmara fakẽ nõko chaka noko soaxonano aõnoax nõ Nios fe isharaapakexatiro. ² Nõ Jesús chanĩmara faito noko noikĩ Niosya noko rafemani. Nãskakẽ, “Ë Nios ikano kaax ã a keskara shara itiro,” ixõ nõ shinãi nõ akiki inimakõitiro. ³ Askatari Jesúsnoax omiskõĩ nõko shinã mẽra nõ inimakõitiro. Askax nõ a keskara nõ itiro. Omiskõifaiito Jesús ãfe

shināmā nōko shinā mēra noko mitsisfamaxotiro nō tenenō. ⁴ Akka Jesúsnoax omiskōikī nō tenei nō yora finakōia ipainākafatiro anā chaka shināyamaxiki. Nāskakē Nios nokoki inimai. Nokoki inimaino nō tāpia nō afe ipaxanō. ⁵ Nō askara shināi nō rāfitiroma Niospamāi a yoia keskara noko axōaino. Akka noko Niospa noikōikī āfe Yōshi Shara nōko shinā mēra noko nanexotiro.

⁶ Akka nōa nōko chaka nō soametiroma. Nāskakē Niospa āfe Fake nīchipaiyaitia nai mēraxō nāmā nīchini yora chakafoōnoax naaxinō. ⁷ Tsōakai yora fetsa nāxopaitiroma sharafiano. Ētsa, itiro rakikīa yora nai yora sharafōnoax. ⁸ Akka nō chakafokē Niospa āfe Fake nīchini noko nāxonō. Nāskakē nō tāpitiro Niospa noko noikōiai. ⁹ Askax nōōnoax naano āfe imi foni. Nō chanīmara fakē afaa chakafamisma keskara noko ōi noko chaka soaxō. Akka nō chakakē Jesús nōōnoax nani. Nāskakē iskaratīa mā nō chanīmara fakī finakōia. Anā nokoki Nios ōitifishkikī noko omiskōimaxima. ¹⁰ Askata nō Nios noikaspaino āfe Fāke noko nāxoni Nios fe nō rafenō. Nāskax nō iskaratīa Jesús afe yorafo nō afe rafekōia. Askaxō noko sharafakī finakōi. Jesús nakē Niospa anā otofani, nōri afe nīpaxanō. ¹¹ Akka nō Nios noikaspayoni. Iskaratīa mā nōko Ifo Jesucristoōxō noko raefaa nō afe isharakōia. Nāskakē Jesús Nioski noko inimamasharakōia.

Adāōxō yorafāfe keyokōichi chakafamisfo. Akka Cristo nōko chaka noko soaxotiro

¹² Niospa nā feronāfake Adán taefakī onifani. Nā Adán taefakī afara chakafani. Nāskakē aōxō afara chakafapafo. Nā Adán afara chakafaniōnoax keyokōi nō natiro nōmāi keyokōichi afara chakafaax. ¹³⁻¹⁴ Mā Adán afetiāma naniano Moisés Niospa meka yoinei kirika keneni afe keskara nō nīmākai. Akka Niospa Moisés yoioamano keyokōichi chakafayopaonifo. Nāskax mā nai keyonifo. Fetsafāfe chakafafiakaxō Moisés kirika keneni tāpipaonifoma. Askafafiaifāfe oa afaa chakafamisfoma keskara Niospa ato ōini tsōakairoko āfe meka tāpikē. Adán keskara foma. Adán Niospa meka tāpifiax nīkayospani. Nāskaxō Adán chakafakī taefani. Nāskarifiakī yorafāfe keyokōichi chakafamisfo. Akka nāskax mā nai keyokani, Adánmāi taeyoi nanikē. Nāskarifiāi Cristo oni yora chakafoōnoax naiyoi. Nāskakē yorafo aōnoax nīpaxatirofo.

¹⁵ Akka Jesucristo Adán keskarama. Adán Nios nikakaspax nani. Nāskakē nōri aōnoax natiro. Akka Jesúsxō Niospa yorafo noikōikī ato imasharapakenaka afaa chakafamisma keskaramāi ato ōikī. Akka nā Adán nai taeni afara chakafaax. Nāskax yorafo Adánnoax nāpanakafo. Akka Jesús Ifofakanax Jesús fistiōnoax keyokōi isharapakenakafo. Jesúsxō Niospa ato raefatiro a chanīmara faafo tii. ¹⁶ Adán afara chakafaniōnoax yorafo nai keyotirofo. Nāskatari āto chakaōnoaxri nai keyotirofo. Akka nō keyokōichi chakafakē Niospa noko omiskōimatiro. Nā Adán ani keskarakai Cristo afaa chakafamisma. Mā nō keyokōichi afara chakafamiskē Jesucristoōxō Niospa noko noikī nōko chaka noko soaxotiro afaa chakafamisma keskara noko ōikī. Omiskōitamaroko nō afe isharapakexanō. ¹⁷ Adán āfe chakafoōnoax keyokōi nakani. Akka Cristo fisti nokoōnoax nani nō aōnoax Nios fe nīpaxanō Niospamāi noko shara ōiaito. Jesucristoōxō Niospa noko noixō noko nīmapakenaka. Nāskakē noko askafaxōkī Jesús Adán finōkōia.

¹⁸ Nāskakē ē mato yoiai keskara nā feronāfake Adán āfe chakaōxō keyokōi Niospa noko omiskōimani. Akka Jesúskaī afaa chakafamisma. Nāskakē nā chanīmara faafo tii Nios fe nīpanakafo. Nāskakē nā afaa chakafamisma

keskara Niospa ato imai. ¹⁹ Akka nã feronãfake Adán Nios nikakaspakī taefani. Nãskax Adán nikayospakōi taeyoi ini. Keyokōichi aõxõ nõ chakafapamis. Akka nã Cristo fistichi ares Nios nikakōimis. Afaakai chakafamisma. Nãskakê nã chanĩmara faafo tii aõnoax afaa chakafamisma keskarafo ipanakafo.

²⁰ Moisés Niospa meka yoikī ato kirika kenexoni afara chakaõnoa tãpinõfo. Akka nã Moisés ato kenexoni mã õifikakī a Niospa ato yoia keskara tsõa nikakōikanima. Keyokōichi afara chakafamisfo. Mã chakafakī finafiafono Niospa ato noisharakōixõ ãfe Fake atoki nĩchini ato chaka soaxonõ. ²¹ Afara chaka fisti shinākani namisfo. Akka Niospa noko noikõia. Nãskakê ãfe Fake Jesús noko nãxoni nõko chaka noko soaxoxiki. Nãskakê nõ Jesús chanĩmara faito Niospa afaa chakafamisma keskara noko õi. Noko chaka soaxonano nõ afe ipanaka.

6

Cristo nia keskara nõri afe nĩpatiro

¹ Akka yorafãfe atirito shinākakī iskakani: “Nõ afara mēxotaima chakafafiaino Epa Niospa noko noikī nõko chaka noko soaxotiro. ¿Nãskakê nõ afara chakafa fafafaĩtiro,” ixõ anori shinākani sharamê? Maa, sharama. ² Nãskakê afara chaka shinãyamakãfe. Nõ Jesús chanĩmara faxõ mã nõko chaka nõ pota. A nõ ipaoni keskara nõ anã shinãpaima. ³⁻⁴ Mã mã tãpia noko maotisafani nõ fetsafo õimanõ. Nãskax nõ a Jesús fe naa keskara nõ chaka ipaoni keskara anã shinãima. Nãskakê nõko chaka soapaikī nõ Jesús chanĩmara faino noko maotisafani. Jesús nokoõnoax naano maifanifo. Nãskax nõ afe naa keskarax nõri maia keskara. Akka Jesús naax otoinãkafata Apa ari kani. Nõri nono mai anoax Jesúsnoax ari nõ katiro. Askaxõ Apa Niospa mã Jesús ofofaxõ nõko õimani nãatomãi afama mĩshti fatiroxakī. Nõko õiti nõko fetsafaano a nõ ipaoni keskara nõ anã itiroma, a keskara sharakōi nõ ipai.

⁵ Cristo nõkoõnoax nani. Nã nõ chanĩmara faax nõ afe rafetiro. Nãskakê Jesucristo nakê Apa Niospa ofofani keskafakīri anã ofofatiro, a keskara shara nõ inõ. ⁶ Jesús mastanifo nõko chaka noko soaxonõ. Nõri Jesús fe masta keskarakōi anã chakafapaima. Nãskarifiã nõ Jesús Ifofaax nõ afe naa keskara. Nãskaxõ nõ anã chaka shinãima. Afara chakafo nõko ifoma. ⁷ Akka yõra nãxokai anã chaka shinãtiroma. Nãskarifiã nõri chaka shinãtiroma afara chakakairoko nõko ifokê.

⁸ Nõ Cristo fe naa keskaraxõ nõ Jesús chanĩmara faax nõ afe isharapak-enaka nãmãi nõ chanĩmara faax. ⁹ Mã nõ tãpia Cristo mã nafiano Niospa ofofani. Nãskax anã natiroma. Anãkai afeskax Cristo natiroma. ¹⁰ Akka nai fistinixakī nõko chaka noko soaxoni anã afara chaka nõko ifo inõma. Nãskakê iskaratĩa Cristo mã nia. Nãskaxõ nõ Niospa apaiyai keskafai.

¹¹ Mãri Cristo fe naa keskara. Nãskakê iskaratĩa mã shinãtiro iskakī: “Ë chaka ipaoni keskara anã shinãpaima. Nãskax ã iskaratĩa Jesucristoõnoax Epa Nios fe rafe kakaini ea amapaiyai keskara axiki,” ixõ anori shinãkãfe. ¹² Nãskaxõ afara chaka anã ifofayamakãfe afara chaka mato famapai kiki a keskara mã anõma. ¹³ Nãskax Niosnoax isharakãfe. Afara chaka mato famapaifaito nikayamakãfe. Afara chakafamis iyamakãfe. Nios Ifofakãfe mato sharafanõ. Iskafakãfe: “Nios ãfe Ifokõixõ ea amapaia keskara ã aki sharafakī.” ¹⁴ Akka anã afara chakapa mato afeska fatiroma. Afara chaka anã mãto Ifo itiroma mã mã Cristo chanĩmara faano. Epa Niospa mato noikī

ares fisti mato ifitiro mā afe ĩpaxanō. Akka nā Moisés kirika keneniōnoaxkai mā Nios fe ipaxatiroma.

Epa Niospa mato amapaiyai keskara mā nikakōīyanā mā yonoxokōitiro

¹⁵ Moisés yoini keskara nō nikaito Epa Niospa noko nimasharaima. Akka Cristo nō chanīmara faito noko noikī noko nimasharatiro. Nā fisti nōko Ifo itiro noko chaka soaxonano. Nāskatari, ¿nō afara chakafa fafāfāitiromē Niospa noko noikī nōko chaka soaxonō? Maa, nō afaa chakafatiroma. ¹⁶ Mā tāpia āfe yonomatixō mātō ifo nikakōīyanā mā yonoxotiro. Nāskarifiakī mā katotiro fatomākī mātō Ifo. Epa Nios mā nikakōitiro āfe yonomati ixii, askayamai chaka mā katoax mā āfe yonomati mā itiro. Chaka katoax mā naax mā omiskōixii, mā Nios fe nipanakama. Askatamaroko Epa Nios nikakōīax mā afe isharapakenaka. ¹⁷ Mā afara chaka ifofaax āfe yonomati mā ipaoni. Akka iskaratīa mā mā Epa Nios Ifofaa. Mato yoimis keskara mātō shinā mēraxō mā nikakōīmis. ¡Aicho! Mā mā Epa Nios Ifofaano mato nimasharamis. ¹⁸ Nāskakēkai afara chaka anā mātō ifo itiroma anā mato yonomatiroma. Akka iskaratīa afara shara fisti mātō ifo itiro. Māfi āfe inakōīfoki. ¹⁹ Ē mato meka fekax yoima, mātō ifoōnoa ē mato yoinō mā tāpisharakōinō. Chaka fetsa fetsatapafo mātō ifo ipaoni. Nāskaxō mā afara chakafakī finakōīpaoni. Akka iskaratīa Epa Niospa āfe inafō, mā. Anā afara chakafayamakāfe afara shara fisti mātō ifo inō.

²⁰ Taeyoi afara chaka mātō ifo ipaoni. Nāskakē afara shara mā shināpaonima mātō ifo ipanā. ²¹ ¿Mā ipaoni keskara sharamē? ¿Mato imasharapaonimē? Maa, a nō ipaoni keskarakai anā afokai nō shināpaima. Afo nō shināi nō rāfitiro. Nā chakafo xateyamax nā nō naitīa nā omiskōīpakenakafo mēra nō katiro. ²² Nāskakē iskaratīa afara chaka anā mātō ifoma. Epa Nios mātō Ifo. Māfi āfe yonomatifoki. Mā āfe yonomatifokē mato sharafa fafāfāini a keskara shara mā inō mā afe ĩpaxanō. ²³ Nā afara chaka nōko ifono, ¿afanā noko kopifaimē? Akka aōnoax nō naax nō omiskōīpakenaka. Akka Jesucristo nō Ifofaino Epa Niospa noko afaa kopi yōkaima nō afe nīpaxanō.

7

Nō anā chaka ifofaxoma nō Cristo Ifofatiro

¹ Efe yorafāfe, mā mā tāpia nōko xanīfokōichi noko yoia keskara nō nikatiro. Nō niyoxō nō nikatiro. Akka mā nō naxō nō anā nikatiroma. ² Nāskarifiiai kēromā āfe fene niyoano enetiroma. Akka mā fene naano fetsa fe fianātiro ixō anori Moisés yoini Niospa meka. ³ Akka fene niyoanokai kēromā fene eneta fetsa fe fianātiroma. Askarafi chakakī. Chota feroma itiro. Akka fene naano kēro feronāfaka fetsa fe fianā askara shara, ixō Moisés keneni.

⁴ Akka mā fenē naxō anā āfe āfi yonomatiroma. Nāskarifiakī mā Cristo fe naa keskarax a Moisés kirika keneni anā mā nikatiroma. Akka mā Cristo fe naa keskarax mā yora fena sharakōi itiro Cristo mātō Ifono. Mā Cristo naax otoiñakafanax Nios fe ipanaka. Nāskaxō afara shara mato amatiro mā Nios yonoxonō. ⁵ Nō Cristo Ifofamatai afara chaka fetsa fetsatapafo nō ayopaoni. Moisés keneni keskara atama nō chaka fisti shināpaipaoni. Nā chakaōnoax nō naxii. ⁶ Cristo noko nāxonī nōko chaka noko soaxoxiki nō fena shara keskara inō. Nāskakē nō Cristo Ifofaax mā nō afe naa keskarakōi. Nō afe naa keskarax nō yora fena shara iki. Afara chaka anā nōko ifoma. Askatamaroko āfe Yōshi

Sharaõxõ Niospa noko amapaiyai keskara noko amatiro. A fisti nõ Ifofai, a Moisés keneni keskara ifofayopaonixaki anã nõ ifofatiroma.

Moisés kenenioxõ nõ tâpia nõ chakafamis

⁷ Iskafakî shinâyamakâfe. A Moisés noko kenexoni, chakara fayamakâfe. Akka Moisés Niospa yoini keskara keneyamanikêkai nõ chakafamis nõ tâpikeraanama. Moisés keneni iskafakî: “Yora fetsanã afara fiapaiyamakâfe. Nõ yora fetsanã fiapaikî nõ chakafai,” Moisés anori keneyamanikê nõ tâpikeraanama. ⁸ Moisés anori keneni tâpifixõ nõko õiti chakakõikê nõ shinãsharaima. Nõkonâyamafekê nõ fichipaimis. Afara chakafori nõ fichipai. Akka Moisés Niospa meka keneyamanikêkai nõ nikayospa ikeranama. ⁹ Niospa meka tâpixoma afara chakafafiakî nõ shinãma. Askata chipo nõ âfe meka tâpifixõ nõ akama a noko yoia keskara. Nãskafaxõ âfe mekaõxõ a nõ afara chakafamis nõ tâpitiro. ¹⁰ Niospa yoia keskara axax nõ nipaxatiro. Niospa yoiai keskara nõ akima mã tâpifiax, askax nõ omiskõi. “Moisés keneni keskara ayamax nõ natiro,” ixõ nõ shinãmis. ¹¹ “Epa Niospa noko yoia keskara nõ aki. Nãskai nõ Nios fe nipanaka,” ixõ nõ shinãfikî nõ afara chakafakî nõ xateama. Akka chakapa noko pârai. Nãskakê nõ tâpia nõko chakaõnoax nõ omiskõi nõ Nios fe nïpanakama.

¹² Moisés keneni keskara sharakõi nãmãi Niospa meka. Niospa meka mêtsekõi, chanĩmakõi. ¹³ A Moisés keneni sharafianokai a keneni keskara nõ nikasharamisma. Moisés kenenioxõ nõ tâpitiro nõ chakafamis. Moisés keneni õifikî, ¿afeskafaxõ nõko chaka nõ potatiromê? Nãskax nõ naax nõ omiskõipakenaka. ¿Moisés kenenioõnoax nõ omiskõipakenakamê? Maa, askarama. Akka nõ Nios nikakaspax nõ omiskõipakenaka. A Moisés keneni sharakõi, Niospa meka. Moisés kenenioõxõ nõ tâpia nõ nikayospakõi. Nõ Niospa meka nikakõimisma. Nãskax nõ chakakõi.

Nõakõi nõko chaka xatapaifikî nõko shinã mëraxõ nõ xatetiroma. Nõko shinã mërã chakakõi

¹⁴ A Moisés Niospa Yõshi Sharapa shinãmanaino noko kenexoni. Niospa meka nõ shinâyamai nõ sharama. Afara chakafi nõko ifokî nõ âfe yonomatî. ¹⁵ ¿Afeskai nõ iskamismê? Nõkai tâpiama. Nõ sharafapaiyai keskara nõ akima. Akka nõ akaspafiakî nõ aki. ¹⁶ Moisés keneni keskara nõ nikapai, “Nã meka shara,” shinãkî. Askara shinãfikî nõ akima. Nã afara chakafapaiyamafikî nõ aki. ¹⁷ Nõakai nõ afara chakafapaima. Akka nõko shinãmã nõ shinãkî nõ afara chakafamis. Afara sharafapaifikî nõ shinãsharaima, nõko shinã mërãmã chakakõikê. ¹⁸ Mã nõ tâpia nõko shinã mërã sharama. Isharapaifi nõ itiroma. ¹⁹ Akka a nõ akai keskara sharama. Nã sharafapaifikî nõ amisma. Nã afara chakafapaiyamafikî nãskara nõ amis. ²⁰ Nãskakî a nõ akaspai nõ aki. Nõakõi nõ afara chakafapaima. Nõ chaka potapaifikî nõ potatiroma nõko shinã mërãmã chakakõikê. ²¹ Akka nõ askamiski. Nõ sharafapaifaito nõko shinã mërãxõ afara chakapa noko fakirira shinãmapai nõ shara shinãnõma. Nõ keyokõi askamis.

²²⁻²³ Nõa nõ iskafai: “Aicho. Niospa noko yoiai keskara shara,” ixõ nõ shinãfi nõ nikayospamis afara chakapamãi noko fekaxtefaito. Niospa meka nõ tâpifiax nõ nikayospamis. Nõa nõ sharafapaiyai keskara nõ atiroma. Nõ chaka xatetiroma. ²⁴ Nãskakêkai ë inimaima. Ê shinãchakai. Êfi feronãfake chakakî. Ê inimaima. Êfe shinã mërãxõ ë afara chakafaax ë omiskõixii. Ooa. ¿Tsõã nõ Ifofatiromê nõko Ifokõi inõ, afara chaka anã nõko ifo inõma? ²⁵ Aicho Epa Nios. Êfe Ifokõi Jesucristoõxõ êfe chaka ë xatetiropi. Iskaratïa ë tâpia

Niospa meka nõ ifofapaifikĩ afeska faxõ nõa nõ atiroma nõko shinã mēramã chakakē. Akka Jesucristoõxõ nõ atiro.

8

Niospa Yõshi Sharaõnoax nõ ika

¹ Akka Jesucristo nõko Ifono nõ afe yora. Nãskakē Epa Niospa noko yoima iskafakĩ: “Mã chaka. Ë mato omiskõimanõ. Emakinoax fotakãfe omiskõipakenakafo mēra nãnoax mã omiskõipakenaka,” ixõ noko yoipakenakama mãmã nõko chaka noko soaxõ, ² Jesucristoõxõ Niospa ãfe Yõshi Sharapa noko nimasharai anã chaka nõko ifo inõma, nõ omiskõipakexanõma. ³ Moisés yoini keskara nõ tãpifiano aato noko imasharatiroma nõko chaka noko soaxotiro. Akka Epa Niospa shinãyoni ãfe Fake nai mēraxõ mai ano nĩchixiki ari noko keskara yora inõ. Noko keskarafioxokai nõ amis keskara afaa chakafamisma. Akka noko nãxonĩ anã afara chaka nõko ifo inõma. ⁴ Nãskata iskaratĩa nõ Niospa Yõshi Shara Ifofaax aõxõ Moisés yoini keskara nõ nikatiro. Nõ Niospa meka ifofasharakõitiro.

⁵ Akka nõ chaka xateyamano afara chakapa noko amapaiyai keskara fisti nõ atiro. Akka Niospa Yõshi Sharapa noko ikinãno nõ noko amapaiyai keskara fisti nõ atiro. ⁶ Nã apaiyaifo keskara fisti shinãkanax afo nakanax anã otokanax omiskõipakenakafo. Nios fe ipanakafoma. Akka Niospa Yõshi Shara ato mēra naneano nã apaiyai keskara Niospa Yõshi Sharaõxõ atirofo. Nãskax isharapakenakafo shinãsharakata. ⁷ Fetsafãfe Nios noikaspakani Niospa ato yoia keskara nikapaikanima. Æto shinã mēraxõ afara chaka fisti shinãkani. Nãskaxõ Niospa ato yoia keskara nikatirofoma. ⁸ Nã ãto shinãmã shinãifo keskara fisti shinãkakĩ Niospa ato amapaiyai keskara atirofoma. Afara chaka ifofaifono Nios atoki inimaima.

⁹ Akka mãkai askarama. Mãto shinã mēraxõ afara chakapa mato shinãmanima. Akka Niospa Yõshi Shara mato shinã mēra nanexõ mato shinãmasharamis. Akka Niospa Yõshi Shara mato shinã mēra naneyamaino mã Cristo fe rafetiroma. ¹⁰ Cristo mato fe rafefiaino afara chakaõnoax mato yora nai. Mãto yora nafiano mato fero mēsho naima Nios fe nipanaka Niospamã afaa chakafamisma keskara mato õiaino. ¹¹ Mã Jesús naano Niospa ofofani. Nãato ãfe Yõshi Shara mato shinã mēra nanea. Nãskarifiakĩ mato yora naano ãfe Yõshi Sharaõxõ Niospa anã mato ofofatiro mato yora fenasharakõĩ inõ.

¹² Efe yora mĩshtichi, Niospa Yõshi Shara nofe rafeaino Epa Niosnoa nõ shinãtiro noko amapaiyai keskara akĩ. A nõ afara chakafamiskai anã nõ shinãpaitiro noko Niospa amapaiyai keskara akĩ. ¹³ Akka a nõ apaiyaifo keskara fisti shinãx nõ omiskõipakenaka nai. Akka nãskafixõ Niospa Yõshi Sharaõxõ afara chakafakĩ nõ xatexõ anã chaka nõ shinãtiro. Nõ Epa Nios fe nisharapakenaka.

¹⁴ Niospa Yõshi Sharapa noko shinãmanaino nõ Niospa fakefo iki. ¹⁵ Æfe Yõshi Sharapa noko shinãmasharapai nõ anã mesenõma. Mã nõfi Niospa Yõshi Shara fiaki. Nã ãfe Yõshi Sharaõxõ ãfe fakefo noko ima. Aõxõ nõ yoitiro iskafakĩ: “Epa Nios, mĩ ãfe Epa,” ixõ nõ yoitiro. ¹⁶ Nõko shinã mēraxõ Niospa Yõshi Sharapa noko yoi iskafakĩ: “Mĩ Epa Niospa Fakekõĩ,” ixõ noko yoi. ¹⁷ Nõ Niospa fakekē nõ noko yoia keskara noko inãtiro. Nõfi nõ Niospa fakekē nõ ãfe Fake Cristo ani keskara nokori inãtiro. Nõõnoax omiskõifinixakĩ iskaratĩa nai mēranoax Apa Nios fe xanĩfokõĩ. Nãskarifiãĩ nõri

añoax omiskōiax nō nai mēra Epa Nios ano nokoano noko sharafinakōia imaxii nō afe isharpakexanō, a keskara shara nō inō. Akka afe yorafo Niospa ato sharafaxōi nāfomāi āfe fakefokē.

Niospa fakefo Jesús fe isharpakenakafo

¹⁸ Nō iskaratīa omiskōiyofiax nō chipo Jesús fe isharpakenaka. A keskara sharafinakōi noko imai. Tsōa ōimisma keskara sharafo noko ōimaxii. A nō omiskōipaoni anā nō shināima. ¹⁹ Epa Niospa āfe fakefo otofaxii a keskara sharakōi ato imaxii. Akka nā Niospa onifanifāfe manakani ōisharpaikōiakī afe keskarafō ato imaimākai. ²⁰⁻²¹ Niospa āfe fakefo sharakōi ato ōimaxii. Nāskatari a onifanifori sharakōi ixii. Anā afaa chaka ixi-ima. Afarafo anā payokomepakenakama. Akka iskaratīa nā Niospa onifanifo payokomepakenakafo askayamapaifaifono. Nāskaxō Niospa yoini: “Adán afara chakafañoax keyokōi payokomepakenaka.” Akka Niospa āfe fakekōifo akiki nokoafono ato yora fetsafaxoxii anā payokomenōfoma, afara chakafāfe ato fekaxtefanōma. Nāskarifiai Niospa onifanifori nā Niospa fakekōifo keskara shara ixii, anā payokomepakenakama.

²² Kēromā fake kākī pae meytiro. Mā kāixō anā pae metiroma. Nāskarifiai a Niospa onifanifo omiskōiyokani. Akka mā Niospa ato fetsafaano anā omiskōixikanima. ²³ Akka nō Niospa fakefo āfe Yōshi Shara nofe rafeaino nō tāpitiro nō Nios ikano kaax nō isharakōixii. Akka iskaratīa nō isinī iki fekaxtei. Nāskakē nō manasharai Epa Nios ika ano noko ifinō nō āfe fakefokē a keskara shara noko imanō. Nāskatari nōko yora fena sharakōi noko imai anā nō isinī inakama. Anākai nō nanakama. ²⁴⁻²⁵ Nāskara nō shināi nō akiki nokoaito noko fetsafaxii a keskara shara nō inō. Nāskax nō afe ipanaka. Chanīmara faxō inimayanā nō manasharatiro fena fenakima nā nō akiki nokoaitia. Akiki nokoxō nō anā manatiroma māmāi nō ōikī.

²⁶ Nāskarifiakī Epa Niospa āfe Yōshi Sharapa noko axosharafāfāini. Afesaxō nō Epa Nios Kīfisharatiromē nōkai tāpia. Akka āfe Yōshi Shara nō mēra nanexō noko shināmanaino nō Kīfisharatiro. Noko noikī noko kīfixoni. Noko kīfixonai keskarakai tsōarikai kīfitiroma. ²⁷ Āfe Yōshi Sharapa shināi keskara Epa Niospa tāpikōia. Keyokōi nōko shinā mērani nō shināi keskara tāpikōia. Epa Niospa noko amapaiyai keskara nānori āfe Yōshi Sharapa a chanīmara faafo tii ato kīfixomis.

Jesúsxō nō keyokōi finōkōitiro

²⁸ Akka nō tāpia Epa Niospa noko katoni a apaiyai keskara nō anō. Nō Epa Nios noiaino afarafāfe noko afeskarafaiaino afoxō Epa Niospa noko axosharai. ²⁹ Nō Jesús Ifofayoamano Epa Niospa tāpiyoni fatofomākī a chanīmara faifo. Akka chanīmara fayoafoamano shināni iskafakī: “Nafo ēfe Fake keskara ē ato imaxii,” ixō shināyoni. Niospa āfe Fake iyoa Jesús. Nāskaxri nōri āfe fake chipoko ixii. ³⁰ Tāpiyoni nō āfe fakefo ixinō. Askano nōko shinā mēraxō noko yoini: “Ēfe Fake chanīmara fakāfe,” noko fani. Fatora anori yoixō ato chaka soaxoni isharanōfo, afaa chakafamisma keskara ato ōixii, ato chaka soaxonano āfe Fake sharakōi keskara inōfo.

³¹ Noko askasharafaino nō fakiri yoitiromē? Epa Niospa noko sharafakōinaino afara chakafāfe noko chakafamatiroma. ³² Epa Niospa noko noikī āfe Fake Jesús timamanima noko naxonō. Nāskanixakī noko axosharatiro nā apaiyai keskara nō anō. ³³ Epa Niospa noko katoni nō afe yora inō. Nāskaxō nōko chaka noko soaxonano afara chakafamisma keskara noko ōixiki. Askano fetsafāfe mī chakara noko faifono nō ato ifofaima.

³⁴ Jesucristo noko nãxokẽ ãpa otofani. Iskaratã Apa Nios ika ano ika Apa feta ato keyokõĩ ìkinã. Epa Nios noko kîfîxõfafaĩni. Nã chanĩmakõikẽ tsõa, “Mĩ afara chakafamiski. Nãskax mĩ omiskõipakenaka,” noko tsõa fatiroma. ³⁵ Tsõakai Jesucristo nomakinoa potatiroma noko noiyamanõ. Nõ omiskõikãĩ, nõko shinã mẽra fekaxtekãĩ, nõ Jesúsnoa yoiaito noko omiskõimafãĩ, noko fonãimafãĩ, nõ rapati yopafãĩ, noko mesemafãĩ noko retepaifãĩ, keyokõĩ afãfekãĩ Cristo nomakinoa potatirofoma noko noiyamanõ. ³⁶ Niospa meka yoikĩ David kirika keneni iskafakĩ:

Epa Nios, pena tii mĩõxõ noko retepaikani. Nõ oveja keskara. Ifãfe nã oveja itipinĩfasharai retexiki. Nãskarifiakĩ a mĩõxõ noko chakafaifãfe noko retepaitirofo,

ixõ kirika keneni. ³⁷ Noko askafafiaifono keyokõĩ nã chakafo nõ finõkõitiro Jesús noko noiaino. ³⁸⁻³⁹ Jesucristo nõko Ifonokai afanã Epa Nios nomakinoa potatiroma anã noko noinõma. Nã ã chanĩmara fakõĩni. Epa Niospa noko noiaino afanã noko afeska fatiroma anã noko noinõma. Nõ nafiakẽkai nomakinoa afanã Nios potatiroma. Nõ niyoanori nomakinoa tsõa paxkatiroma. ãfe ãjirifãferikai nomakinoa paxkatirofoma. Yõshi chakafãferikai nomakinoa paxkatirofoma. Afarafo iskaratã ikaifãferikai nomakinoa paxkatirofoma. Inõpokoifãferikai nomakinoa paxkatirofoma. Afara chakafãfe ãto xãnifofõfãferikai nomakinoa paxkatirofoma. Nã nai ari ikafãfe, mai ano ikafãferikai nomakinoa paxkatirofoma. Epa Niospa nõko Ifo Jesucristoxõ noko noi. Nãskakẽ keyokõĩ onifanifãferikai nomakinoa paxkatirofoma anã noko noinõma.

9

Niospa judeofo katonĩ afe yora inõfo

¹ Ë Cristo fe rafexõ ã mato mẽstekõĩ yoi. Ë mato pãraima. Niospa Yõshi Shara ã mẽra naneano ãfe shinãmã shinãkĩ chanĩma ã mato yoi. ² Ë mato yoi iskafakĩ, ãfe kaifo atirito Cristo Ifofaafoma. Nãskakẽ ãfe shinã mẽra ã atoõnoax omiskõĩ kakaini. Ë ato shinãkõikĩ finamis afomãĩ efe yorafokẽ. ³ Nãskakẽ ã shinãmis iskafakĩ: “Epa Niospa, ãfe kaifo nã israelifo ã ato axopai fenoyamanõfo, mefe nipaxanõfo omiskõipakenakafo mẽra fonõfoma. Nãskaxõ Cristo makinoa ea potãfe ato potakima ã ato omiskõixonõ afo omiskõipaxexanõfoma. Nã ã fichipai ãfe kaifo judeofo Cristo fe ãpaxanõfo,” ixõ ã shinãmis. ⁴ Nõ judeofo, Jacobo ãfe fenafo. Epa Niospa noko ifini ãfe fakefo nõ inõ. Nãa Nios sharafinakõixõ nõko kaifo israelifo ato õimapaoni. “Ë mato afara sharafaxõikai. Cristo nã oxiai judeokõĩ ixii. Aõxõ ã mato sharafaxõikai,” ixõ Niospa yoini. Nãskara Moisés Niospa meka yoikĩ israelifo ato kirika kenexoni nikanõfo. Nãskaxõ ato tãpimani afeskaxõ Nios kĩfitirofomãkĩ ichanãxõ. Nãskata afara sharakõĩ ato axoxiai keskara ato yoiyoni. ⁵ Judeofãfe xinifãfe Epa Nios Ifofasharapaonifo. Cristori judeo fake kãini, Niospa Fakekõifiax. Nãskax arifi nõko xinifãfe ãto fena. Nãfi yorafãfe ãto Ifokĩ, nãatomãĩ keyokõĩ ato ãkikẽ. Nãskakẽ, “Nios fãsi finasharakõia,” nõ fapaxanõ. Askapainõ.

⁶ Epa Niospa noko yoisharayoni keskara judeofo atirito chanĩmara fayamafiaifono ãfe meka chanĩmakõĩ. Afe yorafo yoiyoni keskara axii. “Nã judeofo Israelifãfe ãto fenafo ã katoa efe yora inõfo,” ixõ Niospa yoini. Askafafiano atirito Nios chanĩmara famisfoma. Nãskakẽ afe yorakõĩ keskara

Niospa ato òima. ⁷ Nāskarifiakakī Abraham apaoni keska fakī āfe fena atirifāfe Nios chanīmara famisfoma. Afokai Niospa yorakōifoma. Akka Niospa Abraham yoini iskafakī: “Mī fakekōichi Isaaca āfe fakefo mī fenakōifo ixii, mī fake fetsafāfe āto fakefori mī fenakōifo ixiiima,” ixō yoini. ⁸ Nāskano nō tāpitiro Abraham āfe fenafo atiri āfe fakekōifo Niospa ato òima. Akka Niospa Abraham yoyoini āfe āfinī Sara fake fixiai. “Nā fakefi mī fakekōi ixii. Mī fakē āfe fakefori mī fenakōifo ixii,” fani. Nā yoini keskara Abraham Nios chanīmara fani. Nā Abraham Nios chanīmara fai keskafakīri Nios chanīmara faifono nāfofi Niospa fakekōifoki. ⁹ Abraham āfe āfinī Sara fake naneamatai Epa Niospa yoyoini iskafakī: “Xinia fētsa ē anā mikiki nokoxii. Nāskano mī āfi Sara fake kāixii feronāfake,” ixō Niospa Abraham yoini.

¹⁰ Nāskata Sara āfe fake kāini. Nāskaxō aneni. Isaaca fakī. Nāskakē nā Isaaca nōko xini. Isaaca naetapaxō Rebeca fini āfe āfi inō. Rebeca fake rafe naneni. Nā fake rafeta āto apakōi Isaaca ipaoni. ¹¹⁻¹² Rebeca fake kāini fake rafe naneax. Esau kāi taeni. Chipo Jacobo ini. Akka kāiyoafomano tsōa tāpiyonima fatoto shara shināimākai, fatotori chaka shināimākai. Nāskano Niospa fisti katonī afe yora inō. Kāiyoafomano Niospa āto afa yoyoini iskafakī: “Mī fake chipokoto āfe ochi yonomaxii,” fani. Akka Niospa nā apaiyai keskara fatiro, yorafāfe apaiyai keskara Niospa faima. Askano nō tāpitiro Niospa a inōpokoi keskara shināyoni nāskarakōi aki. ¹³ Nāskara Niospa meka yōra kirikaki kenenī iskafakī: “Ē Jacobo ifipai efe yora inō. Esau ē fichipaima,” fani.

¹⁴ Nāskakē ĵiskara nō yoitromē, “Niospa mā fake fisti katoa kāiyoafomano, afaa chakafayoafomano fisti mā katoa akka fetsa katoama òixoma. Nāskakē Niospa shināsharaima,” ixō nō shinātiromē? Maa, anori nō shinātiroma. Akka Niospa tāpisharakōia. Nā apaiyai keskara fatiro. Nā fichipaiyai katotiro. ¹⁵ Niospa Moisés yoini iskafakī: “Nā ē axopaiyai ē axosharikai. Nāskarifiakī nā ē noipaiyai ē noisharikai,” ixō Niospa yoini. ¹⁶ Askatari nō Nios nikasharatama nōakōi nō afe yora isharapaiyaito askara noko axōima. Askatamaroko Niospa noko noikī noko ifitiro afe yora nō inō, nāatomāi noko òiti tāpikaxō. Nāskaxō noko noikī nā apaiyai keskara shara axōi. ¹⁷ Moisés kirika kenenī iskafakī: “Epa Niospa Egipto anoa āto xanīfo yoini iskafakī: ‘Ē mia xanīfo imapaikī ē mia xanīfo imani mīoxō nā maitio ikafāfe tāpinōfo ē afama mīshti faito. Akka mī afara chakafaito ē mia potai mī anā xanīfo inōma. Ē mia askafaito òikakī eōnoa ato yoitirofo nā maitio ikafāfe: ‘Nios tsoa keskarama āfe shināōxō mā Faraón pota,’ ixō eōnoa yoitirofo,’ ixō Niospa Faraón yoini.” ¹⁸ Akka shinākapo. Nā Niospa ato noipaiyai ato noikī axosharatiro. Nāskarifiakī fētsa afara chakafakī xateamano Niospa āfe òiti nikayospakōi imatiro afaa shināpaiyamai keskara imatiro.

¹⁹ Nāskakē fētsa shinātiroma iskafakī: “ĴAfeskakī Niospa noko yoitromē afara chakafamisfora fakī? Akka nāato noko amai nā apaiyai keskarafakī. Nāskakē noko omiskōimatiro nō nikayospaito,” ixō fētsa yoitiro. ²⁰ Askafayamafe. ĴAfeskakī mī Epa Nios kemapaimē? Mīfi yoraki. Aafi Nioski nā apaiyai keskara atiro. Akka a Niospa onifatokai yoikī iskafatiroma: “ĴAfeskakī mī ea iskara onifaamē?” ixō yoitiro. ²¹ Kēromā kesho rafe faxō nā apaiyai keskara fatiro. Kesho fetsa mēra afara shara nanetiro, fetsa mērari afara chaka nanetiro. Akka na kēsho iskafatiroma: “ĴAfeskakī mī ea iskara faamē?” ixō yoitiro.

²² Nāskarifiakī Epa Niospa keyokōi yorafo onifiaxō atiri ato potatiro āfe meka nikakaspaifāfe. Fenāmāshta ato yoiyofiaito nikayospamisfo. Nāskakē

anā teneima, mā atoki ōititfishkikī ato omiskōimaxii. Nāskaxō yorafo ato ōimapai ato potakī omiskōinōfo chaka fisti shināifāfe. ²³ Akka nōfi ato keskarama. Noko Niospa noikī noko tāpimamis. Nāskatari noko itip-inīsharafamai inimakōikai nō nai mēra shara afe ipaxanō. Noko askafamakī yorafo ōimani nā noiaifo Niospa ato noikōia. ²⁴ Noko judeofo fisti Niospa katonima nō afe ipaxanō. Akka judeofomafori ato katonī. ²⁵ Nānori Oseas Niospa meka yoikī kirikaki keneni iskafakī:

Fetsafo judeofomari ē katoxii efe yorafori inōfo. “Ē mato noi,” ē ato yoiyamafikatsaxakī, ē ato yoixii iskafakī: “Ē mato noikōi;” ixō Epa Niospa yoini keskara Oseas kirikaki keneni. ²⁶ Askata anā keneni iskafakī:

Niospa judeofoma ato iskafani: “Mā kai efe yorafoma,” ato fayoni. Nāskata chipo anā Epa Niospa ato ifixii afe yora inōfo. Nāskakē yorafāfe ato yoixikani iskafakakī: “Nafō Niospa fakefo. Epa Nios finakōia afama mīshti fatiro,”

ixō yoixikani. ²⁷ Isaías israelifoōnoa yoini iskafakī: “Na Israel āfe fenafo ichapakōifo ixii oa makex mīshtifo nō tanātiroma tiikōi. Nāskarifiāi judeofo ichapakōi kaixikani. Askafikaxō fisti rasichi Nios Ifofaxikani Nios fe ipaxakakī. ²⁸ Nāskaxō nā yoiyoni keskara nā maitio ikafāfe nā chanīmara faafoma. Nōko Ifāfe ato omiskōimaxii anā ato manayoima āto chaka potayonōfo;” ixō Isaías yoini. ²⁹ Isaías yoiyoni keskara nāskakōi. Nāskata anā yoini iskafakī:

Nōko Ifo finasharakōia nōko fenafo fetsafo ifni afe ipaxanōfo. Askafayamafiano anā judeofo ikeranama. Akka nō nai keyokerana Sodoma anoa fe Gomorra anoafo ini keskai, ixō Isaías kirika keneni.

Nā judeofoma na meka shara Jesúsnoa Pablo ato yoini

³⁰ Nāskakē ē mato yoi. Nā judeofomafāfe shināyonifoma iskafakakī: “Nōko chaka nō soapai,” ixō shināyonifoma. Akka iskaratīa Cristo chanīmara faifāfe Epa Niospa mā ato chaka soaxona afaa chakafamisma keskara ato ōixiki. ³¹ Akka ēfe kaifo israelifāfe Epa Niospa Moisés yoini keskara ifo sharafapainifo. Nāskaxō shinānifo iskafakakī: “A Moisés keneni nō ifofasharaito Niospa noko shara ōitiro,” ixō shināfiaifono Moisés kenenioxō Niospa ato chaka soaxotiroma ato shara ōixiki. ³² ¿Afskakī Niospa ato shara ōimamē? Ē mato yoinō. Afāfekairoko Jesucristo chanīmara faifono ato chaka soaxopanā. Askatamaroko Moisés ato yoini keskaraōnoax isharapaikī āto chaka soapaikani Niospa ato shara ōinō. Akka Moisés yoinioxō Niospa ato chaka soaxotiroma. Ē mato afara fetsa anā yoinō. Tokiri fai nēxpakīa rakano finōpai akiki nō otisikaināi nō paketiro. Nāskarifiakī Jesús finōpaiyifāfe chanīmara fakanima afe nīpāxakakīma. Akka nā yorafo oa nō tokirikī otisikai paketiro keskarafo. Nāskakī Jesús finōpaikakī shināchakatirofo. Akka tsōa Jesús finōtiroma. ³³ Nānori Isaías Niospa meka yoikī kirika keneyoni iskafakī:

Nikakapo, judeofāfe āto pexe rasi ano Niospa tokiri keskara nīchixii yorafo akiki otisikī shināchakaxinōfo. Nā tokiri efapaki yorafo otisikani paketirofo. Akka nāskarari nā Jesucristo chanīmara faafo tiikai paketirofoma. Anā shināchakakanima, ixō Jesúsnoa Isaías kirika keneni. Akka Jesús nā tokiri efapa keskarakōi.

10

¹ Efe yora mīshṭichi, ēfe kaifo ē shinākī finakōi. Ē ato Nios kīfixōfafāini Jesús chanīmara fanōfo, Nios fe ĩpaxanōfo. ² Mē tāpia nāfāfe Epa Nios tāpisharapaikani. Nāskafikakī a Niospa ato tāpimapaiyai keskara shinākanima. Āa āto shināmā fisti shināxō akani. ³ Jesúsxō Epa Niospa āto chaka ato soaxotiro afaa chakafam-isfoma keskara ato ōixiki. Akka nā Jesús ato chaka soaxotiro nikakaspakani. Āakōi shinākanax shara ipaikani. ⁴ Iskakakī shinākani: “Moisés keneni keskara nō nikakōiaito Niospa noko chaka soaxotiro afaa chakafamisma keskara noko ōixiki. Nāskax nō afe ĩpaxanō,” ixō āakōi shinākani. Akka Moisés kenenioxō nōko chaka nōa nō soametiro ma afaa chakafamisma keskara ixii Niospa noko ōinō. Askatamaroko Moisésxō nō Cristoōnoa tāpitiro. Nāskakī nō Jesucristo chanīmara faax aōnoax nā afaa chakafamisma keskarakōi nō itiro nō Nios fe ipaxakī. Nāskakī nō Cristo fisti Ifofatiro. Nō anā Moisés keneni nikatiroma.

Jesús yorafoōnoax ato nāxoni

⁵ Moisés kirika kenekī iskafani: “Epa Niospa noko yoini keskara ē kirika keneni. Fatora fētsa nā meka ifo sharakōi fai isharakōixii, afaa chakafaamax. Akka māfi Nios fe ikōisharapakenakakī. Akka nā Niospa yoini keskara nō ifo sharakōi fatiroma. Askakimaroko nō Cristo chanīmara fai Niospa noko shara ōinō, nō afe ĩpaxanō.” ⁶⁻⁸ Askata anā kirika kenekī iskafani: “Niospa noko yoini afesax nō shara itromākī. Nō Cristo chanīmara faito nōko chaka noko soaxotiro afaa chakafamisma keskara noko ōixiki. Nā Cristo meka shara nōko shinā mēra ikakī. Nō aōnoa tāpixō nō ato yoimis. Akka iskara shināyamakāfe: ‘¿Tsoa nai mēra katiromē Cristo fotomaxiki nō chanīmara fanō?’ Akka tsoakai nai mēra katiroma Cristo fotomaxiki. Askatari iskafakī shināyamakāfe: ‘¿Afesaxō mā Cristo naafianikē mai mēra nō ifitiromē?’ ixō shināyamakāfe. Akka iskaratīa Niospa meka nō mēra ikakī,” ixō kirikakī Moisés keneni. Nānori nō mato yoimis. ⁹ Akka, “Jesús ēfe Ifoki,” nō ato fakī nō shinātiro iskafakī: “Chanīma, Jesús nafianikē Apa Niospa otofani,” ixō nō shināito nōko chaka noko soaxotiro nō afe ĩpaxanō. ¹⁰ Akka nōko shinā mēraxō nō chanīmara fakē Epa Niospa nōko chaka noko soaxotiro afaa chakafamisma keskara noko ōixiki. Askatari, “Jesucristo ēfe Ifoki,” ixō nō ato yoiāx nō afe ipanaka.

¹¹ Nānori Niospa meka yoiakī yōra kirika keneni iskafakī: “A Jesucristo Ifofakanax anā āto ifo fetsa fenakanima. Cristo fistichi ato nimasharatiro afe ĩpaxanōfo,” ixō kirikakī keneni. ¹² Judeofo feta judeofomafāferi Cristo chanīmara faifono āto Ifo itiro. Niospa ato ōia nā yora fisti keskarāfo, nāskarāfos ato ōi. Nāskaxō fatotora yōkaito Niospa axosharakōifafāini aō noikōikī. ¹³ Nānorikōi Joel yoiakī kirika keneni iskafakī: “Fatotora nōko Ifo chanīmara faxō yoiakī iskafaito: ‘Mī ēfe Ifoki, ea ifife ēfe chaka ea soaxoxiki,’ faito āfe chaka soaxotiro afe ĩpaxanō,” ixō Joel kirika keneni.

¹⁴ Akka tsōa Jesús Ifofaxoma, “Ea ifife ēfe chaka ea soaxoxiki,” ixō tsōa yōkatiroma chanīmara faxoma. Akka Jesúsnoa nikakatsaxakīma afeska faxō chanīmara fatirofoma. Tsōakairoko Jesúsnoa ato yoiṁiskē nikapanāfāfe. ¹⁵ Akka Niospa ato nīchiyamaino tsoa katiroma Niospa meka shara ato yoiāxakī. Ākai fotirofoma. Nānori Isaiās kirika keneni iskafakī: “A meka shara yoi feai sharakōi,” ixō yoini.

¹⁶ Ē mato yoinō Niospa mā yorafo nīchini Cristoōnoa meka shara ato yoi-tanōfo. Niospa meka yoisharafiaifono judeofo atirifāfe ato nikapaikanima.

Nānori Isaías kirika keneni iskafakī: “Ēfe Ifāfe, nō ato yoiaito tsōa chanīmara faima,” ixō yoini. ¹⁷ Nāskano Cristoōnoa meka shara yoiaito nikakakī fetsafāfe chanīmara fatirofo.

¹⁸ “Akka, zjudeofāfe nā meka shara Jesúsnoa nikamisfomamē?” ixō fētsa ea yōkaito, ē kematiro iskafakī: “Ēje, mā nikamisfo.” Nānori David yoini kirika kenekī iskafakī:

Nā maifo tii anoafāferi nā meka shara mā keyokōichi nikamisfo, ixō David kirika keneni. ¹⁹ Mā shināiraka iskafakī: “Akka judeofāfe na meka shara Jesúsnoa mā nikafikakī nikasharamisfomara,” ixō mā shināi rakikīa. Akka ē mato yoi iskafakī, mā nikamisfo nā meka shara Jesúsnoa. Mēxotaima mā nikafikakī chanīmara faafoma. Akka israelifomafāfe Nios nikakatsaxakakīma mā rama aōnoa nikafo. Moisés Niospa meka yoi kī kirika keneni iskafakī:

Nā judeofoma efe yora iyopaonifoma. Akka iskaratīa ē ato noikōikī ē ato ifi efe yora inōfo. Ē ato askafaito ōikakī judeofāfe ato noikaspaixikani ato xītipaikakī. Askatari, “Na judeofomafāfe afaa tāpiafoma, judeofāfe ato fafiaifono ē ato ifi efe yora inōfo. Nāskakanax judeofo atoki ōitifishkixikani,” ixō Niospa yoini,

ixō Moisés kirika keneni. ²⁰ Chipō Isaíasri Niospa meka yoi kī kirikaki keneni iskafakī:

A judeofomafāfe akōi ea fenayamafikatsaxakakī chipo ea fichixō ea chanīmara fakanax efe ipanakafo. Askatari, “Niosnoa noko tāpimafe,” ixō ato yoiyamafikatsaxakakī. Akka chipo ē ato tāpimaxii,

ixō Niospa yoini keskara Isaías keneni. ²¹ Askafiaifono ēfe kaifoōnoa Niospa yoini iskafakī: “Nā pena tiixō āto shinā mēraxō ē ato yoimis iskafakī: ‘Ekeki fekāfe,’ ixō ē ato shināmafaiino ekeki fepaikanima. Nikayospamisfo,” ixō Niospa yoini keskara Isaías kirika keneni.

11

Niospa israelifo noikōi

¹ Mā iskafakī shināiraka: “Epa Niospa afe yorafo israelifo mā pota,” ixō mā shināiraka. Mā askaito ē mato kematiro iskafakī: “Maa, ato keyokōi potama. Nāskaxō eari potama ēri israeli. Akka Abraham fe Benjamín ēfe xini. Nāskax ē israelikē ea Niospa potama,” ixō ē mato kematiro. ² Epa Niospa afe yora inōpokoai fo israelifo ato katoyonixakīkai ato potamisma. Shinākapo. Nōko xini Elías israelifoōnoa yoi kī kirika keneni iskafakī: ³ “Ēfe Ifāfe, a mī meka shara yoimisfo mā ato retemisfo. Askatari a mīsa kamakixō mia kīfimisfo mā potafo. Iskaratīa ē fistichi mia Ifofai. Anā ano tsoama. Eari retepaikani,” ixō Elías Nios yoini. ⁴ Nāskafaito nikakī Epa Niospa ōafaa fanimē, Elías? Iskafakī kemani: “Maa, Meres fistikai mī ea chanīmara faima. Akka nāno mī kaifo siete mil yorafāfe ea chanīmara fakaxō afaa fetsakai ifofaafoma. Akka yorafāfe onifanifo āfe ane Baal, ‘Akai nōko niosra,’ famisfoma,” ixō Niospa Elías yoini. ⁵ Nāskarifiakī iskaratīari ēfe kaifo fisti rasichi mā Nios Ifofafo, Niospamāi afetiama ato noikī ato katoyonino afe yora inōfo. ⁶ Niospa noko noikōisharakī noko ifi nō afe yora inō. Akka nō afara sharafaōxokai noko ifima. Niospa noko afaa kopi yōkaima noko ifixiki. Akka āakōi noko ifi noko noisharakī. Nāskakē nō afara sharafatiroma noko ifinō. Akka a nō kopifa keskara noko ōikī āakōi noko ifikeranama. Nāskakē noko afaa kopi yōkaima āakōimāi noko ifixō.

⁷ Akka ěfe kaifo israelifo fisti rasichi Nios fenapaonifo afe rafexikakĩ, nãfomãi Niospa katoyonino afe yora inõfo. Akka israeli fetsafãfe Nios nikakaspapaonifo Nios fe rafekaspakakĩ. Akka a Nios nikakaspafãfe ãto õiti kerexkõifakaxõ nikakaspakani. ⁸ Nãnori Niospa meka kirika kenekakĩ iskafanifo: “Epa Nios nikakaspakani nã oxafõ keskarafõ afaa shinãkanima. Askatari oa yora fẽxo keskara ipaikani. Nãskaxõ Nios nikakõipaikani. Askafafãfe Epa Niospa ãfe meka shara ato tãpimanima. Iskaratĩari nãskakani,” ixõ yõra kirikaki keneni. ⁹ Askatari David kirika keneni iskafakĩ:

A Nios nikakaspafãfe shinãkani iskafakakĩ: “A nõ piai ichapa ita nõko afama mĩshtifori ichapa. Nãskakẽ Niospa noko shara õi,” ixõ shinãkani, Nios nikayamafikakĩ. Akka nõko afama mĩshtiõxõ Niospa noko shara õima nõ afe ipaxanõ. A Nios nikakaspafõ ãto afama mĩshtiõnoax fenoxikani afama mĩshtiõ shinãifãfe. Niospa ato omiskõimaxii. ¹⁰ Oa yora fẽxo keskara inõfo. Askarafãfe Nios nikayamaifono oa yora afara efekõi pefea keskara Niospa ato imanõ,

ixõ David kirika keneni a Nios nikakaspafõõnoa yoikĩ.

Judeofomafãferi Jesús chanĩmara fakanax afe ipanakafo

¹¹ Akka, ¿Niospa afe yorafo israelifo ato potapakenakamẽ? Maa, ato keyokõi potaima. Akka nã israelifãfe Cristo chanĩmara famisfomano a israelimafãferi mã Jesucristo chanĩmara fakani. Ifofaifono Niospa ato ifi afe yora inõfo. Akka nã israelifomafãfe mã Cristo chanĩmara faifono israelifãfe ato õikakĩ akairi Jesucristo chanĩmara fapaikani afe ipaxakakĩ. ¹² Ěfe kaifãfe, afara chakafamisfo Jesucristo Ifofapaimisfoma. Akka Epa Niospa nã maitio anoafõ Jesucristoõnoa ato tãpimanano chanĩmara fakanax afe ipanakafo. Nãskaxõ Niospa ato shara faxõi, inimakõinõfo. Askatari ěfe kaifo judeofãferi chipo Jesucristo chanĩmara fakanax inimai finakõixikani Niospa ato sharafaxõano.

¹³ Akka mã ěfe kaifoyamafiano Epa Niospa ea mato mẽra nĩchini Jesúsnoa ě mato yoinõ. Ě inimakõi Epa Niospa ea katoni ě mato ano onõ. ¹⁴ Ě mato yoiaino mã Cristo chanĩmara fayana mã inimakõiaito mato õikakĩ ěfe kaifãferi Jesucristo chanĩmara fapaikani, mato keskara ipaikakĩ. Nãskarakõi ipainõfora. ¹⁵ Shinãkapo. Ěfe kaifo judeofãfe Jesucristo chanĩmara fayamaifono Niospa ato potani anã afe yorakõi inõfoma. Akka nã maifo tii anoafãfe Cristo chanĩmara fakanax Nios fe rafekani. Nãskakẽ ěfe kaifãferi Cristo chanĩmara faifono Niospa anã ato ifi afe yora inõfo. Nãskakanax sharakõi ixikani. Nã yora naax otoa keskara itirofo, inimakõikani. ¹⁶ Nãskaxõ ě anã mato yoinõ pãakiri keparanãkĩ iskafakĩ: Pãa kaxke pishta Niosnã ikano keyokõi ãfenã itiro. Nãskatari ifi ãfe tapo ãfenã ikano ãfe teshpafori keyokõi Niosnã itiro. Nãskarifiakĩ ěfe kaifãfe Jesucristo chanĩmara fakakĩ taefanifo fisti rasichi. Nãskakẽ ãto fenafãfe Nios Ifofakanax chipo afe yora ixikani chanĩmara fakanax.

¹⁷ Ě mato afara fetsa anã yoinõ mã tãpinõ. Ěfe kaifo judeofo ifi olivo ãfe põya keskarafõ. Nã ifi põya fimioa ifãfe mextexõ potatiro. Nãskaxõ ifi olivo fetsa nã nii mẽra nia ãfe põya fetsa fĩaxõ tichixotiro nã olivo kayakõiki. Nãskarifiakĩ judeofãfe Jesucristo chanĩmara fayamaito Niospa mã ato pota. Akka mã judeofoma. Mãfi nã ifi olivo nii mẽra nia keskarafokĩ. Nã ifi ifoyama keskarafõ, mã. Nãskax mã Epa Niospa yora ipaonima. Akka Jesucristo mã Ifofaito Niospa mato ifi afe yora mã inõ. Nãskata nã ifi olivo

mã äfe pöya tichiax äfe tapo mëranoax yosiaino foaisharatiro. Nãskarifiakĩ nã judeofäfe äto xinifäfe mekaõxõ mã Niosnoa täpisharakõiafo nã ifi olivo yosiai keskaraxõ. ¹⁸ Iskara shinäyamakäfe: “Nõ sharakẽ noko Niospa ifia. Akka judeofo chakafokẽ Niospa mã ato pota,” iyamakäfe. Shinãkapo. Mãfi ifi äfe pöya keskarafõ. Ifi pöyakai äfe tapomais nitiroma, xanatiro. Ifi pöyafõ aõ tapõnoax nia. Nãskarifiakĩ judeofo äto xinifäfe Nios täpinifo taefakakĩ. Atoõxõ mãri Nios täpitiro.

¹⁹ Mã shinãiraka iskakĩ: “Ifi pöya chakakẽ, ifäfe mextexõ põtatiro. Nãskarifiakĩ judeofäfe Jesucristo chanĩmara fayamaifono Niospa ato potani. Akka nõ judeofo keskarama nõ Jesucristo chanĩmara faax nõ afe ipanaka,” ixõ mã shinãiraka. ²⁰ Nã mã yoiyai keskara chanĩmakõikĩ kexemesharakäfe. Akka judeofäfe chanĩmara fayamaifäfe Epa Niospa ato potani. Nã judeofo potani keskafakĩ Epa Niospa matori potatirokĩ. Kexemesharakäfe, mã anã Jesús chanĩmara fayamaito matori potatirokĩ. Nãskakẽ kakapayamakäfe. Mã Jesús chanĩmara fayamax mã fenotirokĩ. ²¹ Judeofäfe Nios chanĩmara fakĩ taefafianifono chipo äto fenafäfe chanĩmara fayamaifäfe Niospa ato potani. Mãri mã chanĩmara fayamaito matori potatirokĩ.

²² Akka shinãkapo. Niospa noko noifiaino nõ nikayamaino noko täpimatiro omiskõimakĩ. Nãskakẽ judeofäfe chanĩmara fayamaifäfe ato omiskõimakĩ ato potai. Akka Niospa mato noikĩ afe yora mato imai. Nãskakẽ mato noiai keskara shinãfäfikäfe. Chanĩmara fafäfikäfe. Mã askafayamaino matori potatiro. ²³ Èfe kaifo judeofäfe anã chaka shinãkakima, Jesús chanĩmara faifono anã afe yora Epa Niospa ato imatiro. Ifi mextexõ anã äfe pöya tichixotiro anã foainõ. Nãskarifiakĩ Epa Niospa anã ato ifitiro afe yora inõfo. ²⁴ Mãkai judeofoma. Judeofo ifi olivokõi keskarafõ. Akka mã judeoma. Mã nã olivo nii mëra nia keskara. Olivokõi äfe ifäfe nã nii mëra olivo äfe pöya xatexõ olivokõiki tichitiro foaisharanõ. Nãskarifiakĩ mã Niospa yora ipaonima. Akka iskaratĩa Epa Niospa mato ifia mã afe yorafõ inõ. Nãskakëri èfe kaifo anã Niospa ato ifipaisharakĩ ifitiro afe yora inõfo. Jesús chanĩmara faifäfe afe yorafõ ato imatiro.

Epa Niospa judeofo anã ato ifixii afe yora inõfo

²⁵ Efe yora mĩstichi, mãfi israelifoma. Meka fetsaõnoa mã nikamisma è mato täpimanõ mãto shinã mëraxõ mã shinãnõ, nã è mato yoiyai keskara mã täpiax kakapaimis mã inõma, mã iskanõma: “Nõ israelifo keskarama, nõ sharafinakõia,” mã inõma. Chanĩma, iskaratĩa èfe kaifo israelifäfe äto õiti kerexkõixõ Niospa meka shara Jesúsnoa nikakaspakani. Akka israelifäfema Jesús chanĩmara faafono Niospa ato ifini afe yora ato imaxii. Nãskatari èfe kaifäferi anã Nios chanĩmara faifäfe Niospa anã ato ifixii afe yora inõfo. ²⁶ Akka keyokõichi israelifäfe Jesús chanĩmara faifäfe Epa Niospa ato ifixii afe yora inõfo. Nãnori Isaías kirika keneni iskafakĩ:

Nõko Ifo Siõn anoax oxii nõko chaka noko soaxoxiki nõ afe ipaxanõ. Nã nõko Ifo israeli yora ixii. Nãato israelifo ifiyoi anã afara chaka äto ifo inõma, ixõ Isaías kirika keneni. ²⁷ Askata Isaías Niospa meka anã yoini iskafakĩ:

È ato yoiyoni keskara è äto chaka ato soaxoxii, ixõ Niospa yoini Isaías kirikaki keneni.

²⁸ Jesúsnoa meka shara judeofäfe nikakaspakani, noikaspakakĩ. Akka mã judeoma. Nãskakẽ Epa Niospa mato sharafaxõa äfe meka shara Jesúsnoa mã chanĩmara fanõ. Akka judeofäfe äto xinifo Niospa yoini iskafakĩ: “È

mato ifi mā efe yora inō,” ixō ato yoini. Nāskakē āto xinifoōxō Niospa ato noi, āfe fenafori noikōi. ²⁹ Epa Niospa ēfe kaifo āfe afama mīshti ināxixakī yoiyoni keskara anā fetsafaima afetiāmamāi ato ifiyonixakī. Nāskakī ato potapakenakama. ³⁰ Akka mā judeoyamafixō mā Epa Nios nikayopaonima. Akka iskaratīa mā anā nikayospa ipaima. Nāskakē Niospa mato sharafaxopai mā chanīmara faito. Akka ēfe kaifo judeofo ato sharafaxopafiaioto nikakaspapaonifo. Nāskakē mā chanīmara faito Epa Niospa mato noikī mato sharafaxōi. ³¹ Nā mā Nios nikakaspayopaoni keskakani ēfe kaifofo. Nāskafiaifono nā mato noiai keskari fakī atori Niospa noikōi. Nāskakē chipo Epa Nios anā shināxikani. ³² Epa Niospa yoini tāpīxō iskafakī: “Yora keyokōichi chakafamisfo, nikayospafo,” ixō yoini. Askafiaifono ato noikī ato chaka soaxoxii afe ipaxanōfo.

Nios sharafinakōia

³³ ¡Aicho! ¡Nōko Nios sharakōi! Afama mīshti tāpīkōia. Shināsharakōia. Āfe shinā mēraxō yorafaōnoa shināi keskara tsōa tāpitiroma. Aato akai keskara tsōa tāpitiroma. ³⁴ Tsōa nōko Ifāfe shināi keskara tāpitiroma. Tsōarikai nōko Ifo tāpimatiroma. ³⁵ Tsōarikai nōko Ifo afaa ināma noko niminō. ³⁶ Ares āfe shināmā shināxō afama mīshti onifani. Keyokōi āfenā. Aōnoax nipanaka. Nāskakē, “Nios sharakōira,” fapanakafo. Askapainō.

12

Afeskax Niospa āfe yonomati nō itiromākī

¹ Efe yora mīshtichi, ē mato yoisharapaiyai keskara akāfe. Epa Niospa mato noikī mato sharafamiski. Nāskakē māri ināmekāfe mato Ifo inō, āfe yonomati ipaxakakī. Mā askaino anā afara chaka mato ifo itiroma, Nios mato Ifo iki. Shinākapo. Mā mēste shināsharakōikī Nios noiyanā sharafakāfe. Mā askafaino Nios matoki inimakōitiro. ² Nios Ifofaafāfema shināi keskara shināyamakāfe. Mā shināpaoni keskara anā shināyamakāfe. Iskaratīa Niospa mato shinā mēra fetsafapaiyai keskara shinākāfe. Afaa fetsakai mā shinātiroma. Mā askakī mā tāpitiro Niospa mato imapaiyai keskara sharafinakōi. Mato imapaiyai keskara mā ikaino matoki inimatiro.

³ Epa Niospa ea noikī ea yoia ē mato tāpimanō. Nāskakē ē keyokōi mato yoisharapai. Kakapaimis iyamakāfe. Niospa mato imapaiyai keskara fisti shinākāfe. Afaa fetsa shināyamakāfe. Niospa mato shināmāna keskara fisti matoōnoa shinākāfe. Mēstekōi matoōnoa shinākāfe. Mā Nios chanīmara fakī shinākāfe iskakī: “Ea Niospa imapaiyai keskara ē ipai,” ixō shinākāfe. ⁴ Ē mato afara fetsa ēa yoipai. Nōko yora fistifiano nō pōyayai fetsea. Askata nō feroyata, pachoyata, nā nō fisti askai fetsea. Nāskaxō nāfāfe nō afara fetsafo atiro. ⁵ Nāskarīfiai nōko Ifo Cristo fistikōi. Akka nōfi āfe pōya keskarata, āfe fero keskarata, āfe tae keskarata nō iki fetsea yora fisti fiāx.

⁶ Epa Niospa noko amapaiyai keskara nō aōxō fetsafo axosharatiro. Mā nō Nios Ifofaano a noko imapaiyai keskara noko imaketsai fetsa āfe meka ato yoinōfo, fētsari ato tāpimanō, fētsari afaamaisfori ato inānō. Nāskarafo noko imaketsai. Mā nō Nios Ifofaano noko noikī noko katoa noko amai keskara nō anō. Noko fetsafo katoa āfe shināōxō fetsafori āfe meka nō ato yoinō. Nāskakē mā mato katoano mā chanīmara faxō mato yoiai keskara fetsafori ato yoisharakāfe. ⁷ Mā mato fetsafo katokē āfe shināōxō fetsafori axosharafafāikāfe. Mato fetsafo katokē āfe shināōxō āfe meka ato tāpimasharakāfe. ⁸ Mato fetsafo katokē aōxō fetsafo ōiti ato fepeaxōfafāikāfe.

Mato fetsafo katokē afara yopaifo inimayanā ato ināsharakāfe. Mato fet-safo katokē āto xanīfo mā inō. Nāskakē Niospa shināmana keskara ato yonomasharakāfe. Xanīfo mēsteshara ikāfe. Nā mato katokē āfe shināōxō omiskōiaifo ato noikī inimayanā ato axosharakāfe.

Afeskax Nios Ifoafafo itirofomē

⁹ “Ē mato noira,” ifiata ato pāraymentakāfe. Yorafo noikōikāfe. Afara chakafo noikaspakāfe. Afara shara noisharakāfe. Afo potayamakāfe. ¹⁰ Nā mā Nios chanīmara faafo tii noinākāfe. Mato fe yorakōifo fe mā noināmis keskariai noinōnākāfe. A mā mā nōimeai keskariai fetsafori ato noisharakāfe. “Fet-safo finakōiaki, ē finakōiyamaki,” ixō ato sharafakāfe. ¹¹ Nōko Ifo yonoxoni xaniyamakāfe. Niospa Yōshi Sharaōxō inimakāi yonosharaxokāfe. ¹² Epa Niospa mato sharafaxoxiai keskara shinākāfe. Nāfo shināi inimakāfe. Akka omiskōifi fena fenayamakāfe. Epa Nios kīfikī xateyamakāfe. ¹³ Nios Ifoafaafāfe afara yopaifono ato inākāfe. Fetsafo pimasharakāfe. Pexe yopaifāfe mātō pexe mēra ato ikimakāfe. Ato kexesharakāfe.

¹⁴ Mato omiskōimanaifāfe ato kopiyamakāfe. Nios kīfikāfe iskafakī: “Epa Niospa ato chakafayamafe ato sharafafe,” ixō Epa Nios kīfikāfe. Nāskaxori ato īchayamakāfe. Askatamaroko ato sharafaxokāfe. ¹⁵ Inimaifono māri inimakāfe. Ato sharafaifono aōnoax inimakāfe. Oiaifono māri shināmitsayanā ato shinākāfe. Omiskōiaifono māri atoōnoax omiskōikāfe. ¹⁶ Afe fer-atenākakīma Epa Niospa mato shināmapaiyai keskara fisti anori shinākāfe. “Ē ato keskarama,” iyamakāfe. Xanīfofo fisti fe rafepaimis iyamakāfe. Afaayamafo feri rafekāfe. “Ē tāpia keskarakai fetsafāfe tāpiafoma,” ixō anori shināyamakāfe. Kakapaiyamakāfe.

¹⁷ Mato chakafafiaifāfe ato kopiyamakāfe. Āto ferotaifi isharakāfe, “Nios chakara,” fayamanō. ¹⁸ Keyokōi yorafo fe rafepaisharakāfe. Mā aska sharafapaifaiino fetsafo mato fe rafesharapaikanima. ¹⁹ Efe yora mīstichti, fētsa mato chakafafiaito ato kopiyamakāfe. Epa Niospa meka yoikakī kenenifo iskafakakī: “Mato chakafaifo ē ato omiskōimanikai,” ixō kirika kenenifo. Epa Niospa yora chakafo ato omiskōimaxii. Māikai ato omiskōimatiroma. ²⁰ Ato kopitamaroko nā mato noikaspai fo fonāikaifāfe ato pimakāfe. Nōamā ikaiifāfe ato ayamakāfe. Ma askafaito ōikani, “Noko kopīkanimara,” ikanax rāfipainōfo. ²¹ Askata fetsafāfe mato chakafapaifi-aiifāfe māri kopikiri ato chakafayamakāfe. Chaka ifofayamakāfe. Askata-maroko afara sharafatitaifakāfe. Askafakī mā chaka potatiro.

13

Nō xanīfofo nikakōitiro

¹ Epa Niospa yoini keskara nā maitio ikafāfe xanīfofo katotirofo. Akka xanīfo finakōia nikata afe rafeafori nikakōikāfe Niospa ato xanīfo imaino. Akka Niospa xanīfo ato imayamaino itirofoma. ² Niospa noko yoini iskafakī: “Mātō xanīfofo nikakōikāfe.” Akka mātō xanīfo mā nikakaspakī Niosri mā nikakaspai. Mā nikakaspaito mato omiskōimaxii. ³ Akka nō isharaxkai nō xanīfoki mesetiroma. Akka nō isharayamax nō xanīfoki mesetiroma. Xanīfoki mesexikima isharakāfe. Mā askaito mato chakafatama matoōnoa yoisharanōfo. ⁴ Xanīfofo Epa Nios yonoxomis keskarafato mato axosharakani. Akka mā afara chakafaax xanīfoki mā mesetiroma. A xanīfofo afokai kaxpa xanīfofoma, mato omiskōimatirofo. Nāfofi Niospa ōimati keskarafokī afara

chakafaifāfe ato omiskōimatirofo. ⁵ Akka mātō xanīfofo nikakōikāfe mato omiskōimayamanōfo. Mātō shinā mēraxō shināsharaxikakī. Ato nikayamakī mā shinātiro iskafakī: “Ooa, ē nikayospakōi. Nāskax ē shināmitsaito ē mei,” ixō mā shinātiro xanīfofo nikayamax.

⁶ Mātō xanīfofo Nios yonoxomisfo keskarafō pena tii mato yonoxokani mā isharanō. Nāskakē mato kori yōkaifāfe ato inākāfe aōxō mato axosharanōfo.

⁷ Mā ato nimixō ato kori inākāfe. Askatari ato noisharata ato noisharakāfe.

Nō nōinōnātiro

⁸ Tsoa nimiyamakāfe. Askatamaroko noinākāfe. Noināi eneyamakāfe. Nā nō yorafō noiaioxō Epa Niospa yoini keskarakōi nō amis. ⁹ Noko yoikī iskafani: “Mātō āfima fe iyamakāfe. Kērofori mātō fenema feri iyamakāfe. Retemitsapaiyamakāfe. Yometsoyamakāfe. Fetsa pārayamakāfe. Fetsa fīapaiyamakāfe,” ixō noko yoini. Afara fetsafori noko yoini. Nō yorafō noikī na Epa Niospa yoini keskara nō ato chakafaima. Nāskakē a mīa mī noimei keskari akī fetsafo ato noife. ¹⁰ Nō fetsafo noikōixō nō ato chakafatiroma. Akka nō ato noikōikī Niospa yoini keskara nō aki. Nō āto āfi fe nō ipaima. Askatari nō ato noikōixō nō atoki yometsoima. Askatari nō ato pāraima. Akka nō ato noiaioxō Niospa noko yoia keskara nō atiro.

¹¹ Nā Jesús fena oyoaima chāi ē taefakī Jesús Ifofani. Akka iskaratīa nōko Ifo Jesús mā chaima oi. Nāskakē ē mato yoiai keskara akāfe. Oxakatsa ikai keskara iyamakāfe. Oxakatsa ikīkai nō yonosharatiroma. Nāskakē xanikākīma Jesús yonosharaxokāfe itipinīsharaxikakī. ¹² Mā penaino samamakōi penatiro. Nāskarifiakakī mā nōko Ifo chaima oaino fakish mēra ika keskara iyamakāfe. Mātō chaka xatekōikāfe. Jesús ika keskara māri xafakīa ikāfe afara chakafaxikakīma. ¹³ Isharakōikāfe penano nō ōisharatiro pakexikīma. Nāskarifiakī Jesús Ifofaax nō isharakōitiro afaa chakafatama. Akka fetsafāfe monokakī afara chakafaifo mēra foyamakāfe. Chaka fetsa fetsatapafo ayamakāfe. Pāeyamakāfe. Askatari mātō āfima chotayamakāfe. Kēromāri mātō fenema chotamayamakāfe. Afara chaka fetsafo shināyamakāfe. Feratenā faatanāyamakāfe. Fetsa xītipaimis iyamakāfe. ¹⁴ Askatamaroko nōko Ifo Jesucristo fe rafekāfe. Jesús ika keskara māri ikāfe afara chakafakīma. Afara chaka mā shināpaiyai keskara ayamakāfe.

14

Mato fe yorafō a Nios Ifofaafō mekakakī chakafayamakāfe

¹ Meka fetsa ē mato yoinō. Fetsafāfe Jesús Ifofafiakaxō āfe meka tāpisharakanamax mato fe ichanāifono, “Aicho, nofe ichanāi fekāfe,” ato fakāfe. Mā shināi keskara anori shināyamaifono ato fe feratenāyamakāfe. Ato mekakakī chakafayamakāfe. ² Mato mēra ixō fētsa yoitiro iskafakī: “Ē Jesús chanīmara faxō keyokōi ē pitiro,” ixō yoitiro. Akka fētsa yoikī iskafatiro: “Ēfi Jesús chanīmara fakī ēkai nami pitiro. Ē fanafō fisti pitiro,” ixō yoitiro Jesús meka tāpisharaxoma. ³ Fētsafāfe nami pikī a nami pimisfoma ato mekakakī chakafatiroma. Ato yoikī iskafatirofoma: “Mā afaa tāpiama. Nō nami pia shara, noko chakafatiroma. Nami shara,” ato fatirofoma. Nāskarifiakī nā nami pimismato a nami pimisfo ato mekakakī chakafatiroma. Ato yoikī iskafatiroma: “Nafāfe nami pikakī chakafakani,” ixokai atoōnoa yoitirofoma. Akka Epa Niospa keyokōi nāskarafo noko ifi nō āfe fakefo inō. Nāskakē fetsafo mekakakī chakafayamakāfe. ⁴ Jesús Ifofaafokai mātō inafoma. Akka afāfe Epa Nios yonoxomisfo. Nāskakē ato mekakakī chakafayamakāfe. Epa

Niospa ato yoitiro. A chakafaifo ato iskafatiro: “Mā chakafai,” ixō ato yoitiro. Askatari a sharafaifo, “Mā sharafai,” ato fatiro. Akka a chaka shināifo Niospa ato tāpimatiro isharanōfo anā chaka shinānōfoma.

⁵ Akka a Nios Ifofaifo fetsafāfe shinākani iskafakakī: “A judeofāfe tenetitīa nō ichanātiro Jesús shināi,” ixō anori shinākani. Akka fetsafāferi shinākani iskakakī: “Nā pena keyokōi shara nō ichanātiro Jesús shināi,” ixō shinākani. Nāskaxō nā āto shināmā shināifo keskara shara. Nā shināifo penata ichanātirofo Jesús shinākani. Akka mā shināi keskara shināyamaifono ato mekafakī chakafayamakāfe. ⁶ “Na judeofāfe tenetitīa nō ichanātiro Jesús shināi,” ixō shināifāfe, nāfāfe nōko Ifo Jesús Ifofasharapaikani. Akka a nā fatora penata nō ichanātiro Jesús shināi ikaiāferi, nāfāfe nōko Ifo Jesús Ifofasharapaikani. Askatari fetsafāfe shinākani: “Nō nami pitiro. Aicho, Epa Niospa mī noko nami inā nō pinō,” ixō shinākani. Nāfāferi nōko Ifo Jesús Ifofasharapaikani. Akka fetsafāferi nā nami piyamaifāfe nāfāferi nōko Ifo Jesús, “Aicho,” fatirofo. Nāskaxō nāfāfe Nios shināsharapaikani. ⁷⁻⁸ Nō niyoxōkai nōa nō apaiyai keskara fisti nō shinātiroma. Epa Niospa noko amapaiyai keskara nō shinātiro. Nōfi āfenāfoki. Nāfi nōko Ifokī. A nō naitiari nōko Ifo Jesús niyoxō nō Ifofasharapai nokoki inimanō. A nō naitiari nōko Ifo nō shinātiro nōmāi āfenākōixō.

⁹ Cristo noko nāxoni. Mā maifafono otokainixakī. Iskaratīa mā nia. Nāskakē nō nayoamax nōko Ifo iki. Mā nō naaxri nōko Ifo ixii. ¹⁰ ¿Afeskakakī mato feta chanīmara faafo mā mekafakī chakafaimē? ¿Afeskakakī mā fetsaōnoa mā shināchakaimē? “Aakai afaamara,” ixō mā shināi. Shinākapo, keyokōi nō chipo Nios ikano nō akiki nokoi kaikai. Askatari noko yoixii nō afara sharafayamakē nō chakafamiskē. ¹¹ Isaías Niospa meka yoikī kīrika keneni.

Niospa yoini iskafakī: “Chanīmakōi ē nia. Chanīmakōiri keyokōi maifo tii anoafō ekeki nokoxikani. Ekeki ratokonō mai chachikaxō yoixikani: ‘Epa Niospa, mī chanīmakōi, mī Nioskōi,’ ixō ea keyokōichi yoixikani.”

¹² Akka keyokōichi Epa Niospa ferotaifi nō amis keskara nō yoixii. Nō shināmis keskarari nō yoixii.

Fetsafo afara chakafamayamakāfe

¹³ Nāskakē a mato feta Jesús chanīmara faafo mekafakī chakafayamakāfe. Iskafakī shinākāfe: “Nō afara chakafaito ōikaxō akairi chakafatirofo. Nāskakē nō afaa chakafapaima akairi afaa chakafayamanōfo.” ¹⁴ Jesús ēfe Ifokē ē mato yoisharapai. Keyokōi a nō piaifo shara nō pitiro. Nā ē chanīmara fakōini. Nāskafiano fetsafāfe shinākani iskafakakī: “Na piaifo nō pixō nō chaka shinātiro,” ixō shinākani. “Nō nami pitiro,” ixō shināfikakī mā nami pikani. Nāskaxō chaka shinākani. ¹⁵ Mato feta fetsa Jesús chanīmara faito āfe ferotaifi a nami pitirofa piyamakāfe āfe shinā mēraxō shināchakanōma. A noikōixō mā āfe ferotaifi pitirofa. Nōko Ifo Cristo aōnoaxri nani. Nāskakē a pitirofa pikī mā fetsa shināchakamatiro. Nāskakē āfe ferotaifi piyamakāfe Jesús kachikiri faax fenoyamanō. ¹⁶ “A ē akai keskara chakama,” ixō mā shināfiaino fetsafāfe askara shinākanima. Iskafakī shinākani: “Na mā akai keskara chaka,” mato faifono mā xaterisafatiro matoxō shināchakayamanōfo. ¹⁷ A nō piatio Niospa yora noko imatiroma. Askatari a nō ayaito Niospa yora noko imatiroma. Akka Nios nōko xanīfokōino āfe Yōshi Sharaōnoax nō sharakōi. Nōko ōiti fekaxteima nō inimakōitiro. ¹⁸ Nōko Ifo Cristo nō nikasharaino Epa Nios nokoki inimasharatiro. Yorafāferi nokoōnoa shināsharatirofo.

¹⁹ Nāskakē Jesús chanīmara fai fetsafo fe isharakōikāfe. Jesúsnoa yoinōnākāfe a keskara shara ixikakī. ²⁰ Niospa yoini keyokōi a nō piāi shara.

Nāskafekē fetsafāfe, a Nios tāpisharafāfema shinākani iskafakakī: “Afara fetsa nō pixō nō chakafai,” ixō shināifono āto ferotaifi afara piyamakāfe. Akka mā āto ferotaifi piaino mato ōikakī āto shinā mēra shināchakatirofo. Nāskaxō anā Jesús Ifofasharatirofoma. ²¹ Mā nami piaito fetsafāfe mato ōikī shināchakatirofo. Nāskaxō anā Jesús Ifofatirofoma. Nāskakē āto ferotaifi afaa piyamakāfe. Askatari mā māmā ayaito ōikakī fetsafāfe shināchakatirofo. Nāskaxō anā Jesús Ifofatirofoma. Nāskakē anā ayayamakāfe. Afara fetsafori akī mā ato shināchakamatiro, nāskakē xatekāfe Jesús Ifofanōfo. ²² Nāskaxō mā shināi keskara mares shinākāfe. Epa Nios fisti mā yoitiro. Mā Nios chanīmara faxō māto shinā mēra shināsharakī mā iskafatiro: “Chanīma, ē akai keskara chakama,” ixō shināi māto shinā mēra mā inimitiro. ²³ Nāskaxō fētsa Niospa meka tāpisharaxoma shinātiro iskafakī: “Nafō pikī ē chakafairakaiti,” ixō shināfikī akairi pikī chakafatiro. Afara fetsafori shinākī iskafakī: “Nafō akī ē chakafairakaiti,” ixō shinākī akairi akī chakafatiro.

15

Nā mā apaiyai keskara fatama fētsa apaia keskara axokāfe

¹⁻² Jesús chanīmara fakōixō a Niospa meka tāpisharafoma nō ato fenāmāshta yoitiro ato fe feratenātama. Nōa nō apaiyai keskara fisti nō atiroma. Nā Jesús chanīmara faa fetsafori noikī nō ato axotiro āto shinā mēra inimamakī shara inōfo Jesús Ifo sharafakōinōfo. ³ Shinākapo. Nōko Ifo Cristo aafi apaiyai keskara fisti shināpaonima. Aōnoa Nios yoimisto kirika keneni iskafakī: “Epa, ē mia nikakōia. Akka mia chakafakakī eari chakafakani,” ixō kirika keneni Cristoōnoa yoikī. ⁴ Niospa meka kenepakenifo noko tāpimaxikakī. Āfe meka nō chanīmara faxō afara chaka finōkōixō nō tenekōinō. Āfe mekaōxō nōko ōiti nō fepeaxō nō tāpitiro nōko Ifo fe nai mēra chipo nō afe ipanaka anā afara chakapa noko omiskōimanōma. ⁵ Noko afara chakapa afeskarafafiaito Epa Niospa noko mitsisfamatiro nō tenenō nōko ōiti fepeaxokī. Nāskakē mā Jesús Ifofasharaino mato nānori fisti shināmati. ⁶ Nāskakē nōko Ifo Jesucristo āfe Apa nō yoisharai. Nāskax nā meka fistipa nō mekai keskarakōi Epa Nios yoisharakī nā yora fisti keskara.

Niospa meka shara judeofoma yoinifo

⁷ Cristo nokoki inimakī noko ifini afe yorafo nō inō. Nāskakē māri fetsafo fe yōra faatanākāfe. Mā askaino Niosnoa shināsharatirofo. ⁸ Ē mato yoinō Jesucristo mai ano oni judeofo ato yonoxomis keskara ikiyoi. Niospa nōko xinifo yoyoni keskara Cristo oni. Nāskakē Niospa nōko xinifo yoini keskara chanīmakōikē nō tāpitiro. ⁹ Akka judeofomaōnoaxri Jesús oni. Nāfāferi chanīmara faxō yoixikani iskafakakī: “Aicho, Epa Niospa noko noikī āfe Fake nokoki nīchini. Epa Nios shara,” ixō yoixikani. Nānori David kirika keneni iskafakī:

Epa Niosi, ē mīōnoa ato yoisharaxii, a judeofoma. Ē mia fanāki, “Aicho,

Nios shara,” ē mia faxii,

ixō kirika keneni. ¹⁰ Anā Niospa meka yoikī kirika keneni iskafakī:

Judeofoma nā judeofo fe inima faatanākāfe. Māri ato fe Niospa yora ixii,

ixō kirika keneni. ¹¹ Anā kirika keneni iskafakī:

Maitio anoafāfe, nōko Ifoōnoa yoisharakāfe. Keyokōi nā maifo tii ikafāfe

nōko Ifo fanākāfe,

ixō kirika keneni. ¹² Isaiās aatori iskafakī kirika keneni:

Nôko xini Isaî âfe fena na maitio ikafâfe âto xanîfo ixii. Shinâxikani iskafakakî: “Nâ fistichi Nios ika ano noko ifitiro nô afe îpaxanô, nô anâ nanakama,” ixô shinâxikani, ixô Isaîas kirika keneni Cristoônoa yoikî.

¹³ Epa Nios chanîmara faxô nôko Ifo oxaiino nô manai. Epa Niospa noko shinâmani iskafakî: “Chanîma, nôko Ifo oxii noko ifixiki nô afe îpaxanô,” ixô noko shinâmani. Nâskakê ã mato kîfixomis Niospa mato inimamanô. Askatari mâto shinâ mēra mato shinâmasharai mâ afeskatama mâ isharanô mato axosharai. Mâ Nios chanîmara faano âfe Yôshi Sharapa mato axosharai mâ isharanô.

Pablo Jesucristoônoa judeofoma ato yoini

¹⁴ Efe yora mîshtichi, mê tâpia mâ noinâ faatanâito Jesúsnoa mâ tâpisharai mâ yoinônâsharatiro. ¹⁵⁻¹⁶ Niospa ea noikî ea katonî Jesucristo âfe yonomati ã inô, âfe meka shara ã mato tâpimanô. Nâskakê ã ranotama anâ aônoa ã mato shinâmasharai kirika kenekî. Akka Niospa ea nîchini judeofoma ã ato Jesús Ifofamanô. Mâ Jesús Ifo sharafaxô, mâto chaka mâ soax a keskara shara mâ inô. Nâskax Epa Nios matoki inimakôî.

¹⁷ Nâskakê ã inimakôî nôko Ifo Jesucristomâî ea katonikê Epa Nios ã yonoxonô judeofoma Niospa meka ã ato yoinô. ¹⁸ Êa ã ato yoima. Cristo ea shinâmanaino ã ato yoimis. Nâskakê a ã ato yoimis keskara Epa Niosnoa nikakôimisfo. ¹⁹ Âfe Yôshi Sharapa ea shinâmanaino a tsôa atiroma keskara ã ato ôimana. Nâ maitio Jerusalén anoafô yoita Ilirico anoafori ã ato yoini. Keyokôî nâ meka shara Cristoônoa ã ato yoifofâsafamis. ²⁰ Êkai a yora fetsafâfe Cristoônoa yoimisfo ari ã kapaimisma. A Cristoônoa nikamîsfoma ano ã kapaimis ato tâpimaxiki. ²¹ Nânori Isaîas Niospa meka keneni iskafakî:

Tsôa aônoa nikayomisma chipo nikakaxô tâpinôfo, ixô keneni.

Pablo Roma ano kapaiikî shinâni

²² Akka ã mato ari kapaimis. Ê mato ôikapaifi ã kamisma. Afara fêtsa ea katimafamis. ²³ Nâskafixô iskaratîa Jesúsnoa mê ato yoikî mê mitoa. Nâskax mê itipinîa mato ari kaxiki. Mê xini ichapa amis mato ôikapaikî. Mêxotaima ã mato ari kapaimis. ²⁴ Ê España ari kai ã mato ano nêteyoxii mato fe mekaxiki nô yoinônâsharaxiki. Mato anoax ã kaito a ã yopai a ã inâxikâfe ã España ari nokosharanô. ²⁵ Akka iskaratîa ã Jerusalén ano kayoikai. Jesús chanîmara faafâfe ea nîchikani a Jerusalén anoxô Jesús chanîmara faafô ã ato kori inânô. ²⁶ Macedonia anoxô a Jesús chanîmara faafâfe Jerusalén anoafô a Jesús chanîmara faafô ato kori inâpainifo. Acaya anoxori Jesús chanîmara fakaxô ato kori inâpainifo a afaamaisfo. Nâskakê ea kori inânifo ã ato inâtanô. ²⁷ Inimayanâ ato inâpaikakî ato yoinifo iskafakakî: “Jerusalén anoax Jesúsnoa yoimisfo nokoki fenifo Jesúsnoa meka shara noko yoi fekani. Akka nokoki feyamanifono na meka shara nô nikakeranama. Nâskaxô nô afarayaxô nô ato inâpai ato sharafakî,” ixô yoinifo. ²⁸ Nâskata ã ato kori inâfainikai Jerusalén anoax España ari kakî. Nâskaxori ã Roma ano a ã mato ôifainikai. ²⁹ Mê tâpia ã mato ano nokoxô nôko Ifoxô ã mato yoisharaxii mâto shinâ mēra mâ inîmanô.

³⁰ Efe yora mîshtichi, meka fetsari ã mato yoipai. Mâ nôko Ifo Jesucristo noixô âfe Yôshi Sharaôxô ea noikâfe. Ea Nios kîfixokâfe ã yonosharaxonô afanâ ea afeska fanôma. ³¹ Ea kîfixokâfe Epa Niospa ea kexenô Judea anoafâfe a Jesús chanîmara faafâfema ea afeska fanôfoma. Ea kîfixokâfe a Jesús

chanĩmara faifo Jerusalén anoafo ē ato kori ināino inimakōiakai finōfo. ³² Mē ato inākī mitoano Epa Niospa ea nĩchiano ē inimayanā matoki nokoxinō. Nāskata nō yoinōnāsharaxinō nōko ōiti mēra inimayanā. ³³ Epa Nios mato fe inō. Akka Niospa noko imasharatiro nō isharanō.

16

Pablo ato meka fomani

¹⁻² Nofe yora Febe, Cencrea anoax matoki nokokē sharafakāfe. Nā kēromā nōko Ifo Ifofasharakōimis. Cencrea anoxō a Nios Ifofaafō ato sharafaxomis. Yora fetsafori ato afara yopaito axokāfe.

³ Aquila āfe āfi Prisca nā rafe efeta Jesucristo yonosharaxomisfo. Ea ato yoisharaxokāfe. ⁴ Yorafāfe ea retepaiyaiāfāfe nā rafeta ea kexesharamisfo ea reteyamanōfo. Ēfe kaifomari nā Jesús chanĩmara faafāfe ichanākaxō yoimisfo iskafakī: “Aquila yafi Prisca nō atoki inimasharakōi,” ixō yoimisfo. ⁵ Āto pexe anoaxri ichanākaxō ea ato yoisharaxokāfe. Efe yorakōiri Epeneto ea yoisharaxokāfe. Nāatofi Asia anoxō Cristo chanĩmara fakī taefaniki. ⁶ Marĩari mato yonosharaxomiski aari ea yoisharaxokāfe. ⁷ Efe yora raferi Andrónico yafi Junias ea ato yoisharaxokāfe. Nā rafe efe karaxa mēra ikinifo. A Jesúsnoa yoimisfāfe a rafeōnoa yoisharamisfo. Ē Jesucristo chanĩmara famatai nā rafeta chanĩmara fakī taefanifo.

⁸ Ampliatori ē noishara nāatomāi nōko Ifo Ifofasharakōiaito. Aari ea yoisharaxokāfe. ⁹ Urbano efeta Jesucristo yonoxomis. Nārifi ea yoisharaxokāfe. Efe yorashtari Estaquis nāri ea yoisharaxokāfe. ¹⁰ Apeles feronāfake sharakōi. Epa Nios akiki inimamis. Nāatori Jesucristo yonosharaxomis. Nāri ea yoisharaxokāfe. Aristóbulo yafi afe yorafori ea ato yoisharaxokāfe. ¹¹ Efe yorashtari Herodión ea yoisharaxokāfe. Narciso yafi afe yorafāferi nōko Ifo chanĩmara faafo, afori ea ato yoisharaxokāfe. ¹² Trifena yafi Trifosari ea ato yoisharaxokāfe. Nā kēro rafeta nōko Ifo yonosharaxomisfo. Nofe yora Pérsidari ea yoisharaxokāfe. Nā kēromāri nōko Ifo yonosharaxomiski. ¹³ Nōko Ifāfe Rufori katoni afe yora inō. Nā Rufo āfe afa ēfe efakōi keskara. Ea kexesharamis. Nā raferi ea ato yoisharaxokāfe. ¹⁴ Asĩcrito ikaino Flegonte ikaino Hermas ikaino Patrobas ikaino Hermes ikaino nāfāfe nōko Ifo chanĩmara faafo. A fetsafāferi nōko Ifo chanĩmara fakanax ato fe ikafori ea ato yoisharaxokāfe. ¹⁵ Filólogo ikaino Julia ikaino Nereo ikaino āfe poi Olimpas ikaino keyokōi a nōko Ifo chanĩmara fakanax ato fe ikafori ea ato yoisharaxokāfe.

¹⁶ Keyokōi ichanākanax yoinōnā faatanāsharakāfe noinōnāsharaxikakī. Nā maitio ikafāfe a Cristo Ifofaafāfe mato yoisharapaikani.

¹⁷ Efe yora mĩshtichi, ē mato yoinō nikakapo. Mato fe ichanāmis fetsafāfe mato afara chakafamapaikani anā mā Jesúsnoa shinānōma. Akka nō mato mēstekōi tāpimanai keskara nāfāfe mato anori yoikanima. Akka fakirira mato yoipaikani anā mā Jesús shinānōma. Nāskax ato fe rafeyamakāfe, mato pāratirofokī. ¹⁸ Afāfekai nōko Ifo Cristoōxō yoimisfoma. Nāfāfe afara fipaiyaifo fistis shināmisfo. Niospa meka tāpisharafoma āto meka fistiōxō ato pārapaikani ato anorima shināmaxikakī. ¹⁹ Keyokōichi mā nikafo nōko Ifo mā Ifofasharakōikē. Nāskakē ē matoki inimakōini. Afara sharafoōnoa tāpikōikāfe. Mā afara chakaōnoa tāpiyamakāfe. Afoōnoa shināyamakāfe. ²⁰ Epa Niospa mato imasharatiro mā isharanō. Nāato Satanás mato nāmā potai anā mato afeskafanōma. Nōko Ifo Jesucristo mato sharafaxopainō.

²¹ Nā Timoteo efeta Jesús yonoxomisto mato mekashara fomai. Askatari Lucio ikaino Jasón ikaino Sosípater ikaino nāfāferi mato mekashara fomakani. Nāfo efe yorakōifo.

²² Nā Terciori mato mekashara fomai. Nāato ea kirika kenexona.

²³ Gayopa pexe mēra ē ikē ea kexemis. Jesús chanīmara faa fetsafori Gayopa pexe mēranoax ichanāmisfo. Nāfāferi mato mekashara fomakani. Na Erasto pexe rasi anoa ato kori kexexomisto mato mekashara fomai. Askatari nofe yora fetsari Cuarto nāatori mato mekashara fomai.

²⁴ Nōko Ifo Jesucristo mato noikī mato sharafanō. Askapainō.

Mā ato yoikī enekī Niosnoa ato yoisharani

²⁵⁻²⁶ Epa Niospa mato kexesharanō. Ē Jesucristoōnoa mato yoimis keskara āfe shināmā mato shināmatiro mā Ifofasharanō. A iyopaonifāfekai tsōa Jesucristoōnoa tāpiyopaonifoma. Akka iskaratīa keyokōichi mā tāpiafo. Epa Niospa nā nipanakato noko nīchini Jesucristoōnoa nō ato yoinō. A ixiainoa Epa Niospa ato yoini nānorikōi kirika kenenifo. Nā maitio ikafāfe Jesús chanīmara fayana nikasharatirofo.

²⁷ Nōko Ifo Jesucristoxō keyokōichi Niosnoa yoisharapakenakafo. Nōko Nios fistichi keyokōi tāpikōia. Askapainō.

Nā tii ē mato yoi.

Pablo Corinto Anoafo Kirika Kenexõ Fomani

Pablo Jesús chanĩmara faafo Corinto anoafo kirika kenexõ ato fomani

¹ Èkĩa Pablo, ã mato kirika kenexõ fomai. Nofe yora feta nã Jesús Ifofamis feta, ãfe ane Sóstenes, efeta mato kirika kenexoni. Epa Niospa ea katopaikĩ ea katonĩ ãfe meka shara Jesucristoõnoa ã yoifofãsafanõ. ² Akka Jesucristo ea nĩchini ã ãfe meka shara keyokõĩ maifo tii ã ato yoifofãsafanõ. Corinto anoaãfe mãfi Niospa fakefoki. Nãskakẽ ã mato kirika kenexõ fomai. Mã mẽxotaima ichanãmis Niospa meka shara tãpisharakõixikĩ. Niospa mato katonĩ Jesucristoõnoax mã afe yora shara inõ. Mato fisti katonima, a shinãifori keyokõĩ ato katonĩ mato fe Niospa yora inõfo. Nã mai fetsa anoaãfe nõko Ifo ãto Ifori. ³ Mato noikĩ mato shinã mẽraxõ mato shinãmasharanõ. Epa Nios feta nõko Ifo Jesucristo mato askafanõ.

Jesucristo afara sharafo noko axotiro

⁴ Mẽ tãpia Jesucristo mato noikĩ afarafo mato tãpimani ãfe õiti keskara mã inõ. Nãskara tãpixõ ã Epa Nios kĩfikĩ iskafa fafafaĩni: “Aicho Epa Niosi, mã Corinto anoafo afara sharafo Jesucristoõxõ mã ato tãpimanaki,” ixõ ã kĩfifafaĩni. ⁵ Chanĩma, Jesucristo mato fe rafesharaino aõxõ mã Niosnoa tãpisharakõitiro. Akka ãfe shinãõxõ xafakĩ mã yorafo mã yoisharatiro. Jesucristoõnoa mã ato yoisharatiro. ⁶ Nõ mato Jesúsnoa yoini keskara nikakĩ mato õiti fetsafaxõ a keskara shara mã ixii. Nãskakẽ mã Jesús chanĩmara faxõ mã mã ato õimana. ⁷ Nãskakẽ Epa Niospa ãfe Yõshi Sharaõxõ mato imapaiyai keskara mã iki. Nios chanĩmara faa fetsafo nãskarifiakani Niospa mato shinãmasharaino. Nãskakẽ mã nõko Ifo Jesucristo fe ipaikõikĩ mã manasharai nã nokoaitĩa õixikĩ. ⁸ Oyoxoma mato kexesharayoi. ãfe kerex shara mato inãyoi mã Ifofasharano. Nãskakẽ nokoõxõ yoixii iskafakĩ: “Mãfi efe ipanakaki, ã mato chaka soaxonano. Nãskakẽ tsõa mato iskafatiroma: ‘Mã chakakõifoki,’ mato tsõa fatirofoma,” ixõ mato Jesús yoixii. ⁹ Epa Niospa mato katonĩ ãfe Fake nõko Ifo Jesucristo fe mã rafenõ. Epa Nios chanĩma, noko yoiai keskara aki.

Corinto anoxõ Jesús chanĩmara faafãfe anoris shinãnifoma

¹⁰ Efe yora mĩshtichi, ã mato yoisharapai. Nõko Ifo Jesucristo ea yoiaino ã mato yoi nãnorifos mã shinãnõ, mã fetsa shinãnõma. Jesucristo mato shinãmapaiyai keskara fisti shinãkãfe. ¹¹ Efe yora mĩshtichi, mẽ nika a Jesucristo mato shinãmapaiyai keskara fisti mã shinãima. Cloépa afe yorafo nono fẽkaxõ ea yoiafo mã feratenã faatanãito. ¹² Akka mã atiri iskai fetsei: “Nõfi Pablo ifofamiski. Noko tãpimanai keskara kayakaikõĩ nõ nikamis. Fetsafãfekai kayakai shinãkanima,” ixõ mã yoimis. Askatari fetsafori iskakani: “Nõfi Apolos ifofamiski,” ixõ mã yoimis. Askatari fetsafori mã iskamis: “Nõfi Pedro ifofamiski,” ixõ mã yoimis. Askatari fetsafori mã iskamis: “Nõfi Cristo Ifofai,” ixõ mã yoiketsamis.

¹³ Efe yora mĩshtichi, ¿afeskai mã feratenãimẽ? Askarakai sharama. Cristokai anori noko shinãmanima feratenãyanã anorima nõ shinãkatsanõ. Cristokai ãfe shinã ranãyama. Mẽstekõĩ fisti noko yoimis. Akka, ¿afeskakĩ “Nõ Pablo ifofaira” mã ato faimẽ? Èkai mato ifi cruz ikakĩnoax nãxonima. Cristo fistichi mato ifi cruz ikakĩnoax nãxonni mã Ifofanõ. Askatari ãkai tsoa faka mẽra ikimakĩ maotisafama ea ifofanõfo. ¹⁴ Nãskakẽ ã inimai. Èkai tsoa

maotisafama. Akka Crispo yafi Gayo nā rafes ē maotisafa Cristo Ifofaifāfe ōikī. ¹⁵ Nāskakē tsōa yoitiroma iskafakī: “Pablo āfe aneōnoax ē maotisameni. Nāskakē ē Pablo ifofai,” ixō tsōa shinātiroma. ¹⁶ Chōō, iskaratīari ē rama shināi. Estēfanas yafi afe yorafori ē ato maotisafani. Ē shināyoama ē tsoa fetsa maotisafamara ē ika. ¹⁷ Cristokai ea yoiama ē yorafo maotisafapanō. Akka ea yoia ē aōnoa meka shara ē mato yoinō. Ēa shināxō ē mato yoima. Ēa shināxokai ē mato Jesucristo chanīmara famatiroma. Jesucristo mato ifi cruz ikakīnoax nāxoni mato chaka soaxoxikī. Cristo mekaōxō Niospa mato chanīmara famatiroma.

Epa Niospa keyokōi tāpikōia afara fetsa apaikī atiro. Cristoōxō noko ōimayopaoni

¹⁸ Nāskakē Jesús ato nāxoni nikakanax a chanīmara faafāfema yoikī iskafakani: “Jesús ifi cruz ikakinoax noko nāxoni nōko chaka noko soaxoxikī, ixō noko yoipaiyaiāfē nōkai chanīmara fatiroma. Āa chanīkani,” ixō shināmisfo. Nāskakanax nāfo fenokōikani. Omiskōipakenakafo mēra fokani. Akka nō Jesús chanīmara faito noko nimapakenaka nō afe ipaxanō. Niospa āfe shināōxō Jesús noko nāxoni nōko chaka noko soaxoxikī. Afara fētsakai noko nimatiroma nō afe nīpaxanō. ¹⁹ Akka Niospa meka kirikaki kenekī iskafanifo:

Fētsa yoikī iskafatiroma: “Nō tāpikōia. Nōko māpo shināsharafāi nō afara fetsafo fatiro nōfi tāpisharakōiakī,” ixō shināfikakī afaa tāpiafoma. Askarafofi ē ato ōimanikāi afāfe shināifo keskarakai ē ato shināmanima. Nāfāfekai afaa tāpimisfoma. Āa shināmisfo, ixō Niospa yoinō.

²⁰ Akka, ¿fanīmē a nō kirika kenekī tāpiakōiara imisfo? Akka tāpifikaxō a Niospa shināi keskara shinākanima. Nāfofi Niospa ato ōimaxii afaa tāpiafoma keskara fakī. “Nōfi afama mīshti tāpikōiakī,” ifiaifāfe Niospa afaa tāpiama keskarafoma ato imai. ²¹ Tsōa pishtakai āto shināmā Nios tāpitirofoma. Nios fistichi keyokōi tāpisharakōia. Nāskakē nō ato yoimis iskafakī: “Niospa tāpikōixō āfe Fake Jesucristo nīchini noko nāxonō nōko chaka noko soaxoxikī,” ixō nō ato yoimis. A Nios chanīmara faafāfema yoikī iskafamisfo: “Jesús chanīmara faifāfe aōnoa anorima yoimisfo,” ato famisfo. Akka nā Jesús chanīmara faifo Niospa ato chaka soaxoni afe nīpaxanōfo. Nā nō mato yoimis.

²² Akka ēfe kaifo judeofo iskamisfo: “Niospa nai mēraxō afama mīshti noko ōimanaito chipo nō Jesús chanīmara fatiro,” ixō shināmisfo. Akka nā judeofomafāferi afama mīshti tāpipaikani. Afeskaxō Niospa yorafo imasharaimākai tāpipaikani. Askatari afeskaxō Jesús yorafo āto chaka soaxonomākī nāri tāpipaikani. Afama mīshti āa shinākakī tāpipaikani. Akka tāpitirofoma. Nāskakē iskamisfo: “Noko Jesucristoōnoa yoiaifono nō tāpitiroma, fekaxkōi. Nāskakē nō Jesús chanīmara faima. Nā afara nōa nō shināi nā nō chanīmara fai,” ixō yoimisfo. ²³ Nānori shināfiaifono nō yoikī iskafamis: “Jesucristo ifi cruz ikakinoax noko nāxoni noko chaka soaxoxikī,” ixō nō yoimis. Akka ēfe kaifāfe judeofāfe yoikī iskafamisfo: “Ifi cruz ikakī mastafo askarakai nōko Ifo itiroma. Akka Cristokai afeskax natiroma,” ixō judeofāfe shināmisfo. Nāskatari yora fetsafo Cristoōnoa nikakani akiki kaxepaikani iskamisfo: “Tsōakai askara chanīmara faima. Akka tsoa fētsakai noko nāxotiroma,” ixō yoimisfo. ²⁴ Askafiaifono nā chanīmara faifo tii Niospa ato katoni afe ipaxanōfo. Judeofo yafi judeofomari Cristoōxō Epa Niospa ato katoni chanīmara faifāfe. Nāskakē āfe shinā sharaōxō ato nima. Atofi keyokōi tāpikōiakī

Cristoõxõ noko nima nõ afe nipaxanõ. ²⁵ Jesús chanĩmara faafãfema yoikĩ iskafamisfo: “Jesucristo noko nãxoni,” ixõ yoifikakĩ anorima shinãmisfo, ãa chanĩkakĩ. “Akka yora mapo sharayato Cristo chanĩmara fatiro,” ixõ yoimisfo a Jesús chanĩmara faafãfema. Akka anorima yoifiafono Niospa ãfe Fake Jesús noko nĩchixonĩ noko nãxoyonõ. Nãskax Niospa ãfe shinã a chanĩmara faafãfema ãto shinã keskarama. Aatofi mēstekõĩ shinãmisfo. Akka nã chanĩmara faafãfema yoimisfo iskafakakĩ: “Nõ tãpikõia,” ixõ yoifikakĩ yoisharamisfoma. Anorima shinãmisfo. “Nõ afama mĩshti fatiro,” ifiakakĩ fetsafo nimasharatirofoma. Askafikata aforikakĩ ãa chaka soametirofoma. Akka Epa Nios fistichi afama mĩshti fatiroxakĩ noko chaka soaxotiro.

²⁶ Efe yora mĩshtichi, Niospa rama mato katoano afe keskara mã iyopaonimãki. Shinãkapo. Mã fisti rasichi mã kirika kene tãpia mã ipaonĩ. Askatari mã xanĩfo ipaonima. Nãskax mã finakõia mã ipaonima. Akka nã Jesús chanĩmara faafãfema yoikĩ iskafamisfo: “Afãfekai afaa tãpiafoma,” ixõ mato yoimisfo. ²⁷ Mato askafafiaifono Epa Niospa mato katonĩ afe yora mã inõ. Matoõnoa yoimisfo iskafakakĩ a Jesús Ifofaifãfema: “Afãfekai afaa tãpiafoma. Shinãsharakanima,” ixõ yoimisfo. Askatari shinãmisfo iskakakĩ: “Nõfi afama mĩshti fatiroki. Akka a Jesús chanĩmara faifo pachikõifo, kerexkai shinãtirofoma. Nõ atiro keskara atirofoma,” ixõ shinãmisfo. Mato askafafiakakĩ chipo mato tãpitirofo. Niospa mato afara shara tãpimanaino õikani rãfipaitirofo. ²⁸ Nãskakē shinãkani iskakakĩ: “Jesús chanĩmara faifo afãfekai afaa tãpiafoma. Nãskakē nõ ato õipaima,” ixõ matoõnoa mato yoifiaifono Niospa mato katonĩ afe yora mã inõ. “Mãkai afaama,” mato fafiaifono Niospa mato katonĩ mã ato õimanõ akka afãfekairoko afaa tãpiafoma. ²⁹ Akka tsoã pishtakai Niospa ferotaifi yoitiroma iskafakĩ: “Ë tsoã keskarama. Ë shara shinãĩ fetsafo keskarama,” ixõ yoitiroma. ³⁰ Niosnoax Jesucristo afe yorafo mã inõ. Jesucristoõxõ noko mēstekõĩ tãpimani ãfe õiti keskara noko imaxii. Noko nãxoni noko chaka soaxoxiki nõ afe nĩpaxanõ. ³¹ Nãskakē nõ Jesús chanĩmara faaxkai nõ kakapaimis itiroma. Niospa meka yoikĩ yõra kirika keneni iskafakĩ: “Akka tsoakai ãa yoimesharatiroma iskai: ‘Ë afama mĩshti tãpikõia,’ ikax ãa kakapaitiroma. Askatamaroko nõ yoisharatiro nã afara sharafo nõko Ifãfe aka,” ixõ kirika ano yõra keneni.

2

Jesucristo ifi cruz ikakĩ mastanifo Pablo ato yoini Corinto anoafõ

¹ Efe yora mĩshtichi, ã matoki nokofenaxõ yõra shinãõxõ ã mato Niospa meka yoiyameama. Niospa ãfe shinã fistiõxõ ã mato yoiyamea. Ëa shinãõ ã mato yoiyameama. Niospa ea shinãmanaino ã mato yoiyamea. ² Ë matoki oyoxoma ã shinãkĩ iskafani: “Jesucristo ifi cruz ikakinoax noko nãxoni, nã fisti ã ato yoixikai. Afaa fetsa ã ato yoitiromaki,” ixõ ã shinãyamea. ³ Askata mē nokoax ã matoki ratekõiyamea. Nãskakĩ rateyanã ã shinãyamea iskafakĩ: “Ë mĩsisipama ea õikakĩ ea nikakaspatirofo,” ixõ ã shinãyamea. ⁴ Nãskakē ã mato Jesucristoõnoa yoimis ãfe shinãmã shinãõxõ ã mato yoitamaroko Niospa Yõshi Sharapa ea shinãmanaino ã mato yoiyamea. Ë mato yoiaino aõxõ mã Jesús chanĩmara fayamea. ⁵ Akka yõra shinãõxõ mã Jesús chanĩmara fayameama. Niospa shinãõxõ mã chanĩmara fayamea.

Niospa Yõshi Sharapa noko shinãmasharatiro

⁶ Nāskakē a Niospa meka nikasharaifāfe mā tāpiafo nō Niospa Yōshi Sharaōxō xafakīakōi nō ato yoiaito. Nāskaifono fetsafāferi kirika kene tāpisharakōifikaxō Niospa shināi keskara tsōa anori shināima. Āto shināōxōkai Niospa meka nō mato yoima. Āto xanīfofōfāfe shināifo keskararikai nō mato yoima. Akka āto xanīfofo mā chaimashta tsekekani. Anā afo xanīfo ikanima. Nā xanīfofōfāfe shināifo keskara mā keyoi. A shara shināifo keskara shinākanaxma. ⁷ A nō mato iskaratīa Niosxō yoia tsōa tāpiyopaonima. Niospa mai onifayoxoma shinākī iskafani: “Ēfe Fāke ato chipo nāxoxii nā chanīmara faafo tii ato nimapakexixakī,” ixō shināni. ⁸ Ē na meka mato yoiāi keskarakai xanīfofōfāfe tāpiyopaonifoma. Nāskaxō Jesús retenifo. Akka tāpikaxokai tsōa nōko Ifo Cristo ifi cruz ikaki mastakeranifoma. Nā nōko Ifo Cristo sharaifnakōia. ⁹ Akka yōra kirika kenekī iskafani:

Afama mīshti shara Niospa ato axoxii. Tsōa ōiyomisma sharafo ato axoxii. A tsōa nikayomisma ato axōfāi a tsoa pishta āto shinā mēraxō shināyomisfoma nāfo ato axosharaxii. A ato noiaifo ato itipinīshara faxoxii, nāskara yoikī Niospa meka yōra kirikaki kenenī. ¹⁰ Nā kirika kenekī yoinifo keskarakōi Epa Niospa āfe Yōshi Sharapa noko ōimani. Āfe Yōshi Sharapa keyokōi tāpikōia. Epa Niospa shināi keskarari āfe Yōshi Sharapari tāpikōia.

¹¹ Yōra āfe shinā mēraxō āa shināitokai tsōa tāpitiroma. Akka ares fisti tāpitiro. Nāskarīfiai Epa Niospa shināi keskara āfe Yōshi Shara fistichi tāpikōia.

¹² Epa Niospa āfe Yōshi Shara nokoki nīchini noko tāpimapaiyai keskara noko tāpimanō. Akka nā chanīmara faafāfema Niospa meka nikakanima. Nāfāfe shināi keskarakai Niospa noko shināmanima.

¹³ Nāskakē yorafāfe noko tāpimanifo keskara nō mato yoitamaro Niospa Yōshi Sharapa nōko shinā mēraxō noko shināmana keskara nō mato yoimis. Āfe meka chanīmakōi fisti. Nāskakē nōri aōxō nō mato chanīmakōi Niospa mekakōi tāpimani. Nā meka shara mā nikamis māmāi Niospa Yōshi Shara mato fe rafeano.

¹⁴ Akka fetsafo Niospa Yōshi Shara fe rafeyamano nāfāfe Niospa Yōshi Sharapa yoiāi keskara nikakaspakani. Nāskaxō iskafatirofo: “Tsōakai nā meka chanīmara faima. Akka nā shara shināifāfe chanīmara fakanima,” ixō shinākani. Akka Niospa Yōshi Sharapa shināi keskara tsōa tāpiama. Nāskakē Niospa Yōshi Shara ato fe rafeyamano a yoiāi keskara tāpiafoma. Akka Niospa Yōshi Shara fistichi ato tāpimatiro chanīmara faifono. ¹⁵ Akka fatora fetsa Niospa Yōshi Shara afe ikano Niospa tāpimapaiyai keskara tāpitiro. Fatoforimākī chaka shināifo, askatari fatoforimākī shara shināifo Niospa Yōshi Sharapa ato tāpimatiro. Nāskakē a Niospa Yōshi Shara fe rafeyamato a Jesús chanīmara faifo ato tāpitirofoma. ¹⁶ Akka Isaías kirika kenenī iskafakī:

Tsōakai nōko Ifāfe āfe shinā mēraxō shināi keskara tāpitiroma. Tsōakai nōko Ifo tāpimatiroma, ixō kirika kenenī. Askafiaifono nā nō Cristo chanīmara faifāfe a shināi keskara nō tāpitiro nō afe rafexō.

3

Corinto anoafo Niospa Yōshi Shara fe rafeafoma

¹ A fake rama kāiatokai afaa tāpitiroma. Mā yosixō tāpitiro afara fetsa. Nāskarīfiai a rama Jesús Ifoifāfē Niospa meka tāpisharafo a fake yome rama kāia keskarāfo. Nāskarāfo mā Jesús māto Ifo fiano ranārīto āfe

meka mā tāpisharama. Mā rama Jesús Ifofayamafiai oa rama Jesús Ifo-
faifo keskarafō, mā. Niospa meka mā mā nikafikatsaxakī a yoiai keskara
mā nikasharama. Ooa efe yora mīstichi, māfi Niospa meka nikamisma
keskarafoki, rama Jesús Ifofoifo keskara. Māfi nā Niospa Yōshi Shara fe
rafeama keskarafō. Nāskakē ē mato Niospa meka tāpimasharatiroma mākauroko
itipinīsharakē nikasharaxikima. ² Fake yome rama kāiato chocho fisti atiro,
afaakai pitiroma. Nāskarifiakī Niospa meka mā nikapaifikī āfe meka mā
nikasharatiroma. Nāskakē āfe meka ichapa ē mato yoiyotiroma. Āfe
meka fetsafori ē mato yoipaiifaino mā nikasharaima. Nāskax mākaui itip-
inīsharapaima Niospa meka nikasharaxikima. ³ Māfi nā Niospa Yōshi Shara fe
rafeama keskarafokī. Nāskaxō fetsafo mā ato xītipai mā ato keskara ipaikī.
Nāskax mā fochishpanā faatanāi mā ika. Nāskaxō yōra shināi keskara mā
shināi. Akka Niospa Yōshi Sharapa mato shināmapaiyai keskara mā shināima.
⁴ Mā fatora fetsafāfe yoikī iskafai: “Nōfi Pablo ifofakī. Pablo fistichi noko
tāpimasharatiro,” ixō mā yoimis. Akka fetsafāferi mā yoikī iskafai: “Nōfi Apolos
ifofakī. Apolos noko shara yoitiro,” ixō mā yoimis. Nāskax mā fochishpanā
faatanāpai. Nāskaxō yōra shināi keskara mā shināi. Askarafokai Niospa Yōshi
Sharapa mato shināmanima.

⁵ Akka askayamakāfe. Nō afaama. Akka Apolos fetakai nō afaa tāpiama.
Nōkai Nios keskarama. Akka nōfi āfe inaki. Nāskaxō nō mato Jesús chanīmara
famani. Nōko Ifo Niospa noko katonī noko yonomapaiyai keskara nō
yonoxonō. ⁶ Ē mato iskafakī yoipai. Yora fētsa taefakī xiki fanatiro.
Fetsafāfe a nāmā orometirofo foaisharanō. Nāskafixokai nā rafeta xiki
foaimatirofoma. Nios fistichi xiki foaimasharatiro. Nāskarifiakī ē mato
taefakī Jesucristo chanīmara famani. Chipō Apolos Cristoōnoa mato yoini
āfe meka mā nikasharakōinō. Nō mato yoiaino Nios fistichi mato shinā
mēraxō mato shināmasharatiro āfe meka mā tāpisharakōinō. ⁷ Nā ē mato
yoiaito mā nikai keskara Apolos feta nō afaa tāpiama. Akka Nios fistichi
yorafo shināmasharatiro āfe meka tāpisharakōinōfo. ⁸ Akka taefakī fetsafo
Jesús chanīmara famano, a chipō ato yoiaitori nānorikōiri ato yoi. Nā rafe-
tamāi nānorikōi shinākakī Niospamāi ato shināmanaino. Nāskakē ato Jesúsnoa
yoixikani a Ifofasharanōfo. Nāskatari Niospa a yonoxonafo ato afara ināxii.
Fetsa ichapa ināta fetsafori ichapama ināxii yonoxosharafomano. ⁹ Efe
yora mīstichi, ē meka fetsa mato yoipai. Tarepa ifo fistifiano fetsafāferi
yonoxotirofo. Askatari pexe ifo fistifiano fetsafāferi yonoxotirofo. Nāskarifiyai
māfi Niospa āfe tare keskarafokī. Askatari mā āfe pexe keskara. Nios fisti
māto Ifo. Akka nōri Apolos feta yonoxomiskī. Noko yoiai keskara nō mato
tāpimasharani āfe meka mā nikasharakōinō.

¹⁰ Ē mato yoinō afeska faxō pexe fatirofomāki. Taefakī āfe kishi kerexkōi
fikaxō nīchitirofo. Mā kishi nīchikaxō aōxō yonotirofo. Nāskarifiyai māfi pexe
keskarakī. Akka nō mato Niospa meka tāpimani nā pexe faifo keskara.
Cristofi pexe kishi keskarakī. Nā āfe kishiōnoax pexe nitiro. Nāskarifiakī
Cristo mato nimai. Ea Niospa tāpimashara keskarari taefakī ē mato yoiaito
mā Cristo Ifofani. Askatari fetsafāferi nānorikōi mato yoikani mā Cristo
Ifofasharanō. Nāskata nā fetsafo ē ato yoimis iskafakī: “Shināsharata ato
mēstekōi yoisharakāfe,” ixō ē ato yoimis. ¹¹ Ē mato taefakī Cristoōnoa yoini
mā Ifofanō. Akka tsōakai mato yoikī iskafatiroma: “Ē mato meka fetsa
tāpimanō mā chanīmara faax Nios fe ĩpaxanō,” ixō tsōa mato anori yoitiroma.
Jesucristo fistichi noko nimasharatiro nō Nios fe ĩpaxanō. ¹² Afara fetsa

anã ã mato yoinõ, ea nikakapo. Fõtsa pexe fakĩ kishi kerexkõĩ nĩchitiro. Akka fõtsari akiki rofetaxõ kerexkõĩ kenetirofo. Fõtsari akiki oro kenetiro. Fõtsari akiki tokiri sharakõĩ kenetirofo. Askatari fõtsari akiki ifi kerexma kenetirofo. Fõtsari xepa pei akiki kenetirofo. Fõtsari tafa akiki kenetiro. Nãskakẽ nã pexe kooaino pexe ano ikafo ichtirofo kooyamaxikakĩ. Akka pexe kishi kerexkõĩ akiki keneafõ oro akiki keneta, roe taxo akiki keneta, tokiri sharari akiki keneafono kootirofoma. Akka nã ifi kerexma kootiro. Xepa peifori kootiro. Tafari kootiro. ¹³ Nãskarifiã Nios nã pẽxe ifo keskara. Niospa meka yoimisfo nã pexe ifo pexe faxõãifo keskarafo. Fetsafãfe shara faxomis, fetsafãferi shara faxomisma. Nãskaxõ anã oaitĩã Cristo noko õimaxii nã nõ axomis keskara fatõfo keyonakamakĩ. Akka fatõfori nipanakafomãkĩ. Noko õimaxii afeskaõ nõ Nios yonoxonamãkĩ. Fõtsa Jesũs Ifofasharaxoma ãã shinãõ Niospa meka ato yoisharaima, tãpisharaxoma ato yoisharatiroma. A yoiã keskara sharama, ifi kerexma keskara, samama keyotiro. Akka fõtsa Niospa mekakõĩ ato yoi. Niospa shinãmanaino ato tãpimani. Nã tokiri kerexkõĩ keskara keyotiroma. ¹⁴ Nãskatari fatõfora Nios yonosharaxonano Niospa afara shara inãsharaxii nã Jesũs oaitĩã. ¹⁵ Akka fatõforari Nios yonosharaxonamano Niospa afara shara inãima. Nãskafiax Nios fe ipanaka. ãã kaxpa yonokatsaxakĩ akka ãfe yono keyoxii.

¹⁶ Akka, çmã tãpimamẽ mã Niospa pexe keskarakõĩ? ãfe Yõshi Shara mato mẽra ika. ¹⁷ A Nios ika anokai afãã chakama. Nãskakẽ ãfe Yõshi Shara mato mẽra ikano õisharakãfe chaka shinãĩ iyamakãfe. Mã ãfe nĩpaxanõ Niospa mato katonĩ ãfe yora mã inõ. Nã Ifõfafo tii ato shara imai. Akka fatõfora ato anõrima yoikĩ ato afara chakafamaino Niospa kopikiri omiskõĩmaxii.

Cristo noko tãpimasharatiro

¹⁸ Efe yora mĩshtichi, iskafakĩ shinãyamakãfe: “Nã Jesũs chanĩmara famafãfe kirika raiskakĩ afama mĩshti tãpisharakõiafo. Nõri ato keskaraxõ anõri shinãkĩ tãpikõia,” ixõ anõri shinãĩ mã pãrameyamakãfe. Jesũs chanĩmara famafãfe shinãkakĩ iskafakani: “Nã Jesũs chanĩmara faafãfe shinãsharakanimã,” ixõ nokoõnoa yoimisfo. Matoõnoa anõri yoifiaifono Niospa mato mẽstekõĩ shinãmasharapai mã shinãtiro. ¹⁹ Nã Jesũs chanĩmara famafãfe shinãkani iskafakakĩ: “Nõfi mẽstekõĩ shinãsharakĩ,” ifiaifãfe Niospa ato õia mẽstekõĩ shinãsharakanimã. Tatima keskarafo ato õi. Nãnorĩ yõra Niospa meka yoikĩ kirika keneni iskafakĩ: “Nã Jesũs chanĩmara famafãfe ãã shinãkani iskakakĩ: ‘Nõfi tãpikĩ finakõiaiki,’ ixõ shinãkakĩ Nios pãratirofoma. ããkõĩ anõri pãramekani. Nãskakanax fenoafõ,” ixõ Niospa meka yõra kirikakĩ keneni. ²⁰ Anã David kirika keneni iskafakĩ: “ ‘Nõfi tãpisharakõiaiki,’ ifiaifãfe nõko Ifo Niospa ato tãpikõixõ yoikĩ iskafatiro: ‘Nafãfekai mẽstekõĩ shinãsharafoma, tatima keskarafo,’ ” ixõ David kirika keneni.

²¹ Nãskakẽ anã yoi iskayamakãfe: “Na feronãfãke a noko tãpimamisto ãfe meka fisti mẽstekõĩ, sharakõĩ,” ixõ anõri anã shinãyamakãfe. Niospa ato shinãmayamainokai tsõã mẽstekõĩ shinãkëranama. Nios fistioxõ nõ mato mẽstekõĩ yoitiro mã tãpisharakõinõ. Keyokõĩ Niosnã, nã Niosnãri mãtonã. Nãskakẽ aõxõ mato shara faxõi. ²² Ë ikaino, Apolos ikaino, Pedro ikaino nõ Nios yonoxomis. ãfe meka nõ mato yoimis mã nikasharanõ. Askatari naax mã ãfe ipaxanõ. Keyokõĩ Niosnã, askatari nã Niosnãri mãtonã. Iskaratĩa afara sharafo ikai aõxõ Niospa mato shara faxõi. Nã chipõ ixiaifõri aõxõri Niospa mato shara faxoxii. Keyokõĩ a Niospa onifanifo mãtonãri. Nãskakẽ mãri ãto ifo ixii. ²³ Akka Cristõfi mãto Ifokĩ. Cristõri ãfe Ifõri Nios.

4

Cristo yonoxomisfāfe afeskaxō yonoxotirofomāki

¹ Akka mā nokoōnoa shinākī iskafatiro: “Nafāfēfi Cristo yonoxomisfokī,” ixō nokoōnoa yoikāfe. Cristoōnoa meka shara tsōa nikayomisma Epa Niospa nōko shinā mēraxō noko shināmanaino nō atori tāpimani. ² Akka āfe inafāfe āfe ifo nikakōitirofo. Āto ifāfe ato yoia keskara axosharatirofo. Akka nōfi Cristo āfe inafoki. Niospa noko yoini iskafakī: “Ē mato yoia keskara ato yoikāfe ato fomākakīma. Ato yoikāfe xanikakīma,” ixō noko yoimis. ³ Nios fistichi tāpikōiakī nā ea yoia keskara ē aki. Akka yorafāfe ea mekafakī chakafakani. Akka fetsafāferi ea yoisharakani. Nāskanōki āa ea mekafanōfo. Ē āto yonomatimaki. Akka ē Niospa yonomatiki. Akka Nios fistichi tāpia ē yonoxosharakōiaito. Yorafāfekai tāpiafoma. Ērikai tāpīama. ⁴ Ēfe shinā mēraxō ē shināi iskafakī: “Ea Niospa yoiāi keskara ē aki,” ixō ē anori shināfiaino nōko Ifo fistichi ea tāpikōia ea yoia keskara ē ayamakī ē akīma. ⁵ Cristo anā oyoamano iskafakī yoiyamakāfe: “Nāfāfekai Nios yonosharaxokanima,” ixō anori yoiyamakāfe. Akka yora fētsa shināi keskara tsōa tāpīama. Shinākapo. Nōko Ifo anā oaitīa keyokōichi noko ōiaifono nōko shinā mēraxō nō shināmis keskara nōko Ifāfe ato ōimaxii. Anākai nō afaa pishta nō fomāxiima, Niospamāi keyokōi tāpikōikē. Nā nō afara shara nō one axomis tsōa ōiyamaino, askatari nā nō afara chakafamis nāfo keyokōi Niospa noko kāimaxoxii. Askatari nō afara shara faino Niospa noko yoikī iskafaxii: “Aicho. Ē mato yoia keskara mā amis. Mā sharakōi,” ixō noko yoixii.

⁶ Efe yora mūshtichi, nānori ē mato yoi mā isharanō. Yōra kirika kenenī keskara a Niospa yoiāi nā fisti ē aki. Nā Apolosri Epa Niospa yoia keskara fisti aki. Nō askafaito mā noko ōixō nō akai keskara māri akāfe. Nāskakē iskayamakāfe: “Nā noko yoimisto āfe meka sharafinakōia, fetsafo keskarama. Akka nō fetsafo nikapaima,” ixō anori shināyamakāfe. ⁷ Akka Niospa keyokōi noko onifani. Nō Nios fistiōxō afara fetsa nō ato sharafaxonō. Nāskaxō, “Nā ē akai keskarakai tsōa atiroma,” ixō shināyamakāfe. Nāskax kakapaimis iyamakāfe.

⁸ Mā shinākī iskafamis: “Nō Niospa meka tāpikōia. Nō fetsafo finōkōia. Nāskaxō nō anā tsoa fichipaima noko tāpimanō. Nōfi Cristo fe xanīfo keskarakī. Nō yorafāfe āto ifo keskarakī,” ixō mā shināi. Nāskapainōra mā xanīfokōifo iki. Mā xanīfokōifo ikaino nōri mato fe xanīfo ikerana. Akka nō xanīfoma. Noko tsōa ifofaima. ⁹ Ē afara fetsa mato yoipai, nikakapo. Karaxa mēra ikiafo ato retematirofo. Yora ichapafāfe ōiaifono ato retematirofo. Nāskarifiakī nōri ato keskara. Noko Jesús nīchini nō aōnoa meka shara nō ato yoinō. Nō Jesúsnoa yoiāx nō Jesúsnoax omiskōiaino keyokōi yorafāfe noko ōikani. Niospa āfe ājirifāferi noko ōikani. Nō yora mitsisipama noko ōikani, nōkairoko xanīfo keskarakē. Nō āto nāmā rakakōia noko ōikani.

¹⁰ Nāskakē ē Jesucristo Ifofamis. Akka mā ea yoimis: “Pablo afaa tāpīamara,” mā ea famis. Askatari, “Nō Jesús Ifofakī nō tāpisharakōia,” mā imis. Askafixō mā tāpisharakōia. Nāskaxori mā ea yoimis, “Na Pablo afaa afeska fatiroma. Akka nō afarafo nō atiro,” mā imis. Askafixō mā askafatiroma. Mā shinākī sharakōi mā meei. Akka ea mā ōia ē afaamakōi mā ea ōimis. ¹¹ Akka iskaratīari nōfi fonāyanā nōamaikīyanā rapatī shara safeyamata nō imis. Askatari noko koshamisfo. Akka pexemais ixō Niospa meka fisti nō ato yoifofāsafamis. Nāskax nō omiskōi. ¹² Nāskaxō nō kerexkai yonotiro a nō piāi fixiki. Nāskatari yorafāfe noko mekafakī chakafaifono ato kopitamaro nō tenemis. “Jesús mato shara faxopainō,” ixō nō yoimis. Noko

omiskõimafiaifono nõ tenemis. ¹³ Askatari noko ičhaifäfe ato kopitamaroko Niospa meka shara nõ ato yoimis. Nāskakē iskaratīa noko chakafakani, “Māfi nā afamafo keskarakī, nā afara chaka potafo keskara,” ixõ nokoõnoa yoimisfo.

¹⁴ Nāskakē ē mato nānori yoikī kirika kenexõ ē mato rāfimapaima. Askatamaroko ē mato shināmasharapai. Akka māfi ēfe fakekõifo keskarafoki. Ē mato noikõi. Nāskakē ē mato yoisharapai anā mā anorima shināyamanõ.

¹⁵ Yora ichapato mato Cristoõnoa tāpimakani. Akka ē taefakī mato Cristoõnoa tāpimayoni. Nāskakē mā Cristo chanīmara fani. Eõnoax mā Niospa fakekõifo. Nāskatari ē mato epa keskarakõi. Fetsafäfe Cristoõnoa mato tāpimafiaifono afokai mato epa keskarama. Akka ē fisti mato epa keskarakõi. ¹⁶ Nāskakē nā ē ikai keskakäfe. Ē Nios Ifofasharai keskakafakī māri askakafäfe. ¹⁷ Nāskakē ē Timoteo matoki nīchikai. Ē Timoteo Cristo chanīmara famaki taefani. Nāskax ēfe fake keskarakī. Ē aõ noikõi. Nõko Ifo Jesús yoiai keskarakõi nikakõi. Ē Jesucristo Ifofai keskara Timoteo mato shināmaxii mā shināmakinõma. Nā chanīmara faafo pexe rasi tii anoafo ē ato tāpimani keskara Timoteori mato tāpimaxii.

¹⁸ Mē tāpia mā ranārīto shinākī iskafai: “Pablo Timoteo nokoki nīchi nokoki mesekī. Āakai nokoki opaima. Akka nõ keyokõi tāpikõia. Nõ Pablo yopaima,” ixõ mā shināi. Askai mā kakapaimis. ¹⁹ Anori mā shināfiaino ē samamakõi ē mato ari kaikai. Niospa ea yoiano ē samamakõi mato ari kai. Mē mato ano nokoõxõ ē tāpixii nā kakapaimisfäfe Niospa Yõshi Sharaõxõ yoikanimākai, āakõi yoimisfomākī. ²⁰ Nios nõko Ifono nõ meka fisti yoitamaroko äfe shinā sharaõnoax nõ isharatiro. ²¹ Nāskakē nā ē matoki nokoaitīa äfe shinā sharaõnoax ē matoki nokoxii. Mē nokoxõ ē tāpixii afeskak mā ikamākī. Mā chaka xateyamakē Niosxõ ē mato tāpimaxii omiskõimakī. Akka mato chaka mā xatekē ē mato noikõikī fenāmāshta ē mato yoisharaxii. Nāskakē ē matoki nokoxõ ē mato omiskõimayamano fenāmāshta oi tsii faxõ ē mato yoixii ea yoikäfe fato mā fichipaimākai.

5

Jesús chanīmara fafiakaxõ afara chakafakani (Hch. 9.1-19; 22.6-16)

¹ Mē nika mato mēraxõ feronāfake fistichi afara chakafaito. Akka, ¿afeskakī mā yoimamē anā afaa chakafayamanõ? Nā feronāfake äpa äfi fe oxakī chakafai. Askara chakakõi. Nā Nios chanīmara faafoma tsoa askamisma. ² Ooa. Nā feronāfake mato mēraxõ afara chakafai aõnoa rāfiipaikanima, “Nõ sharakõifora,” ixõ mā yoimis kakapaiyanā. Akka, ¿afeskakī nā feronāfakeõnoa mā shināchakaimamē? Akka nāskaxõ äfe chaka xateyamax anā mato fe ichanāito potakäfe anā mato fe ichanāyamanõ. ³⁻⁵ Ē mato fe iyamafixõ ē mato shinākõi. Ē ano mato fe iyamafixõ nā feronāfake afeskaimākai mē tāpikõia. Ē mato anoxõ yoikī iskafakerana: “Mā Jesucristo shināyanā ichanāino Niospa äfe Yõshi Sharaõxõ nā feronāfake äpa äfi fe imiskē mato makinoa potakäfe Satanás ifoafafo mēra inõ. Nāskakē Satanás nā feronāfake omiskõimanõ. Nāskaxõ Satanás nā apaiyai keskara faxii nā feronāfake. Nāskafaino omiskõixii. Satanás omiskõimanaino äfe chaka xatepaixii Jesús anā Ifofapaikī anā omiskõiyamaxiki. Mā äfe chaka xateano nõko Ifo Jesucristo anā oaitīa nā feronāfake ifixii afe ipaxanõ anā omiskõinõma,” ixõ ē mato yoikerana ē mato fe ixõ.

⁶ Ooa, mā iskamis: “Nō sharakōi,” ixō mā shināfikī mā kai nā feronāfake mato mēranoa mā potapaima afara chakafafaiato. ¿Mā tāpiamamē, yora fistichi mato mēra ixō afara chakafaito mā xatemayamax aōnoax keyokōi mā chaka itiro? ⁷ Ē mato afara fetsa yoipai. Nikakapo. Kēromā pāa fakī levadura aya osiano keyokōi faraxitiro. Pishta aya osiano keyokōi faraxitiro. Nāskarifiakī fētsa mato mēraxō afara chakafaito mā xatemayamax aōnoax keyokōi mā chaka itiro. Nāskakē nā yora fistichi afara chakafaito potakāfe mato mēraxō anā afara chakafayamanō, mā fena keskara ixikakī. Akka Niospa Fake, Jesucristo, noko nāxoni nōko chaka noko soaxoxiki. Nāskakē mā afaa chakafamisma keskara. ⁸ Nāskaxō a nō chakafapaoni anā nō shināpaima. Fetsafo fekaxtefayamata ato pārayamata meka chanīmakōi fisti nō ato yoitiro.

⁹ Ē mato kirika kenexoyoni iskafakī: “Feronāfakefo āto āfima fe imisfo. Askatari kērofori āto fenema fe imisfo. Askarāfo yorafo fe rafeyamakāfe.” ¹⁰ Akka a Jesús Ifofaafōnoama ē mato kenexoyonima. Nā Jesús Ifofaifōnoa ē mato kenexoni. Akka faki pishtakai iyamafoma a Jesús Ifofaifoma. Nāskakē nō ato fe imis. Fakira kaxō nō ōimis nāriri ikafo a Jesús Ifofaafoma. Nō ato fe ifiaxō afāfe akaifo keskarakai nō amisma. Afāfe āto ifo Satanās. Nāskaxō āto chaka xateafoma. Chaka fetsa fetsatapafo amisfo. Nāskaxō āto āfimafo chotamisfo. Kērofori nāskarifiamisfo āto fenema fe chotanākani. Afama mīshti fipaikata āfenāfoma fipaimisfo. Nāskatari yometsokōifo imisfo. Nāskakata nioskōiyamafekē, “Na nōko niosra,” ikaxō afara kīfimisfo. Nāskafaifono nō ato feta afaa chakafamisma. Nāskafikē nō ato fe imis. Nō ato makinoax faki paxkatiroma. ¹¹ Akka mā efeta Nios Ifofaino ē mato kirika kenexoyoni. Nāskakē fatotora yoikī iskafatiro: “Ēri mato feta Jesucristo Ifofai,” ixō yoifixō āfe āfima chotamis. Kērofori askari amisfo āfe fenema fe chotanāmisfo. Askatari afama mīshti fichipaimisfo. Atonāma fipaimisfo. Nioskōiyamafekē afara kīfimisfo. Yora fetsafo chakafamisfo. Pāemisfo. Yometsomisfo. Askarāfo fe rafeyamakāfe. “Nō Jesús Ifofaira,” ifiakaxō afara chakafamisfokī. Askarāfo fe rafeyamakāfe.

¹²⁻¹³ Nā Jesús Ifofaifāfema afara chakafaiāfē nō ato yoitiro ma omiskōinōfo. Akka Nios fistichi ato yoitiro iskafakī: “Mā afara chakafamis. Nāskaxō māto chaka mā xateyamaito ē mato omiskōimaxii,” ixō Niospa ato yoitiro. Akka nō ato yoitiro ma. Nāskakē Niospa noko yoia nā Nios Ifofaa fetsafāfe afara chakafaifono nō ato yoitiro āto chaka xatenōfo omiskōixikakima. Akka Niospa meka yōra kirikaki kenenī iskafakī: “Nā feronāfake mato mēraxō afara chakafamis yoikāfe anā mato fe ichanāyamanō āfe chaka xateyamax,” ixō kirika kenenī.

6

A Nios Ifofamisfo rafeta fētsa chakafaino fētsa chakafayamafaito, askara achixō a xanīfo Nios Ifofaama ano iyotiroma ato yoinō

¹ A mato feta Nios Ifofaafō ato yōayamakāfe xanīfofo yoikī a xanīfofofāfe Nios Ifofaafomaki. Askatamaroko nā Nios Ifofaafō ano ato iyokāfe ato yōkanōfo mato chakafafomakī. ² Akka, ¿mā tāpiamamē mā Nios Ifofaxō mā nōko Ifo nokoaino mā xanīfo keskara mā ixii? Nāskaxō mā ato yoixii fatofomākī shara imisfo. Askatari mā yoixii fatofomākī chaka imisfo Niospa ato omiskōimanō. Nāskakē iskaratīari fētsa pishta chakafaano mā ranā yoinōnāsharakāfe xanīfofoki chanikakīma. ³ Askatari mā Nios feta yoixii āfe ājirifo fatofāfe sharafafomākī, askatari fatofāferi chakafafomākī Niospa

ato omiskōimanō, a chakafamisfo. Nāskakē iskaratīa mā mā ato ōi fato-fomākī chakafo fatoforimākī sharafo. Nāskakē mā ranā mā yoinōnāsharakāfe xanīfofoki chanikakīma a xanīfofāfe Nios Ifofaafomaki. ⁴ A mato feta shara shināifo mā ato ifitiro mato yoisharanōfo, mā fochishpanā faatanāino. Akka a Jesús Ifofaafoma mā ato ifitiro. ⁵ Afaa tāpiafoma mā ato ifiax mā rāfitiro. Akka, ʒa shara shināifo mato fe ikafomamamē? Ēje, nāno ikafo a shara shināifo. Nāskakē ato ifikāfe mato yoisharanōfo mā fochishpanā faatanāino. ⁶ Akka mā fochishpanā faatanāx, mā raenā faatanāsharamisma. Askakimaroko mā ato yōaxō nā Nios Ifofaafoma ano mā ato iyomis xanīfofōfāfe ato yōkanōfo.

⁷ Mā ranā mā fochishpanā faatanāx nā Nios Ifofaafomaki mā atoki chanimis. Akka askarakai sharama. Nāskakē Jesús Ifofaa fētsa mato chakafaito kopitamaroko a Jesús Ifofaafomaki mā chanitiro. Nāskax mā shara itiro. Askatari a Jesús Ifofaa fētsa matoki yometsoano nā Jesús Ifofaafomaki mā chanitiro mā āa matoki yometsonōfo. Nāskax mā shara itiro. ⁸ Akka mā ranā mā yometso faatanāmis chaka faatanāyanā. Askatari mato fe yorafori mā ato chakafamis.

⁹ ʒMā tāpiamamē a yora afara chakafamis Nios xanīfo ano katiroma? Nāskakē māri mā pārameyamakāfe. Mā afara chakafaax Nios xanīfo ano mā katiromaki. Akka nā āto āfima chotamisfo Nios xanīfo ano fotirofoma. Askatari kērofori āto fenema chotamamisfo Nios xanīfo ano fotirofoma. Nāskatari nioskōiyamafekē afara fetsa fichipaikī, “Na nōko niosra,” ixō fichipaimisfo. Afokai Nios xanīfo ano fotirofoma. Askatari feronāfakefo aa ranā chotanāpaimisfo. Kērofori nāskari amisfo aa ranā chotanāpaikani. Afokai Nios xanīfo ano fotirofoma. ¹⁰ Askatari yometsomisfo, atonāma fipaimisfo, pāemisfo, īchamitsamisfo, nikayospamisfo, afara fētsa fiatiaxō ato pāraxō afara fetsa fiamisfo. Nāskarafokai Nios xanīfo ano fotirofoma. ¹¹ Mā askapaonixakī iskaratīa mā mā Niospa afe yorafo. Niospa āfe Yōshi Sharaōxō mātō chaka mato soaxona nōko Ifo Jesucristo mā Ifofaito. Mātō chaka mato soaxoyanā āfe ōiti keskara shara mato imai. Askafaxō afaa chakafamisfoma keskara mato ōi.

Nō Cristo fe rafexō nō chakafatiroma

¹² Akka mā yoiraka iskafakī: “Cristo ēfe Ifo. Nāskakē a Niospa yoiyamano nā ē apaiyai keskara ē atiro, afaa chakama,” ixō mā yoiraka. Ēje, nānorikōi. Askatamaroko afara shara fetsa fekē ē aki ē ifofatirora ixō ē apaima. ¹³ Askatari mā yoiraka iskafakī: “Niospa nōko xāki noko onifaxoni a nō piāi nō pinō. Nāskaxori a nō piāi noko onifaxoni,” ixō mā yoisimis. Akka chipo Niospa a nō piāi yafi nōko xāki yamafaxoxii nāatomāi a nō piāi noko onifaxonixakī. Chanīmakōi Niospa noko onifani nō afe rafepakexanō. Niospakai nōko āfima fe nō inō noko onifanima. Kērofori āto fenema fe inō ato onifanima. Askatamaroko Niospa nōko yora noko onifaxoni nō nōko Ifo fe nō rafepakexanō, Jesús āfe ina nō inō, nāskata Jesús nōko Ifo inō. ¹⁴ Nōko Ifo Jesús mā nafianikē Epa Niospa āfe shinā sharayaxō ofofani. Nāskarifiakī āfe shinā sharayaxō nokori ofofaxii.

¹⁵ ʒMā tāpiamamē nō Cristo Ifofaax nō āfe yorakōi? Nāskaxō nō nōko āfima chotatiroma nōmāi Jesús afe yorakōixō. ¹⁶ Niospa meka yoikī yōra kirika kenekē iskafani: “Feronāfake kēro fe ikaino nā rafe yora fisti keskarakōi itirofo,” ixō kenenī. ʒMā tāpiamamē, nā mātō āfima fe mā ikī yora fisti keskara mā itiro? Nāskakē mātō āfima fe iyamakāfe mā chakanatiroki. Askatari kērori

fene fetsa fe itiroma. ¹⁷ Nāskax nō nōko Ifo Jesús fe rafeax nā yora fisti keskara nō ixii. Niospa āfe Yōshi Shara nokoya rafemaxii. Nāskax nōko fero mēsho nā fisti keskara ixii Niospa Yōshi Shara fe rafeax.

¹⁸ Nāskakē mātō āfima fe ipaiyamakāfe. Askatari kērofori mātō fenema fe ipaiyamakāfe. Askara shināyamakāfe. Askapaikakīma ato makinoax ichotakāfe mātō āfima fe ixikakīma. Mā chakanatiroki. Askatari kērofori ichotakāfe mātō fenema fe ipai kakīma mā chakanatiroki. Akka mātō āfima mā chotakī mātō yora mā chakanafatiro. Askatari afara chaka fetsa akī mātō yora mā chakanafatiroma, afara chaka afiakī mā chakanatiroma. ¹⁹ Mā tāpiamamē Niospa Yōshi Shara nofe ika? Nōko yora āfe pexe keskarakōi. Nāskakē Niospa Yōshi Shara nōmēra ika nāmāi nōko Ifofaax. Nāskax mākōi mā ifofametiroma. Akka Nios mātō Ifo. ²⁰ Jesucristo mato nāxononi mātō Ifo ixikī. Nāskax mā āfe inakōifo. Nāskatari Nios mātō Ifokōi. Nāskax mātō yora Niosnā. Nāskakē Niosnā ixosharakāfe Niospa mato imapaiyai keskara. Mā askafaito ōikakī fetsafāfe, “Nios sharara,” fatirofo.

7

Afeskax feronāfake āfi fe isharatirofomē

¹⁻² Mā ea kirika kenexō femakī mā ea yōkaita. Nāskakē nā mā ea yōkai keskara ē mato yoisharapai mā tāpinō. Feronāfāke kēromaisax shara itiro. Askafiax āfiyapai āfiyatiro chakafaxikīma. Nāskax feronāfakefo āfiyatirofo. Xotofakefori feneyatirofo. Nāskara shara. ³⁻⁴ Feronāfake mā āfiyax āfe yora anā āfenā fistima. Āfe āfināri itiro. Nāskarifiai kēro mā feneyax anā āfe yora āfenā fistima. Āfe fenenāri itiro. Nāskakē āfinī āfe fene afe ipaiyaito fene ranītiroma. Nāskatari fenēri āfe āfi afe ipaiyaito ranītiroma. ⁵ Nāskakē ranīnōnāyamakāfe. Akka nāskaxō mā shinātiro iskafakī: “Nō Epa Nios kīfionō, nō paxkanōnāx oxa ranāyoxikī. Chipō anā nō kemānāxikī,” ixō mā yoitiro. Nāskafiax chai samarakayamakāfe. Mā samarakaino Satanās mato chakafamatiro mā kēro fetsa fe ipaitirokī. Nāskarifiai kērori feronāfake fetsa fe ipaitiro. Afe ipaikī chakafatiro.

⁶ Ē mato, “Fianākāfe,” ixō ē mato yoima. Akka mā fianāpai mā fianātiro. ⁷ Askata ē shinākī iskafai: “Feronāfakefo ea keskara kēromais ikanax shara itirofo. Niosnoax ē āfiyamax ē isharai. Ē shināchakaima. Ē inimakōi. Akka Niospa ea kēromais ima keskarakai ato askafaima. Fetsafo Niosnoax āfiyāfo. Fetsafori kēromaiskanax nā ē ikai keskariai inimatirofo.”

⁸ Akka iskaratīa nā kēromaisfo yafi fenemaisfo ē ato yoinō. Feronāfakefo ea keskara kēromais itirofo. Askatari kērofori fenemais itirofo. Askara shara. Askatari āto fene ato makinoax namis, afo anā feneyatirofoma. Ea keskara shara itirofo. ⁹ Akka feronāfake ares ixō teneyamai kēro fe ipaikī fatora kēro fe oxatiro. Askara sharama. Askatamaroko āfiyatiro tanaima shara ixikī, anā kēro fetsafo fe ipaixikīma.

Feronāfāke āfe āfi potatiroma, nāskarai kēromāri āfe fene potatiroma

¹⁰⁻¹¹ Askata iskaratīa feronāfake āfiya ē yoipai, xotofāke feneyari ē yoisharapai. Ēa ē mato yoima. Nōko Ifoōxō ē mato yoi iskafakī, kēromā fene enetiroma. Mā fene eneax fetsa fe fianātiroma. Ares itiro. Akka askayamai anā feneki kematiro. Askara shara itiro. Askatari feronāfāke āfi enetiroma.

¹² Nāskakē iskaratīa keyokōi ē mato yoisharapai. Na meka ē mato yoiāi Niospa ea yoyamafekē ēa mēstekōi shinākī ē mato yoi. Feronāfāke Jesús Ifofaino āfe āfinī Jesús Ifofaxoma fene noikī fene enepaiyamaino fenē āfe

āfi potatiroma. ¹³ Askatari āfe āfinī Jesús Ifofaino fenē Jesús Ifofaxoma āfe āfi enepaiyamaino āfinī fene enetiroma. ¹⁴ Feronāfāke Nios chanīmara faimano āfe āfinī Nios chanīmara faino āfe āfiōxō Niospa nā feronāfake shara faxotiro. Nāskaxō āfe āfinī Jesús Ifofaito oikī āfiōxō fenē Jesús Ifofatiro. Nāskatari kēromā Jesús Ifofayamaino fenē Jesús Ifofaino feneoxō Niospa nā kēro shara faxotiro. Akka feronāfake fe āfi enenāifono āto fakefo shara itirofoma. Akka enenāyamaifono Niospa āto fakefo shara oitiro. ¹⁵ Akka feronāfāke Jesús Ifofayamakē āfinī Jesús Ifofaito fenē enepaikōikī enetiro. Nāskax kapaiyaito nētefayamafe. Katanō. Mā nētefaino fekaxtetiroki. Askatari kēromā Jesús Ifofayamakē fenē Ifofaito kēromā enepaikōikī enetiro. Kapaiyaitori nētefayamafe. Katanō. Mā nētefaino fekaxtetiroki. Niospa noko katoni nōko shinā mēraxō afanā noko fekaxtefanōma nōko oiti tanaimakōi shara inō. ¹⁶ Kēromā Jesús Ifofaxō āfe feneri Jesúsnoa tāpimatiro āfinī fene yoiaino fenē Ifofai rakikīa nō tāpitiroma. Feronāfākeri Jesús Ifofaxō āfe āfiri Jesúsnoa tāpimaino Ifofai rakikīa, nō tāpitiroma.

¹⁷ Nā nōko Ifo Jesús mato ima keskara nāskara ikāfe. Akka Niospa mato ifini nā Jesús mato ima keskara mā inō. Askatari nā Nios Ifofaafō tii Nios kīfiti pexefā anoafoya nā maitio anoafori nānorikōi ē ato yoimis. ¹⁸ Iskafakī ē ato yoimis. Judeofo Niospa ato yoini keskarakōi āto fake feronāfakefo foshki repa xatepaonifo. Akka mato foshki repa xatenifono Jesús Ifofaxō shinākī mā iskafatiroma: “Iskaratīa ē Jesús Ifofai. Nā fistichi ēfe chaka ea soaxonano ē afe īpaxanō. Ooa, ŷafeskakī ea foshki repa xatenifomē, ē askayamapaifiaino? Aatokai ēfe chaka ea soaxotiroma. Nāskakē ē foshki repa xateama keskaraxō ē ato fomāi,” ixō shināyamakāfe. Akka māto foshki repa mā mato xatenifono shināchakayamakāfe. Askatari mā Jesús Ifofaxō iskakī shināyamakāfe: “Judeofo āto xinifāfe ato yoini keskara ē ipai. Ē foshki repa xatepai nā Moisés yoini keskara ē ixikī,” ixō anori shināyamakāfe. Nō foshki repa xatetiroma Niospa noko ifinō. ¹⁹ Akka nō foshki repa xatemisma askatari nō foshki repa xatemis nāskara shara. Akka nō askanokai, “Mā chakafaa,” noko Niospa faima. Askatari nō askamanori, “Mā chakafaa,” noko Niospa faima. Nā judeofo imis keskarakai nō itiroma noko Niospa ifinō. Askatamaroko Niospa noko yoini keskara nā fisti nō atiro. ²⁰ Akka nā Niospa mato ifini keskarakōi ikāfe. ²¹ Mā fētsa yonomati ikatsaxakī shināchakayamakāfe. Nāskarakōi ikāfe. Akka māto ifāfe mato nīchipaiyaino, “Fotakāfe anā yonoxoxikakīma,” mato faino mā katiro. ²² Akka nōko Ifo Jesús mato ifini. Mato ifiyoamano ranāri mā āto yonomati iyopaoni. Iskaratīari mā āto yonomati mā ato yonoxomis. Mā askafixō mā Jesús Ifofaano, Jesús māto chaka mato soaxonano, āfe yonomatikōifo mā iki. Nāskaxō tsōa mato iskafatiroma: “Mākai Jesús afe yorafoma,” tsōa mato fatiroma. Akka ranāritokai mā tsōa yonoxomisma. Askafiax māri Jesús Ifofaax māri āfe yonomatikōifo. ²³ Epa Niospa āfe Fake Jesucristo noko nīchixononi noko nāxoyonō nāskax nōko Ifo inō. Nāskax mā afe yorakōifo. Nā fisti māto Ifokōi. Nā fistichi mēstekōi mato shināmasharatiro. Askaxō fetsafo ifofayamakāfe mato shināmasharatirofomaki. ²⁴ Efe yora mīshtichi, Niospa mato ifiano nā mā ipaoni keskara ikāfe Epa Nios mato fe ikaino.

Feronāfake āfimaisfoya kērofo fenemaisfoōnoa Pablo yoini

²⁵ Akka iskaratīa afara fetsa anā ē mato yoipai mā ea yōkaita. Feronāfakefo āfimaisfoya kērofo fenemaisfoōnoa ē mato yoi. Ē mato yoiai keskara nōko

Ifāfe ea yoiyamafixō ea noikī ea nīchini ē āfe ina inō. Nāskakē ē mato yoiāi keskara mā chanīmara fatiro. ²⁶ Iskaratīa afara mesekōikī noko omiskōimani. Nāskakē mā āfimaīs ika shara. Nios Ifofaafāfema noko omiskōimapaikani nō Jesūs Ifofakē. ²⁷ Akka āfiyakaxō māto āfi eneyamakāfe. Askatari āfimaīsxō kēro fenayamakāfe. ²⁸ Akka mā kēroyaxō mā chakafatiroma. Kērofori feneyakatsaxakīma mā feneyaxō mā chakafatiroma. Askata mā feneyax askatari feronāfake mā āfiyak mato omiskōimanaifono mā omiskōitiro. Nāskaxō mato omiskōimatirofo mā Jesūs chanīmara faino. Nāskakē ē mato yoisharapai mā omiskōiyamanō.

²⁹ Askatari ē mato iskakakī yoipai, efe yora mīstichi. Nōko Ifo Jesūs mā chaima oi kiki. Nōko Ifo nō yonoxokī nō chai faima. Nāskakē nō nōko Ifo yonoxosharakōipai. A āfimaīsāfe nōko Ifo yonoxosharakōitirofo kēro shinākima. Askatari nā āfiyatori nōko Ifo yonoxosharatiro nā āfimaīsāfe yonoxonaifo keskafakī. ³⁰ Askatari nā shināchakaifāfe nōko Ifo yonosharaxotirofo nā shināchakaifāfema yonoxonaifo keskafakī. Nāskatari nā inimaifāfema nōko Ifo yonoxosharatirofo nā inimaifāfe yonoxonaifo keskafakī. Askatari nā afara fiaifāfe shinātirofo iskakakī: “Na nōkonāma, akka na nōko Ifonā,” ixō shinātirofo. Akka nōko Ifo shinākōikī nō yonotiro. ³¹ Nōko Ifo Jesūs mā chaima oi kiki. Nāskakē nōko mai anoxō nō yonosharafafāinō nā nō yopai fixiki. Nāskafixō afama mīstifos shinākima nōko Ifokōiroko nō shinākōinō. Keyokōi mai anoāfo keyoxikani. Nāskakē Jesūs nō shinākī finakōikī afama mīsthi fīpaikī nō shinātiroma.

³²⁻³⁵ Ē mato anori yoi māto shinā mēraxō afaanā mato fekaxtefanōma. Ē mato, “Āfiyayamakāfe,” faima. Askatari xotofakefori, “Feneyayamakāfe,” ē ato faima. Ē mato mēstekōi imapai nōko Ifo fisti mā shinākī finakōinō, mā afara fetsa shinānōma. Askaxō ē mato yoiāi keskara feronāfake āfimaisto āfe Ifo inimamapai. Akka feronāfāke āfiyakō āfiri inimamapai. Āfinī afara yopaito fenē shināchakakī āfi fixotiro. Nāskakī āfe Ifo fistikai shinātiroma. Nāskaxō āfe Ifo inimamapaikī āfiri inimamapai. Askatari xotofake fenemaisto āfe Ifo Jesūs fisti yonoxosharapai. Afara fetsakai shināima āfe Ifo fisti shināi. Niospa amapaiyai keskara fisti aki. Akka xotofake feneyaxō āfe feneri inimamapaikī afara fetsafori shinātiro āfe Ifo Jesūs fisti shinākīma.

³⁶ Nāskakē meka fetsari ē mato yoi. Feronāfāke taefakī xotofake yoiyoxō fichisharapaikī chipo fitiro āfe āfi inō. Shinākī iskafatiro: “Mē afetīama afe mekaitakī, mia fīpa,” shināchakayamaxiki ixō fitiro, chaka shināyamaxiki. Nāskafakī afaa chakafaima. ³⁷ Askatari feronāfāke fētsa shinākī iskafatiro: “Ēfe Ifo ē yonoxosharapaiyai keskara ē āfiyakō ē axotiroma. Nāskakē ē āfiyaima mē yoifixō,” ixō anori shinākī afaa chakafaima. Tsōa kerexkai, “Āfiyafe, mā mī yoiaki,” fayamaino nā feronāfāke xotofake fe fianātiroma Nios yonoxosharaxii. ³⁸ Akka feronāfāke nā xotofake fe fianāsharatiro. Akka nā xotofake fe fianāima nōko Ifo yonoxosharatiro. Nāskarari shara itiro.

³⁹ Askata meka fetsari ē mato yoi. Āfe fene naamanokai kēromā fene enetiroma fetsa fe fianāxiki. Akka mā fene naano fetsa fe fichināpai afe fianātiro nā Nios Ifofaa fe. Askara shara. ⁴⁰ Nāskatari ēa ē shinākī iskafai. Mā fene naano fetsa fe fianāmax nāskarari sharakōi itiro. Ē shināi Niospa Yōshi Sharapai nonorikōi mato yoipai.

8

Nioskōima onifakaxō yorafāfe kīfīpaonifo. Nāskaxō nami ināpaonifo atoōnoa

Pablo yoini

¹ Mā ea yōkaito ē mato yoisharatiro. Yora fetsafāfe afara onifakaxō, “Na nōko niosra,” ikaxō nami ināmisfo. Askata anā nā nami fikaxō ato ināmisfo yorafāfe pinōfo. Akka yorafāfe āto niosnā nō nami pia, shara. Nō piamari, shara. Nāskaxō nō afaa chakafaima. Akka mā yoikī iskafamis: “Mā nō tāpia nō āto niosnā nami pia, shara. Akka nō piamari, shara,” māmāi shinākī Nioskōimara ixō. Akka mā fatora fetsafāfe shinākī iskafamis: “Ēfi tāpikōiaki. Nā ē shināi keskara ē mēstekōi shināi. Ē fetsafo keskarama. Ē apaiyai keskara ē atiro,” ixō mā yoimis. Askara yoi kakapaimis mā itiro. Askara shinākīkai nō fetsafo inimamatiroma. Askakimaroko nō yorafo noixō nō āto ōiti fepeaxosharakōitiro Jesús Ifofasharanōfo. Nāskakē nō ato inimamatiro.

² Askatari fatora fētsa shinākī iskafamis: “Ēfi afama mīshti tāpiakī,” ixō anori yoifkī atiri afaa tāpīama. ³ Akka fatora fētsa Nios noiaino nāskarīfakī Niospa aōnoa yoitiro iskafakī: “Nā ē noiai mē tāpikōia. Nāfi efe yoraki,” ixō yoitiro.

⁴ Nāskaxō yorafāfe afara fetsa onifakaxō, “Na nōko niosra,” ikaxō nami ināifo. Nā nami nō pitiro. Nā shara. Nō chakafaima. Akka nō piamari, shara. Akka mā nō tāpia a afara fetsa yorafāfe onifafo akai afama. Nā onifafotokai afaa tāpīama. Akai ōitiyama. Āfe māporikai afaa shinātiroma. Akai Niosma. Akka Nioskōi fisti. ⁵ Jesús Ifofaafāfema yoikī iskafamisfo: “Nios ichapa. Nai mēranoafoya mai anoafoya nios ichapakōi,” ixō yoimisfo. Akka nā āto nios ichapafīax Nioskōifoma. ⁶ Mā nō tāpia Epa Niosfi fīstiki. Fetsakai anoma. Nāato keyokōi onifani. Nokori onifani nō āfe fakefo inō. Nāskatari nōko Ifo Jesucristori fisti. Anā ano fetsama. Nāskaxō Niospa āfe Fake feta keyokōi onifani. Aōnoax nō nitiro.

⁷ Nā ē mato yoiāi keskara fisti rasichi Jesús chanīmara faifāfe tāpiafoma. Shināmisfo iskafakakī: “A fetsafāfe afara onifafo, nā āto nioskōi nīa,” ixō yoimisfo niyamafīakē. Akka āto xinifāfe nānori ato yoipaonifo. Nāskakē shinākani iskakakī: “Nā āto niosnā nō nami pixō nō Nioskōi chakafatiro,” ixō shinātirofo. Akka mā pikaxō āto shinā mēraxō shināchakatirofo: “Mā nō chakafara,” ikaxō. ⁸ Anori shināfiaifonokai a nō afara piatokai Nios yafi noko rafemasharatiroma. Nios makinoa noko potatiroma. Afara onifakaxō, “Na nōko niosra,” ikaxō nami ināfo nā nami nō pīamanokai noko shara imatiroma. Askatari noko chakafatiroma. Nāskatari mā nō pianori noko chakafatiroma. Nāskatari noko shara imatiroma.

⁹⁻¹² Nāskakē mato feta Nios Ifofafo afaa chakafamayamakāfe. Mā shināi iskafakī: “Nō keyokōi pitiro. Afara onifakaxō, ‘Na nōko niosra,’ ikaxō nami ināfo. Nā nami nō pitiro nā onifafokairoko Nioskōikē. Akka mā nō na nami pixokai nō āto nios chanīmara faima. Akka mā nō tāpia Nioskōima. Akka pixō Nioskōi nō chakafaima. Jesúsri nō kachikirifaima,” ixō mā shināi. Mā anori shināfiaino Jesús Ifofaa fetsafāfe anori tāpiafoma. Tāpīamaifono nā nioskōimato kīfīti pexefā anoxō mā piai fīsti mā pipai mākai āto nios ifofapaima, nāskakī mato ōikakī akairi apaikani. Akka mā mā tāpia yorafāfe āto niosnā nō nami pia shara, chakama. Akka fetsafāferi Nios Ifofafīakaxō yoimisfo iskafakakī: “Āto niosnā nō nami pia sharama, nō chakafatiro,” ixō yoimisfo. Nāskaxō mā nami piatio fetsafāfe mato ōikakī akairi afāfe nami pitirofo. Nāskaxō mā nami pikaxō chipo shinātirofo iskafakakī: “Ooa, mē nami pixō ēfe Ifo Jesús ē chakafaa ēmāi āto niosnā nami pixō. Nā nami pikī ē āto nios sharafai. Ē āto nios ifofai ōitsai. Ooa, ē chakafaa,” ixō shinātiro. Askaxō āfe shinā mēraxō shināchakakōitiro mā nami piatio ōikakī akairi pikaxō. Nāskakē

mã chakafamatiro. Askafakī Cristori mã chakafai. Mã mã tâpia afara onifakaxõ, “Na nõko niosra,” ikaxõ nami inãifo nã pixokai mã chakafaima nã onifafokairoko Nioskõikê. Akka fetsafãfekai tâpiafoma. Afãfe shinãkani: “Nã nami pixõ nõ chakafatiroki,” ixõ shinãmisfo. Akka mã piaito õikakī akairi pikaxõ shinãchakatirofo. Mã akai keskafakīri shinãkani. Akka mã nã nami piyamañokai akairi pikeranafoma. Shinãchakakeranafoma. Nãskakê mato fe yorafo noikõixõ mã nã nami pitiroma ato chakafamaxikima. Akka atoõnoaxri Cristo naniki. ¹³ Nãskakê nõ nami pixõ Jesús Ifofaa fetsafo nõ ato chakafamatiro. Nãskakê ato niosnã nõ nami pitiroma fetsafo chakafamaya-maxikī. Nãskakê nõ fetsafo chakafamapaima. Nofeta Jesús Ifofaa fetsafo noikī nõ afaa chakafamapaima.

9

Niospa Pablo nĩchini ãfe meka ato yoinõ

¹ Nios fistifi êfe Ifokī. Nã ea yonomapaiyai keskara ê atiro. Tsõakai ea yonomatiroma. Jesús ea nĩchini ê aõnoa yorafo yoinõ. Akka nõko Ifo Jesús mẽ õisharakõini. Aõnoa ê mato yoiaito mã chanĩmara fani. Nãskakê nõko Ifo Jesús ê yonoxonaõxõ Jesús mã Ifofai. ² Fetsafãfe shinãkakī iskafamisfo: “Niospakai Pablo nĩchiama Jesúsnoa noko tâpimanõ,” ixõ anori yoimisfo. Fetsafo mekaino anori shinãyamakãfe. Ê mato yoiaito mã nõko Ifo Jesús chanĩmara fai. Nãskakê mã tâpitiro chanĩma Niospa ea nĩchini ê mato Jesúsnoa yoinõ.

³ A ea ãchakakī mekafaifono iskafakī ê ato kematiro: ⁴ Fetsafãfe Jesúsnoa yoiaito nikakakī afaa kopi yõkaxoma kaxpa ato pimamisfo. Akka ê mato Jesúsnoa yoiaito nikakakī, ¿eari afaa kopi yõkaxoma kaxpa eari pi-matirofomamê? ⁵ Ê akai keskafakī Pedrori Jesúsnoa yoifofãsafamis. A Jesús nĩchiafãfe fetsafãferi Jesúsnoa ato yoifofãsafamisfo. Jesús ãfe extofãferi ato yoifofãsafamisfo. Nãfo kero Jesús Ifofafo fe fianãkaxõ Jesúsnoa ato yoifofãsafafaifono ato ãfifori ato fe fofãsamisfo. ¿Nãfãfe ato ãfifãfe Jesús Ifofafo fe fianãfo keskari eri nã kero Jesús chanĩmara faa fe ê fianãtiromamê eferi kafãsanõ? ⁶ ¿Afeskakī ê Bernabé feta nõ mato Jesúsnoa yoifiki nõ yonoimê, a nõ yopai yafi a nõ piã fixikī? Akka fetsafãfe Jesúsnoa mato yoifikkakī yonokanima nõ akai keskafakī. Akka afara yopaifono mã ato inãmis. Akka a nõ yopai kaxpa nõ fimisma, yonoxõ nõ fimis. ⁷ Anã meka fetsari ê mato yoinõ. Sorarofãfe kaxpa yonokanima. Ato xanĩfãfe a piaifo ato inãkani. Askatari ato kori inãkani. Nãskarifikakī yora tare fanamisto ãfe tare foaisharano ãfe yono pitiro. Askatari fakka kexemistori ãfe fakka chocho fiãxõ ayatiro. Nãskarari a Jesúsnoa yoimisfãfe a piaifo fitirofo pixikkakī tsõa kopifaxoma.

⁸ Nã ê mato yoiã keskara yõra mekama. Akka Moisés nãñori kirika keneyoni Niospa meka yoikī. ⁹⁻¹⁰ Moisés Niospa meka kenekī iskafani: “Nã fakka keskara nexakaxõ xiki peama peama amamisfo ãfe xaka potaxikkakī. Nãskakê ifãfe renextiroma xiki xaka pinõ ifomã yonoxokī,” ixõ Moisés Niospa meka yoikī kirika kenenĩ. Akka fakkaõnoa Niospa yoinima. Yorafoõnoari yoini. Nã Jesús yonoxomisfoõnoa yoini. Nãskaxõ afaa kopifaxoma fitirofo yopaifo Niosnoa ato yoikkakī. Askatari fetsafãfe tare kexexõ shinãtirofo iskakakī: “Ê na tare kexeakī nãskakê ê tarepanoa afama mĩshti fiã,” ixõ shinãtirofo. Nãskarifikakī a Niospa meka ato yoimisfãfe a piã fitirofo. ¹¹ Nãskarifikakī nokori kopikiri a nõ yopai mã noko kaxpa inãtiro afaa kopi yõkaxoma. ¹² Fetsafãfe Jesúsnoa mato yoiãfono nikakī nã yopaifo mã ato inãmis.

Akka nō mato taefakī yoiyoni. Nāskakē mā noko afama mīshti inātiro fet-safo finōmainīfōfā. Mā noko afama mīshti ināfitirokē nō mato afaa yōkamisma. Nāskaxō nō tenemis. “Nō ato kori yōkaito anā noko nikapaitirofoma,” ixō nō shināmis. Nāskakē nō mato afaa yōkapaimisma. ¹³ ¿Mā tāpiamamē? Nōko kaifo judeofo na Nios kīfiti pexefā mēra femisfo a piaifo. Nā piaifo Nios ināxikakī. Nāskakē a Nios kīfiti pexefā mēra yonomisfāfe a piai kaxpa pimisfo tsōa kopifaxoma. ¹⁴ Nāskarīfakī nōko Ifāfe yoini iskafakī: “Fētsa ēfe meka shara fet-safo yoiaito nikakakī nā nikaifāfe a yopaifo ato inātirofo,” ixō nōko Ifāfe yoini. ¹⁵ Nānori nōko Ifāfe yoifinikē ē mato afaa pishta yōkamisma. Mato Niospa meka yoifikī ē mato kirika kene fomaima: “Ea kori inānōfora,” ixō. Nāskakē tsōa ea yoikī iskafatiroma: “Pablo ato kori fiapaikī ato Jesucristoōnoa yoimis,” ixokai tsōa eōnoa anori yoitiroma. “Akka Pablo ato kori fiamiski ato Jesucristoōnoa yoikī,” ea mā faito ē rāfipaitiro. Nāskaxō ē mato afaa pishta yōkamisma: “Pablo kori fia,” mā ea fanōma. ¹⁶ “Ē mato afaa yōkatama Jesúsnoa ē mato yoimis. Nāskakē ē sharafinakōiakī,” ixokai ē yoitiroma kakapaiyanā. Akka Niospa ea katoxō ea nīchini ē Jesúsōnoa ē yoifafāinō. Akka ē Jesúsōnoa yoiyamaito Niospa ea omiskōimatiro. ¹⁷ Ē yoikī iskafamis: “Epa Niosi, mī Fakeōnoa ē yoipai,” ixō ē yoikē Epa Niospa ea afara inātiro. Akka ēa ē yoima. Niospa ea nīchini Jesúsnoa ē ato yoinō. Nāskakē nā ea yoini keskara ē ato yoimis. ¹⁸ Akka ē Niospa meka shara yoimiskē, ¿afaa ea Niospa ināimē? Ato Niospa meka yoixokai ē afaa ato yōkamisma. Askaxorikai ē ato yoimisma iskafakī: “Niospa mato yoikē Jesúsnoa ē mato yoifafainaito a ē yopai ea inānōfora,” ixokai ē ato yoimisma. Akka ē Niospa meka ato yoipai afaa yōkaxoma. Nāskax ē inimasharakōi Epa Niospa ea inimamaino.

¹⁹ Ēkai tsōa yonomatima. Nāskafīax ēakōi ē māto yonomati keskarakōi. Nāskakē keyokōi yorafo ē axosharapai ato Jesús chanīmara famaxikī. Nāskax ē yorafāfe āto yonomati keskaraki. Akka nā Nios Ifofaaafoma ē ato fe rafemis āto feyafati shara keskara ixō ē ato yoiaito, Jesús Ifofanōfo ē Niospa meka yoiaito. ²⁰ Ēfe kaifo judeofo fe ē ikax nā ikaifo keskari ēri ato keskara ipai. Ē ato keskara ikaito ea ōikakī Jesús chanīmara fatirofo. Nōko xini Moisés nōko kaifo yoipaoni keskarakai iskaratīa anā ē nikaima. Akka ē nikayamafikī a Moisés yoipaoni keskara nikamisfo fe ēri ato fe ixō Moisés yoini keskara ēri askai ato Jesús chanīmara famaxikī. ²¹ Nāskakēri nā Moisés yoini keskara nikaifoma fe ē ato fe ixō nā Moisés yoini keskara ē akima ato Jesús chanīmara famaxikī. Ē nāskafafiamiskē Cristo ea yoini keskara ē amis. Ē nikasharaxō nā fisti ē kachikiri fatiroma. ²² Jesús chanīmara faafāfe ranārīto Niospa meka tāpisharayokanima. Ē nā keskarafo fe ikax ēri ē ato keskara ipai eari Jesús tāpimasharanō. Nā ea tāpimana keskara ēri ato tāpimasharanō. Nāskatari fatora fet-safo fe ē ikax ē ato keskarari ē ipai. Eōxō Jesús chanīmara fakanax afe isharpakexanōfo. ²³ Nāskakē ē askafakī ē ato Jesucristoōnoa tāpimasharai nā chanīmara faifono ēri ato fe inimai finakōitiro.

²⁴⁻²⁵ Akka mā mā tāpia nā naetapafo xonōnōnāxikakī ichtirofo yora ichapafāfe ato ōiaifono. Akka nā koshi fistichi ato xonōtiro. Nāskakē akiki xanīfo inimakī afara shara fet-sa inātiro. Nāskakē kerexkai ichtirofo fet-safo xonōpaikani. Akka ichoyokanaxma tae fenai ichoyofōfāfōfāitirofo feyafaxikakī xokenāxikakima. Nāskarīfakī nōko Ifo Jesús kerexkai yonosharax-okāfe afara chakafo fayamaxikakī. Akka Niospa mato yoiaito nikakī akāfe Jesús feyafaxō Ifofaxikakī mā akiki nokoaitīa mato afara shara inānō. Akka

nã ichokĩ ato xonõa xanĩfãfe afara shara inã keyotiro. Akka Niospa noko afara inã keyonakama. ²⁶ Nãskakẽ ã Jesús fisti yonoxoni afaa fetsa shinãtama. Akka ãa ã kaxpa mato yويمisma. Niospa ea shinãmanaino ã mato yويمis. Naetapafo xonõnõnãpaikani mẽstekõĩ ichotirofo. Nãskarari ã mẽstekõĩ ika. Ëfe Ifãfe ea yoiãĩ keskarakõĩ ã iki akiki nokosharaxiki. ²⁷ Ëa ã apaiyai keskara ã akima. Ëfe Ifãfe ea amapaiyai keskara ã aki. Ë tenepaifiki ã tenetiroma Jesús Ifofasharaxiki. Ë xokenãfiaki ã tenetiroma Jesúsnoa yoiĩkĩ. Jesús fistiche ã yonomatiro. Nãskakẽ ã fetsafari yoifafãini Jesús Ifofaxõ yonosharaxonõfo. Nãskakẽ Niospa ea yoiã keskara ã ayamax ã fenotiro, afianã ã Nios yonoxotiroma. Niospa anã ea yonomatiroma. Ë fenopaima. Nãskakẽ nã ãa ã apaiyai keskara ã akima. Ëfe Ifãfe ea amapaiyai keskara, nã fisti ã aki.

10

Judeofãfe Nios chakafapaoni keskara iyamakãfe

¹ Efe yora mĩshtichi, tãpikãfe. Nõko xinifo Egipto anoax fonifo. Akka Niospa nai kõi nãmã pishta ato fotomaxoni a õiax nõko kaifo judeofo acho fonifo. Niospa nã nai kõiõxõ ato iyopaiyai ari ato iyoni. Ato iyoikaino nã ãamãfã ãfe ane Õshi ano nokonifo. Nãnoxõ nõko kaifo judeofo Niospa ato ãamãfã nẽxpakãa rafe ato paxkaxotani anori pokefainõfo. ² Moisés ato rekẽ tanaxoni. Akka nõko kaifo judeofo Moisés acho fonifo. Nã Moisés chanĩmara fakanax afe rafepaonifo. Nãskakẽ nai kõi nãmã pishta kaino Moisés nãmã ato iyoni. ãamãfã pokefokani mã ãamãfã nakirafekõĩ shinãtanano. Nãskakẽ pokefainifo ãamãfã nẽxpakãa. Mã ãfe kaifo ato ififani Moisés kani. ³ Askatari Niospa nai mẽraxõ a piaifo ato potaxoni fikaxõ pinõfo. ⁴ Nãskatari ano fakamano Moisés tokirinifã ãfe mẽstetini ramãino faka sharakõĩ tsekeni keyokõichi ayanõfo. Cristoõnoax faka sharakõĩ tsekeni judeofãfe ayanõfo. Akka fakirira fofãfofãipaonifo Cristo ato fe kaino, tsõa Cristo õinima. ato fe kakĩ ato axopaoni ato kexexõ. ⁵ Askafafiafonõ Epa Nioskai atoki inimanima ãfe meka nikayamaifono. Nãskakanax tsõa istoma anoax fofãfofãikani nikayospakanax nai keyonifo. Nã tsõa istoma ano ato maifakĩ fetsanifo Niospa ato namakĩ keyoano.

⁶ Akka afãfe afara chakafapaonifo. Nãskakẽ atoõnoa noko tãpimani afara chakafo fapaonifo keskara nõri ayamanõ inifo keskai omiskõixikima. ⁷ Afãfe afara chakafapaonifo keskara ayamakãfe. Akka nãfãfe afara fetsa onifakaxõ, “Na nõko niosra,” fapaonifo. Nãskakaxõ kifipaonifo. Kifikaxõ ãfe ferotaifi piyanã ayata ikaxõ afara fetsafo chakafapaonifo. Pãeyanã monopaponifo. “Nõko nios nokoki inimaira,” ikanax askapaonifo. Nãskakẽ mãri ato keskara iyamakãfe. ⁸ Nãskakanax ãto ãfima fe ipaonifo. Askatari kẽrofori ãto fenemafo fe ipaonifo. Askaifãfe õikĩ Niospa veintitrẽs mil yorafo ato namarisafatani nã pena fisti. ⁹ Mãri ato keskara chaka iyamakãfe. Akka, “Nioskai nokoki fena õitifishkiyotiroma. Nãskakẽ ã afara chakafafiaito ea Niospa omiskõimanimã,” ixõ shinãyamakãfe. Akka nõko xinifãfe chakafãifãfe õikĩ anã teneyamakãikĩ Niospa ato omiskõimani. Nãskakẽ ato mẽra rono paekõifo nĩchini ato chachinõfo. Ato chachiano ranãri nanifo. Nãskakẽ noko tãpimai nõri Nios chakafaito nokori omiskõimatiro. ¹⁰ Askatari mẽxotaima mekaifãfe õikĩ Niospa ãfe ãjirinĩ ranãri ato namani. Akka mãri ato keskara iyamakãfe mato omiskõimayamanõ.

11 Nā nōko xinifāfe afara chakafapaonifoōnoa noko kenexonifo noko yoisharanō nōri ato keskara iyamanō omiskōixikima. Akka nōko Ifo Jesús oyoamano chaima nō itipinīsharayoi mā nōko Ifo nokoaino anā nō keskara chaka nō ixikima. 12 Akka fētsa shinākī iskafai: “Ēkai ato keskarama. Ē afaa chakafatiroma. Akka afara sharafo fisti ē amis,” ixō anori shinātiro. Nāskakē kexemesharakāfe ato keskara iyamaxikakī afara chakafai. Akka māri Jesús Ifofasharamax mā ato keskarari mā itiro afara chakafai. 13 Satanás mato afara chakafamapaikī mato fisti chakafamapaimisma. Keyokōi nā Nios Ifofaafari ato chakafamapaimis. Mato chakafamapaifiaino Niospa mato yoia keskara mato kexesharatiro mā afaa chakafanōma. Akka mato yويم keskara mato axōi mā chanīmara faito. Nāskakē Niospa Satanás mato ichapama fekaxtefatimafai mā chakafanōma. Mato Niospa amatiro mā tenenō mato fekaxtefafiaino. Māto ōiti mato kerexfaxotiro mā Satanás nikanōma. Askatari afara afe keskararafāfe mato fekaxtefaino Niospa mato amatiro mā tenenō mā Nios kachikirifaxikima.

14 Efe yora mīshtichi, fetsafāfe afara onifakaxō, “Na nōko niosra,” ikaxō chanīmara faifono ato makinoax paxkafaitakāfe. 15 Nāskakē shināsharakōikāfe nā ē mato yoiai keskara ōitsai ē mato pāriraka. Akka ea yoikāfe ē mato pārimākai. 16 Mā mā tāpia Niospa meka nikai nō ano fisti ichanāmis. Nāskaxō nō fimi ene ayamis Jesús noko nāxoni shināyanā. Nā nō ayamis, “Fimi ene Jesús āfe imira,” ixō nō shināmis. Nāskaxō nō shinātiro Jesús noko naxōi āfe imi foni nō afe nīpaxanō. Nāskakē nō yoitiro iskafakī: “Aicho Epa Niosi, mī Fāke noko nāxoni nō afe ĩpaxanō,” ixō nō yoitiro. Nāskatari pāa torepakexō Jesús noko nāxoni shinākī nō pimis. “Nā pāa Jesús āfe namira,” ixō nō shināmis. Nāskaxō nō shinātiro Jesucristo noko omiskōixoni mastafono ifi cruz ikakinoax. Nāskakē nō afe rafepakenaka Ifofaax. 17 Akka pāa fisti torepakexō keyokōichi nō pimis. Nāskarifikī Jesucristo fisti keyokōichi nō chanīmara faax fisti keskara nō ixii.

18 Nāskatari nōko kaifo israelifo shinākāfe. Nāfāfe āto inafō retekaxō Nios ināmisfo āto chaka soapaikakī. Nāskatari nā israelifāfe Nios kifiti pexefā mēraxō Nios yonoxomisfāfe nā nami pimisfo. Nāskakanax nā fisti keskara imisfo ano fisti ichanānākaxō pikani Nios shināyanā. 19 Nāskakē ē mato yoi nā afara fetsa onifafo akai afama. Askatari afara fetsa onifakaxō nami ināfo nā namikai afama a onifafokairoko Nioskōikē. 20 Akka nā Jesús Ifofaafāfema Nioskōi nami inātamarako afara fetsa onifakaxō, “Nā nōko niosra,” ikaxō niafaka chaka nami ināmisfo. Nāskakē māri nami ināyamakāfe. Niafaka chaka fe mā rafeaito ē mato ōipaima. 21 Mā nōko Ifo Jesús fe rafepai a niafaka chakafō fe rafeyamakāfe. Askaxō nā rafe mā ifofatiromaki. Nā Jesús Ifofaafō fe mā ato fe ichanākaxō pāa torexō mā ato feta pimis Jesús noko nāxoni shināyanā. Nāskakē nā Jesús Ifofaafoma fe ato fe mā ichanātiroma niafaka chakafō nikaxikīma. 22 Nōko Ifo Jesús fe rafepaifiki nō niafaka chaka fe rafepaikī nō nōko Ifo Jesús nō ōitifishkimatiro. Nō askafaito noko omiskōimatiro. Akka, nō Jesús kerexkai finōtiromē noko omiskōimayamanō? Maa, nō Jesús finōtiroma. Jesús noko omiskōimanaito tsōa noko timamatiroma.

Nā Jesús Ifofaafō nō ato noikōixō nō ato shināchakamatiroma

23 Akka mā shināiraka iskafakī: “Cristo ēfe Ifo. Nāskakē nā ē apaiyai keskara ē atiro, afaa chakama,” ixō mā shināiraka. Ēje, nānorikōi mā shināmis. Nāskakē afara shara shinākī: “Nā chakama nō atiro,” ixō mā shināfiaino akka fetsafāfe anori shinākanima: “Chakara,” famisfo. Nāskakē

fêtsa ferotaifi nō afara pitiroma ato shināchakayamaxikī. Chanīma, nō Jesús Ifofaxō Niospa noko yoini keskara keyokōi nō pitiro. Keyokōi nami shara nō pitiro. Chanīmakōifiano, Jesús Ifofaa fetsafāfe shināmisfo iskafakakī: “Ē nami pitiroma. Ē nami pixō ē Jesús chakafatiro,” ixō shinātirofo. Nāskakē nō ato ferotaifi nō nami pitiroma shināchakanōfoma. Akka nō ato shināchakamatama Jesús fisti nō ato shināmapai. ²⁴ Nāskakē nā mā apaiyai keskara fisti shināyamaxāfe. Fetsafoōnoari shinākāfe. Ato axosharakāfe.

²⁵ Fatora fêtsa mato nami ināpai mato kori fixikī akka pipaiki mā fitiro pixiki. “¿Fanīa mī na nami feamē?” ixō yōkayamakāfe mā pixō shināchakaxikakīma: “Nā nami nā mī niosnāraka,” ixō yōkayamakāfe. Akka noko Niospa yoini iskafakī: “Keyokōi mā nami pitiro,” ixō noko yoini. ²⁶ Nōko Ifāfe keyokōi onifani. Keyokōiri āfenā. Nā onifani tii noko ināpai nōkonā keyokōi inō.

²⁷ Akka nā Jesús chanīmara famato mato pimapaiyaito mā a feta pipaiyai afeta pikāfe. Nāskaxō iskafakī yōkayamakāfe: “¿Fanīa na nami mī feamē? Nā mī niosnāraka,” ixō yōkayamakāfe. Yōkaxoma mā pitiro shināchakaxikima. ²⁸⁻²⁹ Askatari fêtsa mato yoiki iskafatiro: “Ē mato nami pimai nā ēfe niosnā,” ixō mato yoiaito nā nami piyamakāfe. Akka mā piaito oikī āfe shinā mēraxō shinātiro iskafakī: “Ajaa, na feronāfāke Jesús Ifofafixō nā ēfe niosnā mā nami pii. Na feronāfākeai Jesús Ifofasharama,” ixō āfe shinā mēraxō shinātiro. Nāskakē māri mā nami pixō māto shinā mēraxō mā shināchakatiro: “Mā nō chakafara,” ixō. Akka mā mā tāpia keyokōi nō nami pitiro. Nāskakē fetsafāfe tāpiamano ato ferotaifi nā nami piyamakāfe shināchakayamanōfo.

³⁰ Mā yoiraka iskafakī: “Ē keyokōi nami pikī ē Nios, ‘Aichora,’ fafafāfāini. ¿Akka afeskakī fêtsa eōnoa shināchakatiromē?” ixō mā shināiraka.

³¹ Ē mato yoinō afara mā akai shara shināki akāfe. Niospa mato shara oinō akāfe. Niosnoa shināsharanōfo akāfe. ³² Nā mā akai keskafakī fetsafo shināchakamayamakāfe. Nōko kaifo judeofo iyamai mani fetsafo Nios Ifofaafoya ato shināchakamayamakāfe matōōxō nōko Ifoōnoa shināchakanōfoma.

³³ Nāskari fakī ēri keyokōi yorafo ē ato shara faxopai inimanōfo. Akka nā ē apaiyai keskara fisti ē akima. Fetsafāfe afara apaiyai fo keskafakī ē ato axopai Jesucristo Ifofakaxō ato chaka xatekanax afe ĩpaxanōfo.

11

¹ Akka na Cristo akai keskara ēri aki. Akka māri nā ē akai keskara akāfe.

Ichanāxō nō Nios shināino feronāfāke fe kēro afeskax itirofomāki Pablo ato yoini

² Mā ea shināmiskē ē mato aicho fai matoki inimakī. Nā ē mato yoisimis keskara mā nō feyafamiski. Nā mā nikafafāini. ³ Efe yora mīshtichi, ē afara ē mato yoipai mā tāpinō. Cristofi keyokōichi nōko Ifokī. Nāskarari kērofāfe āto ifo āto fenefo. Akka Cristo āfe Ifokī Epa Nios. ⁴ Nāskakaxō feronāfāke Nios yoiti pe xe anoxō yoianā kifikani marakometirofoma Cristo shinākani. Nō marakomexō nōko Ifo nō noima. Nāskakē nōko Ifo nō rāfimatiro. ⁵ Askatari kērofāfe Nios kifipaiyanā Niospa meka yoipaikani marakometirofo fetsafāfe tāpinōfo āto fenefo āto ifokē. Nāskara mā nō feyafamis. Āto marakometimaisax maxko ika keskara itirofo. Nāskaxō āto fenefo rāfimatirofo. ⁶ Akka kērofāfe Nios kifipaikani marakomekaspakani feronāfākefo keskara maxko itiro. Nāskakanax kērofo maxko ikanax rāfipaitirofo. Nāskakē ato iskafatirofo: “Nā kērofo chakafora,” ikaxō yoitirofo. Nāskakē

kērofāfe Nios kīfipaiyanā āfe mekari yoipaikani marakometirofo. ⁷ Akka feronāfakēfāfe Nios kīfipaikani askayamai āfe meka yoipai marakometirofoma Nios keskara sharamāi ikanax. Askatari Nios nikakōikanax āfe ōiti keskara shara ikafo. Nāskafakīri kērofāfe āto fene nikakōikanax shara itirofo. Nāskakē āto fenefo atoki inimatirofo. ⁸⁻⁹ Niospa feronāfake onifakī taefani. Chipo xotofake onifani. Feronāfakeōnoa Niospa xotofake onifani. Kēronoakai Niospa feronāfake onifanima. Akka feronāfakeōnoa xotofake Niospa onifani fene afara axosharanō. ¹⁰ Nāskakē feronāfāke kēro ikitiro. Kērofāferi āto fene nikakōitirofo. Nāskax Nios Ifofaafō ichanāifono kērofāfe āto marakometi maitirofo āto fenefo nikakōikaxō fetsafāfe ato ōinōfo āto fenefo nikakōiaifono. Askaifono Niospa āfe ājirifāfe ato ōikakī yoitirofo iskafakakī: “Niospa yoini keskara na kērofāfe āto fenefo nikakōisharakani,” ixō yoitirofo. ¹¹ Nāskax nōko Ifo fe nō rafeax feronāfakefo fe xotofakefo nō axō faatanāsharatirofo. Akka xotofakefo iskatirofoma: “Nō feronāfakefo nō yopaima,” itirofoma. Askatari feronāfakefo iskatirofoma: “Nō xotofakefo nō yopaima,” itirofoma. ¹² Niospa taefakī feronāfake onifani, āfe ane Adán. Nāskaxō xotofakeri onifani, āfe ane Eva. Adán āfe pishi tsēkaxō Niospa onifani. Nāskatari xotofake fake feronāfake kāipakemis. Akka xotofakefoya feronāfakefo Niospa onifani.

¹³ Efe yora mīshtichi, shinākāpo. Xotofakēfāfe mato fe ichanākaxō Nios kīfipaikakī marakomexoma Nios kīfikī, ¿askara sharamamē? Mā ea yoitiro. ¹⁴ Mā mā tāpia feronāfake foo chainipaya nō shara ōitiroma. Akka nōkai askara feyafamisima. Nāskakē feronāfāke foo chainipa fatiroma. Foo chainipayax rāfitiro. ¹⁵ Akka xotofakēfāfe āto foo chai faafō nā marakometi shara ōitsa itirofo. ¹⁶ Akka na ē mato yoiāi keskara ea nikakaspai fetsa efe feratenāito ē afaa yoipaima. Akka nā fisti ē mato yoimis. Xotofakefo marakometiro ē mato yoimis. Nā ē mato yoimis keskarari Nios Ifofaa fetsafāfe nānorikōiri yoimisfo nā ichanāifotīa.

Nios yoiti pexe anoax ichanākaxō Corinto anoafāfe afarafo chakafaifono Pablo ato yoini anā askanōfoma

¹⁷ Akka afara fetsari ē mato yoipai. Mē nika Nios yoiti pexe anoax ichanāxō mā afara chakafaito. Nāskaxō afara shara fatama mā afara chakafakōini. Nāskakē, sharafora ē mato faima. ¹⁸ Akka mē nika mato anoax fēkaxō ea yoiāifono nā mā ichanāitīa fetsafo fe mā osināxma ato fe ichanākaspaifo. Nāskax mā ato ketaxamei tsaopaitiroma. Mā ichanāxō nā nōko Ifo Jesús mato nāxoni shināpaifi mā ranā mā noikaspa faatanāi. Nā ē matoōnoa nikai keskara ē chanīmara fai rakikīa. ¹⁹ A mā shināi fisti anori mā shināima. Nāskarafo yorafo a shināi fisti anori shinākanima. Nāskakē mā ranā feratenākakīma yoinānāsharakāfe tāpisharaxikakī. Fetsafāfe anori mā shināino, nāskakē fetsafāferi anorima shināi. Nāskakē yoināsharakāfe fato sharamākī. ²⁰ Ē anā mato yoisharapai. Mā Nios yoiti pexe anoax ichanāxokai mā pāa piyanā ayayanā a noko Jesús nāxoni mā shināima. Askatamaroko mā piāi yafi a mā ayai fisti mā shināmis. ²¹ Mē nika a mā piāi mā feito mares pixikī ichanāxō ato manayoxoma. A fonāikaifokai mā ato ināima. Nāskakē fonāikani. Askatari mā pāemis. Askarakai sharama. ²² Akka pipaikī ichanāti pexe ano kayoxoma ikisi mātō pexe anoxō piyokāfe. Akka mātō pexe anoxō piyoxomaroکو nā Nios yoiti pexe ano mā femis anoxō mares pixikī a fonāikaifo ato akīxikima. Nāskakē a fonāikaifo rāfitirofo. Mā askafakī a mato fe ichanāfo mā chakafai. Mā ato noima. ¿Ē matoōnoa yoisharaimē? Maa. Ēkai matoōnoa yoisharaima māmāi ato chakafaito.

Jesús noko nāxoni shināyanā nō piyanā nō ayatiro
(Mt. 26.26-29; Mr. 14.22-25; Lc. 22.14-20)

²³⁻²⁴ Nāskakē nōko Ifo Jesús ea yoini keskara ē anā mato yoini. Ea tāpimani keskara ēri mato tāpimapai. Nōko Ifo Jesús Judaspa ato achimayoamano nā fakishi fisti aōxō tāpimisfo fe ichanāyoni. Nāskaxō ato feta pikī pāa tsoamaxō Apa Nios yoini iskafakī: “Epa Niospa, mī sharafinakōia. Mīfi keyokōi tāpiaki. Aicho,” fata pāa torepakexō ato ti ināni. Nāskaxō ato anā yoini iskafakī: “Na pāafi ēfe yoraki. Ēfi matoōnoax chipo naikai mato noikōiax. Mē naano nā mā ichanāitīa nā mā pāa piatīa ea shināfafāikāfe,” ixō ato yoini. ²⁵ Nāskaxō mā piaifono anā kecho tsoamaxō ato yoini iskafakī ato ayamayanā: “Afara fena shara ē mato yoinō. Nā mā ayai ēfe imi. Nāskakē mā ea shinātiro. Ēfe imi foyanā ē matoōnoax nai mā efe Epa Nios ari ĩpaxanō. Nā nō akai keskara chipo akāfe mē naano nā mā ichanāitīa ea shinākī,” ixō ato Jesús yoini. ²⁶ Nāskakē nā mā ichanāitīa pāa piyanā ayayanā Jesús shināfafāikāfe: “Nōko Ifāfe noko nāxoni,” shināyanā. “Nā pāa Jesús āfe yora,” ixō shināfafāikāfe pāa piyanā. Jesús anā oaitīa nā chanīmara faifo askapakexanōfo. Ē anā oaitīa nāskaras akāfe.

Ichanāifo anoxō pāa pikī nō Jesús shinātiro

²⁷ Nāskakē nā mā ichanāi anoxō mā pāa piyanā ayayanā mā Jesús shinātiro. Askafafiakīkai māto chaka xatekaspaxō māri mā chakafai pāa pixō. Akka nōko Ifāfe noko nāxoni āfe yora omiskōiyanā āfe imi foyanā noko nāxoni. Nāskakē nō ichanāi anoxō pāa piyanā ayayanā nōko Ifoōnoa shinākima nō nōko Ifo nō chakafai. ²⁸⁻³² Nāskakē nō ichanāyanā nō pāa piyanā nō ayatiro nōko Ifo shināyanā. Akka taefakī nō shinātiro iskafakī: “Ē afara chakafamis,” ixō nō shinātiro. Akka nō afara chakafafxō Epa Nios nō yōkayotiro nōko chaka noko soaxonō. Nāskaxō Jesús noko nāxoni nō shinākōitiro pāa piyanā. Akka nō askafayamaito Epa Niospa noko omiskōimani. Akka nā ē mato yoiāi keskara atiri mā askaima. Nāskakē mā iramanai. Ranāri mā isinī ĩki. Nāskatari ranāri mā mā nai. Nāskakē nā mā ichanāitīa pāa piyoxoma afara chakafxō ĩkisi Epa Nios yoiyokāfe mato chaka soaxonō matori omiskōimayamanō. Akka noko omiskōimafiakī a Jesús Ifofaafoma Niospa ato omiskōimanai keskafakī noko omiskōimasharaima. Akka afokai āfe fakefoma. Nāskaxō omiskōipakenakafo mēra ato potaxii. Akka nōfi āfe fakekōifokī. Nōko Ifāfe noko omiskōimafiakī a omiskōipakenakafo mēra noko potatamaroko noko omiskōimakī noko tāpimani nō anā chakafanōma.

³³ Akka mā ichanāxō pāa pixikī ranārito mō taefakī piimis. Nāskakē fetsafāfe akairi pipaikani afaa pitirofoma. Akka piyoxoma ato manayokāfe fetsafo feta pixikakī. Nāskakē mā ato manayotiro keyokōichi pitirofo. ³⁴ Akka fatora fetsa mā fonāiki ichanāyoxoma māto pexe anoxō mā piyotiro. Nāskaxō mā ichanāxō mā ichapa piyamaino fetsafāferi pitirofo. Nāskaxō mā ichanāxō Jesús shinākī ato feta mā pisharaino Niospa mato omiskōimanima. Afara ichapakōi ē mato yoipai. Nāskaxō ē matoki nokoxō atoōnoa ē mato yoisharapai.

12

Jesús Ifofaafāfe Niospa Yōshi Sharaōxō afarafo atirofo fetsafo fe axō faatanāsharaxikaki

¹ Efe yora mīshtichi, afara fetsa anā ē mato yoisharapai. Niospa Yōshi Sharaōxō afarafo nō atiroōnoa ē mato tāpimapai aōnoa mā tāpisharakōinō.

² Shinākapo. Mā Jesús Ifofaamano afara fetsa onifakaxō, “Na nōko niosra,” ikaxō mato chanīmara famapaonifo. Mā chanīmara fafiaino a onifafotokai afaa shinātirofoma. Askaxorikai afaa pishta mato yoitiroma. Nāskakē mā anorima shināyopaoni. ³ Askata yora fetsafāfe matoki nokoxō yoitirofo iskakafakāi: “Ē mato Niospa meka yoinō. Niospa Yōshi Sharaōxō ē mato yoi,” ixō mato yoiāito, ʔafeskaxō mā tāpitiromē Niospa Yōshi Sharaōxō mato yoi māki? Ē mato tāpimanō afeskaxō mā tāpitiromāki. Fatora yora fetsa Jesús mekakafāi chakafai, akai Niospa Yōshi Sharaōnoax mekaima. Akka, “Jesúsfi nōko Ifokī,” ixō yoi Niospa āfe Yōshi Sharaōxō yoitiro.

⁴ Nā nō Epa Nios Ifofa tii āfe Yōshi Sharapa noko amapaiyai keskara noko amai. Ares fisti noko shināmatiro aōxō nā Nios Ifofaafō fetsafo nō ato asharaxonō. ⁵ Aōxō fetsa fetsafakī afo akī nōko Ifo nō axotiro. Nā keyokōi Nios chanīmara faifo tii nōko Ifo fisti. ⁶ Nāskakē Niospa nā nō Ifofa tii noko shināmani aōxō nō fetsafo afara axosharanō. Askatari Niospa keyokōi noko tāpimani a noko axopaiyai keskara noko axōi. Nā nōko Nios fisti anā ano fetsama. ⁷ Askatari nō Nios Ifofaito noko tāpimani āfe Yōshi Shara nofe iki. Nofe ixō noko amatiro nā Nios Ifofaifo nō ato axosharanō. ⁸ Fetsafāfe Niospa Yōshi Sharaōxō mēstesharakōi noko yoitiro. Askatari fetsafāfe Niospa Yōshi Sharaōxō tāpisharakōikī noko tāpimasharatiro. ⁹ Askatari fetsafori Niospa Yōshi Shara fistiōxō Nios chanīmara fakanax finakōia ikafo. Askatari fetsafāferi Niospa Yōshi Sharaōxō yorāfo sharafakani. ¹⁰ Askatari fetsafāferi Niospa Yōshi Shara fistiōxō tsōa atiroma keskara faino, fetsafāferi Niospa Yōshi Sharaōxō nā Niospa yoiāi keskara noko yoiāifono, fetsafāferi Niospa Yōshi Sharaōxō tāpitiro fetsa niafaka chakaōxō yoi mā kai askayamai Niospa Yōshi Sharaōxō yoi mā kai. Askatari fetsafāferi Niospa Yōshi Sharaōxō meka fetsa nikayomisma yoitiro. Askatari fetsafāfe meka fetsafāfe noko yoiāito nikafikī nō tāpiyamaito fetsafāferi Niospa Yōshi Sharaōxō noko yoisharatiro tāpinōfo. ¹¹ Nā nō Nios Ifofatifi Niospa Yōshi Shara fistichi noko amapaiyai keskara nō atiro. Nā noko amapaiyai keskara noko amatiro.

Nōfi yora fisti keskaraki

¹² Nōko yora fistifiano nō pōyayai fetsea. Askata nō feroyata, pachoyata nā nō fisti askai fetsea. Nāskarifiāi nō keyokōichi Cristo Ifofaano nā fisti keskarakōi. ¹³ Cristo fistifiano nōfi āfe pōya keskarakī. Atiri nō judeofo ikaino mani fetsafori judeofoma ikaino yorafāfe āto yonomatifo ikaino askatari yorafāfe āto yonomatifoma ikaino nō askai fetsea. Nā nō Cristo chanīmara faafo tii nō afe yora ika. Niospa Yōshi Sharapa noko ōiti fetsafaax nō mēra iki.

¹⁴ Nōko yora fistifiano nō pōyayai fetsea. ¹⁵ Nāskakē nōko tāekai yoi kī iskakatiroma: “Ēkai mēkema. Nāskakē ēkai āfe afaama,” ixō yoi fi nā nōko tāeri nōko yoraō nea. ¹⁶ Nāskatari nōko pachori yoi kī iskakatiroma: “Ēkai feroma. Nāskakē ēkai āfe afaama,” ixō yoi fi nā nōko pachori nōko yoraō nea. ¹⁷ Akka nōko yora nōko fero fistikē afeskaxō nō nikakeranama. Nāskatari nōko yora nōko pachō fistikē afeskaxori nō zetekeranama. ¹⁸ Akka Niospakai askara noko onifanima. Nā apaiyai keskara fakī noko onifani. Mapoya fāta feroya fāta pōyaya fāta pachoya fāta kishiya fāta noko fani. ¹⁹ Akka nōko yora afara fistiya ikanokai shara ikeranama. ²⁰ Akka nōko yora fistifiano nō pōyayai fetsea.

²¹ Nāskakē nōko fērokai mēke yoikī iskafatiroma: “Ē mia yopaima,” ixō yoitiroma. Māporikai tae yoikī iskafatiroma: “Ēkai mia yopaima,” ixokai yoitiroma. Nāskafakīri a Nios Ifofaa fetsafo iskafakī yoiyamakāfe: “Ē mia yopaima,” ixō yoiyamakāfe. Niospa nā Ifofaafō tii noko noikōia. Nāskakēri nōa ranā noinākāfe. ²² Nōko yora āfe afara fetsafo mitsisipayamafekē nāfori nō yopakōi. ²³ Nōko yora āfe afara fetsafo, sharamara, nō fafiakī nāfori nō kexesharai. Nōko afara fetsafori nō onesharatiro nō rāfixikīma. ²⁴ Akka nōko yora āfe afara fetsa sharano nō onetiroma. Niospa noko yora onifaxoni nō kexesharanō. Nāskaxō nō yoitiro iskafakī: “Ēfe afara ē yopakōi,” ixō nō yoitiro. Nāskafakīri fētsa a Nios Ifofaa fetsa yoikī iskafatiroma: “Nakai afama,” ixō yoifiaino Nios aō noikōi. Nāskakē noko onifani nā Ifofaafō tii keyokōi nō yopakōi. ²⁵ Niospa noko onifani nā Ifofaafō tii keyokōi nō kexenōnāsharatiro ishaxaxikī nānori fisti shināxikī. ²⁶ Akka nō fanīra moxaki chachixō nō pae meetiro keyokōi nōko yora pāei fetsetiro. Nāskarifikī Jesús Ifofaa fetsa omiskōiaito keyokōi nōri shināmitsatiro. Nāskafakī yorafāfe Jesús Ifofaa fetsa sharafakē keyokōi nō afe inimakōitiro.

²⁷ Akka nō Cristo yora keskarakōi. Nāskax nō āfe pōya keskarafō. Nō ichapafiax nō yora fisti keskarakōi. ²⁸ Nāskaxō keyokōi nā nō Jesús Ifofaa tii Epa Niospa noko katonī aōxō afara fetsa nō anō. Akka fetsafori taefakī ato katonī Jesucristoōnoa ato yoifofāsafanōfo. Askatari fetsafori katonī āfe meka yoimis inōfo Niospa ato shināmanaino. Askatari ato katonī ato tāpimamisfo inōfo. Askatari aōxō tsōa atiroma keskara amisfo ato katonī. Askatari Niospa Yōshi Sharaōxō a isinī ikaifo ato sharafamisfo ato katonī. Askatari fetsafo ato axomisfo ato katonī. Askatari fetsafo shara yonomamisfo ato katonī. Askatari fetsafāfe āfe Yōshi Sharaōxō meka fetsapa yoiyomisma ato katonī ato yoinō āfe mekapa. Noko keyokōi katonī aōxō yorafa nō axosharanō. ²⁹ Niospa keyokōi noko katonī a apaiyai keskara nō anō. Akka noko askafafianino keyokōichi Jesucristoōnoa nō ato yoifofāsafamisma. Askaxori keyokōi noko katonīma āfe meka yoimisfo nō inō. Askaxori keyokōi noko katonīma aōxō ato tāpimamisfo nō inō. Askaxori keyokōi noko katonīma tsōa atiroma keskara aōxō afama mīshti nō fanō. ³⁰ Keyokōi noko katonīma Jesúsō isinī ikaifo ato sharafamisfo nō inō. Keyokōi noko katonīma nā meka fetsapato āfe Yōshi Sharaōxō nō ato yoinō. Keyokōi noko katonīma nā meka fetsa nikaxō nā yoia keskara nō ato tāpimanō. ³¹ Nāskakē Niospa mato imapaiyai keskara ixō nā Jesús Ifofaafō mā ato shara faxotaifai. Niospa Yōshi Sharapa mato amapaiyai keskara nāfo fichipaikāfe. Akka nāfo sharafiano ē mato afara fetsa sharafinokōia iskaratūa ē mato yoinō. Ea nikasharakapo. Shara finokōia Niospa noko imapaiyai keskara ē mato tāpimanō, a noko Niospa noiai keskarī fakī nōri fetsafo noisharakōinō.

13

Nō fetsafo nōisharakōitiro

¹ Ēfe mekapa ē yoifitiroxakī, yora fetsafāfe mekapari ē yoifitiroxakī, Niospa āfe ājirifāfe mekapari ē yoifitiroxakī ē Niosxō yorafa noiyamax ēkai afaa itiroma. Nāskax ē mekai achakōi itiro, fetsafo fekaxtefai keskara ē itiro. Nāskafakī ēa ē fetsafo axomis keskara ē itiroma. ² Niospa meka ē ato yoifikī ē ato noiyamax ēkai afaa itiroma. Askatari fetsafāfe Niospa meka tāpiyamaino akka ē tāpikōifixō ē ato noiyamax ēkai afaa itiroma. Askatari ē Nios chanīmara fakī finakōixō ē Niosxō ē nā machi xekafitiroxaki ē yorafa noiyamax ēkai afaa

itiroma. Ē ato noiyamaino Niospa ea shara ōima. ³Nāskatari ē afama mīshti nā afaamaisfo keyokōi ē ato ināfixō ē ato noiyamax ēkai afaa itiroma. Askatari Niospa meka shara ē ato yoiaito ea nikakaspakakī ea kōaifono ē atoōnoax nafiakī ē ato noiyamax ēkai afaa itiroma. Ē ato noiyamaino Niospa ea shara ōima.

⁴Nō yorafo noikōiaino noko fekaxtefaifono nō atoki ōitifishkitiroma, nō tenetiro. Nāskaxori nō ato noikōikī nō ato axosharatiro. Askaxori nō ato noikī nō xītipaitiroma. Askatari kakapaimis nō itiroma. Nō yorafo noikōikī nō iskatiroma: “Ē tāpikōiaki. Ē fetsafo keskarama,” ixō nō yoitiroma. ⁵Nāskaxori nō ato noikōikī nō ato rāfinīfaima. Askaxori nōa apaiyai keskara fistis nō shinātiroma. Akka nō fetsafori nō ato axosharatiro. Askaxori nō ato fena feratemisma nō itiro. Nāskaxori noko fētsa chakafakī mekaafaino nō shinātaifatiroma. Afo shinātaamaroko nō aō noisharatiro. ⁶Askaxori nō ato noixō fetsafāfe afara chakafaito ōi nō inimatiroma. Akka afara chanīmakōi shara nikai nō inimakōitiro. ⁷Askaxori afara afe keskararafiaino nō Nios noikī nō shināchakatiroma. Nō tenetiro. Askatari ato noikōikī atoōnoa afara chaka yoiaifono nikakī nō chanīmara fatiroma. Akka fetsafoōnoa chaka nikafixō nō tāpīxoma, “Afaa chakafayamapainōfora,” ixō nō shinātiro ato noikī. Askatari a mēxotaima chakafaifoōnoa atoōnoa nō yoitiroma iskafakī: “Nāfāfe mēxotaima afara chakafaifono Niospa ato chaka soaxotiroma,” ixō nō yoitiroma. Askatamaroko nō iskafatiro: “Nios Ifofakakī āto chaka xatetiromo,” ixō nō shinātiro ato noikī. Nāskaxori afara afe keskararafiaino nō Nios noikī nō kachikiri fatiroma.

⁸Nā Jesús Ifofaafāfe Epa Nios yafi yorafo ato noipakenakafo. Askafiaino nōko mai keyoaino Niospa meka yoimisfāfe anā ato yoixikanima. Askaxori a yōra mekapama meka fetsapa yoimisfāfe anā meka fetsapa yoixikanima. Askaxori nā tāpimamisfāferi anā noko tāpimaxikanima. Mā nōko Ifo nokoaino nō anā ato yopaxiima noko axonōfo. ⁹Nāskakē iskaratīa Niospa noko tāpimanai keskara nō tāpisharayoama. A Niospa meka noko yoimisfāfe keyokōi tāpisharafoma. ¹⁰Mā Jesucristo nokoaino nō a keskara shara ixii. Aatofi keyokōi tāpiakī. A tāpia keskara nokori tāpimaxii.

¹¹Akka ē yomeax ēfe meka fāke meka keskara ē iyopaoni. Fakefāfe metiro keskarari ē meyopaoni. Fakefāfe shinātiro keskarari ē shināyopaoni. Iskaratīa mē yosixō fakefāfe shināi keskara ē anā shināima. Fakefāfe ichapa tāpiama. Akka ē iskaratīa mē yosiax fakefo keskara anā ē ikima. Iskaratīa ē feronāfakekōi ē anā fakefo keskarama. ¹²Feisiti fetakōikē nōko femānā nō ōisharatiroma. Nāskarari Jesús nō ōitiroma afe keskara ikamākī. Akka nā oaitīa nō ōixii afe keskaramākī. Akka iskaratīa nō tāpisharayoama. Akka Jesús oaino nō tāpisharakōixii. Jesús noko tāpikōia keskarari nōri tāpikōixii. ¹³Iskaratīa nō Nios chanīmara fai. Nō Nios chanīmara faxō nō manai nā oaitīa afe ipaxakī. Nō Nios chanīmara fai nā shara. Askatari afe ipaxakī nō manaino nāri shara. Askatari nō fetsafo noikōia nāfi sharafinakōiaki.

14

Niospa Yōshi Sharapa noko amapaiyai keskara anā Pablo yoini

¹Nā Niospa noko noiai keskafakī fetsafori noitaifakāfe. Nāskara sharakōi. Nāskara fichipaikāfe askaxikakī. Askatari Niospa Yōshi Sharapa afara fetsa mato amapaiyai keskara nō fetsafo fe axoshara faatanānō, afori fichipaikāfe. Niospa Yōshi Sharaōxō nā Niospa meka mā ato yoinō fichipaikōikāfe. ²Askatari fētsa Niospa Yōshi Sharaōxō meka fetsapato yoikī yorafo yoitama

Niosroko yoitiro. Niospa Yōshi Sharaōxō yoifiaitokai tsōa tāpitiroma. ³ Askatari fētsari Niospa meka shara noko yoikī noko tāpimasharatiro nō Jesús Ifofasharanō. Askata nōko ōiti noko fepeaxosharatiro nōko ōiti mēra nō inimanō afara afeskarafiaino. ⁴ Askatari fētsa Niospa Yōshi Sharaōxō meka fetsapato yoikī āa metiro āfe ōiti fepeaka keskara. Askatari fētsa nōko mekapa Niospa meka shara noko yoisharaito nō keyokōichi nikatiro. Nāskakē Niospa noko yoiai keskara nikasharax nōko ōiti fepeaka keskara shara nō itiro.

⁵ Mā keyokōichi nā meka fetsapato Niospa Yōshi Sharaōxō mā yoipainō. Nāskara sharafiano akka fētsa mato mekapa mato tāpimasharai nāfi shara-finakōiaki. Akka fētsari meka fetsapato mato yoiaito mā nikatiroma tsōa mato yoiyamaino. Akka nā mato yoiai keskara fētsari mato tāpimatiro mā tāpinō. Nikai mato ōiti fepeaka keskara shara itiro. ⁶ Efe yora mīshtichi, meka fetsapato ē mato yoiaito mā nikayamax nā mekakai mātōnā afama. Nāskakē nā ē mato yoiai keskara Niosxō mato mekakōichi ē mato tāpimatiro Niospa mato yoipaiyai keskara mā tāpinō.

⁷ Shinākāpo, meka fetsa ē mato yoinō. Xāiti anorima maneaio nō nikasharatiroma fatomākī xafakīa maneaifo. ⁸ Askatari soraro fētsa nā nexemisto āfe pōōiti pōōatiro āfe sorarofō itipinīsharanōfo ato reteifoxikakī. Askafafiakī pōōasharamano tsōa tāpitiroma. Nāskakē tsoa itipinīsharatiroma ato reteifoxikakī. ⁹ Askatari meka fetsapa mā fetsafo yoiaino afeska faxōkai mā yoiai keskara tsōa tāpitirofoma. Mā askara mekapa mekai māakōi mā mekai tsōa mato nikayamafiaino. ¹⁰ Akka nā maitio ikafo meka fetsapa mekakani. Akka nō ato nikatiroma. Āto kaifāfe meka fisti nikatirofo. Nāskax keyokōi meka shara. ¹¹ Akka ēfe mekapa ē ato yoiaito yora fetsafāfe tāpitirofoma. Ēkairoko āto kaifāfe mekapa yoiaito ea nikafo. Akka ē āto meka tāpimax ē āto kaifo keskara itiroma. ¹² Nāskakē Niospa Yōshi Sharapa mato afara fetsa amapaiyai keskara nāfo mā fichipaikōitiro. Mato askafaino aōxō nā Jesús Ifofaafō mā ato ōiti fepeaxosharakōitiro Jesús Ifofasharanōfo. Nāskara fichipaikāfe Nios yonosharaxoxikakī.

¹³ Nāskakē Niospa Yōshi Sharaōxō meka fetsapato yoikī Epa Nios kīfikāfe nā mā yoiai keskara mato tāpimanō. Mā tāpisharaxō atori mā ato tāpimatiro akairi nikakōisharanōfo. ¹⁴ Nāskakē Niospa Yōshi Sharaōxō meka fetsapato nō Nios kīfikī nōko shināmā shināxō nō kīfima. ¹⁵ Akka Niospa Yōshi Sharaōxō meka fetsapato ē Nios kīfitiro. Askatari yorafāfe mekakōichiri ē Nios kīfitiro keyokōichi nikanōfo. Askatari meka fetsapa fanāitiro. Askatari yorafāfe mekapari ē fanāitiro keyokōichi nikanōfo. ¹⁶ Mā Niospa Yōshi Sharaōxō meka fetsapa Epa Niosnoa mā yoifiaito afeskaxokai a mato fe ichanāfāfe yoitirofoma iskafakakī: “Chanīmakōi mā yoi,” mato fatirofoma tsōakairoko mato meka tāpixō. ¹⁷ Mā meka fetsapato Nios aicho fafiakī fetsafo mā ato ōiti fepeaxosharatiroma mato nikafiaifono māmāi meka fetsapato yoikī. ¹⁸ Efe yora mīshtichi, Niospa Yōshi Sharaōxō yōra mekapama meka fetsapa mato finōimīfōfāta ē yoimiskī. Nāskakē ē Epa Nios aicho fai. ¹⁹ Askafia a Jesús Ifofaafōya fetsafori ē āto yoipai ea nikanōfo. Ichanāti pexe anoxō ato ichanāfaxō āto mekakōichi ē ato yoipai meka ichapama ē yoifiaito. Nāskarafi sharakī. Akka yōra mekapama meka fetsapa ē ato yoiaito ea nikatirofoma meka ichapa ē ato yoifiaito. Nāskakē mekakōichi ē ato yoipai ea nikanōfo.

²⁰ Efe yora mīshtichi, ē mato tāpimapaiyai keskara tāpisharakāfe. Fake yomē tāpisharayoxoma, shināsharatiroma. Nāskarifikī fake yomē shināi keskara shināyamakāfe. Mēstekōi shinākāfe. Akka yora xinifāfe chaka shināitirofo.

Akka fake yomefāfekai chaka shinātiroma. Nāskakē fake yome keskara ikāfe. Afara chaka tāpipaiyamakāfe. ²¹ Isaías Niospa meka yoikī keneni iskafakī:

Nā israelifo ē ato yoifiaito ea nikakaspamisfo. Nāskakē ē ato kaxpakōi yoimis. Nāskaifāfe ōikī āto kaifoma ē atoki nīchikē, āto mekapa ato yoiaifāfe ato nikakanima meka fētsapamāi yoiafono. Ato yoifiaifonokai ato nikakanima,

ixō Isaías kirika keneni Niospa meka yoikī. ²² Nāskakē yōra mekapama nō meka fetsapa ato yoiaito a Nios Ifofaafāfema noko nikatirofoma. Nāskakē Niospa ato ōimani afāfekai Niospa meka tāpitirofoma Nios chanīmara fayamakaxō. Akka Nios Ifofaafāfe Niospa meka tāpitirofo. Askata ichanāxō āto mekakōichi nō ato Niospa meka yoiaino Niospa Yōshi Sharaōxō nikasharatirofo. Akka nā chanīmara faafāfema nikasharakanima āto mekakōichi nō ato yoifiaino. ²³ Nāskakē ichanāx yōra mekapama meka fetsapa mā mekaino a Nios chanīmara faafoma fe a mato fe yoramafori mato fe ichanāxō mato nikakakī shinātirofo iskafakakī: “Ōikapo, nā yorafo nā afaa shināifoma keskarafo,” ikanax yoinātirofo. ²⁴⁻²⁵ Nāskata mā ichanāxō Niospa meka mā yoisharaito a Nios chanīmara faafoma fe a nofe yoramafori mato nikakaxō āto ōiti mēraxō shinātirofo iskakakī: “Ooa, nōri Niospa yoiai keskara nō amisma. Niospa keyokōi tāpikōia. Nōko shinā mēraxō nō afara pishta fomāpaimisfo Niospa tāpikōia. Chipa noko kāimaxoxii,” ixō shinātirofo. Nāskaxō shinātirofo Niospa meka mēstesharakōikī. Anori shinākakī ratokonō mai chachixō Epa Nios kīfitirofo iskafakakī: “Epa Niospa, mī sharafinakōia. Na mia chanīmara faafo fe mī ika keskai nōri mefe ipai,” ixō kīfitirofo.

Pablo ato yoini nō ichanāx nō afeskatiromāki

²⁶ Efe yora mīstichi, ē mato yoipai iskafakī ē mato tāpimapai. Mā ichanāino fētsa mato fanāixotiro. Fētsari mato Niospa meka yoitiro. Fētsari Niospa Yōshi Sharaōxō meka fetsapa mato yoitiro. Fētsari Niospa Yōshi Sharaōxō a meka fetsapato mato yoiaifo mato tāpimatirofo. Nāskakē nā ē yoiai keskara asharakāfe. Nāskax mā ranā mā ōiti fepeasharatiro. ²⁷ Mā ichanāino yora ichapama a yōra mekapama meka fetsapa mekapai mekatirofo. Nāskakē fetsa mekai taetiro. Askatari fētsari chipa mekatiro. Akka meka fetsapato mato yoiaito fētsari mato mekapa xafākīa mato tāpimatiro a mato yoiai keskara mā nikasharanō. ²⁸ Akka yōra mekapama meka fetsapato mā yoipaiyaito tsōa nikatiroma. Akka a ato tāpimatirofo ano ikafomano meka fetsapa mā ato yoitiro. Akka mato pexe anoax mares fisti mā mekatiro yōra mekapama Epa Nios fe.

²⁹ Mā ichanāino nā Niospa meka yoimis rafeta Niospa meka mato yoitirofo. A yoiai keskara nikakaxō nā Jesús Ifofaifāfe shinātiro iskafakakī: “Niospa Yōshi Sharaōxō noko yoi,” askayamai, “Āa shināxō noko yoirā,” ixō shinātirofo. ³⁰ Askaxō fētsa Niospa meka mato yoioaino fētsari tsaono Niospa Yōshi Sharapa shināmanaino mato yoipakī yoitiro. Akka a taefakī yoiaito tsaōxō nikatiro. ³¹ Nāskakē Niospa Yōshi Sharapa mato shināmanai keskara fētsa yoikī taefatiro fētsari chipa yoitiro. Askatari fētsari yoitiro. Nāskaifono nā ichanāfāfe keyokōichi ato nikatirofo. Nāskaxō ato ōiti fepeaxosharakani. ³² Nā Niospa meka ato yoiaito āfe shinā mēraxō shinātiro iskafakī: “Fētsari ato yoipai kiki ikax xatetiro.” ³³ Askaxō ichanāxō rafekaita ato yoiaifono tsōa ato nikasharatiroma. Nāskakē āto ōiti fekaxtefatirofo. Askarakai Niospa fichipaima. Akka Niospa fichipai nā ichanāfo anoxō rafekaita ato yoiyamaino fistichi ato yoinō nikasharakōinōfo.

³⁴ Askatari afara fetsari ē mato yoisharapai. Nios Ifofaafō ichanāifo anoax xotofakefo mekatirofoma. Niospa meka yoimisto yoiaino xotofakefāfe nikakōitirofo. Mekatamaroko nā Niospa meka yoiāi keskara nikasharaxikakī. Nānori taeyoi Niospa meka yoikakī kirikaki kenenifo. ³⁵ Nā ichanāxō nikafo keskara xotofakefāfe tāpisharaxoma āto fene yōkapaikakī manayotirofo. Akka āto pexe ano nokokaxō āto fenefo yōkatirofo āto fenefāfe ato tāpimanō. Nāskakē mā ichanāino xotofakefo mekaifokai sharama.

³⁶ Akka Epa Niospa yoipaiyai keskara mato fisti taefakī tāpimanima. Niospa meka yoimisfo matoki fisti fenifoma Niospa meka yoifekani. Fetsafōri yoifekani fenifo. ³⁷ Akka fatora fētsa mā yoikī iskafatiro: “Nō Niospa meka ato yoimis. Askatari nō Niospa Yōshi Sharaōxō nā Nios Ifofaafō nō afara fetsa ato axosharatiro,” ixō mā yoikī mā tāpitiro nā ē mato kenexonai keskara nōko Ifāfe mato yoiā mā anō. ³⁸ Fētsa anorima mato yoiāto nikayamakāfe. ³⁹ Nāskakē efe yora mīstichi, nā mā ichanāi anoxō Niospa meka ato yoipaiyāfe. Nā sharakōikī. Akka fētsa yōra mekapama meka fetsapa Niospa Yōshi Sharaōxō mato yoipaiyāto xatemayamakāfe. ⁴⁰ Akka mā ichanāino fētsa taefakī yoitiro. Askatari fētsari chipo yoitiro nā yoiāifo keskara mā nikasharakōinō. Mā askaino māto ōiti fekaxteima.

15

Cristo nafīax anā otoni

¹⁻² Efe yora mīstichi, iskaratīa meka shara Jesúsnoa ē mato yoimis keskara ē anā mato shināmapai. Ē mato Jesúsnoa yoiaino mā chanīmara fani. Mā chanīmara faito Jesús mato chaka soaxoni mā afe īpaxanō. Akka ē mato yoini keskara mā kai kachikiri famisma. Akka mā kachikiri faino ēa kaxpa mato yoikerani.

³⁻⁷ Yorafāfe ea meka shara finakōia yoionifo. Nāskakē ēri mato yoini iskafakī: Cristo noko nāxoni nōko chaka noko soaxoxiki. Akka Cristo tres nia maiyoni. Askata anā otoni. Mā otoax Pedroki nokoi taeni. Nāskatari chipo a aōxō tāpimisfokiri nokoni. Askatari nā chanīmara faafoki yorafā rasifokiri nokoni. Akka fisti rasi nāpaifono, akka ranāri nanifoma. Nāskatari chipo Santiagoki nōko Ifo nokoni. Askatari a aōnoa āfe meka yoimisfoki nokoni.

⁸ Akka chipokōi ekeki Jesús nokoni. Ē kai aōnoa afaa tāpiyopaonima. Akka fetsafāfe mēxotaima nikayopaonifo. Nāskakē chanīmara fakī taefanifo. Akka ē afe niyopaonima taeyoi a fetsafo ikai keskai. Ē askafiaino ea Jesús katoni chipo. Ekeki nokoxō ea yoiāto ē koshi Ifofani. ⁹ Akka ē chakafayopaoni keskara Jesús Ifofaa fetsafāfe chakafamisfoma. Akka ē afara chakafakī finayopaoni. A Jesús Ifofaafō ē ato omiskōimayopaoni. A afe yorafo ē chakafayopaonifikē Jesús ea noikī ea nīchini aōnoa ē ato yoinō. ¹⁰ Niospa ea noixō ea katoni a apaiyai keskara ē anō. Nāskakē nā ea amapaiyai keskara mē amis. Akka ea kaxpakōi katonima. Nā aōxō yonoxomisfo keskafakī ē yonoxokī finakōimis. Akka ēakōi ē yonoxomisma. Ea noikī Niospa ea katoni ē Jesús yonoxomis inō. ¹¹ Akka ē Jesúsnoa yoimis iyamai fetsafāfe mato Jesúsnoa yoimis itirofo nānori fisti nō mato yoimis. Nāskakē nā Jesúsnoa fisti nō mato yoimis keskara nikakī mā mā Jesús chanīmara faa.

Namisfo otoxikani

¹² Nō mato yoimis iskafakī: “Cristo noko naxōfinixakī mā anā otoni,” ixō nō mato yoimis. Akka, ŷafeskakī atirito mā yoikī iskafamismē? “Yora naax anā

ototiroma,” ixõ mã anorima yoimis. ¹³ Akka yora naax ototirokẽma Cristori otokeranima. Akka nõ tâpia yora naax ototirokẽ nõskakẽ Cristo otõni. ¹⁴ Akka Cristo otoyamanikẽ kaxpa aõnoa nõ mato yoikerana. Nãskakẽ kaxpakõĩ mã chanĩmara fakerana. Akka chanĩma Cristo naax otõni. ¹⁵ Akka Cristo otoyamanikẽ nõ mato pãrakerana. Akka nõ mato yoimis iskafakĩ: “Epa Niospa Fake Jesõs otofani,” ixõ nõ mato yoimis. Yora naax ototirokẽma Epa Niospa Cristo otofakeranima. ¹⁶ A naafo otoyamaino Cristori otokeranima. ¹⁷ Cristo otoyamanikẽ kaxpakõĩ mã chanĩmara fakerana. Mãto chaka mato soaxokeranama. ¹⁸ Akka Cristo otoyamanikẽkai nõri naax nõ otokeranama. Askax nõ afe nĩpakeranama. ¹⁹ Nono mai anoxõ niyoxõ nõ shinãkĩ iskafakerana: “Ë naax Cristo otõni keskai ãri otõxii ea Niospa otõfaano,” ixõ nõ shinãfiãx Cristo otoyamanikẽ nõskakẽ kaxpa nõ chanĩmara fakerana. Akka Cristo otoyamanikẽ chanĩmayamakẽ, “Afaa tâpiafoma,” noko fakeranafo nokoõnoa shinãchakakõikeranafo.

²⁰ Akka chanĩmakõĩ, Cristo otõni taeni. Anã naxiima. Nãskakẽ Cristo otõnino mã chanĩmara faafo nakanax otõxikani afe ipaxakakĩ. ²¹⁻²² Akka Adãn Niospa onifakĩ taefani. Adãn taefakĩ afara chakafani. Nãskakẽ afara chakafaax nani. Akka mã feronãfakeõnoax keyokõĩ nãpamisfo. Nãskarifiãĩ mã feronãfakeo Cristõnoax mã chanĩmara faafo ototirofo afe nĩpaxikakĩ. ²³ Cristo otõni taeni nĩpaxakĩ. Nã anã oaitã keyokõĩ afe yorafo otõfaxii afe nĩpaxanõfo. ²⁴ Nãskatari nono mai anoafo keyoxikani. Nãskatari Cristo keyokõĩ xanĩfofo potaxii anã xanĩfo inõfoma. Askatari niafakafãfe ãto xanĩfofori potaxii. A niafakafãfe ãto xanĩfo finakõiyari potaxii. Cristo ato potano anã ato yonomapakenakafoma. Nãskaxõ Cristo Apa Nios yoikĩ iskafaxii: “Mã yorafo keyokõĩ ãto xanĩfo mã itiro. Ë anã ãto xanĩfo ikima,” ixõ Apa yoixii. ²⁵ Akka iskaratãia Cristo nõko xanĩfo iyoa. Nã xanĩfo fetsafo a Cristo nikakaspaifo Niospa anã ato afaa imaxiima. Cristo nõmãri ato nĩchixii. Nãskatari Epa Nios xanĩfokõĩ ipanaka. ²⁶ Akka Niospa Satanãs omiskõipakenakafo mãra potaxii. Akka mã Satanãs Adãn afara chakafamanino keyokõichi nõ afara chakafaax nõ napanaka. Nãskakẽ Niospa Satanãs omiskõipakenakafo mãra potano anã tsoa nanakama. ²⁷ Nãskaxõ Niospa ãfe Fake Cristo nõmãri keyokõĩ ato nima. Akka mã nõ tâpia Apa Nios fisti ãfe Fake nõmã ikama nãatomãĩ nõmã keyokõĩ ato nimax. ²⁸ Keyokõĩ Niospa Fake nõmã ikafono Apaõxõ ato yonomatiro. Nãskaxõ ãfe Fãke Apa yoixii iskafakĩ: “Epa mãri ea yonomatiro,” ixõ yoixii. Nã Apa yoiaĩ keskara nikasharakõĩ. Nãskakẽ Apa Nios fistichi keyokõĩ yonomaxii ãto xanĩfo finakõimãiaxõ.

²⁹ Akka yora maotisamisma naano fẽtsa maotisaxotiro. Nãskara mã feyafamisfo. Akka yora naax otoyamanikẽkai tsoa ato maotisanoxokeranama. Tsoa otoyamanikẽ nõri ototiroma. Akka, ãfeskai nõ maotisanõximẽ nõ otoyamafi? Akka nõ tâpia mã nõ naax nõ anã otõxiai. ³⁰ Akka tsoa otoyamanikẽkai ãri otokeranama. Nãskakẽ, ãfeskai mãxotaima Cristõnoax mesekõĩ mãra ã kafãsamẽ ã otoyamafi? Akka ã tâpia a ã otõxiai. Nãskakẽ mãxotaima ã Cristõnoax mesekõĩ mãra kafãsai Cristõnoa ato yoifõfãsafai. ³¹ Nãskakẽri ã fetsafo matoõnoa yoisharamis mãmãĩ eõxõ nõko Ifo Jesucristo mã Ifosharafaano. Efe yora mãshtichi, chanĩma ã mato yoi mãxotaima Cristõõxõ ea retẽpaikani. ³² Poomãnã noko pipaiyai keskara ã Efeso anoafãfe ea retẽpainifo, a Cristo nikakaspaiãfe. Akka Cristõnoax ã naax ã otoyamax kaxpa ã aõnoax nakerana. Askatari ã ato Cristo Ifofamano nakanax tsoa otoyamaino kaxpa ã ato Cristo Ifofamakerana. Nõ naax anã otoyamafixixakĩ

nã nõ apaiyai keskara nõ anõkãfe. Nãskakẽ fetsafãfe yoikakĩ iskafakani: “Nõ nayoxoma nõ piyanã nõ ayayoi inimayanã. Nõ Nios shinãtama nã nõ apaiyai keskara nõ ayoi,” ixõ shinãkani anorima. Akka nõ naax nõ anã otoxii. Nãskakĩ nõ nayoxoma Niospa noko amapaiyai keskara nõ anõkãfe.

³³ Niosnoa yora chakafãfe mato pãramisfo. ato fe rafeyamakãfe. Yora chakafo fe mã rafeaito matori afara chakafamatirofoki. ³⁴ A mã anorima shinãmis anã shinãyamakãfe. Chakafakĩ xatekãfe. Atiritokai mã Nios tãpisharama. Nãskax mã rãfipaitiro.

Nõ naax anã nõ otoaitã nõko yora fetsa keskara ixii

³⁵ Akka yoikĩ iskafakani: “¿Afeskaxõ Niospa naafo ofofaxiimẽ? ¿Anã nõ otonõ afe keskara yoraya noko imaimẽ?” ixõ yoikani. Anori yoikakĩ afaa shinãkanima. Akka shara shinãsharakakĩ tãpitirofo. ³⁶ Nõ ifi exe fanano ãfe xaka payokometiro. Akka ãfe exe oke mẽranoa pishta payokometiroma chipo foaitiro. Maiax ãfe exe xaka naamax ãfe exe pishta foaitiroma. ³⁷ Akka nõ afara fanakĩ nõ ãfe kayafoya fanatiroma. ãfe exe fisti nõ fanatiro. Mã ãfe xaka payokomeaino ãfe exe foaitiro. Nãskax mã foaikax anã ãfe exe keskara itiroma. Fetsa keskara itiro. ³⁸ Nã ifi exe nõ fanano Niospa foaimasharatiro. Nã apaiyai keskafakĩ fanafo fetsa fetsatapafõ fai.

³⁹ Akka nõko yorari yoinãto yora keskarama. Nõko yora fetsa keskara. Yoinãnã fetsa keskarafono peyafonãri fetsa keskarafõ. Foenãri fetsa keskarafõ. Akka nã yora fisti keskara Niospa noko onifanima, fetsa fet-satapafõ Niospa noko onifani. ⁴⁰ Akka nõko mai anoafãfe ãto yorafõ fetsa keskarafõ. Askatari Epa Nios ari anoafõri nai mẽranoafãfe ãto yorafõri fetsa keskarafõ. Keyokõi sharafix askarafõma. ⁴¹ Akka xini ikaino oxe ikaino fishifo ikaino nã yora fisti keskarama fetsa keskarafõ. Nãfo sharafix askarafõma.

⁴² Nãskarifiay yora naino ãfe yora payokometiro. Anã nõ otoaxkai nõko yora payokomenakama. Nãskara shara nõ ipanaka anãkai nõ nanakama. ⁴³ Nõko yora maia anoax chakakõi ixii. Akka nõ otoax sharakõi nõ ipanaka. Nõ nono mai ano niyoax nõ iramanapakeax nõ natiro. Nõ anã otoaxkai nõ anã nanakama, mitsisipa shara nõ ipanaka. ⁴⁴ Nõ naano noko maifafõno nõko yora payokomei. Akka nõ otoano Niospa noko nimaxii afe ãpaxanõfo. Akka nõ mai ano niyoax nõ natiro. Akka mã nõ naax anã nõ otoax nõko yora fetsa keskara ixii. Nõ anã nanakama. ⁴⁵ Niospa meka yõra kenekĩ iskafani: “Feronãfake Adán Niospa onifakĩ taefani. Onifaxõ xãka ikai fani,” ixõ yõra kirikaki keneni. Akka Cristori Adán keskara feronãfake. Feronãfakekõixõ noko nimapakenaka. Nõ naax anã otoax nõ anã natiroma. ⁴⁶ Niospa feronãfake Adán onifakĩ taefani. Chipõ Cristori kãini noko nimapakexakĩ. ⁴⁷ Niospa nã feronãfake Adán onifakĩ taefani. Mai yorafaxõ onifani. Akka Cristo nai mẽranoax nõkoki fotoni. Tsõakai Cristo onifanima. ⁴⁸ Akka nono mai anoax nõ kãiax nõko yora Adán yora keskara. Nõ Jesús Ifofaax nã keskara nõ ixii. ⁴⁹ Nõ nono mai anoax fake kãini. Nãskax nõ Adán keskarakõi. Askatari nõ Niospa yora ikax nõ Jesucristo keskarakõi ixii.

⁵⁰ Efe yora mĩshtichi, ã mato yoinõ nõ afeskax iximãkai. Nõ iskaratã naniya. Askatari nõ imiya. Nãskara yorayax Nios fe nõ ipanakama. Akka nõko yora natiro nõ anã otoxixakĩ. Nõ anã otoax nõko yora fetsa keskara ixii. Nãskakẽ nõ anã nanakama. ⁵¹ Tsõakai nikayomisma na meka shara ã mato yoi. Tãpipaikĩ ea nikasharakãfe. Akka nõkai atiri naima. Askafix nõ keyokõi fetsa keskara iki fetsexii. ⁵² Jesús anã oaino ãfe ãjirinĩ ãfe

maneti maneaino Jesús chanĩmara faafo, a nayoamafo, fetsa keskara ĩtaxikani. Fetsoitanai keskarataxikani fetsa keskara ĩtāxikani. Askatari Jesús chanĩmara faax namisfori otorisataxikani. Nāskakē keyokōi Jesús chanĩmara faafo tii fetsa keskara ixikani. Askax anā nanakafoma. ⁵³ Nō iskaratĩa naino nōko yora payokometiro. Askafiano Niospa nōko yora noko fetsafaxoxii nō anā nanōma, nō afe nĩpaxanō. ⁵⁴ Nānori Niospa meka yoikakĩ kirika kenenifo. Nā yoinifo keskara chanĩmakōi ixii. Iskafakakĩ kirika kenenifo yoikakĩ: “Aicho. Anākai Niospa yorafo nanakama. Cristoōnoax nō afe isharapakenakaki,” ixō kirika kenenifo. ⁵⁵ Askatari kenenifo iskafakĩ: “Anākai afanā noko namatiroma. Anākai nō nai omiskōinakama,” ixō kirika kenenifo. ⁵⁶ Nō afara chakafamisnoax nō nai nō omiskōitiro. Nāskakē nā Moisés noko yoinioxō nō tāpitiro afara chakafaax nō natiro. Naax nō omiskōixii. ⁵⁷ Akka Jesucristo noko nāxoni noko chaka soaxoxiki. Nāskakē nō Jesucristo Ifofaax nō nafiax nō anā otoax nō anā nanakama. Nō afe nĩpanaka. Nāskakē nō Epa Nios aicho fai.

⁵⁸ Akka efe yora mĩshtichi, afara fetsa shināyamakāfe. Niospa noko imapaiyi keskara nā fisti shināsharakāfe. Jesús Ifofasharakāfe. Nōko Ifo Jesús yonoxosharafafāikāfe. Mā mā tāpia nōko Ifoōxō nō yonoai kaxpa nō yonomisma, nōko Ifomāi noko amakē. Nāskakē nō aōxō ato axosharatiro nō kaxpa ato axōima.

16

Nā Nios Ifofaafāfe kori ichafaxō Nios Ifofafo fetsafo fomani

¹ Iskaratĩa mā ea yōkaita, afara fetsa kirikaki kenexō ē mato yoi. Nios Ifofafo Jerusalén anofo afaamais. Ato noikĩ mā ato afara fomatiro. Akka nā Nios Ifofafo Galacia anofo ē ato yoia keskara ē matori yoipai nā afaamaisfo afarafo mā ato ināsharanō. ² Nomĩkotĩa ichanāi mā kori ichafaxō chipo Jerusalén anofo mā ato fomatiro. Yonoxō kori fĩta atiri mā ato inātiro. Akka mā kori ichapama fixō ichapamari mā ato inātiro. Akka mā ichapa fixō ichapari ato inākāfe. Nomĩkotĩa ichanāi mā kori ichafatiro, ea manakima kori ichafayokāfe. Nā ē matoki nokoaitĩa mā anā kori meketiroma. Nā kori mā ichafaa nā Jerusalén anofo afaamaisfo mā ato fomatiro mē Corinto ano matoki oano. ³ Nāskano feronāfake sharakōifo katokāfe afāfe nā afaamaisfo ato kori foxotanōfo Jerusalén anofo. Nāskatari ē Corinto ano nokoxō Jerusalén anofo ē kirika kenexō ē ato fomanō. Nā feronāfake sharakōifāfe ato foxotanōfo. Akka nā feronāfakefāfe nofeta Jesús Ifofafo. Nāskakē ato ifisharakāfe ixō ē kirika kenei nā feronāfakefo sharakōifāfe foxonōfo Jerusalén anoxō Jesús Ifofaafāfe ato tāpinōfo. ⁴ Niospa ea nĩchipaiyaino nā feronāfakefo mā katoa efe fotirofo.

Pablo Corinto ano kapaikĩ ato yoini

⁵ Ĕ Macedonia finōfainikai ē matoki Corinto ano nokoikai. ⁶ Ĕtsa, ē ano mato fe samaraka pishtayotiro rakikĩa. Askayamai ē mato feta mechaka fisti finōyotiro rakikĩa. Nāskakē ē matoki nokoaino mā ea axosharayotiro. Askatari mē kaino mā ea nĩchitiro ē kasharatanō. ⁷ Ĕkai mato finōfaiyaino. Niospa ea nētefayopaiyaino ē mato ano nēteyotiro.

⁸ Askafiax ē nono Efeso ano iyoi nā nōko fista āfe ane Pentecostés ikaitĩa. ⁹ Nonoxō yorafāfe nōko Ifoōnoa nikapaikani. Nāskakē ē nonoxō nōko Ifoōnoa ē ato yoisharayoi chanĩmara fanōfo. Ĕ nōko Ifoōnoa ato yoifiaito atirifāfe ea xatemapaikani ē Jesúsnoa yoiyamanō.

¹⁰ Akka ẽ nõko Ifo yonoxomis keskafakĩ Timoteori nõko Ifo yonoxomis. Nãskakẽ matoki Timoteo nokoaino kexesharakãfe akiki inimayanã. ¹¹ Nãskakẽ, “Mĩ afaamara,” fayamakãfe. Nãskax mato anoax ekeki oaino nĩchisharakãfe inimayanã ekeki nokonõ. Nios Ifofaa fetsafo fe ekeki nokoyonõ ẽ anã ato fe rafesharanõ.

¹² Askatari iskaratĩa nofe yora Apolosõnoa ẽ mato yoi. Ẽ Apolos yoia iskafakĩ: “Corinto anoafo õiyotãfe,” ẽ faito ea yoia iskafakĩ: “Ẽ iskaratĩa kayotiroma. Niospa ea nĩchipayaitĩa ẽ katiro,” ixõ ea yoia.

Pablo mã mekai xatekĩ Corinto anoafo ato meka fomani

¹³ Jesús shinãfafaikãfe chakafakakĩma. Jesús Ifofasharakãfe. Jesús chanĩmara faax afara afeskarafaito rateyamakãfe. Kachikirifayamakãfe. ¹⁴ Afarafo mã akai keskara Nios yafi yorafo noikĩ axosharakãfe.

¹⁵⁻¹⁶ Estéfanas afe yorafo fe Acaya ano ixõ nãnoxõ Jesús chanĩmara fakĩ taefanifo. Mã mã ato õimiskĩ. Mã mã tãpia nãfãfe Nios Ifofafo sharafamisfo. Nã keskarafo nikasharakãfe. Nã ato feta yonoaifori nikasharakãfe.

¹⁷ Ẽ inimasharakõi Estéfanas, Fortunato, Acaicori afo ekeki nokoafono. Akka mã ea axopaiyai keskara nãfãfe mã ea axõafo. Mã ea axotiroma mã chaikõi ika. ¹⁸ Nã tiito ea inimamamisfo. Mato inimamamisfo keskafakĩ eari inimamamisfo. Nãskakẽ atoõnoa yoisharakãfe.

¹⁹ Nã nõko Ifo chanĩmara famisfãfe Asia anoafãfe mato yoisharapaikani. Aquila feta ãfe ãfi Priscila mato yoisharapaikani. Mato shinãkõikani. Ato pexe mẽranoax ato fe ichanãmisfãferi mato yoisharapaikani. ²⁰ Keyokõi nõko Ifo chanĩmara faafãfe nono efe ikaxõ mato yoisharapaikani. Nãskakẽri mã ranã yoinõnãsharakãfe.

²¹ Ẽfi Pabluki mẽ mekai xatekĩ meka rafes ẽ mato kenexonõ. Akka taefakĩ nofe yora Sóstenes ea kirika kenexona. Akka iskaratĩa ẽkõi kirika mato kenexoni mã tãpinõ.

²² Fatatora nõko Ifo noiyamaino Niospa omiskõimapainõ omiskõipakenakafo mẽra potakĩ.

Nõko Ifo Jesús chaima nokopainõ.

²³ Nõko Ifo Jesucristo mato noikĩ mato inimamasharakõinõ.

²⁴ Ẽ nõko Ifo Jesucristoõxõ keyokõi ẽ mato noi. Nã tii.

Pablo Corinto Anoafo Afianã Kirika Kenexõ Fomani

Pablo Corinto anoafo yoisharani

¹ Êfe yora mîshtichi, êkîa Pablo. Ê kirika kenexõ mato fomai mã tâpinõ. Nofeta Jesús Ifofamis Timoteo feta ê mato kirika kenexõ fomai. Epa Niospa ea katopaiyaito Cristo Jesús ea katonî âfe meka ê mato yoifofâfõfâinõ.

Nios chanîmara faafo Corinto anoafo, Acaya mai anoafori ê mato keyokõi yoisharai. ² Ê nõko Nios mato kîfixomis iskafakî: “Epa Niospa, nõko Ifo Jesús feta ato noikõikî âto õiti inimamasharaxõfe. Askatari ato shara fafe,” ixõ ê matoõnoa yoimis.

Pablo omiskõini

³⁻⁴ Nõ Epa Nios yoisharanõ iskafakî: “Epa Niospa, mî noko sharafa fafafaîni. Mî sharafinakõia. ¡Aicho!” ixõ nõ Epa Nios yoinõ. Nâfi nõko Ifo Jesucristo âfe Apakî. Nâatori noko noisharakõi. Askatari nõ omiskõiaito noko inimamatiro. Akka nã nõ meemis keskara mei, fetsa omiskõiaito nõ inimamatiro, nã Epa Niospa nõ omiskõiaito noko inimamamis keskafakî.

⁵ Cristo omiskõimakîfinakõinifo. Nâskakêri nõri Cristoõnoax omiskõikõi. Akka Cristo omiskõiaito Niospa axosharakõini. Nâskakê Cristoõxori nokori Niospa axosharakõi. ⁶ Akka nõ Niospa meka mato yoi nõ omiskõiaito mã noko nikakõixõ mã nõko Ifo Jesús chanîmara faax mã afe isharakõitiro. Nâskax mã inimakõitiro. Akka nõ mato yoi nõ omiskõifiaito nõko õiti Epa Niospa noko inimamaxomis. Akka mã mã noko õimis nõ omiskõiaito Epa Niospa noko axosharaito. Nâskarifiai mãri omiskõiaito Epa Niospa matori axosharakõixii mã tenesharakõinõ. ⁷ Mã nõ tâpia nõ omiskõiai keskai mãri nofe omiskõiaito Epa Niospa nõko õiti inimama keskafakî matori inimamasharai.

⁸⁻⁹ Efe yora mîshtichi, Asia mai anoax nõ omiskõita ê mato yoi mã tâpinõ. Nõ omiskõifinakõita tenetiroma mei nai keskarakõi nõ meita. Nâskakê nõ tâpitiro nâskara Epa Niospa noko tâpimana nõa nõ ifimetrioma nõ omiskõiyamanõ. Epa Nios fistichi noko ifitiro. Akka nõ omiskõiaino nõ naano, nâatofi yorafo otofatirokî, ixõ nõko shinã mēraxõ nõ shinãita. ¹⁰⁻¹¹ Akka nõ fâsi omiskõi nakerafiaino Epa Niospa noko ifita. Anã afetiara noko ifixii. Askatari nõ chanîmara fakõini nokomãi ifitaifamiskê, mãmãi noko Epa Nios kîfixomiskê. Mã noko askafaino nã Nios chanîmara faa fetsafãfe shinãkî iskafaxikani: “Aicho Epa Niospa, mî Pablo yafi afe rafemisfo mã ato ifisharakõia. Mî fâsi sharakõi,” ixõ yora ichapafãfe yoixikani.

Afeskaî Pablo kanimamê Corinto ano

¹² Nã nõ fakira kafãsai ariax nõ isharakõimis, nõ afaa chakafamisma. Niospa fichipaiyai keskara nõ amis. Askatari mato mēranoax nõ isharaifinakõimis. Nâskakê nõ shinãchakaima nõ inimasharakõi. Akka nõkai nõ mato pãramisma, chanîma fisti nõ mato yoimis. Niospa noko noikî noko shinãmanaino nõ isharanõ mato mēranoax. Askatari nã nõ fakira kafãsai ariax nõ isharakõimis. ¹³⁻¹⁴ Ê mato kirika kenexõ manamani tâpitiropinî shara faxõ fekaxma mã tâpitiro xafakîa sharakõi. Nâskafekê atirifãfe tâpisharafaoma ê afe keskaramãki. Nâskafixõ mã tâpisharai, nâskara shara ê fichipai. Nâskakê nõko Ifo Jesús anã oaino mã nokoki inimasharaxii, nõri matoki inimasharanõ.

15-16 Nāskakē ē shinā ē Macedonia ano kaitīa ē mato ano māpefaixii anā ē mato yoisharaxiki mato ōiti mēra mā inimanō. Askata nā Macedonia anoax ē oaitīa anā ē mato ano māpetiro mato fe iyoxiki. Chipo Judea ano ea nīchitirofo, ixō ē shināni. 17 Nānori ē shināfiāx ē mato ari ē kayoikaima. Akka mā iskafakī shināiraka: “Pablo ē kaira ifiax kaima, ¿afeskakī noko pāramē?” ixō mā shināiraka. Akka ēkai ōiti ranāyama fetsa yoikī, fetsa yoikī ē fapanā. Nā yōra Jesús Ifofaamato shināi keskara ē shināima. 18 Nā Niospa noko pāramisma keskafakī nōrikai mato pāramisma. Nāskakē tāpisharakōia nō mato pāramisma. 19 Akka Timoteo ikaino Silvano ikaino ē ikaino Jesucristo Niospa Fakeōnoa nō mato yoimis. Jesucristo mekakai rafema, āfe meka mēstekōi. Chanīma fisti. 20 Epa Niospa noko yoiyoa keskara keyokōi Cristo mā noko axomis. Nāskakē nō keyokōichi yoimis iskafakī: “Epa Niosi, mī fāsi sharakōi. Jesúsxō keyokōi mī afama mūshti famis nā mī yoiyoa keskafakī. Nāskakē Jesús aneōxō nō mia aicho fai,” ixō nō yoimis. 21 Askatari Epa Niospa mato yafi noko Jesús Ifosharakōifama. Nāskatari noko katōxō noko nīchini āfe meka yoimis nō inō. 22 Akka fētsa āfe afarafo marakka fatiro fetsafāfe tāpinōfo āfenākē. Nāskafakīri Epa Niospa āfe Yōshi Shara nō mēra nanea aōxō nō tāpinō nō afe yoraxō. Nāskakē nō tāpitiro afara fetsa nā noko yoiyoa keskara chanīmakōi noko ināxii.

23 Ē mato ari kaira ixō ē shināfiitaxakī ē kaama. Epa Niospa ea tāpikōia ē chanīkēma. Ē mato ari kakerana. Nāskafiax ē kaama ē mato shinākī. Ē ato ari kaxō ē ato fasi yoikī ē ato shināmitsamatiroora ikax nāskax ē mato ari kaama. 24 Ē mato askafatama ēroko mato inimamapaisharai. Ēkai māto ifo ipaima. Akka Jesús fisti nōko Ifo. Akka mā mā Jesús chanīmara faxō mā mā Jesús Ifo sharakōifai. Nāskakē ē mato feta Jesús yonoxopai mā inimai finakōinō, askatari mā Jesús Ifo sharakōifanō.

2

1-2 Nāskakē ēfe shinā mēraxō shinākī ē iskafayamea: “Ē Corinto ari kapaifi ē kaima. Akka ē kaxō ē ato yoikī iskafapaima: ‘A mā afara chakafamis keskara xatekāfe,’ ixō ē ato yoikī ē ato inimamatiroma. Askakimaroko ē ato shināmitsamatiro. Ē ato shināmitsamanaino, ¿tsōa ea inimamatiromē? Akka ares fisti ea inimamatirofo,” ixō ē shināyamea. 3 Nāskakē ē mato kirika kenexona, mato ari kakīma. Akka ē shinā, “Ē ato ari kaxō ē ato iskafaino: ‘Mā isharakōiyama māto chaka xatekāfe,’ ē ato faino shināmitsakōitirofo,” ixō ē shināyamea. Akka mā ea nikayamaino ēri shināmitsakōitiro. Akka mā anā Nios nikakī anā isharakōiaino, mā ea inimamasharakōitiro. Akka mē tāpikōia ē inimakōiaino māri inimakōitiro. 4 Ē mato kenexokī ē meyamea ēfe ōiti shināmitsakōiaino oiayanā. Ēkai mato shināmitsamapainima. Askatamaroko ē mato kenexoni a ē mato noikōiai keskara mā tāpinō.

Fētsa noko chakafaito nō rae fatiro

5 Akka nā feronāfake fētsa ea chakafakī mekakakī ea fisti shināchakamanama, nā mā Nios Ifofaafari keyokōi mato shināchakamana. Nāskakē noko keyokōi chakafakī mekafaa. Noko askafafiaino ēkai na feronāfake omiskōimaki finapaima. 6 Akka mā ranāro omiskōimanakī nāskanōkāfe. 7 Akka a mā aka keskafakī anā askafakīma rae fakāfe. Nāskaxō yoisharakāfe inima-masharaxikakī anā omiskōinōma. Akka mā askafayamaino āfe shinā mēra shināmitsakōitiro anā shināsharatiroma anā Nios Ifofapaima. 8 Nāskakē ē mato yoiai keskafakī ea nikasharakāfe. “Nō mia noikōi. Mī anā nofe isharakōitiro,”

ixō yoikāfe tāpinō. ⁹ Ē mato kirika kenexō manamayamea tāpipaikī mā mēxotaima ea nikakōimākai. ¹⁰ Mā fetsa raefakē ēri nā raefatiro. Fētsa ea chakafaito ē mato shinākī Cristo ea ōiaino ēri nā raefatiro. ¹¹ Nō fetsa raefasharakōiaino Satanás noko feparatiroma. Nō tāpisharakōia Satanás noko kexepaikōi. Akka a Nios Ifofaafo isharayamaino, raefayamaino, a Nios Ifofaafoma tiito chakafakī mekafatirofo Satanás fichipaiyai keskara. Akka nō fetsa raefaino Satanás noko afeskafatiroma.

Pablo pexe rasi Troas ano nokoax inimanima

¹² Akka ē mato eōnoa tāpimapai. Ē pexe rasi Troas ano kani meka shara Cristoōnoa ato yoikai. Cristoōnoa nikapaikōinifo. Nāskano nōko Ifāfe ea atoki nīchini ē āfe meka ato yoinō. ¹³ Akka ē shināni nofe yora Tito Troas ano ē fichikaira ixō. Akka fichiyamax ē inimanima. Nāskaxō ē fāsi shinākōini. Nāskata, “Mē kai,” ixō Troas anoafō nā nōko Ifo chanīmara faafo ē ato yoita ē oni nono Macedonia ano.

Cristoōxō nō keyokōi finōtiro

¹⁴ Aicho Epa Niosi, mī Cristo Jesús afara chaka potamana anā afesakafanōma. Nāskakē nōri afe inimai nōmāi aōxō āfe meka yoikatsaxakī yorafāfe tāpinōfo. Akka pirofomā nakas shara nachikomea nō keyokōichi xetetiromo keskafakī, nāskafakīri Niospa noko nīchiano nokoōxō keyokōichi tāpitirofo āfe meka shara. ¹⁵ Akka nō meka shara Cristoōnoa yoimis keyokōichi nikanōfo. Akka atirifāfe chanīmara fakōikani, Nios fe ipaxakakī. Akka atirifāfe nikasharakanamax Jesús Ifofakanamax nakanax omiskōipakenakafo. ¹⁶ Akka na meka shara nikaifoma mā nakanax omiskōipakenakafo mēra fokanax omiskōixikani, nāfāfemāi na meka shara nā nō afara pisikōi xetemis keskara xeteksaxakakī. Akka nā meka shara nikaifāfe nā nō pirofomā nakas shara xetemis keskara xetemisfo. Nāskakanax Nios fe nīpanakafo. Akka, ŷtsōa Niospa meka Jesúsnoa yoisharatiromē? Akka tsōa atiroma. ¹⁷ Akka fetsafāfe Niospa meka ato yoikakī kori fipaikani āa ato pārakaxō. Nō mato Niospa meka yoikai noko kopifakāfe ikaxō āa ato pārakaxō ato kori fiaifo keskafakī nōkai mato askafamisma. Mā nō tāpia nō āfe meka yoiaito Epa Niospa noko ōisharakōi, nāatomāi noko nīchinixakī. Āfe meka yoikai nō kaxetiroma, Niospamāi noko ōiaino nōmāi Cristo āfe inaxō.

3

Jesús ato meka fena yoimis Pablo ato yoini

¹ Askara nō yoiaino, mā shināiraka nā nōa nō yoimesharai keskara. Maa. Nōa nō yoimesharaima. Mā chaka shināi. Akka fētsa yonopaiyaito fētsari fetsa kirika kene fomaxotiro fetsafāfe ōinōfo yonosharamiskē. Akka, ŷmā shināimē fetsafāfe nokoōnoa kirika kenenōfo noko yoisharakakī nō yonosharamiskē Niospa meka yoikī? Akka nō askara fichipaima. Akka, ŷmā shināimē nō mato kirika kene yōkaito kirika kenexō mā noko inānō nōri fetsafo inānō noko tāpinōfo nō mato mēraxō yoisharamiskē? Maa. Askara nō fichipaima. ² Akka nā kirika kenea keskara nō fichipaima māmāi nā kirika kenea keskarakē, fetsafāfe mato ōitirofo māmāi Nios Ifofasharakē. Mato ōikakī nokori tāpitirofo nō Niosxō yonosharamiskē. ³ Akka mā mā isharakōia anā mā imis keskarama a Niospa fichipaiyai keskairaino. Nā noko ōimana Cristo mātō ōiti fetsafaa fena keskara mā inō. Nāskakē mā kirika kenea keskara. Mato ōixō fetsafāfe tāpitirofo nō Niospa meka mato tāpimasharamiskē.

Akka na kirika kene lapisi kenemeama, askatari tokiri sapaki kenemeama; Epa Nios nīpanakato āfe Yōshi Sharapa mato imashara mā isharakōinō.

⁴ Iskafakī nō yoia, mā nōmāi tāpīxō Niospamāi noko nīchinikē nō āfe meka mato yoinō Cristo āfe sharaōxō nō mato yoisharamis. ⁵ Akka nōa nō afara shara nō mato yoitiroma mā isharanō. Askatamaroko Epa Niospa āfe Yōshi Sharaōxō nō fetsafo tāpimatiro isharanōfo. ⁶ Niospa Yōshi Sharaōxō na meka fena nō ato yoimis Jesúсноa nō Nios fe nīpaxatiro. Akka a Moisés kenenīōnoa nō ato tāpimamisma, sharafiano keyokairoko nikanōfo nō ato yoipanā. Akka a Moisés yoini keskara keyokōi nikakanamax Nios ika ano katiroma. Askatamaroko Niospa Yōshi Sharapa noko imasharapakenaka Nios ika ano nōmāi Cristo Ifofakē.

⁷⁻⁸ Epa Niospa nōko xinifo israelifo nā ato yoipaiyai keskara ato yoini nikanōfo. Tokiri pāraki kenexō ato yoini. Epa Niospa Moisés tokiri kene ināino luz keskara fafekōini. Nāskatari Moisés femānā fafekōini. Nāskakē mā Moisés māchi keya ariax fotokē nōko xini israelifāfe ōitiroma inifo. Nāskax fafekōifiax fenāmāshta matapakeni. Akka Epa Niospa Moisés yoini keskara sharakōifixō noko imapakexatiroma. Sharakōifixō, akka iskaratīa Niospa Yōshi Sharapa noko yoiai keskara nāroko sharafinakōia. ⁹ Akka nā Moisés yoini keskara sharafiano nikakanamax nakanax Nios ika ano katiroma. Akka iskaratīa Niospa āfe Fake Jesúsxō noko chaka soaxotiro nō afe ishara-pakexanō. Nā sharafinakōia afaa fetsakai askarama. ¹⁰ Epa Niospa Moisés yoini keskara sharafiax, akka Epa Niospa Jesúsxō noko axoni keskara nāroko sharafinakōia. ¹¹ Niospa meka shara Moisés fiaino fafesharakōini. Mā fiax āfe femānā fafesharakōini, Moisés. Āfe femānā fafesharakōifiax fenāmāshta matapakeni. Epa Niospa Moisés yoini keskara sharafiax, akka Epa Niospa Jesúsxō noko axoni keskara keyonakama nāroko sharafinakōia.

¹² Nāskakē mā nō tāpikōia Epa Niospa Jesúсноa yoini keskara keyonakama. Nāskakē ranotama nō Jesúсноa yorafo yoitiro. ¹³ Nōkai Moisés keskarama. Moisés āfe femānā fafeaino samapa feopomeni israelifāfe ōinōfoma nāskax fenāmāshta matapakeni. ¹⁴ Akka nōko xinifāfe nikasharapaonifoma, āto ōitimāi fēstokōi keskarakē. Iskaratīari nōko kaifo nāskararofi. A Moisés ato yoini keskara ato kirika anexonaifono ato nikakaspakanax. Nāskakaxō Epa Niospa meka tāpisharatirofoma. Akka Cristo fistichī ato shināmatiro nā ōiti fēstoā keskara inōfoma. ¹⁵ Iskaratīari nā Moisés yoini keskara ato anexonaifono āto ōitimāi fēstokōiano shināsharapanāfāfe. ¹⁶ Askafikaxō iskaratīa a Moisés kenenī keskara anā shināxaxoma nōko Ifo chanīmara fakaxō aōnoa fisti shinātirofo. Nāskakē anā feopomea keskara ixikakima. ¹⁷ Niospa Yōshi Shara nō Ifofaax nofe ikaino afaa fetsa nōko ifo itiroma, noko ikixikī. ¹⁸ Akka nōko ōitikai fēstoā keskarama. Nōko Ifāfe āfe meka nō nikasharakōitiro. Āfe Yōshi Sharapa noko ikixō noko fetsafatiro a keskara shara nō inō. Akka mā noko fetsafaano nō sharakōi ixii. Nāskakē fetsafāfe noko ōikakī tāpitirofo nō shara isharakē. Nā feisiti xini chaxaino fafeai keskara noko ōikakī nōko Ifo Jesú tāpitirofo afe keskaramāki.

4

¹ Akka Epa Niospa noko shinākī noko yoini āfe meka shara Jesucristoōnoa nō yoifofāfōfāinō. Nāskakē nō shināchakaima, nō Niospa meka yoiki xateima. ² Nāskakē nō afaa one chakafamisma rāfixikima, a afara one chakafamisfo keskafakī. Askatari nō tsoa pāramisma. Askatari nōa nō Niospa meka fetsafaxō yoimisma. Akka Niospa tāpia meka chanīma fisti nō yoimiskē.

Nāskakē mā nokoki inimasharapainō, nā nō afarafo shara faito ōi. ³ Na meka shara Jesúsnoa nō yoimis nikakaspafono nā onea keskara. Nāskakē tāpikanamax oa fēstoā keskarafo. Nāskakanax omiskōipakenakafo. ⁴ Nāfofi nā niafaka chaka āto ifoxō ato yoimis. Nāskaxō nā ōiti fēstoā keskara ato faano na meka shara Jesúsnoa tāpitirofoma. Nā yora fēxō luz ota sharafiano ōtitiroma keskarafo. Nāskaraxori Jesús finakōia tāpitirofoma. Nāskatari tsōa tāpitiroma Jesús Apa keskara sharafinakōifiano. ⁵ Akka nōkai nōa nō nokoōnoa nō mato yoimisma mā noko ifofanō. Askatamaroko nō mato yoimis Jesucristo mātō Ifo inō. Nōko Ifokē aō noixō nō yonoxosharapai. Akka nō mato axosharapai Cristoōnoa mā tāpinō. ⁶ Niospa pena onifayoxoma fakishkē yoini pena inō. Nāskarari nō Jesús Ifofayamax nōko ōiti nā fakish keskara chakakōi ipaoni. Akka Niospa Jesucristoōxō nōko ōiti mēra noko chaxamashara aōxō nō tāpinō afe keskara sharakōimāki.

Pablo yoini nō Jesús chanīmara faax nō isharatiro

⁷ Akka nō afaayamafekē Niospa āfe sharakōi noko mēra nanea nō āfe meka shara Jesúsnoa ato yoinō. Akka nā kesho noko keskarari akai afaama. Samama moshitiro. Moshiftirokē a mēra afara sharakōi nō nanetiro. Nāskarifiāi nō afaayamafiano Jesús nofe rafea. Nāskakē yorafāfe tāpitirofo Niospa Yōshi Shara nōmēra nanea. ⁸ Nā nō imis keskara iskaratīa ē mato yoinō mā tāpinō. Noko chakafafiakakī noko xatemakanima. Nāskafixō nō afeskaimēti ixō, nō shināchakafikī mā nō tāpia Epa Niospamāi noko axosharafafainaito. ⁹ Noko noikaspakakī noko chakafapaimisfo. Nāskakaxō noko chīfafōfāsafamisfo. Noko askafafiaifono Epa Niospa noko potaima. Nāskakatari noko retepaikakī noko tsefeya fafiafona Epa Niospa noko kexesharamis nō nayamanō. ¹⁰ Jesús niyoano retepaipaonifo keskafakī nokori nāskari fakani retepaikakī. Noko retepaifiaifono nōko Ifo Jesús noko kexesharai noko retenōfoma. Nāskakē yorafāfe tāpitirofo mā Jesús nafianixakī anā otoax nikē. ¹¹ Nō Jesús yonoxonaito mēxotaima noko retepaikani. Akka noko retepaifiaifono nōko Ifo Jesús noko kexesharai noko reteyamanōfo. Akka nōa nō ifimetiroma nayamaxiki. Nāskakē tāpitirofo mā Jesús nafianixakī anā otoax nofe ikē. ¹² Nāskakē Jesúsnoa nō mato yoimis fetsafāfe noko retepaifiaifono mā chanīmara faax mā afe ĩpaxanō.

¹³ Akka Epa Niospa meka kirika ano yōra keneni iskafakī: “Ē Epa Nios chanīmara fakōini. Nāskakē Niosnoa ē ato yoi,” ixō kirikaki Niospa meka keneni yōra. Nāskarifiakī nōri Niospa meka chanīmara fakōixō nō mato yoi. ¹⁴ Akka mā nō tāpia nōko Ifo Jesús mā nafiakē Ēpa Niospa anā ōtofani afe ĩpaxanō. Nāskakē Apa Jesús ōtofani keskafakī mato yafi nokori ōtofaxii nō afe ĩpaxanō. ¹⁵ Akka nō omiskōikōi mato Epa Niospa meka yoi mā āfe meka chanīmara fakōinō. Nāskakē yora ichapafāferi Epa Nios nikakōikaxō, “Aicho, Epa Niosi, mī fāsi sharakōi,” faxinōfo.

¹⁶ Nāskakē nō omiskōifikī nō shināchakaima. Nōko Ifokai nō kachikiri faima. Akka nōko yorari anā kerexma nō omiskōiaino. Askafixō nōko shinā mēra mēxotaima noko kerex fafāfāini. ¹⁷ Akka a nō niyoax nō omiskōiyoai akai afaama, samamashata keyoi. Akka nō Jesúsnoax omiskōiaito a noko sharakōi imai a keskarakāi tsōa ōiyomisma. Nāfori keyonakama. ¹⁸ Akka nā nō omiskōiai shinātamaroko nā nō ōiyomisma nō shināi. Nios ika anoxō noko inimamapakenaka. Nāa nō shināi. Akka nā afaranā noko omiskōimanai samama keyoxii. Akka a Niospa noko chipo imai keskara keyonakama.

5

¹ Akka ē mato yoinō nikakapo. Pexe xiniāx pāo ikax keyotiro. Nāskarifiāi nō naino nōko yora keyotiro anā nōko fero mēsho nō mēra inōma. Akka tsōakai noko yora fenafaxotiro. Epa Nios fistichi noko yora fena onifaxotiro. Akka mā nō nai mēra kaax nōko yora fena shara ixii. Epa Niospa noko yora fena shara faxōano a anā keyonakama. ² Akka nō fekaitemis nōko yora fekaaxkōimeī. Nōko yora fenashara fapai nai mēraxō. ³ Akka nō naax, ŷnōko fero mēsho yoraya itiomamamē? Maa. Epa Nios fisti nō Ifofamiskē noko yora fena shara faxotiro nō afe ipaxanō. Nāskakē nōko fero mēsho yoramais nai mēranoax itiro. Epa Niospamāi noko yora fena faxōano. ⁴ Iskaratīa nono mai ano niyoax nōko yora omiskōiyoi. Askafīax nō nayopaima. Nō nayoamano Cristo onō noko yora fetsafaxoxiki nō isharapaxanō. ⁵ Nā Epa Nios fistichi noko onifani nō afe ipaxanō. Nāskakē āfe Yōshi Shara nō mēra nanea nō tāpinō noko yora fetsa faxoxiaino.

⁶ Nāskakē nō shināsharafāīni nono mai ano niyoxō, nayoxoma, nōko Ifo Jesús ari kayoxoma mā nō tāpia. ⁷ Nāskakē nā Jesús ika ano ōiyamafikī nono mai anoxō nō chanīmara fafafaīni. Nāskaxō chipo nō ōixii Epa Niospa noko fetsafaano. ⁸ Akka mā nō tāpisharakōia Epa Niospamāi noko yora fetsa ināino. Akka mā nō nakī nōko yora nō ratafainikai nō sharafinakōia ikikakī. Nāskakē nō inimasharakōi mā nō nai nōko Ifo Jesús femāi nō ikikai. ⁹ Akka nono mai ano nō niyoxō nōko Ifo nō yonoxosharayopai nokoki inimanō. Nāskatari nai mēraxori na fischisharapaiyai keskafakī nōko Ifo nō inimamapaisharakōi. ¹⁰ Akka nā chanīmara faafo tii Cristoki nokoxikani. Nāskatari noko yoipakexii nono mai ano niyoxō nō shara famismākī, askayamakī nō chakafamismāki. Akka nō afara shara famiskē afara sharakōi noko ināxii. Akka nō afara chakafamiskē afara shara noko ināpaifikī noko ināxima. Nāskakē nō fixiima. Nāskakē Jesúsxō nō yonopai sharakōi.

Pablo yoini Cristoōnoax nō Nios fe rafetiro

¹¹ Akka Niospa noko yoia keskara nō ayamax nō rāfitiro. Nāskatari fetsafori nō ato yoipai nā Niospa ato yoiai keskara anōfo. Niospa noko tāpikōia nōmāi mēstekōi yoiaito. Nōkai ato feparapaima. Māri mā mā noko tāpikōia nō mato pāramisma. Nōko meka mēstekōi fisti nō mato yoimis. Nānori fisti mato shinā mēraxō mā shināpainō. ¹² Akka kakapai nōa nō yoimesharapaima. Akka mēstekōi fisti nō mato yoimis, mā mā tāpia. Akka fetsafāfekai mato yoikōikanima mato feparapaikani. A yoiaifo anorikai yoimifoma āa āto shinā mēraxō shināxō yoimisfo kakapaiyanā. Akka nōfi mato pāramisma, chanīma fisti nō mato yoimis. Nāskakē mā nokoki inimakōimis. Nāskaxō mā nokoōxō ato yoikī nokoōnoa mā ato yoisharatiro. ¹³ Chanīma, nō Nios noikī kerexkai nō yoimifofāīmis aōnoa fetsafāfe nikasharanōfo. Akka yorafāfe nokoōnoa yoimisfo iskafakakī: “Na Pablo feta yonomisfāfe shināsharamisfoma mēxotaima ato Niospa meka yoifofāsafamisfo omiskōifināfikakī,” ixō noko yoimisfo. Āa noko askafanōfokī mā nō tāpiakī Niosxō nō yonofikai mā āfe meka tāpinō. Akka nō mēstekōi shināsharakī nō mato yonoxosharamis. ¹⁴ Cristo noko noikī noko yoini nō āfe meka shara mato yoinō. Cristo keyokōi yorafoōnoax naani. Nāskakē mā nō naa keskara a nō iyopaoni keskara ixikima. ¹⁵ Akka mā Jesús nayoni yorafoōnoax keyokōi a keskara shara ixiki. Nāskakē a nō chaka ipaoni keskara ixii. Nāskakē nā nō apaiyai keskara fisti anā nō shinātiroma. Cristoōnoax nō yonosharaxotiro. Cristo āa nokoōnoax nayoni. Nafiano Epa Niospa āfe sharaōxō anā otofani.

¹⁶ Akka nā Jesús chanīmara faafāfema fetsafoōnoa shināifo keskarakai nō anā atoōnoa anori shināpakenakama. Nōri anori shināyopaoni nō anā askapaima. Cristoōnoari nō chakakōi shināyopaoni. Nōkai anā aōnoa anori shināima. ¹⁷ Nāskakē Cristo nā Ifofafo ato shinā fetsafaxōa anā shināyopaoni keskara inōfoma, fena keskara shara nōfo. A Niospa fichipaiyai keskara fena keskara nō ixii. Keyokōi fena keskara ixii. ¹⁸ Epa Niospa Cristoōxō noko fetsafaa anā nō noikaspanōma, nō afe rafenō. Askatari noko yoini aōxō āfe meka nō ato tāpimanō Epa Nios fe rafenōfo. ¹⁹ Epa Niospa Cristoōxō keyokōi yorafo afe rafemapai anā noikaspanōfoma. Cristomāi noko nāxonikē Epa Niospa a nō afara chakafamisnoa anā shināima. Nā Epa Niospa noko yoia keskafakī nānorikōi nō mato yoimis.

²⁰ Akka Cristo noko nīchini nō āfe meka mato yoinō. Nō āfe meka mato yoi nā Epa Niospa mato yoiāi keskara. Epa Niospa nokoōxō mato yoi nā Cristo mato yoipaiyai keskafakī. Nāskakē nikakōikāfe Cristo mato nāxonikī mato chaka soaxoxiki. Nāskakē Cristo Ifofaxō māto chaka xatekāfe Epa Nios fe rafexikakī. ²¹ Akka Cristo afaa chakafapaonima. Nāskafikē Apa Niospa nōko chakafo akiki nīchini. Cristo afaa chakafayamafiakatsaxakī noko nāxoni Epa Niospa noko omiskōimayamanō. Nā yora chaka keskarax nōko chakafoōnoax Jesús nani. Nāskakē nō Jesús Ifofaino Niospa noko ōitiro sharakōi nā nō afaa chakafamisma keskara, nokoki inimakōikī.

6

¹ Akka nō Nios feta yonomis āfe meka mato yoikī. Nāskakē nō mato yoisharapai Epa Niospa mato noisharakōiaino, mā shināmakiyamanō, āfe meka mā kachikiri fayamanō. Fetsafāfe anorima mato yoiaito nikayamakāfe. Askatamaroko Jesús meka shināmakiyamakāfe. ² Taeyokī Niospa meka yoimisto kirika keneni iskafakī Niospa yoiaino:

Ē mato shināito, mā ea yoiaino ē mato nikai mā omiskōiaino. Ē mato ifinō, ē mato axosharaxiki, ixō yoini Epa Niospa. Nāskakē nikasharakāfe iskaratīari Epa Niospa noko axosharapai noko ifixii.

³ Nōkai mato afaa chaka yoipaima tsōa noko chakafayamanōfo. Akka nō chaka niaito ōikaki a Nios chanīmara faamafāfe noko mekafatirofo. Nāskakē nō afaa chakafapaima. ⁴ Akka nā nō keyokōi Niosxō aka keskara nō mato ōimamis nōmāi yonoxokatsaxakī. Noko omiskōimafiaifono nō tenekōimis. Askatari fekaxteifinakōita nō tenekōimis. Noko chakakōi famisfo, noko askafafiaifono nō tenekōimis. ⁵ Nāskakaxō noko koshamisfo, askatari karaxa mēra noko ikimamisfo. Nāskatari yora chakafāfe noko noikaspakakī fāsi noko mekafamisfo. Noko askafafiaino fekaxtekōiyanā nō yonomis. Askatari nō oxa tenekōimis. Nāskaxri nō fonāikōimis. ⁶⁻⁷ Noko askafafiaifono afaa chakafatama nōko ōiti mēraxō nō afaa chaka shināima. Nō Cristo fe rafeaito nā noko yoimis keskara mā nō tāpia. Noko chakafafiaifono nō atoki ōitifishkitama. Fena fenakima nō tenekōimis. Nāskax fetsafo fe rafepaikī nō ato sharafa fafāfāimis Niospa Yōshi Sharaōxō nō ato askafamis ato pārakīma nō ato noikōimis. Nō askakī keyokōi nō mato ōimatiro nōmāi Niospa yonomatixō. Satanās noko afara chakafamapaiāito Niospa Yōshi Sharapa nā Nios keskara shara noko imaino āfe Yōshi Sharaōxō nō afara chaka potatiro. ⁸ Akka fetsafāfe nokoōnoa meka shara yoifiaifono fetsafāferi nokoōnoa meka chaka yoimisfo. Akka fetsafāferi na yorafo sharakōira noko fafiaifono fetsafāferi noko īchamisfo. Nō chanīmakōi yoifimiskē noko feparamisfo ixō

nokoōnoa fetsafāfe yoimisfo. ⁹ “Pablo fe rafeakai tsoama. Nōkai ato ōimisma,” noko fafiaifono akka fetsafāfe Nios Ifofakōikaxō noko noikani. Nāskatari nō napaiifax nō nia. Noko omiskōimafiakakī noko tsōa reteama. ¹⁰ Akka nō shināmitsafaiato nōko Ifo Niospa noko inimamamis. Akka afaamaisifō nō Niosxō nō fetsafo imasharakōimis, Nios Ifo shara faifono. Nō afaamais keskarafax nō aya a Niospa noko ināi. Akka nā keyokōi Niosnā nōkonāri.

¹¹ Efe yora mīshtichi Corinto anoafāfe, nā nōko ōiti mēraxō nō shināi keskara nō mato yoimis. Nō mato fomāmisma. Keyokōi nōko shinā mēraxō nō shināi keskara nō mato yoimis mā tāpinō. ¹² Akka nō mato noikas-pamisma. Akka māroko noko noisharamisma. ¹³ Akka iskaratīa ē mato yoi āpa fake noisharakī yoitiro keskafakī, nokori noisharakāfe nā nō mato noiai keskafakī.

Nā Nios chanīmara faafāfema akaifo keskara ayamakāfe

¹⁴ Nā Jesús chanīmara faafoma fe rafeyamakāfe. Akka na yora Nios Ifofaafē shināifo keskarakai nā yora chakafāfe shinākanima. Nāskarifiāi pena fe fakish osinātiroma. ¹⁵ Nāskarifiakī Cristo feta Satanás anoris shinātirofoma. Akka nā Cristo Ifofaafāfe fichipaiyāifo keskara nā Cristo Ifofaafāfema askara fichipaikanima. ¹⁶ Nā Cristo chanīmara faafāfe ichanāmisfo Epa Nios Kīfinōfo. Akka nā Ifofaafoma ato fe ichanātirofoma afara nimofa fakaxō kīfitirofo na nōko niosra ikaxō. Nāskakē nā rafe osinātiroma. Akka afāfekai Epa Nioskōi kīfipaikanima. Akka Epa Nios nō mēra ika. Nāskakē nō Niospa pexe keskara. Nōko Nios nia. Epa Niospa yoini iskafakī:

Ēfi ato fe ikikai, ato fe rafexikī. Ē āto Nios ikaino afo efe yora ikani, ixō yoini. ¹⁷ Askatari Epa Niospa yoini iskafakī:

Akka nā Cristo chanīmara faamafāfe akaifo keskara ayamakāfe. Ato fe rafeyamakāfe afaa chakafaxikākima. Mā askaino ē mato ifikai, ixō yoini. ¹⁸ Askatari nā afama mīshti atiroto ato yoini iskafakī:

Akka ē mātō Epa ixii. Akka mā ēfe fakefo ixii, ixō nōko Ifo Niospa yoini.

7

¹ Ēfe yora mīshtichi, Epa Niospa nā noko yoiyoni keskara shara. Nāskakē nō isharanō keyokōichi nōko chaka nō xatenō. Afarafāfe nōko yora iyamai nōko ōiti mēraxō noko chakafamatiro nāfo nō xatekōinō sharakōi ixiki. Nō Epa Nios noikōiax a keskara shara nō ipai.

Corinto anoxō chaka shināyopaonifo. Akka iskaratīa mā shara shinākan

² Akka nā yora fisti keskara nō inō noko noisharakāfe. Nōkai mato chakafamismaki. Askatari nō mato afaa chakafamamisma, askatari nō mato pāramisma. ³ Ēkai nā ē mato yoiai keskafakī mekakī chakafakī ē mato yoimisma. Akka ē nayoxoma ē mato mēxotaima noikōifafāini. Nāskatari mē nafiāxō mēxotaima ē mato noikōixii. Nāskakē tsōa noko paxkanā fatiroma nā yora fisti keskarāmāi nō ikē. ⁴ Mā nō tāpikōia mā noko noikōiyānā, mā Jesús Ifo sharakōi fakē. Nāskakē nō yorafo yoimis mā isharakōimiskē. Nāskatari nō omiskōifi nō inimakōimis.

⁵ Akka nā nō Macedonia ano nokoitatīa nō teneama, mēxotaima fanīma mīshtinoax fekaxteafāfe ōi. Akka nō shināchakakōimis. Askatari a Nios Ifofaa fetsafōri nō ato shinākōimis, mā nōko Ifo Jesús kachikiri faafora ixō. ⁶ Akka nā shināmitsaifo Niospa ato inimamamis. Nāskakēri nokoki Tito nīchiano nō inimakōimis. ⁷ Akka mā nokoki Tito nokoxō noko inimama noko yoia

iskafakī: “Corinto anoafāfe ea inimamakōiafo,” ixō Titopa noko yoia. Askara nō nikai nō inimakōia. Askatari noko yoia mā eōnoa yoikī iskafakī: “Nō Pablo shinākōi nokoki samamashta nokopainō,” ixō mā yoikē: “Nāskaxori nōko ōitinī nō shinā chanīma nō afara chakafamis. Akka nōkai anā askapaima. Nō Pablo shināi,” ixō mā yoiaino Titopa ea yoia. Nā keskara nikai ē inimai finasharakōi.

⁸ Akka ē mato kirika kenexō manamakī ē mato shināmitsamana. Nāskax ēri shināmitsakōiyoa. Akka anā ē shināmitsaima. ⁹ Akka iskaratīa ē inimakōi. Akka ē mato shināmitsamanax ē inima. Akka mā shināmitsayanā mā Epa Nios kīfiti iskafakī: “Epa Nios, nō afara chakafakī noko raefafe nō afara chakafamiski,” ixō mā yoikī. Nāskakē ē inimasharakōimis. Mā askafaino Epa Niosri matokī inimasharakōi. Akka ē mato kirika kenexō manamakī ē mato yoikī chakafaama. Askatamaroko ē mato yoisharakōia mato axosharayanā. ¹⁰ Akka nō shinākī iskafatiro: “Ooa, ē afara chakafakī, Niosri ē chakafaa,” ixō shinākī nōko chaka nō xatepaitiro Epa Nios Ifopaiakī. Nō askaito ōikī Epa Niospa noko ifitiro nō afe ipaxanō. Nāskaxō nō shinātiroma iskafakī: “Ooa, ēfe chaka ē xateama shara ē ikerana. Niosri ē Ifofaama ē shara ikerana,” ixō anori nō shinātiroma. Akka nā chanīmara faamafāfe nō shināi keskara shinākanima. Iskafakī shināmisfo: “Ooa, nō afara chakafaa,” ixō shinākani āto ōiti mēra shināmitsakanima Nioskai shināpaikanima. Nāskax nakanax Epa Nios fe ipanakafoma. ¹¹ Akka mākai askarama. Shinākapo. Mā mato ōiti mēraxō mā mā shinā anā mā Nios Ifofai mato chaka xatepaikī nā Niospa fichipaiyai keskafakī. Nāskax mā ratekōia Niospa keyokōi noko omiskōimaxira ikax. Nāskakē mā mā itipinīkōia ika a afara chakafaiifo ato omiskōimaxiki. Nāskaxō mā fāsikōi ato yoia āto chaka xatenōfo. Nāskakē mā mā noko ispanākai ato keskarama. Nāskakē mā ea fichisharapaiokī ē mato ōikanō mā isharakōiyamākī. ¹² Akka ēfe kirika kene fixō mā ea noiyanā mā ea nikakōisharamis. Akka ē kirika keneama, nā feronāfāke afara chakafaaōnoa omiskōimakāfe ixō. Askatari nā feronāfāke omiskōimanafoōnoari ē kirika keneama. Akka ē mato kirika kenexona mā tāpinō mā ea noimākai. Akka mā ea nikakōimis. Nāskaxō mā tāpitiro māmāi ea noikī Niospa ferotaifi.

¹³ Nāskakē nō inimasharakōi, māmāi noko noisharakōiaino nikakōisharayanā. Akka Titori matoōnoax inimasharayamea. Nā Tito inimaio ōi nōri inimaifinasharakōiyamea. ¹⁴ Akka Tito kayoamano ē yoiti iskafakī: “Na Corinto anoafō sharakōifo,” ixō ē yoiti. Nāskakē Tito mato mēra kaano mā ifisharakōiyamea. Nāskakē ē matoōnoax rāfiyameama. Akka chanīma fisti nō mato yois. Nā ē matoōnoa Tito yoia keskara chanīmakōi Titopa mato ōia. ¹⁵ Tito matokī nokoxō ōia mā rateaito mato ōita noko Titopa ferateneira ikax. Nāskakē pishta rateyanā mā Tito nikakōita. Nāskakē Titopa mato shinākī, mato noikī finakōi. ¹⁶ Ēri matokī inimakōi. Akka iskaratīa mē tāpia nā ē mato yoiai keskara mā amiskē.

8

“Afarayaxō fetsafo ināsharakāfe,” ixō Pablo Corinto anoafō yoini

¹ Akka meka fetsari ē mato yoinō mā tāpinō. Mā Epa Nios Macedonia anoxō chanīmara faafono Epa Niospa ato noikī āto shinā mēraxō ato shināmashara fetsafori kori ināsharakōinōfo. ² Akka Macedonia anox omiskōifikakī Niosnoax inimakōikakī, afaayayamafiakaxō nā yora afaamaisfo ato afara fetsa ināsharakōiafo. ³ Akka nā ē ōia keskara ē mato yoinō. Fetsafāfe afaayayamafiakaxō fetsafori ato afara ato ināsharakōiafo. Ato afaa fishkofafoma.

Nāskakē atonā afaa ichapa nēteama. ⁴ Iskafakī ea yoiāfo ato ināsharapaikī: “Nā Jesús chanīmara faa fetsafāfe kori yopakani. Nāskakē nōri ato afara fomasharapai,” ea faafo. ⁵ Nō shināyamea kori fistis noko inākanira ixō, Jerusalén anoāfo a Nios Ifoafafo ato foxopaikī. Akka noko kori ināyokaxoma taefakī Nios ināyameafo, iskafakī yoiyanā: “Ifo, nōfi mefe yorakī nā mī noko afara amapaiyai keskara mī noko yoitiro,” ixō yoiyameafo. Nānori yoikāta nokori yoiyameafo iskafakakī Niospa fichipaiyai keskafakī: “Nōri nō mato nikakōinō,” ixō noko yoiyameafo. ⁶ Titopa taefakī mato yoiyoni iskafakī: “Māto korifo ichafakāfe a afaamaisfo Jerusalén anoāfo ato ināxikakī,” ixō mato yoiyoni. Nāskakē nō Tito yoiyamea iskafakī: “Nā mī yoimis keskafakī anā ato yoife nā afaamaisfo Jerusalén anoāfo ato kori inānōfo. ‘Mā ato noikī mā ato kori inātiro,’ Corinto anoāfo ato yoife,” ixō nō Tito yoiyamea. ⁷ Akka mā Jesús chanīmara fakī finakōiyānā mā Niospa meka mēstekōi yoimis, āfe meka tāpisharakōiyānā. Chanīmakōi mā Jesús yonoxosharakōiyānā mā noko noisharakōi. Nāskakē nā mā afarafo shara faa keskafakī nā afaamaisfori mā ato ināsharatiro. Niosxō mā ato noikōikī inimasharakōikai mā ato inātiro, fetsafo finōkōinīfōfā nā mā imis keskayanā.

⁸ Akka ēakōi ē mato yoima nā afaamaisfo mā ato kori inānō. Akka ē tāpipai fetsafāfe ato kori ināpaiyai keskafakī māri ato ināpaimākai. Askayamakī māto meka fistichi mā yoiaraka nō ato ināira ixō. Akka askakīma mā ato noikōiyānā mā ato ināsharatiro. ⁹ Mā mā tāpia nōko Ifo Jesucristo nai mēranoax nāmā fotoyoamax afama mīstifoya iyopaoni. Afaakai yopapaonima. Nāskafixō noko noikōikī āfe afama mīstififo keyokōi potāferani. Nāskax nokoōnoax afaamais iyopaoni nō aōnoax isharapakexanō.

¹⁰ Akka nā ē shināinao ē mato yoinō mā tāpinō. Akka mā xinia fisti finōa mākai inimakōiyānā kori ichafaxō mā ato ināma. Akka taefakī nā afaamaisfo mā ato noikī mā ato kori ināpaiikī mā fiyamea mā mekea ato chipo ināxiki. ¹¹ Nāskakē inimakōikī mā kori ichafakī taefati keskafakī iskaratīari inimayanā ato ināsharakāfe anā afaa yopanōfoma. Nā mā ato ināpaiyaiti ato inākāfe. ¹² Akka mā ato ināpaiikī mā ato inātiro. Askatari mā afarayaxō mā ato ināsharaito Epa Niospa tāpia. Askatari mā afara ichapayaxōma mā ato ināitōri nāri Epa Niospa tāpia. Nāskakē inimakōi.

¹³⁻¹⁴ Akka ē mato iskafakī yoima: “Ichapakōi ato inākāfe,” ixō ē mato yoima. “Askatari keyokōi mā ato ināx mā afayaima,” ixō ē mato yoima. Akka iskaratīa mā afara ichapaya. Nāskakē nā afara yopaifo mā ato inātiro. Akka māri afara yopaito nāfāfe afara ichapayakaxori matori inātirofo. Mā askai mā ranā mā kexenōnāsharax mā isharakōitiro afaa yopaxikima. ¹⁵ Akka kirika ano Niospa meka kenea iskai: “Akka nōko xinifo tsōa istomaxō a piaifo Niospa ato ināpaoni. Akka nā ichapa fiato texefapaonima. Akka nā ichapama fiatori afaa yopapaonima,” ixō kirika ano Niospa meka yōra keneni. Nāskakē yora fetsafo nō afara ināito, Niospari noko afara fetsafo noko inātiro nō afaa yopayamanō.

Tito fe rafeafo

¹⁶ Ē matoōnoa shinākōiai keskafakī Titopari āfe ōiti mēraxō mato shinākōi, Epa Niospa shināmanaino. Nāskakē nō Epa Nioski inimakī nō aicho fai. ¹⁷ Akka iskafakī nō yoiyamea: “Corinto anoāfo anā ato ōitāfe ato yoisharaxikī,” ixō nō Tito yoiyamea. Nānori nō yoiano inimayamea. “Aicho, ē ato ari kaikai ē ato yoisharai kaikai,” ixō noko yoiyamea. Akka ē shināi nō yoiai fistiōnoax kaima. Āari matoki kasharapai kai. ¹⁸ Akka nā nofeta

Nios Ifofamis fetsa nõ Titoya nõchi. Nã nofe yora, nãatori Jesúsnoa ato yoisharamis. Nãskakē aõnoa keyokõichi meka shara yoimisfo. ¹⁹ Akka nã Nios chanĩmara faafo tiito ichanãkaxõ na feronãfake katonifo, nofeta nã kori yopaifo foxõikanõ. Nios shinãkĩ na kori nõ ato inãyanã nõko Ifo sharara fanõfo. Askatari nõ mato feta nõ ato inãpai tãpinõfo nõ ato axosharapai.

²⁰⁻²¹ Nã afaamaisfo nõ ato kori foxosharapai. Nãskakē yorafãfe ferotaifi nõ ato õimasharapai noko chakafakĩ mekafayamanõfo. Na kori ichapa nõ ato foxosharapai noko iskafanõfoma: “Nõko kori ranãri oneafo,” noko fanõfoma. Nãskakē nõko Ifãfe ferotaifi nã yorafãfe ferotaifiri nõ ato õimapai nõ isharakõixõ.

²² Akka nã nofe yora nã Jesús Ifofamis fetsa Tito yafi nõ mato nõchi. Nã feronãfake mã nõ õimis nãato Jesús chanĩmara fakõimis. Nofeta Jesús yonoxosharakõimis. Akka nãato mato nikamis mã Jesús Ifofasharakõixõ nã afaamaisfo mã ato inãsharakõiaito. Nãskakē mato ari kapaimis mato feta ato shara faxiki. ²³ Akka mã mã Tito õimiski. Nãato efeta mato yonoxosharamiski. Nã efe rafemis Jesús yonosharaxoxiki. Nã Jesús chanĩmara faafo raferi afe mato ari fokani. Akka nã Jesús chanĩmara faafãfe ichanãkaxõ ato katonifo mato ari fonõfo. Nã rafeta Nios Ifofasharakõimisfo. Nãskakē ato katonifo mato ari fonõfo. ²⁴ Akka mato ari nokofaifãfe ato ifisharakõikãfe nã Nios Ifofaafo ato katonifo ato tãpinõfo mã ato ifisharaito. Mã ato askafaino nã ã matoõnoa yoisharamis keskara tãpitirofo chanĩmakõikẽ.

9

Nã Nios Ifofaafãfe Corinto anoafõ feta Macedonia anoxõ nã Nios Ifofaa fetsafori ato kori manamanifo

¹⁻² Akka nono Macedonia anoxõ ã kirika kenexõ ã mato fomakĩ ã mato yoikĩ iskafapaima: “Ato kori fomakãfe,” ixõ ã mato yoipaima. Akka mẽ tãpia mã xinia fisti aka nã Jesús chanĩmara faa fetsafãfe afara yopaifãfe mã ato inãpaiyaito. Akka ã Macedonia anoafõ ã yoikĩ iskafaa: “Acaya anoxori ato kori fomapaikani Judea anoafõ,” ixõ ã yoia. ã ato askafaito nikakaxõ akairi ato kori fomasharapaikani. ³ Nãskakē ã Tito yafi nã afe rafeafo ã matoki nõchi nã ã matoõnoa yoisharai keskara chanĩmakõikẽ tãpinõfo. ã Macedonia anoafõ ato yoimis iskafakĩ: “Nã Corinto anoafãfe mã itipinĩshara faafo ato kori fomaxikakĩ,” ixõ ã ato yoia. Akka ã Tito yafi a afe rafeafo ã nõchi mato ano nokokaxõ õinõfo nã ã matoõnoa ato yoia keskara chanĩmamãkĩ. ⁴ Akka Macedonia anoafõife efe foaifono ã ato fe mato ano nokoxõ õia mã kori ichafayamano ã mãto rãfiaino mãri mã rãfipaitiro. ⁵ Nãskakē ã shinã Tito yafi afe rafeafo rekẽ mato ari nõchixiki mato feta kori itipinĩfanõfo ato fomaxikakĩ nã afaamaisfo. Akka afetĩama mã mã shinãxõ yoiyoni: “Nã afaamaisfo nõ ato kori fomanõ,” ixõ. Akka ã mato yoia: “Ato kori inãkãfe,” ixõ. Mãakõĩ mã ato inã. Akka nãskara shara mã ato inãpaiki mã ato inãtiro.

⁶ Nãskakē shinãsharakãfe. Akka nõ fimi exe fisti fanaxõ ichapa fitiroma. Akka nõ fimi exe ichapa fanano nõ fimi exe ichapa fitiro. Nãskarifiakĩ nõ fetsafo afara ichapama inãkẽ nokori Niospa ichapama inãxii. Akka nõ inimayanã fetsafo ichapa inãito nokori Niospa ichapa inãtiro. ⁷ Nã ãto shinã mēraxõ shinãifo keskafakĩ fetsafo inãtirofo. Nãskakē iskafakĩ shinãtirofoma: “Ooa, ã ichapama inãpaifaito ea yõkarifaito ã inã.” Askatari iskafakĩ shinãtirofoma: “Akka ã inãyamaino ekeki õitifishkitiro. Akka ã inã ekeki õitifishkiyamanõ,” ixõ anori shinãyamakãfe. Askatamaroko inimayanã

inākāfe. Nā fetsafo ato afara ināi inimamis nā Niospa noikōi. ⁸ Akka nā mā fichipaiyai tii keyokōi Niospa mato inātiro afara sharafo fetsa fetsatapafō mā afaa yopanōma. Askatari nā afara yopaifo mā ato ināno, Niospa keyokōi tāpia mato sharafo fafafaītiro māri fetsafo shara fanō. ⁹ Niospa meka aōnoax kirikaki kenea iskai:

Feronāfake sharapa nā afaamaisfo afara ichapa ato ināsharamis. Nāskakē Epa Niospa nā feronāfake axosharaino mēxotaima ato afara ināsharatiro, ixō keneni. ¹⁰ Niospa fimi exefo onifani. Nāskakē nō fimi exe fanatiro. Chipō Niospa āfe fanafo foaimasharaxotiro pisharanō. Nāskarifiakī mā afara yopaito Niospa mato ināsharatiro. Afara ichapakōi mato ināno mā inimayanā nā Nios Ifofafo Jerusalén anofo mā ināsharafafāītiro. ¹¹ Chanīma, Niospa mato afaa fishkoima afara ichapa mato ināi māri ato afara ichapa ināno. Akka nā afara yopaifo mā ato ināi nāfo nō ato foxoxii. Nāskakē inimayanā yoixikani iskafakī: “Aicho Epa Niosi, mī fāsi sharakōi,” ixō yoixikani. ¹² Akka mā ato afara ināsharaino nā afaamaisfāfe fixikani. Nāskakē mā fikaxō inimayanā Epa Nios yoixikani iskafakakī: “Aicho Epa Niosi, mī noko shara famis,” ixō yoixikani. ¹³ Mā ato afara ināsharano nā afaamaisfo inimakōixikani mā ato ināsharano. Nāskakē yoikī iskafaxikani: “Aicho Epa Niosi, nā noko afara ināifāfe mī meka nikasharakōimisfo. Jesús nōko Ifo mia famisfo. Mī ato yoia keskafakī noko ināsharafo. Fetsafori nāfāfe afara ato ināsharafo. Nāskakē mā nō ato tāpikōia chanīmakoī mī Fake Jesús āto Ifokōi,” ixō nā afaamaisfāfe yoixikani. ¹⁴ Nāskakē mato Epa Nios kifioxikani. Mā Niosxō ato afara ināsharakē, yoikī iskafaxikani: “Epa Niosi, mīōxō na yorafāfe noko afara ināsharafo. Aicho Epa, nō ato fāsi noikōi. Atori shara fafe,” ixō mato Epa Nios kifioxikani. ¹⁵ Aicho Epa Niosi, mī Fake Jesucristo mī noko ināsharakōini nofe rafesharapakexanō. Nāfi sharafinakōiakī aōnoa nō yoisharapaikōi nōkai tāpiama afeskaxomāi nō yoisharakōinō.

10

“Niospa ea nīchini Jesúsnoa ē mato yoinō” ixō Pablo ato yoini

¹ Iskaratīari meka fetsari ē mato yoisharapai. Efe yora mīshtichi, ea nikasharakāfe. Jesucristokai meka mītsisipato noko yoimisma. Noko yoikī fenāmāshta noko yoisharamis nō āfe meka nikasharakōinō. Nāskarifiakī ēri Cristoōxō mato fenāmāshta yoisharapai mā tāpinō. Akka eōnoa yoikī iskafamisfo: “Pablo nofe ixō fenāmāshta noko yoiāito nō ōimis. Nāskafixō noko kirika kenexoni mītsisipakai noko kirika kenexonaito nō ōimis,” ixō ea yoimisfo. ² Ē matoki nokoxō fāsi mekakai ē ato yoipaima ea nikanōfo. Askafixō ea nikayamafiaifono fāsi kerexkai ē ato yoitiro. Akka nā ea chakafakakī mekaifafo ato nikayamakāfe. Akka eōnoa yoi iskafamisfo āa chanikani iskakani: “Pablo noko yoi nā Nios Ifofaamafāfe yoiāifo keskara. Niospa shināōxōkai noko yoima,” ixō yoimisfo. Akka ē matoki nokoxō ē mato yoitiro nā Nios Ifofaamafāfe shināifo keskara ē mato yoimisma. Niospa shināi keskara fisti ē mato yoimis. Akka mē nokoxō fāsi mekakai ē ato yoixii tāpinōfo. ³ Chanīma, nono mai ano nō ika nā Nios Ifofaafoma fe. Akka nā Nios chanīmara faamafāfe fetsafo finōpaiyāifo keskai nōkai askamisma nā noko noikaspaifo ato finōixiki. ⁴ Akka a Nios Ifofaafoma a Satanās nikakī mato chanikī tāpimapaikani mā anā Jesús Ifofayamanō. Mato pārapaikani. “Nō Nios Ifofara,” ikani. Askatamaroko nō Nios nikakī nō mēxotaima yoimis chanīmakōi. Nāskaxō Nios āfe sharaōxō nō ato xatematiro afara chaka anā

yoiyamanōfo. ⁵ Epa Niospa noko yoiaino nō fetsafo tāpimatiro āa chanīaifo, “Nō Niospa meka tāpisharakōiakī,” ikanaifo, kakapaiyaifo. Akka nō Niospa sharaōxō fetsafo nō ato tāpimatiro nā chanīmisfo Niospa meka tāpisharafoma. Shara shināfoma. Epa Nios Ifofaima. Niosxō nō ato yoimis Nios Ifofanōfo. ⁶ Akka ea Jesús nīchini āfe meka ē mato yoinō. Nāskakē mā Jesús yafi ea nikakōixō mā anā afaa chakafayamaino ē mato afeskafatiroma. Akka mā noko nikakaspaito ē mato omiskōimatiro.

⁷ Akka mā ōikī shināi oa shara keskaraxō fetsafāfe yoiaifono iskafakī: “Cristo ea nīchini āfe meka ē mato yoinō. Akka Pablokai ea keskarama,” ixō mato yoimisfo. Akka nāfāfe shināsharakaxō tāpitirofo eari Cristo nīchinikē āfe meka shara ē mato yoinō. ⁸ Nōko Ifo Jesús ea yoimis keskara ē mato yoitiro. Mato afaa chakafamatama nōko Ifo ē mato Ifofamasharapai mato ōiti fēpeaxosharaxiki. Ē anori mato yoi ēa kakapaitama, ēroko mato yoisharapai. Ē anori mato yoikai ē rāfima. ⁹ Akka ē mato kirika kenexō ē mato ratepaima mā mesenōma. ¹⁰ Akka fetsafāferi eōnoa yoikī iskafamisfo: “Pablo noko kirika kenexokī noko feratekōiaito nō ōimis. Akka askafiax nofe ikē nō ōia afaamakōi nō ōimis. Āfe mekakai mitsisipama,” ixō eōnoa yoimisfo. ¹¹ Nānori eōnoa yoifimisfono ē mato ari samama kaxō ē ato tāpimaxii. Nā ē mato kenexona keskafakī nānorikōi ē mato yoixii.

¹² Fetsafāfe mato yoimisfo iskafakī: “Nōfi afara tāpikōiakī nō mato tāpimasharakōitiro,” ixō mato yoimisfo. Nāskarafo ichanākanax āa ranā yoinākani iskakani: “Noko keskarakai tsoama. Nores fisti nō tāpisharakōia,” ikanax kakapaimisfo. Nāfo tatimakōifo afaakai tāpiafoma. Nāskakaxō nāfāfe anorima afara chaka yoimisfo. Akka ēkai ato keskarax ē sharakōi ē itiroma ēroko ato keskarax. ¹³ Akka nōkai anori yoipaitiroma. Nā Niospa noko yoiai keskara fisti nō mato yoitiro. Noko yoini āfe meka shara fisti nō mato yoinō. Nā fisti nō mato yoimis. Akka mā ika nā Niospa ea nīchini ano. Akka ē kani Corinto anoxō mato Niospa meka tāpimaxiki. ¹⁴ Nāskakē ori fetsa ari ē kani, nā ea nīchini ano ē kani. Akka nā nō mato yoiai keskara chanīmakōi. Nōkai kakapaimisma. Nā Niospa noko yoiai keskara fisti nō mato yoitiro. Akka nō mato Niospa meka yoikī taefatani Jesucristoēnoa meka shara mā nikamiskēma. ¹⁵ Akka nā ē kamisma anoxō fetsafāfe ato yoiafono nō ato yoia ixō nō ato yoimisma. Akka nō mato yoi nā nō mato afara axosharamis fistiēnoa. Akka nā fetsafāfe mato axomisfoēnoa nō yoimisma. Akka mā mā Jesús nikasharai. Nāskapainō. Mēxotaima mā nikasharakōifafāinō. Akka mā ea ifisharakōiano mēxotaima ē mato yoisharatiro nā Niospa fichipaiyai keskafakī. ¹⁶ Nāskakē mai fetsa ari chaikōi mato finōfāi ē kapai Jesúsnoa ato yoixiki nā Niospa meka nikamisfoma ari. Akka nārixō mā fetsafāfe ato yoiafono nō ato yoia, nō ipaima fetsafo imis keskai. Nōkai fetsafo ato yono xītikapaima. ¹⁷ Akka kirika ano Niospa meka kenea isakai: “Akka tsōakai āa yoimesharatiroma isakai ē afama mīshti tāpikōiakī ikax āa kakapaitiroma. Askatamaroko nō yoisharatiro nā afara sharafo nōko Ifāfe aka,” ixō kirika ano yōra kenei. ¹⁸ Akka fetsa āa yoimesharai akai afaama. Akikikai Nios inimatiroma. Akka Niospa fetsa na feronāfake sharakōi faax akiki inimakōitiro.

11

Pablo ato yōani āa chanīkani noko Niospa nīchiaki nō Niospa meka mato yoinō imisfoēnoa

¹ Iskaratīa ē mato yoinō, nā yora shināsharayamaito yoiāi keskara nānorikōi ē mato yoifikīkai askarakōi ē mato yoima. Nā mā ea nikamis keskafakī iskaratīa ea nikasharakāfe. ² Feronāfāke kēroyapaikī āfe apa yōkatiro, nā kēro fixiki āfe āfi inō. Nāskakē apa āfe fake xotofake kexesharatiro feronāfāke fetsa fe oxayamanō. Nāskax mā fianākanax fene fes fianātirofo feronāfāke fetsafekairoko oxakatsaxakī. Nāskarifiakī ē mato Nios Ifofamakī ē mato kexesharani. Nāskaramāi Epa Niospa fichipaiyaino. Nāskakē mēxotaima ē mato kexesharai mā fetsafo nā chanīmisfo mā ato nikayamanō. Nāskakē mā nai mēra Nios ano kaax Cristo afe yorakōi mā ixii. ³ Nāskakē ē shināchakakōi Satanās Eva ani keskafakī fetsafāfe matori pārāyamanōfo, mato pārāifono mā anā Cristo noinōma. ⁴ Ooa. Fetsafāfe mato pārāpaikani. Nō Jesūsnoa mato yoimis keskara anori mato yoikōiyamafiaifono māikai ato xatematama mā ato chanīmara fai. Nō Niospa Yōshi Sharaōxō meka shara Jesūsnoa nō mato yoimis keskara anorikai afāfe yoikanima. Jesūsnoa anorima mato yoifiaifono mā ato xatemanama. Mā ato nikayanā mā yoimis iskafakī: “Aicho, mā nofe isharapainō,” ixō mā ato yoimis. ⁵ Akka mā shināi nāfāfe Niospa meka yoisharakōimisfora ixō. Akka askafikaxō ea finōfāfoma. ⁶ Akka, ĵmā shināimē ē yoisharatiroma? Akka ē Niospa meka tāpisharakōia. Nā ē mato yoiāi anori mēstekōi. Mā mā ea tāpikōia ē mato Niospa meka xafakīakōi yoimis. Nā keskara ē mato ōimafafāini.

⁷ Nā ē mato Niospa meka yoimis chāikai ē mato afaa yōkamisma. Ēkai mato afaa fiamisma, koriri ē mato yōkamisma. Ōitsai, ē mato chakafairaka ē mato kori fiakīma. Akka ē Niospa meka shara Jesūsnoa ē mato yoimis Niospa fakefo mā inō. Ē mato askafai afaamais keskara ē imis mā Niospa meka tāpisharakōinō. ⁸ Akka ē mato fe ikano nā Nios chanīmara faa fetsafāfe ea kori inānifo aō nā ē fichipaiyai keskara ē finō. Ōitsai, ē atoki yometsoa keskarakā nā kori fii mato Niospa meka yoi, ē mato yonoxomis keskarakō. ⁹ Ē mato fe imis chāikai ē afara yopafikī ē mato fekaxtefamisma. Akka Macedonia anoafāfe Nios chanīmara faafo fēkaxō ea afarafo inānifo. Akka ē mato fe imis chāikai ē tsoa afaa yōkamisma. Askatari ē tsoa afaa yōkapakenakama. ¹⁰ Cristo āfe meka chanīmakōi. Nāskarari nā ē mato yoiāiri chanīmakōi. Nāskakē Acaya mai anoxō nā ē mato yoiāi keskara ea tsōa xatematiroma. ¹¹ Ē mato anori yoikī, ĵē mato noimamē? Maa. Anorikaima Niospa tāpikōia ē mato noikōi.

¹² Nā ē mato yonoxomis chāi ē mato afaa fiapaimisma. Iskaratīari ē mato afaa yōkaima. Nāskaxos ē mato yonoxoni nā chanīmisfo mā anā ato chanīmara fanōma. Nā ē yonoaito ōikaxō fetsafāfe yoimisfo iskakakī: “Nōri Pablo yonoai keskafakī nō yonoi,” ifiakaxō afāfekai ē yonoai keskafakī tsōa yonomisma. ¹³ Akka nāfo chanīmisfo. Ē ikai keskara ipaifikani tsoa askakōimisma. “Cristo noko nīchia aōnoa āfe meka nō mato yoinō,” ixō mato yoifikani afokai Cristo fe rafemisfoma. ¹⁴ Chanīma, Satanās nokoki nokotiro nā Niospa āfe ājiri fafai ōitsa. Nāskarato noko yoitiro iskafakī: “Ēfi mato xafakīa yoikai,” ixō noko feparapaitiro. ¹⁵ Akka nā Satanās yonoxomisfori nā keskara itirofo. “Nōri nō Nios yonosharaxomis,” ixō noko pārāpaikani. Nāskaifāfe ōikī Niospa ato omiskōimakī finakōixii. Nāskakē nāfāfe afara chakafakanax omiskōipakenakāfo.

16 Ē mato yoia keskara anā ē mato yoinō: “Pablo afaa tāpiama,” ixō eōnoa shināyamakāfe. Akka ea nikapaikī ea nikayokāfe. Nā yora fetsa afaa tāpiama mā nikamis keskafakī eari nikasharayokāfe. Ēari ē pishta yoimeyonō. 17 Nā ē mato yoiai keskara a ēa ē yoimesharai ēfe Ifāfe ea anori yoiaama. Akka nā afaa tāpiamāfe anori yoimisfo. 18 Akka nā nōko Ifo chanīmara faafoma āa yoimesharaifo keskara nānori fetsafāfe mato yoimisfo. Akka iskaratīari ē mato yoi a ēari ē yoimesharai keskara. 19 Akka mā shināi mā tāpikōia. Nāskaxō nā afaa tāpiamafo mā ato nikamis. Akka afeskakī mato anorima yoifiaifono mā ato xatemamisma. 20 Mato yoimisfo āto yonomati keskarakōi mato fakaxō, askatari mato kaxpa yonomamisfo. Nāskatari mato pāramisfo, askatari mato chakafamisfo, askatari mato īchamisfo. Mato askafaifono mā tenekōimis. 21 Mato askafakakī shinākaniraka nō mitsisipakōira ikaxō. Ooa. Nōkai mitsisipama oa ato akaifo keskafakī nōri mato askafapanā. Akka nōkai mato askafamisma nōkairoko ato keskaraxō.

Akka nāfo āa yoimesharakakī mato afara yoimisfo keskafakī ēari ē yoimesharatiro. Ooa. Nā afaa tāpiamafo keskaraxō anā ē mato yoi. 22 Akka nāfo, “Nō hebreos yorafo,” ikani. Akka ēri hebreo yora. Askatari, “Nō israeli yorafo,” ikani. Akka ēri israeli yora. Askatari, “Nō Abraham āfe fena,” ikani. Akka ēri Abraham āfe fena. 23 Akka, ħnāfo fistimē Jesucristo yonoxomisfo? Maa. Akka ēroko yonoxokī finakōimis. Ooa. Ē iskafakī ē mato yoi oa shināsharayamaito yoiai keskaraxō ē mekai askayamapaifi. Akka nā chanīmisfāfe mato yoikī iskafakani: “Nō Jesús yonoxokōimis. Askatari Jesúsxō noko karaxa mēra ikimanafo,” imisfo. Akka ēroko yonokī finakōimis. Nāskakē earoko karaxa mēra ikimakī finakōimisfo. Askatari ea koshakī finakōimisfo. Ea askafakī fetsaifono mē nakerakōimis. 24 Efe yora judeofāfe ea koshakakī cinco veces fakī ea koshamisfo. Nā ea koshaifo tii treinta y nueve ea famisfo. 25 Romano xanīfodefāferi āto chāti ea koshanifo tres veces fakī. Askatari ēfe kaifāferi tokirifāfe ea tsakakī fisti fanifo. Askatari kanōanāfānē ē pokefainaino kanōanāfā fakafā fospia ikiaino mē āsakerani. Mā kanōanāfā fakafā mēra ikiano nā kanōanāfā āfe kaxke ē fakafā mānāo ē nononi āsaxikima. Fakish fisti ita pena fistiri ē ini. 26 Mē kafāsamis, faka faiyaito mesekōi ē ōimis; askatari yometsoafāfe ea achikaxō ea mesenifaifono mē ōimis; askatari ēfe kaifokōifāfe ea mesenifaifono mē ōimis; yora fetsafāferi ea mesenifaifono mē ōimis; pexefā rasi anoxori ea mesenifaifono mē ōimis; tsōa istomaxori ea mesenifaifono mē ōimis; fakafā anoari mesekōi mē ōimis; “Nōri Nios Ifo sharakōifamis,” ikax a chanīmisfāfe ea mesenifaifonori mē ōimis. 27 Ē omiskōiyanā ē yonomis xokenākōiyanā; askatari ē oxa tenekōimis; askatari ē fonāiyanā nomi tenekōimis; askatari ē pimisma; askatari matsi mei ē omiskōikōimis rapatimais ikax.

28 Nāskarafo ē mei ē omiskōikōimis. Askatari afara fetsafoōnoaxri ē omiskōimis. Askatari mēxotaima ē mato shinākōimis nā mā ichanāxō keyokōichi mā nōko Ifo Jesús Ifofamis tii mā kachikiri fayamanō. 29 Akka ē nika fetsa Jesús Ifofasharapaifi rateaino ē aōxō shināchakakōitiro. Akka fetsa a Nios Ifofaa afara chakafamakē ē akiki ōitifishkikī rāfikōitiro. 30 Akka nā ē mato rama yoiai keskara kakapaikī ē mato yoima. Ē mato yoi mā tāpinō ēa ē afaa atroma. 31 Nā Nios fisti nōko Ifo Jesucristo āfe Apa, nāato tāpikōia ēkai chanīmisma. Iskafakī nō yoinō: “Epa Niospa, mī sharafinakōia,” ixō nō yoipakexanō. 32 Akka Aritas xanīfokōi iyopaoni. Nā Aritas fetsa nīchini Damasco anoax xanīfo inō. Damasco ano ē ikano, nāato āfe sorarofō yoini nā

pexe rasi anoxõ äfe kãiti anoxõ ea kexenõfo ea achixikakĩ. ³³ Akka anoxõ ea achipaiyaifono, nã nõko Ifo Jesús Ifofaafãfe fêta efapa mēra ea onekaxõ pexe rasi kene fomãkĩaxõ ea fotomanifo ē katanõ.

12

Pablo äfe namapa õiai keskara õini Niospa tãpimanaino

¹ Akka ēa ē yoimesharai. A ēa ē yoimesharai keskarakai akai afaama. Nãskafekē nõko Ifo Jesús ea õimana keskara ē mato yoinõ. Nã ēfe namapa ē õiai keskara ea õimana. Nã tsõa nikamisma ea tãpimani. Nãnori ē mato yoi. ² Mã catorce xinia finõa a Niospa ea ifirisafayoni, ē Cristo fe rafeaito õikĩ. Ĕkai tãpiama ēfe fero mēsho fisti nai mēra kani rakikĩa, askayamai ēfe yora kani rakikĩa. Nios fisticchi tãpia a ē ini keskara. ³⁻⁴ Niospa nã ika ano ea ifirisafayoni. Nã ē mato yoiyõa keskara anã ē mato yoi. Ĕfe yora iyamai ēfe fero mēsho fisti kani rakikĩa Ĕkai tãpiama. Nios fisticchi tãpia nã ē ini keskara. Nã ika anoxõ ea afara nikamani keskara ē tsoa yoitiroma. Akka ea yoikĩ iskafani: “A mĩ nika keskara tsoa yoyiamafe,” ixõ ea Niospa yoini. ⁵ Ĕ nã õia keskara ē fetsafo yoipaima iskafakĩ: “Niospa ea fisti nã ika ari ea õimani,” ixõ ē yoitiroma. Ĕ anori yoipaima. Anori ē yoi kakapaimis ē itiro. Ĕkai ēa ē yoimesharapaima. Ereskai ē afaa fatiroma. Nãskakē nã fisti ē yoisimis inimakĩ. ⁶ Akka ēa ē yoimesharai ē yoimetiro. Ĕ anori yoi nã yora afaa tãpiamafãfe yoisimisfo keskara ē yoima. Chanĩmakõi eõnoa ē yoimesharatiro. Akka Ĕakai eõnoa ē yoimesharapaima eõnoa shinãkĩ finakõinõfoma. Mã ea õimis ē afe keskaramãkĩ, askatari mã ea nikamis ē afe keskara yoimismãkĩ.

⁷ Akka Epa Niospa a ika ari ea õimani keskara tsõa õimisma. Akka Niospa ea õimaniõnoax ēa ē yoimesharapaitiro ē tãpikõiara ikax. Nãskakē Niospa nētefayamano Satanãs ea isinĩ imani nã nõ moxaki chachiano noko mõxa fekaxtefai keskafakĩ ēa ē yoimesharayamanõ. ⁸ Nãskakē ē kifikĩ iskafani: “Ifo, ea sharafafe,” ixõ tres ves fakĩ ē yõkani. ⁹ Ĕ askafaito nõko Ifãfe ea kemakĩ iskafani: “Ĕ mia noi. Askafixõ ē mia sharafaima. Cristo mia axotiro na pae mĩ tenenõ ē mefe rafekakaini. Mĩ mitsisipayamafikē ē mĩõxõ ē ato õimatiro ē afama mĩshti fatiro,” ixõ ea kemani. Nãskakē ē isinĩ ifiai ē inimasharakakaini. ¹⁰ Nãskakē ē mitsisipayamafix Jesucristoõnoax ē inimakõi. Nãskaxõ ea ĩchaifono ē tenemis, afaayayamaxri ē inimakõimis ea omiskõimanaifonori ē tenemis. Nãskatari afarafo fekaxkõifekē ē tenemis. Ĕ askafakĩ ē mitsisipayamafixõ Jesucristoõxõ ē afama mĩshti fatiro.

Pablo nã Nios chanĩmara faafo Corinto anoafo ato shinãkõini

¹¹ Akka nã yora afaa tãpiamafo ãa yoimetirofo keskarax ēa ē yoimea. Akka mã eõnoa afaa yoisharama. Akka mã ea õisharakĩ, “Nã Pablo sharakõi,” ixõ mã eõnoa yoiano nã sharakõi ikerana. Nãskakē ēa ē yoimesharakõi fetsafãfe ea tãpinõfo ē afe keskaramãkĩ. Akka Ĕakai ē afaa asharatiroma. Ĕkai afaama. Nãskafekē nã eõnoa afara chaka mato yoisimisfãfe ea finõkanima. ¹² Jesucristo ea nĩchini aõxõ äfe meka ē mato yoinõ. Nãskakē tanaimakõi ē yonomis fena fenakima. Nãskara ē yonofaino Niospa afama mĩshti amis eõxõ mã tãpinõ Jesucristo ea nĩchinikē. ¹³ Akka, çafeskakĩ mã iskafakĩ shinãimē? “Pablo nã Nios chanĩmara faa fetsafo ato shara fai keskafakĩ nokori shara faima,” ixõ mã eõnoa yoitiroma. Akka nã Nios chanĩmara faa fetsafori ē ato shara fai keskafakĩ, nãskarifikĩ ē mato sharafa fafãfãini. Ĕkai mato afaa fiapaimisma.

Askatari ē mato fekaxtefamisma. Ea pimakape ea rapati safemayanā ē mato famisma. Ōitsai, ē mato afaa fīapaikima ē mato chakafaamakī ea raefakāfe.

¹⁴ Mē mato ari kai rafea. Akka iskaratīa mē itipinīsharax anā ē mato ari kai. Ē mato amis keskafakī anā ē mato yōkakī fekaxtefaima. Ē mato afaa fīapaitama ēroko mato shināfafāini. Shinākapo. Fakefāfekai apa yafi afa pimatiroma. Akka afa fetaroko apa fakefo pimatiro. Akka māfi ēfe fakekōifo keskarakī. Akka ē mato Niospa meka tāpimasharakōia eōnoax mā isharanō. ¹⁵ Akka ē afarafo fikī mē kori potakī keyokōia, askafafīaxō ē shināchakaima, askatari ēakōi ē ināmei mā Niosnoax isharakōinō. Akka ē mato noikī finasharakōifianokai Ōitsai mā ea noikī finasharakōimisma rakikīa.

¹⁶ Akka ē mato afaa yōkamisma. Akka fetsafāfe mā Corinto anoafāfe eōnoa yoimisfo iskakafakī: “Akka mā nō tāpia Pablo mato afaa yōkamisma. Askafīxō mato pāraxō mato kori fīamis, Judea anoafō ē ato foxotanōra,” ixō. ¹⁷ ŹNā feronāfakefo ē matoki nīchinioxō ē mato pāramē ē mato kori fīaxiki? Maa. ¹⁸ Ē Tito yoini iskakafakī: “Corinto ano katāfe,” ixō ē yoini. Nā nōko Ifo chanīmara faa fetsafori ē matoki nīchini. Akka, ŹTitopa mato pāramē mato afara fīaxiki? Maa. Mē tāpia Titopakai mato afaa fīapaimisma. Nā ē mato fe imis keskai ari mato fe imis. Noko rafeta nō mato yoimis. Nāskara fisti nō mato afara shara faxopai noko rafe nō mato fe imis.

¹⁹ Mā shināiraka ē mato yoi ai keskara mā eōnoa shināsharanō. Maa. Anorikaima. Epa Niospa nā ē yoi ai keskara ea nikamis Cristo ea shināmanaino. Efe yora mīshtichi, nā ē mato yoi ai keskafakī ē mato shara fapai Jesús shināi keskafakī māri mā shināsharanō. ²⁰ Akka ē tāpiama, Ōitsai, ē ari nokoxō ōia a ē yoi ai keskai mā isharayamakē ē mato fichikai. Askatari ē matoki nokoaino Ōitsai, mā ekeki inimaia rakikīa nā mā shināi keskai. Akka ē matoki nokoxō ōipai mā mā chaka xatexō mā Jesús Ifofasharaino. Akka ē matoki nokoxō ōia mā chaka xateyamano ē shināmitsatiro. Mā fochishpanā faatanāta, fētsa fiati mārifi mā fīpaita, fetsa mekafata, ōitifishkita, mares fisti mā fīpaita, mā chanīta, fetsafo mekafata, nō tsoa keskarama ita, isharayamata, mā askaito ē mato ōipaima. ²¹ Nāskatari ē shināchakakōi, shināyanā ōitsai Niospa atoōxō ea rāfimaniraka ixō ē shināi mā isharayamaino. Mā askaino ē matoki nokoax ē rāfikōixii mā afara chakafaino. Akka ranāri mā isharapaonima. Māto āfima fe mā oxapaoni. Askatari kērofori āto fenema fe oxapaonifo. Nāskatari afara chakafō fetsa fetsatapafo mā apaoni. Akka mā xateyamaino ē nokoax ē mato ōi ē shināmitsakōixii, rāfikōiyanā.

13

Pablo iskakafakī ato yoini: “Anā afaa chakafayamakāfe,” ixō ato yoini

¹ Mē mato ōikī rafe faa. Iskaratīari anā ē mato ōikaikai. Ē anā mato ōikaikai mā māto chaka mā xateamākī. Akka kirika ano Epa Niospa meka kenenifo iskakafakī: “Fētsa afara chakafaito ōixō yōfaito, ‘Nato afara chakafaa,’ ixō rafeta yoi aifono, askayamakī trespa yoiaino askayamakī ranāfai yoi aifono chanīmara nō fatiro,” ixō kirika ano Niospa meka kenenifo. Nāskafakīri ē mato ano nokoxō ē nikai mā afara chakafaito mā afara chaka xateyamaito. Akka ē mato ōitiro mā chaka ikamāki, askayamai shara mā ikamāki. ² Akka anā ē mato ano kayoxō mē mato yoiyoni mā afara chakafanōma. “Mā afara chakafakī xateyamaino ē mato omiskōimaxii,” ixō ē mato yoiyoni. Anā iskaratīari chai ixō ē mato yoi kirika kenexō iskakafakī: “Ē anā kaxō ē mato ōikai mā mā chaka xateamāki. Akka mā chaka xateyamaito ē mato

omiskōimaxii. Akka tsoa pishtakai ē finōmaxima.” ³ Akka mā tāpapai Cristo eōxō mato yoiaino. Chanīma, mā samama tāpinō xafakīakōi ē mato ōimani. Akka ēakai ē mato yoima, Cristoōxō ē mato yoi. Jesucristo mitsisipakōikai mato tāpimani māto chaka mā xatenō. ⁴ Chanīma, Jesucristo nokoōxō ifi cruz ikakī mastaifono nā feronāfake pachikōi keskara ini. Nokoōnoax nai āakai ifimenima. Nāskafinixakī iskaratīa Niospa sharaōnoax nia. Nāskarīfai nōri mitsisipama. Nāskafixō Jesús feta nā Niospa apaiyai keskara nō atiro Epa Niospa sharaōxō.

⁵ Akka māto shinā mēraxō shināsharakāfe chanīmamākī mā mā Jesús Ifofasharamākī. Māa tāpimesharakāfe. Akka, ūmā mā tāpiamē Jesucristo mato fe ikano? Askayamai mā mā chanīmis rakikīa nō Jesús Ifofaira ifiaxō mā Ifofaama. ⁶ Akka mā mā ea ōikī tāpia ē Jesucristoōxō yonosharakōimiskē mato mēraxō. Nā mā chanīmara fakōipainō. ⁷ Ē mato Epa Nios kīfixomis mā afaa chakafanōma. Nokoōnoa shinānōfo ixokai ē Epa Nios kīfimisma. Iskafakī fetsafāfe nokoōnoa shinākani rakikīa: “Pablo fe rafeafāfe ato yonoxosharafoma,” ixō nokoōnoa yoikani rakikīa. Akka noko askafafiaifono mā Jesús Ifosharakōifai nāskara nō fichipai. ⁸ Akka Niospa meka shara fistiōnoa nō yoitiro. Aōnoakai meka chaka nō yoitiro mā āfe mekamāi sharakōikē. ⁹ Akka fetsafāfe nō afama noko askafakī shināfiaifono nō shināchakaima. Akka mā Jesúsnoax isharakōikē nō fāsi inimakōitiro. Akka nō mato Epa Nios kīfixona mā a keskara sharakōi inō. ¹⁰ Akka ē mato kirika kenexona mato ari kayoxoma mā ea nikanō. Mē mato ari nokoxō ōia mā Cristo Ifo sharakōifaino ē mato ōitoshinō. Nāskakē mā isharakōiaino Niosxō fāsi mekakai ē mato yoima mā isharakōinō. Epa Niospa ea yoia ē mato yoisharanō mā Nios Ifo sharakōifanō isharakōixō.

Mā Pablo āfe meka xatekī ato yoisharani

¹¹ Mē mekai xatekī ē mato yoisharai. Jesús keskara isharakāfe. Ea nikasharakāfe. Nānori fisti shinākāfe. Isharakāfe. Mā askaino Niospa mato noikōikī mato inimamasharai āfe Yōshi Sharaōxō mato fe ixō. ¹² Keyokōi nā mā Nios Ifofaa tii yoinōnāsharakāfe. ¹³ Keyokōi nōko Ifo Jesús chanīmara faafāfe nā efe ikafāfe mato yoisharapaikani.

¹⁴ Nōko Ifo Jesucristo mato axosharapai. Epa Niospari mato noikōi. Niospa Yōshi Shara mato fe rafepakexanō. Nā tii.

Ēkīa Pablo

Pablo Galacia Anoafo Kirika Kenexõ Fomani

Galacia anoxõ Nios Ifofaafõ Pabla ato kirika kenexõ fomani

¹ Ëkĩa Pabla, ã mato kirika kenexõ fomai. Niospa ea nĩchini aõnoa meka shara ã ato yoinõ. Yorafãfe ea nĩchinifoma, Jesucristo feta Epa Niospa ea nĩchini. Nã Niospa Jesucristo otofani mã nakẽ.

² Mã Galacia anoxõ Nios Ifofakẽ, na nono efe ikafãfe, akairi Nios Ifofakaxõ efeta mato kirika kenexõ fomakani. ³ Epa Niospa nõko Ifo Jesucristo feta mato noikĩ mato sharakõi fanõ. Askatari mãto õiti mẽranoax mã anã fekaxtenõma. ⁴ Nõ afara chakafamisno nokoõnoax Jesús nani nõko chaka noko soaxoxiki, askatari nã yorafo chakafo mẽranoa noko ifixiki Epa Niospa fichipaiyai keskafakĩ. ⁵ Nãskakẽ Nios sharakõi mẽxotaima fapanakafo. Nãskapakexapainõ.

Anã ano meka fetsama a nikax Epa Nios fe nõ ipaxanõ. Akka Epa Nios fistichi noko nimapakenaka

⁶ Ooa. Epa Nios potakanimara ixõ ã shinãmis, koshikõi kachikiri fayana mã potafaiino, Cristo mato noiaino Epa Niospa mato katofinino. Epa Nios fe ipaikakĩ ãfe meka shara nikafiyana, meka fetsa fetsatapafo nikakakĩ kachikiri famisfo. ⁷ Akka anã anokai meka fetsama, a nikax Nios fe nõ ipaxatiro. Akka nã Nios Ifofaafãfema mato fekaxtefakani. Meka fetsafaxõ anorima mato yoipaikani, Cristoõnoa meka shara mã nikapaifiaito a nikax afe ipaxakĩ. ⁸ Akka fetsafãfe Nios fe mã ipaxanõ Niospa mekaõnoa mato yoifikakĩ, meka fetsafaxõ anorima mato yoikani, mã nõ mato yoifimisno. Nã keskara yorafo nã omiskõipakenakafo mẽranoax omiskõipakenakafo, ã iyamai Niospa ajiri itiro nai mẽranoax oax. ⁹ Nã ã taefakĩ mato yoiyoni keskafakĩ, iskaratĩa anã ã mato yoi. Fetsafãfe Nios fe mã ipaxanõ Niospa mekaõnoa mato yoifikakĩ anorima mato yoikani, mã nõ mato yoifimisno. Nãnori mato yoikanax nã omiskõipakenakafo mẽranoax omiskõipakenakafo.

¹⁰ Ë yoiki iskafaino, yorafãfe eõnoa yoisharanõfora ixõ ã shinãima, askataroko Niospa eõnoa yoisharanõ. Ëkai yorafo eõnoa shinãmasharapaima. Akka yorafo eõnoa shinãmasharapai, ãkai Cristo yonoxomis itiroma.

Jesucristo ea nĩchini ãfe meka sharaõnoa ã ato yoinõ

¹¹ Efe yora mĩshtichi, xafakĩakõi ã mato yoipai. Na meka shara Jesucristoõnoa ã mato yoimis nõ afe ipaxanõ. Na keskarakai yorafãfe ãto shinã mã shinãmisfoma. ¹² Na meka shara ã mato yoimis keskara yorafãfe ea tãpimanifoma. Tsõarikai ea tãpimanama. Askataroko nõko Ifo Jesucristo ea tãpimana keskara ã mato yoimis.

¹³ A ã ipaoni keskara mã mã nikapaoni. Ëmãĩ judeoxõ a nõko xinifãfe yoipaoni keskara ã nikayopaoni. Mã mã tãpia mitsisipakõikai a Nios Ifofaafõ ã ato omiskõimapaoni, anã Nios Ifofayamanõfora ixõ. ¹⁴ Nõko xinifo judeofãfe yoipaonifo keskara ã nikakõini, ãfe kaifofo ã ato finõkõini, efe yosifinifono. Ë nikakõikĩ a ãfe xinifãfe yoipaonifo keskara ã nikakõ finakõini.

¹⁵ Akka taefakĩ Epa Niospa ea katoni ã fakeyoamano. Ea noikõikĩ ea katoni. Nãskakẽ ea tãpimapaikĩ ea askafani. ¹⁶ Nãskaxõ ãfe Fake ea tãpimani ãfe meka shara a judeofoma ã ato yoinõ afe ipaxanõfo. Nãskakẽ ã rama Jesús Ifofakĩ ã tsoa yõkakai kanima ea tãpimanõ. ¹⁷ Nãskakẽ Jerusalén ano ã kayonima a

taefakī Jesúsnoa meka sharaõnoa yoimisfo ato õikai. Askatamaroko Arabia mai ano ē kani. Nāskata Damasco ano anā ē oni.

¹⁸Nāskata Jerusalén ari fena ē kayonima, mā xinia tres akax ē kani. Nānoxõ ē Pedro tāpini, nāno ē afe oxa ranāyoni quince nia ē ini ano oxai. ¹⁹Akka nā Jesús fe rafemisfo fetsafori ē õinima. Nõko Ifāfe āfe exto Santiago fisti ē õini. ²⁰Niospa ferotaifi ē mato yoikõ, na ē mato kirika kenexokī chanīmakõ ē mato yoi.

²¹Nāskata chipo Siria yafi Cilicia mai ano ē kani. ²²Akka Judea mai anoxõ Cristo Ifofafiakaxõ ea tāpiayonifoma. ²³Ea õiyamāfikatsaxakā ēõnoa iskafakī yoiāifāfe nikapaonifo: “A na feronāfāke taefakī noko omiskõimapaofinixaki, iskaratīa Jesúsnoa meka shara ato yoifofāsafai. Askatari noko keyokõ omiskõimakī noko xatempaipaoni nõ anā Jesús nikanõma,” ixõ ēõnoa yoinifo. ²⁴Nāskaxõ eõxõ Epa Nios aicho fakani, mā Pablo Nios Ifofara ikaxõ.

2

“Na Pablori noko ani keskafakī Jesús katoa aõnoa āfe meka shara ato yoinõ,” fanifo

¹Mā catorce xinia finõta Jerusalén ano anā ē kani Bernabé fe. Titori ē iyoni. ²Ē ari kani Niospamāi ea yoiano. Nā Jerusalén anoxõ xanifofo fes ichanāxõ ē ato yoini a judeofoma Niospa meka sharaõnoa afe ipaxanõfo ē ato yoimis keskara. Nāskakē ē ato yoini: “A ē ato yoimis keskara sharamamākī, mī shara yoimiski ea fakanimākai,” ixõ ē ato yoini. ³Nāskakē tsõakai Tito afaa fanima efe oiano. Tito judeoyamafiano foshki repa xatefe tsõa fanima. ⁴Nānoa fetsafo nõ Nios Ifofara ikanax one ikikanax nofe ichanānifo, Nios Ifofayamafiakanax. Nāfāfe yoinifo iskafaki: “Titopari foshki repa xatetiro,” ixõ yoinifo. Nāfāfe noko õipaikani ikiafo ini, chanīmamākī tāpipaikakī afeskax Cristo Jesús Ifofaax nõ ikamākī. Noko anā yonomapaikani nõ Jesucristo Ifofanõma a Moisés yoini keskara fisti nikanõfora ixõ noko anā yonomapaikani. ⁵Akka nāfāfe noko yoipaiyaifono nõ ato nikamisma. Akka nõ fichipaimis nā meka shara chanīmakõ Jesucristoõnoa mā nikakõinõ afe ipaxaki.

⁶Akka a xanīfofōfāfe ē ato fe ichanāino, “Nā mī ato yoiāi anori sharamaki, meka fetsa shara ato yoife,” ea tsõa fanima. Akka afo xanīfofōfiano ē atoõnoa shināchakaima. Nāskarifiakī Niospa nõko femānāõxõ noko onāima, akka Niospa noko tāpikõia. ⁷Meka fetsa shara ea yoitamarako, afāfe tāpinifo a Niospa āfe meka ea yoini keskara a judeofoma āfe meka sharaõnoa ē ato yoinõ afe ipaxanõfo. A Pedro yoini keskafakī judeofo na meka sharaõnoa ē ato yoinõ. ⁸Nā Nios fistichi Pedro nīchini judeofo mēra āfe meka sharaõnoa ato yoinõ. Nāatori ea nīchini a judeofoma mēra ēri a judeofoma āfe meka sharaõnoa ē ato yoinõ.

⁹Nāskakē Santiago ikaino Pedro ikaino Juan ikaino, afāfe a Nios Ifofaafõ ato ikikaxõ ea tāpinifo Niospa ea nīchinino nā meka sharaõnoa a judeofoma ē ato yoinõ. Nāskakaxõ ea yafi Bernabé noko metakaxanifo. Noko askafakāta nokoki inimakakī noko yoikī iskafanifo: “Aicho, judeofoma mēra kaxõ Niosnoa meka shara mā ato yoitiro,” noko fanifo, judeofoma mēra kaxõ Niospa meka sharaõnoa nõ ato yoikanõ, akka afāfemāi nā judeofo Niospa meka sharaõnoa ato yoikakī. ¹⁰Akka noko yoikī iskafanifo: “A afaamaisfo ato shināmakiyamakāfe. Afarayaxõ ato inākāfe,” ixõ noko yoinifo. Askara yoikī ea inimamanifo ērimāi a afaamaisfo ē ato ināsharamiskē.

“Na mī akai keskara sharama,” Pablo Pedro fani Antioquia anoxõ

¹¹ Akka Pedro Antioquia pexe rasi ano kaxõ afara chakafaino ãfe ferotaifi ã yoiikĩ iskafani: “Na mĩ akai keskara sharama, mĩ chakafai,” ixõ ã yoini. ¹² Akka taeyoi a judeofoma feta pipaonifo. Nãskaifono chipo a Santiago fe rafeafo fenifo. Mã feafono judeofoma makinoax Pedro paxkani anã ato feta pinima a rama feafoki atoki mesekĩ mĩ chakafai na judeofoma feta mĩ pii ea fatirofora ixõ. Nãskakẽ anã a judeofoma feta pinima. Akka a judeofo rama feafãfe ato yoiikĩ iskafanifo: “Mã Nios ari kapaiikĩ mãto foshki repa mã xatetiro,” ixõ mẽxotaima ato yoinifo. ¹³ Nãskakẽ a judeofori Nios Ifofakanax nã Pedro ikai keskanifo. Nã Bernabéri ato fe askani. ¹⁴ Akka nõko xinifãfe Niospa meka sharaõnoa noko yoinifo nõ afe ipaxanõ anori Pedro nikayamaito õikĩ yorafãfe ferotaifi ã Pedro yoiikĩ iskafani: “Mĩ judeo. Akka a judeofoma fe mĩ imis, nãskax judeoma keskara mĩ imis. Akka, ¿afeskakĩ a nõko xinifãfe yoipaonifo keskara a judeofoma mĩ ato yoipaimẽ, judeofo keskara ixõ?” ã Pedro fani.

Judeofo a judeofoma feta Nios Ifofakanax Nios fe ipaxatirofo

¹⁵ Akka nõ judeokõifo nõ sharakõifo nõ afaa chakafakĩ finakõimisma na yora fetsafãfe amisfo keskafakĩ. ¹⁶ Askatamaroko mã nõ tãpia a Moisés noko yoini keskaraõxõ nõko chaka nõ soatiroma Niospa noko omiskõimanõma. Akka nõ Jesucristo Ifofaito nõko chaka noko soaxotiro, nõ askainokai noko omiskõimaxima. A Moisés yoini keskara nõ shinãito nõko chaka noko soaxotiroma. Akka Jesucristo fisti nõ Ifofaito noko omiskõimaxima.

¹⁷ Nõfi Cristoõxõ nõko chaka nõ soatiroki noko omiskõimanõma. Nãskara mã nõ tãpifixõ nõ afara chakafamis. Akka nõ afara chakafaito, ¿Cristo noko afara chakafamapaimẽ? Maa, askarama. Noko afaa chakafamatiroma. ¹⁸ A Moisés noko yoini keskara mã nõ tãpia, aõnoaxkai Nios fe nõ nipaxatiroma. Jesús fistiche nõko chaka noko soaxotiro nõ afe nipaxanõ. Nã nõ chanĩmara fai. Akka a Moisés keneni keskara afianã nõ nikapai nõ fenotiro Nios fe nõ ipaxatiroma. ¹⁹ Akka a Moisés yoini keskara ayamakĩ mẽ tãpia ãkai aõnoax ishariatiro. Ë askaino Epa Nios ekeki inimatiroma. Nãskakẽ nãfoõxõ mẽ tãpia Cristo fisti ã chanĩmara faino Epa Nios ekeki inimatiro. Nãskax ã afe yora itiro. Akka iskaratĩ a Moisés yoini keskaraõnoa anã ã shinãpaknakama, atokai ea ãkipakexatiroma. Askara shinãtamaroko Nios fisti fe ã rafei afe ishaxaxiki. ²⁰ Nõko Ifo Cristo ifi cruz ikaki mastaifono nani keskai ãri ã afe naa keskarakõi ini. Nãskakẽ iskaratĩ a ã ipaoni keskara anã ã ikima. A ã Jesús Ifofayamax ã ipaoni keskara anã ã shinãima. Niospa Fake Cristo ea noikõi nã ipaiyai keskakĩ ea nãxonni. Nãskakẽ ã chanĩmara faino iskaratĩa Cristo efe ika a keskara shara ea imaxiki. ²¹ Akka Epa Niospa ãfe Fakeõxõ ãfe chaka ea soaxoni ã afe nipaxanõ. Ëkai afaa fetsa shinãmisma nisharapakexakĩ, Nios fisti ã shinãkõimis Nios fe nipaikĩ. A Moisés kenenioxõ nõko chaka nõ xateax Nios fe nõ nipaxafiatirono Cristo noko nãxokeranima. Æakõi Cristo noko nãxokerani.

3

A Moisés yoini keskara nõ nikayamakĩ nõ Jesús chanĩmara fakõinaito nõko chaka noko soaxotiro

¹ Efe yora mishtichi Galacia anoafãfe, mãfi oa yõra shinãsharaima keskarafoki. Akka, ¿tsõa mato paraimẽ oa mato parakani afianã mã shinãsharanõma? Akka nõ xafakĩakõi mato yoimis Jesucristo ifi cruz ikaki mastafono matoõnoax nani. Nõ mato yoisharafimisno meka fetsa

nikakī mā anorima shināmis. ² Akka ē mato yōkapai mā ea yoinō a Moisés noko yoini keskara tāpioxō mā Niospa Yōshi Shara fiamāki, askayamaki Jesucristoōnoa meka shara nikaxō mā fiamāki. ³ Niospa Yōshi Sharaōxō Jesús mato amapaiyai keskara mā ayopaoni. Akka iskaratīa mā shinākī iskafai: “A Moisés noko yoini keskara nikax nō isharatiro,” ixō mā shināmis. Ooa. ¿Afesakī oa yorafāfe shināsharaifoma keskara mā shināimē? ⁴ Mā Jesús Ifofaino mato omiskōimapaonifo, askafikī Niospa Yōshi Sharaōxō mā Jesús Ifofasharamis. Akka afianā mā Jesús Ifofayamai mākōi kaxpa mā Jesúsnoax omiskōipaoni. Mā askayamapainō. ⁵ A mā nikamis keskara mā mā chanīmara fakōina. Nāskakē āfe Yōshi Shara mato mēra naneyanā, tsōa atiroma keskafakī afama mīshti mato faxōfa. Moisés kenenioxokai mato askafaxōama.

⁶ Shinākapo. Abraham Nios chanīmara faito Niospa yoiyoni iskafakī: “Mī ea chanīmara faito mī chaka ē mia soaxoni mī efe ipaxanō,” ixō yoini. ⁷ Nāskakē tāpisharakāfe nā Abraham āfe fenafāfe nā Nios chanīmara faifāfe, nāfāfe chanīmara fakōinafoki. ⁸ Epa Niospa a inōpokoai keskaraōnoa tāpiyoni a nōko kaifofofāfemari Ifofaifono āto chaka ato soaxota ato imasharaxixakī. Askaifono atoki inimakōini, akka Niospa Abraham yoiyoni iskafakī: “Ē mīōxō keyokōi nā maifo tii anoafō ē ato sharafaxii,” ixō Niospa yoinino kenenifo. ⁹ Nāskakē Abraham chanīmara fani keskafakī, akairi chanīmara faifono Epa Niospa ato sharafaxōi, Abraham sharafaxoni keskafakī.

¹⁰ Akka fētsa shinākī iskafai: “Moisés yoini keskara ē nikai ē isharakōi,” ixō shināi afi āfe chaka aō nepakenaka. Akka kirika kenekī yoikī iskafanifo: “Moisés yoikī kirika kenekī iskafakī yoinino: ‘A Moisés yoini keskara nikayamaki āto chaka āto nepakenaka,’ ” ixō yoinifo. ¹¹ Akka fētsa Epa Nios chanīmara faino āfe chaka soaxota imasharakōitiro. Akka fētsa a Moisés yoinioxō āfe chaka soapaikī iskafakī shinātiro: “Moisés noko yoini keskara nō nikaito Epa Niospa noko imasharatiro,” ixō shināfiafonokai Epa Niospa a Moisés yoini keskaraōxō ato imasharatiroma. ¹² Akka mā nō tāpia Jesús fisti nō chanīmara faax Epa Nios fe nō ipaxatiro. Akka a Moisés noko yoini keskaraōnoax nō askatiroma. Akka Moisés noko yoini iskafakī: “Nā Niospa noko yoini keskafakī mēxotaima nō nikayamax Nios fe nō ipaxatiroma,” ixō noko yoini.

¹³ Akka a Moisés noko yoini keskara: “Nō nikayamaito Epa Niospa noko omiskōimaxira,” ixō kenefinifono, noko omiskōimatama, āfe Fake omiskōimani. Niospa meka kenenifo iskafakī: “Fatora fetsa ifi cruz ikaki mastaifono, atori Epa Niospa omiskōimaxii akairi omiskōinōfo,” ixō kenenifo. Akka nō afara chakafamisno Cristo nokoōnoax ifi cruz ikakinoax nani. Noko nāxoyamanikē nō omiskōipakexakerana. ¹⁴ Akka Epa Niospa Abraham sharafani keskafakī, judeofori Jesucristoōxō ato sharafaxii. Nāskakē a chanīmara faifo tii ato yoiyoni keskafakī āfe Yōshi Shara atoya rafematiro. Akka Cristo nokoōnoax nani Apa Nios fe nō ipaxanō. Nāskatari Niospa Abraham yoiyoni keskafakī chanīmara faifono a judeofomari ato imasharaxii.

Niospa Abraham yoiyonino Moisésri ato yoini nikanōfo

¹⁵ Efe yora mīshtichi, iskaratīa nā nō amis keskaraōnoa ē mato yoi mā tāpinō. Feronāfaka mā āfe feronāfaka yoioyoxō anā shinākī fetsafatiroma māmāi āfe ane kenexō. ¹⁶ Nāskarifiakī Epa Niospa Abraham yoiyoni āfe fena fistiōnoa yoikī. Āfe fena Cristo fistiōnoa yoini. ¹⁷ Ē mato xafakīa yoinō Epa Niospa Abraham yoiyoni keskara cuatro cientos treinta xinia finōta Epa Niospa Moisés yoiniki. Niospa Moisés yoinino akka Abraham yoini keskara anā

fetsafatiroma. Nã yoyioni keskakõimis. Nãskaxõ Epa Niospa anã shinãkĩ fetsafanima, nã yoyioni keskara amiski. ¹⁸ Epa Niospa Abraham yoyioni keskara Abraham chanĩmara faito, chipo Epa Niospa Abraham noikĩ ãakõĩ axosharakõini.

¹⁹ Akka, ¿afeskai a Moisés yoini keskara sharamẽ? Ë mato yoinõ, ea nikakapo. Niospa yoiaino Moisés kenenĩ yorafãfe tãpinõfo afeskax isharatirofomãki, Niospa fichipaiyai keskai. Askatamaroko tosa askamisma, nikayospakõimisfo. Nãskakẽ Epa Niospa ãfe ãjirifo yoini afãferi Moisés yoinõfo Moisésri yorafo yoinõ yorafãfe nikakõinõfo Abraham ãfe fena Cristo oyoamano. ²⁰ Akka Epa Niospa Abraham anori yoinima. ãfe ãjiriõxõ yoyiamata, yorafoõxori yoinima. Epa Niospa ãakõĩ yoipaiyai keskafakĩ Abraham yoini.

¿Afeskakĩ Epa Niospa Moisésxõ ato yoinimẽ?

²¹ Akka, ¿Epa Niospa a inõpokoaifo yoyioni keskara yafi a Moisés yoini keskarakõiri mã shinãimamẽ? Maa. Epa Niospa mekakai rafema. A Moisés yoini keskaraõxõ noko nimapakexatirokẽ Epa Niospa nãfoxõ nõko chaka noko soaxokerana nõ a keskara shara inõ. ²² Akka Niospa meka yoikĩ kirikaki kenekĩ iskafanifo: “Keyokõichi nõ afara chakafakatsaxakĩ nã nõ karaxa mẽra ika keskarakõĩ,” ixõ kenenifo. “Akka Jesucristo nõ chanĩmara faito ares fisti noko kãimatiro afara chaka nõko ifo inõma.” Nãskarakõĩ yoiki kenenifo.

²³ Nãskakẽ nõ chanĩmara fayopaonima. Akka Cristo oyoamano a Moisés noko yoini keskaraõnoax oa karaxa mẽra ika keskarafõ nõ iyopaoni. Akka mã Cristo oano nõ chanĩmara faino noko kaimanano anãkai oa karaxa mẽra ika keskara nõ itiroma. ²⁴ Nãskakẽ nõ tãpitiro Epa Niospa apaiyai keskafakĩ Moisés noko yoini. Nãskakẽ nõko ifo keskara iyopaoni. Akka Cristo oaino nõ chanĩmara faino nõko chaka noko soaxota noko imasharaxiki. ²⁵ Nõ askafipaonixakĩ mã Cristokõĩ nokoano a Moisés yoini keskara afianã nõko ifo itiroma anãkai aato noko ikitiroma.

²⁶ Akka mã chanĩmara faax Niospa fakekõifo mã iki mãmãi Cristo Jesús Ifokõĩ faxõ. ²⁷ Keyokõĩ mãfi mã mã Cristo fe rafekõiakĩ mã maotissimeax keskarax Niospa Yõshi Shara mato mẽra naneano. Nãskax oa rapati fena shara safea keskarakõĩ mã. ²⁸ Epa Niospa Cristoõxõ keyokõĩ nã maifo tii anoafõ keyokõĩ nãskarafos noko õi. Judeofoya a judeofoma, a ato yonomatifo a yonomatifoma, feronãfakefoya kẽrofo, nãskarafos noko õi. Jesucristo nõko Ifo ikano aõnoax yora fisti keskara nõ itiro. Akka keyokõichi nõ Ifofaax nõ afe yorafo. ²⁹ Akka mã Cristo afe yorax Abraham ãfe fenafori mã iki. Nãskakẽ nã keyokõĩ Epa Niospa Abraham yoyioni keskara mãtonãri iki.

4

¹⁻² Akka ã mato iskara yoipai. Apa naano ãfe fãke ãfe apanãfo fitiro. Nãskakẽ nã fake yomekẽ, fetsafãfe ãfe afama mĩshtifo kexesharaxoyokaxõ, nã fake yome yonomayotirofo. Nãskakẽ ãpa yoini keskafakĩ ãa yosiyonõ, yora fetsafãfe ãfe afama mĩshti kexexoyotirofo. ³ Nãskarifiakĩ nõ Cristo Ifofayoamano nõ oa fake yome keskarakẽ nõko xinifãfe noko yoipaiyai keskafakĩ noko yoipaonifo. Nãskakẽ ato yonoxomis keskara nõ iyopaoni. Nã Cristo chanĩmara faafãfema amisfo keskara noko amapaonifo nõ ato yonoxomis keskara inõ. ⁴ Akka Epa Niospa nã yoinitĩa, ãfe Fake nĩchini, kẽromã xakĩ mẽranoax kãini judeokõĩ nã Moisés noko yoini keskara nikakõipaoni. ⁵ Akka

nono mai ano oni, noko imasharaxii a Moisés yoini keskara nikapaimisfono, nāskax Niospa fakekōi keskara nō inō.

⁶ Chanīma, māfi iskaratīa Niospa fakefoki. Nāskakē Epa Niospa āfe Yōshi Shara nō mēra naneano aōxō nō yoitiro iskafakī: “Epa Niosi, mīfi ēfe Epakōi,” ixō nō yoitiro. ⁷ Nāskakē iskaratīa mā Niospa fakefo, a Moisés yoini keskara nō anī nikaima nōko ifo inō. Nāskakē afe fakefo afara ināsharai keskafakī motori afara ināsharaxii Jesucristoōxō.

Pablo a Jesús Ifofaafō ato shinākōini

⁸ Akka taeyoi mā Nios tāpiyoamax nā nioskōimafo mā ato nikaito mato yonomayopaonifo. ⁹ Mā mā askapaonixakī, akka iskaratīa mā mā Nios tāpikōia. Epa Niospari mato tāpikōia. Mā mā Nios tāpikōifiax, ŷafeskakī a mā apaoni keskafakī afianā mā ato yonoxopaimē? Afāfekai Epa Nios xanīfo ika ari mato iyotirofoma. ¹⁰ Nā māto xinifāfe yoinifo keskai mā askakōimis. Nāskakē pena safaronō mā tenemis, askatari rama oxē kāiyaino mā fista amis, askatari rama xiniaino mā fista amis, askatari seis xinia finōmata mātō tare mā fanamisma. Mā shinākī iskafamis: “Nā fistatīa nō ato fe inimaino Epa Nios nokoki inimatiro, nāskaxō nōko chaka noko soaxotiro,” ixō mā anorima shināmis. ¹¹ Ē mato shinākōimis ē mato yonoxopaoni. Ē mato Jesúsnoa yoikī kaxpa ē mato yoipaoni rakikīa mā shināyamafaino.

¹² Efe yora mīstichi, ē mato yoisharapai ē akai keskafakī anā mā Jesús Ifofanō. Mā Jesús Ifofai keskafakī ēri Ifofaaki. Ē mato fe ikano mā ea chakafapaonima, askatamaroko mā ea sharafapaoni. ¹³ Akka mā mā tāpia Epa Niospa ea nētefani taefakī Niospa meka sharaōnoa ē mato yoinō nō afe ipaxanō. Akka ē isinī iki ē anā katiroma ini. Nāskakē ē mato ano nēteni. ¹⁴ Ē isinī iki ē omiskōifaino mā ea iskafanima: “Pablo isinī iki mesekōi nō afe ichanātiroma,” mā ea fanima. Askatamaroko mā ea ifisharakōini oa Niospa āfe ājiri keskara ōikī, askatari oa Jesucristo keskara ea ōikī mā ea ifisharakōini, askatari mā ea kexesharakōipaoni. ¹⁵ Ē mato yoiaino mā inimapaoni. Akka, ŷafeskai iskaratīa a mā ipaoni keskai anā mā inimaimamē? ŷMā shināimamē a mā ea noikōipaoni keskara? Ē afara yopaito mā ea ināpaoni ea noikōiyanā. Akka māto ferori tsekatiro pinikē mā ea inākerapaoni. ¹⁶ Akka, ŷmā shināimē na meka chanīmakōi yoikī ē mato noikaspai keskara?

¹⁷ A Moisés yoikī keneni keskara yora fetsafāfe mato tāpimapaikani. Nāfāfe a shināifo keskara mato tāpimapaikani mā ato keskara inō. Akka a akaifo keskara mā ea feta aka a keskarakai sharama. Nāskaxō nāfāfe noko paxkanā fapaikani afianā mā ea nikatama afāfe mato yoiaifo keskara mā ato nikanō.

¹⁸ Akka fetsafāfe mato sharafaifono shara itiro. Ē mato fe iyamafiano mato sharafaifono, nāskarari sharakōi itiro. Jesucristoōxō mato sharafaifonori sharakōi itiro. ¹⁹ Ēfe fakefāfe, afianā ē matoōnoax omiskōikī ē pae meekōi. Nā kēromā fake kāikī pae meetiro keskarakōi ē mei. Akka mā fake kāixō anā pae meetiroma. Nāskarifiakī mā Jesús Ifofayaino ē matoōxō pae meekōitiro. Akka Cristo āfe Yōshi Shara māto ōiti mēra naneano afianā ē matoōxō pae meetiroma. ²⁰ Ooa. Iskaratīa ē ano mato fe ipainō afianā ē mato yoisharaxiki. Akka ē tāpiama a mā shināi keskara mā anorima shināi. Akka ē ano mato fe ixō ē mato yoisharakōikerana.

Agar fe Sara ipaonifo keskaraōnoa noko yoi

²¹ Niospa shināmanaino a Moisés kirika keneni keskaraōnoa mā anā nika-paimākai Nios Ifofakaspakī ea yoikapō ē mato yoinō. Akka, ŷa Moisés yoini

keskara mā nikamismamē? ²² Iskafakī yoikī kenenifo: “Abraham fake rafeya ini. Fetsa āfe āfinī yonomati feta fake ani, fetsa āfe āfikōi feta ani. Nā āfe āfikōi tsōa yonomati inima,” ixō keneni. ²³ Nā Abraham āfe āfinī yonomatinī fake fini, nā kērofāfe fake fimisfo keskarari fake fini. Akka Abraham āfe āfikōi yōxafokōi ini fake fitiroma. Nāskafekē Epa Niospa Abraham yoiyoni iskafakī: “Mī āfinī fake feronāfake fixii,” ixō yoinino, nāskakē Abraham āfinī fake feronāfake fini. ²⁴⁻²⁵ Nā xotofake rafeoxō Niospa afara fetsa noko shināmani. Niospa yoiyoni afeska faxō yorafo ifitiromākī. Nā kēro Agar nō shināino machi Sinai noko shināmani, Arabia anoa. Nā machi āfe ane fetsa Agar. Nā machi arixō Niospa Moisés yoini Moisésri nā israelifo ato yoinō nikakōinōfo. Askatari nā kēro Agar nō shināino noko Jerusalén shināmatiro. Nā Jerusalén ano ikafo nō shināino nā Agar āfe fakefo noko shināmatiro. Nāfāfe Moisés yoini keskara nikakanax nāfo āto yonomati keskarrafo. ²⁶ Akka nāno kēro fetsa Abraham āfe āfikōi. Āfe ane Sara, nā nōko efakōi keskara. Nō Sara shināino Jerusalén fetsa nai mēranoa noko shināmatiro Epa Nios ika aria. Nāskakē chipo nō ari ixii. Nōri Sara keskara nō āto yonomatima, āfe fakefori āto yonomatifoma. A Moisés yoini keskarakai nōko ifo itiro. ²⁷ Akka kirika kenekī iskafanifo:

Kēromā, mī fake fimismakī inimafe, askatari mī fakeyamakī inimayanā tai tai ife mī fake pae meemismaki. Akka nā kēro fenē eneyoa nāfi chipo āfe fena ichapayakōi ixii kiki, a kēro feneya finōmainīfofā, ixō yoikī kirika ano kenenifo.

²⁸ Efe yora mīshtichi, nōfi Isaaca keskaraki. Epa Niospa Abraham yoiyoni keskai āfe fake Isaaca chipo kāini. Nāskarifiakī Epa Niospa yoiyoni keskai nōri āfe fakefo. ²⁹ Nā āto yonomati Agar yōxafoxoma āfe fake fikī taefani āfe ane Ismael. Akka nā fake fimismato Sara chipo yōxafoxō fake fini Niospa Yōshi Sharaōxō. Nāskano Agar āfe fake Ismael iyoaxō āfe exto omiskōimapaoni. Nāskarifiakī Niospa Yōshi Sharaōnoax nō Niospa fake ikaino, fetsafāfe Nios Ifofakaxoma noko omiskōimatirofo. ³⁰ Akka kirika kenekī, *zafaa fanifomē?* Kenekī iskafanifo: “Mī fake Isaaca ē ināxiai keskara, akka nā mato yonomati Agar āfe fāke afaa fixiima. Nāskakē mato anoxō āfe fakeyafi ato nīchikāfe afianā mato fe inōfoma,” ixō Epa Niospa Abraham yoini. ³¹ Nāskakē ē mato yoi efe yora mīshtichi, nōkai a āto yonomatinī fake keskarafoma. Askatamaroko nōfi Abraham āfe āfikōichi fake keskarrafo. Nāskaxō nō Nios Ifofaax nō tsōa yonomati itiro, nō Niospa fakekōifo itiro.

5

Cristoōnoax isharakāfe a mā ipaoni keskara chaka anā shinākakima

¹ Akka Cristo nokoōnoax nani a Moisés yoini keskara nō anā nikanōma, nāskax anā āto yonomati nō inōma. Cristo fistiōnoax nō isharatiro, nāskakē Cristo kachikiri fayamakāfe. Mā ipaoni keskara anā iyamakāfe, nōko xinifāfe yoinifo keskara afianā nikayamakāfe āto yonomatifo ixikakīma.

² Ē mato yoinō, ea nikasharakapo. Iskafakī shināyamakāfe: “Ē foshki repa xatekema Epa Niospa ēfe chaka ea soaxotiroma,” ixō shināyamakāfe. Anori mā shināito Jesús mato chaka mato soaxotiroma Epa Nios fe mā ipaxanō. ³ Afianā xafakīakōi ē mato yoipai. Fatora fētsa mā foshki repa xatepai Nios fe ipaikī, anori shināfikī nā Moisés yoini keskara nikakōiamax, anorima shināx Nios fe mā nipaxatiroma. ⁴ Moisés yoini keskara fisti mā nikaito mato chaka mato soaxotiroma. Nāskax mā Cristo fe rafeima, akka

Epa Niospa mato noifiaino mā Cristo fe rafeima, akka Epa Niospa mato noifiaino mā Cristo kachikirifai. Nāskafekē mato afeska fatiroma mato chaka mato soaxona mā afe ipaxanō. ⁵ Akka Niospa Yōshi Sharaōxō mā nā tāpia, Cristoōxō nōko chaka noko soaxotiro Niospamāi noko noikōikī. Nāskakē nō manasharai. ⁶ Nō foshki repa xateano, askayamākī nō xateamano, afāfekai nōko chaka noko soaxotiroma. Akka nō Jesucristo Ifofakōinaino fetsafo noko ato noimasharakōitiro nō ato noisharakōinō. Nā fisti nō fichipai, chanīmara fasharakōixii.

⁷ Mā Jesús Ifofasharayopaoni. Akka, ŷtsōa mato yoiamē, na meka sharakōi kachikirifayanā mā anā nikanōma? ⁸ Akka Niospakai anori mato yoia. Āfe Fake fisti mā chanīmara fanō mato yoia. ⁹ Akka mato mēraxō yora fistichi chaka shinākī, nā fistichi keyokōi mato afara chaka shināmatiro, aōxō chakakōi mā shināno. ¹⁰ Ē Nios kīfiyanā nōko Ifo ē chanīmara fakōini, ē akai keskafakī māri chanīmara fanō. Akka nā mato fanīrira chaka shināmanaifo Niospa ato omiskōimaxii.

¹¹ Efe yora mīstichi, akka eōnoa yoikī mā iskafamis: “Na Pablo yoimis nō foshki repa xateamax nō Nios ari katiroma ixō yoimis,” mā ea famis. Maa, ēkai anori yoimisma, ē anori yoiaito ea omiskōimakeranafo. Akka ē yoimis: “Jesucristo ifi cruz ikaki mastafono noko nāxonī, nōko chaka noko soaxoxii Epa Nios fe nō ipaxanō,” ixō ē yoimis. Nānori ē yoiaito nikakī nā Jesúsnoa nikakaspamīsfāfe ea omiskōimamīsfō. ¹² Akka fetsafāfe mato yoimīsfō iskafakakī: “Mā foshki repa xatexoma mā Nios chanīmara faima,” ixō fanīrira mato shināmamīsfō. Nānori yoikakī mato fekaxtefamisfo, nāfo anā mato fe iyamapainōfo.

¹³ Efe yora mīstichi, Jesucristoōxō iskaratīa āfe meka fisti nikakōikāfe. Afaa fetsa mato yonomayamafaino chakafayamakāfe. Jesucristo mato imasharakī iskaratīa nā nō apaiyai keskara nō atiro iyamakāfe. Akka fetsafo fe axō faatanākāfe noinākōiyanā. ¹⁴ Akka Niospa Moisés yoini iskafakī: “Nā mā noimeai keskariakī fetsafori noisharakāfe,” ixō yoini. Mā askafakī nā Niospa Moisés yoini keskara, keyokōi mā aki. Mā askafakī keyokōi a Niospa Moisés yoini keskara mā aki. ¹⁵ Akka mā chakafaatanax mā keyotiro, oa paxta rafe keyonākanax retenātirofo keskaī. Nāskakē kexemesharakāfe askaxikakīma, a mato feta Nios nikamīsfō anā mato fe ichanātirofomakī. Askatari Nios kachikiri fatirofoki.

Nōko shinā mēraxō nō afara chakafapaimis keskara yafti a Niospa Yōshi Sharaōnoax nō isharatiro Pablo ato yoini

¹⁶ Akka ē mato yoi Niospa Yōshi Shara nikasharakāfe aōnoax isharaxikakī. Nāto mato yoitiro mā afeskaimākai. Nā nikakōixō afianā a mā apaoni keskara mato shinā mēraxō afara anā mā atiroma. ¹⁷ A nōko shinā mēraxō nō afara chakafapaiyai keskarakai Niospa Yōshi Sharapa shināima. Nāskaxō āfe Yōshi Sharapa noko amapaiyai keskara nōko shinā mēraxō nō shināfikī nōkai askafapaimisma. Nōko shinā mēraxō nō shināpaoni keskarakai Niospa Yōshi Sharapa anori shināmīsama. Akka nā nō apaiyai keskafakī nō atiroma. A nō afara chakafapaoni keskara nō anā ayamakī Niospa Yōshi Sharapa nōko shinā mēraxō noko yoiai keskara nō nikakōitiro. ¹⁸ Nāskakē Niospa Yōshi Shara nofe rafeaino a Moisés yoini keskara anā nōko ifo itiro noko yonomaxiki.

¹⁹ Fetsafāfe Nios nikakaspakakī afarafo chakafakani. Mā mā tāpia afe keskarafo ikafomākī. Nāskakē feronāfakēfāfe āto āfimafo chotamīsfō.

Nāskakata afara fetsa fetsatapafo chakafamisfo. ²⁰ Nāskakaxō afara yora fakaxō na nōko niosra ixō kīfimisfo. Askatari koshoiti tāpiafo, askatari ato noikasparamisfo, askatari isharakātama ōitifishkimisfo. Nāskakaxō atonā fisti afara apaimisfo, askatari noikaspa faatanāmisfo nores fisti nō tāpikōia a nō tāpia keskara tsōa tāpiana ikanax. ²¹ Nāskaxō fetsafo afara fiapaimisfo, askatari pāemisfo, askatari pikīfinapaikōimisfo. Nāskakaxō afara fetsa fetsatapafo chakafamisfo. Ē mato yoimis a keskara chakafo Epa Niospa keyokōi ato ĩkinā ano tsoa katiroma afe ipaxakakī.

²² Akka Niospa Yōshi Sharapa noko ĩkināno fetsafo nō noikōitiro inimakōiyanā, askatari nō isharakōita nō fekaxtetiroma, askatari fena fenakima nō manasharakōiyotiro, askatari nō fetsafo chakafamisma itiro, askatari nā nō yoimis keskara nō atiro isharakōita. ²³ Askatari isharakōita, fetsafo fe feratenātama oi tsifaxō ato yoimis ita, askatari a Niospa fichikaspai atama nōa nō kexemetiro afaa chakafaxikima. Nāskaxō Niospa āfe Yōshi Sharaōxō noko yoia keskara nō atiro isharaxiki. Nāskakē anā meka fetsa nō yoipaima Niospa Yōshi Sharaōnoax isharaxiki. Nāskakē anā noko tsōa yonomatiroma. ²⁴ Nā Cristo chanīmara faifo tii afe yorakōifo. Jesús cruznoax noko nāxoni nōko chaka noko soaxoxiki. Akka nō naa keskaraxō anā afaa nō chakafatiroma a nō apaoni keskara. Nāskakē nā noko Niospa amapaiyai keskara fisti nō atiro. ²⁵ Nāskakē Niospa Yōshi Shara fe nō rafekī nā noko yoiai keskara nō nikakōitiro. Nāskaxō nā noko amapaiyai keskara nō atiro.

²⁶ Nāskakē Niospa Yōshi Shara fe nō rafeax kakapaimis nō itiro, fetsafāfe nokoōnoa yoisharanōfora ixō ě mato finōkōiara iyamakāfe. Mā askakī fetsafo mā shināchakamatiroki. Mā askara chakafo shinākī mā shināsharatiroma, askara chakakōiki.

6

Mā ranā axosharanōnā faatanākāfe

¹ Efe yora mīshtichi, fētsa afara chakafaito ōikī, Niospa Yōshi Sharayaxō aō noikī oi tsii faxō yoisharakāfe, afara chakafakī xatenō. Meka mitsisipato yoyimakāfe. Nāskakē mārī kexemesharakāfe afara chakafayamaxiki. ² Nāskakē fetsafo fe afara axonōnā faatanāsharakāfe. Mā ranā Nios kīfinōnā faatanākāfe. Fetsa omiskōiatio aō noikī inimamakāfe, nāskakē kexenōnā faatanāsharakāfe. Fetsa omiskōiatio Nios kīfixokāfe Jesúsnoa shināmasharayanā Ifo sharafanō. Mā askakī nā Cristo yoini keskara keyokōi mā akikai.

³ Akka fētsa shinākī iskafai: “Ē sharakōi. Ēkai tsoa yopaima ea Nios kīfixonō,” ixō shināi. Nā keskara yorakai afama, āakōi pāramei. ⁴ Akka nō nōko shinā mēraxō nō shinātiro nō Jesús yonoxōsharaimākai. Akka nō yonoxōsharai mā nō tāpiax nō inimasharatiroma. Nāskakī nō shinākī iskafatiroma: “Na fetasafāfe afara chakafaifo keskafakī ě afaa chakafamisma,” ixō nō shinātiro. ⁵ Akka keyokōichi nō afara chakafamis. Nāskaxori keyokōichi nōko shinā mēraxō nō shinātiro a nō afara chakafamis keskara. Tsōakai a Niospa noko amapaiyai keskara noko amatiroma, nōakōi nō atiro.

⁶ A Niospa meka mato yoimisto afara yopaito ināsharakāfe.

⁷ Mārifi anofi pārameyamakāfe, tsoari Nioski kaxemetsamapaitiroma. Akka akiki kaxemetsamapaiyafono Niospa ato omiskōimatiroma. Akka afara nō fanaxō mā fimiano āfe fimi nō fitiro. Nāskarifiakī Niospa meka nikayamata nō afara chakafaax nō omiskōitiro. Akka nā Niospa noko yoia keskara nō akax nō isharakōitiro. ⁸ Akka fētsa āfe shinā mēraxō afara shinākī afara

chakafaax omiskõifinakõitiro. Akka Niospa Yõshi Sharapa amapaiyai keskara fetsa afafãini, nãfi Niospa Yõshi Sharaõnoax nisharapakenakaki. ⁹ Nãskakê afara sharafaki eneyamakãfe. Nãskaxõ iskafaki shinãyamakãfe: “Mê fetsafo sharafayomiski iskaratã ã anã askaimakai, ã anã fetsafo sharafatiromaki. Nãskanõ,” ixõ anori shinãyamakãfe. Akka nõ askatama nõ inimakõikê nõ noko inãpaiyai keskara shara Niospa noko inãsharaxii. ¹⁰ Nãskakê afeskaraifãfe õikî keyokõi ato axosharafafãikãfe. Nãskatari a Nios Ifofaafo ato noisharayanã ato axosharafafãikãfe.

Pablo mã mekai xatekî ato yoisharani

¹¹ Akka iskaratã êkõi mato kirika kenexoni. Êfe kene efapakõikî õikapo. ¹² Akka fetsafãfe mato yoipaikani iskafakakî: “Mãto foshki repa xatekãfe nõri askaraki,” ixõ mato yoimisfo. Akka mato yoipaikanima a Jesucristo ifi cruz ikakinoax noko nãxoni nõko chaka noko soaxoxiki. Askara mato yoimisfoma, askara nõ ato yoiaito noko omiskõimatirofora ikaxõ. ¹³ Nãfãfe mã foshki repa xatefikaxokai a Moisés keneni keskara tsõa nikakõimisma. Nãskakaxõ matori yoipaikani mãto foshki repari mã xatenõ. Mãri nã imisfo keskai mã ato fe askaito, nãfãfe fetsafo yoitirofo iskafakakî: “Nãfãfe noko nikakõimisfo,” ixõ ato yoitirofo. ¹⁴ Akka êkai anori shinãpaima, nã meka shara fistiõnoa ã yoipaifafãini. Nã meka shara fistiõnoa ã yoipaikî ã iskafai: “Aicho, Jesucristo ifi cruz ikakinoax ea nãxoni, aõxõ a ã chaka shinãpaoni keskara anã ã shinãtiroma. Jesús nã ea nãxofaitã nã ã afarafo chakafapaonifo mã Jesús fe naa keskarakõi. Nãskakê anãkai ea afeska fatiroma,” ixõ ã shinãtiro. ¹⁵ Nõ Jesucristo Ifofaxõ nõ foshki repa xatea askarakai sharama atokai nõko chaka noko soaxotiroma. Akka nõ Ifofaito Niospa nõko chaka noko soaxotiro fena keskara shara nõ inõ. ¹⁶ Niospa Yõshi Sharapa Jesúsnoa noko yoia keskara mã akê Epa Niospa mato inimamakõiyanã mato noikõi. Nãskax Niospa fakekõifo mã iki.

¹⁷ Akka mẽ mekai xatekî ã mato yoinõ. Êfe Ifo Jesúsnoax ã omiskõimis, êfe yora toafo õikî mã tãpitiro ã Jesús yonosharaxonaito ea iskafamisfo. Nãskakê anã ea fekaxtefayamakãfe.

¹⁸ Efe yora mĩshtichi, nõko Ifo Jesucristo keyokõi mato noikî mato sharafa fafafãini. Nãskapainõ. Nã tii.

Pablo

Pablo Efeso Anoafu Kirika Kenexō Fomani

Pablo ato yoisharani, Efeso anoafu

¹ Ēkīa Pablo ē mato kirika kenexō fomai. Ea Jesucristo nīchia ē aōxō āfe meka yoimis inō, Niospa fichipaiyai keskakāfī. Ē na kirika mato fomai a Nios Ifoafafo, Jesucristo chanīmara faafo, Efeso anoafu. ² Nōko Epa Nios feta nōko Ifo Jesucristo mato shināsharanō mato noikī mātō shinā mēra mato shināmasharanō, mātō ōiti fekaxtenōma.

Nō Cristo chanīmara faito afara sharafo noko amatiro

³ Nōko Ifo Jesucristo āfe Apa Niospa noko afara sharafo noko shara famai, nai mēraxō nō ōiamafaito nōko ōiti mēra noko inimamasharai nōmāi āfe fakefokē. Nāskakē nō yoisharai nō inimasharakōi Epa Nioski. ⁴ Epa Niospa mai yafi nai onifayoxoma noko katoni nō afe Īpaxanō āfe Fake Cristo keskara afaa chakafamisma keskara sharakōi nō inō. Niospa noko noikī, ⁵ āfe fakefo noko fani. Anori shināni Niospa a Jesucristo noko nāxoyoxiai. ⁶ Nāskakē Niospa āfe Fake noikōikī nokori nāskarifai noikī. Nāskaxō noko nimasharapakenaka. Nāskakē Nios sharaḡfinakōikē nō aicho fai akiki inimakī nokomāi afama mīshti sharafo famaito Jesúsxō. ⁷ Niospa noko noikī finakōikī āfe Fake Jesús noko nāmā nīchixonī nokoōnoax āfe imi foax ifi cruz ikakinoax noko nāxonō nō sharakōi afe inō, askatari nōko chaka nokoōnoa noko soxonō. ⁸ Nāskaxō Niospa noko ōimana noko noisharakōikī noko tāpimasharakōikī, askatari noko shināmakī finakōi. ⁹⁻¹⁰ Nāskakē Epa Niospa yoini afama mīshti onifayoxoma āfe Fake xanīfo imaxikī, keyokōi, nai mēranoafoya, nāmānoafoyari āto xanīfo finakōi inō. Tsoa pishta anori meka nikayomisma Niospa onāxō yoini a shināi keskakāfī, anori noko tāpimani nō tāpisharanō aōxō. Nāskakē Niospa āa shinākī iskafani: “Nā ēfe Fake ē nīchīpaiyaitīa ē nāmā nīchixii keyokōi nai mēranoafoya, nāmānoafori āto xanīfokōi inō,” ixō Niospa shināni. Nāskaxō nānori iskaratīa noko tāpimana.

¹¹ Nōfi Cristo fakekōifokī. Nō afe yorakōifo ikaito, Epa Niospa noko katoni noko onifayoxoma āa shinākī taefani. Epa Niospa nonori iskafakī shināni: “Na ēfe Fake Jesús ē ināi keskari fakī nā ēfe Fake Jesús Ifofaifori ē ato ināira,” ixō Epa Niospa shināni. A Niospa shinākī yoini keskara, nāskarīfakī iskaratīa mā askafaa. ¹² Akka nō Cristo Ifofakī taefaxō nō yoikī iskafanō: “Epa Niosi, mī fāsi sharakōi. Mī noko sharaḡfamis keskara sharakōi. Tsoa fetsakai mia keskara sharama,” ixō nō yoinō.

¹³⁻¹⁴ Nāskakē ē mato yoi mākai judeofoma. Nāskafixō Niospa meka shara Jesúsxō mā nikakī māri chanīmara fai. Mā askaito Niospa mato chaka soaxona mā afe nipaxanō. Nāskakē māri iskaratīa Cristo afe yorafokī. Anori Niospa yoikī taefani keskakāfī, āfe Yōshi Shara nō mēra nanea noko ĩkinō. Noko askafaito nō tāpitiro āfe shara noko ināxii. Nāskaxfi nō Niosnoafoki. Nāskakē nō tāpiama afetūara nai mēra noko ifi. Taekōifakī anori noko yoini. Nāskakē nā chanīmara fakī nō yoipakenaka: “Nōko Nios fāsi sharakōi,” ixō nō yoipakenaka.

Pablo Epa Nios yōkani iskafakī: “Epa Niosi, mī Fake chanīmara faafo ato tāpimasharafe,” fani

¹⁵⁻¹⁶ Nāskakē nirixō ē mato nikai mā Jesús Ifo sharaḡfata, a fetsafo feri a mato feta Nios Ifofamisfo fe mā rafesharakōiaito ē nikakī inimayanā ē nirixō

ē mato Epa Nios kīfixōfafāini. Nāskakē ē iskafa fafafāini: “Epa Niosi, na Efeso anoxō mia noisharakata fetsafo feri rafesharakōiafo,” ē fai yoikī. ¹⁷ Niospa āfe Fakekōikī Jesucristo. Nāskax sharafinakōia. Nāskakē ē mato kīfixōkī iskafamis: “Epa Niosi, mī Yōshi Sharapa na Efeso ano ikafo ato tāpimasharakōife mia xafakīakōi tāpisharakōinōfo. ¹⁸ Oa xini peisharaino nō fomākīa foiski nō nai xafakīakōishara nō ōitiro keskara, mī Yōshi Sharapa ato ōimafe Epa Niosi, mia tāpisharakōinōfo āto ōiti mēraxō. Askatari ato tāpimafe a nō oniyamatai mī noko shināni nono nāmāxō mī Fake Jesús nō Ifofaax nō mefe īpaxanō nai mēra. Askatari a nō ōimismafo mī noko ināxiai ato ōimafe. ¹⁹⁻²⁰ Epa Niosi, mī Yōshi Sharaōxō mī afama mīshti famis. Nāskaxō mī Fake Cristo mī anā nimani mī Yōshi Sharaōxō mefe pataxamei niax mefe xanīfokōi inō. Nāskax mī pōya kayakai aōri mefe tsaōa. Afia mī Yōshi Shara nō mēra nanexō a nofeta mia chanīmara faafo tii afara fetsafo mī noko ispasharakī mī noko amasharakī.” ²¹ Āfe Yōshi Sharaōxō Cristo ato mānāo nīxō, nā nāmānoafo āto xanīfo tii finōkōia. Askatari nai mēranoafori āto xanīfofo Cristo ato finōkōia keyokōi. Nāskax āto xanīfo finakōia. Tsoa pishta finōtiroma. ²²⁻²³ Akka Epa Niospa āfe Fake yoini keskafakī keyokōi mai anoafoya nai mēranoafo ato īkinā. Nāskaxō āfe Fake katoni nā chanīmara faafo tii āto Ifo inō. Nā chanīmara faafōfi āfe yorakōi keskarafoki. Cristo āto mapo keskara. Akka nōko māpo nō shinātiro. Nā fistichi nā chanīmara faifo yoitiroki, noko īkināno afesaxō nō atiromāki. Akka nō mapomaisax nō nitiroma. Nāskarīfiai nōko Ifo Jesúsmaisax tsoa nitiroma. Keyokōi nā chanīmara faafo nofe ikafo. Nāskax nofe rafe kakāini nā noko amapaiyai keskara nō anō.

2

Niospa noko noikī noko ifia nō afe īpaxanō

¹ Taeyoi mā iyopaoni oa naa keskara māto chaka soaxma. ² Nāskakē mā afara chakafamis, a yora chakafāfe akai keskafakī. Askata a nai mēra ikafāfe a niafaka chakafāfe āto xanīfāfe Satanās mato amapaiyai keskafakī mā amis, Satanās ifofakī. ³⁻⁴ Nōri askafapaoni, nā nō afara chakafapaiyaifo keskara nō apaoni. Afara chaka shināmiskōifo nō ipaoni. Epa Niospa nā nikayospamisfo ato omiskōīmanaitīa ato omiskōīmakōixii. Nōri ato keskaraxō nō afara chakafaito nā ato akai keskafakī nokori omiskōīmakerana. Akka nō afara chakafafaito noko omiskōīmatama. Niospa noko fāsi noisharakōimis, noko shinākōikī noko omiskōīmapaima. Noko chakafapaimisma. ⁵⁻⁶ Nō Nios Ifofayoxoma nō shināyopaonima, chaka fistis nō shināyopaoni, nō chakafayopaoni. Niospa noko noikōīfīaito, nō oniyamatai ares noko Niospa ōikī yoini: “Na ēfe Fake Jesús Ifofaifo ē ato nāmā nīchixonī mā reteafono, ē otofaxō, ē yafi ifixii niri nai mēra afe īpaxanōfo,” ixō Niospa yoini ares ōikī afe ikaifono ato omiskōīmayamaxii. Nāskakē nō nāmānoax oa nō afe nai mēra ika keskara nō nono ika nāmā. ⁷ Epa Nios xanīfokōixō Jesús yafi noko otoani noko noikōikī nō afe nai mēra īpaxanō, nā chipo fakeiafāferi tāpinōfo Epa Niospa noko noikōiaito. ⁸⁻⁹ Nios sharafinakōia. Nō Jesús chanīmara fakē noko ifi nō afe īpaxanō. Akka nōa nō ifimetiroma, Nios fistichi noko ifitiro noko noisharakōikī. Akka nō afarafo shara fatokai noko ifitiroma nō afe īpaxanō. Akka fetsafo āa chanīkani iskatirofoma: “Ē afama mīshti famis. Nāskakē ē tanaima sharakōi Nios ano kai,” ixō yoifiax askara yorakai Nios ano katiroma āamāi chanī Jesús Ifofaamax. ¹⁰ Nāskakē Epa Niospa taeyoi shināyoni Jesucristoōxō yorafetsafo nō axosharakōinō. Nāskakē aa fistichi

noko onifani afara fetsafo nō sharafanō aōxō. Akka nores fisti nō afaa sharafatiroma. Cristo Jesús Ifofaxō nō afama mīshti sharafatiro. Nāskakē taeyokī Epa Niospa ares ōikī yoini.

Jesucristoōnoax nō ōiti sharakōiya ipanaka anā nōko ōiti chaka neenōma

¹¹ Nāskakē shināmakiyamakāfe. Mā chanīmara fayopaonima. Nā judeofāfe yora fetsafo ato yoikī iskafanifo: “Nā yora fetsafo nōko kaifoma. Akka nōfi Niospa yorafokī. Akka na yora fetsafokai Niospa yorafoma. A Niospa noko yoisimis keskafakī keyokōi nōko foshki repa nō xatepakemis na nō judeofāfe. Nāskakē nō ōimani afe yorakōifoxō. Akka a yora fetsafāfe āto foshki repa xatemisfoma. Nō ato tāpitiro afokai Niospa āfe yorafoma,” ixō judeofāfe mato yoisimis mā judeofokēma. ¹² Akka shinākapo. Taeyoi māakai Cristo fe iyopaonima. Epa Niospa israelifo ato katoni keskafakī matorikai katoyonima mā ato fe afe yorafo ipanā. Afe yorafo yoiyoni keskafakī matorikai yoiyonima. Mā shinākī iskafani: “Ooa. ¿Nō afeskatiromē nōko chaka noko soaxonō nō Nios fe ipaxanō?” ixō mā shināpaoni. Nāskatari nā Nios chanīmara faafoma mēra mā iyopaoni. Mā Nios fe rafexoma mā tāpiyopaonima. ¹³ Nāskaxō mā Niosnoa shināyopaonima. Nāskafiano Cristo Jesús matoōnoax naino, āfe imi foni mā afe ipaxanō. ¹⁴ Nāskakē Jesucristoōnoax nō noinātiro, ēfe kaifo israelifo fe yora fetsafo. Nāskakē nāskarafos noko shināmasharatiro nō aōnoax noinā faatanāx afianā nō noikaspa faatanānōma. Nāskakē afanā noko anā afeska fatiroma. Iskaratīa nō Cristoōnoax yora fisti keskarafō. ¹⁵ Nāskakē Jesús nokoōnoax nani. A Moisés Niosxō keneni keskara anā noko tsōa yoitroma. Jesucristo keyokōi noko nāxoni nō afe yorafo inō. Nāskakē māri judeofoyamafekē, mato yafi noko ifni. Nāskax a yora fisti keskarafō nō inō. Mā nō fetsa keskarax ōitisharayakōifo nō inō noināsharakōi. ¹⁶ Nāskakē Jesús ifi cruz ikakinoax noko nāxoni. Na ēfe kaifo judeofo yafi a judeofomari Jesúsxō Niospa noko a yora fisti keskara noko fani. Noko noisharakōikī nō nikayospafo iyopaofinikē, Jesús nokoōnoax nani. Nāskakē Niospa noko yora fetsafōya rafema sharakōia afe yorafo nō inō.

¹⁷ Nāskakē Jesús nāmā fotoxō noko yoini āfe meka shara Niospa noko ifnō. Noko judeofo akai keskafakīri, matori ifia mā judeofoyamafekē mā Nios shināyamafipaonino. Akka nō judeofāfe nō Nios shināyopaoni. Nāskakē iskaratīa nō anā noikaspa faatanātama nō noināsharakōi. ¹⁸ Jesús noko nāxoni nōko chaka noko soaxoxiki nō Nios fe rafesharakōinō afe ipaxakī. Nāskakē Niospa āfe Yōshi Shara nokoya rafemana na nōko kaifomafo fe nō rafesharakōinō. Nāskax Epa Nios fe nō ipaxanō.

¹⁹ Nāskakē iskaratīa mā anā Nios chaifaama mā afe yorakōifo. Nāskakē iskaratīa a Jesús Ifofamisfo fe a rama Jesús Ifofaifo Niospa yorakōifo. ²⁰⁻²² Nāskax mā oa pexe sharakōi keskarafō. Oa tokiri nō pexe shara faa, afeskax paketiroma keskara. Taefakī nō mai pōkita a mēra tokiri nanexō, nō pexe fatiro pakeyamanō. Tokiri kerex sharakōiki nō atiro pexe fakī. Nāskarifikī taefakī a Niospa mekaōnoa ato yoipaonifāfe ato yoipaonifo Niospa ato shināmanaino. Akka chipo mā Jesús nāmā fotoxō, aōxō tāpimisfo ato ifni aōxori a fetsafo tāpimanōfo, oa pexe fisti mēra nō imis keskaraxō, akairi ato tāpimanōfo Niospa meka sharaōnoa ato yoikakī, atoōxori yorafāfe chanīmara fanōfo. Askaxori a rama fakeaifāferi Jesús Ifofakanax, oa nō pexe mitsisipakōi faano, anā paketiroma keskarakōi inōfo Jesucristo Ifofakanax. Nāskakē nōri Ifokōi faax, nōri anā paketiroma nō keyokōichi Ifofaax. Oa

pexe sharakōi mēra nō ika keskara, nō ixii, Niospa āfe Yōshi Shara nō mēra naneano.

3

Niospa Pablo yoini a judeofoma Jesúsnoa yoinō

¹ Nāskakē ē mato Epa Nios yoixonī. Ēfi judeokī mā ēfe kaifoyamafekē ē mato noi. Mato noixō, ē mato Jesucristoōnoa yoi. Nāskakē ea achixō karaxa mēra nīchitifo. ²⁻³ Niospa ea nīchini ē aōnoa ē mato yoinō. Niospa keyokōi yorafo ato noi, judeofo fisti ato noima. Akka a iyopaonifāfekai tsōa tāpiyopaonima Niospa ares ato noifiaito. Nāskakē ē aōnoa ē mato kenexona, pishta fakī. ⁴ Na ē mato kenexona ōixō, mā tāpitiro nā ē tāpia keskafakī Cristoōnoa. Akka a nōko xinifo iyopaonifāfekai tsōa tāpiyopaonima. ⁵ Niospa taefakī tsoa tāpimayonima. Mā iskaratūa Niospa āfe Yōshi Sharaōxō a aōnoa yoimisfo mā ato tāpimana. Askatari a āfe mekaōnoa yoimisfori mā ato tāpimana. ⁶ Akka na meka sharakai tsōa Jesúsnoa tāpiyopaonima. Akka yora fetsafori Epa Niospa afe yorafo itirofo. Nāskakē iskaratūa matori Niospa tāpimani, judeofoya yora fetsafo Jesúsnoax Niospa fakefo mā inō. Nāskakē Epa Niospa āfe kaifo judeofo yoiyoni keskafakī Jesucristoōxō akairi fitirofo.

⁷ Nāskakē a Jesús Ifofafo ē ato chakafafiaito, ea noisharakī Epa Niospa ea nīchini ē āfe meka shara ato yoinō āfe Yōshi Sharaōxō. ⁸ Ē fāsikōi Jesús chakafakī finakōipaoni, na fetsafāfe chakafakī finayamafiaifono. Ē askafafiaito, ares fisti Niospa ea noikī ea nīchini aōxō na yora fetsafo judeofoma ē āfe meka shara ato yoikī tāpimanō Niospa ato noisharakōiaito. Ato noikī ato shināmakōipai. Nios fisti tsoa keskaramakōi. Āfe Fake Jesúsnoa keyokōi nō tāpitiro. ⁹ Niospa keyokōi onifaxō, ea nīchini ē ato mēstesharakōi tāpimanō. Tsoa pishta tāpimano ares fisti tāpini Jesús noko nāxoyoamatai ato tāpimanima. ¹⁰ Nāskakē Niospa ea nīchini āfe meka sharaōnoa ē ato yoinō akairi Nios tāpinōfo. Tāpikanax oa ato fe yorakōifo keskara ixikakī Jesúsnoax. Mā askaito nai mēraxō a xanīfo tiito askara ōikī tāpisharatirofo. “Chanīma, Niospa tāpikīfinakōia,” fatirofo. ¹¹ Afaa pishta onifaatima nānori shināni: “Na ēfe Fake Cristo Jesús Ifofaifo efe yorakōifo ixikani,” ixō yoini keskara mā iskaratūa askakōia. ¹² Jesúsmāi noko nāxonikē, nō Ifofaax, nō Nios fe rafesharatiro mesetama noko potayamanō. ¹³ Ē mato yoinō, ea nikakāfe. Ē mato yoiaito ea nikakakī ea karaxa mēra ikimatifo. Ē omiskōifiaino eōnoa shināchakayamakāfe. Ea karaxa mēra ikimanafoki ē Cristoōnoa mato yoiaino. Nāskafekē inimasharakāfe, mā Niospa yorafokī.

Cristo noko noi

¹⁴ Nāskakē nāfo shinākī ē ratokonō mai chachipakefōfā ē Epa Nios kīfimis. ¹⁵ Nāmāi nai mēranoafo feta nono mai anoxō nā Ifofaafāfe āto Epakē, nāto ēfe fakefora noko famis. ¹⁶ Nānori ē mato Epa Nios kīfixokī iskafamis: “Epa Niosi, mī fāsi sharakōi. Maitiofo yafi nai mēranoafo mīnākōifo. Mī afama mīshti fatiro. Mī Yōshi Sharaōxō mia chanīmara faafo Efeso anoafo mī kerex shara ato ināfe. ¹⁷⁻¹⁹ Nā Jesús Ifofafo mī Yōshi Shara atoya rafemafe. Mia tāpikī finakōinōfo. Askaxō tāpinōfo mī fāsi ato noiaito. Mī Fake Cristori fāsi ato noi. Cristo noko noiai keskara tsōa tāpitiro. Askafikē ato tāpimafe, Epa. Akka tāpikanax, mī ato fe rafekōiaito mia keskara inōfo,” ixō ē matoōxō Epa Nios kīfifāiini.

²⁰ Akka Epa Niospa afama mīshti fatiro a nō yōkai tii noko axotama finōmata noko axotiro. Nāato āfe sharaōxō noko axotiro afama mīshtifo. Noko axopaiyai keskafaito nō tāpitiroma. Finōmainifōfāta noko shara fatiro. ²¹ Nāskakē nō Epa Nios yoikī iskafaito: “Epa Niosi, mī sharafinākōia. Mī Fake Jesu-cristoōxō mī noko sharafamis,” ixō mēxotaima nō yoifafāini. Keyokōichi nā chanīmara faafo feta a inōpokoiafāferi yoisharapakenakafo. Nāskapakexapainō.

4

Niospa Yōshi Sharaōnoax oa yora fistikōi keskara nō itiro

¹ Ē mato yoisharakōi. A Jesucristoōnoa ē mato yoimis. Ē ato yoiaito a Jesucristo nikakaspaifāfe ea karaxa mēra nīchiafo. Ē mato yoisharanō, ea nikasharakōikāfe. Niospa mato katoni Jesucristo mā Ifosharakōi fanō. A ē mato yoiai keskai isharakōikāfe. ² Nāskax, “Ē finakōia,” iyamakāfe, anori shinātama. Yora fetsafo noisharakāfe ato shinākī. A fētsa tāpisharamato mato afeskarafaito, shināchakatama ato noisharakāfe, ōitifishkitama, isharakōita. ³ Niospa Yōshi Sharaōnoax nō isharakōinō a yora fistikōiax itikini. Tanaimakōi ikāfe, ōitifishkiki faatanākakīma. ⁴ Niospa noko yoimis keskai: “Isharakōikāfe, nōko Ifo ifofasharax, mā chaima anā fotoiyoi kiki,” shināi isharakāfe. A Nios Ifofaafori oa nofe naneafō keskarakōifoki. Nāskax isharakāfe. Niospa āfe Yōshi Shara askarakī. ⁵ Nōko Ifokōi Jesucristo. Nā fisti nō chanīmara fai Epa Nios fe ĩpaxakī. Nāskakē āfe Yōshi Shara nō mēra nanei. ⁶ Anā fato fetsa nōko Niosma. Nā fistikōi āfe Fake fe a chanīmara faafo tiito āto xanīfokōi. Nāskaxō keyokōi onifani. Nāskakē a Ifofafo āfenākōifo. Nāskaxō afara sharafo noko amai nōko shinā mēraxō afe keskararāfo noko amatiro. Āfe Yōshi Sharaōxō keyokōi a fichipaiyai keskara nō anō āfe shinā noko ināi.

⁷ Nō Jesús Ifo sharafaito ōikī āfe shara noko minia fisti rasi chanīmara faifo nō ato axonō Jesús Ifofasharakōinōfo. Keyokōi āfe sharaōxō afara fetsa nā Jesús apaiyai keskara anōfo ato ināi. Nō fisti keskarafiakē nā noko imapaiyai keskara noko ima nō afara axonō. ⁸ Nāskakē Niospa meka Cristoōnoa yoikī David kirika kenekī iskafani:

Nono mai anoax Apa Nios ari kaitīa nā Ifofafo tii āto chaka ato soaxoni afianā Satanās āto ifo inōma, askatamaroko Ifo sharakōi fanōfo. Nāskatari keyokōi nā afe yorafo ato imapaiyai keska fakī ato imani aōnoax ishara faatanānōfo, ixō kenenī.

⁹ Nāskaxō kenekī iskafani: “Nono mai anoax Cristo afianā Apa Nios ari kani,” ixō kenenī. Nānori kenenino nō tāpitiro Apa Nios ari kayoamano na mai ano fotoyonino nai mēranoax noko keskara ixiki. ¹⁰ Niospa yoiaino, ftoni. Mā reteafono āfe Apa Niospa otoani. Nāskaxō ifini afe nai mēra ixii. Nāskakē keyokōi nai mēranoafōfāfe nono nāmānoafāferi āto xanīfo ixii. ¹¹ Nāato noko katoni noko imapaiyai keskai aōnoax nō shara faatanānō. Nāskaxō fetsafo afe rafemisfo ato imata, nokori nīchi aōnoa fetsafo nō ato yoisharanō. Fetsafori katoni nā meka shara aōnoa ato yoinōfo Jesús Ifofanōfo. Fetsafori katoni āfe meka shara chanīmara faifono ato tāpimayanā ato kexesharanōfo āfe meka nikasharakōinōfo. ¹² ¿Afeskakī ato Niospa katonimē? Aōxō yoinōfo Niospa ato katoni a yora fetsafo ato yoisharanōfo, a Jesús chanīmara faafo aa yora fisti keskara inōfo Jesús tāpikōikanax. ¹³ Afāfe Niospa Fakeōnoa noko tāpimasharakōiaifono, aōxori fetsafori nō ato yoikī tāpimasharanō. Askax keyokōi oa yora fistikōiax itikini nō inō. Askaxori Jesús afe keskaramāki nō

tāpisharakōinō. Askax oa Jesús ōiti keskara sharakōi ixiki. ¹⁴ Nāskax anā oa fakefo keskara nō itiro ma mā nōmēra Niospa meka yosiano. Oa nefe onori kai, anā onori kai imis keskai, fakefo askatirofo afaa shināsharaima. Askaxō a Niospa meka tāpisharafāfema ato yoiāifāfe nikafofāsa fatirofo. Askaxō tāpisharaxikākīma Niospa mekakōi. Askatari a yora āa chanīki fanīra ato yomis nō nikatiroma. ¹⁵ Fanīra ato yoitama nō nōināsharakōixō Niospa meka mēstesharakōi nō ato tāpimasharakōitiro. Nō askai nōko Ifo Jesucristo āfe ōiti keskara sharakōi nō itiro. ¹⁶ Jesús nōko mapo keskaraxō noko shināmakī noko yonomanaino, oa afe yora keskara nō itiro. Akka nōko yora meemafīax nō mīfīmais ita, nō kishīmais ita, nō pachomais ita, nō feromais ita, ixō nō afaa yonotiroma, afaakairoko shinākī. Akka nō mifi rafeyata, nō tae rafeyata, nō fero rafeyata, askai fetsexō nō meemasharakōixō nō yonosharakōitiro shināfāi, nōko yoramāi meemasharakōikē. Nāskafakīri keyokōichi nō Jesús Ifokōi faax nofe yorafo fe nō isharakōitiro noināsharakōikai, Jesúsnoax mā noko āfe Yōshi Shara ināno oa āfe yora keskara sharax.

Cristo nōko ōiti noko fetsafaxōano a keskarakōi nō itiro, anā nō ipaoni keskara ixikīma

¹⁷ Jesucristo ea īkinā aōxō ē mato yoinō. Ea nikasharakōikāfe a Jesús Ifofamisfāfema fanīra chaka fisti yomisfo fanīra shinā kakī. Nāskakē tsōa shināsharaima. Nāskakē ato keskara iyamakāfe. ¹⁸ Tsōa shināima oa fakishifā mēra niafo keskarāfo. Askatari oa feromais keskara ikafo chai ōima. Nāskakē tsōa tāpifāi shināmīma. A Niospa shināi anori shināmīsfoma. Nāskakē tsōa Nios Ifopaimīma. ¹⁹ Āto ōiti kerexkōi. Askakaxō afarafo chakafakani tsoa rāfitiroma. Nikayospakōimisfo, nō finakōiara ikani nikayospakani. ²⁰ A Jesús noiaifāfema shināifo anori mato Jesús tāpimamīma fanīra chaka. ²¹ Jesús mato tāpimamīma chanīkī mato yomīma. ²² A Nios tāpiamax mā iyopaoni anori anā shināyamakāfe. Fanīra mato Satanās shināmayopaoni mā chaka inō. ²³ Anā anori shinātama, iskaratīa Niospa Yōshi Sharapa mato shināmapaiyai anori shinākāfe a mā iyopaoni shināmākikāta, isharakāfe. ²⁴ Ōiti fenashara fichipaiakāfe. Oa nō rapati chapokōi potaxō nō rapati fenasharakōi nō safemis keskakāfī, ōiti fena sharaya ikāfe Niospa fichipaiyai keskai.

²⁵ Nāskax nō Cristo yorafo. Nāskakē anā fanīra chanī yoiyamakāfe. Afara ōixō yoikōikāfe chanīmākōi.

²⁶ Mā ōitifishkikī anā afarafo chakafayamakāfe. Askata aa chai ōitifishkiyamakāfe. Ōitifishkipai samama raekāfe xini ikiyamano. ²⁷ Mā ōitifishkiriāito koshikōi Satanās mato chakafamarisafai. Askayamakāfe Satanās nō mēra ikiyamanō.

²⁸ Mā yometsoyopaoni anā askayamakāfe. Iskaratīa yonokāfe a mā fichipaiyai fixikakī, a yora afaamaisfo ato ināxikakī afara sharafo.

²⁹ Askata anā fanīra chaka yoiyamakāfe. Shināsharata yoisharakāfe. Mā askaito mato nikakanax āto ōiti mēra inimanōfo. Askatari Jesús Ifofasharanōfo. ³⁰ Askata Niospa āfe Yōshi Shara nōko ōiti mēranao omiskōimayamakāfe afara chakafakī. Askatamaroko nōko Ifāfe āfe Yōshi Shara nokoōnoa inīma-masharakōikāfe. Āfe Yōshi Shara nō mēra naneakī, oa koxa marakka faa keskarafakī Niospa noko askafaa nā Jesús anā fotoaitīa.

³¹ Māto yora mēraxō mato ōiti fishkimamī a chaka shināmākikāfe. Ato noikaspai ōitifishkikī finakōimis iyamakāfe. Afaa shināima oa ōitimais keskara āakōi mekai keskara iyamakāfe. Fāsikōi yōachepemis ato ferateni iyamakāfe. Ato noikaspakī ato īchayamakāfe. Mā chakara ato fayamakāfe.

Mākōi chakafakī ato noikaspayamakāfe. ³² Askatamaroko ato fe raenā faatanāsharakōikāfe, a mato Niospa aka keskafakīri Jesúsxō ato raefakāfe.

5

Afeskax Niospa fakefo itirofomē

¹ Mā Niospa fakefokē mato noisharakōi. Nāskakē a keskara ikāfe, Ifo-fasharakōi. ² Cristo noko shinākī finakōi nokoōnoax nani. Nōko chaka noko soaxoni. Nāskakē noko nāxoni, aakōi nanima. Nāskaito xafakīa Epa Niospa ōini nōko chakaōnoax nani, anā nōko chaka nokoō neenōma. Nāskakē mā ranāri nōināi finasharakōikāfe.

³ Mā Niospa fakefokī ōisharata ikāfe. Isharakāi afarafo chaka shinātama. Māto āfimafo chotayamakāfe. Kēromāri māto fenemafo chotamayamakāfe. Askatari mares fisti afama mīshti a mā fichipaiyaifo fiyamakāfe. ⁴ Askatari fanīrira meka chaka yoyimakāfe. Anori shinātama a Niospa fakefo isharakōikaxō, mēstekōi yoisharatirofo iskafakī: “Aicho Epa Niosi, mī noko ikisharakōiaki,” ixō mā yoimis. ⁵ Mā mā tāpimis yora fetsafāfe fanīrira shināmisfo āto āfimafo chotamisfo ato fe oxakaxō, kēromāri āto fenemafo chotamamisfo, askara yorafo Nios ano fokanima. A afarafo noikakī fichipaimisfo, askara yorafāfe afama mīshtifo noikani Nios shinātama, askara yorafo a Nios xanīfo ano fokanima.

⁶ Ōisharakakī yora fetsafāfe anorima mato yoipaikani fanīrira āa mato pāarakāi. Askara yorafāfe Nios nikakapakakī chakafakani. Askaito ōikī Niospa ato kopikiri chakafaxii atoki ōitifishikī. ⁷ Nāskakē nā ikaifo keskara mā iyamakāfe. Afarafo ato feta chakafakī, anori shināyamakāfe.

⁸ Mā fanīrira shināyopaoni māto ōiti oa fakish keskara ikax, akka iskaratīa mā Cristo fe rafeax a mā iyopaoni keskara anā mā shināima. Māto ōiti xafasharakōia mā ika. Nāskara shara. Mēxotaima isharakāfe. ⁹ Nāskax mā isharakōimis. Cristo mato ikināno māto ōiti xafasharakōi mā imis. Mā isharakōiax shara mā itiro. Māto ōiti mēraxō mēstesharakōi mā shinākōitiro. Mā anori shināxō anā fanīrira mā yoima. ¹⁰ A Niospa fichipaiyai keskafakī tāpisharakōikāfe. Nāskakōi fakāfe. ¹¹ Nā Nios Ifofakaspamifāfe, afaa tāpamafāfe afarafo chakafaifāfe ōiki māri ato feta chakafayamakāfe. Ato ōitamaroko ato yoisharakōikāfe: “Anā afaa chakafayamakāfe,” ixō ato yoiakāfe. ¹² Askatari a yora fetsafāfe one afama mīshti chakafakīa onepaimisfo. Askarayakai nō mekaima nō yoi nō rāfitiro. ¹³ Akka mā fakishano nō rāpari otaxō, keyokōi nō ōisharakōitiro. Nāskarīfai a yorafāfe afarafo chakafakaxō onepaifaiifāfe, Niospa meka ōikī tāpitirofo a chakafamisfo. ¹⁴ Nāskakē Niospa yoimis iskafakī:

Afarafo mā chakafamiski moinīfofākāfe oa mā naa keskara ikax finīfofākāfe Cristo māto ōiti mēra oa fafeai keskara mato fasharanō, ixō yoimiski.

¹⁵ Nāskax isharakōikāfe. Oa Niospa meka tāpiama keskara iyamakāfe. A Niospa mekaōnoa yoiikī kenenifo anori isharakōikāfe. ¹⁶ Nāskakē a Nios Ifo-faafomafo iskaratīa chakafinakōiafo. Nāskakē māri isharakōikāfe ato keskara ikakīma. A Niospa apaiyai keskara akāfe mēxotaima. ¹⁷ Nāskakē fanīrira chaka shināpaiyamakāfe a Niospa mato amapaiyai anori tāpisharakōikāfe. ¹⁸ Askatari anā pāeyamakāfe. Mēxotaima pāeriai mā chakakōifo itiroki. Askaxō mā afaa shināsharaima. Askatamaroko Niospa Yōshi Shara mato mēra naneano afe rafesharakāfe mato yonomasharanō. ¹⁹ Nāskakē mā ranā Niosnoa

yoinōnākāfe isharakōikai. Nōko xini David mēxotaima fanāipaoni keskariai māri Nios Ifofaax aōnoax fanāikāfe mā ranā mātō ōiti mēraxō nōko Ifo shināi inimayanā. ²⁰ Pena tii aichora fakāfe Epa Niospa noko afama mīshti faxōfaino, nōko Ifo Cristo shināyanā nō Ifo sharafanō.

Afe keskara nō itiomē Cristo yorafo

²¹ Cristo nikasharapai, mā ranā nikanōnāsharakōikāfe.

²² Kēromāri a mātō Ifo Jesús mā nikasharai keskafakī, mātō fenefo ato nikasharakōikāfe mato yoisharaifāfe, mātō Ifo Jesús mā nikai keskafakī. ²³ Cristo nōko xanīfofinakōia nō nikasharai keskafakī, kērofāferi āto fenefo nikasharakani āto xanīfomāiyakē. Askatari Cristo noko ifimis nō nikasharakōitiro oa nō afe yorakōifo keskaraxō. ²⁴ Nāskakē kēromā āfe fene nikasharatiro āfe xanīfomāiyakē a nōko Ifo Jesús chanīmara faafo tiito nikasharaifo keskafakī.

²⁵ Nō Cristo Ifofaano noko noikōiax aakōi nokoōnoax nani. Nāskarifikā feronāfakefāfe, mātō āfīfo noisharakōikāfe. ²⁶ Mā āfe meka chanīmara faito, oa noko fāka choka keskara faxō noko katoni, oa nō afaa chakafamisma keskara noko imaxii. ²⁷ Mā noko ifiax, nāskax nokoōnoax nani nōko chaka noko soaxoxiki nō isharanō. Nā anā nōko Ifo Jesús oaitīa a chanīmara faafo tii noko ifixō sharakōi noko ōixii, oa nō afaa chakafamisma keskara noko ōixii. ²⁸ A feronāfakefo āa noimesharaifo keskafakī, mātō āfīfo noisharakāfe. ²⁹⁻³⁰ Akka shinākapo. Tsōa pishtakai ato yora chakafamisma. Nōko yora nō mesefakī fonāikī nō pimis shara nixiki. Nāskafakīri Cristo a afe yorafo ato kexesharamis māmāi nō afe yorakōifokē. ³¹ A Niospa meka yoimisto keneni iskafakī: “Nāskakē feronāfāke kēro fiax anā apa fe afa ikano anā ano itiroma. Paxkatiro, āfi fe ixiki. Askax oa fisti keskara ixiki anā rafema,” ixō yoikī keneni. ³² A Niospa meka yoimisto keneni anori taefakī tsōa tāpinima. Mā iskaratīa noko Niospa tāpimasharai a nōko Ifo Cristo Ifofaafō tii afe yorafokanax, oa fisti keskara afe yorafo ixō keneni. ³³ Ē mato yoi fisti rasichi mātō āfīfo noisharakōikāfe. Mēxotaima aa mā mā noimeai keskafakī mātō āfīfo noisharakāfe. Askatari kērofāferi āto fenefo noisharakōikaxō nikasharakōinōfo.

6

¹ Fakefāfe, mātō epa nikasharakōikāfe mātō efa yafi, nōko Ifo Jesús noikī. Nāskara sharakōi. ²⁻³ Epa Niospa Moisés shināmanaino kirika keneni iskafakī askara nō nikanō: “Mātō epa yafi mātō efa noisharakōiyanā ato nikasharakōikāfe. Mā askafakī nono mai anoxō xinia ranā mā aki inimayanā,” ixō Niospa shināmanaino Moisés kirika keneni.

⁴ Iskaratīa āto apafari ē yoisharai. Mātō fakefo ferateyamakāfe matoki ōitifishkiyamanōfo. Ato askafatamaroko a nōko Ifāfe noko noiai keskafakī, mātō fakefo tāpimasharakōikāfe. Fenāmāshta ato yoisharakōikāfe akairi Jesús tāpisharakōinōfo.

⁵ Askatari ato yonoxomisfāferi mātō xanīfo tii ato nikasharakōikāfe, nono mai anoxō mato yonomanaiifāfe mātō xanīfo tiito. Nāskakē mato yoiāifāfe ato nikasharakōikāfe, nā nōko Ifo Jesús fichipaiyai keskafakī mā samama ato axorisā fai. Askatari mātō xanīfāfe mato yonomanaito mā axosharatiro. Nāskakē, “Ē Cristoōxō yonosharai,” ixō nō yonosharatiro. Nāskarifikā ēfe xanīfori ē yonosharaxotiro. ⁶ Mātō xanīfāfe mato ōiainos yonoxosharakakima, mato ōiayamafaiainori yonosharaxokāfe inimakōiyanā. Mā askaito ōi inimanō. Mā mātō xanīfo yonosharaxokī, nā nōko Ifo Cristo

yonoxona keskara mā faikai. Akka nono mai anoxō mātō xanīfo mā inimama keskafakī, nōko Ifo Niospa mato amapaiyai keskara mā axikai. Nāskax nōko Ifo Jesús āfe yonomati ixikakī. ⁷ Inimasharakī yonosharaxokāfe. A mā nōko Ifo yonosharaxonai keskafakī mātō xanīfori yonosharaxōkāfe inimayanā. ⁸ Mā mā tāpia yorafāfe yonosharaiāfe òikī, Cristo afara sharakōifo ato ināxii, a xanīfomais ināta a xanīfoyari ināxii.

⁹ Nāskakē mā xanīfofōfāferi, a mato yonoxomisfo ato shara fakāfe. Nō mato chakafaira ixō ato ferateki koshapaiyamakāfe. Shinākāfe, māri Ifoyakī a nai mēra ika. Nōko Ifo Cristo keyokōi nāskarafos noko òi kiki.

Afeskax nā nō chanīmara faafo tii nō mitsisipasharakōi itiromē fetsafāfe noko afara chakafamapaiyaifono nō afaa afeska fanōma

¹⁰ Ē mato yoisharanō, ea nikasharakōikāfe, efe yora mīshtichi. Nōko Ifo Niosnoax nō mitsisipakōi itiro āfe Yōshi Shara no mēra naneano. ¹¹ Ē afara fetsaōnoa mato yoinō mā tāpinō. Sorarofō āto xanīfāfe ato yoitiro itipinīsharanōfo fetsafāfe ato afeska fanōfoma. Nāskaxō a aō xorakomeaifo kerexkōi ato inātiro, maiti kerexkōiri ato inātiro, sītora kerexkōiri ato inātiro fetsafāfe ato retenōfoma. Nāskarifiakī Epa Niospa āfe Yōshi Shara mato ināpaiyaito fikāfe, Satanās chakata mato afara chakafamapaiyai keskara axikakīma. ¹² Akka nōkai yorakōifo fe mēnāima. Askatamaroko nā niafaka yōshi chakafo fe nō iki, kerexkai noko afara chakafamapaiyaifono. Nāfāfe nō òiamafaiino noko afara chakafamapaikani. Nā niafaka yōshi chakafo ichapakōifo. ¹³ Nāskakē Epa Niospa āfe kerex shara mato ināpaiyaito fikāfe aōnoax mitsisipakōi ixikakī, niafaka yōshi chakafo matoki nokoxō, mato afeska fanōfoma. Nāskaxō nā niafaka yōshi chakafāfe mato afara chakafamapaiyaito Niospa kerex sharaōxō mā finōtiro mato afaa chakafamanōfoma. Akka Niospa nā mato amapaiyai keskara mā akōinax mā isharakōitiro, niafaka chakafo mato makīnoa potax. Nāskax Jesús fe rafexō mā afaa chakafaima.

¹⁴ Ē mato yoiāi keskai sorarofō itipinī sharatirofo keskai. Māri itipinī sharakāfe niafaka yōshi chakafo matoki nokoxō mato afara chakafamapaiyai fo keskara axikakīma. Epa Niospa mato amapaiyai keskara fisti akāfe isharaxikakī. Sorarofāfe ìkisi āto sītora kerexkōi itipinī fatirofo ayaxō āto rapati safexikakī. Nāskarifiāi mā isharakōiaino niafaka yōshi chakata mato afeska fatiroma. Askatari sorarofō āto safeti kerexkōichinī xorakometirofo, nā ato noikaspaifāfe āto òitiki ato pianōfoma. Māri Niosnoax isharakōikāfe, nikafaka yōshi chakafāfe mātō òiti mēraxō mato afaa chakafamanōfoma. ¹⁵ Oa sorarofāfe āto sapato shara safekanax ichotirofo keskariai, māri nāskari akāfe. Nāskarifiāi mā ato Niospa meka yoisharaiakai mā katiro a Niospa meka nikamisfoma mēra. Itipinī sharakāfe fetsafoki nokoxō Niospa meka sharaōnoa mā ato yoiāito nikai inimakōinōfo. ¹⁶ Akka sorarofāfe āto xītimati nā kerexkōi tsoatirofo a ato noikaspaifāfe ato pianōfoma. Nāskarifiakī a mato xītixonai mā fenai. Mā nōko Ifo Jesús chanīmara faino nā niafaka chakafāfe mato afara chakafamapaiyaito mā atiroma. Nāskakē nō Jesús chanīmara fakōinaino nā nōko xītimati keskara itiro. ¹⁷ Sorarofāfe āto maiti kerexkōi safekaxō āto mapo kexesharatirofo, a ato noikaspaifāfe ato mapoki afeskananōfoma. Nāskarifiakī mā Jesús chanīmara fakōinax mā Epa Nios fe nipaxatiro. Mā askaito niafaka chakata mato afeska fatiroma. Sorarofāfe āto keno fitirofo a ato noikaspaifo fe aō ato fe retenāxikaki. Nāskarifiakī Niospa Yōshi Shara oa keno keskaraki fikāfe. Nā keno keskaraki Niospa meka shara nā mā fichipakōi niafaka yōshi chaka matoki nokopaiyaito otimafaxikakī.

¹⁸ Shinãmakiyamakãfe. Mëxotaima kîfikãfe Niospa ãfe Yõshi Sharaõxõ mato tâpimasharai. Shinãmakixoma mato shinãkõi. Nãskakë shinãchakayamakãfe. Mëxotaima ato Nios kîfixokãfe a Ifofaafõ ato axosharanõ. ¹⁹ Nãskaxõ eari kîfixokãfe Niospa Yõshi Sharaõxõ ãfe meka shara mesetama ã ato yoinõ. Nã ãfe kaifomafoõnoaxri Jesús ato nãxoni ã yoinõ tsõa tâpiyonifoma. ²⁰ Ea Niospa nîchini anori ã ato yoinõ ãfe meka shara. Nãskakë ea karaxa mëra ikimanifo. Nãskakë ea kîfixokãfe ã Niosxõ ato yoinõ mesetama.

Pablo mã mekai xatekî Efeso anoafõ meka shara fomani

²¹ Nofe yora Tíquico ã nõisharakõi. Efeta nõko Ifo Jesús yonoxomiskë. Ë Tíquico mato ari nîchixii, ã afe keskara ikamãkî mato tâpimanõ. ²² Nãskakë ã a mato ano nîchikai nõ afe keskaramãki a Tíquico mato tâpimanõ. Nãskakë mãto õitinî shinãsharai mã inimanõ mã mã tâpiax.

²³ Nõko Epa Nios feta nõko Ifo Jesucristo mãto õiti mëra mato shinãsharamanõ mã fekaxteyamanõ. Jesús chanîmara faax, keyokõi mã nõinãi fetsenõ. ²⁴ Nã nõko Ifo Jesucristo noipakenakafo Nios sharakõi mato noikõipakenaka. Askapakexapainõ. Nã tii.

Ëkîa Pablo ã mato kenexoni.

Pablo Filipos Anoafo Kirika Kenexõ Fomani

Pablo karaxa mēraxõ a Nios Ifojaafõ Filipos anoafo ato kirika kenexõ fomani

¹ Ēkīa Pablo, Timoteo feta nõ Jesucristo yonoxomis. Nāskakē nā Epa Nios Ifojaafõya nā mātõ xanīfofoya a mato kexemisfo nõ kirika kenexõ fomai mā tāpinõ. Nā pexe rasi Filipos anoafo nõ fomai, nāfofi Jesucristo afe yorafoki. ² Nõko Epa Nios feta nõko Ifo Jesucristo mato noikī mato sharafai kiki mato inimamakī mā anā fekaxteyamanõ mā isharakõinõ.

A Nios Ifojaafõ Pablo ato kīfixopaoni

³ Nā ē mato shināitīa, ē Epa Nios aichofa fafafaīni. ⁴ Ē Epa Nios kīfikī mēxotaima inimakõikai keyokõī ē mato kīfixõfafāini. ⁵ Mā efeta Jesucristo chanīmara fakī taefaniṭīa, iskaratīari mā efeta Niospa meka shara Jesucristoõnoa mā ato yoimis. ⁶ Chanīmakõī ē yoi, nā Epa Niospa mātõ õiti mato shara faxoni keskafakī nē askakõifa fafafaīni nā Jesucristo oaitīa. ⁷ Nāskakē nānori shinākī efe õiti mēraxõ ē matoõnoa shināfafāini, ēmāi mato noikõikī nā Epa Niospa ea sharafai keskafakī mārīmāi efeta meemiskē. Akka ea karaxa mēra ikimanifo. Nāskakaxõ xanīfofofāfe ferotaiṭi ea iyomisfo anoxõ ē ato yoisharanõ Niospa meka sharaõnoa afe īpaxanõfo. Iskafakī ē ato yoimis: “Jesús noko nāxoni nõko chaka noko soaxoxiki nõ afe īpaxanõ,” ixõ ē ato yoimis. ⁸ Epa Niospa tāpia keyokõī ē mato noikõiaito a nõko Ifo Jesucristo noko noikõiai keskafakī. ⁹ Ē mato Nios kīfixokī iskafaxõfafāini, mā nõināi finakõinõ, askatari mā tāpisharakõixõ nikakõisharayanā mā tāpikõinõ. ¹⁰ Nāskaxõ afara sharakõifo tāpixõ katonõfo. Nāskakanax isharakõitirofo, afaa chakakai matoõ netiroma, matoõnoari afara chaka yoitirofoma mā Cristo oaino. ¹¹ Nāskaxõ nā Jesucristo mato sharafai keskafakī, māri askafatiro. Mā askaito mato õikī fetsafāfe mato yoikī iskafatirofo: “Aicho, nafo isharakõiafo Epa Niosnoax. Nios fāsi sharakõī,” ixõ yoixikani. Nānori matoõxõ ē Epa Nios kīfifafaīni.

Ē shināi ē Cristo fe rafepakenaka

¹² Efe yora mīstichi, mā tāpinõ ē mato yoinõ. Ea karaxa mēra ikimafiafono, akka ē mēxotaima Niospa meka sharaõnoa ē ato yoifafaīni afe nīpaxanõfo. ¹³ Nāskakē sorarofāfe xanīfāfe pexe anoxõ fetsafo feta mā tāpiafo ē karaxa mēra ikē Cristo Ifofai. ¹⁴ Ē karaxa mēra ikano nā nõko Ifo Jesús Ifojaafāfe atirifāfe Niospa meka sharaõnoa ato yoikakī mesetamakõī inimakõikai nõko Ifoxõ ato yoikani.

¹⁵⁻¹⁷ Chanīma, fetsafāfe Cristoõnoa meka shara yoifīkakī ea finõpaikani, ea shināchakamapaikakī. Akka fetsafāfe ea noikakī eõnoa shināmisfo iskafakakī: “Pablo karaxa mēra ikimafiafono Epa Niospa meka yoiaito tsõa xatematiroma Jesúsnoa ato yoiaito nikakõinõfo,” ixõ Jesúsnoa yoisharatirofo. Akka fetsafāfe Cristoõnoa yoikakī: “Noko nikakõinõfo,” ixõ ato yoipaikani ea finõpaikakī ē karaxa mēra ikano. Akka fetsafāfe ato noikakī ato yoisharamisfo, māmāi tāpikaxõ nonoxõ ē Cristoõnoa meka shara yoimiskē afe nīpaxanõfo. ¹⁸ Akka nāskanõ, nā yoipaiyai keskafaxõ Cristoõnoa ato yoinõfo. Nāskafakī ato yoiaifono nikai ē inimakõini.

¹⁹ Akka mē tāpia ē inimakōi, mā ea Epa Nios kīfixonaito nikai Jesucristo āfe Yōshi Sharapari ea axōfaino. ²⁰ Epa Niospa ea amapaiyai keskara akiki ē rāfitiroma. Ranotamakōi ē yoitiro. Ē askafakī yoiaito ōikakī fetsafāfe Cristoōnoa shinākōinōfo. Nāskakē ē nayoamax ē niyoa sharakī. ²¹ Akka Cristo fistiōnoax ē ĩpanaka, akka ē nairi sharafinakōia, ē inimakōi ěmāi Cristo fe nīpaxakī. ²² Akka ē niyoxō fetsafo Cristo ē ato chanīmara famatiro afe nīpaxanōfo. Akka ē fato katotiroma, nia rakikīa shara, askayamai naa rakikīa shara. Ēkai tāpiama. ²³ Akka fekaxkōi. Nā rafe sharafiax fato ē katotiroma. Akka ē napai Cristo ari kaax afe ĩpaxakī, nā sharafinakōia ē mei. ²⁴ Akka fetsari nā sharafinakōia ē shināi, mā ea yopai Niospa meka shara ē mato yoinō. ²⁵ Mē tāpia māmāi ea yopakōiaito, askatari mē tāpia ē nayoamax ē mato fe iyoikai. Niospa meka shara ē mato yoiaino mā inimayanā chanīmara fakī mā finakōinō. ²⁶ Nāskakē ē anā mato fe ikaino mā inimaifinakōixii Cristo Jesúsnoax.

²⁷ Akka shināsharata isharakāfe. Nāskaxō na meka shara Jesucristoōnoa chanīmakōi yoixikakī. Mā askaito ē mato ōikanō, askayamai chai ixō ē matoōnoa nikakī ē tāpitiro mā Jesús Ifofasharaino nāskara fisti shinākaxō. Nāskaxō keyokōi Niospa Yōshi Sharaōxō fetsafo mā ato Jesús chanīmara famaxikākī. ²⁸ Mā askafakī yoiaito a mato noikaspaifāfe mato mekakī xatemapaiyaifono rateyamakāfe. Nāskakē mā atoki rateyamaito ōikakī tāpitirofo akka nāfo fenokōikani, akka mā fenotama Nios fe mā nīpanaka. ²⁹ Epa Niospa mato sharafaxōa mā Cristo chanīmara fata aōnoa māri mā omiskōinō. ³⁰ Ē ikai keskai mā efe omiskōimis. Mā mā ea ōipaoni ē omiskōiaito, iskaratīari mā mā ea nika Cristoōnoa ē omiskōiaito nāskafixō ē eneima Niospa meka ato yoiķi.

2

Cristo nono mai anoax afama iyopaofnixakī iskaratīa xanīfo finakōia

¹ Nāskakē Cristo mato inimama mato noikī mato inimamashara āfe Yōshi Shara mato fe ika. Chanīma, Cristo mato noikī mato inimamashara mā mā meemis. ² Nāskakē ea inimamakōikāfe. Isharakōita keyokōichi nānorifos shinākāfe. Mā ranā nōināsharakōikāfe. Nāskakē Jesús mato amapaiyai keskara fisti axikakī. ³ Akka fetsafo afara axotama a mā mā afara apaiyai keskara fisti shināyamakāfe, askatari fetsafāfe eōnoa yoisharakōinōfora ikax kakapaimis iyamakāfe. Askatamaroko isharakōita fetsafoōnoa yoiķi iskafakāfe: “Nafāfe ea finōtirofoki. Akka ěkai afama. Jesús fistichi ea imasharatiro,” ixō fetsafo finōpaiyamakāfe. ⁴ Askatari a mā mā fichipaiyai keskara fisti shināyamakāfe, askatamaroko a fetsafāfe fichipaiyaifo keskarafori shinākāfe.

⁵ Nāskaxō nōko Ifo Jesucristo shināi keskakakī māri nānori shinākāfe. ⁶ Nāfi Nioskōikī Apa Nios keskara ari onifafianino yoiķi iskafapaonima: “Ēri ē Nioskōi nā ěfe Epanāfōri ěfenā. Nāskakē ěfe Epa nai mēra ika keskarai ē nono mai ano itiro. Ē askaito afanā ea afeska fatiroma,” ixokai anori Jesús shināpaonima. ⁷ Askatamaroko Jesús āfe sharafoya āfe afama mīstiffo potayoni, nono mai ano oax ato yonoxomis keskara ixiki. Nāri fake feronāfake kaitiro keskai, feronāfakekōi kāini. ⁸ Feronāfakekōi ixō isharakōixō Apa Niospa yoiāi keskara nikakōiax nani. Afara chakafamis keskarax ifi cruz ikakinoax omiskōikai nani. ⁹ Nāskakē Epa Niospa xanīfo finakōia imani, nāatofi keyokōi finōinīfofanakī. ¹⁰ Nāskakē Jesús keyokōi ato finōano āfe ane nikakakī keyokōichi akiki ratokonō mai chachikaxō yoiķi iskafaxikani:

“Jesús, mīfi xanīfo finakōiakī,” ixō yoixikani keyokōi nā nai mēranoafoyaxō nono mai anoafāfe. Askatari nā Ifofax namisfāferi askafaxikani, ni-afakafāferi askafaxikani. ¹¹ Nāskafaifono keyokōichi tāpixikani, “Jesucristo nōko Ifora,” faifono. Askafakāki Apa Niosri inimamakōixikani.

Jesús Ifofaafāfe ato ōimasharatiro afeskax isharatirofomāki, a Jesús Ifofaafoma

¹² Nāskakē ēfe yora mīshtichi, ē mato fe ixō ē mato yoiaito mēxotaima mā ea nikapaoni keskafakī, ea nikakī finakōikāfe iskaratīa ē chai ikakī nono karaxa mēra. Jesús māto chaka mato soaxonō isharakōita shināsharakōikāfe afe īpaxakakī kachikiri fakakīma. Nāskakē meseyanā nikakī finakōifafāikāfe Niospa māto chaka mato soaxonō. ¹³ Niospa māto shinā mēraxō mato shināmafāīni a mato amapaiyai keskara mā anō. Nā apaiyai keskafakī, nānori mato shināmapai.

¹⁴ Nāskatari nā mato amapaiyai keskara akāfe, yōachēpekakima, askatari feratenāyamakāfe, ¹⁵ mā isharakōiano tsōa matoōnoa afaa chaka yoiyamanō. Askatamaroko yora chakafo mēra ikax mā isharakōiaito mato ōitirofo māmāi Niospa fakekōiax afaa chakafamisma. Akka mā ato mēra ixō ato ōimasharakāfe, oa fakishi fishifāfe chai chaxatiro keskafakī. ¹⁶ Nāskaxō Niospa meka sharaōnoa ato yoifofāfōfāikāfe afe īpaxanōfo. Nāskakē mā Cristo oaino ē matoōnoax inimaifnakōitiro, ēakairoko kaxpa Niospa meka ē mato tāpimanax, askatari ēa ē kaxpa yonomisma. ¹⁷⁻¹⁸ Ē mato yoisharamis mā Jesús chanīmara fakōinō. Akka Epa Nios ē yoitiro iskafakī: “Epa Niospa, ea mīa yoini keskafakī Filiposo anoafo mī Fake Jesúsnoa ē yoimis. Nā chanīmara fakōinōfo, a mī ato yoiai keskara akōixikani. Ē mia ato chanīmara famaōxō ea retexikani rakikīa,” ixō ē Epa Nios yoitiro. Akka ea retefiafono eōxō mā Jesús Ifofaano ē inimatiro. Nāskakē māri efe inimakāfe Niospa ea sharafaino matoōnoax ē natiro.

Timoteo fe Ipafrodito

¹⁹ Nōko Ifo Jesucristo nīchipaiyaino ē matoki samamashta Timoteo nīchipai mato ōikanō. Mā anā oxō matoōnoa ea yoiaito nikai ē inimakōixii. ²⁰ Akka tsōakai efeta iskafakī shināima, Timoteo fistichi shināi ē shināi keskara. Chanīma, na Timoteo mato noikōikī matoōnoa tāpipai mā Jesús Ifo sharafaamāki. Akka tsoakai na Timoteo keskarama. Nāskaxō ē mato noiai keskafakī nāatori mato noikōi. ²¹ Akka fetsafāfe āakōi apaiyai fo keskara fisti shināmisfo. Cristo Jesús ato amapaiyai keskara amisfoma. ²² Akka mā mā tāpia na Timoteo isharakōixō mato ōimamis efeta Niospa meka sharaōnoa ato yoimis. Nā fāke āfe apa feta yonotiro keskafakī na Timoteo efeta yonosharamis. ²³ Nāskakē Timoteo, ē mato ano nīchipai mato ōikanō. Mē tāpixō ē afeskaimākai, akka mē tāpixō mato ari ē Timoteo nīchi eōnoa mato tāpimanō. ²⁴ Akka ē nōko Ifo chanīmara fai, ea mato ari nīchiaino samamashta kaxō ē mato ōikai.

²⁵ Akka ē shinā nofe yora Ipafrodito mato ari nīchipaikī. Fekaxfiano nāato efeta yonokōimis na Ipafrodito mā ekeki nīchini, ē afara yopaito ea axonō. ²⁶ Na Ipafrodito mato ōisharapaikōi, mato shinākōi māmāi nikamiskē isinī ikaito. ²⁷ Chanīma, na Ipafrodito isinī ikōini, mā nakerati. Nāskaino akka Nios aō noikōikī mā sharafaita, eari noikōiyanā. Akka mā naano ē shināmitsaifinakōikeraita. ²⁸ Nāskakē ē mato ari nīchipaikōi mā inimakōinō matoki anā nokoaino, ēri shināmitsakōiyamaxiki. ²⁹ Nāskakē matoki nokoaito

inimayanā ifisharakōikāfe nōko Ifoōxō. Nāskakē nā mā Ipafrodito noiai keskafakī nā keskarafori fetsafo noikōikāfe. ³⁰ Akka na Ipafrodito Cristo yonoxoni mā nakeraita. Akka mā chai ikax ekeki oyamaino matoōnoa omiskōinixakī nā Ipafrodito ekeki oyamea ea axosharaxiki.

3

Jesús chanīmara faafo a chanīmara faafoma mēra ikaxō ato ōmatiro afeskax isharatirofomāki

¹ Efe yora mīshtichi, iskaratīa nōko Ifoōnoax inimakāfe. Mē mato kirika kenexōkatsaxakī, anā ē mato yoi. Akka mā nikakōisharanō ē mato yoi. ² Kexemesharakāfe, a yora chakafo fishtayamakāfe, nā paxta pōfe keskarafoki. Nāfāfe afara chakafamisfoki. Iskafakī mato yoipaikani kiki: “Mā foshki repa xateyamax mā Nios ari kaima,” ixō mato yoipaikani kiki. ³ Akka nō foshki repa xatexokai nōko chaka nō soatiroma. Cristo Jesús noko nāxoni nōko chaka noko soaxoxiki. Niospa āfe Fakeōxō āfe fakefo noko imatiro. Āfe Yōshi Sharaōxō nō Nios yoitiro iskafakī: “Nō mia noi. Mī sharakōi,” ixō nō yoitiro. Nāskakē nō akiki inimakōi ares fisti noko nimatiro. Mā nō tāpia nō foshki repa xateāoxokai noko afeska fatiroma. ⁴ Fetsafāfe yoikī iskafakani: “Ē shara famis. Nāskax ē Nios fe ĩpanaka,” ixō shināifono, ēri anori shināipaiki ē shinākī finapaoni. ⁵ Mē kāiax ocho nia ē oxano ea foshki repa xatenifo. Ēfi israelikōikī, ēkai osiama. Benjamīn ēfe xini ipaoni, ēfi āfe fenaki. Ēfe epa feta ēfe ēfa hebreoxomāi ea fake fiafono, nāskakē ēri hebreo. Askatari fariseo ē iyopaoni, nāskaxō Niospa Moisés yoipaoni keskara ē nikakōipaoni ēmāi fariseoxō. ⁶ Askatari Niospa meka nikasharapaikōikī a Nios Ifofaafo ē ato chakafapaoni. Askatari ē isharapaikōikī Moisés yoini keskara ē nikasharakōipaoni. Nāskakē eōnoa yoikī tsōa iskafatiroma: “Na Pablokai Moisés yoini keskara nikakōipaonima,” ixō tsōa yoitiro.

⁷ Akka nāfo taeyoi ē ōia ēfenā sharafinakōia iyopaoni. Akka iskaratīa ē ōia afokai anā afama. Cristo Ifofakī afo ē anā shināima mē shināmakikōia. Cristo fisti Ifofakī afe ĩpaxakī. ⁸ Akka a ē ipaoni keskara anā ē shināima. Nāfo mē shināmakikōia, afo shināi ē finakōia ipaoni. Akka ē shināi afokai afama, nā afara chaka potamea keskarafo. Akka ēfe Ifo Jesucristo fisti ē tāpīpaikōi, nāfi sharafinakōiaki. Ares fisti ea imasharatiro, a Moisés yoini keskarakai ē anā nikatiroma ea imasharanō. ⁹ Askatamaroko ē Cristo chanīmara faino Epa Niospa āfe Fakeoxō ea imasharatiro a keskara shara ē inō. Akka ē Nioski nokoaino ekeki inimatiro, ē Cristo fisti chanīmara fakē ea imasharanō. ¹⁰ Ē Cristo tāpīpaikōi afe rafesharaxiki. Niospa āfe kerex sharayaxō Cristo anā ofofani keskai, ēri āfe kerex shara mepai a keskara shara ea imanō. Jesucristo omiskōini keskai ēri aōnoax omiskōipai. Jesús naani keskai ēri askapai a keskara ixiki, afaa chakafaxikima, askatari afaa chaka shināixikima. ¹¹ Nāskakē a chakafo kachikiri fata, nā Jesús keskara sharakōi ē ipai, oa yora naax anā otoa keskara shara.

Ē Jesús Ifokōi fai nā ē akiki nokoaitīa

¹² Ē isharakōira ē ifiax ēkai isharakōiama. Askatari Jesús keskara ē ipaifi ē askakōima. Jesucristo ea Ifofamani ē a Ifofanō. Nāskakē ē Jesús Ifofakōini a keskara sharakōi ixiki. ¹³ Efe yora mīshtichi, ē Jesús keskara iyamafiai a ē ipaoni keskara ē anā shināima. Akka ē Jesús fisti Ifofai. Nā feronāfakēfo ichokani xonōnōnākī texkeakekafā ōtirofoma. Nā ifi nīchiti nia ari fisti ōiax

ichtirotirofo keskariakī afara chaka shinākima Jesús fisti ē shināmis a keskara sharakōi ixiki. ¹⁴ Nāskaxō afaa fetsa ē shināima. Nā Cristo Jesús ē shināmis Ifofapaikōikī. Akka Niospa ea katoni ē afe İpaxanō, Cristo Jesúsōnoax Epa Nios ari ē nokotiro, ariax a keskara sharakōi ixiki.

¹⁵ Mā Jesús Ifofakī nā ē mato yoimis keskafakī nānorikōi shinākāfe. Akka fetsafāfe a ē shināi keskara shināyamaifono, Niospa ato tāpimakī mēstekōi shara ato yoixii. ¹⁶ Akka nāfo nō tāpiax, shināsharakōita nō isharakōitiro, mā nōmāi Jesucristoōnoa tāpiax.

¹⁷ Efe yora mīshtichi, ē Jesús Ifofaa keskafakī māri Ifofakāfe. Mā nō mato ōimamiskī, nō ikai keskai māri askakāfe. ¹⁸ Mē mato mēxotaima yoitaifamis, nāskafekē afianā ē mato yoi oiayanā. Akka fetsafāfe na ē mato yoiai keskara nikakaspakani. Āto chaka xatekaspakakī Jesucristo ifi cruz ikakinoax noko nāxonī nikakaspakani. Nāskakanax Jesús noikaspanyā ikafo. ¹⁹ Jesús ato amapaiyai keskara shinātama āa apaiyaifo keskara fisti shināmisfo. Nā piāi fisti shinākata, a ayai fisti shināmisfo. Feronāfakefāferi kērofo shināmisfo, āto āfifoma. Kērofāferi feronāfake fetsafo shināmisfo āto fenefoma. Nāskara chakafos shinākī, nā keskara fisti tāpiafo. Akka nō chakama, nō isharakōimis imisfo. Nāskakanax rēfitirofoma, nā keskarāfo mā keyokani. Askatari nā omiskōipakenakafo mēra fokani. ²⁰ Akka nōfi askaramakī, nō Niospa fakefokī nō afe nai mēra İpanaka. Akka nō manai a noko İfimis nai mēranoax oxō noko ifiyonō, nōko İfo Jesucristo. ²¹ Nāato nōko yora chakakē noko fetsafaxoxii afe yora keskara sharafinakōia nō inō. Nāskaxō āfe kerex sharaōxō nōko yora noko fenasharafaxoxii afara chakafo nō finōinīfofanō.

4

Nōko İfo Jesúsnoax mēxotaima inimafafāikāfe

¹ Nāskakē efe yora mīshtichi, ē mato noikōikī ē mato ōisharapai. Nā ē mato shināitīa ē mea ē inimakōikakāini. Nāskakē efe fakefāfe, Jesús kachikiri fayamakāfe. İfo sharakōi fakāfe.

² Akka a xotofake rafe Evodia yafi Sintiqli ē ato yoisharapai mēnāpaikakīma isharakōinōfo nā yora fisti keskarakanax nōko İfoōnoax. ³ Yamā, mī efeta Nios yonoxomiskī, ē mia yoinō nā kēro rafe ato yoisharafe isharanōfo. Nā rafeta efeta Niosnoa meka shara yoimisfoki afe İpaxanōfo. Clementeri nofeta yoimis. Fetsafāferi efeta Niosnoa yoipaonifo. Nāskakē āto anefo Niospa mā kirikaki kenea afe İpaxanōfo.

⁴ Nāskakē Jesús māto İfokī mēxotaima inimakāfe. Afianā ē mato yoi, inimafinakōikāfe. ⁵ Nāskakē isharakōikāfe keyokōichi mato ōinōfo, isharakōiafora mato fanōfo. Mā chaima nōko İfo oi kiki.

⁶ Nāskakē afara afeskara afiaino shināchakayamakāfe, askatamaroko mēxotaima Epa Nios kīfiki. A mā fichipaiyai keskara yōkakāfe iskafakī kīfikī: “Aicho Epa Nios, mī ea nikasharakōimis. A ē yopai keskara tāpixō mī ea axosharamis,” ixō kīfikāfe. ⁷ Nāskakē mā ratepaiyaito Niospa mato inimamasharakōixii. Afara afeskara ifiaino Niospa nōko ōiti noko inimamaxotiro. Nāskakē nō tāpitiroma afeskaxora nōko ōiti noko inimamaxotiro. Askafiano Cristo Jesús nō chanīmara faino noko shināmasharatiro. Afara sharafoōnoa shinākāfe.

⁸ Efe yora mīshtichi, ē kirika kenekī keyokerana. Afara nā chanīmakōi fisti shinākāfe, askatari afara sharafos shinākāfe, askatari nā noko mēstekōi

shināmatiro shinākāfe, yorafāfe a afara sharafaifo keskarari shinākāfe, a Niospa noko axōai keskarafori shinākāfe. Askaxō nōko Ifo aicho fakāfe.

⁹ Afara a ē mato yoiai keskara yafi a ē mato tāpimana keskara akāfe. Nāskaxō afara fetsa ē akaito mā ōia keskafakī, māri askafakāfe. Mā askaito ōikī Niospa mātō ōiti mēra mato inimamasharakōitiro. Nāskax mato fe isharpakenaka.

Filipos anoafāfe kori ichanāfakaxō Pablo fomanifo

¹⁰ Ē nōko Ifoōnoax inimakōi, taeyoi mā ea kori manamayopaofinixakī anā mā ea manamamisma. Akka iskaratīa ea shinākī mā mā ea manamana ē aō pinō. Akka ea shināmakiāfora ē mato faima, ea manamatiroma meekī mā ea manamamisma. ¹¹ Ē afaayayamafixō ea afaa ināfoma ē mato famisma. Ē shināchakaima, Niospa anori ea tāpimana. Ē afaamais fiāx ē inimatiro, askatari afara ichapayax ē inimatiro. ¹² Akka mē tāpia afaamaisax afeskax ē itiromāki. Askatari mē tāpia a afara ichapayax ē itiro. Askatari mē tāpia afara afeskara ifiaino ē inimatiro. Nāskakē ē shināchakaima. Askatari māyaxri ē inimatiro, fonāifiāiri ē inimatiro. Afara mekefaxri ē inimatiro, afaa meke fayamafiāxri ē inimatiro. ¹³ Afara fetsafo ē atiro Cristo āfe kerex shara ea ināno.

¹⁴ Nāskafekē mā ea shinākī mā ea sharafa ē omiskōiāito. ¹⁵ Akka Filipos anoxō mā mā tāpia, nā ē Jesúsnoa meka shara yoikī taefaniūa noko ifipakexanō. Akka ē Macedonia anoax kaino, mā Nios Ifokōifaxō, mā ea kori manamani, ēmāi Niosnoa mato tāpimanano. Akka fetsafāfe ea afaa manamifoma. ¹⁶ Ē Tesalōnica ano iyoano, ē kori yopaito mā ea femayopaoni. ¹⁷ Akka ē shināima a ē afara fiāi fisti. Askatamaroko ē shināi mā ea sharafaino Niospa mato sharafa fafāfāinō, mato noikī. ¹⁸ Nāskakē iskaratīa ē anā afaa yopaima, mēmāi ayaxō. Ipafrodito ea fexoyamea a mā ea manamayamea tii. Nā ē fichipaiyai tiimaroko finōmainīfofā mā ea femayamea. Nā mā Nios noiai keskafakī eari noikī mā ea femayamea. Mā ea askafaito ōi matoki Nios inimakōixii. ¹⁹ Ēfe Niospa nā mā fichipaiyai tii mato ināxii. Epa Niosnā āfe afara sharakōifo nā ichapakōifo keyonakama, āfe Fake Cristo Jesúsxō mato ināsharaxii. ²⁰ Akka nōko Epa Niosfi nōko Epakōikī nā fāsi sharakōi, tsoa keskarama. Ares fisti sharakōi. Tsōakai a finōtiroma. Nā nōko Ifokōira nō fapanaka. Askara ipainōra.

Pablo mā mekai xatekī Filiposo anoafō meka shara ato fomani

²¹ Eōxō keyokōi a Cristo Jesús Ifofaafo ea ato yoisharaxokāfe. Askatari na nono efe ikafāferi nā Jesús Ifofaafāfe mato yoisharakani kiki. ²² Na nono ikafāfe Nios Ifofakanax, xanīfo César āfe pexe ano yonomisfāfe afāferi mato yoisharakani. ²³ Nōko Ifo Jesucristo mato noikī mato sharafanō. Nā tii ē mato yoi.

Pablo

Pablo Colosas Anoafo Kirika Kenexõ Fomani

Pablo Jesús Ifofafo kirika kenexõ fomani, Colosas anoafo

1-2 Ēkĭa Pablo, Niospa ea nĭchini, aato apaiyai keskafakĭ ē yorafo yoinõ Jesucristoõnoa. Nofe yora Timoteo feta nõ mato kirika kenexõ fomai. Mā Cristo Ifofakõikē, pexe rasi Colosas anoxõ Nios nikakõiyanañ. Nõko Epa Niospa mato noikĭ mato shināfafāinõ afanā mato fekaxtefanõma mā isharakõinõ.

Pablo a Jesús Ifofafo ato kĭfixõfafāini

3-4 Nā nõko Ifo Jesucristo āfe Apa Nios nõ mato kĭfixõfafāini. Nõ mato kĭfikĭ iskafaxokĭ aicho fakĭ māmāi nõ nikax mā Cristo Jesús Ifofakõikē. Nāskaxõ nā Jesús Ifofaa fetsafari mō ato noikõimiskē mā nõ nikamis. ⁵ Na meka shara chanĭmakõi Jesucristoõnoa mā mā nikamis. Jesucristo chanĭmara faax Nios ika ari mā afe ipaxatiro ixõ yoinifo mā mā nikamis. Na meka chanĭmara fakõixõ fetsafo mā ato noikõimis. ⁶ Na meka shara Jesucristoõnoa mā nikakĭ taefakĭ mā chanĭmara fakĭ finakõini. Nāskaxõ nikakĭ mā tāpini chanĭmakõi, Niospa mato noikĭ Jesucristoõxõ mōto chaka mato soaxoni mā chanĭmara fainõ. Nāskakē na meka shara, nikakani maifo tii anoafoi nāskarifiamisfo. ⁷ Nonori nofe yora Ipafras mato yoini. Akka nā Ipafras nofeta Cristo yonosharaxomis, nāskakē nāto Jesucristoõnoa mato yoipaoni. ⁸ Nā Ipafras matoõnoa iskafakĭ noko yoiatio nõ nikamis: “Na Colosas anoafo Niospa Yõshi Sharaõnoax isharakõikaxõ fetsafo noikõikani,” ixõ noko yoiatio nõ nikamis.

⁹ Nāskakē nā ē matoõnoa nikakĭ taefanitiā, ē mato Epa Nios kĭfixokĭ xatemisma. Kĭfikĭ ē iskafa fafafāini: “Epa Niospa, Colosas anoafo mĭ Yõshi Sharaõxõ mĭ ato amapaiyai keskafakĭ ato tāpimafe, mĭ ato tāpimanai keskafakĭ ato õiti mēraxõ mia tāpikaxõ mia Ifokõi fanõfo,” ixõ ē mato kĭfixõfafāini. ¹⁰ Nāskaxõ nā mato amapaiyai keskara mā akaino õi Nios matoki inimakõixii. Nāskax āfe Fake keskarakõi mā itiro. Nāskaxõ mā fetsafo sharafa fafafāikĭ mā Nios tāpiki finakõitiro. ¹¹ Akka Epa Niospa afama mĭshtifo shara fatiroki, āfe kerex shara mitsisipakõi mato inātiro afara afeskarafiaino aõxõ mā tenekõinõ. Nāskafikĭ mā tenetiro fena fenakĭma inimasharakõikai. ¹² Nāskakē mā inimakõi. “Aicho Epa Niospa,” mā fatiro nāatomāi noko imasharata afe yorafo ināpaiyai keskafakĭ nokorimāi ināito. Nõri afe yorafokē noko inimaxii, a ika anokai fakishma penasharakõi. ¹³ Nāskakē noko imasharakõia anā fakish mēra nõ inõma. Akka nā Satanás ika ano fakishifākõi. Nānoa Epa Niospa noko ifia, āfe Fake fe nõ ĩpaxanõ. Nāato āfe Fake noikõi. ¹⁴ Āfe Fāke noko nāxonikē aõxõ Epa Niospa noko ifia, nõko chaka noko soaxoyanā.

Jesús noko nāxonioõnoax Nios fe nõ isharapakenaka

¹⁵ Akka nõ Epa Nios õiyamafitirono āfe Fake Jesús mai ano oni. Nāskaxõ āfe Fāke noko tāpimani afe keskaramākĭ Apa Nios. Nā āfe Fake Jesús Apa Nios keskarakõi, āfe õiti keskarakõiri. Afaa oniataima Apa Nios fe nai mēra iyopaoni. ¹⁶ Āfe Fake Jesucristoõxõ Niospa keyokõi onifani, nai mēranoafoya nono mai anoafo. Nā nõ õitiromafoya, a nõ õitirofo onifani. Askatari āfe ājirifo nā afe ikafo onifata, niafakafāferi āto xanĭfori onifani. Epa Niospa āfe Fake Jesucristoõxõ keyokõi onifani. ¹⁷ Afaa oniataima Cristo iyopaoni. Āfe kerex sharaõxõ keyokõi kexesharakõimis. Nāskaxõ fishifo kexeta, xini kexeta, oxe

kexeta, nõko mai kexeta famis. Akka nãfo kexeyamaino, chakanai fetsekerana. Nai fe mairi chakanakerana. ¹⁸ Tsõakai Jesús finõtiroma, afaa oniataima keyokõi finõyopaonixakĩ, iskaratĩari keyokõi finõa. Nãfi nã chanĩmara faafãfe ãto Ifokõiki. ¹⁹ Nãskaxõ Epa Niospa yoikĩ iskafani: “È imis keskai ãfe Fakeri nãskakõimis, nãskax nãri efe Nioskõi, nõ nãskara rafekõi,” ixõ inimakai Epa Niospa yoini. ²⁰ Jesús ifi cruz ikaki mastaifono ãfe imi foax noko nãxoni nõko chaka noko soaxoxiki. Nãskakẽ aõnoax Epa Nios fe nõ anã isharatiro. Aõnoax keyokõi mai anoafoya nai mëranoafo afe isharatirofo.

²¹ Mãto õiti mëraxõ mã Nios noikaspayanã, mã chakakõi fapaoni. Nãskata mã Nios fe rafeyamata, afe yorarikai mã ipaonima. ²² Nãskafikẽ ãfe Fake Jesucristo nai mëraxõ mai ano nĩchini feronãfakekõi ikiyonõ. Nãskax ifi cruz ikakinoax noko nãxoni, aõnoax Epa Nios mato fe rafexõ mãto chaka mato soaxotiro a keskara shara mã inõ. Nãskax mã akiki nokoaito matoõnoa afaa chaka yoitiroma. Nãskaxori mã yoitiroma iskafakĩ: “Mĩ afara chakafamis,” ixõ aõnoa mã afaa yoitiroma. ²³ Nãskano na meka shara Jesucristoõnoa mã chanĩmara faxõ afara fetsa mã shinãyamaino Epa Niospa matoõnoa yoipakenakama iskafakĩ: “Mĩ afara chakafamis,” ixõ matoõnoa afaa yoipakenakama. Askatamaroko mã chanĩmara faax mã inimakõiaito mato ifixii mã afe ipaxanõ. Mã Jesucristo ãfe meka shara nikakĩ taefani keskafakĩ nãnorikõi keyokõi ãto tãpimani. Èkĩa Pablo, ã Epa Niospa ãfe meka yoifafãini Jesucristoõnoa ato yoikĩ.

Niospa Pablo yoini a Jesús chanĩmara faafo ato yonoxonõ

²⁴ Nãskakẽ ã inimai ã matoõnoax omiskõifi, mãri afara afeskaraino mã Cristo Ifosharakõi faano. Cristo nokoõnoax omiskõini keskai, ãri nã afe rafemisfoõnoax nã Niospa fakefo atoõnoax ã omiskõimis. È matoõnoax omiskõita iskaratĩari ã Cristoõnoax omiskõimis. ²⁵ Akka Epa Niospa ea katonĩ, a mato yonoxomis keskara ã inõ, ãfe meka shara ã mato yoinõ. Nãskaxõ ea yoikĩ iskafani: “Na maniafo tii anoa ãfe meka shara Jesucristoõnoa ato yoifofãsafafe,” ixõ ea yoini. Nãskaxõ ãfe kaifoma mẽra ea nĩchini. ²⁶ Na meka shara Jesucristoõnoa nõko xinifãfe tãpiyopaonifoma. Niospa ato tãpimayopaonima. Akka iskaratĩa Niospa noko tãpimani nõ afe yorafokẽ. ²⁷ Epa Niospa Cristoõnoa mato yoiyomis keskafakĩ keyokõi mato tãpimaxii, mato fisti tãpimatama, nã yora fetsafori ato tãpimaxii. Iskafakĩ ato yoixii: “Èfe Fake Cristo mato fe rafekakãini, nãskakẽ mã chanĩmara fatiro a ã ika ano efe ipaxakĩ. Nã Cristo isharakõiai keskafakĩ ãri mato askafatiro mãri isharakõinõ,” ixõ mato yoini.

²⁸ Nõ Cristoõnoa yoimis, keyokõi nõ ato yoifofãsafamis keyokõi nõ ato yoimis nikakõinõfo. Mã isharakõiano nõ keyokõi Niospa ferotaifi nõ õimasharapai a keskara shara ixii. ²⁹ Nãskakẽ ã mato yonoxokĩ finakõifafãini, Cristo ãfe kerex shara ea inãno.

2

¹ Akka ã mato yoipai mã tãpinõ, ã mato Epa Nios kĩfixõfafãini. Laodicea anoafo yafi fetsafori a ea õimisfoma nãfori ã to Epa Nios kĩfixõfafãini. ² Nãskaxõ ã mato kĩfixõfafãini mãto õiti mëranoax mã inimakõiyana, mã ranã mã nõinãkõinõ. Nãska faatanãxõ Epa Niosnoa xafakĩakõi mã tãpitiro, akka a iyopaonifãfe Cristoõnoa tsõa tãpiyopaonima. Nãskakẽ iskaratĩa xafakĩakõi mato tãpimapai aõnoa mã tãpisharakõinõ. ³ Nãato keyokõi tãpikõia, Apa Niospa tãpia keskafakĩ ãfe shinã mëraxori tãpikõia. Akka Epa Nios afarafo sharafoyakẽ,

Cristoõxõ mã tãpitiro. ⁴ Nãnori ã mato yoi, tsõa mato pãrayamanõ, meka fetsafaxõ fanĩrira mato yoipaikani kiki. ⁵ Ë mato fe iyamafixõ pena tii ã mato shinã. Akka matoõnoa nikai ã inimakõ, mã chanĩmara fakõixõ mã Cristo nikakõiaito.

Jesucristo nõko õiti fetsafaxõfaano a keskara shara nõ inõ

⁶ Nãskakẽ mã nõko Ifo Jesucristo chanĩmara fakõixõ, mã Ifofakõina. Nãskakẽ pena tii afe rafefafãikãfe. ⁷ Oa afara fanafono ãfe tapo mai mẽra chaikõ kaax ferotiroma keskara, Jesũsri nãskarakõikĩ, afe rafefafãikãfe afaa chakafatama a keskara shara ixikakĩ. Ipafras mato yoini keskafakĩ pena tii nikakõikĩ Jesũs chanĩmara fafafaikãfe. Nãskaxõ pena tii Epa Nios aichofa fafafaikãfe.

⁸ Nãskakẽ kexemesharakãfe, fetsafãfe mato pãrayamanõfo. Mã Jesũs nikakõiai keskafakĩ anori mato yoipaikani. Akka mã mato yoiaifo keskara mã ato nikakĩ kaxpakõ mã ato chanĩmara fatiro. Nãfãfe Cristoõnoa yoikõikanima, nãskaxõ mã imisfo keskakakĩ mato yoipaikani. Nã chanĩmara faafãfema shinãifo anori fisti mato shinãmapaikani.

⁹ Akka Cristo fe Apa Nios nãskara rafe, Cristo noko keskara feronãfakekõifixax Apa Nios imis keskara mã nãskakõini. ¹⁰ Nãfi keyokõichi ãto xanĩfokõiki, xanĩfo fetsafoya, a niafaka chakafãfe ãto xanĩfofo finõkõinĩfõfãna. Nãskakẽ mã Jesũs fe rafexõ mã afaa fetsa yopaima. ¹¹ Askatari mã Cristo Ifofai akka feronãfakefãfe ãto foshki repa xatepaonifo, nãskaramã feyafakatsaxakakĩ. Akka mã foshki repa xatefiafono mãto chaka mato soaxotiroma. Cristo fistichi mãto õiti mato fetsafaxotiro, mãto chaka mato soaxotiro afianã a mã chaka apaoni keskara mã anã atama a keskara shara mã inõ. ¹² Akka mã maotisai faka mẽra mã ikinitĩa, mã mã chakafapaonifo oa maia keskara, askatari mã Jesũs maifanifotĩa a mã afara chakafapaonifo oa maia keskarafo. Mã faka mẽra iki maotisameax mã fininãkafãni oa Jesũs fe fininãkafãni shinãtsatiro mã a keskara sharakõ ixiki. Niospa ãfe kerex sharaõxõ afianã Jesũs otofani mã nõ chanĩmara fai. Askatari mã mẽranoax Jesũs otonitĩa, mãri afe otõni keskara itiro, a keskara sharakõ ixiki. ¹³ Mã Jesũs Ifofamax mã yora naa keskara mã iyopaoni. Nãskaxõ mã afara chakafapaoni mãto chaka xatexoma. Nãskafikẽ Epa Niospa Cristo otofani afe nipaxanõ. Nãskarifiakĩ matori aõxõ nimapakexatiro, nãskaxõ nõko chakafo mã noko soaxona. ¹⁴ Shinãkapo. Keyokõ nõ chakafamis keskara nõko chakafo Epa Niospa noko soaxoni, anã afoõnoa shinãyamaxii. Nãskano Niospa yoini keskara nõ nikatama afara fetsa nõ chakafapaoni. Nãfo keyokõ nõ chakafamisfo keskara kenepakea. Askafixõ ifi cruz ikakinoa Jesũs mastanifoxõ não nõko chaka noko soaxoni. ¹⁵ Akka Cristo ifi cruz ikakinoax noko nãxonixakĩ, Satanãs yafi keyokõ niafaka chakafo finõkõia. Nãskakẽ noko anã afeskafatiroma, anã nõko ifo ixõ noko ikitirofoma. Nãskakẽ Jesũs ifi cruz ikakinoax naino Niospa keyokõ maifo tii anoafõ ato ispani na niafaka chakafo anã kerexfoma.

Jesũs ika ari nai mẽra sharakõ nã fisti fichipaikãfe

¹⁶ Akka mãto xinifãfe ãto feyafati ipaoni xinia fena ikaino fista apaonifo. Askatari oxe rama kãiyaino fista apaonifo. Akka mato yoitirofo iskafakakĩ: “Afaa mã pitiroma askatari afaari mã ayatiroma. Askatari nõko pena tenetitĩa mãri tenetiro,” ixõ mato yoitirofo. Akka mã askayamaino fetsafãfe mato mekafakĩ ichatirofo. Mato askafaifono ato nikayamakãfe. ¹⁷ Akka mã mãto xinifãfe ãto feyafati noko õimatirofo afe keskara iximãkai a Cristo oaino. Akka mã Cristo oano mã fisti nõ Ifofatiro. Nã nõ feyafamis keskara nõ anã

atiroma. Cristo fisti nõ nikatiro a nõ ayopaoni keskara nõ anã axikima. ¹⁸ Õisharakãfe fetsafãfe mato pãrapaikani kiki iskafakakĩ: “Nõ afaa tãpiama. Æjirifo nõ kĩfitiro,” ixõ mato pãrapaikani. Afãfe afaa õiyamafikatsaxakakĩ afama mĩshtifo yoipaimisfo. Æto shinãmã shinãkata kakapaikõimisfo, Niospa shinã keskarakai shinãmisfoma. ¹⁹ Afokai Cristo fe rafepaikanima. Akka Cristo nõko mapo keskara askatari nõ ãfe yora keskara. Nãskaxõ nõko yora nõ kexesharax nõ mitsisipakõi itiro. Nãskatari nõko pono efapayafo, nõko pono mĩshti, nõko nami mẽranoax ichanãtirofo. Afeskatama nõ isharakõinõ. Akka nõ Cristo fe rafekõiaito Epa Niospa ãfe Fãkeoxõ ãfe kerex shara noko inãtiro a keskara shara nõ inõ. Nãskarakõi noko axopai.

²⁰ Mã oa Cristo fe naa keskara mã ini. Nãskakẽ iskaratĩa a mã chakafapaoni keskara mã anã akima. Askatamaroko mã isharakõimis. Mã askaito nã chanĩmara faafãfema mato afaa yoitirofoma. Nãskafekẽ, çafeskakĩ mã ato nikaimẽ, mã ato nikaxõ nã mato yoiaifo keskara ma apai? Nãskakẽ ato nikayamakãfe. ²¹ Nãskakẽ mato yoiki iskafapaikani: “Na afarafo meyamakãfe, afori piyamakãfe, mato inãifonori mãto mẽkemã achiyamakãfe,” ixõ mato yoipaikani. ²² Akka na mato yoipaiyaifo keskara Niospa anori ato yoia. Æa shinãkaxõ mato yoipaikani. Akka nã mato yoipaiyaifo keskara nõfo mã keyoxii, anãkai afo inakama. Nãskakẽ ato nikayamakãfe. ²³ Chanĩma, yora fetsafãfe shinãkĩ iskafakani. Na ato yoiaifo keskara shara, nafãfe tãpikõiafo, a Niospa noko yoini keskaranĩ tãpikõiafo. Nãskakẽ Niospa ãfe ãjirifo kĩfifãfikani. Nãskakatari ato fanĩra mekafamisfoma, askatari ãto yorari mese famisfoma ãa koshamemisfo. “Nafõ sharakõifo,” ixõ atoõnoa yoipaikani. Akka afokai isharakõimisfoma. A afarafo chakafaifo keskarakai xateafoma, chanĩma nõfo kakapaikõimisfoki.

3

¹ Akka Cristo naax anã otoiñakafani keskai mãri nãskariai afe otoiñakafani keskara mã itiro mã isharakõiax afe ipaxakĩ. Cristo iskaratĩa Apa Nios fe ika afeta keyokõi ikinã. Nãskakẽ aõnoa shinãta nã mato amapaiyai keskara aõnoa shinãfafãikãfe. ² Nãskakẽ nã Niospa fichipaiyai keskara fisti shinãkãfe, nãskakõixikakĩ. Akka nono mai anoxõ yorafãfe afara chakafapaiyaifo keskafakĩ mãri askafayamakãfe. ³ Anã ã mato yoi Cristo noko nãxonĩ. Akka mã oa Cristo fe naa keskara iyoni, nãskakẽ iskaratĩa mã afe rafekakaini, Epa Nios feri mã askakãini. Nãskariai Epa Niosri mato fe rafekakaini. Mã askaito tsõa mato tãpitiroma, a mã Cristo fe rafekĩ keskai ari askaxiki. ⁴ Cristo anã mai ano fotofaino mãri afe ixii. Nãato noko ikipakenaka. Nãskakẽ a keskara sharakõi nõri afe ixii, keyokõichi yorafãfe noko õixikani.

Nõ chaka iyopaonixakĩ iskaratĩa nõ õiti fena sharayakõi

⁵ Nãskakẽ a mã afarafo chakafapaoni keskafakĩ anã askafayamakãfe. Askarafo anã shinãyamakãfe. Askatari mãto ãfimafori chotayamakãfe, kãrofãferi mãto fenemafori chotamayamakãfe. Nãskaxõ ato chaka shinãmayamakãfe. Afarafori noiyyamakãfe feronãfakefãfe mãto ãfima fichipaiyamakãfe, kãrofãferi mãto fenemafo fichipaiyamakãfe. Afara chakafori fichipaiyamakãfe, nã mã fichipaiyai fisti fichipaiyamakãfe. Mã askakĩ Nios mã noima, nã afarafo fisti noikĩ. ⁶ Askara chakafo Niospa õipaima, nãskakẽ ato omiskõimakĩ finakõixii nikayamaifono. ⁷ Nãskakẽ taeyoi chakakõi mã iyopaoni Nios nikamax. ⁸ Mã mã askapaoniki. Akka iskaratĩa a chakafo shinãmakãfe. Anã õitifishkiyamakãfe, anã chaka shinãyamakãfe,

ato chakafayamakāfe, ato ŭchayamakāfe, askatari māto axfapa meka chaka yoiyamakāfe. ⁹Nāskakē mā ranā pāranōnāyamakāfe, mā taeyoi ipaoni keskara a chakafo mā mā potakōiakī. ¹⁰A mā apaoni keskara anā atama iskaratīa, mā mā Jesucristo fe rafekōia a keskara shara ixiki. Akka Epa Niospa māto ōiti mēra fena sharakōi mato ōi. Nāskakē a keskara sharakōi mato imafafāini, aōnoa mā tāpisharakōinō. ¹¹Nō Cristo Ifofakē Niospa keyokōi nāskarafos noko ōi. Judeofo yafi a judeofoma, a kene tāpiafoya a kene tāpiafomari, yorafoya nafafa āto yonomatifofoya a āto yonomatifomari Niospa nāskarafos noko ōi. Keyokōi nō afe yoraxō nō Jesucristo fisti yopakōi.

¹²Niospa mato noikī mato katoni afe yorafa mā inō. Aa keskara shara mato imaxiki. Nāskakē fetsafo noikī ato sharafa fafafāikāfe. Nāskakē fetsafo shināki nā mā apaiyai keskara fisti shinātama, fetsafāfe apaiyifo keskari shinākāfe, oi tsū faxō ato yoifafāikāfe. ¹³Nāskakē fetsafo fe mēnāpaitama ato yoisharakāfe raenāsharaxikāki. Nōko Ifāfe mato raefa keskfakī fetsafo fe raenā faatanāsharakāfe. ¹⁴Nāskakē nā ē mato yoiyai keskai, keyokōi noinākāfe, nō noināsharafinakōiakī. Nāskai nō noināx nō isharakōitiro, nā nōko Ifāfe noko yoini keskai nō noināsharakōiax nō nāskasharakōitiro. ¹⁵Nāskakē Cristo nikasharakōikāfe māto ōiti sharanokai mā fochishpanā faatanātiro. Askatamaroko aōnoax isharakōiax nā yora fisti keskara shara mā itiro. Nāskakē Epa Niospa mato katoni aōnoax mā isharakōita fetsafo mā afeska fanōma. Nāskakē mā Epa Nios yoitiro iskafakī: “Aicho Epa Niosi, ēfe ōiti mā sharafaxōa,” ixō mā yoitiro.

¹⁶Cristo noko tāpimani keskfakī māto ōiti mēra nanekōikāfe. Nāato mato ūināki āfe meka tāpisharakōixō fetsafori yoisharakāfe isharaxikāki. Māto ōiti mēraxō Nios aicho fata David fanāini keskai māri fanāixota āfe mekaōnoari fanāixokāfe. ¹⁷Nāskaxō nā mā apaiyai keskfakī yoikāfe iskafakī: “Aicho, Epa Niosi. Nōko Ifo Jesucristoōxō nā nō apaiyai keskfakī keyokōi mī noko axōfafāimis,” ixō yoifafāikāfe.

Nō Jesús Ifofakōinax aōnoa nō afeskatiromāki

¹⁸Kērofāfe, māto fenefāfe mato yoiāifāfe ato nikasharakōikāfe. Nāskax mā isharakōikai nōko Ifāfe mato yoiyai keskai. ¹⁹Feronāfakefāfe, māto āfifō noikōikāfe ato fe feratenāyamakāfe.

²⁰Fakefāfe, māto epa yafi māto efa nikakōikāfe. Mā askaino nōko Ifo matoki inimakōi kiki. ²¹Epafo feta efafāfe, māto fakefo ferateyamakāfe, māto fakefāfe shināki iskafayamanōfo: “Ooa, ēfe epa feta ēfe efa ea feratenafo,” ixō shināyamanōfo.

²²Āto yonomatifāfe, māto ifofo ato nikakōikāfe nono mai anoxō. Akka mato ōiaifonos ato yonoxokakīma, mato ōiamai fonori ato yonoxokāfe. Nā māto Ifo Jesucristo mā noiaino, matoki inimanō ato yonoxosharakāfe. ²³Afara yonokī inimayanā axosharakōikāfe. Nōko Ifo shināki ato yonoxosharakāfe. ²⁴Nāskakē shināmakiyamakāfe mā mā tāpiaki nōko Ifo chipo afara sharafo mato ināxii kiki. Mā nōko Ifo Jesucristo yonoxosharamiski, nāfi māto Ifokōikī. ²⁵Akka nā afara chakafamisfo, nāfo omiskōi finakōixikani afara chakafakat-saxakakī. Nāskakē Niospa fetsa keskarafo noko ōima, nāskarafos noko ōi.

4

¹Ato yonomamisfāfe, māto yonomatifo ato paraxō yonokakīma ato noisharayanā afara sharafo ato ināsharakāfe ato parakakīma. Mā mā tāpiakī māri Ifoyakī, māto Ifāfe nai mēraxō mato ōifafaini kiki.

² Nāskakē Epa Nios kīfiki xateyamakāfe, kīfikī afara fetsa shinākakīma, Epa Nios fisti kīfikī iskafakāfe: “Aicho Epa Niosi, mī ea sharafa fafāfāini,” ixō kīfikāfe. ³ Nāskakē nokori kīfixokāfe, Epa Niospa fetsafo mēra noko nīchiano Cristoōnoa nō ato yoisharanō. Afāfe Cristoōnoa nikamisfomaki. Akka ē Cristoōnoa meka shara yoiaito yorafāfe ea karaxa mēra ikimanifo. ⁴ Ea Epa Nios kīfixōfafāikāfe xafakīakōi Jesucristoōnoa anā ē ato yoinō.

⁵ Akka nā Jesús Ifofaafoma mēra mā ikaki ato ōimakāfe mā isharakōixō. Nāskaxō nā mā atoki nokoaitīa Jesucristoōnoa ato yoisharakāfe. ⁶ ato fe mekakī meka shara fisti ato yoifafāikāfe, ato kaxemetsama fakakīma ato yoisharakōikāfe, āto ōiti mēraxō shināchakanōfoma. Mā askakī nā yorafo mā ato kexesharatiro.

Pablo mā mekai xatekī Colosas anoafo ato meka shara fomani

⁷ Nofe yora Tīquico, ē aō noikōi. Nāato efeta nōko Ifo Jesús yonoxomis. Nāskakē aato eōnoa mato yoi kiki ē afeskax nono ikamākī. ⁸ Nāskakē ē mato ari nīchia, aato mato yoinō afeskax nono nō ikamākī, askatari mato inimamasharakōixiki. ⁹ Nā nofe yora Onīsimōri afe kai, nāri ē noikōi. Nā mato fe iyopaoni, nofeta nōko Ifo Jesúsnoa yoi inimakōimis. Nā rafeta matoki noko kaxō mato yoikani nono afe keskaramāki.

¹⁰ Akka na efe karaxa mēra imisto Aristarcori mato meka shara fomai. Marcosi mato meka shara fomai, nā Marcos Bernabé āfe chai. Nāskakē nā Marcos matoki nokoaito ē mato yoia keskafakī ifisharakāfe kexesharayanā.

¹¹ Na feronāfake āfe ane Jesús nāatori mato meka shara fomai, āfe ane fetsa Justo. Nāfāfe judeofo mēraxō Nios Ifokōi fakaxō efeta Nios xanīfoōnoa yoikī yonomisfo. Nāskafakakī ea inimamakōimisfo. Akka ēfe kaifāfe nonoxō efeta Nios yonoxomisfoma, nā ē mato yoiaifo feta ē Niosnoa yoimis. ¹² Na feronāfake Ipafrasri meka shara mato fomai, nāatori Cristo yonoxomis, nā mato mēra iyopaoni. Nāato mēxotaima matoōxō Epa Nios kīfikī iskafa fafāfāini: “Epa Niosi, mī ato amapaiyai keskafakī ato amafe afaa fetsa shinānōfoma. Nāskakanax mī Fake Jesús ōiti keskara shara inōfo,” ixō mato kīfixōfafāini.

¹³ Akka mē ōia na Ipafras matoōxō shināchakakōiaito. Askatari nā pexe rasi Laodicea anoafo yafi Hierápolis anoafo ato Epa Nios kīfixōfafāini. ¹⁴ Na Lucas ato sharafamis, ē aō noikōi. Nāato Demās feta mato meka fomakani.

¹⁵ A Jesús Ifofaafō Laodicea anoafo ea ato yoisharaxōfe. Nīnfasri ea yoisharaxōfe, a āfe pexe anoax Nios Ifofakanax ichanāmisfōri ea ato yoisharaxōfe. ¹⁶ Akka na kirika kene ē mato fomai mā mā ōixō, nā Nios Ifofaafō Laodicea anoafori ato fomakāfe akairi ōinōfo. Māri na kirika kene ōikāfe Laodicea anoxō mato mana manafono. ¹⁷ Nāskakē Arquipori ea yoikī iskafaxokāfe: “Epa Niospa mia yoia keskafakī axosharakōife,” ixō ea yoisharaxokāfe.

¹⁸ Ēkīa Pablo, ē mato kirika kenexoni. Mato yoisharakī, ēfe mīfikōichi ē kenei. Nāskakē ea shināmakiyamakāfe ē karaxa mēraxō ikakī. Niospa mato noikī matoōnoa shināfafāinō. Nā tii.

Pablo Tesalónica Anoafo Kirika Kenexõ Fomani

Pablo a afe rafeafo feta a Tesalónica anoxõ Nios Ifofaafõ ato kirika kenexõ fomani

¹ Ëkĩa Pablo, nõ mato kirika kenexõ fomai, Silvano ikaino Timoteo ikaino nã tiito nõ mato fomai. Nã pexe rasi Tesalónica anoxõ Nios Ifofaafõ nõ fomai, anoxomã Epa Nios yafi nõko Ifo Jesucristo mã Ifokõi faafono. Epa Nios feta nõko Ifo Jesucristo mato noikĩ mato sharafanõ fekaxtetama mã isharakõinõ.

Tesalónica anoafãfe Jesús Ifokõi fakaxõ ato õimanifo

² Mëxotaima nõ matoõxõ Epa Nios aicho fakĩ nõ kifiki iskafa fafafãini. ³ “Epa Niosi, na Tesalónica anoafãfe, mia noikakĩ mia yonoxosharamisfo, nãskakaxõ fena fenakãkima nõko Ifo Jesús manasharamisfo nokoki anã oi kiki,” ikaxõ. Nãnori pena tii ã mato kifixõfafãini. ⁴ Efe yora mĩshtichi, Niospa mato fãsi noikĩ mato katonĩ afe yorafo mã inõ. ⁵ Nõ mato Niospa meka sharaõnoa yoimis afeskax nõ afe ipaxatiromãki. Akka nõko mekapas nõ mato yoimisma, askatamaroko Niospa Yõshi Sharayaxõ ãfe kerex sharafoyaxõ nõ mato Jesúsnoa nã meka chanĩmakõi nõ mato yoimis. Akka mã mã tãpia nõ mato fe isharapaoni. Nõ askaino mã Jesús Ifofakõini.

⁶ Akka nõ Jesús Ifofai keskafakĩ mãri Ifofani. Nãskakẽ Niosnoa meka shara nõ mato yoiaino inimakõiyana mã nikakõini, Niospa Yõshi Sharapamã mato inimamakõiaino fetsafãfe mato omiskõimafiaifono. ⁷ Nãskakẽ mã isharakõixõ mã ato õimakõia nã Nios Ifofaafõ Macedonia anoafo yafi Acaya anoafo. ⁸ Matoõxõ nõko Ifãfe meka shara nikakĩ taefanifo Macedonia anoafo feta Acaya anoxõ. Akka anoxos nikanifoma. Nã pexe fetsafo anoxori nikanifõ. Nãskaxõ mã tãpiafo mã Nios Ifokõifakẽ. Nãskakẽ nõ anã matoõnoa ato yoitiroma, mãmã matoõnoa tãpikõiafono. ⁹ Askatamaroko fetsafãfe nokoõnoa ato yoimisfo iskafakãki: “Tesalónica anoafãfe nõko Ifo Nios Ifofakõinafo, nãskaxõ Pablo yafi a afe rafeafo ato sharafayanã a yoiaino keskara ato nikakõimisfo. Nãskakaxõ afara fetsa onifakaxõ, ‘Na nõko niosra,’ ikaxõ anã kifimisfoma, Nioskõi Ifofakakĩ. Nãskakaxõ nã nipanaka Nioskõi yonoxomisfo. ¹⁰ Akka nã Niospa Fake Jesús mã manakõi nai mëranoax anã oaitia. Akka Niospa ãfe Fake ofofani. Nãato noko ifitiro a omiskõiaifo mëranoax nõ omiskõinõma.”

2

Pablo Tesalónica anoxõ Jesúsnoa ato yoini

¹ Efe yora mĩshtichi, mã mã tãpia kaxpa nõ mato õikai kanima. Jesúsnoa nõ mato yoikai kani nikakĩ mã Ifofakõinõ. ² Mã mã tãpia nõ matoki kayoamano na Filiposo anoafãfe noko ichayanã noko omiskõimapaonifo. Nãskaxõ noko xatemapaiyafono, Epa Niospa ãfe kerex shara noko inãno, nõ ratetama na meka sharaõnoa Jesúsnoa nõ mato yoimis keskara tsõa noko xatematiroma. ³ Akka nõ mato yoiki fanĩrira nõ mato yoimisma, nõ mato yoisharakõimis. Askatari nõ mato chakafakĩ yoimisma, askatari nõa nõ mato parakisma. ⁴ Askatamaroko Epa Niospa noko katonĩ ãfe meka shara Jesúsnoa nõ mato yoinõ. Akka nõkai yorafo nokoõnoa shinãmapaitiroma. Askatamaroko nokoõnoa Nios fisti nõ inimamapai, nã fistichi nõko shinã mëraxõ nõ shinã

keskara tãpikõia. ⁵ Mã mã tãpia nõkai matoõnoa meka shara yoimisma, mãri nokoõnoa yoisharanõ. Êkai mato feparamisma, “Noko afara shara inãnõfora,” ixõ. Akka a ê mato yoimis keskara Epa Niospa tãpikõia, nãato ea õifafaini. ⁶ Nõkai fetsafo nokoõnoa yoisharakãfe nõ ato famisma. ⁷ Akka nõ aõnoa yoinõ noko nõchini ãfe meka shara nõ mato yoinõ. “Akka noko afara afeskarafaxokãfe,” ixõ nõ mato yoikerapaoni. Akka ãfa ãfe fake yome kexesharamis keskafaki nõ mato kexesharapaoni. ⁸ Nõ mato noikõikĩ inimakãi nõ mato Niospa meka shara yoianã nõa nõ inãmepaikõini, mã Nios tãpisharakõinõ. Nãskaxõ nõ mato noipaoni keskafaki, iskaratãa nõ mato noikĩ finasharakõimis. ⁹ Efe yora mĩshtichi, mã mã tãpia nõ mato mëraxõ yonomiski omiskõikõiyana, a nõ fichipaiyai fixiki, penata yonota fakishchãiri nõ yonomis. Akka nõ mato afaa kaxpa fiapaimisma, Niospa meka sharaõnoa mato yoianã.

¹⁰ Akka mã mã noko õimis, Niospari tãpia nõ tanaima isharakõimiskẽ mato fe a mã Nios Ifofaafõ fe. Nãskakẽ nokoõnoa tsõa afaa chaka yoitirofoma. ¹¹ Askatari mã mã tãpia nõ mato inimamakõimis, mã shinãmitsaitori nõ mato askafamis inimamamis oa ãpa ãfe fake inimamatiro keskafakĩ. ¹² Akka nõ mato yoimis mã isharakõinõ a Nios Ifofaafõ imis keskai. Akka nãato mato katonĩ Jesús keskara shara mã ãpaxanõ.

¹³ Nãskakẽ mẽxotaima nõ Epa Nios aicho fatitaifaa mãmãi noko nikasharaito, nõ mato Niospa meka sharaõnoa yoiaito. Nãskakẽ mã yoikĩ iskafani: “Na meka shara mã noko yoiai yõra mekama, Niospa meka shara,” ixõ mã yoini. Chanĩma, Niospa mekakõi nõ mato yoimis. Nãskakẽ mã ãfe meka nikakĩ mã chanĩmara faino mato shinãmasharai Jesús keskara shara mã inõ. ¹⁴ Efe yora mĩshtichi, mãri omiskõini mãto kaifãfe mato omiskõimanaifono. Nãskarifiãi mã mã ikai keskai a Nios Ifofaafõ Judea anoxõ Cristo Jesús Ifofakanax omiskõikani ãto kaifo judeofãfe ato omiskõimanaifono. ¹⁵ Nã judeofãfe nõko Ifo Jesús retenifo, taefakĩ a ato Niospa meka sharaõnoa yoimis ato retepanifo, nãskaxori noko omiskõimayanã noko potanifo. Nãskaxori Nios aicho fayamato yorafa chakafakĩ mekafamisfo. ¹⁶ Askatari a judeofoma Nios fe ãpaxanõfo nõ ato yoisharapaiyaino, noko ato yoitima famisfo. Nãskakẽ afaa chakafakĩ finayamafikatsaxakakĩ mã afara chakafakĩ finakõimisfo. Akka iskaratãa anã tenetiromameki Niospa ato omiskõimaki finakõi.

Pablo Tesalónica anoafõ anã ato õipai kapaini

¹⁷ Efe yora mĩshtichi, mã nõ mato fe paxkanãifinixakĩ, nõa nõ shinãki mato õiamafikĩ mẽxotaima nõ mato shinãtaifai nõko õiti mëraxõ. Akka nõ kaxõ nõ mato õisharapaikõi. ¹⁸ Akka mã nõ mato ari kapaitaiamis, nãskaifi êroko mẽxotaimakõi mato ari kapaikõimis. Nõ askafiaino, akka Satanás noko katimafamis. ¹⁹ Nõ mato yoimis Jesús keskara shara mã inõ. Nãskakẽ Jesucristo oaino keyokõichi tãpitirofo Jesúsmãi Ifokõi fakaxõ. Nãskakẽ Jesús õiaino matoõnoax nõ inimakõixi, nõ mato yoipaoni keskaramãi mã nikakõimiskẽ. ²⁰ Chanĩma, nokoõxõ mã Jesús Ifofakõinafono nõ inimakõi. Nãskakẽ Epa Nios nokoki inimakõi.

3

¹⁻² Nãskakẽ nõ anã tenetiroma meekĩ nõ shinãita nono Atenas ano nores nẽtexiki, nãskaxõ nofe yora Timoteo nõchixiki mato õikanõ. Na Timoteori Nios yonoxomis, nãato nofeta yonomis Jesucristoõnoa meka sharaõnoa ato yoikĩ. Nãato mato yoikĩ mato inimamasharakõitiro. ³ Nãskakẽ ê matoki Timoteo nõchini: “Omiskõikãki anã Niospa meka nikatirofomara,” ixõ. Akka

mã mã tâpia na nõ omiskõiai keskara. ⁴ Akka nõ mato fe iyoxõ, nõ mato yoifafäiyamea, nõ omiskõixiira fakī. Nõ mato yoifafäiyamea keskai mã askakõia, nãskakē mã mã tâpia. ⁵ Nãskakē ē anã tenetiroma meekī, ē Timoteo nīchiyamea mato yõkatanõ, a mã Jesús Ifofapaoni keskafakī ai mã Jesús Ifofamãkī ē tâpipaikī. Akka ē ratekõiyamea, “Niafaka chakata ato afara chakafamaira,” ikax. Akka nõakõi kaxpa Niospa mekaõnoa nõ mato yoiyamea ikerana.

⁶ Akka Timoteo mã Tesalónica anoax anã oa mato õitani. Meka shara matoõnoa noko yoitoshia, mã Jesús Ifofasharayanã mã noinãsharakõiaito. Noko yoia mã noko shinãyanã mã noko noikõiaito, askatari mã noko õisharapaikõiaito, nã nõ mato õipaiyai keskafakī mã noko õisharapai. ⁷ Nãskakē efe yora mĩsttichi, noko Jesúsxõ omiskõimayanã noko fekaxtefaifono mã Jesús Ifo sharafakī mã noko inimamakõimis. ⁸ Akka mã mã Jesús Ifofashara, mã anã afaa fetsa shinãima. Mã nõ tâpiax nõ inimasharakõi nõ isharakõitiro. Nãskakē afara afeskaraino nõ tenetiro. ⁹ Nõ matoõnoa shinãki nõ Epa Nios kīfikī, nõko õiti mēranoax nõ fãsi inimakõi. Nãskakē nõ matoõxõ Epa Nios kīfiki nõ aichofa fafafãini. ¹⁰ Nãskakē penata yoita fakishi yoita nõ Nios kīfifafãini matoõxõ, noko mato ari nīchiaino nõ mato õikanõ a mã tâpiamafo nõ mato yoixiki mã Jesús Ifofakõinõ.

¹¹ Nãskakē Epa Nios feta nõko Ifo Jesucristo mato ari noko nīchipainõ nõ mato õikanõ. ¹² Nõko Ifãfe mato shinãmasharaino mã noinãi finakõinõ, fetsafori mã noisharanõ, nõ mato noiai keskafakī mãri keyokõi yorafo noisharakõinõ. ¹³ Mã askaino Epa Niospa mãto õiti mēraxõ mato shinãmasharai, Jesús Ifo sharafayanã mã afaa chakafayamanõ. Mã askaino nõko Ifo Jesús afe yorafoya oaitia mãri a keskara shara ixii, Epa Niospa õiaino.

4

Afeskax isharaxõ nõ Nios inimamatiromē nokoki inimanõ

¹ Efe yora mĩsttichi, mē mekai xatekī ē mato yoinõ. Nõ mato yoipaoni afeskax mã itiomãkī Nios matoki inimanõ. Akka nã nõ mato yoipaoni keskai mã mã askakõia. Nãskakē anã nõ mato yoi noko nikakapo. Mã Nios Ifofaa keskafakī nõko Ifo Jesucristoõxõ Ifofakī finakõikãfe.

² Akka mã mã tâpia nõko Ifo Jesús noko yoini keskara, nãnorikõi nõ mato yois. ³ Akka Niospa fichipai a keskara shara mã inõ. Nãskakē tsõa ãfe ãfima chotatiroma. Kērofãferi ãto fenemafo chotamatirofoma, ⁴ Askatamaroko ãfiyatirofo ãfe ãfi noiyanã ãfe ãfifes ixiki. ⁵ Nãskata afara chakafapaimiskõi iyamaxikakī, a Nios tâpiamafãfe amisfo keskara axikakima. ⁶ Akka Epa Niospa yoini iskafakī: “Fẽtsa ãfi fe ipaiyamakãfe. Tsoa fomãyamakãfe fetsa ãfi fe ixiki,” ixõ Niospa yoini. Akka nõ mato yoini keskai, tsoa askayamakī afara chakafaifono Epa Niospa ato omiskõimaxii. ⁷ Epa Niospa noko katonima nõ afara chakafanõ. Askatamaroko nõko katoni a keskara shara nõ inõ. ⁸ Nãskakē a ē mato yois keskara tsõa nikayamakī atokai yora fisti nikakaspaima. Niosri nikakaspai, nãato ãfe Yõshi Shara mato inãfiano a mato amapaiyai keskara mã anõ.

⁹ Ëfe mekakai mã fichipaima mã ranã noinãixiki. Epa Niospa mato tâpimani mã noinãnõ. ¹⁰ Mã nõ tâpia nã Nios Ifofaafõ Macedonia anoxõ mã ato noikõiaito. Nãskakē nõ mato yoisharapai, mã ato noiki finakõinõ. ¹¹ Nãskakē isharakãfe mãto õiti mēraxõ afanã mato fekaxtefanõma. Fẽtsa afara afeskarafaino aõnoa shinãchakayamakãfe. Nã Niospa mato amapaiyai

keskara fisti akāfe. Askatari mā yonotiro xanikima. Nānori nō mato yoimiski. ¹² Nāskafakī mā yonotiro a mā fichipaiyai fixiki. Kaxpa afaa ato yōkayamakāfe. Mā askaito a Nios Ifofaafāfema matoōnoa shinākōitirofo.

Nōko Ifo Jesús anā oaino, ¿afe keskara ixiimē?

¹³ Efe yora mīshtichi, ē mato yoiai keskara nikasharakāfe. Jesús Ifofaafō nakanax afeskakanimākai ē mato yoinō, akka a Ifofaafoma ato fe yorafo naafono, manomitsakani omiskōikani. Akka mā askaima māmāi Nios Ifofaax, māmāi anā ōinōnāxixakī. Akka a Nios Ifofaafoma anā ōinōnākanima. ¹⁴ Mā nō tāpia Jesús nafiax afianā otoni. Nāskarifiakī mā nō tāpia Niospa atori otofaxii. Jesús anā oaino, a Ifofakanax namisfo.

¹⁵ Nāskakē nō mato yoimis nōko Ifo Jesús noko tāpimamis keskara. Akka nō nayoamax nōko Ifo Jesús oaino nō rekē nai mēra kaima, nā naitaenifo rekē fokani. ¹⁶ Akka nōko Ifo nai mēranoax fotopakekafāni fāsikōi mekakeraxii xanifo finakōimāiax. Askatari nā ājiri xanifo finakōiafāfe āto mekari nō nikaxii. Askatari Niospa āfe maneti chāi chāisaito nō nikaxii. Nāskakē a Cristo Ifofakanax namisfo otoi taexikani. ¹⁷ Nāskata a nō namisfoma Niospa atoya noko iyoxii, nāskakē nai kōi mēranoax nō fichināxii. Nōko Ifori nofe ixii nai kōi mēra. Nāskakē nōko Ifo fe mēxotaima nō ipanaka. ¹⁸ Nāskakē mā ranā inima faatanāsharakāfe, na meka sharaōnoax.

5

¹ Efe yora mīshtichi, nōko Ifo Jesucristo anā oaino anā nō mato yoitiro. ² Akka mā mā tāpikōia nā oaitia tsōa manasharayamaino nōko Ifo nokotiro. Nā afaa shināima tanaima oxafono, fakishi oax yometso atoki yometotiro keskai. ³ Yorafo iskaifono: “Nōkai afaa chakafamisma nō isharakōia,” ikaifono Epa Niospa ato omiskōimanaino pae meexikani. Oa kēromā fake nanexō mā fake kākī pae meetiro keskara meexikani. Nāskakē nā omiskōia nokoaino tsoa faki onetiro.

⁴ Akka efe yora mīshtichi, mākai oa fakish mēra nia keskarama, askatamaroko mā oa penata nia keskara. Nāskakē mā manasharaito nōko Ifāfe mato fichitshitiro. Akka nā Ifofaafoma oa fakish mēra nia keskaraono, atoki yora yometso oax atoki yometsoaino tsōa tāpitiroma keskarafo. Nāskarifiakī nōko Ifo oaino afaa shinātirofoma, Ifokairoko fakaxō. ⁵ Akka māfi nā penata nia keskara sharakōifokī. Mākai oa fakish mēra nia keskaraono. ⁶ Nāskakē nā Satanás ifofamisfo keskara nō imisma, afāfe afafo chakafai fo fisti shināmisfo. A Jesús fotoaino tsōa shināmisma. Akka nō anā Jesús oaitia nō shināi, oa yora oxa keskara nō imisma. Oa yora moia keskara nō imis Jesús oaitia manai xafakīakōi isharaxō. ⁷ Nā afaa shināifoma a Satanás ifofafo nā fakishi oxafō keskarafo. Nāskarifiāi a Satanás ifofafo a afaa shināifoma fakishi pāemisfo keskarafo. ⁸ Akka nōkai ato keskarama, nōfi oa penata nia keskara sharafoki. Nāskakē Jesús Ifokōi fata nō yorafo noikōita nā Jesús oaino nō manakōitiro, nō askaito Satanás noko afaa chakafamatiroma. Māraki sorarofāfe āto rapati kerexkōi safeafono tsōa ato retetiro, āto maiti kerexkōi safeafonori tsōa ato retetiro. Nāskarifiakī nō Jesús Ifofaano, āfe Yōshi Shara nō mēra naneano Satanás noko afeska fatiroma. ⁹ Akka Niospa shinānima a omiskōipakenakafo mēranoax nō omiskōipaxanō. Askatamaroko noko ifini Jesucristo nōko chaka noko soaxoxiki nō afe ipaxanō. ¹⁰ Akka Jesucristo nokoōnoax nani nō afe ipaxanō. Nayamafiāx mā naaxri nō afe nīpanaka. ¹¹ Nāskakē inimayanā fetsafo ato inimamasharakāfe. Mē tāpiaki mā ato askafaino. Nāskakē ato fe mēxotaima aska faatanākāfe.

Pablo A Nios Ifofaafō ato yoisharani

¹² Efe yora mīstichi, ē mato yoisharapaikai, ea nikasharakāfe. Epa Niospa nā Ifofaafō katonī āfe meka shara mato yoinōfo. Nāfāfe nōko Ifoōnoa mato yoisharamisfo nōko Ifo mā Ifo sharafanō. Nāskakē ato noiyanā ato nikasharakāfe. ¹³ Nōko Ifoōxō mato yoisharamisfo, nāskakē ato nikasharakāfe, ato noisharayanā. Mato fe yorafo fe isharakāfe, mēenāpaitama isharakōikāfe.

¹⁴ Askatari efe yora mīstichi, nō mato yoisharamis iskafakī: A xanimisfori ato yoisharakāfe yonosharanōfo, askatari a shināmitsaifo ato inimamakāfe. Nāskaxō a Nios Ifofasharafoma ato yoisharakāfe chanīmara fakōinōfo. Nāskaxō ato noiyanā fenāmāshta mā ato yoisharatiro.

¹⁵ Nāskakē kexemesharakāfe, fetsafāfe mato noikaspaiyono ato kopiya-makāfe. Askatamaroko noinā faatanāsharakāfe, keyokōi yorafo sharafakāfe.

¹⁶ Mēxotaima inimafafāikāfe. ¹⁷ Pena tii Epa Nios kififafāikāfe. ¹⁸ Afara afeskara afiaino, Epa Nios aicho fakāfe. Nāskara Niospa matoōnoa fichipai kiki mā Cristo Jesús Ifo shara fakē.

¹⁹ Niospa Yōshi Sharapa mato amapaiyai keskara xateyamakāfe. ²⁰ Fetsafāfe Niosxō mato yoiaino a yoiaino keskara, “Na afamara,” ixō ato nikakaspakakīma, ato nikasharakōikāfe. ²¹ Akka fētsa mato yoiyaiito Niospa Yōshi Sharaōxō yōkakāfe nā mato yoiyai keskara chanīmamakī askayamai chanī itiroki. Akka nā meka chanīmakōi nikafafāikāfe, a meka chanī nikakakima. ²² Afara chaka fishtayamakāfe.

²³ Niospa māto yorafoya, māto fero mēshofoya māto yōshi sharafoya Niospa mato sharakōi fatiro mā fekaxtenōma. Nāato shara mato imatiro āfe ōiti keskara shara mā inō. Mato kexesharata māto ōiti mēraxori mato shināmasharatiro. Askax mā sharakōi inō. Epa Niospa mato askafaino nōko Ifo Jesucristo afianā oaitia mato shināmasharaxii. ²⁴ Niospa mato katonī mā Ifofanō. A noko yoiyai keskara Niospa noko pāratiro, noko axotiro.

Mā mekai xatekī Pablo ato yoisharani

²⁵ Efe yora mīstichi, noko Epa Nios kifixokāfe.

²⁶ Keyokōi a nōko Ifo Jesús Ifofaafō fe yoinōnāsharakāfe.

²⁷ Nāskaxō Epa Niospa mato yoiyai keskara nikasharakāfe. Nā mā Ifofa tii ē mato kirika kenexō fomaikai ato nikamasharakāfe.

²⁸ Nōko Ifo Jesucristo mato noikī mato sharakōifanō. Nā tii ē mato yoi.

Pablo

Pablo Tesalónica Anoafo Afianã Kirika Kenexõ Fomani

Pablo afe rafeafo feta Tesalónica anoxõ Nios Ifofaafono ato kirika kenexõ fomani

¹ Ëkĩa Pablo. Silvano ikaino Timoteo ikaino nõ mato kirika kenexõ fomai. Efe yora mĩshtichi, mã Epa Nios Ifofaano pexe rasi Tesalónica anoxõ, mãfi nõko Epa Nios fe rafekõiakĩ nõko Ifo Jesucristo ferĩ mã askakõia. ² Nãskakẽ Epa Nios feta nõko Ifo Jesucristo mato noikĩ mato sharakõifanõ, askatari mato imasharakõinõ mãto õiti mẽranoax mã anã fekaxtenõma.

Epa Niospa a yora chaka omiskõimaxii mã Cristo anã oaino

³ Efe yora mĩshtichi, mã taefakĩ mã Nios chanĩmara fani. Nãskakẽ iskaratĩa mã chanĩmara fakĩ finakõia. Askatari mã rama Nios Ifofaax mã nõinãsharakõini. Nãskakẽ iskaratĩa mã nõinãifinakõi. Nãskakẽ nõ matoõxõ Nios kĩfikĩ iskafa fafafãini: “Aicho Epa Niosi, mefe yorafãfe Tesalónica anofãfe mia Ifokõĩ faafokĩ,” ixõ ẽ mato kĩfixõfafãini. ⁴ Nãskakẽ Niospa mekaõnoa nõ ato yoifofãsafakĩ mã Nios Ifofaafono fe nõ ato fe ichanãitĩa nõ matoõnoa ato yoimis iskafakĩ: “Nã Nios Ifofafo Tesalónica anoafo ãto kaifo fetsafãfe ato omiskõimamisfo. Nãskakẽ afara chakafãfe ato afeskarafafaino a shinãtamaroko Jesús Ifokõĩ fakaxõ tenekõimisfo,” ixõ nõ matoõnoa ato yoixomis. ⁵ Nãskakẽ mã Jesucristoõnoax omiskõifixõ mã tãpitiro Niospa isharakõixõ mato yoikĩ iskafaino: “Nafõ isharakõiafo,” mato faino mã afe ipaxatiro. Nãskax mã mã omiskõifix chipo mã afe isharapakenaka.

⁶ Niospa mẽstekõĩ fisti shinãmis, a mato omiskõimamisfo kopikiri chipo Niospa ato omiskõimaxii. ⁷ Nãskakẽ nõko Ifãfe mato tenemsharaxii mã anã omiskõinõma a noko akai keskafakĩ mã nõko Ifo fotoxõ. Akka nõko Ifo nai mẽranoax fotoi oa chii xoisai itikikeraxii ãfe ãjiri finakõiafo fe oi. ⁸ Akka nõko Ifo oxii a Nios Ifofamisfoma ato omiskõimaniyoi, askatari ãfe meka sharaõnoari nikamisfomano ato omiskõimaxii. ⁹ Nãfo omiskõipakenakafo, anãkai nĩpanakafoma. Nõko Ifokai õipakenakafoma, askatari ãfe shara yafi ãfe kerex shara õipakenakafoma. ¹⁰ Akka nõko Ifo oaino, mã penata a Ifofamisfãfe aõnoa yoisharaxikani. Nãskafaifono mã Nios Ifofamisfãfe õiketsaxikani, akka mã mã nikamis nõ mato yoiaito.

¹¹ Nãskakẽ nõ matoõxõ Nios kĩfikĩ iskafa fafafãini: “Epa Niosi, mã ato imapaiyai keskafakĩ ato imasharafe mia Ifofakaxõ fetsafo sharafapaikani kiki mã kerex shara ato inãfe,” ixõ ẽ matoõxõ Epa Nios kĩfimis. ¹² Nãnori nõ mato Epa Nios kifixomis, fetsafãfe mato õikakĩ nõko Ifo Jesúsnoa yoisharanõfo iskafakakĩ: “Jesús afama mĩshti fatiro, nãskaxõ afe yorafa a keskara sharakõĩ ato ima,” ixõ aõnoa yoisharanõfo. Nãskakẽ Epa Nios feta nõko Ifo Jesucristo mato noiyanã a keskara sharakõĩ mato imatiro.

2

Nã feronãfake afara chakafamisnoa ato yoini

¹⁻² Akka nõko Ifo Jesucristo anã fotofaino mã Ifofaafono tii akiki nokoxikani afe ipaxakakĩ. Nãskafekẽ fetsafãfe mato parapaikani iskafakakĩ: “Jesús mã oxõ a inõpokoifo keskara ea tãpimana,” ixõ mato yoikani. Nãskatari fetsafãferi mato yoikĩ iskafakani: “Mã nõ nika Jesús mã oa,” ixõ mato yoiaifono,

fetsafāferi yoikī iskafakani: “Pablo noko kirika kenexō fema, ‘Jesús mā oa,’” ixō mato yoipaikani, āa chanīkakī. Nāskakē rateyamakāfe. Ē mato yoinō. Jesús oaino nā Ifoafafo afe ichanāxikani, nāskax afe ipanakafo. Akka mato yoisharapaiyaito nikasharakāfe. ³ Nā chanīmisfo ato nikayamakāfe. Jesús oyoamano keyokōichi Epa Niospa meka kachikiri fakani anā nikaxikakima. Nāskakanax nikayospakōi ixikani. Nāskaifono a feronāfake chakafinakōia oxii. Nāato a Niospa yoini keskara nikakaspakōimis. Nāato Satanás ifofakōimis. Askafiax chipo a omiskōipakenakafo mēra kaxii. ⁴ Akka a feronāfake niyoxō iskafakī yoixii: “Ē keyokōi finōa. ‘Na nōko Niosra’ ixō mā kīfimis, nāri ē finōa. Akai Niosma,” ixō ato yoita, nā Nios kīfiti pexefā mēra ikikaixō ato yoixii iskafakī: “Afaa fetsa kīfiyamakāfe. Askatari afaa fetsari noiynamakāfe. Ēfi Nioski,” ixō ato pāraxii.

⁵ Akka, ħmā shināimamē a ē mato fe iyoxō a ē mato yoipaoni keskara? ⁶ Akka mā mā tāpia nā chaka finakōia Epa Niospa nētefayoa, fena oyoyamanō. Nāskafiax chipo oxii Epa Niospa anā nētefayamaino. ⁷ Nā noikaspamis Epa Niospa nētefayoano fena oyoima. Chipo oxii Epa Niospa anā nētefayamaino. Akka oyoamano nā aōxō afara chakafamisfāfe fomāpaiyoxikani. ⁸ Nāskakē nā chakafinakōia mā oano, nōko Ifo Jesús āfe axfapa xoō atakī retekī mapokōi fataxii. ⁹ Nōko Ifāfe reteyoamano nā yora chakafinakōiato Satanāōxō afama mīstiffo faxii afarafo afeskarafakī ato parayanā. ¹⁰ Nāskaxō afarafo afeskarafakī ato pāraxii a nikaifo, nāskakē nā nikananax afe nā omiskōipakenakafo mēra foxikani. Nāfāfe Niospa mekakōi nikayamakāta, āfe meka sharari noimisfoma Nios fe ipaxakakīma. Nāskakē nā omiskōipakenakafo mēra foxikani. ¹¹ Nāskakē Niospa anā ato yoipaima āa ato paranōfo, a ato paramisfāfe ato yoiaifo keskara nikakōiaifono. ¹² Nāskakē nāfāfe Niospa mekakōi nikayamakāta, tsoarikai aō noimisma. Askataro afara chaka fisti fichipaiyafono Epa Niospa nā omiskōipakenakafo mēra ato potaxii nā ato paramisfo fe omiskōipakexanōfo.

Niospa noko katonī nōko chaka noko soaxoxiki nō afe ipaxanō

¹³ Efe yora mīstichi, taekōifakī Epa Niospa mato noikī mato katonī afe mā ipaxanō. Nāskakē āfe Yōshi Sharaōxō mato ifini afe yora mā inō, Jesúsnoa mā chanīmara faino. Nāskakē mēxotaima nō Nios aicho famis mato shinākī. ¹⁴ Nāskakē āfe meka shara nōko Ifo Jesucristoōnoa nō mato yoiaino nokoōxō mā mā tāpikōia. Nāskaxō mā chanīmara faino āfe Fake Jesucristo otofani keskafakī matori otofaxii a ika ano mā afe ipaxanō.

¹⁵ Nāskakē efe yora mīstichi, nā nō mato yoimis anorikōi nikafafāikāfe. Akka anoriyamakē afo nikayamakāfe. Nā nō mato yoipaoni keskara nā fisti chanīmara fayana, a nō mato kirika kenexoki nō mato yoini keskarari shināfāikāfe. ¹⁶ Nōko Ifo Jesucristo feta nōko Epa Niospa noko noikī, nōko ōiti mēraxō noko inimamakōinō. Nāskakē nō tāpitiro noko potanakama nō afe ipaxanō. ¹⁷ Māto ōiti inimamakōikāfe mato imasharakōiaino. Nāskaxō afara afeskara afiaino ato yoisharakōita mā ato axosharafāixikakī.

3

“Noko Epa Nios kīfixokāfe,” ixō Pablo ato yoini

¹ Akka efe yora mīstichi, mē mekai xatekī ē mato yoi. Noko Epa Nios kīfixokāfe, nōko Ifāfe āfe meka shara mā nika keskafakī nōko Ifoōnoa keyokōichi nikanōfo. ² Askatari noko Epa Nios kīfixokāfe na yora chakafo

feta a shināsharaiḡāfema noko afeskafanōfoma. Nākakē Jesúsnoa nō ato yoiaito noko nikakatama noko xatemapaimisfoki. ³ Akka nōko Ifo sharakōi, nā noko yoisimis keskara noko axomis. Nāato mato imasharapakenaka, afara chakatari mato fekaxtefanōma. Askatari nāato mato kexesharapakenaka. ⁴ Nāskakē nōko Ifoōxō nō chanīmara fai, nā nō mato yoisimis keskara mā akaito. Nāskakē mēxotaima mā askafa fafāḡāini a nō mato yoisimis keskafakī. ⁵ Epa Niospa mato noiai keskafakī nōko Ifāfe mato tāpimapaīnō. Cristo omiskōifiki teneni keskafakī, aōxō māri mā tenesharakōifāḡāinō.

Keyokōichi nō yonosharakōitiro

⁶ Efe yora mīshtichi, nōko Ifo Jesucristoōxō nō mato yoisimis. A Epa Nios Ifofaa fetsafāfe yonokaspaifono mā ato makinoax paxkanō a nō mato yoisimis keskara nikakaspaifono. ⁷ Akka mā mā tāpia a nō imis keskara mā askapai mā isharakōitiro. Nō mato mēra ixō nō yonokaspapaonima. Askatamaroko nō yonokōipaoni. ⁸ Askatari nō tsoa afaa kaxpa pīapaonima. Askatamaroko nō yonopaoni, penata yonota, fakishi yonota nō fapaoni a nō piai fixō pixii mares fisti māto kori ichapa mā potanōma. Nō yonokī askafapaoni. ⁹ Niospa mekaōnoa yoinifo iskafakī: “Nā mato Niospa meka yoisimisfāfe afara yopaiḡāfe ato inākāfe,” ixō kenenifo Niospa ato shināmanaino. Nāskakē, “Noko afara inākāpe,” ixō nō mato yōkakerapaoni. Askatamaroko nō yonopaoni nō mato ōimakī a nō akai keskafakī māri mā yononō. ¹⁰ Akka nō mato mēra ixō nō mato yoipaoni iskafakī: “Akka nā yonoyamaito afaa pitiroma,” ixō nō mato yoini. ¹¹ Akka matoōnoa noko yoiāfo iskafakakī: “Na ranārito yonokaspata ikafo, nāskakanax afaa meekatama āa fofāsakaki ato parafoḡāsa famisfo,” ixō noko yoiāfo. ¹² Nāskakē nō mato yoi iskafakī, nōko Ifo Jesucristoōxō mā tanaima yonosharakōinō anā xanikima a mā fichipaiyai keskara fixiki.

¹³ Efe yora mīshtichi, a mā afarafo sharafamis keskafakī xateyamakāfe. ¹⁴ Akka na kirika kenexō nō mato yoiāi keskara nikakaspai, aōnoa shinākāpo. Nāskakē afe rafepaiyamakāfe, mā askafaino rāfinō. ¹⁵ Nāskafaito noikaspayamakāfe. Askatamaroko yoisharakāfe mato fe yora keskara fakī.

Mā mekai xatekī Pablo ato yoisharani

¹⁶ Nōko Ifāfe nōko ōiti noko inimamaxotiro. Pena tii afara afeskara afiaino mato inimamatiro. Nōko Ifo keyokōi mato fe isharanō.

¹⁷ Ēkīa Pablo, ēkōi ēfe mēkemā kirika kenexō ē mato fomai yoisharakōiyānā. Akka nā ēfe kirika kenefo ē iskafamis kenekī. ¹⁸ Nōko Ifo Jesucristo mato noikī keyokōi mato sharafanō. Nā tii ē mato yoi.

Pablo Timoteo Kirika Kenexõ Fomani

Pablo Timoteo yoisharani

¹ Ëkĩa Pablo. Iskaratĩa ã mia kirika kenexõ fomai Timoteo, ã mia yoikĩ. Epa Niospa ea katonĩ ã ãfe meka Jesucristoõnoa ã ato tãpimanõ. Epa Nios noko ifimis, Jesucristo nõko Ifo feta ea yoini ã ato tãpimanõ. Jesucristo nokoõnoax nani ares noko Epa Nios ari iyoxii kiki. ² Nãskaxõ ã mia Jesucristo chanĩmara famaxõ, ã mia fakekõĩ faa, Timoteo. Nãskaxõ ã mia yoixõ Epa Nios, Cristo Jesús nõko Ifo feta mia shinãsharanõ mĩo noikĩ, mĩ shinã mẽra mia shinãmasharanõ, mĩ õiti fekaxtenõma.

Pablo Timoteo yoini: “Õisharakõife, ato anorima tãpimapaikõikani kiki”

³⁻⁴ Ë Macedonia ano kayamea taefakĩ, ã mia yoifaini kati. Ë mia anã yoiaito nikasharafe. A Efeso anoax fena kayamafe. Nãno ixõ mĩ efesofo ato yoisharafe. Atiixori Niospa meka anorima yoimisfokĩ. Niospa meka yoitamaroko ãto xinipao ipaoni fisti ato yoifafãikani. Askakani feratenãkani. Nãskakẽ ã mia yoi mĩ ato yoisharanõ iskafakĩ: “Niospa meka mẽstekõĩ yoisharakõikãfe. Mãto xinipaoafãfe afeskax Epa Nios ari nõ nokotiomãki noko tãpimapaonifoma. Jesucristo noko nãxonĩ nõko chaka noko soaxoxiki. Epa Nios ano noko imaxiki nõ Jesús chanĩmara fakẽ. Nã fisti chanĩmara fakãfe, a fisti ato yoikãfe. A mãto xinipao ipaoni anori mã anã shinãnõma. Anorima chaka ato yoiyamakãfe. Niospa meka yoisharakãfe mẽstekõĩ,” ixõ ato yoife.

⁵ Niospa meka ato yoisharafe noinãnõfo. Mĩ ato yoiaito nikakĩ ãto õiti sharafanõfo. Askatari ãto chakafo Jesús ato soaxonõ, anã afaa pishta chaka shinãifomano, askatari Jesús chanĩmara fakõinõfo. Nãskax keyokõĩ shara faatanãkõinõfo. ⁶ Mã askafiax atiri yorafãfe anã shinãsharakanima. Anã ato noisharakanima. Nãskakĩ mẽxotaima ato mekafafofãsa fakani. Nãskakĩ anã ato tãpimasharatiroma, fanĩrira yoitiro. ⁷ Nãskaxõ a Moisés yoikĩ kirika keneni keskara ato tãpimapaikakĩ nãfãfe yoimisfo iskafakĩ: “A Moisés yoini keskara nõ fãsi tãpikõia,” ixõ yoifikatsaxakakĩ a yoiaino keskara tãpikõiafoma.

⁸ Akka mã nõ tãpia nã Moisés yoini keskara shara. Mẽstekõĩ ato yoiaino nikasharatirofo ishaxaxikakĩ. ⁹ Mã nõ tãpia a yora sharafoõnoa yoikĩ Moisés kenenima. Akka nõ yora chakafoõnoa yoikĩ keneni. A nikayospafoõnoa yoikĩ, askatari a yora chakafoõnoa yoikĩ, askatari a Niospa meka nikamisfomaõnoa yoikĩ, askatari ãto apa yafi ãto afa retemisfoõnoa yoikĩ, askatari a ato retemisfoõnoa yoikĩ, ¹⁰ askatari a ãto ãfimafo chotamisfoõnoa yoikĩ, kẽrofãferi ato fenemafo chotamamisfoõnoa yoikĩ, askatari feronãfakefori aa ranã chotanãmisfoõnoa yoikĩ, nãskakãkĩ ãto ãfifo anã tanamisfomaõnoa yoikĩ, askatari yora fetsaxõ achikaxõ onemisfo ato yonomaxikakĩ, askatari ãa chanĩmisfo, Niospa meka fanĩrira yoimisfo, askatari afarafo chakafamisfo, afãfe Niospa meka tãpiafoma, nãskara yorafoõnoa Moisés ato kenexoni tãpinõfo afeskax ishariatirofomãkĩ a Niospa noko imapaiyai anori. ¹¹ Nãfãfe Niospa meka tãpisharafoma, nikakanima. Epa Niospa ea yoiã ã ãfe meka mẽstesharakõĩ ato tãpimanõ. ãfe Fake Jesucristo fãsi shara nokoõnoax nani nõko chaka noko soaxoxiki nõ afe nipaxanõ. Aicho, Nios fãsi sharakõĩ.

“Aicho, mĩ ea õia mĩ ea shinãkõia,” Pablo Nios fani yoikĩ

12-14 Ĕ anorima shināyopaoni Niospa Fake tāpiaxma. Ĕ fāsi anorima shināpaoni iskafakī: “Jesús Niospa Fakekēroko. Āa pārakaninō, yorakōifekē,” ixō ē chakafapaoni, ē anorima shinākī. Anori shināki a Jesús Ifofamisfo ē fāsi ato chakafapaoni. Ĕ fāsi feronāfake mesekōi ipaoni ea omispaonifo ē tāpisharaxma. Anorima ē shinākī ē noikaspapaoni, ares ea shināfiaito Niospa ea noikī. Nāskaxō ea ifisharani. Ĕ fāsi chakafafiamiskē ea noisharai. Nāatofi ea shināmamiskī ē aō noinō. Ea askafaito ē nikasharakē nōko Ifo Cristo Jesús ea yora fetsafo fāsi noimasharai. Aicho, ē Jesúski inimasharakōi ea noisharaito. Jesucristo ea shināmani iskafakī: “Mī ea noikī, ea shināsharafe, mī ea tāpisharaxō eōxō mī yonoi ato tāpimakī,” ixō ea yoia.

15 Timoteo, na ē mia yoiai chanīma. Keyokōichi chanīmara fanōfo. Jesucristo nai mēraxō Apa Niospa nāmā nīchini nōko chakafōōnoax noko nāxoyonō nō afe ĩpaxanōfo. Askafiaino na fetsafāfe chakafakī finayamafiaifono ē fāsikōi chakafakī finakōiipaoni. Jesús Ifofamisfo ē chakafayopaoni. 16 Nāskafiaito ōikī Jesús ēfe chaka ea soaxona. Ĕ chakafafafimiskē Jesucristo ea fāsi noi. Ea askafaito ōi kakī yora fetsafāfe iskatirofo: “Ĵōikapo! Na Pablo fāsi chakafafiamiskē mā Jesús aō fāsi noi,” shināito ōikī, “Nokori Jesús noikī noko ifitiro, na Pablo akai keskafakī, nō afe ĩpaxanō na Pablo ikai keskai Jesús fe nīpanaka, nōri afe nīpaxanō,” ikaxō anori shinātirofo.

17 Anori shinākī nānori nō yoitiro iskafakī: “Aicho Epa Niospa, mī fāsi sharakōi. Meres mī xanīfokōi, tsōa mia finōtiroma. Mī nanakama, mī nīpanaka. Tsōa mia ōitiroma. Meres mī keyokōi tāpikōia. Meres mī Nioskōi, anā fato fetsama.” Nāskafakī nō Nios yoipakenaka.

18 Ĕfe fake Timoteoshta, a Jesús Ifofanifāfe mia yoiaito mī nikamiski. Niospa ato shināmanaino anori mī kerexkai ato yoisharanō mēstekōi, ēri mia yoi kerexkai yoife mī Niospa meka nikasharakōixō Jesús Ifofaxō ato yoisharafe. 19 A yora fetsafāfe mā Niospa meka tāpifikaxō iskaratīa anā Nios shinākanima. Niospa meka nikakaspakakī Jesús anā chanīmara fakanima. Fanīrira shinākani mā na meka tāpifikatsaxakakī. 20 Akka a feronāfake rafe Himeneo feta Alejandro iskafamisfo. Nā rafeta Nios chakafamisfo noikaspakakī. Askaito ōikī ē ato yoia: “Mā mā Satanás nikakī, Nios chakafakī, afianā Niospa mato kexeima.” Mā askafaito Satanás mato omiskōimatiro. Mato omiskōimanaito mā tāpitiro mā anā Nios chakafanōma.

2

Afeskafaxō nō Nios kīfitiromē

1 Timoteo, a Nios Ifofamisfo ē mia yoiai anori ato fāsi yoife. Taefakī mī ato yoitiro iskafakī: “Keyokōi yorafo ato yoixokāfe. Afara yopaifāfe Nios ato yoixokāfe. Mato Niospa axōfaito aicho fakāfe akiki inimakī. 2 A xanīfokōi fe afe rafeafo keyokōi xanīfo ato Nios yoixokāfe mato yonoxosharanōfo isharaxikākī. Nāskakē afanā mato fekaxtefayamanō, mā Nios shināsharanō, Nios Ifofasharaxiki.” 3 Nāskakē Nios noko ifimisto noko ōikī noko iskafatiro: “Na ēfe fakefo isharafo. Iskara sharakōi. Na yorafoki ē inimakōira,” ixō Niospa yoitiro. 4 Niospa keyokōi yorafo ifisharapai, keyokōi yorafo Jesús ato nāxoni ato chaka soaxoxikī a tāpikōinōfo. 5-6 Nios fistikōi, anā fato Nios fetsama. Nā Nios fisti ares shara. Akka na yorafo chakakōifo. Afara chakaya shara nō ositiroma. Akka yōra ato mēraxō afara chakafamisto Nios ōikaspai, nikakaspakī. Akka nā yora chaka askara Nios ari katiroma. Nāskakē Cristo Jesús nāmā na mai ano oni yorafo nāxoxiki nōko chaka noko

soaxoxiki. Askafakī, yorafo chaka soaxonano isharanōfo, ato askafaano, Nios ari nokotirofo. Nāskakē nō tāpia Jesucristo fistichi noko Nios ari iyotiro. Nāskakē keyokōi yorafo ifipai. Nāskakē noko ōimani Jesucristo keyokōi yorafo ifipai. ⁷ Nāskakē Niospa ea katonī ađnoa judeofoma ē ato tāpimanō nāfāferi tāpinōfo. Yora fetsafođnoaxri Jesús nani. “Eōxō yoixiki,” ixō Niospa ea yoini. Ē chanīma, ē mia paraima. Niospa ea yoini ē ato tāpimanō Jesús ato nāxoni chanīmara fanōfo.

⁸ Akka feronāfakefo ichanākakō kīfikani inimakani, keyokōi mā raenā faatanākakō ato chaka Jesús soaxonano, āto mēke rafe Nioskiri mēshaxotirofo Niospa ōitiro. Askafono Jesús ato chaka soaxonano, nā Nios kīfiaifāfe ato Niospa nikatiro. Askapainōfora ixō ē yoi.

⁹ Nāskarifiakī nō ichanāino xotofāke iskara shinātiroma: “Sama shara safeta, teoti ichapa safeta, askata femānāki keneta, foaromesharata, irosharakōita, ē ikaino yorafāfe, ‘Na xotofake sharakōira’ ixō ea yoinōfo,” ixō anori shināyamakāfe. ¹⁰ Askafatamaroko, fetsafo axosharakāfe, Nios Ifofaxō Nios ōimaxikakī. “Na xotofake sharakōira,” ikaxō ađnoa yoitirofo. ¹¹ Ano fisti ichanākakō xotofakefāfe ato nikakōisharatirofo. Akairi tāpisharakikakī atoōxō. ¹² Ē fichipaima xotofāke feronāfakefo Niospa meka ato tāpimanaino. Askatamaroko feronāfakefāfe xotofakefo Niospa meka sharađnoa ato yoitirofo. Nāskakē xotofakefāfe feronāfakefo nikakōitirofo. ¹³ Akka Niospa Adán onifakī taefani. Nāskaxō chipo Evari onifani. ¹⁴ Nāskakē Satanás Eva pārani. Adán anīma pārakī. Nāskakē xotofakefāfe nikakōisharatirofo. ¹⁵ Nāskaxō xotofāke fake fixō pexkosharatiro, Nios Ifo shara famaxiki. Nāskakē chanīmara fatirofo. Mā askafaito Niospa ato ifitiro. Āto ōiti inimasharanōfo a fetsafo noisharakanax ato fe isharanōfo. Isharakaxō, shināsharakōinōfo.

3

Afe keskara itiomē a Niospa meka ato yoimis

¹ Nā ē mia yoiāi chanīmakōi. A feronāfāke Niospa meka yoimis ipai askara sharakōi itiro. Askatari a Nios Ifofamisfo ato kexemis ipai askarari shara. ² Nāskakē nā isharakōimis ifife. Isharaito ōikakī fetsafāfe yoitirofoma iskafakī: “Nato afara mēxotaima chakafamis,” ixō yoitirofoma. Askatari āfi fistiya itiro. Kēro fetsa kaxefamisma ikāi, shināsharakōita isharakōimis ikāi, fāsi yonosharamis xanimisma ikāi, fetsafo sharafamiskōi āfe pexe anoxō yora pimamis ikāi, fētsa pexe yopaito āfe pexe mēra yora ikimamis ikāi, ato tāpimasharamis ikāi, nāskara feronāfake ifife. ³ Askatari pāemisma ikāi, setemitsamisma ikāi, yorafo noimiskōi ikāi, ato chakafamisma ikāi, kori noimisma ikāi, askara feronāfake shara katofe. ⁴ Āfe āfinō āfe fakefonō afe isharakōimisfo itirofokī. Āfe fakefāfe noikakī nikasharakōimisfo itirofo. ⁵ Akka askayamaito, afe yorafāfe a nikakaxoma askara yora Jesús Ifofamisfāferi a nikatirofoma. ⁶ Akka a rama Jesús Ifofaa a Niospa meka ato yoimis askara katoyamafe. Aato shināki iskafatiro: “Ē fāsi sharakōi, ē Niospa meka ato tāpimani. Tsoa fetsa ea keskarama,” ixō shināi Jesús shināyamafi āa shināi askatiro. Satanás anori mekani: “Ē Nios finōikai,” ini. Askaito Niospa nai mēraxō potani nāmā. Nāskari fakī a rama Jesús Ifofai, Satanás ani keskari fatiro. Nāskakē a ato Niospa meka yoimis askara katoyamafe a rama Jesús Ifofai. ⁷ Akka askaito ōikī a Nios Ifofamisfāfema yoitirofo isharakōiāito ōikakī.

Akka isharayamaito, tsōa yoisharatiroma. Askara yōra fanīrira chaka shināi paketiro Satanás paraino.

Afe keskara itiomē a Nios Ifofamisfo ato kexemis

⁸ Nā a Nios Ifofamisfo ato kexemis nā keskara feronāfake katoxō ifife. Nāskara yora sharakōifo itirofo, āto meka mēstekōi shara itirofo, askara yorafo pāemis itirofoma, nā kori fisti shināfafāinaifoma. Nāskara feronāfake isharamisfo ifife Nios Ifofamisfo ato kexesharanō. ⁹ Na Niospa meka nō tāpiyopaonima, iskaratīa rama nō Niospa meka tāpi. Nāskakē na feronāfāke Niospa meka nikasharakōimis ifife, askatari afara chakafayamaino āfe ōiti fekaxtemisma askara ifife. ¹⁰ Nā Nios Ifofafo ato kexemis ikimāikai mī ōiyotiro. Askarato afe keskara yonosharaimāikai mī ōiyotiro asharaimāikai. Askata asharakōiaito ōikī, askara yora mī ifitiro a Nios Ifofafo ato kexemis inō. ¹¹ Mā askafono āto āfifori ato keskara sharafori itirofo. Nāskaxō anā ato mekakāi chakafatirofoma. Askatari pāemismafori itirofo. Askatari āa kakapaimisfo itirofoma. Askara yorafāfe shināsharamiskōifo itirofo. ¹² Nāskax a Niospa meka yoimisfo fe rafekanax āfi fistiyafo itirofo. Nāskakanax ato pexe anoax isharakōitirofo, āto āfinō, āfe fakefori afe isharatirofo, askara nikakōisharatirofo. ¹³ Nāskaxō a Nios Ifofafo ato kexemisto yonosharakōiaito ōikakī fetsafāfe ōikaxō yoisharakōitirofo aōnoa. Nāskaxō a feronāfake mese-tama fetsafo yoisharatiro: “Cristo Jesús ea ifia,” ixō ato yoitiro.

Niospa meka chanīmakōi noko yoimis.

¹⁴ Timoteo, iskaratīa ē mia kenexō fomai, mia ari samama kapaikī. ¹⁵ Akka ē mia ari fena kayamaino ōikī na kene tāpixō mī tāpitiro afeskax itirofomāikai a Jesús Ifofaifo. Akka Nios nīpanaka. Nāskax a Ifofamisfo Niospa fakekōifo afe ipanakafo. Nāskaxō Niospa meka mēstekōi ato yoisharaiifāfe fetsafāferi ato nikasharakōitirofo. ¹⁶ Fetsafāfe yoikī iskafatirofoma: “Niospa meka chanīra,” ixō yoitirofoma. Jesús Niospa Fake feronāfakekōi kāini. Niospa Yōshi Sharapa, “Jesús Niospa Fakekōi,” ixō yoini. Askatari Niospa ājirifāfe Jesús ōinifo Niospa Fakekōikē. Askatari yorafāferi ōinifo Jesús Niospa Fakekōikē. Nāskaxō yorafo tāpimakōinifo ato yoisharakōikakī, akairi tāpisharakōinōfo. Askaifāfe yora fet-safāfe mai fetsafo arixō nikakakī ato chanīmara fanifo akairi Jesús shinākakī. Nāskakē Jesús anā nai mēra kani Apa Nios ano.

4

Pablo yoini anā Nios shināyamaifono

¹ Niospa Yōshi Sharapa noko mēstekōi yoikī iskafamis: “Jesús mā chaima oaitīa atiri yorafāfe Nios kachikiri fakani. ‘É Jesús Ifofaira’ ifiamisxakakī nā nīafaka ato pārafiaito anorima ato yoimisfo. Askara anori yoimifāfe nikakaxō nīafaka fisti ifofamisfo,” ixō ato yoimis. ² Askara yorafāfe yora fetsafo anorima yoikani āa ato pārakakī, ōiti chakayafiakaxō. Anori fisti shinākī feyafamisfo. Nāskakē afara chakafakani rāfikanima. ³ Askarafāfe fetsafo tāpimakī iskafakani āa ato pārakakī: “Niospa yoikī iskafamis: ‘Feronāfakefo āfiyatirofoma. Askatari nami piyamakāfe,’ ixō yoimis,” ato fatirofo. Akka Niospa keyokōi onifani nō pinō. A Nios Ifofamisfāfe pixikakī Nios kīfiyotirofo. Nāskaxō nō pitiro afama mīshti. ⁴ Keyokōi a nō piaifo Niospa onifakī sharakōi fani. Nāskakē nō inimakī yoitiro aicho fakī. Nāskakē nō pikaspakī chakafatiroma a nō piaifo Nioski inimakī. ⁵ Epa Niospa noko yoia:

“Keyokōi shara,” ixō noko yoia. Nāskakē nō, “Aicho Epa Niosi, mī noko yoinā shara inā,” nō fai. Nāskaxō nō pitiro.

Afe keskara itiomē Jesús yonoxosharamis

⁶ Timoteo, na ē mia yoiai anori mī chanīmara famis. Nāskakē Jesús Ifofamisfo ato tāpimasharafe, mī Cristo Jesús yonoxomis shara ixiki. Askatari Niospa meka mēxotaima ōife a mī piāi keskafakī, fāsi shināsharakōixiki, shara nixiki. ⁷ A tāpiamafāfe yoimis anori nikayamafe. Mēxotaima Niospa meka shināfafāife. Askata ōiti kerexfafāi Nios shināfafāife mī ōiti pachi fakīma. ⁸ Akka afaa meeyamai rakatsax nōko yora xokenātiro. Nō anā afaa yonopaitiroma. Akka nō mēxotaima yonoi nō mitsisipakōi itiro. Nāskara shara. Nāskafakīri nō mēxotaima Niospa meka nō ōirifakī, Nios kīfirifai nō mitsisipakōi itiro nōmēra sharafinakōia. Nāskax nō shara itiro. Nāskatari nō naax, nai mēra kaax, ariaxri nō mitsisipakōi itiro sharafinakōimāi niax Nios anoax, nōmāi Nios Ifofakatsaxakī. ⁹ Na ē mia yoiai chanīmakōi. Nāskaxō keyokōichi chanīmara fanōfo. ¹⁰ Nāskaxō mitsisikāi nō Niospa meka yoifafāini. Nō askafaito fetsafāfe noko omiskōimatirofo a Niospa meka ōikaspafāife. Askai omiskōifikī nō tāpikōimis Jesús iskaratīamāi nikē. Nāskaxō Jesúmāi noko nāxonikē, keyokōi yorafoōnoax, nāskaxō a Ifofamisfo ato ifixii.

¹¹ Timoteo, na ē mia yoiai yonosharata ato tāpimafe. ¹² Nios Ifofafāi isharakōife. Mī isharakōiaito mia ōinōfo, ato ōimasharakōife. Askax mī isharakōixiki Nios Ifokōi faax, ato yoisharakōife mī meka pachi faxō, ato noikōisharata, nāskax isharaito ōikakī yorafāfe mia chakafakī yoinōfoma iskafakī: “Na naetapa Timoteo fanīrira noko yoi kiki nikayamakāfe,” ixō mia tsōa yoitroma. ¹³ Nā ē kayamaichāi, ato ichanāfaxō Niospa meka ato anexō, ato nikamasharakī, ato yoisharakōife. ¹⁴ A Nios Ifofaafo ato kexemisfāfe mia māmākaxō mia Epa Nios kīfixonaifono Niospa mia amapaiyai keskara mia axoni a Nios Ifofaafo mī ato tāpimasharanō ato kexesharayanā. Akka Epa Niospa mia kaxpa tāpimanimakī fetsafori sharafaxōfafāini xateyamafe.

¹⁵ Shināfāikōi isharafe nā ē mia yoiai keskafakī. Mī askafaito mia tāpisharakōinōfo mī yorafo Niospa meka yoiaito mia tāpisharakani. Askaxō, “Timoteo fāsi sharakōi,” ixō mia yoikani. ¹⁶ Nāskakē kexemesharafe. Niospa meka mēstesharakōi ato yoife, isharakōita. Mī askafai Epa Nios fe mī isharakōipakenakari. A mia nikaifori askapakenakafoki.

5

Afesax nō ishariatromē a nō Nios Ifofaa tii

¹ Anifo fāsi mekafata yoiyamafe. Nā mī epa mī aka keskafakī, oitsifafāi yoisharafe. Askatari nā naetapafari mī ochi yafi mī exto aka keskafakī ato shināmasharata ato yoisharafe. ² Yōxafofori nā mī efa mī aka keskafakīri shināsharafāi ato yoisharafe. Mī chiko yafi mī chipi mī aka keskafakī nā xomayafo sharafo feesyamafāi, askara shinātama ato yoisharafe.

³ Nā kēro ifomafafo, askata fakemaisfo, askatari fafamaisfo, nāfo shināmakiyamafe nā Jesús Ifofamisfāfe kexesharanōfo. ⁴ Akka nā kēro ifomafa fakeyakē, askayamai fafafoyakē afāfe kexesharatirofo. Askarifakī nā yome pishtakē ato kexesharapaonifo keskafakīri kopikiri kexesharanōfo āfe fakefāferi. Nāskafāifāfe fetsafāfe ōi kakī, “Nā yorafāfe Nios nikasharakani,” ikaxō yoisharanōfo. Nāskaito ōi Nios atoki inimai. ⁵ Nā kēro ifomafa fakemais ita, fafamais ita, fenemais ita, nāskarafāfe Nios fisti shinākī: “Niospa ea kexei,” ixō shinākī iskafakī, nā pena tii kīfita fakish tii kīfita famisfo Epa Nios

mēxotaima kīfikakī. ⁶ Nāskafīax nā ifomafa fetsa fenemaisax kafāsatiro. Aa inimasharakōi nā ipaiyai keskai. Niospa meka mā shināmakixō, kachikiri faax, nā mā naa keskara. Shināsharaima, chaka shināi. ⁷ Timoteo, keyokōi ē mia yoiyai na kēro ifomafa Jesús Ifofamisfo tāpimasharafe, askara tāpikaxō nikasharakōinōfo, fetsafāfe, “Mā chakara,” ikaxō yoitirofoma. ⁸ Akka fetsa afe yorafō kexesharama, āfe pexe mēra ikiaifāfe ato kexeima nāskafakī chakafai. Aa keskaratokai Niospa meka nikasharama. A Jesús Ifofamato askarato afara chakafai, akka a Jesús Ifofaafāfe afe yorafō kexesharakakīma fāsi chakafamisfo.

⁹ A kēro ifomafa sesenta xini aka, āfe fene fisti fe iyopaoni nā keskaraki kirika kenefe nā Jesús Ifofamisfāfe ato kexenōfo. ¹⁰ Nāskata nā kēroōnoa yorafāfe yoisharamisfo; nāskata āfe fakefo pexkosharakōini; askatari yora fetsa āfe pexe ano kaito atoki inimamis; fetsafo pimamis; omiskōiaito ato sharafamis; ato feta amis; kēro askara fistichi āfe ane kenetiro Jesús Ifofamisfāfe a kexenōfo.

¹¹⁻¹² Akka nā kēro ifomafa sesenta xinia akama, a keskaraki āfe ane mī kenetiro. Nā kēromā āa shinākī iskafatiro: “Jesús, ē mia fisti shināpai. Mīa fisti ē yopai. Ē anā feneyapaima,” ifīaxō anā fetsa anori shinātiro feneyapāikī, anā Jesús shinātiroma. Nā Niospa yoiyai anori shināima āa chanī mekatiro. Askafai āa chanīaito ōikī, askara kēroki Nios inimatiroma. Nāskakē āfe ane kenetiro. ¹³ Askara kēro fenemaisax xani itiro, pexe tū ōifōfāsafakī, askai kafāsakī, ato pārāfōfāsafatiro āa chanīkī. Nāskakē ato fekaxtefatiro. ¹⁴ Askatamarokō kēro ifomafa yōxāfo famatai feneyatiro. Mā feneyaxō fake fitiro. Fake fixō āfe pexe fisti anoxō kexesharatiro. Askafasharaito ōikī yorafāfe chakafakī mekafatirofoma. ¹⁵ Atiri kēro ifomafafāfe Nios kachikiri fakaxō Satanás ifofaafō.

¹⁶ Timoteo, a Jesús Ifofamisto afe yora ifomafakē, kexesharatiro. Askatari a ifomafafo kaifoyakēma, fenemais ita, fakemais ita, fafamaisfo askara a Nios Ifofamisfāfe ato kexetirofo.

¹⁷ A Nios Ifofaafāfe xanīfōfōfāfe noko kexesharakaxō noko ikisharamisfo Niospa meka noko tāpimanaifono nō atoki inimakī nō aicho fatiro. Askatari nō ato ināsharatiro nā afara yopaifo keskara finōfo. ¹⁸ Moisés kenekī yoikī iskafani: “A ato yonomanaito ato yonomakī kopifatiro.” Askatari keneni yoikī fakkaki keparanākai. Moisés keneni yoikī iskafakī: “Oa fakka keskara nō yonomanaino trigo āfe xaka chona chona a fōfāsafatiro nō renexitiroma pi-ifōfāsafanōfo. Askatari a noko tāpimasharamis nō kopifatiro afaa yopayamanō. Nāskafakī nō yoitiro akiki inimasharakī,” ixō yoikī keneni.

¹⁹ A yora fistichi Nios Ifofamisto xanīfōfōnoa mia yoiaito, chanīmara fayamafe. Akka feronāfake rafe iyamai trespa a afara chakafaito ōikaxō, mia yoiāifāfe mī ato nikatiro.

²⁰ Askaito nikakī a Jesús Ifofamisfāferi ichanākaxō yoitirofo iskafakī: “A mī chakafaa keskafakī anā askafayamafe. Nā mī chaka shināi, Jesús yoife na afarafo mī chakafakī fetsai, mī yoiaito nikakī Jesús mia chaka soaxonō.” Mī askafaito ōikani fetsafo rāfitirofo. Askaxō afaa chakafapaitirofoma rāfikaspakī.

²¹ Epa Nios feta Jesucristo āfe ājirifāfe mia ōikani. Nāskakē na ē mia yoiyai anori askafafe. A afara chakafamisfāfe āto ferotaifi yoife. Mī kaifofo yafi mī kaifofofo ōikī, nāskarafāfe āto chaka xatenōfo ato yoife. ²² Ōisharata ato katofe Niospa meka ato yoimis. A kaa fisti ato katoyamafe. Ato ōisharayofe taefakī. Mī ōisharaxoma ato ifitiroma. Mī askara ifikē chipo afara chakafaira

ixō, fetsafāfe mia mekafakī chakafatirofo. Nāskakē shināsharafāi ife, Timoteo. Afaa chakafayamafe.

²³ Timoteo, mī xāki pāemiski faka fisti ayakima uva ene pāepishta ayafe sharaxikī.

²⁴ Atiri yorafāfe afara chakafaito nō ōitiro xafakīakōi. Akka atirifāferi afara chakafaiifāferi nō ōitiro. Mā askafimisfono chipo nō tāpīxii Niospa kāimanaino. ²⁵ Nāskarifikī atirifāfe shara faifāfe nō ōitiro xafakīakōi. Askatari fetsafāferi afara shara faifāfe nō ōitiro. Mā askafamisfono chipo nō tāpīxii Niospa xafakīakōi kāimakē afo.

6

¹ A ato yonoxomisfāfe Jesús Ifofamisfāfe āto xanīfo shināfāi yonosharaxotirofo. Askakaxō tsōa chakafakī mekafatiroma āto xanīfo. Akka āto xanīfo yonosharaxokima chakafakī mekafaiifāfe fetsafāfe ato iskafatirofo: “Kee, na Nios Ifofamisto yonokī finasharaima.” Nāskarifikī Niosri chakafakī yoi. Niospa mekari chakafakī yoi. ² Āfe xanīfāfe Jesús Ifofamiskē a yonoxomistori Jesús Ifofaxō askarato āfe xanīfo noikī shināfāi yonosharaxotiro, akiki xanikima aō noisharakōita afe nanea ōitsakōi ixō shināsharakōitiro āfe xanīfo.

Timoteo, nā ē mia yoiāi anori Jesús Ifofamisfo tāpimasharafe. ³⁻⁴ Nōko Ifo Jesucristo āfe meka fāsharakōi. Jesús meka nikax oa Nios keskara nō shara itiro. Akka a yora fētsa noko anorima yoitiro, āa shināxō. “Ēfi fāsi tāpīfinakōiakī, ea keskarakai tsoama,” ixō āa yoi askara yōra afaa tāpīamafīax. Āa chanī askamis. Askara yora ato fe feratenātiro. Askakī meka shara yoitiro. Āa kakapaimis askara yōri āa shinātiro: “Ea tsōa finōyamanōra,” ixō āa shinātiro. Askara feronāfākekeai Niospa meka ato yoisharatiroma. Askaito ōi kakī feratetirofo, meepaitirofo, nikakaspaitirofo, īchatirofo, noikaspaitirofo, “Noko chakafaira,” ixō shinātirofo. ⁵ Akka a feratenāmisfāfe anorima fisti shināmisfo. Mā Nios shināyopaofinixakakī anā shināsharatirofoma. Anā ato yoisharatirofoma mēstekōi. Afāfe shināfo: “Nō Nios Ifofakatsaxakī nō kori ichapaya itiro,” ixō shināmisfo anori Niospa yoiamafiano. Akka fētsa shināi iskatiro: “Ēri a keskara shara ipai,” ixō shinātiro. ⁶ Akka anori shinātamaroko nō afaamaisfixō nō Nios Ifofaax, nō inimasharakōitiro. ⁷ Na nō fake kāiyaitīa nō afaaya pakenima. Nāskairi a nō naitīa nōkai afaaya katiroma. ⁸ A nō piāi yafi a nō rapatīyax nō inimatiro, afaa anā ichapafō fichipaitama. ⁹ Akka atiri yorafo rapati ichapaya ipaimisfāfe nonori shinākani iskamisfo: “Afaa ē fipakī ē fitiro, nāskax ē inimatiro,” ixō anori fisti shinātiro. Fētsa kori fisti fichipai samama shināchakatiro, afara chakafo fetsa fetsatapafo fichipaitiro. Kori ichapa fipakī afeskakoma askarato chaka shināfāfāini. Askara naax, a omiskōipakenakafo mēra katiro. ¹⁰ Nāskakī kori fisti noi, Niospa meka shinātama afara chakafofa fafāfāini kori fixikī. Nāskafakī Nios kachikiri famisfo. Askara yorafo āto shinā mēraxō shinākani omiskōikanax anā inimasharatirofoma.

Pablo yoini afe keskaramāki Nios Ifofaax nō kerexkai ikai

¹¹ Timoteo, Niospa mia katoa. Kori yafi rapati shināyamafe. Nios Ifofasharafe a keskara ixiki, afaa chakafamisma ixiki, Jesús meka chanīmara fakōixiki. Askaxō mī yorafo noimiskōi ixiki, Niospa meka Ifofakī, akka mī yorafo yoikī oitsifafāi yoisharafe. ¹² Mia yora ichapafāfe ōiaifono mī ato yoimis: “Jesús ea nāxoni ēfe chaka ea soaxoxiki. Nā Jesús ēfe Ifo. Ē fāsi inimai,” ixō mī yoisharani. Akka anā shināmakiyamafe. Jesús mia nāxoniki

nō afe nīpaxanō. Nā fistiōnoa shināfe. Satanás mia chaka shināmapaiyaito nikayamafe. ¹³ Ea nikasharafe Niospa keyokōi noko onifani noko nimaxiki. Jesucristo nā xanīfo Poncio Pilato yoini: “Ēfi Niospa Fakekōi,” ixō ratekima yoini. Iskaratīa Nios feta Jesús mia ōi. ¹⁴ Nāskakē Jesús meka nikasharafe. Afara ē mia yoiai keskara afe, mī askaito ōikī fetsafāfe, “Timoteo chakafamisra,” ixō yoinōfoma. Nāskara afe nōko Ifo Jesucristo nokoaitīa. ¹⁵ Nios fistichi Jesús nokoaitīa tāpiakī āa nīchixiki. Ares afara apaikī atiroki. Afi xanīfo efapakōiki xanīfo fētsa finōtiroma. Nā nōko Ifo efapakōi fato xanīfo fētsa finōtiroma. ¹⁶ Akka tsōa onifanima, aakōi ares ika. Nāskax nanakama. A chaxasharai mēra ika tsoa akiki nokotiroma. Askatari tsōa ōimisma, tsōa ōitiroma. Nāskakē keyokōichi nō aōnoa yoisharatiro: “Nios fisti sharafinakōia. Nā fistichi afara sharafo ares atiroki,” ixō yoipakenakafo. Askapainō.

¹⁷ A kori ichapayafo ato yoife: “Ē kori ichapayaki tsoa ea keskarama,” ixō anori shināyamakāfe. Māto koriōnoax inimamis iyamakāfe. Askatari māto kori mato afeskafatiroma, keyotiro samama. Askatamaroko Nios fisti shinākāfe. A nō afara fipaiyai noko ināi noko fīshkoima. ¹⁸ Nāskakē māto korioxō fetsafo aō noisharakāfe. Fishkomītsayamakāfe. Afaamaisfo ato inākāfe. Fishkoyamakāfe. Inākōikāfe. ¹⁹ Akka mā ato ināsharaito ōi Nios matoki inimai. Mato afara fāsi shara faxōi mā Nios ari nokoaitīa. Iskaratīa mā fetsafo ināsharai keskari fakī, Niospari chipo mato ināsharaxii kiki. Nāskax mā Niosnoax isharapakexatiro,” ixō ato yoife.

Pablo mā mekai xatekī, “Timoteo, mī isharaxō ato yoi sharafe,” ixō kirika kene manamani

²⁰ Nāskakē Timoteo, Niospa āfe meka shara mia tāpimani fetsafori mī ato yoinō. Nāskakē tāpisharayofe, āfe meka tāpisharaxō fetsafo mēstekōi tāpimaxii. Akka fetsafāfe Niospa meka anorima yoimisfo. Aa ranā yoinōnākakī kaxpakōi yoimisfo. Nāfāfe yoimisfo nō tāpikōiara ifiakaxō tāpiafoma. Nāskakē ato fe rafeyamafe. ²¹ Nāskakē nikayamafe. Fetsafāfe nāfo nikakanax ifofakaxō Niospa meka kachikiri fakanax, nāfo fenoafo. Afianā chanīmara faafoma.

Nōko Ifofāfe mato noikī mato kexesharanō. Nā tii.

Ēkīa Pablo.

Pablo Timoteo Afianã Kirika Kenexõ Fomani

Pablo Timoteo yoisharani

¹ Èkĩa Pablo ã mia kirika kenexõ fomai. Epa Niospa fichipaiyai keskafakĩ Cristo Jesũs ea katoni aõnoa ãfe meka shara ã yoifofãsafanõ. Ea yoini iskafakĩ: “Keyokõi yorafo yoife iskafakĩ: ‘Jesucristo matoõnoax nãxoni mato chaka mato soaxoxiki nã chanĩmara faafo tii afe nĩpaxanõfo,’ ixõ ato yoife nã ã mia yoiai keskafafe,” ixõ Jesũs ea yoini. ² Timoteoshta, ã mĩo noikĩ ã mia kirika kenexõ fomai mĩ tãpinõ. Epa Nios nõko Ifo Cristo Jesũs feta mia noikĩ mia shara famanõfo. Askatari mĩ shinã mẽra mia shinãmasharakõinõfo mĩ õiti fekaxtenõma.

Ato Jesũsnoa yoisharafe

³ A ãfe xinifãfe Epa Nios yonoxosharapaonifo keskari fakĩ, ãri a yonoxosharai. Ë mẽraxõ ã afaa shinãchakayamafai ã yonoxosharai. Nãskakẽ ã mia Nios kĩfixõfafãini aicho fakĩ. Pena tii yafi fakish tii ã mia Nios kĩfixõfafãini. ⁴ Nãskakẽ mẽ oaino, mĩ ea shinãi oiaito ã mia õiferani. Nãskakẽ ã anã mia õisharapai, mia õi ã inimasharakõixiki. ⁵ Taefakĩkõi mĩ chichi Loida Jesũs Ifofani. Askata mĩ efa Euniceri Jesũs Ifofani. Afãfe Ifofasharakõimisfo keskafakĩ, mĩri Ifofasharai. Mẽ mia tãpia mĩ Ifofasharakõiaito nãskakẽ ã mia yoi.

⁶ Anã shinãmakiyamafe ã mia mãmãxõ ã mia Nios kĩfixoni. Nãskakẽ Niospa mia katoni Jesũs yoimis mĩ inõ. Mã chii nokakẽ nõ anã xofisa fatiro anã xofisanõ. Nãskarifikĩ mĩ anã yorafo ato yoipaima mã mĩ xokenãifinaxõ askara meekĩ mĩ Nios kĩfitiro anã mia õiti fepeaxosharanõ, mĩ anã ato yoisharanõ inimayanã a mĩ taefakĩ ato yoini keskafakĩ. ⁷ Nãskakẽ Niospa Yõshi Sharapa noko yorafoki mesematama. Aõxõ afama mĩshti noko amatiro. Askatari noko ato noimasharai. Aõxori noko shinãmasharatiro anã nõ chakafanõma. ⁸ Askafai rãfiyamafe Jesũsnoa yorafo yoitaifãfe rãfikima. Askatari eõri rãfiyamafe. Ë Jesucristo ato yoirifaito ea karaxa mẽra ikimatifoki. Mĩri Jesũs ato tãpimasharafe; mĩ askaito, miari omiskõimanaifono rateyamafe. Jesũsnoax nõ omiskõiaito, Niospa mia axoxii. ⁹ Akka Niospa ãfe Fake Cristo Jesũs noko nĩchixononi nokoõnoax nãxoyonõ nõko chaka noko soaxoxiki. Askaxõ noko shinãni afe yora nõ inõ. Nõ yora chakafofiakẽ Niospa noko noimis. Taefakĩkõi Niospa mai onifaxoma, a inõpokoai tãpixõ, noko shinãni noko ifixixakĩ Jesũsxõ. ¹⁰ Jesũs noko ano oamatai Niospa noko ifipaiyai anori nõ tãpipaonima. Akka rama iskaratĩa mã nõ tãpia noko ifimis Jesucristo noko nãxoni. Nãskax iskaratĩari nõ nai, nõ rateima omiskõipakenakafo mẽra nõ kairoko. Nõ Nios ari kaax anã nõ naxima. Jesũs noko chaka soaxonano nõ Nios ari nĩpanaka. Mã iskaratĩa nõ tãpia Jesũs noko nãxoni nõ chiifã mẽra kanõma noko ifiano.

¹¹ Niospa ea katoni na meka shara Cristoõnoa yora fetsafo ã ato tãpimanõ.

¹² Nãskakẽ ã karaxa mẽranoax Cristoõnoax omiskõifi ã rãfima. Ë Jesũs tãpikõiax chanĩmara fayanã. Jesũs ãfe chaka taefakĩ ea soaxonitĩa ã Epa Nios iskafakĩ yoini: “Epa Niosi, ã kexesharapakexafe Jesũs afianã oaitĩa,” ixõ ã yoini keskara ea axoxii ã chanĩmara fakõini.

¹³ Na ã Cristo Jesũsnoa mia chanĩmakõi tãpimana shinãmakiyamafe. Ë mia mẽstekõi tãpimana keskafakĩ, nãskari fakĩ ato tãpimafe. Cristo Jesũs chanĩmara

fakī afe rafekī aōxō yorafo noife mī afe rafeakī. ¹⁴ Nā ē mia yoia keskara mī mēraxō shināfe, shināmakixikima. Āfe Yōshi Shara mī mēra ikano mefeta aki. Ōifāi, Niospa mia yoia keskafakī kachikiri fayamafe.

¹⁵ Mā mī tāpia keyokōichi chanīmara faafo Asia mai anoafāfe ea ōifainafō. Askatari ato feta Figelo feta Hermógenesri ea ōifainafō ato fe fokākī. ¹⁶⁻¹⁷ Akka Onesíforokai askanima, eō rāfinima ē karaxa mēra ikikē. Nāafi Roma ano nokoxō pena tii ea fenafafākī ea karaxa mēranoa fichita, ea ōiyoi nā otitaiapaoni mēxotaima ea ōifaa ōifakī, ea pishta inimamani. Nāskakē nōko Ifāfe Onesíforo āfe āfinō āfe fakefonō Efeso anoxō ato noikī ato kexesharaxonō. ¹⁸ Onesíforo Efeso anoxori ea yonosharaxopaoni, mīfi a ōixō tāpisharakī. Jesucristo anā fotoxō noko ichanāfaxō Onesíforoki inimakōikī noikī axosharaino ē askara fichipai.

2

Nō Jesús Ifofakī oa soraronō āfe xanīfo nikakōiai keskafakī nōri Nios nikasharakōitiro

¹ Timoteoshta, Jesucristo āfe kerex sharaōnoax isharafe, afaa chakafaxima.

² Ē yorafo Jesúsnoa yoiaito mīri ea nikafafāini. Nāskarifiāi mī ato chanīmara fasharatiro. Nāskaxō a feronāfakefāfe a shinā sharaifo ifife mī ato tāpimaxikī afāferi fetsafo tāpimanōfo.

³⁻⁴ Akka soraro ōiti sharayato omiskōifikī tenetiro. Āfe pexe shināyamata āfe xanīfo fisti ifofakō nikasharakōi. A afara yonoai keskara āfe xanīfāfe yonomanaino soraro sharapa yonosharatiro. Nāskarifikī Niospa mia yonomapayai keskari fakī yonosharaxōfe fanīrira fetsa shinākima. Jesúsnoax omiskōifi meseyamafe. ⁵ Askatari fetsafo xonōnōnāxikakī ikisi itipinīsharatirofo xonōnōnāpaikani. Askatari mīri shināsharafai Niospa mia yoiaito nikasharakōife. Akka mī nikasharayamaito Niospa mia, “Aicho, mī fāsi sharakōi,” ixokai mia yoitiro. ⁶ Askatari feronāfāke yonosharamiskōi āfe tare efapafaxō, ikisi āfe yono fitiro pixikī. Nāskarifiakī mīri Jesúsnoa yonoxosharamis Jesús mikiki inimakōinō mia afara shara ināxii. ⁷ Ē mia yoiai keskara shināsharafe. Nōko Ifāfe mato tāpimasharai kiki.

⁸ Nāskakē shināmakiyamafe Jesucristo naafiakē anā Niospa ofofani noko ifimis inō. Nā David āfe fena. Nānori nā meka shara ē yoifafāimis. ⁹ Nā ē yoifiaito, yorafāfe Jesús Ifofaafoma ōitifishkikakī. Ē Niospa mekasharaōnoa yoiaino ekeki ōitifishkikakī ea karaxa mēra ikimanafo. Ē afaa chakafayamafiakē ē feronāfake chaka keskarakē ea karaxa mēra ikimanafo. Ea ikimafianifono Niospa meka Jesucristoōnoa ē enetiroma. ¹⁰ Nāskakē ē atoōnoax omiskōifikī ē tenekōi a Jesús Ifofafo tii ē ato tāpimani chanīmara fanōfo, Nios fe ipaxakakī.

¹¹ Na meka sharakōi nikafe:

Nō Jesúsnoax nakī nō chanīmara faax nō afe ipanaka. ¹² Askatari nō Jesúsnoax omiskōifikī nō tenei, nō Jesús fe Epa Nios ariax xanīfo ipanakakī. Akka nō Jesús potakī, “Niospa fakemara,” ixō nō askafaito Jesús noko yoitiro iskafakī: “Mā ea Niospa Fakemara faito ēri mato kopitiro iskafakī: Mī ēfe fakema,” fakī noko fatiro. ¹³ Askatari nō Jesús nikayamai nō isharayamafimiso, akka akai askarama, aroko isharakōimis. Aatokai afaa chanī yoimisma, āfe meka chanīmakōi. Aakai ōiti ranāyama.

Afe keskara a Niospa meka yoimis shara itiromē Nios akiki inimanō

¹⁴ Na ě mia yoiari anori, mefe yorafo ichanāmisfo ato shināma fafāife. Niospa mia xafakīa ōiaino ato yoife Niospa mekaōnoa feratenānōfoma, feratenākani aōnoax mekanōfoma. Akka fatotokai yoisharaimākai fatotori yoisharaimamākai ikaxō tsōa tāpitiroma tāpipai kakī. Anorima nika kakī tsōa tāpitiroma. Askakani fanīrira mekamisfo āa chanīkani. ¹⁵ Timoteo, Niospa meka pena tii ōife. Askafaxō Niospa meka tāpisharaxō yorafo mēstekōi ato tāpimafafāife. Mī askaito Niospa mīōnoa yoitiro iskafakī: “Na ea yonoxosharamis, ě akiki inimasharakōi,” ixō mīōnoa yoixiki. Mia askafainokai mī aō rāfitiroma. ¹⁶ A feratenāmisfo āto meka nikayamafe. Nō āto meka nikaxō meka mēstekōi Jesūsnoa nō nikapaitiroma. Askaxō anā nō Nios Ifofapaitiroma. Chakakōi itiro. ¹⁷ Oa yora faraxiki finaxō, koofi payokometiro ksfakakī, a yōra anorima yoikī yorafo āto ōiti chakana fatiro. Himeneo feta Fileto askara chakakōi ato yoimisfo. ¹⁸ A Jesūs oaitia a namisfo anā otōxiaifo mā nō tāpifekē, a feronāfake rafeta Himeneo feta Fileto anorima mato yoimisfo. Akka nō tāpia mā Jesūs anā fotoaino Epa Niospa nā namisfo otōfaxii. Akka nā rafeta mato pāramisfo āa chanīkakī. Iskara mato yoimisfo: “Mā finōa a mato yoimisfo keskara. A Niospa namisfo mā ato otōfaa,” ixō a refeta yoimis. Afāfe nā meka nikaxō shinākī iskafatirofo: “Ooa. Mā nō nakē Niospa noko anā otōfaima,” ixō anorima shinātirofo. Anori shinākani Jesūs shināmakitirofo. ¹⁹ Akka Niospa meka chanīmakōi. Tokirinīfakai tsōa rafetiroma. Niospa meka nāskarari. Tsōakai āfe meka fetsafatiroma. A chanīma, nā yoimis keskara nāskarakōi. Tokirinīfakī yōra keneakai tsōa soatiroma. Nāskarifiakī Niospa meka kenenifo iskafakī: “Nōko Ifāfe afe yorafo tāpikōia.” Nāskakaxō, “Afe yorafāfe a afara chakafamisfo keskara potatirofo,” ixō kenenifo.

²⁰ Feronāfāke āfe pexe efapa sharakōi faxō a mēra kecho sharakōifo faa, askaxō a kecho sharafo mēra afara sharafo fatiro. Akka a kecho chakafo mēra afara chakafori fatiro. ²¹ Mā mī chaka mī xatekōiax, nā fēta xinikī afara chaka potatiro keskara itamaroko. Nā sapa choka keskara sharakōi mī itiro. Nāskax Jesūs keskara shara mī ikaino Epa Niospa mia yonomapaiyai keskara mī aōxō afara sharafo faxotiro.

²² A naetapafāfe afara chakafo shinākī nā apaiyai keskara faifono mīri askayamafe. Anori shinātamaroko Niospa fichipaiyai keskara shināfe, Jesūs chanīmara fafāi, yorafo noikī, fetsafāferi shināsharakōiaifono, Jesūs Ifofaifo ato fe mēstekōi isharakōife. ²³ Anā ě mia yoinō, ea nikasharafe. A feratenāifo ato nikayamafe. Ato fe feratenāpaiyamafe. Askara yorafo samama ōitifishkitirofoki. ²⁴ Niospa meka yoimisto tsoa feratetiroma. Anori askatamaroko keyokōi yorafo ato noisharafāi, ato tāpimasharatiro, tenekōisharata ato yoitiro. ²⁵ Fētsa Niospa mekakōi nikakaspakī meka anorima fisti shināito, fenāmāshta ato tāpimasharafe. Mī ato askafaino āto chaka xatetiromo Niospa mefeta akaino. Askaxō Jesūs chanīmara fakōinōfo. ²⁶ Nāskafakī anā Niosnoa shināsharanōfo. Oa tarapa mēra ikia keskara Satanās ato fapai kiki. Nāskaxō ato amapaiyai keskafakī ato yonofafāini. Akka mia nikaxō Jesūs ato ifitiro. Nāskaifono Satanās afianā ato afara yonomatiroma. Afianā tarapa mēra ikia keskara ikanima.

3

¹ Timoteo, õisharafe. Ë mia yoi Jesús chaima oaino fekaakõ: ixii kiki. ² Fetsa noitama ãakõ: kexemei, askatari fëtsa áfe kori fisti shinãfã, ãakõ: anofi inimamis ikã, Niosnoa chaka yoimis ikã, askaxõ áto apa yafi áto afa nikakaspamisfo ikã, yonoxofiaifãfe aichora ato famisfoma ikã, ato noikaspamisfo, Niosnoa shinãtama chakakõ: fistic shinãmisfo, ³ afe yorakõ: noiyamafã, fetsafo noiyamata axokaspafã, fetsafo ãa pãramis ikã, ãa apaiyai keskafakõ enemisma ikã, mitsisipakõ: ikã, afara mĩshti sharafo noiyamafã, ⁴ askata a afe rafeafo ato chakafafã, samama õitifishkimis ikã, “Ëkai tsoa keskarama,” ixõ yoifã, Nios noitama afara chaka fisti fakõ ato inimama-paimiskõ: ipaikani. ⁵ Askata a Nios Ifofafo ichanãifono ato fe ichanãkaxõ Niospa meka nikafikaxõ shinãsharakanima. “Nõri Nios Ifofai,” ixõ ãa mato pãrakani. Askax ãa chanĩmisfo Nios Ifofayamafiakanax.

Askaifãfe õi ato fe rafeyamafe. ⁶ Askara yorafãfe a fofãsakã ato pãratirofo a kãro tãpisharamisfoma fanĩrira ato yoimisfo ato anorima yoiãifãfe. Atirifãfe noko yoikõikanira ato famisfo. Nãskakẽ a xotofakefãfe noko yoikõikanira ikaxõ a yoiãifo anori ato nikataifaafo. Nãskakẽ a kãrofãfe ãa shinãkani iskakakõ: “Nõ fãsi chakakakainaito, noko tãpimasharanõfora,” ixõ shinãkani anorima áto shinã mẽraxõ shinãkaxõ nãskai fekaxtetitãiafo. ⁷ Nãskaxõ a ato yoimis fẽtsari ato yoiãito, nikatai fakaxõ Niospa meka sharakõ: tsõa mẽstekõ: tãpinakafoma. A rama ikai fẽtsari yoiãito, nikakãkiri aõxõ tãpisharapafikakõ, tsõa tãpinakama Niospa mekakõ. ⁸⁻⁹ Mã mĩ shinãimẽ anori aakõ: Egipto anoa xanifãfe Faraón israelifo ato yonomapaoni, mesemaxõ? Askaito õikõ Niospa Moisés nĩchini afe yorafo israelifo mai fetsa ari ato iyotanõ. Ato askafãito Faraón ato nĩchikaspani. Askaino a feronãfãfe rafe ano mokaya inifo; fetsa ane Janes ikaino fetsa aneri Jambres ini, nã rafe Faraón fe rafeafo ini. A rafe Moiséski õitifishkinifo. Nãskaxõ áto xanifõ Faraón ãa pãranifo ato Moisés nikanõma. Askafãifãfe õikõ chipo áto xanifãfe tãpini Moisés a feronãfãfe mokaya rafe finõkõia ini. Mokayafakaxõ afaa tãpiama inifo. Nã rafeta Faraón yoinifo Moisés nikanõma. Nãskafakõri fetsafãfe Niospa meka mẽstekõ: ato nikamakaspakani. Nãskaxõ Niospa meka mẽstekõ: tsõa yoima áto shinãmã anorima shinãkani. Oa Janes feta Jambres áto xanifõ anorima yoiãifono áto xanifãfe ato tãpini keskafakõ. Nãskafakõri na iskaratã na anorima yoimisfo ãa chanãifãfe nõ ato tãpixii afãfe afaa tãpiafoma.

Mã Pablo mekai xatekõ Timoteo yoisharani

¹⁰ Timoteo, mã mĩ ea õisharakõimiskõ ãe ato afo tãpimanaito. Mã mĩ ea õimiskõ afeskax ãe isharamãkai, Nios fisti inimamapafã, Jesús noikõ chanĩmara fafã, afarafo chakafo nokoaito ãe tenefã, ãe yorafo noifã, ¹¹ a yora chakafãfe ea Jesúsxõ chakafãifãfe ãe tenefã, askai ãe omiskõimis. Mã mĩ tãpia ãe afo tenemis. Askatari mã mĩ tãpia a Antioquã anoa ita, Iconio anoa ita, a Litra anoxõ ea chakafãifãfe ãe teneni. Nãskakẽ nã chakafoõxõ nõko Ifo Nios ea kexesharamis ãe tenesharakõimis inõ. ¹² Na ãe mia yoiã anori chanĩma. Nõ Cristo Jesús fe rafesharapayaito a Jesús noikaspamisfãfe noko omiskõimaxii. ¹³ A yora chakafãfe ãa ato pãrakani. Askatari chipo ato pãrakõ finakõixikani. Nãskakẽ afara chakafakõ ato pãraifãfe õikõ Satanãsri ato pãraxii.

¹⁴ Nãskakẽ Timoteo, na meka Jesúsnoa mĩ tãpisharai. A mia tãpimanafo mã mĩ tãpikõia. Nãskakẽ mĩ tãpisharakõ. Anori meka chanĩmara fafe, shinãmakikima. ¹⁵ Mã mĩ shinãimẽ yomepishtaxõ mĩ Niospa meka tãpiakõ? A mekaõnoa mã shinãsharamiskõ Cristo Jesús chanĩmara faax nõ afe isharamapake-naka. ¹⁶ Niospa ato shinãmanaino feronãfãfe kirika ato kenxonifo Niospa

meka ato tãpimaxikakĩ. Fetsafãfe afara chakafaifono, nõ ato Niospa meka tãpimasharatiro anã askayamanõfo. Askatari nõ isharapaikõikĩ nõ Niospa meka õikĩ nõ tãpitiro afeska faxõ nõ Jesús Ifofasharatiromãkĩ. ¹⁷ Akka Nios Ifofamisãfe ãfe meka nikasharakõikaxõ, Nios yonoxosharakõitirofo.

4

¹ Timoteo, ã mia kaxeta yoima, nikafe. Jesús oatĩa nõko xanĩfokõĩ ixii Apa Nios feta, keyokõĩ yorafo namisfo yafi niafori ato yoixii. Jesús chanĩmara fakanax afe nai mẽra nisharapakenakafo; akka a chanĩmara famisfoma chiifã mẽra Niospa ato potai omiskõipakexanõfo. Nãskakẽ ãfe Fake Jesucristo feta Niospa noko õiaino ã mia yoi iskafakĩ: ² Niospa meka fena fenakima ato yoife fenãmãshta shara. A nikapaiyaifo askatari a nikakaspaifori ato yoisharafe, mĩ ato yoisharaino ãto chaka xatenõfo Jesús Ifofasharax isharanõfo. Shinãsharata, Niospa meka mẽstekõĩ yoife. ³ A yora chakafamai nokoaino yorafãfe Niospa mekakõĩ nikakaspatirofo. A nikatamaroko meka fetsafo shinãtirofo, nã apaiyai keskafakakĩ. Anori fisti shinãkani. Nãskakanax ano fisti ichanãkaxõ anorima a fetsafãferi yoiaito nikakakĩ. ⁴ A Niospa mekakõĩ nikakaspakani a ãto xinifãfe shinãpaonifo keskari fakakĩ. ⁵ Nãskakẽ Timoteo, õisharafe. Afara afeskaraito Niospa mekakõĩ Ifofasharafe; mĩ shinãfenotama anori tãpisharafe. Mia omiskõimanaifono tenefe. Kafãkakaikĩ yorafo Jesúsnoa tãpimafe Ifofanõfo. Nã mia Niospa yoiai keskafafe shinãfãĩ.

⁶ Iskaratĩa eõnoa ã mia yoi. Anã ã samarakaima mẽ chaima nai ea Jesúsxõ retexikani. ⁷ Mẽ yonosharakõitiani ãfe Ifo Jesúsxõ. Ë chanĩmara fatitaifaa enekima. Keyokõĩ Niospa ea yoiai keskara mẽ aka. ⁸ Nõko Ifokõichi ea õimis ã Ifofasharakõiaito. Nãskakẽ ã akiki nokoaito ea afarafo inãsharaxii. Eres fisti ã fixiima. Nã nõko Xanĩfo finakõia oaitĩa keyokõĩ nã Ifofaafãferi fixikani. Aõ noikĩ a manaifori ato inãsharaxii.

Pablonõ Timoteo fisti yoini kirika kenexokĩ

⁹ Timoteo, ea ano orisape. ¹⁰ Demãs afarafo fichipaikĩ ea nonoa õifaiti, Tesalónica ano kakĩ. Askatari Crescenteri kati Galicia ano. Askatari Titori Dalmacia ano kati. ¹¹ Akka na Lucas fisti efe ika. Nãskakẽ Marcos ea efexõfe ea axosharaiyonõ Niospa meka ato yoikĩ. ¹² Akka ã Tíquico Efeso ano nĩchiyamea ã. ¹³ Mĩ oaitĩa ea ãfe rakoti fexõfe a Troas ano ã faferati a Carpo pexe ano. Askata ãfe kirikari ea fẽxota, askatari kirika fetsari ea fẽxota a fakka fichisharakõĩ ã akiki kenemis, aari ea fexõfe. Ë afo fichipaikai.

¹⁴ Na yami famis Alejandro ea fãsi mekafamis. Aato ea chakafaito õikĩ Niospa kopikiri omiskõimaxii. ¹⁵ Õisharafe. Alejandro miari chakafatiroki na meka shara Jesúsnoa nõ yoiaito noko meka xatemapai kiki.

¹⁶ Akka ea taefakĩ xanĩfo ano iyonifo tsõakai eõnoa yoisharanima. Akka keyokõichi ea õifainifo fõkakĩ. Askafiaifono ã Nios iskafakĩ yoini: “Epa, na ea nonoa õifainaifo ato chakafayamafe,” ixõ ã Nios yoiyamea. ¹⁷ Ea askafafiaifono ãfe Ifãfe Jesús ea potayameama, ea kexexõ. Ea askafiaifono ã ratetima ãfe Ifãfe ea kexeano ãfe kerex ea inãno ã ato yoinõ. A judeofomafãfe ea yõkaifãfe keyokõĩ nikanõfo ã Niospa meka Jesúsnoa ato yoiyamea. Ë askaito ea retepaikakĩ, oa poomãnã noko pipaiyai keskara ea fatifo ea retepaikakĩ. Ea askafafiaifono ea Niospa kexesharayamea ea tsõa retenõma. ¹⁸ Afara chakafo ekeki nokoaito õikĩ ãfe Ifãfe ea kexetaifa a ã akiki nai mẽra nokoaitĩa. Fãsi nõko Nios sharakõĩ, tsoa fẽtsakai askafatiroma. Nãskakẽ tsõa

nõko Nios finõtiroma. Ares fisti sharafinakõia. Nõ aõnoa yoisharapakexanõ. Nãskapakexapainõ.

Pablo mã mekai xatekĩ ato meka shara fomani

¹⁹ Timoteoshta, ea Prisca yafi Aquila ea yoixõfe, keyokõi yorafo Onesíforo pexe ano ikafori ea yoixõfe. ²⁰ Erasto Corinto ano nēteyamea. Trófimo isinĩ ikĩ rakakē ē Mileto ano rataferayamea. ²¹ Nã mechaka ikamano ekeki ofe. Eubulonõ, Pudentenõ, Linõnõ, Claudianõ, keyokõichi Jesús chanĩmara faafãfe mato yoisharapaikani.

²² Nõko Ifo Jesucristo mefe ipaxanõ. Askatari Niospa mato noikõikĩ mato kexesharakõinõ keyokõi. Nã tiĩ ē mato yoi.

Ĕkĩa Pablo

Pablo Tito Kirika Kenexõ Fomani

Pablo Tito yoisharani

¹ Tito, ã mia kirika kenexõ fomai. Ëfi Pabloki, Niosfi ãfe Ifokõiki. Nã ea yoiãi keskamis ã. Jesucristo ea nãchia ã aõnoa yoimis inõ, nã Niospa katoa yorafo ã ato tãpimanõ afãfe Jesús chanĩmara fanõfo. ² Niospa mai onifatama shinãkĩ iskafani: “Na yorafo ã ato katoano efe rafeaifono ã ato ìkikõipakenaka efe ìpaxanõfo,” ixõ shinãni. Nãskakẽ nõ Nios Ifofapaikĩ nã yoiãi keskara nõ chanĩmara fatiro. Nios ramashara chanĩmismã. ³ Aatofo noko tãpimapaiyaitĩã ãfe meka shara noko tãpimani. Nãskakẽ iskaratĩã ea nãchia ã ato ãfe meka shara yoinõ eõxõ tãpinõfo. Nã Nios noko ifimis nõ afe ìpaxanõ. ⁴ Tito, ã mia kirika kenexõ fomai. Mĩfi ãfe fake keskarakõikĩ, eõxomãĩ mĩ Nios chanĩmara fakẽ. Epa Nios mĩ Ifofakẽ mia imasharakõipakenaka mia noikĩ mia shinãsharamani. Nõko Ifo Jesucristori mia askafai.

Pablo Tito Creta ano nãchiferani ato tãpimanõ

⁵ Tito, ã mia nãchiferati Creta ano a nõ yonofai mitoxoma mĩ chipo mitonõ. Nãskakẽ ã mia yoiti iskafakĩ: “Nã pexe rasi anoafo kexemisfo katofe nã Nios Ifofaafõ ichanãfono ato kexenõ,” ixõ ã mia yoiferati. ⁶ A Nios Ifofaafõ kexemis katofe afaa chaka shinãmismã. Æfi fistiya inõ. Æfe fakefo Jesús tãpiafo inõfo, ato kemamisma inõfo, afaa chakafamisfoma inõfo ãfe fakefo. ⁷ Nã Nios Ifofaafõ kexemis sharakõĩ itiro, afaa chaka shinãmismã nãmãĩ xanĩfoax. Nã keskara yora mĩ katotiro nã Nios Ifofaafõ kexemis inõ. Nã Niospa shinãmanai keskara inõ aõnoa afaa chaka yoiyamanõfo. Askatari kakapaimis itiroma. Askatari samama õitifishki imiskai itiroma. Askatari pãemis itiroma. Askatari setemitsamis itiroma. Askatari yora fetsa pãraxõ kori fiamis itiroma. ⁸ Askatamaroko isharakõixõ yorafo ãfe pexe nokoaito atoki inimayanã ato ifitiro. Askatari yorafo keyokõĩ ato afara shara axõsharakõimis itiro. Askatari ãa kexemesharamis itiro mẽstekõĩ isharakõiyãã. Niospa meka nikasharakõipai afara chakafapaifkĩ anã akima. Nãskaxõ a Niospa fichikaspaifo anã shinãima. ⁹ Niospa meka nikasharaxõ kachikiri fayamafãĩ, nã Niospa yoiãi anori chanĩmara faxõ fetsafori yoitiro. Xafakĩakõĩ yoitiro. Nãskaito nikai yorafo Nioski inimanõfo. Askatari anorima yoimisfori ato tãpimatiro, akairi tãpinõfo.

¹⁰ Akka nã fetsafo nikayospakõimisfo Niospa meka ato yoiãifono nikakas-pakõimisfo. Nãskaxõ meka fetsafaxõ yoimisfo ãa fanĩrira yoikakĩ nã Moisés yoini keskara fisti nõ nikanõra ikaxõ. Akka nã judeofo ranãri askamisfo ãa chanĩkani. ¹¹ Nãskakẽ ato xatemafe ato pãranõfoma. Kori fisti fipaikakĩ anorima chakakõĩ ato tãpimapaikani kiki. Nãskakẽ ranãrito atoõxõ Jesús kachikiri fayomisfoki.

¹² A feronãfake onãyato a inõpokoai keskaraõnoa Creta anoxõ yoini: “Nono ikafo, Cretafofi chanĩmiskõĩ, nikayospafo, pikĩ fisti tãpiafo, yoinã keskara pitsikõifo xanikõifo,” fani. ¹³ Nã tãpiafo ato yoikõĩni ato pãranima. Creta anoafo chakakõĩ ikafo. Nãskafiaifono ato yoisharafe Titopa, anã askanõfoma, Niospa yoiãi keskara nikanõfo. Nãskaxõ Niospa meka chanĩmara fanõfo. ¹⁴ Akka judeofãfe ãto xinifãfe ato yoipaonifoki anorima, ãa chanĩkakĩ. Nãskakẽ ato yoisharafe anã ato nikanõfoma. Askatari a Niospa meka anã nikaifãfema ato yoipaiyafono, ato yoisharafe anã ato nikanõfoma.

¹⁵ Fetsafo òiti sharayafo, māmāi Epa Niospa ato chaka xatexonano. Nāskakē afara sharafo atonā sharakōifo. Akka a òiti chakayafāfe āto shinā mēraxō chakakōi shināmiso. ¹⁶ Askafiax chanīmisfo, “Nō Nios tāpiara,” iki, tsōa Nios shināyamafi. Askara yōra Niospa meka nikakaspakī chakafai. Nāskakē nō tāpitiro askara yora Nios fe rafemisma. Askara yōra shara shināima, afaa pishta shara fatiroma, chakakōi shināi.

2

“Niospa meka ato mēstekōi tāpimasharafe,” Pablo Tito fani

¹ Mīfi askaramakī, Titopa, mī ato yoisharafe. Niospa meka ato mēstekōi tāpimasharafe, mia nikasharanōfo. ² Askata anifo tiiri ato yoisharafe isharanōfo. “Anā pāeyamakāfe,” ato fafe. Askafaxō ato yoisharafe: “Māri isharakāfe mā askaito òikī fetsafāfe mato òinōfo. Afara chakafapaikī anā ayamakāfe, kexemesharakāfe. Shara shināi ikāfe. Māto òitinī Nios shinākī kachikiri fayamakāfe. Askata māri yorafo fe rafesharakāfe. Ato noikāfe. Māto afara afeskaraito shināchakayamakāfe, a finōmataroko Nios yoikāfe.” Nāskaxō anori ato tāpimasharafe, Titopa. ³ Askatari a yōxafo tiiri ato yoisharafe iskafakī: “Isharakāfe a Niospa fichipaiyai keskai. Askatari mā ranā paranōnāyamakāfe. Parakī ato chakafayamakāfe. Yōxafofiax pāeyamakāfe. Askatamaroko afara sharakōifo fetsafo ato tāpimakāfe,” ixō ato yoife. Askafafe ato yoikī, a ranā askanōfo. ⁴ Nāskafaxō anā ato yoisharafe, Titopa, yōxafo tiito a naetafafa ato yoisharanōfo a tiitori tāpinōfo, nāskaxō āto fene noisharakōinōfo, āto fakefori noikōinōfo, ⁵ afara chakafapaifakī anā anōfoma, kexemesharanōfo, askatari āto pexe anoxō āto fakefo kexesharakōinōfo faki fofāspaiyamanōfo, askatari ato noisharakōinōfo, askatari āto fene nikakōinōfo. Nāskaifāfe òikī fetsafāfe Niospa meka chakara fatirofo, nā kērofo shara niaifāfe òikī, Nios Ifofakanax. Akka kērofāfe Nios Ifofafiakakī anorima shināifono fetsafāfe Niospa meka chakara fatirofo, nā kērofo òikī, chaka niaifono, Nios Ifofafiakanax. Akka nā kērofo Nios Ifofaax shara ikaifono òikī fetsafāfe Niospa meka chakara fatirofoma. Nāskara yōxafofōfāfe ato shara tāpimatirofo, naetafafa.

⁶ Askatari naetapafori yoisharafe iskafakī: “Māri tāpikāfe, shināsharakāfe isharaxikāki. Afara chakafapaifakī anā ayamakāfe, kexemesharakāfe,” ixō ato yoife, Titopa. ⁷ Askatari mīri isharafe. Keyokōi yorafo shara fafe. Afeskax isharatirofomākī ato òimafe. Ato Niospa meka tāpimafe, mēstekōi ato yoisharafe, xafakīakōi. Niospa mekaki kakapayamafe. ⁸ Ato meka shara yoife. Mī shara yoiaito, mia fetsafāfe iskafanōfoma: “Titopa noko meka chaka yoirā,” inōfoma. Tsoa mefe feratenāyamanō. Mefe feratenāpaikani rāfitirofo. Mī afara chakafaino mia tsōa òiyamanō.

⁹ Askatari a ato yonomatifo ato yoife iskafakī: “Māto xanīfāfe mato yoiaito akiki inimayanā nikakōikāfe afe feratenākakima. ¹⁰ Nāskaxō māto xanīfo āfe afara onēyamakāfe. Shara yonoxokāfe, ramashara mā ato pāramismakī. Askara òikī mato tāpisharanōfo mā ato yonoxosharakōiaito māmāi Niospa meka shara shinākī.” Nāskakē mātoōxō, “Niospa meka sharara,” fatirofo. Nā Nios noko ifimis nō afe ipaxanō.

¹¹ Epa Niospa āfe Fake Jesús nāmā nīchini nokoñoax naiyonō nōko chaka noko soaxoyanā nō afe ipaxanō. Nāskakē nō tāpitiro Epa Niospa keyokōi noko noikōiaito. ¹² Noko noikī noko tāpimani afara chakafakī nō xatenō. Noko afara chakafamapaiyafāfe nō ato yoitiro iskafakī: “Maa, ē anā afaa chakafapaima.

Ē shara nipai, ē anā chaka shināpaima,” nō ato fatiro. Nāskaxō nōko ōiti mēraxō a afara chaka nō fichipaiyai a Niospa fichipaiyaima, nōri anā fichipaitiroma. Askara fichipaitama a nō shināmakitiro. Nāskata nō isharakōitiro. Niospa noko shināmanai keskara fisti nō shinātiro. Nāskax nō shara nitiro. Yora fetsafāfe chaka shināifono nō askara shinātiroma, Nios Ifofaxō. ¹³ Iskaratīa nō Jesucristo manai anā oaito nō ōisharapai. Nāfi nōko Ifokōiki. Nāfi Nioski. Nō tāpia nokoki anā oxii. Nokoki nokoaito sharafinakōia nō ōixii. Nāato noko nāxoni nō omiskōipakexanōma nōko chaka noko soaxoxiki, nō afe nīpaxanō. ¹⁴ Nā nokoōnoax nani. Nōko chaka keyokōi noko soaxōfaini. Nāskaxō nōko ōiti noko sharafaxōa. Nō afe yoraxō nō afara sharafapaikī nō anō.

¹⁵ Nāskakē ē mia yoiāi keskafakī keyokōi yorafo ato tāpimafe, mia Niospa shināmanaino. Afara chakafaiāfe ato yoisharafe, anā askanōfoma. Niospa yoiāi keskafakī mīri ato yoisharafe, inimanōfo. Mī ato askafaito mia nikasharanōfo Niospa mia yoiāi keskarafakī akairi nikasharanōfo.

3

Nios Ifofaafō shara nitirofo

¹ Nāskaxō mefe yorafo ato yoisharafe, Titopa, iskafakī: “Māto xanīfofo feta nafa xanīfāfe yoiāito nikasharakāfe. Ato nikasharax a mato yoiāifo keskākāfe. Askatari afara afeskaraito ato axosharakāfe. Shara shinākāfe. ² Askatari ato mekafakī chakafayamakāfe. Fētsa mato yoipaiyaito ferateyama-kāfe. Akiki ōitifishkiyamakāfe. Ato shināsharakāfe. Fenāmāshta ato yoikāfe,” ixō ato yoisharafe, Titopa.

³ Nāskakē nōri afaa shināyopaonima. Nōko ōiti mēra nō afaa pishta shinātiroma nō ipaoni. Nō nikayospakōi nō ipaoni. Nō chaka shināpaoni. A nā nō ipaiyai keskara nō ipaoni. “E shara shināi, nā ē ipaiyai keskara ē iki,” ikax nōa nō pāramepaoni. Nō yora fetsa āfe afara fichipaipaoni. Nō ato mekafakī chakafapaoni. Chakakōi nō ipaoni, afaa pishta nō mekeaima. Nāskax nō noikaspā faatanāpaonixakikai nō xatemisma. ⁴ Mā nō askapaonino, Epa Niospa noko noikī āfe Fake fisti nīchini nōko chaka noko soaxoniyonō, nō omiskōipakexanōfoma nokoōnoax naiyonō. Nāskaxō noko ōimani afesaxō noko noimākai. ⁵ Akka nō chaka shināmiskē noko nāxoni nōko chaka noko soaxoxiki, nokomāi noikōiki. Akka nō afara shara faōxō noko ifima. Noko noikī nōko ōiti fetsafaxō noko shināmasharai. Noko askafaano nō niāx fena keskara shara nō itiro. Niospa Yōshi Sharapa noko askafatiro. Nōa nō niāx nō askatiroma. Nōa nō chaka soametiroma. ⁶ Nōko Ifo Jesucristo noko nāxoni, nōko chaka noko soaxoxiki noko ikipakexakī. Nāskakē Niospa āfe Yōshi Shara noko inā nō mēra nanenō, fishkomītsatiroma. ⁷ Nāskaxō noko ōiti shara faano, nō afe rafekōitiro nokomāi noikōiki. afe rafeax nō afe nisharakōipakexatiro nā nō ipaiyai keskaī.

⁸ Titopa, ē mia xafakīakōi yoiāki. Nā ē mia yoiāi keskara chanīmaki. Nāskakē Nios Ifofaafō yoisharakōife, shināsharata isharakōinōfo, yora fetsafo shara fanōfo. Askara shara ikax keyokōi nō isharatiro. ⁹ Nāskata fētsa mia feratenāito kemayamafe. Mia iskafaito: “Nōko xinifo mī tāpiama, mī ea keskarama,” mia faito kemayamafe. Askata oi mitsisipato mekaito kemayamafe. Moisés yoini keskafakī mia mekafainīfōfānaito kemayamafe. Mī kemapanā sharamaki. A noko askafai yōra afaa tāpiamaki. Askara fe nō kemapānātiromaki.

¹⁰ Akka fētsa a Jesús Ifofaafō ato yoisharakima āa ato pārakī ato paxkanāfaino kenaxō yoisharafe mia nikasharaimākai anā askanōma. Akka

mã mĩ yoikĩ rafefafiano mia nikayamaino anã afaa yoiyamafe. Askatari anã afe rafeyamafe, ares inõ. ¹¹ Mã mĩ tãpia askara yõra Nios Ifofaama. Niospa meka níkaíma, chaka shinã, õiti chakaya. Askarato afashta shara faima. Mã ãa tãpimekõia, yora chaka.

Pablo mã mekai xatekĩ ato meka shara fomani

¹² Askata ã mikiki Artemas iyamakĩ Tíquico ã mia nĩchixoní. Mikiki nokokẽ, ekeki ofe, Nicópolis ano. Na oi pakeaitã ã shinã ã nono Nicópolis ano itiroki, mechakaino. ¹³ Apolos yafi Zenas kexesharafe. Nã Zenasmã noko ato yoixomiski, nõko xanĩfo. A rafe mato makinoax foaifãfe ato kexesharafe. Nãskaxõ afara fichipaiyãifãfe ato inãfe, aya fõtanõfo. ¹⁴ Askatari a Jesús Ifofaafõ ato yoife yonomisfo inõfo, yonosharakõ yononõfo, yonochakama. Askarafãferi afara yopakakĩ fitirofo, yonokaxõ. Askarafo ato yoife xanimisfoma inõfo, ato afara inãxikãki a omiskõiaífo, afaamaisfo.

¹⁵ Na ãfe ikafãferi ãto meka shara mia fomakani, Jesús Ifofaafãfe. A noko shinãifori noko ato yoixõfe. Niospa ãfe shinã shara mãto õiti mẽra nanemanõ mato noikõikĩ. Nã tii ã mia kenexõ fomai, Titopa.

Pablo

Pablo Filemón Kirika Kenexõ Fomani

Pablo Filemón yoisharani

1-2 Ëkĩa Pablo. Na karaxa mēraxõ ã mia kirika kenexõ fomai. Na nõko exto Timoteo feta nõ mia kirika kenexõ fomai. Ë Jesucristoõnoa ato yoiaito, ea nikakaspakakĩ ea achikaxõ karaxa mēra ea ikimatifo. Nāskakē ã mia yoi, Filemón, mĩfi noko keskarakĩ Niosnoa ato yoimis. Nāskakē nõ mia noikõi. Nõ mia kirika kenexõ fomai, mia yafi a mefeta Jesús Ifofaafo a mĩ pexe anoax ichanāmisfori nõ mato kirika kenexõ fomai. Akka Apia nõko poi keskara, nāskakē Arquipo yafi nõ ato kirika kenexõ fomai. Akka nã Arquipo noko keskarari nāatori ato Niospa meka yoimis. ³ Niospa mato noikĩ mato shinã mēra mato shināmashara mã fekaxtenõma. Epa Nios feta nõko Ifo Jesucristo mato askafanõ.

Filemón Jesús Ifofaxõ yorafo noipaoni

4-5 Mē mia nika mĩ nõko Ifo Jesús noikõiaito, askatari mĩ chanĩmara fakõinaito, askatari a Jesús Ifofaafori mĩ ato noisharakõia keyokõi. Mĩ askaito nikakĩ ã mia nirixõ kĩfixõfafãini iskafakĩ: “Aicho Epa Niosi, na Filemón mia Ifofasharakõia,” ixõ ã mia Epa Nios kĩfixomis. ⁶ Askatari mĩ Epa Nios Ifofasharakõianã mĩ ato afara axosharakõimis ato tãpimasharakõianã. Nāskakē ã Epa Nios mia kĩfixomis mĩ tãpisharakõinõ nã Cristo Jesús nõ Ifofaito noko inimamamis keskafakĩ. ⁷ Ë mikiki inimasharakõi mĩ ato noisharakõiaito nikai. Nāskakē ã mikiki inimai, efe yorashta, a Nios Ifofaa fetsafo mĩ ato noikĩ mĩ ato inimamasharakõiano.

Pablo Filemón iskafani: “Mĩ yonomati Onĩsimõ eõxõ sharafafe,” ixõ yoini

⁸ Cristo ea ifini ã ãfe meka yoimis inõ. Nāskakē fãsi mekainĩkafã ã mia yoifitiroxakĩ, akka ã mia askafapaima mĩmãi fetsafo ato noianã mĩ ato inimamasharakõiano. ⁹ Ë mia askafatamaroko ã mia noikõianã ã mia yoipai. Ëkĩa Pablo mē anifokõia ã Cristo meka ato yoiaito ea nikakaspakakĩ karaxa mēra ea ikimatifo. ¹⁰ Nāskakē Onĩsimõõnoa ã mia yoisharapai. Na Onĩsimõfi ãfe fake keskaraki. Nono karaxa mēraxõ ã Onĩsimõ Jesús chanĩmara famati. Nāskakē Onĩsimõ ãfe fake keskara.

¹¹ Akka taeyoi Onĩsimõ mia yonoxosharapaonima. Mã askayopaofinixakĩ, iskaratĩa mĩo noikĩ mia axosharatiro, nã ea axõai keskafakĩ. ¹² Ë mia anã Onĩsimõ nĩchixonĩ ã aõ noikõifiki. ¹³ Epa Niospa meka shara ã yoiaito ea karaxa mēra ikimanifono, o nono efe ixõ mĩ ea kexesharamis itikixõ na Onĩsimõ ea kexenõ ã fichipaikerana. ¹⁴ Akka ã mia yõkaxoma nonoxõ ea kexenõ, ã nētefapaima. Nāskakē, “Na ea Onĩsimõ anã nĩchixõfe,” ã mia faima. Nāskakē na Onĩsimõ mĩ efeta yonomapaikĩ ea kexenõ mĩ yoitiro. ¹⁵ Õitsai, Niospa anori fichipaiyaino askayameaki nāskax anã mĩ yonomati keskara ikima Nios chanĩmara faax. Mĩ yonomatifax mikiki onekeratiki afetĩama. Anã iskaratĩa mia ano kaax, chaka ikima mefe rafesharakõi kiki. Anã mikikinoax faki kanakama. ¹⁶ Anã mĩ yonomati keskarama. Iskaratĩa mã Jesús Ifofaa. Nāskax oa mefe nanea keskara mã Jesús Ifofaa. Nāskai ã aõ noiai keskafakĩ, mĩ aõ noifinakõitiro. Iskaratĩa anã oa mĩ yonomati keskarama. Mã isharakõia oa mĩ exto keskara, anã oa yora fetsa keskarama.

¹⁷ Nāskakē mī oa efe nanea keskaraxō mī efeta Jesús Ifofai, ē mikiki nokoaino mī ekeki inimayanā mī ea ifitiro keskafakī, na Onīsimōki inimayanā ifisharakōife. ¹⁸ Akka mia chakafaferatimākī, askayamākī mia nimiferatimākī ea yoife ē mia kopifanō. ¹⁹ Nānori ē mia yoi mia kirika kenexō fomayanā. A Onīsimō mia nimia ē mia kopifanō ea chanīmara fafe. Efe yorashta, mī ea nimia shināfe. Mī ea kori nīmiyamafekē ē mia Jesús meka yoyamano mī Jesús Ifofakeranama afe nīpaxakī. ²⁰ Efe yorashta, ē mia yoi nōko Ifoōxō ea Onīsimō shara faxōfe. Ēfe ōiti inimamasharakōife.

²¹ Mē tāpia a ē mia yoiai anori mī ea nikasharakōi. Askatari a ē mia kirika kenexona ōikī a finōmainīfofā mī ea axosharai. ²² Ē mia anā fetsari yoi. Mī ea Epa Nios kīfixotitaifanō. Mī askafaino ea karaxa mēranoa kāimanafono ē mikiki samama nokotiro. Nāskakē ea mī pexe kene ano mī ea itipinī faxotiro, Niospa ea kāimanano ē ano oxaxinō.

Mā Pablo mekai xatekī ato meka shara fomani

²³ Na Ipafra Cristo Jesúsnoa yoimis a yafi ea karaxa mēra ikimatifo, aatori mia yoisharai. ²⁴ A efeta Jesucristo yoimis, fetsafori Marcos ikaino, Aristaroco ikaino, Demās ikaino, Lucas ikaino, nā tiito mia yoisharakōikani mikiki inimakākī.

²⁵ Nōko Ifo Jesucristo mato noikī mato kexesharakōipainōra. Nā tii ē mato yoi.

Ēkā Pablo.

Jesúsnoa Yoikĩ Fětsa Hebreofo Kirika Kenexõ Fomani

Jesús afe Apaõxõ yoini. Nāskakē nō tāpitiro afe keskaramāki

¹ Efe yora mīstichi, ē mato kirika kenexõ fomai mā tāpinõ Jesúsnoa. Taeyoi Epa Niospa afe meka nōko xinifo israelifo yoipaoni mēxotaima. Afe ājiriõnoa ato yoipaoni. Askatari afe namapa ato yoipaoni. Askatari afe meka yoimifoxõ ato yoipaoni. ² Akka iskaratīa noko yoia afe Fakeoxõ. Nāskakē nō tāpitiro Nios afe keskaramāki. Afe Fakeoxõ keyokõi nai mēranoafoya mai anoafoyari onifani. Nāskafata afe Fake katoni nai mēranoafoya mai anoafoyari nōko xanīfo finakõia inõ. ³ Nāfi sharafinakõiaiki Apa Nios keskarakõi. Apa Nios afe keskaramāki noko õimani. Nāato keyokõi kexesharamis afe mekasharaõxõ. Askatari nokoõnoax nani nōko chaka noko soaxoxiki a keskara shara noko õi. Nāskakē nōko chaka anā shināima. Nāskata mā otoax nai mēra kani Apa fe xanīfokõi ixiki.

Niospa afe ājirifo Jesús ato finõkõia

⁴ Nāskakē nō tāpitiro Niospa Fāke ājirifo ato finõkõia. Nāskax Niospa Fake xanīfokõi Jesús. ⁵ Akka Niospakai afe ājirifo yoikĩ iskafamisma:

Māfi ēfe Fakekõifokĩ. Ē mato Epaki,

ato famisma. Akka afe Fake fisti yoikĩ iskafani:

Mĩ ēfe Fakekõi. Nāskakē mĩ fisti āto xanīfo finakõia ipanakaki,

ixõ yoini. ⁶ Nāskaxõ afe Fakekõi mai ano nĩchini. Nāskata afe ājirifo yoini iskafakĩ:

Keyokõichi ēfe Fake noikõikāfe. “Mĩ fāsi sharakõi,”

ixõ yoikāfe. ⁷ Nāskata afe ājirifoõnoa yoikĩ iskafani:

Ēfe ājirifo oa nefe koshi katiro keskara ē fai, ēfe meka yoinõfo. Nāfori oa chii xoisai keskarafõ. Nāskakē nā ē ato yoiai keskafakĩ afara arisafatirofo,

ixõ Niospa yoini. ⁸ Akka afianā afe Fakeõnoa yoikĩ iskafani:

Mĩ ea keskarari. Mĩri mĩ Nioskõi. Mĩ āto xanīfokõi ipanaka. Mĩ keyokõi ĩkikõisharapakenaka. ⁹ Mĩ afara sharafo noikõimis, nā afara chakafo noikaspayanā. Nāskakē ē mia katoni mĩ āto xanīfo inõ. Akka ājirifo ē ato inimamai. Akka ē mia inimamakõi,

ixõ yoini. ¹⁰ Askata anā yoini,

Mĩri ea keskarakõi. Mĩ āto xanīfokõi. Afaa oniyamatai mai yafi nai mĩ onifakĩ taefani. ¹¹ Nāskakē nāfo keyokõi mitokomexii. Akka mĩ fisti keyonakama. Nā rapati mā chapoax keyotiro keskai mai fe nai keyoxii.

¹² Rapati chapokē potatirofo fetsa fena shara fixikakĩ. Nāskarifiakĩ mai fe nai anā sharakēma mĩ anā mai yafi nai pāofakĩ keyotiro. Anā fenashara faxiki fenashara inõfo. Akka mĩ fetsatiroma. Mĩ fisti ipanaka,

ixõ Epa Niospa afe Fake yoini. ¹³ Niospakai afe ājirifo yoikĩ iskafamisma:

Mā efe xanīfo ikikai efe ketaxamei. Tsaokāfe,

ixokai yoimisma. Akka afe Fake fisti yoini iskafakĩ:

Mĩ efe xanīfokõi ikano nā mia noikaspaifāfe anā mia afeska fatirofoma mĩmāi keyokõi ato ĩkikē. Nā mia noikaspaifo mĩ ato ĩkĩxii, ē mia askafaino mĩ efe xanīfokõi ixii,

ixō yoini. ¹⁴ Akka Epa Niospa āfe ājirifo yoini noko kexesharanōfo. Fa-
torafāferi Jesús Ifofaafomākī afe ipaxakakī. Nāskakē Niospa āfe ājirifo yoini
a Ifofafo kexesharanōfo.

Nāskakē nō tāpia ājirifo Jesús finōkōia.

2

*Jesús nokoōnoax nanixakī noko imapakenakakī. Nāskakē kachikiri faya-
makāfe*

¹ Akka Cristo ājirifo finōkōia. Nāskakē nā meka chanīmakōi Niospa Fakeōnoa
nō nikasharakōitiro, na meka shara kachikiri fayamaxiki. ² Niospa āfe
ājirifo nīchini āfe meka yorafo yoitanōfo nōko xinifāfe nikasharanōfo. Akka
nikasharayamaifono Niospa ato omiskōimani. ³ Akka taefakī Jesús yoiyoni
nokoōnoax chipo naxiai, nōko chaka noko soaxoxiki nō afe ipaxanō. Nānori
ato yoiaito nikakaxō a afe rafemisfāfe noko yoinifo. Akka nō Jesús Ifofaino,
Niospa noko ifitiro. Akka nō nikayamaino Niospa noko ifitiro. ⁴ Askatari
Niospa afara fetsa fetsatapafo tsōa atiroma keskara ato ispapaoni aōxō
tāpinōfo āfe meka chanīmakōikē. Askatari āfe Yōshi Shara ato mēra naneni ato
katōxō nāfāfe yonokī fetsa fetsafakī yonoxonōfo. Nāskakē nō Niospa meka
chanīmara fai.

*Jesucristo nono mai anoax yorakōi ikiyoi oni, feronāfakekōi askafīax
Nioskōi*

⁵ Akka Niospa āfe ājirifo yoikī iskafanima: “Na mai fena anoax mā
xanīfo ixii,” ixō yoinima. (Nāskakē nō Jesúsnoa nō shināmakitiroma nāmāi
xanīfofinakōikē.) ⁶ Akka na kirika kenekī David yoikī iskafani Niospa
shināmanaino:

Epa Niosi, keyokōi mī onifani. Akka nōkai afama. Nāskafekē mī noko
noiyana mī noko shināmis, noko kexesharayanā. ⁷⁻⁸ Akka mī ājirifāfe noko
finōyonifo. Nāskafiano nono mai anoax mī noko xanīfo ima. Nāskakē nā mī
onifanifāfe noko nikakōitirofo mīmāi noko xanīfo imasharakē,
ixō kenenī. Akka keyokōi nā Niospa onifanifo nō āto xanīfo itiro. Tsoa
fetsakai xanīfo itiro. Askafiano keyokōichi noko nikakanima. ⁹ Akka mā
nō tāpia Niospa noko noikī nono mai ano Jesús nīchini yorakōi inō. Nāskakē
āfe ājirifāfe Jesús finōyonifo. Akka mā nokoōnoax nai omiskōixō noko chaka
soaxokē. Epa Niospa xanīfo finakōi imani, nāskaramāi Niospa fichipaikī
keyokōi noko noikī. ¹⁰ Epa Niospa keyokōi onifani aōnoax keyokōi inōfo.
Nāskakē āfe fakefo afe isharapakenakafo. Nāskaxō āfe Fake Jesús nīchini
nokoōnoax omiskōiyonō nō afe ipaxanō. Āfe Fake fisti nokoōnoax omiskōitiro
nōko chaka noko soaxoxiki. Nāato Apa Nios ika ari noko iyoano nō afe
ipaxatiro. ¹¹ Akka Jesús āfe Apa Nios nāri nōko Epa. Nāskaxō noko chaka
soaxona nō a keskara shara inō. Nāskaxō rāfikima noko yoikī iskafatiro:
“Nafō ēfe fakefo,” ixō noko yoitiro. ¹² Nā chanīmara faafoōnoa Jesús Apa Nios
yoikī iskafani:

Epa Niosi, mīōnoa efe yorafo ē yoisharaxii. Nāskakē ato fe mīōnoax ē
fanāixii,

ixō yoini. ¹³ Nāskaxō anā yoikī iskafani:

Epa Niosi, ē mia chanīmara faaki,
ixō yoini. Nāskafata anā yoikī iskafani:

Epa Niosi, nā ea chanīmara faafo mā mī ea inā ēfe fakefo inōfo,
ixō Jesús Apa Nios yoini. Nāskarakōi kenenī David.

¹⁴ Nā fakefo apa fistichi ato fake fafiano nā yora fistiyata nā imi fistiya ikafo tsoa osiama. Nāskarifiāi Jesúsri noko keskara yorakōi ipaoni. Yorakōi kāinixakī noko nāxonī Satanás yōshi chaka nōko ifo iyamanō anā noko namapakenōma. Nokoōnoax Jesús naitīa Satanás āfe kerex xateni anā noko afeska faxima. ¹⁵ Akka Jesús nokoōnoax nayoamano yorafo nō naira ikax ratekōi paonifo. Askafiano mā nokoōnoax Jesús naxō noko chaka soaxona afe ipaxanōfo. Nāskakē napai nō anā ratetiroma. ¹⁶ Akka mā nō tāpia Jesúskaī onima āfe ājirifo afara ato axoyoi. Askatamaroko Abraham āfe fenafo nā chanīmara faafo, Abraham chanīmara fapaoni keskafakī chanīmara faifono ato afara axosharayoi oni. ¹⁷ Akka Jesús noko keskara yorakōi ini. Nāskakē nā nō meemis keskarari arifi meepaoni. Yorafāfe noikaspafono meepaoni paekōi. Askatari mekafafono, askatari chakafamapaiyafono, meepaoni paekōi. Nāskakē nokoōnoa shināi. Noko potaxikima. Nāskakē Epa Nios noko kīfixomis noko imasharanō. Akka nā Jesús nokoōnoax nani nōko chaka noko soaxoxiki. Nāskakē noko Apa Nios kīfixotiro iskafakī: “Epa Niosi, ē ato nāxonikī ato chaka soaxōfe nā ea chanīmara faifo,” ixō Apa yoitiro. Nāskaxō noko Epa Nios kīfixomis xanīfokōi itiro. ¹⁸ Satanás Jesús chakafamapai. Akka Jesús omiskōifikī afaa chakafanima. Nāskakē nokori Satanás afara chakafamapaiyaito Jesús noko axosharatiro nō afaa chakafayamanō.

3

Jesús Moisés finōkōia

¹ Efe yora mīshtichi, Epa Niospa mato katoni āfe Fakekōifo mā inō, nāskaxri mā afe xanīfo inō. Niospa Jesús nīchini nokoōnoax nanō. Akka nāatori Apa Nios noko kīfixomis. Akka a ato Nios kīfixomisfo Jesús ato finōkōia. Nāskakē Jesús shināsharakōikāfe. ² Akka a Niospa Jesús yoini keskara, nāskara asharakōini. Nāskatari Niospa Moisés katoni israelifo Egipto mai anoa ato ifinō, askatari āfe meka shara ato yoinō. Nā Niospa yoini keskarari Moisés asharakōini. ³ Akka Moisésnoa yoisharafitirofono, askatamaroko Jesúsnoa yoisharakōitirofo. Nā pexe sharaōnoa yoisharatirofono, askatamaroko nā pexe famisnoa yoisharakōitirofo. Nāskarifiakī Moisésnoa yoisharafitirofono akka Jesúsnoaroko yoiķi finasharakōitirofo. ⁴ Āa pexe itiroma. Akka nā pexe famisto atiro pexesharafakī. Nāskarifiakī Epa Niospa keyokōi onifani. ⁵ Akka Moisés Epa Niospa āfe yonomati ini. Niospa yoini keskafakī, nāskarakōi ani. Āfe kaifo israelifo ato yoipaoni Niospa meka. Askatari ato kexesharapaoni. Askatari Egipto anoa ato ifixō ato iyonī. Nā Moisés apaoni keskafakī oikī keyokōichi tāpikōitirofo Epa Niospa āfe Fake nīchiai afe yorafo ichapakōi ifinō nai mēra afe ipaxanōfo. ⁶ Akka Jesúskaī Epa Niospa āfe yonomatima. Āfe Fakekōi. Nāskakē afe yorafāfe āto Ifokōi. Akka tsoamāki afe yorafo ē mato yoinō. Nō Jesús Ifofaxō a noko yoiyoni keskafakī nō manasharai nā anā oaitīa, nō kachikiri fayamax nō afe yorakōi nō iki.

Niospa fakefo aōnoax inimakōitirofo anā āto ōiti fekaxtenōma

⁷⁻⁸ Akka Niospa Yōshi Sharapa yoiķi iskafani:

Epa Niospa mato yoiāi keskafakī nikasharakāfe. Māto ōiti kerexfayamakāfe Niospa meka nikakaspakī. Māto xinifo keskara iyamakāfe. Māto xinifo ē ifini Egipto anoa. Ē ato ififinino tsōa istoma anoxō ea nikasharanifoma. Askakimaroko Jesús mato yoiāi keskara nikasharakōikāfe. ⁹ Nā tsōa istoma anoxō māto xinifāfe ea nikakaspapaonifo nā tsōa ōiyomisma

ēfe yonoshara ē ato ispafiaino. Ano afaamano a piaifo ē ato ināpaoni. Askatari ano fakamano, ē ato ināpaoni. Ē ato xinia ranā askafafiaino ea nikakaspapaonifo. ¹⁰ Nāskakē ē atoki ōitifishkini. Nāskakē ē yoini iskafakī: “Ea nikatamaroko āto ōiti mēraxō afara chaka shināmisfo. A ē ato shināmapaiyai keskarakai tsōa nikafoma.” ¹¹ Nāskakē ē atoki ōitifishkikī ē atoōnoma yoini iskafakī: “Na israelifāfe ea nikakaspakani. Nāskakē a ē ato inimamapaiyai keskafakī ē ato axopakenakama,”
ixō Epa Niospa nōko xinifoōnoa yoini.

¹² Efe yora mīstichi, ōisharakāfe. Nōko xinifo keskara iyamakāfe. Māto shinā mēraxō mā Jesús chanīmara fayamax chakakōi mā itiro. Mā askaikai nā Nios nīpanakāfe mā ipanakama. ¹³ Askatamaroko pena tii yoinōnāsharakī inimama faatanākāfe nōko Ifoxō shināsharakōixikakī. Afara chakafāfe noko pāratirofoki nō chakafanō. Akka nō nikaxō nō anā shināsharatiroma. Nōko ōiti chakakōi itiro. Nāskakē ato nikayamakāfe. ¹⁴ Akka nō taefakī Jesús chanīmara fakōini keskafakī eneyamax nō afe ipaxatiro. ¹⁵ Akka nā kirika keneano iskakī ē mato yoinō,

Epa Niospa mato yoiai keskara fisti nikasharafafāikāfe. Māto xinifāfe Epa Nios nikakaspakakī āto ōiti kerexkōi fapaonifo. Nāskakē ato keskara iyamakāfe. Māto ōiti kerex fayamakāfe. Nāskax nikayospa iyamakāfe, ixō Niospa meka yoikī kenenifo.

¹⁶ Akka, ŷtsoafo Niospa tsekanimē Egipto mai anoa āfe meka nikakaspakakī kachikiri faifono? Akka keyokōi nōko xinifo Moisés Egipto mai anoa iyonī. Nāfāfe Nios nikakaspapaonifo. ¹⁷ Akka, ŷtsoafoki Epa Nios ōitifishkinimē cuarenta xinia mā akax? Nā nikakaspayanā afara chakafai fokī ini. Nāskakē Epa Niospa tsōa istoma anoxō keyokōi ato namapakeni. ¹⁸ Akka, ŷtsoafo Niospa yoinimē iskafakī? “A ē mato inimamapaiyai keskafakī ē anā askafapanakama,” ixō yoini. Akka nā nikayospafo ato yoikī askafani. ¹⁹ Akka Epa Nioskai tsōa chanīmara fanima. Nāskakanax a Niospa ato imapaiyai ano tsoa ikinima. Nāskakē tsōa anoxō tenenima inimayanā.

4

¹ Akka Epa Niospa noko yoyoni iskafakī: “Mā ea Ifofaino ē mato anā inimamatiro. Akka mā ea Ifofayamakē ē mato inimamatiroma,” ixō noko yoiniki. Nāskakē keyokōichi nō Ifofanōkāfe. ² Epa Niospa noko yoia: “Ē mato ifipai,” noko fani. Nāskarifikī Epa Niospa nōko xinifo yoikī iskafani: “Ē mato ifipai mato inimamapaixikī anā mā fekaxtenōma,” ixō ato yoini. Ato askafafiaino tsōakai nikasharanima. Kaxpakōi Epa Niospa ato yoini. ³ Akka Niospa Moisés shināmanaino iskafakī kirikaki kenekī yoini:

Ea nikayamaifono ē atoki ōitifishkikī. Nāskakē ē ato fāsikōi yoia iskafakī: “Mā ea nikayamaino ē mato mai shara fetsa ano imapakenakama anoax mā isharanō,”

ixō ato yoini. Akka Epa Niospa keyokōi onifani. Mā keyokōi askafakī fetsaxō teneni. Nāskafakīri Niospa fichipai afe yorafo isharanōfo anā fekaxteyamanōfo. Iskaratīari afe yorafo isharamapai afe isharapakexanōfo. Akka nōa nō Nios chanīmara faino, Epa Niospa noko ifisharai nō inimapakexanōfo.

⁴ Akka kirikaki Moisés keneni pena tenetiōnoa yoikī. Iskafakī keneni:

Seis nia yonokī Epa Niospa keyokōi onifani. Nāskaxō pena fisti teneni, ixō keneni. ⁵ Askatari anā kirikaki keneni, iskafakī yoikī:

Efe isharapakenakafoma,

ixõ kirikaki kenekĩ yoini.

⁶ Askafiano ranãri afe isharapakenakafo. Akka nã Niospa meka nikakaspaifo afe ipanakafoma. ⁷ Nãskakẽ Niospa shinãmanainori chipo David kirika kenekĩ yoini iskafakĩ:

Iskaratĩa Niospa meka nikakĩ mãto shinãmã shinãsharakãfe. Anorima shinãkakima, ixõ David yoini.

⁸ Mã Moisés naano, Josué israelifo iyoni Canaán mai ano isharanõfo. Nãskaifono Niospa iskafakĩ yoini: “Nã ea Ifofaafõ efe nai mẽra isharapakenakafo,” ixõ yoini. ⁹ Nãskakẽ mã nõ tãpia nõ Ifofaax, nõ afe isharapakenaka. Epa Niospa afe yorafo inimamasharapai isharapakexanõfo. ¹⁰ Epa Niospa keyokõ onifaxõ inimayanã teneni. Nãskarifiã nõ Epa Nios ano kaax a nõ iyopaoni keskara nõ anã itiro, Niospa noko inimamasharakõiaino. ¹¹ Akka fekaxfiano nõ Nios Ifofakõitiro afe isharapakexakĩ. Akka nõko xinifãfe nikayamaito Epa Niospa ato mai shara inãpaifikĩ ato inãnima. Nãskakẽ nõri ato keskara ipaĩma.

¹² Epa Nios nipanaka. Nãskarifiã ãfe meka keyonakama, mitsisipakõi. Akka keno ikikõichi nami potexõ ãfe xaki mẽra nõ õitiro. Nãskarifiã Epa Niospa meka fãsi finakõia. ãfe meka shara nõ mẽra ikano aõxõ nõ tãpitiro nõ shara ikamãki askayamai nõ chakamãki. ¹³ Epa Niospa keyokõ tãpia nõ õtatiroma. A nõ afara shinãxõ nõ amis keskara keyokõ tãpikõia. Akka nõri tãpia a nõ amis keskara. Nãskakẽ nõ Nios pãratiroma.

A Nios ato kĩfixomisfo Jesús ato finõkõia

¹⁴ Akka Jesúsfi Niospa Fakekĩ. Askatari noko Nios kĩfixomis. Nãatofi a Nios ato kĩfixomisfo finõkõiaiki. Nãskax nai mẽra Nios ano kani. Nãskakẽ nõ kachikiri fatiroma nikakõisharayanã. ¹⁵ Nãatori meemis a Satanás noko afara chakafamapaiyã keskara. Nãskakẽ nãato tãpia a nõ meemis keskara fekaxkõi. Akka Satanás Jesúsri afara chakafamapaini. Nãskafekẽ Jesús nikanima. Nãskakẽ nokori axotiro. ¹⁶ Nãskakẽ nõ Nioski ranokima nã nõ yoĩpaiyã keskara nõ yoitiro. Nõ yoiaito Niospa noko noikĩ noko afara axosharatiro.

5

¹ Ë mato yoinõ afeskax ato Nios kĩfixomis xanĩfo itirofomãki. Nã Niospa ato katoato nãato noko kĩfixonõ. Nã Niospa katoa noko keskara yorari itiro. Nãfi Nios noko kĩfixomis xanĩfo itiro. Nãskakẽ yorafãfe Epa Nios aicho fakakĩ a Nios ato kĩfixomisto ãfe xanĩfo afara inãmis atori Nios inãnõ. Askatari yorafãfe ãto chaka soapaikakĩ nã yoinã ina fexomisfo retexõ ato koofaxonõ Epa Niospa ãto chaka ato soaxonõ. ² Akka nãri noko keskarari nãatori afara chakafatiro. Nãskakẽ tsõa tãpisharaxamakĩ, shinãsharakima afara chakafaino, nã xanifãfe tanaima isharaxõ ato axosharatiro. ³ Nãskaxõ yorafãfe nã yoinã inafõ inãno nãato retexõ koofakĩ Epa Nios ato kĩfixomis Epa Niospa ãto chaka ato soaxonõ. Nãskatari ãri ãfe yoinã ina retexõ koofamis ari Epa Niospa chaka soaxonõ, a noko axomis keskafakĩ. ⁴ Akka ãkai tsoa katometiroma Nios ato kĩfixomis xanĩfo ixii. Nios fistichi ato katotiro Aarón ani keskafakĩ. ⁵ Nãskarifiã Cristo aari katomenima Nios ato kĩfixomis xanĩfokõi ixiki. Akka Apa Nios fistichi yoini iskafakĩ:

Mĩ efe Fakekõi. Nãskakẽ mã fisti ãto xanĩfo finakõia ipanakaki, ixõ yoini. ⁶ Askatari anã iskafakĩ yoini:

Mifi ato Nios kifixomis xanifo ipanakaki, nã xanifo Melquisedec ipaoni keskara, ixõ Apa yoini.

⁷ Jesús nono mai ano ikax, mã chaima naxiki omiskõikõini. Nãskaxõ fãsikõi mekayanã oiayanã Apa kifini iskafakĩ: “Epa, mĩ keyokõi tãpia. Ea mã ifipaikĩ ea mã ifitiro ã nanõma,” ixõ yoini. Mëxotaima nã Āpa amapaiyai keskara fisti shinãkĩ Jesús ãfe Apa nikakõini. Nãskakẽ ãfe Āpa tenemakõini axosharakõiyã omiskõiaino. ⁸ Akka Jesús Niospa Fakekõifixax omiskõini. Omiskõifikĩ Apa nikakõini. ⁹ Nokoõnoax omiskõifikĩ Apa Niospa yoiai keskara nikakõini. Nãskaxõ a nikaifo ato ifipakexakĩ. Nãskax noko ifimis sharakõi imis. ¹⁰ Epa Niospa ãfe Fake Jesús katoxõ yoikĩ iskafani: “Mifi nã Melquisedec keskara ikikai. Nãskakẽ a ea ato kifixomisfãfe ãto xanifokõi mĩ ipanakaki ato ikipakexakĩ. Nãskaxõ a eõnoa ato kifixomisfo xanifofori mĩ ato finõkõinifofãnakĩ,” ixõ Āpa yoini.

Õisharakõikãfe. Mã Jesús kachikiri faa fãsi mesekõi itiroki

¹¹ Ē mato yoia Epa Niospa Jesús katoa a noko Nios kifixomis afe xanifo finakõia ixii. Akka nãõnoa ě mato fetsa yoisharapai. Nãskakẽ ě mato anã yoisharatiroma mãmã fenãmãshta tãpiaino. ¹²⁻¹³ Akka mã Niospa meka nikakĩ mã mã xinia ranã aka. Nãskakẽ tãpikõixõ mã ato yoikerãna. Akka mãkai tãpisharama. Akka a mã taefakĩ Niosnoa mã ato yoiyoni mã mã shinãmakia. Nãskakẽ mato anã tãpimanõfo mã ato fenai. Nã fake yome chocho afiai yosiaima keskarakõifo, mã. Akka fake yomẽkai afaa piyotiroma. Nãskarifiakĩ mãri Niospa meka tãpisharaima. Nãskakẽ mã tãpiama fato sharamãki fatofori chakamãki. ¹⁴ Akka nõ pena tii Niospa meka õifafãikĩ nõ tãpikõiax isharakõitiro mãmãi nõ tãpiax fato sharamãki, fatofori chakamãki.

6

¹ Akka nõkai fakefo keskarama. Fakefãfekai afaa tãpisharafoma. Akka nõroko tãpisharakõia. Akka fetsa ě mato yoipai a ě mato yoiyomis keskara anã ě mato yoima. Mã nõ tãpia a nõ afara chakafamis. Nãskakẽ nõ rãfikõiyãnã nõko chaka shinãmakitiro. Nãskaxõ nõ Nios Ifofaino noko chaka soaxotiro nõ afe ipaxanõ. ² Mã nõ tãpia noko fetsa maotisafaino keyokõi tãpitirofo mã nõmãi Nios Ifofaino. Askatari nõ tãpia noko Nios kifixoyãnã ãto mifi noko mãmãtirofo Niospa Yõshi Sharapa noko imasharanõ. Nãskatari mã nõ tãpia nõ Jesús Ifofaax nõ naax nõ anã otoxiai. Akka a Jesús nikakaspamisfo Niospa a omiskõipakenakafo mẽra ato potaxii. Nãskakẽ nãfo mã nõ tãpikõia. ³ Nãskakẽ a Niospa fìchipaiyaino afara fetsafori nõ tãpitiro.

⁴ Nãskakẽ nõ Jesucristoõnoa meka shara nikaxõ chanĩmara faax mã naax Nios fe nõ ipaxatiro. Nãskatari Niospa Yõshi Shara noko fe iki. ⁵ Nãskakẽ nõ Niospa meka tãpisharakõiaino a Niospa afara shara noko yoiai nõ atiro. Askatari Niospa afara sharafo noko famapai afara sharafo nõ atiro, ãfe Yõshi Sharaõxõ. ⁶ Nãskakẽ keyokõi nõ afo tãpifixõ nõ Niospa Fake kachikiri faxõ chakafakĩ mekafaxõ, nõ anã Ifofatiroma mã nõmãi chakafaxõ a noko Ifimis. Anã tsõa noko ifitiro. ⁷ Akka ě mato yoinõ nikakapo. Oi ikaino mai mechanatiro. Nãskakẽ tare anoax fanafõ foaisharatiro. Nãskakẽ a tare yonomisfe inimatirofo fanafõ foaisharaino Niospamãi imasharaino. ⁸ Akka nõ tare fetsa chaka anori oi ikaino, fanasharafo foaitiro. Moxa chakafo fisti foaitiro. Nãskakẽ koofatirofo nã fanachakafo kooi mitokomẽnõ. Nãskarifiakĩ fetsa Niospa meka shara nikafafãifikĩ Nios chakafakĩ mekafaito

nā keskarrafo Niospa nā omiskōipakenakafo mēra potaxii. Nō tare shara keskarakē Epa Nios nokoki inimatiro. Akka nō tare chaka keskarakē Epa Nios nokoki inimatiro. Nāskakē noko omiskōimaxii.

Akka mā nō tāpia nō Jesús chanīmara faax nō isharakōitiro

⁹ Efe yora mīstichi, mē matoōnoa tāpisharakōia. Mākai ato keskarama. Akka Jesús Ifofaax oa mā fāi kai keskara mā Nios ari kai. ¹⁰ Akka Epa Nios sharakōi. Afaa chaka shināmisma. A mā sharafamis Epa Niospa tāpia, shināmakima. Askatari mā Nios noikī a chanīmara famisfo mā ato axosharamis. Nāskakē Epa Nios shināmakima. ¹¹ Akka Epa Nios kachikiri faxoma a mā akai keskararifakī, ato sharafakī mēxotaima Ifofasharakōikāfe, “Nioski nokoaitīa nō afe isharapakexakī,” shinākōikī. ¹² Akka Epa Niospa meka shināmakiyamakāfe. Epa Niospa fetsafo yoini iskafakī: “Mā ea Ifofakī mā ea manasharaitō ē mato afara shara ināxii,” ixō ato yoini. Nāskarifiakī māri manasharakāfe, Jesús kachikiri faxoma. Māri afara shara fixikakī.

¹³⁻¹⁴ Niospa nōko xini Abraham yoyoni iskafaki: “Ēkīa mī Nios. Ea tsōa finōtiroma. Ramashara ē chanīmisma. Ē mia yoinō mī tāpisharakōinō. Ē mia axosharakōikai mī fenafo ichapakōi inōfo. Akka mīkai ato tanātiroma mī fenafomāi ichapakōikē,” ixō Niospa Abraham yoyoni. ¹⁵ Nāskakē Abraham fena fenakima manakōipaoni. Nā Niospa yoyoni keskarakōi fakī Abraham āfinī fake fini. Āfe fake Isaaca. ¹⁶ Akka fētsa noko yoikī iskafatiro: “Ē mia pāraima ēfe xanīfāfe mā ea ōi. Nāskakē nā ē mia yoiyai keskara ē mia axoxii,” ixō noko yoitiro. Nāskakē nō tāpitiro nokokairoko pāraito. ¹⁷ Nāskarifiakī Niospa noko tāpimapai āfe meka chanīmakōi. A noko yoyoni keskara afesxaxō anā fetsafatiroma. Nāskaxō ato yoini iskafakī: “Ē Nioskōi. Tsōakai ea finōtiroma. Nāskakē nā ē mato yoiyai keskafakī mā ea chanīmara fatiro,” ixō ato yoini chanīmara fanōfo. ¹⁸ Chanīma Niospa a noko yoyoni keskara mā noko ōimasharakōia mā nō tāpia. Nāskakē noko pāratiro. Noko yoini iskafakī: “Ēfe Fake ē matoki nīchixii mātō chaka mato soaxonō mā efe ipaxanō,” ixō noko yoini. Nāskakē nō chanīmara fai nā noko yoyoni keskara āfe Fakeōnoax Epa Nios ano nō afe ipaxatiro. ¹⁹ Nāskaxō anā afaa fetsa nō shinātiroma. Nios makinoakai tsōa noko potatiroma. Nāskakē Epa Nios fe nō ipanaka. ²⁰ Jesús nai mēra kani nō aōnoax chipo kanō. Nārixō xanīfokōixō noko Apa Nios kīfixōfafāini Melquisedec ipaoni keskaraxō.

7

Nā Melquisedec yorafo Nios kīfixomis ipaoni

¹ Akka Melquisedecnoa ē mato yoinō afe keskara ipaonimāki. Melquisedec xanīfo ipaoni pexe rasi āfe ane Salem anoax. Askatari ato Nios kīfixomis ipaoni. Nā cuatro xanīfofo yometso chakafo ato iħoxō Abraham āfe pia ifitani, afama mīstifoya oaino, nā Melquisedec Abrahamki nokoni. Nāskata Melquisedec Abraham Nios kīfixoni axosharanō. ² Askafaito ōikī Abraham Melquisedec nā afama mīshti fitanai ranāri ināni. Nā Melquisedec āfe ane “Asharakōimis,” famisfo. Nā Salem pexe rasi anoax xanīfo ipaoni. Nā Salem āfe ane “Isharakōi,” fapaonifo. ³ Nā Melquisedec āfe epa yafi āfe efa nō tāpiana. Āfe xiniforikai nō tāpiana. Askatari nō tāpiana a fake kāinitīa. A nanitīari nō tāpiana. Nāskakē nō Melquisedec shinākī Niospa Fakeri nō shinātiro. Nāato noko Niosnoa kīfixomis xanīfo ipanaka.

⁴ Efe yora mīstichi, shinākapo. Melquisedec xanīfokōi ipaoni tsoa keskarama. Akka Abraham israelifāfe taefenai āto xini iyopaoni. Abraham

sharakōi ipaoni. Askafixō Abraham Melquisedec afama mīshti ināni āfe afaayamafekē. Akka Melquisedec xanīfo finakōia ini Abraham sharafiano. ⁵ Israeli xoko fetsafo Levī āfe fenafo Epa Niospa katonī. Nāfāfe āto kaifo Epa Nios kīfixopaonifo. Nāskakē Moisés yoini keskakafāī nā ato Nios kīfixomisfo kori fisti rasi ato ināpaonifo. Askatari āto afama mīshtifori ato inānifo āto kaifāfe. ⁶ Akka Melquisedec Levī āfe fenayamafiano Abraham āfe afama mīshtifo fetsa fetsatapafo ināni. Nāskakē Melquisedec Abraham yoini iskakafāī: “Abraham, mia Niospa axosharai,” ixō yoini. ⁷ Chanīma, keyokōi nō tāpikōia fētsa ato finōkōixō āfe mekapa ato shara fatiro. Nāskakē nō tāpia Melquisedec Abraham finōkōia. ⁸ Nāskakē nā israeli xoko fetsafāfe nā Levī fenafo afama mīshti ato ināfinifono nāfo mā nai keyonifo. Akka Melquisedec Abrahamnā afama mīshti fini. Akka Niospa meka yoikī kenenifo Melquisedec iskaratīa nia keskara. ⁹⁻¹⁰ Levī fenafāfe āto xini Abraham ipaoni. Nāskaxō Abraham Melquisedec afarafo ināino Levīfāfe akairi ināi keskakafanifo. Nō tāpiama afetiāra nani. Nāskakē nia keskara nō famis. Nā Abraham Melquisedec afarafo ināitīa Abraham āfe fena Levī anokai fakeama ini. Chipō Levī fakeni. Nāskakē nō tāpitiro Melquisedec fistichi āto xini Abraham yafi ato finōkōia.

¹¹ Efe yora mīshtichi, shinākapo. Epa Niosxō Moisés noko yoini keskakafāī Levī fenafāfe noko Nios kīfixomisfāfe noko ifitirofono Niospa āfe Fake nīchikeranima Apa Nios noko kīfixomis inō. Cristokai Levī āfe fena Aarón keskarama. Nā Cristo Melquisedec keskarakōi. ¹²⁻¹⁴ Akka tae fenaī Levī āfe fena Aarón ini. Nā Aarón yorafo ato Nios kīfixomis ini fetsafāfe āto xanīfo. Akka nōko Ifo Jesúskai Levī āfe fenama, xoko fetsa ini. Nāskax Aarón keskarama. Akka nōko Ifo Jesús Judapa fena. Nā Levīpa chipoko Judá. Akka, “Judapa yorafāfe yorafo ato Nios kīfixomisfo itirofora,” ixō Moisés yoinima. Askafiano Niospa āfe Fake Jesús nīchini yorafo ato Nios kīfixomis inō. Nāskatari a Moisés yoini keskara Epa Niospa fetsafani.

¹⁵ Nāskakē anā ē mato mēstekōi yoisharapai. Iskaratīa xafakiakōi nō tāpishara Nios afara fetsa yoini keskara noko Nios kīfixomis āfe fena Jesús, Melquisedec keskara nokoki nokoni. ¹⁶ Akka Moisés yoini keskarakōi Levī āfe fenafo fisti ato Nios kīfixomisfo itirofoki. Jesúskai Levī fenaxoma a Moisés yoini keskaraōnoax noko Nios kīfixomis itiroma. Askatamaroko Niospa Jesús katonī noko kīfixomis inō. Āfe sharaōxō Epa Niospa Jesús otofani. Anā nanakama. Nāskax noko Nios kīfixomis ipanaka Niospa sharaōxō. ¹⁷ Nānori Niospa yoiyoni David Jesucristoōnoa kenekī iskakani:

Mī Melquisedec keskara. Nāskaxō mī yorafo Nios kīfixomis ipanaka, ixō keneni. ¹⁸⁻¹⁹ Nāskakē a Moisés yoini keskarakai nō anā ifofaima. Nokokai imasharatiroma. Askatari nōko chaka noko soaxomisma nō Nios fe ipaxanō. Akka Jesús āfe meka askarama. Āfe meka sharafinakōia. Epa Niospa Fake nokoki nīchini aōnoax nō afe ipanaka.

²⁰⁻²¹ Akka Epa Niospa āfe Fake yoini keskakafāīkai Levī āfe fenafo anori yoinima. Niospa yora shināmanaino iskara kenenī, Niospa āfe Fake Jesús yoikī iskakani:

Nā meka ē mia yoiāi chanīmakōi. Nāskakē ē anā fetsapakenakama. Ē yorafāfe āto Ifokōi. Nāskakē a ē mia yoiāi keskakafāī yorafo mī ato ea kīfixomis ipanaka, ixō Epa Niospa āfe Fake yoini. ²² Akka Apa Niospa nānori yoinikē nō tāpitiro Jesúsoax Nios fe nō ipaxatiro. Akka Moisés meka askarama. Aōnoax Niospa

yorafo nõ itiroma. Akka Epa Niospa Moisésxõ Leví âfe fenafo yoini keskara sharafiano akka âfe Fake Jesús yoini keskara sharafinakõia.

²³ Akka a âto kaifo ato Nios kîfixomisfo ichapafoflax afo natirofo. Tsoa nîpaxatirofoma. Mâ fetsa nano fetsari katotirofo atori âfe yorafo Epa Nios kîfixomis inõ. ²⁴ Akka Jesúskaí ato keskarama. Nâfi nîpanakakî nâato noko Epa Nios mēxotaima kîfixomis ípanaka. ²⁵ Nâskakē Apa Niosxõ noko íftiro nõ afe ípaiyaito nokoõxõ Apa Nios yoifafâini iskafakî: “Epa Niosi, ê ato nâxoniki, ato chaka soaxõfe. Nâskaxõ a mî ika ano ato imafe,” ixõ nokoõxõ Apa yoimis. Nâskakē a nokoõnoa Apa yoia keskafakî noko nâskakõí faxoxii nõ afe ípaxanõ. Nâskaxkai nõ fenopakenakama.

²⁶ Akka nâ Jesúsfi noko Nios kîfixomis xanîfokõikî. Apa Nios keskara sharafinakõia. Fetsafo finõkõia. Tsõakai aõnoa afaa chaka yoitiroma. Aatokai afaa chaka shinâmissa yora chakafo keskarama. Nâskaxõ Apa Nios ika anoafori ato finõkõia. Nâskaxõ a nõ yopaifo noko axosharatiro. ²⁷ Akka a ato Nios kîfixomis xanîfo fetsafo keskarafoma. Taefakî afâfe pena tii yoinâ ina retepaonifo Epa Nios inâkakî ato chaka soaxonõ. Nâskakē Niospa mâ ato chaka soaxonano yora fetsafâferi ato yoinâ inafõ inânifo, atori Epa Niospa chaka soaxonõ. Akka Jesúskaí ato keskarama. Jesús ato finõkõia. Nâskakē Jesús nai fistini noko chaka soaxonano Epa Nios fe nõ ípaxatiro. ²⁸ Akka Epa Niosxõ Moisés yoini keskafakî yorafoõnoa Epa Nios ato kîfixomisfo inõfo âto xanîfofo katonifo. Akka nâfofi noko keskarafori nâfâferi afara chakafamisfo. Nâskakē Niospa yoiyoni keskafakî âfe Fake Jesús chipo katoní nokoõxõ Nios kîfixomis ípaxanõ. Aatokai afaa chakafamisma. Isharakõimis.

8

Epa Niospa meka fenasharakõí yoini Jesús noko nâxonõ nõko chaka noko soaxoxii

¹⁻² Akka nâ sharafinakõia nõ yoiai nâfi Apa Nios xanîfokõí ika ari afe ikaki. Nâskakē nõ afara yoipaiyaito nokoõxõ Apa yoipakenaka. Nâatofi noko Apa Nios kîfixomis xanîfokõikî. Nâskakē a ika arikai tsõa afaa fetsa onifanima. Akka Nios fistichi onifani. Nâskakē ariax Apa fe nokoõnoax mekakakâini. Nâ ika ari nai mēra anoa a anoxõ Nios kîfiti pexefâ keskarakõífiar finakõia. Nâskakē nâ ê mato kenexona keskara xafakîakõí mâ tâpitiro.

³ Nâ ato Nios kîfixomis xanîfokõí inõfo Niospa ato katoní afarafo yorafâfe Nios inâkata finõfo. Askatari yoinâ inafõ fixõ retexaxõ koofaxõ ato kîfixonõfo âto chaka ato soaxonõ Niospa ato katoní. Nâskakē nâ Jesús, noko Nios kîfixomisto, nâatorí Nios inâni. Yoinâ ina inânima. Askatamaroko âa noko nâxoní nõko chaka noko soaxoxiki. Âfe Âpa amapaiyai keskara ani. ⁴ Moisés yoini keskafakî Leví âfe fenafo israelifâfe ato Nios kîfixomis itirofo yoinâ retexaxõ ato Nios inâxoxikakî Niospa ato chaka soaxonõ. Akka Jesúskaí Leví âfe fenama. Nâskakē Jesús nono mai ano ixõ nokoõxõ Apa Nios kîfimis ikeranama. Akka nai mēra ixõ noko kîfixomis, Niospa ato katoano. ⁵ Akka nono mai anoxõ nâ Leví fenafâfe a anoxõ Nios kîfiti karapa pexe mēraxõ yonopaonifo. Nânoxõ âto kaifo israelifo tâpimapaikakî Nios ika ari afe keskaramâkî tâpinõfo. Askafixõ askarakõí tsõa tâpiyonima. Nâskakē Epa Niospa Moisés yoini iskafakî karapa pexe fayoamano: “Ê mia yoiai keskafakî a anoxõ ea kîfiti karapa pexe fafe. ¿Mâ mî shinâimê ê mia machi anoxõ tâpimana keskara nâskakõí fafe karapa pexe fakî? Nâskakē a yonomisfo tâpimafe nâ ê mia yoiai keskarakõí fanõfo,” ixõ Epa Niospa Moisés

yoini. ⁶ Akka Niospa äfe Fake Jesús yoini keskarato a Moisés yoini keskara finökōia. Nāskakē Jesús Apa ika arixō nokoōxō Apa Nios kīfifafāini. Akka Levī fenafāfekai askafapaonifoma. Epa Niospa äfe Fake Jesús yoiyoni keskarakōi ato yويمisma. Akka nā ato yoiyoni keskara sharafiano nā äfe Fake Jesús yoini keskararoko sharafinakōia.

⁷ Niospa Moisés yoini keskara nō nikasharakōixō nō afara chaka nō fakeranama. Akka nō nikasharakōima. Nāskakē Epa Niospa aōxō noko ifitiroma. Nāskakē noko fetsa yoini iskafakī: “Ēfe Fake ē nīchixii mato nāxonō mato chaka soaxonō. Mā Jesús Ifofaino ē mato ifixii,” ixō Epa Niospa yoini. ⁸ Akka Epa Niospa Moisésxō yoini keskarakai tsōa askara nikasharakanamax nōko xinifo nikayospakōi inifo. Nāskakē nōko Ifo Niospa yoini iskafakī:

Ē chipo na efe yorafo israelifo yafi Judapa äfe fenafo meka fena shara ē ato yoixii. Nā ē ato sharakōi axōai keskara ē ato ōimaxii. ⁹ Ē āto xinifo Egipto anoa iyoni. Nāskaxō ē ato yoisharani ēfe meka nikasharaifāfe ato kexesharafafāixikī. Ē ato yoisharafiaino ēfe meka kachikiri fanifo. Nāskakē ē ato potani. Akka a āto xinifo ē ato yoini keskarakai ē āto fenafo askara ē yoixiima. Askatamaroko ēfe meka fena shara ē ato yoixii ea nikasharanōfo. ¹⁰ A ē israelifo yoixiai kene fistiōxō ē ato tāpimaxima. Askatamaroko āto shinā mēra ēfe meka shara ē nanexii āto ōiti mēraxō a kirika kenea keskara sharaōxō shināsharanōfo. Nā ē ato yoiai keskakōixii shināsharaxikani. Nāskakē ē āto Epa Nioskōi ixii. Akka afo efe yorafo ixikani. ¹¹ Akka anā fisti rasichi ato tāpimaxikanima. Keyokōichi ea tāpixikani. Yorafo afamafāferi ea tāpiaifono, xanīfofofāferi ea tāpikōixikani. Nāskakē anā eōnoa tsōa ato tāpimaxima akōi keyokōichi mā ea tāpikōiafono. ¹² Ē ato chaka soaxoxii afara chakafafiaifāfe. Nāskaxō a afara chakafamisfo ē anā shināpakenakama,

ixō Niospa yoini. ¹³ Nāskakē Niospa anā ato yoini iskafakī: “Meka fena shara ē mato yoinō,” ixō ato yoini. Akka a Moisés ato yoini keskarakai anā tsōa shinātiriroma. Nā Moisés ato yoini keskara meka xinikōi. A mekakai anā tsōa shināpakenakama. Nāskakē nā meka shināmakipakenakafo.

9

Karapa pexe kene fetsa mēraxō Epa Nios ato kīfixopaonifo. Akka iskaratīa Jesús noko kīfixomis Apa Nios ika arixō

¹ Ē mato yoinō afe keskara yorafo ipaonifomakī. Akka Epa Niospa Moisés yoini afesaxō nono mai anoxō afe yorafo ato Nios kīfixotirofomākī Niospa ato chaka soaxonō. Akka karapa pexe fanifo a mēraxō Nios kīfinōfo. ² Akka a karapa pexe fanifo mēra kene rafe ini. Nā kene rekētana mēra siete rāpari oro ōtatia metax keskara ini. Askatari mīsari a mēra ini. Nā mīsa kamaki mēxotaima doce pāa fapaonifo. Nā kene rekētana anenifo iskafakakī: “Nios chaimashta ika,” ixō anenifo. ³ Akka karapa pexe fanifo mēra sama namikōi nakirafekōi potexō xītia ini. Nā kene chikaya anenifo iskafakakī: “Nono Nios ikōina,” ixō anenifo. ⁴ Nā kene rekētana ketaxamei mīsa kafāshara oroya taxta fanifo ini. A kamakixō nakas potoshara kooati ipaoni. Nāskatari kene chikaya fetsa mērari kafo oroya taxtafanifo ini. Nā kafo mēra pāa keskara äfe ane mánā kecho oro mēra nanea ini. Akka Aarón äfe chatiri nā kafo mēra naneyoamano Niospa nā Aarón äfe chati charofo onifayoni. Nāskata Aarón äfe chati chipo kafo mēra naneni. Nāskatari Niospa Moisés äfe meka makexki kenexō ināni nikanōfo. Nā makex para Niospa mekaya nā kafo mēra nanea

ini. ⁵ Nāskakē nā kafo māmākīa Niospa āfe ājiri keskara raferi nia ini. Āto peta rafeta kafo fepoafu keskara ini. Nāskakē nā Niospa āfe ājiri keskara rafeoxō nō tāpitiro Nios fāsi sharakōikē nōko chaka noko soaxomis. Askafiano akka nafaōnoakai ē mato iskaratīa yoitiro.

⁶ Nāskakē nā Nios kīfīti karapa peXe kene rekētana mēra a ato Nios kīfixomisfo mēxotaima ikipaonifo anoxō nakas potoshara koofaino ato Nios kīfixoxikakī. ⁷ Akka a kene fetsa mērari tsoa ikitiroma ipaoni. Nā ato Nios kīfixomis xanīfo finakōia fīsti ikīpaoni. Xīnia fīsti ata ikīpaoni. Nāskatari imimais ikīpaonima. Yoinā imiYa ikīpaoni nā imi Epa Nios ināxikī āfe chaka soaxonō, askatari afe yoraforti ato chaka soaxonō. ⁸ Nāskakē Niospa Yōshi Sharapa xafakīa noko tāpimani. Akka nā karapa peXe iyoano āfe kene fetsa mēra tsoa ikīpaonima. Nā ato Nios kīfixomis xanīfokōi fīsti ikīpaoni Nios fe mekaxikī. Yorafu Epa Nios fe mekayoxoma, Nios ato kīfixomis xanīfo fīsti yoīyopaonifo. ⁹ Nāskakē nā ipaonifoōnoa iskaratīa noko shināmatio Moisés ato yoini keskafakī. Karapa peXe ano yoinā ina retexō ināpaonifo Niospa āto chaka ato soaxonō. Askafikanax isharapaonifoma afara chakafakaxō shinātaifapaonifo. ¹⁰ Akka Moisés ato yoini keskafakī a ato Nios kīfixomisfāfe nāskakōi fanifo. Nāskaxō afara shara fetsaforti ato tāpimani Moisés meka. Afara pita, afara ayata mā fatiro ato fani. Askatari afaari mā pitiroma, afaari mā ayatiroma ato fani. Askatari ato tāpimani afesax mechokometirofomākī Epa Niospa ato nikakōinō. Akka askafiaifono afāfekai ato chaka soaxokōitirofoma. Cristo oyoamano nānori Niospa ato yoīyoni. Nā Cristo naitīa aōxō keyokōi Niospa fetsafani. Nāskakē nō Jesūs Ifofaino, Niospa nōko chaka noko soaxotiro. Nāskakē a Moisés yoini keskara anā tsōa ifofasharatiroma āfe chaka soapaikī.

¹¹ Akka Cristo mā anā nai mēra kaax, noko Nios kīfixomis xanīfokōi ini. A Niospa noko yoīyoni keskara noko ināmis. A karapa peXe anoxō a ato Nios kīfixomisfāfe ato Nios kīfixopaonifo yorafāfe anifo. Akka Jesūs noko kīfixomis ano sharafinakōia Nios fistichimāi nai fanino. ¹² Akka Cristokai karnīro imi fota fakka fakeshtari fonima. Askatamaroko nokoōnoax nakī āfe imi foax ikisi Apa Nios ari kani. Nāskakai anā Jesūs nanakama. Nāskaxō nōko chaka noko soaxonano āfe Apa Nios ari nō katiro. ¹³ Akka chanīma, karnīro yafi fakka retexaxō āfe imi fīkaxō nā karnīro koofakaxō āfe chii mapoya nā imi osikaxō saa saa anifo Epa Niospa ato chaka soaxonō anā choshta keskara iyamanōfo. ¹⁴ Akka Cristokai afaa chakafamisma. Nāfi sharafinakōia. Niospa Yōshi Shara a nīpanakato Jesūs shināmāni. Nāskakē Apa yoini iskafakī: “Epa, ē atoōnoax naikai. Nāskakē ēfe imi foano eōxō mī āto chaka soaxotiro mefe yorafu inōfo.” iXō Apa yoini. Akka a nō Nios inimamapaikī nō shināpaoni keskara nō anā shināima. Akka iskaratīa nō Nios inimamapaikī nō nikasharakōitiro. Nā Nios nīpanaka sharafinakōia.

¹⁵ Akka a Moisés ato yoini keskara sharafiano tsōa nikapaonima. Afara chakafapaonifo. Nāskakē nā afara chakafapaonifo keskara Cristo fistichi ato chaka soaxotiro. Akka a Moisés yoīpaoni keskara anā ato yoitiro. Nāskakē Cristo oni nokoōnoax naiyoi nōko chaka noko soaxoxikī nō Nios fe ipaxanō. Nāskakē Niospa noko yoini iskafakī: “Ekeki fekāfe ēfe Fakeōnoax efe yorafu ixikakī,” iXō noko yoini. Nāskaxō a noko yoīyoni keskara noko ināxii. ¹⁶⁻¹⁷ Iskaratīa afara fetsa ē mato yoinō mā tāpinō. Nō nayoxoma nō yoitiro iskafakī ato yoikī: “Ē naano tsōa ēfe afarafo fīmākai ikisi ē mato tāpimayonō,” iXō nō yoitiro. Nāskakē nā nō yoīyomis keskafakī nō nayoxoma nōko afarafo

fetsafo ināpaikī nō yoitiro. Akka nō nayoamano nōko afarafo tsōa fena fitiroma. ¹⁸Nāskakē Niosxō Moisés afe yorafo yoini āto yoinā inafoneteaifono imi fonō. Akka a yoinā inafāfe imi foyamaino a ato yoiyoni keskafakī Niospa ato chaka soaxotiro. ¹⁹⁻²⁰Taefakī Epa Niospa shināmanaino Moisés israelifo keyokōi ato yoini nikanōfo. Mā ato yoiikī mitoxō, nā ifi hisopo āfe pōya pishta fini. Mā fixō fakka fake imi yafi oveja imi fakkaya osini. Nāskaxō ifi hisopo pōya pishta fixō oveja raniya texkeani. Nāskata nā ifi hisopo pōya pishta texkeata fakka fake imiki momo momo axō nā Niospa meka kirikaki kenea a Niospa yoiyoni keskafakī fakka imi saa saa ani. Askatari yorafokiri fakka imi saani. Ato yoiikī iskafayanā: “Na imioxō mā tāpitiro Epa Niospa noko yoiyoni keskara axii. Nāskax nō afe yorafo itiro,” ixō Moisés āfe kaifo yoini. ²¹Nāskatari nā karapa pexe a mēraxō Nios kīfiti Moisés imī saa saa ani, askatari a mēranoafori keyokōi imī saa saa ani. ²²Chanīma, nā Epa Niospa Moisés yoini keskafakī Moisés imi saakano karapa pexe anofo keyokōi ato chaka soaxona. Akka imi foyamaino noko chaka soaxotiro. Anā ano fato fetsama nōko chaka noko soaxotiro.

Cristo nōkoōnoax nani noko chaka soaxoxiki

²³Nā anoxō Nios kīfiti karapa pexe mēranoa keskarakōifo Nios ika ari. Nāfoki ato Nios kīfixomisfāfe yoinā imi saanifo Niospa afo ōisharanō. Akka a karapa pexe mēranoa imifo sharafiano afāfe nōko chaka noko soaxotiro. Askatamaroko nā Cristo nokoōnoax nai fistini nōko chaka noko soaxoxiki. Noko chaka soaxonano Nios ika ari nō katiro, a keskara shara afe ipaxakī. Askatari anokai a anoxō Nios kīfiti karapa pexe keskarama. A Nios ika ano sharafinakōia. ²⁴Akka yorafāfe karapa pexe fanifo anoxō Nios kīfinōfo. Nāskakē a mēra a Nios nai mēra ika keskarakōi ipaoni. Akka Cristo mā otoax a karapa pexe fanifo mēra ikinima. Askatamaroko Apa ari nai mēra kani. Nāskakē iskaratīa ari afe ika noko Apa Nios kīfixōfāfāixiki. ²⁵Akka nā ato Nios kīfixomis xanīfo karapa pexe kene fetsa mēra ares fisti xinia fisti akax ikipaoni a mēraxō Nios kīfixiki. Āfe imikōiya a mēra ikitamaroko, yoinā imiya ikipaoni. Akka Cristokai ato keskarama. Akai mēxotaima natiroma, nai fistini Apa Nios ari kaxiki. ²⁶Akka askakatsaxakī Cristo nokoōnoax nai ranā ranākerana nā Niospa mai onifanichāi. Akka askamisma. Jesūs nai fistini ikisi noko keyokōi chaka soaxoxiki. ²⁷Akka keyokōi nō nai fetsexii. Nō naax keyokōi nō akiki nokoaito noko yoiixi a nō niyoxō amis keskara. Nāskakē a nō amis keskara noko yoiaino nā Jesūs Ifofafo tii afe isharapakenakafo. Akka nā nikamisfoma omiskōipakenakafo mēra ato potaxii. ²⁸Cristo āari ināmeax noko naxōi fistini. Yora ichapafoōnoax omiskōixō noko nāxon. Askafiax anā āfe yorafoki oxii, noko ikisharapakexakī. Nāskakē anā nokoōnoax nanakama noko chaka soaxoxiki. Askatamaroko aōnoax nō isharapakenaka.

10

¹Niospa Moisés yoini keskaraōxō nō tāpitiro Cristo noko afarasharakōi faxoxiai. Nāskakē nā Moisés ato yoini keskarakai tsoa imasharatiroma. Afia Moisés ato yoini keskafakī nā xinia tii a ato Nios kīfixomisfāfe yoinā inafoneteaifono Niospa ato chaka soaxonō. Askatari a Moisés yoini keskaratokai ato imasharamisma Nios fe ipaxanōfo. ²Akka a ato Nios kīfixomisfāfe yoinā inaoxō ato chaka soaxonafono, tsōa anā akeranama yoinā ina retekī. Āfe chakaōxō anā shināchakakeranama. Nāskakē anā tsōa yoinā ina retekeranama. ³⁻⁴Akka askarama. Nā xinia tii cabra ato retexonafotia nā afara chakafamis

keskara ato shināmapaonifo. Akka yoinā ina imioxō āfe chaka ato soaxotiroma.

⁵ Nāskakē Cristo mai ano fotoyoxoma Apa yoini iskafakī:

Epa, mīkai fichipaima yoinā ina imioxō āto chaka soanōfo. Askatamaroko yorakōi mīa ea onifani ēfe yora ē mia inānō. Nāskaxō yorafōnoax naxō ē ato chaka soaxoxiki. ⁶ Akka yorafāfekai mia inimamakanima yoinā ina retexaxō kooakī mī ato chaka soaxonō, ixō yoini. ⁷ Akka anā mē mia yoia iskafakī:

Mē nono mai ano fotoa a mīa amapaiyai keskara ē axiki. Nānorikōi mī meka yomisto eōnoa yoikī keneyoni, ixō Cristo Apa yoini. ⁸ Efe yora mīshtichi, shinākapo. Cristo Apa yoikī taefani iskafakī: “Epa, mīōxō Moisés ato yoini keskara sharafiano mī anā fichipaima. Akka nāato ato yoikī iskafani: ‘Yoinā inafō retekāfe āfe imi foano aōxō Niospa mato chaka soaxonō,’ ixō ato yoini. Akka a yoinā retexō koakaxō mia ināifāfekai afāfekai mia inimaima,” ixō Apa yoini. ⁹ Nāskaxō anā yoikī iskafani: “Epa, ē nono mai ano ē fotoni a mīa amapaiyai keskara axiki,” ixō Apa yoini. Akka Cristo noko nāxoni noko chaka soaxoxiki. Nāskakē a Moisés ato yoini keskara nō anā nikatiroma nōko chaka Epa Niospa noko soaxonō. Nāfo mā Niospa fetsafaa. ¹⁰ Nāskakē a Apa amapaiyai keskai Jesucristo āari ināmeni noko nāxoxikī aōnoax nō a keskara shara inō. Nāskakē nō anā afaa fetsa fichipaima māmāi Jesús noko nai fistixonikē.

¹¹ Akka a atoōxō Nios kīfixomisfāfe pena tii yoinā ina retepaonifo Epa Niospa keyokōi ato chaka soaxonō. Askafekēkai afāfe ato chaka soaxopaonifoma. ¹² Akka Jesucristo mā noko nai fistixoniko noko chaka soaxoxiki. Nāskakē nō anā afaa fetsa yopanakama noko chaka soaxonō. Nāskakē mā nokoōnoax naax Apa Nios ari kani ariax afe xanīfokōi ikikai. ¹³ Akka mā Apa ari kanixakī iskaratīa arixō manai, a noikaspamisfo Apa Niospa ato potaitīa. Nāskakē Jesucristo Apa fe xanīfofinakōia ixii. ¹⁴ Nāskakē āarifi ināmei fistixō noko nāxoni nōko chaka noko soaxoxiki. Nāskaxō nō Ifofaax a keskara shara nō ixii. Nāskakē Niospa anā afaa chaka nokoōnoa ōipakenakama. Nāskakē nōri a keskara sharakōi ixii.

¹⁵⁻¹⁶ Nānori Niospa Yōshi Sharapa noko yoiyoni iskafakī:

Efe yorafāfe, ea Ifofaifono āto shinā mēra ēfe meka ē nanexii āto ōiti mērari a ēfe meka kenea keskara ē faxii ea Ifofasharanōfo, ixō yoini. ¹⁷ Nāskaxō anā yoikī iskafani:

Mā ea Ifofaino ē anā shināpakenakama a mā chakafamisfo, ixō Niospa Yōshi Sharapa yoini. ¹⁸ Akka mā noko chaka soaxonano, nāskakē nō anā yoinā ina inātiroma noko chaka soaxonō.

Nios fe rafesharakōikāfe

¹⁹ Efe yora mīshtichi, nāskakē nō nai mēra ikitiro Nios ano ranotama Jesucristomāi nokoōnoax nai imi fonikē, noko chaka soaxoxiki. ²⁰ A ato Nios kīfixomisfo kīfiti pexefā kene fetsa mēra xinia tii ikifistipaonifo ato Nios kīfixoxikakī. Anā iskaratīa nō yopatiroma askara. Anā askafapanakama. Akka iskaratīa afara fetsa fenasharakōi Jesús noko axoni. Nāskakē mā Jesús naino nā Nios kīfiti pexefā kene mēranoa sama nāmīfā faxtetani anā tsoa ikiyamanō. Nāskakē nākōi nā Nioskōi nō kīfitiro. ²¹ Nōko Ifo Jesús nokoōxō Apa Nios kīfixomis xanīfokōi. Nāskakē keyokōi Niospa fakēfāfe āto Ifokōi. ²² Nāskakē nō Jesús chanīmara fakē nā noko nāxonioxō nōko ōiti fena sharakōi noko faxotiro. Nāskaxō a nō afarafo chakafamis keskarafo anā nō shinātiroma nōko ōiti inimakōitiro. Nāskaxō faka sharapa nashimana keskara

noko fatiro anã afaa chaka nõko shinã mēraxõ nõ shinãnõma. Nãskakē Nios fe rafekãfe. ²³ Akka nõ yoikĩ iskafamis: “Jesús nõko Ifokē Epa Niospa a noko yoiyoni keskara noko axoxii,” ixõ nõ yoimis. Nãskakē afaa fetsa shinãyamakãfe. Nã nõ shinãi fisti shinãfafãikãfe. ²⁴ Akka Epa Niospa noko sharafamis. Nõri nõ shinãsharanõ afesaxõ nõ fetsafo shinãmasharatiromãkĩ nõinã faatanãkaxõ afara axoshara faatanãnõfo. ²⁵ Mã mã tãpia mã Jesús chaima oi. Akka fetsafo anã ichanãmifoma. Nãskakē ato keskara iyamakãfe. Nãskakē ichanãi xateyamakãfe. Jesúsnoa mã shinãi keskafakĩ fetsafori yoitaifakãfe mãto õiti inimasharakõinõ.

²⁶ Fatora fētsa mã tãpia Jesús nokoõnoax nani nõko chaka noko soaxoxiki. Nãskara mã tãpifixõ afara chakafakĩ nõko Ifo Jesús kachikiri fakĩ, askarakai Niospa ãfe chaka soaxotiroma. ²⁷ Nãskarafo Niospa ato omiskõimaxii. Akka Niospa ato õiaino ratei finakõixikani. Nãskakē Niospa ato yoixii iskafakĩ: “Emakinoax omiskõipakenakafo mēra fotakãfe, chiifã mēra,” ixõ ato yoixii. ²⁸ Akka fētsa mã Moisés yoini keskara nikakaspakĩ afara chakafaito fētsa õixõ xanifo yoimis. Fistichi yoiyamakĩ rafeta yoitiro, askayamakĩ trespa yoitiro iskafakĩ: “Mã nõ õia nato afara chakafaito,” ixõ yoitirofo. Nãskakē xanifãfe yoitiro: “Na feronãfãke afara chakafaa mã natiro,” ixõ yoitiro. ²⁹ Akka mã Moisés yoini keskara nikakaspai fo retapaonifo keskafakĩ fatorafãferi Jesús nikakaspamifokē Niospa ato omiskõimakĩ finakõixii. Nãskakē mã yora chakafãfe shinãkĩ iskafamisfo: “Mē nikamis Jesús ea nãxoni. Nã naino ãfe imi foni. Nãskaxõ ea katonĩ aõnoax ē Niospa fake inõ. Akka ē shinãikai afama. Nãskakē ē Jesús Ifofapaima,” ixõ anorĩ shinãkĩ nãato Niospa Fake nikakaspakõimis. Askara meka yoikĩ Niospa Yõshi Shara chakafakĩ mekafamis, Niospa Yõshi Sharapa sharafafiamisno noikĩ. ³⁰ Akka mã nõ tãpia Niospa yoikĩ iskafani: “Afaa chakafãfãfe ē ato omiskõimaxii,” ixõ yoini. Askatari yoikĩ iskafani a kirika keneano: “A ea Ifofaafãfe afara chakafãfono ē ato omiskõimaxii,” ixõ yoini. ³¹ Akka fatorafãfe nõko Ifo Jesús kachikiri fakaxõ afara chakafariafãfono atonã fãsi mesekõĩ ixii. Nãskakē askarafo mã Nios nĩpanakato ato achixõ ato omiskõimakĩ finakõixii.

³² Shinãkapo efe yora mĩstichi. Mã taefakĩ Jesúsnoa tãpixõ mã Ifofani keskafakĩ shinãmakiyamakãfe. Fetsafãfe mato Jesús Ifofatimafãfono ato nikatama mã nõko Ifo Jesús Ifofasharakõipaoni. ³³ Nãskaxõ mã Jesús Ifofasharaito õikakĩ fetsafãfe mato Ichayanã mato omiskõimamifiso. Akka a Jesús Ifofamis fetsafori omiskõiaifono mãri ato fe omiskõipaimis. ³⁴ A Jesús Ifofaa fetsafo karaxa mēra ato ikimanifo. Nãskakē mã ato noiyanã ato inimama-pai karaxa mēranõ mã ato õikai kani ato shinãmasharata ato inimamaxiki. Nãskatari mã Jesús Ifofaafãfema mãto afarafo mato fiakĩ keyokõinifo. Mato askafãfiafono a shinãchakatamaroko mã tãpini Epa Niospa mã ika arixõ mato afara mekexona afokai fenopaknakama. Nãskara tãpixax mã inimakõini. ³⁵ Nãskakē a mã Jesús chanĩmara faa keskafakĩ kachikiri fayamakãfe. Mã kachikiri fayamakē Epa Niospa mato sharafaxii noko yoiyoni keskafakĩ. Nãskaxõ afara shara mato inãxii. ³⁶⁻³⁷ Akka Niospa meka kenenĩ iskaĩ:

Cristo mã chaima matokĩ oi, samarakaima,

ixõ kenenifo. Nãskakē mã Jesús Ifofasharai keskafakĩ omiskõifikĩ tenekãfe. Epa Niospa mato inãpaiyai keskara aõxõ mã mato yoiyoni keskara mã fixii. ³⁸ Nãskaxõ anã Niospa meka kenenifo iskafakĩ yoikĩ:

Nã ea chanĩmara fai ē imasharaito, nãato ea Ifofasharakõixii. Akka mã ea kachikiri faafokĩ ē inimaxima,

ixō Niospa yoini kirika keneano. ³⁹ Nāskarāfāfe Jesús kachikiri fakanax omiskōipakenakofo mēra fokani. Akka nōkai askarama. Askatamaroko nō Jesús chanīmara fakōimis noko nimasharapakexanō nō afe ipaxakī.

11

Nios nikakōipaonifo

¹ Akka nō Epa Nios chanīmara fakōixō a noko yoiyoni keskara noko axoyoa-mano nō chanīmara fai chipomāi noko axōfaito. Nāskarifiakī a noko yoiyoni keskara nō ōiyamafixō āfe mekaōxō nō chanīmara fai. Nāskara nō shinākī nō Nios chanīmara fai. ² Nāskakē nōko xinifāfe Niospa ato yoini keskara chanīmara fakōipaonifo. Nāskakē Epa Nios atoki inimakōikī atoōnoa meka shara yoini.

³ Akka nō chanīmara faxō nō tāpitiro Niospa āfe mekapa mai yafi nai onifani. A nō ōiyomisfoma afarafo Niospa onifani, akka iskaratīa mā nō ōitiro. Nāskakē āfe mekapas keyokōi onifani.

⁴ Ē mato yoinō nikakapo mā tāpinō a nōko xinifo ipaonifo afe keskaramākī. Nōko xini Abel Nios chanīmara faxō oveja fake ināni nā Niospa yoini keskafakī. Nāskakē Nios akiki inimakōini. Akka āfe ochi Caínkai askara inānima. Nā Caín Nios nikakaspayanā āfe afarafo ināpaiyaito Niospa fichikaspani. Akka āfe exto Abel Nios chanīmara fakōikē Niospa aōnoa yoikī iskafani: “Mī ea chanīmara fakōina,” ixō yoini. Abel Nios chanīmara faax mā nafianikē nō Abel shinākī nō tāpitiro Nios chanīmara faxō nō nikasharakōitiro. Nō askafaino Nios nokoki inimasharakōi.

⁵ Nōko xini Enoc aatori Nios chanīmara fakōinax afe rafekōipaoni. Nāskakē nayamafiakē a ika ari Niospa ifirisafatani. Aōnoa yoikī Niospa meka kenenifo iskafakī: “Ē Enoc yoiāi keskafakī ea nikakōimis. Nāskakē ē akiki inimakōi,” ixō Niospa yoini. ⁶ Akka nō Nios nikayamakī nō Nios inimatiro. Akka nō Nios fe ipaikōikī nō nikakōitiro. Iskaratīa Nios nia. Nāskakē nō chanīmara fatiro Niosmāi nikē. Askatari nō nikapaikōikī chanīmara fayānā akiki nokoaito Niospa noko afara shara faxoxii.

⁷ Nōko xini Noéri Nios chanīmara fakōipaoni. Nāskakē Niospa Noé yoikī iskafani: “Ē oi kaya imai faka faipafanō āsai fetsenōfo. Nāskakē kanōanāfā pexeya fafe. Mī fakefo fe mī āfinō ano ikanax āsaxikanima. Nā ē mia yoiāi keskafafe,” ixō Niospa Noé yoini. Akka tsōa askara ōiyomisma nāskakē Noé chanīmara fakī kanōanāfā fani āfe fakefo fe āsaxikakima. Nā Noé Nios chanīmara faax isharakōipaoni. Akka nā nikakaspaifo askapaonifoma, afāfe afara chakafapaonifo. Nāskakē Niospa ato omiskōimani āsanōfo. Nāskakē Nios fe Noé rafeaito akiki inimakōini.

⁸ Nōko xini Abrahamri Nios chanīmara fakōipaoni. Nāskakē Niospa Abraham yoikī iskafani: “Nā ē mia nīchipaiyai ari mī katiro. Ē mia mai inānō mīnā inō,” ixō Epa Niospa yoini. Akka Abraham tāpia inima fakiri kaimākai. Askafīax nā Niospa yoia keskakōini. ⁹ Nāskakē nā Niospa yoiyoni keskara chanīmara faax, a Niospa nīchia mai ano nokoax Abraham yora fetsafo mēra kani. A keskarafo inima. Nānoax pexe keskara a karapa pexe fofāfapaoni a mēra oxaxikaki. Nāskakēri āfe fake Isaaca fe āfe fafa Jacobo nā keskara mēra ipaonifo. Epa Niospa Abraham yoini keskafakī nā raferi ato yoikī askafani: “Ē mato mātō mai ināxii,” ixō yoini. ¹⁰ Nāskakē Abraham manapaoni. Akka Niospa yoini keskara nā mai ano ifīaxō tāpīpaoni a Nios ika ari afe ipanaka.

Nāno Niospa onifanifo keyokōi sharakōifo nāfori āfenā ipanaka. Nāskakē Abraham manapaoni.

¹¹ Niospa Abraham yoini iskafaki: “Mī āfi Sarapa chipo fake fixii. Āfe fake feronāfake ixii. Nāskakē mī fenafo ichapakōi ixikani,” ixō yoini. Akka Abraham anifokōi ini āfe āfiri yōxafokōi ini fake fimisma. Nāskakē Abraham āfe shinā mēraxō shinākī iskafani: “Epa Niospa ea yoyioni keskara ea axōi. Nāato nā yoiāi keskarakōi famis,” ixō Abraham Nios chanīmara fani. Nāskakē Abraham āfinī fake fini, āfe fake feronāfake. Nāskakē Abraham fakeya ini. ¹² Akka Abraham mā anifokōia ini. Nāskano āfe fenafo ichapakōifo ini. Tsōa ato tanātiroma. Nā fishifo tiikōi askatari nā mashi exe tiikōi inifo tsōa ato tanātiroma. Abraham āfe fenafo ichapakōi inifo.

¹³ Nā ē yorafoōnoa mato rama yoiā keskara atoōnoa ē mato yoinō. Nā yorafo nai mitokomenifo a Niospa ato yoyioni keskara fikanaxma. Akka askafikaxō chanīmara fakakī ato shinā mēraxō oa ōiai keskara fanifo. Nāskakē inimakōinifo. Nāskakanax yoinānifo iskakani: “Nonokai na mai ano nō ipanakama, mai fetsa ano nō ixii,” ikax yoinānifo. ¹⁴ Akka nānori yoiāifāfe nō tāpitiro nāskara yorafo nono mai ano ipaitama Nios ika ari fopaikani afe ipaxakakī. ¹⁵ Akka a ipaonifo ano shinākani āto mai ano anā fopaikani fokeranifo. ¹⁶ Akka āto mai ari fopai atama Nios ika ariroko shinānifo ari nokopaikakī. Nāfāfe tāpinifo Nios ika ari sharafinakōia. Nāskakē Epa Niospa a ika ari ato pexe shara faxoni afe ipaxanōfo. Nāskakē Niospa atoōnoax inimakī ato yoiakī iskafani: “Ēfi māto Nioski,” ixō atoōnoa yoini inimayanā.

¹⁷⁻¹⁸ Anā Abrahamnoa ē mato yoinō. Epa Niospa tāpipaini Abraham chanīmara fakī nā yoiā keskara akimākai. Nāskaxō yoiakī iskafani: “Mī ina ea retexotamaroko mī fake fisti Isaaca ea retexōfe,” ixō yoini. Nāskatari Epa Niospa taefakī Abraham yoyioni āfe fake fisti Isaacaōnoax āfe fenafo ichapakōi ixiaifo. Nā afara sharafo Niospa Abraham yoyioni keskafakī āfe fake Isaacaōxō keyokōi axoxixakī tāpimayoni. Nānori Niospa Abraham yoiaino āfe fake fisti retexō Nios inākerani. Nāskaxō Nios chanīmara fakōixō nā yoini keskakōi fani. ¹⁹ Nāskaxō Abraham āfe shinā mēraxō shinākī iskafani: “Epa Niospa ea yoiā iskafakī: ‘Mī fake Isaaca ea retexōfe,’ ea faito ē shinā Niospa afama mīshti fatiro. Akka ēfe fake nafiakē Epa Niospa samama ea otofaxotiro,” ixō shināni. Chanīma, āfe fake nakerani. Nāskakē Abraham shināni āfe fake nafiakē Niospa otofaxotiro.

²⁰ Akka Isaaca nāatori Nios chanīmara fakōipaoni. Nāskakē āfe fake feronāfake rafe yoini a inōpokoai: “Jacobō yafi Esaú, chipo Epa Niospa afara shara mato faxoxii,” ato fani.

²¹ Nāskarifiakī Jacobori Nios chanīmara fakōipaoni. Nāskakē mā chaima naito Niospa āfe shinā mēra shināmanai keskafakī āfe fafa rafe, José fake rafe, Niospa ato shara faxonōpokofai ato yoini. Ato yoita āfe chatikī mēstexō Epa Nios kīfianā aicho fani.

²² Nā Joséri Nios chanīmara fakōipaoni. Nāskaxō mā chaima nakī āfe yorafo yoiakī iskafani: “Chipo Epa Niospa nōko fenafo nā israelifo Ejipto anoa ato iyoxii kiki. Fokakī ēfe xaori foxikani kiki. Nā ikaifo ano ea maifaifoxikakī,” ixō ato yoyioni.

²³ Moisés āfe apa feta āfe afa Nios chanīmara fakōipaonifo. Nāskakē Moisés yomeax sharapishtakōikē āfe apa feta āfe afa ōini. Nāskaxori tāpinifo mā yosixō a Niospa yoiāi keskara yonosharakōixiaito. Nāskakē Ejipto anoa xanīfāfe ato yoini a israelifāfe āto fake feronāfake yome mīshti keyokōi

ato rētekī mitokakōinōfo. Askafiaifono Moisés āfe apa feta āfe afa Nios chanīmara fakaxō ratekakima tres oxe anifo āto fake onekakī xanīfāfe āto fake rēteyamanō.

²⁴ Moisés āfe chata keskara ini Faraón. Askafiaifono Moisés askara fichikaspani. Nāskaxō ato yoini iskafakī: “Xanīfo Faraónkai ēfe chatama. Āfe fakerikāi ēfe efama,” ixō ato yoini, chanīmara fanōfo israelifo āfe kaifo ini. Moisésri Nios chanīmara fakōipaoni. ²⁵ Akka Moisés shināni iskakī: “Ē Ejipto anoax xanīfāfe pexe ano ikax ēri ato fe inimasharakai xini ranā ayanā ē afara chakafatiro Nios shināyamakī. Ē askapaima,” ixō shināni. Askapaitamaroko iskafakī shināni: “Ēkai ejiptofo feta afara chakafapaima, askakimaroko ēfe kaifo fe nā Niospa inafō omiskōiaifo keskai ēri ato fe omiskōi. ²⁶ Ē Egipto anoafō ato afara fiapaikī ē ato fiakerani. Ē fiaxoma, ea mekafafiaifono Egipto anoafāfe, nāskanō. Akka afarafoyafiax shara. Akka Cristo, a Niospa noko nīchixii noko ifinō, nā sharafinakōia. Ē Cristoōnoax omiskōifiano Epa Niospa a ika arixō ē nokoaito afara sharakōi ea ināxii ē afe īpaxanō,” ixō shināni.

²⁷ Akka Nios chanīmara fakōinax Ejipto anoax āfe kaifo fe Moisés kani. Ejipto anoax āto xanīfo akiki ōitifishkifiaino akiki mesetama nā xanīfāfe mai anoax kani. Akka Nios tsōa ōiyamafitirono Moisés fisti Nios fe rafekōiax afe mekapaoni. Nāskakē nā Niospa yoini keskafakī enepaonima. ²⁸ Akka Ejipto anoax israelifo foyoafomano Niospa Moisés yoini iskafakī: “Mī kaifo yoife ovejanā fake retenōfo. Nāskakaxō nā oveja imi āto pexe fepotifo raish anōfo, askafafono ōiki ēfe ājirinī āto fake iyoafo rēteyamanō, nā Ejipto anoafō āto fake iyoafo ato reteaitīa,” ixō Niospa yoini. Nāskakē Moisés nā Niospa yoia keskara chanīmara faxō āfe kaifo israelifo yoini. Nāskakē israelifāfe āto fake iyoafo nanima.

²⁹ Nāskakē israelifāfe Nios chanīmara fanifo. Nāskakaxō nā fakafā āfe ane Ōshi pokefainifo. Epa Niospa nēxpakīa fakafā shināfatanaino israelifāfe pokefainaifono ato acho Ejipto anoafō fonifo ato retepaikani. Mā fakafā nēxpakīa kāiyafono Niospa atoki fakafā yosifani. Nāskakē āsai mitokomenifo.

³⁰ Akka Niospa israelifo yoini: “Nā Jericó pexe rasi kachiori siete nia foaketi fayakenōfo,” ixō yoini. Nā pexe rasi kachiori simīto kene keyakōi masoa ini. Nāskakē israelifāfe a pexe rasi kachiori foaketi fayakenaifono nā Niospa yoini keskara nā pexe rasi maokomei fetseni. ³¹ Akka keyakōi Jericó anoafō nai keyonifo. Akka nā kēro chotaferoma āfe ane Rahab nā fisti nanima nāatomāi mā Nios chanīmara faax. Akka Jericó pexe rasi ano foyoafomano israeli xanīfāfe feronāfake rafe nīchini ato onāti fatanōfo. Mā foafono nā rafe Rahab āfe pexe mēra ato ikimani tsōa ato fichixō reteyamanō. Nāskakē nā Rahab tsōa retenima āfe kaifo retetikakī.

³² Akka, zanā afaa fetsa ē mato yoiitromē? Nā yora ichapafāfe Epa Nios chanīmara fapaonifoōnoa ē mato yoiikī keyotirona. Nā Gedeón ikaino, Barac ikaino, Sansón ikaino, Jefté ikaino, David ikaino, Samuel ikaino nā Niospa meka yoisim fetsafoōnoari ē mato yoipanā ēkai yoiikī keyotirona. ³³ Nāskakē afāfe Epa Nios chanīmara fakaxō āto sorarōfo yoinifo a ato noikaspaifo ato retenōfo. Nāskakē a ato noikaspaifo ato retepaifikakī finōkōinifo. Akka atiri xanīfo ikaxō āfe yorafo kexesharapaonifo isharanōfo. Nāskakē a Niospa ato yoiyoni keskara ato axosharani. Nāskatari atiri nā Nios Ifoafāfema poomā mēra ato potanifo. Askafiaifono Epa Niospa ato kexesharani poomānā ato pinōma. ³⁴ Akka atiri xanīfo chakafāfe ato yoinifo chiifā mēra ato potanōfo. Chiī mēra ato potafiafono Niospa ato kexesharani koonōfoma. Atiri kenofāfe

ato retepaifikakī tsōa ato retenima. A isinī ikani ato yora pachikōifokē afori Niospa ato mitsiskōi imani. Nāskakē nā ato noikaspaifāfe āto sorarofāfe ato retepaifiaifono nāfāferoko ato Ichonifo ato afeskafanōfoma. ³⁵ Kērofāferi Nios Ifofaino, fake naano Niospa ato otifaxoni anā ninō.

Akka fetsafo Nios chanīmara fakōinafono nā Nios Ifofaifāfema ato omiskōimanifo ato retetakī. Nāskaxō ato yoikī iskafanifo: “Mā Nios Ifofayamaito nō mato afeska faima mā kasharatanō. Akka mā Ifofaito nō mato retei,” ixō ato yoinifo. Ato askafafiaifono tsoa Nios shināmakinima. Nāskakē ato retenifo ato reteyoafomano shinākī iskafanifo: “Noko retefiaifono Epa Niospa samama noko ototafiro nō afe ĩpaxanō,” ixō shinānifo. ³⁶ Askatari a Nios chanīmara faa fetsafori ato kaxemetsamafayanā ato koshaketsayanā ato cadenānā metexkere ata ato otxekere axō ato karaxa mēra ikimanifo. ³⁷ Askatari ranāri tokirinī ato tsakaketsakaxō ato retenifo, ranāri sirochonō nakirafe ato xatenifo nanōfo, ranāri kenopa ato retenifo, ato askafaifono. Nāskakē nā afaamaisfāfe ano rapatiyamano oveja fichi iyamai cebra fichi rapati fakaxō safenifo. Ato retepaikakī ato ĩchorifaifono. Nāskakē omiskōikōinifo. ³⁸ Nāskakē tsōa istoma anoax machi keya anoax a mafa kini mēra ikikata mai kini mērari ikinifo. Akka nā Nios chanīmara faafa a Nios Ifofaafāfema ato shara fanifoma Niospa ato ōia sharafiafono, ato chakafapaonifo.

³⁹ Nāskakē nāfo omiskōi finafikakī Nios Ifokōi fapaonifo. Nāskakē Niospa atoōnoa yoikī iskafani: “Nafāfe ea nikakōikani. Nāskakē ē atoki inimakōi omiskōifikani isharakōimisfo,” ixō Niospa atoōnoa yoini. Askafikaxō a Niospa ato yoiyoni keskara tsōa fiamā ini. ⁴⁰ Nāskakē Epa Niospa ato manamayopaoni. Akka nōri nō Nios chanīmara faax nō ato fe a Jesūs ika ari nō nokoxii. Nāskakē yora fisti keskara nō ato fe ixii a keskara shara noko imaino. Nāskaxō ato feta anā afaa fetsa nō yopapakenakama. A Niospa yoiyoni keskara keyokōi noko ināxii nai mēraxō.

12

Nō Jesūsnoa shināsharatiro

¹ Akka nōko xinifāfe Nios chanīmara fapaonifo. Nāskakē nōri ato keskara nō itiro. Nāskaxō a afara chakata noko nētefapaiyai keskara nāfo nō kachikiri fakōini. Nāskaxori afara chakafāferi samamakōi noko afara chakafamapairo. Nāfo chakari nō kachikiri fakōini a Niospa noko amapaiyai keskara fisti axiki, fena fenakima a noko yoiai keskara nō axosharakōi. ² Akka nō Jesūs fisti shināfafāinō. Nāfi nōko Ifokōikī noko tāpimamiskōi. Akka nāato noko ōimākī taefanikī afara afeskara afiaino nō Nios chanīmara fakōinō. Nāskaxō a Apa yoia keskara akōipaoni. Nāskakē nōri a keskara inōkāfe. Nāskaxō mā mastakakī yorafāfe ferotaifi rāfini fanifo. Askafafiaifono omiskōiyanā tenekōini māmāi tāpiax a chipo xanifo ixō Apa Nios feta noko ifixiai inimakōiyanā Apa Nios ika arixō.

³ Yora chakafāfe chakafafiaifono tenekōini. Nāskaxō a nokoōnoax omiskōini keskara shinākī matorī omiskōimanaifono, shināchakatama mātō ōiti fekaxtefayamakāfe. Nāskaxō a Niospa mato amapaiyai keskara mā enetiroma. ⁴ Akka yorafetsafāfe mato afara chakafamapaimisfo anā mā Jesūs Ifofanōma, ato nikatama mā omiskōifi mā omiskōi sharamisma. Akka Jesūsroko omiskōi finakōini. ⁵ Mā mā shināmakia keskara ē anā mato yoinō. Mā āfe fakekē, Epa Niospa mato yoini keskara āfe meka kirikano kenea iskara fētsa keneni:

Ēfe fāke, ēfi mī Ifokōikī. Akka nā ē mia yoiai keskara mī ayamaito ē mia omiskōimani mī ea nikanō, mī ea Ifofasharanō. Ē mia askafaino, akai afamara mī fatiroma. Askatari shināchakayamafe. Tāpisharafe. ⁶ Nā ē aō noiai tāpimasharai aō noikī. Ēfe fake keyokōi omiskōimani anā nikasharanō, ixō kenenī a Niospa shināmanaino. ⁷ Epa Niospa mato tāpimapaiyai keskara tāpikāfe. Nāskax omiskōifikī shināchakatamaroko tenesharakōikāfe. Nāskakē omiskōixō mā tāpitiromo māmāi Niospa fakefoxō. Apafāfe āto fakefo tāpimatirofo keskafakī Epa Niospa mēstekōi nokori tāpimani. ⁸ Keyokōi Epa Niospa āfe fakefo ato tāpimanaito mā meemisfo. Akka Epa Niospa noko tāpimayamaino nō āfe fakekōifo itiroma. Nāskax nōri āfe yorafo itiroma. ⁹ Akka nō yomekē nōko epafāfe nono mai anoxō noko tāpimapaonifo. Nāskakē nō shinākī nō ato nikakōimis. Akka Epa Niospa noko tāpimanaino nō tenekōitiro. Nāskaxō nā noko tāpimapaiyai keskai nō inimayanā nō isharakōitiro. ¹⁰ Nōko epafāfe āa shinākaxō noko tāpimamisfo nō shara inō. Akka mā nō yosiano anā noko askafamisfoma. Nāskarifikī Epa Niospa mēste shināsharakōikī, nokori shara fapaikī noko tāpimamis a keskara shara nō inō. ¹¹ Chanīma, noko tāpimayanā noko omiskōimanaino nō shara meetiroma. Paekōi mei nō ichopaitiro. Askafixō mā yosixō chipo nō shinātiro Epa Niospa noko tāpimasharai, nōko ōiti inimasharatiro shara noko imaino.

Nō Niospa meka nikakaspaino mesekōi ixii

¹² Nāskakē afara afeskara afiaino shināchakayamakāfe. Epa Niospa mato tāpimapaiyai keskara fisti akāfe. Nāskaxō Nios Ifokakī kachikiri fatama nikasharafafāikāfe. Nāskatari āfe meka shara nikakī enepaiyamakāfe. Yora pachi keskara iyamakāfe. ¹³ Nāskax isharakōikāfe Jesús Ifofasharaxikakī. Mā askaito ōikani nā Jesús Ifo sharafaafoma mato fe rafepaitirofo Jesús keskara shara ipaikani.

¹⁴ Nāskakē mēenāpaitama keyokōi yorafo fe isharafafāikāfe. Nāskatari Jesús keskara shara ipaikāfe. Akka tsoa Jesús keskara shara iyamakani afāfekai nōko Ifo ōinakafoma. ¹⁵ Epa Niospa noko noikōikī āfe Fakeoxō noko sharafa fafafāimis. Nāskakē a Niospa noko amapaiyai keskara akāfe fenoxikakīma. Askatari māto shināmā afaa shināyamakāfe. Akka māto shināmā mā afara shinākī fetsafori mā ato afara chakafamatiro akairi askara anōfo. ¹⁶ Nāskatari māto āfima fe iyamakāfe. Kērofori māto fenema fe iyamakāfe. Akka nō naino, nōko fake iyoato nōko afama mīshti fitiro. Akka Esau shināsharanima. Fonāikī āfe exto yōkani āfe ēxto pimanō. Nāskaxō a āfe apa ināpaiyai shinākīma āfe exto yoini iskafakī: “Epa naano āfe afama mīshtifo ē fiāi ē mia inānō kopifakī,” ixō yoini. Nāskakē nā Esau keskara iyamakāfe. Atokai Niosnoa shināpaonima. Akka a Niospa mato ināpaiyai keskara fikaspakīma, fikāfe. ¹⁷ Mā mā tāpia āpa afara shara ināpaiyai keskara fipaifikī finima. Nāskaxō apa yōkakī iskafani: “Epa, a mīa ināpai keskara ea ināfe, ē mī fake iyoakōi,” ixō oiāiyānā yōkafaiato āpa inānima māmāi chipokoto fiano. Nāskakē ōisharakāfe. Mā Nios nikayamai māri Esau keskara itiro. Nāskakē Niospa mato ināpaiyai keskara mā fitiroma.

¹⁸ Epa Niospa a nōko xinifo yoini keskara iskaratīa noko yoimisma a keskara. Ato yoini machi āfe ane Sión tenāmā fotanōfo anoxō afara fetsa ato yoixiki. Akka nā machi anoax chiifā erepafākōi, askatari kōi fakishifākōi, askatari nēfefākōiyānā kana piishini. ¹⁹⁻²⁰ Nai mēranoax maneti fāsikōi chāi chāisaito nikanifo. Nāskatari nai mēraxō fāsikōi ato yoiaito nikanifo ato Niospa iskafaito: “Na machi ano tsōa māpetiroma. Māpeaifāfe tokirinī ato tsakakī retēkāfe. Askatari yoināfāferi māpeaito mā retetiro,” ixō ato yoiaito nikanifo.

Nāskakē ratekōikakī Moisés yoinifo iskafakakī: “Moisés, nō anā Niospa meka nikapaima. Māchi ari māpei nō narisatiro. Nāskakē Nios yoife noko anā yoiyamanō,” ixō israelifāfe Moisés yoinifo. ²¹ Akka Moisésri nā ōia keskara ato yoini iskafakī: “Ēri fāsi ratekōi, tari tari iki,” ixō ato yoini.

²² Akka nōkai machi Sión ano nō kaima. Askatamaroko machi Sión fetsa ano nō kai, āfe ane fetsa nā Jerusalén Fena ano a Nios ika ari. Nāskakē nānoax āfe ājirifo ichanākaxō, “Nios sharara,” fafafaŋaikani. Akka nā āfe ājiri ichapakōifo tsōa ato tanātiroma. ²³ Nānori nō keyokōi a Jesús chanīmara faafo afe ixiii. Akka nā Nios ika ari āto anefo kenea afe ĩpaxanōfo. Nāskakē nōri nō Nioski nokoa. Nāskakē noko yoixii fatofāfe Ifofakanax afe ipanakaŋomāki. Nā Ifofaaŋos a keskara shara ato nai mēraxō imai afaa chakafamisfoma keskara inōfo. ²⁴ Jesús noko nāxoyoamano tsōakai nokoōnoax nāxoyonima. Nāskakē iskaratīa Jesús noko nāxonikē nō Nios fe isharapakexatiro. Akka nōko xini Caín onefetsa Abel reteni. Nāskakē Epa Niospa Caín yoikī iskafani: “Caín, ¿afeskakī mī exto mī reteamē? Iskaratīa ē mia omiskōimani,” ixō yoini. Abel nafianixakī aato noko nimapaketiro, Jesús keskarama. Akka Jesús nanixakī noko nimapakenaka.

²⁵ Nāskakē Niospa mato yoiai keskara nikakaspayamakāfe. Nā nono mai anoxō nōko xinifo Moisés ato yoini keskara nikayamaifāfe Epa Niospa ato omiskōimani. Akka Jesús Moisés keskarama. Nios ika ariax nokoki fotoni Niospa Fakekōiax. Nāskakē a Jesús noko yoiai keskara nō nikayamaito nokori omiskōimakī finakōixii. ²⁶ Akka Epa Niospa Moisés yafi nōko xinifo machi Sión anoxō ato yoikī āfe mekapa mai naya naya ani. Nāskaxō anā ato yoini iskafakī: “Anā mai fisti ē naya naya axima. Nairi ē naya naya axii,” ixō ato yoini. ²⁷ Nāskakē nā Epa Niospa noko yoini keskaraōxō nō tāpitiro nā afara nipatirofoma, Niospa nāfo yamafarisafataxii anā afaa inōfoma. Akka nā Niospa ato imapaiyai fisti itirofo. ²⁸ Nāskatari a Nios ika ariax mai naya naya itirofo. Nāskakē nāno nō afe isharapakexatiro. Nāskakē aōnoa nō shināsharayanā nō kififafāinō. Nāskaxō a noko amapaiyai keskara nō axōaino nokoki Epa Nios inima sharakōixii. ²⁹ Akka mā nō tāpia nōko Ifo Nios nā chiifā erepafāi keskara. Akka nā āfe meka shara nikakaspakī kachikiri faifono Niospa chiifā erepafāi mēra ato potaxii anoax omiskōipakexanōfo. Nāskakē nō nikasharakōinō.

13

Afesaxō nō Nios inimamatiromē

¹ Māfi Cristo afe yorafokī. Nāskakē mā ranā nōināi xateyamakāfe. ² Yora fetsafori mai fetsa ariax oaito mātō pexe anoxō ifisharakāfe. Nāskakēri tāpixonoma fetsafāfe yorayama fiano ājirifo fiano ifimisfo.

³ Nā karaxa mēra ikafori ato shinānkāfe. Nāskaxō ato ōiti inimamasharakāfe. Askatari ato axosharakāfe. Nā mā ato fe karaxa mēra ika keskara shinānkōikāfe.

⁴ Feronāfakēfo, mātō āfīfo fe nōināsharakāfe. Nāskax isharakāfe. Askatari mātō āfīma fe ipaiyamakāfe, mātō āfi fisti fe ikāfe. Kērofori mātō fenema fe ipaiyamakāfe, mātō fene fisti fe ikāfe. Akka nā āto āfīma fe ikaifono, kērofori āto fenema fe ikaifono, nāskarafo Niospa ato omiskōimaxii.

⁵ Akka kori ichapa noi Yamakāfe. Askatamaroko inimakāfe afe tii mā ayamakī. Epa Niospa yoinikī iskafakī: “Ēkai mato makinoax paxkanakama.

Askatari ě mato potanakama. Nāskakē a mā yopai ě mato ināxii,” ixō yoini.

⁶ Nāskakē chanīmākōi nō yoitiro iskafakī:

Afara afeskara afiaito ěfe Ifāfe ea axomis. Nāskakē ě rateima, Epa

Niospamāi ea kexesharaino yorafāfe ea afeskafanōfoma, ixō nō yoitiro.

⁷ Niospa meka yoimisfāfe mato yoinifo keskara atoōnoa shināfafāikāfe. Nāfāfe mato shara famisfo. Nāskakaxō nōko Ifo Jesús chanīmara famisfo. Nāskakē ato keskara ikāfe nō Jesús Ifofasharakōinō.

⁸ Akka Jesucristo nā ipaoni keskara ipanaka. Anākai iskaratīa fetsatiroma.

⁹ Akka fetsafāfe mato anorima yoipaikani, a tsōa nikamisma keskara. Nāskakē ato nikayamakāfe mato iskafakī yoipai ani kiki: “Nōko xinifāfe noko yoinifo keskara nō nami fetsa piaino nōko shinā mēra noko shināmasharatiro,” ixō mato yoipai ani kiki. Akka a nō piaitokai nōko shinā mēra noko shināmasharatiroma. Askatamaroko Niospa noko noixō noko imasharatiro a keskara shara nō inō.

¹⁰ Nāskakē nō chanīmara famis Jesucristo ifi cruz ikakinoax noko nāxoni nōko chaka noko soaxoxiki. Akka Jesucristo chanīmara fatama nā Moisés ato yoini keskara fisti chanīmara famisfo. Nāskakē afāfekai ato chaka soaxotirofoma.

¹¹ Akka nā Moisés ato yoini keskai a ato Nios kīfixomis xanīfo fisti, ares fisti pexe kene fetsa mēra ikipaoni, nā mēra yoinā ina imiya ikikē ōikī Epa Niospa ato chaka soaxonō. Akka nā yoināfāfe ato kaya pexe rasi pasotaixō koofapaonifo. ¹² Nāskarīfai Jesús Jerusalén pasotainoax noko omiskōixokī āfe imi foax noko nāxoni nōko chaka noko soaxoxiki a keskara shara nō inō. ¹³ Akka nōri Jesús ipaoni keskara inōkāfe a nō ipaoni keskara anā ixikima. Nāskaxō āfe kaifāfe potanifo keskafakī nokori nofe yorafāfe potatirofo. Nāskakaxō Jesús ĩchaketsanifo keskafakī nokori aōxō ĩchatirofo. Akka Jesúsnoa chaka shināmisfo keskafakī nokori aōxō chakafatirofo. ¹⁴ Nono mai anoax nō omiskōifiki nō shināchakaima, mā nōmāi tāpiax nono mai ano nō ipanakama. Askatari mā nō tāpia a Nios ika ari nokoax nō afe ipanaka. Nāskakē nā nō manasharamis.

¹⁵ Jesús noko nāxonioxō nō Epa Nios aicho fai. Akka nō yoikī iskafatiro: “Aicho Epa Niosi, mī Fake Jesús ěfe Ifokōi. Aōxō ě mia aicho fai,” ixō nō yoitiro. ¹⁶ Askatari ato shināmakiyamakāfe mā afarayaxō a afaamaisfo ato ināsharakāfe. Mā ato askafaito ōikī Nios matoki inimasharakōi kiki.

¹⁷ Akka nā ichanāti pexe anoxō Niospa meka mato yoimisfo ato nikasharakōifafāikāfe. Nāskax nā mato yoiaifo keskakōikāfe. Nāfāfe mato kexesharamisfo mā Jesús nikasharanō. Akka nāfāferi tāpiafo Nios ari nokoafāfe ato yōkaxii iskafakī: “ĴMā ěfe meka mā ato tāpimasharamismē?” ixō ato yōkaxii. Nāskakē ato nikasharakāfe inimakōinōfo. Akka mā ato nikayamaino inimatirofoma, shināchakatirofo. Nāskaxō mato axosharatiroma.

¹⁸ Nokori Epa Nios kīfixokāfe. Epa Niospa noko amapaiyai keskara mā nō apaimiskī. Nāskaxō nōko shinā mēraxō nō afaa chaka shināima. Nō isharaipaikōi. ¹⁹ Eari Nios kīfixokāfe matoki ea samama nīchinō ě anā mato fe inō.

Ato Nios kīfixoyanā mā mekai xatekī ato yoini

²⁰⁻²¹ Epa Niospa noko inimamakōimis nō afaa shināchakanōma. Nōko Ifo Jesús mā nokoōnoax nafiakē Apa Niospa otofani Jesús keyokōi finōax noko kexemis inō. Jesús noko nāxonioñoax Epa Nios fe nō afe yora ipanaka.

Nāskakē mā afara shara yopaito Epa Niospa mato inātiro a mato apaiyai keskara shara mā anō. Āfe Fake Jesucristoōxō nōko shinā mēra noko shināmasharax nokoki inimakōixii. Nāskakē keyokōichi Jesúsnoa nō yoisharapakenaka. Nāskara sharakōi īpanaka.

²² Efe yora mīshtichi, nā ē mato ichapama yoia keskara nikasharakāfe fena fenakākima. Nā ē mato kenexona keskai māto shinā mēra mato shināmasharaxii kiki. ²³ Ē mato yoipai mā nofe yorashta Timoteo iskaratīa karaxa mēranoax mā tsekea. Akka samamashta ekeki oano ē afe kai mato ari.

²⁴ Keyokōi ichanākaxō a mato Niospa meka yoixomisfo yafi a mato kexemisfori nō ato yoisharai. Akka nono Ītalia anoxori nā Nios Ifofafāferi mato yoisharakani.

²⁵ Epa Niospa keyokōi mato noikī mato shara faxōfafāinō. Nā tii.

Santiago Jesús Chanĩmara Faafo Kirika Kenexõ Fomani

Judeofo paxkanãnifono Santiago ato kene fomani

¹ Êkĩa Santiago ẽ mato kirika kenexõ fomai. Epa Nios yafi nõko Ifo Jesucristo ẽ ato yonoxomis. Mãfi Jesucristo mã Ifofamiskĩ nã maitiofo mã paxkanãi fetseni. Ẽ mato meka shara fomai.

Niosxõ nõ tãpisharatiro

² Efe yora mĩshtichi, afara chakafo nokoaino, inimasharakãfe, shinãchakakakima. ³ Mã mã tãpiakĩ, ano afara chakafo nokoaino, mã Jesús nikakĩ finasharakõikĩ, afara chakafo nikakãkima mã tenesharakõitiro. Nãskaxõ afara chakafo mã finõinĩfõfãtiro. ⁴ Mã askaino Jesús mato imapaiyai keskara mã itiro mẽxotaima mãmãĩ mã Jesús nikakõisharakĩ. Mã askakĩ afarafo Jesús mato amapaiyai keskara mã atiro afaa chaka shinãkima.

⁵ Akka Niospa mato amapaiyai keskara mã tãpixoma, Nios yõkakãfe mato tãpimanõ. Mã yõkaito mato tãpimatiro. “Ea fekaxtefayamakãfe,” ixokai Niospa mato anori yoima. Inimayanã mato tãpimani. ⁶⁻⁸ Nãskata mã Nios yõkakĩ iskafakĩ shinãyamakãfe: “Ẽ Epa Nios yõkaito ea tãpimanimaraka,” ixõ anori shinãyamakãfe. Akka nã mã yõkapaiyai keskara shinãkãfe. Nãskaxõ, “Aicho, ẽ Nios yõkaito mã ea tãpimasharakĩ. Nãskakẽ ea amapaiyai keskara ea tãpimaxii,” ixõ shinãkãfe. Askatari anã afaa shinãyamakãfe. Fekaxteyamakãfe. Nãskarari nẽfefakĩ ifi fokẽ fokẽ akaito nõ tãpitiroma fakiri kaimãkai. Nãskarifiakĩ Niospa mato tãpimafiaino mã anã afara fetsa shinãkĩ mã shinãsharatiroma. Nãskakẽ mã fekaxtexõ mã shinãsharatiroma. Nãskakẽ Niospa mato afaa tãpimatiroma mã fekaxteaito.

⁹ Jesús chanĩmara fafiakani ranãri yorafo afaamaisfo. Nãskakẽ fetsafãfe ato tanakanima. “Nafokai afama,” ixõ shinãkani. Askatamaroko afaamaisfiafono Niospa ato iskafai: “Mãfi ẽfe fakekõifokĩ. Keyokõĩ ẽfenãfo mãtonãri,” ixõ Niospa ato yoini. Nãskakẽ inimatirofo. ¹⁰⁻¹¹ Fetsafori Jesús chanĩmara faafo afama mĩshtiyafõ. Nãskakẽ feronãfake afama mĩshti ichapayato shinãkĩ iskafatiro: “Ẽ afama mĩshti ichapayafekẽ ẽfe afama mĩshtifãfe ea inima-matiroma. Ẽfe afama mĩshtiõnoaxkai ẽ isharatiroma. Akka ẽfi Niospa fakekõiax, ẽ afe rafepakenakakĩ. Nãskax ẽ inimakõĩ,” ixõ shinãtiro. Akka taeyoi charõfo sharashta iyotiro. Askafiaino xinĩ tsofifaano, anã shara itiro ma mãmãĩ xinĩ tsofifaano. Nãskarifiã feronãfake afama mĩshti ichapayato shinãtiro iskafakĩ: “Nã charõ ikai keskariai fatora penata ẽ natiro. Mẽ nãxõ ẽfe afama mĩshti ẽ fotiroma. Askatari ẽfe afama mĩshtifãferikã ea afeska fatiroma,” ixõ nã feronãfake afama mĩshtiyato shinãtiro. Nãskakẽ mã ẽfe afama mĩshtifõnoax isharakõiax narisatiro.

Santiago ato tãpimani afara chakafamisfõnoa

¹² Nõko Ifãfe yoiĩ iskafayoni: “Nã ea noiaifi efe ãpanakakĩ,” ixõ yoyioni. Nãskakẽ afara chakafo nokoki nokoaino, nãskara teneyanã nõko Ifo Nios nõ kachikiri fayamaito õikĩ nokoki inimatiro. Nãskax a yoyioni keskai nõ afe nĩpanaka. ¹³ Chanĩma, keyokõichi nõ Jesús Ifõfaxõ afara chakafapaikĩ nõa nõ yoitiro ma iskafakĩ: “Ea Niospa afara chakafamapai,” ixõ nõ

yoitiroma. Akka Nios sharafinakōia. Afara chakafatiroma. Tsōarikai Nios afaa chakafamatiroma, Niosmāi sharafinakōikē. Nāskakēri Niospa ato afaa chakafamatiroma. ¹⁴ Nāskakē nō afara chakafapaiyaino afara chaka nō nea. Nāskatari nōko shinā mēraxō nō afara chakafapaikī nō atiro. ¹⁵ Ē mato yoinō, nikakapo. Kēro fistichi fake naneano fenāmāshta yositiro. Akka mā kāiax yositiro. Mā yosiax anifoax, natiro. Nāskarifiakī nōko shinā mēraxō nō afara chakafo fapai, akka afara chakafo nō shināmakiyamaxō, afara chakafo nō atiro. Nāskakē mēxotaima nō afara chakafatiro. Nāskax nō naa keskara nō itiro.

¹⁶ Akka efe yora mīshtichi, anorima shināyamakāfe. Niospa afaa chakafatiromaki. ¹⁷ Akka Epa Niospa nai mēraxō mēxotaima noko kexesharafafāini. Nāskaxō noko afama mīshti onifaxoni. Xini onifata, fishifo onifata, oxe onifata, nāfo noko onifaxoni, afāfe noko chaxasharanō. Akka oxe ikiaito nō anā ōitiro. Fishiri nāskarari ikiaito nō ōitiro. Chipō kāiyaito nō anā ōitiro noko chaxasharaito. Akka Epa Nioskai askarama. Akai fetsatiroma. Noko mēxotaima sharakōi faxomis. Nokokai chakafatiroma. ¹⁸ Niospa ares shināyoni iskakī: “Ēfe meka chanīmakōi nikaifono ē ato fetsafaxii ēfe fakekōi inōfo,” ixō Niospa shināyoni. Nāskakē noko katokī taefani. Nāskatari a rama chanīmara faifo āfe fakekōifo ixikani.

Niospa meka mēstesharakōi nikax askakōikāfe. Nāskakē mā chanīmara fakōinikai

¹⁹ Efe yora mīshtichi, nikasharakāfe ē mato yoisharanō. Fētsa mato yoipaiyaito, nikakaspatama nikayokāfe. Māri chipo fenāmāshta yoisharaxikakī. Akka samamashta ōitifishkiyamakāfe. Nāskakē nō ōitifishkiki nō mekatiro. ²⁰ Mā ōitifishkikikai Niospa mato afara sharafamapaiyai keskara mā atiro. ²¹ Nāskakē afara chakafo mā famis xatekāfe. Mā mā chaka xatexō mā Niospa meka nikakōisharatiro. Nāskaxō mā yoikī iskafatiro: “Epa, mī meka shara emēra naneane ē mia Ifofasharapaikai. Ē mia nikapaisharakōikai,” ixō anori yoikāfe. Āfe meka shara mato mēra naneano, a mato yoiyoni keskai mā afe nīpanaka.

²² Āfe meka fisti nikakākima nā Niospa yoini keskakōiri akāfe. Mā mā nikafi mā askayamai māa mā pāramei, “Nō Nios Ifofara,” ixō shinākī. ²³⁻²⁴ Nā keskarafofi iskamisfokī: Espejo fikaxō āto femānā choshtakē ōikanax fechokomepaikani shināmakitirofo. Nāskarifiakani Niospa meka nikafikakī, nāskakaxō afara chakafakakī xateafoma. ²⁵ Akka fētsa Niospa meka shara nikafafāikī nā yoiyai keskara amis, shināmakitama. Nā keskara yōra Nios chanīmaraxō Niospa yoiyai keskara amis, nāskax inimakōimis. Shinākī iskafamis: “Niospa meka sharakōi. Nā ea yoiyai keskara ē aki,” ixō shināmis. Nā keskara yora iḥarakōitiro inimayanā.

²⁶ Akka fētsa shinākī iskafai: “Ē Jesús Ifofasharai,” ifiakī meka chaka fisti yoimis āa pārameyanā. Askara yōrakai Jesús Ifofasharama. Akikikai Nios inimaima. Nā keskara yōrakai tsoa ōimatiroma afeskax isharamatiromaki. Atokairoko Nios Ifofaxō ato ōimaxiki. ²⁷ Askatari nō Jesús Ifofasharaxō fakefo apamaisfoya, kēro ifomafatori nō ato kexesharatiro, omiskōiaifāfe. Nāskatari nō Jesús Ifofasharaxō a afara chakafaifo keskara nō atiro. Nō aska sharaito noko ōi nokoki Jesús inimatiro. Nāskarafo nōko Ifo Jesús keskara sharakōi ikani.

2

Yora kori ichapaya fisti sharafatama a afaamaisfori ato sharafakāfe

¹ Efe yora mīstichi, nōko Ifo Jesucristo xanīfofinakōia. Nāskakē noko noipakenaka. Yora afama mīstifoya, afaamaisfoiyari keyokōi noko Jesús noi. Nāskatari māri Jesús chanīmara famis, noko Jesús noiiai keskafakī, keyokōi noikāfe. Nā yora kori ichapaya fisti noikakīma, nā yora afaamaisfoiyari noikāfe. ²⁻³ Akka mā ichanāino feronāfake kori ichapaya oro anīcho efapa safefāi rapati sharakōi safeax mato fe ichanāiyoi oaito, mā shinākī iskafatiro: “Nafi afama mīstifoyaki, nāskakē nō ifisharai,” ixō mā shinātiro. Nāskaxō, “Nono tsaoyofe keyokōichi mia ōinōfo,” mā fatiro. Mā askafaino, feronāfake afaamais rapati chapokōi safeax mato fe ichanāpaiyaito mā iskafatiro: “Onī nīxō ōife,” askafayamakī, “Onī nāmā tsaoxō ōife,” mā fatiro. ⁴ Mā askafakī mā chakafai. Nā kori ichapaya noikī nā feronāfake afaamaisya mā ifimisma. “Jesús shināi keskara nōri nō shināi,” ixō mā yoimis. Anori yoifi mā askamisma. Feronāfake afaamaisya ifisharaxma Jesús shināi keskara mā shināima.

⁵ Efe yora mīstichi, ē mato noikōi. Akka ē mato yoiai keskara ea nikasharakāfe. Yorafāfe afaamaisfikaxō, Jesús chanīmara faifāfe ato noixō Niospa ato katonī afe yorakōifo inōfo. Ato yoiyoni iskafakī: “Mā ea chanīmara fakī, mā ea noikōi. Nāskakē mā efe ipanaka ē xanīfo ika ano. Nāskatari nā ēfenāfo mātonāri ixii,” ixō Niospa ato yoiyoni. ⁶⁻⁷ Askafixō a afaamaisfoya mā ato ikisharakōima, mā ato chakafai ato ōikaspayanā. Akka shinākapo afe keskarafo māki kori ichapayafo. Nā kori ichapayafāfe mato omiskōimakanī. Mā ato nimikē xanīfo ano mato iyokaxō mato karaxa mēra ikimipaikanī. Askarafāfe nōko Ifo chakafakī mekafamisfo. Akka a kori ichapayafāfe mato noikanima ato kori fisti noi kakī. Akka, ¿afeskakī a kori ichapayafo mā ato ifisharapaimē mato chakafafiaifono? Akka a afaamaisfo mā ato noikaspamis.

⁸ Akka kirikaki Niospa meka kenekī iskafanifo: “Nā mā noimekōiai keskariakī fetsafori noikōikāfe,” ixō yoinifo. Nā Niospa yoini keskara mā nikakōiax mā isharakōikai. ⁹ Akka mā fetsafo noiamax mā shara ikīma, chaka mā ikī. A Niospa Moisés yoini keskara mā akīma. Nāskakē, “Mā nikayospakōifo,” Niospa mato fatiro. ¹⁰ Niospa noko yoiyoni iskafakī: “Keyokōi noikāfe,” noko fani. Akka keyokōi Niospa noko yoini keskara nō nikafikī afara fisti nō shināmakixoma nō chakafai. Nāskakē Epa Niospa noko ōi nā nō afaa nikama keskara. ¹¹ Shinākapo. Niospa noko yoini iskafakī: “Kēro fetsa fe oxayamakāfe. Xotofakeri feronāfake fetsa fe oxayamakāfe,” noko fani. Askatari, “Yora reteyamakāfe,” Niospa noko fani. Akka kēro fetsa fe mā oxayamafikatsaxakī mā yora retekī Niospa noko yoini keskara keyokōi mā nikama.

¹² Akka Niospa noko noikī, āfe meka noko yoini nō afaa chakafanōma. Nāskakē noko yoini keskara, nō keyokōi nikasharaito noko omiskōimanimā. Akka nāfo tāpikōixō, keyokōi nō nikakōixō nō ato yoisharatiro. Askatari fet-safo sharafakāfe, askara sharakōikī. ¹³ Mā askaxō Niospa noko yoini keskara, mā yorafo noiyanā ato shinākī mā ato sharafai. Mā askafaito Niospa mato omiskōimatiroma. Akka mā yora fetsafo mā noiyamaito Niospari mato noixoma mato omiskōimatiro.

Nō Jesús chanīmara fakōixō nō fetsafori afara sharafaxotiro

¹⁴ Efe yora mīshitchi, ē mato yoisharapai. Akka fētsa yoikī iskafai: “Ē Jesús chanīmara fai,” ixō yoifixō yorafo sharafamisma, askarakai sharama. Nāskaxō mā noko ōimani mā kai Jesús chanīmara faama. Nāskakē mā Nios fe nīpanakama. ¹⁵⁻¹⁶ Akka a Jesús chanīmara faa fetsa omiskōi afaamaisyax matoki nokoaito, mā iskafatiro: “Mī rapati safesharata katāfe, matsi meyamaxiki. Askatari pisharatāfe fonāiyamaxiki,” mā fafiakī mā kai afaa ināmisma, askarakai sharama. ¹⁷ Akka mā yōra nāxokai anā fetsafo afaa sharafaxotiroma. Nāskarifiakī fetsafāfe yoikī iskafatirofo: “Ē Jesús chanīmara fai,” ifiaxō fetsafo afaa sharafaxomisma atokai Jesús chanīmara fakōinama. Nā keskarafi yora naa keskarakī.

¹⁸ Akka fētsa shinākī noko iskafatiro: “Ē Jesús chanīmara fai. Nāskakē Epa Nios ēfe Ifo,” ifiaxō fetsafokai sharafamisma. Akka ē iskafai: “Ēri Jesús chanīmara fai. Askatari ē fetsafo sharafamis. Nāskakē mī ea tāpitiro Nios ēfe Ifokē.” Akka mī, “Ē Jesús chanīmara fai,” ifiaxō mī fetsafo sharafamisma. Akka, ḡafeskafaxō mī ato ōimatiromē mī Jesús chanīmara faxō? Akka ē fetsafo sharafakī ē ato ōimatiro ē Jesús chanīmara fakī. ¹⁹ Akka mī yoimis iskafakī: “Nios fisti, anā ano Nios fetsama,” ixō mī yoimis. Nāskakē mī chanīmara fai. Nā mī chanīmara fai keskara shara. Akka nā niyfaka chakafāferi chanīmara fakani Nios fistikē. Akka chanīmara fafiakanax rateifinakōikani choakani māmāi tāpikanax a omiskōipakenakafo mēra Niospa ato potaxiaino. ²⁰ Akka mī yoimis: “Ē Jesús chanīmara fai. Nāskakē ē Nios fe nīpanaka,” ixō mī shināfikī, mī afaa sharafamisma. Nāskakē mī shināsharaima. Akka ē mia yoisharapai. ²¹ Akka nōko xini Abrahamnoa shināfe. Niospa yoini iskafakī: “Mī fake Isaaca ea fishkoyamafe,” fani. Askafaino Abraham āfe fake fishkomitsanima, āfe fakekōifiano. Nāskakē Niospa Abraham ōini sharakōi māmāi nikasharakōiaino. ²² Akka shināpo. Abraham Nios chanīmara faxō nā yoi ai keskara ani. Akka Abraham yoikī iskafanima: “Epa Niospa, ē mia chanīmara fafiaxō mīa yoi ai keskara ē akima,” ixō yoinima. Askafaino akiki Epa Nios inimakeranima. Abraham Nios chanīmara faxō, Niospa yoini keskara ani. Nāskakē Nios akiki inimakōini. ²³ Taefakī kirika kenenifo Abraham Nios chanīmara fakōinaito. Nāskakē Abrahamki Nios inimani. Nāskaxō Niospa yoini: “Mīfi efe rafepakenakakī,” fani.

²⁴ Nāskaxō mā tāpitiro fetsa iskaito: “Ē Nios chanīmara fai,” ifiaxō Niospa yoi a keskara akima, askara yorakai Nios fe nīpaxatiroma. Niospakai, “Ē mikiki inimai,” fatiroma. Akka fētsa chanīmara fakī, Niospa yoi a keskara aki, nāfi Nios fe nīpanakakī. ²⁵ Nāskarifiakī nā xotofāke Rahab Nios chanīmara faxō nā israeli rafe ato oneni tsōa ato reteyamanō. Rahab taeyoi chota feromakōi iyopaoni. Mā askapaonixakī, chipo Nios Ifofaax sharakōi ipaoni. Nāskaxō nā israeli rafe Josué ato nīchini Jericó anoafō ato ōitanōfo onexō. Nā rafe Rahab ato oneni tsōa ato reteyamanō. Nāskaxō ato fai fētsa nīchini fotanōfo. Nāskakē nā xotofake Rahabki Nios inimani.

²⁶ Mā nō naano, nōko fero mēsho nomakinoax tsekeano, anā nōko yora shara itiroma. Nāskarifiakī nō Nios Ifofayamakī nō isharatiroma. Nāskaxō Niosxō nō fetsafo nō axosharatiroma. Nāskaxō nō tāpitiro nō Nios chanīmara faimākai.

3

¹ Efe yora mīsh̄tichi, ē mato afara fetsa yoinō. Mā Niospa meka tāpifixō nikasharaxoma mā ato tāpimapaiyamakāfe. Akka nō Niospa meka nikasharaxoma nō ato yoiaito noko nikakaxō akairi afara chakafatirofo. Nāskakē Niospa ato omiskōimafiakī, ato omiskōimasharanima. Akka nokoroko omiskōimakī finai. Nāskakē Niospa meka nikasharaxoma nō ato yoitiroma.

² Akka fake yome rama finipai paketiro kereḡ sharaxma. Nāskarifiakī nōko mekapa nō afara chakafatiro, Nios Ifofasharaxoma. Akka fētsa meka chaka yoikīma meka shara fisti yoifafāini nā keskaratokai afaa fetsa chakafaima āa kexemesharatiro. Akka shara ifiakani tosa shara imisma, afara chakafam-isfo.

³ Akka shinākapo. Āfe ifāfe āfe kamayo renex̄ti fatiro. Askatari afara pishta aostatiro. Nāskax a kamakī tsoax ifo kafāsatiro. Akka kamayo efapafiano nā aostamea pishta āfe yora kexetiro nā kapaiyai ari kanō.

⁴ Askatari shinākapo. Kanōa efapanāfāfiano āfe fiti pishtafakeshta. Kanōa efapanāfāfiano āfe fiti āfe ifāfe chiataxō nā iyopaiyai ari iyotiro. Faka faipafāfekē, nā iyopaiyai ari iyotiro ifāfe chiataxō. ⁵ Nāskarifiakī nōko anari efapayamafiano nō yoikī chakakōi nō yoitiro. Nāskarifiakī chii pishta nō kētefaano nefekī chii xoisafatiro. Nāskakī nōko afarafo noko kōatiro. ⁶ Nāskarari nōko ana pishtafiano, nō chakai mekaino, nōko meka efapatiro. Nāskakē nō yorafo chakana fatiro Satanás noko pāraino.

⁷ Akka yoināfo fetsa fetsatapafoya, peyafoya, xōchixaraifori, faka mēra ikafoya nō ifofamatiro. ⁸ Akka nōko anakai tsōa ifofamatiroma noko nikanō. Nōko anā nō mekai chakakōi imis nō itiro. Nā rono pae keskarakōi. Rono paekapato noko chachiano nō omiskōitiro. Nāskarifiakī nōko anā yora fetsa mekafakī, chakafakī, nō omiskōimatiro. ⁹⁻¹⁰ Nā nōko ana fistichi nō afara chaka yoitiro. Nāskatari nā nōko ana fistichi nō Epa Nios yoitiro iskafakī: “Epa Niospa, mī sharakōi. Mī nōko Ifo,” ixō nō yoitiro. Epa Niospa keyokōi yorafo onifani āfe ōiti keskara inōfo. Askafixō nō fetsa mekafakī chakafatiro, askafayamakī Niosnoa meka shara nō yoitiro. Efe yora mīsh̄tichi, meka sharafekai meka chaka osia shara itiro. ¹¹ Mai mēranoax faka tsekeai shara itiro, askayamai faka pota tseketiro. Nāskax nōko faka fiti anoax faka pota fe faka shara tseketiroma. ¹² Shīko fanax xopaya foaitiroma. Askatari sātera fanax fāraya foaitiroma. Askatari faka fiti anoax faka pota tsekeaino, faka shara tseketiroma, nō mea shara itiro. Nāskarifiakī yōra āfe shinā mēraxō Jesús shinākī fena afaa chaka shināyotiroma.

Nios fistichi noko shināsharamatiro

¹³ Akka fētsa mato mēraxō Niospa meka tāpisharax āfe ōiti keskara shara ikī, nā keskara yōra shara ixō mato axosharafafāitiro. Nā keskara yōra āfe shinā mēra shinākī iskafatiro: “Ē afaayamafixō ē Jesucristoōnoax isharaxō, ē yorafo sharafai,” ixō shinātiro. Askaxō mā noko ōimani Jesús Ifosharafakī.

¹⁴ Akka mā isharaxoma, mā fetsafāfe fiakī keskara mā fipaimis, askatari mā finakōia ipaimis, ato finōpaiyanā mā askaino mato ōiti fekaxtetiro. Nāskax mā isharatiroma. Nā afara chaka fisti mā shinātaifa, askarafo shināi, ini-mayamakāfe. Anori shināi iskayamakāfe: “Ē Niospa meka tāpishara, ē āfe ōiti keskarakōi,” iyamakāfe. Anori shinākī mā yoisharaima. ¹⁵ Mā askara chaka shināito Niospa mato shināmanima. Mā chaka shināi keskara nā Jesús Ifofaafāfema nāskarari shinākani, Satanás ato shināmanaino. ¹⁶ Fetsafāfe fiakī keskarari mā fipaimis, askatari mā ato finōpaimis, askafakī nā Jesús

chanīmara faafo fe mā feratenāmis. Askaxori mā ato fekaxtefapaimis. Askatari afara chaka fetsa fetsatapafo mā ato amamis.

¹⁷ Akka Niospa noko mēstesharakōi noko shināmasharakōitiro. Nō shara inō, askatari nō fetsafo fe nō mēnāpaiyamanō, tanaimakōi isharakōixō fetsafo nō noisharakōitiro afara axosharayanā, askatari fetsafāfe noko yoipaiyai keskara nō nikakōitiro, askatari fetsafo omiskōiaino nō noiyana nō axosharatiro. ¹⁸ Nō afara fanaxō, āfe fimi nō fitiro mā fimiyoano. Nāskarifiakī nō isharakōixō a Niospa apaiyai keskara nō shināsharaxō, nō fetsafo shināmasharatiro, tanaima isharakōinōfo.

4

Niospa fichipaiyaima fichipaiyamakāfe

¹ Afeskai mā raenā faatanāsharakōimamē? Akka māto shinā mēraxō afarafo mā chakafapai. Nāskax mā feratenā faatanāpai, ōitifishkiyanā. ²⁻³ Mā afarafo fipaiikī fiamax mā ōitifishkikī finakōikī mā fetsafo meepaiyanā mā retepaitiro. Akka a Niospa mato ināpaiyai mā yōkama. Nāskakē Niospa a mato ināpaiyai mato inātiroma mā yōkayamaino. Nā afama mīshtifo mā apaiyai nā fisti mā shināi, fetsafo shinākima. Askaxō mā afara yōkafaito Niospa mato ināima, mākōimāi mā afarafo fipaiyai fetsafo inākima.

⁴ Akka kēro feneyafiax feronāfake fetsafo fe imis keskarakōi māri nāskarakōi. “Jesús ēfe Ifoki,” ifiaxō mā Jesús Ifofakōinama. Nā mā shināi keskara chakakōi. ¿Mā tāpīamamē mā fetsafo feta afara chakafakī, mā Nios noima? A Niospa fichipaiyaima, mā fichipaiax mā Nios fe rafetiroma māmāi noikaspakī.

⁵ Niospa āfe Yōshi Shara nō mēra naneano nō afe rafepakenaka. Akka shinākapo. Nō afara fetsa noikōikī nō Nios noisharaimano āfe Yōshi Shara shināmitsatiro. Akka Niospa meka kirikaki kenenifo iskafakakī: “Epa Niospa āfe Yōshi Shara nō mēra naneni. Aōxō noko noikī finakōi. Akka nō Epa Nios noisharayamakī nō afara fetsa noikōiaino āfe Yōshi Shara shināmitsatiro,” ixō kirikaki kenenifo. Nāskakē kaxpa noko kenexonifoma. ⁶ Askatari Niospa meka kirikaki kenekī iskafanifo: “Fētsa Epa Nios nikakaspakī āa apaiyai keskara fisti aki āa kakapaiyanā, aa keskara feka, Epa Nios afe rafetiroma, akiki inaima. Akka fētsa Epa Nios nikapaiikī Epa Nios fenai afe isharapakexakī. Nāskakē Epa Nios akiki inimitiro, askara fe Epa Nios rafesharatiro,” ixō kirikaki kenenifo. Nāskakē Epa Niospa āfe Yōshi Shara nō mēra naneano nā fisti nō noikōiaino Epa Niospa noko axosharai nō Ifofasharanō.

⁷ Nāskaxō yoiki iskafakāfe: “Epa Niospa, mīa amapaiyai keskara ea amafe,” ixō yoikāfe. Akka Satanās mato afara amapaiyaito yoiki iskafakāfe: “Satanās, Jesucristo ēfe Ifokī ea fekaxtefakima, emakinoax katāfe,” ixō yoikāfe. Mā askafaino mato makinoax ichtanō. ⁸ Nios Ifofasharakāfe. Mā Nios Ifofasharaino mato fe rafei. Nāskakē māto chaka xatekāfe afaa chakafapaikakima. Akka fētsa Nios Ifofasharapaifkī, Satanāsri ifopapai, askatamaroko, Nios fisti Ifofasharakāfe. ⁹ Afara chakafaxō shināchakakōikāfe inimakakima. “Ē afara chakafaax ē rāfikōiaino meei,” ixō shinākāfe. ¹⁰ Nāskakī Jesús yoikāfe iskafakakī: “Jesús mī ēfe Ifokē ē mia chakafaki. Ea anā chaka soaxōfe,” ixō yoikāfe. Mā askafaito Niospa mato inimamai. Nāskakē noko yoixii iskafakī: “Ē mia noi. Ē mia anā chaka soaxonō, mikiki inimayanā,” ixō noko yoixii.

Fetsaðnoa yoikī chakafayamakāfe

¹¹ Niospa meka noko yoikī iskafakī Moisés kirikaki keneni, Niospa shināmanaino, “Nōinā faatanākāfe,” ixō noko yoini. Nāskakē fetsafo pārāyamakāfe, ato chakafakī mekafayamakāfe. Mā ato chakafakī Niospa noko yoini keskara mā akima ato noikīma. Akka, “Niospa meka chakara,” nō fatiroma nikakaspakī. Askatamaroko nō nikakōisharatiro. ¹² Nios fistichi noko yoini afeskax nō isharatiromākī, ares fistimāi xanīfokōixō. Ares fistichi tāpikōia nō afe keskara ikamākī, shara iyamai chaka nō ikamākī. Ares noko ifitiro. Akka noko ifiyamakī omiskōipakenakafo mēra noko potatiro. Nāskakē fetsafo pārāyamakāfe.

Mā kai tāpiama a inōpokoai afe keskara iximā kai

¹³ Meka fetsari ē mato yoipai. Ea nikakapo. Mā kai afaa tāpiama fatora penata afara afeskara ifiaito mā yoimis iskafakī: “Na penata nō kayamai, penama nō kai pexe rasi ano. Anoxō nō xinia fisti akikai. Anoxō nō kori ichapa fixii nōko afarafo minixō,” ixō mā yoimis. ¹⁴ Nāskakē anorima mā shinākōimis. Mā kai afaa tāpiama fatora penata afara afeskara afiaino. Akka fakishpari nai nifi keyopaketiro. Nāskax yamarisatatiro. Nāskarifiāi nō nīpanakama. Fatora penata nō narisatani. ¹⁵ Nāskakē mā yoitiro iskafakī: “Niospa fichipaiyai keskara ē iki. Nāskakē nā apaiyai keskara ē aki,” ixō yoikāfe. ¹⁶ Askatamaroko mā kakapaikōimis. “Ē afara ichapa fii,” ixō mā yoifafāini. Niospa mato amapaiyai keskara mā shināima. Nā mā shināi keskara chakakōifo. ¹⁷ Niospa mato amapaiyai keskara mā tāpifixō mā askara atama mā afarafo chakafamis.

5

Nā afama mīshti ichapayafō Santiago ato yoini

¹ Nikakapo kori ichapayafāfe, mato Niospa omiskōimaxii. Nāskakē oiakāfe mā mā omiskōixikai. ² Māto afama mīshtifo mā payokomea. Māto rapati sharakōifo mā nakaxfāfe pikī keyoa. ³ Māto kori mā mekemis mātonā fisti mā fapaikī. Mā mekeaino mā xinina. Nāskakē fetsafāfe tāpitirofo māto kori mā mekea mā xininaano, tsoa pishta ināxoma, mātonā fisti mā fapaikī. Mā askafaito Niospa mato ōi. Akka mato yoikī iskafaxii: “Māfi afara fishkomūtsamiskī. Mā kai tsoa noimisma. Nāskakē ē mato omiskōimaxii,” ixō yoixii. ⁴ Shinākapo. A mato yonoxomisfo mā ato afaa ināsharamisma, mā ato feparamis finōmafāi fifiakī. Nāskakē Epa Nios yoimisfo iskafakakī: “Epa Niospa, noko axōfe nōko patoronō noko kopifamismakī,” ixō yoimisfo. Askafaiyono Niospa ato nikamis. Akka a mato yonoxomisfo mā ato omiskōimanai keskara Niospa mā tāpikōia. ⁵ Askatari mā afama mīshtifoyax mā isharakōia, afaa yopatama. Afama mīshti ichapayata, ichapa pifāi, rapati ichapayata, nā afarafo mā fipaiyai fo mā fifixō fetsafo mā noimisma. Fetsafo keskarama mā isharakōikē, Niospa mato omiskōimakī finakōixii mā fetsafo noiyamaito. ⁶ Fetsafāfe afaa chakafayamafiakē mā ato pārāmis xanīfo yoikī, xanīfāfe ato retemanō. Nāskatari āakai afeskax ifimetirofoma a yorafo.

Omiskōifikī tenekāfe, Nios kīfikāfe

⁷ Efe yora mīshtichi, mā omiskōifi fena fenayamakāfe. Nōko Ifo kachikiri fayamakāfe. Akka nō tarepa xiki fanano fenāmāshta foaitiro. Nāskakē nō fena

fenakima. Nō oi manayotiro. Akka mā choshiano nō fisharakōitiro foaisharano. ⁸ Nāskarifikā manasharayokāfe nā nōko Ifo Jesús chaima nokoaitia. Nāskakē āfe meka kachikiri fakākima, nikasharakāfe shināchakakākima.

⁹ Efe yora mīshtichi, feratenāyamakāfe Niospa mato omiskōimayamanō. Nā nōko Ifo Jesús chaima nokoaitia nā yora chakafo ato omiskōimaniyoi. ¹⁰ Efe yora mīshtichi, ē mato yoisharapai, shinākapo. Niospa meka yoimisfo Niospa meka yoikani omiskōipaonifo. Omiskōifikani fena fenapaonifoma. Nōko Ifo nikaki finakōipaonifo. Āfe meka yoikī enepaonifoma. ¹¹ Nāskakē Nios atoki inimani. Askatari nōko xini Job omiskōifikī teneni. Omiskōifikī Nios potanima. Nāskakē Nios Jobki inimani. Nāskakē Niospa Job sharafarisafatani. Nāskatari Niospa Job āfe fake fetsafoya āfe ina fetsafori ichapa anā inani. Nāskakē nōri nō Job shināki nō tāpisharatiro Niospa noko noisharakōiaito.

¹² Efe yora mīshtichi, ea nikasharakapo ē mato yoinō. Afara chanīma fisti yoifafāikāfe. Nāskakē, “Ēje, ē mia axōi,” ixō axosharakāfe. Akka mā yoikī iskafakī: “Maa. Ē mia axōima,” ixō anori yoita ayamakāfe. Mā askafamiskē keyokōichi tāpitirofo mā chanīkima yoimiskē. Nāskakē iskayamakāfe: “Ē mia pāraitō, Epa Niospa ea omiskōimatiroki,” ixō yoiyamakāfe Epa Niospa mato omiskōimayamanō.

¹³ Fetsa omiskōikī Epa Nios kīfitiro kexesharanō. Askatari fetsari inimai fanāitiro. “Aicho Epa Niosi, mī fāsi sharakōi,” ikax fanāitiro. ¹⁴⁻¹⁶ Askatari nā isinī ikaito Jesús chanīmara faafo āto kexemisfo kenatiro Nios kīfixonōfo. Nāskakē ichanāxō a isinī ikai Nios kīfixoxikakī. Taefakī a mā afarafo chakafamis kāimakāfe. Nāskax mā ranā Epa Nios kīfinōnākāfe mato chaka soaxonō, askatari a isinī ikairi sharafanō. Nāskakē a isinī ikai xiniyaxō femākāfe, Epa Nios kīfixoyanā. Mā nōko Ifo chanīmara fakōixō nōko Ifo mā kīfixonaino, nōko Ifāfe a isinī ikai sharafatiro. Askatari afara chakafaino Niospa āfe chaka soaxotiro. Nō Epa Nios chanīmara fakōita nōko chakafori keyokōi kachikiri faxō nō kīfaiito noko nikakōitiro. Nō yōkai keskara noko afama mīshti axotiro.

¹⁷ Nā Nios yoimis āfe ane Elías feronāfake noko keskarari ini. Nāskaxō Epa Nios fāsikōi kīfiaino oi inima. Kīfikī iskafani: “Epa Niosi, efe yorafāfe mia kachikiri faafokī, fena oi imayamafe, efe yorafāfe anā mia Ifofayonōfo,” ixō yoini. Askafaino xinia tres ata mā xinia fistiri keyoaino oi inima. ¹⁸ Askata anā Elías Epa Nios kīfini oi inō. Nāskakē oi ranā ikaino fanafo foaisharani.

¹⁹⁻²⁰ Efe yora mīshtichi, fētsa Niospa meka kachikiri fakī anā Jesús Ifofaimano, nā Jesús chanīmara faato yoikī iskafatiro: “A mā afara chakafamis xatefe, anā Jesús Ifofaxii,” ixō yoiaino anā Jesús Ifofatiro. Nāskaxō fētsa mā āfe chakafo xatemanano, Niospa āfe chaka soaxoxii. Nāskakē nā feronāfāke afara chakafapaoni Niospa āfe chaka soaxō, anā Niospa shināchakaima fētsamāi taefakī āfe chaka xatemanano. Nāskakē a omiskōipakenakafo mēra kaima. Nāskakēri mā ato yoisharatiro anā Jesús Ifofanōfo. Nā tii.

Santiago

Pedro Jesús Chanĩmara Faafo Kirika Kenexõ Fomani

Pedro Jesús Ifofaafo paxkanānifono ato kirika kenexõ fomani

¹ Ēkĩa Pedro. Jesucristo ea nĩchini aõnoa ě ato yoimis inõ. Niospa mato katonĩ afe yorafo mã inõ. Akka mato potaifono mã Jesúsnoax paxkanānino ě mato kirika kenexõ fomai mã tãpinõ. Ponto anoafõ fomata, Galacia anoafõ fomata, Capadocia anoafõ fomata, Asia anoafõ fomata, Bitinia anoafõ fomata, ě mato fomai. ² Epa Niospa taefakĩ mato katonĩ mã afe yorafo inõ, ěfe Yõshi Sharaõxõ nã mato amapaiyai keskara mã anõ, mã Jesucristo nikasharakõinõ. Akka ěfe Fãke Jesús mato nãxoni ěfe imiõxõ mãto chaka mato soaxoxiki. Niospa mato noikĩ mãto õiti mato sharafaxonõ ixõ ě matoõnoa shinãĩ.

Jesucristoõnoax nõ Nios fe ipaxatiro

³ Nãskakẽ nõko Ifo Jesucristo ěfe Apa Nios nõ aicho fatiro: “Mĩ fãsi sharakõĩ,” ixõ nokomãĩ noikõĩaino ěfe Fake Jesucristomãĩ nõkoõnoax naax anã otonikẽ. Nãskaxõ fake yome rama kãia keskara shara noko imai õiti fenasharayakõĩ. Nãskakẽ nõ afe isharakõĩpakenaka. ⁴ Nãskaxõ noko ĩkisharapakenaka nõ afe ipaxanõ. Akka nõ ěfe fakekẽ nã nai mẽraxõ noko mekexona nõkonãri ixii. Nã Niospa noko mekexona afanã afeskafatiroma, chakanari atiroma, askatari keyotiro. Charofo keskarama. Charofo sharashtafix chipo otsi fetsetiro. Nãskakẽ nãfo Niospa noko mekexona nõkonã inõ. ⁵ Akka mã Nios chanĩmara fakẽ, Epa Niospa ěfe sharaõxõ mato kexesharafafãini nã Jesús oaitĩ mã omiskõinõma, nã oaitĩ afe isharapakexakĩ a mato itipinĩshara faxoni ano.

⁶ Nãskakẽ mã inimai finakõĩkakaini, omiskõĩfi nono mai anoax. Mã omiskõĩfi chipo Jesús fe mã isharakõĩpakenaka. ⁷ Akka mã Jesucristo chanĩmara fakõĩni mã oa oro keskara. Akka kooaito mã õitiro orokõimãki, chakaya osiyamaito. Nãskarifiakĩ Niospa noko tãpitiro nõ chanĩmara faimãkai, akka oro sharafiano nõroko finõinĩfõfana. Akka nã oro sharafix keyotiro. Akka mã Epa Nios chanĩmara fasharakõĩyanã mã Jesús potayamaino Jesús anã nãmã matoki fotoax inimasharakõixii. Iskafakĩ mato yoixii: “Aicho, mã ea chanĩmara fakõĩmis. Mĩ efe isharakõĩpakenaka,” ixõ mato yoixii.

⁸ Mã Jesucristo noisharakõĩ õiyamafikatsaxakĩ. Askatari iskaratĩ mã chanĩmara fakõĩni õiyamafikatsaxakĩ. Nãskakẽri mã inimai finasharakõĩyanã mã tsoa yoisharatiro. ⁹ Nõmãĩ chanĩmara fasharakõĩax, nãskax nõ afe isharakõĩpakenaka.

¹⁰⁻¹¹ Nã Niospa meka yoimisfãfe a inõpokoai yoikakĩ Cristoõnoa meka shara yoipaonifo, Niospa Yõshi Sharapa ato shinãmanaino. Iskafakĩ yoinifo: “A noko noikĩ noko ifimis nokoki oxii, mato omiskõĩoxoxiki mã aõnoax isharanõ,” ixõ kenenifo. Ato askafafiaino tsõa tãpisharapaonima afeskaxoma tãpisharapaipaonifo. ¿Tsoamẽ noko ifimis ixiai afetiari oximẽ? ixõ shinãpaipaonifo. ¹² Akka Niospa Yõshi Sharapa ato tãpimani a inõpokoai yoiaifo keskara, akka afãfe niyokaxõ õiyonifoma. Akka afãfe õiyamafiaifono mãroko mã mã õia. Akka na meka shara Jesucristoõnoa keyokõichi mã nõ nikamis. Noko yoiaifãfe Epa Niospa ěfe Yõshi Shara atoki nĩchini nai mẽraxõ Jesucristoõnoa noko yoinõfo. Nã mã nikamis keskari Niospa ajirifãferi tãpipaikõikani.

Epa Niospa noko yoini Jesucristo keskara shara nõ inõ

¹³ Nãskakê itipinĩsharakãfe shinãsharakõiyana. Nã Niospa noko noikĩ noko afara shara inãxiatĩa Jesucristo oaino. Nãskakê manasharakõikãfe. ¹⁴ Mãfi Niospa fakefoki. Nãskakê Epa Nios nikasharakõikãfe. Mato amapaiyai keskara mã tâpiyopaonima. Mã afara chakafapaoni keskara ana ayamakãfe. ¹⁵ Askatamaroko afaa fetsa shinãtama isharakõikãfe. Akka Nioskai afaa chakaya osiama. Niospa mato katoni a keskara shara mã inõ. ¹⁶ Akka Niospa meka kenekĩ iskafanifo Niospa ato shinãmanaino: “Ë isharakõimiski. Nãskakê isharakõikãfe,” ixõ Niospa ato shinãmanaino kenenifo.

¹⁷ Shinãkapo. Mã Epa Nios kifiki Epa mã famis. Nãskax nõ ãfe fakefokê noko õi. Akka a ãfe meka nikamisfo Niospa ato shara fai. Akka a nikamisfoma ato omiskõimatiro. Ares fisti Epa Niospa noko õimis mēstekõi. Nãskakê isharakõikãfe nono nãmãnoax. Nãskaxõ Nios shinãsharakãfe meseyana. ¹⁸ Akka mãto xinifãfe mato tâpimapaonifo keskarato mato nimapakexatiroma. Mãto xinifo Nioski meseapanifoma. Æakõi ipaonifo. Nãskakê mãri ato keskara ipaoni chaka shinãi. Mã askaito Niospa mato ifini mã ana chaka shinãyamanõ a mã ipaoni keskara Nios shinãmax. Akka shinãkapo. Mã mã tâpia a oro sharakõi mã Nios inãx mã aõnoax nĩpaxatiroma. Askatari kori exe mã inãx aõnoaxri mã nĩpaxatiroma. ¹⁹ Akka Cristo fistichi noko nimatiro. Atokai afaa chakafamisma, nã oveja fake meema keskara sharakõi. Jesús noko nãxonni ãfe imi foni noko imasharapakexakĩ nõ ana chaka inõma. ²⁰ Epa Niospa mai onifatama ãfe Fake Jesús katoni noko nimapakexanõ. Nãskafekê fetsafãfe tâpiyopaonifoma, akka iskaratĩa Epa Niospa mã mato tâpimana. ²¹ Jesucristoõxõ mã Epa Nios chanĩmara fai, Epa Niospa Jesucristo otoax akiki inimakõini. Nãskakê mã iskaratĩa chanĩmara fakõini, Nios manakõiyana afe ipaxakĩ.

²² Akka mã mã Jesucristoõnoa meka shara nikakõixõ ana afaa chaka shinãyamakĩ. Mã mã isharakõixõ mã fetsafo noikõi. Nãskakê mã ranã nõinã faatanãsharakõikãfe mãto shinã sharafoyaxõ shinãsharakõita. ²³ Nãskakê mã mã rama fake kãia keskara shara mã. Akka mãto epa feta mãto ãfa mato fake fifiakanax chipo natirofo. Akka Niospa ãfe meka sharaõxõ fena keskara shara noko ima, nã keyonakama. ²⁴ Akka kirika ano kenekĩ iskafanifo:

Keyokõi yorafo fana keskarafõ, sharakõifikanax mã charõfo keskarafõ.

Akka mã fanafo naino ãfe charõfo keyopaketirom. Nãskarifiyai keyokõi yorafo nĩpaxatirofoma, keyokõi natirofo. ²⁵ Akka nõko Ifãfe ãfe mekakai keyonakama,

ixõ kenenifo. Nã mekaõnoa Jesucristoõnoa fetsafãfe mato yoimisfo mã afe ipaxanõ.

2

¹ Nãskakê mã mã afara chakafamisfo xatekãfe. A mã ato pãramisfo, askatari a mã ato feparamisfo: “Noko sharara fanõfora,” ixõ nãfori xatekãfe. Nãskatari a fetsa fiayi tii fipai fekaxtemis iyamakãfe. Askatari fetsafo ato chakafapai chanĩmis iyamakãfe. ²⁻³ Askatamaroko mã fake rama kãiato yosixiki chocho apaiyai keskafakĩ, mãri Niospa meka shara fichipaikãfe, oa fake yomē chocho aki yositiro keska shara ixikakĩ. Mã mã tâpiaki nõko Ifãfe mato shara faxõaito. Nãskakê mã Epa Niospa mato amapaiyai keskara fisti akãfe.

Cristo mã tokiri mitsisipa keskaraki

⁴Nō pexe fakī tokiri mitsisipasharakōi nō fenatiro, pexe mitsisipa sharakōi inō. Akka tokiri mitsisipakima nō pexe faano pexe shara itiroma. Nōko Ifo Jesucristofi nāskarākī oa tokiri mitsisipakōi keskara shara. Nāskaxō afama mīshti fatiro. Nāskafekē tsōa chanīmara famisma, nōko Ifo fichipaimisfoma. Nāskaxō yoimisfo iskafakakī: “Afeskakīkai nō fichipaitiroma,” ixō yoimisfo. Akka Epa Niospa Jesús katoni noikōikī nōko Ifo inō. Nāskakē akiki fekāfe Ifofaxikakī. ⁵Nāskarifiakī Niospa mato tokiri pexefā keskara faxii mā afe yorafokē. Askatari mā ato Epa Nios kīfixomis inō mato imaxii afaaya osiama sharakōi mā inō Jesúsnoax, Jesúsmaī noko nāxonikē. Nāskakē Nios aicho fakāfe akiki inimakōikāfe, “Epa Niosi, mī fasi sharakōi,” fayanā. ⁶Akka kirika ano kenekī iskafanifo, Niospa ato shināmanaino:

Ōikapo, ē Cristo ōia ares fisti sharakōi. Nāskakē ē katoni efe yorafo afe yora inōfo. Nā tokiri mitsisipa keskarakōiki. Nāskakē afe yorafo afe isharakōipakenakafo. Nāskakaxō Cristo chanīmara fakaxō anā afaa chaka shināpakenakafoma. Askatamaroko afe inimakōipakenakafo, ixō Niospa yoini.

⁷Nāskakē nō Jesús Ifofaxō nō shinākī iskafatiro: “Jesúsfi nā tokiri kerex keskarakōikī, nāskax sharafinakōiaki,” ixō nō shinātiro. Akka a Jesús Ifofaifāfema askara shinākanima: “Oa tokiri shara nō potatiro,” kesfafakani. Akka aōnoa yoikī kirika kenekī iskafanifo Niospa ato shināmanaino:

Oa tokiri pexe famisfāfe tokiri efapa shara potafono, pexe ifāfe ato yoitiro iskafakī: “¿Afeskakī na tokiri efapa mā potaimē? Potayamakāfe, efapa sharaki. Ē fichipaikai ē akiki pexe fanō,” ixō pexe ifāfe yoitiro, ixō yoimifo Jesúsnoa yoikakī. ⁸Askatari kirika kenenifo iskafakakī Niospa Yōshi Sharapa ato shināmanaino:

Tokiri efapafai nēxpakīa rakano tsōa ōiamax akiki otisikaini pake-tirofo keskakani. Nāskarifiakani tsōa nōko Ifo chanīmara fakanaxma, oa pakeai keskarakanax fenokanax Epa Nios ika ari fopaifikani nā omiskōipakenakafo mēra fokani, ixō kenenifo. Niospa anori yoifinino Cristoōnoa nikayamakanax fenopakenakafo. Nānori kirika kenenifo, Niospa ato shināmanaino.

⁹Akka māfi askaramakī. Niospa mato katoni afe yorafo mā inō. Nāfi nōko Xanīfokōikī mā yonoxotiro, fetsafori mā ato kīfixotiro Jesúsnoa ato tāpimaxiki. Noko aa keskara shara imaino mā afe yorakōi itiro. Nāskaxō aōnoa fetsafo mā yoisharatiro iskafakī: “Epa Nios sharafinakōia afara noko sharafaxomis,” ixō nō ato yoitiro. Epa Niospa mato katoni afe yorakōifo ikax xafakīakōi shara mā afe ipaxanō, anā fakish mēra ika keskara mā inōma. ¹⁰Akka māikai Nios shināyopaonima, afe yorakai mā iyopaonima. Akka iskaratīa mā afe yorafo, taeyoi Niospa mato noifiaino mā tāpiyopaonima. Akka iskaratīa mato noikōiaito mā mā tāpia.

Nō Niospa yorafo ikax nō shara itiro

¹¹Efe yora mīshtichi, ē mato yoisharapai ea nikasharakāfe. A Nios Ifofaafomafo fe nō ato fe ikax oa yora fetsa keskara nō iki. Askafiap nōkai ato fe ipanakama. Akka nōroko Epa Nios fe İpanaka. Nāskakē nā Epa Nios Ifofaafoma keskara iyamakāfe. A mato shināmapaiyaifo keskara shināyamakāfe. Mā ato keskara itiroki, Satanás mato chakafamapai kiki. ¹²Nāskakē ato mēranoax Jesús Ifofaax isharakōikāfe. Akka afāfe mato yoikī chakafamisfo fanīrira mato mekafakakī. Nāskakē ato kopiynamakāfe. Tanaimakōi ato mēra

ikāfe. Mā askaito mato ðinõfo mā afaa chakafatama mā isharakõikē a Niospa keyokõi noko ichanāfaitia mā mai keyoaino. Nāskakē mato iskafakani: “Aicho, na yorafo fāsi sharakõifo, nõ ato chakafafaiaino noko kopikanima, Niosxõ noko shara famisfo. Fāsi Nios sharakõi,” ixõ yoinõfo.

¹³⁻¹⁴ Nõko Ifo Jesús fichipaiyai keskafakī, xanīfofo nikasharakõikāfe. Askatari a noko İkinā nõko xanīfo finakõia nikasharakõikāfe. A xanīfo fet-safori ato nikakāfe. Nā xanīfo finakõiato ato xanīfo imakī, afāfe nā afara chakafaifo ato omiskõimanõfo, askatari a afara shara famisfo ato yoisharanõfo. ¹⁵ Nāskakē Niospa fichipaiyai keskafakī mā fetsafo afara shara faxõfafāikāfe. Nā afaa tāpiamafāfe shara shināmisfomakī, askatari Niospa meka tāpiafomakī õikaxõ anā mato mekafatirofoma māmāi ato shara faxõaito a Niospa fichipaiyai keskafakī.

¹⁶ Jesús fisti mātõ Ifokõi, akka afaa fetsa shinātama isharakõikāfe. Niospa mato amapaiyai keskara fisti shinākāfe. Mā askax afaa fetsa mātõ ifo itiro. Afaa chakafatama Nios yonosharaxõfafāikāfe. ¹⁷ Nāskakē keyokõi yorafo shināfafāikāfe. Nā Jesús Ifofaafari ato noikõikāfe. Niosnoa shinākõikāfe iskafakī: “Ē Nios noikõi nā ea yoiai keskara ē nikakõi. Ēkai nikayospapaima ea omiskõimanõma,” ixõ Niosnoa shinākāfe. Nāskaxõ mātõ xanīfofo nikakas-payamakāfe, ato nikasharakāfe.

Cristo noko omiskõixononi keskai nõri nõ aõnoax omiskõitiro

¹⁸ Ato yonoxomisfāfe mātõ xanīfofo ato nikasharakõikāfe. Nā mato sharafaifos shinākakīma. Nā yora chakafāferi mato yonomamisfoki ato nikakāfe. ¹⁹ Mā afaa chakafayamafiakē mātõ xanīfāfe mato omiskõimanaino Nios shināki tenekāfe. Mā askaito Epa Niospa matoõnoa yoisharai kiki. ²⁰ Akka mā afara chakafakē mātõ xanīfāfe mato omiskõimanaino, Niospa mato iskafakī yoitiroma mā teneaito: “Mī afara sharakõifaa,” ixõ mato yoitiroma māmāi afara chakafakē. Akka mā afara sharafaino mato omiskõimanaifono mā omiskõifināfikī mā tenekē, nõko Ifo Niospa ma-toõnoa yoikī: “Sharakõifo,” mato fatiro. ²¹ Cristo nokoõnoax omiskõikõini, nāskakē nõri aõnoax nõ omiskõitiro. Nāskax nõ aa keskara shara itiro. ²² Cristokai afaa pishta chakafamisma, askatarikai tsoa pishta pāramisma. ²³ Fetsafāfe mekafakakī İchafiaifono, atorikai kopikī tsoa İchamisma. Askatari omiskõimanaifono, “Ēri mato kopixii,” ixõ ato yoinima. Askatamaroko Apaõnoa shinākī iskafani: “Epa, mī eõnoa tāpiaki. Nāskarifikī mī ato tāpikõia. Nāskakē a mī ato chipo omiskõimaxiai chanīmakõi,” ixõ Apa shināni, Apamāi mēstekõi ikē. ²⁴ Cristo cruznoax noko nāxonni, nõko chaka noko soaxoxiki. Nāskakē nõ anā fanīrira shinātiro oa yora naa keskara nõ itiro mā noko chaka soaxonano nõ afe isharapakexanõ. Māraki yora naato afaa shinātiro. Nāskax mēstekõi nõ isharakõitiro. Nā noko omiskõixonionõnoax nõ isharakõipakexanõ. ²⁵ Akka mā taeyoi oa oveja fenoa keskara mā iyopaoni afara chaka shināi. Akka iskaratīa mā Cristo İfofasharakõi, mato kexesharano oa oveja kexemisto āfe oveja kexetiro keskafakī. Nāskaxõ mato kexesharakõiaino mā afe yora iki.

3

Afeskax fene fe kēro isharatirofomāki Pedro ato yoini

¹ Nāskarifikī mārī kērofāfe, mātõ fenefo nikasharakõikāfe. Nā Niospa meka shara chanīmara faifāfema mā isharaito mato õikakī Niospa meka shara chanīmara fanõfo, mā afaa yoiyamata mā isharakõiaito õikakī. ² Mātõ fenefāfe

mato yoiiaifono ato nikakaspakakīma ato nikasharakāfe. Mā Jesús keskara shara ikaito ōikakī nōko Ifo chanīmara fanōfo. ³ Akka mā samasharakōi safexō, foarome sharakōita, teoti sharakōi safeta, parotameti sharakōi mā safekē, mato tsōa tāpitiroma mā ōiti sharaya iyamai mā ōiti chakayakē. ⁴ Akka mā Cristo Ifofasharakōixō mā ato ōimasharakōitiro. Māto ōiti mēraxō shināsharakōita, meka mitsisipato mā ato yoitiroma, tanaima sharakōi mā itiro. Fetsafo ōikī ato yoisharakāfe, ato fe isharakāfe. Mā askaito ōikī Niospa mato iskafatiro: “Na kērofo sharakōifo ē ōi,” ixō Niospa mato yoitiro matoki inimayanā. ⁵ Nāskakanax kērofo ranāri Nios Ifofasharakanax isharakōipaonifo. Nāskakaxō āto fenefo nikakōisharapaonifo. ⁶ Akka nā Sara āfe fene Abraham nikakōisharapaoni, “Ēfe ifora,” fayanā. Nāskax mā isharakōiax, askatari mā meseyamax Sara āfe fenafo keskara mā itiro.

⁷ Akka māri feronāfakēfāfe, māto āfifo ikisharakōikāfe. Nā kērofokai mitsisipafomakī mato keskara. Nāskakē ato kexesharakāfe, mato feta Nios Ifofaafoki Niospa ato noikī atori iflakī afe ipaxanōfo. Nāskakē māto āfiffo ato noisharakāfe. Mā ato noiamax ato kexesharaxoma mā kifiaito Niospa mato nikasharatiroma.

Afara ato sharafaxōkani omiskōitirofo

⁸ Nāskakē isharakōixō keyokōichi nānori fisti shināsharakāfe. Oa mato fe yora mā noiāi keskafakī ato fe nōinā faatanāsharakōikāfe. Ato shinākī ato axosharafafāikāfe. Askatari, “Nā yora afaa tāpīamafo ē finakōia,” ikaifo keskai askayamakāfe. ⁹ Fētsa mato chakafaito kopiyamakāfe. Askatari mato īchaito kopikiri Ichayamakāfe. Askatamaroko ato noisharakāfe, akka Niospa noko katonikī noko sharafakī. ¹⁰ Niospa meka yōra kenekī iskafani, Niospa Yōshi Sharapa shināmanaino:

Mā isharapaiķī afara chakafo yoiyamakāfe, fetsafo pārayamakāfe.

¹¹ Afara chakafo fishtayamakāfe, ato makinoax fotakāfe. Askatamaroko afara sharafos akāfe. Afeskax mā isharatiromākī nāskax isharakōikāfe fetsafo fe. ¹² A Niospa meka nikasharakōipaiyaiifono Niospa ato kexesharakōifafāini, kifiaifāferi ato nikakōimis. Akka a afara chakafamisfo Niospa ato nikatama ato tāpimatiro ato chakafakī, ixō yorafāfe Niospa mekaōnoa kenenifo.

¹³ ¿Mā afara ato axosharaino, akka tsōa mato chakafatiromē? ¹⁴ Akka mā askafiaino mato omiskōimanaifono inimai finasharakōikāfe. Nāskakē atoki meseyamakāfe, askatari shināchakayamakāfe. ¹⁵ Askatamaroko nōko ōiti mēraxō nōko Ifo kifiki iskafakāfe: “Cristo, mīfi ēfe Ifokōiki. Mīkai afaa chakafamisma, mī sharakōi,” ixō yoiakāfe. Askatari fetsafāfe mato iskafaiāfe: “¿Afeskaxō mī tāpīamē mī Nios fe ipanaka?” ixō mato yoiāifāfe ato yoiixakī īkisi itipinīsharakāfe ato tāpimasharaxikakī. ¹⁶ Akka māroko isharakōita ato nikasharakōikāfe, mato ōinōfo mā shara ikaito. Māto ōiti fekaxtefayamakāfe. Akka mato chakafakī mekafaiāfe iskafakī mato yoikanax: “Na Jesús Ifofam-isfāfe afara chakafamisfo,” ixō mato yoiifikanax rāfitirofo māmāi isharakōikē. ¹⁷ Akka nō afara shara faino fetsafāfe noko omiskōimanaifono nō teneaino Epa Nios nokoki inimatiro. Akka nō afara chakafaax nō omiskōiaino nokoki inimatiro.

¹⁸ Akka Cristo nokoōnoax omiskōiax nani nōko chaka noko soaxoxiki. Anākai nanakama nai fistinī. Sharakōifiano retenifo. Akka nō chakakōifokē noko nāxonī. Apa Nios ano noko imapakexakī. Akka mā nafiax āfe fero mēsho nanima, anā otoni Āpa Yōshi Sharaōnoax. ¹⁹ Akka mā naax āfe fero mēsho Niospa Yōshi Sharaōnoax a namisfo mēra kayoni a toa tseketiroma ano,

anoxō yoikai. ²⁰ Akka nāfo nayokanaxma taeyoi nikayospakōi iyopaonifo. Nāskaifono Noéri nāno ato fe iyopaoni. Nāskakē Epa Niospa Noé manayopaoni kanōanāfā fayofaino, Noémāi Epa Nios Ifofakē. Āfe fakefori afe inifo, āto āfifo fe. Ocho inifo. Nāskakē ato fāka āsanima Epa Niospamāi ato kexesharakē. Akka nā nikayospafo ato fakafānē āsakī mitoni. ²¹ Faka faipafāino kanōanāfā mēra ikiax Noé āfe āfi fe āsanima. Āfe fakefori āto āfifo fe afe ikikanax āsanifoma. Ocho inifo. Nāskarifiakī fētsa noko maotisafakī faka mēra noko ikimaxō, noko fininīfōfanaino nō yorafo ispai nō Jesús Ifofakī nōko chaka noko soaxonō nō afe ipaxanō. Akka nā noko maotisafafoōxokai nōko choshta nō soatiroma. Askātamaroko nō Nios yōkai nōko chaka noko soaxonō noko īkipakexanō Jesūsmāi mā naax anā otonikē. Nāskaxō nō anā shināchakatama Jesucristoōxō nō shināsharakōi Nios fe īpaxakī. ²² Jesús Apa ari nā mēra kani Apa Nios fe xanīfokōi ixiki. Nāskakē ājirifāfe āto xanīfōfōfāfe Jesús finōtiroma nā yōshifāferi. Askatari nā yōshifāferi xanīfōfiakaxō Jesús finōtirofoma Jesūsmāi finakōikē.

4

Epa Niospa noko āfe shara ināi keskafakī fetsafori nō sharafaxotiro

¹ Nāskakē nā Cristo āfe yora omiskōini keskai, māri nāskai omiskōixikai itip-inīsharakāfe. Akka nā omiskōiato anā afaa chaka shinātiroma māmāi āfe chaka xatexō. ² Isharakōixō nā mā apaiyai keskara mā atiroma, nā Niospa mato amapaiyai keskara mā atiro. ³ Mā xini ichapa finōa, nā Jesús Ifofaafāfema apaonifo keskara mā ayopaoni. Nā mā afara chakafapaiyai keskara fisti mā ayopaoni. Māto āfimafo mā fichipaipaoni. Kērofori askapaonifo. Askatari mēxotaima mā pāepaoni, ato fe ichanāx afarafo chakafayanā ayakī finakōiyanā. Askatari afara fetsafo mā noikōipaoni nā Nioskōi noitama. ⁴ Akka mā anā ato fe rafeyamaxō mā anā ato feta afaa chakafayamaito ōikakī. Nāskaxō mato yoikī iskafatirofo: “Ōikapo. Na yorafāfe anā nofeta afaa akanima,” ikaxō mato chakafakī mekafatirofo. ⁵ Akka ato askafaifāfe Niospa ato yoixii iskafakī: “¿Afeskakī māto chaka mā xatekaspakī na fetsafo mā ato chakafamismē?” ixō ato yōkaxii. Ato askafata ato omiskōimaxii. A nyoafoya a namisfo Niospa ato omiskōimaxii, tsōa Ifofatama āto chaka xateyamaxō. ⁶ Nāskakē Epa Niospa āfe meka yoimisfo nīchini yorafāfe nayokaxoma Jesucristoōnoa meka shara nikanōfo. Nā namisfāfe niyokaxō nikayopaonifo. Akka mā keyokōi nanifo. Nāskafikē fatora fetsafāfe Jesús chanīmara fakē Epa Niospa nā nia keskara ato imapakenaka afe ipaxanōfo.

⁷ Nāskakē meka fetsari ē mato yoinō. Nikakapo. Mā chaima mai keyoi kiki. Nāskakē shināsharakāfe, afaa chaka shinātama. Epa Niospa mato shināmapaiyai keskara fisti shinākāfe. Nāskaxō Epa Nios fisti kīfifafāikāfe. ⁸ Nāskax noinā faatanākōikāfe nō noinākōia sharaki. Fetsa noikōixō nō rae fatiro, a noko chakafāi keskara anā shinānōma. ⁹ Fetsafo mato pexe ano nokoaito akiki inimayanā māto pexe anoxō ifikāfe, ato mekafakī chakafaxoma. ¹⁰ A Niospa āfe Yōshi Sharapa noko tāpimanai keskafakī nōri fetsafo axosharatiro fetsafāferi Nios Ifofanōfo. Nāskaxō fetsafo afara shara faxokī xateyamakāfe. A Niospa afe yorafo noikōiai keskafakī māri ato noikōikāfe. ¹¹ Mā Niospa meka yoi, nā Nioskōi mekai keskaraōxō ato yoikāfe. Māto shināmā shināxō ato yoikakīma. Askatari mā Niospa Yōshi Sharaōxō mā afarafo ato shara faxōfaito ōikakī yorafāfe iskafakī yoitirofo: “Aicho, Epa Nios sharakōi. Āfe Fake Jesucristoōxō afama mīshtifo fatiro,” ixō yoitirofo. “Epa

Niospa ares fisti afarafo shara famis, atokai afaa chakafapanakama. Ares fisti afe Yōshi Sharaōxō afama mīshti fapanaka,” ixō yoinōfo.

Nō omiskōifkī nō tenetiro nōmāi Jesucristo chanīmara fakī

¹² Efe yora mīshtichi, omiskōifkī rateyanā shināchakayamakāfe. Mā askaito Epa Niospa tāpitiro mā Jesús Ifokōi fakē. Nāskakī shinākī iskafayamakāfe: “¿Afeskaī ē omiskōimē?” ixō anori shināyamakāfe. ¹³ Askatamaroko inimakōikāfe Jesucristo omiskōiai keskai māri omiskōifkī. Askatari chipo mā inimasharakōixii Jesucristo anā nai mēranoax fotoaino. Nāskakē keyokōichi ōixikani afe sharafoya nai mēranoax fotokē, nōko xanīfo finakōi ixiki. ¹⁴ Akka mā Cristo Ifo shara faino Cristoōxō mato Ichaifono inimakōikāfe. Nāskakē Epa Niospa afe sharafoya afe Yōshi Shara matoya rafemani kiki. ¹⁵ Akka fatora mā fētsa mā afaa chakafamiskēma mato omiskōimanaifono tenekāfe inimayanā. Askatari yometsoyamata, askatari afara chakafakī finata iyamata, askatari fetsafāfe afara yoipaiyaifo keskara ato feta ayamakāfe omiskōixikākima. Ato keskara iyamakāfe. ¹⁶ Akka nō omiskōi Nios Ifofaax, nāskakē rāfiyamakāfe. Askatamaroko Epa Nios yoikāfe iskafakī: “Aicho Epa Niosi, ē mī Fāke Jesús afe yora. Nāskakē nā chanīmara faafāfema ea omiskōimanaifono ē Jesúsnoax omiskōi. Aicho,” ixō yoikāfe.

¹⁷ Akka Epa Niospa yorafo keyokōi tāpimaniyoi afe keskara ikafomākī. Tafakī noko ōikī taefaiyoi nōmāi afe yorafokē. Akka chipo nā Jesús chanīmara faafomafori ato yoixii afe keskara ikafomākī. Akka iskaratīa nō omiskōiyoi, anākai nō omiskōinakama nō isharakōipakenaka, Epa Nios fe nai mēra. Akka chipo nā Niospa meka nikakaspamisfo omiskōi finakōixikani, afokai anā nīpanakafoma. ¹⁸ Niospa meka yoikī iskafakī kenenifo: “Nā Nios chanīmara faifo isharakōimisfo, Nios ari foyokanaxma omiskōiyotirofo. Nāskafikanax mā Nios ari nokokanax anā omiskōinakafoma. Akka nā Nios chanīmara faafāfema afara chakafamisfo nāfo omiskōi finakōipakenakafo,” ixō kenenifo. ¹⁹ Nāskakē nā Niospa mato yoiai keskai mā omiskōifkī shināchakayamakāfe. Nēato mato onifaniki. Nāskakē yoikī iskafakāfe: “Epa Niosi, mī ea amapaiyai keskara fisti ē apai. Meres fisti mī ea yoitiro,” ixō yoikāfe. Nāskax isharakōikāfe nā mato yoiai keskara amiskī.

5

Afeskax isharatirofomāki a Nios Ifofafo Pedro ato yoini

¹ Akka nā Niospa meka nikakani ichanāfono ato kexemisfo, ē mato yoisharapai ea nikasharanōfo. Nāskaxō māto shinā mēra ēfe meka nane-sharakāfe. Ēri nā Jesús chanīmara faafo ē ato kexemiski. Nōko Ifo Cristo omiskōiaito ē ōini. Anā oaino ēri afe isharapakenaka. Tsōa a keskara ōimisma sharakōi keyokōichi ōixikani. Ēri ōixii a keskara sharafinakōia. ² Nāskakē ē mato yoi nā Jesús chanīmara faafo ichanāifono Niospa mato yoini keskafakī ato kexesharakāfe. Ato Niospa meka yoisharakāfe isharanōfo. Nāskaxō shinākī iskafayamakāfe: “Ooa, ē afara fetsafapaiifkī ē Niosxō ato kexeī,” ixō shināyamakāfe. Askatamaroko a Niospa fichipaiyai keskafakī ato kexesharakāfe ato noīyanā. Nāskakē, “Ea Niospa ato yoimanaino ē ato yoikaspai,” ixō yoīyamakāfe. Anori shinātamaroko inimasharayanā Niospa meka ato yoisharakāfe. “Ē ato yoiaito ea kori inākani kiki,” ixō shināyamakāfe. Anori shinātamaroko ato Niospa meka yoisharakāfe inimayanā. ³ Nāskata āto xanīfo ipaikākima ato ōimasharakāfe afeskaxō Jesús Ifofasharax isharatirofomākī.

⁴ Mā askaito a noko kexemis, nōko Ifo Jesucristo anā nāmā fotoxō mato ōisharaxii. Nāskaxō mato afara shara ināxii a keyonakama. Nāskakē mā afe İpanaka.

⁵ Nāskarifiakī māri naetapafāfe anifofo yafi a mato Niospa meka yoimisfo nikakōisharakāfe. Naetapafāfe anifofo fe isharakōikāfe. Nāskata mā ranā axoshara faatanākāfe. “Ē xanīfoki,” iyamakāfe. Akka, “A xanīfo nipaikani kakapaimisfoki Nios atoki inimaima. Akka a kakapaimisfomaki Nios atoki inimayanā ato afara axosharai ato noikī,” ixō kenenifo Niospa meka yoikakī. ⁶ Epa Nios finakōixō afama mīshti famis. Nāskakē kakapaimis iyamakāfe. Anori shinātamaroko iskafakāfe: “Epa Nios finakōia. Ē afaa tāpiama,” ixō yoikāfe kakapaimis ikakīma. Mā askaito Niospa ato mñāno mato nīchixii xanīfo keskara mā inō. ⁷ Askatari afaa shināchakayamakāfe. Afaa shinātamaroko Nios yoikāfe mato kexesharano. Niospa mato noikī mato kexesharaino anā mātō ōiti fekaxtefayamakāfe.

⁸ Shināsharata mēste shinākāfe. Satanás noko noikaspakī noko chakafapai kiki, oa poomā fonāiki kafāsakī yoinā fenai keskaraxō. Satanás chakata noko afara chakafamapaimiski Niosnoa tsōa shinānōma, Satanás ato chakafamaino afe yora inōfo. ⁹ Nā mā omiskōiai keskariai nā nōko Ifo chanīmara faa fetsafori maitio anoax omiskōikani. Nāskakē Satanás mato afara chakafamapaiyaito nikayamakāfe. Mātō Ifo fistiroko chanīmara fakāfe. Afara chakafayamakāfe. ¹⁰ Niospa mato noikōikī mato katoni, Cristo ika ari mā afe isharakōipakexanō nā sharafinakōia ano. Nono mai ano mā iyoax mā aōnoax omiskōiyoi. Mā askaino Epa Niospa mātō ōiti mato kerex faxōi. Nāskaxō afara afeskara afaino mā tenekōixō mā Jesucristo İfofasharakōixii. ¹¹ Nāatofi afama mīshtifo fapanakaki. Nā fistichi atiro keskafakī tsōa askafatiroma. Nā fistichi askafāpanaka.

Mā mekai xatekī Pedro ato meka shara yoini

¹² Ēfi Silvano shinākōimis. Ē tāpia nā Niospa amapaiyai keskara amiskē. Akka nā ē mato yoipaiyai anori ea kirika kenexoni. Na kirika ichapama ē mato kenexoni mātō ōiti mato inimamasharakōixonō mā shināsharakōinō. Ē mato yoi chanīmakōi Niospa noko noikōi. Nāskakē nānori fisti shinākāfe fanīrira shinākakima.

¹³ Jesús chanīmara faafo ichanāmisfo mēraxō Babilonia anoafāfe mato yoisharakani. Ēfe fake Marcosri mato yoisharapai. Nāfori Niospa katoni afe yora inōfo, noko akai keskafakī. ¹⁴ Māri mā nōinā faatanāi yoinōnāsharakāfe. Mā Cristo yorakōifokī, nāskakē inimasharakōikāfe. Nā tii.

Pedro

Pedro Jesús Chanĩmara Faafõ Afianã Kirika Kenexõ Fomani

Pedro Jesús Ifõfaafõ ato kirika kenexõ fomani

¹ Èkĩa Simón Pedro, Jesucristo ẽ yonoxomis. Aõnoa yorafo ẽfe meka shara ẽ ato yoinõ ea nõichini. Nãskakẽ ẽ mato kirika kenexõ fomai, mã mã nõko Ifo Jesús mã chanĩmara fakĩ finakõiano ẽ akai keskafakĩ. Nã nõko Ifo Nios feta Jesucristo noko ifimis nã ẽ chanĩmara famis nãmãisharakõimiskẽ.

² Akka Epa Nios yafi nõko Ifo Jesús mã tãpikõikẽ matõõnoa shinãkĩ mato inimamakõikĩ mãto õiti mato inimamaxotiro tanaima sharakõĩ mã inõ.

A Nios Ifõfaafõ afeskax isharatirofomãki

³ Niospa noko katoni a keskara shara ikax nõ afe ãpaxanõ. Nãatofi afama mĩshti fatiroki. Nõ Nios tãpikõikẽ afara nõ yopaito ẽfe kerex sharaõxõ noko inãxii. Nãskaxõ noko amapaiyai keskara nõ anõ. ⁴ Nãskakẽ noko yoiyoni keskafakĩ ẽfe kerex sharaõxõ afara sharakõifo noko axoxii a keskara sharakõĩ nõ inõ. Akka a nikakaspafãfe nã afara chakafapaiyaifo keskara fisti amisfo. Nãskafono Niospa nõko imasharai nõ ato keskara inõma. ⁵ Nãskakẽ nã mato imapaiyai keskakãfe, chanĩmara faax a keskara sharakõĩ ikãfe. A keskara sharakõĩ mã ikaino, Niosxõ mato amapaiyai keskara fisti tãpikãfe. ⁶ Akka nã mã apaiyai keskara fisti shinãkakĩma, kexemesharax aõnoax isharakõita afara afeskaraino tenekõita Niosnoa fisti shinãfafãikãfe. ⁷ Askatari keyokõĩ yorafo sharafata oitsifaxõ ato noifafãikãfe.

⁸ Mã askafakĩ nõko Ifo Jesucristo mã tãpikõitiro. Nãskaxõ nã mato amapaiyai keskafakĩ mã yonoxosharakõitiro. ⁹ Akka mã askafayamai oa fẽxo keskara mã itiro, õisharaima. Nãskakẽ mãto chaka mã mato soaxofiano mã anã shinãima, mã mã shinãmakiax. ¹⁰ Nãskakẽ efe yora mĩshtichi, Niospa mato ifikĩ mato shinãmani mã afe yorakõifo mã inõ. Nãskakẽ afe yorakõĩ isharapikõikãfe. Shinãsharata isharakõikãfe. Askafaax mã anã afara chakafo ifofaima. ¹¹ Mã askaito õikĩ mato ifisharakõixii a ika ano mã afe ãpaxanõ nõko Ifo fe. Nõko Ifo Jesucristo noko ifimis.

¹² Nãskakẽ ẽ mato shinãmafãĩni, mã mã tãpifekẽ, nãskakẽ iskaratĩa na meka shara mã mã tãpixõ nã fisti mã shinãkõimis. ¹³ Akka ẽ nayoxoma ẽ mato yoisharafãĩni, ¹⁴ mãmãni nõko Ifo Jesucristo ea tãpimanano ẽ chaima naino. ¹⁵ Nãskakẽ mẽxotaima ẽ mato yoirifai mẽ naano nã ẽ mato yoisimis keskara mẽxotaima mã shinãfafãinõ.

“Cristo Niospa Fake chaxapakekafanaito ẽ õini,” ixõ Pedro ato yoini

¹⁶ Nõ mato yoisimis nõko Ifo Jesucristo ẽfe kerex sharaõxõ afama mĩshti fatiro. “Anã nokoki oxii,” ixõ nõ mato yoisimis. A yorafãfe yoipaonifo anori nõ mato yoisimisa. Akka nõko ferokõichi nõ õini, nõko Ifãfe chaxapakefõfanaito. ¹⁷ Askatari ẽfe Apa Niospa iskafakĩ yoini: “Nafi ẽfe Fakekõikĩ ẽ aõ noisharakõĩ, ẽ akiki inimakõĩ,” ixõ yoini. ¹⁸ Nõkõĩ nikani nai mẽranoax mekai askaito. Nã mãchifã ano nõko Ifo fe nõ ini, nã mãchifã anoxõ nõ nikani anoax Nios mekaito.

¹⁹ Akka a Niospa meka yoipaonifãfe a inõpokoai keskara yoikakĩ Jesúsnoa kenenifo keskara nõ chanĩmara fakõitiro. Nãskakẽ mãri mã na meka mã chanĩmara fakõitiro. Oa rãparinĩ fakish mẽraxõ chaxatiro keskafakĩ, akka

mā penano xafasharakōitiro. Nāskarifikāi mā Niospa meka nikasharaino Epa Niospa mātō ōiti mēra oa pena keskara mato fatiro. ²⁰ Akka taefakī iskara tāpikāfe. A Niospa meka yoipaonifāfe āa āto ōiti mēraxō shinākaxō kenepaonifoma. ²¹ Askatari āa āto shināmā shināxō yoipaonifoma. Askatamaroko Niospa Yōshi Sharapa ato shināmanaino nānorikōi ato yoipaonifo. Nāskakaxō a Niospa Yōshi Sharapa ato shināmanai keskara kenepaonifo.

2

Fetsafāfe chanī fisti ato yoipaonifo (Ju. 4-13)

¹ Akka, “Nō Niospa meka mato yoinōra,” ixō āa nōko xinifo ato pārappaonifo. Nāskarifiakī mato mēraxō mato pāramisfo, “Nō Niospa meka mato yoinōra,” ikaxō. Afāfe meko pārakani fanīrira mato yoikani mā anā shināsharanōma. Akka nōko Ifo Jesu ato nāxoni afara chaka āto ifo inōma. Nāskakē a nōko Ifāfe noko tāpimapaoni keskara chanīmara faafoma. Nāskakē nāfo Epa Niospa ato omiskōimarīsafaxii omiskōipakexanōfo. ² Nāfāfe afara chakakōifo ato tāpimanaifo keskafakī yora ichapafāfe ato nikamisfo. Nāskakaxō atoōxō Niospa mekaōnoa chakakōi fatirofo. Nāskakē a Niospa ato shināmapaiyai keskara shinākanima mā fenoafo. ³ Nāskakaxō kori fisti noikōimisfo, “Nō mato yoinōra,” ixō mato pārakani. Akka a afara chakafaifo keskara mā Niospa tāpia fatora penata ato tāpimani omiskōipakexanōfo. Afetiama Niospa shināyoni a yora chakafo ato omiskōimapakexakī.

⁴ Epa Niospa āfe ājirifo āto chaka ato soaxonima afara chakafaifāfe. Askatamaroko chiifā mēra ato potani, anoax fakishifā mēra īpaxanōfo kaninānā ato metexkere axō. Nā ato ichanāfaitiā ato yoixō ato omiskōimaxii. ⁵ Nāskatari nā yorafo Noé niyoatīa Niospa meka nikakaspafono Niospa āto chaka ato soaxonima. Askatamaroko oi kaya imani faka faipafaxō a yora chakafo ato āsakī mitonō. Akka Noé fisti āsanima. Nā Noé ato yoiyopaoni iskafakī: “Nios sharakōikī mātō chaka xatekāfe a keskara shara ixikakī,” ixō ato yoipaoni. Nāskakē Noé āsanima afe yora sietefo fe Niospa ato kexesharano. ⁶ Nāskatari Niospa pexe rasi Sodoma yafi Gomorra pāoakī fetsaxō kooakī mitoni, mapokōifakī. Nāskakē nā rama chipo ixiaifāfe tāpinōfo yora chakafo keyokōi Niospa ato omiskōimaxiai. ⁷⁻⁸ Akka Lot fisti nanima Niospa nimasharakōini. Nā feronāfakemāi sharakōikē, nāato ōipaoni yorafāfe anoxō chaka shināifāfe. Nā Lot fekaxtekōini, nā yora chakafo askaifāfe ōi. ⁹ Nāskakē nōko Ifāfe afe yorafo kexesharatiro afarafo ato chakafamapaiyai keskara anōfoma. Nāskaxō nā afara chakafamisfo ato omiskōimakī nā omiskōipakenakafo mēra ato potaxii anoax omiskōipakexanōfo.

¹⁰ Nāskakē Niospa ato omiskōimaxii āa shinākaxō afara chakakōi famisfono, nōko Ifāfe āfe meka sharari nikakaspamisfono. Afāfekai afaa tāpiafoma. Mesetamakōi ato īchamisfo a nō ōimisma nai mēranao xanīfo finakōiafo. ¹¹ Akka nā ājirifo xanīfokanax afokai askamisfoma. Afāfe tsoa īchamisfoma nōko Ifāfe ferotaifi. Askatamaroko yoikī iskafamisfo: “Āa Niospa ato tāpimanō omiskōimakī,” ixō shināmīsfo āfe ājirifāfe a yora chakafāfe chakafafiaifono ato afesa fapaimisfoma.

¹² Akka na yorafo yoinā keskarafo, afaa tāpiafoma. Afaa shināima ikafo. Nāskakē achixō retetirofo. Afāfe afara chaka yoimisfo ōiyamafikakī, nāskakē afori naxikani na yoināfo natirofo keskakani. ¹³ Fetsafo omiskōimakatsaxakakī afori omiskōixikani. Afāfe afarafo chakakōifo

fakakī sharakōimeyokani. Akka nā mato pāramisfo mato fe ichanāfo Jesús nikayamafikatsaxakakī. Anoxō mato feta piyanā mato pārapaikani. Akka māfi askaramakī mā noināsharakōita ano fisti ichanāxō mā piisharamis. Mā askafaiato a ato pāramisfo mato fe ichanāpaikani mato fanīrira chakafo yoipaikani mā anā shināsharanōma. Inimakōiyanā nā mato pārapaiyai fisti yoipaikani. ¹⁴ Askatari kēro fetsa ōikakī akiki nokofenepaikakī chotapaimisfo, chaka fisti shināmisfo. Akka kēromā Jesús Ifofayamaxō ato fichipai ato fe ixiki. Askatari a chanīmisfāfe Jesús Ifofasharamisfoma ato chakafamapai ato feta afarafo chakafanōfo ato ōikakī. Askatari ato afama mīshti ato fichipaimisfo mā askara feyafamisfo. Niospa nā keskara yorafa ato omiskōimani omiskōipakexanōfo, yora chakafomāiano. ¹⁵ Nāfo forāsakani mā fenoafo, Niospa meka shara kachikiri fakanā nā Balaam ipaoni keskarafo. Nā Balaam Niospa meka yoimis iyopaoni, Beorpa fake. Mā Niospa meka yoipaofinixakī kori kaya fichipaini, afara chaka shinākī. ¹⁶ Niospa yoiaino Balaam āfe burro nā yora mekai keskani. Nāskaxō āfe ifo iskafakī yoini: “¿Afeskakī mī ea koshaimē?” ixō nā burropa yoini. Askafaito nikai Balaam oa yōra shināsharaima keskarakōi ini.

¹⁷ Na feronāfakēfo faka fiti ano faka netsoa keskarafo. Afaakai tāpiafoma, nāskaxō Niospa meka shara noko tāpimatirofoma. Askatari mā oi fei kiki ixō, nai kōi choshta nō ōifiaino, nēfe nai kōi potatiro keskarafo. Nāskarakaxō noko pāratirofo: “Niosnoa nō mato yoirā,” ikaxō āa shināi imisfo Niosnoa yoikōimifoma. Nāskakē Epa Niospa ato potaxii fakishifā mēra ipaxanōfo. ¹⁸ Nāfo chanīkani kakapaimisfo. Nāskaxō yoimisfo iskakani: “Nō tāpia keskafakī tsōa tāpiama. Nā tsōa atiroma keskafakī nō tāpikōia,” ixō āa yoikani chanīfinamisfo. Nāskakaxō a rama Nios Ifofapaikakī āto chaka xatepaiyai ato yoitirofo iskafakakī: “Mī fētsa āfe āfi fe ika sharakī, nāskax mī afe inimakōitiroki, nō anō kafe,” ixō fētsa iyotiro afara chakafamaxiki. ¹⁹ Afāfe iskafakī yoimisfo: “Mā afara shara faōnoaxkai Nios fe mā ipaxatiroma. Akka nā mā afarafo apaiyai keskafakāfe. Nā mā apaiyai keskafaino tsōa mato xatematiroma inimayanā akāfe,” ixō ato yoikakī anorima ato yoikani. Afori isharamisfoma, āa pāramemisfo. Afara chakafo āto ifo, nāfo Satanās inafō. Nāskakē shināsharakanima. Chaka fisti shināmisfo. ²⁰ Akka nōko Ifo Jesucristo nā noko ifimis, nō nikakōixō nā nikaifāfema afara chakafaifo keskafakī, anā afaa chakafakanima. Nā afara chakafo makinoax paxkatirofo anā āto ifo inōma. Akka anā afara chakafaifono afara chakakōi ato mēra nanetiro a ipaonifo keskara chakafinakōia inōfo. ²¹ Akka afo shara ikeranafo Jesús nikayamakatsaxakakī. Akka a meka shara mā nikafikatsaxakakī chipo anā kachikiri faifono ato omiskōimaki finakōixii. ²² Akka nōko xinifāfe Niospa mekaōnoa kenekī yoikōinifo iskafakī: “Paxta nā imis keskai ori kafāsayotiro. Chipo anā a anāpakea ano otiro. Nāskariai kochiri mīfamā raish iyotiro, nāskax fakanaki kaax choki sharata, mā choki sharafiax anā chipo mīfamā raish itiro.” Nāskari akani Niospa Yōshi Sharaōxō āto chaka potakanamax Satanās āto ifo iki. Āto chaka xatepaifikanax afianā afara chaka mēra paketirofo.

3

Nōko Ifo Jesús anā fotoxii

¹ Efe yora mīshtichi, anā ē mato kirika kenexō fomai. Taeyoi ē mato manamayonixakī, nā kirika kene rafeoxō ē mato shināsharapai mā shināsharakōinō. ² Shinākāfe, a Niospa meka yoimis sharafāfe afetiama mato

yoipaonifo anori. Askatari a noko ifimisto nõko Ifo Jesús ato yoiaito a aõnoa yoimisfåfe nikakatsaxakakĩ nånori mato yoipaonifo keskara shinåkåfe.

³ Nåskakẽ ẽ mato yoinõ shinåkõikåfe. Må chaima Jesús oaino nå yora chakafo matoki fekanax nåfo matoki kaxemetsamapaixikani kiki åakõi askara chakafo shinåkanax. ⁴ Nåskaxõ mato yõkaxikani iskafakakĩ: “A Niospa yoini keskai, çafesakri Cristo oimamẽ? Akka nõko xinifo nanifo chåikai afaa afeskaito nõ õimisma, keyokõi nåskara. Nå Niospa mai onifani chåi afaa afeskaito nõ õimisma,” ixõ yoixii. ⁵ Akka nå yorafåfe må tåpifikaxõ shinåkanima, afetiama Niospa nai onifafianino Niospa yoiaino fakafå nẽxpakĩa mai onifani, taeyoi fakafå iyopaoni. Nåskakẽ Niospa åfe mekapa fakafå nẽxpakĩa mai onifarifatani. ⁶ Askatari fakafaipafakĩ mai maiyaino keyokõi yorafo åsai mitokomeni. ⁷ Akka mai yafi nai iskaratĩa ato mekeyoa, chipo ato koofakĩ mitokõixii. Niospa yoiaino askai fetsexii. Nå Niospa ato ichanåfaitĩa na chiifånẽ ato koofakĩ mitoxii nå yora chakafo ato omiskõimanaitĩa.

⁸ Nåskakẽ efe yora mĩshtichi, shinåmakiyamakåfe. Nõ õimiski xiniachåikõi. Akka nõko Ifåfe õia pena fisti xini ichapa keskara, askatari xini ichapa pena fisti keskara õi. ⁹ Nåskakẽ shinåkĩ iskafamisfo: “Nõko Ifåfe yoiyoni keskara ikamano, akka må yoini keskara må finõkõia,” ixõ shinåmisfo. Askatamaroko Niospa noko noikõikĩ a omiskõipakenakafo mẽra ato potapaima. Fena fenakima ato manasharamis keyokõichi åto chaka xateyonõfo åfe meka shara nikaxikakĩ omiskõipakexakakĩma.

¹⁰ Akka nõko Ifo nokoki nokorisai tsõa manasharayamaino nå yometso nõko pexe ano oaito nõ tåpitiroma keskai. Nåskarifiakĩ tsõa tåpiama afetiara nõko Ifo nokorisai, itipinĩsharomano. Må nõko Ifo nokoaino chåa itakõixii. Nåskaino nai mẽranoafo koofi keyokõixii, nåskatari nono mai anaofori koofi keyokõixikani.

¹¹ Nå ẽ mato yoiai keskai keyokõi keyoxii. Nåskakẽ tåpisharakõixõ nõko Ifo nikasharakõikåfe. Må må itipinĩsharakõixõ a må apaoni keskara anå må akimakai. A mato amapaiyai keskara fisti må akikai. Epa Nios shinåkĩ finakõiax sharakõi ikåfe. ¹² Fatora penata Jesús noko kiki manashara fafåikåfe. Nåskakẽ fetsafo Jesúsnoa yoisharakåfe tåpisharakõinõfo, åto chaka xatekaxõ må chaima Jesús oi kiki. Må Jesús oaino nai mẽranoafo koofi mẽsho mẽshokõixikani. ¹³ Akka nai fenashara nõ manai, mai fena yafi a Niospa yoiyoni keskafakĩ afo sharafai. Akka afara chakafo ano itiroma, nå sharafos ano itirofo.

¹⁴ Nåskakẽ efe yora mĩshtichi, må Jesús manakĩ manasharafafåikåfe. Må askaito Niospa mato õi kiki åfe Fåkeõnoax må isharakõikẽ. Nioski mesekĩma iskafakĩ shinåfafåikåfe: “Epa Niospa åfe Fakeõxõ ea noi. Ẽri Epa Nios noi afe rafepakexakĩ,” ixõ anori shinåfafåikåfe. ¹⁵ Nåskakẽ måri fekaxtekåkima. Shinåsharata isharakõikåfe. Oikapo. Nõko Ifo samarakamis fena omisma yorafåfe ea Ifofanõfora ixõ shinåmis Epa Niospa. Nåskarifikĩ nofe yora Pablo mato kirika kenexoni Epa Niospa shinåmasharaino. ¹⁶ Nå kirika keneai tii nõko Ifo anå oxii kiki ixõ aõnoa yoikĩ mato kirika kenexoni Pablo. Akka a atiri yoikĩ kenei afokai nõ tåpisharatiroma. Akka a Niospa meka tåpiamafåfe åa fanĩra yoimisfo a Pablo yoikĩ kenei anori tsõa yoimisma. Nåskarifiakĩ Niospa mekakõi yoitama, fanĩra yoimisfo. Nåskakanax omiskõipakenakafo.

¹⁷ Efe yora mĩshtichi, a ẽ mato yoiai keskara må må tåpiaki. Nåskakẽ õisharakåfe, a chanĩmisfåfe mato yoipaiyaifo anori må ato nikaxikima. Må

Jesús nikakōiaito mato kexesharakōitiro. Akka a fanīrira yoimisfo mā ato nikaxō anā mā shināsharatiroma. Nāskaxō fanīrira mā shinātiro. ¹⁸ Akka a noko ifimis nōko Ifo Jesucristo nikasharakōifafāikāfe tāpisharakōixikakī. Mato sharafapaiyai keskara a keskara shara ixikakī. Māto ōiti mēraxō a mato tāpimapaiyai keskara tāpisharakōikāfe. Nā fisti nō yoikī iskafatiro: “Mī nōko Ifo, mīōxō afara shara nō atiro, meres fisti mī sharakōi;” ixō iskaratīa yoita a inōpokoai keskara nō yoipakenaka. Nāskakōipakexanō. Nā tii.

Pedro

Juan Jesús Chanĩmara Faafo Kirika Kenexõ Fomani

Jesús noko nimasharaino nõ afe ĩpaxanõ

¹ Ĕkia Juan, Ĕ mato kirika kenexõ fomai mã tâpinõ. Jesucristo Ĕ õimisxaki Ĕ mato yoi mãri mã tâpisharanõ. Nã Jesucristo nõko Ifokõi tae fenakõi Nios fe iyopaonixakĩ. Akka Niospa afama mĩshti onifamatai afe iyopaonixakĩ, chipo nãmã fotoxõ noko yoiaito nõ nikamis. Oa yorakõi keskara nõ õimis. Mã õikĩ feyafaxõ nõ ramãti nõko mĩfi. Nãskakẽ noko yoiaito nikayamexakĩ Ĕ mato yoi, noko imasharanõ nõ afe ĩpaxanõ. ² Apa Nios ariax nokoki Jesús ftoni. Fotokẽ nõ õikĩ feyafani. Nãfi afeskapishita nakama, nãfi nĩpanakakĩ. Apa Nios fe ikatsaxakĩ nokoki ftoni. Nãskakẽ nã nõ õia keskara nõ mato yoi. ³ Nõ õipaonixakĩ nõ mato yoi noko yoiaito ĩfe meka. Nãskakẽ nofe rafexõ nã nõ shinãi keskarrari mãri mã shinãtiro. Nios feta ĩfe Fake Jesucristo shinãi keskafakĩ nõri anori nõ shinãi, nõ ato fe rafekõitiro. ⁴ Nãskakẽ Ĕ mato kirika kenexõ fomai nã kirika kene õiax mã inimakõinõ.

Nios xafakĩakõi ika oa luz keskara

⁵ Akka noko Cristo yoiai, anori Ĕ mato yoinõ. “Oa xinĩ chai chaxaino fakishtroma keskara, xafakĩakõi Nios ika. Afaa chaka afe rafemisma,” ixõ Cristo noko yoimis. ⁶ Akka anorima shinãi yora fetsafo iskakani: “Ĕ Nios fe rafea,” ifiaxõ a Niospa yoiai anori shinãima ĩa chanĩ anorima yoi. ĩfe õiti sharama xafakĩakõi ikama, fakish keskara a Niospa yoiai anori shinãyamafi. ⁷ Nios xafakĩakõi ikakĩ, afaa pishta chakafamisma. ĩfe õiti mẽra oa fakish keskarama, xafakĩa sharakõi ika. Akka nõri afe rafekõixõ, nõ ĩfe meka nõ mẽra nanekõixõ, Niospa shinãi keskafakĩ nõri nõ shinãtiro. Nõ askara shinãx, nã Ifofafo fe nõ ato fe rafetiro. Nãskax nõ xafakĩakõi nitiro, Niospa Fake Jesúsmãi noko nãxonikẽ. ĩfe imĩ nõko chaka noko soaxõfafãini keyokõi.

⁸ Akka nõ yoikĩ iskafamis: “Ĕ afaa chakafamisma,” ifiax nõa nõ pãramemis. Nãskax nõa nõ chanĩkõimis. Nõko õiti mẽra Niospa meka naneama. ⁹ Akka nõ afara chakafaxõ nõko chaka nõ soapaikĩ, nõ Nios yoiaito nõko chaka noko soaxotiro. Keyokõi noko soaxotiro noko raefakĩ, Niosmãi mẽstekõi isharakõixõ. ¹⁰ Niospa yoimis: “Keyokõi yorafãfe chakafamisfo,” noko famis yoikõikĩ. Noko askafafiaino, “Ĕkai afaa pishta chakafamisma, Ĕ chaka shinãima,” ixõ yoikĩ nõ Nios chanĩmara faima, “Āa chanĩra,” nõ Nios fai. Nãskakẽ ĩfe meka nõko õiti mẽra naneima.

2

Jesús Apa Nios noko yoixonõ

¹ Efe yora mĩshtichi, Ĕ mato shinãi. Mẽ mato Jesús Ifofamaxõ Ĕ mato fakefai. Mato fakefaxõ Ĕ mato kirika kene fomai, mã anã afarafo chakafanõma, shinãsharata mã inõ. Askara Niospa fichipai. Akka nõ chakafaino Niospa fichipaima. Nãskakẽ nõ anã afara chakafaxõ nõ nõko Ifo Jesucristo nõ yoitiro anã nõko chaka nõ soapaikĩ, nokomãi nikaito. Noko nikaxõ Apa Nios noko yoixonõ iskafakĩ: “Epa, Ĕ ato nãxonĩ. Eõxõ ato chaka soaxõfe, ĩto chaka soapaikani kiki,” Apa fatiro. Nã fistimãi mẽstekõi ixõ, afaa chakafamisma. Nãskaxõ Apa Nios noko yoixotiro. ² Noko nãxonĩ nõko chaka noko soaxoxiki.

Noko fistima, keyokõïõnoax noko nãxoni. Nõko Ifo Jesucristo noko nãxoni. Nõko chaka noko soaxõfaini nani.

³Nãskakẽ Cristo noko yoiai keskafakĩ nõ nikakõixõ nõ tãpisharakõitiro nõmã afe rafexõ. ⁴Yora fetsafo isakai: “Ë Cristo fe rafea,” ifiaxõ ãfe meka nikama, ãa akikiri kêtapamis, mêtækõï ikama. ⁵Akka nõ Niospa meka nikakõikĩ nõ aõ noikõï. Nãskafaxõ nõ tãpitiro nõ afe rafekõïa, Nios fe. ⁶“Mẽ Nios fe rafekõïaki,” ixõ yoi, a Jesús imis keskara ikãfe.

Noko meka fena shara yoini nõ nõinãsharakõinõ

⁷Efe yora mĩshtichi, ã mato yoisharakĩ ã mato kirika kenexoni. Na ã mato yoiai keskafakĩ taefakĩ mã mã nikamiskĩ. Jesús noko yoia keskafakĩ ã mato kenexonõ. ⁸Mã mã nikafimiskẽ, ã mato anã fenafakĩ yoinõ chanĩma. Jesucristo noko noikõï. Nãskari fakĩ nõ fetsafo noikõï. Fetsafo noikĩ, nõko õiti mẽra xafakĩakõï iki. Anã fakish keskara ikima. ⁹Akka, “Ë Nios fe rafea ã xafakĩakõï ika,” ixõ nõ yoifixõ nofe yorafo nõ noikaspamis, nõkai xafakĩakõï ikama. ¹⁰Akka nõroko nofe yorafo noi, nõ xafakĩakõï iki. Nõ shinãsharata nõ ikax, nõ anã fenotiroma. Nãskakẽ nõ xafakĩakõï iki, afaa pishta chaka shinãtama. ¹¹Akka a afe yorafo noikaspaifo, afokai sharama. Fakish mẽra niafo keskara. Afaakai shinãkanima. ãto chaka xatekaspakani. Askafikaxõ afaa tãpiafoma, fenokõïafo.

¹²Efe fakefãfe, mãto chakafo Jesúsxõ Epa Niospa mato soaxonano, nãskakẽ ã mato shinãkĩ ã mato kirika kenexoni. ¹³Afaa oniataima Epa Nios fisti iyopaoni. Efe anifo tiito, ã mato kirika kenexoni, afe keskaramãki mã mã Epa Nios tãpiakĩ. Mã mã tãpixõ mã chanĩmara famiski. Naetapafãfe, matori ã kirika kenexoni, Satanás chakata mato afara chakafamapaiyaito mã mã finõfakĩ. Nãskakẽri naetapa tiito ã mato kenexõ foma, mã Satanás chaka finõano. Efe fakefãfe, ã mato yoikĩ kenexona mãmã Epa Nios tãpikẽ.

¹⁴Efe anifo tiito, matori ã kirika kenexona, mã mã tãpiakĩ, afaa oniyataima Epa Nios fisti iyopaoni. Naetapafãfe, matori ã kirika kenexona, mãto õiti kerexkõifafã Epa Nios ãfe meka shara nikakõïyanã mã mã Satanás chaka finõfakĩ.

¹⁵Akka a Niospa fichipaiyamai, nõri fichipaitiroma. Afo fichipaikĩ nõ Nios shinãtiroma. Afarafo na yora chakafãfe ãto shinã mẽraxõ shinãifo keskara afo fichipaiyamakãfe. Afo fichipaikĩ mã Nios shinãtiroma. ¹⁶Akka a Nios shinãifoma nono nãmã ikafo ãa shinãkani iskamisfo: “Ëa ã shinãxõ nã ã apaiyai keskara ã tiro. Afara õikĩ ã fichipaikĩ ã fitiro. Ë tosa keskarama. Ë afama mĩshti shinãï. Ea keskara tsoama,” ixõ fẽtsa yoitiro ãa chanikĩ. Aato Niospa meka shinãima, ãa shinãx askatiro. ¹⁷Akka na afe keskararafafo Niospa õikaspaifo mã afo mitokomei. Nãskatari a yora chakafãfe fichipaiyairo mã afori mitokomei. Akka nã Niospa yoiai keskara nikakõïax nõ Nios fe nĩpanaka.

A yora chanãiafo nõ nikatiroma

¹⁸Efe fakefãfe, mã chaima Jesucristo anã nãmã fotoiyoi mã nõ nika. Nãskakẽ Jesús nãmã fotoyoamano, akka nã yora chakafãfe Cristo shinãmisfoma ãto xanĩfo finakõïa oi taei. Nãato, “Ë Cristora,” ixõ noko pãrapaixi. Mã mã tãpia nãato Jesús noikaspamis. Akka iskaratĩa, “Ë Cristora,” ikanaifo yora ichapakõïfo. Nãskakẽ mã nõri tãpia nã Cristo kayakõï samama fotoi. ¹⁹Nã Cristo noikaspaifo nofe iyoafo, mã noikaspakani nomakinoax tsekefo. Afokai noko keskarafoma. Cristo anã shinãkanima, mã kachikiri

faafo. Nāskax nomakinoax tsekeafono nō tāpitiro afāfekai Cristo Ifoafaafoma. Akka a Cristo āto Ifokōikē nomakinoax tsekekeranafoma.

²⁰ Akka Cristo āfe Yōshi Shara mātō ōiti mēra nanea. Nāskakē keyokōichi mā mā tāpia Niospa Yōshi Sharapa mato tāpimapaiyai keskara. ²¹ Nāskata Jesucristo mā tāpikī finakōiakī. Tāpixō mā mā chanīmara fakī. Nāskakē ē mato kenexoni. Nāskaxō afara mato pāraifāfe mā chanīmara faima. Mā tāpia Jesucristo ramashara anorima ato yoimisma, nāfi chanīmakōikī. ²² Yora fetsafo iskamisfo: “Cristokai Niospa nai mēraxō nīchinikeroko, akai Niospa Fakekēroko,” ixō yoimisfo. Askafakaxō Epa Nios yafi āfe Fake Jesús chanīmara fakanima. Afāfe Cristo noikaspakōikani. ²³ Akka nā Cristo noikaspafāfe iskafakani: “Jesús Niospa Fakema,” fakanax Epa Nios fe rafemisfoma. Afokai Niospa yorafoma. Akka a yoikī iskafaifo: “Jesús Niospa Fakekōi,” fakanax nāfo Nios fe rafekani.

²⁴ Nāskakē Jesúsnoa mā nikakī taefani keskafakī, āfe meka shara shināmakiyamakāfe. Nā mā nikakī taefani keskafakī, mā shināmakiyamax mā nikakōisharaino Epa Nios fe āfe Fake Jesús mato fe rafekōipakenaka. ²⁵ Nāskakē Jesús noko iskafakī yoiyoni: “Ea yafi ēfe Epa mā Ifoafaax, mā nofe nīpanaka, anā mā nanakama,” ixō noko yoini.

²⁶ Akka na yorafāfe Cristo noikaspaifo afāfe mato pārapaikani. Mato anorima yoipaikani. Nāskakē ē mato yoisharakī kirika kenexoni mā tāpikōinō tsōa mato pārayamanō anorima yoikī. ²⁷ Akka Epa Niospa āfe Yōshi Shara mato ināni mato fe rafekōinō. Nāskakē aōxō mā mā tāpikōia. Mā anā tsoa yopaima mato tāpimanō, āfe Yōshi Sharapamāi keyokōi mato tāpimakē. A mato tāpimanai keskara chanīmakōi, mato pāratiro. Nāskakē nikakōiyanā Cristo fe rafesharakōikāfe, a Niospa Yōshi Sharapa mato yoiāi keskai. A Niospa Yōshi Sharapa mato yoini keskai shināmakikakīma Cristo fe rafesharakāfe enekakīma.

²⁸ Ēfe fakefāfe, iskaratīa Cristo nikakōiyanā afe rafekōikāfe, mā nāmā fotofaino nō akiki meseimakai nōmāi isharakōiax. Askatari nō akiki rāfimakai.

²⁹ Mā mā tāpiakī Nios isharakōimiskī afaa chakafatama. Nā isharakōimisfo nāfo Epa Niospa imasharapakenaka āfe fakefo inō. Nafofi Epa Niospa fakekōifokī.

3

Niospa fakefo

¹ Epa Niospa noko noikōi. Shināfāi ikāfe. “Ēfe fakefora,” noko famis. Akka nō āfe fakekōifo. Akka nā yora fetsafāfe Jesucristo shināifoma Nios tāpiafoma. Nāskafakīri nokori tāpiafoma, nō Niospa fakefofiano. ² Efe yora mīshtichi, ea nikakāfe. Nōfi iskaratīa Niospa fakekōifokī. Nāskakē afe keskarara chipo noko Niospa imai nō tāpiama. Cristo fotoaito nō ōiax nā keskarakōi nō iki, āfe ōiti keskarakōi. ³ Niospa fakekē nonori nō yoi: “Ē Jesucristo fe ipanaka. Ē Jesús fe ikaino āfe ōiti keskarakōi ē ixii,” ixō shinākī nō anā chaka shināpaima. Jesucristo shināi keskarari nō shinātiro, anā chaka shināyamakī.

⁴ Akka yora fetsafāfe ato chakafakakī, āto chaka potakaspakani, a Niospa yoiāi keskara shinākanima, afara chaka fisti shināmisfo. ⁵ Jesucristo nai ariax nokoki fotoni nōko chaka noko soaxoxikī. Akka nāatofi afaa chakafaximakī. Nā fistifi finakōiakī. Ē mato yoiāi keskara mā mā tāpiakī. ⁶ Nāskakē a afe rafeafāfe chaka shināmisfoma. Akka a ōiti chakayafāfe Jesús tāpiafoma, Jesús shinākanima. Jesús fe rafeafoma. ⁷ Ea nikasharakāfe, ē mato yoinō.

Fetsa iskatiro: “Ē Niospa meka mato yoinō,” ixō mato yoisharaima. Mato anorima tāpimapai, akka aa nikax mā chaka nitiro. Akka a isharakōixō shināsharamis. Aa keskarafi yora sharakōikī. A Cristo ika keskarari ari isharakōia shināsharakōita. ⁸ Akka nā afara chakafamisfo Satanás fe rafeafo. Nā Satanás māi taeyoi ōiti chakaya inino, iskaratīari nāskara. Nāskaxō Satanás keyokōi yorafo afara chakafamapai. Nāskakē Niospa āfe Fake nokoki nīchini. Noko nāxoxiki nokoki fotoni, nōko chaka noko soaxoxiki. Nomakinoa Satanás potatiro noko afara chakafamapaiyaito. Nāskakē Jesucristo Satanás finōinīfōfana.

⁹ Akka Niospa āfe Yōshi Shara nōmēra naneano nō Niospa fake itiro. Nō Niospa fakexō nō anā afaa chakafapaima. Nā Niospa Yōshi Shara nōko ōiti mēra ikē nō anā afaa chakafatiroma, nōko ōiti noko fetsafaano. Nōko ōiti noko fetsafaxō, mā Niospa noko fakefa. ¹⁰ Fetsafāfe afara chakafamisfo, afokai Niospa fakefoma. Afofi aa ranā noinākanima. Askarafo Niospa fakefoma. Afofi Satanás fakefoki. Nāskakē Satanás fakefo nō tāpitiro. Nāskafakīri Niospa fakefo nō tāpitiro.

Nōa ranā nō noinātiro

¹¹ Nāskakē taefakī mā Nios Ifofaxō mā mā nikamiskī mato yoiaito: “Nōa ranā nō noināsharanō,” ixō mato yoiaito mā mā nikamis. ¹² Akka nā Caín onefetsa noikaspakī reteni keskara iyamakāfe. Askara Satanás chaka fe rafea. Nāskaxō onefetsa reteni noikaspakī, ē mato yoinō nikakapo. A Niospa yoia keskafakī onefētsa Nios shināni. Akka Caín askanima. Āfe onefetsakī ōitifishkikī reteni. A onefētsa Nios Ifofaito ōikī noikaspakī reteni, Niosri noikaspayanā. ¹³ Akka māri Jesús Ifofaito, matori noikaspatirofo. “Ē Jesús Ifofaito ea tsōa noikaspaima kiki,” ixō shināyimakāfe. A mā Jesús Ifofaito a Jesús Ifofaafāfema mato noikaspatirofo. ¹⁴ Nō yorafo noikōixō nō tāpitiro nōmāi Niospa fakefoxō. Nāskakē a omiskōipakenakafo mēra katama, afe nō ipanaka. Akka a yora fetsafo noikaspai, afokai Niospa fakema. Nios fe rafeamax afe ipanakama. ¹⁵ Akka a yorafo noikaspai fo afofi retemitsamis keskarafoki. Afo chakakōifo. Askarafo mā mā tāpia Niospa fakefoma. Askarafo Nios fe rafeafoma. Nios fe nīpanakafoma, yorafo noikaspakanax. ¹⁶ Akka Jesús noko noikōikī, noko nāxonī. Āakōi nokoōnoax nani. Nāskarifiakī nō fetsafo noikōiax nō atoōnoax natiro. ¹⁷ Akka afama mīshti ichapayafixō, fetsafāfe afara yopaito nō ato afaa ināmā, askara sharama. Epa Niospa noko noiai keskafakī, nō ato noima. ¹⁸ Efe yorafāfe, ea nikakōikāfe, ē mato yoinō. Fetsafo iskakani, āa chanīkani: “Ēfi yorafo noikai,” ifiaxō ato chakafakani, atokai noikanima. Akka nōfi askaramakī. Nō yorafo noisharakōixō nō ato shara fatiro.

Nō Nios nikasharax nō akiki ranotiroma

¹⁹ Akka nō ato noisharakī nō tāpitiro nō fanīrira chaka shinākīma, Jesús nōko Ifokōimāiyakē. Anori shināi nō akiki meseima. ²⁰ Nāskafixō nōko ōiti mēraxō nō shinākī iskafatiro: “Ē afara chakafaa,” ixō nō shināito Niospa noko ōi. Noko ōikī tāpia a nō shināi keskara. Nāskakē nōko chaka nō soapaiyaito nōko chaka noko soaxotiro. Nios nōko ōiti keskarama. Aato keyokōi tāpia. ²¹ Efe yora mīshtichi, ea nikasharakāfe. Nōko ōitinī nō shināi iskatiro: “Ē Nios Ifofaito ēfe chaka mā ea soaxona, mā ea shināsharamana,” ixō shināi, nō Nios fe rafetiro, nō akiki nō ranotiroma. ²² Nō askaino Epa Nios nokoki inimatiro. Nāskakē nā nō yōkai keskara noko inātiro, a noko yoiai keskaramāi nō nikasharaito, askatarimāi nō inimamasharaito. ²³ Iskafakī noko yoini:

“Ēfe Fake Jesucristo nikasharakōikāfe,” ixō noko yoini. Nāskatari a noko yoini keskai nōa ranā nō noināsharai. ²⁴ Akka a Niospa noko yoini keskafakī nō nikasharakōiax Nios fe nō rafekōitiro. Askatari Niosri nofe rafekōitiro. Epa Niospa āfe Yōshi Shara nokoki nīchini. Aōxō nō tāpitiro Epa Nios nofe ikaito.

4

Niafaka chakata Niospa Yōshi Shara noikaspai. Askatari Cristo noikaspai

¹ Efe yora mīstichi, fetsafāfe mato anorima yoiāifāfe ato nikayamakāfe. Iskafakī mato yoipaikani: “Nō mato Niospa meka yoi Niospa noko shināmanaino,” ifiakaxō anorima mato yoimisfo. Askaifono Niospa meka ōikī mā tāpitiro a yoiāifo keskara chanīmāmākī. Niospa Yōshi Sharaōxō mato yoikanimākī. Akka afokai Niospa ato afaa yoiama. ² Nāskakē ē mato yoisharai, ea nikakāfe. Fetsafāfe a Niospa meka mato tāpimasharaito mā tāpitiro. Niospa Yōshi Shara a mēra naneano yoiāito mā tāpitiro. Iskara mato yoiāito: “Jesucristo fotoni Apa ariax nai mēranoax. Nāfi yora keskara kāiniki. Aafi yorakōiki,” mato faito mā tāpitiro Niospa shināmanaino mato askafakī yoiāito. ³ Akka yora fetsafāfe anori yoiyamaifāfe nō tāpitiro afāfe Jesucristo noikaspamisfo, Niospa Yōshi Shara āto mēra naneama. Satanās ato shināmamis. Akka a Cristo noikaspai noko ano fexikani mā mā nikamis. Akka iskaratīa mā noko ano feafo, afāfe Cristo noikaspamisfo.

⁴ Akka māroko askaramakī efe yorafāfe, Niosfi mātō Ifokōikī, māfi Niospa yorakōifokī. Āfe Yōshi Shara mā mātō ōiti mēra nanea. Akka a anorima shināifo askarafoma, Satanās yōshi āto ōiti mēra nanea. Akka Niospa Yōshi Shara mato mēra naneano mā Satanās finōkōia. ⁵ Akka fetsafāfe Nios tāpiafomano, nāskakē anorima ato yoimisfo, Satanās ato shināmanaino. Nāskakē Satanās ifoafaafāfe ato nikamis Satanāsmāi āto ifokē. ⁶ Akka nōfi Niospa yorafokī. Nāskakē a Nios tāpiafāfe noko nikakōitirofō nō yoiāi anori. Akka a Nios Ifoafaafāfema a nō yoiāi anori nikatirofoma. Akka nō tāpitiro ato mēra Niospa Yōshi Shara naneano noko nikasharaifono. Ato mēra nanexō fanīrira ato shināmanima. Akka a noko nikaifoma ato mēra Satanās nanea. Satanās ato mēra nanexō fanīrira ato shināmani. Satanās chanī finakōia. Nāskax ōiti chakaya.

Niospa noko noikōi

⁷ Efe yora mīstichi, nō noinākōinō, Niospa noko ato noimanō. Nios fistichi noko shināmatiro nō ato noinō, a fistichimāi noko noikī finakōixō. Nāskakē nō ato noikōikī nō Nios tāpia nō afe yora, nōko ōiti mā noko fetsafaano. ⁸ Niospa yorafo noikōia. Nāskaxō ato noikī noko tāpimatiro. Akka a yorafo noiaifāfema, Nios tāpiafoma. ⁹ Niospa āfe Fake fisti nāmā nīchini, nāmānoax noko nāxoyonō. Nāskakē nō afe nīpaxatiro, nāatomāi nōko chaka noko soaxomiskē. Nāskakē Niospa noko ōimani afeakaxō noko noimākai. ¹⁰ Nāskakē nō Nios noi. Akka nō Nios keskarama, nō ato noikī finamisma. Nios fistichi noko noikōimis. Noko noikōikī āfe Fake Jesús nāmā nīchini noko nāxoyonō nōko chaka noko soaxoxiki.

¹¹ Akka efe yora mīstichi, Epa Niospa noko noikōi. Nāskakē nōa ranā nōri nō noināsharakōikāfe. ¹² Akka tsoa pishta Nios ōimisma. Nāskafiax nō noināino, Nios nōmēra ika. Nofe ixō yorafo noko noimasharatiro. ¹³ Niospa āfe Yōshi Shara nōmēra ikimakē nō tāpitiro nō Nios fe rafea, Nios nofe ikano. ¹⁴ Epa Niospa nai arixō āfe Fake noko nāmā nīchixonī. Āfe Fake nāmānoa nō ōipaoni. Ōipaonixakī nō ato yoimis iskafakī: “Epa Niospa āfe Fake noko nāmā

nīchixonī, keyokōi nokoōnoax nanō nōko chaka noko soaxoxiki noko ifiano nō afe ipaxanō.” ¹⁵ Fetsa iskai: “Jesúsfi Niospa Fakeki,” ixō shināi. Aafi Nios fe rafeakī Nios afe ikano.

¹⁶ Niospa noko noikōia mā nō tāpia, nō chanīmara faiyanā, Niospamāi noko noimiskē. Nō Nios chanīmara faito nofe rafexō noko yorafo noimatiro. Akka nō ato noikōiaino Nios nofe ika, afe nō rafekōia. ¹⁷ Nō Nios noi. Nō Nios noikī finakōiax nō inimatiro Jesús anā nāmā fotoano. Anā fotoxō noko iskafatiro: “Nā ea Ifofaafō tii ēfe Epa Nios ari fokani. Akka nā ea Ifofaafoma tii ēfe Epa ari fokanima, nā omiskōipakenakafa mēra fokani,” ato fatiro. Ato askafaino nōkai Nioski meseima. Nō ranoima nō afe rafekōi. Afe rafei nō Jesús keskara iki, āfe ōiti keskara nō iki. Nāskakē Jesús oaitīa nō akiki meseima. ¹⁸ Nō Nios noikōiax nō akiki mesetiro. Nōko shinā mēraxō nō Nios noikī finakōixō nō rate potatiro. Akka fētsa mesekī iskafai: “Niospa ea omiskōimani,” ixō shināi aatokai noikī finakōiama. Ato noikōiamax Nioski mesetiro.

¹⁹ Nō Nios noiyamatai noko noikī taefani. Akka noko taefakī noinikē iskaratīari nōri nō aō noi. ²⁰ Akka fetsafo iskakani: “Ē Nios noi,” ifiaxō a Nios Ifofaafō noima, anorima yoimisfo. Mā afe yorafo ōifiki atokairoko noikatsaxakakī, Niosri noisharakanima askara ōiroko fakatsaxakakī. ²¹ Niospa noko yoimis: “Ea noixō nā ea Ifofaafari noikāfe,” noko famis.

5

Nō Nios Ifofakē tsōa noko afaa chakafamatiroma

¹ Jesucristo Niospa Fakekōi. Nokoki nīchini noko nimapakexanō, nōko Ifo inō. Akka nō a chanīmara fai nō Niospa fakefo itiro. Nāskaxō āfe Apa Nios nō noixō, āfe Fakeri nō noikōitiro. ² Nō Nios noikōikī noko yoiai keskara nō nikai. Nāskaxō mā nō tāpia nō Niospa fakefori noikōi. ³ Nō Nios noikōixō āfe meka nō nikakōikī a noko yoiai keskara nō nikai nō fekaxteima. ⁴ Nāskakē nō Epa Niospa fakexō afara chakafāfe noko amapaiyai keskarakai nō atiroma. Niospa Fake Jesucristo chanīmara faxō afarafāfe noko afara chakafamapaiyai keskara nō finōtiro. ⁵ Afara chakafo noko amapaiyaiifo keskara Niospa noko amatiro. Nāskaxō Jesucristo Niospa Fake nō chanīmara faxō aōxō na chakafo nō finōtiro anā afaa chakafaxikima. Nā chanīmara faafāfe finōtirofo.

Niospa āfe Fakekōi noko ōimani

⁶ Mā nō tāpia Niospa āfe Fake feronāfakekōi ini. Nā Jesús mā maotisata faka mēra ikipakekafāta kainākafanaino, Epa Niospa yoini iskafakī: “Nafi ēfe Fakeki,” ixō yoini. Jesús naino āfe imi foaino Apa Niospa noko tāpimani āfe Fakemāiakē. Āfe Yōshi Shara chanīmisma nōmēra nanexō noko yoimis Jesús Niospa Fakekōi. ⁷ Nā trespato yoimisfo Jesús Niospa Fakekōi. ⁸ Jesús faka mēra maotisani shināta, askatari naino āfe imi foni shināta, askatari Niospa Yōshi Sharapa noko yoiaino, nānorifos nā trespa shināmisfo. ⁹ Akka yorafāfe noko afara yoiaito ato chanīmara fata a Niospa noko yoiairi nō chanīmara fakī finakōitiro. Akai yora keskarama, afi Nioskōikī. Akka āfe Fakeōnoa noko yoiaito nō chanīmara fakōitiro. ¹⁰ Akka Niospa Fake chanīmara faxō Apa Niospa aōnoa yoini keskara āfe ōiti mēraxō chanīmara fatirofo. Nāskafekē āfe Fakeōnoa yoimis keskara tsōa chanīmara fayamaxō, “Nios chanīra,” fakaxō yorafo fanīrira shināmapaikani. ¹¹ Nāskakē Nios iskamis: “Ē mato nimasharapaketiro ēfe Fake Jesúsxō,” ixō noko iskafamis. Nāskakē nō Jesús Ifofaax nō

afe n̄paxatiro. ¹² A Niospa Fake Ifofaifo afe n̄paxatirofo. Akka a Ifofaima afe n̄paxatirofoma.

Mā mekai xatekī ato yoisharani

¹³ Mā Niospa Fake chan̄imara faaki. Nāskakē ē mato kirika kenexoni, mā tāpinō mā afe n̄panaka.

¹⁴ Nō afara sharafo nō fichipaikī, a Niospa noko shināmanaino, nō Nios yoitiro kīfikī, a Niospa fichipaiyai keskafakī. Nō askakī nō tāpitiro Niospamāi noko nikasharamiskē. ¹⁵ Nāskakē nō tāpitiro a nō Nios yoiaito noko nikaito noko nikaxō noko afara in̄ātiro nō yōkaito.

¹⁶ Akka a Nios Ifofaa fētsa afara chakafaito ōikī, a Nios Ifofaa fētsa Nios kīfixotiro āfe chaka xatenō. Akka Epa Niospa ato nimatiro isharapakeξανōfo. Askafikanax fetsafāfe oa Nios Ifofaafo keskara iyokanax mā potakaxō chaka shināfafāikakī Nios kachikiri fakōinafo. Askarafokai tsōa ato nimatiroma n̄paxanōfo. Naax omiskōipakenakafo mēra fokani. Atoōnoa Epa Nios kīfixokāfe ixō ē mato yoiaama. ¹⁷ A Niospa noko yoiai keskara nō nikayamaxō nō chaka shināi. Askafixō anā nō chaka xatepaiyaito ōikī nōko ōiti noko fetsafaxotiro, nō anā chaka shināpaiyamanō.

¹⁸ Mā nō Nios Ifofaano, noko fakefai. Nō āfe fake ixō nō tāpia nō anā chaka shināpaima, māmāi noko Niospa ōiti fetsafaano. Mā nō askano Satanás afara anā noko chakafamapaiyaito, Niospa Fakekōichi Jesús noko ifixō noko kexesharatiro. Noko askafakē Satanás noko afeska fatiroma. ¹⁹ Mā nō tāpia nō Niospa fake. Akka fetsafāfe Nios nikakaspafono, afo Satanás ato shināmani āto ifo inōfo. ²⁰ Niospa Fake nokoki oni. Noko tāpimaniyoi āfe Apa nō tāpisharakōinō. Āfe Apafi mēstekōi ikaki. Akka nō Jesús fe rafeax āfe Apa feri nō rafetiro. Nā Jesucristo Niospa Fake. Nāri Nioskōi. Nāskakē noko nimapakexatiro. ²¹ Efe yora m̄shtichi, Nios fisti Ifofakāfe. Satanás mato afara chakafamapaiyaito afe rafeyamakāfe. Askatari afara chakafo mā ifofapaikī afo shināyamakāfe. Nios fisti shinākāfe.

Nā tii ē mato kirika kenexō fomai, efe yora m̄shtichi.

Ēk̄a Juan

Juan Jesús Chanĩmara Faafo Afianã Kirika Kenexõ Fomani

Juan a Nios Ifofaafõ ato kirika kenexõ ato fomani

¹ Ëkã Juan, ã Jesús Ifofaafõ ã ato kexemis ã mato kirika kenexõ fomai mã täpinõ. Mã mã täpia Niospa mato katoni afe yorafo mã inõ. Chanĩma, ã mato noikõi, eres fistima, a Jesús Ifofaafõ feta ã mato noikõi. ² Nõ mato noikõi Jesúsmã nofe rafeano. Akka mã Jesús nofe rafepakenaka. ³ Efe yorafãfe, ã mato yoisharanõ. Nõko Epa Nios feta ãfe Fake Jesús noko noikõi. Nãskakẽ noko noikõiyana nõko õiti mẽra noko inimamasharai, nõko õiti mẽra nõ inimasharakõinõ.

⁴ Mẽ täpia ã inimaifinakõi ranãri mã isharakõiaino a Epa Niospa noko yoini keskai. Nãskakẽ ã matoki inimakõini. ⁵ Ea nikakãfe ã mato yoisharanõ, mã ranã noinãkãfe. Mã mã nikamiskĩ mã mã Jesús Ifofakĩ taefanitĩa. Akka ãa shinãxõ ã mato meka fena kenexonima, mã mã nikamis. Nãskakẽ mã ranã noinãsharakãfe. ⁶ Nõ Nios noikĩ a noko yoiai keskara nõ aki. Niospa taefakĩ noko yoiaito mã mã nikamiskĩ iskafakĩ yoiaito: “Mãa ranã noinãkãfe,” ixõ noko yoiaito mã mã nikamis.

Ãa anorima yoikĩ ato pãramisfo

⁷ A ãa ato pãramisfo ato mẽra fofãsamisfo. Afãfe, “Na Jesucristo Niospa Fake Apa Nios ariax oni feronãfakekõi ixikĩ,” ixõ yoimisfoma. Afãfe ato pãrapaimisfo Cristo noikaspakata imisfo. ⁸ Mãri ato keskara iyamakãfe. Shinãfai ikãfe ato keskarama. Mã askakĩ mã ato Nios yoisharaimano täpitirofoma, fenotirofo. Akka ato Niospa meka mẽstekõi ato yoisharakõikãfe Nios täpisharakõinõfo. Nãskakẽ mãri afara shara a Niospa mato mekexona mã fitiro, mã Nios yonoxosharakĩ.

⁹ Akka fetsafãfe a Cristo noko yoiai keskara nikayamakaxõ anã shinãkanima, ãa fanĩrira shinãkani. Afokai Nios fe rafeafoma. Akka fetsafãfe a Cristo yoiai anori nikakanax Apa Nios fe rafekõikata ãfe Fake Cristo feri rafekani. ¹⁰ Akka yora fetsa matoki oxõ Cristoõnoa yoisharaima fanĩrira yoi, askara fe rafeyamakãfe. “Noko Niospa meka yoife,” fayamakãfe. ¹¹ Nãskakẽ askara yora mã chanĩmara fakĩ afe rafexõ afeta mã anorima yoitiro chaka shinãkĩ.

Mã Juan mekai xatekĩ ato yoisharani

¹² Ë mato kirika kenexõ ichapa fomapaifikĩ askatamaroko ã matoki nokopai mato fe yoinãxiki. Ë matoki nokoano nõ inima faatanãsharanõ.

¹³ Nã efe yora mĩshtichi, Nios Ifofafo nonoax ichanãmisfo afãferi. Nã tii ã mato yoi kirika kenexõ.

Ëkã Juan

Juan Gayo Kirika Kenexō Fomani

Juan feronāfake yoisharani, āfe ane Gayo

¹ Efe yorashta Gayo, ěkĭa Juan. Ě xini ichapa amis a Nios chanĭmara faafo ě ato kexekĭ. Ě mia kirika kenexō fomai mĭ tĕpinō. Ě mia noikōi.

² Yamā, ě mia noikĭ Nios kĭfixōfafĕini mĭ yonayamanō. Mĕ tĕpia mĭ ōiti sharakōi mĕ mĭ Nios Ifofasharai. Nĕskakĕ ě mia kĭfixōfafĕini mia kexesharanō mĭ afeskanōma shara mĭ inō. ³ Mĕ mia nikamis mĭ Nios potakaspakōiaito. Nĕskaxō a Ifofafo mĭ ika anoax ekeki nokokaxō ea iskafamisfo: “Nĕ Gayopa Niospa meka nikasharai,” ixō ea yoimisfo. Nĕ nikai ě mikiki inimai finakōi.

⁴ Ěfe fakefĕfe Jesŭs Ifokōifafĕe nikai ě inimakōimis. Afara fĕtsakai ea inimakĭ iskafatiroma.

⁵ Yamā, ě mia noisharai. Mĕ nika a Nios Ifofafo yora fetsafo mĭ ato kexemis mia ano nokoafĕfe, mĭ ato ĭkisharakōia, ato ōiyamafikatsaxakĭ. ⁶ Nĕskakĕ na mĭ ato kexeafĕfe noko yoitafo mia yoikakĭ. Nĕskakĕ na Nios yoiti pexe mĕranoax ichanĕkanax fanĕikani mĕ nō nika mĭ ato noikĭ, mĭ ato ĭkisharakōia. Nĕskata ě mia yoikĭ iskafai: Afara ato inĕfe Niospa meka ato yoinōfo pexe tii, Niospa meka ato yoifofĕsananōfo. Mĭ askafaino Nios mikiki inimai. ⁷ Nĕfo fofĕsamisfo Jesŭsnoa meka shara ato yoifofĕsafakani. Afara yopafkĕki a Jesŭs chanĭmara faafoma ato afaa yōkamisfoma. ⁸ Nĕskakĕ a Nios Ifofafo nō ato kexesharatiroma afara fichipaiyafĕfe nō ato inĕtiro. Nō ato askafakĭ nōri ato feta Nios yonoxomis itiro.

Yora fetsa āfe ane Diōtrefes chaka ini

⁹ A Niospa meka nikapaikani ichanĕmisfo ě ato kirika kenexō fomayamea ōinōfo. Akka Diōtrefes ea nikakaspamis, “Ě āto xanĭfo finakōia inōra,” ixō. Nĕskaxō ea ōikaspai, efe rafepaima. ¹⁰ Ea mekafakĭ chakafamis, ea yafi a Niospa meka yoimisfōri noko chakafai. Askatari a Nios Ifofafo fetsafo ato ifikaspamis Niospa meka ato yoiyamanōfo. Fetsafĕfe ato ifipaifiaifono a Diōtrefes ato ifimakaspamis. “Mĕ anĕ nofe ichanĕtiro nōno ikiax,” ixō ato chakafamis. Nĕskakĕ ě matoki nokoxō ě mato xafakĭakōi yoi kaikai mĕ tĕpisharakōinō, afeskakĭ ato chakafaimĕkai. ¹¹ Yamā, ōiti chakayafō keskara mĭri iyamafe. Akka a ōiti sharayafō keskara mĭri ife. A ato sharafamisfo Niospa fakefokĭ. Akka a ato chakafamisfo Nios tĕpimisfoma afe keskaramĕki.

Na yora fetsari āfe ane Demetrio shara ini

¹² Keyokōichi a yoisharakani Demetrioŕnoa iskafakakĭ: “Na Demetrio feronāfake sharafinakōia,” ixō yoikani. Nōri anori yoimis. Nō anori yoiaito mĭri chanĭmara fatiro, mĕ mĕmĕni noko tĕpixō.

Mĕ mekai xatekĭ Juan ato meka shara fomani

¹³ Ě mia ichapa yoipaifkĭ ě anĕ mia kirika ichapa kenexonima. Kaxō ě mia yoisharaxiki. ¹⁴ Akka ě mikiki koshi nokosharapai. Ě mikiki nokoax mefe yoinōnĕsharaxiki.

¹⁵ Mĭri isharafe, ōiti fekaxteyamaxiki. Na efe ikafĕferi mia meka shara fomapaikani. Mĭri a mefe ikafo noko ato yoioxsharafe. Nĕskakĕ nĕ tii ě mia yoi kirika kenexō mia fomai.

Judaspa Jesús Chanĩmara Faafu Kirika Kenexõ Fomani

Judaspa ato kirika kenexoni a Nios Ifofafo

¹ Èkĩa Judas, Santiago áfe exto. Nõko Ifo Jesucristo ã yonoxomis. È mato kirika kenexoni a Epa Niospa mato noikĩ mato ifini tii áfenãkõĩ faxiki. Akka Epa Niospa nõko Ifo Jesucristoõxõ mato kexesharafafãini. ² Epa Niospa mato noikĩ, mato inimamasharakõinõ mãto õiti fekaxteyamanõ, askatari mato noikĩfinakõinõ.

Fetsafãfe chanĩ fisti ato yoipaonifo (2 Pe. 2.1-17)

³ Efe yora mĩsttichi, nõko Ifãfe noko nãxoni keskara ã yoi, a noko imapaiyai keskai nõ chipo afe ixiai keskaraõnoa ã mato kenexopaifiki mẽ nika mã meka fetsa yopaito. Nãskakẽ iskaratĩa ã mato kirika kenexoni mã Jesucristo nikakõiyana mã shinãfafãinõ. Nãnori Epa Niospa áfe Fakeõxõ noko tãpimani. Nã áfe Fakeõnoa noko tãpimani keskafakĩ nã fisti nõ yopai Ifo sharafaxiki. Akka meka fetsa mato fanĩrira yoipaiyaiãfe ato nikatamaroko nã mato yoini keskara nã fisti nikakõikãfe. ⁴ Yora chakafo mato mẽra fõkaxõ anorima mato pãrakani chaka tãpimapaikakĩ. Afokai Niospa yorafoma. Akka nõ afara chakafamixakĩ nõ Epa Nios yoiato nõko chaka noko soaxonano nõ afe ipaxatiro. Nãskafekẽ nãfãfe fanĩrira chakakõĩ mato yoipaikani, iskafakĩ mato yoipaikakĩ: “Mã Jesús Ifofaxõ nã mã apaiyai keskara mã atiro, mãto áfima fe mã ikaino, kẽrofori áfe fenema fe itirofo. Nãskaxõ nã afara chaka fetsafo mã apaikĩ mã atiro. Mã askafaito Niospa mato omiskõimatiroma,” ikaxõ fanĩrira mato yoipaikani. Nõko Ifo Jesucristo fisti nikakaspamisso. Nã keskarafoõnoa Niospa shinãmanaino keneyonifo Niospa ato omiskõimakĩ finakõixii.

⁵ Akka mã mã tãpifekẽ anã ã mato yoipai nõko Ifãfe Ejipto anoa israelifo ato ifini anã omiskõinõfoma. Akka ato ififinixakĩ chipo a chanĩmara faafoma ato keyokõĩ reteni. ⁶ Nãskatari Niospa áfe ájirifo taeyoi Nios fe isharayopaonifo. Nãfãferi Epa Nios yonosharaxoyopaonifo. Nios fe isharafiakatsaxakĩ atirifãfe afara chaka shinãkakĩ anã Nios Ifofapainifoma. Askaifãfe õikĩ Niospa kaninãnã metexkereaxõ fakishifã mẽra ato nĩchiyoni. Nãskaxõ nã nikamixfoma ato omiskõimanaitĩa ato ichanãfaxõ nã omiskõipakenakafo mẽra ato potaxii. ⁷ Nã Niospa ájirifãfe afara chakafapaonifo keskafakĩ Sodoma anoafõ feta Gomorra anoafãfe a pexe rasi ano chaima ikafãferi nãskafapaonifo afara chakafakakĩ. Feronãfakãfe ato áfimafo chotaifono, kẽrofãferi ato fenemafo chotamapaonifo. Askatari feronãfakãfe ãa ranã chotanãpaonifo, kẽrofori askapaonifo ãa ranã chotanãkani. Nãskarafo õikĩ Niospa ato omiskõimani, chiifã tokiriya nai mẽraxõ atoki potani. Nã askafanioxõ Niospa noko tãpimani. Nã tãpixõ nõ tãpitiro fatorafãfe ato chaka xateyamakanax nãskarifiakani, chiifã mẽranoax omiskõipakenakafo.

⁸ Nãskarifiakĩ nã chanĩmisfãfe afara chaka fisti shinãfafãikani. Nãskakaxõ afia ato namapa õia keskafakakĩ, nãskakõĩ fakani, ato yora chakanafakakĩ. Askatari Nios nikakaspakani. Nãskakaxori Niospa ájirifori Ichamisso. ⁹ Akka Niospa áfe ájiri Miguel xanĩfokõifixõ atokai Satanãs Ichanima. Mã Moisés naano Satanãs Miguel fe feratenãni. Miguel Moisés áfe yora maifapaiãino, akka Satanãs Moisés áfe yora chakafapaixikĩ fipaini. Askafaito õikĩ Miguel

afe feratenāfikī īchanima. Yoikī iskafani: “Satanás, ē mia afeskafatiroma. Akka ēfe Ifo Niospa mia yoinō mī omiskōinō,” ixō yoini. ¹⁰ Akka nā feronāfakefāfe mato mēra fōkaxō nā afaa tāpiamafikaxō meka chaka yoim-isfo. Askatari nā apaiyai keskara fisti famisfo, nā yoināto shināsharatiroma keskarafo. Nāskaxō āa afarafo chakafakanax omiskōipakenakafo.

¹¹ Ooa. Nā Caín ini keskarafo. Caín āfe onefetsa noikaspapaoni. Nāskakē reteni. Askatari nā Balaam kori fisti fichipaiķī Nios kachikiri fani. Na yoraforti nāskaraforti. Nāforti nā Coré keskarafo. Nā Coré āfe xanīfo Moisés nikakaspapaoni. Nāskakē nikakaspaito Niospa reteni, nāskarifikī nā ato pāramisfo Niospa askari faxii omiskōimakī. ¹² Akka mā noināķī ayayanā mā pimis nōko Ifo shināyanā. Akka nā yora chakafori nāfitama mato fe ichanākaxō nōko Ifo shināmisfoma. Fetsafo noitama āakōi noimemisfo. “Nō mato yoi mato kexesharaxiki,” ifiakaxō tsōa afaa yoisharamisma. Nāfo nā nai kōi oimais keskarafo. Nō nai kōi fakish ōikī mā oi feira nō fatiro inimayanā. Akka oi iyamaino nēfe nai kōi potano nō shināchakatiro. Nā ato kexemisfo keskarafofikanax afāfe nōko Ifoōnoa tsōa tāpiama. Nāskatari nā yorafa nā ifi fimimistīa fimiyamai keskarafo. Nā ifi mā nai rafea keskarafo, mā nakē āfe tapo tsekatirofo. Nāskarifiakī nā ato pāramisfāfe tsōa ato Jesús Ifofamatiroma afe nīpaxanōfo. ¹³ Nāfo oa fakafā poo ikī fākox potatiro keskarafo. Nāskakaxō afāfe afaa shara yoitirofoma, mēxotaima afara chaka yoikani rāfimisfoma. Nāfo nā fishi keskarafo. Mā fishi nāmā pakexō, anā chaxatiroma. Nāskarifiāi nā mato pāramisfo Nios kachikiri fakanax fakishifā mēra fokani, Niospa nā keskarafo ato tāpimakī ato omiskōimakōixii anoax omiskōipakexanōfo.

¹⁴ Nāskatari Enoc chipo fakeni, mā Adán afetiāma Epa Niospa onifanino. Akka Enoc āfe xini ini Adán. Nā Enoc nā chanīmisfāfe ato pāranōpokoxiaifoōnoa yoini. Nāskata aato ato yoikī iskafani: “Nikakapo, ē ōia nōko Ifo oi, afe nai mēra ikafo fe ichapakōifo tsōa ato tanatiroma afe fexikani. ¹⁵ Nāskaxō ato yoipakexii nā niyoxō amisfo keskara. Keyokōi maitio anoafō nōko Ifoki fexikani, fatofomāki afe yorafa a afe ipanakafo ato ōinō, askayamai fatoforimāķai a chanūmara fayamakanax omiskōipakenakafo mēra foaifo. Akka nā nikamisfoma afe yorafoma. Akka nā chakafamisfo tii ato yoita, niyokaxō Nios nikakaspapaonifoōnoa yoita, keyokōichi mekafakī chakafamisfoōnoari ato yoixii,” ixō Enoc ato yoini. ¹⁶ Nāfāfe yōachepeyanā ato mekafamisfo. Nā chakafapaiyai keskara fisti shināfāfāimisfo. Askaxori fetsafo pārakaxō afara fiapaimisfo ea ināsharkanira ixō shināfāfāimisfo.

Nā Nios Ifofafo ato yoisharani isharanōfo

¹⁷ Efe yora mīshtichi, nā nōko Ifo Jesucristoōnoa mato yoimisfāfe mato yoinifo keskara shināmakiyamafāfe. ¹⁸ Iskafakī mato yoinifo: “Nōko Ifo mā chaima oaino nā Jesús Ifofaafāfema mato kaxemetsama faxikani, Niospa meka nikakaspakakī. Nāfāfe afaa shinātama nā chakafapaiyai fo fisti shināfāfāikani,” ixō mato yoinifo. ¹⁹ Nā keskarafāfe mato paxkanā fatirofo, afarafo chakafo shināfāfāikani. Askarafo Niospa Yōshi Shara ato mēra naneama.

²⁰ Akka efe yora mīshtichi, kexemesharata isharakōikāfe Niospa āfe meka shara nikakōiyanā. Nāskakē kifikāfe āfe Yōshi Sharaōxō matō imapaiyai keskara mato tāpimanō. ²¹ Nāskakē Jesús Ifosharakōifakāfe, Epa Niospa mato noikōiaito mā mā meemiski. Nōko Ifo Jesucristo noko noikōikī nō nafiakē noko nimapakenaka nō afe ipaxanō.

²² Fetsafāfe iskafakī shināifono: “Ētsa, chanīma rakikā,” ixō shināifono, fenāmāshta ato yoisharakāfe nikasharakōinōfo. ²³ Oa afara chiifā mēra pakeax koofaito, nō koshi firisafatiro keskafakī nāskarifiakī fetsafāfe afara chakafaifono ato noikī yoisharakāfe Jesús chanīmara fanōfo, chiifā mēra foyamanōfo. Akka yora chakafinakōiafori mā ato noikī ato yoisharakāfe xatenōfo, chiifā mēranoax omiskōiyamanōfo. Nāskatari nō kooyoxō rapati chakana faxō nō anā fichipaitiroma. Nāskatari āto chakafo noikaspaifo keskara iyamakāfe. Ato noikōita nā afara chakafaifo keskafakī ato feta ayamakāfe.

Mā mekai xatekī Niosnoa ato yoisharani

²⁴⁻²⁵ Nōko Ifo Nios fisti finakōia, nāato keyokōi tāpiakōia. Askatari nāato noko ifimis. Āfe kerex sharaōxō noko kexesharatiro nō fenonōma. Nāato noko inimamasharakōi nō nai mēra kai, afaa chakafamisma keskarax. Nā sharafinakōia, efapakōi, afama mīshti fatiro, tsōa atiroma keskafakī nōko Ifo Jesucristoōxō atiro. Nāskarākōi mēxotaima īpanaka. Nā tii.

Ēkīa Judas

Jesucristo Juan Ōimani Keskara

Afara afeskara ixiai anori Jesucristo Juan tāpimani

¹⁻² Efe yora mīštichi, iskaratīa ē mato kirika kenexō fomai mā tāpinō. Ēkīa Juan ē mato kirika kenexō fomai. Nai mēraxō Epa Niospa Jesucristo yoini afe keskara a inōpokoai fo nāmānoafo a yonoxomisfo tāpimaximākai. Askafaito nikakī Jesús āfe ājiri ekeki nīchia. Anoxori ea ājirinī yoinō afe keskara ikimākai nāmānoafo. Ea ōimanaito mē ōia a inōpokoai fo xafakīakōi. Askaito ōikī ē kirika kenea a inōpokoai fo anori a Niospa Jesús yoia anorikōi mā tāpisharakōinō.

³ Na ē mato yoiai ikataima. A inōpokoai ē mato yoiai na kirika ano. Nā ōikani fetsafori inimanōfo. Askatari a nikaifori chanīmara fakanax, afori inimaxikani. Nā ē mato yoiai keskai mā samamashta iki. Ea nikasharakāfe.

Juan a ichanāmisfo anofo siete Nios yoiti pexe anofo ato kirika kenexō fomani tāpinōfo

⁴⁻⁵ Nā Asia mai anofo a Nios Ifofoafo tii siete pexefo anofo ē mato kirika kenexō fomai. A ē mato yoiai anori ōisharakōikāfe. Afetiama Epa Nios niyopaofinixakī iskaratīa nia. Epa Nios nīpanaka. Āfe Yōshi Sharari afe itiani. Nāskakē Epa Nios feta āfe Yōshi Sharapa, āfe Fake Jesucristo mato noikī māto ōiti mēra mato shināmasharapainō afanā māto ōiti fekaxtefanōma. Nāskakē nōko Ifo Jesucristo Niospa meka noko yoimis chanīmakōi. Jesúsfi Niospa Fakekōifekē retenifo. Mā retexō maifafafono Apa Niospa anā otofani anā nanakama. Fato fetsa askayomisma. Nāskaxō Apa Nios fe rafexō a xanīfofo maitio anofo ato ikixii xanīfokōi ixō. Aatofo noko noikōiakī, āfe imi foax noko nāxoni Satanás chaka nōko ifo inōma. ⁶ Nō aōnoax nō Epa Nios afe yorakōi ixō noko yonomapaiyai keskafakī nō anō. Nō askai afe yorakōifo ixō nōri yora fetsafo nō kīfixotiro Epa Niospa noko nikai. Nāskarafoskōi nōko Ifo Jesucristo noko imai. Nāskakē keyokōi yorafāfe aōxō iskafakakī yoipakenakafo: “Aicho, tsoa fetsakai na Jesús keskarama. Nā fisti sharafinakōia. Ares fisti nōko Ifo nīpanaka. Ares fisti keyokōi yorafa ato ikipakenaka,” ixō yoipakenakafo. Askapakexapainō.

⁷ Ōikapo. Oa nai kōi keskara sharakōi nōko Ifo Jesús oaito keyokōi yorafāfe ōixikani. Askatari a retenifāferi ōikani, akiki rāfixikani. Oaito ōikani keyokōi yorafa a Ifofamismomofo, “¿Afeskakī nō Jesús Ifofamismamē?” ikanax ōiaixikani, shināmītsakōixikani.

⁸ Epa Niospa yoia: “Afara onifataima ē iyopaoni. Ēfi nīpanakakī. Afetiara na nōko mai keyoai eres fisti ē ato yoitiro. Nāskaxō ē afama mīшти famis. Akka ē niyopaoni. Nāskatari ē nīpanaka,” ixō nōko Ifo Niospa yoia.

Nōko Ifo Jesucristo āakōi oa namakē ōiai keskara Juan ōimani

⁹ Ēkīa Juan, ē māto ochikōi. Nāskax māri Jesús Ifofoaax mā efe yorakī. Askax mā aōnoax omiskōifikī, mā tenemis. Nāskariai ēri aōnoax omiskōifikī ē tenei. Ē Niospa meka ato yoita Jesúsnoari ē ato yoimis. Ea nikakaspakakī, āto xanīfāfe sorarofa ea achimaxō, fakafā nakirafe ea ato nīchimana āfe nāsīmā, āfe ane Patmos ano. ¹⁰ Ē mato yoinō, ea nikakāfe. Anoxō iskafani. A Jesús otoni penata, nomīkonō, Niospa Yōshi Sharapa ea ikixō a ea tāpimapaiyai ea ōimana. Oa namakē nō ōimis keskara xafakīakōi ea ōimana. Askata ea kachiorixori fāsikōi oa xāaiti keskarato ea yoiaito ē nika. ¹¹ “Nā mī ōiaifo fetsafo kenexōfe.

A kirika kenexō Jesús Ifofamisfo tii ato fomafe. A siete Nios yoiti pexe anoafō Asia anoafō ato fomafe, afāfe ōinōfo. A Nios Ifofamisfo a pexe tii Efeso anoafō fomata, Esmirnā anoafō fomata, Pérgamo anoafō fomata, Tiatira anoafō fomata, Sardis anoafō fomata, Filadelfia anoafō fomata, Laodicea anoafōfori nā mī ōiaifo ato kirika kenexō ato fomafe,” ea faa.

¹² Ea askafaito ē fesoakekafā ē ōia tsōa ea yoimākai ixō. Ē ōia siete oa rāpari efapa ōta keskara oro ē ōia. ¹³ Nāskai rāpari nakirafe feronāfake xanīfo finakōia nia keskara ē ōia. Āfe tari āfe tae fepokōia, āfe sītorari orokōi aō nonexemea ika. ¹⁴ Askata āfe foo oxokōi. Askatari āfe fero oa chii keskara xafakīakōi. (Nāskarifiakī xafakīakōi Jesús noko ōitiro a nō shināi keskara.) ¹⁵ Askatari āfe taeri chaxasharakōia ika. Āfe mekari oa oi kaya feaito nō nikamis keskarakōi. ¹⁶ Āfe pōya kayakai aōri āfe mifi kamaki siete fishi keskara ika. Āfe ana keno chainipa keskara aostamea ika. Askatari āfe femānā fafekōi oa xini nō ōimis keskara ika.

¹⁷ Nāskara ōi ē pakea, oa nai keskara. Ē askaito ōikī ea ramā āfe mifi kayakai aōxori. Ē askaito ea yoia iskafakī: “Rateyamafe. Ē Jesúski. Afara onifataima ē iyopaoniki. Ēfi anā nanakamaki. ¹⁸ Iskaratīari ē nia. Mē nafianixakī, iskaratīa ē nia. Ē anā nanakama. Ē anā afeska pishta nakama. Eres fisti ē ato namata, chiifā mēra ē ato potatiro a ea nikakaspamisfo. ¹⁹ Nāskakē a mī taefakī ōiafo kirikaki kenefe. Askatari na mī iskaratīa ōiaifori kirikaki kenefe. Askatari a chipo ixiaifori kenefe. ²⁰ Ē mia yoinō afeskai siete fishimē ēfe mēke kayakai aōri; askatari afeskai siete rāpari oro keskara otamāki. Na siete fishi mī ōiai nāato noko shināmamis siete Niospa meka yoimisfo Nios yoiti pexe mēranoa ichanāmisfo. Askatari nā siete rāpari keskara mī ōiai nāatori noko shināmamis siete Nios yoiti pexe mēranoax ichanāmisfo Nios Ifofakanax,” ixō ea faa.

2

Jesús a Ifofaafō Efeso anoafō ato yoini taekōifakī

¹ Jesús ea yoia iskafakī: “Efeso anoxō a ea Ifofaafō a ato Niospa meka yoimisto na kirika ato anexonaito nikanōfo, iskafakī kenexōfe: ‘Ēkīa mātō Ifo Jesús keyokōi yorafo ēfe Epa Niospa meka yoimisfo ē ato kexetaifaa. A ē mato yoiai anori ea nikasharakōikāfe. ² A mā ikai keskara mē tāpia, mē mato ōi. Māfi eōxō fāsi yonosharakōimiskī. Afara fetsa afeskara afaito mā tenekōimis. A yorafāfe afarafo chakafamisfo anorikai mā tāpipaimisma. Akiki mā inimapaimisma afara chakafaifono, nāskax mā ato fe rafekaspamis. Yora fetsafāferi mato yoikī iskafakani: “Cristo ea nīchia ē mato yoinō,” ixō mato yoiaifāfe, “Nō ato nikayonō,” ixō mā ato nikataifaa. Fanīrira mato yoiaito anā chanīki yoimara mā faima mē mato ōia mā askafaito. Anorima yoi āa chanīmisfo mā mā tāpia. ³ Nāskax mā eōnoax omiskōikī mā tenemis ea potakaspakī. ⁴ Mā anori shara shināfismiskē ē anā meka fetsari yoinō. Taefakī mā ea noiyoapaonixakī anā iskaratīa mā ea anā noisharaima. Mā mā ea shināmaki fetsea. ⁵ Shināsharakāfe a mā taefakī shināyoapaoni anori. A ea noikī mā taefani keskafakī anā ea noikāfe. Askatari mā ranā mā nōināyoapaoni keskakōikāfe. Akka mā ea tanaima, oa chii nokaito nō anā kēfetatiro keskafakāfe ea shinākī. Mā ea Ifofasharayamainokai chipo tsōa anā mato tanaima. Mā ichanāi ano anā tsoakai mato fe ichanāima. ⁶ Mā askafixō afara fetsa mā shara famis. A feronāfake āfe ane Nīkoraita fanīrira yoiaito nikakakī atirifāfe mato anoxō nikakaxō, afāferi chakafamisfo keskafakī ēri

ato noikaspai. A ē noikaspai keskafakī māri efeta noikaspai. ⁷ Mā pachoyakī ea nikasharakōikāfe. Niospa Yōshi Sharapa mato yoiaito nikasharakōikāfe. Satanás mato fanīrira shināmapaimiskī. A Satanás finōinifōfā ea kachikiri fatama ea Ifofasharakōiaito, aafi Epa Nios ano ē ikimaxii efe isharapakexanō, ” ixō Jesús ea yoia anori Efeso anoafō a chanīmara faafo ato ē kenexonō.

Jesús Ifofafo Esmīrnā anoafō ato yoini

⁸ Anā Jesús ea yoia iskafakī: “A ea Ifofamisfo Esmīrnā anoafō a ato Niospa meka yoimis ē yoinō ea kirika kenexōfe iskafakī: “Ēkīa mātō Ifo Jesús ē mato yoi mā tāpinō. Ea nikasharakāfe. Nā afama mīшти onifataima ē iyopaoni. Iskaratīa ē nīpanaka. Mē nayofinixakī ē anā nanakama. Ē mato nonori yoi iskafakī: ⁹ Mā omiskōiaito mē ōi. Askatari mā afaayafoma. Mā askafaiino ē mato fe ikano, ea keskarari mā shara itiro. Mē tāpia matoōnoa yora fetsafāfe meka chakayoiaifāfe. “Nō judeofo, nō Nios Ifofamis,” ikaxō yoiaifo afokai efe yorafoma. Afofi Satanás yorafoki. ¹⁰ Akka a inōpokoai ē mato yoinō. Satanás ifofaafāfe fatora fetsa fisti mato karaxa mēra ikimaxikani mā ea shināmakimānakai ōixikakī. A mato mesenifaifono rateyamakāfe. Ea shināmakitama nonori shinākāfe iskafakī: “Ea retefiaifono ē meseima, ē Nios ari kai. Ēfe Ifāfe ea potanakama. Ē efe Ifo noikī finakōifafāini,” ixō yoikāfe. Mā askax, nakē, ē mato ikipakenaka mā efe ipaxanō. ¹¹ Mā pachoyakī nikasharakōikāfe Niospa Yōshi Sharapa mato yoiaito mā Jesús Ifofakī. Fetsa omiskōifikī ea shināmakiyamaito Satanás afeskafatiroma. Nāskax naax a omiskōipakenakafo mēra katiroma,” ixō anori Jesús ea yoia a Ifofafo Esmīrnā anoafō ē ato kenexonō.

Jesús Pérgamo anoafō a chanīmara faafo ato yoini

¹² Anā Jesús ea yoia iskafakī: “A ea Ifofamisfo Pérgamo anoafō a ato Niospa meka yoimis a ē yoipaiyai anori ē yoinō ea kirika kenexōfe tāpinōfo. Iskafakī kenefe: “Ēkīa mātō Ifo Jesús ē mato yoi mā tāpinō. Ēfe meka oa keno chainipa takairafe ikikōiai keskaraxō, efe mekapas a ea noikaspaifo tii ē ato chakafatiro kopikī. ¹³ Mē tāpia a peixe rasi Pérgamo ano mā ika. A Pérgamo anoafāfe Satanás nikakōikani. Askaito ōi mā mesemisma, ea Ifosharafai. “Jesús nōko Ifokōi,” ixō mā ato yoimis. A ea Ifofamis fetsa āfe ano Antipas eōnoa ato yoimis ōikī mā reteafo noikaspakakī. Mā reteaifāfe ōifiax mā atokī meseima, mā ea chai faama. Mātō ōiti mēra mā shināsharakōi. “Noko retefiaifonokai nōko Ifo Jesús nō chai faima,” ixō mā yoimis. Anori mā shināi sharakōi. ¹⁴⁻¹⁵ Akka nāno afara fetsa a sharama ē mato yoipai. Fatora mā fetsa a Balaam afara chaka yoini keskara mā shināmakikaspai. Akka taeyoi xanīfo Balac israelifo chakana famapaini. Nāskaxō Balaam yōkani: “¿Afskaxō mī kaifo ē ato chakana famatiromē?” faito, Balaam kemani iskafakī: “Mī ato yoitiro mī fista mēra ato ikikixiki. Nā mā akai keskarari akairi anōfo. Nā nōko niosra ixō afara onifaxō a mā piāi mā ināmis. Nā israelifāfe pikanax chakananōfo mātō fista mēranoax. Askatari āto āfima fe ikanax chakananōfo,” fani. Iskaratīari nāskaratori mā fisti rasi chakanafō nā Nicolaitafāfe ato afara chaka tāpimanaifo keskara ikafo. ¹⁶ Nāskakē anā iskaratīa askafayamakāfe. Nios Ifofakāfe, anā shinākāfe. Mātō chaka xatekāfe shināmitsayanā. Akka mā chaka xateyamaito, ē matoki mamasashta nokoxō ēfe mekapa ē mato kopikī chakafatiro mā omiskōinō. Ēfe mekafi oa keno ikiai keskarakōikī. ¹⁷ Mā pachoyaki ea nikakāfe. Niospa Yōshi Sharapa eōnoa mato yoiaito, nikasharakāfe. Satanás mato chakafamapai.

Fĕtsa Satanás nikayamaxō ea kachikiri faamano, nā ē kexesharaxii nā ēfe Epa israelifo kexesharani keskafakī. Shinākapo. Epa Niospa israelifāfe āto xinifo a piaifo ato ināni fonāikaifāfe afaa piamaifāfe Epa Niospa nai mĕraxō ato pōtani oa misi keskarrafo āfe ane mānā nā pinōfo ato pōtapaoni pena tii ato noikī. Nāskafakīri nā ea chanīmara faafo ea Ifo sharakōi faifo ē ato ināxii ēfe Yōshi Shara isharapakexanōfo. Ea ōiyamafiaifono pena tii ē āto ōiti xafasharakōi faxotiro. Askatari mā ea Ifo sharafaifono isharakōiyānā mā ea chanīmara faino, akka ē mato ane fetsafaxōi tsōa tāpimisma, nā fiāi fistichi tāpitiro. Tokiri oxosharakōiki nā tokiriki mā mātō ane kenea mātō ane fena ē mato ināxii. Nāskakē ea tāpisharakōixikani. Mā ōitisharayakōi ixii, ” ixō Jesūs anori ea yoia a chanīmara faafo Pĕrgamo anoafo ē ato kenexonō.

Jesús a Tiatira anoafo a Ifofamisfo ato yoini

¹⁸ Anā Jesūs ea yoikī iskafaa: “Ea Ifofaafo Tiatira anoafo Niospa meka ato yoimis a ē yoipaiyai anori ē yoinō ea kirika kenexōfe iskafakī: ‘Ēkīa ē mātō Ifo Jesūs ē mato yoisharapai mā tāpinō. Ēfe fero oa chii xoisai keskara. Nāskakē ē mato tāpikōia. Ēfe taeri nā keno fakka fakka ikai keskara. Nāskakē ē mato yoikī iskafai: ¹⁹ ‘Mĕ mato tāpia, nā mā afara shara famis. Mā nōinākōi. Askatari mā ea chanīmara faxō mā ea Ifokōi famis. Nāskakē fetsafori mā noisharakōimis šara kexesharayanā. Mā omiskōifkī eōxō mā tenekōimis. Mā ea chanīmara fakī taefanitiā mā fetsafo sharafamis. Nāskakē iskaratīari mā ato noisharataifaa. ²⁰ Mā mā askafimiso afara fetsa ē mato yoinō a ē fichipaiyaima mā anā fichipainōma. Akka kĕro fisti mato fe ichanāxō, ‘Ē Niospa meka ē mato yoinō, ea nikakāfe,’ ixō mato yoipaikī, ēfe mekakōi mato yoima. Nā kĕro Jezabel fanīrira mato yoikī āa mato pāramis. Mā Jesūs Ifofafiamiskē mato pāramis iskafakī: ‘Māto āfimafo chotakāfe; kĕrofāferi mātō fenemafo chotamakāfe,’ mato famis. Askatari mato yoimis iskafakī: ‘Afara fetsa yora fakaxō, nā nōko niosra ixō, a mā piāi ispaxō nōko nios nō ināira ixō, ano fisti ichanāxō, mā pitiro,’ ixō na kĕro Jezabel mato yoikī mato pāramis. ²¹ A kĕromā fanīrira mato yoimis mĕ yoitaifamis anā chakafanōma. Ē yoifiaitokai āfe chaka xatepaima. ²² Ē yoifiaino ea nikayamaito ōikī ē isinī imaxii rakatsax omiskōinō. Askata a fetsafori a keskara a sharashināifoma āto chaka xateyamaifāfe ē ato omiskōimani. ²³ A kĕromā shināi keskarari shināifo ē ato retexii. Ē askafaito, ōikani a ea Ifofamisfo mai fetsafo arixō tāpitirofo ē keyokōi yorafo ē tāpisharakōia. Mātō ōitinī a mā shināi anori mĕ tāpikōia. Tsōakai afaa pishta ekeki onetiroma. Ē keyokōi tāpikōia. Nāskakē mā afarafo shara famis ē mato shara faxii kopifakī. Akka a afarafo chakafamisfo ē ato omiskōimaxii kopikiri. ²⁴ Efe yora mīshtichi Tiatira anoafāfe, mā atiri nā kĕromā mato fanīrira yoipaiyai anori mā nikamisma. Satanás ato tāpimamis keskara mā anori shināpaima. Askara shara. Nāskakē ē anā mato afaa fetsa yoima. ²⁵ Nāskakē ē anā fistiri mato yoi. Na eōnoa mā tāpimis anori shināmakiyamakāfe. Ē mato ifiyoai mā eōnoa tāpimis anori shināmakiyaiyamakāfe. ²⁶⁻²⁸ Fĕtsa Satanás finōkōixō, ea fisti Ifokōifaax mā naax nā efe nīpanaka. Ē ato xanīfo imaxii. Epa Niospa ea xanīfokōi ima keyokōi ē ato īkinō. Nāskarifikī ē ato xanīfo imatiro efeta na maitio anoafo ato īkinōfo, mitsisipakōixō. Akka a fetsafāfe ēfe meka shara nikakaspiāife nō ato omiskōimaxii. Oa nō kesho kexekai nō yamī moshaino moshituro keskara afeskaxō nō anā shara fatiroma. Nāskarifikī nā nikayospamisfo nō ato omiskōimanaitīa tsoa pishta ato timamatiroma nanōfoma. Mā penaino,

fishifā fisti fafeaito, keyokōichi yorafāfe òitirofo. Aa keskara ē anā oxii ea òisharanōfo. Ē anā nokoxō, ē ato yoixii nā ea Ifofamisfo efe isharapakexanōfo. ²⁹ Mā pachoyakī ea nikasharakāfe. Niospa Yōshi Sharapa mato yoiai keskara nikasharakāfe,” ’ ixō Jesús anori ea yoia a Ifofaafo Tiatira anoafō ē ato kenexonō.

3

Jesús Sardis anoafō a chanīmara faafō yoini

¹ Askata anā Jesús ea yoia iskafakī: “A ea Ifofamisfo Sardis anoafō a ato Niospa meka yoimis a ē yoipaiyai anori ē yoinō ea kirika kenexōfe iskafakī: ‘Ēkīa mātō Ifo Jesús ē mato yoi mā tāpinō. Niospa Yōshi Shara efe ika. Ēfi Nios yoimisfāfe āto xanīfokōiki. Ē mato yoi iskafakī: Mā ika keskara mē tāpimis. Yorafāfe matoōnoa iskafakī yoimisfo: “Nafō shara ikafo. Na Sardis anoafāfe mā Jesús Ifofakōinafo,” ixō matoōnoa yoimisfo. Mā isharamis keskara òikani. Māri shināmis iskafakī: “Nō shara ikara” ifiax mā shara ikama. Mā ea Ifofasharakōiama. ² Akka mā mā ea shināmakia. Askakakīma, anā a mā shināyopaoni anori shinākāfe. Mē tāpia Epa Niospa mato imapaiyai keskara mā isharakōiama. Ē mato yoiai keskara mā akama. Mā eōxō asharayopaoni anā iskaratīa mā anā askafaima. Mā ea shināmakipai. Nāskakē afianā ea shināsharinīfōfākāfe. ³ Nā mā ēfe meka mātō òiti mēra mā shināyopaoni keskafakī anā shinākāfe. A mā chakafamis keskara shinākakīma; ea Ifo shara fakāfe. Akka mā ea shināyamaito ē matoki samama nokorisatiro mato omiskōimaxiki. Oa yometso tsōa tāpiamano āto pexe mēra ikirisatiro keskai, ē matoki nokorisataxii mato omiskōimaxiki. ⁴ Askafiax a mato fe ichanāmisfo fisti rasi a Sardis ano ikafāfe chakafamisfoma. Nōko rapati choshtakōi nō pekaxō fatiro fetsa fena shara safexikī. Nāskafakīri atirito mā chaka shināpaoni keskara mā anā shināima, mā mā pota. Nāskaxō mēstekōi mā eōnoa shināi. Nāskaxō rapati fenasharakōi keskara ē mato òitiro. Mā askano, mā ea ano nokoaito ē mato rapati oxokōi sharakōi ināxii mā efe ipaxanō. Mā isharakōimisxakī mā efe rafepakenaka. Nā ē keskara shara ixikākī. ⁵ Tsoa ēfe meka shināmakitama ea Ifofakaxō, eōxō Satanás finōkanax afo efe isharakōipakenakafo. Afori ē ato rapati oxokōi sharakōi ināxii. Askaifāferi ēfe Epa Niospa a ea Ifofaafo tii āto ane tii kirikaki kenea. Nāskaxō āto ane kenea kirikaki a ea Ifofaifāfe tāpinōfo efe nīpaxakākī. Askaifāfe ē āto ane soanakama. Epa Nios feta āfe ājirifāfe òiaifono ē ato yoixii iskafakī: “Nafofi efe yorafokī,” ixō ē ato yoixii. ⁶ Mā pachoyakī ea nikasharakāfe. Niospa Yōshi Sharaōxō eōnoa a ea Ifofaafāfe yoiaito nikasharakōikāfe,” ’ ixō anori ea Jesús yoia a Ifofaafo Sardis anoafō ē ato kenexonō.

Jesús Filadelfia anoafō a chanīmara faafō yoini

⁷ Askata anā Jesús ea yoia iskafakī: “A ea Ifofaafo Filadelfia anoafō a ato Niospa meka yoimis a ē yoinō ea kirika kenexōfe iskafakī: ‘Ēkīa mātō Ifo Jesús ē mato yoi mā tāpinō. Ē afaa pishta chakafamisma. Ē sharafnakōia. Ēfe meka chanīmakōi. Nā fichipaiyai afama mīshti sharafo āfe pexe ano fapaoni, xanīfo David. Akka āfe pexe fepoti chamisyano tsoa ikitiroma ipaoni, chamismasax. Akka ato ikimanaino ikitirofo. Akka ato ikimayamaino tsoa ikitiroma. Nāskarari mā Nios ano ikipai mā ikitiroma ē mato ikimayamaino ēmāi chamis keskaraxō. Akka ē mato ikimanaino mā ikitiro Nios ano. Akka fetsafāfe ikikāfe mato faifono mā Nios ano ikitiroma. Eres fistichi ē mato ikimatiro. ⁸ A mā imis keskara mē tāpia. Mā yora ichapayamafixō mā

shināsharakōimis. A ē yoimis keskara mā ato tāpimatiro a mā amis keskara eōnoa. A ē yoimis anori tsōa mato xītiriroma. Yora fetsafāfe mato yoiaifo mā metsanima. Mato askafafiaifono ēfe meka mā shināmakimisma. “Na Jesús nōko Ifo,” mā ea famis. ⁹Fetsafāfe chanīkākī mato yoimisfo iskafakī: “Nō judeofo,” ixō mato yoimisfo. Afokai Niospa afe yorafoma, Epa Nios chanīmara faxoma. Afāfe Satanās ifofamisfo. Nāskakē ēfe Epa fe nō āto kaifoma. Afofi āa chanīmisfo. Shinākāfe. Nā yorafo ē ato yoimaxii iskafakī yoinōfo: “Nōkai shara shināima. Nō afama. Chanīma, Niospa āfe Fake mato noisharakōimis,” ratokonō mai chachikaxō iskafakī mato yoixikani. ¹⁰A ē mato yoimis anori mā isharakōia omiskōifikī mā tenekōimis ēfe meka nikakatsaxakī. Mā eōnoax omiskōifikī mā tenekōimis. Nāskakē mā ea shināmakimismano ē mato kexesharaxii a omiskōiai nokoaino nā maitio. Keyokōi omiskōixikani ea Ifofayamakanax. ¹¹Ē anā samama oxii matoki. Ea shināmakiyamakāfe. Mā ea Ifofakī ea chaifayamakāfe. Mā ea chaifayamaino eōxō Epa Niospa mato ināpaiyai keskara mato ināi fetsafāfe finōfoma. ¹²Fetsa omiskōikī ēfe meka shināmakitama tenekōifai ea Ifo sharakōi faxō ato Satanās finōkōia. Nāskakē a ēfe Epa Nios ika ano, ē ato imasharapakenaka. Anoax anā faki fonakafoma. Nāskakē ē afo tāpimaxii afomāi Epa Niospa yorafokē. Askaxō ē ato yoixii iskafakī: “Nono Epa Nios ikano, nofe mā ipanaka,” ē ato faxii. A Niospa yorafo, judeofo, Jerusalén ano ipaonifo. Akka iskaratīa Epa Nios ika ari Jerusalén fena. Jerusalén fena nai mēra. Nai mēra ifiax, chipo nāmā fotoxii. Akka fetsafo ea shināmakikanaxma afo ano ipanakafo. Nāskakē fotoxō ēfe Epa ane ē atoki nētaxii. Askatari Jerusalén fenapa aneri ē atoki nētaxii. Askatari ēfe ane fenari tsōa nikayomisma ē atoki nētaxii keyokōichi tāpinōfo ē āto Ifokē. ¹³Mā pachoyakī ea nikasharakōikāfe. A Niospa Yōshi Sharapa ato shināmanaino yoiaifo anori nikasharakōikāfe,” ixō Jesús ea anori yoia a Ifofafo Filadelfia anofo ē ato kenxonō.

Jesús Laodicea anofo a chanīmara fafo ato yoini

¹⁴Askata anā Jesús ea yoia iskafakī: “A ea Ifofafo Laodicea anofo a ato Niospa meka yoimis a ē yoipaiyai anori ē yoinō ea kirika kenexōfe iskafakī: ‘Ēkīa mātō Ifo Jesús ē mato yoi mā tāpinō. Epa Niospa ea amapaiyai keskara ē fakatsaxakī āfe meka yoinō. Epa Niospa yoipaiyai keskara ē keyokōi yoimis. Ē chanīkima yoimis. Epa Niospa onifani tii keyokōi ēfi āto xanīfokōikī. Ē mato iskafakī yoi: ¹⁵⁻¹⁶Mā amis keskara mē tāpia. Ea kachikiri fayamakaxō akka askafixō ē mato amapaiyai keskara mā fichipaikōiama. Askara sharama. Afara matsishara nō nīskakī nō inimayanā nō ayatiro. Askatari afara xana shara mā matsikē nō inimayanā ayatiro. Askafixokai afara katsa nō inimayanā ayatiroma. Katsa meei nō anāpaketiro. Nāskarifiāi ranāri yorafo afara xana keskarrafo. Ea Ifo sharakōi fafo. Akka ranāri afara matsi keskarrafo. Ēfe meka tāpisharafoma. Ē atoōnoax rafaanā ikōini. Askafixakai mākai xana yafi matsi keskarama. Mā katsa keskara. Afara katsa meekī nō anāpaketiro keskara ēri mato askafai. Nāskakē ē mato potaxii oa ē anāpakeai keskafakī. ¹⁷Akka mā yoimis iskafakī: “Ē afara ichapaya. Ē afaa yopaima. Ē Niospa mekari tāpifinakōia,” ixō, anori mā yoifiax mā tāpiama mā chaka imis. Ooa. Ea mā yopafikī mā kakapaimis. Niospa āfe Yōshi Sharapa mato imapaiyai keskara mā ikama. Mā katsa keskarakī. Mā imis keskara mē tāpia. Akka ēkai askara fichipaima. Askafixō ē matoōnoa shināi keskara mākai tāpiama. Mā nā fēxo keskarrafo. Fēxo afara ōitiro.

Nāskarifiāi māri ēfe mekakōi nikasharamisma. Mā yora chitoria keskarāfo. Akka mā tāpiama mā chitoria keskara. Yora chitoriato rapati yopai chitoria ixikima. Nāskarifiāki mā ea yopaima keskara ea yopafiki. ¹⁸ Akka ē mato yoisharapai mā afara chakafamis keskara mā anā anōma. Ea yōkakāfe ē mato tāpimanō afeskax mā ea keskara itiromākī. Eres fisti ē mato imasharatiro. Akka mā chitoria keskara. Akka ē mato rapati safemasharatiro mā anā rāfinōma. Akka rapati ē mato yoitamaroko mā afara chakafamis ē mato yoi. Akka ē mato ōiti fetsafaxotiro ea keskara shara mā inō. Akka a afara mā chakafamis ē xafakīa ōia. Mā fēxo keskarakōi imis. Nāskakē ea yōkakāfe ē mato sharafanō, ēfe meka ē mato tāpimasharanō. ¹⁹ Akka ē mato noiyamakī ē anori mato yoikeranama. Askatamaroko ē mato keyokōi noikōi. Nāskakē ē mato omiskōimatiro tāpimakī mā chaka xatenō. Nāskaxō nāfori ē ato yoisharapai ea Ifo shara fanōfo. Akka a mā chaka shināmis keskara anā shināyamakāfe. Iskaratīa ēfe meka nikakōikāfe ē mato yoiai keskara axikakī māto chaka xatekāfe. ²⁰ Shinākapo efe yora mīshtichi. Akka a yora pexe mēra ikipaiikī ikisi pexe ifo kenatoshitiro pexe ifāfe ikimanō. Nāskarifiāi ē mato ano nokoxō mato yoikī iskafaxii: “Ē mefe rafepai,” ixō ē mato yoimis. Fētsa āfe shinā mēraxō ea nikaxō ea yoi: “Ifo, emēra ikife. Ē mia fichipai,” ixō anori yoiaito ē a mēra ikiax ē afe rafei. Ari efe rafei. ²¹ Fētsa afara chakafakī xatexō ea Ifosharafai nā ēfe Epa Nios ika ano efe ipasharatiro. Nāato Satanās finōa. Ēfi xanīfokōikī ari efe xanīfo itiro. Ē Satanās yafi niafaka chakafo finōkōia. Ēfe Epa Nios ika ano afe xanīfokōi ē ika. Nāskarifiāi fētsa āfe chaka kachikiri fakī, ea Ifosharafaxii ē ika anoax ari efe xanīfo ipaxatiro. ²² Mā pachoyakī ea nikakāfe. Niospa Yōshi Sharapa ea yoiai keskara nikasharakāfe,” ixō ea anori Jesús yoia a Ifoafafo Laodicea anoāfo ē ato kenexonō.

4

¹ Akka nā ea taefakī yoia, mē kenekī mitoano, ea anā yoiaito ē nika. Ea iskafaito ē anā ōia nai mēraxō oa pexe fepoti fepekemea keskaraxō. Ē nika afia ē nika keskara xāaiti āfe oi efapa keskarato ea yoia anā ea iskafakī: “Niri ekeki māpeferafe,” ea faa. Oa namakē ōia keskara ē ōia ea iskafaito: “Nafō ē mia ispanō nafo afarafo chipo ixiaifo ē mia ispanō,” ea faa.

² Ea askafaito samama Niospa Yōshi Sharapa ea ōimana āfe tsaoti efapa sharakōi ea ōimana a xanīfāfe tsaoti ano tsaokē ē ōia. ³ A ē ōimismafo ē ōia sharakōifo. Nāskakē ē tāpia. Nioskōiromomē ē faa. Askaito ē ōia fafesharakōiaito. Iskara ē ōia. Tokiri rafe āto ane jaspe fe cornālinā nā rafesharakōi fakka fakka sakōini. Nāskara āfe femānā ē ōia. A āfe tsaoti ano oa nāfa fai nana keskara ē ōia fafesharakōiaito. ⁴ Nā nōko Ifo tsoao ano a kematai veinticuatro tsaotifo ē ōia. A tsaoti kamaki feronāfakēfo tsoafo ikafo. Nā feronāfakēfo Jesús Ifofamisfo ikafo. Afāfe nā ato chanīmara faifo ato kexemisfo ipaonifo. Āto rapati oxo sharakōifo māmāi ato Niospa āfe chaka soaxonikē. Askatari xanīfāfe maiti keskara oro sharakōi safeafo ika. ⁵ A āfe tsaoti anoax kana peeitaitani oa kana piishikai keskara a mēranōa ē nika. A fesoa anori siete rāpari xofisaito ē ōia. A ē ōiaino Epa Niospa ea shināmana iskafakī: “A Epa Nios tsoano rāpari otaito ē ōia keskara, nāskarifikī Epa Niospa āfe Yōshi Shara nokoki nīchiarokomē nofe rafenō,” ixō ē shinā.

⁶ Askatari a fesoa anori oa fakafā keskara fakka fakka ikaito ē ōia, oke mēra xafakīakōi ika. Askatari a nōko Ifāfe āfe tsaoti ano a onifanifo cuatro ano niafo ika. Askai fero ichapayafo. Takairafe fero neeafo. ⁷ Oa poomā femānā keskara fetsa ita, fetsari oa fakka fene femānā keskara ita, fetsari oa

yōra femānā keskara ita, fetsari oa tete yoyai keskara ika. ⁸ Askakani āto pei ichapa seis ika, fisti rasi pei ichapayafo. Askai āto fero rasi ato neei fetsea ika. Penachāi fanāita, fakishchāiri fanāiki xatepakenakafoma. Fanāiyanā iskafakani:

Sharafinakōia, sharafinakōia, sharafinakōia, nōko Nios sharafinakōi. Nōko Niospa afama mīshti famis nā apaiyaifo. Epa Nios niyopaofinixakī, nāskakē iskaratīa nia. Askatari Epa Nios afeska pishta nakama, ikax fanāikaifo.

⁹⁻¹⁰ Nāskakē aōnoax fanāikafo iskakani: “Epa Niosi, mī fisti nōko Ifo. Fato fetsakai na mī ikai keskarama. Mīfi nīsharapakenakaki. Mī sharakōi. Mī afaa pishta chakafamisma. Mī askaito nō mia Ifofasharakōi. Aicho Epa Niosi. Fato fetsakai mia keskarama,” ixō Nios fanākafo. Mā askafono nā Jesús Ifofamisfo veinticuatro xanīfofo nōko Ifo Nios āfe tsaotiki tsaono a nāmā feopakefofānafo. Feopakefofākata, āto maiti tsekakata feofafo Nios nāmā māmāi askafakatsaxakakī. Nāskaxō yoiāfo iskafakakī: “Nōko Ifo Nios mī noko maiti inā keskari fakī nōri miari mini. Mī noko ināfikē nō mia fāsi noikī na maitifo nō mia mini. Meres fisti mī noko ikitiro. Mī noko ifimis. Akka mī nōko Ifokōi itiro. ¹¹ Mī afaa chakafatamaroko mī sharakōifamis. Akka mīōnoa fisti nō yoitiro iskafakī:

Mī nōko Ifokōi. Mī nōko Nios. Tsoa fetsakai mia keskarama shara. Mī isharapakenaka. Mīkai afaa chakafamisma. Nāskakē nō mia fāsi noi. Mī shināmās mī afama mīshti fatiro. Mī keyokōi onifani. Mī apaiyai keskara mī keyokōi onifani ato nimapakexakī,” ixō nā Jesús Ifofamisfāfe veinticuatro xanīfofofāfe yويمisfo.

5

Jesús kirika kataramea tsomaxō ato yoiyoni afeskaximākai chipo

¹ Askata ē anā ōia oa ēfe namapa ōia keskara nā ē mato yoinō. Nā mifi kayakai aōri nōko Ifo Nios tsaono ē ōia kirika kataramea takai rafe kenea ē ōia, siete taxtati aō neekē. ² Niospa ājiri finasharakōia ē ōia. Fāsikōi mekayanā iskafakī yoiā: “Na kirika taxtatini taxta afeskaxō tsōa ōitiro. Nā xanīfo afaa chakafamisma fistichi fēpetiro ōixii. ¿Fato xanīfāfe afaa chakafamismato fēpetiromē nō ōinō?” ixō yoiā.

³ Askafixō tsōa fēpetiroma nai mēranoa ikafāferi fēpetirofoma. Askatari a nāmā ikafāferi, Niospa ājirifāferi fēpetirofoma a mēra ōixikakī. ⁴ Nāskakē ē oiāi finakōiyanā iskafakī yoiā: “¡Ooa! Xanīfo afaa chakafamisma tsōa fichiama na kirika noko fēpexopanā a mēra nō ōipanā,” ixō ē shinā. ⁵ Askata nā veinticuatro xanīfofofāfe Jesús Ifofamis fētsa ea iskafaa: “Oiyamafe. Ōipo. Nōko Ifo oa ono nia. Cristo fisti nōko xanīfo finakōi. Afama mīshti atiro. Tsoa a keskarakōima. Nōko xinifāfe āto xanīfo ipaoni David āfe fena Jesús. David xanīfo finakōia ipaofinikē, Jesús finōkōia. Keyokōi ato finōa. Satanās finōta, a xanīfo fetsafori ato finōkōia Jesús. Iskaratīa nono Epa Nios fe ika. Nāskakē na siete taxtati Jesús noko fēpexotiro nā kirika nō ōinō. Nāskakē anā oiayamafe,” ea faa.

⁶ Nāskakē nānoa ovejanā fake ē ōia āfe māxo sieteya, āfe ferori nāskara ika. Reteafo keskarafix Niospa tsaoti ano nia ika. Nānoa nā Niospa onifani cuatrofo feta a veinticuatro Nios Ifofafo xanīfofofāfe foaketefayakenafo ika. Tsoa fetsakai a keskarama. Nāato afama mīshti fatiro. Nā fero sietefāfe noko shināmani Niospa āfe Yōshi Shara nīchiano keyokōi nā maitio ano inō. ⁷ Akka Epa Niospa nā kirika āfe mifi kayakai aōri tsomakē Jesús fīa. ⁸ Fīxō tsomano

nā cuatro Niospa onifanifo fe nā veinticuatro xanifofo Jesús Ifofamisfo a nāmā feopakefōfānafo. Nāfāfe maneti yafi kechofo tsomafo. Nā kechofo oro fakka fakka ikai keskara mēranoax otano āfe kōi nofe nakas shara nai mēra foai keskara. Nāskarifiāi nā Nios Ifofamisfāfe kīfiaifono Epa Niospa nikamis. ⁹⁻¹⁰ Akka nā fanāikaifo tsōa nikayomisma fanāikani, iskakani:

Mī afaa chakafayamafiamiskē mia retenifo. Mī noko nāxoni, mī imi foni Satanás anā nōko ifo inōma Epa Nios āfe fakefo nō inō. Nāskakē mī fistichi fitiro kirika kenea fēpexiki noko tāpimaxiki. Mīōnoax nā mia chanīmara faafo tii maifo tii anofo Niospa yora itirofo meka fetsa fetsatapafāfe mekakani. Nāskakē nāfāferi fetsafo mī meka shara ato tāpimanano, mī ato amapaiyai keskara anōfo. Askatari nā maifo tii anofo xanifo mefe ixikani, ikax fanāikafo.

¹¹ Askatari ē ōia Niospa ājirifo ichapakōifo tsōa ato tanatiroma ichapakōi fanāikaifāfe ē ato nika. Nios xanifo tsaoti ano nā Niospa onifaa cuatrofo fe nā xanifofo veinticuatrofo feta nakifayakenafo. ¹² Fāsikōi fanāikani iskafo:

Niospa Fake Jesús oveja fake keskara yorafo nāxōa āto chaka soaxoxikī. Akka keyokōi nā maitio anofo ato ikitiro, keyokōi nai mēranoafori ato ikitiro, nōko mai anoafori āfenā, keyokōi tāpikōiakī, afama mīshti atiro, keyokōichi mī sharakōira fapanakafo. Mī fisti nōko Ifo itiro. Aicho, mī nōko Ifo mī isharakatsaxakī mī nīpanakara, ikax fanāikafo.

¹³ Askata ē nika keyokōi nai mēranoafo tii fanāikaifono, mai anoafori fanāikaifono ē nika. Mai mēranoafori ē nika. Fakafā anoafori fanāikaifono iskakani:

Epa Nios āfe tsaoti ano tsoafo, āfe Fake Jesús oveja fake keskara, nā rafe nōko Ifo isharakōimifso. Keyokōichi mā sharakōira ato fapanakafo. Mares fisti mā nōko Ifo itiro. Mā afama mīshti atiro. Nāskara mā īpanaka, ikanax fanāikafo.

¹⁴ Askatari nā cuatro Niospa onifafāfe yoiāfo iskafakakī: “¡Aicho! Askapainōra,” fata, nā veinticuatro xanifofo Nios nāmā feopakefōfānafo. Afāferi Epa Nios yafi Jesús yoisharakani.

6

Nā siete taxtati

¹ Nāskata ē namakē ōiai keskara ē anā ōia. Jesús oveja fake keskara nāato noko nāxoni nāato nā kirika āfe taxtati fisti fēpeaito ē ōia. Fēpeaino ē nika nā cuatro Nios onifaa fetsa fāsikōi mekaito nai tiri ikai keskara: “Niri ofe,” ikaito.

² Askaino kamayo oxo chaima nia ē ōia. Nā kamayo kamaki fētsa kati tsomax tsoano xanifāfe maiti Niospa maimana. Nānoax kamayonō kaa fetsafo ikipai xanifo ixiki. Tsoa pishtakai nētefatiroma.

³ Askata Jesús anā kirika taxtati fetsa fēpea. Fēpeaino nā cuatro Niospa onifani fetsa ē nika iskaito: “Niri ofe,” ikaito.

⁴ Nāskafaino kamayo fetsari ōshi nokotoshia. Nā kamayo kamaki tsoafo fetsari ē ōia. Keno chainipa Niospa inā aya katanō maifo tii anofo ato shināmatanō anā isharanōfoma noikaspa faatanākanax retenānōfo.

⁵ Askatafata Jesús anā kirika taxtati fetsa fēpea. Fēpeaino nā cuatro Nios onifaa fetsa ē nika iskafakī yoiāto: “Niri ofe,” ikaito. Anori yoiaino kamayo fetsa fisokōi nokotoshiaito ē ōia. A kamaki tsoafo aō kilo tanati tsomax. ⁶ Nā cuatro Niospa onifani anoax mekaito ē āfe meka nika iskaito: “Kori texe

fayamanō, feronāfāke pena fisti yonoxō kori fixō trigo kilo fisti fikī kopifatiro. Askayamakī tres kilo xiki fitiro. Kori texefayamaxō afaa fetsa fitiroma. Nāskakē xini yafi nā uva fimi ene chakanafayamafe. Akka mā texefayamax mā fonāiki omiskōixii,” ixō yoia.

⁷ Askata Jesús anā kirika āfe taxtati fetsa fēpea. Fēpeaino ē nika na cuatro Nios onifani fetsa, “Niri ofe,” ikaito.

⁸ Anori askafaino kamayo fetsa pāshikōi nokotoshiaito ē ōia. Nā kamayo kamaki fetsa tsoa ika āfe ane Ato Namamis. Nāato yorafo namatiro. “Ē yorafo namapaira,” faito, “Ēje. Mī ato namatiro,” Niospa faa. Askafaito nā ato namamisto yora fetsafoya ato retenāmai. Akka atiri ato fonī namai, atiri pae fetsa fetsatapafāfe ato namaxii, atiri yoinā pōfefāfe ato yokakani. Akka yora kayakōi ato namaxiai ē ōia tsōa ato tanātiroma.

⁹⁻¹⁰ Nāskata Jesús āfe kirika taxtamea anā fēpea. Fēpeaino nā Niospa meka ato yoifofāsafaifono fetsafāfe ato retefinifono mā otoafo ē ōia. Epa Nios kīfiti mīsa ano nā Jesúsnoax nanifo āto fero mēshofo ichanākanax fāsikōi mekaito ē nika iskai mekaifono: “Nōko Ifo Nios, mī keyokōi tāpikōia. Mī afama mīshti fatiro. Mī shara famis. Mīkai afaa chakafayomisma. Mī chanīmakōi. Nā mia chanīmara faafāfema mai anoafāfe noko retemisfo. Nāskakē, ¿afetīa mī ato kopimē omiskōimakī?” ixō yoiaifāfe ē nika. ¹¹ Nāskakē nōko Ifāfe yoia isfakī: “Manayokāfe. Fena fena kakīma. Fetsafori mato keskarafori eōxō yonomisfo ixikani. Nāfori eōxō nā yora chakafāfe ato retexikani. Akka mā ato retekī mitoafono mā nakanax mato ano nokoxikani keyokōi. Nāskakē nā ato retemisfo ē ato kopixii ato omiskōimakī omiskōipakenakafo mēra ē ato potaxii afaramāi chakafamisfokē,” ixō nōko Ifo ato yoia. Ato yoita rapati oxosharakōi chainipa ato inā, nāfāfemāi taeyoi nikanifono nā Epa Nios Ifofasharamisfo tii ato inā.

¹² Askata Jesús anā kirika āfe taxtati fetsa fēpeaito ē ōia. Fēpeaino fāsikōi mai naya naya ika. Xini anā pee iyamaino, rapati fisokōichi fēpoa keskara ika, fakishkōi. Oxeri ōshikōi imi keskara ika. ¹³ Oa nefe kerexepato nokoki nefekī fana fimi yome mīshti niriatiro keskara. Nāskarīfai fishifo nai mēranoax mai ano pakei fetsea. ¹⁴ Askatari nai katarameake kafākē ē anā ōiama. Māchifā fe mai toomāfā mai naya naya ikaino, anā ano ikama. ¹⁵ Nāskakē keyokōi mai anoafō ratekōiafo. Yorafāfe āto xanīfofori sorarofāfe āto xanīfofori ratekōiafo; afama mīshtiyafori, yora mitsisipafori, āto yonomatifori, fetsafori ifomaisfori keyokōi nāfo ratekōiafo. A tiiri mafa kini mēra ikiafo. A tiiri māchi keya ano ichoafō tokirinīfā nāmā oneafo. ¹⁶⁻¹⁷ Askata fiisikafo iskayanā: “¡Ooa! Epa Nios nai mēra ikato āfe Fake Jesús fe iskaratīa nokoki ōitifishkikōina. ¿Nō afeskatīromē omiskōiyamaxikī? Tsōakai Nios timamatiroma noko omiskōimayamanō. Nā māchi keya anoa tokirinīfā nokoki pakepainō Niospa noko fichinōma nō omiskōinōma,” ixō nā nikakaspamisfāfe yoiafo.

7

Niospa ciento cuarenta y cuatro mil afe yorafo kexexii

¹ Nāskata ē anā ōia oa ēfe namapa ōia keskara nā ē mato yoinō. Niospa āfe ājiri cuatro afe nai mēra imisfo ē ōia. Fetsa xini oaikiri nia, fetsa xini kaikiri nia, fetsa xini oaima anori nia, fetsa xini kaima anori nia. Askano nefe nishpapapekafana. Nefe nishpapapekafanaino keyokōi maifo tii anoa nii peifo takka takka ikama. Fakafāri anā poo ikama. ² Nā cuatro Niospa

ato yoiaito mai yafi fakafā chakafatirofo. Askata Epa Nios nipanakato āfe ājiri fetsa ē ōia xini oaikirinoax oaito, nōko Epa Nios āfe marakka fati feaito, a afe yorafo aō marakka faxii keyokōichi tāpinōfo Niospa afe yorafokē. Nā Niospa ājiri okī nā cuatro Niospa ājiri fetsafori fāsikōi ato yoia iskafakī: ³ “Manayokāfe, nā Nios Ifofamifso ikisi āto femānāki āfe anefo keneyonō nāfāfe Nios yonoxomisfoki keyokōichi tāpinōfo. Nāskakē fena ato chakana fayamakāfe. Mai anoafo fakafā anoafori, iffo ato chakana fayamakāfe. Chipo ato axikakī,” ixō ato yoia.

⁴ Akka ē nika mā Niospa ājirinī mā ato marakka faano ciento cuarenta y cuatro mil judeofāfe femānāki. ⁵⁻⁸ Nōko xini Israel āfe fakefo feronāfakefos doce inifo. Ato iyoakōichi āfe ane Judā. Judā āfe pefeta Rubén. Rubén āfe pefeta Gad. Gad āfe pefeta Aser. Aser āfe pefeta Neftalí. Neftalí āfe pefeta Manasés. Manasés āfe pefeta Simeón. Simeón āfe pefeta Leví. Leví āfe pefeta Isacar. Isacar āfe pefeta Zabulón. Zabulón āfe pefeta José. José āfe pefeta ato chipo fakekōi Benjamín. Nā doce feronāfake fisti rasi paxkakanax mā kaiafono nā doce feronāfake anoa Niospa ato katoní. Fetsa anoa doce mil faxō ifta, fetsa anoari doce mil faxō ifni. Nāato askafakī fetsa doce mil faxō ato ifiketsani. Nāskakē mā afo yoisikanax ciento cuarenta y cuatro mil inifo.

Yorafā rasikōichi rapati oxokōi safeafo

⁹ Askata Epa Nios fe āfe Fake Jesús nā oveja fake keskara nā tsaofa ano yorafā rasi niafo tsōa ato tanatiroma. Nā maitio anoafo fisti rasi anoafo, xoko fetsafo, meka fetsayafo ikafo, rapati oxokōi chainipa safeafo ē ōia fisti rasichi epe pei tsomafāfe. ¹⁰ Nāfāfe fāsikōi yoiafo iskafakakī:

Nōko Epa Nios feta āfe Fake Jesús noko ifimis nōko Ifo Jesús oveja fake keskara nokoōnoax nani nōko chaka noko soaxoxikī nō afe nīpaxanō, ixō yoiafo. ¹¹⁻¹² Nāskata nōko Ifo xanīfāfe tsaoti ano tsaono āfe ājirifāfe foaketi fayakenafo ikafo. Nāskakē nā veinticuatro xanīfofo fe nā Niospa onifanifo cuatrofo nōko Ifo tsaono tsaofa ikafo. Nāskafono nā ājirifo nā nōko Ifo tsaono ratokonō mai chachipakefōfākanax feopakefōfānafo Nios yoisharakakī iskafakakī:

¡Aicho! Chanīmakōi, meres fisti mī isharapakemis. Meres fisti nokori mī imasharatiro. Mī keyokōi tāpia. ¡Aicho! Nā nō yopai keskara mī noko axomis. Keyokōichi sharakōi mia fapanakafo. Mī afama mīshti fatiro. Mī nāskapakenaka. Nāskaroko anōkī,

ixō yoiafo.

¹³ Nāskata nānoa xanīfo fētsa ea yōka: “¿Na yorafo rapati oxo chainipa safeafo tsoamē? ¿Fakiax feafomē, mī tāpīamē?” ixō ea yōka. ¹⁴ “Maa. Ēkai tāpīama. Mī tāpia. Mī ea yoitiro,” ē faito ea yoia iskafakī: “Yorafo omiskōiaifono na yorafori fāsi omiskōinifo. Akka omiskōiaifono Niospa āfe Fāke Jesús ato nāxoni āto chaka ato soaxoxiki. Ato chaka soaxō mā ato imasharakōia. Nāskakē ato rapati oxo shara safemana. ¹⁵ Nāskakē Epa Nios ano iskaratīa afe ikafo. Epa Niospa ato yonamana keskara axopakenakafo. Nāskakē ato kexefafāini afara chaka atoki nokoyamanō. ¹⁶⁻¹⁷ Niospa āfe Fake Jesús Epa Nios fe imis. Nāato ato kexepakenaka. Nāskakē anā fonāitama, anā nomipakenakafoma. Xinīri anā ato pipanakama. Jesús ato kexeaino inimapakenakafo. Epa Niospa āto ōiti ato fepeaxoxii anā oianōfoma,” ixō ea yoia.

8

Nā taxtati mā keyoaino Jesús fēpea

¹ Mā kirika āfe taxtati keyoano Jesús fēpeaito ē ōia namakē ōiai keskara. Nā seis taxtati taefakī fēpeyoa. Akka iskaratīari fetsari fēpea mā keyoaino. Fēpeano Nios ika ano nai mēranoax keyokōi nishparakafo. Media hora nishparakayofo. ² Nishparakaifono ē ōia Niospa āfe ājirifo siete a ketaxamei niafāfe, nāfāfe Niospa ato yoimis keskara anōfo. Niospa ato tii maneti inā nā ato yoiaifā āto maneti chāi chāisafanōfo. ³ Askata Niospa ājiri fētsa sapa oro fakka fakka ikai keskara tsomax Epa Nios kīfiti ano nia ē ōia. Akka fētsa sapa kamaki nakas otaxō naneaito ē ōia. Nāskaxō Nios kīfiti mīsa ano oro kamaki sapa faa. ⁴ Askano āfe kōi nakas shara nai mēra foa āfe mifi kamaki sapa tsomano. Nāskarīfai Niospa yorafāfe kīfiaifono Epa Nios ika ari nokoaito nikatiro. ⁵ Akka ē anā ōia Epa Niospa āfe ājiri yoiaino, mīsa kamakinoa chii fixō āfe sapa kamaki chii fospi faa. Fospi fata nai mēraxō mai ano pota. Askaino mai anoax nai fāsikōi tiiri ika pachakōi ika, kanari piishika mairi naya naya ika. Nāskakē nā chanīmara faafoma tii ato omiskōimaxii.

Ājirifāfe maneti chāi chāisafafo

⁶ Askata Niospa āfe ājirifāfe siete nā manetifo Niospa ato tii inā itip-inīsharafafo chāi chāisafaxikāki.

⁷ Askata fētsa āfe maneti chāi chāisafaino faka matsi tokoro efapafō imia osia nai mēranoax keyopakea. Chiiri imiya osia nai mēranoax mai ano pakea. Māifā kaxe fetsa koofi keyoa ififofo. Akka ranāri texea. Akka fasifo kooi keyokōia.

⁸ Askata Niospa ājiri fētsa āfe manetiri chāi chāisafaino machi efapa chii xoisai keskara Niospa nai mēraxō nāmā pota. Fakafā mēra pakea. Askaino fakafā kaxke fetsa imi keskara ika. ⁹ Nāskakē fakafā mēranoax fafīfo ranāri nafo. Askatari kanōanāfāfori ranāri koofo.

¹⁰ Askata Niospa ājiri fētsa atori āfe maneti chāi chāisafaino fishi efapakōi xofisai chii keskara nai mēranoax pakea fakafo mēra. Akka faka fetsafo mērari pakeama. Askatari faka poyo poyo ikai ano pakea. ¹¹ Nā fishifā āfe ane Mokara famisfo. Nā fishi faka mēra pakeano, faka moka paekōi ika. Nāskakē nā faka ayakanax yorafō ranāri nai fetsefo.

¹² Askatari Niospa ājiri fētsa āfe manetiri chāi chāisafaino xinī anā chaxasharama. Ōxeri anā chaxasharama. Askatari fishifāferi anā ranārito chaxasharama. Nāskakē penafekē tsōa anā ōisharatiroma. Fakish finakōia ika. Tsōa askara fakish ōiyomisma.

¹³ Ē nāfo ōiaino tetepafā keskara keya yoyaito ē nika. Fāsikōi mekayanā yoia iskafakī: “¡Oal Yorafāfe Nios nikakaspakanax omiskōikani finakōixikani. Niospa ājiri tres fetsafāfe āto maneti chāi chāisafaifono mai ano ikafo omiskōifinaxikani,” ixō tetepafā keskarato yoia.

9

¹ Askatari Niospa ājiri fētsa āfe maneti chāi chāisafaino nai mēranoax oa fishi keskara nāmā pakeaito ē ōia. Nāskata nā niafaka chakafo kinīfā fakishifā mēra ikafo ano kaa. Nā kinīfā fepotiya. A mēranoaxkai kāitirofoma. Akka nā nai mēranoax nāmā pakea Niospa chavis inā aato kinīfā fakishifā mēranoa ato kāimanō. ² Fēpeano mafa kinīfā mēranoax kōinīfā nai mēra foa. Nāskakē xinī chaxasharama. Nai fakishkōi ika. ³ Askata nā kōinīfā mēranoax kōketsere keskara ichapa rasi mai ano fotoa. Niospa ato pōfekōi ima nifo keskara

inōfo. ⁴⁻⁵ Ē nika iskaito: “Mai anoa fasifo fanafo ififo chakana fayamakāfe. Akka nā Niospa yorafo femānāki keneafō, ato tekayamakāfe. Akka nā keneamafo mā ato tekatiro. Akka ato reteyamakāfe. Ato retetamaroko cinco oxe ato amakāfe ato omiskōimākī,” ixō ato yoia. Nāskakē kōketserefāfe ato tekafo nā chanīmara faafoma nifo keskara paekōi meafō omiskōiafo. ⁶ Nāskakē kōketserefāfe cinco oxe ato omiskōimana nā chanīmara faafomafo napaixikani, tenetirofoma mekani. Askafikanax nakanima.

⁷ Iskaratīa na kōketserefo afe keskaramākī ē mato yoinō mā tāpinō. Kamayofō itipinī faax a kamakī tsaofax katiro fetsafo reteikai. Nāskarīfai na kōketserefo nā kamayo keskarafo. Kamayo kamakī tsaofax fetsafo reteikai keskara īta, xanīfāfe āfe oro maiti maia keskara īta, āto fēso feronāfāke fēso keskara īta, ⁸ āto foo kērofāfe foo keskara īta, āto piti poomānā piti keskara īta, ⁹ āto xochi ano rapati kerexkōi keskara safemanano ato tsakapaiyaifono a mēra ikitiroma īta, āto petafo pei pei ikī kamayonō karo keskara niniaino pachakōi īta, fetsafo retenāifo keskara īta, ¹⁰ keyokōi tsitsisyafō. Āto tsitsisi yora chachitiro nifo pae keskara. Āto tsitsisi yorafo omiskōimatiro. Mā oxe cinco finōano anā ato omiskōimatirofoma. ¹¹ Nā kinīfā fakishifā mēra niafaka chakafo ikafo anoa āto xanīfāfe ane israelifāfe mekapa Abadón famisfo. Griego mekapari Apolión famisfo. Nōko mekapari, “Yorafo Retemis,” nō famis.

¹² Akka taeyoi a omiskōiaifo mā finōfiano, akka nāno raferi a finakōia finōama.

¹³ Askata Niospa ājiri fētsa āfe maneti chāi chāisafaino, Epa Nios kīfiti oro mīsa shara ano fakka māxo cuatro nia ika. Nā mīsa nakirafenoax mekaito ē nika iskafakī āfe ājirinī yoiaino āfe maneti tsofaxō nika. ¹⁴ “Nā cuatro niafaka chakafo menexemexō nā faka efapa Eufrates anoxō manaifo ato mēpetāfe fotanōfo,” ixō āfe ājirinī yoia.

¹⁵ Nā tsekeafō penata Niospa ato yoiaino ichapakōi ato retenōfo. Nāskakē nā niafaka chaka cuatro Niospa itipinīfani māi kaxke fetsa ano ikafo ato retexinōfo. ¹⁶ Ē nika dos cientos millones sorarofō kamayo kamakī tsaofāfe fetsafo retexikakī.

¹⁷ Askata Epa Niospa oa namakē ōia keskara ea ōimana nā sorarofō yafi āto kamayofō ē ōia iskara. Āto xochi ano oa chii ereai keskara kerexkōi āto xochi ano safeafō ikafo. Askatari nanakōiri ika, chaxtari ika a aō xorakomeafō. Akka a kamayofāfe āto mapo poomā mapo keskarafo. Āto āxfā mēranoax kōi fe chii ereai keskara. ¹⁸ Chii fe kōi xofisakī āto āxfā mēranoax kāifaikī ato repakeafō yorafo ichapakōi ranāri naafō. ¹⁹ Āfe āxfā feta āfe tenēri yorafo retetiro. Āfe tene rono pae keskara. Āfe tene mapoya ika. Nāo yorafo omiskōimana nanōfo.

²⁰ Tsoa nayamafīaxō āto chaka xateafoma Epa Nios Ifofaxikakīma. A niafaka chakafo ifofamisfo xateafoma. Nāskakē oro nimofō fakāta, a kerexkōi fakkai fakkaisai nimofō fakāta, keno āfe ane bronze nimofō fakāta, ifi nimofō fakāta, tokiri nimofō fakāta; nāfo askafaxō, “Nāfo nōko nios. Nō aō noi,” ixō yoimisfo. Afāfe ōiyamafīafono, askatari mekayamafīafono, askatari kafāsāyamafīafono, nāskakē afo kīfimisfo. Epa Niospa nā āto kaifo yafi yora fetsafo omiskōimafīafito ōifikanax āto chaka xateafoma Epa Nios Ifofapaikānima. ²¹ Ato retetakī xatemisfoma, askatari koshoiki xatemisfoma, askatari āto āfīma chotamisfo, kērofāferi āto fenema chotamamisfo, yometsoriai xatemisfoma nāfo xateafoma. Tsōa āto chaka xateama. Nōko

Ifo Jesús Ifofaxikakima. Nāfo chakakōifkaxō āto chaka xateafoma nōko Ifo Jesucristo Ifofasharaxikakima.

10

Epa Niospa āfe ājirinī kirika tsoma

¹ Askata ē ōia Niospa āfe ājiri fetsa mitsisipakōi nai mēranoax fotoaito, nai kōiya. Āfe maiti nāfa fai keskara maia. Āfe femānā xinī chaxai keskara. Āfe kishi rafe chii keskara. ² Kirika fepekemea tsomax nia ika. Āfe tae kayakai aōri fakafā femākia paia. Akka āfe tae oshkiori mai ano paia ika. ³ Askata āfe meka poomā efapato meka keskara ē nika. Askatari ē nika naitiriki fetseaito. ⁴ Mē nikaxō nā yoiāfo keskara ē kenekerana. Akka nai mēranoax Nios ika anoa meka fetsa ē nika ea yoiāito iskafakī: “Nā mī nika keskara āto meka keneyamafe. Mī tsoa tāpimatiroma,” ixō ea yoiā.

⁵⁻⁷ Askata nā Niospa āfe ājirinī takai fetsa fakafā aōri paita takai fetsari mai ano paixō anā yoiā. Epa Nios nā nipanakato nai onifaa. Askatari nai mēra ikafo onifaa. Askatari mai onifaa. Mai ano ikafori onifaa. Askatari fakafā onifaa. Fakafā mēra ikafori onifaa. Nā Nioskōichi āfe ājiri yoiā iskafakī: “Epa Niospa ea ōiaino chanīmākōi ē mato yoi. Epa Niospa anā manaima. Āfe ājiri fētsa āfe maneti manekī chāi chāisafaino Epa Niospa axiai keskara āfe meka yoimisfāfe yoiāifo keskara yorafāfe tāpinifoma. Iskaratīa a Nios yoimisfāfe yoinifo keskara mā askakōia,” ixō Niospa ājirinī ea yoiā.

⁸ Askata anā nai mēranoax mekaito ē nika ea yoiā iskafakī: “Oa Niospa ājiri fakafāki paita mai ano paiax nia ano katāfe. Nā kirika kataramea fēpexō tsoma fīatāfe,” ea faa.

⁹ Askata ē Niospa ājiri ano kaxō ē yoiā iskafakī: “Nā kirika pishta ea ināfe,” ē faito, “Nakīa, fife. Ōixō tāpikōife. Mā tāpikōixō mī tāpitiro nā meka chanīmākōi. Niospa meka shara. Askatari mī tāpitiro na meka yoiāifo keskara yorafo omiskōikani. Mīri tāpixō mī fāsi shinātiro,” ea faa.

¹⁰ Nāskaxō ē kirika pishta fita ē ōia. Ea yoiā keskara chanīmākōi mē tāpikōia. Nā Niospa meka sharafinakōia. Nāskakē nā inōpokoai yoiā keskara yorafo omiskōixikani. Nā ōiax ē shināmitsakōia. ¹¹ Ē askano, anā ea yoiā: “Niospa afe yorafo yoipaiyai keskara anā ato yoife. Afarafo ixiai yorafoōnoa yoife, manifetsafoōnoari yoife, xanīfofoōnoari ato yoife,” ea faa.

11

Nōko Ifo Jesús yorafo yoipaiyai anori feronāfake rafeta ato yoixikani

¹ Askata na tanati metro keskara ea ināyanā ea yoiā iskafakī: “Nāo Nios kīfiti pexefā anoā āfe chainipa yafi āfe xāki tanatāfe. Anoxō Nios kīfiti mīsari tanafe. Askatari a mēranoax fanā ikanaifo ato tanasharafe afe tiito Epa Nios fanā ixokanimākai, askatari afe tiixori kīfikanimākai ato tanasharafe. ² Akka a ketokonō mapoāfo a israelifoma ato tanayamafe; afāfe na Jerusalén anoāfo ato chakafakani oa fākka nō afara faanano fākka peamanaino kāitiroma keskafakani ato. Cuarenta y dos oxe amaxō ato askafaxikani. ³ Nāskakē nā feronāfake rafe ē ato nīchixii. Nā rafeta nā ē ato yoipaiyai anori ato yoixikani. Un mil dos cientos sesenta pena ato yoixikani ēfe meka. A rafeta āto rapati chapokōi safexō ato ōimaxikani. A ato chakafamisfāfe, ato ōikakī a afara chakafamisfo shināxikani,” ixō ea yoiā.

⁴ Nāskakē Niospa afe yorafo yoipaiyai keskara nā rafeta yoimisfo. A rafe oa ifi olivo keskara. Āfe xini fospia keskariai, a feronāfake rafe Niospa Yōshi Shara ato mēra nanekōiafo. Askatari afia rafe oa rāpari ōtai keskara. Mā fakishkē rāpari otakē nō ōsharakōitiro. Nāskarifikā nā rafeta Niospa Yōshi Sharaōxō ato tāpimaxikani Niospa meka. Mā isharakōikaxō āto Ifāfe meka ato fe yorafo yoixikani. ⁵ Na Niospa meka yoimis rafe fetsafāfe ato chakafapaiyafono, āto axfa mēranoax chii kāitiro ato koofaxii nanōfo. Nāskakē nā rafe tsōa ato chakafatiroma. ⁶ Epa Niospa ato yoiaino, nā rafeta āto mekapa oi nesefatirofo anā fena oi iyamanō nā ato yoiatifotā. Askatari faka yafi ĩa āto mekapa fetsafatirofo oa imi keskara inō. Askatari afara afeskarafapaikakī āto mekapas afara meseni fetseaifo fatirofo pae fetsa fetsatapafori fatirofo.

⁷ A feronāfake rafeta mā ato yoikī senēfaafono, a chakakōi mai kinifā mēranoax Satanás shināmanaino, tsekeinākaā a feronāfake rafe retexii. ⁸ Mā reteafono, fāi nēxpakīa paxeax rakaxikani nā Jesús mastanifo ano, a Jerusalén ano. Nā Jerusalén anoafāfe nōko Ifo Jesús āfe meka shināmisfoma. Nāskakē nō aōnoa yoitiro iskafakī: “Na Sodoma ano ikafo feta Egipto ano ikafāferi, afaa shināpaonifoma. Nāskakē chakakōi ipaonifo anofo. Nāskarakōi Jerusalén anoafori.” Nāskax nā feronāfake rafe Jerusalén anoax nakanax āto yora fai nēxpakīa rakaxii. ⁹ Nāskakē yora fetsafo a mai fetsa ari ikafāfe, xoko fetsafāferi, meka fetsayafāferi, a feronāfake rafe rakafāfe ato ōixikani. Nāskafono āto xanīfofōfāfe, “Ato fena maifayamakāfe,” ixō ato yoixikani ato noikaspakōikakī. Nāskakē tres nia ato ōixikani. ¹⁰ Askaito ōikani a mai ano ikafo atoki inimaxikani. Askakanax atoki inimakakī fista axikani. Aa ranā kaxpa afarafo inānōnāxikani. Yoikani iskaxikani: “Anā na rafeta noko fekaxtefakanima kiki,” ikanax inimasharakōikani. “Anā nōko chaka noko yoikanima,” ikanax yoināxikani.

¹¹ Askafiaifono mā tres nia oxata nayoafono anā chipo Niospa ato otōfaxii a feronāfake rafe. Askaito ōikani a ato mānāo nikaxō ato ōiaifo, afo mesexikani, ratekōixikani, askaifāfe ato ōikani. ¹² Askata nā feronāfake rafe otokāta nai mēranoax mekaito nikakani ato iskafaito: “Niri ekeki māpeferakāfe,” ato fāito nikakani a rafe āto ferotaifi ronoinīfōfakani nai kōi mēra māpefainīfokani. Askaifāfe a ato noikaspaiifāfe ato ōikani. ¹³ Askata samama atoya mai naya naya iki finakōia. Pexefā rasi fisti rasi potaito ē ōia. Askaino siete mil yorafo naafo. A naamafāferi ratekakī Nios yoiafo, “Nios mīfi afama mīshti fatirokī,” faafo.

¹⁴ Mā afo askayoa anā chipo finakōixii.

Niospa ājiri fētsa āfe maneti chāi chāisa faa

¹⁵ Akka Niospa ājirinī chipokōitakī nā sietepa āfe maneti chāi chāisafaino, nai mēra Epa Nios ika ariax fāsikōi mekaifāfe ē nika iskai mekaifāfe:

Iskaratīa na nōko Ifo Cristo xanīfokōi iki nāmānoax nai mēra ika keskarari ixii nāatixō xanīfo ĩpanaka, ixō yoiafo. ¹⁶⁻¹⁷ Akka nā Jesús chanīmara faafo ato kexemisfo nā veinticuatro feronāfakefo tsaokanax a Nios nāmā feopakefōfā nafo Nioski inimayanā iskafafo:

¡Aicho, mī fāsi sharakōiki! Mī afama mīshti famiski. Mī Yōshi Sharapa ato ĩkinā. Afama mīshti onifaaxma mī iyopaonixakī. Iskaratīari mī nia. ¹⁸ A mai fetsa anoafāfe mia noikaspamisfo mikiki ōitifishkikōikakī mefe ikaspakakī. Afama mīshti chakafamisfo. Askaifāfe ōikī, mīri ato kopikī ato omiskōimaxii atoki ōitifishkikōixō. Akka a mia Ifofamisfo mī ato ināsharakōixii afara

sharakōifo. Akka a mia yonoxoyanā mī meka mēxotaima yoimisfo afo mī ato ināsharakōiketsaxii, a mia chanīmara famisfo tii; keyokōi afaamaisfo ita, a xanīfori a afama mīshiti ichapayafori mī ato ināsharakōixii a mia Ifofamisfo tii. Akka nā yorafo chakafamisfo, mī ato omiskōimaxii, a amēranoax, omiskōimisfo mēra mī ato potaxii,

ixō yoiāfo.

¹⁹ Askata a Nios kīfiti pexefā nai mēranoax fepekemeaito ē ōia. Nānoa Niospa kafo ē ōia, nā kafo mēra a Niospa israelifo yoini kirika kenea nanea ika. Askatari ē ōia kana pee ikaito nairi tiri ikaito ē nika, mīamāfanēri mai naya naya akaito ē ōia, nai mēranoaxri oi kaya ikaino, oi nami keyopakeaito ē ōia.

12

Kēro yafi kapetafā keskara nai mēranoa Juan ōini

¹ Askata ē afianā ēfe namapa ōia keskara ē mato yoinō a ea Niospa ispaito ē ōiafō nā inōpokoaifo ōikī ē tāpinō a tsōa ōimismafo. Ē kēro ōia āfe rapati oa xini pee ikai keskara safea ika nai mēranoax. Oxe kamaki paiya keskara. Askatari āfe maiti ano fishi doce aō neafo. ² Askata nā kēro mā chaima fake kākī, fāke pāefai. ³ Askainori fetsari ē ōia a tsōa ōiyomisma keskara nai mēranoax. Nā Satanás oa ronofā keskara efapanāfakōi ōshimāfa, askai mapo ichapayakōi siete mapoya, askai a āto xanīfokōichi maiti sharakōi keskara maiya siete faxō, askatari āfe māxofori diez ika. ⁴ Askata āfe tene fininīfōfā nai mēshanānaino nai mēranoax fishi rasi pakea. (Naskarifakī Epa Niospa ājirifo Satanás atiri ato chakana fama ato ikipaiķī, “Ea ifofakāfe,” ixō ato feparapaiķī. Nāskakē a keskara niafaka chakafo ato ikinō Niospa nāmā potani nāmāxō ato ikinō.) Nāskakē mā kēro chaima fake kāiyaino, a ronofānē kexei āfe fake pīapaiķī kāiyaito. ⁵ Askata a kēro fake kāi feronāfāke mitsisipakōi. Nāskakē yorafo manifo tii, ato kexesharakōixii āto xanīfo finakōia ixii. Mēstekōi ato yoisharakōixii nikasharakōinōfo. Askafiato a fake yome nama afa kāiyaito ronōfānē pipaiyaino Niospa ifirisafaa nai mēranoax afe xanīfokōi inō. ⁶ Askaito ōifaini afa ichoachāi tsōa istoma ano a Niospa afetiama itipinī faxoni ano Satanás afeskafanōma arixō Niospa kexenō cuarenta y dos oxe akaino Niospa kexesharanō.

⁷ Askatari ē anā ōia Satanás āfe inafō fe nā ājiri Miguel āfe inafō nai mēranoax retenāpaiyafono Satanás ato finōpaiyaino. Nāskaxō Satanás Niosri finōpaini. ⁸⁻⁹ Akka Satanás ato finōpaifikī ato finōnima. Nāskakē fanī itirokēma Niospa nāmā potani āfe inafōya. Taeyoi ājiri iyopaoni. Nāskaxō nāto keyokōi yorafo maifo tii anoafō ato pāramis anorima ato yoikī chaka shinānōfo, chaka nīpaxakakī.

¹⁰ Askaito ē anā nika meka efapato mekai iskaito: “¡Aicho! Epa Niospa mā Satanás nrixō nāmā potakī, mēxotaima āakōi noko fanīrira pārarifaito. Nāskakē Epa Niospa Satanás finōinīfōfana. Nāskakē Satanás anā nōko ifo ikima, anā fanīrira noko shināmanima, Epa Nios fisti nōko Ifokōi iki. Askatari āfe Fake Jesucristori nōko Ifokōiri iki. Nā rafe nōko Ifokōi. ¹¹ Nāskakē Jesús Ifofaxō mēxotaima nō yoimis niri nai mēra oyoxoma nō yoiyopaoni nāmāxō iskafakī: ‘Nōko Ifo Jesús, Niospa Fakekōi, oa oveja fake keskaraxō noko Nāxonni nōko chaka noko soaxoxikī,’ ixō nō yoimis mēxotaima. Askatari nō Niospa meka ato yoimis. Nāskai nō meseima, ‘Noko retefiaifono, nō inimasharai,’ ixō anori mēxotaima nō yoimis. Askaxō nō Satanás finōinīfōfana. ¹² Nāskakē māri nono nai mēranoax inimakāfe Niosnoax. Nā chanīmara faafāfe Jesúsxō mā

Satanás finōkōiafo. Akka Satanás Niospa nāmā potani nai mēraxō. Askafaino ōitifishkiki nāmā fotoxō yorafo chakafapaikōi. ¡Ooa! Yorafo ono mai anoax fe fakafā mēranoaxri omiskōikani. Satanás mā tāpia afetiara Jesús mai ano fotoai tsōa anā afaa chakafanōma. Nāskara mā tāpiax Satanás ōitifishkikōikī keyokōi maifo anofo ato chakafamapai omiskōinōfo Jesús fe ĩpaxanōfoma,” ixō nai mēranoax mekaito ē nika.

¹³ Mā afo nikakī ē anā ōia afia ē ōiyoa keskara. Mā Niospa Satanás nāmā potano, Satanás shinākī iskafai: “Na kēro ē akiki nokoxō omiskōimanikai,” ixō shināki Satanás chīfafaina. ¹⁴ Nāskakē Niospa nā kēro tetepafā pei keskara inā aō katanō tsōa istoma ano. Nā afetiama Epa Niospa itipinī faxoni ano mā kaxō anoxō piinō cuarenta y dos oxe akī, nā niafaka chakata ronōfā keskarato afeskafanōma. ¹⁵ A kēro ari ikano chakafapaikai Satanás ari kai. Mā kaxō chaima nikaxō āfe axfapa faka siiakī faka faipafānē iyotanō āsapaikī. ¹⁶ Askafaito ōikī Niospa mai kaxkexoni a mēra faka faipafā ikikaitanō a kēro afeskafanōma. ¹⁷ Nāskaito ōi Satanás a kēroki ōitifishkikōina. Nāskax nā kēromā āfe fakefoki kaa ato retepai, nāfāfemāi Niospa meka nikakōisharaifono isharakōiyanā Jesús Ifofasharakōiyanā. ¹⁸ Askata ē anā ōia Satanás fakafā kesemē nia.

13

Fakafā mēranoax yoinā keskara mesekōi kāinākafana

¹ Askata ēfe namapa ē ōia keskara afianā ē mato yoi. Ē ōiaino fakafā mēranoax yoinā keskara mesekōi kāinākafanaito ē ōia. Nā yoinā pōfe keskaraōnoa ē mato yoinō. Ea nikasharakāfe. Nā fistifiax mapo ichapaya, siete mapoya. Askatari āfe māxo rasi diezya. A āfe māxo rasi xanīfāfe maiti maimakī fetsa. Nāskaxō Epa Nios mekafakī chakakōi faa. Āfe femānāfoki ane fetsafo chakakōifo nēta. ² Askai oa poomā keskara āfe yora. Askatari āfe tae oa osopa tae keskara. Askatari oa poomā axfa keskara. Nāskara Niospa ea ōimana ē tāpinō a feronāfāke Satanāōxō tāpikifinakōia, oa xanīfo finakōia keskara ixii nāmānoax. Satanás āfe yōshi ināno ato yoimis ixii, afama mīshti fakī fetsaki ato ōimaxii. ³ Āfe mapo fetsa ano mā māpeafiafono anā otoax afianā nia. Nā mai tio anoxō yora rasichi ōikani askaito: “Kee, ¿afeskax otoamē mā nākōina nō ōia?” ixō yoikani. Nāskaito ōikī ifofaxikani. ⁴ Nāskakē ifofakaxō yoikani Satanás iskafakī: “Mī fāsi sharakōi. Mī afama mīshti famis,” fakaxō ifofakani. “Nāskaxō nā yora pōfekōi inō mī yōshi mī inā nōko xanīfokōi inō. Nāskaxō nō mia chai faima,” fakaxō yoikani. Askatari oa yoinā keskara akiki inimakakī fanāixokani iskafakakī: “Mia keskarakai tsoama. Mī fāsi sharakōi. Miakai tsōa chakafatiroma. Mī fisticchi ato finōkōia,” fakaxō yoikani fanāikakī.

⁵ Askatari anā Nios chakakōifakī yoi iskafakī: “Fato fetsakai ea keskarama. Ē Nios finōkōia,” ikax, āa chanī Nios chakafakī finakōimis. Nāskafekē Niospa yoixii: “Cuarenta y dos oxe finōta mī anā afaa fatiroma xanīfokōixō afara fetsafo sharafakī.” ⁶ Nios noikaspakī mekafakī fetsaito ē nika iskafaito: “Fato Nioskai nai mēra ikama. Anā ano Niosma. Mā kaxpakōi mā Nios Ifofai,” ixō yoi. “A yora namisfāfekai fato Nios Ifofamisma,” ato fakī fetsai. ⁷ Askatari Satanás ifofakaxō ato afara shināmānaino yorafāfe a Jesús Ifofamiso ato finōpaikī ato retepaikani āto xanīfo ĩpaikakī. Askatari maitio anofo, xoko fetsafo, meka fetsafoya keyokōi āto xanīfo ikani a feronāfake xanīfo chakakōi a Satanás yōshi a mēra nanea. ⁸ Askafaxō yoisharaxikani akiki inimakakī: “Mī fāsi finakōia, mī nōko nioskōi,” ixō

yoixikani akiki inimakakī. Askaifāfe tāpixō nōko Ifo Niospa atoki kirika keneama a Ifofaafāfema ōikī. Mai onifataima mā tāpixō Niospa āto anefo āfe kirikakī keneni fatofāfe Jesús Ifofaimākai. Akka nā Jesús ovejanā fake keskara noko nāxoni noko ikipakexakī.

⁹ Mā pachoyakī e nikasharakāfe. ¹⁰ “Nā Satanás ifofaafāfe mato karaxa mēra ikimakakī mato ikimaxikani. Askatari mato kenopa retetakī mato retexikani.” Nāskakē efe yora mīshtichi, shināchakayamakāfe. Nā nō Jesús chanīmara faafo tii nō omiskōifikī, nō tenekōixii nōko Ifo Jesús shināmakitama.

¹¹ Askatari ē anā ōia oa namakē ōia keskara. Mai mēranoax kāinākfanaite ē ōia yoinā pōfe fetsa keskara. Āfe māxo tiixo pishta rafe oveja fakenā keskara. Askai fāsikōi mekai oa poomā keskara āfe meka mēxakōi chai potai. Askaito ē ōia. ¹² Akka nā yoinā pōfe taeyoi fakafā mēranoax kāiyaito afama mīshti atiroxakī nāato yoiaino nā rama oatori afama mīshti atiro nā fētsa aka keskafakīri nāskaxō yorafo tii ikitiro. Keyokōi maifo tii anoafō ato yoia iskafakī: “A yoinā keskara mā mapoki rerafo mā nayofiax afianā mā otoa nā fisti ifofakāfe. ‘Na nōko ifora,’ fakāfe,” ixō ato yoia. ¹³ Afama mīshti tsōa atiroama keskara ato ispa yorafāfe chanīmara fanōfo. Nāskata yorafāfe āto ferotaifi nai mēranoa chii fotomana. ¹⁴ Satanāōxō nāskarifikī yorafo pāra niosra fanōfo. Askafata ato yoia: “Nā yoinā pōfe keskara retefiafono mā otoa nā nimofonōfā faxō inākāfe a keskara faxō,” ixō ato yoia. ¹⁵ Nānori ato yoiaino mā nimofonōfā māpeakano xākaitiroma. Askafiano Satanāōxō xākaima mekanō, askatari a siete mapoya mekayamaifo ato retenō. ¹⁶ Askata anā ato yoia iskafakī: “Maitio ikafāfe āto mēke kayakai aōri kenēnōfo askayamakī āto femānāki kenēnōfo.” Nā yoinā pōfe keskara fakafā mēranoax kāiato āfe ane keneyamakī āfe número ato kenemana. Keyokōi ato kenemana. Fakefo kenemata, xinifori kenemata, afama mīshtifoyari kenemata, afaamaisfori kenemata, inafomari kenemata, inafori kenemana. Tsoa pishta finōmanama. Keyokōi nā yoinā pōfe keskarato āfe ane atoki kenemana. ¹⁷ Tsōa nā ane keneyamaxō afaa fitiroma. Askatari afaa ināmitsatiroma a piaifori tsōa fitiroma, a rapati yopaifori tsōa fitirofoma.

¹⁸ Nāskakē Niosxō shināsharatirofo nā yoinā pōfe keskara āfe número tāpitirofo. Āfe número tāpixō āfe aneri tāpitirofo. Nā yoinā pōfe keskarafiax feronāfakekōi, āfe número seiscientos sesenta y seis.

14

Jesús chanīmara faafo ciento cuarenta y cuatro mil akiki fanāikani

¹ Askata ēfe namapa ē ōia keskara afianā ē mato yoinō. Nā Jesús ovejanā fake keskara māchifā āfe ane Sión ano nia ē ōia. Askatari ciento cuarenta y cuatro mil afe yorafo afe niafo ika. Āfe ane Jesús yafi Epa Nios āto ane femānāki kenea ē ōia. ² Nāskatari nai mēranoa meka efapakōi ē nika. Faka pōoitifā keskara ē nika, nai tiri ikai keskarari pachakōi ē nika. Meka efapari ē nika yora ichapa fanāikanaifono āto manetiya ichapa rasi fanāikanaifāfe ē nika. Nā manetinī āfe ane arpa. ³ Fana fena tsōa nikayomisma Epa Nios ferotaifi fanāixōāfo. Nānoxori nā cuatro Niospa onifanifāfe nikakani. Askatari nā veinticuatrofāfe nikakani. Nā ciento cuarenta y cuatro mil nono mai anoa Jesús ato ifini, nāfāfe na fana fena tāpitirofo. Tsoa fētsakai tāpitirofoma. ⁴ Nā ciento cuarenta y cuatro mil yorafāfe nōko Ifo Jesús Ifokōi famisfo. Afara chaka shināntamaroko Jesúsnoa shināfafāikani. Aato ato ifimis ato nāxonixakī Epa Nios yafi āfe Fake Jesús Ifokōi fakanax āfe yora inōfo.

Ato iyopaiyai ari afe fomisfo. Ato katoa afe yorakaxō ato yoiyai keskara anōfo. ⁵ “Nāfāfe chanīkī yoimisra,” ixōkai tsōa atoōnoa yoitiroma. Jesúsnoax isharamisfo. Aōxō afaa chakafamisfoma.

Niospa āfe ājiri trespa yoiāfo

⁶ Askata ē ōia Niospa ājiri fētsa nai mēra ika fāsi keyakōi yoyakī keyokōi yorafo maifo tii anoāfo ato meka shara yoiā. Yorafo keyokōi yoita, xoko fetsafo tii yoita, nā meka fetsa fetsatapafāfe meka yoimisfori yoita, nā mani fetsafo tiiri ato meka shara yoiā. Epa Nios nipanakaōnoa ato yoiā. ⁷ Mekakī fāsikōi ato yoiā iskafakī: “Nios shinākāfe. Nikakōikāfe. A noikōikāfe. ‘Mī sharakōi, mī afama mīshti mī atirora,’ fakāfe. Iskaratīa Niospa nā keyokōi chakafamisfo ato omiskōimani. Nāato nai onifani, mairi onifani, fakafāri onifani, faka sharari onifani. Nāskakē a noikāfe: ‘Mī nōko Ifo Nios sharakōi,’ fakāfe,” ato faa.

⁸ Askata Niospa ājiri fētsa mā mekai keyoano fetsari nokotoshixō iskafakī yoiā: “Babilonia ano pexe rasi iyopaoni. Iskaratīa anā ano tsoa ikama. Nānoxō yorafāfe afara chaka shināpaonifo. Fetsafori afara chaka ato fama-paonifo ato keskara inōfo. Askaiāfāfe Epa Niospa ato omiskōimani anā ano inōfoma. Nāskakē Babilonia anā anoma,” ixō Niospa ājirinī nai mēra ikato yoiā.

⁹⁻¹¹ Askata afianā Niospa ājiri fetsari nai mēranoax nokotoshixō meka fāsikōi yoiā iskafakī: “Fētsa nā yoinā pōfe keskara yafi āfe nimofa keskara nikakōikī yoimis iskafakī: ‘Nā ēfe nioskōi,’ ixō anori yoikī āto mēkeki kenenifo, askayamakī āto femānāki na yoinā pōfe keskarato āfe ane keneafāfe Epa Nios atoki ōitifshikikōixii. Nāfo Niospa ato fāsi kerexkai omiskōimaxii. Chii mēra ato potafianokai keyonakafoma. Jesús āfe ājirifo sharakōifo feta ōiaino a omiskōipakenakafo mēra Niospa ato potaxii chakamāi famisfono, Nios nikakaspakakī. Pae meekakī xatenakafoma. Tsōa ato iftirioma, nā yoinā pōfe keskarato āfe ane āto mēkeki keneafono, askayamakī ato femānāki keneafō. Nāskakē pena tii ita, fakishchāi ita, omiskōixikani tenepakenakafoma,” ixō Epa Niospa āfe ājirinī yoiā.

¹² Nāskakē efe yora mīshtichi, māto ōiti inimamasharakāfe. Omiskōifikī tenekāfe. Niospa noko yoini keskara akāfe. Nōko Ifo Jesús kachikiri fayamakāfe.

¹³ Askata ē meka nika nai mēraxō ea yoiāito: “Ē mia yoiāi keskara kenefe. Fatorafō nōko Ifo Jesúsnoax nai, inimakōixikani,” ixō ea yoiā. “Chanīmakōi. Mā nakanax anā omiskōitirofoma. Epa Niospa ato ama keskara akōikanax, nāskakē inimakōixikani. Nāfāfe fetsafo shara faxomisfono Nios atoki inī-masharaxii. Akka Epaki nokoafono ato ināsharaxii,” ixō Niospa Yōshi Sharapa yoiā.

Nā chakafamisfoki Nios ōitifshikikōikī maifo tii anoāfo ato ichanāfai ato omiskōimaxii

¹⁴ Akka ēfe namapa ōia keskara afianā ē mato yoinō. Ē afara fetsa ōia nai kōi oxokōi kamaki feronāfake tsaokē ē ōia. Ē ōikī iskafaa: Xanīfāfe maiti orokōi maiya, askatari keno extea ikikōi tsoma ika. ¹⁵ Akka āfe ājiri fetsa Nios kīfiti pexefā anoax kaxō fāsikōi yoiā iskafakī: “Nā maifo tii ano mā fanafō ōshia. Nāskakē iskaratīa mā fanafō chetekani. Akka mī keno exeatō taxtēxō ichafafe,” faa. Nānori yoifiki fanakōifoōnoa yoiāma. Niospa yorafoōnoa yoiā iskafakī: “Iskaratīa keyokōi Jesús chanīmara faafō tii ifife Epa Nios fe ika anoax ichanākanax afe ĩpaxanōfo,” ixō yoiā.

¹⁶ Askata nã nai kõi kamaki tsaoto afe kenopa fanafo taxtea keskafakĩ afe sharaõxõ a chanĩmara faafo tii ifia afe İpaxanõfo.

¹⁷ Askata ẽ õia nai mēranõa ājiri fetsari Nios kĩfiti pexefã anoax kaito, aatori keno extea ikiai tsofax. ¹⁸ Afianã ājiri fetsari Nios kĩfiti mĩsa anoax kaa. Nãato Niospa maifo tii anoax koatiro. Nãatori keno extea ikiai tsofax fãsikõi mekayanã yoia: “Nã uva fimi mã pachiaki. Mextexõ ichafafe,” ixõ yoia. Nãskarifakĩ Epa Niospa afe ājiriõxõ a nikakaspamisfo ichanãfaxii. ¹⁹ Nãskata nã Niospa ājirinĩ afe keno extea ikiai tsofaxõ uva xatexõ afe tsinĩti mēra nanea afe ene fonõ. Nãskarifakĩ Niospa ājirifãfe nã Niospa meka nikakaspamisfo ato ichanãfai. Akka Nios atoki õitifishkikõixõ ato omiskõimani. ²⁰ Nios ika anoxõ ato omiskõimanama. Iskafakĩ ẽfe namapa ẽ õiai keskara ea õimana. Fetsafãfe ato retexikani āto imi ichapa foxii. Askara tsõa õiyomisma. Āto imifo kamayofõ tesanãkõixii. Āto imi chaikõi trescientos kilometros foxii. Ato imi noakõi un metro ixii, nakirafekõi. Nãskarifakĩ nã Epa Nios nikakaspamisfo omiskõixikani ato omiskõimanaitã.

15

Epa Nios afe ājiri siete afianã ato yoia mai anoaxo ato omiskõimanõ

¹ Askata anã ẽfe namapa ẽ õia keskara ẽ mato yoinõ. Afara fetsa tsõa õiyomisma nai mēranõa ẽ õia. Ẽ ratekõia. Akka Nios nã yora nikayospafoki õitifishkiki. Nãskakẽ afe ājiri siete ato yoia keyokõi mai anoaxo ato omiskõimanõfo. Mã askafafono Epa Niospari ato omiskõimani. Akka anã tsoaki õitifishkixõ, Niospa ato omiskõimatiroma.

² Askata ẽ õia fakafã feroikima raka chiya osia keskara. Nãno yorafã rasi niafo ika. Nã yorafãfekai yoinã põfe keskara ifofaafoma; afe nimofori ifofaafoma; afe numerori āto yoraki keneafoma. Nãfãfe ato finõkõiafo. Nã fakafã feroikima raka chiya osia keskara a kesemẽ maniafo. Epa Nios ato tii maneti inãpakea. Nã maneti afe ane arpa. ³ Taeyoi Nios yonoxomiskõi Moisés ipaoni. Nã Moisés afe rãfifo finõkõiax fanãini keskara nãskarifai āto arpa tsoamakaxõ Jesús shinãkakĩ fanãikani a Moisés fanãini keskara iskafakakĩ:

Ifo, mĩfi Nioski. Mĩ afama mĩshti atiro. Mĩ amis keskara sharakõi. Tsoa fẽtsakai atiro. Mĩ mai fetsa anoaxo keyokõiõnoax mĩ āto xanĩfokõi ipanaka. Mĩ shinãmis keskara mēstekõi ikõina. ⁴ Ifo, keyokõi mikiki mesekakĩ mia nikasharapainõfo. Mĩ afama mĩshti tsõa õiyomisma mĩ atiro. Keyokõi maitio anoaxõ anori yoipakexanõfo. Mĩ fistichikai afaa chakafamisma. Mĩ shara fisti famis. Afeñara mĩ ato apaiyaitã mĩ ato omiskõimaxii a chakafamisfo. Chanĩmakõi mĩ ato askafaxii. Keyokõichi mã fẽkaxõ mia shinãkani inimayanã fanãikani, ixõ yoiaifãfe ẽ nika.

⁵ Askata afianã ẽ õia nai mēranõa Nios ika anoax. Ea fẽpexona Nios ika ano ẽ õinõ. ⁶ Nios ika mēranõax afe ājiri siete ichanãfo. Rapati oxokõi chainipa choshtama fafeai safeafo, oro õshi keskarato xonexemeafo. Nãfãfe mai anoaxo ato omiskõimakani omiskõinõfo. ⁷ Nãskakẽ nã cuatro Niospa onifaa fẽtsa Niospa afe ājiri sietefo ato oro kecho inãakea. Nios nã nipanakato nã İfofaafoma mai anoaxokĩ õitifishkikõikĩ nã kechofo mēra afara chakafo fospi faa nãskaxõ chipo atoki ājirifãfe nachiakeafono omiskõinõfo. ⁸ Nios ika mēra koinĩfã nashfiakĩ keskara. Niospa afe kerex shara a mēra fospi. Nãskatari a mēraxõ chaxasharai. Akka mai anoxõ nã Nios nikakaspamisfo

Niospa ājirifāfe ato omiskōimakani omiskōinōfo. Nāskakē a ato omiskōimanai xateamano tsoa Nios ika ano ikitirofoma.

16

Nikayospafo Niospa ato omiskōimani omiskōinōfo

¹ Askata Nios ika ariax fāsi mekaito ē nika. Niospa ājirifo siete ato yoia iskafakī: “Niospa a nikakaspamisfo mai ano ikafo atoki ōitifishkikī nā kechofo mēra afara chakafo fospī faa atoki nachitakāfe,” ixō ato yoia.

² Nikakaxō Niospa ājiri fētsa taefakī āfe kecho mēranoa nai mēraxō mai ano nachia. Nāskatari nā yoinā pōfe keskarato āfe ane āto mēkeki keneyamākī āto femānāki keneafō, āfe nimōfo keskarari ifofaafō nāfo kooyoi fetsekaxō paekōi meexikani.

³ Askata afianā Niospa ājiri fētsa āfe kecho mēranoa nai mēraxō fakafānaki nachia. Mā nachiano fakafā ōsinātana nā yora reteafono āfe imi foa keskara. Nāskakē keyokōi nā fakafā mēranoax nai fetseafō.

⁴ Askata afianā Niospa ājiri fētsa āfe kecho mēranoa nai mēraxō fakafoki nachia, askatari mai mēranoax faka tsekeafokiri nachia. Nachiaino fakafo fe mai mēranoax faka tsekeafō fe imi keskara osiafo. ⁵⁻⁶ Askatari Niospa āfe ājiri fetsa mekaito ē nika. Nā faka kexemisto iskafakī yoia: “Epa Niosi, mī tsoa onifataima mī iyopaoni. Nāskakē nā mī iyopaoni keskarari iskaratīari mī nīpanaka. Mī shara fisti amis. Aicho, iskaratīa nā mia nikakaspamisfo mī ato omiskōimani chanīmakōi. Āto chaka xatekaxō mī Fake Jesús Ifokōi fanōfo, mī meka ato yoimisfori nā Jesús Ifofaafāfema ato reteafō. Nāskakē nā mia Ifofaafoma mī kopikiri ato namai chanīma. Mefe yorafo omiskōimamisfo. Nāskakē ato kopikiri nā mia Ifofaafoma mī ato omiskōimani omiskōinōfo. Chanīmakōi ato omiskōimani,” ixō Niospa ājirinī yoia.

⁷ Askatari Nios nai mēra ika anoa nā kīfiti ano fistixō Epa Nios kīfimisfo anoa ē fetsa nika yoikī iskafaito: “Nōko Ifo Nios, mī ājirinī yoia keskara chanīmakōi. A mia nikakaspamisfo mī ato omiskōimatiro. Chanīma, mī mēstekōi ixō mī ato omiskōimani,” ixō yoia.

⁸ Askata Niospa ājiri fētsa Nios ika arixō āfe kecho mēranoa afara chaka xiniki nachia. Akiki nachiano xini chii keskara ikano yorafo koofafo. ⁹ Xini xanakōiaino yorafo koofafo. Kookani omiskōiafo. Mā tāpiyomisfo Niospa ato omiskōimafaiaino āto chaka xateafoma. Nios Ifofatamaroko. Iskafakī yoimisfo: “Niospa noko chakafai. Nios chakakōi,” ixō yoiafo. “Nios shara. Afama mīshti fatiro,” ixōkai tsōa anori yoipaikanima.

¹⁰ Askatari Niospa āfe ājiri fētsa Nios ika arixō āfe kecho mēranoa nā yoinā pōfe keskara chakakōikī afe ikafokiri atoki nachia. Nachiano nā yoinā pōfe keskara yoifofafo ika ano fakishkōi ika. Nāskakē keyokōichi paekōi meafō, aripe iyanā. ¹¹ Nāskai omiskōifikakī āto chaka xateafoma. “Niospa noko iskafai. Nios chakakōi,” ikaxō āto chaka xateafoma.

¹² Askatari anā Niospa ājiri fētsari nai mēraxō āfe kecho mēranoa faka efapa āfe ane Eufrates kamaki nachia. Mā nachiano nā Eufrates netsorisatana. Nāskakē xanīfofo xini oaikirinoax fekanī, mā Eufrates netsokōiano, āto sorarofo feta pokeferakani.

¹³ Askatari ē niafaka chakakōifo tres fexko keskara ē ōia. Fetsa ronōfā keskara nā Satanās āfe āxfā mēranoax kāikaina, fetsari nā yoinā pōfe keskarato āfe āxfā mēranoax kāikaina, fetsari: “Ē Niospa meka ē mato yoimisra,” iki, a chanīmisto āfe āxfā mēranoax kāikaina. ¹⁴ Nā tres niafaka chakafāfe tsōa afaa

ōiyomisma keskara afama mīshti yorafo ispafo. Keyokōi xanīfofo a ano fokani ato ichanāfanō nōko Ifo Jesús afe yorafo retenōfo. Nāskatari nōko Niospa afama mīshti famisto afe yorafo ispaxii.

¹⁵ Askatari nōko Ifo Jesús ato yoiaito ē nika iskafakī ato yoia: “Ea nikakāfe. Yometso tsōa yoyiamano koshikōi pexe mēra ikirisatiro afara onexikī. Nāskarifakī ē tsoa tāpimanima nā ē matoki nokoaitīa. Ē matoki samamashta nokorisai. Mā itipinīsharakaxō ea manasharakanax inimasharaxikani. Akka tsoa itipinīsharayamano ē matoki nokoaitīa keyokōi yorafāfe ea ōikani afāfekai ea Ifofasharama. Nāskakē rāfikōitirofo,” ixō yoia.

¹⁶ Nānori nōko Ifo Jesús yoifiano nā tres niafaka chakafāfe keyokōi xanīfofo maifo tii anoafo ichanāfaa Niospa yorafo retepaikī. Ato ichanāfai nā mai āfe ane israelifāfe mekapa Armagedón famisfo anoxō.

¹⁷ Askata Niospa ājiri fētsa anā nai mēraxō āfe kecho mēranoa nachia. Mā nachiano Epa Nios meka fāsikōi iska: “Mē keyokōi aka,” ixō yoiaito ē nika.

¹⁸ Askatari fāsikōi kana piishikai ita, afarafo pachakōifo ita, nai tiri iki ikai ita, mai naya naya ita, askarafokai tsōa ōiyomisma. Nā feronāfake onifakī taefanitiā tsōa mai naya naya iki finakōiaito askara tsōa ōiyomisma. ¹⁹ Akka nā Babilonia anoax mai naya naya ikaino mai tres kaxketani. Maifo tii anoari āto pexe rasi nā mai naya naya ikaino maokomea. Nā Babilonia anoafo anā Niospa shināni afara chakafamisfono. Nāskakē atoki ōitifishkikōikī ato omiskōimani omiskōinōfo. ²⁰ Nāskatari nā mai toomāfā anoafo yamarisatana. Keyokōi māchifāfori yamarisatana. ²¹ Nāskatari oi nami matsi tokorofo efapakōi āfe efe cincuenta kilo nai mēranoax yorafoki pakea. Askafiato ōikakī āto chaka xateafoma. “Nios chakakōi. Na oi nami efapakōi nokoki potai,” ixō yoiaifāfe ē nika.

17

Mai fetsa anoafo kēro feroma keskarafō

¹ Askata anā ēfe namapa ē ōia. Afara afeskara ixiai keskara anā ea ōimana. Nā Niospa ājiri sietepa kecho tsomafo ikafo akka fistichi ea yoia: “Niri ofe. Na pexe ichapa rasi fakafāfo chaimashta anoafo chakakōifo. Kēro feromakōi keskarafō Nios nikakaspakani. ² Akka keyokōi xanīfofo maifo tii anoafo ato fe chaka imisfo. Nāskakē atoōnoax afori chakakōifo ikafo. Nā kēro feromakōi keskara ikafo chakafakani. Akka nā Niospa ato omiskōimaxiai keskara ē mia ōimanō,” ixō ea yoia.

³ Ea askafaino ē anā namakē ōia keskara ē ōia. Epa Niospa Yōshi Sharaōxō ājirinī ea iyoa tsōa istoma ano ea iyoa. Nānoa kēro ē ōia yoinā pōfe ōshikōi kamaki tsaokē. Nā yoinā pōfekōi āfe yora tiixō ane ichapato kenea ika. Keyokōi nā anefo kenekī Nios mekafakī chakafaa. Nā yoinā pōfe āfe mapo sieteya. Āfe māxo diezya. ⁴ Nā kēromā sama chainipa yafi nana ōshi safea ika. Oro fakka fakka ikai keskara safea. Askatari makex keskara fakka fakka ikai sharashta yafi fetsa āfe ane perla oxoshara, nāri safea ika. Nā kēromā kecho oro tsoma a mēra afara chakakōi naneato, a mēra nanea keskara yorafo afara chakakōi fetsa fetsatapafo chakafama. Āto mēra nanexō ato afara chaka shināmana. Ato pāemata, chanīmis ato imata, āto āfima chotamimisfo ato imata, āto fenema chotamamisfo ato imata, nāskara chakakōifos ato imamis. ⁵ Āfe femānāki kenea keskara tsōa tāpimisma. Iskara kenea: “Babilonia anoafo tsoa keskarafoma. Nā kēro feromakōichi Nios nikakaspai keskarafō. Nāskakē fetsa fetsatapafo chakafakī finakōimisfo,” ixō kenea. ⁶ Nā kēro feroma

keskarato Jesús chanimara faifo ichapakōi ato retea inimayanā. Nāskaito ōikī tāpia. “Choo, na kēromātsi ato retemiski,” ixō ē shinā. ⁷ Ē askaito Niospa ājirinī ea iskafaa: “¿Afeskai mī ratemetsamaimē? Ē mia yoinō, ea nikapo. Na kēro yafi nā yoinā keskarāōnoa ē mia yoinō. Na yoinā pōfe keskara siete mapoya askatari diez māxoya tsōakai askara tāpiyomisma. Akka iskaratīa ē mia tāpimani. ⁸ Nā yoinā pōfe mī ōiai yoinākōima. Nāfi xanīfo efapa chakakōi. Nāato Nios nikaskapamis. Taeyoi niyopaoni. Anā iskaratīa niama. Askafīax chipo nā niafaka chakafo kinīfā mēra ika anoax kaixii. Nānoax kāifekē Epa Niospa a omiskōipakenakafo mēra potaxii anā anoax faki kanakama. Akka nā taefakī mai onifakī taefanītīa yorafāfe āto anefo Niospa āfe kirika kenenī, nāfo afe ipanakafo. Akka a āfe kirikaki āto anefo keneama, afo Nios fe ipanakafoma. Nāfāfe yoixikani iskafakakī: ‘¡Kee, ōikapo! Mā nafianixakī afianā mā otoa,’ ixō yoixikani.

⁹ “Akka fētsa Niosxō mēstekōi shinākī nāato nā ē rama kenea keskara tāpitiro. Nā yoinā pōfeōnoa ē mato yoinō, ea nikasharakāfe. Āfe mapo siete mapokōima. Nā siete mapoxō xanīfoōnoa noko tāpimai. Nā ikafo siete māchifā. Nānori nā kēro feroma ika. ¹⁰ Cinco xanīfofo anā anoma. Mā nanifo. Fisti iskaratīa nīa. Fetsari chipo ixii xanīfoi. A chipokōi xanīfoxiāi xanīfoi chaima. ¹¹ Nā yoinā pōfe keskara ōshi ē mia yoia, ari yoinākōima, xanīfo chaka fetsa. Nā xanīfo siete ipaonifo keskara nāri chakakōi. A iyopaonikai iskaratīa anā xanīfoma. Nāskakē nāri fetsafo fe omiskōipakenakafo mēra kai anoax anā kāinakafoma.

¹² “Askatari nā māxo diez mī ōiai māxokōima. Nāōxō diez xanīfofo noko tāpimani. Nāfo xanīfofo iyoafoma. Chipo mani fetsafo anoax nā diez āto xanīfofo itirofo. Na yoinā pōfe keskara fe xanīfo ixikani. Askafikanax xanīfoi chai samaraka kanima. ¹³ Nāskakē nā diez xanīfofōfāfe shināmīso: ‘Na yoinā pōfe keskara nōko xanīfo iki kiki,’ ixō shinākani. Nāskakē, ‘Mī noko yoiai keskara nō atiro,’ ixō nā diez xanīfofōfāfe nā feronāfake yoinā pōfe keskara yoikani. ¹⁴ Nāskaxō nā feronāfake yoinā pōfe keskarato nōko Ifo Jesús afe yorafoya noikaspai, xanīfofo fetsafāferi ato noikaspaxikani. Nā yoinā pōfe keskarato nā diez xanīfofo feta Jesús yafi afe yorafo retepaikani. Retemapaiāifono Jesús ato kanāxii. Niospa ato katoa afe yorafo kena a Ifofamīso. Nāfāfe afara afeskarafīaito nōko Ifo kachikiri famīsofoma. Nōko Ifo Jesús xanīfo fetsafori ato īkitiro. Nōko Ifo finakōixō keyokōi ato īkitiro. Akka tsōakai nōko Ifo Jesús finōtiroma,” ixō nā Niospa ājirinī ea yoia.

¹⁵ Askano afianā ea yoia iskafakī: “Na mī ōiai nā kēro feromakōi keskara, fakafā femākīa tsoa nā fakafākai fakafākōima, askatari yorafo mai fetsa anoafō, meka fetsayafō. ¹⁶ Nā diez xanīfofo feta nā xanīfo yoinā pōfe keskarato nā kēro feroma keskarakaxō noikaspakōixikani. Keyokōichi āfe afara fīaxikani anā aya inōma. Nāskakē anā tsoa nā kēro feroma keskara fe ipaikanima. Poomānā retexō koshi pikī keyotiro. Nāskafakīri nā diez xanīfofo feta nā xanīfo yoinā pōfe keskarato nā kēro feromakōi keskara chakafaxikani omiskōimayanā. Askafaxō chīi koofaxikani anā ninōma. ¹⁷ ‘Mī noko yoiai keskara nō atiro,’ ixō nā diez xanīfofōfāfe xanīfo yoinā pōfe keskara yoikani. Akka Niospa anori ato shināmana a apaiyai keskara fanōfo. Askata taeyoi Niospa yoiyoni nā inōpokoi keskara nāskarakōi ixii. ¹⁸ Na kēro feromakōi keskara mā ōiai kērokōima, akka nā pexefā rasi Babilonia keskara. Babilonia ano a yorafo chakakōifo. Nāfāfe manifo tii ano a to īkināno ato chakafakani ato keskara ikaxō,” ixō Niospa ājirinī ea yoia.

18

Ājiri fětsa yoia iskafakī: “Iskaratīa Babilonia pexe rasi mā keyoa,” ixō yoia

¹ Askata anā ājiri fetsa nai mēranoax mai ano fotoaito ē ōia. Epa Niospa yoia nā xanīfo fětsari afama mīshti atiro. Nāato chaxaito maifo tii anoxō ōikani.

² Fāsikōi yoia iskafakī:

Pexefā rasi Babilonia anoafō mā keyoa, anā anoma. Iskaratīa anā ano tsoa ikama, askatamaroko niafaka yōshi chakakōifo ano ika, askatari peya yōshi chakakōifori ano ika. ³ Nā kēro chakapa yorafo ato māmā pae ayamatiro keskafakī, nāskarifiakī nā Babilonia anoafāfe yora fetsafo mai fetsa anoafō ato afara chakafamafo ato keskara inōfo. Āto xanīfofori ato askafamafo. Askatari afara sharafos fichipaimisfo. Nāskakē a afama mīshtifo ato minimisfo, afara ichapayakōifo, ixō yoiaito ē nika. Niospa inapa askara ato yoia a Niospa keyoxiai a Babilonia anoafō.

⁴⁻⁸ Yoikī askafatanaino nai mēranoax mekaito ē meka fetsa nika is kai mekaito:

Babilonia ano ikafāfe fāsi afara chakafakī finakōiafo. Nā afara chakafamisfo Epa Niospa ato ōia chakakōifaifāfe. Nāskakē ato omiskōimaxii. Nā Babilonia anoafāfe fetsafo afara chakafamamisfono afori. Epa Niospa ato omiskōimakī finakōixii omiskōinōfo. Nā Babilonia ano ikafāfe āto shinā mēraxō mā shināfo iskafakakī: “Nō Nios yopaima. Afara fetsafori nō yopaima. Nō isharakōimis. Oa xanīfokōi isharamis keskara nōri nāskamis, xanīfo keskara. Nōkai oa kēro ifomafa keskarama. Nō omiskōitiroma. Askatamaroko nō isharapakenaka,” ixō kakapaimisfāfe yoimisfo. Akka Epa Niospa ato fāsi omiskōimani omiskōiakī tenēnōfoma. Akka nā ea chanīmara faafāfe, ea nikasharakāfe. Epa Niospa mā ato samamashta omiskōimani anā isharayamanōfo. Atiri ē ato namai, atiri ē ato omiskōimani, a piaifori ato kēyoi. Nāskakē fonāikani. Nāskatari atiri ē ato koofaxii kooi fetsenōfo. Tsōa atiroa keskara Epa Niospa afama mīshti atiro. Nāskakē Epa Niospa mato yoi iskafakī: “Efe yora mīshtichi, Babilonia anoafō keskara iyamakāfe. Ato fe rafeyamakāfe. Ato feta chakafayamakāfe ē ato omiskōimanai keskafakī, matori ē omiskōimanōma,” ixō Epa Niospa ato yoixii kiki,

ājirinī faito ē nika.

⁹ Askano Babilonia kooaino mai fetsa anoafāfe āto xanīfofōfāfe ōikakī manoxikani. Nāfāferi Babilonia anoxō afara chakafakī tāpinifo. Nāskakē ato feta Epa Nios chakafakakī potakani afara chakafaxikakī. Nā Babilonia ano keskarafori afāfe afama mīshti ichapa fimisfo. ¹⁰ Babilonia kooaino nā xanīfofo ratekōixikani chai inoaxri fetsafo mesexikani.

¡Ooa! Babilonia anoafō fato yora fetsafo keskarafo. Mā tāpikōisharafikē samamashta Epa Niospa mato omiskōimani mā kooi fetsenō. ¡Keexto! Koshikōi Babilonia mā kooi keyoa. Nōri iskayamapainō, ixō shinākani xanīfofōfāfe ratekōiyanā.

¹¹ Nāskatari maifo tii anoafō āto afama mīshtifo minimisfo oiaxikani shināmitsakani. “¡Ooa! Mā Babilonia kooi keyoa. Iskaratīa anā nōko afama mīshtifo noko tsōa fiatiroma. ¹² Nōko oro ōshishara fiayamata, a kerexkōi fakkai fakkaisai fiayamata, nōko tokirinī fakeshta fakkai fakkaisai fiayamata, nōko tokiri fetsa āfe ane perla fiayamata, nōko sama sharafinakōia fiayamata, nōko sama nana shara fiayamata, sama fetsa fetsatapafo fiayamata, nōko ifi nakas sharakōi fetsa fetsatapafo fiayamata, tokiri keskara kerexkōi oxosharakōi

āfe ane mārfil nāato afarafo onifaa fīayamata, afe keskarara ifi sharakōifo fīayamata, firo shara āfe ane bronze fīayamata, keno fetsa āfe ane firo fīayamata, tokiri āfe ane mārmoōlo fīayamata, nāfo kopikōifo noko anā fīakanima. ¹³ Akka nō pīchamis afama mīshhtifoya osixō, nā itsa sharafoya fetsa fetsatapafoya osixō, afo noko tsōa fīatiroma. Askatari a nakas shara āfe ane incienso, fetsari mīrra, fetsari pirofomā, fetsari vinō, fetsari xini, fetsari arinā, fetsari trigo, askatari nōko yoinā inaforti ovejari, kamayori, nōko karori, yonomatifori, nāfo noko anā tsōa fīatiroma. ¹⁴ ¡Ooa! Babilonia anofāfe nā afara fetsa fetsatapafa fichipaikakī anā fitirofoma. Keyokōi afara sharafo fichipaikakī mā fimis anā anoma mā fenokōia anā mā fīpanā. Mā afaa yopakima mā fimis. Mā kai anā fitiroma. Keyokōi nā mātonā mā keyoa,” ixō nā ināmitsamisfāfe yoixikani.

¹⁵ Nā mai fetsa anoa fēkaxō afama mīshti minikaxō kori ichapa fimisfāfe mā noko kaxō chaima nīxō ato ōikani, ratekōiyana, oiakani, askatari shināmitsakōikani. ¹⁶ Yoiki iskafaxikani: “¡Ooa! Fato fetsakai Babilonia anoafō keskarama. Ato fe yorafāfe rapati sharakōifo safeafo. Rapati ōshi sharafo, askatari oro teoti safeafo, tokiri fakkai fakkaisai keskarari menexemeafo, perlari askari faafo. ¹⁷⁻¹⁹ Koshikōi na afama mīshtisharafo mā keyokōia,” ixō yoixikani.

Nāskarīfiai nā kanōanāfā āfe ifofāfe shinākani, a kanōanāfā mēra fomisfāferi shinākani, a kanōanāfā nexa yonomisfāferi shinākani, a kanōanāfā mēra fokaxō, ato afama mīshti minikaxō kori fimisfāferi shinākōikani. Babilonia kooaito chai ixō ōikani manokakī shināxikani. “¡Ooa! Fato pexe fetsakai Babilonia keskarama. Na Babilonia fistiōxō kanōanāfānē āfe ifofāfe kori ichapa fimisfo. Akka a aya imisfo koshikōi mā keyoa,” ixō a kanōanāfāō yonomisfāfe yoixikani.

²⁰ Askaifono keyokōi Epa Nios ika anoafō inimakāfe. Babilonia anoafāfe a Jesús chanīmara faafo ato omiskōimamisfo, Epa Niospa ato kopikī omiskōimaxii. Nāskakē keyokōi a Jesús chanīmara faafo fe, Jesúsxō āfe meka yoipaonifo fe, a Niospa meka inōpokoai yoimisfori inimakāfe.

²¹ Akka Epa Niospa āfe ājiri fetsa mitsisipakōichi tokiri efapakōi fininīfōfāta fakafā mēra potaxō yoia iskafakī: “Na tokiri kerexkai ē potai keskafakī, nāskafakīri Epa Niospa na pexe rasi anoafō Babilonia kerexkai omiskōimana kooi keyonō. Mā keyokōikanax anā ano tsoa ikima. ²² Nāskakē anā Babilonia anoax manetifo, xāitifo, maneti fetsafori, afo anā tooxikama. Askatari anā tsoa fanāikama. Tsōakai anā ato nikatirofoma. Askatari a yonomisfo anā ano ikafoma. Askatari a aō xiki reneaifo nō anā nikatiroma. ²³ Anā luzri ōtapakenakama. Feronāfāke kēro fiaino inimaifāfe mā nikamis keskara anā tsoa askara mā nikapakenakama. Babilonia anoax a ināmitsamisfāfe tāpikōikani. Nāfāfe ichapakōi fimisfo. Askatari koshōiti tāpixō yora fetsafo pāramisfo. Askafikanax mā keyoafo.

²⁴ “Babilonia anoafāfe a Niospa meka yoimisfo, fetsafori a Jesús chanīmara faafo, fetsafori mai fetsa anoafō ato retemisfo Jesús ōikaspakakī. Niospa meka mato yoipaiifaifono mā ato nikakaspamiskē, Niospa mato omiskōimana,” ixō Niospa ājirinī yoia.

19

Nios ika anoax fanāiki iskakani: “¡Aicho! Nōko Ifo Nios sharakōi,” ikaxō Niosnoa afara sharafo fanāikani

¹⁻² Askata nai mēra ikafo ichapakōi āto meka ē nika, fāsikōi iskaifāfe:

A fetsafāfe chakafamisfo Epa Niospa ato omiskōimani. Chanīmakōi, ato omiskōimani. ¡Aicho! Nōko Ifo Nios fāsi sharakōi. Nāato nōko chaka noko soaxona nō afe nīpaxanō. Aōnoa fisti nō yoitiro iskafakī: “Mī nōko Ifokōi. Fato fetsakai mia keskarama afara sharafamis. Mī sharaōxō mī afama mīshti fatiro,” ixō keyokōichi yoipakenakafo. Epa Niospa Babilonia anoafō atoōnoa iskafakī yoia: “Nā Babilonia anoafō nā kēro feromakōi keskarafo. Nā chakafamisfoōxō maifo tii ano ikafori ato chakafama. Nāskakē Babilonia anoafāfe ea fāsi chakakōi famisfo. Efe yorafori ato omiskōimakani nanōfo. Nāskakē ē ato kopia omiskōimakī,” ixō Epa Niospa yoi,

ixō yoiaifāfe ē nika. ³ Afianā meka fetsari ē nika nai mēranoafāfe yoiaifāfe iskafakakī:

¡Aicho! Nōko Ifo fāsi sharakōi. Afaa chakafamisma. A chakafamisfo chanīmakōi ato omiskōimani. Ato chiifā mēra potano afo kooi nishpapakenakafoma,

ixō yoiaifāfe ē nika.

⁴ Askanori Epa Nios tsoa ano nā veinticuatro xanīfori nā Nios onifani cuatro a nāmā feopakekafakī iskafakī yoiafo: “Askapainō. ¡Aicho! ¡Nōko Ifo fāsi sharakōi!” ixō yoiaifāfe ē nika. ⁵ Askata Epa Nios tsoa ano ē meka fetsa nika iskafakī yoiaito:

Epa Nios yonoxomisfāfe xanīfofōfāfe askatari afamafōfāfe mato Niospa yoia keskara mā apaikōimis. Māri Epa Nios yoikāfe iskafakī: “¡Aicho! ¡Epa Niosi, mī sharafinakōia!”

ixō yoiaito ē nika.

Feronāfake āfiyakī fista atiro inimakī. Nāskarifikī Jesús nai mēraxō noko fista axoxii nokoki inimakī

⁶ Askatari ē anā nika yōrafā rasi mekaifāfe nā fakafā poo ikai keskara, askatari fāsikōi nai tiri ikai keskarari ē nika āto meka:

¡Aleluya! Nōko Ifo Nios tsōa atiroma keskara afama mīshti fatiro. Nā nōko Xanīfo finakōia. Maifo tii anoafō noko ikitiro. ¡Aicho! ¡Nōko Ifo Nios shara-finakōia! ⁷⁻⁸ Akka feronāfāke kēro faino nā kēro inimakōi itipinīsharatiro āfe fene fe fianāxiki. Nāskarifiāi nōko Ifo Jesús fe iskaratīa afe yorafo afe ipanakafo. Akka afe yorafo mā itipinīsharafo afe ipaxakakī. Akka āfinī āfe fene inimamapai itipinīsharatiro. Sama fena sharakōi patsaxō safetiro afe fianāxikī. Nāskarifiakī nā Jesús Ifofamisfāfe itipinīshara fatirofo. Epa Niospa ato shara fapaikī, ato chaka soaxoni Jesús fe īpaxanōfo. Nāskakē nō inimai.

Tsoa fetsakai mia keskarama afara shara famis,

ixō yoiafo. Niospa yorafāfe Jesúsxō fetsafo sharafamis. Nāskakē Niospa ato rapati sharafinakōi safemana Jesús fe ipasharanōfo.

⁹ Askatari ājirinī ea yoia: “Ē mia yoiai keskara kenefe iskafakī: ‘Ēfe Fake Jesús iskaratīa keyokōi afe yorafo ichanāfai afe īpaxanōfo. “Niri fekāfe,” ato faino, nikakanax inimakōikani. Nāskakaxō ēfe Fake feta pikani afe ipaxakakī,’ ixō Epa Niospa yoia. Nāskakē Epa Nios āfe meka mā chanīmara fatiro,” ixō ea yoia.

¹⁰ Ea yoiaino ē a nāmā feopakekafana, “Mī fāsi sharakōi,” ixō yoixiki. Ē askafaino ea yoia iskafakī: “Ea askafayamafe. Ēri Nios yonoxomiski mī axomis keskafakī, a Nios Ifofaa fetsafāferi askafamisfokī. Jesús mato yoiai keskara mā kachikiri famisma. Nāskakē Nios fisti nāmā nō feopakekafā yoitiro: ‘Mī fāsi sharakōi. Mī ēfe Ifokōi,’ ixō anori fisti nō yoitiro. Nā Niospa

meka yoimisfāfe yoimisfo keskarifakī ēri Jesúsnoa yoimis Epa Niospa ea shināmanaino,” ixō ājirinī ea yoia.

Jesús mai ano afianā oxiai keskara yoi

¹¹ Akka ē anā ēfe namapa ōia keskara anā ē mato yoinō mā tāpinō. Epa Nios ika anoa nai mēranoa ē ōia. Fepoti fepekemea keskara ē a mēra ōia. Nāskara Epa Nios ika ari xafakīakōi ē ōia. Nāno kamayo oxokōi ē ōia. Nā kamayo kamaki Jesucristo nōko Ifo tsoa. Āfe ane ichapa. Āfe ane rafeōnoa ē mato yoinō. Fētsa, “Nā Yoia Keskara Akōimis.” Akka āfe ane fetsari, “Chanīmisma.” Nāato chanīmakōi yora chakafo omiskōimani. Niospa meka nikakaspamisfo a omiskōipakenakafo mēra ato potaxii. ¹² Āfe fero rafe chii xofisai keskara. Fakishi chii xofisaino yōra ōisharatiro. Nāskarifakī nōko Ifāfe yorafāfe āto ōiti mēraxō shināifo keskara tāpia. Xanīfāfe maiti sharakōifo ichapakōi maiāfo ika. Āfe femānāki āfe ane kenea. Ares fisti nā ane tāpia. ¹³ Rapati chainipa safea. Nā rapati imiki momoa. Nāskara ōikī ea shināmana Jesús noko nāxoni. Āfe ane fetsari, “Niospa Meka,” famisfo. ¹⁴ Afe yorafo nai ariax kamayofō oxokōi kamaki āto Ifo kachiori fokani. Āto rapatifo oxokōi chainipa safeafo. Nā rapati oxokōi rama pātsaxona keskarāfo. ¹⁵ Āfe axfa mēranoa keno chainipa ikiaikōi ē ōia. Akka āfe kenoma, āfe meka. Āfe mekapas maifo tii anoāfo nikayospamisfo omiskōimani. Maifo tii ato īkinā, fetsafo nikayospamisfo ato kerexkai omiskōimakōi. Āfe meka nikakaspamisfono Nios ōitifishkikōini. Akka Jesúsxō ato omiskōimani, omiskōipakenakafo mēra ato potaxii. ¹⁶ Jesús āfe ane fetsa āfe rapati chainipaki kenea mānākiri keneta maikiriri kenea iskafakī: “Xanīfo maifo tii anoā āto Xanīfo finakōia, askatari āto Ifo finakōia,” ixō kenea.

¹⁷⁻¹⁸ Askatari ē ōia ājiri fetsa xini ano nīxō fāsikōi yoia iskafakī: “Xanīfofo ikaino, sorarofō āto xanīfofo ikaino, āto xanīfofo fe rafea ikaino, feronāfakēfo mītsisīpafo ikaino, kamayofō ikaino, a kamayofō kamaki tsoafo ikaino, keyokōi Niospa meka nikakaspamisfo ikaino, ato yonomatifoma ikaino, a āto yonomatifo ikaino, yora afamafori ikaino, a yora finakōiafo ikaino, keyokōi Niospa ato namaxii,” ixō yoia. Nāskakē ishpifo ato yoia: “Fekāfe āto nami pixikakī,” ixō nā ājirinī ishpifo kena.

¹⁹ Askatari afianā ē ōia a nōko Ifo Jesús noikaspai nā yoinā pōfe keskara yafi maifo tii anoā xanīfofo āfe sorarofōya ēfe namapa ōia keskara ē ōia. Mā ichanāfo Jesús āfe kamayo kamaki tsaokē afe yorāfoya retepaikani. ²⁰ Akka ato retetamaroko Jesús ato achia chiifā mēra ato potaxiki. Nā ato pāramisto, “Ē Niospa meka mato yoimis,” ifiax āa chanīmis. Nāato na yoinā pōfe keskaraōxō tsōa atiroma keskara famis Satanás yōshixō. Nāskaxō keyokōi yorafoki kenea nā marakkaōxō yoinā pōfe keskara tāpixikani. Nāfāfe yoimisfo iskafakakī: “Mī ēfe nios. Ē mia noi,” ixō anori yoinā pōfe keskara yoimisfo. Akka nā ato pāramisto yōra atiroma keskafakī afama mīshti faito nāfāfe ōiafo. Nāskakē ato pārakōia. Nā yoinā pōfe keskara fe nā ato pāramis naafomano iriyafi Jesús ato chiifā mēra pota. ²¹ Nā rafeta āto ināfo Jesús āfe kamayo kamaki tsoaxō āfe mekapa ato reteaino nai fetseāfo. Mā naafono ishpifo atoki ichanākaxō āto nami pikani māyakōiafo.

20

Jesús Satanás achixō nexaxii mil xinia

¹ Askata Niospa ājiri Nios ika ariax fotoaito ē òia, chamis keskara tsoma. Nā niafaka chakafo kinifā fakishifā mēra ikafoki atoki fepoti fepoa keskara ē òia. Nā Niospa āfe ājirinī fepotinī āfe chamis yafi kaninā efapa tsoma ika. ² Tsomaxō nā ronōfā keskara achia. Nā ronōfā keskara nā niafaka chakakōi Satanās. Nā achixō nexa. ³ Nāskaxō kinifā fakishifā mēra pota. Potata akiki fepokōia mil xinia a mēra inō anā yorafo pāranōma. Mā mil xinia finōano afianā kāimayoxii samarakatama chaimashta anā mai ano kafāsayonō.

⁴ Askata xanifāfe tsaotifo Epa Nios ika anoa ē òia. Jesús afe yorafo yoia nā tsaoti kamaki tsaofono, “Mā yoitiro fatofomākī omiskōipakenakafo mēra foaifoma, akka fatoforimākī a omiskōipakenakafo mēra foaifo.” Askano nānoari ē òia nā Jesús chanīmara faafo yamī ato textenifo. Ato texteyoafomano yoiyopaonifo: “Jesús nōko Ifo,” fayopaonifo. Niospa meka ifofamisfona, nāskakē ato textenifo. Akka nāfāfekai nā yoinā pōfe keskara yafi āfe nimofa yoimisfoma iskafakakī: “Mī nōko ifo nios. Nō mia noi,” ixōkai anori yoimisfoma. Askatari aō ato tāpinōfo āto mēke yafi āto femānā kenemisfoma. Nāskakē nā yoinā pōfe keskara atoki òitifishkikī ato textemani. Mā nai fetsefiafono Jesús ato otoani. Mā otokaxō Jesús feta maifo tii anoafu mil xinia yorafo tii ato ikināfo. ⁵ Nāfo mā otoafono mā mil xinia keyoano fetsafori Epa Niospa ato otoaxii. ⁶ Shinākapo efe yora mishtichi, mato yoiai keskara. Noko Epa Niospa otofakī taefaxii. Noko katoni afe yorafo nō inō. Epa Nios feta Cristo noko yoiai keskara nō fetsafo Epa Nios kīfixomis. Nō omiskōifikatsaxakī Jesúsnoax omiskōifikatsaxakī naax nō omiskōipakenafo mēra kanakama. Askatamaroko Cristo ika anoxō a feta fetsafo nō ikixii. Nāskakē Jesús keskara shara ikax nō fāsi inimaxii.

Satanās kinifā chaikōi mēranoa kāimayoi anā yorafo pāranō. Ato askafaino koshikōi anā kinifā mēra potaxii anā kāipakexanōma

⁷⁻⁸ Askata mā mil xinia finōano Satanās kinifā fakishifā mēranoa anā kāimayoxii anā maifo tii anoafu ato pārayonō. Askata mā kāixō nā Nios nikakaspaifo maifo tii anoafu ato ichanāfai nā Niospa yorafo ato retemaxii. Ichanākani ichapakōifo. Nā Nios nikakaspamisfo tsōa ato tanātiroma. Gog anoax fekāta, Magog anoax fekāta, ikanax ichanāfo Nios nikakaspamisfo. ⁹ Maifo tii anoafu ato ichanāfaxii Niospa yorafo ikafo anoa ato cheteakenōfo ato retexikakī. Ato askafaifono Epa Niospa afe yorafo noikī ato ifixii. Nā yorafo Satanās ichanāfaa ono nai mēraxō atoki chiifā potano nai fetsekani anā tsoa pishta ninakama. ¹⁰ Akka nā Satanās niafaka chakata yorafo feparamiskōikē Epa Niospa chiifā mēra pota. Nā taefakī nā yoinā pōfe yafi nā ē mato Niosnoa mato yoimisra iki a chanīmis ato mērari Satanās niafaka chaka Epa Niospa pota. Nā tii chiifā mēranoax omiskōikani xatenakafoma.

Jesús chanīmara faafoma ato omiskōimaxii

¹¹ Askata xanifāfe tsaoti oxokōi efapakōi ē òia. Nāno Epa Nios tsoa. Akka mai fe nai anā ano ikama. ¹² Askata ē òia nā xanīfofo fe nā yora afamafori nakanax Epa Nios tsoa ano niafo. Nāno niafono Epa Niospa āfe kirikafo fēpea. Kirika fetsari fēpea. Nā kirikaki nā Ifofamisfo atoki kenea. Akka a Ifofamisfoma atoki keneama. Akka nā kirikanā āfe ane Nīpamisfo. Nā nayoxoma apaonifo keskara kirikafo mēra keyokōi Epa Niospa mā kenenī. Nāskakē nā afara chakafapaonifo keskara atoki kenenō ato ispai tāpinōfo chanīmakōi ato omiskōimaxii. ¹³ Nā āsamisfo fe mai anoax namisfori askatari fetsafori nafiakanax otoyokanima keyokōi namisfo Epa Nios āfe ferotaifi

feafō. Nā chakafamisfo tii Epa Niospa ato omiskōimapakea. ¹⁴ Keyokōi nā Niospa meka nikakaspamisfo Epa Niospa ato chiifā mēra pota. Mā nafianifono iskaratīa afianā ato chiifā mēra potaito ē ōia. Nānoax omiskōikani xatepakenakafoma. ¹⁵ Akka nā kirika āfe ane “Nīpamisfo” a mēra Epa Niospa āto ane kenemisma, nāfo chiifā mēra pota. Nāskara ē ōia Epa Niospa ea ōimanaino a ixiai keskara mai keyoaino.

21

Nai yafi mai fenakōi Epa Niospa onifaxii

¹ Akka nā ēfe namapa ōia keskara Epa Niospa anā ea ōimana. Ē ōia nai yafi mai fenakōi Niospa onifaa. Nā nai yafi mai taefakī onifani yamarisatana. Fakafāri yamarisatana. ² Askano ē ōia Niospa yorafo nāfāfe Jesús Ifo shara famisfo nai mēranoafo Epa Nios ika ariax fotokani. Nāfo ikafo Jerusalén fena ano. Nā Jerusalén fena Nios ika ariax nāmā fotoa nāno ikafo. Fotoaifono ē ōia fāsi sharakōi. Akka kēromā āfe sama sharakōi safetiro itipinīsharaxikī fene fe fianāxiki. Nāskari fakī Epa Niospa nā Jerusalén fena itipinīshara faa sharakōi inō afe yorafo nāno afe nīpaxanōfo. ³ Askano Epa Nios tsaao anoa meka achakōi ē nika. Yoia iskafakī: “¡Aicho! Iskaratīa Epa Nios yorafo fe ixikiki. Ato mēra ixii nāfo afe yorafo inō, nā yora fisti keskara. ⁴ Ato kexesharaxii anā tsoakai omiskōitiroma. Ato noikī oiaifono Epa Niospa ato shināmasharaxii āto fēo tereaxoxii anā shināchakakakima tanaima inimanōfo. Ato kexeaino tsoakai anā natiroma, anārikai manomitsai oiakanima, anārikai paemekanima. Afara chakafo iyopaoni keskarakai anā askanakama,” ixō yoia.

⁵ Askata Niospa āfe tsaoti kamaki tsoaxō yoikī iskafaa: “Ē keyokōi fenafai,” ixō Niospa yoia. “Ēfe meka chanīmakōi. Nāskakē nā mī nikai keskara kenefe,” ixō ea yoia.

⁶ Askaxō anā Niospa ea yoia iskafakī: “Mē aka. Iskaratīa ē yoiyoni keskara mē keyoa. Afara onifataima ē iyopaoni. Afetīara maifo tii keyoai eres fisti ē yoitiro. Ē keyokōi ikinā. Ēfi nīpamiski. Fetsa nōamāikī yoitiro iskafakī: ‘Ē faka fenakōi naxikima,’ ixō yoitiro. Nāskarīfai fetsa ipaisharapaikōikī yoitiro iskafakī: ‘Ēa ē isharatiroma. Ē Nios yopakōi,’ ixō anori yoiaito ē inimakī ifitiro, efe ipaxanō. ⁷ Fētsa ea kachikiri fatamaroko nā naitīa ea Ifofasharaxō nāato keyokōi nā ē mia yoia keskara fixii. Ē kaxpa ināxii. Ē āfe Nios ixii. Akka ēfe fake ixii. ⁸ Akka fetsa ratei eōnoax omiskōikasapakī ea kachikiri faa, askatari fētsa ēfe meka nikakaspamis, fētsari afara chakafo fetsa fetsatapafo xatekaspai, askatari fetsari retemitsamis, fetsari āto āfima chotamis, askatari kēromāri āto fenema chotamamis, fētsari koshōiti tāpiax nā niafaka chakafo fe rafemis, askatari fētsari ea noitamaroko afara fetsa noikī, ‘Na ēfe nioski,’ famis. Nāskakē askarafo fe nā chanīmisfo afokai efe nīpanakafoma. Chiifā mēra nā omiskōipakenakafo mēra ipanakafo. Anoaxkai faki fonakafoma,” ixō Epa Niospa ea yoia.

Jerusalén Fena

⁹ Askata Niospa ājirinī siete kecho keskara mēra afara chakakōi fospia maifo tii ano nachixii ato omiskōimanō fētsa ekeki oxō yoikī iskafaa: “¡Ofel! Ē mia afara sharakōi ōimanō. Akka feronāfāke mā āfiyaxō kexesharatiro. Nāskarīfakī Jesús chanīmara faafo afe yorafo ifia. Ofe. Ē mia ōimanō,” ea faa. ¹⁰⁻¹¹ Askano Niospa Yōshi Sharapa ea ikināino Niospa ājirinī ea machi

efapa keyakōi ano ea iyoa keyokōi ē ōinō. Jesūs chanīmara faafo nā Nios ika anoafo ato chaka soaxona nāfo nai mēranoa Epa Nios ika ariax fotoaifāfe ea ōimana. Na māchifā keyakōi anoxō ea ōimana. Nāfo ika ano āfe ane Jerusalén Fena. A mēra ikafo Jesūs Ifo shara famisfo. Epa Niosri ato fe ika. A ato fe ika ano fakkai fakkais isharai. Tokiri fakkai fakkais ikai keskara sharafinākōia. Nā tokiri āfe ane jaspe fēxta shara, tokiri fetsa āfe ane cristal. Shara fakkai fakkais ikai keskara. ¹² Nā tokiri kenea efapa Jerusalén foake tii fayakena. Nā kene keyakōi doce fepotiya. Nā doce fepoti ano Niospa ājiri niafo kexesharaxikakī. Israel iyopaonito āfe fake doce ipaoni. Nā docefāfe āto fakefo paxkanifo. Nāskakē fepoti tii āto anefo doce kenea. ¹³ Nā kene keya āfe fepoti ichapaya. Xini oaikiri tres ikaino, xini kaikiri tres ikaino, xini kaima anori tres ikaino, xini oaima anori tres ika fepoti ichapaya. ¹⁴ Nā kene keyakōi tokiri doce efapanāfā kamaki kenea. Jesūsnoa yoimisfāfe āto anefo nā tokiri doceki kenea.

¹⁵ Niospa ājirinī nā ea taefakī yoiato, nāato tanati oro tsoma, Jerusalén Fena tanaxii, āfe kene yafi āfe fepoti tanaxiki. Nā tanati tafa chainipa keskarafiax oro ōshi keskara sharakōi. ¹⁶ Nā Jerusalén Fena āfe kene keya senēsharakōi. Āfe chainipa fe āfe xākī nātixō rafe. Āfe keyari nātixori. Niospa inapa tana dos mil dos cientos kilometro āfe chainipa fe, āfe xākī, āfe keyari. ¹⁷ Āfe kenefo keyakōi a akiki kenea sesenta y cuatro metros. Nā Niospa ājiri yorafāfe tanamis keskari fakī nāatori metropa tana.

¹⁸ Nā Jerusalén Fena sharakōi. Nā manishomo fēxta nō ōimis keskara sharafiax ōshi keskara. Nāōxō Epa Niospa Jerusalén Fena onifaa. Askatari a kenea keyakōi nā tokirinī āfe ane jaspe Niospa onifaa. ¹⁹ Tokiri sharakōifo fetsa fetsatapafo Epa Niospa onifaa, nā doce tokiri kamaki nā kene keya tsaoa. Taeyoi jaspeki iyoa. Āfe pefeta zafiroki ika. Āfe pefetari agataki ika, āfe pefetari esmeraldaki ika, ²⁰ āfe pefetari onīceki ika, āfe pefetari cornālināki ika, āfe pefetari crisolitoki ika, āfe pefetari beriloki ika, āfe pefetari topacioki ika, āfe pefetari crisoprasaki ika, āfe pefetari jacintoki ika, āfe pefetari amātistaki ika; nāfo sharakōifoki nā kene Epa Niospa nimainīfōfāni. ²¹ Nā kene keyapa āfe fepotifo perla oxo efapa Niospa onifaa. Nā perla tokiri keskara oxo sharakōi. Nā perla fistiōxō fepoti fisti onifaa. Nāskakē doce fepoti onifaa nā perlaōxō. Nā Jerusalén Fena āfe fai manishomo fēxta sharakōi keskara oke rafe nō ōitiro. Manishomo fēxta keskara sharafiax oro ōshi keskara shara.

²² Akka Epa Nios kīfiti pexefā anoma. Epa Niospa nā afama mīshti fatiroxakī nōko Ifo Jesūs noko fe Jerusalén Fena mēra imisfo. Askatari yorafāfe Epa Nios kīfiti pexefā nā anā yopanakafoma. ²³ Nāskarifakī anā xini yafi oxe yopakanima Epa Nios fe Jesūs ato fe ikano. Epa Nios nāno ato fe ixō ato chaxaxoni. Jesūsri ato askafaxōi ōisharakōinōfo. Anā afaa yopakanima. ²⁴ Mai fetsa anoaxri fōfāsatirofo Epa Niospa ato chāxano. Xanīfofori Jerusalén Fena mēra ikikaxō a aya imisfo afara sharafo ināxikani. ²⁵ Nāno fakishri anā ikima. Fakishpakenakama. Akka anā Jerusalén Fena āfe fepotifo fepopakenakama. ²⁶ Akka fetsafori maifo tii anoax Jerusalén Fena mēra ikikakī a aya imisfo ato afara sharafo ināxikani. ²⁷ Akka afara chaka nā Jerusalén Fena mēra ikitiroma. Nā chaka shināmisfo fe a afara chakafamisfo, a ato pāramisfori afo ikitirofoma. Akka Jesūs āfe kirika mēra āto ane keneano afe ipaxatirofo. Nāfo fisti Jerusalén Fena mēra ikitirofo Jesūs fe ipasharaxikakī.

22

1-2 Askano ěfe namapa ōiai keskara Niospa ājiri fĕtsa ea ōimana afe keskaramāki Nios ika ano. Nios fe Jesús tsoa anoax faka shara fakkai fakkaisai keskara kafani, fai nĕxpakĭa. Afara choshta a mĕra ikitiroma. Nāno ikafāfe nā faka shara ayapaiyaitĭa ayatirofo, nāskakĕ nomipakenakafoma. (Nāskarifiakĭ nāno Niospa noko potapakenakama noko ĭkipakenaka.) Nānori fai nĕxpakĭa ifi nia ika. Faka takai raferi nūi xokoa ika. Nāno ikafāfe nā nūi fimi pipaiyaitĭa pitirofo. Nāskakĕ fonāipanakafoma. Nāskarifiyai Nios nofe ikano nō aŏnoax omiskōitiroma nō nisharapakenaka. Nā ifi oxe tii fimimis. Āfe pei tsasimisma xachoko fena shara ipanaka. Nāskarifiyai nā chanĭmara faafo tii maifo tii anoax Niosnoax meema sharakōi ipanakafo. ³ Nā Jerusalĕn Fena ano Epa Nios fe Jesús nofe ixii. Nō ato fe yorakōixō nō ato noikōixii. Nō āto yonoxomiskōi nō ixii. Atoki fanāisharayanā nō ato yoisharapakenaka. Akka nōko mai xini ano afara chaka fetsa fetsatapafo imis. Akka iskaratĭa nā Jerusalĕn Fena ano afara chaka a mĕra itiroma. ⁴ Nānoax nōko Ifo fe āfe femānāki ōinōnāfāfĭixikani. Āto femānāki āfe ane ato nĕtamana. ⁵ Nōko Ifo Nios ari ikafo ato penafaxōa. Nāskakĕ anā rāpari yafi xini yopatirofoma. Anokai anā fakishima. Nāskax afe xanĭfo ipanakafo.

Jesús chaima oi

⁶ Askata Niospa ājirinĭ anā ea yoia: “Nōko Ifo Niospa āfe Yōshi Sharaōxō a āfe meka yoimisofo āto ōiti mĕraxō ato tāpimamis a afara afeskara ixiai keskara afe yorafori ato tāpimanōfo. Nāskarifiakĭ iskaratĭa āfe ājiri fetsa nĭchia afara afeskara ixiai keskara a yonoxomisofo tii ato tāpimanō. Nā ě mia yoiai keskara chanĭmakōi. Keyokōi ěfe meka mā chanĭmara fatiro,” ixō ea yoia.

⁷ Akka yoikĭ iskafaa nōko Ifo Jesús yoia iskafakĭ: “Ē nai mĕranoax mai ano matoki nokorisai. Nā mĭ ōia a inōpokoai a mĭ nikafori, nāfo mĭ kenetiro. Akka nāfo chanĭmara fakakĭ kachikiri fayamakanax inimakōixikani,” ixō Jesús ea yoia.

⁸ Ĕkĭa Juan ě nika, askatari ě ōia ea Niospa ājirinĭ ōimanaino. Nāskakĕ ě a nāmā feopakekafana ěfe Ifo keskara shināi. Nāskaxō, “Mĭ fāsi sharakōi,” ě fakerana. ⁹ Ĕ askafaito ea yoia iskafakĭ: “Ea askafayamafe. Ĕri mia keskaraki. Mĭ ikaino, Jesús chanĭmara faafo ikaino, āfe meka yoimisofo ikaino, keyokōi nā mĭ rama kenea keskara chanĭmara faafo fe, ěri mato keskara nōko Ifo Nios ě yonoxomis. Akka Epa Nios fisti mĭ Ifofatiro. Nā fisti nāmā mĭ feopakekafatiro,” ea faa.

¹⁰ Askata afianā ea yoia iskafakĭ: “Nā mĭ kenea oneyamafe. Nā mĭ kenea keskara samama askakōi. Nāskakĕ a mĭ kenea keskara keyokōi yorafāfe tāpinōfo. ¹¹ Akka mā Jesús nokoaino nā nikakaspamisfāfe chakafakĭ finakōixikani. Yora chakafamisfāferi nāskari faxikani chakakōi fakakĭ. Akka nā Niospa yoiai keskara amisfāfe nāskarakōi fakakĭ mimakōi faxikani Niospa yoiai keskara akakĭ. Nā Jesús keskara shara imisfo nāfori isharakōixikani āto Ifo ifosharakōifakani,” ixō Niospa ājirinĭ ea yoia.

¹² Nāskaxō Jesús anā yoia iskafakĭ: “Ea nikasharakāfe. Ĕ matoki samama nokorisai. Nokoxō ě mato yoioa keskara ě mato ināsharaxii. Nā afara shara famisfo ě ato shara fata nā afara chakafamisfo ě ato omiskōimaxii. ¹³ Afarafo onifataima ě iyopaoni. Ĕfi nĭpamiskĭ. Ĕ niixatepakenakama. Nā mato mai keyoai eres fisti ě yoitiro,” ixō ea yoia.

14 Anā Jesús yoia iskafakī: “Nō Jerusalén Fena mēra ikixō, nā ifi āfe fimi pipaiyaiṭia nō pitiro. Nāskarifiāi nō Epa Nios fe ikaino ares fisti noko nimapakexatiro. Nā Jesús chanīmara faafo ato chaka soaxona nāfo fisti Epa Niospa ato ikimatiro afe ipaxanōfo. 15 Nāskakē nā yora chakakōi paxta pōfe keskarāfo fe, a koshoiti tāpiafo, nā koshoiti chanīmara faifori, feronāfāke āfe āfima chotamis, kērofāferi āto fenema chotamamisfo, retemitsamisfori, Nioskōima noikī ifofamisfori, chanīmisfori, nā chanī noimisfori, askara yorafokai Jerusalén Fena mēra ikitirofoma.

16 “Ēkīa Jesús, ēfe ājiri matoki nīchia ē mia yoia keskara nā ea Ifofaafo tii ichanāfo anoxō ato tāpimanō. Ēkīa David āfe fena. Ēfi nā fishi efapa penaino ōimisfo keskarakī. Nā fishi ōikī nō tāpitiro mā penaino. Nāskarifiāi mē chaima oaino tāpikanax itipinīsharatirofo Jerusalén Fena mēra efe ipaxakakī,” ixō Jesús ea yoia.

17 Askano Niospa Yōshi Shara feta Jesús afe yorafāferi yoikakī iskafatirofo: “Jesúsiki fekāfe,” ato faifono, fetsafāferi nikakaxō ato yoitirofo: “Jesúsiki fekāfe,” ato fatirofo. Fētsa nōamā ikī faka yopai, faka ano katiro mā ayax anā nōamā itiroma. Nāskarifiāi fētsa āfe chaka xatepai, Jesúsiki otiro Epa Nios fe ipaxakī. Afaa inātama Jesús chanīmara faax, afe ipaxatiro.

Juan mā mekai xatekī Jesús yoiai keskara keneni

18 Ēkīa Juan, afara ixiai keskara ē mato kenexona. Ē mato kenexonai keskara chanīmakōi. Nā meka ē mato yoiai nikasharakāfe. Ē mato kenexona keskara akka fētsa afianā meka fetsa shinākī keneax, na kirika mēra kenea mā ōiai keskara omiskōipakenakafo chanīmakōi Epa Niospa keyokōi nāfo omiskōimaxii. 19 Askatari a afara afeskara ixiai keskara ē kenea fētsa na meka atiri soakē Epa Niospari āfe ane soaxii āfe kirika mēranoa. Nāskakanax nā Jerusalén Fena shara mēra ikitirofoma. Ē kenea keskara soakanax nā Epa Nios afara shara yoiyoni keskara, aya ipanakafoma.

20 Jesús yoia keskara nānori ē mato kenexona. Nāato yoikī iskafaa: “Chanīma, ē matoki samama nokorisai,” ixō yoia. Askapainō. Nōko Ifo Jesús orispainō.

21 Mā Niospa yorafo. Afara afeskara afiaino nōko Ifo Jesús mato noixō mato ōiti mato fēpeaxosharpainō. Askapainōra. Ēri mato fāsi shināi. Nā tii.

Ēkīa Juan